


God-are Jögoru  
I'oho



The New Testament in the Omie language of Papua New Guinea

**God-are Jögoru I'oho**  
**The New Testament in the Omie language of Papua New Guinea**  
**Nupela Testamen long tokples Omie long Niugini**

copyright © 1991 Wycliffe Bible Translators, Inc.

Language: Ömie (Omie)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 18 Apr 2025 from source files dated 31 Aug 2023  
a68769b4-6180-5825-a17e-676d8f6a7efa

## Contents

FRT . . . . .	1
MATTHEW . . . . .	3
MARK . . . . .	78
LUKE . . . . .	125
JOHN . . . . .	205
ACTS . . . . .	261
ROMANS . . . . .	336
1 CORINTHIANS . . . . .	371
2 CORINTHIANS . . . . .	405
GALATIANS . . . . .	427
EPHESIANS . . . . .	441
PHILIPPIANS . . . . .	452
COLOSSIANS . . . . .	460
1 THESSALONIANS . . . . .	468
2 THESSALONIANS . . . . .	475
1 TIMOTHY . . . . .	479
2 TIMOTHY . . . . .	488
TITUS . . . . .	495
PHILEMON . . . . .	499
HEBREWS . . . . .	501
JAMES . . . . .	526
1 PETER . . . . .	535
2 PETER . . . . .	544
1 JOHN . . . . .	550
2 JOHN . . . . .	558
3 JOHN . . . . .	559
JUDE . . . . .	560
REVELATION . . . . .	563
Read the New Testament . . . . .	598

# God-are Jögoru I'oho The New Testament in the Omie language of Papua New Guinea

## Nupela Testamen long tokples Omie long Niugini

### *God-are Jögoru I'oho*

The New Testament in the Omie language of Papua New Guinea  
[aom]

Translation: © 1991 Wycliffe Bible Translators, Inc.

Print publication, 1991 by Bible League International

Web version  
2013, Wycliffe Bible Translators, Inc.  
[www.Wycliffe.org](http://www.Wycliffe.org)

<http://pngscriptures.org>

[www.ScriptureEarth.org](http://www.ScriptureEarth.org)

This translation is made available to you under the terms of the Creative Commons license (Attribution-Noncommercial-No Derivative Works).

<http://creativecommons.org/licenses/by-nc-nd/4.0>

**Your are free to share** — to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

**Notice** — For any reuse or distribution, you must make clear to others the license terms of this work.

### **Tok Orait**

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri.** Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating.** Na tu, **yu no ken senisim Tok.**

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa. Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela.**

Olgeta tok orait na lo long tok ples English i stap long *<http://creativecommons.org/licenses/by-nc-nd/4.0/legalcode>*.

Sapos yu gat askim long dispela, **plis askim mipela.**

**God-are Jögoru I'oho**

## MATTHEW

*Iesuare hijo miono'lo jiobe rovade jöhoje.*

<sup>1</sup> Aveho Iesu Keriso-are hijo miono'lo jiobe rovade jöhoje. Iesu hu David-are uje jiadeje. David hu Abraham-are uje jiadeje.

<sup>2</sup> Abraham hu Isaac-are vavue jiadeje. Isaac hu Jacob-are vavue jiadeje. Jacob hu Judah-are o Judah-are ö ömo'ömo jabesi vavue jiadeje.

<sup>3</sup> Judah hu Perez o Zerah-mesi vavue jiadeje. Jabesi vëmoho Tamar jiadeje. Röhu Perez hu Hezron-are vavue jiadeje. Hezron hu Ram-are vavue jiadeje.

<sup>4</sup> Ram hu Amminadab-are vavue jiadeje. Amminadab hu Nahshon-are vavue jiadeje. Nahshon hu Salmon-are vavue jiadeje.

<sup>5</sup> Salmon hu Boaz-are vavue jiadeje. Boaz-are vëmoho Rahab jiadeje. Röhu Boaz hu Obed-are vavue jiadeje. Obed-are vëmoho Ruth jiadeje. Röhu Obed hu Jesse-are vavue jiadeje.

<sup>6</sup> Jesse hu a böröme David-are vavue jiadeje.

David hu Solomon-are vavue jiadeje. Solomon-are vëmoho Uriah-are dorue jiadeje.

<sup>7</sup> Röhu Solomon hu Rehoboam-are vavue jiadeje. Rehoboam hu Abijah-are vavue jiadeje. Abijah hu Asa-are vavue jiadeje.

<sup>8</sup> Asa hu Jehoshaphat-are vavue jiadeje. Jehoshaphat hu Joram-are vavue jiadeje. Joram hu Uzziah-are vavue jiadeje.

<sup>9</sup> Uzziah hu Jotham-are vavue jiadeje. Jotham hu Ahaz-are vavue jiadeje. Ahaz hu Hezekiah-are vavue jiadeje.

<sup>10</sup> Hezekiah hu Manasseh-are vavue jiadeje. Manasseh hu Amon-are vavue jiadeje. Amon hu Josiah-are vavue jiadeje.

<sup>11</sup> Josiah hu Jechoniah-are o hesi ö ömo'ömo jabesi vavue jiadeje. Evare majare Babylon rajohuro muorovo'i rueromo Israel rajoho tövëvoromo ujuoho va'oromo Babylon rëmæreje.

<sup>12</sup> Tövëvo ujuoho va'oromo Babylon rëmære maja hesi ijore evare Jechoniah hu Shealtiel-are vavue jiadeje. Shealtiel hu Zerubbabel-are vavue jiadeje.

<sup>13</sup> Zerubbabel hu Abiud-are vavue jiadeje. Abiud hu Eliakim-are vavue jiadeje. Eliakim hu Azor-are vavue jiadeje.

<sup>14</sup> Azor hu Zadok-are vavue jiadeje. Zadok hu Achim-are vavue jiadeje. Achim hu Eliud-are vavue jiadeje.

<sup>15</sup> Eliud hu Eleazar-are vavue jiadeje. Eleazar hu Matthan-are vavue jiadeje. Matthan hu Jacob-are vavue jiadeje.

<sup>16</sup> Jacob hu Joseph-are vavue jiadeje. Joseph hu Mary-are barue jiadeje. Mary hu Iesuare vëme jiadeje. Iesuare jöho uvarueje: Böröme namiromo ajamuaje aho höjo.

<sup>17</sup> Iesuare hijo miono'oho ëhi jiobe rovadeje. Abraham bëhoho jioromo hesi ujo ömo'ömo jiobe rovadoho ro David-arire ë vituoho jioromo bëhohu'lo ujohu'lo aho'obëhe 14 jiadeje. O David bëhoho jioromo hesi ujo ömo'ömo jiobe rovadoho ro Israel rajo tövëvoromo Babylon ujuoho va'are majare ë vituoho jioromo bëhohu'lo ujohu'lo aho'obëhe 14 jiadeje. O Israel rajo tövëvoromo ujuoho va'are majare jioromo ujo ömo'ömo jiobe ruejuvo böröme namiromo ajamuaje a rahade majare ë vituoho jioromo ujoho aho'obëhe 14 jiadeje.

*Iesu rahade jöhoje.*

<sup>18</sup> Röhu Iesu Keriso rahadoho aviëhije. Hesi vëme Mary'o Joseph'o masurovo'iröhëro uarovoromo arijareje. Bogo masurovoromo gemuoroho arijë'e Mary-ro gavadeje God-are Aru'ahohuro uje bojamijë'ëro hu dë'e jiamu.

<sup>19</sup> Hesi aemo'aeme Joseph-ro gavade hu dë'e jiamu gagorovo jögoru ejaje aëro jië'ëro Mary nugö'ö'i uehorovadeje. Röhu Mary a nunire javoji bojami'iröhoho bijönimamu uvadeje: Iae na saginiëri ëhi ë'ejöjo.

<sup>20</sup> Ëhi uehorovojuvo nia'ovoro gavadeje Badare aneraëro rueromo uavavamu: David-are hije Joseph jaehu Mary masu'iranoho nadi juhuonivonëjo. Ëhesi bëhoho bogo aho ujoho bojami'i hesi God-are Aru'ahëro bojamamu dë'iraejë'e höjo.

<sup>21</sup> Harihoho rahego hesi ihoho Iesu jumuvonëjo rabëni huro hesi aribövi jabesi sisëho mu'uvëhoromo maro rëmo'ië'e jiaje.

<sup>22</sup> Röhu ë mue aho'o rovade hesi bëhoho ëhuro Badahu hesi jö majëhijaje a uavamu jajivadëhi ëhi jioröhego.

<sup>23</sup> Jajivoromo ëhi uvadeje: Aboridohuro dë'iraeromo harihe raho'a'ajëjo. Raho'iramu aëro hesi ihoho Emmanuel jumuvo'aruëjo. Emmanuel ë iho hesi bëhoho God-hu no'o jiaje jöhoje.

<sup>24</sup> Amo Joseph-ro niavë'ëro ri'öromo Badare anera hesi jöho ejahoromo hesi magonahoho masuvadeje.

<sup>25</sup> Masuromo röhu bogo hu'ocho gemuoroho niavadeje u'emu harihoho rahego niavo'iröhëro. Amo harihoho rahamu Iesu jumuvadeje.

## 2

### *Sa'a gö rajo ariböviehu Iesu rajahi'i rovere jöhoje.*

<sup>1</sup> Iae Iesu Bethlehem amore Judea sa'are ë rahadeje Herod sa'a a böröme jiadevare. Rahamu iae jiji adaho'amarue a masijohuro aruhe sa'a göre jioromo rovaroho ro Jerusalem amore suorovareje.

<sup>2</sup> Suorovoromo uëvareje: Jew rajo jemesi sa'a a böröme jioröhego rahade aharihoho dinö'e höjo. No aruhe sa'a göre raromoromo gavare hesi jijoho rojomamu garomo hu rajahi'i rovere höjo.

<sup>3</sup> Ejöho heromo Herod sa'a a börömohuro dë sisërëromo uehore gö gö baejadeje Jerusalem amo rajo a ioro'iorohu'o.

<sup>4</sup> Uehore gö gö baeromo huro Jew rajo priest masijohu'o jabesi jögoru öri röjëhijarue ariböviohu'o uëvamu gemuoro gagovoruomadeje. Gagovamu uëvadeje: Böröme namiromo ajëmi'iröhe aho hu dinö'e raho'a'ajëjo.

<sup>5</sup> Uavareje: Bethlehem amore Judea sa'are ë raho'a'ajëjo. Mami'e jö God-aro baeromo majëhinövade ahuro ëhi jajivoromo uvë'e höjo:

<sup>6</sup> Bethlehem ja Judea sa'are javajoho Judea sa'are a masijo jabesi nuniroho jasi ihoho bogo bise'ocho jio'a'ajëjo. Jasirire jioromo a böröme rue'a'ajëjo. Rueromo nasi aribövie Israel rajoho muebejëvo'ajëjo.

<sup>7</sup> Ëhi majahijamu hegorovo Herod-ro ë sa'a gö rajo a masijohuro ruejëro saginiëri jöe nugö'öromo uëvadeje: Ejijoho maja raburo aevoromo rojomamu gavarije höjo. Nadi ruëroho numëroho ue'i majaho ma-gemu uevego na hejëjo.

<sup>8</sup> Majaho uavamu henugoromo uëvadeje: Rue Bethlehem amoro va'irarijoho aharihoho avoho nahobe jijihorëjo. Birohogoro rueromo dinö'e jiajoho uerego na he'iröjo na'o ë va'oromo hu rajahi'irode.

<sup>9</sup> Ëhi uëvamu hegoro va'areje. Örire va'ihö gavareje mami'e ruhe sa'a göre gavare jije gemuoho jabesi nuninö urimo va'amu. Jijohuro urimo va'adoho va'o aharihehu hijajire ë hesi simano bure namijadeje.

<sup>10</sup> Namijamu ganugoromo bogo bise'o vadu'oho nimorohareje.

<sup>11</sup> Nimorohoromo ë osare rumo va'oromo gavareje aharihoho hesi vëme Mary'o ë hijamu. Garomo sa'are ague aho raromoromo hu rajahijareje. Rajahiromo inömo inömoho jiovoromo suvuore bamahareje. Gold o ridi'e inöme niö'i göho frankincense göho myrrh ëhi i'imamareje.

<sup>12</sup> I'imamë'ëro nia'ovonö'e hejare God-ro uëvamu: Bogave Herod-are öriroho vuonorö'ö va'irarijë uëvamu hegorovo vuonorö'öromo öri gönö jabesi sa'are va'areje.

*Joseph-hu Mary'o Iesu'o hu'iraejëvoromo ju'ebiromo Egypt sa'are va'are jöhoje.*

<sup>13</sup> Va'amu Joseph-ro nia'ovoro gavadeje Badare aneraëro rovamu. Aneraëro rueromo uavavamu: Ri'ö aharihohu'o hesi vëmohu'o hu'iraejëvoromo ju'ebiromo Egypt sa'aro va'ëjo. Va'o ëhuro jionëjo hujeji naro uavego rue'irane ë hesi bëhoho Herod-ro aharihoho ano'i naho'ië'e jiaje.

<sup>14</sup> Ëhi uavamu hegorovo Joseph-ro ri'öromo jabumë hu'iraejëvoromo vahi'e ë amoho vuonugo'i Egypt va'adeje.

<sup>15</sup> Egypt va'oromo ë hijuvo hejade uavavamu: Herod guomë'e hö uavamu hegoro rovadeje. Ëmue aho'o rovade hesi bëhoho urimë'i Badahu uavamu hesi jö majëhinövade aehu jajivadëhi ëhi jioröhego. Badahu uavade jöho hesi surire jajivoromo ëhi uvë'eje: Nasi Harihoho uvamu Egypt jioromo rovë'e höjo.

*Asisö'o inino bijuëmare jöhoje.*

<sup>16</sup> Ëhi ë'areje röhu ë hesi urimoho Herod-ro gavade sa'a gö rajo masijoho bogo vejö'oho rueruomamu gagorovo uvadeje: Sareremijare höromo dë vörönimo avohadeje. Dë vörönimamu hesi aribövioho jöe bojëmiromo uëvadeje: Bethlehem-nö va'oromo asisö'o ininoho aho'o bijuëmorëjo. Magonahoho nadi vadune niö'i iosiramë'oho nadi a'i asisö'o ioro'ioroho aho'o bijuëmo barërejo. Mami'e sa'a gö rajohuro jije rojomamu gavare majaho uavamu hejë'ëro ëhuni vadune niö'i bogo iosiramijë'e asisö'oho bijuëmoröhego uëvadeje. Uëvamu iae va'oromo bijuëmoruomadeje.

<sup>17</sup> Bijuëmamu ëhuro mami'e jö God-aro baeromo majëhinövade ae Jeremiah-hu uëvadëhi ëhi jiadeje.

<sup>18</sup> Jeremiah-ro ëhi uëvadeje:

No hejaruëjo Ramah amore uvavo'ego.

Hara'uoromo nivavo'ego.

Rachel-ro hesi ujo ömo'ömohuni nivavajëjo.

Hesi ujoho barëjahë'ëro aehu sanuamaruoho bogo ejajëjo.

*Iesumëhu Egypt jioromo vuonorö'ö rovere jöhoje.*

<sup>19</sup> Herod guomamu Joseph-ro Egypt hiromo nia'ovo'iraeromo gavadeje Badare aneraëro rueromo

<sup>20</sup> uavamu: Ri'öromo aharihohu'o hesi vëmohu'o hu'irae ömëvoromo Israel sa'aro vuonorö'ö va'ëjo aharihu ano'i uehorovare aribövioho mami'e vuovë'e jiaje.

<sup>21</sup> Ëhi majahijamu hegorovo Joseph-ro ri'öromo aharihohu'o vëmohu'o hu'irae ömëvoromo Israel sa'are vuonorö'ö rovadeje.



<sup>22</sup> Rueromo hejade uvavamu: Archelaus-ro hesi vavue Herod-are sionoho baeromo bövie namiromo Judea sa'aho muebejaje hö uvamu hegoroovo juhuonivoromo ë sa'aroho bogo hijadeje. A'i nia'ovo'iraeromo hejade God-arire jöe rueromo majahijamu hegoroovo Galilee sa'are va'adeje.

<sup>23</sup> Galilee sa'are va'oromo amo ihe Nazareth ë hijadeje. Nazareth hijade hesi bëhoho urimë'i jö God-aro baeromo majëhinövare ariböviohuro God-are surire jajivarëhi ëhi jioröhego. Jajivoromo ëhi uvareje: Aëro hesi jöho atoromo uvo'a'aruëjo: Hu Nazareth raje ae höjo.

### 3

#### *Bapataeto vaejaje ae John-hu ëhi ë'ade jöhoje.*

<sup>1</sup> Ëhi'amu John a bapataeto vaejëvaje ahuro Judea sa'a a rumo'ere Jordan jovo riröre hiromo jöho majëhinövadeje.

<sup>2</sup> Majëhiromo uënövadeje: Uehoro sisëho vuonugo'i uehoro mae baehëjo. Jemë iae ga'ië'arujëjo God-ro böröme namiromo muebejëvego. Ëhi majëhinövadeje.

<sup>3</sup> Ëaho John hesi jöho God-ro mami'e uavamu hesi jö baeromo majëhinövade ae Isaiah-ro God-are surire jajivoromo ëhi uvë'eje: Aëro a rumo'e sa'are hiromo ma-darugo'o uvo'a'ajëjo: Badahu rueröhe öroho avohorego hu maro rue'irajo. Hesi öroho ahorirëro vajivorego hu maro juvo'irajo. John-hu ë'iröhe jöho mami'e ëhi jajivoromo uvë'eje.

<sup>4</sup> Ëhi jajivoromo uvë'ëro ë aho John-ro camel mi uehu avoho'amë'e niögu sisëho ruohoromo mi sinehu avohë'e götaho dë'ahore ba'amonövadeje. O hesi ioho hu guajugujue vuome ëhi ibe juvonövadeje.

<sup>5</sup> Ëhi'ego Jerusalem amo rajoho Judea sa'a ioro'iorore raromarue aribövioho Jordan jovo bëhinö dinö'e dinö'e raromarue aribövioho ëho jaburo rueruomonövadeje.

<sup>6</sup> Rueromo jabesi sisëho huruoho'ego John-ro Jordan jovore bapataeto vaejëvonövadeje.

<sup>7</sup> Ëhi'oromo John-ro gavade Pharisee ariböviohu'o Sadducee ariböviohu'o aho'obëhe huro bapataeto vaejëvojöro rueruomamu gëgoroovo uëvadeje: Sigobu aboji harihu'e jëvanovajëjo. Jemë raro uëvade höjo: God-are vöröehu rue'iröhire jioromo huruomoromo manö va'irarijoho eni jëvo'ajëjo.

<sup>8</sup> Bogajo. Ijehu bajo mae raejajëhi ëhi mu mae vaerego no garomo uvo'irarëjo: Iae jemë uehoro sisëho vuonugo'i uehoro mae baejë'e jëvajëjo.

<sup>9</sup> Röhu nadi uvorëjo: Abraham nosi bëhohuro jï'ëro ëhu'ëro no mae javuajëjo. Naro jemë uëvajëjo: Jemë Abraham-are ujo ömo'ömo jëvajoho ëho ma-bise'e höjo. God-ro nimo'ibejajo ave munëho ujuohoromo avohëvego araeromo Abraham-are ujo ömo'ömoho jio'amo'ibejajo. Ëhuni nadi nimorohë'ioho ëhioho atorëjo.

<sup>10</sup> Röhu tonëro ijoho bëhi'o huo'ö'ië'ajëjo. Di ijohuro bajoho bogo ma raejë'e jiego huo'öromo vëniro huo'ië'ajëjo.

<sup>11</sup> Naro jovëremu bapataeto vaejëvaje höjo aëro garuomoröhego jemë öri sisëho vuonugo'i aevoromo öri mare jijihë'e jëvego. Röhu ae gö nasi ijönö rue'ië'ajëjo. Huro na iosiremiromo börömoho höjo. Naehu hesi mu bise'o vaejahoromo höru sino ujuohahoromo hesi ijore va'ibejodoho o mu bise'o bise'e rabe vaejaho'ibejodoho röhu na ma-bise'e jevajëjo. Ëahuro God-are Aru'ahohuro o vënëro bapataeto vaejëvo'ajëjo.

<sup>12</sup> Hesi ijo garanoho övore höjo. Ijo garanoho övore jië'ëro ioho tevoromo döro hijiohijiovoromo mevoromo i maho gagovoromo hesi iruno'e osare ë avoho bahi'i subueho sinoho ravemu ravaje vënire huo'a'ajëjo.

*John-hu Iesu bapataeto vaejade jöhoje.*

<sup>13</sup> Ëhi'amu Iesuro Galilee sa'are jioromo abuejadoho abo Jordan jovore höröjadeje John-ro hu bapataeto vaejöro.

<sup>14</sup> Rovamu gagorovo John-ro nijio'iraeromo uavadeje: O-ajo. Jero na bapataeto vaejevo'ibejanëjo iae mae jio'ibejajo. Röhu jero rabëni nasi öriroho rovane höjo naro ja bapataeto vaejavöjöro.

<sup>15</sup> Ëhi uavamu hegorovo Iesuro uavadeje: Bogajo. Avevejö'e naehu uavajëhi ëhi ë'ëjo. Ëhi ë'ë'o'ho ëhuro God-hu nimaje muoho vae'ëjarëjo. God-hu nimaje mu noehu vae barëjë'o'ho iae mae höjo. Iae mae höjamu hegorovo John-ro ejahadeje.

<sup>16</sup> Bapataeto vaejamu gagorovo Iesuro jovore jioromo rojo ionire nami-jadeje. Namijamu ö'idöho arorovadeje. Arorovamu Iesuro gavadeje God-are Aru'ahë guaho va'ënohuro ruvebiromu hesirire gerejamu.

<sup>17</sup> Ëhi'amu ae aho'obëhe hejareje ö'idöre uvavamu: Ave aho nasi Harihu mabëhe höjo. Na hu garomo ëhuro nasi dë vövöbajo'o'ho nimorohevajëjo.

## 4

*Iesuhu mu sisë vaejöro Satan-hu bijioho gavade jöhoje.*

<sup>1</sup> Iae Satan-ro Iesure dëre bijioho garöhego God-are Aru'ahëro uavamu Iesuro a rumo'e sa'a göre ajiomadeje.

<sup>2</sup> Ajiomoromo ioho bogo ijë'e majae vahie ma-hibe va'amu majae aho'obëhe 40 barëjadeje. Majae aho'obëhe 40 barëjamu vadunëro hömadeje.

<sup>3</sup> Hömamu dëre bijahuaje ahuro rueromo uavadeje: Ja God-are Harihe javë'o'ho ave munëho uëvego irae'amajo.

<sup>4</sup> Irae'amajamu ruehuro uavadeje: Röhu God-are jöho jajivoromo ëhi uvë'e höjo: Aehu iemu uehorovë'o'ho bogo maho raromo'aruëjo. A'i God-hu jöe aho'o jövajohuro ëhuro mae raromo'aruëjo.

<sup>5</sup> Ëhi'amu Satan-ro Iesu hu'irae baeromo God-are amo ihe Jerusalem ajiomoromo ajio ruhe God-are osa börömo hesi dëre ba'ojio ë nugamu namijadeje.

<sup>6</sup> Namijamu Satan-ro uavadeje: Ja God-are Harihe javë'o'ho jörö'örovëjo. Ëhesi bëhoho God-are surire jöho ëhi uvë'e höjo: God-ro hesi aneraho uë'iramu ja muebejavö'aruëjo. O hesi surire jö göho ëhi uvë'e höjo: Aner-aho jaburo övore ma'enagonövo'aruëjo jasi hörure munëro bibejavöjöëni. Ëhuni jörö'örovëjo.

<sup>7</sup> Jörö'örovëjamu uavadeje: Röhu ave God-are surire jöhu'o ëhi uvë'e höjo: Nadi ri'öromo Bada jasi God hesi dëho ëma bijiohoromo uanëjo: God jero ëhi ëhi ë'ëjo.

<sup>8</sup> Ëhi uavamu Satan-ro Iesu hu'irae baeromo dahoru ëgobövire ajiomadeje. Ajiomoromo a masijehu dinö'e dinö'e raromoromo muebe'amarue öri ari'o'ho sa'ae inömo inöme bövie bise'e ma-mabëhe jië'ego aehu muebe'amaruoho ëho röjahi barëjadeje.

<sup>9</sup> Röjahiromu uavadeje: Ëbövioho bise'o'ho aho'o jasi örire bojami'ejöjo. Jaehu ague ahoromo na rajehijë'o'ho iae na bojami'ejöjo.

<sup>10</sup> Bojamilejōjamu ruehuro uavadeje: Satan va'ëjo. God-are surire jōho uv'e hōjo: Bada jasi God gemu rajahiromo hesi muohemu gemu vaejahonējo.

<sup>11</sup> Ëhi uavamu Satan-ro va'adeje. Va'amu aneraëro rueromo Iesu ajami-jareje.

*Iesuhu Galilee sa'are hiromo aevoromo hesi mu vaejade jōhoje.*

<sup>12</sup> Ëhi'amu Iesuro hejade uavavamu: John bapataeto vaejavuaje aho aëro guduamo bava'oromo savoji gagore ba'amë'e hōjamu hegorovo Galilee sa'are ajiomadeje.

<sup>13</sup> Ajiomoromo Nazareth amore hiromo ëho vuonugo'i abueromo Capernaum amore hijadeje. Capernaum amoho jovo e'u riröreje Zebulun rajo Naphtali rajo jabesi öri ari'ere.

<sup>14</sup> Iesuhu ë sa'are hijade hesi bëhoho God-hu uavamu hesi jö baeromo majëhinövade ae Isaiah-hu jajivadëhi ëhi jioröhego. Isaiah-ro God-are surire jajivoromo ëhi uvadeje:

<sup>15</sup> Zebulun rajo Naphtali rajo jabesi sa'aho

jovo bërömore va'arue öroho Jordan ioro'ioro göre sa'aho

ë sa'are Jew rajoho bogo a'i sa'a ioro'ioro rajehu ë Galilee sa'are raro-maruoho

<sup>16</sup> ë aribövioho ramoramo'ere raromarue hōjo.

U'emu aji mabëhe iae garuomo'ajëjo.

Jaruvoho ramoramo'ero vuovo öriro jijiharue hōjo.

U'emu ajoho rueromo jabesi örire ajivëvo'ajëjo.

Iesuhu ëhi ë'iröhego God-are surire jö jajivadëhi Iesuro ëhi Galilee sa'are hiromo ajoho barovadeje.

<sup>17</sup> Iesuro ajoho barueromo aevoromo jōho majëhiromo uënövadeje: Uehoro sisëho vuonugo'i uehoro mae baehëjo. Jemë iae ga'ië'arujëjo God-ro bëröme namiromo muebejëvego.

*Iesuhu uëvamu visu suovarue ae 4 jabuhu aevoromo hesi ijore ijore jijihare jōhoje.*

<sup>18</sup> Ëhi'oromo iae Iesuro Galilee e'u riröre juvadeje. Juvo'i gavadeje Simon hesi iho göho Peter'o Andrew'o ö'o ö'o visue suovarue aëro jëvë'ëro viöho jovore ba'amamu.

<sup>19</sup> Viöho jovore ba'amamu gëgorovo uëvadeje: Nasi ijoro ijoro ruehëjo naro röjëhijego jemëro bogo visuoho gagovo'i a'i ae magonahe gagovëvego nasinö jioruomo'iröhe hōjo.

<sup>20</sup> Ëhi uëvamu hejë'i jaburo viöho ëhi vuonugo'i aevoromo hesi ijore ijore jirehonövareje.

<sup>21</sup> Ëhi'amu Iesuro va'i gavadeje ae gö ö'o ö'o James'o John'o Zebedee-are harihe niö'i boat gagore jabesi vavuohu'o gemuore arijamu. Ariromo jabesi viöho sigohijamu gëgorovo uvëvadeje: Ruehëjo.

<sup>22</sup> Ruehëjamu hejë'i jaburo boat-ohu'o jabesi vavuohu'o ë vuonugo'i aevoromo Iesure ijore ijore jirehonövareje.

*Iesuhu hesi jö majëhibe a ajëmibe juvade jōhoje.*

<sup>23</sup> Ëhi'amu Iesuro God rajahijarue osare osare God-are jö bëhoho röjëhibe God-hu bëröme namiromo ae muebejëvo'iröhe jö maho majëhibe guomo guome gö gö baejë'e aribövioho avohëvobe ëhi'obe Galilee sa'ae bövioho juvo barëjadeje.

24 Ëhi'obe juvamu huhu ëhi ë'ade jöho hebe va'adoho Syria sa'are raromarue aribövioho jabu'o ë jöho hebe va'oruomadeje. Hebe va'oromo aëro guomo guome gö gö vi'ehe gö gö baejë'e aribövioho Satan-are ariböviehu dëre abue'amë'e aribövioho simano sisërëjë'e aribövioho övo hörü vuovëhë'e aribövioho ëhi jië'e aribövioho ujuohoromo jabesi sa'are jioromo ruenövareje. Ujuoho rue'ego Iesuro ajëmi'ego marëjëvonövadeje.

25 Ae aho'obëhe ave Galilee sa'are jioromo aruhe Amo 10 Jio'amaje Sa'are jioromo arue Jerusalem amo börömore Judea sa'a ioro'iorore jioromo aruhe Jordan jovo ionü gönö jioromo ë ro tagavoromo Iesu rihromonövareje.

## 5

### *Iesuhu dahorure hiromo a jö majëhijadohoje.*

1 Rihromamu Iesuro gavade ae aho'obëhe tagavoromo raromamu gagoro dahorure ajiomadeje. Ajiomoromo sa'are hijadeje. Hijamu hesi ijore ijore jijiharue ariböviohuro rovamu gëgorovo

2 aevoromo jöho rjëhiromo uëvadeje:

### *Huë mae jioruomaje aribövi jabesi jöhoje.*

3 Ae rahu uvë'o: No bogo eni javuë'ëro hesi God-ro ajamuijaje hö uvë'o ho huë mae jioruomaje höjo

God-ro muebejëvego hesi aharire mae raromo'ië'ëro.

4 Huë vavaeni baejarue aribövioho huë mae jioruomaje höjo

God-ro huë sanue bojëmi'ië'ego.

5 Ma-taemo raromarue aribövioho huë mae jioruomaje höjo

God-hu uëvade bövioho bise'o ho bae'ië'ëro.

6 God-are mu maemu ga'i nimo avoharue aribövioho huë mae jioruomaje höjo

God-ro mu maho nugö'öjëhego jabesi dë vövöbajo'o ho mae jëvo'ië'ego.

7 Ae göëni vavaenimarue aribövioho huë mae jioruomaje höjo

God-ro jabesi jöëni vavaenimo'ië'ego.

8 Dë vövöbajo'o ma-maemu jiaruho huë mae jioruomaje höjo

God ga'ië'ëro.

9 Muorovo öri tugoho'i huë baerovarue öri jiovarue aribövioho huë mae jioruomaje höjo

God-ro uvo'ië'ego: Jabumë nasi aboji harihu'e hö uvo'ië'ego.

10 Mu mae vaejego aehu ma-jabu gemu i'u bojëmego baejaruho huë mae jioruomaje höjo

God-ro muebejëvego hesi aharire mae raromo'ië'ëro.

11 Jemëhu na uehorovevamu aehu sivëgoromo mu sisë vaejëvoromo ae sarerëmiromo jemesi jö sisë gö gö ëma atë'o ho huë mae jëvaje höjo.

12 Dë sasohoromo nimoro avohorëjo ë hesi bëhoho God-hu suvuro jemëni ö'idöre bamëhajoho böröme jië'e jiaje. Urimo jö God-aro baeromo majëhinövare aribövi jabesi örire jabu'o aëro ëhi gemuho sisë vaejëvonövare höjo.

### *Sö'o iro'o jabesi uhu jöhoje.*

13 Söehu rumorovego i marëjajëhi jemëro sa'are aribövioho ëhi ajëmego mae jioruomaje höjo. Jemëhu ëhi sönö'e ajëmijarujoho sö hesi rihu barëjë'o ho diehi'oromo röhu maho avohojöëni sisëgo ruruhö'öjarue höjo. Ruruhö'öromo ë döre jijiharue höjo.

<sup>14</sup> O irehu ajivego gavaruëhi jemë sa'are aribövioho ëhi ajivëvo'irarijoho jëvájëjo. Ame hojire jië'oho bogo gurihiroho jëvo'i ma-va'orahoro jëvo'ajëjo.

<sup>15</sup> O iro buno'iraejë'iroho hevö gagoroho bogo gurihi'i ma-va'orahoro bamo'anuejo ae aho'obëhe ë osare raromaruoho ajivëvo'iröhego.

<sup>16</sup> Èhesi bëhoho jemëro jemesi aji muoho ma-va'orahoro vaejeho aëro ë garomo jemesi Vavue ö'idöre hijajoho rajahiruomoi'irajo.

*Moses o jö God-aro baeromo majëhinövare a ioro'ioro ë aribövi jabesi jögoru Iesuhu ejego marë barë'iröhohuni ëhuni rovade jöhoje.*

<sup>17</sup> Röhu jö göho nadi uvorëjo: Naehu rovode hesi bëhoho Moses-hu bojamuade jögorohu'o jö God-aro baeromo majahuinövare a ioro'ioro jabesi jöhu'o Iesu naehu mu'u'irodoho höjo. Na bogo ëhunioho rovode höjo. A'i ë ariböviehu jajivare jöe aho'o naehu ejego marë barë'iröhohuni ëhuni rovode höjo.

<sup>18</sup> Ave jöho na jö mae uë'ië'ajëjo. Ö'idö'o sa'a'o biririvoromo jiohe va'iröhoho Moses-are jögoroho bogo iaroho bisemu vadu'oho sisërë'i jöe aho'obëhe ë hesi muoho marë barë'ajëjo.

<sup>19</sup> Èhuni ae rahu Moses-are jögoru masijohu'o inino mahu'o ahë'oho o ae göehu ahoröhego röjëhijë'oho ëhi jië'e a hesi ihoho God-are öri ari'eroho bogojio'ajëjo. A'i ae rahu Moses-are jögoru ejë'oho o ae göehu eröhego röjëhijë'oho ëhi jië'e a hesi ihoho God-are öri ari'ere böröme jio'a'ajëjo.

<sup>20</sup> Èhuni naro jemë uëvájëjo: God-are jögoru öri röjëhijarue ariböviohu'o Pharisee ariböviohu'o jaburo Moses-are jöho ma'enarue höjo. Röhu jemëhu ë aribövi bogo iosirëmiromo God-hu nimaje mu bogo uhohu'o vaejë'oho God-are öri ari'eroho bogo mae bogo va'a'arujëjo.

*Bogo dë vörönimo'iröhe jöhoje.*

<sup>21</sup> Jemë hejarije höjo uvavamu: Aëro a mamioho ëhi uëvare höjo: Nadi aho anonëjo. Jaehu a anë'oho aëro ja guduamavoromo court-ro baejavo va'a'aruëjo. Èhi uvamu hejarije höjo.

<sup>22</sup> Röhu naro uëvájëjo: Ae rahu jaehu ae gö hesi örire dë vörönimë'oho aëro guduamavoromo court-ro baejavo va'o hesi höjo. O ae rahu jaehu jasi aemo'aemo sivoromo uavë'oho: Ja uehore bogojië'e ae javajë uavë'oho aëro guduamavoromo council masijo jabesi nunire baejavo va'o hesi höjo. O ae rahu jaehu ae gö agoromo uavë'oho: Ja simano bogojië'e ae javajë uavë'oho ëhuro ja vëni örire va'o hesi javajëjo.

<sup>23</sup> Èhuni jasi suvuro God-are maratuore bamahö'i ë namiromo uehorovoromo uvë'oho: O nasi aemo'aemohuro nasi jö sisëho uehorovaje hö uvë'oho

<sup>24</sup> suvuroho maratu nuninö ëhuro bamo nugo'irögoro urimo va'oromo jasi aemo'aemohu'o sanuamirovoromo evare ijönö vuonorö'ö rueromo God-are öroro suvuroho bamahonëjo.

<sup>25</sup> Aehu jasi jö sisë hesirire jië'ero ja baejavoromo court-re va'ië'iroho jemë niö'iro örire va'arujevero jero ma-burëro sanu'e jöho majahinëjo. Sanu'e jö bogo majahijë'oho huro court gavaje a hesi övore bojami'ajëjo. Bojami'iramu court gavaje ahuro police bojami'iramu savoji gagore ba'amavo'iramu ë hi'a'anuejo.

<sup>26</sup> Èhi ma-hiemu hijuvo bojami'irane monioho aho'obëhe bojami barë'anuejo. Iae na mae uëvájëjo.

*Bogo goho'amo'iröhe jöhoje.*

27 Jemë hejarije höjo uvavamu: Urimo ëhi uëvare höjo: Nadi goho'amonëjo.

28 Ëhi uvamu hejarije höjo. Röhu naro uëvajëjo: Ae rahu magonaho garomo goho'amo'ië'ohuro ëhuro hesi simanore goho'amë'e höjo.

29 Ëhuni jasi övo manörire nunehu mu sisë garomo ëhuro God uehorovanue mu vuonugo'ië'iroho nunoho jahoromo bu'önëjo. Inöme gemu boremi'öjë'oho ma-jianovo'i jasi sine aho'o vënire va'ë'oho ëho sisë höjo.

30 Jasi övo manöhuro mu sisë vaeromo God uehorovanue mu vuonugo'ië'iroho tarioromo bu'önëjo. Inöme gemu boremi'öjë'oho ma-jianovo'i jasi sine aho'o vënire va'ë'oho ëho sisë höjo.

*Bogo vaboro nugö'ö'iröhe jöhoje.*

31 Röhu ave jöhu'o uövuë'e höjo: Vaboro nugö'ö'ië'iroho suroro jajivoromo vaboroho bojamiromo evaro nugö'önëjo. Ëhi uövuë'e höjo.

32 Röhu naro uëvajëjo: Vaboroho bogo ma-juvë'e baruehu ëma nugö'öjë'oho ëho huro magonaho hesi örire mu sisë vaejaje höjo. Ëhu'ëro ë magonahohuro ae gö masuvë'oho bogo maho masu'i ëho goho'amarue muoho vae'a'ajëjo. O ae göehu nugö'öjade magonaho masuvë'oho goho'amarue muoho vae'a'ajëjo.

*God-are öri ari'o iho o inömo iho bogo uvoromo darugo'e jö jövo'iröhe jöhoje.*

33 Jemë hejarije höjo uvavamu: Aëro a mamioho ëhi uëvare höjo: Darugo'e jö jövoromo mu vae'i mae uavë'oho nadi ahonëjo. A'i diehi vae'i uavanëhi ëhi Badare nunoro vaenëjo. Ëhi uvamu hejarije höjo.

34 Röhu naro uëvajëjo: Mu vae'i mae uavë'oho nadi darugo'e jöho jövo'i ma-ahorirëro uanëjo. Nadi ö'idö ihoho uvoromo darugo'oho jövonëjo God hu böröme jioromo ë hijaje jiaje.

35 Nadi ave sa'a ihoho uvoromo darugo'oho jövonëjo God-ro hesi höroho ë bamoromo hijaje jiaje. Jerusalem amo ihoho nadi uvoromo darugo'oho jövonëjo böröme namijaje a hesi ame jiaje.

36 Jasi simano ihoho nadi uvoromo darugo'oho jövonëjo. Simano si'öre gemu namijöro uvë'oho o simano ue rövë'e gemu namijöro uvë'oho ja bogo mae bogo eni javo'ajëjo.

37 Ëhuni nadi simano ihoho uvo'irögoro ae ma-uërëjo: Iae na ë'ejöjo. O bogo ë'ejöjo. Jöe ruëre numëre ëma jövä'oho ëho hesi Satan-are jöho höjo.

*I'u bogo mana bojami'iröhe jöhoje.*

38 Jemë hejarije höjo uvavamu: Urimo ëhi uëvare höjo: Ae göehu gö hesi nune gemu bijioho hisivë'oho mana nune gemu bijioho hisivahonëjo. Ae göehu gö hesi ane gemu bu'uvë'oho mana ane gemu bu'uvahonëjo.

39 Röhu naro uëvajëjo: Aehu sisë vaejavë'oho nadi nijio'iraerovonëjo. A'iro aehu a'isabi övo manörire anagë'iroho huotorovego a'isabi gönöhu'o anago'irajo.

40 Aehu jasi niögu bae'i court-re baejavo va'ië'iroho jasi döre ba'amanue niögohu'o bojamego bae'irajo.

41 Rome muorovo'e aehu uavë'oho: Ma-burëro ri'öromomo nasi inömo baejago va'oromo ëhuro bamë uavë'oho jero huë baeromo ajamiromo bamojöro uavade röhoho iosiramiro mo va'o numori'o bamahonëjo.

42 Aehu jasi örire böviëni biselëni ëninamë'oho bojaminëjo. Ma-jahuri bae'i nimë'oho nadi nijio'iraenëjo.

*Nu huodaguarue aribövi huë baejëvo'iröhe jöhoje.*

<sup>43</sup> Jemë hejarije höjo uvavamu: Urimo ëhi uëvare höjo: Jasi ae gemuoho huë baenëjo. Ja'lo muorovaje aho nue huodivonëjo.

<sup>44</sup> Röhu naro uëvajëjo: Jemë'lo muorovarue aribövioho huë baejëvorëjo. Jemë mu sisë vaejëvarue ariböviohuni God-are öroro ëninamirëjo.

<sup>45</sup> Jemëhu ëhi ë'ë'oho Vavue ö'idöre hijaje hesi aboji harihu'lo mae jëvo'ajëjo. Èhesi bëhoho Vavuehu maja ëni nugö'öjajoho bogo a mahuni gemu nugö'ö'i a mahu'lo a sisëhu'lo aho'lo jabuni röromo nugö'öjaje höjo.

<sup>46</sup> O jemë huë baejëvarue aganohemu huë baejëvë'oho rabëni uvorëjo: Èhuni God-ro suorovo mabëhe bojamui'ajëjo. Jemë'lo uehorovorëjo. Vajiohu'e tax baeruomaje aribövioho jabu'lo ëhi jabesi aganoho huë baejëvarue höjo.

<sup>47</sup> O jemëhu jemesi ö mueno'emu rajëhijë'oho rabëni nimorohoromo uvorëjo: No ae aho'obëhe iosirëmiromo mu ma-mabëhe vaejë'e javuajëjo. Jemë'lo uehorovorëjo. God-are jö bogo hejë'e aribövioho jabu'lo iae ëhi gemuoho ë'oromo jabesi ö mueno'ohemu rajëhijarue höjo.

<sup>48</sup> Èhi jië'e jiaje jemesi Vavue ö'idöre hijajehu mu bövi bise'lo ma-mae vaejajëhi jemë'lo ëhi avoho vaerëjo.

## 6

### *Bogo aehu göjoro suvuro bojëmi'iröhe jöhoje.*

<sup>1</sup> God uehorovarue mu vaejë'iroho gavë'iajo. Nadi a nuniroho ë muoho vaerego ehuro aëro jemë gë'irarëjo. A nunire vaejë'oho jemesi Vavue ö'idöre hijajohuro suvuroho bogo mana bojëmi'ajëjo.

<sup>2</sup> Èhi jië'e jiaje mae sisë bogojië'e a huë baeromo suvuro bojëmi'ie'iroho nadi sinemuoho nimorohoromo hëgöe huanovoromo uvorëjo: Suvuro'e ae jevajoho ro gehëjo. Hesi döhemu mae jio'amaje aribövi jabesi mue höjo. Èho jaburo God rajahijarue osare raromoromo o örire jijihoromo ëhi a nunire nimorohë'i suvuroho i'imëmarue höjo aëro jabumë rajëhijöro. Röhu aveho na jö mae uëvajëjo. Jabesi iho döre jiajoho ëho jabu jabesi manaho mami'e ma-ioro'ioremu bae barëjë'e höjo.

<sup>3</sup> A'i jemëhu huë baeromo a ajëmijë'iroho övo maehu ae ajëmijë'oho nadi adoho huruoho majahi'i

<sup>4</sup> jasi ma-saginiëri aho ajëminëjo. Ma-saginiëri ajëmijë'oho Vavue jaehu saginiëri vaejego gavajohuro jasi manaho iae bojami'ajëjo.

### *Diehi pari vae'iröhe jöhoje.*

<sup>5</sup> O jemëhu God-are örire jö atë'iroho ma-döhemu mae jioruomaje ariböviehu vaejaruëhioho nadi ehioho vaerëjo. Jabumëro God rajahijarue osare o öri duvahore riravoromo parie vae'i nimoruomaje höjo aëro gëjöro. Röhu aveho na jö mae uëvajëjo. Jabesi iho döre jiajoho ëho jabu jabesi manaho mami'e ma-ioro'ioremu bae barëjë'e höjo.

<sup>6</sup> A'i jemëhu God-are örire jö atë'iroho jero jasi sivue osaro va'oromo ojoho tugohoromo parie vaejego jasi Vavue gurihiro hijajohuro he'irajo. Èhi'oromo pari vaejë'oho jasi Vavue jaehu saginiëri vaejego gavajohuro jasi manaho iae bojami'ajëjo.

<sup>7</sup> O pari vaejë'oho nadi ruëroho numëroho ma-atobe va'orëjo. Hesi God-are jö bogo hejë'e ariböviohuro uvoruomaje höjo: Nani noehu jö ëgobövi jaguromo majëhijë'oho ehuro aru'aho masijohuro avoho he'a'aruëjo.

<sup>8</sup> Jabuhu pari vaejaruëhioho nadi ehioho ë'orëjo. Bogo pari vaejarue majare jemesi Vavuohuro jemesi huë vavaenoho huro urimo gavaje höjo.

<sup>9</sup> Ĕhuni jemëro jöho nadi ëhioho jagu'irögoro a'i aviëhi jië'e jöho majahi-romo parie vaerëjo. Uarëjo:

Nosi apajo. Ö'idöre hijanuoho  
jero ae aho'obëhe nosi dë vövöbajo'oho avohahuego  
noro ja gemu mae uehorovavo'irarëjo.

<sup>10</sup> Jero böröme namiromo aho'obëhe muebejavuego  
no jasi aharire gemu raromo'irarëjo.

Jasi aharire gemu raromoromo jaehu nimanuoho ruhe ö'idöre mae eja-  
haruëhi  
ave sa'arohuro ëhi ejaho'irarëjo.

<sup>11</sup> Nosi ioho jaruvo i'imamuijego no ue'ahego da'uaguajo.

<sup>12</sup> Nosi sisëho uehorovoromo vuonugonëjo.

Ae göehu no sisë vaejavuego noehu uehorovoromo vuonugaruëhi jero ëhi  
ajamuinëjo.

<sup>13</sup> Nadi vörö'eroho ramuego rireromavuo'i  
a'i ajamuinego A Sisëho bogo ruahö'öjavuo'irajo.

<sup>14</sup> Ĕhesi bëhoho jemëhu a jabesi sisë uehorovoromo vuonugë'oho  
ëhuro jemesi Vavue ö'idöre hijajohuro jemesi sisëhu'o uehorovoromo  
vuonugo'ajëjo.

<sup>15</sup> O a jabesi sisë bogo uehorovoromo vuonugë'oho jemesi Vavuohuro  
jemesi sisëhu'o bogo uehorovoromo vuonugo'ajëjo.

*Bogo aehu göjoro God uehorovo'i i vuonugo'iröhe jöhoje.*

<sup>16</sup> O jemëhu God uehorovo'i i vuonugë'iroho döëremu mae jië'e ariböviehu  
nu ano'e sisërërovaruëhioho nadi ëhioho ë'orëjo. Ĕhesi bëhoho döëremu mae  
jië'e ariböviehu i vuonugë'oho jabesi nu ano'oho ijumorovarue höjo aëro  
gëjoro jabuhu i bogo ijaruoho. Röhu aveho na jö mae uëvajëjo. Jabesi iho  
döre jiajoho ëho jabu jabesi manaho mami'e ma-ioro'ioremu bae barëjë'e  
höjo.

<sup>17</sup> O jaehu i vuonugë'oho jasi sine bövie bise'e avohorovoromo ninugu'e  
jovëro simanoro otehoromo nu ano'oho u'orovonëjo.

<sup>18</sup> Ĕhi ë'ë'oho aho bogo ga'a'aruëjo ja ioho vuonugë'e javo'iramu ga'i  
jasi Vavue gurihiro hijajohuro huro sivue ja ga'a'ajëjo. Jasi Vavue jaehu  
saginiëri vaejego gavajohuro jasi manaho iae bojami'ajëjo.

*Ave sa'are bogo a'i ö'idöre inömo babaenemi'iröhe jöhoje.*

<sup>19</sup> Röhu ave sa'aroho nadi inömoho aho'obëhe jemesi sinënioho avo-  
horomo babaenemirëjo. Sa'aroho inömoho dë'irae'amaje höjo. Majo  
majëro tarivo'amaje höjo. Vajiohu'e ariböviëro osaho dadovoromo ujuo-  
harue höjo. A'i ö'idöro avoho babaenemirëjo. Ö'idöroho inömoho bogo  
dë'irae'amaje höjo. Majo majoho bogo tarivo'amaje höjo. Vajiohu'e  
aribövioho bogo osaho dadovoromo ujuoharue höjo.

<sup>20</sup> Inömo inömoho nadi jemesi sinënioho gemu bahi'i God-are öroro  
bojamego huro hesi öri ari'ere bahi nugëho'irajo. Ĕhi jië'oho majo majoho  
bogo tarivo'amo'ajëjo. Bogo dë'irae'amo'ajëjo. O vajiohu'e aehu ojo  
dadovoromo inömo ujuoho'iröhoho bogojio'ajëjo.

<sup>21</sup> Jasi mae sisë dinö'e jiajire jasi dë vövöbajo'oho ë gemu jio'a'ajëjo.

*Sino haho'o hesi iroho nuni jiaje uhu jöhoje.*

<sup>22</sup> Jasi sino hesi iroho nunoho höjo. Jasi nuni mae jië'oho ëhuro aji maro  
hi'a'anuëjo.



<sup>23</sup> O jasi nuni sisë jië'oho ëhuro ja ramoramoro hi'a'anuëjo. Ëhesi bëhoho naro uëromo ë'ajëjo: Jasi uehoro ramoramovavë'ohuro ëhuro ramoramomaro hi'a'anuëjo.

*Monie iruno'e niögu suhi'e ë hesi jöhoje.*

<sup>24</sup> Ae niö'i börömoho gemuoho jëvajëromo jabesi mu gemuore havoromo vaejë'oho bogo eni javo'ajëjo. Ja göho nue huodivo'i göho rajahi'anuëjo. O göho mae uehorovo'i göho bijönimo'anuëjo. Ëhesi bëhoho God'o moni'o niö'i börömoho gemuoho jëvajëromo gemuore havoromo mu vaejë'oho bogo eni jëvo'ajëjo.

<sup>25</sup> Ëhuni uëvajëjo: Nadi uvorëjo: I jovo'o rabe ue'ahoromo bogo vuovo'i birivoromo raromo'ejarejo. O uho niögu'o rabëro sino haho'oho riogivo'ejarëromo nurunurumorëjo. Ëhesi bëhoho ioho ma-bise'e jio'i jemëhu birivoromo raromarujoho ëho börömoho höjo. Uho niögu'oho ma-bise'e jio'i sino haho'o jëvajoho ëho börömoho höjo.

<sup>26</sup> Röhu ugehu döre va'aruoho uehorovohëjo. Noehu ë'aruëhioho ugoho bogo ëhioho iruno'oho bivo'i o bogo gagovo'i o bogo ujuohoromo osaroho ro avoho bahijarue höjo. Bogo ëhioho ë'oruomaje höjo röhu jemesi Vavue ö'idöre hijajohuro ugoho mio'amaje höjo. Röhu jabumë ma-bise'e jio'amo'i jemë masijo mae jëvajëjo. Ëhuni hu jemë'o avo'avoho muebejëvo'ajëjo.

<sup>27</sup> O jemëhu uvë'oho: No diehi'oromo ave sa'aroho majae ëgo'o raromo'ejare uvoromo nurunurumë'oho na ëhuro jemesi vuovo'irarije majaho iosiramiro mo ruëhi ma-bisemu gö'o raromobe va'orëjo. Bogajo.

<sup>28</sup> O niögënioho rabëni nurunurumaruje höjo. Bëhoho bogohöjo. Je'ore resu resuehu diehi'oromo ri'amaruoho ëhu'o uehorovohëjo. Aehu mu vaeromo niögu avoharuëhioho resu resuoho bogo ëhioho ë'arue höjo.

<sup>29</sup> Bogo ëhioho ë'arue höjo röhu ave resu resuohuro ma-mabëhe kavuego garomo nosi dëho vüëvavuaje höjo. Naro jemë uëvajëjo: A böröme Solomon niögu ma-mabëhe io'amonövadoho ëho ma-jianovo'i ave resu resuohuro ëhi ma-mabëhe mae kavuo'amaje höjo.

<sup>30</sup> Jaruvëhi resu resuoho rijego nërëhi ëhi aëro jahoromo vëniro huo'amarue höjo. Röhu ëhi jië'e resu resuoho God-ro muebejego marëromo kavuo'amaje höjo. Resu resuoho ma-bise'e jio'amo'i jemë masijo mae jëvajëjo. Ëhuni uvorëjo: Hu no'o avo'avoho muebejavuoromo uhe niöge i'imamui'ajëjo. Nurunurumarujoho God bogo ma uehorovaruje aribövie jëvajëjo.

<sup>31</sup> Ëhuni nadi uvorëjo: No i rabe jovo rabe i'ejarejo. O niögu rabe io'amo'ejarëromo nurunurumorëjo.

<sup>32</sup> God-are jö bogo hejë'e raromarue ariböviohuro ie jove bövie bise'e ëhuremu uehorovoruomaje höjo. Röhu jemëro nadi ëhioho ë'orëjo. Jemesi Vavue ö'idöre hijajohuro iae mae garomo uvajëjo: Jemë iëro jovëro rabëro ëhuro birivoromo raromarujëjo.

<sup>33</sup> Ëhuni nadi ëhemuoho uehorovo'i a'i God-hu böröme namiromo muebejëvaje muoho noehu vaejëro huhu nimaje muoho ëho nunoro bamorëjo. Ëhi ë'ë'oho God-ro jemesi aru'ahoho muebejëvoromo röhu ie jove niöge givae bövie bise'e ëhu'o romoromoro bojëmi'ajëjo.

<sup>34</sup> Ëhuni nëröhunioho nadi nurunurumorëjo. Nëri evare ë maja hesi muoho uehorovo'arujëjo. Majae gemu hesi huë vavaene jaruvo majae gemu uehorovarujoho höjo. Ëhuni nëri hesiroho nadi nurunurumorëjo.

## 7

*Bogo döro bamorovoromo a jabesi sisë mevo'iröhe jöhoje.*

<sup>1</sup> Röhu nadi döroho bamorovoromo a jabesi sisëho mevorëjo. Jabesi sisë bogo mevä'oho God'lo jemesi sisëho bogo mevo'ajëjo.

<sup>2</sup> Jemë diehi jië'e uehoro baeromo mevarujëhi God-ro ëhi jië'e uehoro baeromo meväho'ajëjo. I'u'e mae bojamë'ohuro ëhuro i'u'e mae bae'a'arujëjo. O bisemu bojamë'oho bisemu bae'a'arujëjo.

<sup>3</sup> Ja diehi'oromo ijo ugobajo'e biseharihehu isiare nunire namijajoho ga'i ijo börömehu jasi nunire namijavajoho bogo gavanuëjo.

<sup>4</sup> Jasi nunire ijo börömehu tugohavë'oho ëhu'oho ja rabëni jasi aemo'aemoho uanëjo: Ë'ego na jasi nunire ijo ine namijavajoho jahahöjo.

<sup>5</sup> Sareri ae javajëjo. Jasi nunire ijo börömehu tugohavajoho jero urimo jahonëjo. Jahonugoromo evare avoho garomo ijo ino harihoho isiare nuniroho jahaho'anuëjo.

<sup>6</sup> Röhu God-are inömo maho nadi öho mëmi'i jemesi nieniaho nadi mahu nuniroho ruruhö'orëjo. Ëhi ë'ë'oho jaburo önu bijö'ëro vaenugoromo evare huotorovoromo jemë umijëvo'ajëjo.

*Birivoromo God ua ga'iröhe jöhoje.*

<sup>7</sup> Röhu birivoromo God ua garëjo. Birivoromo ua gavë'oho ujuoho'arujëjo. Birivoromo nahorëjo. Nahë'oho biroho'arujëjo. Ojoho ano'anovorëjo. Ano'anovë'oho God-ro jiovëho'ajëjo.

<sup>8</sup> Ae rahu ua gavë'oho ujuohoruomo'ajëjo. Nahë'oho bihoruomo'ajëjo. Ano'anovë'oho ojoho jiovëho'ajëjo.

<sup>9</sup> Nasi jö hejarujoho ae gö vavu ömo'ömo'e jëvajëjo. Jemesi harihehu uëvë'iroho: Ie bojemego na ijö uëvamu hejë'oho na jemë sareramiro mo munë bojamirëjo.

<sup>10</sup> O uëvë'iroho jovo mie bojemego na ijö uëvamu hejë'oho na jemë sareramiro mo sigobu sisëho bojamirëjo. Bogajo. Jemë i mae i'imami'arujëjo.

<sup>11</sup> Jemë sisë aribövie jëvajëjo röhu jemesi aboji harihu'o avoho suvuorëmi'irarije öroho iae gavaruje höjo. Jemë sisë jëvo'i ö'idöre hijaje jemesi Vavuho mae jiaje jemëro birivoromo uvorëjo: Hu maëro jië'ëro ae rahu ua gavë'oho suvuoro mabëhe bojamuinövo'ajëjo.

<sup>12</sup> Ëhi jië'e jiaje jemë ae göehu diehi vaejëvojöro nëgë'oho jemë'o ëhi jië'e muoho ae gö jabesi öroro vaejëvorëjo. Ëhi jië'e mu vaejë'ohuro ëhuro Moses-are surire jögorohu'o jö God-aro baeromo majëhinövare surire jöhu'o ë jö hesi bëhoho ejëho'arujëjo.

*Ojo harihure rumo va'iröhe hesi jöhoje.*

<sup>13</sup> Röhu ojo harihoro rumo va'orëjo. Vëni'ere va'arue ojoho öroho börömëro jië'ëro ëhu'ëro ae aho'obëhe ë va'oruomaje höjo.

<sup>14</sup> A'i maro raromoröhe ojoho öroho biseharihe jië'ëro hesi ae magemuëro gemuëro bihoromo ë va'arue höjo.

*Jö majahuijarue ae gö jabesi mure garomo uvo'ejo: Sareri jöe majahuijaruëjo. Ëhesi jöhoje.*

<sup>15</sup> Gavë'i raromorëjo. Aëro rueromo God-are jöho huotohuotovoromo majëhijego ejëhojööni uëvajëjo. Jabumë ma-döhemu sheep va'ëne jio'amo'i uhoho vörö'e mioho va'ëne jio'amajëjo.

<sup>16</sup> Jabesi mure garomo uvo'a'arujëjo: Ëaribövioho God-are jö sareri'e majahuijarue aribövioho jioruomajëjo. Rihu'e grape bajo uro'ië'iroho

ë ö'iremu uro'i bibë'e ijo sisëroho bogo uro'a'anuëjo. O meso böso uro'ië'iroho mesoremu uro'i bibë'e resu sisëroho bogo uro'a'anuëjo.

<sup>17</sup> O ijo mahuro bajo mae rae'i ijo sisëhuro bajo sisë rae'amaje höjo.

<sup>18</sup> Ijo maho bajo sisëho bogo rae'i ijo sisëho bajo maho bogo raejaje höjo.

<sup>19</sup> Ije aho'obëhe bajo bogo ma raejë'oho huo'öromo vëniro ruruhö'öjarue höjo.

<sup>20</sup> Èhu'ëro jië'ëro jabesi mure garomo uvo'a'arujëjo: Èho jaburo bogo rae avohë'ëro God-are jöho bogo avoho majahuijarue höjo.

*Bogo Bada ma-döëremu uvarue a'i Vavuehu nimaje mu vaejarue ariböviehu God-are öri ari'ere va'iröhe jöhoje.*

<sup>21</sup> Aehu na uevaruoho: Bada Bada uevaruoho ioro'iorohuremu God-are öri ari'eroho va'oruomo'ajëjo. Ioro'ioroho bogajo. A'i ae rahu nasi Vavue ö'idöre hijaje aehu nimajoho ë'ë'ohuro ë ariböviohuremu ëho va'oruomo'ajëjo.

<sup>22</sup> Èmajaho rue'iramu ae aho'obëhe ueruomo'ajëjo: Bada Badajo. Noro jasi ihore God-are jöho majëhiromo Satan-are sisë aribövioho a dëroho rarovö'öjëvoromo mu masijoho aho'obëhe vae'amare höjo.

<sup>23</sup> Vae'amare hö'iramu evare naro uë'ejöjo: Na jemë bogo gëvode höjo. Bogo mae bogajo. Jemë mu sisë vaejaruje aribövie jëvaje ëhuni rori'o va'ohëjo.

*Simano ma'e ahu'o simano sisë'e ahu'o javu vaejare uhu jöhoje.*

<sup>24</sup> Röhu naehu jövaje jö ae rahu ejehajoho ëhi jië'e a hesi jöho naro uhu'e majëhi'ië'ajëjo. Simano ma'e ae gemuëro javuoho munë'e sa'are vaejade höjo.

<sup>25</sup> Vaejë'ëro ëni börömëro jovo börömëro buru börömëro rueromo ë javuoho anade höjo. Anamu bogo buevade höjo munë'e sa'aro vaejë'ëro. Nasi jö ejehaje aho ë simano ma'e aho va'ëne höjo.

<sup>26</sup> A'i naehu jövaje jö ae rahu heromo bogo ejehajoho ëhi jië'e a hesi jöho na majëhi'ië'ajëjo. Simano sisë'e ae gemuëro javuoho nie'ure vaejade höjo.

<sup>27</sup> Vaejë'ëro ëni börömëro jovo börömëro buru börömëro rueromo ë javuoho anamu buevade höjo. Buevoromo sa'are nemoromo garahörö'e baejade höjo. Ahia mino'ëjo.

<sup>28</sup> Èjöhö Iesuro majëhi barëjamu ë tagavare ariböviohuro heromo tiöromo uvoruomadeje: Hesi jöho darugo'e jö ma-mabëhe javavajëjo.

<sup>29</sup> Èhi uvoruomade hesi bëhoho jabesi jögoru öri röjëhijarue ariböviehu röjëhijarëhioho hu bogo ëhioho majëhi'i a'i hesi birire baejë'ëro jöho majëhijadeje.

## 8

*Iesuhu sino jomo'e a ajamade jöhoje.*

<sup>1</sup> Iae Iesuro dahorure abuejadeje. Abuejamu gagorovo ae aho'obëhe hu rihioromoruomadeje.

<sup>2</sup> Rihioromoro sino jomo'e ae gemuëro hu bihoromo ague aho hiromo uavadeje: Bada ja nasi sino avoheho'iranoho ja eni javajëjo. Èhuni jasi nimoromo ajemijë'ohuro iae ajemi'anuëjo.

<sup>3</sup> Ajemi'anuëjamu Iesuro övoho nugö'öromo sinoho rëhahoromo uavadeje: Iae na negajëjo ajami'iro. Marëjëjo. Marëjë uavamu gavë'i jomoho rireromoro hesi sinore sisë sisëho barëjadeje.

<sup>4</sup> Sisë sisëho barëjamu gagorovo Iesuro uavadeje: Aveho hejëjo. Nadi aho uënëjo. A'i ma-va'irano ho jasi sinoho priest rōjahijego ga'irajo. Ëhi'oromo Moses-hu uōvuade ëhi jië'e suvuoro ho God-are öro ro bojamego aëro garomo uvo'irarëjo: Jasi sinore sisëho barëjë'ëro iae mae javajëjo.

*Iesuhu Rome rajo hesi mu vaejaje a avohade jöhoje.*

<sup>5</sup> Ëhi'onugoromo Iesuro va'lo Capernaum amore höröjajedeje. Höröjamu Rome raje muorovo simano vaejaje ahuro rueromo uavadeje:

<sup>6</sup> Bada nasi mu vaejahaje aho guomo guome jioromo vi'ehe sisë maro baeromo bogo vuodovë'e ma-röhoremu raromajëjo. Na ja ajaminëjo o bogajo.

<sup>7</sup> Bogajamu uavadeje: Iae na ja'lo ö'oromo hesi sinoho ajami'ejöjo.

<sup>8</sup> Ajami'ejöjamu rue simano vaejaje ahuro uavadeje: Bada iae mae höjo röhu na ae ma-bise'e jevoromo sisë jevë'e jaehu nasi osare ö'ë'o ho bogo maehu höjo. A'i ma-jö'ëro jöe jövego nasi mu vaejahaje aho marë'irajo.

<sup>9</sup> Ma-jö jövego mu rovaje hesi öroho iae na gavë'e jevajëjo. Ëhesi bëhoho na nasi a masijo jabesi aharire jevë'ëro jabesi jöho ejëhoromo muoho vae'i muorovo aribövioho nasi aharire jëvë'ëro nasi jöho ejëhoromo muoho vaejarue höjo. Naehu muorovo ae gö uavë'o ho: Va'ë uavë'iroho iae hu va'aje höjo. O muorovo ae gö uavë'o ho: Rovë uavë'iroho iae hu rovaje höjo. O nasi mu ajemaje a uavë'o ho: Mue ëhi ëhi vaejë uavë'iroho iae hu ëhi vaejaje höjo. Ëhu'ëro jö jövego mu rovaje hesi bëhoho iae na gavë'e jevajëjo. Ëhuni uavajëjo: Ma-jö'ëro jöe jövego marëjajo.

<sup>10</sup> Ëhi uavamu Iesuro heromo tiöjajedeje. Tiöromu hu rihiromare aribövioho uëvadeje: Hu mabëhe uehorovevade höjo. Ëhi jië'e aho na bogo birohë'e jevajëjo. Nosi Israel rajoho jabu'lo bogo ëhioho mae uehorovevaruëjo. Iae na mae jövajëjo.

<sup>11</sup> Ëhuni uëvajëjo: Sa'a ioro'ioro raje ae aho'obëhe maja rojomajire beva'ajire jioromo God-are öri ari'ere va'oromo Abraham Isaac Jacob jabu'lo gemuore raromoromo ie ue'ahoruomo'ajëjo.

<sup>12</sup> A'i Israel raje God-are öri ari'ere va'lo raromo'iröhe röho jiëhajoho God-ro Israel rajo a ioro'ioro ho babu'öjëvo'iramu ëho bogo va'i rori'lo ramoramoro va'a'aruëjo. Ëdirö'ore ae aho'obëhe nierusuburu'e bamoromo ane ja'ihö vuogigimoruomo'ajëjo.

<sup>13</sup> Ëhi uënugoromo Iesuro ë simano vaejaje aho uavadeje: Va'onëjo. Diehi jio'iröhego jaehu mae uehorovanëhi iae ëhi jiaho'ajëjo. Ëhi uavamu gavë'i evare hesi aho marëjajedeje.

*Iesuhu ae aho'obëhe jabesi sino ajëmade jöhoje.*

<sup>14</sup> Ëhi'onugoromo Iesuro Peter-are osare va'adeje. Va'oromo gavadeje Peter-are jure magonahoho sine vörö'irae'ego röhore raromamu.

<sup>15</sup> Raromamu gagorovo Iesuro magonaho hesi övoho rëhahamu vöröho u'uhadeje. Vöröho u'uhamu hegoro ho magonahohuro ri'öromu Iesuni iruno'e avohahadeje.

<sup>16</sup> Ëhi'lamu majae beva'amu gavë'i Satan-are a sisëhu dëre abue'amë'e aribövioho aho'lo aëro sö rovarëje. Sö rovamu gagoro Iesuro jöe jövoromo ajëmiromu Satan-are aribövioho rarovö'öjëvadeje. O guomo guomo'e aribövioho aho'lo jabesi sinoho avohëvamu marëjëvadeje.

<sup>17</sup> Ëhi a ajëmade hesi bëhoho mami'e jö God-aro baeromo majëhinövade ae Isaiah-ro jajivoromo uvadeje: Nosi guomo guomo hesi i'uoho huro nigemahuë'e höjo.

Nosi vi'ehoho rori'o bava'ë'e höjo.

*A ioro'iorehu Iesuare ijore ijore jijih'o'ia'amugo Iesuhu jö majëhijade jöhoje.*

<sup>18</sup> Ëhi'oromo Iesuro gavade ae aho'o hesi bëhire ruë numë tagavamu gëgorovo hesi ijorajo ömo'ömoho uëvadeje: Ruerego no e'u ioni gönö va'irarëjo.

<sup>19</sup> Ëhi uëvamu Jew rajo jögoru öri röjëhijaje ae gemuëro rueromo Iesu uavadeje: Tisa ja dinö'e dinö'e va'ë'iroho na jasi ijore ijore juvonövo'ejöjo.

<sup>20</sup> Juvonövo'ejöjamu Iesuro ë aho uavadeje: Jero nasi ijore ijore juvo'i uevanuëjo röhu je'o majehu sa'a gagore röho avohoromo mare raromaruoho iae jiajëjo. O je'o ugehu iju vaeromo mare raromaruoho iae jiajëjo. A'i God-are A Ma naehu niavaje hijaje osaho bogojevajëjo. Nadi uvonëjo: Nörö'o hibe juvë'o'ho mae hibe juvo'ejöromo nasiriroho ruenëjo.

<sup>21</sup> Ëhi'amu Iesuare ijore ijore juvaje ae göëro ri'öromo Iesu uavadeje: Bada uevego na nimo vuonorö'ö va'oromo nasi vavuoho guavo'iröjo. Guavoromo hujeji evare jasi ijore ijore juvo'iröjo.

<sup>22</sup> Juvo'iröjamu Iesuro uavadeje: O-ajo. Jero nasi ijoro ijoro juvëjo. Vuonugego vuovo örire jijiharue ariböviohuro jabesi aribövioho guavo'amo'irarëjo.

*Iesuhu uavamu jovo börömehu ruhosöjade jöhoje.*

<sup>23</sup> Ëhi'oromo Iesuro boat gagore ajio hijamu hesi ijorajo ömo'ömohuro hu'o ajio gemuore raromoromo va'areje.

<sup>24</sup> Va'ihö gavareje e'u döre buru börömo rueromo jovoho hasa'ego boat gagoho abo rarovamu. Abo raro'vo'i röhu Iesu niavë'e jiadeje.

<sup>25</sup> Iesu niavë'e jiamu gagorovo va'o ioromo uavareje: Bada ajamuëjo. Vuovavuo'ië'ajëjo.

<sup>26</sup> Vuovavuo'ië'ajëjamu uëvadeje: Jemë rabëni juhuonivarujëjo. Jemë God bogo ma uehorovaruje aribövie jëvajëjo. Ëhi uënugoromo ri'öromo burohu'o jovohu'o uëvadeje: Vuonugohëjo. Vuonugohëjamu jovoho u'uhoromo ma-jörume ruhijadeje.

<sup>27</sup> Ma-jörume ruhijamu gavë'i rueho jaburo uarovareje: Ave aho diehi jië'e ae höjo. Huhu uëvë'o'ho bogo aëremuoho ejaho'i burohu'o jovohu'o jabu'o hesi jöho ejaharue höjo.

*Aru'aho sisë ae niö'i jabesi dëroho Iesuhu raro'vö'öjëvade jöhoje.*

<sup>28</sup> Ëhi'onugoromo Iesumëro va'aroho va'o e'u ioni gönö Gadarene rajo jabesi sa'are va'o baboro bejareje. Baboro bejamu gavë'i ae niö'iro guavo'amarue juju gagore arijë'ëro rueromo Iesu birohareje. Röhu ë ae niö'ioho Satan-are a sisëro dëre abueruomë'ëro jië'ëro vörö ma'e jëvadeje. Ëhuni ae aho'obëhe juhuonivareje ë örire jijih'o'iröhoho.

<sup>29</sup> Ëhi jië'e vöröho jëvë'ëro birohoro ma-darugo'o uvareje: God-are Harihoho ja rabëni sihusihuagu'o'i rovane höjo. Noehu i'u bae'iröhe majaho bogo rovë'e na ja ëma öri'ahoro huë sisëho vi'ehoho bojamui'i rovane höjo. O diehi'avuo'i rovane höjo.

<sup>30</sup> Rovane höromo gavare aruhëre mahe aho'obëhe gemuoro ie ue'ahamu gagorovo

<sup>31</sup> Iesu uavareje: Ja raro'vö'öjavuogorovo uövuego no suorovo va'oromo aruhe mahu jabesi dëre va'o abuejarëjo.

<sup>32</sup> Abuejarëjamu uëvadeje: Ëhuro va'ohëjo. Va'ohë uëvamu hejë'i ë ae niö'i jabesi dëre jioromo suorovo va'oromo ruhe mahu jabesi dëre

abueroomadeje. Abueruomamu ë mahohuro aho'obëhe baradore va'orireromoromo e'ure siö ruruhö'ö va'oromomo jove ue'ahoromomo vuovadeje.

<sup>33</sup> Vuovamu gavë'i mahu muebejarue ariböviohuro huruomomomo amore va'oromomo ae uëvareje: Aru'aho sisëhu dëre jëvade aho ëhi marëjëvohijajo. O mue gö gö ëhi ëhi ruehijajo.

<sup>34</sup> Ëhi majëhijamu ae aho'obëhe heromomo Iesu biroho'i rueroomadeje. Rueroomomo garomomo uavareje: Ave sa'aho vuonugomo'i va'ëjo.

## 9

### *Övo hörule vuovahë'e a Iesuhu ajamade jöhoje.*

<sup>1</sup> Ëhi'amu Iesuro boat gagore ajiomomomo jovo dëre va'adoho va'ohesi amore ravo'amadeje.

<sup>2</sup> Amore ravo'amamu gagorovo övo hörule vuovahë'ëro hesi maratuore raromaje aho aëro giojimo barovareje. Barovamu gagorovo Iesuro gavade jaburo hu mae uehorovamu gëgorovo övo hörule vuovahë'e aho uavadeje: Harihohajo. Ma-biririvëjo. Jasi sisëho uehorovoromomo vuonugoromomo mu'ubarëjahë'e höjo.

<sup>3</sup> Mu'ubarëjahë'e höjamu hegorovo jögoru öri röjëhijarue a ioro'iorohuro uehorovoromomo uvareje: Asë'ëjo. Ave ahuro God-are ihoho ijumajëjo.

<sup>4</sup> Ëhi uvamu Iesuro gëromomo uvadeje: Jabumë ëhi uehorovaruëromomo uëvadeje: Jemë rabëni uehoro sisëho baejarujëjo.

<sup>5</sup> Jemë'o uehorovohëjo. Nani ja ae ëma ua'a'anuëjo: Jasi sisëho uehorovoromomo vuonugahë'e hö ua'a'anuëjo. Ja ëhi ua'ibejanëjo aho nunoho bogomo ga'ibejarëjo ja mae o sarere jövë'e javego. Röhu ja bogomo ëma ua'a'anuëjo: Ri'öromomo nami juvëjo hesi guomohomo bogomo barëjogojöeni.

<sup>6</sup> Röhu ë bogomo ëma jövo'ibejane jöho iae na jövo'ejöjo huro ejehoromomo ri'ö nami juvego jemëro ë muohomo garomomo ëhuro ga'irarijogomo God-are A Maho naro sa'are hijajire evare sisë mu'uvaje darugohomo baejë'e jevego. Ëhi uënugoromomo röhu övo hörule vuovahë'e aho uavadeje: Ri'öromomo raromanue maratuohomo banigojomomomo baeromomo jasirëro va'ëjo.

<sup>7</sup> Va'ëjamu iae ri'öromomo hesirëro va'adeje.

<sup>8</sup> Va'amu gavë'i ë ariböviohuro juhuonivoromomo uvoroomadeje: God-romoma-ae uavamu mu böröme ë'ade höromomo God rajahiruomadeje.

### *Iesuhu uavamu Matthew-hu aevoromomo hesi ijore ijore juvade jöhoje.*

<sup>9</sup> Ëhi'amu Iesuro va'adeje. Va'i gavade tax baejaje ae hesi ihoho Matthew hesi mu vaejaje osare hijamu gagorovo uavadeje: Rueroomomo nasi ijoro ijoro juvonövonëjo. Juvonövonëjamu hegorovo ri'öromomo aevoromomo hesi ijore ijore juvonövadeje.

<sup>10</sup> Ëhi'amu Iesumëro Matthew-are osare ie ue'ahamu evare tax baejarue ae aho'ohomo sisë aribövie aho'ohomo ëhomo jaburo rueroomomo Iesu'ohomo hesi ijorajohomo ömohomohu'ohomo gemuorohomo iohohomo ue'ahareje.

<sup>11</sup> Ie ue'ahamu gëgorovo Pharisee ariböviohuro Iesuaru ijorajohomo uëvareje: Asë'ëjo. Jemesi börömo hohomo rabëni tax baejarue ariböviohu'ohomo sisë a ioro'iorohu'ohomo gemuorohohomo hiromohomo iohohomo ijajëjo. Ëhi jië'ohohomo sisë höjo.

<sup>12</sup> Ëhi jië'ohohomo sisë hö uvavamu Iesuro hu'ohomo hegorovo ë Pharisee ariböviohohohomo uhu'e uëvadeje: Jemëhu nasi aribövi ëhi uëvarujohohomo röhu guomohomo guomohohomo ariböviohuremu doctor gavarue höjo mae jövë'e ariböviohohomo bogajo.

<sup>13</sup> Va'oromo ave jö hesi bëhoho nahoromo birohorëjo. God-ro uvajëjo: Na negajëjo a huë bae'irarije muoho vaejoro mi suvuoroho bogajo. Naro sisë aribövioho nasinö jëvojoro uë'i rovode höjo ma-döemu mae jëvë'e aribövioho bogajo.

*Bëhoho rabëni Iesuare ariböviehu i bogo vuonugare jöhoje.*

<sup>14</sup> Èhi'amu John-are ijore ijore jijiharue ariböviohuro rueromo Iesu uavareje: No'lo Pharisee ariböviohu'lo God uehorovo'i ie vuonugarue höjo. Noro èhi è'arue höjo röhu jasi aribövioho rabëni bogo èhioho ioho vuonugarue höjo.

<sup>15</sup> Rabëni bogo èhioho ioho vuonugarue höjamu hegorovo Iesuro uëvadeje: Nasi ijore ijore jijiharue ariböviehu i bogo vuonugarue hesi bëhoho naru uhu'e uë'ië'ajëjo. Na jemëro uvarujëjo: I'lo masuröhe a hesi söröre rueromo aemo'aemëro huë vavaene baeruomo'ajëjo. Bogo èhioho è'i iae ie ue'ahoruomo'ajëjo. Röhu majae ijönö i'lo masuröhe aho aëro guduamo bava'iramu evare ioho vuonugo'aruëjo. Avevejö'oho naru jabu'lo hijë'ego jabu ioho bogo vuonugo'aruëjo.

*Jew rajehu gororovo'iröhe jögoru mamiohu'lo Iesuhu barovade mu i'ohu'lo bogo gemuore havo'iröhe jöhoje.*

<sup>16</sup> Èhi uënuoromo Iesuro uhu jöe gö'lo majëhiromu uëvadeje: Niögu i'ohu'lo mamiohu'lo bogo havo'anuëjo. Bogo havoromo niögu mami dadovadiroho niögu i'lo hesi vituoho baeromo niögu mami hesi gagoroho bamoromo sigohi'anuëjo i'ohuro duduhiorovoro ruho barovego böröme dadorovo-jöeni.

<sup>17</sup> O wine jovo mi sino gagore bigu'ië'iroho jovo i'ohu'lo mi sino mamiohu'lo bogo gemuoroho havoromo jovo i'oho mi sino mamiroho bigu'anuëjo. Èhi è'ibejanëjo jovohuro gatovoromo ögohuro bibivoromo mi sinoho mamiëro jië'ëro tögömoromo dadorovego jovoho rova'ibejajo. A'i jovo i'oho mi sino i'lo hesi gagoremu bigu'anuëjo. Bigu'iramu jovoho mi sinoho mae jio'amo'ajëjo.

*Iesuhu magonahe niö'i Jairus-are abojohu'lo magonahe gö'lo ajëmade jöhoje.*

<sup>18</sup> Iesuro èhi uëvamu gavë'i Jew rajo a böröme gemuëro rovadeje. Rueromo ague aho hiromu Iesu uavadeje: Nasi aboje avevejö'e guomajëjo. Jero rueromo jasi övoho hesi sinoro bamego i'ovajo.

<sup>19</sup> I'ovajamu hegorovo Iesuro ri'öromu hu'lo hesi ijorajo ömo'ömo'hu'lo è a hesi ijore va'areje.

<sup>20-21</sup> Örire va'amu gavë'i magonahe gemuëro jabu'lo va'adeje. Èmagonahoho manaero garorovade guomo guomoho bogo barë'i vadune aho'obëhe 12 baejë'ëro jië'ëro uehorovoromo uvadeje: Na Iesu manióghuremu rehë'ohuro èhuro marëjevo'ajëromu Iesuare dejönö rueromo niögu viture rehadeje.

<sup>22</sup> Rehëamu hegorovo Iesuro huotorovoromo magonahoho garomo uavadeje: Abojëjo. Nadi juhuonivo'i biririvëjo. Jero na mae uehorovevamu èhuro ja marëjavë'e höjo. Marëjavë'e hö uavamu gavë'i marëjadeje.

<sup>23</sup> Marëjamu gagorovo Iesuro va'oromo è a böröme hesi osare va'oromo gavade virikö vavaeni'e huosiharue aribövioho è raromo'i ae aho'obëhe darugo'lo nierusuburu'e bamamu gëgorovo

<sup>24</sup> uëvadeje: Ae aho'lo va'ohëjo. Magonaho harihoho bogo guomo'i maniajavëjo. Ma-niavajëjamu hegoro rueho jaburo Iesu sivoromo ijo'ijahareje.

25 Ijo'ijahamu huro ae aho'obëhe rarovö'öjëvonugoromo magonaho hesi osare va'oromo övoho baejamu i'ovoromo ri'öjajedeje.

26 Ëhi è'ade jöho è sa'aho aho'obëhe rumorovobe va'adeje.

*Ae niö'i nuni tugorohëvadoho Iesuhu ajëmamumu marëjëvade jöhoje.*

27 Ëhi'lamu Iesuro è amoho vuonugo'i örire juvo va'adeje. Örire juvo va'lamu gagorovo nuni sisë'e ae niö'iro rihimoromo uvobe va'areje: David-are ujoho böröme javaje jero noni vavaenimëjo.

28 Ëhi uvobe va'lamu Iesuro osare va'adeje. Osare va'lamu rue ae niö'iohuro rovareje. Rovamu gëgorovo Iesuro uëvadeje: Na jemë mae uehorovoromo uvarujëjo: Nörö ajamui'iröhoho eni höjo. Eni höjamu uavareje: Bada io'ajo.

29 Io'ajamu Iesuro nunoho rëhëhoromo uëvadeje: Ëhi jië'ocho jemëhu uehorovarujëhi iae ëhi jiëho'ajëjo.

30 Ëhi uëvamu gëgorovo nunoho marëjëvamumu mae uherihareje. Mae uherihamu gagorovo Iesuro darugo'o majëhiromomo uëvadeje: Bogave aho uë'irarijëjo.

31 Ëhi uëvamu hegorovo è ae niö'iohuro hö'öromomo va'oromo Iesuare jöho bogo ejaho'i Iesuhu jabumë ajëmijade jöho majëhibe sa'ae bövioho jirehareje.

*Iesuhu bitaro tövë'e a ajamade jöhoje.*

32 Ëae niö'iocho jaburo è osare jioromo hö'öjamumu gavë'i aëro ae gemu hu'irae baeromo rovareje. Ëaho aru'aho sisë dëre jië'ëro jörumo'e jiadeje.

33 Jörumo'e jiamu Iesuro è aru'aho sisëho rarovö'öjamumu aho aevoromo jöe jövadeje. Jöe jövamu hegorovo ae aho'obëhe tiöromomo uarovareje: Asë'e ëhi jië'e muoho Israel sa'aroho bogo gavë'e javuajëjo.

34 Ëhi uarovamu Pharisee ariböviohuro uëvareje: Sisë a börömohuro vöröho bojamijego ëhuro a dëre aru'aho sisëho rarovö'ö'amaje höjo.

*Iesuhu ae aho'obëhe jabesi jöëni vavaenimade jöhoje.*

35 Ëhi'lamu Iesuro God rajahjarue osare osare God-are jö bëhoho röjëhibe God-hu böröme namiromomo muebejëvo'iröhe jö maho majëhibe guomo guome gö gö baejë'e aribövioho avohëvobe ëhi'obe amo masijore ininore juvo barëjadeje.

36 Juvoromo ganövade ae aho'obëhe tagavoromomo huë vavaene baeromo sisë'i raromomo'ego gëgorovo uvonövadeje: Ëaribövioho vëmu vavumu rumo'e ö mahu'ëro raromanovaruë uvoromomo jabesi jöëni vavaenimonövadeje.

37 Jabesi jöëni vavaenimamumu hesi ijorajo ömo'ömocho uhu'e uëvadeje: Ae aho'obëhe nasinö sö rue'iröhoho ëho mure iruno'e gagovo'iröhoho va'ëne höjo. Mure gagovo'iröhe iruno'ochi bövi mae jio'i gagovarue aribövioho no ma-gemumu gemumu javuajëjo.

38 Ëhuni mu Arijo'ochi ëninamiromomo uarego huro ae gö'o rëmö'öjego mure rueromomo ajamuiromomo iruno'ochi gagovo'irarëjo.

## 10

*Iesuare apostle 12 jabesi jöhoje.*

1 Ëhi'lamu Iesuro hesi ijoraje 12-ho uëvadeje: Ruehëromomo rovamumu daruge bojëmiromomo uëvadeje: Satan-are ariböviehu a jabesi dëre jio'amamumu gëvë'ochi rarovö'öjëvego suorovoromomo va'irarëjo. Guomo guome



gö gö baejë'e o sino haho'e u'uho'amë'e jiamu gëvë'oho avohëvego marëjëvo'irajo.

<sup>2</sup> Röhu hesi apostle aribövie 12 jabesi ihoho aviëhije. Urimo Simon hesi iho göho Peter'lo hesi öho Andrew'lo ëhi jëvadeje. Göho James'lo John'lo ö'lo ö'lo Zebedee-are harihoho jëvadeje.

<sup>3</sup> Göho Philip'lo Bartholomew'lo jëvadeje. Göho Thomas'lo tax baenövade ae Matthew'lo jëvadeje. Göho James Alphaeus-are harihohu'lo Thaddaeus'lo jëvadeje.

<sup>4</sup> Göho Simon hu Jew rajehu jabesi mueberovo'i nimade aho jiadeje. Göho Judas Iscariot jiadeje. Judas Iscariot hu ijonö Iesuni hiruëmiromo a jabesi övore bojëmi'iröhe aho jiadeje. Iesuale apostle 12 jabesi ihoho ëhi jio'amadeje.

*Apostle 12 jabuhu va'oromo mu vaeröhego Iesuhu rëmö'öjade jöhoje.*

<sup>5</sup> Ëaribövie 12-ho jaburo mue vaebe jijihoröhego Iesuro rëmö'öromo uëvadeje: Va'irarijoho sa'a ioro'ioro rajo jabesiroho Samaria sa'a rajo jabesi amoroho nadi va'orëjo.

<sup>6</sup> A'i Israel rajo jabesiriremu va'orëjo jabumë sheep-ëro öre sidövanovoromo ëma jijiharue jiaje.

<sup>7</sup> Va'oromo uëbe jijihorëjo: Iae ga'ië'arujëjo God-ro böröme namiromo muebejëvego.

<sup>8</sup> Ëhi uëbe guomo guomo'e aribövioho ajëmibe vuovë'e aribövioho i'ovëvobe sino jomo'e aribövioho avohëvobe Satan-are ariböviehu a dëre jio'amë'oho rarovö'öjëvobe ëhi'obe jijihorëjo. A ajëmi'irarije darugo God-arire baejarijoho bogo manaho bojamarije höjo. Ëhuni manaho nadi bae'i aho ma-ajëmibe jijihorëjo.

<sup>9</sup> Gold ijo bajoho ajivë'e ijo bajoho rövë'e ijo bajoho göta esöroho nadi aegoromo ujuoho jijihorëjo.

<sup>10</sup> A ëninëmiromo ujuohoromo aego'irarije esöho nadi ujuohoromo jijihorëjo. Niögoho nadi göho ujuoho'i ma-gemu ruohoromo jijihorëjo. Höru guduoho nadi io'amoromo ijahoho nadi ujuohoromo jijihorëjo. Ëhi jië'e inömo inömoho nadi ujuoho jijihorëjo ë hesi bëhoho ae rahu mu vaeromo i mana baejë'oho iae mae jië'e jiaje.

<sup>11</sup> Va'irarijoho amo masijore o ininore suorovë'oho va'oromo a ma-maho nahorëjo. Nahoromo birohogorovo ë a hesi osaro raromonövorëjo ijonö ë amore jioromo va'ië'e jëvaje.

<sup>12</sup> Röhu osare rumo va'ë'iroho jejëmiromo uënövorëjo: Huë mae baerëjo.

<sup>13</sup> Huë mae baerëjamu hegorovo ë osare raromarue ariböviehu uëvë'oho: Iae mae hö uëvë'oho iae huë mae baeruomo'ajëjo. O bijönimë'oho uërëjo: God-are huë ma jö uëvodoho vuonugajëjo. Ëhu'ëro bogo bae'a'arujëjo.

<sup>14</sup> O di osaehu di amehu jemesi örire nu huodëgoromo jö bogo ejëhë'oho uvorëjo: Jabesi muoho bövioho bise'oho sa'aho tohotohoho sisë höromo jabesi tohotohe jemesi hörure jiajoho riremomo va'orëjo.

<sup>15</sup> Ave jöho na jö mae uëvajëjo: God-hu i'u bojëmi'iröhe maja rovë'iroho Sodom o Gomorrah amo rajo jabuhu i'u baeröhoho ma-jianovo'i a'i jemesi jö bogo eruomaje aribövioho jaburo i'u börömo maho baeruomo'ajëjo.

*Aehu Iesuale aribövi huë sisë bojëmi'iröhe jö Iesuhu jövadohoje.*

16 Aveho hehëjo. Naro rëmö'öjego jemë vaevë'e sheep harihunö'e vörö'e miehu jioruomajire va'ie'arujëjo. Èhuni va'oromo sigobehu a gagoro ma-burëro ju'ebiro mo va'ajëhi ëhi gavë'i jijihorëjo. O ugo ma-maehu hesi iemu iromo ma-taemo hijajëhi ëhi taemo raromobe va'orëjo.

17 Ae gëvë'iajo. Jaburo guduamo ujuohëvo va'oromo jögoru muebejarue aribövi jabesi övore bojëmi'aruëjo. Jabuhu God rajahjarue osa göro göro hisuebijëvo'aruëjo.

18 Gavana o sa'are a masijo gö gö jabesi nunire rëmo'iramu nasi jöëni ë riravoromo nasi jöho jabesi örire sa'a gö rajo jabesi örire majëhi'arujëjo.

19 Röhu jabuhu guduamo ujuohëvo va'amu a masijo jabesi nunire riravë'o ho nadi uvorëjo: Na diehi jöho majëhi'ejöjo. O rabu jöë majëhi'ejöromo nurunurumorëjo. Rabëni hesi bëhoho jö majëhi'irarije majaho rue'iramu evare majare God-ro ajëmiromo jöho röjëhi'iramu majëhi'arujëjo.

20 Bogo jemëhu jöho majëhi'irögoro a'i jemesi Vavu hesi Aru'ahohuro jöho simanore bojëmi'iramu jemëro jöho majëhi'arujëjo.

21 Röhu öhuro öho ae gö jabesi örire bojëminövo'aruëjo muo'amojoro. Vavuohuro aboji harihu'oho ëhi gemuoho ë'a'aruëjo. Aboji harihu'ohuro ri'öromo ae uë'iramu vëmu vavu'oho muo'amo'aruëjo.

22 Röhu jemëhu na uehorovevarujohuni ae aho'obëhe jaburo jemesi örire nue huodëgoruomö'ajëjo. Röhu ae rahu biririvoromo mae uehorovevobe va'öjuvo maja barë'iröhe maja rovë'iroho God-ro baejëvoromo manö bamëvo'ajëjo.

23 Jemë amo göre raromamu aehu sisë vaejëvë'oho huruomoromo amo göro va'onövorëjo. Aveho na jö mae uëvajëjo. Jemë Israel sa'are amo göre göroho bogo va'o barëjë'e God-are A Maho na ö'ejöjo.

24 Jö hejaruje aribövioho jö röjëhijaje aho na bogo iosiremiromo masijoho jëvajëjo. O mu vaejeharuje aribövioho mu simano vaejaje aho na bogo iosiremiromo döroho jëvajëjo.

25 Èhuni jö röjëhijaje aho ae göehu huë vavaene bojemego naehu baejajëhi nasi jö hejaruje ariböviehu ëhi baejë'oho iae mae höjo. O mu simano vaejaje aho ae göehu huë vavaene bojemego naehu baejajëhi nasi mu vaejeharuje ariböviehu ëhi baejë'oho iae mae höjo. Èhesi bëhoho agano muebejëvaje aho na aehu uevaroho: Ja Beelzebul a sisë jabesi böröme javajë uevarohuni ëhuni ëhi jië'e ariböviohuro jemë nasi agane jëvë'ego jö sisë bëhi mae uëruomö'ajëjo.

26 Jö sisëho ëhi uëruomö'ajëjo röhu nadi juhuonëmirëjo. Mue rabe gurihiro jiajoho aho'obëhe va'orahoro jio'a'ajëjo. Rabe rabe subivëhajoho aho'obëhe ma-samaro jio'a'ajëjo.

27 Èhi jië'e jiaje naehu jöë rabe vahi'e saginiëri majëhijajoho ijönö maja'e ë jöho ma-va'orahoro majëhirëjo. O saginiëri hia'ire majëhijego hejarujoho ëho amo riroro majëhirëjo.

28 Röhu nadi uvorëjo: Èariböviohuro anaguö'ajëromo juhuonëmiromo jabesi jöho uehorovorëjo. Jemesi sinohemu muo'amë'oho eni jëvo'i jemesi aru'aho muo'amë'oho bogo eni jioruomë'e jiaje ëhuni jabumë nadi juhuonëmi'i God juhuonamiromo hesi jöho uehorovorëjo. Huhu jemesi aru'ahohu'o sinohu'o vëni'e öri ari'ere babu'öjëvoromo ijumëvo'iröhoho hu eni jiajëjo. Èaho juhuonamiromo hesi jöho uehorovorëjo.

29 A'i aho bövioho bise'oho nadi juhuonëmirëjo. Èhesi bëhoho God-ro uvajëjo: Jemë iae masije jëvajëromo avo'avoho muebejëvaje höjo. Monie

ma-bisemu bu'öromo ugo inine niö'i imo'arujëjo. Röhu jemesi Vavuoho bogo uvaje höjo: Ugoho ininego bogo muebe'ejöjo. Bogo ehioho uvo'i ugoho muebe'amë'ego ugoho bogo gemu vadu'oho ëma vuovoromo ö'idöroho jioromo sa'aroho rireromo rovarue höjo. Vavuohuro gëvego rireromo rovarue höjo.

<sup>30</sup> A'i jemë God-ro jemesi bövie bise'e aho'o muebejëhoromo röhu jemesi simano uoho ëhu'o adahëhoromo avo'avoho muebejëhaje höjo.

<sup>31</sup> Ehuni nadi juhuonivorëjo uge aho'obëhe jio'amajoho ëho ma-jianovo'i ae gemu gemu jemë masije jëvë'e jiaje.

*Noehu Iesuarë jö a nunire huruoho majëhi'iröhe jö Iesuhu jövadohoje.*

<sup>32</sup> Ae rahu a nunire uvë'oho: Na Iesuarë ae jevajë uvë'oho naro nasi Vavue ö'idöre hijaje hesi nunire uvo'ejöjo: Ehö nasi ae magonahe höjo.

<sup>33</sup> O ae rahu a nunire uvë'oho: Na bogo Iesuarë aehu jevajë uvë'oho naro nasi Vavue ö'idöre hijaje hesi nunire uvo'ejöjo: Ehö bogo nasi aehu magonahehö höjo.

*Iesuhu rovë'ëro ëhu'ëro ae adovoromo göehu jöe gö göehu jöe gö uehorovarue jöhoje.*

<sup>34</sup> Nadi uvorëjo: Nöröhu rovade hesi bëhoho ajamuego sa'ae aho'obëhe iro muorovo'oho vuonugo'i ma-huë baerovoromo gemuoro raromö'iröhego rovade höjo. Na bogo ehuniho rovode höjo. A'i naehu rovode hesi bëhoho naro nasi jöho majëhijego aëro heromo jöe gö gö uehorovoromo muorovo'iröhego rovode höjo.

<sup>35</sup> Naehu rovode hesi bëhoho nasi jöhuni harihohuro vavuoho nue huodivo'i abojohuro vëmoho nue huodivo'i ajohuro ajoho nue huodivo'iröhego ehuni rovode höjo.

<sup>36</sup> A nu huodëgarue aribövioho jabesi agane gemuoho jioruomö'ajëjo.

<sup>37</sup> Ae rahu ja vavu o vëmu nuninö bamo'i na dejonö bamevë'oho nasi a ma jio'iranoho bogo eni javo'ajëjo. O ae rahu harihu o aboji nuninö bamo'i na dejonö bamevë'oho nasi a ma jio'iranoho bogo eni javo'ajëjo.

<sup>38</sup> Ae rahu ja bogo uvë'oho: Iesuarë jöëni vi'ehe huë vavaene javoje rabe baeromo guomevë'oho iae hesi hö uvoromo bogo korosi hesi i'u banigojiomanovoromo nasi ijore ijore juvë'oho nasi ae jio'iranoho ja bogo eni javo'ajëjo.

<sup>39</sup> Ja jasi sinohuni uehorovoromo biririvoromo ave sa'are hi'i ehemu uehorovë'oho ijönöho guomo öriro va'a'anuejo. O ja nasi jöëni guomë'oho ijönöho maro hi'a'anuejo.

*Mu ma vaejarue hesi mana bae'iröhe jöhoje.*

<sup>40</sup> Jemëhu nasi jö majëhibe va'ë'iroho ae rahu jemë rajëhiromo baejëvë'oho ehuro na'o rajëhiromo baejevorumaje höjo. O ae rahu na rajëhiromo baejevë'oho ehuro remö'öjamu rovode ahu'o rajahiruomaje höjo.

<sup>41</sup> Ae rahu uvë'oho: Ehö jö God-aro baeromo majahuijaje ae höromo rajahiro baejë'oho ehuro jö God-aro baeromo majëhiruomaje ariböviehu suvoro ujuoharue ëhi jïë'e suvoro God-are örire ujuohoruomö'ajëjo. O ae rahu uvë'oho: Ehö ma-mae höromo rajahiro baejë'oho ëhi jïë'e a maehu suvoro ujuoharuëhi ëhi ujuohoruomö'ajëjo.

<sup>42</sup> Ave jöho na jö mae uë'ië'ajëjo. Ave nasi ijorajoho ae ma-bise'ehu ö'amu aehu garomo uvë'o'ho: Ëaho Iesuare ijore ijore juvaje ae höromo ma-bisemu ajamiromo enatuore jovo baguso bojamijë'o'ho ë aribövioho jaburo iae manaho ujuohoruomo'ajëjo.

## 11

*Bapataeto vaejaje ae John-hu ae rëmö'öjamu rueromo Iesu jö ua gavare jöhoje.*

<sup>1</sup> Iesuro hesi aribövie 12 jabesi örire jöho majëhinugoromo va'adoho ë bëhire jio'amaje amore amore jöho majëhibe bëhoho röjëhibe juvadeje.

<sup>2</sup> Iae John bapataeto vaejaje ahuro savoji gagore hiromo hejade uavamu: Kerisoro muoho ëhi vaejaje hö uavamu hegorovo hesi ijorajoho rëmö'öromo uëvadeje: Va'oromo ëhi ëhi Iesu ua garëjo.

<sup>3</sup> Ua garëjamu va'oromo Iesu uavareje: No uvaruëjo: God-ro a böröme nugö'ö'iramu nosi örire rue'a'ajëjo. Na ja ë aho javajëjo. O na no muebe'ejarejo ae göëro rueröhego.

<sup>4</sup> Ëhi uavamu hegorovo Iesuro uëvadeje: Va'oromo diehi hejarujoho gavarujoho John majahirego he'irajo.

<sup>5</sup> Uarëjo: Nöröro ae nuni sisë'o'ho ajëmijego mae uheriharue höjo. Höru sisë'o'ho ajëmijego mae jijiharue höjo. Jomo'e aho ajëmijego marëjëvoromo jabesirire sisë sisëho barëjëhaje höjo. Hia'i sisë'o'ho ajëmijego hia'e dadovoromo jöe hejarue höjo. Vuovë'e aho ajëmijego i'ovarue höjo. Bogo eni jië'e aribövioho ajëmiromo majëhijego God-are jö maho hejarue höjo. John ëhi majahirëjo.

<sup>6</sup> Röhu John o ae rahu birivoromo nasi örire mae uehorovevë'o'ho ë ahuro maho hi'a'ajëjo.

<sup>7</sup> Maho hi'a'ajëjamu hegorovo vuonorö'ö va'areje. Va'amu gavë'i Iesuro ë hesi bëhire gagovare aribövioho John-are jöho majëhiromo uëvadeje: Urimë'ioho jemë rabe ga'irögoro John-hu a rumo'e sa'are hijajiroho ëho va'onövarije höjo. Ijo rudu burehu huosihego arue anume va'aje ëhi uehorovaje aho na John ëhi jië'e ae jiamu ga'i va'arije höjo. Bogajo.

<sup>8</sup> O diehi jië'e aho ga'i va'arije höjo. Na John niögu mabëhe sanu'e io'amë'e ae jiamu ga'i va'arije höjo. Röhu ëhi jië'e niögu ma io'amarue aribövioho bogo a rumo'e sa'aroho raromo'i a masijehu raromarue os-aremu raromarue höjo.

<sup>9</sup> Ëhi jië'o'ho jemë rabëni a rumo'e sa'aroho va'arije höjo. Na John jö God-aro baeromo majëhijaje ae jiamu ga'i va'arije höjo. Io'ajo. John iae hu ëhi jië'e ae höjo. Röhu aveho hehëjo. Jö God-aro baeromo majëhinövare a ioro'ioroho iosirëmiromo John hu börömo höjo.

<sup>10</sup> Iae ë a hesi jöho God-are surire ëhi jajivoromo uvë'e höjo:

Ave aho God nasi jö bajuvaje aho höjo.

Ja va'ië'iroho naro hu urimo nugö'ö'iramu va'oromo ae uë'a'ajëjo jaehu va'irane öroho iogorahoröhego.

<sup>11</sup> Ave jöho na jö mae uë'ië'ajëjo. Ave sa'are raromobe rovere aho ae gemu vadu'o'ho John bogo iosiramiroho börömo höjo. A'i God-hu böröme namiromo muebejëvego hesi aharire raromarue a inino mahuro John iosiramiroho döroho jioruomajëjo.

<sup>12</sup> Urimo John bapataeto vaejavuajaje aehu a jö majëhijadevare evare aëro aevoromo daruge aho'o bojamiromo birivoromo öroho jiovobe

rueruemë'e höjo ëhuro God-ro böröme namiromo muebejëvego hesi aharire jëvoröhego. Jaruvoho ëhi gemuoho ë'oruomaje höjo.

<sup>13</sup> Aevo'ioho Moses jögoru bojëmade ahuro God-hu böröme namiromo ae muebejëvo'iröhe jöho majëhijamu jö God-aro baeromo majëhibe rovare ariböviohuro ëhi gemuoho ë'obe rovaroho röhu ijo tugoho'ioho John-ro ë jöho majëhijade höjo.

<sup>14</sup> Röhu urimo majëhiromo uënövare höjo: God-hu böröme namiromo muebejëvego ga'irarije ë hesi urimo ae gö rue'a'ajëjo. Ëahuro Elijah-hu vaenövade mue gemuoho barue'ajëjo. Jöho ëhi majëhinövare höjo. Röhu jemë mae uehorovo'i nëgë'o'ho uvorëjo: Elijah-are mu barueröhego uövuare aho iae John höjo.

<sup>15</sup> Ae rahu ja God-are jö hejanue ae javë'o'ho bëhoho nahoromo birohönëjo.

<sup>16</sup> Röhu jaruvore raromaruje aribövi jemesi jöho uhu'e majëhi'ie'ajëjo. Amo ririre raromarue jö bijönimoromaje asisö'o'ho jëvanovajëjo. Amo ririre raromoromo asisö'o ioro'iorohuro ioro'ioroho uvëvoruomajëjo:

<sup>17</sup> Noehu aninivoromo jemëni virikö huosihëharoho jemëro bijönimoromo bogo ejahuoromo javavarije höjo. Noehu aninivoromo huë vavaeni'e jö iaroho jemëro bijönimoromo bogo ejahuoromo nierusuburu'e bamarije höjo.

<sup>18</sup> Ëhesi bëhoho John-ro rueromo God uehorovoromo ma-hi'i ioho jovoho bogo inövade höjo. Ëhi'onövadoho jemëro ë jö bijönimarue asisö'o'ho va'ëne bijönëgamu John-are jöho bogo ejaho'i sisë'i uehorovoromo uvonövarije höjo: Aru'aho sisë dëre jje'ëro ëhu'ëro ioho jovoho bogo ijaje höjo.

<sup>19</sup> O God-are A Maho naro rueromo ioho jovoho ma-ijaje höjo. Ëhi ë'ajoho jemëro ëhu'o bijönimoromo uvaruje höjo: Nörö gahëjo. Ioho mahunö'e iromo vörö'e jovemu ijaje höjo. Hu vajiohu'e tax baejarue ah'u'o a sisë ioro'iorohu'o ëho jabesi aemo'aeme höjo. Jemëro John-are muohu'o nasi muohu'o bijönimaruje höjo röhu no God-are uehoro maho baej'ëro muoho vaejarue höjo. Ëmuoho aëro garomo uvoruomo'ajëjo: God-are uehoroho iae mae höjo. Ëhu'ëro muoho vaejare höjo.

*Ame göehu göehu Iesu bogo ma uehorovare jö Iesuhu jövadohoje.*

<sup>20</sup> Ëhi uëngoromo ame gö gö birëgadeje ë hesi bëhoho urimë'i huhu a ajëmiromo darugo'e mu masijo vaebe ë amore amore juvamu jabuhu bogo huotorovoromo hu mae uehorovarohuni. Birëgoromo uëvadeje:

<sup>21</sup> Chorazin'o Bethsaida'o amo rajohumë vaevë'o'ho jemë sisëro revo hesi jëvajëjo. Naro darugo'e muoho jemesi amore vaejago garomo röhu nasi jöho bijönimaruje höjo. Naehu darugo'e mu jemesi amore vaejodoho Tyre amore o Sidon amore vaejago ga'ibejarëjo mami gö'e jabesi sisëni huë vavaene baeromo niögu sisë io'amoromo uonëro buerovoromo uehoro sisëho vuonugo'i uehoro mae baeruomo'ibejajo.

<sup>22</sup> God-hu i'u bojëmi'iröhe maja rovë'iroho Tyre o Sidon rajo jabuhu i'u bae'iröhoho ma-jianovo'i jemëro i'u börömo maho bae'a'arujëjo. Ëhuremu uehorovorëjo.

<sup>23</sup> Röhu Capernaum amo rajohumë jemëro jemesi sivue uehorovoromo uvaruje höjo: Nosi ihoho ö'idöre ajiomo'ajëjo. Bogo ëhioho jio'i sa'aro bel'a'ajëjo. Ëhesi bëhoho naro darugo'e muoho jemesi amore vaejago garomo röhu nasi jöho bijönimaruje höjo. Naehu darugo'e mu jemesi amore vaejodoho Sodom amore vaejago ga'ibejarëjo mu sisëho vuonugo'ibejarëjo ëhuro jabesi amoho bogo sisërë'i jaruvoho ëhi mae jio'ibejajo.

<sup>24</sup> God-hu i'u bojëmi'iröhe maja rovë'iroho Sodom rajo jabuhu i'u baeröhoho ma-jianovo'i jemëro i'u börömo maho bae'a'arujëjo. Èhuremu uehorovorëjo.

*Iesuaro va'oromo nuho'iröhe jöhoje.*

<sup>25</sup> Iesuro ëhi uënuqoromo evare God uavadeje: Apo ja ö'idörohu'o sa'arohu'o muebejanue ae javajëjo. Naro jasi örire huë mae uavajëjo. Rabëni hesi bëhoho jero gavane nuni aji'e a masijohuro uvoruomamu: Nosi simanoho mae javuoromo bövie bise'e ga barëjë'e javuajë uvamu gëgorovo jero jasi jöho jabesi örire subivëhë'e javajëjo. A'i gavane bogo gavë'e ariböviohuro bogo döroho bamorovo'i jöho he'i nëgamu gëgorovo jero jasi jö bëhoho röjëhijë'e javajëjo.

<sup>26</sup> Apo iae mae höjo. Jero jasi nimoromo ë'ane höjo.

<sup>27</sup> God ëhi uanugoromo ë aribövioho uëvadeje: Nasi Vavuohuro jöe aho'o bojëmijë'e höjo muebe'irodego. Vavuohuro gemuëro Harihoho na avoho gevaje höjo. Harihoho naremuëremu Vavuoho avoho gavaje höjo. O Harihu naehu di aribövi röjëhi'i negë'ohuro ehuro ë ariböviohuremu röjëhijego jabu'o Vavuoho gavarue höjo.

<sup>28</sup> Röhu jemë ae rahu sivohoromo i'u'e mu vaejamu u'uvëvë'o ruerego naro jemesi dë vövöbajo'oho sasohëho'iröjo.

<sup>29</sup> Na sanu'e mae jevë'e jiaje ehuni nasi muoho banigojiomoromo nasi jöho henövorëjo. Èhi ë'ë'o jemesi dë vövöbajo'oho ma-mabëhe sasohëvo'ajëjo.

<sup>30</sup> Rabëni hesi bëhoho nasi muoho i'uoho bogojio'i sase höjo.

## 12

*Jew rajehu nuharue maja hesi jöhoje.*

<sup>1</sup> Èhi'oromo Jew rajo jabesi nuho majaho rovamu gagorovo Iesumëro mure jijihareje. Jijihoromo hesi ijorajo ömo'ömohuro hömëvamu ioho babovoromo ue'ahobe va'areje.

<sup>2</sup> Babovoromo ue'ahobe va'amu gagorovo Pharisee ariböviëro Iesu uavareje: Asë'e jaruvoho nuho majae höjo. Jasi ijorajo ömo'ömehu i avoharuoho ëho nuho maja hesi jögoroho aharuëjo.

<sup>3</sup> Aharuëjamu Iesuro uëvadeje: David nosi a böröme jionövade höjo. Röhu hu'o hesi ariböviohu'o jabumë hömëvamu hegorovo huhu ë'ade jö God-are surire adaharijoho ëho diehi'oromo bogo avoho uehorovarujëjo.

<sup>4</sup> David-ro God-are osa mare va'ade höjo. Va'oromo God-are nunire bahijare ioho hu'o hesi ariböviohu'o ue'ahare höjo. Èioho bogo David'o hesi ariböviohu'o ue'aho'iröhoho jio'i hesi ma-priest-ëremu ue'aho'iröhe ie jiade höjo. Röhu jabuhu ue'aharohuro ehuro jögoroho ahare höjo. Röhu ë hesi jöho bogojiade höjo.

<sup>5</sup> Ave jöhu'o Moses-hu jögoru surire jajivadoho jemë diehi'oromo bogo avoho adaharije höjo. Nuhu maja rovë'iroho priest ariböviohuro God-are osa börömo hesi muoho vaeromo ehuro nuho maja hesi jögoroho ahoruomaje höjo. Röhu God-are osa börömo hesi muoho vaejaruëro jië'ëro ehü'ëro jöho bogojiajëjo.

<sup>6</sup> Naro jemë uëvajëjo: Mu i'ëro aviae rueromo God-are osa börömo hesi muoho iosiramijë'e höjo. Ehuni nasi ariböviehu i babovoromo ue'aharuoho jöho bogohöjo.

<sup>7</sup> God-are surire jöho jajivoromo uvë'e höjo: God-ro uvajëjo: Na negajëjo a huë bae'irarije muoho vaejëro mi suvuoroho bogajo. Èjö hesi bëhoho avoho

he'ibejarijëjo ave övo uno'e aribövioho bogo uë'ibejarijëjo: Mu sisë ë'ë'e jëvajëjo.

<sup>8</sup> God-are A Maho naro nuho maja hesi jögoroho muebejaje höjo.

*Övo guomahë'e a Iesuhu ajamade jöhoje.*

<sup>9</sup> Iesuro ëhi uënuqoromo va'adeje. Va'oromo Jew rajehu God rajahijarue osare rumo va'adeje.

<sup>10</sup> Amo ë osare övo hitahi guomahë'e aho ë hijë'e jiadeje. Hijamu gagorovo aëro ë raromë'ëro uehorovoromo uvareje: È'ego noro Iesuarë jö sisëho nahoromo jögoru muebejarue aribövioho majëhijarëromo Iesu uavareje: Nuho majare a jabesi sino ajëmijë'oho na ëhuro no nosi jögoroho aharue höjo o bogajo.

<sup>11</sup> O bogajamu Iesuro uhu'e uëvadeje: Jemë ae gemu sheep gemu javë'oho röhu nuho majare guare beva'ë'oho na ja ajamiromo io bamonëjo o bogajo. Io'ajo. Nuho majaroho iae io bamo'anuejo.

<sup>12</sup> Röhu sheep-oho ma-jianovo'i aho bërömo mae höjo. Èhuni nuho majare a ajëmijë'oho iae mae höjo.

<sup>13</sup> Iesuro ëhi uënuqoromo ë övo guomahë'e aho uavadeje: Jasi övoho nugö'öjëjo. Èhi uavamu hegorovo övoho nugö'öjamu marëromo övo gö jiajëhi ëhi jiadeje.

<sup>14</sup> Mae jiamu gagorovo Pharisee ariböviohuro va'oromo Iesu anoröhe jöho mevoruomadeje.

*Iesu hu God-are mu vaejaje a mae jiaje jöhoje.*

<sup>15</sup> Iesu anoröhe jöho mevaruë uvamu hegorovo Iesuro ë amore jioromo va'adeje. Va'amu gagorovo ae aho'obëhe hu rihromareje. Rihromamu huro guomo guomo'e aribövioho aho'o ajëmamu mae jëvadeje.

<sup>16</sup> Mae jëvo'ego uënövadeje: Naehu jemë ajëmijode jöho bogave aho uë'irarijëjo.

<sup>17</sup> Èhi uënövade jö hesi bëhoho jö God-aro baeromo majëhinövade ae Isaiah-hu jajivadëhi ëhi jioröhego. Isaiah-ro God-are surire jajivoromo ëhi uvadeje:

<sup>18</sup> Naehu baejë'ëro mu vaejaje aho gahëjo.

Nasi dë vövöbajo'e aho'o uehorovego dë mae jevaje aho aviae höjo.

Naro nasi Aru'ahoho hesire bamaho'ejöjo.

Bamaho'iramu ae aho'obëhe dinö'e dinö'e raromaruoho huro nasi mu ma hesi jöho majëhi'ajëjo.

<sup>19</sup> Hu bogo giagiavoromo darugo'oho uvo'a'ajëjo.

Aho hesi huëho amo riroho bogo he'a'aruëjo.

<sup>20</sup> Ijo adehu aho bu'öjanovo'ië'iroho hu bogo ahö'ö'ajëjo.

Irehu duorohanovo'ië'iroho bogo duoho'a'ajëjo.

Èhi ë'obe va'ojuvo hujeji evare hesi mu mahuro ruahö'öjëvoromo dö maro jio'a'ajëjo.

<sup>21</sup> Èhi jio'iramu ae aho'obëhe dinö'e dinö'e raromaruohuro hu uehorovoromo uvoruomo'ajëjo: Iae huro gemuëro ajamui'ajëjo.

*Iesuhu Satan-are aribövi a dëre jio'amamu rarovö'öjëvadoho hu bogo Satan-are darugoho baeromo ëhioho ë'adeje. Èhesi jöhoje.*

<sup>22</sup> Èhi'amu aëro ae gemu hu'irae baeromo rovareje. Èaho Satan-are a sisëro dëre abo hijë'ëro ëhu'ëro nune tugohahoromo bitare tövahë'e jiadeje. Èaho hu'irae baeromo rovamu gagorovo Iesuro a sisë dëre jiajoho rarovö'öjamu bitaroho nunoho mae jioromo jöe jövoromo uherihadeje.

<sup>23</sup> Ĕhi ajamamu gagorovo ae aho'obēhe jiodudu'iraeromo uarovareje: Ave aho na hu a bōrōme David-are uje no ajamui'irōhe aho hōjo. O rahuo hōjo.

<sup>24</sup> Ĕhi atoruumamu hegorovo Pharisee aribōviahuro uēruomadeje: O bogo Ĕhi jiē'e a maho jioromo ē'aje hōjo. A'i Beelzebul aru'aho sisē jabesi bōrōmohuro vōrōho bojamego Ĕhuro a dēre aru'aho sisēho rarovō'ō'amaje hōjo.

<sup>25</sup> Ĕhi uēruomamu Iesuro gēromo uvadeje: Ĕaribōviahuro nasi jōho Ĕhi uehorovaruēromo uhu'e uēvadeje: Sa'ae gemuehu adovoromo jabesi ar-ijo'arije muorovē'oho barērovo'ajējo. Ame gemuehu o agane gemuehu adovoromo jabesi arijo'arije muorovē'oho bogo biririvo'li barērovo'ajējo.

<sup>26</sup> Ĕhuni Satan-ro ri'ōromo hesi aribōvi a jabesi dēre jio'amajoho rarovō'ōjēvo'ibejajo Ĕhuro hesi aribōviahuro'lo muorovo'ibejajo hesi darugoho muoho uehoroho diehi'oromo biririvoromo nami'ibejajo.

<sup>27</sup> Rōhu jemēro uvarujējo: Sisē a bōrōmohuro nōrō vōrōho bojamego hesi sisē aribōvioho rarovō'ō'amaje hōjo. Ĕhi jiē'oho na jemesi aribōviahuro sisē a bōrōmo hesi vōrōho baeromo rarovō'ō'amarue hōjo. O diehi'oromo ē'arue hōjo. Jaburo uē'a'aruējo: Sarerivarujējo. Aho bogo sisē a bōrōmo hesi vōrōho baeromo Ĕhioho ē'arue hōjo.

<sup>28</sup> A'i naro God-are Aru'aho hesi darugoho baeromo rarovo'amaje hōjo. Ĕhuni uvorējo: God-ro aevoromo bōrōme namiromo nosi ōrire muebejavuajēro jiē'ēro Ĕhu'ēro ē'ajējo.

<sup>29</sup> Rōhu aehu darugo'e a hesi osare rumo va'oromo hesi mae sisē ujuohaho va'iē'iroho bogo Ĕma ujuohaho va'irōgoro urimo darugo'e aho guduamoromo tōvonugoromo evare hesi inōmo inōmoho ujuohaho va'a'ajējo. Naro Satan Ĕhi ruahō'ōjaje hōjo.

<sup>30</sup> Ae rahu bogo nasi a jiē'oho Ĕho huro na'lo muorovaje hōjo. O na bogo ajemiromo nasi aribōvi gagovē'oho Ĕho huro arua anumiae nugō'ō'amaje hōjo.

<sup>31</sup> Ĕhuni uēvajējo: Aehu mu sisē vaejē'oho God-are iho ijumarue jō sisē atē'oho aho'lo God-ro uehorovoromo vuonugēho'ajējo. A'i God-are Aru'aho hesi iho ijumē'oho Ĕhi jiē'e jō sisēho God bogo uehorovoromo vuonugo'ajējo.

<sup>32</sup> God-are A Ma nasi jō sisē'li atē'oho God-ro uehorovoromo vuonugo'ajējo. A'i God-are Aru'aho hesi jō sisē'li atē'oho Ĕho God bogo uehorovoromo vuonugo'ajējo jaruvo majahu'lo maja ijohu'lo.

*Aho jō jōvajire heromo uvarueje: Ĕa hesi dē vōvōbajo'oho mae hōjo Ĕ aho sisē hōjo. Ĕhesi uhu jōhoje.*

<sup>33</sup> Ijo bajo mae uro'li nagē'oho ijo ma hesi bajoho uro'a'anuējo. O ijo sisē javē'oho bajo sisē uro'a'anuējo. Ijoho bajoro garomo uvo'a'anuējo: Ĕijoho mae hōjo Ĕho sisē hōjo.

<sup>34</sup> Sigobu aboji harihu'e jēvanovajējo. Ijo sisē va'ēne jēvē'oho jemē diehi'oromo ijo bajo manō'e raeromo jō mae atorējo. Bogo eni jēvajējo. Uehoro maehu o uehoro sisēhu dē vōvōbajo'ere rarovēvajoho Ĕhi jiē'e jōho jō'ēro atarue hōjo.

<sup>35</sup> A maho uehoro maēremu jēvē'ēro jō maemu atarue hōjo. A sisēho uehoro sisēremu jēvē'ēro jō sisēmu atarue hōjo.

<sup>36</sup> Naro jemē uēvajējo: Jō sisē rabe rabe Ĕma atē'oho mevēvo gērōhe majaho rue'iramu God-ro uē'a'ajējo: Ĕjōho rabēni atarije hō uē'iramu mana ua'a'arujējo.



<sup>37</sup> Ae gemu gemu jasi jöre garomo ua'a'ajëjo: Ja a mae javajëjo. O jasi jöre garomo ua'a'ajëjo: Ja a sisë javajëjo.

*Ariböviehu Iesu bogo ma uehorovoromo huhu darugo'e mu vaejoro dinamare jöhoje.*

<sup>38</sup> Ëhi jövamu hegoroovo Jew rajo jögoru öri röjèhijarue ae gö gö o Pharisee ae gö gö èho jaburo ri'öromo uavareje: Tisa no naguajëjo ga'i jero darugo'e muoho vaejogo èhuro uvo'iröhëro: Ja daruge God-aro baeromo muoho vaejanue höjo.

<sup>39</sup> Vaejanue höjamu uëvadeje: Sareri'e aribövi sisë jëvajëjo. Magonahehu hesi baru vuonugo'i ma-juvajëhi jemëro èhi God vuonugo'i mue gö gö uehorovaruje höjo. Jemë rabëni darugo'e muoho ga'i nimarujëjo. Na èhi jië'e muoho bogo vae'i a'i jö God-aro baeromo majèhinövade ae Jonah-hu God-are mu börömo röjèhijade èhi jië'e muohuremu röjèhi'ejöjo. Mue gö gö bogajo.

<sup>40</sup> Jonah-are mu börömo hesi bëhoho jovo mi börömhuro Jonah nimu'öjamu abueromo hesi dëre hijade höjo. Hiromo majae niö'i gemu vahie niö'i gemu hesi uhure ègubijohamu höröjade höjo. Höröromo rovadëhi God-are A Maho naro sa'a gagore abo hiromo majae niö'i gemu vahie niö'i gemu hesi uhure höröromo rue'ejöjo.

<sup>41</sup> Nineveh amo rajohuro ave jaruvore raromaruje ariböviohu'o gemu mae ri'öromo God-are nunire riravoruomo'ajëjo. Riravo'iramu God-ro jabesi mu maho garomo jemesi mu sisëho garomo jemë uë'a'ajëjo: Nineveh amo rajehu vaejare èhi jië'e mu maho bogo vaejè'ego èhuni na uëvajëjo: Jemë sisë'e aribövie jëvaje sisëro va'ohëjo. Èhesi bëhoho è Nineveh amo rajohuro mu sisë vaeruomë'ëro hejare Jonah-ro God-are jöe majèhijamu hegoroovo jabesi uehoro sisëho vuonugo'i uehoro mae baejare höjo. Jonah ma-bise'o jioromo jö majèhijadoho Nineveh amo rajohuro hesi jöho ejahare höjo. A'i naehu hu iosiramiro mo börömo jioromo jö majèhijajoho jemë bogo ejeharuje höjo. Èhu'ëro jië'ëro mevo gëröhe majaho rue'iramu jemë sisërëjëvo'ajëjo.

<sup>42</sup> O èho majaho rue'iramu arue sa'a göre börömo vaenövade magonahohuro ave jaruvore raromaruje ariböviohu'o gemu mae ri'öromo God-are nunire nami'a'ajëjo. Nami'iramu God-ro sa'a gö rajo magonaho hesi mu maho garomo jemesi mu sisëho garomo jemë uë'a'ajëjo: Èmagonahehu vaejade èhi jië'e mu maho bogo vaejè'ego èhuni na uëvajëjo: Jemë sisë'e aribövie jëvaje sisëro va'ohëjo. Èhesi bëhoho è sa'are börömo vaenövade magonahohuro hesi sa'aho vuonugo'i öri ègoböviro rovade höjo a böröme Solomon-hu nuni aji'e jö jövajoho he'iro. Solomon-hu ae ma-bisemu börömo jioromo jö majèhijajoho è magonahohuro he'i nimade höjo. A'i naehu Solomon iosiramiro mo börömo mae jioromo jö majèhijajoho he'irarijoho jemë bijönëgajëjo. Èhu'ëro jië'ëro mevo gëröhe majaho rue'iramu jemë sisërëjëvo'ajëjo.

*Satan-are a sisëhu a hesi dëre vuonorö'ö abueromo ijumahade uhu jö Iesuhu jövadohoje.*

<sup>43</sup> Röhu Satan-are mu ajamijaje aru'aho sisëhuro ae gemu hesi dëre hi'a'ajëjo. Hiromo hörö va'a'ajëjo. Va'oromo jovo rumo'e sa'are va'oromo hi'iröhe röhoho nahobe juvojuvo bogo birohogorovo

<sup>44</sup> uvo'a'ajëjo: Na vuonorö'ö va'oromo hijode sionore röhu maho è hi'ejöjo. Èhi uvonugoromo vuonorö'ö va'oromo urimo hijade a hesi dëre

abueromo ga'a'ajëjo dë vövöbajo'o ho gagemu jio'i bibivoromo iogorë'e ma-mabëhe osa va'ëne jio'iramu.

<sup>45</sup> Ëhi jio'iramu gagorovo va'oromo Satan-are aru'aho sisë aho'obëhe söromo rue'a'ajëjo. Ëurimore ro hijade aru'ahoho a sisë höjo. Ijore huhu sörovade ariböviohuro hu iosiramiro mo jabumë sisë bëhi mae jioruomajëjo. Ëhu'ëro urimo sisë'i hijade aho ijonöho sisë bëhe hi'a'ajëjo. Jaruvore raromaruje aribövi sisëho jemë ëhi sisërëjëvo'ajëjo.

*Iesuare vëmu ömo'öme o ö ömo'öme rahumë jëvaje jöhoje.*

<sup>46</sup> Ëhi jövamu evare hesi vëmohu'o ö ömo'ömo hu'jaburo Iesu'o jöe ato'i nëgamu rueromo amonö riravareje.

<sup>47</sup> [Riravamu ae gemuëro ri'öromo Iesu uavadeje: Hë-ajo. Jasi vëmohu'o ö ömo'ömo hu'jaburo Iesu'o jöe ato'i nioromo amonö riravaruëjo.]

<sup>48</sup> Riravaruëjamu Iesuro uavadeje: Ja uehorovanuho nasi vëmohu'o nasi ö ömo'ömo hu'jaburo Iesu'o jöe ato'i nioromo amonö riravaruëjo.

<sup>49</sup> Ëhi uanugoromo hesi ijore ijore jijiharue aribövioho övëro röjëhijadeje ae aho'obëhe jaburo gëjoro. Hesi aribövioho röjëhiromo ae aho'obëhe uëvadeje: Aruëroho nasi vëmohu'o ö ömo'ömo hu'jaburo Iesu'o jöe ato'i nioromo amonö riravaruëjo.

<sup>50</sup> Ae rahu nasi Vavue ö'idöre hijaje aehu nimajëhi ëhi ë'ë'o ho ëhuro ë aribövioho nasi öe ma'ine vëme jioruomajëjo.

## 13

*Aehu i ujo sa'a mare sa'a sisëre riremade uhu jöhoje.*

<sup>1</sup> Ëmajae gemuore Iesuro osare jioromo va'oromo nume jovo e'u riröre abuejadeje. Abueromo God-are jö bëhoho röjëhi'i sa'aro hijadeje.

<sup>2</sup> Hijamu ae aho'obëhe ro tagavamu Iesu jovore boat gagore va'o hi'i ae aho'obëhe jovo riröre riravareje.

<sup>3</sup> Riravamu Iesuro uhu jöe majëhiromo ëhuro jöe aho'obëhe röjëhijadeje. Röjëhiromo uëvadeje: Iae ae gemuëro i uje ujuohoromo mure riremado va'ade höjo.

<sup>4</sup> Riremobe va'amu ujo ioro'ioroho örire rireromade höjo. Rireromamu gavë'i ugëro ro i barëjare höjo.

<sup>5</sup> Ujo ioro'ioroho munë uhunö jië'e sa'are rireromade höjo. Rireromoromo ma-burëro ri'amade höjo sa'aho munë döro ma-bisemu jië'ëro.

<sup>6</sup> Riromo dirumoho bogo ma io'amë'ëro majaëro rojomoromo anamu sahoriamade höjo.

<sup>7</sup> Ujo ioro'ioroho bibë'e resu resu'e sa'are rireromade höjo. Rireromë'ëro bibë'e resuohuro riromo ujo maho baba'amade höjo.

<sup>8</sup> Ujo ioro'ioroho sa'a mare rireromade höjo. Rireromoromo riromo bajoho rae'amade höjo. Uje gemu gemu röhu ioro'ioroho baje 100 rae'amo'i ioro'ioroho 60 rae'amo'i ioro'ioroho 30 rae'amade höjo.

<sup>9</sup> Ae rahu ja God-are jö hejanue ae javë'o ho bëhoho nahoromo birohönëjo.

*Iesuhu rabëni uhu'e majëhinövade ë hesi jöhoje.*

<sup>10</sup> Ëhi'amu Iesuare ijorajo ömo'ömo hu'jaburo rueromo Iesu uavareje: Ja ae aho'obëhe jö majëhijë'iroho ja rabëni uhu'o ho majëhijanue höjo.

<sup>11</sup> Rabëni uhu'o ho majëhijanue höjamu uëvadeje: God-ro böröme namiromo aho'obëhe muebejaje jöho urimoho subivëhade höjo. Ësubivëhade jöho huro hesi suvüore jemë bojëmijë'e höjo jemëremu he'i a ioro'ioroho bogo heruomoröhego.

<sup>12</sup> Ëhesi bëhoho aji'e jö javë'o'oho God-ro gö'o bojami'iramu baeromo bövi mae javo'ajëjo. O bogojavë'o'oho bisemu baejanoho God-ro ë uehoroho mu'uvaho'ajëjo.

<sup>13</sup> Ëhuni naehu uhu jöemu ë aribövi majëhijaje hesi bëhoho jabu gavaruoho bogo avoho gavarue höjo. Hejaruoho bogo avoho heromo simanoroho baejarue höjo.

<sup>14</sup> Jabumë ëhi jië'e aribövie jioruomajëjo. Jabesi jöho mami'e jö God-aro baeromo majëhinövade ae Isaiah-ro jajivoromo ëhi uvë'e höjo:

Jemë hemu he'a'arujëjo

röhu bëhoho bogo avoho he'a'arujëjo.

Jemë gaemu ga'a'arujëjo

röhu bëhoho bogo avoho ga'a'arujëjo.

<sup>15</sup> Ëaribövi jabesi dë vövöbajo'o'oho i'uhëgaje höjo.

Hia'o'oho tugohëhë'e höjo.

Nunoho sigohijëhë'e höjo.

Bogo ëhioho jëvo'ibejajo nunëro ga'ibejarëjo.

Hia'ëro he'ibejarëjo.

Dë vövöbajo'o'oho sasohoromo jöho bae'ibejarëjo

ëhuro jabumë huotorovoromo rue'ibejarëjo

naro avohëvego mae jëvo'ibejajo.

<sup>16</sup> Isaiah-hu jajivadëhi aribövi ioro'ioroho ëhi jioruomaje höjo. A'i jemë huë mae baejë'e jëvajëjo. Rabëni jemë nunëro garomo avoho gavaruje höjo. Hia'ëro heromo avoho hejaruje höjo.

<sup>17</sup> Ave jöho na jö mae uë'ië'ajëjo. Jemë gavaruje muoho o hejaruje jöho urimë'i jö God-aro baeromo majëhinövare ariböviohu'o a ma ioro'iorohu'o aho'obëhe jaburo nimoruomade höjo garomo he'iro. Röhu bogo garomo bogo heruomade höjo.

*I ujo sa'are riremado uhu jö Iesuhu huruoho majëhijadohoje.*

<sup>18</sup> Röhu aehu i ujo riremado uhu jö hesi bëhoho hehëjo.

<sup>19</sup> God-hu böröme namiromo muebejëvaje jöho ae rahu hia'ëremu heromo bogo avoho hejamu gavë'o'oho a sisë börömhuro rovaje höjo. Rueromo gavaje God-are jöho i ujo va'ëne jabesi dëre jiego garomo baeniëhiromo rori'o bu'öjaje höjo. Ujo örire rireromamu ugehu i barëjare jö hesi bëhoho ëhi höjo.

<sup>20</sup> O i ujehu munë uhunö jië'e sa'are rireromoromo riromo sahoril'amade jö hesi bëhoho aëro God-are jöho heromo ma-burëro nimorohoromo jöho ejaharue höjo.

<sup>21</sup> Ejahoromo jöho ma-döëremu baejë'ëro ëhu'ëro majae ma-bunemu mae uehorovoromo garöhe God-are jö uehorovaruohuni aehu sisë vaejëvamu gavë'o'oho o huë vavaene rovamu gavë'o'oho ma-burëro vuonugarue höjo.

<sup>22</sup> O ujehu bibë'e resu gemuore rireromade jö hesi bëhoho aëro God-are jöho hejarue höjo. Heromo ave sa'a hesi muohuni nurunurumoromo o sarerivoromo uvarue höjo: Inöme bövie bise'e masije höromo jabesi nuninö bamarue höjo. Bamoromo sa'arohemu uehorovaruohuro ëhuro God-are jö jabesi dëre jiajoho taemego jabumë bogo rae avoharue höjo.

<sup>23</sup> O ujehu sa'a mare rireromoromo baje 100 o 60 o 30 rae'amade jö hesi bëhoho aëro God-are jöho heromo avoho hejarue höjo. Avoho heromo rae avoharue höjo. Ioro'iorohuro ioro'ioroho iosirëmiromo mu ma-mabëhe vaejarue höjo.

*Resu sisëhu iruno'o ma hesi gemuore ri'amade uhu jöhoje.*

24 Iae Iesuro uhu jöe gö'o majëhijadeje. Majëhiromo uëvadeje: Ae gemuehu ujo ma riremoromo ë'adëhi God-ro böröme namiromo hesi öri ari'oho ëhi muebejaje höjo. Ae gemuëro mure va'oromo iruno'e ujo maho riremobe va'ade höjo.

25 Ëhi ë'ë'ëro ae aho'obëhe momorö'öjë'e jiamu gagoro mu arijo'ohu'o muorovaje ae gemuëro mure rovade höjo. Rueromo i va'ëne resu sisëho i ujo riremadiire ë riremonugoromo va'ade höjo.

26 Ëhi ë'ë'ëro iruno'oho riromo baje raejamu gavë'i resu sisëhu'o riromo rae'amade höjo.

27 Resu sisëhu'o rae'amamu gagorovo mu arijo'o hesi mu vaejarue ariböviohuro rueromo uavare höjo: Asë'e ja ujo mae jasi mure riremame höjo. Diehi'oromo resu sisëhu'o rijade höjo.

28 Uëvade höjo: Na'o muorovaje ahuro ë'ade höjo. Ë'ade höjamu uavare höjo: Ëhi jïë'oho na ja nagajëjo no va'oromo resu sisëho ravojöro.

29 Uëvade höjo: Bogajo. Jemëro resue ravo'ihöromomo iruno'ohu'o ravo'amojöëni bogo ëhioho ë'a'arujëjo.

30 Ëhuni iruno'ohu'o resuohu'o nugego ëhi gemu mae ri'irajo gagovo'iröhe majaho rue'iröhe höjo. Ëmajaho rue'iramu iruno'e gagovarue aribövioho naro uë'ejöjo: Urimo resuoho ravoromo huhoho'amorëjo vëniro huol'irarije. Amo evaro iruno'oho gagovoromo ujuoho va'oromo nasi iruno'o osaro bahirëjo.

*Ijo hisue mustard-hu ëgovaje uhu jöhoje.*

31 Röhu uhu jöe gö'o majëhiromo uëvadeje: Ijo hisu ihe mustard ujehu börömororomo ëgovajëhi God-ro böröme namiromo ae gö'o gö'o ëhi gagovoromo muebejävobe va'a'ajëjo. Ae gemuëro mustard ijo hisu uje gemu baeromo hesi mure öjade höjo.

32 Röhu bajo ioro'ioroho ma-jianovo'amo'i a'i ë mustard ujoho biseharihe höjo. Ëhi höjo röhu riromo ëgovoromo ijo hisu ioro'ioroho iosirami'amoromo ijo va'ëne jiaje höjo. Ijo va'ëne jiego ugëro rueruomoromo ë ijo hesi adore ijue vae'amarue höjo.

*I dë huaje osehu ire rumorovade uhu jöhoje.*

33 Ëhi majëhinugoromo uhu jöe gö'o majëhiromo uëvadeje: God-hu böröme namiromo muebejävaje öroho aviëhi höjo. I dë huaje osehu ire rumorovajëhi God-hu böröme namiromo muebejävaje muohuro sa'ae aho'o ëhi rumorovobe va'aje höjo. Magonahe gemuëro ie aho'obëhe gagovoromo i dë huaje osoho i gemuore bamoromo iohu'o buarohade höjo. Buarohamu ë ioho aho'obëhe rumorovo barëjade höjo.

34 Ëjöho aho'obëhe Iesuro uhu'e majëhijamu rue gagovare ariböviohuro hejareje. Jöe aho'o ma-uhu'e gemu majëhinövadeje.

35 Ëhi uhu'e majëhijade jö hesi bëhoho urimo jö God-aro baeromo majëhinövade ae gemuëro Iesuhu vae'iröhe mu jöho God-are surire jajivoromo uvadeje:

Naro uhu'e majëhinövo'ejöjo.

Ö'idö sa'a bamadevare evare aevoromo subivëhobe rovade jöho na jövonövo'ejöjo.

*Resu sisë hesi uhu jö Iesuhu huruoho majëhijade jöhoje.*

<sup>36</sup> Ĕhi'onugoromo gagovarue aribövioho rëmo'li osare va'adeje. Osare va'amu gagorovo hesi ijorajo ömo'ömhuro rueromo uavareje: I va'ëne resu sisëhu i mure ri'amade jöho huruoho majahuijego no hejarëjo.

<sup>37</sup> Hejarëjamu uëvadeje: Ujo ma riremado a hesi jö bëhoho uëromö ë'ode höjo: God-are A Maho nörö höjo.

<sup>38</sup> I mu hesi jö bëhoho uëromö ë'ode höjo: Sa'ae aho'obëhe dinö'e dinö'e jiohe va'ajëjo. I ujo hesi jö bëhoho naro uëromö ë'ode höjo: God-hu muebejëvego hesi aharire raromarue aribövie jioruomajëjo. I va'ëne resu sisë hesi jö bëhoho naro uëromö ë'ode höjo: A sisë börömo hesi aribövie jioruomajëjo.

<sup>39</sup> Mu arijo'o nu huodivoromo resu sisë hesi ujo riremado a hesi jö bëhoho naro uëromö ë'ode höjo: Satan höjo. I gagovo'iröhe maja hesi jö bëhoho naro uëromö ë'ode höjo: Ave sa'a bövi bise'o barë'iröhe majaho höjo. I gagovo'iröhe aribövi jabesi jö bëhoho naro uëromö ë'ode höjo: Anera aribövioho jioruomajëjo.

<sup>40</sup> Resu sisë gagovoromo vëniro huaruëhi sa'a bövi bise'o barë'iröhe majaho rue'iramu ëhi jio'a'ajëjo.

<sup>41</sup> Ĕho majaho rue'iramu evare God-are A Maho naro nasi anera aribövioho rëmö'ö'iramu jabumëro rueruomö'ajëjo. Rueruomoromo mu sisë röjëhjarue o God-are jö aharue aribövi God-hu muebejëvajoho mevoromo

<sup>42</sup> vëni börömehu ravajire ruruhö'öruomö'ajëjo. Ĕdirö'ore ae aho'obëhe nierusuburu'e bamoromo ane ja'ihö vuogigimoruumö'ajëjo.

<sup>43</sup> Ĕhi ë'iramu evare mu mae vaejarue ariböviohuro jabesi Vavuehu muebejaje öri ari'ere raromoromo majaehu bamoromo ajivajëhi ëhi ajivoruumö'ajëjo. Ae rahu ja God-are jö hejanue ae javë'ohö bëhoho nahoromo birohönëjo.

*Gurijë'e inömo mabëhe o nienia mabëhe ë inömo jabesi uhu jöhoje.*

<sup>44</sup> Röhu God-hu böröme namiromö muebejëvaje jö göho uhu'e uë'ië'ajëjo. Ae gemuehu gurijë nugë'e inömo mabëhi birohoro ehuremu gemu uehorovadëhi God-hu böröme namiromö muebejëvaje jö ehuremu ëhi uehorovo'irarije jöho höjo. Ae gemuëro ae gö hesi mure juvo'li gavade höjo inömo ma-mabëhe gagovoromo gurijë nugë'e jiamu. Gurijë nugë'e jiamu gagorovo huro ujuohoromo röhu mahö gurijëromö duhade höjo. Duhonugoromo ë inömhuremu uehorovoromo nimoröhë'li va'oromö hesi mahö sisëho aho'o imo'amo barënuhoromö ijo bajo bövi mae baeromö vuonorö'ö va'oromö gurijë nugë'e inömo bae'li ë muohö imade höjo.

<sup>45</sup> O aehu nienia mabëhe ëhemu uehorovadëhi God-hu böröme namiromö muebejëvaje jö ëhemu ëhi uehorovo'irarije jöho uhu'e uë'ië'ajëjo. Nienia imo'amaje ae gemuëro nienia mabëhe imo'amo'li nahobe juvade höjo.

<sup>46</sup> Nahöjuvo nieniae gemu ma-mabëhohö birohade höjo. Birohonugoromö ë nieniahuremu uehorovoromö va'oromö hesi mahö sisëho imo'amo barënuhoromö ijo bajo bövi mae baeromö vuonorö'ö va'oromö ë nieniaho gemu imade höjo.

*Viö uhu jöhoje.*

<sup>47</sup> Röhu God-hu böröme namiromö muebejëvaje jö göho uhu'e uë'ië'ajëjo. Aëro viö böröme jovo e'ure ba'amare höjo. Ba'amamu jovo maje ihe gö gö viöre aegade höjo.

<sup>48</sup> Aegoromo irijiomamugo evare jovo riröre bava'oromo raromare höjo. Raromoromo jovo majo maho suovoromo hevöre io'amo'i sisëho ruruhö'öjare höjo.

<sup>49</sup> Ëjõ hesi bëhoho ave sa'a hesi majaho barë'iramu ëhi jio'a'ajëjo. An-  
eraëro rueruomoromo a maho ëhi rëmo'i a sisëho mevoromo ujuohoromo

<sup>50</sup> vëni bërömehu ravajire ë ruruhö'ö'aruëjo. Ëdirö'ore ae aho'obëhe nierusuburu'e bamoromo ane ja'iho vuogigimoruomo'ajëjo. Ëhi jio'a'ajëjo.

*Jõ mae göho mamie göho i'e ë hesi jõhoje.*

<sup>51</sup> Röhu naehu majëhijode jõho aho'o na jemë he barëjarije höjamu uavareje: Io'ajo.

<sup>52</sup> Io'ajamu Iesuro uëvadeje: Ëhu'ëro God-are jögoru mami öri röjëhijaje ae rahu God-hu bëröme namiromo muebejëvaje jö i'ohu'o ëhu'o hejë'o ho inömo mamiohu'o i'ohu'o hesi osare jiaje aho va'ëne jianovajëjo. Ëhi jië'e aehu inömo mamiohu'o i'ohu'o bahijaje osare jio'amajoho va'orahoro ujuoho rueromo röjëhijajëhi ëhi jië'e ariböviohuro God-are jö mamiohu'o i'ohu'o ae röjëhiruomo'ajëjo.

*Iesuale amo rajehu Iesu bijönimoruomade jõhoje.*

<sup>53</sup> Ëhi jië'e uhu jõho majëhinugoromo Iesuro va'adeje.

<sup>54</sup> Va'oromo hesi amëro rovadeje. Rueromo hiromo God rajahijarue osare rumo va'oromo God-are jö bëhoho röjëhijadeje. Röjëhijamu hegorovo tiöjëvadeje. Tiörömo uvoruomadeje: Diehi'oromo simano maho baeromo darugo'e mu masijoho vaejaje höjo.

<sup>55</sup> Hu sarerivajëjo. Ma-ijo muemu vaejaje a hesi harihe höjo. Hesi vëmoho Mary höjo. Hesi ö ömo'ömoho James Joseph Simon Judas ëhi jio'amajëjo.

<sup>56</sup> Hesi ma'ino ömo'ömoho aho'o no'o gemu mae raromarue höjo. Ëhi jië'o ho diehi'oromo aviëhi jië'e muoho baejade höjo.

<sup>57</sup> Ëhi uvoromo nue huodivareje. Nue huodivamu gëgorovo Iesuro uëvadeje: Jö God-aro baeromo majëhijarue aribövioho dinö'e dinö'e va'ë'iroho aëro no mae uehorovavuarue höjo. A'i nosi sa'a raje agane gemuoho jemëremu bogo ëhioho uehorovavuaruje höjo.

<sup>58</sup> Ëhi uënugoromo darugo'e muoho ma-gemu gemu ë vaejadeje amo rajoho bogo ma uehorovaruego.

## 14

*John bapataeto vaejaje a guomade jõhoje.*

<sup>1</sup> Ëhi'amu Iesuhu mu bërömo vaejaje jõho sa'a a bëröme Herod-ro hejadeje.

<sup>2</sup> Herod-ro jõho heromo hesi mu vaejarue aribövioho uëvadeje: Ëaho John bapataeto vaenövade aho höjo. Hu guomoromo ri'öjë'e höjo. Guomoromo ri'öjë'ëro ëhu'ëro darugo bëröme baeromo mu masijoho vaejaje höjo.

<sup>3-4</sup> Röhu ë jö hesi bëhoho urimë'i Herod-ro hesi öe Philip-are vabore hesi ihoho Herodias gohoniahijadeje. Gohoniahijamu John-ro ri'öromo ua'i hijadeje: Ëmagonaho baejanoho ëho bogo maehu höjo. Ëhi ua'i hijamu Herod-ro ë magonaho hesi jöëni ae uëvamu John guduamoromo tövoromo savoji gagore ba'amareje.

<sup>5</sup> Ëhi'amu Herod-ro John ano'i nimoromo röhu uvadeje: Ae aho'obëhe uvoruomaje höjo: John hu jö God-aro baeromo majahuijaje ae hö uvarue höjo. Ëhi uvoromo ë aribövioho juhuonëmiromo bogo anadeje.

6 Ëhi'ojuvo Herod rahade majaho rovadeje. Herod rahade majaho rovamu Herodias-are abojohuro ae aho'obêhe jabesi nunire rueromo javavadeje. Javavamu Herod-ro garomo vuêvadeje.

7 Vuêvoromo magonahoho uavadeje: Ja rabe rabe nagë'oho iae na bojami'ejöjo. God-ro ge'ego na mae uavajëjo.

8 Ëhi uavamu abojohuro va'o vëmehu nimade jöho heromo rueromo Herod uavadeje: Bapataeto vaejaje ae John-are sönöho tarioromo simanoho hevöro bamoromo avehuro baro bojemëjo.

9 Ëhi uavamu hegoroovo rue a börömohuro huë vavaene baejadeje. Huë vavaene baejade höjo röhu urimo darugo'e jöho ë aribövi jabesi nuniro ë magonahoho mae uavë'ëro ëhu'ëro jöe bojëmiromo uêvadeje: Magonahehu nimajoho baro bojamihëjo.

10 Bojamihëromo ae rëmö'öjamu savoji gagore va'oromo John-are sönöho tarioromo

11 simanoho hevöre bamonugoromo barueromo abojoho bojamijareje. Bojamamu huro bava'o vëmoho bojamadeje.

12 Ëhi'amugo John-are ijore ijore jijiharue ariböviohuro rueromo sinoho bava'oromo guavareje. Guavonugoromo va'oromo Iesu majahijareje.

*Iesuhu ae aho'obêhe 5,000 da'uojëhade jöhoje.*

13 John bapataeto vaejëvaje a guomade jöho majëhijamu hegoroovo Iesuro va'oromo boat-re ajio hiromo a rumo'e sa'are va'i va'adeje hu'o hesi ariböviohu'o sivue raromoröhëni. Ëva'aje jöho hegoro ae aho'obêhe jabesi amore amore jioromo va'oromo Iesuhu va'ajire sa'a hörëro ë va'oruomadeje.

14 Va'oruomamu Iesuro jovo döre boat-re va'adoho sa'are rueromo ravo'amoromo gavade ae aho'obêhe tagavë'e jiamu gëgorovo jabesi jöeni vavaenimoromo jabesi aribövie guomo guomo'oho ajëmijadeje.

15 Ëhi'ojuvo majae garobo'e bamamugo hesi ijorajo ömo'ömohuro rueromo uavareje: Aveho a rumo'e sa'ae höjo. O majae mami'e barëjë'e höjo. Ëhuni aribövioho rëmö'öjogo amo göro göro va'oromo ie imo'amo'irarëjo.

16 Ie imo'irarëjamu Iesuro uêvadeje: Jabumë rabëni va'ojörajo. Jemëro iruno'oho da'uojëhirëjo.

17 Da'uojëhirëjamu uavareje: Iae mae höjo röhu aviae no ie övo gö mine visue niö'i ehemu javuajëjo.

18 Ëhemu javuajëjamu uêvadeje: Baro bojemihëjo.

19 Ëhi uënogoromo huro aribövioho uêvadeje: Garasioro raromohëjo. Raromohëromo ie övo gö mine visue niö'i ujuoho rovaroho ëho huro ujuohoromo ö'idöho sioroho garomo God huë mae uavadeje. Huë mae uanugoromo ioho ato'atovoromo hesi ijorajo ömo'ömoho i'imëmamumu ujuohoromo ae aho'obêhe suvuorëmijareje.

20 Suvuorëmijamu ae aho'obêhe ë ioho visuoho ue'ahamu da'uëgadeje. Da'uëgamu gagorovo ijorajoho jaburo vitu vituoho gagovoromo aegamu esöe aho'obêhe 12 irijiomamadeje.

21 Ëhi'areje. Ama'e aho'obêhe 5,000 rabu'e iohu'o visuohu'o ue'ahoruomadeje. Röhu magonahe asisö'e jabu'o ue'ahareje.

*Iesuhu e'u döre hörehu va'ade jöhoje.*

22 Ëhi'amumu Iesuro hesi ijorajo ömo'ömoho uêvadeje: Boat-oro ajio raromoromo e'u ioni gönö urimo va'ohego na a ioro'ioroho rëmö'öjjo.

23 Ëhi uëromo ae aho'obëhe rëm'önugoromo parie vae'i hesi sivue dahorure ajiomadeje. Ajiomoromo hesi sivue hijamu vahiromadeje.

24 Vahiromamu nume ijorajoho jaburo öri ëgoböviro jovo döre va'oruomamu evare burëro jabesi nuninö rueromo jovoho hasaromo boat-ohu'o babu'öjëvobe va'adeje.

25 Ëhi'ojuvo sisonuvo'ia'amu Iesuro jovo döre hörëro rovadeje.

26 Jovo döre rovamu gagorovo ijorajoho jaburo jiodudu'iraeromo uvareje: Aru'ahëro rovajëromo juhuonivoromo jö'e dadovareje.

27 Jö'e dadovamu hejë'i Iesuro uëvadeje: Nadi juhuonivo'i biririvohëjo. Na jevajëjo.

28 Na jevajëjamu Peter-ro uavadeje: Bada ja javë'oho uevego na jovo döre ö'öjo.

29 Ö'öjamu Iesuro uavadeje: Rovëjo. Rovëjamu hegorovo Peter-ro boat-re jioromo jovo döre abueromo Iesu biroho'i hörëro jovo döre va'adeje.

30 Va'ihö gavade bure rovamu gagorovo juhuonivadeje. Juhuonivoromo jovo gagore abue'ia'amu gavë'i uvadeje: Bada ajemëjo.

31 Ajemëjamu hejë'i Iesuro övoho nugö'öromo Peter ma'enoromo uavadeje: Mae uehorovevo avoho'ibejanëjo. Ja rabëni uehoro niö'ioho baejane höjo.

32 Ëhi uanugoromo jaburo niö'iro boat gagore ajiomamu gavë'i buroho barëjadeje.

33 Buroho barëjamu gagorovo boat-re raromare ariböviohuro Iesu rajahiro uavareje: Iae mae-ëjo. Ja God-are Harihe javajëjo.

34 Ëhi'onugoromo e'u ioni gönö rueromo Gennesaret sa'are ravo'amareje.

35 Ravo'amamu gagorovo ë sa'a rajohuro Iesu garomo uvoruomadeje: Iae Iesu hö uvoromo ë sa'ae bövioho jöe nugö'öjamu guomo guomo'e ae aho'obëhe ujuoho rueruomadeje.

36 Ujuoho rueromo ëninamiromo uanövareje: Guomo guomo'e aribövioho uëvego ja niögu vituohuremu rëhego ëhuro guomo guomoho barë'amajo. Ëhi ua'ego ae rahu rëhë'oho marë'amonövadeje.

## 15

*Pharisee ariböviehu God-are jö bogo avoho uehorovo'i jabesi a mami jö böröme hö uehorovare jöhoje.*

1 Ëhi'amu Pharisee ariböviohu'o Jew rajo jögoru öri röjëhjarue ariböviohu'o ëho jaburo Jerusalem jioromo rovareje. Rueromo Iesu uavareje:

2 Jasi ijorajo ömo'ömoho nosi a mamiehu bojëmibe rovare jögoroho ahoruomaje höjo. Nosi a mamiehu ë'arëhioho jasi aribövioho jovoho övoho bogo ëhioho otehodivorovë'e ioho ma-ue'aharue höjo. Rabëni ëhioho ë'arue höjo.

3 Ëhi uavamu hegorovo Iesuro uëvadeje: Röhu jemë rabëni jemesi a mami jabesi muohuremu uehorovoromo ëhuro God-are jögoroho aharue höjo.

4 Ëhesi bëhoho God-ro uëvade höjo: Jasi vëmu vavu'oho mae uehorovëvonëjo. O jöe gö'o uëvade höjo: Ae rahu jö sisë jövoromo vëmu o vavu hesi iho ijumahë'oho anego guomo'irajo.

5 Röhu jemëro ë jöho ahoromo ae röjëhiromo uëvaruje höjo: Jaehu jasi vëmu vavu'o God-are nunire uëvë'oho: Nasi maho sisëho ujuohoromo jemë ajëmi'ibejodoho röhu aveho na God-are ihoro bamë'e jevajë uëvë'oho



<sup>6</sup> nadi röhu maho huotorovoromo vavuoho ajaminëjo. Ajamijë'oho sisë höjo. Vavu ajamijë'oho sisë hö uëvarujohuro ëhuro vëmu vavu'o mae uehorovëvo'irarijego God-hu bojëmade jöho jemëro aharuje höjo jemesi a mami jöho e'irovo.

<sup>7</sup> Sareri sareri'e aribövie jëvájëjo. Jö God-aro baeromo majëhijade ae Isaiah-ro jemëhu ë'irarije jöho jajivoromo ëhi uvë'e höjo:

<sup>8</sup> Ave ariböviohuro ma-jö'ëremu God na rajehi'i dë vövöbajo'oho bogo nasi gemuoroho jio'i rori'o jioruomajëjo.

<sup>9</sup> Jabumë a jabesi jögoroho ae röjëhiromo uëruomaje höjo: Ëho God-are jöe jiaje ejahuorëjo.

Ma-a jabesi jögoroho ëhi röjëhiromo ëhuro ma-döhemu God na rajehiruomaje höjo.

Ëjemesi jö Isaiah-hu jajivadoho iae mae höjo.

*Bogo i ijaruohuro a'i uehoro sisë baejaruohuro ëhuro God-are nunire sisërëjavuaje jöhoje.*

<sup>10</sup> Iesuro ëhi uënuogoromo ae aho'obëhe uëvadeje: Ro gemuoro gagovohëromomo ro gagovamu uëvadeje: Ave uhu jö uë'ië'ajoho avoho heromo bëhoho baerëjo.

<sup>11</sup> Rabe jö'ore va'ë'oho bogo ëhuro aho sisërë'amo'i a'i rabe jö'ore jioromo suorovë'ohuro ëhuro aho sisërë'amaje höjo.

<sup>12</sup> Iesuro ëhi jövamu hejë'ëro hesi ijorajoho jaburo rueromo uavareje: Jaehu ë jö majëhijamu Pharisee ariböviehu heromo huë sisë baeruomadoho na ja uehorovanuëjo.

<sup>13</sup> Na ja uehorovanuëjamu Iesuro uëvadeje: Nasi Vavue ö'idöre hijaje a hesi aribövioho mure i maehu rijajoho va'ëne jioruomajëjo. Ëmure hesi ëma ri'amaje resu resuoho nasi Vavuohuro jaho'amoromo ruruhö'ö'ajëjo.

<sup>14</sup> Ëhuni ë resu resu va'ëne Pharisee aribövioho ëhi vuonugorëjo. Jaburo nuni sisë'e ariböviohuro öroho röjëhijanovarue höjo. Nuni sisë'e a göehu nuni sisë'e a gö öri röjahijë'oho jabumë niö'i guare bejëvo va'a'ajëjo.

<sup>15</sup> Bejëvo va'a'ajëjamu Peter-ro Iesu uavadeje: Röhu jö'ore va'aje o jö'ore jioromo suorovaje uhu jö hesi bëhoho huruoho majahuijego no hejarëjo.

<sup>16</sup> Hejarëjamu Iesuro uëvadeje: Na jaruvoho ëhi jemë'o uehoroho bogojëvájëjo.

<sup>17</sup> Jemë rabëni bogo garomo uvarujëjo: Rabe jö'ore va'ë'oho dëre abueromo dëre jioromo suorovoromo bogo aho ijumëvë'e ma-gua gagore va'aje höjo.

<sup>18</sup> A'i jö'ore jioromo suorovaje jöhuro dë vövöbajo'ere jioromo rojomoromo jö'ore suorovaje höjo. Suorovoromo ëhuro aho God-are nuniroho sisërë'amaje höjo.

<sup>19</sup> Ëhesi bëhoho uehoro sisëhuro dë vövöbajo'ere jioromo rojomego ëhuro ae muo'amoruomaje höjo. Goho'amoruomaje höjo. Öëro jijihanovoruumaje höjo. Vajiohëro ujuohoruomaje höjo. Ae sarerëmiruomaje höjo. Ae gö jabesi ihoho ijumoruomaje höjo.

<sup>20</sup> Ëhi jië'e mu sisë vaejë'ohuro ëhuro aho God-are nunire sisërë'amaje höjo. A'i övo bogo eguë'e i ijë'oho bogo ëhuro aho God-are nuniroho sisërë'amaje höjo.

*Israel rajo bogo a'i sa'a gö rajo magonahehu Iesu mae uehorovade jöhoje.*

<sup>21</sup> Ëhi'oromo Iesuro ë sa'aho nugo va'adeje. Va'adoho va'o Tyre amo Sidon amo jiajinö sa'are ë rovadeje.

22 Rovamu iae Canaan sa'a rajo magonahëro ë sa'are hijël'ëro rueromo Iesu uavadeje: Bada ja a böröme David-are ujoho javaje nani vavaeni-moromo ajeminëjo. Satan-are a sisëro nasi aboji hesi dë gagore abuejë'e höjo. Abuejë'ëro magonahoho sisë'i hijajëjo.

23 Sisë'i hijajëjamu Iesuro bogo jöho uavadeje. Bogo jöho uavamu hesi ijorajo ömo'ömohuro rueromo uavareje: Magonahoho uavego va'ajo. Hu ma-darugo'o uvobe nosi ijore ijore rovajëjo.

24 Rovajëjamu Iesuro uëvadeje: God-ro sa'are remö'öjade höjo naro rueromo bogo sa'a gö rajoho ajëmi'i a'i Israel raje sheep va'ëne subirö'ö'amë'ohemu ajëmi'irodego.

25 Ëhi uëvamu ë sa'a gö rajo magonahohuro ro Iesure bëhire ague aho hiromo uavadeje: Bada ajemijëjo.

26 Ajemijëjamu Iesuro uehorovoromo uvadeje: Vëmu vavu'ehu jabesi aboji harihu'o urimo ajëmijaruëhi naro nasi sa'a rajohemu ëhi urimo ajëmi'i rovode höjo. Ëhi uvoromo ë sa'a gö rajo magonahoho uhu'e uavadeje: O-ajo. Noehu aboji harihu'o jabesi i ujuohoromo ö harihu mio'amë'oho ëho bogo maehu höjo.

27 Bogo maehu höjamu hegorovo magonahohuro uehorovoromo uvadeje: Iae na bisemu ioniro sa'a gö raje jevo'ego ëhuni bogo ajëmi'i jöho jövajëjo. Röhu noehu bogo rarovego öehu i ugobajo'o ue'aharuëhi nani Iesuro na'o ëhi ejehoromo nasi abojoho ajami'ajëjo. Ëhi uvoromo mana uhu'e uavadeje: Bada iae mae-ëjo röhu jabesi öhuro vavu jabesi maratuore jioromo rireromë'e i ugobajo'oho ue'aharue höjo.

28 Ue'aharue höjamu Iesuro uavadeje: Asë'e naro ajamijöro uehoro mamabëhe barovane höjo. Ëhuni jaehu nimanuëhi ëhi ë'ejöjo. Ëhi ë'ejöjamu gavë'i abojoho marëjahadeje.

### *Iesuhu ae aho'obëhe jabesi sino avohëhade jöhoje.*

29 Ëhi'amu Iesuro va'adeje. Va'adoho va'o Galilee jovo riröre va'oromo dahorure ajiomoromo sa'aro hijadeje.

30 Hijamu ae aho'obëhe maho jaburo höru sisë'e aho nuni sisë'e aho övo höru tövëhë'e aho bitaro tövëhë'e aho guomo guomo'e a ioro'ioroho aho'obëhe ëhi ujuoho rueromadeje. Ujuoho rueromo Iesuhu hijajire sa'are bahiruomadeje. Bahijamu huro avohëvamu mae jëvadeje.

31 Mae jëvamu ae aho'obëhe garuomadeje bitaro tövëhë'e aribövioho mae jioromo jöe atamu övo höru'e tövëhë'oho mae jëvamu höru sisë'e aribövioho mae jioromo jijihamu nuni sisë'e aribövioho mae jioromo uherihamu. Ëhi'amu gëgorovo jabumë ae aho'obëhe tiöjëvadeje. Tiöromo God Israel rajo muebejëvaje a hesi ihoho döro bamoruomadeje.

### *Iesuhu ae aho'obëhe 4,000 i da'uojëhade jöhoje.*

32 Ëhi'amu Iesuro hesi ijorajo ömo'ömoho uëvadeje: Ruehë uëromo rovamu uëvadeje: Ave ariböviohuni vavaenegajëjo. Jabumë na'o raro-mobe rovaroho majae niö'i gemu barëjë'ëro ëhu'ëro i ue'aho'iröhoho bogohöjo. Ma-dë gagëremu rëmö'öjël'oho na bijönegajëjo va'ego örire nune örijëvojöëni.

33 Ëhi uëvamu rue ijorajoho jaburo uavareje: Iae ëhi höjo röhu aveho ma-sa'aemu jië'e öri ari'ero ae aho'obëhe rovë'e höjo. Ëhi jië'oho no dinö'e ioho bihororomo da'uojëhi'ëjarëjo.

<sup>34</sup> Da'uojëhi'ejarëjumu uëvadeje: Ioho dimino'e jëvajëjo. Dimino'e jëvajëjumu uavareje: Ioho övo gö mine övo göre niö'i visu ininoho ma-gemu gemu javuajëjo.

<sup>35</sup> Ëhi uavamu hegoroovo Iesuro ae aho'obëhe uëvadeje: Sa'aro raromohëjo.

<sup>36</sup> Raromohëromo ie övo gö mine övo göre niö'i ujuoho rovarohu'o visuohu'o ujuohoromo God huë mae uanugoromo ato'atovoromo hesi ijorajo ömo'ömoho i'imëmamumu ae aho'obëhe suvuorëmijareje.

<sup>37</sup> Suvuorëmijamumu ae aho'obëhe ue'ahamumu da'uëgadeje. Da'uëgamumu gagorovo ijorajoho jaburo vitu vituoho gagovoromo esöe övo gö mine övo göre niö'i aegamumu irijiomu'amadeje.

<sup>38</sup> Ama'e aho'obëhe 4,000 jaburo ë ioho visuoho ue'ahoruomadeje. Röhu magonahe asisö'e jabu'o ue'ahareje.

<sup>39</sup> Ëhi'amumu Iesuro ë aribövioho rëmö'önugoromo boat-re ajio hiromu Magadan sa'are va'adeje.

## 16

*Pharisee ariböviohu'o Sadducee ariböviohu'o jabuhu Iesu bogo ma uehorovoromo huhu darugo'e mu vaejoro dinamare jöhoje.*

<sup>1</sup> Iae Pharisee ariböviohu'o Sadducee ariböviohu'o ëho jaburo rovareje. Rueromu Iesu guaro beva'ojoro nimoromu uavareje: God-are darugoho baeromu bogo gavarue muoho röjahuijego no gavarëjo huro ja ajamego muoho vaejanue javego o bogo.

<sup>2</sup> Ëhi uavamu huro uëvadeje: Jeniromoromu ö'idöho kavuego uvaruje höjo: Ö'idö kavuajoho vamae jio'iro ë'ajëjo.

<sup>3</sup> O sue'oho uvaruje höjo: Ö'idö kavuoromu ramoramovajoho jaruvoho ëni buru'e rue hesi höjo. Jemëro ö'idöho uherihoromu kavuego garomu uvaruje höjo: Ëhesi bëhoho iae ëhi jio'ië'ajëjo. Röhu ave jaruvore rovaje muoho garomu ë hesi bëhoho bogo avoho garomu uvarujëjo: Iae God-are mu börömoho rovajëjo.

<sup>4</sup> Sarerile aribövi sisë jëvajëjo. Magonahehu hesi baru vuonugo'i majuvajëhi jemëro ëhi God vuonugo'i mue gö gö uehorovaruje höjo. Jemë rabëni darugo'e muoho ga'i nimarujëjo. Na ëhi jië'e muoho bogo vae'i a'i Jonah-hu God-are mu börömo röjëhijade ëhi jië'e muohuremu röjëhi'ejöjo. Mue gö gö bogajo. Ëhi uënuoromu rëmo va'adeje.

*Pharisee aribövi o Sadducee aribövi jabesi i dë huaje oso hesi uhu jöhoje.*

<sup>5</sup> Ëhi'amumu Iesumëro e'ü döre va'oromu ionu gönö rovareje. Rueromu ijorajoho jaburo gavareje rumonëgamumu iruno'oho bogo ujuohë'e jëvamumu.

<sup>6</sup> Ëhi'amumu Iesuro uhu'e uëvadeje: Jemë gavë'iajo. Pharisee aribövi o Sadducee aribövi jabesi i dë hu'o'amaje osohuro jemesirire rumorovo'ajëjo.

<sup>7</sup> Rumorovo'ajëjamumu rueho jaburo ë jöho mevoromu uarovareje: Noro ie bogo ujuoho rovë'ëro ëhuni jövajëjo.

<sup>8</sup> Ëhi uarovamumu Iesuro gëromu uvadeje: Jabumë ëhi jië'e jöho ataruëromu uëvadeje: Mae uehorovevo avoho'ibejarijëjo. Jemë rabëni i bogojavuaje jöho atarujëjo.

<sup>9</sup> Jemë rabëni avevejö'ohu'o bogo gavarujëjo. Naehu ie övo gö mine ujuohoromu ae aho'obëhe 5,000 i'imëmodoho ë i vitu vitu aegamumu esöe dimino'e irijiomu'amadoho jemë ëhu'o rabëni bogo uehorovarujëjo.

10 O naehu ie aho'obēhe övo gö mine övo göre niö'i ujuohoromo ae aho'obēhe 4,000 i'imēmodoho ë i vitu vitu aegamu esöe dimino'e iri-jiomom'amadoho jemē rabēni bogo ëhu'o uehorovarujējo.

11 Jemē rabēni uvarujējo: Ie bogojavuo'ego nöröro i jöe uehorovoromo majahuijajējo. Bogo ë jöho uëromom'ode höjo. Röhu gavē'iajo. Pharisee aribövi o Sadducee aribövi jabesi i dē huo'amaje osohuro jemesirire rumorovom'ajējo.

12 Rumorovom'ajējamu hegorovo ijorajoho jaburo uhu jö hesi bēhoho avoho uehorovoromom'uvareje: O Iesu bogo i dē huo'amaje oso jöho majahuiromom'uövuade höjo: Gavē'iajo. A'i Pharisee aribövi o Sadducee aribövi jabesi jö sisēhuro nosiro rumorovojöēni ë jöho uhu'e majahuiromom'uövuade höjo: Gavē'iajo.

*Iesu hu ëhi jjiē'e ae jiaje jö Peter-hu jövade jöhoje.*

13 Iae Iesuro ajiomadoho Caesarea Philippi amom'bēhinö sa'are rovadeje. Rueromom'huro hesi ijorajom'ömom'ömo uëvadeje: God-are A Maho na rahuo jevajem'jöho ae aho'obēhe diehi atorumom'ajem'höjo.

14 Diehi atorumom'ajem'höjamu uavareje: A iorom'iorohurum'uvoromom'ajem'höjo: Ja John bapataetom'vaejavuonövm'ahurum'rovē'e javajējo. A iorom'iorohurum'uvoromom'ajem'höjo: Ja Eliahm'ro rovē'e javajējo. A iorom'iorohurum'uvoromom'ajem'höjo: Ja Jeremiahm'ro om'jö God-aro baeromom'ae majēhinövm'ae göerom'rovē'e javajējo.

15 Ëhi uavamum'hegorovom'uesurum'uëvadeje: Röhu jemē nasi jöho diehi atarujem'höjo.

16 Diehi atarujem'höjamum'Simon Peter-rom'ri'öromom'uavadeje: Ja börömem'namiromom'ajamuijanuem'ahom'javajējo. God hiemum'hijajem'a hesim'Harihem'javajējo.

17 Hesi Harihem'javajējamum'iesurum'Peter uavadeje: John-are harihohom'Simon jam'huë mabēhem'baejē'e javajējo. Bogom'ma-ahum'ë jöhom'röjahijamum'jövom'irögorom'nasim'Vavuem'ö'idörem'hijajohurum'röjahijē'ërom'jövom'uanuëjo.

18 Röhum'na ave jöhom'ua'ie'ajējo: Jam'Peter javajējo. Peter hesim'bēhohom'munē javajējo. Röhum'ave munēhom'bamom'ejöjom'nasim'ekaresiam'ahom'obēhem'ë hesim'dörem'gagovēvegom'bibivoromom'riravom'irarijekom'nasim'ekaresiam'ahom'obēhem'ëhim'riravom'iramum'vuovom'hesim'vöröhom'bogom'ruahö'öjēvoromom'ijum'ëvom'ajējo.

19 Röhum'narom'Peter jasim'örirerom'darugohom'bojamim'ejöjom'jero ojohom'jiovēhegom'aërom'God-are örim'arilerem'ë va'oruomoröhegom'. Jam'sa'are hiromom'örim'tugohē'ohom'jero mam'maem'tugohom'iramum'God'om'ö'idörem'hiromom'avohom'tugohom'ajējo. Om'sa'are hiromom'örim'jiovē'ohom'jero mam'maem'jiovom'iramum'God'om'ö'idörem'hiromom'avohom'jiovom'ajējo.

20 Ëhim'uaromom'hesim'ijorajohom'ahom'obēhem'darugom'om'uëvadeje: Nadi ahom'huruohom'majēhiromom'uërējom:Nörö börömem'namiromom'am'ajēmijajem'ahom'höjo.

*Iesuhum'huë vavaenim'baeromom'guomoröhem'jö jövadohoje.*

21 Ëhim'onugoromom'evare majarem'iesurum'aevoromom'hesim'ijorajom'ömom'ömo röjēhiromom'uëvadeje: God-rom'ëhim'bamē'ërom'ëhu'ërom'na Jerusalem ajiomom'ejöjom'. Ajiomom'iramum'a duvahom'ariböviohurum'priest masijohurum'Jew rajom'jögorom'örim'röjēhijaruem'ariböviohurum'ëhom'jaburum'vi'ehe huë vavaenem'bövim'bise'lem'bojemim'aruëjom'. Ëhim'ë'oromom'ae gö jabesim'övorem'bojemim'iramum'anegom'iramum'guomoromom'majam'niö'i gemum'hesim'uhure rim'ö'ejöjom'.

22 Ëhim'uëvamum'hegorovom'Peter-rom'iesurum'rorim'om'hu'irarem'bavom'oromom'uavadeje: Badam'bogajom'. Ëhim'jiē'lem'huë vavaenohom'bogom'maem'bogom'bae'om'anuëjom'.

<sup>23</sup> Ëhi uavamu hegoroovo Iesuro huotorovoromo Peter uavadeje: Satan rori'o va'ëjo. Jero nasi muoho ahanuëjo. God-hu uehorovajëhioho ja bogo ëhioho uehorovo'i ma-aehu uehorovaruëhi jero ëhi uehorovoromo ëhuni ë jöho jövanuëjo.

<sup>24</sup> Ëhi uanugoromo hesi ijorajo ömo'ömoho uëvadeje: Ae rahuario nasi ijore ijore juvo'i nimë'ocho jasi sinehu nimajoho nadi uehorovo'i uvonëjo: Iesure jöëni vi'ehe huë vavaene javoje rabe baeromo guomevë'ocho iae hesi hö uvoromo korosi hesi i'uoho banigojiomanovoromo nasi ijoro ijoro juvonövonëjo.

<sup>25</sup> Ja jasi sinohuni uehorovoromo biririvoromo ave sa'are hi'i ëhemu uehorovë'ocho ijönöho guomo öriro va'a'anuëjo. O ja nasi jöëni guomë'ocho ijönöho maro hi'a'anuëjo.

<sup>26</sup> Jaehu are jove sa'ae mae sisë aho'obëhe bae baerë'i röhu jasi arijo'arije ijumorovë'ocho na ja ëhuro mae javo'ajëjo. Bogajo. Arijo'arije ijumorovë'ocho diehi röhu maho avohorovo'iramu mae javo'ajëjo. Öre bogohöjo.

<sup>27</sup> Röhu God-are A Maho naro nasi Vavu hesi ajohu'o nasi anera ömo'ömohu'o gemu mae vuonorö'ö rue'ejöjo. Rueromo evare ae gemu gemu diehi jië'e mu vaejarije manaho ëhi bojëmibe va'ejöjo.

<sup>28</sup> Ave jöho na jö mae uë'ië'ajëjo. Jemë a ioro'iore ave riravarujoho bogo vuovë'e raromoromo ge'a'arujëjo God-are A Maho naro böröme namiromo muebejëvo'i rue'iramu.

## 17

### *Iesure nu ano'ehu ajivoromo gorosovade jöhoje.*

<sup>1</sup> Ëhi uënuigoromo majae aho'obëhe övo gö mine övo göre gemu barëjamu Iesuro Peter James o James-are öe John ëhi söromo dahoru ëgobövire ajiomoromo jabesi sivue raromareje.

<sup>2</sup> Raromoromo ë ijorajoho jaburo gavareje Iesure sino haho'e gorosovoromo hesi nu ano'ocho majaehu bamajëhi ëhi jio'i hesi niögoho ajivo avohamu.

<sup>3</sup> Ëhi ga'i gavareje Moses'o Elijah'o ëma jëvoromo jabu'o Iesu'o jöe atoruomamu.

<sup>4</sup> Jöe atamu gëgorovo Peter-ro Iesu uavadeje: Bada no ave raromaruoho iae mae höjo. Ja nagë'ocho naro javue niö'i gemu vae'amo'ejöjo jani gemu Moses-ni gemu Elijah-ni gemu.

<sup>5</sup> Ëhi jövamu gavë'i ajivë'e suehuro rueromo aegëhadeje. Aegëhamu hejareje sue uhure uvavamu: Ave aho nasi Harihu mabëhe höjo. Na hu garomo nimorohevajëjo. Huhu jövaje jöho avoho herëjo.

<sup>6</sup> Ëhi uvavamu hejë'i ë ijorajoho jaburo sisë maro juhuonivoromo sa'are rireromoromo nu ano'ocho sa'are amoromo momorö'öjareje.

<sup>7</sup> Sa'are momorö'öjamu Iesuro rueromo jabumë rëhëvoromo uëvadeje: Nadi juhuonivo'i ri'öhëjo.

<sup>8</sup> Ri'öhëjamu hegoroovo ri'ö uheriho'i gavareje ae gö bogojio'i Iesu gemu namijamu.

<sup>9</sup> Ëhi'onugoromo dahorure ruvebijë'i Iesuro uëvadeje: Jemëhu gavarijoho nadi aho majëhirëjo. U'emu God-are A Maho naro guomoromo ri'öjogo evaro majëhirëjo.

<sup>10</sup> Ëhi uëvamu rueho jaburo uavareje: Jew rajo nosi jögöru öri röjahuijarue ariböviohuro uövuarue höjo: God-are a börömoho bogo ëma rue'i a'i urimo Elijah God-aro va'adoho iae vuonorö'ö rue'a'ajëjo. Rue'iramu God-are a

börömoho ijore rue'a'ajëjo. Jögoru öri röjahuijarue aribövioho rabëni ë jöho majahuijarue höjo.

<sup>11</sup> Rabëni majahuijarue höjamu Iesuro uëvadeje: Io'ajo. Elijah-hu urimo rueromo bövi bise'o avoho'amo'iröhe jöho iae mae-ëjo.

<sup>12</sup> Röhu ave jöho naro jemë uhu'e uë'ië'ajëjo. Hehëjo. Elijah iae mami'e rovade höjo. Rovamu aëro hu bogo ma ga'irögoro jabuhu diehi nimarëhi ëhi hesi örire sisë vaeruomade höjo. Jabuhu hu sisë vaejarëhi God-are A Maho na'o ëhi sisë vaejevorumo'ajëjo.

<sup>13</sup> Ëhi majëhijamu hegorovo evare Elijah uëvaje hesi bëhoho uehorovoromo uvareje: John bapataeto vaejavuonövade a hesi jöho majahuiromomo ë'ajëjo.

*Iesuhu Satan-are a sisë aharihu hesi dëre jiamu rarovö'öjade jöhoje.*

<sup>14</sup> Dahorure ruvebinugoromo ae aho'obëhe raromaruire ë rovereje. Rovamu gavë'i ae gemuëro rueromo ague aho hiromomo

<sup>15</sup> Iesu uavadeje: Bada nasi harihohuni vavaenimoromo ajamijëjo. Hesi simanoho sisërëromomo sisë'i sisë'i hi juvaje höjo. Sisë'i sisë'i hiromomo vënire jovore ëma ravorovaje höjo.

<sup>16</sup> Ëhuni jasi ijorajo jabesi örire barovode höjo. Barovamu ajami'iröhoho bogo eni jëvade höjo.

<sup>17</sup> Bogo eni jëvade höjamu Iesuro uëvadeje: Asë'e ave jaruvore raromaruje aribövioho jemë bogo ma uehorovo'i jöe gö gö ëma uehorovaruje aribövie jëvajëjo. Na majae dimino'e jemë'o'ho hibe va'ejöjo. Majae dimino'e jemesi mu sisëho garomo ma-nunëro ga taemobe va'ejöjo. Jemesi mu sisëhuro na u'uvevajëjo. Ëaharihoho avehuro barovego na gavöjo.

<sup>18</sup> Barovamu gagorovo Iesuro Satan-are a sisëho birevamu aharihu hesi dëre jioromomo hörö va'adeje. Hörö va'amu gavë'i aharihoho mae jiadeje.

<sup>19</sup> Ëhi'amu Iesuare ijorajoho jaburemu rueromomo Iesu uavareje: Diehi'oromomo noehu aru'aho sisë rarovö'öjaroho bogo eni javuade höjo.

<sup>20</sup> Bogo eni javuade höjamu Iesuro uëvadeje: Jemëro bogo ma uehorovë'ëro ëhu'ëro bogo eni jëvadeje höjo. Röhu ave jöho na jö mae uë'ië'ajëjo. Mustard bajoho inino mae jio'amajëjo. Mustard baje gemu mabise'o jiajëhi ëhi uehoro mae ma-bisemu baeromomo God mae uehorovë'öho ave dahorehu böviehu bise'ehu jemesi mu ahanovajoho uavë'öho: Rori'o va'ë uavë'öho iae rori'o va'a'ajëjo. Ëhi jië'e mu bövi bise'o vaejë'öho eni jëvo'ajëjo.

<sup>21</sup> [Amo ë aharihu hesi dëre jiade ëhi jië'e a sisë ae gö hesi dëre jiajoho rarovö'ö'ië'iroho i ue'aharujoho vuonugo'i God-are örire uehore aho'o bojamiromomo ëninamijë'öhuro ëhuro rarovö'ö'amo'arujëjo. Öri göho bogoe höjo.]

*Iesuhu guomoröhe jö röhu maho majëhijade jöhoje.*

<sup>22</sup> Ëhi'oromomo Iesuare ijorajoho jaburo Galilee sa'are ë ro gemuoro gagovareje. Gagovamu gavë'i Iesuro uëvadeje: God-ro ëhi bamë'ëro hesi A Maho na a jabesi övore va'oromomo

<sup>23</sup> anego'iramu guomo'ejöjo. Guomoromomo majae niö'i gemu hesi uhure ri'ö'ejöjo. Ëhi majëhijamu heromomo huë vavaene böröme baeruomadeje.

*Iesumëhu God-are amo börömo hesi tax bojami'iröhe jöhoje.*

<sup>24</sup> Ëhi ë'ë'ëro Iesu'o hesi ijorajo ömo'ömohu'o ëho jaburo Capernaum amore rovereje. Rovamu God-are amo börömo hesi mu nigemo'iröhe tax

moni baejarue ariböviohuro rueromo Peter uavareje: Na jasi a börömoho God-are amo börömo hesi tax-oho bojamijaje höjo.

<sup>25</sup> Bojamijaje höjamu Peter-ro uévadeje: Io'ajo. Io'a uënuqoromo osare va'amu gavë'i Iesuro urimo jöho jövoromo Peter uavadeje: Simon ja diehi uvanuëjo. Sa'ae dinö'e dinö'e raromoromo masijo vaejaruoho tax ihe gö gö ujuoho'ië'iroho rahumesi örire uëvego i'imëmarue höjo. Na jabesi ae gemuoho jabesi örire o ae gö jabesi örire uëvarue höjo.

<sup>26</sup> Uëvarue höjamu Peter-ro uavadeje: Ae gö jabesi örire uëvarue höjo tax monie bojëmijöro. Ëhi uavamu Iesuro Peter uavadeje: Ëhu'ëro jië'ëro jabesi agane gemuoho tax-oho bogo vaejarue höjo.

<sup>27</sup> No God-are agane javuajëjo röhu no hesi osa hesi tax-oho bogo bojëmi'ibejarëjo tax baejarue aribövioho huë sisë bae'ibejarëjo. Ëhuni iae bojëmi'ejarejo. Röhu jovo e'uoro va'oromo anuge ba'amoromo aevo'i jiomö'irane visuoho baeromo jö'oho tarivahonëjo. Tarivahoromo ga'a'anuëjo tax hesi ijo bajoho jö'ore jio'iramu. Ëho bava'oromo tax-oho jasirohu'o nasirohu'o bojëminëjo. jöhoje.

## 18

### *Di aehu a ioro'ioro iosirëmiromo böröme jiaje*

<sup>1</sup> Ëhi'amu evare Iesure ijorajoho jaburo rueromo uavareje: God-hu böröme namiromo muebejavuajoho di ahuro a ioro'ioroho iosiramuiromo börömoho javuajëjo.

<sup>2</sup> Börömoho javuajëjamu hegorovo Iesuro aharihoho uvamu rovadeje. Rovamu jabesi nunire hu'irae barueromo

<sup>3</sup> uévadeje: Ave jöho na jö mae uë'ië'ajëjo. Jemë jemesi iho böröme jiojöro uehorovarujoho vuonugoromo huotorovoromo asisö'onö'e ma-taemo raro-morëjo. Jemë bogo ëhi ë'ë'oho God-hu muebejaje öri ari'eroho bogo va'oho hesi jëvajëjo.

<sup>4</sup> Ae rahu döre bamorovaruoho vuonugo'i ave aharihoho va'ëne ma-taemo raromë'oho ë ariböviohuro God-hu böröme namiromo muebejëvaje a ioro'ioroho iosirëmiromo jabumë masijo mae jioruomajëjo.

<sup>5</sup> Ae rahu aviëhi jië'e asisö'oho gemu nasi ihore rajahiromo baejë'oho ëhuro na'oro rajahiromo baejevorumaje höjo.

### *God uehorovarue mu ijumëharue aribövi jabesi jöhoje.*

<sup>6</sup> Ae göëro asisö'onö'e jörume hiromo nasi örire mae uehorovevo'ajëjo. Ëhi'o'iramu ae göëro ë aho mu sisë röjahiromo ëhuro na uehorovevaje muoho ijumaho'ajëjo. Ijumahoromo ëhuro hu i'u sisëho bae'a'ajëjo. Mu sisë bogo röjahijajevare evare ë mu sisë röjahijaje a hesi sönö'ahore aëro i'u'e munë hitahiohuro tövoromo sö jovore ba'amego e'u ëgobövire beva'oromo jove iromo guomo'ibejajo ëho ma-jianovo'ibejajo. A'i ë mu sisë röjahi'iröhe ë hesi i'uoho börömo bëhe bae'a'ajëjo.

<sup>7</sup> Sa'are aribövioho aho'oro vaevë'e jioruomajëjo göehu gö bijioho gavego sisë vaeröhe muoho jië'ego. Ëhi jië'e muoho iae rue'a'ajëjo. Röhu ae rahu ë mu barovë'oho vaevë'oho sisërë'ajëjo.

<sup>8</sup> Jasi övehu o hörehu mu sisë vaeromo God uehorovanue mu vuonugo'ië'iroho övoho o höroho tarioromo bulönëjo. Ja öve o höre gemu javamu ijönö va'oromo mare hijë'oho ëhuro mae javo'ajëjo. A'i öve niö'i o höre niö'i javamu ijönö God-hu ramö'öjamu ravemu ravaje vënire va'ë'oho ëhuro sisë bëhe javo'ajëjo.

<sup>9</sup> O jasi nunehu mu sisë vaeromo God uehorovanue mu vuonugo'ië'iroho nunoho jahoromo bu'onëjo. Ja nune gemu javamu ijonö va'oromo mare hijë'oho ehuro mae javo'ajëjo. A'i nune niö'i javamu God-hu ramö'öjamu vëni sisëre va'ë'oho ehuro sisë bëhe javo'ajëjo.

*Sheep subirö'öjamu nahoromo birohade uhu jöhoje.*

<sup>10</sup> Röhu gavë'i raromorëjo. Asisö'o va'ëne ma-taemo raromarue aribövioho bogave nue huodëgo'irarijëjo. Rabëni hesi bëhoho jabumë muebejëvarue aneraho jaburo ö'idöre raromoromo nasi Vavue ö'idöre hijaje a hesi nuniro raromemu raromarue höjo.

<sup>11</sup> [God-are A Ma naehu rovode hesi bëhoho subirö'ö'amë'e aribövioho sö rueromo maro nugo'amo'irodëni rovode höjo.]

<sup>12</sup> Röhu ave uhu jö majëhi'ië'ajoho jemë diehi uehorovarujëjo. Ae gemu sheep aho'obëhe 100 jio'i gemu sidövoromo ëma juvë'oho arijo'ohuro sheep ioro'iroho 99 dahorure nugo'amo'i va'oromo subirö'öjade sheep-oho nahobe juvo'a'ajëjo. Na mae-ëjo.

<sup>13</sup> Nahobe juvoromo birohë'oho evare sheep ioro'iore 99 mae raro-mare jabesi jöënioho ma-bisemu nimoroho'i a'i ë subirö'öjade sheep gemu'ohunioho nimoroho avoho'ajëjo. Iae na mae uëvajëjo.

<sup>14</sup> Èuhu jö hesi bëhoho asisö'o va'ëne jörume raromarue aribövioho röhu gemu sisëre va'ë'oho jemesi Vavue ö'idöre hijajohuro ëhi jië'oho bijönimaje höjo.

*Ekaresia ae göehu mu sisë vaejavuego noehu diehi ë'iröhe jöhoje.*

<sup>15</sup> Ja'o hu'o God uehorovaruje öehu ri'öromomo jasi örire sisë vaejavë'oho jasi sivue va'oromo jemë niö'iro ariromomo hesi sisëho avoho majahijego hu he'irajo. Heromo huhu ejahë'ohuro ehuro jasi öho jasiro barue'anuejo.

<sup>16</sup> O bogo ejahë'oho va'oromo ae gö'o gemu o niö'i hu'iraejëvoromo ö hesi öröro vuonorö'ö va'onëjo. Èhesi bëhoho God-are surire jöho ëhi uvë'e höjo: Ae rahu ae gö hesi sisë a masijo jabesi nunire majëhijë'iroho ae niö'i o niö'i gemu gavare o hejare jö sisë gemuohuremu majëhijë'oho aëro heromo uvo'a'aruëjo: Iae mae-ëjo. Èhi jië'e mu sisëho vaejade höjo. Èhuni ae gö'o gemu o niö'i hu'iraejëvoromo ö hesi öröro va'oromo hesi jö sisëho mevego jabu'o heromo ja ajami'irarëjo.

<sup>17</sup> O jabesi jöhu'o bogo ejëhë'oho va'oromo ekaresiaho ë a hesi sisëho huruoho majëhinëjo. O huhu ekaresia jabesi jö ëhu'o bogo ejëhamu gavë'iroho uvonëjo: Hu a gö va'ëne o vajiohu'e tax gagovaje aho va'ëne höromomo nadi gavanovonëjo.

<sup>18</sup> Ave jöho na jö mae uë'ië'ajëjo. Jemë sa'are raromoromo öri tugohë'oho jemëro ma-mae tugoho'iramu God'o ö'idöre hiromomo avoho tugoho'ajëjo. O sa'are raromoromo öri avoho jiovë'oho jemëro ma-mae jiovo'iramu God'o ö'idöre hiromomo avoho jiovo'ajëjo.

<sup>19</sup> Röhu ave jöhu'o uë'ië'ajëjo. Jemë ae niö'i sa'are ariromomo jöe gemuoro uehorovoromo ëninamijë'oho nasi Vavue ö'idöre hijajohuro ejëhoromo jemëhu ëninamijarijëhi iae ëhi vaejëho'ajëjo

<sup>20</sup> rabëni ae niö'i o niö'i gemu nasi ihore gemuore gagovë'oho naro ë dirö'ore jemë'o jevajëro jië'ëro.

*Ae göehu ae gö hesi sisë bogo uehorovoromo vuonugade ë hesi uhu jöhoje.*

<sup>21</sup> Èhi'amu Peter-ro rueromomo Iesu uavadeje: Bada nasi öehu nasi örire mu sisë vae'i hijë'iroho na majae dimino'e uehorovoromomo vuonugo'i hi'ejëjo. Na na vae 7 uehorovoromomo vuonugo'i hi'ejëjo.



22 Ĕhi uavamu hegoroovo Iesuro uavadeje: Na uavajęjo: Bogo vae 7 ěhemu a'i vae majae uehorovoromo vuonugo'i hi'a'anuęjo.

23 Ĕhesi uhu jőho na ua'ię'ajęjo. Sa'a a bőrommo hesi mu vaejahaarue aribővi jabuhu moni bojami'irőhe suri suri ě sa'a a bőrommehu adahoromo ě'adęhi God-ro bőrome namirommo hesi őri ari'oho ěhi muebejaje hőjo.

24 Iae sa'a a bőrome gemuero hijade hőjo. Hirommo hesi mu muebejahaarue jabesi suri surioho aevoromo adaho'amade hőjo. Adaho'amamu ae gemuehu a bőrommo hesi őrire 7 million kina bojami'irőhoho hu'irae barovare hőjo.

25 Barovamu a bőrommohuro gavade ě aho moni bojami'irőhoho bogo eni jiamu gagorovo hesi aribővioho uęvade hőjo: Ĕhuni ave aho hesi vaborohu'o aboji harihu'ohu'o maho sisęho aho'obęhe ěhu'o jemero ae gő imęvoromo monioho mana baeromo nasi őroro bojemiręjo. Ĕhi jię'oho ě mu vaejaje aehu na mana bojemego bae'ibejodęhi ě monioho naro bae'ęjőjo.

26 Ĕhi majęhijamu hegoroovo ě ahuro agree aho hirommo ěninamirommo uavade hőjo: Ma-biririvoromo hirommo muebejevonejo. Iae na aho'o bojami barę'ęjőjo.

27 Ĕhi jővamu hegoroovo rue a bőrommohuro huni vavaenimoromo uavade hőjo: Iae mae-ęjo. Nadi ijoho bojeminęjo. Iae baręjajęjo. Va'onęjo.

28 Ĕhi uavamu iae va'ade hőjo. Va'ihő gavade ae gemu hu'o mue vaeromo a bőrommo hesi mu muebejahajoho jiamu gagorovo guduamade hőjo 12 kina hesi őrire bojami'irőhero jię'ero. Guduamoromo huę husuovahoromo uavade hőjo: Nasi monioho bojemijęjo.

29 Bojemijęjamu agree aho hirommo ěninamirommo uavade hőjo: Ma-biririvoromo hirommo muebejevonejo. Iae na bojami'ęjőjo.

30 Bojami'ęjőjamu bogo ejahade hőjo. Bogo ejaho'i guduamo bava'oromo savoji gagore ba'amade hőjo hu ě hibe va'ojuvo ě monioho hesi őrire bojami'irőhego.

31 Ĕhi'lamu gagorovo a bőrommo hesi mu muebejahaarue a ioro'iorohuro garomo dę vőronęgoromo sisę maro vavaenęgade hőjo. Vavaenęgamu va'oromo a bőrommoho huruoho majahirommo uavare hőjo: Ĕhi ěhi ě'ę'e hőjo.

32 Ĕhi ěhi ě'ę'e hőjamu rue a bőrommohuro jőe nugő'őjamu ě mu muebejahaje ahuro rovade hőjo. Rovamu a bőrommohuro uavade hőjo: Nasi mu vaejanue aho sareri a sisę bęhe javajęjo. Jero uevę'ero ěhuni jaehu moni bojemi'iranoho na uehorovoromo vuonugo baręjode hőjo.

33 Naehu jani vavaenimodęhi ja rabęni jasi a gőhunioho bogo ěhioho vavaenimane hőjo.

34 Ĕhi uanugoromo ě arijo'ohuro dę vőronimamu ae uęvamu hegoro mu vaejaje aho guduamo bava'oromo savoji gagore ba'amare hőjo ě hibe va'ojuvo monie aho'obęhe bojami barę'irőhego.

35 Jőho ěhi jię'ero jemę ae gemu gemu jemesi a ioro'ioro jabesi sisę bogo uhohu'o uehorovoromo vuonugę'oho nasi Vavue ő'idore hijajohuro ě bőrommehu ě'adęhi jemesi őrire ěhi ě'a'ajęjo.

## 19

### *Vaboro'o baru'o gemuoho jęvaje jőhoje.*

1 Iesuro ě jőho majęhinugoromo Galilee sa'are jioromo va'adeje. Va'oromo Jordan beromo ioni gőre Judea sa'are rovadeje.

2 Rovamu ae aho'obęhe mae rihromoruomamu huro guomo guomo'le aribővioho avohęvamu mae jęvadeje.

<sup>3</sup> Ĕhi'amu gagorovo Pharisee ariböviohuro rueromo Iesu guaro beva'ojöro uavareje: Vaboro nugö'ö'amo'iröhe jögoru hesi jöho no he'i naguejéjo. Baruehu rabëni rabëni bijönimoromo vaboro nugö'öjè'oho na mae o sisë höjo.

<sup>4</sup> Mae o sisë höjamu Iesuro uëvadeje: Röhu jemë ave jö adaharijoho rabëni bogo avoho uehorovarujéjo. God-are surire ëhi uvë'e höjo: Bövi bise'o bamade ahuro aevoromo ahu'o magonahohu'o bamëvade höjo.

<sup>5</sup> Bamëvoromo uëvade höjo: Ĕhu'ëro jië'ëro aëro vëmu vavu'oho rëmö'ö'i vaborohu'o gemu mae hi'a'ajéjo. Vaborohu'o hi'iramu jabumë niö'i jëvadoho röhu gemu jio'a'ajéjo. Ĕhi uvë'e höjo.

<sup>6</sup> Ĕhu'ëro jië'ëro ë ahu'o magonahohu'o bogo hahagu hahagu jio'i magemu jëvo'ajéjo. God-hu mami'e gemuore havoromo muohadoho jemë ma-ae jëvaje nadi tarivoréjo.

<sup>7</sup> Nadi tarivoréjamu uavareje: Vaboro nugö'ö'iröhoho sisë hö uövuanuoho röhu ëhi jië'oho Moses-ro rabëni ave jögoroho bojamuade höjo: Vaboro nugö'ö'i nagë'oho nugö'ö'irane jöho suroro jajivoromo vaboroho bojamiromo evaro nugö'önéjo.

<sup>8</sup> Nugö'önéjamu Iesuro uëvadeje: Jemë hia'i biriri'e aribövie jëvobe rovë'ego ëhuni baruehu vaboro nugö'ö'amo'irarije ë hesi öroho Moses bogo tugohade höjo. Röhu ni'i'ivadiroho ëhi jië'e muoho bogojiade höjo.

<sup>9</sup> Röhu ave jöho na uë'ië'ajéjo. Vaboroho bogo ma-juvë'e baruehu ëma nugö'ö'oromo magonahe gö masuvë'oho ëho bogo maho masu'i goho'amarue muoho vae'a'ajéjo.

<sup>10</sup> Ĕhi majëhijamu hegorovo hesi ijorajoho jaburo Iesu uavareje: Ja uövuanuoho: Baruehu vaboro masuvë'oho nadi ëma nugö'ö'amorë uövuanuëjo röhu ëhi jië'oho aehu magonaho masuvë'oho bogo maho jianovajéjo.

<sup>11</sup> Ĕhi uavamu Iesuro uëvadeje: Magonaho bogo masu'i ma-raromë'oho ae aho'obëhe ëhi ë'ë'oho bogo eni jioruomö'ajéjo. God-hu darugo bojëmamu baeromë'oho ë ariböviohuremu ëhi ë'ë'oho eni jioruomö'i a ioro'ioroho bogo eni jioruomö'ajéjo.

<sup>12</sup> Ĕhesi bëhoho ae göëro göëro bëhe gö gö uehorovoromo magonahoho bogo masu'i ëma raromarue höjo. A ioro'ioroho rahare majare sinoho ëhi jëvë'ëro magonahoho bogo masu'i ëma raromarue höjo. A ioro'ioroho sinoho tarivëhë'ëro magonahoho bogo masu'i ëma raromarue höjo. A ioro'iorohuro God-hu böröme namiromo muebejëvaje hesi muoho uehorovoromo magonahoho bogo masu'i ëma raromarue höjo. Ae rahu ëhi jië'e mu vae'irarije darugo bæjè'oho ëhi vaeréjo.

*Iesuhu hesi övo asisö'ö inino jabesi sinore bamëhade jöhoje.*

<sup>13</sup> Ĕhi'amu gagorovo aëro asisö'öho sö ujuoho rueruomadeje Iesuro öve jabesi sinore bamëhoromo God uavego ajëmi'iröhego. Ujuoho rovamu gëgorovo Iesure ijorajo ömö'ömohuro birëgareje.

<sup>14</sup> Birëgamu hegorovo Iesuro hesi ijorajoho uëvadeje: Nadi ahëvo'i uëhego rueruomajo. Ĕhi jië'e asisö'ö va'ëne jörume raromë'e aribövioho God-ro böröme namiromo muebejëvego hesi aharire raromoruomaje höjo.

<sup>15</sup> Ĕhi uëvë'ëro övoho jabesi simanore bamëhonugoromo va'adeje.

*Bövi bise'ö marohë'e a hesi jöhoje.*

<sup>16</sup> Ĕhi'amu iae a i'e gemuëro rueromo Iesu uavadeje: Tisa na diehi jië'e mu maho vaeromo ëhuro ioro'ioemuoho maroho hi'ejöjo.

17 Maroho hi'ejöjamu uavadeje: Mu ma vae'irane jöho ja rabëni nasi öriroho ue gevanuëjo. God gemu a maho höjo. Röhu mare hi'i nagë'oho hesi jögoroho ejahonövonëjo.

18 Ejahonövonëjamu uavadeje: Diehi jië'e jögoroho uevanuëjo. Uevanuëjamu Iesuro uavadeje: Nadi aho anonëjo. Nadi goho'amonëjo. Nadi vajiohoho baenëjo. Nadi sareri'e jöho aho majëhinëjo.

19 Jasi vëmoho vavuoho mae uehorovëvonëjo. Jasi arijo'arije rajahirovanuëhi jasi ae gemuoho ëhi rajahinëjo.

20 Rajahinëjamu uavadeje: Ëjöho iae na e barëjë'e jevajëjo. Ëhi ë'ë'e jevajëjo röhu mu göho rabe vae'ejöjo ëhuro maro hi'irodoho eni jevo'iröhe.

21 Ëhi uavamumu Iesuro uavadeje: Maro hi'iranëro ma-mae javojöro nagë'oho va'oromo jasi bövioho bise'oho imo'amoromo monioho baeromo inömo bogo eni jië'e aribövioho suvuorëminëjo. Ëhi ë'ë'oho bövie bise'e maho maho janioho ö'idöre jiaho'ajëjo. Ëhi'oromo rueromo nasi ijoro ijoro juvonövonëjo.

22 Ëhi uavamumu hegoroovo ruehuro hesi uehorovoromo uvadeje: Na bövie bise'e börömo mae jevë'ëro suvuorëmi'irodoho na bogo eni jevajëromu vavaenimoromo va'adeje.

23 Va'amumu gagorovo Iesuro ijorajo ömo'ömoho uëvadeje: Ave jöho na jö mae uë'ië'ajëjo. Bövi bise'o marohë'e aehu God-hu muebejaje öri ari'ere va'ë'oho ëhi jië'oho anoji'e mae jio'a'ajëjo.

24 Röhu avehu'o uëvajëjo. Mi börömo anugo gagore nugö'öj'ë'oho ja bogo eni javo'ajëjo. Röhu ëhi ë'ë'oho samae jianovo'i bövi bise'o marohë'e ariböviehu God-hu muebejaje öri ari'ere va'iröhoho ëho anoji'e mae höjo.

25 Anoji'e mae höjamu heromo tiötiövoromo uavareje: Ëhi jië'oho no diehi'oromo maroho va'ëjarëjo. No ae aho'obëhe bogo eni javuajëjo.

26 Bogo eni javuajëjamu Iesuro ërimëhoromo uëvadeje: Io'ajo. Jemë aëro jëvë'ëro bogo eni jëvajëjo. A'i God-hu mue aho'obëhe vaej'ë'oho hu eni höjo.

27 Ëhi uëvamumu hegoroovo Peter-ro ri'öromu Iesu uavadeje: Aveho gavëjo. Noro bövie bise'e nosiroho vuonugo'i jasi ijore ijore jijihë'e javuajëjo. Ëhuni no manaho rabe bae'ëjarëjo.

28 Rabe bae'ëjarëjamu Iesuro uëvadeje: Ave jöho na jö mae uë'ië'ajëjo. Maja i'oho rue'iramu God-are A Maho naro nasi ihoho dö maro jio'iramu nasi röho mare hiromu nasi aribövioho muebejëvo'ejöjo. Muebejëvo'iramu evare nasi ijoraje 12-ho jemëro na'o gemu mae arëto göro göro raromoromo Israel rajo nosi agane gö gö 12 jabesi muoho mevo ga'a'arujëjo.

29 O ae rahu javue öe ma'ine vavue vëme aboji harihu'e o sa'ae nasi iho hesi jöëni vuonugo'amo'i va'ë'oho ëhi jië'e ariböviohuro bövi mae baeromo ijönö ma-ioro'ioremu maro raromo'arujëjo.

30 Ëhi höjo röhu a ioro'iore aho'o nuninö jiaruoho dejonö jioruomo'i a ioro'iore dejonö jiaruoho nuninö jioruomo'ajëjo.

## 20

*Ariböviehu grape ö'i bajo mure va'oromo mu vaejamu mu arijo'ehu mana diehi bojëmade uhu jö Iesuhu majëhijadohoje.*

1 Sa'a arijo'e aehu hesi mu hesi öri muebejadëhi ö'idöre hijaje A Börömhuro hesi öri ari'oho ëhi muebejaje höjo. Sa'a arijo'e ae gemuëro sue'o va'ade höjo ae baejago jaburo hesi grape ö'i bajo mure va'oromo mue vaejahoromo manaho baerumoröhego.

2 Va'lo ae birohëvoromo uëvade höjo: Muoho vaejehorego noehu a bojëmijaruëhi ëhi jië'e ajivë'e ijo baje gemu majae gemu hesi muohuni bojëmi'iröjjo. Bojëmi'iröjjamu uavare höjo: Iae mae höjo. Iae mae höjamu rue mu arijo'ohuro hesi mure rëmö'öjade höjo.

3 Ëhi ë'ë'ëro majae 9 o'clock jiamu gavë'i vuonorö'ö va'oromo gavade höjo a ioro'ioroho mu rumo'e market-re ëma riravamu gëgorovo

4 uëvade höjo: Jemë'o nasi muoro va'lo mue vaerëjo. Suvuoro mae dimino'e jiajëhi na ëhi bojëmi'ejöjo.

5 Bojëmi'ejöjamu muro va'are höjo. Ëhi'amu maja ririrohu'lo maja huotorovadevarohu'lo huro market-re vuonorö'ö va'oromo ae gö gö jöe gemuoho uë'i hijade höjo.

6 Ëhi ë'ë'ëro majae beva'ia'amu gavë'i market-re va'oromo gavade a ioro'ioroho riravamu gëgorovo uëvade höjo: Majae bövioho jemë rabëni muoho bogo ë'ë'e ëma riravemu riravarujëjo.

7 Uavare höjo: Aho moni muoho bogo bojamuijë'ëro ëhuni mariravarujëjo. Uëvade höjo: Jemë'o nasi muoro va'oromo mue vaejehorëjo.

8 Ëhi ë'ë'ëro majae barëjamu gagorovo mu arijo'ohuro hesi mu muebejahaje aho uavade höjo: Mu aribövioho uëvego rue'irarëjo. Rovego suvuoroho bojëmibe va'onëjo. Ijonö ro aevoromo mu vaejare aribövioho urimo manaho bojëmiromo evaro va'lo urimo majae göre göre mu vaebe rovere aribövioho bojëmibe va'oromo ijo tugoho'ioho urimo ro mu aevoromo vaejare aribövioho bojëminëjo.

9 Ëhi'amu majae beva'ia'amu ro mu vaejare ariböviohuro ajivë'e ijo baje gemu gemu baeruomade höjo.

10 Ëhi baeruomamu gavë'i urimo ro mu vaejare ariböviohuro uvare höjo: No gö'o döre bae'ejarë uvare höjo röhu jabu'lo ajivë'e ijo bajoho ëhi gemuoho baeruomade höjo.

11 Ëhi gemuoho baeromoromo mu arijo'oho birevoromo

12 uaruomade höjo: Ijo tugoho'i ro mu vaejare ariböviohuro majae mabisemu mue vae'i noro sisonuvamu muoho aevoromo majae nijo'e huë vavaeni'e muoho vaebe va'ojuvo hujeji jeniromamu vuonugare höjo. Röhu jero jabumë bojëmijanëhi no'lo ëhi gemuoho bojamuijanuëjo.

13 Bojamuijanuëjamu rue mu arijo'ohuro ae gemu uavade höjo: Isiajo. Na bogo sisë'ioho vaejavode höjo. Ja'lo uehorovëjo. Na mami'e uavode höjo: Ajivë'e ijo baje gemu bojami'ejöjamu hegoro jero uevane höjo: Iae mae höjo.

14 Ëhuni jasi suvuoroho baeromo va'ëjo. Nasi nimoromo naehu ja bojamijodëhi ave ijo tugoho'i ro mu vaejehade aho suvuore ëhi gemuoho bojamijajëjo.

15 Nasi moniëro jië'ëro naehu baeromo rabe rabe negajoho ë'ë'ohoho ëho na mae höjo o sisë höjo. Na suvuoro'e huë baejë'e ae jevajëjo röhu jero rabëni ëho uehorovoromo aho nue huodëganuëjo. Ëhi uavade höjo.

16 Röhu uhu jö bëhoho ëhi höjo. Dejonö jiaruoho nuninö jioruomo'i nuninö jiaruoho dejonö jioruomo'ajëjo.

*Iesuhu guomoröhe jö urimo vae niö'i majëhijadoho ijonö röhu maho majëhijade jöhoje.*

17 Iae Iesuro Jerusalem amo börömore ajiomo'i va'adeje. Örire va'oromo huro hesi ijoraje 12-ho rori'lo sö va'oromo örire uëbe va'adeje:

18 Aveho hehëjo. No Jerusalem amore va'aruëjo. Va'lo ë raromoromo God-ro hesi ëhi bamë'ëro hesi A Maho naro priest masijo jabesi övore Jew rajo

jögoru öri röjèhijarue a jabesi övore va'iramu baejevo'aruëjo. Baejevoromo nasi jöho mevo garomo uvoruomo'ajëjo: Nörö sisë'e aego guomo'a'ajëjo.

<sup>19</sup> Guomo'a'ajëromu na baejevoromo sa'a göre jioromo rovare aribövi jabesi övore bojëmi'iramu baejevoromo sivegoromo hisuebijevevoromo korosire anego'iramu guomevo'ajëjo. Guomoromo majae niö'i gemu hesi uhure ri'ö'ejëjo.

*James'o John'o jabuhu masije rirarovo'iröhego jabesi vëmehu Iesu ua gavade jöhoje.*

<sup>20</sup> Èhi'lamu iae Zebedee-are harihe niö'i James'o John'o jabesi vëmohuro jabumë hu'iraejëvoromo rovadeje. Rueromo ague aho hiromo Iesu uavadeje: Na ja ajamuinëjo o bogajo.

<sup>21</sup> O bogajamu hegorovo Iesuro uavadeje: Ja diehi nagajëjo. Diehi nagajëjamu uavadeje: Na negajëjo jaehu böröme namiromo muebejavuë'iroho jero uëvego ave nasi harihu niö'iohuro ö'o jasi bëhire masije rirarovoromo göhuro jasi övo manö göhuro jasi övo adonö èhi ari'iröhego.

<sup>22</sup> Èhi uavamu hegorovo Iesuro ö'o ö'o uëvadeje: Iae èhi höjo röhu jemëhu ue gevaruje jö hesi bëhoho jemë bogo gavë'e ëma uevarujëjo. Na gavajëjo ajuo'e jovo sisëro ajuemanovo hesi jio'ego. Èhi jië'e huë vavaeni bae'irarijoho na jemë'o eni jëvajëjo. Eni jëvajëjamu uavareje: Iae no eni javuajëjo.

<sup>23</sup> Èhi uavamu Iesuro uëvadeje: Iae mae höjo. Na ajuemi'iröhe jovo sisëhuro jemë'o ajuëmi'ajëjo. Röhu nasi bëhire övo manö o övo adonö ari'irarije jö uë'irodoho èho bogo nasirehu höjo. Nasi Vavuehu a rahumëni uvoromo nugade röhoho è aho jaburemu nasi bëhiroho ari'a'aruëjo.

<sup>24</sup> Èhi'lamu Iesure ijorajo ioro'ioere 10-ho jaburo hejare uvavamu: Ö'o ö'o Iesure bëhire böröme rirarovo'i uvare höjamu hegorovo jabesi örire dë vörönimoruomadeje.

<sup>25</sup> Dë vörönimoruomamu gëgorovo Iesuro hesi ijorajoho aho'obëhe uëvadeje: Ruehëromu rovamu uëvadeje: Iae jemë'o gavarujëjo. Sa'a ioro'ioero rajo jabesi a masijoho jaburo jabesi aribövioho ruahö'öjëvoromo jabumëremu masije riravarue höjo. O jabesi bëhire riravaruhuro èhi taemëvoromo jöe bojëmijarue höjo.

<sup>26</sup> Sa'a ioro'ioero rajohuro èhi è'arue höjo. Röhu jemë nadi èhioho döroho bamorovorëjo. A'i jemesi ae gemu rahu böröme nami'i nimë'oho è aho a ioro'ioero jemë ajëminövo'iröhe ae jio'a'ajëjo.

<sup>27</sup> O jemesi ae gemu rahu nunire jio'i nimë'oho hu a ioro'ioero jemesi mu vaejëhonövo'iröhe ae jio'a'ajëjo.

<sup>28</sup> God-are A Ma naehu a ajëmi'i rovodëhi èhi è'orëjo. Naehu rovode hesi bëhoho bogo aëro na ajëmi'irarijeho rue'i a'i naro ae ajëmiromo nasi arijo'arije bojamirovoromo guomorovoromo èhuro ae aho'obëhe sisëhu tövëvajoho jiovo rëmö'ö'irodëni èhuni rovode höjo.

*Iesuhu Jericho amo vuonugoromo va'i nuni sisë'e ae niö'i ajëmade jöhoje.*

<sup>29</sup> Èhi'oromo Iesumëro Jericho amoho nugo'i va'amu ae aho'obëhe rihromoruomadeje.

<sup>30</sup> Röhu nuni sisë'e ae niö'i öri ionire arijë'e jiareje. Ariromo hejare uvavamu: Iesuro rova'ajë uvamu hegorovo ma-darugo'o uvareje: [Bada] David-are ujoho böröme javaje noni vavaenimëjo.

<sup>31</sup> Vavaenimëjamu hegorovo ae aho'obëhe jaburo birëgoromo uëvareje: Jöe vuonugohëjo. Jöe vuonugohëjamu hejë'i röhu ma'ho darugo ma'lo uvareje: Bada David-are ujoho böröme javaje noni vavaenimëjo.

<sup>32</sup> Vavaenimëjamu Iesuro va'adoho vuonugo'i ë namiromo uvëvadeje: Avehuro ruehëromomo rovamu uëvadeje: Naro diehi ajëmijöro nëgajëjo.

<sup>33</sup> Nëgajëjamu uavareje: Bada ajamuego no nune dadovoromo uheri-harëjo.

<sup>34</sup> Uheriharëjamu Iesuro jabumëni vavaenimoromo nunoho rëhëhadeje. Rëhëhamu ma-burëro uherihoromo hesi ijore va'areje.

## 21

### *Iesuhu Jerusalem mabëhe rovade jöhoje.*

<sup>1</sup> Iae Iesumëro va'lo Jerusalem bëhire va'oromo Olives Dahorure Beth-phage amo'ere ajio suorovareje. Suorovoromo Iesuro ijorajoho niö'i rëmö'öromomo

<sup>2</sup> uëvadeje: Arue jemesi nunörire amohuro va'ohëjo. Va'lo hörö'i ga'a'arujëjo donkey-oho harihohu'lo benugë'e jio'iramu. Benugë'e jiego jiovoromo hu'iraejëvo ruerëjo.

<sup>3</sup> O aehu jö uëvë'iroho uarëjo: Badaro ave mioho nimo'ego ëhuni hu'iraejëvo va'aruëre. Ëhi ua'iramu iae ma-burëro uë'a'ajëjo: Ëhi ë'ohëjo.

<sup>4</sup> Röhu ëhi ë'iröhe mu hesi bëhoho God-are surire jö jajivarëhi ëhi jioröhego. Jö God-aro baeromo majëhinövade ahuro uëvadeje:

<sup>5</sup> Jemëro Zion amo rajoho ëhi uërëjo:

Gahëjo. Jemesi börömhuro jemesi örire rovajëjo.

Hu sanu'e aëro jië'ëro donkey döre hiromomo rovajëjo.

Donkey hesi harihure hiromomo rovajëjo.

<sup>6</sup> Amo Iesuro hesi ijorajoho rëmö'öjamu va'oromo Iesuhu uëvadëhi ëhi ë'areje.

<sup>7</sup> Ëhi'oromo ë donkey niö'ioho vëmohu'lo harihohu'lo hu'iraejëvo rueromomo niögohomo jabetesi dejore ruahö'amo bahijamu gagorovo Iesuro ë ajio hijadeje.

<sup>8</sup> Hijamu ae aho'obëhe a ioro'iorohuro niögohomo örire ahahobe va'i a ioro'iorohuro ijo rude tarivo'amoromomo ahahobe va'areje.

<sup>9</sup> Iesure nuninö va'oruomadohu'lo dejonö rueruomadohu'lo ma-darugomo uvoruomadeje:

Ave aho David-are ujoho böröme vaeromomo rovajoho mabëhëjo.

Ave aho Badare ihore rovajoho mabëhëjo.

God mabëhëjo.

<sup>10</sup> Ëhi'lamu Iesuro Jerusalem amore höröjamu gavë'i amo raje ae mago-nahe aho'obëhe tiötiövoromomo uëvareje: Ëho rahuo höjo.

<sup>11</sup> Rahuo höjamu Iesu'lo rueruomade ariböviohuro uëvareje: Ëaho Galilee sa'are Nazareth amore hiromomo jö God-aro baeromomo majahuijaje aho höjo.

### *Iesuhu God-are amo börömore va'oromo ë'ade jöhoje.*

<sup>12</sup> Ëhi'lamu Iesuro God-are amo börömore va'adeje. Va'i gavade aëro bövie bise'e imo'amamu rarovö'öjëvadeje. Rarovö'öjëvoromomo gavade aëro sa'a göre göre jioromomo rovare aribövi jabetesi ijo bajoho ujuoh'i amo börömore hesi ijo bajoho i'imëmamumu gëgorovo jabetesi mu maratuhö huotovö'öjëhoromomo ugo imo'amarue aribövi jabetesi arëtohu'lo huotovö'öjëhadeje.

<sup>13</sup> Huotovö'öromomo uëvadeje: God-are surire jajivoromomo uvë'e höjo: God nasi osaho aëro uvoruomomo'ajëjo: Ëho God-are örire jö ato'iröhe osaho höjo.

Ēhi uvē'e hōjo rōhu jemēro mu sisē ēl'ēro ēhuro ave osaho vajiohu'e aribōviehu gurihirovarue juju gagoho va'ēne hōjo.

<sup>14</sup> Ēhi uēvamu nuni sisē'e hōru sisē'e aribōvioho God-are amo bōrōmore rueruomamu Iesuro avohēvadeje.

<sup>15</sup> Avohēvamu gagorovo priest masijohu'o jōgoru ōri rōjēhjarue aribōviohu'o ēho jaburo gavare Iesuro ēhi jiē'e mu masijoho vae'amamu hejare asisō'ēro uvo'i arijavamu: Ave aho David-are ujoho bōrōme vaeromo rovajoho mabēhē uvoruomamu hegorovo dē vōrōnimoruomadeje.

<sup>16</sup> Dē vōrōnimoruomoromo Iesu uavareje: Arue asisō'ehu jō sisē uvoruomajoho na ja hejanuējo o bogajo. O bogajamu hegorovo Iesuro uēvadeje: Io'ajo. Iae na hejajējo. God-are jōho surire jajivoromo uvē'e hōjo: God jero asisō'ohu'o asisō'o inino mahu'o avohēvē'ego jasi ihoho mabēhe uvoruomaje hōjo. Ēsurire jōho rabēni bogo avoho gavarije hōjo.

<sup>17</sup> Ēhi uēnugoromo Iesuro ē rēmoromo Jerusalem amore jioromo va'oromo Bethany amore hōrōromo vahie gemu ē hijadeje.

*Mesehu bajo bogo raejōro Iesuhu uavade jōhoje.*

<sup>18</sup> Hijē'ēro sisonuvamu gagorovo Iesuro Jerusalem amo bōrōmore vuonorō'o va'i va'adeje. Ōrire va'amu hōmadeje.

<sup>19</sup> Hōmamu va'ihō gavade mesoho ōri ionire namijamu gagorovo bēhire va'oromo gavadeje bajoho bogojio'i ma-hano rudu'emu jiamu. Ma-hano rudu'emu jiamu gagorovo mesoho uavadeje: Ijoho nadi bajoho raenējo. Ēhi uavamu gagorovo mesoho ma-burēro sahorijadeje.

<sup>20</sup> Sahorijamu gagorovo Iesure ijorajoho jaburo tiōromo uavareje: Diehi'ego mesoho ma-burēro sahorijajējo.

<sup>21</sup> Sahorijajējamu Iesuro uēvadeje: Ave jōho na jō mae uē'iē'ajējo. Jemē bogo uehore niō'i bae'irōgoro God gemu mae uehorov'oho naehu meso avohode ēhi jiē'e mu vaejē'oho eni jēvo'ajējo. Rōhu bogo ēhemuoho vae'i ave dahoru uavē'oho: Ri'ōromo va'o jovo bōrōmoro bu'ōrovonē uavē'oho iae ēhi jio'a'ajējo.

<sup>22</sup> O rabe rabe God ua gavē'oho mae uehorovoromo uvē'oho: God-ro ajemi'ajē uvē'ohuro ēhuro iae bae'a'arujējo.

*Jew rajo a masijehu Iesu bogo ma uehorovoromo darugoho dinō'e baejane hō uavare jōhoje.*

<sup>23</sup> Ēhi uēnugoromo Iesuro God-are amo bōrōmore ajiomadeje. Ajiomoromo God-are jō bēhoho ae rōjēhijadeje. Rōjēhijamu priest masijohu'o a duvaho ōmo'ōmohu'o ēho jaburo rueromo uavareje: Jaehu God-are amo bōrōmore hiromo mue gō gō vaejanuoho diehi jiē'e daruge javoromo o raro darugoho bojamijē'ēro ēhi jiē'e muoho vaejanue hōjo.

<sup>24</sup> Vaejanue hōjamu Iesuro uēvadeje: Nasi darugo hesi jō ue gevarujoho na'o jemē jōe gemu uē gē'iē'ajējo. Jemēhu mana uevē'oho naro jemē uē'ejōjo: Na ēhi jiē'e darugohuro muoho vaejaje hōjo.

<sup>25</sup> John-hu bapataeto vaejavuonōvadoho ē darugoho dinō'e baejade hōjo. Na God-ro o ma-aēro darugoho bojamijē'ēro ēhioho ē'onōvade hōjo. Ē'onōvade hōjamu rue a masijohuro Iesu diehi mana ua'irōhe jōho jabesi mevoromo uarovareje: Noehu uavē'oho God-ro John darugoho bojamijade hō uavē'oho Iesuro uō'a'ajējo: Ēhi jiē'oho jemē rabēni John bogo ma uehorovarije hōjo.

<sup>26</sup> O noehu Iesu ua'irōhoho: Ma-aēro John uavamu ē'ade hō ua'irōhoho rōhu ae aho'obēhe juhuonēmiromo bogo ēhioho ua'ejarējo ē hesi bēhoho

jaburo uvoruomë'ëro: John hu jö God-aro baeromo majahuinövade ae hö uvoruomë'ëro.

<sup>27</sup> Ëhi uarovoromo Iesu uavareje: Jaehu uö gövuanue jö hesi bëhoho no dadivavuajëjo. Dadivavuajëjamu hegoroovo Iesuro uëvadeje: Ëhi jië'oho jemëhu uevarije jöho na'o bogo uë'ejöjo: Na ëhi jië'e darugohuro muoho vaejaje höjo.

*Harihu niö'ihu diehi ë'are uhu jö Iesuhu jövadohoje.*

<sup>28</sup> Röhu ave uhu jö heromo diehi uehorovarujoho majehirego na he'iröjo. Iae ae gemu hu harihe niö'i jëvade höjo. Harihe niö'i jëvë'ëro vavuo-huro va'oromo murioho uavade höjo: Jue'i jaruvo grape ö'i bajo muoro va'oromo mue vaejehonëjo.

<sup>29</sup> Vaejehonëjamu muriohuro ri'öromo uavade höjo: Na bijönegajëjo. Bijönegajë uanugoromo röhu ijonö avoho uehorovoromo mue vaejaho'i va'ade höjo.

<sup>30</sup> Ëhi'amu vavuohuro va'oromo ijorajoho jöe gemuoho majahiromo uavade höjo: Muoro va'oromo mue vaejehonëjo. Vaejehonëjamu ijorajo-huro uavade höjo: Apo iae na va'ejö uaromo röhu bogo va'ade höjo.

<sup>31</sup> Ëhi jië'oho di ahuro vavuehu nimadëhioho vaejade höjo. Vaejade höjamu uëvareje: Muriohurajo. Muriohurajamu Iesuro uëvadeje: Ave jöho na jö mae uë'ië'ajëjo. Vajiohu'e tax baejarue ariböviohu'o önö'e jijiharue magonahohu'o ëho jaburo jemë iosirëmiromo urimo God-are aharire va'oromo raromego huro jabumë muebejëvaje höjo.

<sup>32</sup> Rabëni hesi bëhoho John-ro jemesirire rovade höjo öri maho röjëhijego ga'irarijego. Rovamu jemëro hu bogo ma uehorovo'irögoro vajiohu'e tax baejarue ariböviohu'o önö'e jijiharue magonahohu'o ëho jaburo hu mae uehorovoruomade höjo. Mae uehorovamu jemëro ëho garomo röhu bogo avoho uehorovoromo huotorovoromo John ma uehorovarije höjo.

*Mu ariböviehu a börömo hesi ö'i bajo mu mueberomo sisë ë'are uhu jö Iesuhu jövadohoje.*

<sup>33</sup> Röhu uhu jöe gö'o majëhi'ië'ajoho hehëjo. Iae sa'a arijo'e ae gemuëro mure grape ö'oho bivo'amade höjo. Bivoromo ë muoho buore iromo rova'o rojomoromo ö'i bajo sa'ijovoröhe guaho umoromo mu javue döro vaejade höjo hesi mu ahuro ajio ë hiromo muoho atovoröhego. Ëhi avohoromo gavade eni jiamu gagorovo ae uëvade höjo: Na va'ejöjo. Jemëro nasi muoho muebejehorëjo. Mueberomo ö'i bajoho raeromo mavego nasiroho bahi'i ioro'ioroho jemesi ujuohorëjo. Ëhi uënuogoromo ri'öromo va'o sa'a göro ë hijade höjo.

<sup>34</sup> Sa'a göro va'oromo hijuvo gavade ö'i bajo urarue majaho dunovamu gagorovo hesi mu vaejहारue aribövioho uëvade höjo: Va'irarijoho mu muebejarue aribövioho uëregö nasi ö'i bajoho i'imëmegö ujuoheho ruerëjo.

<sup>35</sup> Ujuoheho ruerëjamu hegoroovo va'are höjo. Va'oromo suorovamu gëgorovo mu muebejarue ariböviohuro guduamëvare höjo. Gudu-amëvoromo göho hisuebi'i göho ano bamo'i göho munëro vajamijamu guomade höjo.

<sup>36</sup> Ëhi'amugo mu arijo'ohuro mu vaejहारue ae gö'o rëmö'öjade höjo mure va'oröhego. Urimo mu vaejहारue ae gemu gemu rëmö'öjë'ëro röhu evaroho ae aho'obëhe rëmö'öjade höjo. Rëmö'öjamu va'oromo mure suorovamu gëgorovo mu muebejarue ariböviohuro urimo rueruomamu ë'arëhi ëhi sisë vaejëvare höjo.



<sup>37</sup> Sisë vaejëvamu ijo tugoho'i mu arijo'ohuro uvade höjo: Arue mu muebejarue ariböviohuro nasi harihoho garomo uvo'a'aruëjo: Nöruare harihe hö uvoromo ëhuni mae uehorovo'aruëjo. Ëhi uvoromo nugö'öjamu mure va'ade höjo.

<sup>38</sup> Va'lo höröjamu garomo uarovare höjo: Arue rovaje ahuro hesi vavu hesi sionoho bae hesi höjo. Ëhuni ë'ego ano bamoromo hesi sa'aho nosi baejarëjo.

<sup>39</sup> Ëhi uarovoromo ë aho mure jiamu guduamoromo rori'lo bijimo bu'öromu anamu guomade höjo. Ëhi'are höjo.

<sup>40</sup> Ëhi jië'o'ho mu arijo'ohuro mure rovë'iroho mu muebejarue aribövi jabesi ö'iroho diehi'ëvo'ajëjo.

<sup>41</sup> Diehi'ëvo'ajëjamu uavareje: Sisë jioruom'ego ijumëvo barëromu muoho a maho bojëmi'ajëjo jaburo mueberöhego. Mueberomo majae eni jiego ö'i bajoho uroromo hesiroho i'imamiröhego.

<sup>42</sup> Ëhi uëvamu hegorovo Iesuro uëvadeje: Ave uhu jöho God-are surire jajivoromo uvë'e höjo:

Munë javue vae'irögoro munë gemu bijönimoromo vuonugare höjo.

Vuonugaroho jaruvoho ë munëhuro javuoho nigemo'ego bibivoromo mae namijajëjo.

Hesi Bada God-ro ëhi ë'ade höjo.

Ëho noro garomo uvarue höjo: God-ro mu mabëhe ë'ë'e höjo.

Ëjö God-are surire jajivamu adaharijoho jemë diehi'oromo ë hesi bëhoho bogo avoho baejarije höjo.

<sup>43</sup> Ëhu'ëro jië'ëro naro jemë uëvajëjo: Jemëhu God-are aharire raro-moromo hesi mu muebebe rovarije muoho God-ro baeniëhiromu ae gö bojëmi'iramu jaburo hesi aharire raromoromo ë muoho mueberomo rae avoho'aruëjo.

<sup>44</sup> [Röhu aehu ë munë döre bejë'o'ho ahoro ahoro bae'a'ajëjo. O ë munëhu a döre berovë'o'ho aho sa'ijovo barë'ajëjo.]

<sup>45</sup> Iesuro uhu jöe gö gö ëhi jövamu hegorovo priest masijohu'lo Pharisee ariböviohu'lo ëho jaburo garomo uvareje: Nosi jöe jövajëromu

<sup>46</sup> guduamo bava'ië'oromo uvareje: Ae aho'obëhe uvoruomaje höjo: Iesu hu jö God-aro baeromo majahuijaje ae hö uvoruomaje hö uvoromo jabumë juhuonëmiromu vuonugareje.

## 22

### *Sörö bamamu aehu juahamare uhu jöhoje.*

<sup>1</sup> Iae Iesuro röhu maho uhu jöe gö gö ae majëhijadeje.

<sup>2</sup> Majëhiromu uëvadeje: God-hu böröme namiromu muebejëvaje öroho aviëhi höjo. Sa'a a böröme gemuëro söröe baejade höjo hesi harihohuro masuromu iröhego.

<sup>3</sup> Ëhi ë'ë'ëro hesi mu vaejहारue aribövioho uëvade höjo: Va'irarijoho rueröhego naehu mami'e uëvode aribövioho uëregu rue'irarëjo. Rue'irarëjamu uëvamu bijönimoruomade höjo.

<sup>4</sup> Bijönimamu hegorovo sa'a a börömohuro mu vaejहारue a ioro'ioroho uëvade höjo: Söröre rueröhego uëvodoho ëhi uërëjo: Jöe hehëjo. Nasi söröho eni jië'e höjo. Nasi mi masije ma-mabëhe naehu ma-je mio'amaje sanuovë'e mioho bjuëmoromo buvomoromo bahijë'e jevajëjo. Bövie bise'le eni avohë'e jevajëjo. Ëhuni rovego no ë söröho i'irarëjo. Ëhi uërëjo.

<sup>5</sup> Ĕhi uëvamu jöho bava'oromo majëhijamu ë ariböviohuro bogo ejëhë'e öre gö öre gö va'are höjo. Göëro hesi mure va'ade höjo. Göëro hesi moni muro va'ade höjo.

<sup>6</sup> Ioro'iorohuro ë anu rovare aribövioho guduamëvoromo mu sisë vaejëvoromo muo'amare höjo.

<sup>7</sup> Ĕhi'amu ë sa'a a börömohuro dë vörönimade höjo. Dë vörönimamu muorovo aribövioho rëmö'öjamu jaburo ë anëgare aho muo'amoromo jabetesi amoho bue'öjëhare höjo.

<sup>8</sup> Bue'öjamu gagorovo a börömohuro hesi mu vaejहारue aho uëvade höjo: Söröho eni jië'e höjo. Röhu rueromo sörö ihë uëvamu juahemijare ariböviehu rueromo sörö ijë'oho sisë höjo.

<sup>9</sup> Ĕhuni öri masijoro va'irarijoho va'oromo ae rahu rahu birohëvë'oho uëvego söröro rue'irarëjo.

<sup>10</sup> Rue'irarëjamu hegorovo rue mu ariböviohuro örire va'oromo a sisëhu'o a mahu'o birohëvoromo aho'o sö ujuoho rovare höjo. Rueruomamu sörö osaho rarovade höjo.

<sup>11</sup> Rarovamu a börömohuro ë aribövioho gë'i osare rovade höjo. Rue'i gavade höjo ae gemu masuvarue sörö i'i io'amarue niögoho bogo ba'amë'e ma-hijamu.

<sup>12</sup> Ma-hijamu gagorovo uavade höjo: Isiajo. Masuvarue niögoho bogo ba'amë'e ja diehi'oromo ave osaroho rovane höjo. Osaroho rovane höjamu riehuro jörumoraëjade höjo.

<sup>13</sup> Jörumoraëjamu rue a börömohuro ril'öromu mu aribövioho uëvade höjo: Övo hörü'oho tövo'amoromo babu'öhego amonö ramoramore va'o hijajo. Ĕdirö'ore ae aho'obëhe nierusuburu'e bamoromo ane ja'ihö vuogigi-moruomo'ajëjo.

<sup>14</sup> Ĕhesi bëhoho God-ro ae aho'obëhe riejöro uëvaje höjo. Röhu ae ma-gemu gemu hesinö jëvojöro bæjëvaje höjo.

*Iesuhu guaro berovojöro aehu tax jö ua gavarohoje.*

<sup>15</sup> Ĕhi'amu iae Pharisee ariböviohuro va'oromo jöe atoromo uarovareje: Ĕ'ego no Iesu sareramego hu guaro berovo'irajo.

<sup>16</sup> Ĕhi atonugoromo jabetesi ijore ijore jijiharue a ioro'iorohu'o Herod-are aribövi ioro'iorohu'o rëmö'öjamu va'oromo Iesu sarerisareriamiromu uavareje: Tisajo. Iae no gavarue höjo ja a mae javë'ëro God-are mu örohemu röjahuijego. O aho bogo juhuonëmijego. Ĕhesi bëhoho jero no göromu ae böröme o bise'e javuajëromu jöe gö gö bogo röjahuijanue höjo.

<sup>17</sup> Ĕhuni ave jöho ja diehi uehorovanuoho majahuijego no hejarëjo. Rome a börömohuro nosi sa'aho muebejego noro hu tax bojamijarue höjo. Noehu ëhi ë'aruoho na ehuro nosi jögoroho aharue höjo o bogajo.

<sup>18</sup> Bogajamu Iesuro gëromu uvadeje: Jabumë sisë vaejevo'i ue gevaruëromu uëvadeje: Sareri aribövie jëvajëjo. Jemë rabëni na bijioho gevarujëjo.

<sup>19</sup> Tax a bojëmijaruje ijo bajoho röjehihego na gavöjo. Gavöjamu ijo bajoho barovareje.

<sup>20</sup> Barovamu garomu uëvadeje: Aveho rahuare nu ano'ohu'o ihohu'o jajivë'e höjo.

<sup>21</sup> Jajivë'e höjamu uavareje: Rome a börömo hesi höjo. Rome a börömo hesi höjamu uëvadeje: Ĕhuni Rome a börömo hesiroho ëho hesi öroro bojami'i God-aroho ëho God-are öroro bojaminövorëjo.

22 Ëhi uëvamu hegoroovo tiöjëvamu Iesu ë nugo'i va'oruomadeje.

*Iesuhu guaro berovojöro vuovë'e ariböviehu ri'öruomoröhe jö Sadducee ariböviehu hu ua gavarohoje.*

23 Va'amu gagorovo majae gemuore Jew rajo a masijo ioro'iorohuro rovaraje. Jabumë Sadducee jö uehorovarue aribövie jioruomadeje. Sadducee ariböviohuro uehorovoromo uvoruomajeje: A vuovë'oho ijönöho bogo ri'ö'amo'i ma-ioro'iore gemu vuovo'ajëjo. Ëhi uvoruomaje ariböviohuro rueromo Iesu guaro berovojöro sarerisareriamiromo uavareje:

24 Tisa Moses-ro jögore jajivoromo uövuë'e höjo: Aboji harihu'o rumo'e vuovego diehi ë'iröhe öroho aviëhi höjo. Aehu vaboro masuromo vaboroho aboji harihu'o bogo vaejë'e baruehu guomo'i vaboro nugë'oho hesi öhuro vuojiroho masuromo ehuro guomade ö hesi ihoro ujoho vaejaho'ajëjo. Moses-are jögoroho ëhi höjo.

25 Ëhi jië'lëro iae ae aho'obëhe 7 ma-ö ömo'ömëremu nosirire raromare höjo. Raromoromo muriohuro magonahoho masuvade höjo. Masuromo vaboroho aboji harihu'o bogo vaejë'e baruoho guomade höjo. Guomamu hesi vaboroho dorue hijamu gagorovo ö göhuro vuojiroho masuvade höjo.

26 Masuromo guomade höjo. Ö ömo'öme 7 jabuhu ë magonahe gemuoho masube rovaroho ë magonahoho aboji harihu'o bogo vaejë'e aho ma-vuovëvobe rovade höjo.

27 Vuovobe ruejuvo barëjamu ijo tugoho'ioho ë magonahoho hu'o guomade höjo. Ëhi'are höjo.

28 Ëhi ë'arohuni ehuni ave jöho no ua galië'aruëjo. Jero uvanue höjo: Vuovoromo ri'ö'ejarejo. Ehuni vuovë'e ariböviehu ri'öruomoröhe majaroho ae 7 höjo röhu ë magonahoho di ahu'o hi'a'ajëjo. Barue aho'obëhe masuvë'ego ehuni uvaruëjo.

29 Ëhi uavamu hegoroovo Iesuro uëvadeje: Bogajo. God-are surire jöhu'o huhu mu vaeröhe darugohu'o jemë bogo avoho gavarujëro sisë'i uehorovoromo ue gevarujëjo.

30 Ëhesi bëhoho vuovë'lëro ri'öruomo'iröhe maja rovë'iroho vaboroho baruoho bogo masurovo'i aneraehu ö'idöre ma-raromaruëhi ëhi raromo'aruëjo. Ehuni ë magonahehu di ahu'o hi'iröhe jö ue gevarujoho bëhi rumo'e höjo.

31 Ëjöhö jemëro uvaruje höjo: Vuovë'e ariböviehu ri'ö'iröhe jöho sareri jöe höjo. Eho bogo sareri jöehu jio'i jö mae höjo. Ehesi bëhoho vuovoromo ri'ö'iröhe jöho God-ro jemëni jövamu hesi surire jajivoromo uvë'e höjo:

32 Na Abraham Isaac Jacob ëhi muebejëvaje ae jevajëjo. Jemë rabëni ë jö hesi bëhoho bogo avoho baejarije höjo. God-hu Abraham Isaac Jacob muebejëvaje jö hesi bëhoho jabumë vuovoromo bogo ioro'ioemuoho barë'i va'o raromego muebejëvaje höjo. God bogo vuovoromo ioro'ioemu barëjë'e aribövioho muebejëvo'ibejajo. A'i hu vuovoromo va'o raromarue aribövioho iae muebejëvaje höjo.

33 Iesuro Sadducee aribövioho ëhi uëvamu ae aho'obëhe heromo jöe barëjëvadeje.

*God-hu bojamuade jöho diho börömoho jiajoho aehu Iesu ua gavadohoje.*

34 Ëhi'amu Pharisee ariböviohuro hejare uvavamu: Iesuro jö mae jövamu ehuro Sadducee aribövioho jö mana majahi'iröhoho bogohö uvavamu hegoro gagovorovareje.

<sup>35</sup> Gagovorovonugoromo Jew rajo jögoru öri röjêhijaje ae gemuëro Iesuare dêho bijioho ga'irögoro ri'öromo uavadeje:

<sup>36</sup> Tisajo. God-hu bojamuijade jögore aho'o jio'amajoho di jöho börömoho höjo.

<sup>37</sup> Börömoho höjamu uavadeje: Jasi dê vövöbajo'e aru'ahe uehore aho'obêhe Bada jasi God ma-hu gemu bojaminëjo.

<sup>38</sup> Êho jö börömo börömoho jië'ego êho nuniroho höjo.

<sup>39</sup> O ë jö hesi bëhirohu'o iae gemuoho höjo. Jaehu jasi arijo'arije rajahirovanuëhi jasi ae gemuoho ëhi rajahinëjo.

<sup>40</sup> Dê vövöbajo'e aho'o God bojami'irane jöhu'o jasi ae gemuoho rajahi'irane jöhu'o bëhoho jëvajëjo. God-are surire jö Moses'o jö God-aro baeromo majëhinövare a ioro'iorohu'o jajivo'amaroho êho ado sirino'oho jio'amajëjo.

*Böröme namiromo ajamuaje a hesi jö Iesuhu röjëhi'i uë gëvadohoje.*

<sup>41</sup> Iae Pharisee ariböviohuro gagovorouomamu gavë'i Iesuro uëvadeje:

<sup>42</sup> Böröme namiromo ajëmi'iröhe a hesi jöho jemë diehi uehorovarujëjo. Hu rahuare ujoho höjo. Uavareje: Hu David-are ujoho höjo.

<sup>43</sup> David-are ujoho höjamu uëvadeje: Êhi jië'ocho God-are Aru'ahoho rabëni uavamu David-ro böröme namiromo ajëmi'iröhe aho Bada uavade höjo.

<sup>44</sup> Êhesi jöho David-ro God-are surire jajivoromo uvë'e höjo: God Badaro nasi Bada uavade höjo:

Nasi övo manö rojo hijego

ja'o muorovarue aribövioho naro ruahö'öjëvego

hörëro vijuvo taemo'amo'irane höjo.

<sup>45</sup> Êhesi bëhoho böröme namiromo ajëmi'iröhe a hesi jöho David-ro jajivoromo uvë'e höjo: Bada höjo. Bada hö uvë'e jiaje êhuni nadi uvorëjo: Böröme namiromo ajamui'iröhe aho ma-David-are uje höjo.

<sup>46</sup> Êhi uëvamu aehu Iesu mana ua'iröhoho bogo eni jëvadeje. Bogo eni jëvamu ijönö jöe gö gö ua ga'ië'aroho juhuonivoromo vuonugareje.

## 23

*Pharisee ariböviohu'o Jew rajo jögoru öri röjêhijarue ariböviohu'o êho jabuhu sareri'e mu vaejaruëhi aehu bogo êhi ë'iröhego Iesuhu jövadohoje.*

<sup>1</sup> Êhi'amu Iesuro hesi ijorajo ömo'ömo'u'o a ioro'iorohu'o aho'obêhe uëvadeje:

<sup>2</sup> Jew rajo jögoru öri röjêhijarue ariböviohu'o Pharisee ariböviohu'o êho jaburo Moses-are sionoho baejë'e höjo.

<sup>3</sup> Moses-are sionoho baejë'e jëvaje êhuni mu jö rabe rabe uëvë'ocho ejëhoromo ëhi vaenövorëjo. A'i jabuhu ömaruëhioho nadi êhioho ömorëjo. Rabëni hesi bëhoho jö majëhijaruëhioho muoho bogo êhioho vaejarue höjo.

<sup>4</sup> Aehu i'u'e inömo ujuoho va'oruomajöro buahore bahijëhoromo tövëhoromo va'ego bogo ajëmiromo övo namehu vitu banigojiomëharuëhi ë Pharisee ariböviohu'o jögoru öri röjêhijarue ariböviohu'o jaburo êhi ë'arue höjo. I'u'e muoho aho'o ae bojëmiromo bogo mae bogo ajëmi'i ma-nunëremu gëvarue höjo.

<sup>5</sup> Jabu mu rabe rabe vaejë'ocho aëro gëjöro ma-döhemu vaeruomaje höjo. Êhesi bëhoho jabumëro nimoruomaje höjo aëro gëromo uvoruomoröhego: Jabumëremu God mabêhe uehorovorouomaje höjo. Aëro êhi uvoruomoröhego nëgego God-are jö'e suri surioho maua gagore bahiromo

övo ahore varijore muoho taemoruomaje höjo va'orahoro jio'amego aëro garuomojöro. O God-are örire jö ato'i io'amarue niögure ö'i egobövie be io'amoruomaje höjo va'orahoro jio'amego aëro garuomojöro.

<sup>6</sup> O sörö i'i va'ë'o ho o God rajahjarue osare va'ë'o ho a masijehu raro-maruire ë va'o raromo'i nimarue höjo.

<sup>7</sup> O imo'amaruire va'ë'o ho nimarue höjo ae aho'obëhe uvoruomoröhego: Jabumë a masijëro jijihajëromo rajëhiromo jejëmiruomoröhego. O nimarue höjo aëro jejëmiromo uëröhego: Tisajo.

<sup>8</sup> Röhu ae göehu jemë döre bamëvoromo uëvë'o ho: Tisa uëvë'o ho ëhi jië'o ho sisë höjo rabëni hesi bëhoho jemë ö ömo'ömëremu jëvo'i jemesi Tisaho na gemu jevë'ego.

<sup>9</sup> O ave sa'are raromarue aribövioho nadi döroho bamëvoromo uërëjo: Apajo. Èhesi bëhoho ae gemu ö'idöre hijajoho ëho iae jemesi Vavu Börömo ho höjo. Èhuni ëhi jië'e jöho nadi uërëjo.

<sup>10</sup> O ae göehu jemë döre bamëvoromo uëvë'o ho: Simano vaejanue aho javajë uëvë'o ho ëhi jië'o ho sisë höjo. Èhesi bëhoho jemesi Simano Vaejaje Aho ma-gemu jevajëjo böröme namiromo ajëmijaje ahuro jevë'ëro.

<sup>11</sup> A'i a masije jemesirire jioruomajoho ëhi jië'e aribövioho mu ajëmi'iröhe aribövie jioruomo'ajëjo.

<sup>12</sup> Ae rahu sivu uehorovoromo döre bamorovë'o ho hesi ihoho abue'a'ajëjo. O ae rahu ba'obuerovë'o ho hesi ihoho döro ajïomo'ajëjo.

*Pharisee ariböviohu'o Jew rajo jögoru öri röjëhjarue ariböviohu'o sisëre va'iröhe jö Iesuhu jövadohoje.*

<sup>13</sup> Vaevë'e jögoru öri röjëhjaruje ariböviohu'o Pharisee ariböviohu'o jemë ma-döëremu muoho ömarujëro sisërëjëvo'ajëjo. Èhesi bëhoho God-hu böröme namiromo muebejëvego hesi aharire raromoruomo'iröhe öroho tugohëharuje höjo aëro ë va'o raromojöëni. Jemë God-are ahariroho bogo va'o raromo'i nimaruje höjo. O ae göehu God-are aharire va'o raromo'ia'amu gevë'o ho ahëvaruje höjo.

<sup>14</sup> [Vaevë'e jögoru öri röjëhjaruje ariböviohu'o Pharisee ariböviohu'o jemë ma-döëremu muoho ömarujëro sisërëjëvo'ajëjo. Èhesi bëhoho magonaho doru jabesi bövioho bise'o ho ëma ujuohëharuje höjo. Èma ujuohëhoromo sarerivoromo pari egobövie jaguvaruje höjo aëro gëromo uvojöro: Mu mae vaejaruëjo. Èhi jië'e sareri'e muoho vaejarujego ëhuni God-ro i'u börömo mae bojëmi'ajëjo.]

<sup>15</sup> Vaevë'e jögoru öri röjëhjaruje ariböviohu'o Pharisee ariböviohu'o jemë ma-döëremu muoho ömarujëro sisërëjëvo'ajëjo. Èhesi bëhoho jemëro jovo göre göre sa'a göre göre ae dinëmibe va'aruje höjo ma-ae gemuëro hesi muoho vuonugo'i Jew rajo muoho baeröhego. Ae dinëmibe va'oromo gavaruje aho jemesi jöho ejëhoromo Jew rajo mu baejamu gavë'o ho jemëro ë aho mu sisë röjahijego mae höromo vaeromo jemëhu sisë ë'oromo vëni'e örire va'arujoho ë ahuro jemë iosirëmiromo sisë börömo bëhe ë'oromo vëni'e örire va'o hesi höjo.

<sup>16</sup> Vaevë'e nuni ramoramovë'e aribövi jemëhu ae gö öri röjëhi'ie'arujoho sisërëjëvo'ajëjo. Èhesi bëhoho jemëro ae ëma majëhiromo uëvaruje höjo: Ae rahu darugo'e jö uvo'ie'o ho God-are osa börömo hesi iho uvoromo ae uëvë'o ho: Na mue ëhi ëhi ë'ejö uëromo röhu mu bogo vaejë'o ho iae hesi höjo. A'i God-are osa börömore jio'amaje gold hesi iho uvoromo ae uëvë'o ho: Na mue ëhi ëhi ë'ejö uëvë'o ho iae ë muoho vae'a'anuejo. Bogo sarerivo'anuejo.

17 Nune ramoramovoromo simane sisë'i uehorovë'e aribövie jëvadjëjo. Ëhi majëhijaruje hesi bëhoho nani jemëro uvaruje höjo: God-are osa börömo hesi ihoho bise'e jio'i God-are osa börömore jio'amaje gold-ho iho böröme höjo. Röhu ë gold-ho bogo God-are osa börömoroho jio'amo'ibejajo bogo God-are gold maho jio'amo'ibejajo. A'i ë gold-ho God-are osa börömore jio'amë'ëro ëhu'ëro ëho gold maho höjo. Gold-huro bogo God-are osa börömo iohuro iosiramiro mo iho börömo jio'i God-are osa börömo hesi iohuro gold iohoho iosiramiro mo bövioho jiaje höjo.

18 O jemëro jöe gö ëma majëhiromo uëvaruje höjo: Ae rahu darugo'e jö uvo'ië'o ho God-are maratu hesi iho uvoromo ae uëvë'o ho: Na mue ëhi ëhi ë'ejö uëromö röhu mu bogo vaejë'o ho iae hesi höjo. A'i God-are maratu döre bahijahare suvuro hesi iho uvoromo ae uëvë'o ho: Na mue ëhi ëhi ë'ejö uëvë'o ho iae ë muoho vae'a' anuëjo. Bogo sarerivo' anuëjo.

19 Nuni ramoramo'e aribövie jëvadjëjo. Nani jemëro uvaruje höjo: God-are maratu hesi ihoho bise'e jio'i God-are maratuore jio'amaje suvuroho iho böröme höjo. Röhu ë suvuroho bogo God-are maratuoro ho jio'amo'ibejajo bogo God-hu ujuoh'o'iröhe suvuro maho jio'amo'ibejajo. A'i ë suvuroho God-are maratuore jio'amë'ëro ëhu'ëro ëho suvuro maho höjo. Suvuro-huro bogo God-are maratuho iosiramiro mo iho bövioho jio'i God-are maratu hesi iohuro suvuro iohoho iosiramiro mo bövioho jiaje höjo.

20 Aehu darugo'e jö ato'ië'iroho God-are maratu hesi iho darugo'o majëhijë'o ho ë hesi bëhoho bogo maratu hesi iohohemu uvo'i maratuore jio'amaje suvuro hesi iohu'o uvoromo ë'arue höjo.

21 O ae rahu God-are osa börömo hesi iho darugo'o majëhijë'o ho ë hesi bëhoho bogo osa hesi iohohemu uvo'i osare hijaje A hesi iohu'o uvoromo ë'arue höjo.

22 O ae rahu ö'idö hesi iho darugo'o majëhijë'o ho ë hesi bëhoho ö'idöre jiaje God-are röho hesi iohu'o ë hijaje a hesi iohu'o uvoromo ë'arue höjo. Ëhuro darugo'o majëhijaruje höjo.

23 Vaevë'e jögoru öri röjëhijaruje ariböviohu'o Pharisee ariböviohu'o ma-döeremu muoho ömarujëro sisërëjëvo'ajëjo. Jemëro jemesi i jögoru e avohoromo i'o buarohoromo ijarue rihu'e oso harihu harihue gö gö garue gö gö mevoromo 10 10 bahibe va'oromo gemu gemu God suvure bojamijaruje höjo. Ëhi jië'e jögoru ininoho ejaho avoharuje höjo. Ëhi jië'o ho iae mae höjo. Nadi vuonugorëjo. Röhu ëho ma-jianovo'i jö ioro'ioroho masijo jiajoho ëho bogo uehorovaruje höjo. A ma-mae vaejëvo'irarije muoho a huë baejëvo'irarije muoho ahore vaejëvo'irarije muoho ëho rumonimaruje höjo. Nadi rumonimo'ibejarijëjo.

24 Majo majo biseharihehu jemesi jovore beva'ë'o ho io bu'öromo jovoho i'i majo börömo börömo bogo avoho gavë'e ma-nimu'öjaruje höjo. Jö masijoho bogo uehorovo'i ma-jö ininohemu uehorovaruje höjo. Ëhuro nunoho ramoramovëvego öroho sisë'i röjëhijaruje aribövie jëvadjëjo.

25 Vaevë'e jögoru öri röjëhijaruje ariböviohu'o Pharisee ariböviohu'o ma-döeremu muoho ömarujëro sisërëjëvo'ajëjo. Jemë hevöe enatue dönöhemu u'o'amaruje höjo. Gagonöho ae gö jabesi ie jove vajiohöro ujuohoromo aegë'ëro irijio mo'amë'e höjo. Ëhu'ëro dönöho aje jio'i gagonöho va'inumi'e jio'amajëjo. Jemesi mu sisëho ëhi jianovajëjo.

26 Pharisee jemë ae gemu gemu nuni ramoramo'e ae jëvadjëjo. Urimo ae gö jabesi iohu'o jovohu'o vajiohehu ujuohoromo hevöre bahiromo enatuore oteharujoho vuonugorego hevö o enatu gagoroho va'inumoho

bogojio'irajo. Ëhi ë'ë'oho jemesi hevöhu'o enatuohu'o döhu'o uhohu'o ma-mae jio'amo'ajëjo.

<sup>27</sup> Vaevë'e jögoru öri röjëhijaruje ariböviohu'o Pharisee ariböviohu'o jemë ma-döëremu muoho ömarujëro sisërëjëvo'ajëjo. Jemesi jöho uhu'e uë'ië'ajëjo. Vuovë'e sino bahi'amarue munëho aëro ajivë'e osëro buejaho'amarue höjo nu ano'e mae jio'amoröhego. Buejaho'amego dönöho ajivë'e mabëhe jio'amo'i gagonöho vuovë'e a jabesi ijo'ahohu'o sagohohu'o ëhuremu jio'amajëjo. Jemë ëhi jië'e jëvanovajëjo.

<sup>28</sup> Döhemu mae jëvego aëro gëromo uvoruomaje höjo: Jemë a mae jëvajëjo. A'i jemesi uhohu sareri sareri'e mu sisëmu vaejaruje jëvajëjo.

<sup>29</sup> Vaevë'e jögoru öri röjëhijaruje ariböviohu'o Pharisee ariböviohu'o ma-döëremu muoho ömarujëro sisërëjëvo'ajëjo. Jö God-aro baeromo majëhinövare aribövi jabesi sino guavo'amare huoho avoho'amaruje höjo. Mu mae vaejare a mami jabesi huoho avohoromo muebejaruje höjo.

<sup>30</sup> Avohoromo mueberomo jemë uvaruje höjo: Nosi hijo miono'ehu raromare majaroho evaroho no'o javuo'ibejajo no jabumë bogo ajëmiromo God-are jö majëhijaruje ariböviohuo muo'amo'ibejarëjo.

<sup>31</sup> Iae mae-ëjo. Ëhi atarujoho ëho jemëro huruoho majahuiromo uöromo ë'arujëjo: God-are jö majëhinövare a muo'amare aribövi jabesi ujo ömo'ömëro javuë'ëro jabesi öre gemuore jijiharue aribövie javuajëjo.

<sup>32</sup> Jemë ëhi jië'e aribövie jëvë'e jiaje ëhuni jemesi hijo miono'ehu mu sisë aevoromo vaebe rovarëhi jemesi nimarujoho jemë'o ëhi jië'e muoho vaebe jijihorëjo. Na ë hesi jöho bogo uë'ejöjo.

<sup>33</sup> Sigobe jëvo'amajëjo. Sigobu aboji harihu'e jëvo'amajëjo. Ëhi jië'e mu vaejë'oho diehi'oromo vënoho garaedivorëjo.

<sup>34</sup> Ëhuni aveho hehëjo. Jö God-aro baeromo majëhinövo'iröhe ariböviohuo simano ma'e ariböviohuo jö röjëhinövo'iröhe ariböviohuo Iesu naro rëmö'ö'iramu ö'oruomo'ajëjo. Ö'iramu jemëro ioro'ioroho muo'amo'arujëjo. O korosire ano taemo'amo'arujëjo. Ioro'ioroho God rajahijaruje osare osare hisuebi'amo'arujëjo. O amo göre jio'iramu amo göre siho ujuoho va'onövo'arujëjo.

<sup>35</sup> Ëhi ë'iramu ëhuni ma-maemu jië'e aribövi aehu muo'amobe rovere ë hesi i'uoho jemesi örire rue'a'ajëjo. Aevö'ioho aëro Abel a mae anoromo a ma ioro'ioroho muo'amobe ruejuvo ro ijo tugoho'ioho jemesi hijo miono'ohuro Barachiah-are harihe Zechariah anare höjo. God-are osa börömoho numëhi jio'i God-are suvuro bahijaruje maratuoho ruhëhi jiamu Zechariah ë ririre anare höjo.

<sup>36</sup> Ave jöho na jö mae uë'ië'ajëjo. God-are aribövi ëhi muo'amobe rovere ë hesi i'uoho aho'obëhe ave jaruvore raromaruje ariböviohuo jemëni rue'a'ajëjo.

### *Iesuhu Jerusalem amo rajëni vavaenimade jöhoje.*

<sup>37</sup> Vaevë'e Jerusalem amo rajohumë jemëro jö God-aro baeromo majëhijaruje ariböviohuo muo'amaruje höjo. God-hu jemëni rëmö'ö'ajë ariböviohuo munëro vajëmijaruje höjo. Kököröko vëmehu harihu vivoju uhure nugo'amoromo diehehu aegëharuëhi naro jemë ëhi gagovëvoromo gemuore rëmö'i nimo'i hijode höjo röhu jemëro bijönimarije höjo.

<sup>38</sup> Ëhuni ave jöho hehëjo. God-ro jemesi amoho vuonugego jemesi sivue jëvo'ië'ajëjo.

<sup>39</sup> Naro jemë'o hiromo va'iramu jemë nasi nu ano'o'oho bogo ga'a'arujëjo hujeji na vuonorö'ö rue'iramu evare avoho geromo nasi jöho majëhiromo uvo'a'arujëjo: Badare ihore rovajoho mabëhëjo. Èhuremu uehorovorëjo.

## 24

*Aehu God-are amo börömo dadovoruomo'iröhe jö Iesuhu jövadohoje.*

<sup>1</sup> Èhi uënuGOROMO Iesuro God-are amo börömore jioromo va'amU gavë'i hesi ijorajo ömo'ömohuro ro birohoromo God-are amo hesi javue gö gö röjahi'amareje.

<sup>2</sup> Röjahi'amamu Iesuro uëvadeje: Ave öri ari'o'oho aho'o jemë iae gavarujëjo. Röhu aveho na jö mae uë'ië'ajëjo. Ave munë javuoho aho'obëhe aëro dadovoruomo'iramu munëho ahoromo sa'aro ruvebi barë nahonahovo'ajëjo.

*Huë vavaeni börömo rueröhe jö Iesuhu majëhijadohoje.*

<sup>3</sup> Èhi ë'ë'ëro Iesuro Olives Dahorure ajio hijadeje. Hijamu hesi ijorajoho jaburo sivue ajio hu'o raromoromo uavareje: Ave jöho majahuego no hejarëjo. God-are javu masijehu rireromo'iröhego uövuanoho ëho divare jio'a'ajëjo. O no mu rabe garomo uvo'ëjarëjo: Jero rue'ië'anuejo. Rovego ave sa'aho bövioho bise'o'oho barë'ië'ajëjo.

<sup>4</sup> Barë'ië'ajëjamu hegorovo Iesuro uëvadeje: Gavë'iajo. Aëro sarerëmi'iramu guaro rirerömëvo va'a'ajëjo.

<sup>5</sup> Ae aho'obëhe rueromo sarerëmiromo uë'a'aruëjo: Nöruare ihoro rovajëjo. God-hu uevë'ëro böröme namiromo ajëmi'irode aho na jevajëjo. Èhi uëromo ae aho'obëhe sarerëmi'iramu uvo'a'aruëjo: Mae-ëromo guaro rireromo'ajëjo.

<sup>6</sup> Röhu he'a'arujëjo muorovo jöe ruenövo muorovonövo'iramu he'a'arujëjo. Èhi hejë'o'oho bogave gemu juhuonivo'irarijëjo. Öre gö bogojië'ëro ëhi jië'e mu sisëho iae jio'a'ajëjo. Röhu sa'aho bövioho bise'o'oho evaroho bogo barë'i hesi majae göro jio'a'ajëjo.

<sup>7</sup> Sa'ae göëro göhu'o muorovonövo a masijo ioro'iorohuro ioro'iorohu'o muorovonövo'aruëjo. Sa'ae gö gö iruno'e bogojio'ajëjo. Sa'ae dinö'e dinö'e jiajoho hijiohijiovo'amo'ajëjo.

<sup>8</sup> Èhi jië'e huë vavaenoho rue'iramu mu sisëho bogo burëroho barë'i magonahehu aevoromo raho'i hara'uajëhi ëhi aho aevoromo huë vavaene börömo'oho baebe va'oruomo'ajëjo.

<sup>9</sup> Èhi'o'iramu evare aëro jemë guduamo ujuohëvo va'o a masijo jabesi övore bojëmi'aruëjo jaburo huë vavaene bojëmi'iröhego. O muo'amëvo'aruëjo. Sa'ae dinö'e dinö'e raromarue aribövioho aho'obëhe jaburo uvoruomo'ajëjo: Jemëro na uehorovevaruje hö uvoromo nue huodëgoruomo'ajëjo.

<sup>10</sup> Èhi'o'iramu evare ae aho'obëhe nasi örire mae uehorovevaruoho vuonugo'i mue gö gö uehorovoruomo'ajëjo. Aemo'aemohuro aemo'aemoho sarerisareriëmiromo ae gö jabesi övore bojëmi'aruëjo sisë vaejëvoröhego. Göëro göho nue huodivorovoruomo'ajëjo.

<sup>11</sup> Ae göëro göëro ri'öromo ae sarerëmiromo uë'a'aruëjo: Na jö God-aro baeromo majëhijaje ae jevajë uë'iramu ae aho'obëhe heromo mae höromo guaro rireromo'aruëjo.

<sup>12</sup> Mu sisë aho'o rumorovobe va'iramu gagorovo ae aho'obëhe göehu gö huë baerovarue muoho vuonugo'iramu sisërë'ajëjo.



13 Ĕhi ě'oruomo'ajĕjo rĕhu ae rahu birivoromo mae uehorovevobe va'ujuvo maja barĕ'irĕhe maja rovĕ'iroho God-ro baejĕvoromo manĕ bamĕvo'ajĕjo.

14 Rĕhu God-hu bĕrĕme namiromo muebejĕvaje jĕ maho aĕro sa'ae dinĕ'e dinĕ'e majĕhibe va'oruomo'ajĕjo ae aho'obĕhe sama'e heruomorĕhego. Jĕho sa'ae aho'obĕhe majĕhi barĕ'iramu evare sa'a bĕvi bise'o barĕ'irĕhe majaho rue'a'ajĕjo.

*Mu sisĕ bĕhe ruerĕhe jĕhoje.*

15 Rĕhu Daniel jĕ God-aro baeromo majĕhinĕvade ahuro mami'e God-are surire jajivoromo uĕvuade hĕjo: God-are osa ijumaje sisĕhuro God-are osa maremu nami'a'ajĕjo. Daniel-hu jajivadĕhi ěhi ga'a'arujĕjo ě sisĕho God-are osare nami'iramu. Iesuro ěhi majĕhijadeje. Ĕjĕ Iesuhu majĕhijadoho adahoromo avo'avoho gare.

16 Amo Iesuro jĕ vituoho majĕhiromo uĕvadeje: Sisĕhuro God-are osare namijego gagorovo ave Judea sa'are raromaruje aribĕvioharo huruomoromo dahoru'ero iojomorĕne.

17 Ae rahu javu dĕnĕ haradare raromĕ'oho nadi abueromo osare inĕmoho va'oujuho'i ma-huruomoromo va'orĕne.

18 O mure raromĕ'oho nadi vuonorĕ'ĕ va'oujuho'i ma-huruomoromo va'orĕne.

19 Rĕhu ě huĕ vavaeni rue'irĕhe majaroho dĕ'e magonahohu'o aboji harihu'o inino jio'amĕ'e magonahohu'o jabumĕ vaevĕ'oho diehi huruomoruomo'ajĕjo.

20 Rĕhu God ua garĕjo huro ajĕmego ěhuro niohijo majaroho o nuho majaroho bogo huruomo'irarije hĕjo.

21 Rabĕni hesi bĕhoho evare majaroho huĕ vavaene bogo bise'o vadu'oho rue'a'ajĕjo. Ĕhi jiĕ'e huĕ vavaenoho urimo God-hu sa'a bĕvi bise'o bamadevaroho bogojibe ruejuvo ro jaruvo majahu'o ěhi jiĕ'e huĕ vavaenoho bogohĕjo. O ijonĕhu'o bogojio'i ě majaho gemu bĕrĕmoho jio'a'ajĕjo.

22 Ĕhuĕ vavaeni maja ěgobĕvi jiajoho God bogo tarioromo bunemuoho bamo'ibejajo aho bogo birivoromo raromo'ibejajo. A'i God-ro hesi baejĕvade aribĕvioho uehorovĕvoromo ě majaho tarioromo bunemu bamo'ajĕjo.

23 Ĕhi jiamu ae gĕhu uĕvĕ'oho: Aveho ro gahĕjo. O arueho va'oujuho'i gahĕjo. God-hu uavĕ'ĕro bĕrĕme namiromo ajamui'irĕhe aho aviae o aruae hĕ uĕvĕ'oho nadi maho uehorovorĕjo.

24 Ĕhesi bĕhoho rabĕniajo. Ae aho'obĕhe rueromo sarerĕmiromo uĕbe va'a'aruĕjo: God-hu uevĕ'ĕro bĕrĕme namiromo ajĕmi'irode aho jevajĕjo o jĕ God-aro baeromo majĕhijaje ae jevajĕjo. Sarerĕmiromo ěhi majĕhi'aruĕjo. Majĕhiromo bogo gavarue mu masijo masijoho vaenĕvo'aruĕjo eni jĕvego God-hu sĕjĕvade aribĕviohu'o sarerĕmego rireromo'irĕhego.

25 Rĕhu hehĕjo. Ijonĕ jiorĕhe jĕho na urimo majĕhijĕ'e jevajĕjo.

26 Ĕhu'e jiaje aehu uĕvĕ'oho: Ĕhuro va'oujuho'i garĕjo. Aruae je'ore hijajĕ uĕvĕ'oho nadi va'oujuho'i garĕjo. O uĕvĕ'oho: Hu gurihiromo osaro hijajĕ uĕvĕ'oho nadi maho uehorovorĕjo.

27 A'i baderehu aruhe baderivoromo ajivo va'oujuho'i anume bu'ĕjĕgo gavarujĕhi God-are A Maho naro ěhi ma-va'orahoro rue'iramu ge'a'aruĕjo.

28 Sagohe dinĕ'e jiajire ě ugoho gagovoruomo'ajĕjo.

*God-are A Maehu ruerĕhe jĕhoje.*

29 Röhu ë huë vavaeni majaho barë'iramu evare maja nunoho ramoramovoromo manaeroho duorohoromo jijoho sisërë'amoromo ö'idöre inömoho aho'o arua anumiae va'o'amo'ajëjo.

30 Ëhi'o'iramu evare God-are A Ma nasi ajohuro ö'idöre ajivo'iramu ga'a'aruëjo. Ëho garomo sa'are aribövioho aho'obëhe nierusuburu'e bamoromo ga'a'aruëjo God-are A Maho naro darugo'o aji'o börömo mae baeromo ö'idöre suere ruvebi'iramu.

31 Ruvebiromo hëgöho ma-darugo'o huo'iramu nasi aneraho rëmö'ö'ejöjo. Rëmö'ö'iramu ro God-hu søjëvade aribövioho gagovëvo'aruëjo. Arua anumiae sa'ae dinö'e dinö'e maja rojomajire beva'ajire jioruomajoho gagovëvo'aruëjo.

*Mesehu gumutivego Jew rajo jabesi vama maja dunovaje uhu jöhoje.*

32 Röhu meso hesi uhu jöho heromo bëhoho avoho uehorovorëjo. Gavaruje mesoho gumutivoromo rahego garomo evare jemë uvaruje höjo: Jew rajo nosi vama majaho iae dunovajëjo.

33 Ëhesi bëhoho jemë ga'irarije naehu uëvodëhi mue gö gö rovamu gavë'iroho uvorëjo: Ëmajaho iae rovajëjo.

34 Ave jöho na jö mae uë'ië'ajëjo. Ave jaruvore raromaruje aribövioho jemë bogo vuovo barëjë'iro evare naehu uëvaje muoho aho'obëhe rue'a'ajëjo.

35 Ö'idöe sa'ae bövie bise'e barë'i nasi jöho gemu bogo barë'ajëjo.

*Iesuhu vuonorö'ö rueröhe maja no bogo gavarue jöhoje.*

36 Röhu ë majaho divare jio'iröhoho aho bogo gavaruëjo. Ö'idöre raromarue anerahu'o Harihoho na'o bogo ga'i hesi Vavuuhuro gemuëro gavajëjo.

37 Röhu God-are A Ma naehu a nunire rue'ië'iroho a mami ae Noah-hu hijade majare jiadëhi ëhi gemuoho jio'a'ajëjo.

38 Jovo börömo bëhe rojomoromo öri ari'e aho'o bae'iröhe majaho dunovamu evare aëro ie jove ue'ahobe masurovobe ëhi jië'e muohemu uehorovobe va'ojuvo evare Noah-mëro boat börömore rumo va'are höjo.

39 Rumo va'amu gavë'i a ioro'iorohuro uvoruomade höjo: No mae raro-maruejamu evare jovo börömhuro rojomoromo jabumë aho'o baeniagëgo barë nahonahovade höjo. God-are A Ma naehu rue'ië'iroho ëhi jië'e muoho jio'a'ajëjo.

40 Ëmajaho rue'iramu evare ae niö'iro mure ariromo muoho vae'iramu gavë'i aneraëro göho bae'i göho ë vuonugo'aruëjo.

41 Magonahe niö'iro gemuoro ariromo ioho sa'ijovoromo avoho'iramu aneraëro göho bae'i göho ë vuonugo'aruëjo.

42 Ëhi ë'iröhohuni ëhuni gavë'iajo. Jemesi Bada naehu rue'irode majaho jemë'o bogo gavarujëjo.

43 Ave uhu jöhu'o avo'avoho uehorovohëjo. Vajiohu'e aehu vahi'e divare rueröhe majaho osa arijo'oho bogo gavade höjo. Ga'ibejajo gavë'i hiromo vajiohu'e a hesi öroho tugohahego osaho bogo dadovoromo inömoho ujuoho'ibejajo.

44 Osa arijo'ohuro gavë'i hi'ibejajo mae jio'ibejajo. Jemë'o gavë'i raro-morëjo. Jemë bogo uehorovë'e raromaruje majare evare God-are A Maho naro rue'ejöjo.

*A börömo hesi mu aehu avoho o sisë'i mueberöhe jöhoje.*

<sup>45</sup> Aehu hesi a börömo hesi muohemu uehorovë'i simano mae uehorovoromo mu vaejaje ëhi jië'e aho uehorovohëjo. Ëa hesi a börömohuro hu uavë'e hōjo. Na valië'ajëjo. Jero nasi mu vaejarue a ioro'ioroho muebejëvonëjo. Muebejëvoromo majae eni jiego jabesi iruno'oho i'imëminövonëjo. I'imëminövonë uanugoromo va'ë'e hōjo.

<sup>46</sup> Va'o hijuvo röhu ijonö vuonorö'ö rueromo garöhe ë ahuro hesi muoho avoho vaejaho'iramu gagorovo huë mabëhe bojami'ajëjo.

<sup>47</sup> Huë mabëhe bojamiromo ua'a'ajëjo: Ja mu mae vaejanohuni ëhuni na mu börömoromo bamavo'ejöjo. Jero nasi sa'ae inömo inöme bövie bise'e aho'o muebejehonëjo. Mu avo'avoho muebejë'oho iae hu ëhi ua'a'ajëjo.

<sup>48</sup> A'i ë mu vaejahaje aho sisë jië'ohuro ëhuro uehorovoromo uvo'a'ajëjo: Nasi börömooho örisanuovajëromomo

<sup>49</sup> ri'öromomo mu vaejarue aribövi ioro'ioroho muo'amoromo vörö'e jovo sisë ue'ahoruomaje ariböviohu'o gemuore hiromomo iohomo jovoho i'a'ajëjo.

<sup>50</sup> Ëhi'oromomo bogomo gavë'e uehorovë'e hi'iramu evare hesi börömooho majioho rue'a'ajëjo.

<sup>51</sup> Rueromomo sino hahomo sisë maro ijumahoromomo nugö'ö'iramu sisëromomo va'oromomo sareri sareri'e ariböviohu'o hi'a'ajëjo. Ëdirö'ore ae aho'obëhe nierusuburu'e bamoromomo ane ja'ihomo vuogigimoromomo'ajëjo.

## 25

*Aborido ioro'iorehu sisë'i uehorovo'i ioro'iorehu avo'avoho uehorovare uhu jö Iesuhu jövdohoje.*

<sup>1</sup> Nasi majahoro rovego God-hu böröme namiromomo a diehi muebejëvo'iröhe jöho naro uhu'e majëhi'ië'ajëjo. Iae magonahoro aboride aho'obëhe övo gö mine övo gö mine raromoruomade hōjo. Raromoromomo irohomo gae ujuohoromomo i'oro masuvade aho biroho'i va'oruomade hōjo.

<sup>2</sup> Röhu aboride övo gö mine simano sisë'i uehorovarue aborido ömomo'öme jioruomomo'i aboride övo gö mine ëhomo simano mae uehorovarue aboride jioruomomade hōjo.

<sup>3</sup> Simano sisë'i uehorovarue aboridohomo jaburo irore biguröhe jovohomo bogomo ujuoho'i irohemo ujuoho va'irögoro

<sup>4</sup> simano mae uehorovarue aboridohomo jaburo irore biguröhe huonore jovohu'o irohu'o ëhi ujuohoromomo va'oruomade hōjo.

<sup>5</sup> Ëaboridohomo övo gö mine övo gö mine jaburo va'oromomo muebejuvo gavare i'oro masuvade aho bogomo vejö'ohomo rovamomo gagorovo nunëhëgamomo hegorovo momorö'öruomade hōjo.

<sup>6</sup> Momorö'öjuvo vahimo riri'e aëromomo ma-darugomo uvare hōjo: Nosi aho rovajëjo. Ruehego va'oromomo biroharejo.

<sup>7</sup> Ruehego va'oromomo biroharejamomo hegorovo aborido ömomo'ömhuro ri'öruomomomomo jabesimomo irohomo avohomo'amare hōjo.

<sup>8</sup> Avohoromomo simano sisë'i uehorovarue aboridohomo jaburo simano mae uehorovarue aboridohomo üvare hōjo: Jemesimomo jovohomo gö bojamuihëjo. Nosi irohomo duorohahuumomo'amajëjo.

<sup>9</sup> Duoroharejamomo üvare hōjo: Bogajomo. Jemë'oro no'oro biguvego barëjöënimomo bogomo bojëmi'ëjarëjo. Ëhuni va'oromomo jemesimomo gö imohëjo.

<sup>10</sup> Imohëjamomo ë aboridohomo jaburo jove imo'i va'oruomomade hōjo. Va'oruomomomomo i'oro masuvade ahuro rovade hōjo. Rovamomo iro ma avohare aboridohomo jaburo ë ahuro gemomo mae osanö va'oruomomade hōjo masurovare sörohomo i'iröhënimomo. Osanö va'oruomomomomo ojohomo tugohare hōjo.

11 Ojoho tugohamu magonaho ioro'iorohuro ijore rueruomade höjo. Rueruomoromo i'o masuvade ahuni uvare höjo: Asë'e asë'e oje jiovahuego no ö'arëjo.

12 Ö'arëjamu ruehuro uëvade höjo: Na jemë bogo gëvaje höjo. Iae na mae uëvajëjo. Èhi'are höjo.

13 Èhuni gavë'iajo na divare majare rue'irodoho jemë bogo gavë'e jëvaje.

*Ae niö'ì gemu jabesi a börömo hesi moni ujuohoromo diehi ë'are ë hesi uhu jö Iesuhu jövadohoje.*

14 Röhu God-hu böröme namiromo muebejëvo'iröhe öri hesi uhu jö göho aviëhi höjo. Ae gemuëro öre gö va'irögoro hesi mu vaejaharue aribövioho uëvamu rovere höjo. Rovamu uëvade höjo: Na va'ejöjo. Jemëro nasi sa'aho bövioho bise'oho avoho muebejehorëjo.

15 Avoho muebejehorëromo mu ariböviehu mu böröme o bise'e vae'iröhoho eni jëvamu garomo èhi hesi monioho böröme o bise'e èhi ae gemu gemu bojамibe va'ade höjo jaburo èho baeromo hesi muoho vaejahoröhego. A göho 5,000 kina bojami'i a göho 2,000 kina bojami'i a göho 1,000 kina èhi bojамijade höjo. Èhi i'imëminugoromo va'ade höjo.

16 Va'amu gavë'i 5,000 kina baejade ahuro ujuoho va'oromo mue vaeromo èhuro 5,000 kina gö'o döre baejade höjo.

17 2,000 baejade aho hu'o mue vaeromo 2,000 kina gö'o döre baejade höjo.

18 Èhi'o'irögoro 1,000 kina baejade ahuro va'oromo guae umoromo hesi a börömo hesi ijo bajoho ë gurihi bahijade höjo.

19 Èhi'oromo raromobe va'ojuvo majae ëgobövie barëjamu jabesi a börömohuro vuonorö'ö rovade höjo. Rueromo uëvade höjo: Ruehego na gëvöjo nasi ijo bajoho diehi muebejehë'e jëvego.

20 Èhi uëvamu 5,000 kina baejade ahuro 5,000 kina gö'o döre baejadoho èhu'o barueromo bojamiromo uavade höjo: Bada jero 5,000 kina bojemi-jane höjo. Aveho gavëjo. Naro mue vaeromo 5,000 kina gö'o döre baejahë'e jevajëjo.

21 Baejahë'e jevajëjamu hesi a börömohuro uavade höjo: Mabëhëjo. Ja mue vaejehanue a ma-mae javajëjo. Naehu ijo baje ma-bisemu bojамamu avoho muebejehanohuni èhuni naro bövi mae bojami'ejöjo muebejeho'iranego. Rovego gemuoro nimoroho'irarëjo.

22 Gemuoro nimoroho'irarëjamu 2,000 kina baejade ahuro rueromo uavade höjo: Bada jero 2,000 kina bojамijane höjo. Aveho gavëjo. Naro mue vaeromo 2,000 kina gö'o döre baejahë'e jevajëjo.

23 Baejahë'e jevajëjamu hesi a börömohuro uavade höjo: Mabëhëjo. Ja mue vaejehanue a ma-mae javajëjo. Naehu ijo baje ma-bisemu bojамamu avoho muebejehanohuni èhuni naro bövi mae bojami'ejöjo muebejeho'iranego. Rovego gemuoro nimoroho'irarëjo.

24 Gemuoro nimoroho'irarëjamu 1,000 kina baejade ahuro rovade höjo. Rueromo uavade höjo: Bada na mae garomo uvode höjo: Ja vörö'e aëro javë'ëro ae göehu ba'amaroho bivaroho ja ma-ijanue höjo.

25 Èhi javë'e aëgo èhuni naro ja juhuonamiromo jasi 1,000 kina bava'oromo sa'a gagore gurihi bamode höjo. Aveho gavëjo. Jasi ijo bajoho aviae höjo.

26 Aviae höjamu rue a börömohuro ri'öromo uavade höjo: Sareri mu bijöni'e a sisë bëhe javajëjo. Jero uvane höjo: Ae göehu ba'amaroho bivaroho nöröro ma-ijaje höjo. Jero èhi uvane höjo. Na mae-ëjo.

<sup>27</sup> Ĕhuni ja nasi ijo bajoho baeromo avoho bahijarue aribövi jabesi övore bamo'ibejanëjo. Ĕhi ë'ibejanëjo na rueromo nasiroho baeromo gö'o döre bamaroho ëhu'o bae'ibejëjo.

<sup>28</sup> Ĕhuni jemëro 1,000 kina ë ia hesiroho baeniahiromo 10,000 kina baejë'e aho bojamihtëjo.

<sup>29</sup> Ĕhesi bëhoho mu vae'irane suvuore javë'o'oho God-ro gö'o bojami'iramu baeromo bövi mae javo'ajëjo. O bogojavë'o'oho bisemu baejanoho God-ro baeniahi'ajëjo.

<sup>30</sup> Röhu ë mu bogo vaejaje aho gudumoromo babu'öhego amonö ramoramore va'o hijajo. Ĕdirö'ore ae aho'obëhe nierusuburu'e bamoromo ane ja'ihö vuogigimoromo'ajëjo. Ĕhi uëvade hëjo.

*Maja viture a ma a sisë mevavuo'iröhe jö Iesuhu jövadohoje.*

<sup>31</sup> Röhu jö göho God-are A Maho naro anerae aho'obëhe jabu'o gemu mae nasi aji'o rovë'iroho evare nasi aji'e röho mare ajio hi'ejëjo.

<sup>32</sup> Hi'iramu sa'ae dinö'e dinö'e raromarue aribövioho jaburo rueromo nasi nunire gagovoruomo'ajëjo. Gagovoruomo'iramu sheep muebejaje aehu sheep o goat adovoromo hahagu hahagu nugo'amaruëhi naro ë aribövioho ëhi adovëvoromo hahagu hahagu rëmo'ejëjo.

<sup>33</sup> Hahagu hahagu rëmoromo sheep ma va'ënoho nasi övo manö rëmo'i goat sisë va'ënoho nasi övo adonö rëmo'ejëjo.

<sup>34</sup> Rëmonugoromo a bërömo'ho naro övo manö riravarue aribövioho uë'ejëjo: Nasi Vavuohuro jemesi örire huë mabëhe bojëmijë'e jiaje jemesi röhoho ro baehëjo. Ĕröhoho urimo sa'a bövi bise'o bamadevare huro avoho nugëhobe rovë'e hëjo jemëro ë hesi aharire raromo'irarijego.

<sup>35</sup> Rabëni hesi bëhoho urimo na hömevamu jemëro ie i'imemijarije hëjo. Na huë girihevamu jemëro jovoho bojemijarije hëjo. Naro ame göro jioromo ö'amu gegorovo uevarije hëjo: Nosi osaro ro hijëjo.

<sup>36</sup> Niögu rumo'e jevamu niögoho i'imemamu io'amode hëjo. Guomo guome baejevamu jemëro muebejevarije hëjo. Savo'ji gagore hijamu jemëro rueromo gevarije hëjo.

<sup>37</sup> Gevarije hö'iramu rue aribövi mahuro ueruomo'ajëjo: Bada iae ëhi hëjo röhu no divare gavare hëjo ja hömavamu ioho i'imamare hëjo. Divare gavare hëjo ja huë girihavamu jovoho bojamare hëjo.

<sup>38</sup> Divare gavare hëjo ja ame göro jioromo rovamu uavare hëjo: Nosi osaro ro hijëjo. Divare gavare hëjo niögu rumo'e javamu niögoho i'imamare hëjo.

<sup>39</sup> Divare gavare hëjo ja guomo guome baejavamu o savo'ji gagore hijamu no ö'oromo gavare hëjo.

<sup>40</sup> Ĕhi ue'iramu a bërömo'ho naro uë'ejëjo: Aveho na jö mae uëvajëjo. Nasi öe iho ma-bise'o jië'o'oho mae avoharijohuro ëhuro na'o mae avohevarije hëjo.

<sup>41</sup> Ĕhi uënu'goromo huotorovoromo nasi övo adonö riravarue aribövioho uë'ejëjo: I'ue bae'ië'e aribövie jëvaje rori'o va'ohëjo. Ravemu ravaje vëni'e öri ari'oro va'ohëjo. Ĕvënoho God-ro Satan'o hesi anera ömo'ömo'hu'o ëho jabuni avohëhë'e hëjo.

<sup>42</sup> Rabëni hesi bëhoho na hömevadoho jemë ioho bogo i'imemijarije hëjo. Huë girihevadoho jemë jovoho bogo bojemijarije hëjo.

<sup>43</sup> Ame göro jioromo ö'odoho jemë bogo uevarije hëjo: Nosi osaro ro hijëjo. Niögu rumo'e jevadoho jemë niögoho bogo i'imemarije hëjo. Guomo

guomo baejevadoho o savoji gagore hijodoho jemë bogo ro muebejevarije höjo.

<sup>44</sup> Bogo ro muebejevarije hö'iramu rue ariböviohuro ueruomo'ajëjo: Bada iae ëhi höjo röhu no divare gavare höjo ja hömavamu o huë girihavamu o ame göro jioromo rovamu o niögu rumo'e javamu o guomo guome baejavamu o savoji gagore hijamu garomo bogo ajami'i ma-nunëremu gavare höjo.

<sup>45</sup> Ma-nunëremu gavare hö'iramu naro uë'ejöjo: Nasi öe iho ma-bise'lo jië'oho bogo ma avoharijohuro ëhuro na'o bogo ma avohevarije höjo.

<sup>46</sup> Ëhi uë'iramu ë aribövioho sisëro va'oromo ma-ioro'ioeremu i'ue baeruomo'ajëjo. A'i aribövi mahuro maro va'oromo ma-ioro'ioeremu raromoruomo'ajëjo.

## 26

### *Iesu ano'i mevare jöhoje.*

<sup>1</sup> Ëjöho majëhi barënu goromo Iesuro hesi ijarahö ömo'ömoho uëvadeje:

<sup>2</sup> Iae jemë'lo gavarujëjo majae niö'i hesi uhure evare God-hu Vörö Tugohade Sörö majaho rue'a'ajëjo. Rue'iramu aëro God-are A Maho na guduamevoromo a masijo jabesi övore bojëmi'aruëjo korosire ano taemevoröhego.

<sup>3</sup> Iesuro ëhi jövo'irögorö röhu evare priest masijohu'lo Jew rajo a duvaho ömo'ömohu'lo ëho jaburo priest börömo ihe Caiaphas-are osa börömore ë ro gagovareje.

<sup>4</sup> Gagovoromo jöe mevoromo uarovareje: No diehi'oromo Iesu saginiëri guduamoromo ano'ejärëjo.

<sup>5</sup> Sörö majaröho bogo guduamo'ejärëjo aëro göromo no'lo muorovoruo-mojöeni.

### *Magonahehu ridi'e oso Iesuare simanore otehade jöhoje.*

<sup>6</sup> Ëhi'amu Iesuro Bethany amore rueromo sino jomo'e ae Simon-are osare ro hiromo ie ijadeje.

<sup>7</sup> Ie ijamu gagorovo magonahe gemuëro munë huono mabëhe baeromo rovadeje. Ëhuono gagore ridi'e osoho jiadeje. Huonore oso imarue hesi manaho bövi mae jiadeje. Magonahohuro ë osoho barueromo Iesuare simanore otehadeje.

<sup>8</sup> Simanore otehamu gagorovo Iesuare ijarahöho jaburo dë vörönëgamu uarovareje: Osoho rabëni ëma otehö'öjajëjo.

<sup>9</sup> Ae gö jabesi örire imo'ibejarëjo manaho bövi mae bae'ibejarëjo. Ëmanaho baeromo bövi bise'lo rumo'e aribövioho suvuorëmi'ibejarëjo. Ëhi jië'oho iae mae jio'ibejajo. Röhu ëma otehö'öjade höjo.

<sup>10</sup> Ëhi atamu hegorovo Iesuro göromo uvadeje: Ëhi jië'e jöho ataruëromo uëvadeje: Jemë rabëni magonahoho huë vavaenoho bojamijarujëjo. Mu mabëhe nasi örire vaejevë'e höjo.

<sup>11</sup> Bövi bise'lo rumo'e ariböviohuro jemë'lo raromobe jijihö'aruëjo mae vaejëvojöro. A'i naro jemë'oho bogo hibe juvo'ejöjo ëhi avohevojöro.

<sup>12</sup> Ëmagonahehu oso nasi sinore bamehade hesi bëhoho nasi sinoho avohehade höjo ëhuro aëro hure mae bamevoröhego.

<sup>13</sup> Ave jöho na jö mae uë'ië'ajëjo. Sa'ae dinö'e dinö'e aehu nasi jö ma majëhibe jijihë'iroho ë magonahehu ë'ade jöhu'lo majëhibe jijihö'aruëjo aëro hu mae uehorovoruumoröhego.

*Judas-hu Iesu ni Jew rajo a masijo hiruëmade jöhoje.*

14 Ëhi'amu Iesuare ijoraje 12 röhu gemu hesi ihe Judas Iscariot-ro va'oromo priest masijoho uëvadeje:

15 Naehu Iesu jemesi övore bojëmijë'o ho jemë ijo baje dimino'e bo-jemirëjo. Bojemirëjamu rueho jaburo ajivë'e ijo bajoho adahoromo 30 bojamijareje.

16 Bojamijamu evare Judas-ro aevoromo öre nahadeje Iesu jabesi övore bojëmi'iröhëro.

*God-hu Vörö Tugohade Sörö Iesumëhu ijare jöhoje.*

17 I Dë Huaje Oso Rumo'e I ibe va'iröhe majaho aevoromo rovamu gagorovo Iesuare ijorajoho jaburo rueromo Iesu uavareje: Ja nagajoho no dinö'e va'oromo God-hu Vörö Tugohade Söröho avohaho'ejarëjo.

18 Ëhi uavamu uëvadeje: Jerusalem amo börömhuro va'oromo ë a hesi osaro va'oromo uarëjo: No röjahuijaje ahuro uvajëjo: Nasi majaho dunovajëjo. Ëhuni naro jasi osare ö'oromo God-hu Vörö Tugohade Söröho nasi ijorajoho jabu'o gemu mae i'ejöjo. Ëhi uarëjo.

19 Ëhi uarëjamu rue ijorajoho jaburo Iesuhu uëvadëhi ëhi ë'oromo söröho avohareje.

20 Ëhi'amu vahiromadeje. Vahiromamu gagorovo Iesuro hesi ijoraje 12-ho jabu'o gemuore hijadeje ë ioho i'irovo.

21 Hiromo ioho ijë'i uëvadeje: Ave jöho na jö mae uë'ië'ajëjo. Jemë ae gemuëro na bijönegarue aribövi jabesi övore bojëmi'anuëjo.

22 Bojëmi'anuëjamu hegorovo uehore gö gö böröme baeromo ae gemuëro gemuëro uavareje: Na bogo ëhioho ë'ejöjo. Na na mae uavajëjo.

23 Mae uavajëjamu hegorovo uëvadeje: Naehu i hevöre ba'amo'ego hu'o gemuore ba'amaje ahuro ë mu sisëho vae'a'ajëjo.

24 God-are surire jajivarëhi hesi A Maho na ëhi guomevo'ajëjo. Röhu na bijönegarue aribövi jabesi övore bojëmi'iröhe aho vaevë'o ho sisërë'ajëjo. Ëaho bogo raho'ibejajo ëhuro mae jio'ibejajo.

25 Mae jio'ibejajamu Judas Iesu bijönimarue a jabesi övore bojëmi'iröhe ahuro uavadeje: Na bogo ëhioho ë'ejöjo. Na mae-ëjo. Na mae-ëjamu uavadeje: Jero jasi jövanuëjo.

*Sino'o kö'o aevoromo ijare jöhoje.*

26 Ëhi'amu ioho ue'ahoromo Iesuro ioho baeromo God mae uanugoromo ato'atovoromo hesi aribövioho suvuorëmiromo uëvadeje: Baeromo ihëjo. Aveho nasi sine höjo.

27 Ëhi'onugoromo enatuore jovoho baeromo God mae uanugoromo bojëmiromo uëvadeje: Jemë ae aho'obëhe enatuore jovoho baeromo ihëjo.

28 Aveho nasi köe höjo. Ae aho'o jemesi jöëni köho rovevoromo guomevo'ajëjo ëhuro sisëho mu'uvëhoröhego. Guomevo'iramu ëhuro God-hu muebejëvo'iröhe jögoroho marë'ajëjo.

29 Röhu aveho hehëjo. Na ijoho ö'i bajo jovoho bogo i'ejöjo hujeji ëho majaho rovego evare jemë'o na'o nasi Vavuehu muebejaje öri ari'ere raromoromo ö'i bajo jovo i'oho ue'ahoröhëni.

30 Ëhi uënugoromo God rajahijarue jöho ionugoromo suorovo va'oromo Olives Dahorure iojio mareje.

*Peter-hu Iesu gavaje jö a subivëhoröhe jö Iesuhu majahijadohoje.*

31 Iojjiomoromo Iesuro hesi aribövioho uëvadeje: Jaruvo vahire ae aho'obëhe nasi örيره mae uehorovevarujoho vuonugo'i remo va'a'arujëjo. Èhesi bëhoho God-are surire jöho jajivoromo uvë'e höjo: Sheep muebe'amaje aho God naro ano'ejöjo. Ano'iramu huhu muebe'amade sheep-oho jaburo arua anumiae va'o'amo'ajëjo. God-are jö jiajëhi ëhi remo va'a'arujëjo.

32 Remo va'iramu guomoromo ri'önugoromo naro urimo Galilee va'ejöjo. Jemë ijore ö'a'arujëjo.

33 Èhi uëvamu Peter-ro ri'öromomo uavadeje: Nani a ioro'ioroho jasi örيره uehorovaruocho vuonugo'i ramo va'a'aruëjo röhu na bogo ëhioho ë'ejöjo.

34 Bogo ëhioho ë'ejöjamu Iesuro Peter uavadeje: Èhi uevanuëjo röhu ave jöho na jö mae ua'ië'ajëjo. Jaruvo vahire kökörökoho bogo urimoho uvë'e jero urimo vae niö'i gemu ae uë'a'anuëjo: Na Iesu bogo gavaje höjo.

35 Èhi uë'a'anuëjamu hegorovo Peter-ro uavadeje: O na bogo ëhioho ë'ejöjo. Aehu anegamu ja'o gemuore guomo'ië'iroho na bogo ëhioho majëhi'ejöjo. Bogo majëhi'ejöjamu ijorajo ioro'ioroho aho'o jabu'o ëhi gemuoho Iesu uaruomadeje.

*Iesuhu Gethsemane sa'are hiromomo God-are örيره ëninamijade jöhoje.*

36 Èhi'lamu Iesuro öri ari'o ihe Gethsemane hesi ariböviohu'o rovadeje. Rueromomo uëvadeje: Avehuro raromohago na aruëre va'oromomo God-are örيره jöe jövöjo.

37 Èhi uënugoromomo Peter'o Zebedee-are harihoho niö'i jabu'o sö ujuoho va'oromomo huë vavaene böröme baeromomo nurunurumadeje.

38 Nurunurumomomo uëvadeje: Na sisë maro huë vavaene baejevajëjo. Èhuro guomevo hesi höjo. Èhuni nadi momorö'ö'i ma-nune jioromomo avoho mueberovë'e raromohëjo.

39 Èhi uënugoromomo rori'o va'oromomo sa'are behumomomo nu ano'oho sa'are amoromomo God ëninamiromomo uavadeje: Apo jasi örيره öre gö javë'oho i'ue huë vavaene nasi örيره rovajoho ahego na bogo bae'iröjo. Röhu naehu nimajoho nadi ë'i jaehu nimanuëhi ëhi ë'onëjo.

40 Èhi ëninaminugoromomo vuonorö'ö rueromomo gavade hesi ae niö'i gemu momorö'öjamu gëgorovo Peter uavadeje: Majae ma-bunemu nune jioromomo na'o gemuoro mueberovë'e raromom'irarijoho jemë diehi'oromomo bogo eni jëvajëjo.

41 Nune jioromomo mueberomomo ëninamihego God-ro ajëmego Satan-ro bogo dinëmego èhuro bogo bejëvo'irajo. Jemesi aru'ahoho mu mae vae'i nimo'i jemesi sino haho'oho u'uhë'e höjo.

42 Èhi uënugoromomo röhu maho va'oromomo ëninamiromomo uavadeje: Apo öre gö bogojavo'i i'uehu huë vavaenehu nasirire ruejoro nimë'oho iae ëhi ë'onëjo.

43 Èhi uanugoromomo vuonorö'ö rueromomo gavade jabumë nunëhimo'amo'lego momorö'öjamu gëgorovo

44 rëmo'i vuonorö'ö va'oromomo urimë'i vae niö'i ëninamijade jöe gemuoho röhu maho ëninamijadeje.

45 Èninaminugoromomo rueromomo hesi aribövioho uëvadeje: Jemë diehi'oromomo nuhoromomo ma-momorö'öemu momorö'öjarujëjo. Gahëjo. Majaho mami'e rovë'e höjo. Aëro God-are A Maho na bijönegarue aribövi jabesi övore bojëmi'ië'ajëjo.



46 Ri'öromo go va'ohago va'arëjo. Gahëjo. Na bijönegarue a bojëmi'iröhe aho rovajëjo.

*Iesu guduamare jöhoje.*

47 Ëhi uëvamu gavë'i Judas rovadeje. Iesuare ijoraje aho'obëhe 12 röhu Judas hu'o jabesi ae gemuoho jiadeje. Judas rovamu ae aho'obëhe mae siravae kepatae ujuohoromo hu'o rueruomadeje priest masijohu'o Jew rajo a duvaho ömo'ömohu'o ëho jaburo rëmö'öjë'ëro jië'ëro.

48 Röhu ë hesi urimo ë sareri'e aho Judas-ro ë aribövioho uëvadeje: Ga'irarije naro di aho dudöhamu gavë'ohu uvorëjo: Iae Iesu höromo guduamorëjo.

49 Judas-ro ëhi uëvë'ëro huro rueromo ma-burëro ro Iesu uavadeje: Bada vaevë'ëromo dudöhadeje.

50 Dudöhamu uavadeje: Isi jasi nimanue muoho vaejëjo. Ëhi uavamu aëro rueromo Iesu guduamareje.

51 Guduamamu gagorovo ae gemu Iesuare bëhire namijaduhuro hesi kaejöhö jijöromo priest börömo hesi mu vaejaje aho anoromo hia'ohö tariö'öjahadeje.

52 Tariö'öjahamu gagorovo Iesuro uavadeje: Jasi kaejöhö sionoro vuonorö'ö ba'amëjo. Ae rahu kaejöhöhu o bijehu bunehu muorovë'ohö kaejöhuro bijohuro bunohuro muo'amëvo'iramu vuovëvo'ajëjo.

53 O jaehu a ananue hesi bëhohö nani jero uvanuëjo: Nöröhu hesi Vavu ua gavë'ohö bogo ajamiromo anerae aho'obëhe mae gemuore jioruomajohö rëmö'ö'iramu rueruomoromo na ajemi'aruëromo ëhuni aho ananuëjo.

54 Röhu naro hu ua ga'ibejëjo God-are surire jajivarëhi muoho bogo ëhioho jio'ibejajo. Ëhuni ajemi'iröhe jöhö Vavuohö bogo ua ga'ejëjo.

55 Iesuro ëhi uanugoromo ë rueruomade aribövioho uëvadeje: Aveho na bogo vajiohu'e anano'e aehu jevajëjo. Jemë rabëni siravahö kepataho ujuohoromo guduamevo'i rovarujëjo. Mami'e majae aho'o naehu God-are amo börömore hiromo God-are jö hesi öri a rjöhinövodohö jemë evarohö bogo guduamevarije höjo.

56 Röhu avevejö'e vaejaruje mue aho'o hesi bëhohö urimo jö God-aro baeromo majëhinövare ariböviohuro God-are surire jajivoromo uvare höjo: Ëhi jië'e muoho jio'a'ajëjo. Jabuhu jajivarëhi ëhi jioröhögo ëhuni ave muohö rovë'e höjo. Ëhi uëvamu hesi ijoraje aho'obëhe hu nugo'i huruomoromo va'areje.

*Iesu Jew rajo a masijo jabesi nunire namijade jöhoje.*

57 Ëhi'amu gagorovo Iesu hu'irae rueromo priest böröme Caiaphas-are osare rovarëje. Rueromo gavareje jögoru öri rjöhijarue ariböviohu'o a duvaho ömo'ömohu'o ë gemuoro gagovë'e jiamu.

58 Iesu priest börömo hesi osare barovamu Peter-ro arue riribövire Iesu rihromoromo priest börömo hesi osare rovadeje. Rueromo osare rumo va'oromo abo osa ririre ruë numë javue vae'i riroho ma-va'orahö nugarire ë va'oromo priest hesi mu vaeruomaje ariböviohu'o gemuore hijadeje diehi'aruohö garöhëni.

59 Ëhi'amu priest masijohu'o a masijo ioro'iorohu'o ae nahareje sareriv-  
oromo ëma huruohö majëhiromo uëröhögo: Iesuro ëhi jië'e mu sisëho vaejamu gavare höjégo heromo Iesu anego guomoröhögo.

60 Nahoromo bogo birohareje. Ae göëro göëro rueromo Iesuare jö sareriv-  
oromo majëhijarohö bogo eni jiobe va'ojuvo hujeji ae niö'iro rueromo

<sup>61</sup> jöe gemuoho majëhiromo uëvareje: Ëiahuro uvavohijajo: God-are amo börömo dadovoromo majae niö'i gemu hesi uhure röhu maho vae barë'irodoho na eni jevajëjo. Ëjö sisëho uövuamu hejare höjo.

<sup>62</sup> Ëhi majëhijamu hegorovo priest börömo huro ri'öromo Iesu uavadeje: Na ja jö mana uö'iranoho bogojavajëjo. Aehu jasi jö sisë majahuijaruoho na ëho mae o sarere höjo.

<sup>63</sup> Mae o sarere höjamu Iesuro jörume namijadeje. Jörume namijamu priest börömo huro uavadeje: God biririvoromo hijaje a hesi nunoro ave jöho ma-maemu uevego na hejöjo. Böröme namiromo ajamuijanue aho na ja javajëjo. Na ja God-are Harihe javajëjo.

<sup>64</sup> Javajëjamu uavadeje: Jaehu uevanuëhi iae ëhi jevajëjo. Röhu naro jemë ae aho'obëhe ave jöho uëvajëjo. U'emu jemëro ge'a'arujëjo God-are A Maho darugo eni jië'e A hesi övo manö hi'iramu. Ö'idöre jio'amaje suehu'o gemu mae ruvebi'iramu.

<sup>65</sup> Ëhi uavamu hegorovo rue priest börömo huro hesi niögoho dadovoromo uëvadeje: Huro God-are ihoho ijumajëjo. A göho rabëni rueromo hesi jöho huruoho majahuijöräjo. Iae no eni hejë'e javuajëjo. God-are iho ijumajoho jemë iae hejarujëjo.

<sup>66</sup> Ëhuni jemë diehi uehorovarujëjo. Diehi uehorovarujëjamu uavareje: Jö sareri'e aego ano'iramu guomo'a'ajëjo.

<sup>67</sup> Ëhi uanugoromo Iesure nu ano'ere sabëro ödivoromo övo mugö mugöëro anoruomadeje. O övo hitahiëro anoromo

<sup>68</sup> sivoromo uavareje: Jero uvanuëjo: Na böröme namiromo ajëmaje aho jevajëjo. Ëhi jië'e javaje jöho God-aro baeromo huruoho majahuiromo anagade a hesi ihoho uövuego no hejarëjo.

### *Peter-hu Iesu gavaje jö a subivëhade jöhoje*

<sup>69</sup> Ëhi'amu Peter-ro amonö aehu raromaruire ë hijadeje. Hijamu gagorovo mu ajamijaje magonahe gemuëro rueromo uavadeje: Ja'o Galilee sa'a rajo ae Iesu'o gemu mae javade höjo.

<sup>70</sup> Javade höjamu Peter-ro ae aho'obëhe jabetesi nunire magonahoho sareramiro mo uavadeje: Jaehu jövanue jöho na dadivevo avohajëjo.

<sup>71</sup> Ëhi uanugoromo aribövioho ë rëmo'i ojo bëhire va'adeje. Va'amu magonaho göëro Peter garomo hesi bëhire riravarue aribövioho uëvadeje: Ave iahe Nazareth amo rajo ae Iesu'o gemu mae jiade höjo.

<sup>72</sup> Jiade höjamu hejë'i Peter-ro röhu maho sareramadeje. Sareramiro mo uavadeje: God-are nuniro na mae uavajëjo. Ëaho na bogo gavaje höjo.

<sup>73</sup> Ëhi uavadoho ririvanovamu bëhire riravarohuro ro Peter uavareje: Iae mae-ëjo Iesure aribövi jabetesi ae gemuoho javajëjo. Jasi huëre heromo ëhuni uavaruëjo.

<sup>74</sup> Uavaruëjamu Peter-ro uëvadeje: Na jemë sarerëmi jë'oho i'ue baejööni ëhuni na jö mae uëvajëjo. Ëaho na bogo gavaje höjo.

<sup>75</sup> Bogo gavaje höjamu gavë'i kökörökoho uvadeje. Uvavamu hegorovo Peter-ro uehorovoromo uvadeje: O mami'e Iesuro uevade höjo: Kökörökoho bogo urimoho uvë'e jero urimo vae niö'i gemu ae uë'a'anuëjo: Na Iesu bogo gavaje höjo. Ëhi uehorovoromo amonö hörö va'oromo sisë maro nivadeje.

<sup>1</sup> Iae sisonuvo'ia'amu gagorovo priest masijohu'o Jew rajo a duvaho ömo'ömohu'o ë aribövioho aho'obëhe jaburo gagovoromo jöe mevoromo uarovareje: No ëhi ëhi ë'ëjarëjo Iesu guomoröhego.

<sup>2</sup> Ëhi mevoromo eni jiamu gagorovo Iesu tövoromo bava'oromo gavana Pilate-are övore bamareje.

*Judas-hu hesi arijo 'arije anorovade jöhoje.*

<sup>3</sup> Ëhi'amu Iesuni hiruëmiromu a jabesi övore bojëmade aho Judas-ro gavade Iesuare jöho court-roho bejë'e jiamu gagorovo uvadeje: Na mae ë'ajë'i sisë ë'ë'e jevajëjo. Sisë ë'ë'e jevajë uvonugoromo ajivë'e ijo baje aho'obëhe 30 ujuohadoho vuonorö'ö ujuoho va'oromo priest masijohu'o a duvahohu'o bojëmi'ie'adeje.

<sup>4</sup> Bojëmi'ie'oromo uëvadeje: Naro mu sisë ë'ë'e jevajëjo. Naro a mahuni jemë hiruëmiromu hu jemesi övore bojëmijë'e jevajëjo anego guomoröhego. Ëhi uëvamu uavareje: Ëho bogo nosi muehu höjo. Jero jasi ganëjo.

<sup>5</sup> Ëhi uavamu hejë'i ijo bajoho God-are osare bu'önugoromo jabumë rëmo va'oromo ö'ëro sönöre benugoromo vioruhirovoromo guomadeje.

<sup>6</sup> Ëhi'amu priest masijohuro ijo bajoho ujuohoromo uarovareje: Ave ijo bajoho guomoröhe a hesi manaho höjo. Ëhuni God-ni moni bahijaruire ë bahijë'oho sisë höjo.

<sup>7</sup> Jöho mevonugoromo eni jiamu gagorovo ijo bajoho ujuohoromo sa'aho imareje sa'a ioro'iorore jioromo rovere aribövioho vuovëvego ë guavo'amoröhëni sa'a ihoho Rama Avoho'amaje A Hesi Sa'aho jië'ëro.

<sup>8</sup> A guomoröhe manaho baeromo ë sa'aho imë'ëro ëhuni ë sa'aho Kö Rovade Sa'aho jumuvoroho jaruvoho hesi ihoho ëhije.

<sup>9</sup> Röhu jö God-aro baeromo majëhinövade ae Jeremiah-hu Iesuare mana ujuohoromo sa'a imoruomoröhego urimo uëvadëhi ëhi ë'areje. Amo Jeremiah-ro uëvadeje: Jabumë ajivë'e ijo bajoho aho'obëhe 30 ujuohare höjo Israel rajohuro monie ëmino'e hu imoröhëni uvë'ëro.

<sup>10</sup> Ijo bajoho ujuohoromo Badahu na uevadëhi ëhi rama avoho'amaje a hesi sa'ahuni bu'öruomade höjo. Jeremiah-ro ëhi uëvadeje.

*Pilate-hu jöe gö gö Iesu ua hejade jöhoje.*

<sup>11</sup> Amo Iesuro gavanare nunire namijamu gavanaro uavadeje: Na ja Jew rajo jabesi a börömoho javajëjo. Javajëjamu Iesuro uavadeje: Ëjöhö jero jasi jövanuëjo.

<sup>12</sup> Jövanuëjamu priest masijohu'o a duvahohu'o ëho jaburo Iesuare jö sisëho gavana huruoho majahijareje. Majahijamu Iesu bogo mana uavadeje.

<sup>13</sup> Bogo mana uavamu Pilate-ro Iesu uavadeje: Rueho jabuhu jasi jö sisë aho'obëhe majehijaruoho na ja hejanuëjo o bogajo.

<sup>14</sup> Bogajamu Iesuro jöho bogo mana majahijadeje. Bogo majahijamu rue a börömohuro tiö avohadeje.

*Iesu anego guomojöro Pilate-hu uëvade jöhoje.*

<sup>15</sup> Röhu God-hu Vörö Tugohade Sörö maja rovë'iroho savoji gagore raromarue aribövioho di aho jiovo nugö'öjöro aehu uvoruomë'oho Pilate-ro ë aho jiovo nugö'önövadeje.

<sup>16</sup> Röhu ae gemu hesi jö sisë ae aho'obëhe hemu hejaruoho ë aho savoji gagore hijadeje. Hesi ihoho Iesu Barabbas jiadeje.

<sup>17-18</sup> Röhu Pilate-ro gëromu uvadeje: Iesuare ihoho bövie jië'ego ë ariböviohuro dë vörönëgamu nasi övore bojëmijare höjo. Bojëmijare hö

uvoromo gavade ae aho'obëhe gagovorovë'e jiamu gëgorovo uëvadeje: Jemë nëgajoho na di aho jiovoromo bojëmi'ejöjo. Na na Iesu Barabbas jiovo nugö'ö'ejöjo. O na na Iesu göho Keriso hö uvarujoho jiovo nugö'ö'ejöjo.

<sup>19</sup> Ëhi uënugoromo röhu Pilate-ro court-re hiromu jöho hejamu evare hesi vaborohuro jöe nugö'öromu uavadeje: Ëaho sisë rumo'e ae jiaje ëhuni hesi öriroho nadi bövioho bise'oho ë'onëjo. Jaruvo vahi'e naro niavoromo Iesu nia'ovoro garomo huë vavaene börömo bëhe baejode höjo.

<sup>20</sup> Jöho ëhi rovamu gavë'i Jew rajo priest masijohu'o a duvahohu'o ëho jaburo ae aho'obëhe birivoromo dinëmiromu uëvareje: Jemëro uvohëjo: Barabbas jiovo nugö'ö'i Iesu anohëjo.

<sup>21</sup> Ëhi uëvamu Pilate-ro ae aho'obëhe uëvadeje: Ëae niö'ioho jemë nëgajoho na di aho jiovoromo bojëmi'ejöjo. Uavareje: Barabbas-ajo.

<sup>22</sup> Barabbas-ajamu uëvadeje: Ëhi jië'oho Iesu Keriso na diehi'o'ejöjo. Ae aho'obëhe uvoruomadeje: Korosioro anego guomajo.

<sup>23</sup> Guomajamu uëvadeje: Rabëniajo. Diehi jië'e mu sisë vaejë'e höjo. Vaejë'e höjamu ae aho'obëhe ma-darugo ma'e uvo'i arijareje: Korosioro anego guomajo.

<sup>24</sup> Ëhi uvamu hegorovo Pilate-ro gavade hu jö jövajoho bogo eni jio'i aribövioho muorovo'ia'amu gëgorovo vuonugo'i jovoho baejadeje. Jovoho baeromo ae aho'obëhe jabesi nunire övoho eguadeje. Övoho eguoromo uëvadeje: Na övo uno'e ae jevajëjo. Ëia hesi kö rumo'e jevajëjo. Jemesi garëjo.

<sup>25</sup> Jew raje ae aho'obëhe uvoruomadeje: Iae mae-ëjo. Nosi övore nosi ujo jabesi övore ë ia hesi köho javuobe va'a'ajëjo.

<sup>26</sup> Köho javuobe va'a'ajëjamu Pilate-ro ejëhoromo Barabbas jiovo nugö'ö'ejadeje. Barabbas jiovo nugö'ö'i Iesu hisuebijöro ae uënugoromo uëvadeje: Ave aho bava'oromo korosioro anohego guomajo.

#### *Muorovo ariböviehu Iesu sivare jöhoje.*

<sup>27</sup> Guomajamu rue gavanare muorovo ariböviohuro hesi osa börömore Iesu bava'oromo muorovo a ioro'iorohu'o gagovoromo Iesu ruë numë numareje.

<sup>28</sup> Numonugoromo hesi niögoho jijövaho'i a masijehu kavuë'e niögu ëgo io'amoromo mu vaejarue ëhi jië'e niögoho ba'amahareje.

<sup>29</sup> Ba'amahoromo a masijehu bosö didi'arue ëhi jië'e bosöho Iesuare simanore didi'ahareje. Röhu bogo inömo maho baeromo bosöho avo-haho'i bibë'e ijo hisuoho ujuohoromo huoromo simanore ba'amahareje. Ba'amahonugoromo a masijehu inömo ma-mabëhe ma'eno raromaruëhi jië'e inömoho övore bamahareje. Röhu bogo inömo maho bamaho'i ma-ijahemu övore bamahareje. Bamahoromo hesi nuninö ro ague aho raro-moromo sivoromo uavareje: Jew rajo jabesi börömo vaevë'e hijanuëjo.

<sup>30</sup> Hijanuëromu sabëro ödivoromo ijahoho baeniahiromu hesi simanore anareje.

<sup>31</sup> Ëhi sivoruomoromo niögu ëgoho jijövaho'i hesi niögu maho io'amahoromo hu'irae bava'areje korosire ano taemo'i.

#### *Iesu korosire ano taemare jöhoje.*

<sup>32</sup> Bava'oromo örire va'ihö gavare Cyrene amo raje ae gemu hesi ihe Simon rovamu gagorovo övëro bijimö'öromu uavareje: Ave a hesi korosioho baeromo va'ëjo.

33 Baeromo va'ëjamu ejëhoromo baeromo jabumë aho'o va'aroho ajiomoromo sa'a ihe Golgotha nosi huëhu huotovë'o ho simano gijo va'ëne sa'are ë ajio suorovareje.

34 Suorovonugoromo wine jovohu'o ajuo'e jovohu'o buaroharoho Iesu bojamijareje hesi vi'ehoho bisemu u'uhoröhego. Bojamijamu i garomo juahëmadeje.

35 Juahëmamu korosire ano taemareje. Ano taemoromo hesi niögoho adovoromo ajajovoromo ujuohareje.

36-37 Röhu Iesuare jö sisë jajivaroho hesi simano namore korosire ano taemareje. Jajivoromo ëhi uvë'e jiadeje: Ave aho Iesu Jew rajo jabesi a börömoho höjo. Ehi'onugoromo sa'are raromoromo hu muebejareje.

38 Ehi'o'irögoro röhu aëro anano'e vajiohu'e ae niö'i jabu'o korosire ano taemëvoromo göho ruëhi Iesuare övo manö göho viëhi övo adonö ehi amëvareje.

39 Ehi'amu aëro rova'ë'i uvene hijiohijiovoromo sivoromo

40 uvoruomonövadeje: Asë'e sareri ae javajëjo. Jero uvane höjo: Naro God-are osa börömoho dadovoromo majae niö'i gemu hesi uhure röhu maho vae barë'ejöjo. Ehi uvë'e javaje ehuni ja God-are Harihe javë'o ho jasi arijo'arije ajamirovoromo korosire javajoho ruvebijego bogo guomavajo.

41 Jabuhu sivarëhi priest masijoho jögoru öri röjëhijarue aribövioho a duvaho ömo'ömoho ëho jabu'o ehi sivoromo uarovareje:

42 Eahuro uövuade höjo: Naro a ioro'ioroho ajëmego marëjëvaje höjo. Ehi uövuade höjo röhu hesi sino ajamirovë'o ho hu bogo eni höjo. Huro uövuade höjo: Israel rajo jemesi börömoho na jevajëjo. Ehuni nadi'ego hu korosire jioromo ruvebijego no garomo mae uehorovarëjo.

43 Röhu ave jöhu'o huro uövuade höjo: God-ro na muebejevaje höjo. Hu uvaje höjo: Na God-are Harihe jevajëjo. Ehuni nadi'ego no ga'irarëjo God iaho nimoromo ajamijego o bogo ajamijego.

44 Ehi uarovamu gavë'i hesi bëhire vajiohu'e ae niö'i korosi'o amëvare aho jabu'o ehi sivoromo jöe gemuoho uavareje.

### *Iesu guomade jöhoje.*

45 Ehi'amu majae ririre öri ari'e aho'o ramoramovadeje. Ramoramovobe va'ojuvo majae huotorovamu ajivadeje.

46 Majae huotorovoromo ajivamu Iesuro Jew rajo jabesi jöëro madarugo'o uvadeje: Eliajo. Eliajo. Lema sabaktaniajo. Nosi jöehu huotovë'o ho God nasi Böviohajo. God nasi Böviohajo. Ja rabëni remo va'ane höjo.

47 Remo va'ane höjamu bëhire riravare a ioro'iorohuro Elia uvavamu hegorovo uarovareje: Elijah-ni uvajëjo.

48 Ehi uarovoromo ae gemuëro ma-burëro tutuvo va'oromo u'uhë'e inömoho barueromo nioga'i'e wine jovore ba'amoromo rumorovamu ioromo ijaho viture bijiohoromo Iesu bojami'ie'adeje.

49 Bojami'ia'amu a ioro'iorohuro uarovareje: Nadi'ego no ga'irarëjo Elijah-ro hu ajami'i rovego o bogo rovego.

50 Ehi uarovamu Iesuro röhu maho jö'e dadovoromo guomadeje.

51 Guomamu God-are osa börömo ojo göho gagonö jiajoho niögëhu tugoharoho arorovo ruvebijadeje. Sa'aho hijiohijiovamu munëho aro-rovo'amadeje.

52 Arorovo'amamu huoho tögömoromo jiororovo'amamu God-are aribövöie vuovövade ioro'ioroho aho'obêhe i'ovo'amadeje.

53 I'ovoromo suorovoromo Iesu ri'öjamu evare va'oromo God-are osa börömo jiaje amore va'o ae aho'obêhe jabesi nunire rueruomamu garuomadeje.

54 Röhu Iesu guomamu gagorovo muorovo simano vaejaje ahu'o ë hesi ariböviohu'o riravoromo Iesu muebejarohuro gavare sa'aho hijiohi-jiorovomo mue gö gö jiamu garomo sisë maro juhuonivoromo uvareje: Iae mae-ëjo. Ave aho iae God-are Harihe jiade höjo.

55 Ëhi'amu magonahe aho'obêhe arue riribövire riravoromo Iesu diehi'aruoho garuomadeje. Urimoho ë magonahoho jaburo Galilee jioromo Iesu ajamibe hesi ijore ijore rovereje.

56 Mary Magdalene o Mary göho James o Joseph jabesi vëmoho o Zebedee-are harihu jabesi vëmoho o magonaho ioro'ioroho ëhi jioruomadeje.

*Iesuare sino munë gagore bamare jöhoje.*

57 Iae majae garobo'e bamamu bövie bise'e eni jië'e ae gemu hesi ihe Joseph-ro rovadeje. Hesi amoho Arimathea jio'i hu'o Iesuare ijoraje jiadeje.

58 Ëhi jië'ëro huro va'oromo Pilate uavadeje: Uevego na Iesuare sinoho bae'iröjo. Bae'iröjamu Pilate-ro ae uëvadeje: Va'o sinoho ave aho babojamego bava'irajo.

59 Babojamamu Joseph-ro baeromo niögu i'ohuro numadeje.

60 Numoromo Joseph guomego hesi sino bamo'iröhego uvadire Iesuare sinoho ë bamadeje munë gage i'e ubuvë'ëro jië'ëro. Bamoromo munë börömo ho höhö barueromo ojoho tugohonugoromo va'adeje.

61 Ëhi'amu Mary Magdalene'o Mary göhu'o Iesu bamarire ë nunoho bamoromo ëhi arijareje.

*Iesu bamarire atovare jöhoje.*

62 Ëmajaho Friday jiadeje. Friday jiamu momorö'öjè'ëro sisonuvamugo Jew rajo priest masijohu'o Pharisee ömo'ömohu'o rueromo Pilate'o gagovoruomadeje.

63 Gagovoromo Pilate uavareje: Gavanajo. Iesu hu sareri sareri'e ae jiade höjo. No uehorovoromo uvaruëjo: Mami'e hu bogo guomë'e hijadevare evare sareramuiromo uövuade höjo: Guomoromo majae niö'i gemu hesi uhure i'ovoromo ri'ö'ejöjo.

64 Ëhuni ae uëvego huoho tugohoromo majae niö'i gemu ëhi atovo'irarëjo. Ëhesi bëhoho no juhuoninaguajëjo Iesuare ijore ijore jijiharue ariböviohuro hure va'oromo hesi sinoho vajiohëro baeromo ae aho'o sarerëmiromo uëjöëni: Iaho guomoromo ri'öjè'e höjo. Ëhi jië'e sareri'e jö atë'oho ëhuro urimo Iesuro mae uövuajëromo aribövioho mabisemu sisërërovaroho avevejö'oho ri'öjade jöho mae höromo börömo bëhe sisërërovo avoho'aruëjo. Ëhuni huoho avoho tugohojöro naguajëjo.

65 Tugohojöro naguajëjamu Pilate-ro uëvadeje: Muorovo aribövioho ujuoho va'ego atovo'irarëjo. Huoho diehi tugoho'i uehorovarujëhi ëhi tugoho garëjo.

66 Ëhi uëvamu va'oromo tugohoromo sivaëro badihi taemareje. Tae-moromo muorovo aho ë nugo'amareje huoho atovoröhego.

1 Iae Jew rajo nuho majaho barëjumu nëröho hura bërömo sisonuvo'ie'adeje. Sisonuvo'ia'amu Mary Magdalene'o Mary göhu'o jaburo niö'iro Iesu bamaroho ga'i va'areje.

2 Va'amu sa'aho hijiohijiovadeje. Èhesi bëhoho Badare anerae gemuëro ö'idöre jioromo ruvebiromo Iesu bamoromo ojo tugohare munëho höhö bava'adeje. Bava'oromo ë munë döre hijadeje.

3 Amo anera hesi nu ano'oho baderivoromo ajivajëhi ëhi jiadeje. Hesi niögoho ajivoromo sa buso va'ëne jiadeje.

4 Èhi jiamu gagorovo muorovo aribövie munë muebejarohuro ëho garomo juhuonivoromo butubutumoromo sa'are rireromoro vuovë'e ahuro momorö'öjanovadeje.

5 Èhi'amu magonahoho jaburo rovamu gagorovo anerahuro uëvadeje: Nadi juhuonivohëjo. Na gavajoho jemë korosire anamu guomade a hesi sinoho naharujëjo.

6 Hu aveho bogohöjo. Guomoromo ri'öröhëni uëvadëhi ëhi ë'ë'e höjo. Ro hesi sinehu raromade sionoho gahëjo.

7 Garomo ma-burëro va'oromo hesi ijorajo ömo'ömoho uërëjo: Iesu guomoromo ri'öjë'e höre. Huro urimo Galilee sa'are va'iramu jemëro ijore ö'oromo ga'a'arujëre. Ave naehu uëvaje jöho uehorovorëjo.

8 Èhi uëvamu hegorovo juhuonivë'i sisë maro nimorohoromo hure jioromo tutovoromo Iesuare ijorajoho jöho majëhi'i va'areje.

9 Va'amu gavë'i Iesuro birohëvadeje. Birohëvoromo uëvadeje: Vaevë'e jëvajëjo. Vaevë'e jëvajëjumu rueromo hesi höroho guduamoromo rajahijareje.

10 Rajahijamu uëvadeje: Nadi juhuonivohëjo. Va'oromo nasi ö ömo'ömoho uërëjo: Galilee sa'aro va'orëjo. Iae na ë ge'a'arujëjo. Èhi uërëjo.

*Iesuare sino atovare ariböviehu priest jö majëhijamu priest jabuhu ni-jio'iraejëvade jöhoje.*

11 Èhi uëvamu va'areje. Magonahoho jaburo va'irögoro muorovo a ioro'ioro Iesuare sino muebejarohuro amo bërömore vuonorö'ö va'areje. Va'oromo priest masijoho uëvareje: No hu muebejaroho ëhi ëhi jiade höjo.

12 Èhi majëhijamu hegorovo priest masijohuro uëvareje: Jew rajo a duvahohumë ro gagovohëjo. Gagovohëjumu gagovorovoromo jöho mevoromo avohonugoromo ijo bajo bëröme muorovo aribövioho suvuorëmiromo

13 uëvareje: Jemëro ae majëhiromo uënövorëjo: Vahi'e noro momorö'ö'i bogo gavamu Iesuare ijore ijore jijiharue ariböviohuro sinoho vajiohëro bava'ë'ëro ëhu'ëro Iesuare huoho gagemu höjo.

14 O momorö'öjarije jö gavanahu hejë'oho noro hu sanuami'ëjarëjo. Sanuami'iramu hu huë vavaenoho jemesi öriroho bogo bojëmi'ajëjo.

15 Èhi uëvamu hegorovo rue muorovo ariböviohuro ijo bajoho ujuohoromo Jew rajo a masijehu ae majëhiröhego uëvarëhi ëhi majëhibe jijihonövareje. Èhi majëhibe jijihonövë'ëro ëhu'ëro Jew raje ae aho'obëhe ë jöho atarueje.

*Iesuhu hesi aribövi jabsi nunire rovade jöhoje.*

16 Iae Iesuare ijoraje 11-ho jaburo Galilee sa'are va'oromo Iesuhu birohëvo'iröhëni uëvade dahorure ë iojiomareje.

17 Iojiomoromo hu garomo rajahijareje. Röhu ijorajo ioro'iorohuro uvareje: Na aveho Iesu höjo o ae gö höjo.

<sup>18</sup> Ëhi'amu Iesuro bëhire rueromo uëvadeje: God-ro nasi örire daruge bojemijë'e höjo mue aho'obëhe ö'idöre o sa'are jio'amajoho naro muebe'amo'irodego.

<sup>19</sup> Ëhuni sa'ae dinö'e dinö'e va'oromo ae aho'obëhe ajëmibe jijihorego jabu'o nasi ijore ijore jijihö'irarëjo. Ëhi ajëmiromo Vavu hesi ihoro Harihu nasi ihoro God-are Aru'aho hesi ihoro bapataeto vaejëvobe jijihorëjo.

<sup>20</sup> Bapataeto vaejëvoromo naehu mu rabe rabe bojëmodoho ëho röjëhibe jijihorego jaburo nasi jöho ejeho'irarëjo. Ëhi ë'iramu naro jemë'o gemu mae juvemu juvobe va'iramu sa'ae bövie bise'e barë'ajëjo.



## MARK

### *Bapataeto vaejaje ae John-hu jö majëhinövade jöhoje.*

<sup>1</sup> God-are Harihe Iesu Kerisohu mu mae barovade jöho na jajivo'ië'e. Ëmu ma aevadoho ëhi jiadeje.

<sup>2</sup> Mami gö'e hu bogo rovadevare evare jö God-aro baeromo majëhinövade ae Isaiah-ro ë mu maehu sa'are rueröhe jöho God-are surire jajivadeje. God-hu Keriso-are örire jövade jöho jajivoromo uvë'eje:

Ave aho God nasi jö bajuvaje aho höjo.

Ja va'ië'iroho naro hu urimo nugö'ö'iramu va'oromo ae uë'a'ajëjo jaehu va'irane öroho iogoro'iröhego.

<sup>3</sup> Aëro a rumo'e sa'are hiromu ma-darugo'o uvo'a'ajëjo:

Badahu rueröhe öroho avohorego hu maro rue'irajo.

Hesi öroho ahorrëro vajivorego hu maro juvo'irajo.

<sup>4</sup> Ëhi ë'iröhego Isaiah-hu jajivadëhi iae ëhi John-ro ijonö rueromo a rumo'e sa'are ro hijadeje. Hiromu aribövioho rueruomolego bapataeto vaejëvoromo jöe majëhinövadeje. Majëhiromu uënövadeje: Uehoro sisëho vonugo'i uehoro mae baeromo bapataeto vaehego God-ro jemesi sisëho uehorovoromo vonugëhajo.

<sup>5</sup> Ëhi'ego Jerusalem amo rajoho aho'obëhe o Judea sa'a ioro'iorore raromarue aribövioho aho'obëhe ëho jaburo rueruomonövadeje. Rueromo jabesi sisëho huruoholego John-ro Jordan jovore bapataeto vaejëvonövadeje.

<sup>6</sup> Röhu John niöge camel mi uehu avohë'e niögu sisëho ruohoromo mi sinehu avohë'e götaho dë'ahore ba'amoromo juvonövadeje. O hesi ioho hu guajuguajue vuome ëhi ibe juvonövadeje.

<sup>7</sup> Röhu hu jöho ëhi uënövadeje: Ae gö nasi ijonö rue'ië'ajëjo. Huro na iosiremiromu börömoho höjo. Naehu hesi mu bise'o vaejahoromo uruho'amoromo hörü sino jiovaho'ibejodoho o mu bise'o bise'e rabe vaejaho'ibejodoho röhu na ma-bise'e jevajëjo.

<sup>8</sup> Na ma-jovëremu bapataeto vaejëvë'e jevajëjo. A'i ë ahuro God-are Aru'ahohuro bapataeto vaejëvo'ië'ajëjo.

### *Iesu bapataeto vaejamu Satan-hu dinamijade jöhoje.*

<sup>9</sup> John-ro ëhi jië'e muoho vaejamu Iesuro Galilee sa'are Nazareth amore jioromo rovadeje. Rueromo uavamu John-ro ë Jordan jovore bapataeto vaejadeje.

<sup>10</sup> Bapataeto vaejamu gagorovo Iesuro jovore jioromo rojo ionire nami'i gavadeje ö'idöho arorovo'ego God-are Aru'ahe guaho va'ënohuro hesirire ruvebijamu.

<sup>11</sup> Ruvebijamu gavë'i ae aho'obëhe hejareje ö'idöre uvavamu: Ja nasi Harihu mabëhe javajëjo. Na ja garomo ehuro nasi dë vövöbajo'oho nimorohevajëjo.

<sup>12</sup> Ëhi uvamu gavë'i God-are Aru'ahohuro darugole jöho Iesure dë vövöbajo'ere bojamamu huro ri'öromo a rumo'e sa'a göre ajiomadeje.

<sup>13</sup> Ajiomamu huro God-are jöho ahöjoro Satan-ro hesi dëho bijioho ga'i hijadeje. Bijioho ga'i hijamu je'o mi sisë jioruomajinö ë hijadeje röhu aneraëro ajamareje. Ëhi'obe va'adoho majae 40 barëjadeje.

*Iesuhu uëvamu visu suovarue ae 4 jabuhu aevoromo hesi ijore ijore jijihare jöhoje.*

<sup>14</sup> Ëhi'amu aëro John guduamo bava'oromo savoji gagore ba'amareje. Savoji gagore ba'amamu evare Iesuro Galilee sa'are ajiomoromo God-are jö maho majëhinövadeje.

<sup>15</sup> Majëhiromomo uënövadeje: God-are maja börömoho rovë'e höjo. Jemë iae ga'ië'arujëjo God-ro böröme namiromomo muebejëvego. Ëhuni uehoro sisëho vuonugo'i God-are jö maho mae uehorovohëjo.

<sup>16</sup> Ëhi'oromo iae Galilee e'lu riröre juvadeje. Juvo'i gavadeje Simon'o Andrew'o ö'o ö'o visue suovarue aëro jëvë'ëro viöho jovore ba'amamu.

<sup>17</sup> Viöho jovore ba'amamu gëgorovo uëvadeje: Nasi ijoro ijoro ruehëjo naro röjëhijego jemëro bogo visuoho gagovo'i a'i ae magonahe gagovëvego nasinö jioruomoi'iröhe höjo.

<sup>18</sup> Ëhi uëvamu hejë'i jaburo viöho ëhi vuonugo'i aevoromo hesi ijore ijore jirehonövareje.

<sup>19</sup> Ëhi'amu Iesuro ma-bisemu va'anovo'i gavadeje Zebedee-are harihe niö'i James'o John'o ö'o ö'o jabesi boat gagore arijamu. Ariromomo jabesi viöho sigohijamu gëvë'i

<sup>20</sup> uvëvadeje: Ruehëjo. Ruehëjamu hegorovo jaburo jabesi vavue Zebedee hesi mu vaejarue ariböviohu'o gemu mae boat-re hijajoho vuonugo'i aevoromo Iesure ijore ijore jirehonövareje.

*Satan-are aru'aho sisë ae gemu hesi dëre jiamu Iesuhu rarovö'öjade jöhoje.*

<sup>21</sup> Ëhi'oromo Iesumëro rue Capernaum amore va'areje. Va'oromo God-are nuho majaho rovamu Iesuro God rajahijarue osare va'oromo God-are jö bëhoho röjëhijadeje.

<sup>22</sup> Röjëhijamu heromo tiöromomo uvoruomadeje: Hesi jöho darugo'e jö ma-mabëhe javavajëjo. Ëhi uvoruomade hesi bëhoho Jew rajo jögoru öri röjëhijarue ariböviohu röjëhijarëhiohu hu bogo ëhiohu majëhi'i a'i hesi birire baejë'ëro jöho majëhijadeje.

<sup>23</sup> Jabumëro ëhi uvoruomamu röhu evare majare Satan-are a sisëhu dëre abuejë'e aho ë osare hijë'ëro ma-darugo'o uvadeje:

<sup>24</sup> Iesu Nazareth rajoho ja rabëni sihusihuaguo'i rovane höjo. Na ja ijumavuo'ië'anuëjo. Na iae ja gavajëjo. Ja God-aro jioromomo rovë'e a ma-maemu jië'e ae javajëjo.

<sup>25</sup> Ëhi uavamu hejë'i uavadeje: Jöho vuonugo'i höröjëjo.

<sup>26</sup> Höröjëjamu hejë'i uhure a sisëhuro ë a hesi simanoho huotovahamu bijöbijövoromomo övo'o hörü'o ajiomadeje. Övo'o hörü'o ajiomamu a sisëhuro jö'e dadovoromomo höröromomo va'adeje.

<sup>27</sup> Höröromomo va'amu ë ariböviohu aho'o tiöjëvadeje. Tiöromomo berohoromomo uarovareje: Aveho mu rabe höjo. No bogo hejarue jöho jövajëjo. Ëiaho daruge baejë'ëro ëhu'ëro huhu jö bojëmijë'oho aru'aho sisëho jabu'o eja-harue höjo.

<sup>28</sup> Ëhi'amu Iesuhu vaejaje mu hesi jöho ë Galilee sa'are raromaruoho aho'o hebe va'areje.

*Iesuhu guomo guomo'e ae aho'obëhe ajëmade jöhoje.*

<sup>29</sup> Ëhi'amu Iesumëro God rajahijarue osare ë jioromomo va'areje. Va'oromomo Iesuro James'o John'o gemu mae va'oromomo Simon'o Andrew'o arijarue osare rovarëje.

<sup>30</sup> Röhu Simon-are jure magonaho hesi sino haho'oho vörö'iraejamu röhore raromë'e jiadeje. Raromamu Iesuro osare rovamu gavë'i ë ariböviohuro uavareje: Ave magonahoho guomo guome baejë'e höjo.

<sup>31</sup> Baejë'e höjamu hegorovo Iesuro rueromo övore ma'enoromo banigojiomadeje. Banigojiomamu sino haho'ere vörö'iraejadoho u'uhadeje. Vöröho u'uhamu hegorovo magonahohuro ri'öromo iruno'e avohëhadeje.

<sup>32</sup> Avohëhë'ëro majae beva'amu gagorovo aëro guomo guomo baejë'e aribövioho aho'o Satan-are a sisëhu dëre abue'amë'e aribövioho aho'o ëhi ujuoho rueruomadeje.

<sup>33</sup> Amo raje ae aho'obëhe rueromo Simon-are ojanore gagovoruomadeje.

<sup>34</sup> Gagovamu Iesuro guomo guome gö gö baejë'e ae aho'o jabesi sinoho avohëhoromo aru'aho sisëho aho'o a jabesi dëroho rarovö'öjëvonövadeje. Rarovö'öjëvoromo ë aru'aho sisëho uënövadeje: Jöe nugohëjo. Nadi nasi jöho huruohohëjo. Iesuhu ëhi jië'e jö jövade hesi bëhoho ë aru'aho sisëho jaburo gavë'ego hu ëhi jië'e ae jiamu garuomë'ego ëhuni jövadeje.

### *Iesuhu Galilee sa'are jö majëhibe juvade jöhoje.*

<sup>35</sup> Èhi ë'ë'ëro sisonuvo'i titimamugo Iesuro ri'öromo va'lo a rumo'e sa'are hiromo ë parie vaejadeje.

<sup>36</sup> Parie vaejamu Simon-mëro Iesu nahobe rovareje.

<sup>37</sup> Nahobe rueromo birohoromo uavareje: Ae aho'obëhe ja nahavaruëjo.

<sup>38</sup> Nahavaruëjamu Iesuro uëvadeje: Ruehego no amo göre göre va'arëjo naro God-are jöho amo ioro'iorohu'lo majëhi'irode höjo. Èhesi bëhoho na ëhi ë'irodëro rovode höjo.

<sup>39</sup> Èhi uënugoromo va'oromo God-are jöho Jew rajehu God rajahjarue osare osare majëhibe Satan-are aru'aho sisëho a jabesi dëroho rarovö'öjëvobe ëhi'obe Galilee sa'ae bövioho juvo barëjadeje.

### *Iesuhu sino jomo'e a ajamade jöhoje.*

<sup>40</sup> Èhi'amu iae sino jomo'e ae gemuëro rueromo ague aho hiromo ëninamiromo uavadeje: Ja nasi sino avoheho'iranoho ja eni javajëjo. Èhuni jasi nimoromo ajemijë'ohuro iae ajemi'anuëjo.

<sup>41</sup> Ajemi'anuëjamu Iesuro huni vavaenimoromo övoho nugö'öromo sinoho rëhahoromo uavadeje: Iae na negajëjo ajami'iro. Marëjëjo.

<sup>42</sup> Marëjëjamu gavë'i jomoho rireromoromo hesi sinore sisë sisëho barëjadeje.

<sup>43</sup> Barëjamu gavë'i Iesuro hu nugö'öromo darugo'e jöho uavadeje:

<sup>44</sup> Aveho hejëjo. Nadi aho uënëjo. A'i ma-va'iranoho jasi sinoho priest röjahego ga'irajo. Èhi'ego Moses-hu uövuade ëhi jië'e suvuroho God-are öroro bojamego aëro garomo uvo'irarëjo: Jasi sinore sisëho barëjë'ëro iae mae javajëjo.

<sup>45</sup> Èhi uavamu rue ahuro Iesure jöho bogo ejaho'i va'oromo Iesuhu ajamade jöho ae majëhibe juvadeje. Ae majëhibe juvamu ae aho'obëhe hebe va'amu Iesuro urimo ë'onövadëhi amore amore ma-va'orahoro juvo'ië'oromo gavade ae aho'o hu ga'i tagavamu gëgorovo vuonugo'i a rumo'e sa'are va'lo hijadeje. Hi'ego ae aho'obëhe dinö'e dinö'e jioromo hu ga'i ruenövareje.

## 2

### *Övo höru'e vuovahë'e a Iesuhu ajamade jöhoje.*

<sup>1</sup> Ëhi'amu iae majae gemu niö'i barëjamu gagoro Iesuro Capernaum amore vuonorö'ö rovadeje. Rovamu ae aho'obëhe hejare uvamu: Iesu hesi osare hijajë uvamu hegoro

<sup>2</sup> rueromo ë gagovoruomadeje. Gagovoruomamu röhe aho'obëhe os-aho ojanoho raro vo barëjadeje. Rarovo barëjamu huro God-are jöho majëhijadeje.

<sup>3</sup> Majëhijamu evare ae ëhi niö'i ëhi niö'i jaburo övo höru'e vuovahë'e aho maratuore giojimo barue'i a ioro'iorohuro ma-namijëho rovareje.

<sup>4</sup> Rueromo Iesure bëhire rue'ië'oromo gavare ae aho'obëhe tagavoromo röho ho rarovë'e jiamu gagorovo javu dönö ba'ojiomoromo Iesure simano namonö dadovareje. Dadovoromo maratuohu'o ëhi nume osare ba'amareje.

<sup>5</sup> Ba'amamu Iesuro gavade i'e rovare ariböviohuro hu mae uehorovoroumamu gëgorovo övo höru'e vuovahë'e aho uavadeje: Harihëjo. Jasi sisëho uehorovoromo vuonugoromo mu'u barëjahë'e höjo.

<sup>6</sup> Mu'u barëjahë'e höjamu hegoro vo Jew rajo jögoru öri röjëhjarue a ioro'iorohuro ë raromoromo jabesi simanëro uehorovoromo uvoruomadeje:

<sup>7</sup> Asë'ëjo. Ave aho rabëni ëhi jië'e jöho jövajëjo. Ëhi jië'o ho huro God-are ihoho ijumajëjo. Hu ma-ae höjo. Röhu huro ë aho uavajëjo: Naro jasi sisëho uehorovoromo vuonugoromo mu'u barëjahë'e jevajëjo. Ëhi jië'e muo ho hesi God-ro gemuëro vaejaje höjo. Ma-aho bogajo.

<sup>8</sup> Ëhi uehorovamu Iesuro hesi dë vövöbajö'ëro gëromo uvadeje: Jabumë ëhi uehorovaruëromo uëvadeje: Jemë rabëni uehore gö gö baejarujëjo.

<sup>9</sup> Jemë'o uehorovohëjo. Ave övo höru'e vuovahë'e aho nani ja ëma ua'a'anuëjo: Jasi sisëho uehorovoromo vuonugahë'e hö ua'a'anuëjo. Ja ëhi ua'ibejanëjo aho nunoho bogo ga'ibejarëjo ja mae o sarere jövë'e javego. Röhu ja bogo ëma ua'a'anuëjo: Ri'öromo jasi maratuoho banigojioromoro nami juvëjo hesi guomo guomoho bogo barëjago ja javojagojöëni.

<sup>10</sup> Röhu ë bogo ëma jövo'ibejane jöho iae na jövo'ejöjo huro ejehoromo ri'ö nami juvego jemëro ë muo ho garomo ëhuro ga'irarijago God-are A Maho naro sa'are hijajire evare sisë mu'uvaje darugoho ëhu'o baejë'e jevego. Ëhi uënugoromo röhu övo höru'e vuovahë'e aho uavadeje:

<sup>11</sup> Naro ja uavajëjo: Ri'öromo raromanue maratuoho banigojioromoro baeromo jasi osahuro va'ëjo.

<sup>12</sup> Va'ëjamu hejë'i ruehuro ri'öromo maratuoho ma-burëro banigojioromoro baeromo ae aho'obëhe jabesi nunire höröromo amonö va'adeje. Höröromo va'amu gagorovo ë ariböviohuro aho'obëhe tiö'i God rajahiro mo uarovareje: Asë'ëjo. Ëhi jië'e mu börömo ho urimoho no bogo gavare höjo.

*Levi-hu Iesure ijore ijore juvoröhego Iesuhu uavade jöhoje.*

<sup>13</sup> Ëhi'amu iae Iesuro amore jioromo va'oromo röhu maho Galilee jovo e'u riröre va'adeje. Va'amu ae aho'obëhe ijore va'oromo hesi bëhire gagovoruomadeje. Gagovamu gagorovo jöho röjëhijadeje.

<sup>14</sup> Röjëhi barënugoromo va'adeje. Va'i gavade tax baejaje ae hesi ihoho Levi Alphaeus-are harihoho hesi mu vaejaje osare hijamu gagorovo uavadeje: Rueromo nasi ijoro ijoro juvonövonëjo. Juvonövonëjamu hegoro vo ri'öromo aevoromo Iesure ijore ijore juvonövadeje.

<sup>15</sup> Ëhi'amu Iesumëro Levi-are osare ie ue'ahamu evare tax baejarue ae aho'o sisë aribövie aho'o urimo Iesure ijore ijore jijihonövë'ëro jië'ëro

ëhu'ëro ëho jaburo rueromo Iesu'o hesi ijorajo ömo'ömohu'o gemuoro ioho ue'ahareje.

<sup>16</sup> Ie ue'ahamu gëgorovo Pharisee aribövie Jew rajo jögoru öri röjëhjarue ariböviohu'o gavarue Iesuro sisë ariböviohu'o tax baejarue ariböviohu'o ëho jabu'o gemu mae ie ijamu gagorovo hesi ijorajo ömo'ömoho uëvareje: Asë'ëjo. Hu rabëni tax baejarue ariböviohu'o sisë a ioro'iorohu'o gemuoroho hiromo ioho ijajëjo. Ëhi jië'oho sisë höjo.

<sup>17</sup> Ëhi jië'oho sisë hö uvavamu hegorovo Iesuro hu'o heromo ë Pharisee ariböviohu'o uhu'e uëvadeje: Jemëhu nasi aribövi ëhi uëvarujoho röhu guomo guomo'e ariböviohuremu doctor gavarue höjo mae jëvë'e ariböviohu'o bogajo. Ëhesi bëhoho naro sisë ariböviohu'o nasinö jëvojöro uë'i rovode höjo ma-döemu mae jëvë'e ariböviohu'o bogajo.

*Bëhoho rabëni Iesuare ariböviehu i bogo vuonugare jöhoje.*

<sup>18</sup> Ëhi'amu iae John-are ijore ijore jijiharue ariböviohu'o Pharisee ariböviohu'o ëho jaburo God uehorovo'i ioho vuonugareje. Ioho vuonugamu aëro rueromo Iesu uavareje: John-are jö o Pharisee jabesi jö hejarue ë ariböviohu'o jaburo ioho vuonugarue höjo. Röhu jasi ariböviohu'o rabëni bogo ëhioho ioho vuonugarue höjo.

<sup>19</sup> Rabëni bogo ëhioho ioho vuonugarue höjamu hegorovo Iesuro uëvadeje: Nasi ijore ijore jijiharue ariböviehu i bogo vuonugarue hesi bëhoho naro uhu'e uë'ië'ajëjo. Na jemëro uvarujëjo: I'o masu'iröhe a hesi söröre rueromo aemo'aemëro ioho vuonugo'aruëjo. Bogo ëhioho jio'i a'i i'o masuröhe aehu jabu'o hijajevare evare ioho ue'aho'aruëjo.

<sup>20</sup> Röhu majae ijönö i'o masuröhe aho aëro guduamo bava'iramu evare ioho vuonugo'aruëjo. Avevejö'oho naro jabu'o hijë'ego jabu ioho bogo vuonugo'aruëjo.

*Jew rajehu gororovo'iröhe jögoru mamiohu'o Iesuhu barovade mu i'ohu'o bogo gemuore havo'iröhe jöhoje.*

<sup>21</sup> Ëhi uënuogoromo Iesuro uhu jöe gö'o majëhiromo uëvadeje: Niögu i'ohu'o mamiohu'o bogo havo'anuëjo. Bogo havoromo niögu mami dadovadiroho niögu i'o hesi vituoho baeromo niögu mami hesi gagoroho bamoromo sigohi'anuëjo i'ohuro duduhirovoromo mamioho ruho barovego dadovego gagoho böviræjöëni.

<sup>22</sup> O wine jovo mi sino gagore bigu'ië'iroho jovo i'ohu'o mi sino mamiohu'o bogo gemuoroho havoromo jovo i'ohu'o mi sino mamiroho bigu'anuëjo. Ëhi ë'ibejanëjo jovohuro gatovoromo ögohuro bibivoromo mi sinoho mamiëro jië'ëro tögömoromo ioro'ioremu dadorovego jovoho rova'o barë'ibejajo. A'i jovo i'ohu'o mi sino i'o hesi gagoremu bigu'anuëjo.

*Jew rajehu nuharue maja hesi jöhoje.*

<sup>23</sup> Iae Jew rajo nuho majaho rovamu gagorovo Iesumëro mure jijihareje. Jijihoromo hesi ijorajo ömo'ömohuro ioho babovoromo ue'ahobe va'areje.

<sup>24</sup> Babovoromo ue'ahobe va'amu Pharisee ariböviëro Iesu uavareje: Asë'e jaruvoho nuho majae höjo. Jasi ijorajo ömo'ömehu i avoharuoho ëho nuho maja hesi jögoroho aharuëjo. Jabumë rabëni ëhi jië'oho ë'aruëjo.

<sup>25</sup> Ëhi uëvamu Iesuro uëvadeje: David nosi a bëröme jionövade höjo. Röhu hu'o hesi ariböviohu'o ie bogojëvoromo hömëvamu huhu ë'ade jö God-are surire adaharijoho ëho diehi'oromo bogo avoho uehorovarujëjo.

<sup>26</sup> Abiathar priest bëröme jiadevare evare David-ro God-are osa mare va'ade höjo. Va'oromo God-are nunire bahijare ioho ujuohoromo vituoho

i'i vituoho hesi aribövioho i'imëmamu ue'ahare höjo. Ëhi jië'e ioho bogo aho ue'aho'i hesi ma-priest-ëremu ue'aho'iröhe ie höjo. Röhu jabuhu ue'aharohuro ëhuro jögoroho ahare höjo. Röhu ë hesi jöho bogojiade höjo.

<sup>27</sup> Ëhi uënu goromo uëvadeje: God-ro nuho majaho bamë'e höjo ae ajamui'iröhëro. Bogo aho bamavuade höjo nuho maja hesi jöho e'iröhego.

<sup>28</sup> Ëhu'ëro God-are A Maho naro nuho maja hesi jögoroho ëhu'o muebejaje höjo.

### 3

#### *Övo guomahë'e a Iesuhu ajamade jöhoje.*

<sup>1</sup> Ëhi'amu iae Iesuro God rajahijarue osare rumo va'adeje. Amo ë osare övo hitahi guomahë'e aho hijë'e jiadeje.

<sup>2</sup> Hijamu gagorovo aëro ë raromë'ëro Iesuare jö sisëho nahoromo uvareje: Iesuhu ë a hesi övo avohëhë'oho noro a masijoho huruoho majëhiromo uë'ejarejo: Iesuro a ajamaje muoho vaeromo nuho maja hesi jögoroho ahade höjo. Ëhi uvoromo jabumëro ma-hu gemu ërimahareje ga'iro nuho majare huro ë a hesi övoho avohahego o bogo.

<sup>3</sup> Ërimahamu Iesuro övo guomahë'e aho uavadeje: Ave a nunoro rovëjamu rovadeje.

<sup>4</sup> Rovamu hu bijönimoromo ërimaharuoho uëvadeje: Nosi jögoroho diehi höjo. Nuho majaroho na ae mae vaejëvo'ejarejo o sisë vaejëvo'ejarejo. I'ovëvo'ejarejo o muo'amo'ejarejo. Ëhi uëvamu rue ariböviohuro ma-jörumoraejareje.

<sup>5</sup> Jörumoraejamu Iesuro uvadeje: Ëaribövioho hia'i biriri'e aribövie jioruomajë uvoromo huë vavaeni böröme baeromo dë vörönimamu uherihoromo ë aribövioho gëvadeje. Gënu goromo övo guomahë'e aho uavadeje: Jasi övoho nugö'öjëjo. Ëhi uavamu hegorovo övoho nugö'öjamu marëjadeje.

<sup>6</sup> Marëjamu gagorovo rue Pharisee ariböviohuro suorovo va'oromo sa'are a böröme Herod nimarue ariböviohu'o gemu mae gagovoromo Iesu anoröhe jöho mevoruomadeje.

#### *Ae aho'obëhe e'u riröre raromare jöhoje.*

<sup>7</sup> Ëhi'amu Iesuro hesi ijorajo ömo'ömohu'o gemu mae ë amore jioromo va'oromo Galilee e'u riröre abuejadeje. Abuejamu ae aho'obëhe mae Galilee sa'are jioromo hesi ijore rueruomadeje.

<sup>8</sup> Rueruomamu rue Jerusalem amore Judea sa'a ioro'iorore jioromo arue Idumea sa'are jioromo ruhe Jordan jovo ioro'ioro gönö jioromo nume Tyre amo'o Sidon amo'o jiajinö ë ae aho'obëhe jioromo Iesuhu mu masijo vaejaje jöho hegorovo hesi örire rueruomadeje.

<sup>9</sup> Rueruomamu gëgorovo Iesuro uvadeje: Ae aho'obëhe jioruomë'ëro nani jabumëro na tatijimevoruomajë uvoromo hesi ijorajo ömo'ömohu'o uëvadeje: Boat harihe avohehego na ë hi'iröjo.

<sup>10</sup> Röhu Iesuro hu tatijiomoröhe jö uehorovade hesi bëhoho huro ae aho'obëhe avohëvamu mae jio'amë'ego guomo guomo'e aho aho'obëhe göëro gö bijimö'öbe iosiramirovobe rue'ië'areje hu rëhego mae jëvoröhego.

<sup>11</sup> O Satan-are aru'aho sisë a jabesi dëre raromaroho ëho jabuhu Iesu gavë'iroho hesi nuninö behumorovo'amoromo ma-darugo'o uvonövareje: Ja God-are Harihe javajëjo.

<sup>12</sup> God-are Harihe javajë'ego Iesuro ë aru'aho sisëho uënövadeje: Jöë nugohëjo. Na rahu jevajoho bogave aho huruoho majëhi'irarijëjo.

*Iesuhu hesi iJORAJE aho'o 12 baejävade jöhoje.*

<sup>13</sup> Ëhi'onugoromo iae Iesuro dahorure ajiomoromo hesi baejëvo'i nimade aribövioho uëvadeje: Ruehëjo. Ruehëjamu rovarereje.

<sup>14</sup> Rovamu ae aho'obëhe 12 baejävadeje hu'o gemu mae raromo jijiho'iröhego. O rëmö'öjego hesi jöho ae majëhibe jijihö'iröhego.

<sup>15</sup> O Satan-are ariböviehu a dëre jioruomajoho uëvego suorovoromo va'oruomoröhego.

<sup>16</sup> Röhu baejävade aribövi jabesi ihoho ëhi jävadeje. Simon baejadeje. Röhu Iesuro iho göho Peter jumuvadeje.

<sup>17</sup> Röhu Zebedee-are harihe niö'i James'o John'o ö'o ö'o baejävadeje. Röhu Iesuro jabumë niö'i ihe Boanerges jumëgadeje. Jabesi jöho Boanerges iho bëhoho nosi jöho vajerehu anajëhi ëhi jëvë'e ae jëve.

<sup>18</sup> Röhu Andrew Philip Bartholomew Matthew Thomas o Alphaeus-are harihe James o Thaddaeus o Simon ëhi baejävadeje. Röhu Simon hu Jew rajehu jabesi mueberovo'i nimade aho jiadeje.

<sup>19</sup> O Judas Iscariot hu'o baejadeje. Judas Iscariot hu ijonö Iesuni hiruëmiromomo a jabesi övore bojëmi'iröhe aho jiadeje.

*Iesuhu Satan-are aribövi a dëre jio'amamu rarovö'öjävadoho hu bogo Satan-are darugoho baeromo ëhiöho ë'adeje. Ëhesi jöhoje.*

<sup>20</sup> Ëhi'onugoromo Iesu va'oromo hesi osare hijadeje. Hijamu ae aho'obëhe mae röhu maho hu ga'i ro gagovamu ëhuro Iesu'o hesi iJORAJE ömo'ömo'u'o i ue'aho'iröhoho bogo eni jävadeje.

<sup>21</sup> Bogo eni jëvamu hesi aganhuro ëho heromo uvareje: Nani Iesure simanoho sisërejähë'e höromomo hu guduamoromo hu'irae bava'i rovarereje.

<sup>22</sup> Ëhi'amu Jew rajo jögoru öri röjëhijarue ariböviohuro urimo Jerusalem jioromo rovë'ëro atoromo uvonövareje: Iesu hu Beelzebul aru'aho sisë dëre jiajëjo. Sisë a börömohuro vöröho bojamijego ëhuro a dëre aru'aho sisëho rarovö'ö'amaje höjo.

<sup>23</sup> Rarovö'ö'amaje höjamu hegorovo Iesuro uëvadeje: Ruehego na jöe majëhijöjo. Majëhijöjamu rovamu uhu'e uëvadeje: Diehi'oromo Satan-ro hesi aru'aho sisëho rarovö'öjävöjoro uvarujëjo.

<sup>24</sup> Sa'ae gemuehu adovoromo jabesi arijo'arije muorovë'o'ho ë sa'aho bogo biririvo'i barërovo'ajëjo.

<sup>25</sup> O agane gemuehu adovoromo jabesi arijo'arije muorovë'o'ho ë aganoho bogo biririvo'i barërovo'ajëjo.

<sup>26</sup> Ëhuni Satan-ro ri'öromomo hesi ariböviohu'o muorovo'ibejajo hesi darugoho uehoroho muoho bogo biririvo'i barë'ibejajo.

<sup>27</sup> Röhu aehu darugo'e a hesi osare rumo va'oromo hesi mae sisë ujuohaho va'ië'iroho bogo ëma ujuohaho va'irögoro urimo darugo'e aho guduamoromo tövonugoromo evare hesi inömo inömoho ujuohaho va'a'ajëjo. Naro Satan ëhi ruahö'öjaje höjo.

<sup>28</sup> Ave jöho na jö mae uë'ië'ajëjo. Aehu mu sisë vaejë'o'ho God-are iho ijumarue jö sisë atë'o'ho aho'o God-ro uehorovoromo vuonugëho'ajëjo.

<sup>29</sup> A'i God-are Aru'aho hesi iho ijumë'o'ho ëhi jië'e jö sisëho God bogo mae bogo uehorovoromo vuonugo'i ë mu sisë vaejë'o'ho ë hesi i'uoho maior'iore gemu baeruomo'ajëjo.

<sup>30</sup> Iesuhu ëhi uëvade hesi bëhoho ë ariböviohuro atoromo uvareje: Aru'aho sisëro Iesure dëre abuejë'e höjo.

*Iesure vëmu ömo'öme ö ömo'öme rahumë jëvaje jöhoje.*

31 Ëhi'amu iae Iesuare vëmohu'o ö ömo'ömohu'o rovareje. Rueromo amonö riravoromo Iesuro riejöro jöe nugö'öjareje.

32 Jöe nugö'öjamu Iesu ririre hi'i ae aho'obëhe ruë numë raromo rova'o rojomë'ëro uavareje: Hë-ajo. Jasi vëmohu'o ö ömo'ömohu'o ja ga'i nimoromo amonö ro riravarüejo.

33 Riravarüejamu uëvadeje: Jemë uehorovarujoho nasi vëmoho ö ömo'ömoho di aribövioho jioruomajëjo.

34 Ëhi uënugoromo uherihoromo ruë numë raromo rova'o rojomarue aribövioho gëromo uëvadeje: Aveho gahëjo. Aruëroho nasi vëmohu'o ö ömo'ömohu'o jëvajëjo.

35 Ae rahu God-hu nimaje mu vaejë'oho ëhuro ë aribövioho nasi öe ma'ine vëme jioruomajëjo.

## 4

### *Aehu i ujo sa'a mare sa'a sisëre riremade uhu jöhoje.*

1 Ëhi'amu iae Iesuro röhu maho e'u riröre va'o hiromo jöho röjëhijadeje. Röjëhijamu ae aho'obëhe ro tagavamu Iesuro jovore boat gagore va'o hi'i ae aho'obëhe jovo riröre raromareje.

2 Jovo riröre raromamu Iesuro uhu jöe majëhiromo ëhuro jöe aho'obëhe röjëhijadeje. Röjëhiromo uëvadeje:

3 Jöe hehëjo. Iae ae gemuëro i uje ujuohoromo mure riremoli va'ade höjo.

4 Riremobe va'amu ujo ioro'ioroho örire rireromade höjo. Rireromamu gavëli ugëro ro i barëjare höjo.

5 Ujo ioro'ioroho munë uhunö jië'e sa'are rireromade höjo. Rireromoromo ma-burëro ri'amade höjo sa'aho munë döro ma-bisemu jië'ëro.

6 Riromo dirumoho bogo ma io'amë'ëro majaëro rojomoromo anamu sahoriamade höjo.

7 Ujo ioro'ioroho bibë'e resu resu'e sa'are rireromade höjo. Rireromë'ëro bibë'e resuhuro riromo ujo maho baba'amade höjo. Baba'amamu maho bogo rae'amade höjo.

8 Ujo ioro'ioroho sa'a mare rireromade höjo. Rireromoromo riromo ëgovoromo bajoho rae'amade höjo. Uje gemu gemu röhu ioro'ioroho baje 30 rae'amoli ioro'ioroho 60 rae'amoli ioro'ioroho 100 rae'amade höjo.

9 Ëhi uënugoromo uëvadeje: Ae rahu ja God-are jö hejanue ae javë'oho bëhoho nahoromo birohönëjo.

### *Iesuhu rabëni uhu'e majëhinövade ë hesi jöhoje.*

10 Ëhi uëvamu ijönöho ae aho'obëhe bogojio'i Iesuro hesi ariböviohu'o gemu mae hijadeje. Hijamu hesi ijorajo 12-hu'o hesi bëhire raromarue aribövi ioro'iorohu'o ëho jaburo uhu jö hesi bëhoho ua gavareje.

11 Ua gavamu Iesuro uëvadeje: God-ro böröme namiromo aho'obëhe muebejaje jöho urimoho subivëhade höjo. Esubivëhade jöho huro hesi suvuore jemë bojëmijë'e höjo jemëremu he'irarijego. Ehu'ëro jemëro jö bëhoho he'i a ioro'ioro jabetesi öriroho ma-uhu jöemu rovaje höjo.

12 Jabuni ma-uhu jöemu rovaje hesi bëhoho ë jöho God-are surire jajivoromo ëhi uvë'e höjo:

God-ro nimade höjo ë ariböviohuro muoho ma-gaemu ga'i bogo avoho garuomoröhego.

O jöho ma-hemu he'i bogo avoho heröhego.

Garomo he'ibejarëjo jabumë huotorovoromo God-arinö va'ego



ëhuro hu jabesi sisëho uehorovoromo vuonugo'ibejajo.

*I ujo sa'are riremado uhu jö Iesuhu huruoho majëhijade jöhoje.*

<sup>13</sup> Ëhi uënuGOROMO uëvadeje: Röhu naehu majëhijode uhu jöho jemë diehi'oromo bëhoho bogo hejarujëjo. Bogo hejarujoho diehi'oromo uhu jö ioro'ioro hesi bëhohu'o avoho herëjo.

<sup>14</sup> Aehu mure ruruhö'öjade i ujo hesi bëhoho ëho God-are jö a majëhijajoho uëromo ë'ode höjo.

<sup>15</sup> Ujo örire rireromamu ugehu i barëjare jö hesi bëhoho aehu God-are jö hejamu gavë'oho Satan-ro ma-burëro rovaje höjo. Rueromo gavaje God-are jöho i ujonö'e jabesi dëre jiego garomo baeniëhiromoro rori'o bul'öjaje höjo.

<sup>16</sup> O i ujehu munë uhunö jië'e sa'are rireromoromo riromo sahoril'amade jö hesi bëhoho aëro God-are jöho hejarue höjo. Heromo ma-burëro nimorohoromo jöho ejaharue höjo.

<sup>17</sup> Ejahoromo jöho ma-döëremu baej'ëro majae ma-bunemu mae uehorovoromo garöhe God-are jö uehorovaruhuni aehu sisë vaejëvamu gavë'oho o huë vavaene rovamu gavë'oho ma-burëro vuonugarue höjo.

<sup>18</sup> O ujehu bib'e resu gemuore rireromade jö hesi bëhoho aëro God-are jöho heruomaje höjo.

<sup>19</sup> Heromo ave sa'a hesi muohuni nurunurumoromo o sarerivoromo inöme börömo mae ujuohoi o bövie bise'e ujuohoi nimoromo ëhemu uehorovoromo ëho jabesi nuninö bamarue höjo. Bamoromo sa'arohemu uehorovaruhuro ëhuro God-are jö jabesi dëre jiajoho taemego jabumë bogo rae avoharue höjo.

<sup>20</sup> O ujehu sa'a mare rireromoromo baje 30 o 60 o 100 rae'amade jö hesi bëhoho aëro God-are jöho heromo ejahoromo rae avohoruomaje höjo ioro'iorohuro ioro'ioroho iosirëmiromomo mu ma-mabëhe vaejarue höjo.

*Iro bueromo va'orahore bahijarue uhu jöhoje.*

<sup>21</sup> Röhu uhu jöe gö'o majëhi'ië'ajëjo. Jemë'o uehorovohëjo. Iro bunol'iraeromo osare barovarue hesi bëhoho bogo hevö gagoroho o maratu ahariroho gurihi bamo'i va'orahoro bamo'iro ëhuni barovarue höjo.

<sup>22</sup> Ëho naro uëromo ë'ajëjo: Nasi jöe rabe rabe gurihiro jiaje naehu jövaje hesi bëhoho ma-va'orahoro jioröhego jövajëjo. O rabe rabe subivëhaje naehu uëvaje hesi bëhoho ma-samaro jioröhego uëvajëjo.

<sup>23</sup> Ae rahu ja God-are jö hejanue ae javë'oho bëhoho nahoromo birohönëjo.

<sup>24</sup> Ëhi uënuGOROMO uëvadeje: Nasi jö hejarujoho avo'avoho uehorovonövorëjo. Uehore ma-bisemu bamë'oho ëhuro aji'e jöho ma-bisemu bae'a'arujëjo. O börömo bamë'ohuro ëhuro böröme bae'a'arujëjo. Röhu gö'o döre börömo bëhe bae'a'arujëjo.

<sup>25</sup> Aji'e jö javë'oho God-ro gö'o bojami'iramu bae'a'anuëjo. O bogojavë'oho bisemu baejanoho God-ro ë uehoroho mu'uvahol'ajëjo.

*I ujehu sa'are jioromo hesi ëma gurihiro rijaje uhu jöhoje.*

<sup>26</sup> Röhu Iesuro uhu jöe gö'o majëhiromomo uëvadeje: I ujehu riromo raejajëhi God-ro böröme namiromomo hesi öri ari'oho bövioho bise'oho ëhi muebejëvaje höjo. Ëjöho naro majëhi'ië'ajëjo. Mu arijo'ohuro nani ujoho sa'are suovo ruruhö'öbe va'a'ajëjo.

<sup>27</sup> Va'oromo vahiromol'iramu niavoromo sisonuvo'iramu ril'önövo'ajëjo. Ëhi'obe va'iramu ë majae gemuore ujo suovo ruruhö'öjadohuro

rēdijiomoromo ri'amo'ajējo. Ēhi'o'iramu mu arijo'ohuro ēho garomo dadivoromo uvo'a'ajējo: Diehi'oromo ē'ajējo.

<sup>28</sup> Ēhi uvo'a'ajējo rōhu hesi sa'aēro rihuoho bojamego i ujoho riromo inovoromo maho raejaje hōjo.

<sup>29</sup> Maho raeromo mavego evare arijo'ohuro ma-burēro tarivoromo gagovoromo avoho bahijaje hōjo ē hesi bēhoho ē gagovarue majaho rovē'ego.

*Ijo hisue mustard-hu ēgovaje uhu jōhoje.*

<sup>30</sup> Rōhu Iesuro jōe gö'o majēhiromo uēvadeje: God-hu bōrōme namiromo muebejēvaje ōroho naro uhu'e bu'ōromo jemē'o na'o uehorovo'ejarejo.

<sup>31</sup> Ijo hisu ihe mustard ujehu bōrōmoriromo ēgovajēhi God-ro bōrōme namiromo ae gö'o gö'o ēhi gagovoromo muebejēvobe va'a'ajējo. Mustard uje gemu sa'are ōjē'iroho bajo ioro'ioro dinō'e dinō'e jio'amajoho ēho majianovo'amo'i a'i ē mustard ujoho biseharihe hōjo.

<sup>32</sup> Ēhi hōjo rōhu riromo ēgovoromo ijo hisu ioro'ioroho iosirami'amoromo ēho bōrōmoho hōjo. Bōrōmoriromo adoho ēgovo'amego ugēro rueromo gavarue sanu mae jiegorovo ijuoho ē vae'amarue hōjo. Ēhi uēvadeje.

<sup>33</sup> Ēhi jiē'e uhu jōho aho'obēhe Iesuro uēromo ēhuro hesi jōho majēhinōvadeje. Jabumē diehi jiē'e jō bae'irōhoho eni jēvē'o'oho ēhi jiē'e jōhuremu majēhinōvadeje.

<sup>34</sup> Jōho bogo mae bogo samaroho majēhi'i ma-uhu'e gemu majēhinōvadeje. Majēhiromo rōhu hu'o hesi aribōviohu'o jabesi sivue raromē'iroho jōho aho'o huruoho majēhinōvadeje.

*Iesuhu uavamu jovo bōrōmehu ruhosōjade jōhoje.*

<sup>35</sup> Iesuro boat-re hiromo ēhi jiē'e uhu jōho majēhinugoromo vō'ōromamu gagorovo hesi aribōvioho uēvadeje: Ruehego no aruhe e'u ioni gönō va'arējo.

<sup>36</sup> Va'arējamu hegorovo ē Iesure aribōviohuro ae aho'obēhe ē rēmo'i Iesuhu hijaje boat-re iojioromomo hu boat-re baeromo va'areje. Bava'amu boat ioro'ioroho ēhu'o gemu mae va'oruomadeje.

<sup>37</sup> Va'amu buru bōrōme e'ure rovadeje. Bure rovamu jovohuro hasaromo boat-re ro nemoromo ruahoromo abueromo irijiomoromo diruvēvo'iē'adeje.

<sup>38</sup> Diruvēvo'ia'amu gavē'i ijorajoho jaburo gavare Iesu mami'e boat de-jonō va'o raromoromo simano dōvaejaruohuro simane dōvaeromo niavē'e jiamu gagorovo ioromo uavareje: Tisa no vuovavuo'iē'ajējo. Na ja nosi jōēnioho bogo uehorovanuējo.

<sup>39</sup> Uehorovanuējamu Iesuro ri'ōromo burohu'o hasajaje jovohu'o uēvadeje: Vuonugohējo. Vuonugohējamu buroho ahō'ō'i jovoho u'uhoromo ma-jōrume ruhijadeje.

<sup>40</sup> Ma-jōrume ruhijamu gagorovo hesi aribōvioho uēvadeje: Jemē rabēni juhuonivarujējo. Urimē'i jemē bogo ma uehorovevobe rovarijoho na jemē jaruvohu'o ēhi gemuoho ē'arujējo.

<sup>41</sup> Ēhi gemuoho ē'arujējamu sisē maro juhuonivoromo uarovareje: Ave aho diehi jiē'e ae hōjo. Huhu uēvē'o'oho bogo aēremuoho ejaho'i burohu'o jovohu'o jabu'o hesi jōho ejaharue hōjo.

## 5

*Satan-are a sisē aho'obēhe ae gemu hesirire jioruomamu Iesuhu rarovō'ō'amade jōhoje.*

<sup>1</sup> Ëhi'onugoromo jabu'o Iesu'o va'aroho va'o e'u ioni gönö Gerasene rajo jabesi sa'are va'o baboro bejareje.

<sup>2</sup> Baboro bejamu gagorovo ae gemuëro guavo'amarue juju gagore jioromo rueromo Iesu birohadeje. Ëa hesi dëre Satan-are a sisëro abueruomamu simane huotorovë'e jiadeje.

<sup>3</sup> Simane huotorovë'ëro guavo'amarue juju gago jio'amajire ë hinövadeje. Hi'ego aëro vajaëro ö'ëro rabëro tövo'ië'oromo gavare bogo eni jëvamu vuonugareje.

<sup>4</sup> Urimoroho aëro vajaëro övore hörure tövo'ego övore ö'oho ruho tariv-  
oromo hörure vajaho ano ahö'önövadeje. Ëhi'oromo vörö'irae'ego aehu  
gduamoromo hu'irae ro röhore nugo'iröhoho bogo eni jëvonövadeje.

<sup>5</sup> Majae vahie jö'e dadovë'i munëro anorovë'i guavaruire hinövo daho-  
rure ajio hinövadeje.

<sup>6</sup> Ëhi'onövë'ëro ë ahuro rori'o öri ëgoböviro namiromo Iesu garomo tutuvo  
rueromo hesi bëhire ague aho hiromo

<sup>7</sup> ma-darugo'o uvadeje: Iesu ja God dö mare hijaje a hesi Harihe javajëjo.  
Ja rabëni sihusihuego'i rovane höjo. Na God-are nuniro uavajëjo: Nadi huë  
sisëho vi'ehoho bojemëjo.

<sup>8</sup> Vi'ehoho nadi bojemijë uvade hesi bëhoho urimë'i Iesuro hu uavadeje:  
Aru'aho sisëho jero ë a hesi dëre hijanuoho vuonugo'i va'ëjo. Ëhi uavë'ego  
ëhuni uvadeje.

<sup>9</sup> Ëhi uvamu hegorovo Iesuro uavadeje: Jasi ihoho rahuo höjo. Rahuo  
höjamu uavadeje: Nasi ihoho Siriehu Bimuvanovë'oho jevajëjo. Ëhesi  
bëhoho no aru'ahe aho'obëhe dëre javuë'ego ëhuni ëhi jumegë'e höjo.

<sup>10</sup> Ëhi uaromo Iesu ua'i hijadeje: Aru'ahoho nadi uëvego jabumë ave  
sa'are jioromo va'irarëjo.

<sup>11</sup> Röhu mahe aho'obëhe aruhe dahoru ahore gemuoro gagovoromo ie  
ue'ahamu gagorovo

<sup>12</sup> dëre sisë ariböviohuro Iesu uavareje: Uövuego no suorovo va'oromo  
aruhe mahu jabesi dëre va'o abuejarëjo.

<sup>13</sup> Abuejarëjamu uëvadeje: Ëhuro va'ohë uëvamu hejë'i ë sisë ariböviohuro  
ë a hesi dëre jioromo suorovo va'oromo ruhe mahu jabesi dëre abueruo-  
madeje. Abueruomamu ë mahohuro va'o baradore rireromoromo e'ure  
siö ruruhö'ö va'oromo jove ue'ahoromo vuovadeje. Mahe aho'obëhe 2,000  
rabu'e ëhi vuovo'amadeje.

<sup>14</sup> Vuovamu gavë'i mahu muebe'amarue ariböviohuro huruomoromo  
amo börömore amo ininore jöho majëhibe va'areje. Jöho majëhijamu hejë'i  
ae aho'obëhe rueruomadeje ga'iro diehi jiego.

<sup>15</sup> Iesuro rueromo gavareje aru'aho sisëhu dëre jioromo suorovo  
va'oruomade aho simanoho mae jio'ego niöge ba'amë'e hijamu. Urimoho  
ganövareje aru'aho sisë Siriehu Bimuvanovë'ohuro hesi dëre jioruomë'e  
ëhi hi'ego röhu evare gavareje ma-mae hijamu. Ëhi gagorovo  
juhuonivoruomadeje.

<sup>16</sup> Juhuonivamu Iesuhu mu vaejamu gavare ariböviohuro uëvareje: Sisë  
ariböviehu dëre abue'amade ahu'o mahohu'o ëhi jië'e muoho birohoro-  
mohijajo.

<sup>17</sup> Ëhi majëhijamu ae aho'obëhe heromo Iesu uavareje: Ave sa'aho  
vuonugo'i va'ëjo.

18 Vuonugo'i va'ëjamu Iesuro boat-re ajiomoromo sionëro vuonorö'ö va'ië'adeje. Va'ia'amu gavë'i aru'aho sisë hesirire jioromo suorovo va'oruomade ahuro Iesu uavadeje: Na ö'oromo ja'o hi'i negajëjo.

19 Negajëjamu Iesuro uavadeje: Bogo rue'a'anuëjo. Sionëro jasi amëro va'oromo jasi aganoho uënëjo: Badaro huë baejevoromo ëhi mabëhe ajemijamu rovode höjo.

20 Ëhi uavamu hegorovo rue ahuro va'oromo hesi sa'a ihoho Ame 10 Jio'amaje Sa'aho ë sa'are majëhibe juvoromo uënövadeje: Iesuro ëhi mabëhe ajemamu rovode höjo. Ëhi majëhijamu hegorovo ae aho'obëhe jöe barëjövadeje.

*Iesuhu magonahe niö'i Jairus-are abojohu'o magonahe gö'o ajëmade jöhoje.*

21 Ëhi'amu Iesuro boat-re va'oromo anume e'u ioni gönö va'o ravo'amadeje. Ravo'amoromo e'u riröre namijamu ae aho'obëhe ruë numë gagovo rova'oromo ëhi riravareje.

22 Riravamu iae ae gemu hesi ihe Jairus-ro rovadeje. Jairus hu Jew rajehu God rajahjarue osa muebejaje ae jiadeje. Rueromo Iesu garomo hesi hörü bëhire ague aho hiromo

23 dinamiromo uavadeje: Bësu guomo'ië'ajëjo. Rueromo jasi övoho hesi sinoro bamego i'ovoromo hijajo.

24 Hijajamu hegorovo Iesuro hu'o gemu mae va'adeje. Va'amu ae aho'obëhe tatijiomobe hu'o gemu mae ëhi va'oruomadeje.

25 Va'oruomamu iae magonahe gemuëro jabu'o va'adeje. Ëmagonahoho manaero garorovade guomo guomoho bogo barë'i ëhi jiemi jiobe va'adoho vadune aho'o 12 barëjë'e jiadeje.

26 Doctor aho'obëhe gëromo ëhuro vi'ehe sisë maro baenövadeje. Vi'ehe baeromo hesi ijo baje bu'ö barë'i röhu bogo marë'i sisërëbe va'onövadeje.

27-28 Sisërëbe va'amu ë magonahohuro hejade uvoruomamu: Iesuro ae magonahe mabëhe ajamuijaje hö uvamu hejë'ëro uehorovoromo uvadeje: Na Iesu ma-niögohuremu rëhë'ohuro ëhuro marëjevo'ajëromo ae aho'obëhe va'aruire ë va'oromo Iesure dejonö rueromo niögoho rëhadeje.

29 Niögoho rëhamu gavë'i magonahoho kö rovadoho ijoho bogo rovadeje. Ijoho bogo rovamu magonahohuro herovadeje mae jiavamu.

30 Mae jiavamu Iesuro hejade a ajëmaje daruge gö hesirire jioromo va'ë'e jiavamu evare ma-burëro huotorovoromo ae aho'obëhe uëvadeje: Ja rahuaro nasi niögoho rëhane höjo.

31 Rëhane höjamu hegorovo hesi ijorajoho jaburo uavareje: Ja'o iae gavanuëjo ae aho'obëhëro ja tatijiomavo'ego. Ëhi jië'oho ja rabëni uövuanuëjo: Ja rahuaro na rëhevane höjo.

32 Ëhi uëvamu Iesuro arua anumiae uherihadeje ga'i di ahuro o di magonahohuro hu rëhë'e jiego.

33 Uherihoromo gëvamu rue magonahohuro iae mae garomo uvadeje: Huro na ajëmade hö uvoromo juhuonivoromo butubutumoromo röhu ma-biririvoromo rueromo Iesure hörü bëhire ague aho hiromo diehi ë'ade jöho sama'e huruoho majahi barëjadeje.

34 Majahi barëjamu Iesuro uavadeje: Abojëjo. Jero na mae uehorovevamu ëhuro ja marëjavë'e höjo. Vaevë'e va'onëjo. Jasi guomo guomoho barëjavë'e jiaje ijönö mae jionëjo.

<sup>35</sup> Iesuro ëhi uavamu gavë'i ae göëro göëro Jairus-are osare jioromo rueromo Jairus uavareje: Jasi abojoho mami'e guomë'e höjo. Èhu'oho rabëni ja tisaho u'uoho bojamijanuëjo.

<sup>36</sup> U'uoho bojamijanuëjamu hegoroovo Iesuro he bogo hejanovë'e Jairus uavadeje: Nadi juhuonivo'i God mae uehorovonëjo.

<sup>37</sup> Èhi uanugoromo Peter James o James-are öe John ëho jaburo hu'o va'ojöro uë'i a ioro'ioroho nijio'iraejëvadeje.

<sup>38</sup> Nijio'iraejëvonugoromo jaburo va'oromo Jairus-are osare rovareje. Rueromo Iesuro gavadeje ae aho'obëhe gagovorovë'ëro garahörö'e baeromo ma-darugo'o nierusuburu'e bamoruomamu.

<sup>39</sup> Èhi'amu gagorovo osare va'oromo uëvadeje: Jemë rabëni garahörö'e baeromo nierusuburu'e bamarujëjo. Èmagonaho harihoho bogo guomo'i ma-niavajëjo.

<sup>40</sup> Ma-niavajëjamu hegoroovo rueho jaburo Iesu sivoromo ijo'ijahareje. Ijo'ijahamu gagorovo Iesuro ë aribövioho aho'obëhe amonö rarovö'öjëvonugoromo magonaho harihu hesi vëmu vavu'ohu'o hu'o rovare ae niö'i gemu jabu'o ëhi søjëgoromo magonaho harihehu raromaje osare va'adeje.

<sup>41</sup> Osare va'oromo magonaho hesi övore ma'enoromo hesi jöëro uavadeje: Tarita kumajo. Èjöho huotovë'oho ëho uaromo ë'adeje: Bësu naro ja uavajëjo: Ri'öjëjo.

<sup>42</sup> Ri'öjëjamu hejë'i rue magonahohuro ma-burëro ri'öromonami juvadeje hesi vadunoho aho'obëhe 12 jië'ëro. Juvamu gavë'i ae aho'obëhe hu garomo tiöjëvadeje.

<sup>43</sup> Tiöjëvamu gagorovo Iesuro ma-darugo'o uëvadeje: Naehu vaejode muoho nadi aho huruohorëjo. Èhi uënugoromo uëvadeje: Magonahoho ie bojamego ijajo.

## 6

### *Iesuale amo rajehu Iesu bijönimoruomade jöhoje.*

<sup>1</sup> Èhi'onugoromo Iesuro va'adeje. Va'oromo hesi amëro rue'i hesi ijorajoho jaburo hu'o gemu mae rovareje.

<sup>2</sup> Rueruomoromo Jew rajo jabesi nuho majaho rovamu Iesuro God rajahijarue osare va'oromo God-are jö bëhoho röjëhijadeje. Röjëhijamu ae aho'obëhe heromo tiöjareje. Tiöromonuvoruomadeje: Èiahuro jöho dinö'e hejë'ëro jövajëjo. Hu diehi'oromo ëhi jië'e simano maho baejade höjo. Darugo'e mu masijoho diehi'oromo vaejaje höjo.

<sup>3</sup> Hu sarerivajëjo. Ma-ijo muemu vaejaje ae höjo. Hu Mary-are harihe höjo. Hu James-are Joses-are Judas-are Simon-are öe höjo. Hesi ma'ino ömo'ömoho aviae no'o gemu mae raromarue höjo. Èhi uvoruomoromo nue huodivareje.

<sup>4</sup> Nue huodivamu gëgorovo Iesuro uëvadeje: Jö God-aro baeromo majëhijarue aribövioho dinö'e dinö'e va'ë'iroho aëro no mae uehorovavuarue höjo. A'i nosi sa'a rajoho aganoho osae gemuore raromaruoho jemëremu bogo ëhiho uehorovavuaruje höjo.

<sup>5</sup> Èhi uëromu hu darugo'e mu vae'iröhoho bogo eni jiadeje. Huro guomo guomo'e ae ma-gemu gemu jabesi sinore hesi övoho bamëhoromo sinoho avohëvamu marëjëvadeje. Èhemu ë'adeje.

<sup>6</sup> Röhu hesi amo rajehu hu bogo ma uehorovarohuni ëhuni tiöjadeje.

*Iesuare ijoraje 12 jabuhu va'oromo mu vaeröhego Iesuhu rëmö'öjade jöhoje.*

Ëhi'onugoromo va'adeje. Va'oromo amore amore jöho røjehibe juvadeje.

<sup>7</sup> Røjehibe juvoromo hesi ijoraje 12-ho uëvadeje: Ruehëromo rovamu uëvadeje: Naro jemë rëmö'ö'ië'ajëjo jemëro nasi jöho ae majehibe jijiho'irarijego. Jemë ae niö'i niö'i ame göro göro va'orëjo. Jemëhu mu vae'irarijohuni nasi darugoho bojëmijajëjo ëhuro jemëro Satan-are a sisë gö gö a dëre jio'amë'o'oho rarovö'ö'irarijego.

<sup>8</sup> Röhu va'ië'iroho ma-guduodemu ujuohorëjo. Ioho esöho ijo bajoho bövioho bise'o'oho bogavëjo.

<sup>9</sup> O hörü guduoho io'amoromo niöge ma-gemu gemu io'amo'i nadi niö'i niö'ioho io'amorëjo.

<sup>10</sup> Ëhi uënuogoromo uëvadeje: Amo göre göre va'oromo aehu di osare raromöjoro uëvamu va'o raromë'o'oho ëhuremu raromonövorëjo ijönö ë amore jioromo va'ië'e jëvaje.

<sup>11</sup> O di amore ariböviehu jemesi örire nu huodëgoromo jö bogo ejëhë'o'oho amoho nugo va'irögoro jabesi sa'a hesi tohotohe jemesi hörü hitahire jiajoho sa'aro riremö va'ego ë amo rajohuro garomo uvo'irarëjo: No sisë ë'ë'e javuajëjo.

<sup>12</sup> Ëhi majëhijamu hegorovo ijorajo ömo'ömhuro va'oromo jöe majehibe jijihoromo uënövareje: Uehoro sisëho vuonugo'i uehoro mae baerëjo.

<sup>13</sup> Ëhi jië'e jöho majehibe Satan-are aribövi sisë aho'obëhe jabesi dëre jëvajoho rarovö'öbe ose guomo guomo'e a jabesi sinore otehoromo sinoho avohëvobe ëhi jië'e mu masijoho vaebe jijihareje.

*John bapataeto vaejaje a guomade jöhoje.*

<sup>14</sup> Ëhi jië'e mu masijoho vaebe jijihamu sa'a a böröme Herod-ro ë jöho hejadeje rabëni Iesuhu ë'aje jöho ae aho'obëhe dinö'e dinö'e vaerövë'ëro jië'ëro. A ioro'iorohuro uvoruomadeje: Ëaho John bapataeto vaenövade ahuro guomoromo ri'öjë'e höjo. Ëhu'ëro darugo böröme baeromo mu masijoho vaejaje höjo.

<sup>15</sup> A ioro'iorohuro uvoruomadeje: Iesu hu mami'e hijade ae Elijah-ro rovë'ëro ë'ajëjo. A ioro'iorohuro uvoruomadeje: Jö God-aro baeromo majëhinövare aribövi ioro'ioro jiarëhi hu ëhi jië'e aëro jië'ëro ë'ajëjo.

<sup>16</sup> Ae göëro göëro Iesuare jöho gö gö atavamu hegoro Herod-ro ae uëvadeje: Ëaho hu John höjo. Urimo naro hesi sönöho tariøjahode höjo röhu hu guomoromo ri'öjë'ëro hijajëjo.

<sup>17-18</sup> Röhu ë jö hesi bëhoho urimë'i Herod-ro hesi öe Philip-are vabore hesi ihoho Herodias gohoniahijadeje. Gohoniahijamu John-ro ri'öromö ua'i hijadeje: Jasi vuojiri baejanoho ëho bogo maehu höjo. Ëhi ua'i hijamu Herod-ro ë magonaho hesi jöëni ae uëvamu John guduamoromo tövoromo savoji gagore ba'amareje.

<sup>19</sup> Ëhi'amu ë magonahohuro John nue huodivoromo ano'i nimadeje. Ëhi nimoromo röhu Herod-ro magonahoho ahamu ano'ië'adoho vuonugadeje.

<sup>20</sup> Herod-hu magonaho ahade hesi bëhoho huro uvadeje: John hu a ma-mabëhe hö uvoromo ëhuni John juhuonamiromo avoho mueberomo magonahoho ahadeje. Magonahoho ahoromo va'oromo henövadeje John-ro God-are jöe majahi'ego. Jöe majahi'ego Herod-ro nurunurumo'ego hesi jöho he'i nimonövadeje.

21 Ëhi'oromo John anojöëni magonahoho ahobe ruejuvo Herod rahade majaho rovamu evare magonahehu vae'i nimade majaho rovadeje. Ëhesi bëhoho Herod-ro söröe baeromo hu ajamiromo ë sa'a muebejarue aribövioho muorovo mu muebejarue aribövioho a masijo ioro'iore Galilee sa'are raromaruoho ë a masijoho uëvadeje: Ruehego na söröe bojëmi'iröjo. Bojëmi'iröjamu rueruomadeje.

22 Rueruomamu ë magonaho hesi abojohuro rueromo javavadeje. Javavamu gagorovo Herod'o hesi örire rueruomade ariböviohu'o ë magonahoho garomo vuëvorovoromadeje. Vuëvorovoromo Herod-ro magonahoho uavadeje: Ja rabe rabe nimë'oho uevego bojami'iröjo.

23 Naehu muebejaje öri ari'o nimë'oho iae ëhu'o ririre tarioromo vituoho bojami'ejöjo. God-ro ge'ego na mae uavajëjo.

24 Ëhi uavamu ë magonahohuro va'oromo vëmoho uavadeje: Na rabe bae'ejöjo. Rabe bae'ejöjamu rue vëmohuro uavadeje: Uanëjo bapataeto vaejaje ae John-are sönöho tarioromo simanoho baro bojëmëjo.

25 Ëhi uavamu hejë'i rue abojohuro ma-burëro vuonorö'ö rueromo a börömoho uavadeje: Na negajoho avevejö'e ae uëvego bapataeto vaejaje ae John-are sönöho tarioromo simanoho hevö döre bamoromo baro boje-marëjo.

26 Ëhi uavamu hegoroovo rue a börömohuro huë vavaene böröme baejadeje. Iae hu huë vavaene baejadeje röhu urimo darugo'e jöho ë aribövi jabesi nuniro ë magonahoho mae uavë'ëro ëhu'ëro huotorovoromo nijio'iraeröhoho hu bijönimadeje.

27 Bijönimamu evare ae gemu ma-burëro nugö'öromo uavadeje: Va'oromo John-are sönöho tarioromo simanoho baruenëjo. Baruenëjamu savoji gagore va'oromo sönöho tarioromo simanoho

28 hevöre bamonugoromo barueromo abojoho bojamadeje. Bojamamu huro bava'o vëmoho bojamadeje.

29 Ëhi'amu John-are ijore ijore jijiharue ariböviohuro ë jöho heromo rueromo sinoho bava'oromo munë gagore bamareje.

*Iesuhu ae aho'obëhe 5,000 da'uojëhade jöhoje.*

30 Iesure apostle ömo'ömohuro mu masije vaebe jijihë'ëro vuonorö'ö rueromo Iesu uavareje: No muoho ëhi ëhi vaeromo jöho ëhi ëhi majëhiromo rovere höjo. Ëhi jië'e jöho jabumëro Iesu majahi barëjareje.

31 Majëhi barëjamu gagorovo ruehuro gavade ae aho'obëhe rovë'i va'ë'i rovë'i va'ë'ëro hu'o hesi ariböviohu'o i ue'aho'iröhe o bövi bise'lo vae'iröhe majaho bogojiamu gagorovo uëvadeje: Ruehego no a rumo'e sa'are nosi sivue va'lo raromoromo jemëro ëhuro ma-bisemu nuhorëjo.

32 Ëhi uënuigoromo jaburo boat-re ajio raromoromo a rumo'e sa'are jabesi sivue va'i va'areje.

33 Va'i va'amu ae aho'obëhe gavare jabumë va'amu iae mae gëromo uvoruomadeje: Ëaribövioho Iesumëro boat-re va'aruë uvoromo amo göre göre jioromo sa'a hörëro ma-burëro va'oromo Iesu'o hesi ariböviohu'o boat-re va'aruoho iosirëmiromo jaburo jovo ioni gönö urimo rueruomadeje.

34 Urimo rovamu Iesuro ijönö ro höröromo ravo'amoromo gavade ae aho'obëhe tagavë'e jiamu gëgorovo uehorovoromo uvadeje: Vaevë'ëjo. Ëaribövioho vëmu vavu'lo rumo'e ö mahu'ëro raromanovaruë uvoromo jabesi jöëni vavaenimadeje. Jabesi jöëni vavaenimamu evare jöe aho'obëhe röjëhijadeje.

<sup>35</sup> Jöe aho'obêhe røjehijuvo majae beva'ia'amu gagorovo hesi ijorajo ömo'ömohuro rueromo uavareje: Aveho a rumo'e sa'ae höjo. O majae mami'e barëjê'e höjo.

<sup>36</sup> Èhuni ave aribövioho rëmö'öjego ave bëhire amo masijore ininore va'oromo ie imo'amo'irarëjo ue'ahoröhe.

<sup>37</sup> Ue'ahoröhe höjamu uëvadeje: Bogajo. Jemëro iruno'o ho da'uojëhirëjo. Da'uojëhirëjamu uavareje: Asë'ëjo. Dinö'e ioho baeromo da'uojëhijöro uvanuëjo. Na ja uvoromo ë'anuëjo: No 200 kina javuë'ëro noro ëho bava'oromo bu'ö barëromo ioho imo'amoromo ujuoho rueromo ëhuro da'uojëhi'ëjarë uvoromo o diehi uvoromo jövanuëjo.

<sup>38</sup> Jövanuëjamu uëvadeje: Ioho dimino'e jëvajëjo. Va'oromo gahëjo. Va'oromo gahëjamu va'oromo adaho garomo vuonorö'ö rueromo uavareje: No ie aho'obêhe övo gö mine o visue niö'i ëhi javuajëjo.

<sup>39</sup> Èhi uëvamu hegorovo ruehuro ae aho'obêhe uëvadeje: Va'oromo hahagu hahagu gagovoromo ëhi garasihuro raromobe va'ohëjo.

<sup>40</sup> Va'ohëjamu rue ariböviohuro va'oromo ë 50 50 o 100 100 hahagu hahagu gagovoromo ëhi garasi röv'e mabëhire raromobe va'areje.

<sup>41</sup> Raromobe va'amu gagorovo ie övo gö mine visue niö'i ujuoho rovaroho ëho Iesuro ujuohoromo ö'idöho sioroho garomo God huë mae uavadeje. Huë mae uanugoromo ioho ato'atovoromo hesi ijorajo ömo'ömoho i'imëmijadeje ae aho'obêhe suvuorëmijöro. Èhi'oromo visue niö'i taritarivoromo i'imëmijadeje jaburo ëhu'o suvuorëmijöro.

<sup>42</sup> Èhi'amu ae aho'obêhe ë ioho visuoho ue'ahamu da'uëgadeje.

<sup>43</sup> Da'uëgamu gagorovo ijorajoho jaburo i vitu vituoho visu vitu vituoho aegamu esöe aho'obêhe 12 irijiomomadeje.

<sup>44</sup> Èhi'areje. Iesuro ie övo gö mine visue niö'i ujuohoromo suvuorëmijamu ama'e aho'obêhe 5,000 ë ioho ue'ahoruomadeje.

### *Iesuhu e'u döre hörehu va'ade jöhoje.*

<sup>45</sup> Èhi'amu gavë'i Iesuro ijorajo ömo'ömoho uëvadeje: Boat-oro ajio raro-moromo e'u ioni gönö Bethsaida amoro urimo va'ohëgo na a ioro'ioroho rëmö'öjöjo.

<sup>46</sup> Èhi uëvamu hegorovo hesi ijorajoho jaburo boat-re iojioromomo va'oruomamu Iesuro parie vae'i dahorunö ajiomadeje.

<sup>47</sup> Ajiomoromo parie vaejamu vahiromadeje. Vahiromamu nume ijorajoho jaburo öri ëgoböviro jovo döre va'oruomo'i Iesuro ruhe sa'are hesi sivue hijadeje.

<sup>48</sup> Hi'i gavadeje burëro jabesi nuninö rue'ëgo ijorajoho jaburo jovoho sisë'i sisë'i huo'öbe va'oruomamu. Èhi'ojuvo sisonuvo'ië'adeje. Sisonuvo'ia'amu Iesuro abueromo jovo döre hörëro va'adeje. Va'oromo jabumë iosirëmi'ië'adeje.

<sup>49-50</sup> Iosirëmi'ia'amu ijorajoho jaburo gavareje hu jovo döre juvamu gagorovo uvareje: Aru'ahëro juvajëromo jiodudu'iraeromo jö'e dadovareje. Jö'e dadovamu hejë'i uëvadeje: Nadi juhuonivo'i biririvohëjo. Na jëvajëjo.

<sup>51</sup> Na jëvajë uëngoromo boat gagore ajiomoromo jabu'o gemu mae hijamu buroho barëjadeje. Buroho barëjamu ë aribövioho dadivëvadeje.

<sup>52</sup> Èhesi bëhoho Iesuhu mami'e i da'uojëhade hesi bëhoho bogo avoho bæjareje jabesi uehoroho bogo eni jië'ëro.

### *Iesuhu Gennesaret sa'are hiromo guomo guomo aribövi ajëmade jöhoje.*



<sup>53</sup> Ëhi'amu e'u ioni gönö rueromo Gennesaret sa'are ravo'amoromo boat-oho ijo bunore be nugareje.

<sup>54</sup> Röhu ravo'amamu gavë'i evare ae aho'obëhe Iesu garomo uvoruo-madeje: Iae Iesu hö uvoromo

<sup>55</sup> ë sa'ae börömoho ma-burëro jijihoromo aevoromo guomo guomo'e aribövioho giojimo ujuoho rueromo henövare uvavo'ego: Iesu ë dirö'ore hijajë'ego ë va'onövareje.

<sup>56</sup> Iesuhu amo masijore ininore o dinö'e dinö'e rovë'iroho guomo guomo'e aribövioho giojimo ujuohoromo aehu gagovarue öri ari'ere ë ro bahinövareje. Bahinugoromo Iesu ëninamiromo uanövareje: Guomo guomo'e aribövioho uëvego ja niögu vituohuremu rëhego ëhuro guomo guomoho barë'amajo. Ëhi ua'ego ae rahu niögu rëhë'oho ëhuro marë'amonövadeje.

## 7

*Pharisee ariböviehu God-are jö bogo avoho uehorovo'i jabesi a mami jö böröme hö uehorovare jöhoje.*

<sup>1</sup> Iae Pharisee ariböviohuro Jew rajo jögoru öri röjëhjarue ariböviohuro urimo Jerusalem jioromo rovë'ëro jië'ëro Iesu jiajire ro gagovoroumadeje.

<sup>2</sup> Gagovoromo gavareje Iesuare ijorajo ömo'ömohuro Pharisee rajo jabesi jögoroho ahoromo jovoho övoho bogo otehodivorovoromo sisëho u'ovë'e ioho ma-ue'ahamu.

<sup>3</sup> Ëhesi bëhoho Pharisee ariböviohu'o Jew rajo a ioro'iorohu'o ioho bogo ëma ue'aharueje. A'i urimo Jew rajo a mamiehu jö bojëmibe rovarëhi ëhi'oromo jovëro övoho otehodivorovoromo uvoruomajeje: Nosi sinore sisëho u'ovahuë'ëro God-are nunire mae javuajëromo evare ioho ue'aharueje.

<sup>4</sup> O i imo'amarue öri ari'ere jioromo ujuoho rovë'iroho uvoruomajeje: Sisë höromo jovëro otehodivoromo u'o'amoromo uvoruomajeje: Avevejö'oho ë ioho iae mae u'ovë'e höromo evare ue'aharueje. Ëhi'oromo a mami ariböviehu bojëmibe rovarë jögoroho aho'obëhe jabumëro ejëhoromo enatue ramae gö gö [i ijarue röhe] ëhi u'o'amoromo uvoruomajeje: Ëinömo inömo hesi sisëho u'o barë'ego God nimorohajëjo. Ëhi'arueje.

<sup>5</sup> Ëhi'aruëro jië'ëro ë Pharisee ariböviohu'o Jew rajo jögoru öri röjëhjarue ariböviohu'o ri'öromo Iesu uavareje: Jasi ijorajo ömo'ömoho a mamiehu bojëmibe rovarë jöho bogo eromo jovoho övoho bogo otehodivorovë'e ioho ma-ue'aharue höjo. Rabëni ëhioho ë'arue höjo.

<sup>6</sup> Ëhi uavamu hegorovo Iesuro uëvadeje: Sareri sareri'e aribövie jëvajëjo. Jö God-aro baeromo majëhijade ae Isaiah-ro jemëhu ë'irarije jöho jajivo-romo ëhi uvë'e höjo:

Ave ariböviohuro ma-jö'ëremu God na rajehi'i

dë vövöbajo'oho bogo nasi gemuoroho jio'i ma-rori'o jioruomajëjo.

<sup>7</sup> Jabumë a jabesi jögoroho ae röjëhiromo uëruomaje höjo: Ëho God-are jöe jiaje ejahuorëjo.

Ma-a jabesi jögoroho ëhi röjëhiromo ëhuro ma-döhemu God na rajehiruomaje höjo.

Ëjemesi jö Isaiah-hu jajivadoho iae mae höjo.

<sup>8</sup> God-hu bojëmade jögoroho jemëro vuonugo'i aehu bojëmibe rovarë jögorohemu ma'enaruje höjo.

9 Ĕhi uēnugoromo uēvadeje: Sareri'e uehoroho baeromo ēhuro God-hu bojēmade jōho aharuje hōjo jemēhu a bojēmijaruje jōgoroho ma'eno'irarijēro.

10 Ĕhesi bēhoho Moses-ro uēvade hōjo: Jasi vēmu vavu'o ho mae uehorovēvonējo. O jōe gō'o uēvade hōjo: Ae rahu jō sisē jōvoromo vēmu o vavu hesi iho ijumahē'o ho anego guomo'irajo.

11 Rōhu jemēro ē jōho ahoromo ae rōjēhiromomo uēvaruje hōjo: Jaehu jasi vēmu vavu'o God-are nunire uēvē'o ho: Nasi maho sisēho ujuohoromo ajēm'i bejodoho rōhu aveho na God-are ihero bamē'e jevajē uēvē'o ho

12 nadi rōhu maho huotorovoromo jasi vēmu vavu'o ho ajēminējo. Ajēmijē'o ho sisē hōjo. Ĕhi uēvaruje hōjo.

13 Vēmu vavu'o ajēmijē'o ho sisē hō uēvarujohuro ēhuro vēmu vavu'o mae uehorovēvo'irarijēgo God-hu bojēmade jōho jemēro aharuje hōjo jemesi a mami jōho e'irovo. Ĕhi jiē'e mu sisēho aho'obēhe rōjēhijaruje hōjo.

*Bogo i ijaruohuro a'i uehoro sisē baejaruohuro ēhuro God-are nunire sisērējavuaje jōhoje.*

14 Iesuro ēhi uēnugoromo ae aho'obēhe rōhu maho uēvadeje: Ro gemuoro gagovohēromomo ro gagovamu uēvadeje: Naehu ave uhu jō uē'iē'ajoho jemē ae aho'obēhe avoho heromo bēhoho baerējo.

15 Rabe rori'o jiajehu jō'ore va'ē'o ho bogo ēhuro aho sisērē'amo'i a'i rabe dē vōvōbajo'ere jioromo suorovē'ohuro ēhuro aho sisērē'amaje hōjo.

16 [Ae rahu ja God-are jō hejanue ae javē'o ho bēhoho nahoromo birohonējo.]

17 Ĕhi majēhinugoromo Iesuro ae aho'obēhe rēmo'i osare va'adeje. Osare va'amu hesi ijorajoho jaburo uavareje: Uhu jō majahuijane hesi bēhoho huruohego no hejarējo.

18 Hejarējamu Iesuro uēvadeje: Ĕhi jiē'o ho na jemē'o uehoroho bogojēvajējo. Jemē rabēni bogo garomo uvarujējo: Rabe rori'o jiajehu jō'ore va'ē'o ho bogo ēhuro aho sisērē'amaje hōjo.

19 Ĕhesi bēhoho rabe jō'ore va'ē'o ho vōvōbajo'eroho bogo abue'i dēre abuejaje hōjo. Dēre abueromomo dēre jioromo suorovoromomo bogo aho ijumēvē'e ma-gua gagore va'aje hōjo. Ĕhu'ēro aho God-are nuniroho bogo sisērē'amaje hōjo. Iesuhu ēhi jōvadoho huro uōromomo ē'adeje: Jaruvoho ie aho'o ma-ue'ahē'o ho God-ro uvaje hōjo: Iae mae hōjo.

20 Rōhu Iesuro hesi jō vituoho majēhiromomo uēvadeje: I ue'ahē'ohuro bogo ēhuro aho sisērē'amo'i a'i dē vōvōbajo'ere jioromomo rojomoromomo suorovē'ohuro ēhuro aho God-are nuniroho sisērē'amaje hōjo.

21 Uehoro sisēhuro dē vōvōbajo'ere jioromomo rojomego ēhuro oēro jiji-hanovoruomaje hōjo. Vajiohēro ujuohoruomaje hōjo. Ae muo'amoruomaje hōjo.

22 Goho'amoruomaje hōjo. A jabesiroho ujuohoniēhi'i ganiganimoruomaje hōjo. Mu sisē rabe rabe vaeruomaje hōjo. Ae gō sarerēmīruomaje hōjo. A nunire javoji'e muoho vaeruomaje hōjo. A jabesi mu mahuni dē vōrōnēgaje hōjo. A jabesi ihoho ijumoruomaje hōjo. Sivue uehorovoromomo jabesi ihoho dōro bamoruomaje hōjo. Simane sisē'i uehorovoruomaje hōjo.

23 Ĕhi jiē'e uehoro sisē aho'obēhe dē vōvōbajo'ere jioromomo rojomoromomo suorovajohuro ēhuro aho God-are nunire sisērē'amaje hōjo.

*Israel rajo bogo a'i sa'a gō rajo magonahehu Iesu mae uehorovade jōhoje.*

24 Ĕhi'onugoromo Iesuro ri'öromö ä Jew rajo jabetesi sa'aho vuonugo'i va'adoho va'ö sa'a göre Tyre amo Sidon amo jiajinö sa'are ä rovadeje. Ruenugoromo osare va'oromo uävadeje: Naehu ave rovodoho nadi hu-ruohorëjo. Ĕhi uävadeje röhu hesi ihoho ä sa'aroho böromëro jië'ëro hu rovadoho bogo a subivëho varijënoho jiadeje.

25 Ĕhu'ëro jië'ëro magonahe gemuëro ma-burëro hejadeje uvavamu: Iesu rovë'e höjo. Ĕmagonahoho aboje gemu bise'e jiadeje. Satan-are a sisëro ä aboji hesi dëre abueromo simanoho huotovahë'e jiadeje. Hesi abojoho ähi jië'ëro ä magonahohuro hejade uvavamu: Iesu rovë'e hö uvavamu hegorovo rueromo Iesuarë höru bëhire ague aho hijadeje.

26 Röhu ä magonahoho hu bogo Jew rajo magonahehu jioromo bogo Jew rajo jöëhu jövaje magonahehu jio'i a'i hesi sa'a böromoho Syria jio'i hesi sa'a bise'oho Phoenicia jiadeje. Hu bogo Jew rajoho jië'e Iesu ëninamiromo uavadeje: Ajemiromo a sisë nasi aboji hesirire jiajoho rarovö'öjego va'irajo.

27 Rarovö'öjego va'irajamu Iesuro uehorovoromo uvadeje: Vëmu vavu'ehu jabetesi aboji harihu'ö urimo ajëmijaruëhi naro nasi sa'a rajo-hemu ähi urimo ajëmi'i rovode höjo. Ĕhi uvoromo ä sa'a gö rajo magonahoho uhu'e uavadeje: O-ajo. Nadi'ego urimo aboji harihu'öho ie da'uojëhi'iröjo. Ĕhesi bëhoho noehu aboji harihu'ö jabetesi i ujuohoromo ö harihu mio'amë'oho ëho bogo maehu höjo.

28 Bogo maehu höjamu hegorovo rue magonahohuro uehorovoromo uvadeje: Iae na bisemu ioniro sa'a gö raje jevo'ego ëhuni bogo ajëmi'i jöho jövajëjo. Röhu noehu bogo rarovego öëhu i ugobajo'ö ue'aharuëhi nani Iesuro na'ö ähi ejehoromo nasi abojoho ajami'ajëjo. Ĕhi uvoromo mana uhu'e uavadeje: Bada iae mae-ëjo röhu i maratu aharire raromarue öho jabumëro aboji harihu'ö jabetesi i ugobajo'öho iae ue'aharue höjo.

29 Ue'aharue höjamu Iesuro uavadeje: Iae mae uevanuëjo. Ĕhuni va'onëjo. A sisëho jasi aboji hesi dëre jioromo iae mami'e höröromö va'ë'e höjo.

30 Ĕhi uëvamu hegorovo rue magonahohuro vuonorö'öromö hesi osare va'oromo gavadeje a sisëho mami'e hörö va'i abojoho röhöre raromamu.

*Ae gemu hesi hia'e tugohoromo bitare tövë'e jiamu Iesuhu ajamade jöhoje.*

31 Ĕhi'amu Iesuro Tyre amonö jioromo va'oromo Sidon amonö rova'adoho va'ö sa'a ihe Ame 10 Jio'amaje Sa'are ä va'oromo nume Galilee e'ure ruvebijadeje.

32 Ruvebijamu gatorovo aëro ae gemu hu'irae baeromo rovereje. Ĕa hesi hia'öho tugohë'e ö jöho a'ö'a'ohë'e jövë'e ae jiadeje. Ĕaho hu'irae baeromo rueromo Iesu ëninamiromo uavareje: Jasi övoho hesi sinoro bamego hu mae jiajo.

33 Ĕhi uavamu Iesuro hu'irae baeromo ae aho'obëhe riravaruire jioromo va'oromo jabetesi sivue rirarovoromo hesi övo namoho niö'i ä a hesi hia'i gagore rëmö'öjadeje. Rëmö'öromö jijönugoromo sabëro öromö ä a hesi bitaroho rëhahadeje.

34 Bitaroho rëhahonugoromo ö'idöho sioroho garomo ä ahuni hara'uoromo hesi jöëro uavadeje: Epatajo. Ĕhesi bëhoho huotovë'öho: Hia'e dadovo'amëjo.

35 Ĕhi uavamu gavë'i ä a hesi hia'öho dadovaho'i bitaroho marëromö jöho avoho jövadeje.

<sup>36</sup> Jöho avoho jövamu Iesuro ae aho'obëhe uëvadeje: Naehu mu vaejodoho nadi aho majëhirëjo. Iesuhu nijio'iraejëvo'i hijadoho bogo ejahoruomo'i ae ëma majëhibe va'areje.

<sup>37</sup> Röhu ae aho'obëhe Iesuare muoho garomo tiöruomadeje. Tiöromo uvoruomadeje: Mue bövie bise'e ma-mabëhe vaejë'e höjo. Mu masije gö gö vaeromo röhu hia'i tugohë'e bitaro tövë'e aribövioho jabu'o avohëvego marë'amoromo jöe heromo jöe atarue höjo.

## 8

### *Iesuhu ae aho'obëhe 4,000 i da'uojëhade jöhoje.*

<sup>1</sup> Èhi'amu ae aho'obëhe röhu maho gagovë'ëro ie bogojëvadeje. Ie bogojëvamu gagorovo Iesuro hesi ijorajo ömo'ömoho uëvadeje: Ruehë uëromo rovamu uëvadeje:

<sup>2</sup> Ave ariböviohuni vavaenegajëjo. Jabumë na'lo raromobe rovaroho majae niö'i gemu barëjë'ëro ëhu'ëro i ue'aho'iröhoho bogohöjo.

<sup>3</sup> Naehu ma-dë gagëremu rëmö'öjamu jabetesirëro va'ë'oho nune öri'amobe va'oruomo'ajëjo jabumë ae gö gö öre ëgoro rueruomë'ëro jië'ëro.

<sup>4</sup> Èhi uëvamu rue ijorajoho jaburo uavareje: Röhu diehi'oromo ë aribövioho ioho da'uojëhi'ëjarëjo. Aveho a rumo'e sa'ae höjo.

<sup>5</sup> A rumo'e sa'ae höjamu uëvadeje: Ioho dimino'e jëvajëjo. Dimino'e jëvajëjamu uavareje: Ie övo gö mine övo göre niö'i javuajëjo.

<sup>6</sup> Èhi uavamu hegorovo Iesuro ae aho'obëhe uëvadeje: Sa'aro raromohëjo. Raromohëromo ie övo gö mine övo göre niö'i ujuoho rovaroho ëho Iesuro ujuohoromo God huë mae uaromo ato'atovoromo hesi ijorajo ömo'ömoho i'imëmijadeje jaburo suvuorëmijöro. I'imëmamu ujuohoromo ae aho'obëhe suvuorëmijareje.

<sup>7</sup> Èhi'o'i visu inine ma-gemu gemu Iesuare ijorajo jabetesirire jiadeje. Jëvamu Iesuro ujuohoromo God huë mae uanugoromo hesi aribövioho uëvadeje: Ave visuohu'o suvuorëmibe va'ohëjo.

<sup>8</sup> Èhi ë'l'ëro ae aho'obëhe ë ioho ue'ahamu da'uëgadeje. Da'uëgamu gagorovo ijorajoho jaburo i vitu vituoho gagovoromo esöe övo gö mine övo göre niö'i aegamu irijiom'o'amadeje. Èhi'areje.

<sup>9</sup> Röhu ë i visu ue'ahare aribövioho aho'obëhe 4,000 rabu'e jiadeje. Ue'ahoromo Iesuro rëmö'öjamu va'oruomadeje.

<sup>10</sup> Va'amu gavë'i Iesuro hesi ijorajo ömo'ömohu'o gemu mae boat-re ajiomoromo Dalmanutha sa'are va'adeje.

### *Pharisee ariböviehu Iesu bogo ma uehorovoromo huhu darugo'e mu vaejöro dinamare jöhoje.*

<sup>11</sup> Èhi'amu iae Pharisee ariböviohuro rueromo Iesu jö aho'ahamijareje. Jö aho'ahamiromo Iesu bijioho ga'i nimareje ga'i hu guaro beva'ego. Èhi nimoromo Iesu uavareje: God-are darugoho baeromo bogo gavarue muoho röjahuijego no gavarëjo huro ja ajamego muoho vaejanue javego o bogo.

<sup>12</sup> Èhi uëvamu hegorovo dë vövöbajo'o uhure sisë maro vavaenimoromo hara'uoromo uëvadeje: Ave jaruvore raromaruje aribövioho jemë rabëni bogo gavarue muoho ga'i nimarujëjo. Na God-are ae jevego ga'i nadi ëhioho uehëjo. Ave jöho na jö mae majëhi'ie'ajëjo. Ave jaruvore raromaruje aribövioho ëhi jië'e darugo'e muoho bogo mae bogo ga'a'arujëjo.

<sup>13</sup> Èhi uënuigoromo rëmö'ö'i Iesumëro va'oromo boat-re iojiomoromo jovo e'u ioni gönö va'i va'areje.

*Pharisee aribövi o Herod-are aribövi jabesi i dë huaje oso hesi uhu jöhoje.*

<sup>14</sup> Va'oromo hesi ijorajoho jaburo rumonëgamu iruno'oho bogo gö'oho ujuohë'e jiareje. Ioho ma-bisemu urimo jiadohemu ehuremu boat-re jëvadeje.

<sup>15</sup> Ie ma-bisemu jëvamu Iesuro uhu'e uëvadeje: Jemëro gavë'iajo. Pharisee aribövi jabesi o Herod-are i dë huo'amaje osohuro jemesirire rumor-ovo'ajëjo.

<sup>16</sup> Rumorovo'ajëjamu rueho jaburo ë jöho mevoromo uarovareje: No ie bogojavuo'ego ehuni jövajëjo.

<sup>17</sup> Èhi uarovamu Iesuro gëromu uvadeje: Jabumë ë jöho ataruëromu uëvadeje: Jemë rabëni i bogojavuafe jöho atarujëjo. Jemë rabëni avevejö'ohu'o bogo gavarujëjo. O rabëni bogo uehorovarujëjo. Na mu ma hesi uehoroho bogojëvë'ëro ehü'ëro bogo gavarujëjo.

<sup>18</sup> Jemë nuni'e hia'i'e jëvajëjo. Röhu rabëni bogo garomo bogo hejarujëjo. Jemë rabëni ave jö hesi bëhoho bogo uehorovarujëjo.

<sup>19</sup> Naehu ie övo gö mine ujuohoromo ato'atovoromo ae aho'obëhe 5,000 i'imëmodoho jemë ë i vitu vituoho aegamu esöe dimino'e irijiomu'amade höjo. Uëvareje: Esöe aho'obëhe 12 irijiomu'amade höjo.

<sup>20</sup> Èhi uavamü uëvadeje: O naehu ie övo gö mine övo göre niö'i ato'atovoromo ae aho'obëhe 4,000 i'imëmodoho jemë ë i vitu vituoho aegamu esöe dimino'e irijiomu'amade höjo. Uavareje: Esöe aho'obëhe övo gö mine övo göre niö'i èhi irijiomu'amade höjo.

<sup>21</sup> Irijiomu'amade höjamu uëvadeje: Urimo nasi mu bëhi bogo gavarijoho jaruvohu'o jemë rabëni bogo avoho gevaruje höjo na diehi jië'e ae jevajoho.

*Iesuhu nuni sisë'e a ajamamu öri ari'o ma-bisemu ma'e ma'e garomo röhu maho ajamamu avoho ga barëjade jöhoje.*

<sup>22</sup> Èhi'onugoromo Iesu'o hesi ijorajo ömo'ömohu'o èho jaburo Bethsaida amore rovarëje. Rovamu aëro nuni sisë'e ae gemu hu'irae baeromo rovarëje. Barueromo Iesu ëninamiromu uavareje: Ave iaho rëhego nunoho marëjajo.

<sup>23</sup> Marëjajamu Iesuro nuni sisë'e a hesi övore ma'enoromo amore jioromo hu'irae baeromo va'adeje. Hu'irae baeromo va'oromo ë a hesi nunoho sabëro ödivoromo övoho nunire bamëvoromo uavadeje: Na ja uherihoromo bövioho bise'oho gavanuëjo.

<sup>24</sup> Gavanuëjamu ruehuro nigerohoromo garomo uavadeje: Na sisë'i gavajëjo ae jijiho'i röhu jabesi nu ano'oho ijo va'ëne jio'amo'ego.

<sup>25</sup> Èhi uëvamu ruehuro övoho nunire röhu maho bamëvadeje. Bamëvamu röhu maho uherihoromo avoho garomo bövie bise'e aho'o ma-mae ga'amadeje.

<sup>26</sup> Ma-mae ga'amamu uavadeje: Nadi arue amoho vuonorö'ö va'i o öre gö öre göho va'i ma-ahorirëro jasi osaëro va'ëjo.

*Iesu hu èhi jië'e ae jiaje jö Peter-hu jövade jöhoje.*

<sup>27</sup> Èhi ë'ë'ëro Iesu'o hesi ijorajo ömo'ömohu'o va'areje. Va'oromo Caesarea Philippi amo börömo jiajinö amore amore suorovo'i iojionareje. Örire iojionë'i Iesuro uëvadeje: Na rahuo jevaje jöho ae aho'obëhe diehi atoruo-maje höjo.

<sup>28</sup> Diehi atoruo-maje höjamu uavareje: A ioro'iorohuro uvoruomaje höjo: Ja John bapataeto vaejavuonövane ahuro rovë'e javajëjo. A ioro'iorohuro uvoruomaje höjo: Ja Elijah-ro rovë'e javajëjo. A ioro'iorohuro uvoruomaje

höjo: Mami gö'e jö God-aro baeromo majëhinövarijohuro röhu jero gemuëro rovë'e javajëjo.

<sup>29</sup> Ëhi uavamu hegoroovo Iesuro uëvadeje: Röhu jemë nasi jöho diehi ataruje höjo. Diehi ataruje höjamu Peter-ro ri'öromo uavadeje: Ja böröme namiromo ajamuijanue aho javajëjo.

<sup>30</sup> Javajëjamu uëvadeje: Ëjöho nadi aho huruoho majëhirëjo.

*Iesuhu huë vavaeni baeromo guomoröhe jö jövadohoje.*

<sup>31</sup> Ëhi'onugoromo Iesuro aevoromo hesi ijarahö ömo'ömoho röjëhiromo uëvadeje: God-ro ëhi bamë'ëro ëhu'ëro hesi A Maho naro vi'ehe huë vavaene bövie bise'e bae'ejöjo. Jew rajo a duvaho ömo'ömoho priest masijoho jögoru öri röjëhijarue aribövioho ëho jaburo na bijönegoruomo'ajëjo. Bijönegoruomo'iramu aëro anego'iramu guomevo'ajëjo. Guomoromo majae niö'i gemu hesi uhure i'ovoromo ri'ö'ejöjo.

<sup>32</sup> Ëjöho Iesuro bogo subivëho'i ma-sama'e röjëhijadeje. Röjëhijamu Peter-ro Iesu rori'o hu'irae bava'oromo uavadeje: Ëhi jië'e jöho nadi jövëjo.

<sup>33</sup> Nadi jövëjamu Iesuro huotorovoromo hesi ijarahö ömo'ömoho göromo Peter uavadeje: Satan rori'o va'ëjo. God-hu uehorovajëhioho ja bogo ëhioho uehorovo'i ma-aehu uehorovaruëhi jero ëhi uehorovoromo ëhuni ë jöho jövanuëjo.

<sup>34</sup> Ëhi uënugoromo Iesuro hesi ijarahö ömo'ömohu'o a ioro'ioroho aho'obëhe ëhu'o uëvadeje: Ruehë uëromo rovamu uëvadeje: Ae rahuaro nasi ijore ijore jijihö'i nimë'oho jasi sinehu nimajoho nadi uehorovo'i uvonëjo: Iesuare jöëni vi'ehe huë vavaene javoje rabe baeromo guomevë'oho iae hesi hö uvoromo korosi hesi i'uoho banigojimanovoromo nasi ijoro ijoro juvonövonëjo.

<sup>35</sup> Ja jasi sinohuni uehorovoromo biririvoromo ave sa'are hi'i ëhemu uehorovë'oho ijonöho guomo öriro va'a'anuëjo. O ja nasi jöëni o nasi jö ma hesi jöëni guomë'oho ijonöho maro hi'a'anuëjo.

<sup>36</sup> Jaehu are jove sa'ae mae sisë aho'obëhe bae barë'i röhu jasi arijo'arije ijumorovë'oho na ja ëhuro mae javo'ajëjo. Bogajo.

<sup>37</sup> Arijo'arije ijumorovë'oho diehi röhu maho avohorovo'iramu mae javo'ajëjo. Öre bogohöjo.

<sup>38</sup> Ëhesi bëhoho ave jaruvore raromarue aribövioho sisë ariböviëro jioruomë'ëro bogo God gemu uehorovo'i mue gö gö uehorovorouomaje höjo. Jabumë ae rahu nasi jöëni o naehu majëhijaje jö hesi jöhuni javojëgë'oho u'lemu God-are A Maho naro maemu jië'e anera ömo'ömohu'o nasi Vavu hesi ajohu'o rue'iramu evare nani javojimoruomade ariböviohuni javojëgo'ajëjo.

## 9

<sup>1</sup> Ëhi uënugoromo uëvadeje: Ave jöho na jö mae uë'ië'ajëjo. Jemë a ioro'iore ave riravarujoho bogo vuovë'e raromoromo ga'a'arujëjo God-hu böröme namiromo hesi darugehu muebejaje ajoho rue'iramu.

*Iesuare nu ano'ehu ajivoromo gorosovade jöhoje.*

<sup>2</sup> Ëhi'oromo majae aho'obëhe övo gö mine övo göre gemu barëjamu Iesuro Peter James John ëhi söromo dahoru ëgobövire ajiomoromo jabesi sivue hahagu raromareje. Raromoromo ë ijarahö jaburo gavareje Iesuare sino haho'e gorosovoromo

<sup>3</sup> niögoho ajivo avohamu. Sa'are raromarue aribövioho noro niöge u'lo'ibejo bogo ehioho ajivo'ibejo. Iesuare niögohuro ehi ajivamu gavareje.

<sup>4</sup> Ehi ga'i gavareje a mami ae niö'i Elijah'o Moses'o ëma jëvoromo jabu'o Iesu'o jöe atoruomamu.

<sup>5</sup> Jöe atamu gëgorovo Peter-ro Iesu uavadeje: Tisa no ave raromaruoho iae mae höjo. Uövuego no javu harihe niö'i gemu vae'amarëjo jani gemu Moses-ni gemu Elijah-ni gemu.

<sup>6</sup> Peter-hu ehi uavade hesi bëhoho Peter James John ëho jaburo sisë maro juhuonirovë'ëro jö ma diehi jövo'iröhoho Peter dadivamu ehuni ehi jövadeje.

<sup>7</sup> Ehi jövoromo Iesuare ijorajoho jaburo gavare suehuro Iesumë aegëhamu gagorovo hejareje sue uhure uvavamu: Ave aho nasi Harihu mabëhe höjo. Huhu jövaje jöho avoho herëjo.

<sup>8</sup> Ehi uvamu hejë'i Iesuare ijorajoho jaburo ruaroho numiaroho uheriho'i gavareje Moses'o Elijah'o bogojëvo'i Iesuro gemuëro ë jabesi bëhire nami-jamu.

<sup>9</sup> Ehi'oromo dahorure ruvebijë'i Iesuro uëvadeje: Jemëhu gavarijoho nadi aho huruoho majëhirëjo. U'emu God-are A Maho naro guomoromo ri'öjeho evaro majëhirëjo.

<sup>10</sup> Ehi uëvamu rue ijorajoho jaburo iae ejahoromo Iesu gorosovamu gavare jöho subivëhobe va'areje. Röhu jabesi sivue atoromo uarovareje: Guomoromo ri'ö'iröhëro uövuaje jö hesi bëhoho rabe höjo.

*John bapataeto vaejaje aehu rovadoho ëho Elijah-hu rovanovade jöhoje.*

<sup>11</sup> Ehi uarovoromo jabumëro Iesu uavareje: Jew rajo nosi jögoru öri röjahuijarue ariböviohuro uövuare höjo: God-are a börömoho bogo ëma rue'i hu rue'ië'iroho a mami ae Elijah God-arire va'adohuro vuonorö'ö rue'a'ajëjo. Rue'iramu God-are a börömoho ijore rue'a'ajëjo. Jögoru öri röjahuijarue aribövioho rabëni ë jöho majahuijarue höjo.

<sup>12</sup> Rabëni majahuijarue höjamu Iesuro uëvadeje: Io'ajo. Elijah-hu urimo rueromo bövi bise'o avoho'amo'iröhe jöho iae mae-ëjo. Röhu ave jöhu'o God-are surire jajivoromo uvë'e höjo: Aëro God-are A Maho nörö nue huodivoromo sisë vae'iramu vi'ehe huë vavaene bövie bise'e bae'a'ajëjo. Ehi jajivë'e höjo. Ejöho bogo ëma jajivo'i iae mae jajivare höjo.

<sup>13</sup> Röhu naro ave jöho jemë uhu'e uë'ië'ajëjo. Hehëjo. Elijah iae mami'e öre avoho'i rovide höjo. Rovamu jaburo diehi nimarëhi ehi hesi örire sisë vaeruomade höjo. Ehi ë'iröhe jöhu'o God-are surire jajivë'e höjo.

*Iesuhu Satan-are a sisë aharihu hesi dëre jiamu rarovö'öjade jöhoje.*

<sup>14</sup> Ehi uënuogoromo Iesu Peter James John ëho jaburo dahorure ruvebi-jareje. Ruvebiromu Iesuare ijorajo ioro'ioro jabesirire rue'i gavareje ae aho'obëhe jabesi bëhire gagovoromo riravo rova'o rojomo'i Jew rajo jögoru öri röjëhijarue ariböviohuro Iesuare aribövi jabesi jöho aho'ahëmijamu.

<sup>15</sup> Ehi jië'ëro ae aho'obëhe gavare Iesu rovamu gagorovo tiöjëvadeje. Tiöjëvamu Iesu ma-burëro birohoro jejamiruomadeje.

<sup>16</sup> Jëjamijamu Iesuro uëvadeje: Jemë rabu jöe nasi ariböviohu'oho atarujëjo.

<sup>17</sup> Atarujëjamu ae gemuëro uavadeje: Tisa na nasi harihoho jasi örire barovode höjo. Ehesi bëhoho Satan-are ae gemuëro hesi dëre abo hiromo hesi bitaroho tövahë'e höjo. Ehi jië'e aru'ahoho hesirire höjo.

<sup>18</sup> Hesirire jië'ëro nasi harihu hesi simano huotovahë'iroho ijumahego jue'i sa'are behumorovaje höjo. Behumorovoromo jö'onö obohu tatogo'e

rueromo ane vuogigimoromo biriri'öväje höjo. Ëhi'ajego naro jasi ijorajo ömo'ömoho uëvode höjo: Aru'aho sisëho rarovö'öhego va'ajo. Ëhi uëvamu rarovö'ö'i ë'o gavaroho bogo eni jëvade höjo.

<sup>19</sup> Bogo eni jëvade höjamu Iesuro uëvadeje: Asë'e ave jaruvore raromaruje aribövioho jemë bogo ma uehorovaruje aribövie jëvajëjo. Na majae dimino'e jemë'oho hibe va'ejöjo. Majae dimino'e jemesi mu sisëho garomo ma-nunëro ga taemobe va'ejöjo. Jemesi uehoro sisëhuro na u'uvevajëjo. Ëaharihoho barovego na gavöjo.

<sup>20</sup> Na gavöjamu rueho jaburo aharihoho hu'irae rovareje. Rovamu uhure a sisëhuro Iesu garomo ma-burëro dë vövöbajo'oho ijumahamu simane sisërëromo bijöbijövoromo övo'o hörü'o ajiomoromo sa'are behu-morovoromo jö'onö obohu tatogo'e rueromo ubiri'ubirivadeje.

<sup>21</sup> Ubiri'ubirivamu gagorovo Iesuro vavuoho uavadeje: Divare aevoromo simanoho sisërëbe rovade höjo. Sisërëbe rovade höjamu uavadeje: Asisö'o jiadevare evare aevoromo ëhi jiobe rovade höjo.

<sup>22</sup> Röhu uhure a sisëhuro majae aho'obëhe ijumo avoho'i nimego simane huotovahego vënire jovore ëma ravorovaje höjo. Röhu ja eni javë'oho nosi jöëni vavaenimoromo ajamuijëjo. O bogo eni javego ehuro vuonugëjo. Vuonugëjamu Iesuro uavadeje:

<sup>23</sup> Ja rabëni uvanuëjo: Nani nörö bogo eni höjo. Ae rahu God mae uehorovë'oho God-hu ëhi jië'e ariböviohuni bövi bise'o vae'iröhoho eni höjo.

<sup>24</sup> Eni höjamu rue vavuohuro ma-darugo'o uvadeje: Iae na ma-bisemu mae uehorovajëjo. Ajemego na mae uehorovo avohöjo.

<sup>25</sup> Ëhi uavamu heromo Iesuro gavade rue ariböviohuro aho'obëhe tubijiohoromo ruë numë hu baba'amo'i rueruomamu gëgorovo uhure a sisëho birevoromo uavadeje: Aru'aho sisë a jabesirire abueromo bitaro tövëhoromo hia'i tugohëhanuoho naro ja uavajëjo: Höröromo va'ëjo. Ijoho bogave gemu vuonorö'ö abue'iranëjo.

<sup>26</sup> Ëhi uavamu hegorovo rue uhure a sisëhuro jö'e dadovoromo aharihu hesi simanoho huotovahamu bijöbijövoromo sisë maro övo'o hörü'o ajiomadeje. Sisë maro övo'o hörü'o ajiomamu uhure a sisëhuro höröromo va'amu aharihoho guomo barëjë'e sinoho va'ëne raromadeje. Ëhi raromamu ae aho'obëhe uvoruomadeje: Ëiaho mami'e guomë'e höjo.

<sup>27</sup> Guomë'e höjamu Iesuro aharihoho övore ma'enoromo nigemamu ri'öjadeje.

<sup>28</sup> Ëhi'amu Iesuro va'o osare hijamu hesi ijorajoho jaburemu hu'o raromoromo uavareje: Diehi'oromo noehu aru'aho sisë rarovö'öjarocho bogo eni javuade höjo.

<sup>29</sup> Bogo eni javuade höjamu Iesuro uëvadeje: Ëaharihu hesi dëre jiade ëhi jië'e a sisë ae gö hesi dëre jiajoho rarovö'ö'ië'iroho God-are örire ëninamijë'ohuro ehuro rarovö'ö'amo'arujëjo. Öri göho bogo'e höjo.

*Iesuhu guomoröhe jö röhu maho majëhijade jöhoje.*

<sup>30</sup> Ëhi'onugoromo Iesu'o hesi ariböviohu'o ë sa'aho vuonugo'i va'areje. Va'oromo Galilee sa'are ma-saginiëri jijihoruomadeje aëro Iesu gajöëni.

<sup>31</sup> Ëhesi bëhoho huro hesi aribövioho röjëhibe juvoromo uënövadeje: God-ro ëhi bamë'ëro hesi A Maho na a jabesi övore va'oromo anego'iramu guomo'ejöjo. Guomoromo majae niö'i gemu hesi uhure ri'ö'ejöjo.

<sup>32</sup> Jöho ëhi röjëhamu bëhoho bogo he'irögoro juhuoninëgamu bogo ua gavareje.



*Di aehu a ioro'ioro iosirëmiromo böröme jiaje jöhoje.*

<sup>33</sup> Ëhi'oromo Iesumëro Capernaum amore rovaraje. Rueromo osare va'oromoromo Iesuro hesi aribövioho uëvadeje: Jemë rabu jöe öriroho atobe rovarije höjo.

<sup>34</sup> Atobe rovarije höjamu jörumoraearajeje ë hesi bëhoho örire rueromo atoromo uarovë'ëro: Iesure ijorajo ömo'ömoho di aho börömoho javuajëjo. Ëhi uarovobe rovë'ëro jörumoraearajeje.

<sup>35</sup> Jörumoraearajamu Iesuro sa'aro hiromo hesi aribövi 12-ho jaburo ruejoro uvëvamu rovaraje. Rovamu uëvadeje: Ae rahu a ioro'ioro iosirëmiromo nunire nami'i uehorovë'oho uvonëjo: Na a ioro'ioro jabesi dejonö nami-jajëromo jabesi muoho vaejëhonövonëjo.

<sup>36</sup> Ëhi uënugoromo Iesuro va'oromohoho viëhi jabesi nunire baro gurasi-jiomomo namiromo uëvadeje:

<sup>37</sup> Ae rahu aviëhi jië'e asisö'oho gemu nasi ihore rajahiromo baejë'oho ëhuro na'oromohoro rajehiromo baejevoruomaje höjo. O ae rahu na rajehiromo baejevë'oho ëhuro bogo na gemu rajehi'i remö'öjamu rovode ahu'oromohoro rajehiromo baejevë'oho höjo.

*Ae rahu jemë'o bogo iro muorovo'e vaejë'oho jemë'o gemuore jiaje hesi jö Iesuhu jövadohoje.*

<sup>38</sup> Ëhi uëvamu John-ro ri'oromohoro uavadeje: Tisa no gavare höjo ae gemuëro jasi ihoho uvoromohoro aru'ahoho sisë a jabesi dëroho rarovö'öjëvamu. Rarovö'öjëvamu garomohoro röhu gavare hu bogo no'oromohoro juvaje aho jiamu gagorovo uavareje: Vuonugëjo.

<sup>39</sup> Vuonugëjamu Iesuro uëvadeje: Nadi ëhi jië'ohoho ë'orëjo. Ae rahu nasi iho uvoromohoro darugo'e mu vaejë'ohoho bogo burëroho huotorovoromohoro nasi jö sisëho aho majëhi varijënoho höjo.

<sup>40</sup> Ae rahu nosi örire bogo bijönimë'ohoho ë aribövioho nosi aemo'aemehoro jioruomajëjo.

<sup>41</sup> Röhu ave jöho na jö mae uë'ië'ajëjo. Ae rahu jemë gëromohoro uvë'ohoho: Jemë Keriso-are aribövie jëvajëromohoro ma-bisemu ajëmiromohoro enatuore jovo bojëmijë'ohoho jabu iae manaho ujuohoruomohoro'ajëjo.

*God uehorovarue mu ijumëharue aribövi jabesi jöhoje.*

<sup>42</sup> Ae göëro asisö'onö'e jörume hiromo nasi örire mae uehorovevo'ajëjo. Ëhi'oromohoro ae göëro ë aho mu sisë röjahiromo ëhuro na mae uehorovevaje muoho ijumahohoro'ajëjo. Ijumahoromohoro i'u sisëho bae'a'ajëjo. Mu sisë bogo röjahijajevare evare ë mu sisë röjahijaje a hesi sönö'ahore aëro i'u'e munë hitahiohuro tövoromohoro sö jovore ba'amëgo e'ure beva'oromohoro guomohoro'ibëjajo ëho ma-jianovohoro'ibëjajo. A'i ë mu sisë röjahi'iröhe ë hesi i'uohoho börömo bëhe bae'a'ajëjo.

<sup>43</sup> O jasi övehu mu sisë vaeromohoro God uehorovanue mu vuonugohoro'ie'irohohoro övohohoro tariö'onëjo. Ja öve gemu javamu ijonö va'oromohoro mare hijë'ohoho ëhuro mae javohoro'ajëjo. A'i öve niö'i javamu ijonö God-hu ramö'öjamu ravemuhoro ravaje vënire va'ë'ohoho ëhuro sisë bëhe javohoro'ajëjo.

<sup>44</sup> [Ëdirö'ore huinohuro bogo vuovohoro'i a sine ma-ue'ahemuhoro ue'ahëgohoro vënöhohoro bogo duorohëgo ë dirö'ore aho vi'ehohoho ma-baemuhoro baejarue höjo.]

<sup>45</sup> O jasi hörehu mu sisë vaeromohoro God uehorovanue mu vuonugohoro'ie'irohohoro hörohohoro tariö'onëjo. Ja höre gemu javamu ijonö va'oromohoro mare hijë'ohoho ëhuro ja mae javohoro'ajëjo. A'i höre niö'i javamu ijonö God-hu ramö'öjamu vënire va'ë'ohoho ëhuro ja sisë bëhe javohoro'ajëjo.

<sup>46</sup> [Ēdirō'ore huiniohuro bogo vuovo'i a sine ma-ue'ahemu ue'ahego vėnoho bogo duorohego   dirō'ore aho vi'ehoho ma-baemu baejarue hōjo.]

<sup>47</sup> O jasi nunehu mu sisė vaeromo God uehorovanue mu vuonugo'iė'iroho nunoho jahonėjo. Ja nune gemu javamu ijonō va'oromo God-are aharire hijė'oho  huro mae javo'ajėjo. A'i nune niō'i javamu God-hu ramō'ojamu vėnire va'ė'oho  huro ja sisė bėhe javo'ajėjo.

<sup>48</sup> Ēdirō'ore huiniohuro bogo vuovo'i a sine ma-ue'ahemu ue'ahego vėnoho bogo duorohego   aho vi'ehoho ma-baemu baejarue hōjo.

<sup>49</sup> Sōero ioho hu'ihego  huro ioho bogo sisėrė'i mae jiaje hōjo. Sōehu i hu'ihego i bogo sisėrė'i mae jiajėhi  hi ae aho'obėhe jemė vėnėro ravėvanovoromo vi'ehė bae'a'arujėjo  huro jemesi dė vōvōbajo'oho bogo sisėrėjėho'i ma-mae jėvorōhego.

<sup>50</sup> Sōho rihu'e mabėhe hōjo. Rōhu sō hesi rihu barėjė'oho rōhu bogo maho avoho hesi hōjo.  huni nasi rihu'e jōho ma'eno'i nadi boremi'orėjo. Nadi boremi'ō'i nadi iro muorovo'oho vae'i ma-huė baerovorėjo.

## 10

### *Vaboro'lo baru'lo gemuoho jėvaje jōhoje.*

<sup>1</sup> Iesuro jōho  hi majėhinugoromo   sa'aho vuonugo'i va'adeje. Va'adoho va'lo Judea sa'are va'oromo Jordan beromo ioni gōre ajiomadeje. Ajiomamu gagorovo ae aho'obėhe hesi ōrire rōhu maho ro gagovareje. Gagovamu huro urimo  'ajėhi  hi God-are jōe rōjėhijadeje.

<sup>2</sup> Rōjėhijamu Pharisee aribōviohuro rueromo Iesu guaro beva'ojōro uaruo-madeje: Vaboro nugō'ō'amo'irōhe jōgoru hesi jōho no he'i naguajėjo. Aehu vaboro nugō'ojė'oho  hi jiė'oho na mae o sisė hōjo.

<sup>3</sup> Na mae o sisė hōjamu Iesuro uėvadeje: Rōhu Moses-hu jajivoromo bojėmade jōgoroho diehi hōjo.

<sup>4</sup> Diehi hōjamu uavareje: Moses-ro jajivoromo uōvu'e hōjo: Nugō'ō'i nagė'oho nugō'ō'irane jōho suroro jajivoromo vaboroho bojamiromo evaro nugō'ōnėjo.

<sup>5</sup>  hi uavamu uėvadeje: Iae  hi hōjo rōhu jemė hia'i biriri'e aribōvie jėvobe rovė'ego  huni Moses-ro   jōgoroho jemėni jajivėhade hōjo.

<sup>6</sup> Rōhu aevo'i God-hu bōvi bise'lo bamade majaroho bogo  hioho jio'i   hesi jōho God-are surire  hi uvė'e hōjo: God-ro aevoromo ahu'lo magonahohu'lo bamėvade hōjo.

<sup>7</sup>  hu'ėro jiė'ėro aėro vėmu vavu'oho rėmō'ō'i vaborohu'lo gemu mae hi'a'ajėjo.

<sup>8</sup> Vaborohu'lo hi'iramu jabumė niō'i jėvadoho rōhu gemu jio'a'ajėjo.  hi uvė'e hōjo.  hu'ėro jiė'ėro   ahu'lo magonahohu'lo bogo hahagu hahagu jio'i ma-gemu jėvo'ajėjo.

<sup>9</sup> God-hu mami'e gemuore havoromo muohadoho jemė ma-ae jėvaje nadi tarivorėjo.

<sup>10</sup>  hi uėnugoromo hu'lo hesi ijorajo ōmo'ōmohu'lo vuonorō'ō va'lo osare raromoromo ijorajoho jaburo Iesu uavareje: Vaboro nugō'ō'amarue jōho rōhu maho majahuijego no hejarėjo.

<sup>11</sup> Hejarėjamu Iesuro uėvadeje: Baruehu vaboro nugō'ō'i gō masuvė'oho  ho goho'amarue muoho vae'a'ajėjo.  huro vaboro maho ijumo'ajėjo.

<sup>12</sup> O vaborehu baru nugō'ō'i gō masuvė'oho  ho bogo maho masu'i goho'amarue muoho vae'a'ajėjo.  hi uėvadeje.

*Iesuhu hesi övo asisö'oho inino jabesi sinore bamëhade jöhoje.*

13 Ëhi uëvë'ëro aëro asisö'oho sö ujuoho rueruomadeje Iesuro öve jabesi sinore bamëhojoro. Ujuoho rovamu gëgorovo Iesuare ijorajo ömo'ömohuro birëgoromo uëvareje: Asisö'oho nadi aveho sö ruehëjo.

14 Ëhi birëgamu hegoro Iesuro dë vörönimamu hesi aribövioho uëvadeje: Nadi ahëvo'i uëhego rueruomajo. Ëhi jië'e asisö'oho va'ëne jörume raromë'e aribövioho God-ro böröme namiromo muebejëvego hesi ahariremu raro-moruomaje höjo.

15 Ave jöho na jö mae uë'ië'ajëjo. Asisö'oho ininehu bogo sivu uehorovo'i God-hu muebejavuajoho mae hö uvaruëhi ae rahu bogo ëhi uvë'oho ë God-are ahariroho bogo va'oro raromo'aruëjo.

16 Ëhi uënuogoromo ë asisö'oho huohudë'amoromo övoho jabesi simanore bamëhoromo uëvadeje: God-ro huë mae bojëmi'ajëjo.

*Bövi bise'oho marohë'e a hesi jöhoje.*

17 Ëhi ë'ë'ëro Iesuro ri'öromo örire va'adeje. Va'amu ae gemuëro tutuvo rueromo hesi bëhire ague aho hiromo uavadeje: Tisa ja a mae javajëjo. Na diehi'oromo ioro'ioremuoho maroho hi'ejöjo.

18 Maroho hi'ejöjamu uavadeje: Jero na uevanuëjo: Ja a mae javajëjo. Iae mae höjo röhu hesi God gemu a maho höjo.

19 Röhu mae hi'iranëro ue gevanuoho ja God-are jögoroho iae gavanue höjo. Nadi aho anonëjo. Nadi goho'amonëjo. Nadi vajiohoho baenëjo. Nadi sareri'e jöho aho majëhinëjo. Nadi sareri sarerioho ë'oromo vajiohu muoho vaenëjo. Jasi vëmoho vavuoho mae uehorovëvonëjo. Mae hi'irane öroho ëhi höjo.

20 Öroho ëhi höjamu uavadeje: Tisa iae mae-ëjo röhu na asisö'ohere aevoromo jö ebe rovodoho jaruvohu'oho ëhi gemuoho ë'laje höjo.

21 Ëhi uavamu hegorovo Iesuro hu garomo hesi örire dë vövöbajo'e aho'oho uehorovoromo uavadeje: Iae ëhi höjo röhu mue gemu bogo vaejë'ëro javë'ëro ëhu'ëro ja bogo eni javajëjo mae hiemu hi'iranoho. Va'oromo jasi inömoho bövioho bise'oho imo'amoromo monioho baeromo inömo bogo eni jië'e aribövioho suvuorëminëjo. Ëhi ë'ë'oho bövie bise'e maho maho janioho ö'idöre jiaho'ajëjo. Ëhi'oromo rueromo nasi ijoro ijoro juvonövonëjo.

22 Ëhi uavamu hegorovo ruehuro hesi uehorovoromo uvadeje: Na bövie bise'e börömo mae jevë'ëro suvuorëmi'irodoho na bogo eni jevajëromu vavaenimoromo nu ano'e sisërëromu va'adeje.

23 Va'amu gagorovo Iesuro uherihoromo hesi ijorajo ömo'ömoho gëromu uëvadeje: Bövi bise'oho marohë'e ariböviehu God-hu muebejaje öri ari'ere va'ë'oho anoji'e mae jio'a'ajëjo.

24 Ëhi uëvamu rue ijorajoho jabu jöe barëjëvadeje. Jöe barëjëvamu Iesuro röhu maho uëvadeje: Aganomë God-hu muebejaje aji'e öri ari'ere va'iröhoho anoji'e mae höjo.

25 Mi börömo anugo gagore nugö'öjë'oho ja bogo eni javo'ajëjo. Röhu ëhi ë'ë'oho samae jianovo'i a'i bövi bise'oho marohë'e ariböviehu God-hu muebejaje öri ari'ere va'iröhoho ëho anoji'e mae höjo.

26 Ëhi jövamu heromu tiötiövoromu uavareje: Ëhi jië'oho no diehi'oromo maroho va'ëjarëjo. No ae aho'obëhe bogo eni javuajëjo.

27 Bogo eni javajëjamu Iesuro ërimëhoromu uëvadeje: Io'ajo. Jemë aëro jëvë'ëro bogo eni jëvajëjo. A'i God-hu öri avohëhë'oho hu eni höjo hu mue aho'obëhe vaejë'oho eni jiajëro jië'ëro.

28 Ëhi uëvamu hegoroovo Peter-ro ri'öromo Iesu uavadeje: Aveho gavëjo. Noro bövie bise'e nosiroho vuonugo'i jasi ijore ijore jijihë'e javuajëjo.

29 Jijihë'e javuajëjamu Iesuro uëvadeje: Ëho iae mae höjo. Aveho na jö mae uë'ië'ajëjo. Ae rahu javue öe ma'ine vëme vavue aboji harihu'e o sa'ae vuonugo'i nasi jöëni va'oromo nasi jö ma a majëhijë'o

30 ëhi jië'e aribövioho jemë jemesi bövioho bise'o ho ëho ma-bise'e vuonugarije höjo röhu avevejö'e ave sa'are bövi mae bae'a'arujëjo. Javue aho'o ö ömo'öme aho'o ma'ino ömo'öme aho'o vëmu ömo'öme aho'o aboji harihu'e aho'o sa'ae aho'o bae'a'arujëjo. Ëhi bae'a'arujëjo röhu aëro nasi jöëni huë vavaenuhu'o bojëmi'iramu bae'a'arujëjo. Röhu majae ijönö jemë maior'ioremu maro raromo'arujëjo.

31 Ëhi höjo röhu a ioro'iore aho'o nuninö jiaruoho dejonö jio'i a ioro'iore dejonö jiaruoho nuninö jioruomo'ajëjo.

*Iesuhu guomoröhe jö urimo vae niö'i majëhijadoho ijönö röhu maho majëhijade jöhoje.*

32 Ëhi ë'lë'ëro Iesu'o hu'o va'arue ariböviohu'o ëho jaburo Jerusalem amo börömore ajiomo'i örire va'areje. Iesuro urimo va'i hesi ijorajo ömo'ömohuro uehoro böröme baebe hesi ijore va'i a ioro'ioroho aho'obëhe jaburo jabesi ijore juhuonivobe va'oruomadeje. Va'oromo Iesuro hesi ijoraje 12-ho röhu maho rori'o sö va'oromo aehu hesi örire diehi jië'e mu vae'iröhe jöho majëhiromo uëvadeje:

33 Aveho hehëjo. No Jerusalem amore ajiomaruëjo. Ajio ë raromoromo God-ro hesi ëhi bamë'ëro hesi A Maho naro priest masijo jabesi övore Jew rajo jögoru öri röjëhjarue a jabesi övore va'iramu baejevo'aruëjo. Baejevoromo nasi jöho mevo garomo uvoruomo'ajëjo: Nörö sisë'e aego guomo'a'ajëjo. Guomo'a'ajëromo na baejevoromo sa'a göre jioromo rovere aribövi jabesi övore bojëmi'iramu baejevoromo

34 sivegoromo sabëro ödegoromo hisuebijevoromo anego'iramu guomevo'ajëjo. Guomoromo majae niö'i gemu hesi uhure ri'ö'ejöjo.

*James'o John'o masije rirarovo'i Iesu ua gavare jöhoje.*

35 Ëhi uëvë'ëro iae Zebedee-are harihe niö'i James'o John'o rueromo Iesu uavareje: Tisa no naguajëjo noehu rabu jö ua ga'ië'aruëhi jero ëhi ë'iranego.

36 Ëhi uavamu uëvadeje: Naro rabe ë'ëhojöro uevarujëjo.

37 Rabe ë'ëhojöro uevarujëjamu uavareje: No naguajëjo jaehu jasi aji'e öri ari'ere hijë'iroho jero uövuego no ö'o jasi bëhire masije rirarovoromo noro göëro jasi övo manö göëro jasi övo adonö ëhi ari'iröhëro.

38 Ëhi uavamu uëvadeje: Iae ëhi höjo röhu jemëhu ue gevaruje jö hesi bëhoho jemë bogo gavë'e ëma uevarujëjo. Na gavajëjo ajuo'e jovo sisëhu ajuemanovo'iröhoho jioromo nasi örire jövëro rovanovo hesi jio'ego. Ëhi jië'e huë vavaeni bae'irarijoho na jemë'o eni jëvajëjo.

39 Eni jëvajëjamu uavareje: Iae no eni javuajëjo. Ëhi uavamu Iesuro uëvadeje: Iae mae höjo. Na ajuemi'iröhe jovo sisëhuro jemë'o ajuëmi'ajëjo. O nani rueröhe jovohuro jemëni rue'a'ajëjo.

40 Röhu nasi bëhire övo manö o övo adonö ari'irarije jö uë'irodoho ëho bogo nasirehu höjo. Hesi God-hu a rahumëni uvoromo nugade röhoho ë aho jaburemu nasi bëhiroho ari'a'aruëjo.

41 Ëhi'amu Iesure ijorajo ioro'ioroho 10 jaburo hejareje uvavamu: James'o John'o Iesure bëhire böröme rirarovo'i uvare höjamu hegoroovo jabesi örire dë vörönimoruomadeje.

<sup>42</sup> Dë vörönimoruomamu gagorovo Iesuro hesi ijarahoho aho'obêhe uêvadeje: Ruehëromomo rovamu uêvadeje: Iae jemë'o gavarujëjo. Sa'a ioro'ioro rajëro uvoruomaje hõjo: Èa masijohuro no muebejavuarue hõjo. Èhi hõjo rõhu ë a masijoho jaburo jabesi aribövioho ruahö'øjëvoromo jabumëremu masije riravarue hõjo. O jabesi bëhire riravaruhuro ëhi taemëvoromo jõe bojëmijarue hõjo.

<sup>43</sup> Sa'a ioro'ioro rajohuro ëhi ë'arue hõjo. Rõhu jemë'o nadi ëhioho döroho bamorovorëjo. A'i jemesi ae gemu rahu bövie nami'i nimë'o ho hu a ioro'ioro jemë ajëminövo'irõhe ae jio'a'ajëjo.

<sup>44</sup> O jemesi ae gemu rahu nunire jio'i nimë'o ho hu a ioro'ioro jemesi mu vaejëhonövo'irõhe ae jio'a'ajëjo.

<sup>45</sup> Èhesi bëhoho God-are A Maho na'o ae ajëmi'i ëhuni rovode hõjo. Naehu rovode hesi bëhoho bogo aëro na ajëmi'irarijigo rue'i a'i naro ae ajëmiromomo nasi arijo'arije bojamirovoromo guomorovoromo ëhuro ae aho'obêhe sisëhu tövëvajoho jiovo rëmö'ö'irodëni ëhuni rovode hõjo.

### *Iesuhu Jericho amo vuonugoromo va'i nuni sisë'e a ajamade jõhoje.*

<sup>46</sup> Èhi'oromo Iesumëro va'aroho va'o Jericho amore suorovareje. Suorovë'ëro Iesu'o hesi ijaraho ömo'ömo hu'o a ioro'iorohu'o aho'obêhe ëho jaburo Jericho amoho nugoromo va'i ë'areje. Rõhu Timaeus-are harihe Bartimaeus öri ionire hijë'e jiadeje. Hu nuni sisë'e aëro jië'ëro hiromomo maëni sisëni ëninëminövadeje.

<sup>47</sup> Èahuro öri ionire hiromomo hejade uvoruomamu: Rova'aje aho Nazareth amo raje Iesu hõ uvamu hegorovo ma-darugo'o uvo'i hijadeje: David-are ujoho böromë javaje Iesu jero nani vavaenimëjo.

<sup>48</sup> Vavaenimëjamu hegorovo ae aho'obêhe jaburo birevoromo uavareje: Jõe vuonugëjo. Jõe vuonugëjamu hejë'i rõhu maho darugo ma'o uvo'i hijadeje: Hë David-are ujoho nani vavaenimëjo.

<sup>49</sup> Èhi uvo'i hijamu hegorovo Iesuro va'adoho vuonugo'i ë namiroromo uêvadeje: Uvohego rovajo. Rovajamu rueho jaburo ë nuni sisë'e aho uavareje: Iae mae hõjo. Ri'öromomo rovëjo. Arue ahuro uvajëjo jero ruejõro.

<sup>50</sup> Èhi uavamu hejë'i ruehuro döre ba'amade niögohu jaho bu'öromomo ma-burëro ri'öromomo Iesuaro va'adeje.

<sup>51</sup> Va'amu Iesuro uavadeje: Naro diehi ajamijõro nagajëjo. Nagajëjamu rue nuni sisë'e ahuro uavadeje: Bada ajemego na nune dadovoromo uherihõjo.

<sup>52</sup> Uherihõjamu Iesuro uavadeje: Iae mae hõjo. Va'ëjo. Jero God mae uehorovamu ëhuro marëjavë'e hõjo. Èhi uavamu gavë'i ma-burëro uherihadeje. Uherihoromo Iesuare ijore örire va'adeje.

## 11

### *Iesuhu Jerusalem mabêhe rovade jõhoje.*

<sup>1</sup> Iae Iesumëro va'o Jerusalem bëhire va'oromo Olives Dahorure iojomoromo Bethphage amo o Bethany amo jiajinö ë rovareje. Rueromomo Iesuro hesi ijarahoho niö'i rëmö'öromomo

<sup>2</sup> uêvadeje: Arue jemesi nuninõrire amohuro va'ohëjo. Va'o hörö'i ga'a'arujëjo donkey harihe bise'ego aehu döre bogo hiromomo va'aruoho benugë'e jio'iramu. Benugë'e jiego jiovoromomo hu'irae ruerëjo.

<sup>3</sup> O aehu uëvë'oho: Jemë rabëni jiovarujë uëvë'oho uërëjo: Badaro ave mioho nimo'ego ëhuni jiovaruëre. Huro mu nimadoho vaeromo iae maburëro sionëro nugö'ö'ajëre.

<sup>4</sup> Ëhi uëvamu va'oromo gavareje donkey harihoho öri bërömore javue gemu nami'ego ë ojanore benugë'e jiamu. Benugë'e jiamu gagorovo jiofareje.

<sup>5</sup> Jiovamu gëgorovo ë bëhire riravare aribövioho jaburo uëvareje: Jemë rabëni donkey harihoho jiovarujëjo.

<sup>6</sup> Rabëni jiovarujëjamu Iesuhu uëvadëhi ëhi majëhijareje. Ëhi majëhijamu rueho jaburo uëvareje: Iae mae höjo. Bava'ohëjo.

<sup>7</sup> Bava'ohëjamu hu'irae barueromo jabesi niögoho mi dejore ruaho'amo bahijamu Iesuro ë ajio hijadeje.

<sup>8</sup> Hiromu va'amu gavë'i ae aho'obëhe a ioro'iorohuro niögoho örire ahahobe va'i a ioro'iorohuro mure ijo rude tarivë'ëro ahahobe va'areje.

<sup>9</sup> Va'oromo Iesure nuninö va'oruomadohu'o dejonö rueruomadohu'o ma-darugo'o uvoruomadeje:

God mabëhëjo.

Ave aho Badare ihore rovajoho mabëhëjo.

<sup>10</sup> Nosi hije David-are sionoho baeromo bëröme namiromo muebejavuo'ië'ajëjo.

No naguajëjo ë muoho mae tutuvoröhego.

God mabëhëjo.

<sup>11</sup> Ëhi rajahibe rovë'i Iesu'o Jerusalem rovareje. Iesuro Jerusalem ruenugoromo God-are amo bërömore va'adeje. God-are amo bërömore va'oromo bövioho bise'oho gabe juvonugoromo gavade mami'e vö'öromamu gagorovo huro hesi ijoraje 12-ho jabu'o gemu mae Bethany amore sionëro va'adeje.

*Mesehu bajo bogo raejoro Iesuhu uavade jöhoje.*

<sup>12</sup> Bethany amore va'ë'ëro nërö ri'öromo ë jioromo vuonorö'ö rovareje. Örire rueromo Iesuro hejade hömamu hejë'i

<sup>13</sup> rue'i gavadeje arue riribövire mesoho hano'e namijamu. Mesoho namijamu gagorovo ë bëhire va'adeje ga'i bösoho raejë'e jiego o bogo. Va'oromo gavadeje bajoho bogojio'i ma-hano rudu'emu jiamu hesi raejaje majaho bogo rovë'ëro jië'ëro.

<sup>14</sup> Hano rudu'emu jiamu gagorovo mesoho uavadeje: Ijonöho nadi bajoho raenego aho ue'aho'irarëjo. Ëhi uavamu hesi ijorajoho jaburo hejareje.

*Iesuhu God-are amo bërömore va'oromo ë'ade jöhoje.*

<sup>15</sup> Ëhi'oromo Iesumëro örëro ajiomoromo Jerusalem ajio suorovareje. Suorovoromo Iesuro God-are amo bërömore va'adeje. Va'i gavade aëro bövie bise'e imo'amamu gëgorovo rarovö'öjëvadeje. Rarovö'öjëvoromo gavade aëro sa'a göre göre jioromo rovare aribövi jabesi ijo bajoho ujuoho'i amo bërömo hesi ijo bajoho i'imëmamu gëgorovo jabesi mu maratuoho huotovö'öjëhoromo ugo imo'amarue aribövi jabesi arëtohu'o huotovö'öjëhadeje.

<sup>16</sup> Huotovö'öromo ae aho'obëhe ahëvadeje jabuhu inömo inömo ujuhoromo God-are amo ririre örörovaruoho vuonugojöro.

<sup>17</sup> Ëhi uënuogoromo God-are jö hesi öroho ae röjëhiromo uëvadeje: God-are surire jajivoromo uvë'e höjo: God nasi osaho aëro uvoruomo'ajëjo: Ëosa hesi bëhoho sa'ae dinö'e dinö'e raromarue ariböviehu ro God-are örire jö

atarue osaho höjo. Ëhi uvë'e höjo röhu jemëro mu sisë ë'l'ëro ëhuro ave osaho vajiohu'e ariböviohu gurihivarue juju gagoho va'ëne höjo.

18 Ëhi uëvamu priest masijohu'o Jew rajo jögoru öri röjëhjarue ariböviohu'o ëho jaburo ë jöho heromo gavare ae aho'obëhe Iesuhu röjëhijaje jöho heromo tiöruomamu gëgorovo uvareje: Nani ae aho'obëhe no ramuo'i Iesu gemu uehorovo'aruëromo juhuonivareje. Juhuonivoromo öre nahareje Iesu anego guomoröhego.

19 Ëhi'amu vö'öromamu gagorovo Iesu'o hesi ariböviohu'o Jerusalem jioromo va'areje.

*Iesuhu meso hesi uhu jö huruoho majëhijade jöhoje.*

20 Va'l'ëro sisonuvamu Iesu'o hesi ariböviohu'o örire vuonorö'ö rue'i gavareje mesoho mami'e sahori barëjë'e jiamu.

21 Sahori barëjë'e jiamu gagorovo Peter-ro Iesuhu urimo jövade jöho uehorovoromo uavadeje: Bada arueho gavëjo. Jaehu sahorijöro uavane mesoho iae sahorijë'e höjo.

22 Sahorijë'e höjamu Iesuro uëvadeje: God mae uehorovorëjo.

23 Ave jöho na jö mae uë'ië'ajëjo. Jemë bogo uehore niö'i bae'irögoro God gemu mae uehorovoromo uvë'oho: Na uvajëhi iae ëhi jio'a'ajë uvoromo ave dahoru uavë'oho: Ri'öromo va'o jovo börömore bu'örovonë uavë'oho jemëhu uvarije muoho God-ro vaejëho'ajëjo.

24 Ëhuni na uëvajëjo: Rabe rabe God ua gavë'oho mae uehorovoromo uvorëjo: Iae mae-ëjo. God-ro iae bojemi'iramu bae'ejöjo. Ëhi uvë'ohuro ëhuro iae bae'a'arujëjo.

25 O jemë döre riravoromo God-are örire ëninami'irögoro röhu ae göëni dë vörönëgë'oho ë a hesi sisëho uehorovoromo vuonugorëjo. Ëhi ë'l'ë'oho ëhuro jemesi Vavue ö'idöre hijaje ahuro jemesi sisëhu'o uehorovoromo vuonugo'ajëjo.

26 [O jemëhu jabesi sisë bogo uehorovoromo vuonugë'oho jemesi Vavue ö'idöre hijaje aho hu'o jemesi sisëho bogo uehorovoromo vuonugo'ajëjo.]

*Jew rajo a masijehu Iesu bogo ma uehorovoromo darugoho dinö'e baejane hö uavare jöhoje.*

27 Ëhi majëhinugoromo Iesu'o hesi ariböviohu'o Jerusalem röhu maho rovarëje. Jerusalem rueromo Iesuro God-are amo börömore va'oromo ë juvadeje. Juvamu gagorovo priest masijohuro Jew rajo jögoru öri röjëhjarue ariböviohu'o a duvaho ömo'ömohuro rueromo

28 Iesu uavareje: Jaehu God-are amo börömore hiromo mue gö gö vaejanuoho diehi jië'e daruge javoromo o raro darugoho bojamijë'ëro ëhi jië'e muoho vaejanue höjo.

29 Vaejanue höjamu Iesuro uëvadeje: Nasi darugo hesi jö ue gevarujoho na'o jemë jöe gemu uë gë'ië'ajëjo. Jemëhu mana uevë'oho naro jemë uë'ejöjo: Na ëhi jië'e darugohuro muoho vaejaje höjo.

30 John-hu bapataeto vaejavuonövadoho na God-ro o ma-aëro darugoho bojamijë'ëro ëhioho ë'onövade höjo. Uehego na hejöjo.

31 Hejöjamu rue a masijohuro Iesu diehi mana ua'iröhe jöho jabesi mevoromo uarovareje: Noehu uavë'oho: God-ro John darugoho bojamade hö uavë'oho Iesuro uö'a'ajëjo: Ëhi jië'oho jemë rabëni John bogo ma uehorovarije höjo.

32 O noehu Iesu ua'iröhoho: Ma-aëro John uavamu ë'l'ade hö ua'iröhoho röhu ë jöho bogo ua'ejarejo. Ëhi uarovare hesi bëhoho ae aho'obëhe

uvoruomadeje: John hu jö God-aro baeromo majahuinövade ae höjo. Ëhi uvoruomamu ë a masijehu ae aho'o jabesi jö aho'i jö gö Iesu ua'iröhoho juhuonivareje. Juhuonivo'i ëhuni Iesu ua'iröhoho: Ma-aëro John uavamu ë'ade hö ua'iröhoho bijönimareje.

<sup>33</sup> Bijönimoromo Iesu uavareje: Jaehu uö gövuanue jö hesi bëhoho no dadivavuajëjo. Dadivavuajëjamu hegorovo Iesuro uëvadeje: Ëhi jië'oho jemëhu uevarije jöho na'o bogo uë'ejöjo: Na ëhi jië'e darugohuro muoho vaejaje höjo.

## 12

*Mu ariböviehu a börömo hesi ö'i bajo mu mueberomo sisë ë'are uhu jöhoje.*

<sup>1</sup> Iesuro ëhi uënugoromo ë Jew rajo aribövi jabesi jö sisëho uhu'e majëhiromo uëvadeje: Iae ae gemuëro mure grape ö'oho bivo'amade höjo. Bivoromo ë muoho buore iromo rova'o rojomoromo ö'i bajo sa'ijovoröhe guaho umoromo mu javue döro vaejade höjo hesi mu ahuro ajio ë hiromo muoho atovoröhego. Muoho ëhi avohoromo gavade eni jiamu gagorovo ae uëvade höjo: Na va'ejöjo. Jemëro nasi muoho muebejehorëjo. Mueberomo ö'i bajoho raeromo mavego nasiroho bahi'i ioro'ioroho jemesi ujuohorëjo. Ëhi uënugoromo ri'öromo va'o sa'a göro ë hijade höjo.

<sup>2</sup> Sa'a göro va'oromo hijuvo gavade ö'i bajo urarue majaho rovamu gagorovo mu vaejharue aho gemu uavade höjo: Va'iranoho mu muebejarue aribövioho uënego ö'i baje gö i'imamego ujuoheho ruenëjo. Ujuoheho ruenëjamu riehuro va'ade höjo.

<sup>3</sup> Va'o mure höröjamu gavë'i rue mu muebejarue ariböviohuro ë aho guduamoromo anoromo sihö'öjamu sionëro övemu rovade höjo.

<sup>4</sup> Övemu rovamu gagorovo rue a börömohuro mu vaejharue ae gö'o nugö'öjamu mure va'ade höjo. Va'o höröjamu gavë'i rue mu muebejarue ariböviohuro ë aho simanore anoromo hesi örire mu sisë vaejare höjo.

<sup>5</sup> Ëhi'amu mu arijo'ohuro mu vaejharue ae gö'o nugö'öjamu mure va'ade höjo. Va'oromo höröjamu gavë'i mu muebejarue ariböviohuro ë aho anamu guomade höjo. Anamu guomamugo mu arijo'ohuro hesi mu vaejharue ae gö gö nugö'öbe rovade höjo. Nugö'ö'ego va'o mure hörö'ego ioro'ioroho ijahëro hisuebi'amo'i ioro'ioroho muo'amo barënövare höjo.

<sup>6</sup> Ëhi'ojuvo hu'oho ae gemu jiade höjo. Ëaho hesi harihu mabëhoho jiade höjo. Ijo tugoho'i mu arijo'ohuro uehorovoromo uvade höjo: Arue mu muebejarue ariböviohuro hu garomo uvo'a'aruëjo: Nöruare harihe hö uvoromo ëhuni mae uehorovo'aruëjo. Ëhi uvoromo nugö'öjamu mure va'ade höjo.

<sup>7</sup> Va'o höröjamu gavë'i ë mu muebejarue ariböviohuro uarovare höjo: Arue rovaje ahuro hesi vavu hesi sionoho bae hesi höjo. Ëhuni ë'ego ano bamarëjo ëhuro ave muoho noro baeröhe höjo.

<sup>8</sup> Ëhi uarovonugoromo ë aho guduamoromo anoromo guomamu muro jiamu baeromo rori'o bu'öruomade höjo. Ëhi'are höjo.

<sup>9</sup> Ëhi jië'oho mu arijo'ohuro diehi ë'a'ajëjo. Huro rueromo mu muebejarue aribövioho i'ue bojëmiromo muo'amo'i ë muoho ae gö bojëmi'ajëjo jaburo mueberöhego.

<sup>10-11</sup> Röhu ave uhu jöho God-are surire jajivoromo uvë'e höjo: Munë javue vae'irögoro munë gemu bijönimoromo vuonugare höjo. Vuonugaroho jaruvoho ë munëhuro javuoho nigemo'ego bibivoromo mae namijajëjo.



Hesi Bada God-ro ëhi ë'ade höjo.

Ëho noro garomo uvarue höjo: God-ro mu mabëhe ë'ë'e höjo.

Ëjö God-are surire jajivamu adaharijoho jemë diehi'oromo ë hesi bëhoho bogo avoho baejarije höjo.

<sup>12</sup> Ëhi uëvamu hegoroovo rue Jew rajo a masijohuro garomo uvareje: Iesuro a masijoho no biraguoromo ëhuni uhu jöho jövajëjo. Jövajë uvoromo Iesu guduamo bava'ië'oromo ae aho'obëhe juhuonëmiromo vuonugo va'areje.

*Iesuhu guaro berovojöro aehu tax jö ua gavarohoje.*

<sup>13</sup> Ëhi'amu aëro Pharisee aribövioho o Herod-are aribövioho rëmö'öjareje va'oromo Iesu sareramego huro jöe sisë'i jövoromo guaro berovoröhego.

<sup>14</sup> Rëmö'öjamu va'oromo Iesu sarerisareriamiromo uavareje: Tisajo. Iae no gavarue höjo ja a mae javego. O aho bogo juhuonëmijego. Ëhesi bëhoho jero no göromo ae böröme o bise'e javuajëromo jöe gö gö bogo röjahui'i God gemu uehorovoromo hesi örohemu mae röjahuijanue höjo. Ëhuni no jö harihe ua ga'ië'aruëjo tax jöho. Rome a börömohuro nosi sa'aho muebejego noro hu tax bojamiarue höjo. Noehu ëhi ë'aruoho na ëhuro Jew rajo nosi jögoroho aharuë höjo o bogajo. Na no bojami'ëjarëjo o bogajo.

<sup>15</sup> Bogajamu Iesuro gëromo uvadeje: Arue ariböviohuro nasi örire ma-döemu mae ue ge'i a'i jabesi uhoho na ijumevo'i nimoromo majehi-jaruëromo uëvadeje: Jemë rabëni nasi dëho bijioho gevarujëjo ga'i na bejevego. Ajivë'e ijo baje gemu baruehego na gavöjo.

<sup>16</sup> Gavöjamu barovareje. Barovamu garomo uëvadeje: Aveho rahuare nu ano'ohu'o ihohu'o jajivë'e höjo. Jajivë'e höjamu uavareje: Rome a börömo hesi höjo.

<sup>17</sup> Rome a börömo hesi höjamu Iesuro uëvadeje: Ëhuni Rome a börömo hesiroho ëho hesi öroro bojami'i God-aroho ëho God-are öroro bojaminövorëjo. Ëhi uëvamu heromo jöe barëjëvadeje.

*Iesuhu guaro berovojöro vuovë'e ariböviehu ri'öruomo'iröhe jö Sadducee ariböviehu hu ua gavarohoje.*

<sup>18</sup> Ëhi'amu iae Jew rajo a masijo ioro'iorohuro rovareje. Jabumë Sadducee jö uehorovarue aribövie jioruomadeje. Sadducee ariböviohuro uehorovoromo uvoruomajeje: A vuovë'oho ijonöho bogo ri'ö'amo'i ma-ioro'iore gemu vuovo'ajëjo. Ëhi uvoruomaje ariböviohuro rueromo Iesu guaro berovojöro sarerisareriamiromo uavareje:

<sup>19</sup> Tisajo. Moses-ro jögore jajivoromo uövuë'e höjo: Aboji harihu'o rumo'e a vuovego diehi ë'iröhe öroho aviëhi höjo. Aehu vaboro masuromo vaboroho aboji harihu'oho bogo vaejë'e baruehu guomo'i vaboro nugë'oho hesi öhuro vuojiroho masuromo ëhuro guomade ö hesi ihoro ujoho vaejaho'ajëjo. Moses-are jögoroho ëhi höjo.

<sup>20</sup> Ëhi jiië'ero iae ma-ö ömo'ömëremu ae aho'o 7 raromare höjo. Raromoromo muriohuro magonahoho masuvade höjo. Masuromo vaboroho aboji harihu'oho bogo vaejë'e baruoho guomade höjo.

<sup>21</sup> Guomamu hesi vaboroho dorue hijamu ö göhuro vuojiroho masuvade höjo. Masuromo vaboroho aboji harihu'oho bogo vaejë'e baruoho guomade höjo. Guomamu hesi vaboroho röhu maho dorue hijamu gagorovo ö göhuro vuojiroho masuvade höjo. Masuromo guomade höjo.

<sup>22</sup> Ö ömo'ömo ioro'iorohu'o ëhi gemuoho ë'obe rovare höjo. Ö ömo'öme 7 jabuhu ë magonahe gemuoho masube rovaroho ë magonahoho aboji

harihu'oho bogo vaejē'e aho ma-vuovēvobe rovade hōjo. Vuovobe ruejuvo barējamu ijo tugoho'ioho ē magonahoho hu'o guomade hōjo. Ēhi'are hōjo.

<sup>23</sup> Ēhi ē'arohuni ēhuni ave jōho no ua ga'iē'aruējo. Jero uvanue hōjo: Vuovoromo ri'ō'ejarejo. Ēhuni vuovē'e aribōviehu ri'ōruomorōhe majaroho ē magonahoho di ahu'o hi'a'ajējo. Barue aho'o 7 masuvē'ego uavaruējo.

<sup>24</sup> Ēhi uavamu hegorovo Iesuro uēvadeje: Bogajo. God-are surire jōhu'o huhu mu vaerōhe darugohu'o jemē bogo avoho gavarujēro sisē'i uehorovoromo ue gevarujējo.

<sup>25</sup> Ēhesi bēhoho vuovē'ēro ri'ōruomo'irōhe maja rovē'iroho vaboroho baruoho bogo masurovo'i aneraehu ō'idōre ma-raromaruēhi ēhi raromo'aruējo. Ēhuni ē magonahehu di ahu'o hi'irōhe jō ue gevarujoho bēhi rumo'e hōjo.

<sup>26</sup> Ējōho jemēro uvaruje hōjo: Vuovē'e aribōviehu ri'ō'irōhe jōho sareri jōe hōjo. Ēho bogo sareri jōehu jio'i jō mae hōjo. Ēhesi bēhoho vuovoromo ri'ō'irōhe jōho Moses-ro God-are surire iae jajivē'e hōjo. Ijo hisu vēnehu ravade jō jajivadevare evare God-hu jōvade jōho jajivoromo ave jōhu'o uvē'e hōjo: God na Abraham Isaac Jacob ēhi muebejēvaje ae jevajējo. Jemē rabēni ē jō hesi bēhoho bogo avoho baejarije hōjo.

<sup>27</sup> God-hu Abraham Isaac Jacob muebejēvaje jō hesi bēhoho jabumē vuovoromo bogo ioro'ioemuoho barē'i va'o raromego God-ro muebejēvaje hōjo. God bogo vuovoromo ioro'ioemu barējē'e aribōvioho muebejēvo'ibejajo. A'i hu vuovoromo va'o raromarue aribōvioho iae muebejēvaje hōjo. Ēhuni ae vuovoromo ioro'ioemu barējaje hō uvarujoho ēho sarerivarujējo.

*God-hu bojamuade jōho diho bōrōmoho jiajoho aehu Iesu ua gavadohoje.*

<sup>28</sup> Ēhi uēvamu Jew rajo jōgoru ōri rōjēhijarue ae gemuēro rueromo hejade Iesu'o Sadducee aribōviohu'o jō aho'ahamirovamu hejē'i rōhu gavade Iesuro jō mae mana majēhijamu gagorovo Iesu uavadeje: Na ave jōho ua ga'iē'ajējo. God-hu bojamuade jōgore aho'o jio'amajoho di jōhuro jō ioro'ioroho iosirami'amoromo nuniroho hōjo.

<sup>29</sup> Nuniroho hōjamu Iesuro uavadeje: Nunire jō bōrōmoho aveho hōjo: Israel aribōviohumē ave jōho hehējo. Bada nosi God hu gemu bōrōmoho hōjo.

<sup>30</sup> Jasi dē vōvōbajo'e aru'ahe uehore daruge aho'obēhe Bada jasi God ma-hu gemu bojaminējo.

<sup>31</sup> Ējōho nuniroho hōjo. Rōhu ē jō hesi bēhiroho aveho hōjo. Jaehu jasi arijo'arije rajahirovanuēhi jasi ae gemuoho ēhi rajahinējo. Jōgoru ioro'ioroho ē jō niō'ioho bogo iosirēmiromo masijoho jio'amo'i ē jō niō'ioho bōrōmo maho jēvajējo.

<sup>32</sup> Bōrōmo maho jēvajējamu hegorovo rue jōgoru ōri rōjēhijaje ahuro Iesu uavadeje: Tisa ja jō mae jōvanuējo. Jaehu uevanuoho: God ma-gemu jio'i god gō gō bogohōjo.

<sup>33</sup> Noehu dē vōvōbajo'e uehore daruge aho'obēhe ma-hu gemu bojamiromo rōhu nosi arijo'arije rajahirovaruēhi nosi ae gemuoho ēhi rajahijē'oho ēho ma-mabēhe hōjo. O mi vēnire bueromo God-are ōrire bojamijē'oho o suvuore gō gō hu bojamijē'oho ēho ma-jianovajējo.

<sup>34</sup> Ma-jianovajējamu hegorovo Iesuro gavade rue aho simano mae uehorovoromo jōvamu gagorovo uavadeje: Jaehu God-are aharire va'o hijego huhu muebejavo'irōhoho ja bogo rori'oho javo'i iae bēhiro javajējo. Ēhi

uavamu hegorovo ae aho'obēhe jōe gō gō ua ga'iē'aroho juhuonivoromo vuonugareje.

*Böröme namiromo ajamuaje a hesi jō Iesuhu rōjēhi'i uē gēvadohoje.*

<sup>35</sup> Vuonugamu Iesuro God-are osa börömore hiromo jōgoroho rōjēhijadeje. Rōjēhiromo uēvadeje: Aveho hehējo. Böröme namiromo ajēmi'irōhe a hesi jōho jōvo'iē'ajējo. Jew rajo jōgoru öri rōjēhijarue ariböviohuro uvoruomaje hōjo: Böröme namiromo ajamui'irōhe aho ma-David-are uje jio'a'ajējo. Rabēni ēhioho uvoruomaje hōjo.

<sup>36</sup> God-are Aru'ahohuro jōho David-are simanore bojамamu jajivoromo uvē'e hōjo:

Bada God-ro nasi Bada uavade hōjo:

Nasi övo manō rojo hijego

ja'o muorovarue aribövioho naro ruahö'ōjēvego

hörēro vijuvo taemo'amo'irane hōjo.

<sup>37</sup> Ēhesi bēhoho böröme namiromo ajēmi'irōhe a hesi jōho David-ro jajivoromo uvē'e hōjo: Bada hōjo. Bada hō uvadoho ēhu'oho rabēni uvoruomaje hōjo: Böröme namiromo ajamui'irōhe aho ma-David-are uje hōjo. Ēhi uēvamu ae aho'obēhe huhu majēhijaje jōho heromo nimorohoruomadeje.

*Jew rajo jōgoru öri rōjēhijarue ariböviehu sareri'e mu vaejaruēhi aehu bogo ēhi ē'irōhego Iesuhu jōvadohoje.*

<sup>38</sup> Ēhi'amu Iesuro jōho rōjēhijuvo röhu uēvadeje: Jemēro Jew rajo jōgoru öri rōjēhijarue aribövioho gē avohorējo. Ēhesi bēhoho ē aribövioho jaburo jabesi sinohemu uehorovoromo niōgu ēgobövie hör'u'o utahē'oho io'amoromo jijiharue ēhi jiē'e muoho nimarue hōjo aēro gēromo rajēhijōro. O imo'amaruire va'ē'oho jaburo nimarue hōjo aēro uvoruomorōhego: Jabumē a masijēro jijihajēromo rajēhiromo jejēmiruomorōhego.

<sup>39</sup> O God rajahijarue osare va'ē'oho o sörö i'i va'ē'oho a masijehu raromaruire ē va'o raromo'i nimarue hōjo.

<sup>40</sup> Raromo'i nimoromo magonaho doru jabesi bövioho bise'oho ēma ujuohēharue hōjo. Ujuohoromo sarerivoromo pari ēgobövie jaguvarue hōjo aēro gēromo uvojōro: Mu mae vaejaruējo. Ēhi jiē'e sareri'e muoho vaejaruego ēhuni God-ro i'u börömo mae bojēmi'ajējo.

*Bövi bise'o rumo'e magonaho doruehu God-ni suvuro ba'amade jōhoje.*

<sup>41</sup> Ēhi uēnugoromo Iesuro God-are suvuro bahijarue bēhire ē va'o hijadeje. Hiromo uheriho'i gavadeje ae aho'obēhe ijo bajoho ē io'amamu. Bövi bise'o marohē'e mae jiē'e aribövie aho'obēhe jaburo rueromo ijo baje böröme ba'amoromo va'onövareje.

<sup>42</sup> Ēhi'amu magonaho dorue gemuēro rueromo rōvē'e ijo baje niō'i ba'amēvadeje. A'i ē monioho ma-bise'e jiadeje.

<sup>43</sup> Ba'amēvamu Iesuro ēho garomo hesi ijarajo ömo'ömohuro riejōro uvēvadeje. Rovamu uēvadeje: Ēbövi bise'o marohē'e jiē'e ariböviohuro ijo baje aho'o io'amo'i arue bogo eni jiē'e magonahohuro rōvē'e ijo bajoho niō'i ba'amade hōjo. Röhu God-ro ēhi uvajējo: God-are suvuro io'amare a ioro'iorohuro bisemu bisemu io'amo'i ē bogo eni jiē'e magonaho doruohuro bövi mae ba'amade hōjo. Na mae uēvajējo.

<sup>44</sup> God-hu ēhi uehorovaje hesi bēhoho ē a ioro'iorohuro inömo marohē'e maēro jiē'ēro ma-vituohemu bojami'i ē magonahohuro inömo rumo'ēro jiē'ēro hesi i i'ibejade monioho aho'o bojami barējē'e hōjo.

## 13

*Aehu God-are amo börömo dadovoruomo'iröhe jö Iesuhu majëhijadohoje.*

<sup>1</sup> Èhi'onugoromo Iesuro God-are amo börömore jioromo va'amu gavë'i hesi ijorajo ömo'öme röhu ae gemuëro Iesu uavadeje: Tisa aruëroho gavëjo. God-are javu masijo vae'amarohu'o javu masijo hesi munëhu'o ma-mabëhe jio'amajëjo.

<sup>2</sup> Èhi uavamu uavadeje: Ave munë javu masijoho na jemë gavarujëjo. Èjavuoho aho'obëhe aëro dadovoruomo'iramu munëho ahoromo sa'aro ruvebi barë nahonahovo'ajëjo.

*Huë vavaeni börömo rueröhe jö Iesuhu majëhijadohoje.*

<sup>3</sup> Èhi uënuogoromo Iesuro va'oromo Olives Dahorure ajio hiromo gavadeje God-are amo börömo anume jiamu. God-are amo börömo anume jiamu Peter James John Andrew ëho jaburo sivue ajio Iesu'o raromoromo uavareje:

<sup>4</sup> Ave jöho majahuego hejarëjo. God-are javu masijehu rireromo'iröhego uövuanoho ëho divare jio'a'ajëjo. O no mu rabe garomo uvo'ejarëjo: Èhi jië'e muoho aho'obëhe rue'ië'ajëjo.

<sup>5</sup> Rue'ië'ajëjamu uëvadeje: Gavë'iajo. Aëro sarerëmi'iramu guaro rireromëvo va'a'ajëjo.

<sup>6</sup> Ae aho'obëhe rueromo sarerëmiromo uë'a'aruëjo: Nöruare ihoro rovajëjo. God-hu uevë'ëro böröme namiromo ajëmi'irode aho na jevajëjo. Èhi uëromo ae aho'obëhe sarerëmi'iramu uvo'a'aruëjo: Mae-ëromo guaro rireromo'ajëjo.

<sup>7</sup> O he'irarije muorovo jö ruenövo muorovonövamu hejë'oho nadi juhuonivorëjo. Öre gö bogojië'ëro ëhi jië'e mu sisëho iae jio'a'ajëjo. Röhu sa'aho bövioho bise'oho evaroho bogo barë'i ëho hesi majae göro jio'a'ajëjo.

<sup>8</sup> Sa'ae göëro göhu'o muorovonövo a masijo ioro'iorohuro ioro'iorohu'o muorovonövo'aruëjo. Sa'ae dinö'e dinö'e jiajoho hijiohijiovo'amo'ajëjo. Sa'ae gö gö iruno'e bogojio'ajëjo. Èhi jië'e huë vavaenoho rue'iramu mu sisëho bogo burëroho barë'i a'i magonahehu aevoromo raho'i hara'uajëhi ëhi aho aevoromo huë vavaene börömo baebe va'oruomo'ajëjo.

<sup>9</sup> Röhu gavë'i raromorëjo. Aëro guduamo ujuohëvo va'oromo jögoru muebejarue aribövi jabesi övore bojëmi'aruëjo. God rajahijarue osa göro göro ë hisuebijëvo'aruëjo. Gavana o sa'are a masijo gö gö jabesi nunire rëmo'iramu nasi jöëni ë riravo'arujëjo nasi jöho huruoho majëhi'i.

<sup>10</sup> Röhu God-are jö maho aëro sa'ae dinö'e dinö'e majëhibe va'o barë'ajëjo. Èmuoho urimoho jio hesi höjo. Bövi bise'o barë'iröhe majaho ë hesi ijönö jio'a'ajëjo.

<sup>11</sup> Röhu jabuhu guduamo ujuohëvo va'amu a masijo jabesi nunire riravë'oho nadi uvorëjo: Na rabu jöe majëhi'ejöromo nurunurumorëjo. Nadi ëhioho ë'i a'i a masijo jabesi nunire riravo'irarije maja rovamu evare God-hu rabu jö jemesi simanore bojëme'oho ë jöho majëhirëjo. Èhesi bëhoho bogo jemëhu jöho majëhi'irögoro a'i God-are Aru'ahohuro jöho simanore bojëmi'iramu jemë ë jöho majëhi'arujëjo.

<sup>12</sup> Röhu öhuro öho ae gö jabesi örire bojëminövo'aruëjo muo'amojöro. Vavuohuro aboji harihu'oho ëhi gemuoho ë'a'aruëjo. Aboji harihu'ohuro ri'öromo ae uë'iramu vëmu vavu'oho muo'amo'aruëjo.

<sup>13</sup> O jemëhu na uehorovevarujohuni ae aho'obëhe jaburo jemesi örire nue huodëgoruomo'ajëjo. Röhu ae rahu biririvoromo mae uehorovevobe

va'lojuvo maja barë'iröhe maja rovë'iroho God-ro baejëvoromo manö bamëvo'ajëjo.

*Mu sisë bëhe rueröhe jöhoje.*

<sup>14</sup> Röhu jemë ga'a'arujëjo God-are osa ijumaje sisëhuro maehu jiaje röhore ëma nami'iramu. Ëjö Iesuhu majëhijadoho adahoromo avo'avoho gare. Amo Iesuro jö vituoho majëhiromo uëvadeje: Sisëhuro maehu jiajire ëma namijamu gavë'o'oho ave Judea sa'are raromaruje aribövioharo huruomoromo dahoru'ero iojiomorëne.

<sup>15</sup> Ae rahu javu dönö haradare raromë'o'oho abueromo osare inömoho nadi va'lo ujuoho'i ma-huruomoromo va'orëne.

<sup>16</sup> O mure raromë'o'oho nadi vuonorö'ö va'lo niögoho ujuoho'i ma-huruomoromo va'orëne.

<sup>17</sup> Röhu ë huë vavaeni rue'iröhe majaroho dë'e magonahohu'o aboji harihu'o inino jio'amë'e magonahohu'o jabumë vaevë'o'oho diehi huruomoruomo'ajëjo.

<sup>18</sup> Röhu God ua garëjo huro ajëmego ëhuro aho niohijo majaroho bogo huruomom'iröhe höjo.

<sup>19</sup> Rabëni hesi bëhoho evare majaroho huë vavaene bogo bise'o vadu'o'oho rue'a'ajëjo. Ëhi jië'e huë vavaenoho urimo God-hu sa'a bövi bise'o bamadevaroho bogojiobe ruejuvo ro jaruvo majahu'o ëhi jië'e huë vavaenoho bogohöjo. O ijonöhu'o bogojio'i ë majaho gemu börömoho jio'a'ajëjo.

<sup>20</sup> Ëhuë vavaeni maja ëgobövi jiajoho God bogo tarioromo bunemuoho bamo'ibejajo aho bogo biririvoromo raromom'ibejajo. A'i God-ro hesi baejëvade aribövioho uehorovëvoromo ë majaho tarioromo bunemu bamo'i uvë'e höjo.

<sup>21</sup> Ëhi jiamu ae göehu uëvë'o'oho: Aveho ro gahëjo. O arueho va'lo gahëjo. God-hu uavë'ëro böröme namiromo ajamui'iröhe aho aviae o aruae hö uëvë'o'oho nadi maho uehorovorëjo.

<sup>22</sup> Ëhesi bëhoho rabëniajo. Ae aho'obëhe rueromo sarerëmiromo uëbe va'a'aruëjo: God-hu uevë'ëro böröme namiromo ajëmi'irode aho jevajëjo o jö God-aro baeromo majëhijaje ae jevajëjo. Sarerëmiromo ëhi majëhiromo bogo gavarue mu masijoho vaenövo'aruëjo eni jëvego God-hu sjëvade aribövioho sarerëmego rireromom'iröhego.

<sup>23</sup> Röhu jemëro avoho mueberovorëjo. Ijonö jioröhe jöho na urimo majëhijë'e jevajëjo. Ëhuni sareri'e jöho nadi maho uehorovorëjo.

*God-are A Maehu rueröhe jöhoje.*

<sup>24</sup> Röhu ë huë vavaeni majaho barë'iramu evare maja nunoho ramoramovoromo manaeroho duorohoromo

<sup>25</sup> jijoho sisërë'amoromo ö'idöre inömoho aho'lo arua anumiae va'lo'amo'ajëjo.

<sup>26</sup> Ëhi'o'iramu sa'are raromarue ariböviohuro ae aho'obëhe ga'a'aruëjo God-are A Maho naro darugo'lo aji'lo börömo mae baeromo suere ruvebi'iramu.

<sup>27</sup> Ruvebiromom nasi aneraho rëmö'ö'iramu ro God-hu sjëvade aribövioho gagovëvo'aruëjo. Arua anumiae sa'ae dinö'e dinö'e maja rojomajire beva'ajire jioruomajoho gagovëvo'aruëjo.

*Mesehu gumutivego Jew rajo jabesi vama maja dunovaje uhu jöhoje.*

<sup>28</sup> Röhu meso hesi uhu jöho heromo bëhoho avoho uehorovorëjo. Gavaruje mesoho gumutivoromo rahego garomo evare jemë uvaruje höjo: Jew rajo nosi vama majaho iae dunovajëjo.

29 Ĕhesi bēhoho jemē ga'irarije naehu uēvodēhi mue gō gō rovanu gavē'iroho uvorējo: Ĕmajaho iae rovajējo.

30 Ave jōho na jō mae uē'iē'ajējo. Ave jaruvore raromaruje aribōvioho jemē bogo vuovo barējē'iro evare naehu uēvaje mue aho'obēhe rue'a'ajējo.

31 Ō'idōe sa'ae bōvie bise'e barē'i nasi jōho gemu bogo barē'ajējo.

*Iesuhu vuonorō'ō ruerōhe maja no bogo gavarue jōhoje.*

32 Rōhu ē majaho divare jio'irōhoho aho bogo gavaruējo. Ō'idōre raromarue anerahu'o Harihoho na'o bogo ga'i hesi Vavuohuro gemuēro gavajējo.

33 Avoho mueberovorējo. Gavē'iajo. Jemē'o ē majaho bogo gavarujējo.

34 Ĕhesi jōho uhu'e majēhi'iē'ajējo avoho he'irarijego. Ae gemuēro ōre gō va'iē'ajējo. Amore jioromo va'iē'iroho hesi mu vaejharue aribōvioho ae gō gō mue gō gō bojēmibe va'a'ajējo jaburo simane vaeromo ē muoho muebejaho'irōhego. Bojēmibe va'oromo hesi osa ojo muebejaje aho ua'a'ajējo: Ojoho avo'avoho muebenējo. Osa arijo'ohuro ēhi ē'a'ajējo.

35 Ĕhesi bēhoho na ē osa arijo'oho va'ēne jevajējo. Na divare vuonorō'ō rue'irodoho jemē bogo gavarujējo. Nani vō'ō'e o vahi riri'e o sisonuvo'i titimo'iramu o sisonuvo'iramu rue'ejōjo. Jemē bogo gavarujējo. Ĕhuni muoho avo'avoho mueberējo.

36 O bogo nuni jioromo mu avoho muebejē'oho nani na ma-majioho rue'i ga'ejōjo jemē momorō'ō uro'amē'e jēvo'iramu.

37 Na jemē uēvajēhi ae aho'obēhe ēhi gemuoho uēvajējo: Nune jioromo muoho avo'avoho mueberējo.

## 14

*Jew rajo a masijehu Iesu ano'i jō mevare jōhoje.*

1 Iae God-hu Vōrō Tugohade Sōrō o I Dē Huaje Oso Rumo'e Sōrō jiamēhi i'irōhoho jio'i rōhu jaruvēhi priest masijohu'o Jew rajo jōgoru ōri rōjēhijarue aribōviohu'o ēho jaburo ōre nahareje Iesu saginiēri guduamōromo ano'irōhēro.

2 Ōre nahoromo uarovareje: Sōrō majaroho bogo guduamo'ejarējo aēro gōromo no'o muorovojōēni.

*Magonahe gemuehu ridi'e jovehu Iesuale simanore otehodivade jōhoje.*

3 Ĕhi'amu Iesuro Bethany amore rueromo sino jomo'e ae Simon-are osare ro hiromo ie ijadeje. Ie ijamu gagorovo magonahe gemuēro munē huono mabēhe baeromo rovadeje. Ĕhuono gagore ridi'e osoho jiē'e jiadeje. Osoho bogo jovo'oho buarohē'e ma-oso maemu jiadeje. Oso ihoho nard jiadeje. Rōhu hesi manaho bogo bise'o vadu'oho jiadeje. Magonahohuro ē munē gagore jiaje osoho barueromo munēho hahovoromo Iesuale simanore otehadēje.

4 Simanore otehamu gagorovo ae gōero gōero dē vōrōnēgamu jō sisē atoromo uarovareje: Ĕmagonahoho rabēni osoho ēma oteh'ō'ajajējo.

5 Aro imo'ibejarējo 300 kina iosiramijē'e manaho bōvi mae bae'ibejarējo. Ĕmanaho baeromo bōvi bise'o rumo'e aribōvioho suvuorēmi'ibejarējo. Ĕhi jiē'oho iae mae jio'ibejajo. Rōhu huro ēma oteh'ō'jade hōjo. Ĕhi uarovoromo magonahoho birevareje.

6 Birevamu hegorovo Iesuro uēvadeje: Ĕmagonaho birevarujoho vuonugohējo. Jemē rabēni magonahoho huē vavaenoho bojamijarujējo. Huro na mabēhe avohevē'e hōjo.

<sup>7</sup> Bövi bise'lo rumo'e ariböviohuro jemë'lo raromobe jijih'o'aruëjo. Jemesi nimoromo jabumë ajëmijë'oho iae jemë eni jëvaje höjo. A'i naro jemë'oho bogo hibe juvo'ejöjo. Ijonö ëhi avohevo'irarijoho bogo eni jëvo'ajëjo.

<sup>8</sup> Ëmagonahohuro rabe eni jiadoho ëho nasi örire mae avohevade höjo. Mae avohevoromo oso nasi sinore otehade hesi bëhoho nasi sinoho avohevade höjo ëhuro nasi sinoho mae jevego aëro hure bamevoruomoröhego.

<sup>9</sup> Ave jöho na jö mae uë'ië'ajëjo. Sa'ae dinö'e dinö'e aehu nasi jö ma majëhibe jijihë'iroho ë magonahehu ë'ade jöhu'o majëhibe jijih'o'aruëjo aëro hu mae uehorovoruomoröhego.

*Judas-hu Iesuni Jew rajo a masijo hiruëmade jöhoje.*

<sup>10</sup> Ëhi'lamu Iesuare ijoraje 12 röhu gemuëro Judas Iscariot-ro va'oromo priest masijoho uëvadeje: Jemë nëgë'oho na Iesu jemesi övore bojëmi'ejöjo.

<sup>11</sup> Bojëmi'ejöjamu hegoroovo nimorohoromo uavareje: Iae mae höjo. Ëhi jïë'oho no ijo baje mana bojami'ëjarëjo. Ëhi uavamu hegoroovo Judas-ro öre nahadeje Iesu jabesi övore bojëmi'iröhëro.

*God-hu Vörö Tugohade Sörö Iesumëhu ijare jöhoje.*

<sup>12</sup> I Dë Huaje Oso Rumo'e I ibe va'iröhe majaho aevoromo rovadeje. Aevoromo rovaje majaho rue'ego Jew rajëro sheep harihoho muo'amonövareje God-hu Vörö Tugohade Söröho i'iro. Amo ë majaho rovamu gagorovo Iesuare ijorajoho jaburo Iesu uavareje: Ja nagajoho no dinö'e va'oromo söröho avohaho'ëjarëjo.

<sup>13</sup> Avoho'ëjarëjamu Iesuro hesi ijorajoho niö'i uëvadeje: Jerusalem amo börömorö va'orëjo. Va'i ga'a'arujëjo aëro jovo'e ramaho simanëro baeromo ro birohëvo'iramu.

<sup>14</sup> Ro birohëvego va'oromo ga'irarije hu di osare rumo va'ego gagorovo jemë'o ë osaro va'oromo osa arijo'oho uarëjo: Tisahuro uvade höjo: Osaho dinö'e höjo naehu nasi ijorajoho jabu'o gemu mae sörö i'irodoho. Ëhi uarëjo.

<sup>15</sup> Ëhi ua'iramu osa arijo'ohuro jemë hu'iraejëvoromo vuahure ajiomoromo döre osa börömo röjëhi'a'ajëjo. Röjëhi'iramu ga'a'arujëjo maratue bövie bise'e eni avohoromo bahijë'e jio'iramu. Ëhi jiamu gavë'iroho ë dirö'oro söröho avohorëjo jemë'o no'lo ë i'iröhe.

<sup>16</sup> Ëhi uëvamu rue ae niö'iohuro ri'öromö Jerusalem va'areje. Va'oromo gavare Iesuhu uëvadëhi bövioho bise'oho ëhi jiamu gagorovo söröho avohareje.

<sup>17</sup> Ëhi'lamu vahiromadeje. Vahiromamu gagorovo Iesuro hesi ijoraje 12-ho jabu'o gemu mae rovadeje.

<sup>18</sup> Rueromo ioho ijë'i Iesuro uëvadeje: Ave jöho na jö mae uë'ië'ajëjo. Jemë ae gemuëro na bijönegarue aribövi jabesi övore bojëmi'anuejo. Ëaho ja aviae na'lo ie ijanuëjo.

<sup>19</sup> Ie ijanuëjamu hegoroovo jaburo uehore gö gö baeromo ae gemuëro gemuëro uavareje: Na bogo ëhioho ë'ejöjo. Na na mae uavajëjo.

<sup>20</sup> Mae uavajëjamu hegoroovo uëvadeje: Ae aho'obëhe 12 röhu gemu naehu i hevöre ba'amo'ego hu'o gemuore ba'amaje ahuro ë mu sisëho vae'a'ajëjo.

<sup>21</sup> God-are surire jajivarëhi hesi A Maho na ëhi guomevo'ajëjo. Röhu na bijönegarue aribövi jabesi övore bojëmi'iröhe aho vaevë'oho sisërë'ajëjo. Ëaho bogo raho'ibejajo ëhuro mae jio'ibejajo.

*Sino'o kö'lo aevoromo ijare jöhoje.*

22 Ëhi uënu goromo ioho ue'ahoromo Iesuro ioho baeromo God mae uanugoromo ato'atovoromo hesi aribövioho suvuorëmiromo uëvadeje: Baehëjo. Aveho nasi sine höjo.

23 Ëhi'onugoromo enatuore jovoho baeromo God mae uanugoromo bojëmamueje. Bojëmamu ae aho'obëhe ë jovoho ibe rova'areje.

24 Ibe rova'amu Iesuro uëvadeje: Aveho nasi köe höjo. Ae aho'o jemesi jöëni köho rovevoromo guomevo'ajëjo. Guomevo'iramu ëhuro God-hu jemë muebejëvo'iröhe jögoroho marë'ajëjo.

25 Röhu ave jöho na jö mae uë'ië'ajëjo. Na ijoho ö'i bajo jovoho bogo i'ejöjo hujeji ëho majaho rovego evare na God-hu muebejaje öri ari'ere hiromo ö'i bajo jovo i'oho i'irodëni.

26 Ëhi uënu goromo God rajahijarue jöho ioruomoromo suorovo va'oromo Olives Dahorure iojio mareje.

*Peter-hu Iesu gavaje jö a subivëhoröhe jö Iesuhu majahijadohoje.*

27 Olives Dahorure iojio moromo Iesuro hesi aribövioho uëvadeje: Jemë ae aho'obëhe nasi örire mae uehorovevarujoho vuonugo'i remo va'a'arujëjo. Ehesi bëhoho God-are surire jöho jajivoromo uvë'e höjo: Sheep muebe'amaje aho God naro ano'ejöjo. Ano'iramu huhu muebe'amade sheep-oho jaburo arua anumiae va'o'amo'ajëjo. God-are jö jiajëhi ëhi remo va'a'arujëjo.

28 Remo va'iramu guomoromo ri'önugoromo naro urimo Galilee va'ejöjo. Jemë ijore ö'a'arujëjo.

29 Ëhi uëvamu Peter-ro ri'öromomo uavadeje: Nani a ioro'ioroho jasi örire uehorovaruocho vuonugo'i ramo va'a'aruëjo röhu na bogo ëhioho ë'ejöjo.

30 Bogo ëhioho ë'ejöjamu Iesuro Peter uavadeje: Ëhi uevanuëjo röhu ave jöho na jö mae ua'ië'ajëjo. Jaruvo vahire kökörökoho bogo urimoho vae niö'i uvë'e jero urimo vae niö'i gemu ae uë'a'anuejo: Na Iesu bogo gavaje höjo.

31 Ëhi uë'a'anuejamu hegorocho Peter-ro ma-darugo'o uavadeje: O na bogo ëhioho ë'ejöjo. Aehu anegamu ja'o gemuore guomo'ië'iroho na bogo ëhioho majëhi'ejöjo. Bogo majëhi'ejöjamu Iesure aribövi ioro'ioroho aho'o jabu'o ëhi gemuochu Iesu uaruomadeje.

*Iesuhu Gethsemane sa'are hiromo God-are örire ëninamijade jöhoje.*

32 Ëhi uanugoromo Iesu'o hesi ariböviohu'o va'oromo öri ari'o ihe Gethsemane rovareje. Rueromo Iesuro uëvadeje: Avehuro raromochego na aruëre va'oromo God-are örire jöe jövöjo.

33 Ëhi uënu goromo Peter James John ëhi sö ujuochu va'oromo hesi dë vövöbajo'o uhure huë vavaene aho'o rovamu sisë maro nurunurumadeje.

34 Nurunurumoromo uëvadeje: Na sisë maro huë vavaene baejevajëjo. E'huro guomevo hesi höjo. E'huni nadi momorö'ö'i ma-nune jioromo na'o gemuoro avoho mueberovë'e raromohëjo.

35 Ëhi uënu goromo rori'o ëgo'o va'oromo sa'are behumoromo God ëninamijadeje ëhuro eni jiego vi'ehoho bogo bae'iröhëni.

36 E'nenamiromo uavadeje: Apo mue aho'o vae'iranoho ja eni javajëjo. E'huni i'ue huë vavaene nasi örire rovajoho ahego na bogo bae'iröjo. Röhu naehu nimajoho nadi ë'i jaehu nimanuëhi ëhi ë'onëjo.

37 Ëhi ëninaminugoromo vuonorö'ö rueromo gavade hesi ae niö'i gemu momorö'öjamu gëgorocho Peter uavadeje: Simon-ajo. Rabëni niavanuëjo. Majae ma-bunemu nune jioromo mueberovë'e hi'iranoho ja diehi'oromo bogo eni javajëjo.



<sup>38</sup> Jemëro nune jioromo mueberomo ëninamihego God-ro ajëmego Satan-ro bogo dinëmego ëhuro bogo bejëvo'irajo. Jemesi aru'ahoho mu mae vae'i nimo'i jemesi sino haho'o ho u'uhë'e hõjo.

<sup>39</sup> Ëhi uënu goromo rõhu maho va'oromo urimo ëninamiromo uavade jõe gemuoho ëninamijadeje.

<sup>40</sup> Ëninaminugoromo vuonorö'ö rueromo gavadeje jabumë nunëhimo'amo'ego momorö'öjamu. Rueho jaburo momorö'öjë'ëro ri'öromo Iesuare örire jö mana ua'iröhoho dadivëvadeje.

<sup>41</sup> Dadivëvamu Iesuro urimë'i vae niö'i va'oromo ëninamijadoho rõhu maho va'oromo ëninamijadeje. Ëninaminugoromo rueromo uëvadeje: Jemë diehi'oromo ma-momorö'öemu momorö'öjarujëjo. Iae mino'ëjo. Iae barëjajëjo. Majaho mami'e rovë'e hõjo. Aëro God-are A Maho na bijönegarue aribövi jabesi övore bojëmi'ië'ajëjo.

<sup>42</sup> Ri'öromo go va'ohëgo va'arëjo. Gahëjo. Na bijönegarue aribövi jabesi övore bojëmi'iröhe aho rovajëjo.

*Iesu guduamare jöhoje.*

<sup>43</sup> Ëhi uëvamu gavë'i Judas rovadeje. Iesuare ijoraje aho'obëhe 12 rõhu Judas hu'o jabesi ae gemuoho jiadeje. Judas rovamu ae aho'obëhe siravae kepatae ujuohoromo hu'o rueruomadeje priest masijohu'o Jew rajo jögoru öri röjëhijarue ariböviohu'o a duvaho ioro'iorohu'o ëho jaburo rëmö'öjë'ëro.

<sup>44</sup> Rõhu urimë'i ë sareri'e aho Judas-ro ë aribövioho uëvadeje: Ga'irarije naro di aho dudöhamu gavë'oho uvorëjo: Iae Iesu hõromo guduamoromo hu'iraeromo avoho muebebe va'orëjo.

<sup>45</sup> Judas-ro ëhi uëvë'ëro huro rueromo ma-burëro ro Iesu jejamiromo Bada uavë'i dudöhadeje.

<sup>46</sup> Dudöhamu gavë'i ë ariböviohuro Iesu guduamareje.

<sup>47</sup> Guduamamu ae gemu Iesuare bëhire namijadohuro hesi kaejõho jijöromo priest börömo hesi mu vaejaje aho anoromo hia'oho tariö'öjahadeje.

<sup>48</sup> Ëhi'amu Iesuro ë rueruomade aribövioho uëvadeje: Aveho na bogo va-jiohu'e anano'e aehu jevajëjo. Jemë rabëni siravahe kepataho ujuohoromo guduamevo'i rovarujëjo.

<sup>49</sup> Mami'e majae aho'o naehu God-are amo börömore hiromo God-are jö hesi öri a röjëhinövodoho jemë evaroho bogo guduamevariye hõjo. Rõhu jemëhu vaejaruje muoho ë hesi jö God-are surire jajivarëhi muoho ëhi jioröhego ëhuni ave muoho rovë'e hõjo.

<sup>50</sup> Ëhi uëvamu hesi ijoraje aho'obëhe hu nugo'i huruomoromo va'areje.

<sup>51</sup> Va'amu a i'e gemuëro niöge hane gemu ruohë'e Iesuare ijore va'adeje. Iesuare ijore va'amu aëro guduamo'ia'amu

<sup>52</sup> niögoho jaho bulönugoromo dë'ahobatëremu ju'ebiro mo va'adeje.

*Iesu Jew rajo a masijo jabesi nunire namijade jöhoje.*

<sup>53</sup> Ëhi'amu Iesu hu'lirae rueromo priest börömo hesi osare rovareje. Ëösare priest masijoho a duvaho ömo'ömo ho jögoru öri röjëhijarue aribövioho ë aribövioho aho'obëhe jaburo ë gemuoro gagovareje.

<sup>54</sup> Iesu priest börömo hesi osare barovamu Peter-ro arue riribövire Iesu rihiomoromo priest börömo hesi osare rovadeje. Rueromo osare rumo va'oromo abo osa ririre ruë numë javue vae'i riroho ma-va'oraho nugarire ë va'oromo priest hesi mu vaeruomaje ariböviohu'o gemuore hiromo vënoho jurovadeje.

<sup>55</sup> Ĕhi'amu priest masijohu'o a masijo ioro'iorohu'o ae nahareje jaburo huruoho majĕhiromo uĕrĕhego: Iesuro ĕhi jiĕ'e mu sisĕho vaejamu gavare hĕjego heromo Iesu anego guomorĕhego. Nahareje rĕhu jĕ sisĕho bogo birohareje.

<sup>56</sup> Ae aho'o sarerĕmiromo Iesure jĕ sisĕho majĕhiromo ae gĕĕro gĕĕro jĕe gĕ gĕ majĕhijareje.

<sup>57</sup> Ae gĕĕro gĕĕro jĕe gĕ gĕ majĕhijuvo a ioro'iorĕro ri'ĕromo sarerĕmiromo Iesure jĕ sisĕho huruoho majĕhiromo uĕvareje:

<sup>58</sup> Ĕahuro ĕhi uvavohijajo: Ave God-are javu bĕrĕmoho naro dadovo'ejĕjo. Dadovoromo majae niĕ'i gemu hesi uhure javu i'oho vae'ejĕjo. Urimore javuoho aĕro ĕvĕro vaejare hĕjo. A'i ijore javuoho ĕho bogo ĕvehu vaejĕ'oho jio'a'ajĕjo. Ĕhi uvade hĕjo.

<sup>59</sup> Jĕho ĕhi majĕhijareje rĕhu jabu'o jĕe bogo gemuoho majĕhi'i ae gĕĕro gĕĕro jĕe gĕ gĕ majĕhijareje.

<sup>60</sup> Jĕe gĕ gĕ majĕhijamu hegorovo priest bĕrĕmohuro ri'ĕromo ae aho'obĕhe jabesi nuninĕ va'o namiromo Iesu uavadeje: Na ja jĕ mana uĕ'iranoho bogojavajĕjo. Aehu jasi jĕ sisĕ majahuijaruoho na ĕho mae o sarere hĕjo.

<sup>61</sup> Mae o sarere hĕjamu Iesuro jĕho bogo mana ua'i ma-jĕrume namijadeje. Jĕrume namijamu priest bĕrĕmohuro rĕhu maho jĕe gĕ bu'ĕromo bijioho garomo uavadeje: Bĕrĕme namiromo ajamuijanue aho na ja javajĕjo. Na ja noehu rajahijarue A hesi Harihoho javajĕjo.

<sup>62</sup> Javajĕjamu uavadeje: Iae na ĕ aho jevajĕjo. Rĕhu u'emu jemĕro ge'a'arujĕjo God-are A Maho naro darugo eni jiĕ'e A hesi ĕvo manĕ hi'iramu. Ő'idĕre jio'amaje suehu'o gemu mae ruvebi'iramu.

<sup>63</sup> Ĕhi uavamu hegorovo rue priest bĕrĕmohuro hesi niĕgoho dadovoromo uĕvadeje: Iae eni jiĕ'e hĕjo. A gĕho rabĕni rueromo hesi jĕho huruoho majahuijĕrajo. Iae no eni hejĕ'e javuajĕjo.

<sup>64</sup> God-are iho ijumajoho jemĕ'o iae hejarujĕjo. Ĕhuni jemĕ diehi uehorovarujĕjo. Diehi uehorovarujĕjamu uavareje: Jĕ sareri'e aego ano'iramu guomo'a'ajĕjo.

<sup>65</sup> Ĕhi uanugoromo a ioro'iorĕro ri'ĕromo Iesu sabĕro ĕdivoromo nunoho tugohoromo ĕvo mugĕ mugĕĕro anareje. Anoromo sivoromo uavareje: Na jĕ God-aro baeromo majĕhijaje ae jevajĕ uĕvuanue javaje ĕhuni anagare aribĕvi jabesi ihoho huruoho majahuijĕgo hejarĕjo. Ĕhi uavamu Iesu atovarue aribĕviohuro Iesu baeromo sisĕ maro ano'i arijareje.

*Peter-hu Iesu gavaje jĕ a subivĕhade jĕhoje.*

<sup>66</sup> Ĕhi'amu Peter-ro anume aehu raromaruire ĕ hijadeje. Hijamu priest bĕrĕmo mu ajamijarue magonahoho rĕhu gemuĕro rovadeje.

<sup>67</sup> Rueromo gavade Peter hiromo vĕne jurovamu gagorovo ĕrimahoromo uavadeje: Ja'o Nazareth amo rajo ae Iesu'o gemu mae javade hĕjo.

<sup>68</sup> Javade hĕjamu Peter-ro magonahoho sareramiro mo uavadeje: Jaehu jĕvanue jĕ hesi bĕhoho na bogo garomo bogo hejajĕjo. Ĕhi uanugoromo ojonĕ va'o namijadeje. [Namijamu kĕkĕrĕke uvadeje.]

<sup>69</sup> Amo Peter-ro ĕhi namijamu gagorovo priest bĕrĕmo mu ajamijaje magonahohuro Peter garomo hesi bĕhire riravarue aribĕvioho uĕvadeje: Ĕaho Iesure aribĕvi jabesi ae gemuoho hĕjo.

<sup>70</sup> Iesure aribĕvi jabesi ae gemuoho hĕjamu Peter-ro rĕhu maho sareramiro mo uavadeje: Na bogajo.

Ëhi uavadoho ririvanovamu bëhire riravaroho jaburo Peter uavareje: Iae mae-ëjo. Iesuare aribövi jabesi ae gemuoho javajëjo. Ja'o hu'o Galilee sa'a raje jëvë'ego ëhuni uavaruëjo.

<sup>71</sup> Uavaruëjamu Peter-ro uëvadeje: Na jemë sarerëmijë'o ho i'ue baejööni ëhuni na jö mae uëvajëjo. Jemëhu uevaruje aho na bogo gavaje höjo.

<sup>72</sup> Bogo gavaje höjamu gavë'i kököröko urimo vae gemu uvadoho röhu maho uvadeje. Uvamu hegoro Peter-ro uehorovoromo uvadeje: O mami'e Iesuro uevade höjo: Kökörökoho bogo urimoho vae niö'i uvë'e jero urimo vae niö'i gemu ae uë'a'anuëjo: Na Iesu bogo gavaje höjo. Ëhi uehorovoromo sisë maro nivadeje.

## 15

### *Iesu Pilate-are nunire namijade jöhoje.*

<sup>1</sup> Iae sisonuvo'ia'amu gagorovo priest masijohuro a duvaho ömo'ömohuro Jew rajo jögoru öri röjëhijarue ariböviohuro jö mevarue a masijo ioro'iorohuro ëho jaburo gemuore gagovoromo jöe mevoromo uvoruomadeje: No Iesuare örire ëhi ëhi ë'ejarejo. Ëhi mevoromo eni jiamu gagorovo Iesu tövoromo bava'oromo Pilate-are övore bamareje.

<sup>2</sup> Bamamu Pilate-ro Iesu uavadeje: Na ja Jew rajo jabesi a börömoho javajëjo. Javajëjamu Iesuro uavadeje: Ëjöho jero jasi jövanuëjo.

<sup>3</sup> Ëhi uavamu priest masijohuro Pilate sareramiro mo Iesuare jö sisëho aho'obëhe huruoho majahijareje.

<sup>4</sup> Majahijamu Pilate-ro Iesu röhu maho jöe ua garomo uavadeje: Jasi jö sisë aho'obëhe majehijaruoho ja hejanuëjo. Na ja jö mana majëhi'iranoho bogojavajëjo.

<sup>5</sup> Bogojavajëjamu Iesu jöho bogo mana majëhamu Pilate-ro uvadeje: Diehi'oromo jöho bogo jövajëromo tiöjadeje.

### *Iesu anego guomojoro Pilate-hu uëvade jöhoje.*

<sup>6</sup> Röhu God-hu Vörö Tugohade Sörö maja rovë'iroho savoji gagore raromarue aribövioho di aho jiovo nugö'öjoro aehu uvoruomë'o ho Pilate-ro ë aho jiovo nugö'onövadeje.

<sup>7</sup> Röhu ae gemu hesi ihe Barabbas savoji gagore hijadeje. Urimë'i sa'are a masijohu'o muorovare majaho jiamu ae aho'o sa'are a masijohu'o muorovoromo ae muo'amareje. Ae muo'amë'ëro savoji gagore raromareje. Röhu ae gemu Barabbas jiadeje.

<sup>8</sup> Barabbas savoji gagore hijamu amonö gagovoromo riravare aribövioho ae aho'obëhe jaburo rueromo Pilate uavareje: Savoji gagore raromaruoho noehu uavego jiovo nugö'öjahuanuëhi ëhi ë'onëjo.

<sup>9-10</sup> Ëhi ë'onëjamu Pilate-ro gëromo uvadeje: Iesuare ihoho bövie jië'ego priest masijohuro dë vörönëgamu nasi övore bojemijare hö uvoromo uëvadeje: Na jemë nëgajëjo naro Jew rajo jemesi a börömoho jiovo nugö'öjoro.

<sup>11</sup> Ëhi uëvamu priest masijohuro ae aho'obëhe biririvoromo dinëmijamu hegorovo jaburo uvoruomadeje: Iesu vuonugo'i Barabbas jiovo nugö'öjëjo.

<sup>12</sup> Ëhi uvoruomamu hegorovo Pilate-ro uëvadeje: Ëhi jië'o ho jemëhu uvarujoho: Jew rajo nosi a böröme hö uvaruje ë aho na diehi'o'ejëjo.

<sup>13</sup> Diehi'o'ejëjamu uvoruomadeje: Korosioro anego guomajo.

<sup>14</sup> Guomajamu Pilate-ro uëvadeje: Rabëniajo. Diehi jië'e mu sisë vaejë'e höjo. Vaejë'e höjamu ma-darugo ma'e uvo'i arijareje: Korosioro anego guomajo.

<sup>15</sup> Guomajamu hegorovo Pilate-ro ë aribövioho aho'obëhe sanuëmi'i nimamu Barabbas jiovo nugö'öjadeje. Barabbas jiovo nugö'ö'i Iesu hisuebijöro uënuqoromo uëvadeje: Ave aho bava'oromo korosioro anohego guomajo.

*Muorovo ariböviehu Iesu sivare jöhoje.*

<sup>16</sup> Ëhi uëvamu rue muorovo ariböviohuro Iesu hu'irae bava'oromo gavanare osa börömore va'areje. Osa börömo hesi ihoho praetorium uvonövareje. Va'oromo jabesi muorovo ariböviohuni jöe nugö'öromomo uëvareje: Jemë aho'o avehuro ro gagovohëjamugo ro gagovareje.

<sup>17</sup> Gagovoromo Iesu sivo'irögoromo sa'are a masijehu kavuë'e niögu ëgo io'amoromo mu vaejarue ëhi jië'e niögohomo Iesu ba'amahareje. Ba'amahoromo a masijehu bosö didi'arue ëhi jië'e bosöho Iesuare simanore didi'ahareje. Röhu bogo inömo maho baeromo bosöho avohaho'i bibë'e ijo hisuohomo ujuohoromo huoromo simanore ba'amahareje.

<sup>18</sup> Ëhi'onugoromo sivoromo jejamiromomo uavareje: Jew rajo jabesi börömo ho vaevë'e hijanuëjo.

<sup>19</sup> Vaevë'e hijanuëromomo ijahëromomo simanore anoromo sabëromomo ödivoromo ëma sarere ague aho raromoromo rajahijareje.

<sup>20</sup> Ëhi sivoruomoromo niögu ëgohomo jijövahohi hesi niögu maho io'amahoromo osare jioromo hu'irae bava'areje korosire ano taemohi.

*Iesu korosire ano taemare jöhoje.*

<sup>21</sup> Bava'oromo örire va'ihö gavareje ae gemu hesi ihe Simon muro jië'ëromomo rovamu. Röhu Simon hu Cyrene sa'a rajo ae jiadeje. Hu Alexander'o Rufus'o jabesi vavue jiadeje. Amo Simon-ro örire rovamu gagorovo muorovo ariböviohuro hu garomo övëromomo bijimö'öromomo uavareje: Ave a hesi korosioho baeromo va'ëjo.

<sup>22</sup> Baeromo va'ëjamu ejëhoromo baeromo jabumë aho'o va'arohomo ajiomoromo sa'a ihe Golgotha nosi huëhu huotovë'ohomo simano gijo va'ëne sa'are ë ajio suorovareje.

<sup>23</sup> Suorovonugoromo wine jovohu'o myrrh osohu'o buaroharohomo Iesu bojamareje hesi vi'ehohomo bisemu u'uhoröhego. Bojamamu juahëmadeje.

<sup>24</sup> Juahëmamomo korosire ano taemareje. Ano taemoromo hesi niögohomo adovoromo ajajovareje ga'i di aho di niögohomo bae hesi jiego. Ajajovonugoromo niögohomo ujuohareje.

<sup>25</sup> Röhu Iesu korosire ano taemare majahomo 9 o'clock sisonu'e jiadeje.

<sup>26</sup> O Iesuare jö sisëhomo jajivoromo ëhi uvë'e jiareje: Ave aho Jew rajo jabesi a börömo ho höjo.

<sup>27</sup> Röhu aëromomo anano'e vajiohu'e ae niöhomo jabu'ohomo korosire ano taemëvoromomo göhomo ruëhi Iesuare övomomo manö göhomo viëhi övomomo adonö ëhi amëvareje.

<sup>28</sup> [Amëvamomo Iesu ë a sisë niöhomo jabesi ririre korosire iromadeje. A sisë jabesi ririre iromadohuro ëhuro ëhi ë'iröhego God-are surire jö aehu jajivadëhi iae ëhi jiadeje. God-are surire jöho jajivoromomo uvë'eje: Aëromomo uvoruomë'e höjo: Hu jö ahoruomaje ariböviohu'ohomo gemuore höjo.]

<sup>29</sup> Ëhi'amomomo aëromomo rova'ëhi uvene hijiohijiovoromomo sivoromomo uvoruomonövadeje: Asë'e sareri ae javajëjo. Jero uvane höjo: Naro God-are osa börömo ho dadovoromomo majae niöhomo gemu hesi uhure röhu maho vae barë'ëjjo.

<sup>30</sup> Ĕhi uvē'e javaje Ĕhuni jasi sinoho ajamirovoromo korosire javajoho ruvebijējo. Sivoromo Ĕhi uvoruomadeje.

<sup>31</sup> Jabuhu sivarēhi priest masijohu'o jōgoru ōri rōjēhijarue aribōviohu'o Ĕhi sivoromo uarovareje: Ĕahuro uōvuade hōjo: Naro a ioro'ioroho ajēmego marējēvaje hōjo. Ĕhi uōvuade hōjo rōhu hesi sino ajamirov'oho hu bogo eni hōjo.

<sup>32</sup> Huro uōvuade hōjo: Bōrōme namiromo jemē ajēmaje aho na jevajējo. Israel rajo jemesi bōrōmoho na jevajējo. Ĕhuni nadi'ego hu korosire jioromo ruvebijego no garomo hu mae uehorovarējo. Ĕhi uarovamu ē ae niō'i hesi bēhire korosi'o amēvare aho jabu'o Iesu sivareje.

### *Iesu guomade jōhoje.*

<sup>33</sup> Ĕhi'amu maja ririre ōri ari'e aho'o ramoramovadeje. Ramoramovobe va'ojuvo majae huotorovamu gavē'i ajivadeje.

<sup>34</sup> Majae huotorovoromo ajivamu gavē'i Iesuro Jew rajo jabesi jōero ma-darugo'o uvadeje: Eloiajo. Eloiajo. Lema sabaktaniajo. Nosi jōehu huotovē'oho God nasi Bōviohajo. God nasi Bōviohajo. Ja rabēni remo va'ane hōjo.

<sup>35</sup> Remo va'ane hōjamu bēhire riravare a ioro'iorohuro hejare uvavamu: Eloia uvamu heromo uarovareje: Ĕho hehējo. Elijah-ni uvajējo.

<sup>36</sup> Ĕhi uarovoromo ae gemuēro tutuvo va'oromo u'uhē'e inōmoho barueromo nioga'i'e wine jovore ba'amoromo rumorovamu ioromo ijaho viture bijiohoromo Iesu bojami'iē'adeje. Bojami'iē'oromo aribōviohu uēvadeje: Nadi'ego no gavarējo Elijah-ro God-arire jioromo ro Iesu juvo baruvebijego o bogo.

<sup>37</sup> Ĕhi uēvamu Iesuro jō'e dadovoromo guomadeje.

<sup>38</sup> Guomamu gavē'i God-are osa bōrōmo ojo gōho gagonō jiajoho niōgehu tugoharoho arorovo ruvebijadeje.

<sup>39</sup> Ĕhi'amu muorovo simano vaejaje ahuro Iesure nuninō namiromo gavade Iesu Ĕhi'oromo guomamu gagorovo uvadeje: Iae mae-ējo. Ave aho God-are Harihe jiade hōjo.

<sup>40</sup> Ĕhi'amu magonaho ōmo'ōmohuro arue riribōvire riravoromo Iesu diehi'aruoho garuomadeje. Mary Magdalene o Mary gōho James a i'o o Joses jabesi vēmoho o Salome o magonaho ioro'ioroho Ĕhi jioruomadeje.

<sup>41</sup> Urimē'i Iesu Galilee sa'are hijadevare evare ē magonaho ōmo'ōmohuro bōvie bise'e ajamibe hesi ijore ijore jijihonōvareje. Ĕhi ē'l'ēro ē magonahohu'o magonaho ioro'iorohu'o aho'obēhe Jerusalem amore hu'o gemu mae rovē'ero ē riravoromo garuomadeje.

### *Iesure sino munē gagore bamare jōhoje.*

<sup>42</sup> Rōhu ē majaho bōvi bise'o avoho'amarue majae jiadeje nērōho nuhoromo God rajahi'irōhēro. Ĕmajaho garobo'e bamadeje.

<sup>43</sup> Nuho majae rue'ia'amu majae garobo'e bamamu gagorovo Arimathea amo raje ae gemu hesi ihe Joseph-ro va'adeje. Hu Jew rajo jabesi a duvahēro jiē'ero Jew rajo a masijo ioro'iorohu'o hiromo jōe mevonōvadeje. Jōe mevo'ego ae aho'obēhe hesi ōrire mae uehorovonōvareje. Rōhu ae gōehu gōehu ē'aruēhi hu'o Ĕhi muebejē'e hijadeje God-ro ro bōrōme namiromo aho'obēhe muebejēvorōhego. Joseph Ĕhi jiē'e ae jiadeje. Ĕhi jiē'e aēro jiē'ero huro biririvoromo va'oromo Pilate uavadeje: Uevego na Iesure sinoho bae'irōjo.

<sup>44</sup> Iesuare sinoho bae'iröjambu Pilate-ro tiöromo uvadeje: Iesu diehi'oromo ma-burëroho guomade höjo. Ëhi uvoromo jöe nugö'öjambu Iesu muebejade muorovo ahuro rovadeje. Rovamu Pilate-ro uavadeje: Na Iesu mami'e guomë'e höjo.

<sup>45</sup> Guomë'e höjambu ruehuro uavadeje: Iae guomë'e höjambu hegorovo Joseph uavadeje: Jaehu Iesuare sino baejè'oho iae mae höjo.

<sup>46</sup> Iae mae höjambu Joseph-ro va'oromo niögu mabëhe imoromo guomë'e sinoho baruvebiromomo niögohuro numadeje. Niögohuro numoromo munë ubuvarire ë bamadeje. Bamoromo munë höhö barueromo ojoho tugohadeje.

<sup>47</sup> Ëhi'amu Mary Magdalene'o Joses-are vëmoho Mary'o jaburo niö'iro ariromomo gavareje Iesu ë dirö'ore bamamu.

## 16

### *Iesuhu ri'öj jade jöhoje.*

<sup>1</sup> Iae Jew rajo jabesi nuho majaho barëjadeje. Jew rajo jabesi nuho majaho barëjambu Mary Magdalene o Mary göho James-are vëmoho o Salome ëho jaburo va'oromo ridi'e osoho imareje va'oromo Iesuare sinore otehoröhëro.

<sup>2</sup> Imë'ëro hura börömore sue'o majae rojomamu gagorovo ri'öromomo Iesuare sino bamarire va'areje.

<sup>3</sup> Va'ë'i uarovareje: Raro ojo tugohare munëho rori'o höhö baejahuo va'a'ajëjo.

<sup>4</sup> Ëhi uarovoromo avoho ga'i gavareje mami'e rori'o bava'ë'e jiamu. Röhu ë munëho böröme jiadeje.

<sup>5</sup> Bava'ë'e jiamu gagoro va'o munë gagore rumo va'oromo gavareje rue jabesi övo manö a i'e ajivë'e niögu ba'amë'oho ë hijamu. Hijamu gagorovo jiodudu'iraejareje.

<sup>6</sup> Jiodudu'iraejambu gagorovo ruehuro uëvadeje: Nadi jiodudu'irahëjo. Nazareth rajo ae Iesu korosire anamu guomade a hesi sinoho jemë naruhjëjo. Hu aveho bogohöjo. Guomoromo ri'öjè'e höjo. Hesi sino bamare sionoho gahëjo.

<sup>7</sup> Garomo va'oromo Peter'o Iesuare ijorajo ioro'iorohu'o uërëjo: Iesuro urimo Galilee va'iramu mami'e uëvadire jemë ë ijore va'oromo ga'a'arujë uërëjo.

<sup>8</sup> Ëhi uëvamu ë magonaho ömo'ömhuro jiodudu'iraeromo butubutumoromo munë gagore jioromo suorovoromo huruomoromo va'areje. Va'oromo juhuonivo'i ë jöho aho bogo majëhijareje.

### *Iesuhu Mary Magdalene-are nunire rovade jöhoje.*

<sup>9</sup> [Iae hura börömore sisonuvo'ia'amu Iesu guomadoho ri'öjadeje. Ri'öromomo aevo'ioho Mary Magdalene-are nunire rovadeje. Röhu urimo bogo guomade majare Iesuro ë magonaho hesi dëre jio'amaje aru'aho sisë 7 rarovo'amadeje.

<sup>10</sup> Ëmagonaho hesi nunire rovamu gagorovo ë magonahohuro va'oromo gavade Iesuare aribövioho huë vavaene baeromo nivoruomamu gëgorovo uëvadeje: Iesu ri'öjè'ëro hijamu gavode höjo.

<sup>11</sup> Hijamu gavode höjambu heromo bogo ma uehorovareje.

### *Iesuhu hesi ijoraje niö'i jabesi nunire rovade jöhoje.*

<sup>12</sup> Bogo ma uehorovamu Iesuro Mary Magdalene-are nunire rovamu ijönö ae niö'iro amore jioromo va'i gavareje Iesu nu ano'e gorosovë'e rovamu.

<sup>13</sup> Rovamu gagorovo jaburo niö'iro vuonorö'ö rueromo Iesuare aribövi ioro'ioroho Iesu gavare jöho majëhijamu bogo ma uehorovareje.

*Iesuhu hesi ijoraje 11 jabesi nunire rovade jöhoje.*

<sup>14</sup> Bogo ma uehorovoromo Iesuare ijoraje 11-ho jaburo ie ue'ahamu evare ijo tugoho'i Iesu jabesi nuniroho rovadeje. Rueromo uehorovoromo uvadeje: Ave nasi ariböviohuro hejare ae göëro göëro uëvamu: Nörö ri'öjë'e jiamu noro gavare hö uëvamu heromo bogo ma uehorovare hö uvoromo birëgadeje. Birëgoromo uëvadeje: Jemë rabu hia'i birire ë'oromo naehu ri'öjode jöho bogo ma uehorovarije höjo.

<sup>15</sup> Èhi birëgonugoromo uëvadeje: Sa'ae dinö'e dinö'e va'oromo nasi jö maho ae aho'obëhe majëhi barërëjo.

<sup>16</sup> Ae rahu mae uehorovoromo bapataeto vaejë'o'ho God-ro baejëvoromo manö bamëvo'ajëjo. Ae rahu bogo ma uehorovë'o'ho God-ro uë'a'ajëjo: Jemë sisë jëvaje öri sisënö va'ohëjo.

<sup>17</sup> O ae rahu mae uehorovë'o'ho aviëhi jië'e bogo gavarue mu masijoho vaeruomo'ajëjo aëro ëho garomo uvoruomoröhego: Iae mae-ëjo. Jemë jö mae atarujëjo. Nasi ihoho uvoromo Satan-are sisë aribövi a dëre jëvajoho rarovö'öruomo'ajëjo. Bogo hejarue jöëro atoruomo'ajëjo.

<sup>18</sup> Vörö'e sigobu banigojio'ho o oso sisë'e jovo ue'ahë'o'ho bogo sisërëjëvo'ajëjo. O guomo guomo'e aribövi jabesi sinore övo bamëhë'o'ho marëjëvo'ajëjo.

*God-hu Iesu ajamamu ö'idöre ajiomade jöhoje.*

<sup>19</sup> Bada Iesuro èhi jië'e jöho majëhiromo God-ro hu ajamamu huro ö'idöre ajiomoromo God-are övo manö hijadeje.

<sup>20</sup> God-are övo manö hijamu hesi ariböviohuro va'oromo jöho majëhibe dinö'e dinö'e jijihonövareje. Majëhibe jijiholego Badaro jabu'o bimu-voromo muoho ajëmi'ego bogo gavarue darugo'e muoho vaenövareje aëro ëho garomo jabesi jöho mae uehorovo'iröhego. Èhi'areje. Ahia mino'e.]

## LUKE

*Luke-hu jajivade jö hesi bëhohoje.*

<sup>1-2</sup> O asë'e Theophilus naro ave jöho jasi örire jajivo'ië'e gane. Mu böröme nosirire rovë'eje. Ëmu aevadire aëro nunëro gabe rovë'ëro ë jöho ae majahuinövareje. Majahuijamu ae aho'obëhe heromo ë jö gö göho gemuoro gagovoromo jajivo gavareje.

<sup>3</sup> Ëhuni ë muoho aho'o diehi diehi vaejaroho he avoho'i uë gëbe rovë'ëro naro jani avoho ahorirëro jajivo'amo'i uehorovodeje

<sup>4</sup> ëhuro jero adahoromo mami'e hejane jöho mae uehorovo'iranego.

*Bapataeto vaejaje ae John rahoröhego aneraehu majahijade jöhoje.*

<sup>5</sup> Iae Herod-hu Judea sa'a muebejadevare priest gemu ë hijadeje. Priest hesi ihoho Zechariah jiadeje. Abijah-are ujore priest ömo'ömoho Zechariah hu'o ae gemuoho jiadeje. Hesi vaboro hesi ihoho Elizabeth jiadeje. Elizabeth hu aevo'i jiade priest Aaron-are uje jiadeje.

<sup>6</sup> Vaboro'o baru'o jaburo niö'iro Badahu bojëmade jögoroho bövioho bise'oho aho'o avoho ejahoromo hesi nunire ma-mabëhe arijareje.

<sup>7</sup> Jabumë aboji harihu'o rumo'e jëvadeje Elizabeth dë tjojë'e magonahëro jië'ëro. Röhu mami'e mavojiraejëvë'e jiadeje. Jabumë ëhi jië'e a magonaho'e jëvadeje.

<sup>8</sup> Ëhi jëvë'ëro Zechariah'o hu'o gemu mae priest mu vaejarue ariböviohu'o jabesi mu majaho rovamu evare Zechariah-ro priest muoho God-are nunire vaejadeje.

<sup>9</sup> Muoho vaejamu Jew rajo priest-ehu vaejaruëhi jabumëro priest ihoho jajivo'amoromo gemuore buarohoromo gemu iareje ga'i di ahuro di muoho bae hesi jïego. Ihoho ioromo gavareje Badare osa börömore rumo va'oromo ridi'e oso God-ni vënehu bueröhe muoho Zechariah-ro baejë'e jïamu. Zechariah-ro ë muoho baenugoromo ose bue'i Badare osa börömore va'irögoro

<sup>10</sup> a ioro'iorohuro aho'o amonö raromoromo God-are örire jöe atoruo-madeje.

<sup>11</sup> God-are örire jöe atamu gavë'i Zechariah-ro osa börömore muoho vae'i gavadeje Badare anerae gemu nume oso buejarue maratu övo manö ro namijamu.

<sup>12</sup> Aneraho ro namijamu gagorovo jiodudu'iraeromo juhuonivadeje.

<sup>13</sup> Juhuonivamu gagorovo anerahuro uavadeje: Zechariah nadi juhuonivëjo. Jaehu God ëninamijanoho hu iae ejahë'e höjo. Ejahë'ëro huro jasi vabore Elizabeth ajami'iramu huro jani harihoho raho'a'ajëjo. Rahë'iroho hesi ihoho John jumuvonëjo.

<sup>14</sup> Jero sisë maro nimoroho'iramu ae aho'obëhe jabu'o uvo'a'aruëjo: Mabëhe rahade hö uvoromo nimoroho'aruëjo.

<sup>15</sup> Hu Badare nunire a böröme jio'a'ajëjo. Wine jove vörö'e jove gö gö bogo i'a'ajëjo. Hu hesi vëmu hesi dëre jio'iröhire aevoromo God-are Aru'ohohuro hesi dë vövöbajo'ere simanore raro'ajëjo.

<sup>16</sup> Rarovo'iramu Israel raje ae aho'obëhe jabesi dë vövöbajo'oho huotovëho'iramu jabumëro Bada jabesi God-are örire avoho uehorovoruomo'ajëjo.



17 Huro Elijah-are öre daruge gemuoho baeromo ehuro Badare jöho baeromo urimo va'a'ajëjo. Va'oromo aribövi jabesi dë vövöbajo'oho huotovëho'iramu vavu ömo'ömohuro aboji harihu'oho huë baejëvo'aruëjo. Jö bijönimarue ariböviohuro mu mae vaejarue aribövi jabesi jö maho ejëhoruomo'ajëjo. Ehi ajëmi'iramu evare aribövioho avoho raromoruomo'ajëjo Bada maro rueröhego.

18 Anerahuro ehi majahijamu hegorovo Zechariah-ro uavadeje: Nasi vaboroho raho'a'ajë uevanuoho röhu na mavoje jevoromo nasi vaborohu'o mavoje höjo. Ehi jië'oho na diehi'oromo uvo'ejöjo: Ja jö mae uevanuëjo.

19 Uevanuëjamu anerahuro uavadeje: Na Gabriel jevajëjo. Na God-are nuninö namijaje höjo. Huro na remö'öjade höjo naro ja'o jöe jövoromo jaehu hejanue jö mabëhoho majahi'irodego.

20 Ehuni hejëjo. Jaehu nasi jö bogo ma uehorovanuohuni ehuni ja jö jövanuoho bitaroho tövavo'iramu jörume hibe va'ojuvo naehu uavodëhi ehi jio'iramu evare jöho jövo'anuëjo. Amo ë jöho bogo sareroho jio'i hesi majaho rue'iramu iae jio'a'ajëjo.

21 Ehi'amu ae aho'obëhe Zechariah mueberomo uvoruomadeje: Hu rabe ë'oromo osa börömorehi hiromo örisanuovajëjo.

22 Örisanuovajëjamu Zechariah-ro amonö hörö rueromo jöho bogo majëhi varijënoho jiadeje. Jöho bogo majëhi varijënoho jiamu gagorovo rue ariböviohuro garomo uvoruomadeje: Hu God-are osa börömore hijadevare God-ro röjahamu nia'ovo'iraeromo mu böröme gavë'ëro ehü'ëro jöho bogo majahui varijënoho höjo. Röhu hu tövë'ëro jië'ëro jöho bogo majëhi'i mäövëremu majëhijadeje.

23 Ehi ë'ë'ëro God-are osare mu majaho barëjamu Zechariah-ro hesi amëro vuonorö'ö va'adeje.

24-25 Va'amu hesi vabore Elizabeth-ro dë'iraeromo uvadeje: Dë tioromo hiromo ae aho'obëhe jabesi nunire javoji baebe rovodoho aviavejö'e Badaro huë baejevoromo ajemamu javojoho barëjevë'e höjo. Ehi uvoromo osaremu hijamu manaere övo gö mine barëjadeje.

### *Iesu rahoröhe jöhoje.*

26 Elizabeth dë'iraeromo manaere 5 barëromo röhu manaere 6-ho jiamu gavë'i God-ro anerae Gabriel nugö'öjamu Galilee sa'are Nazareth amore rovadeje

27 aboride gemu jöe majahi'iröhëni. Eaborido hesi ihoho Mary jiadeje. Hu o a juvije gemu jabu niö'ihu masurovo'iröhe jöho ae aho'obëhe jabesi nunire majëhijareje. A juvijo hesi ihoho Joseph jiadeje. Joseph hu Israel sa'are börömo vaenövade ae David-are uje jiadeje.

28 Amo anerahuro rueromo Mary uavadeje: Vaevë'e javajëjo. God-hu huë baejavaje magonahe javajëjo. Badaro ja'o juvaje höjo.

29 Ja'o juvaje höjamu hegorovo Mary-ro sisë maro nurunurumoromo uehorovoromo uvadeje: Bëhoho rabëni ehi jië'e huë baejë'e jöho majehiromo jejemijajëjo.

30 Ehi uvamu anerahuro uavadeje: Mary God-ro jasi örire huë baejavë'e jiaje nadi juhuonivo'i

31 aveho gavëjo. Jero dë'iraeromo harihe rahoromo Iesu jumuvo'anuëjo.

32 Hu böröme jio'a'ajëjo. Huro ave ihoho bae'a'ajëjo Dö Mare Hijaje A hesi Harihe ë ihoho bae'a'ajëjo. Bada God-ro ë aho ua'a'ajëjo: Jasi hije David-are sionoho baeromo böröme namiromo Israel rajoho muebejëvonëjo.

<sup>33</sup> Muebejëvonë ua'iramu huro Jacob-are ujo ömo'ömoho ma-ioro'ioremu muebejëvonövo'ajëjo. Bogo vuonugo'i ëhi muebejëvobe va'a'ajëjo.

<sup>34</sup> Muebejëvobe va'a'ajëjamu Mary-ro aneraho uavadeje: Iae jö mae-ëjo. Röhu aho bogo masegë'e na ëma hijajëjo. Ëhi jië'oho diehi'oromo na dë'iraejevo'ajëjo.

<sup>35</sup> Dë'iraejevo'ajëjamu anerahuro uavadeje: God-are Aru'ahohuro ru-ahö'öjavo'ajëjo. Dö mare hijaje A hesi darugohuro aegaho'ajëjo. Ëhuni raho'irane a ma hesi jöho God-ro uë'a'ajëjo: Hu nasi Harihe höjo.

<sup>36</sup> Röhu aveho gavëjo. Jasi agane Elizabeth mavoje höjo röhu hu'o harihe raho'irögoro ë'ajëjo. Ae aho'obëhe garomo uvoruomade höjo: Hu dë tjojë'e magonahe höjo. Röhu hu dë'iraejadoho manaere 5 barë'i aveho 6-ho höjo.

<sup>37</sup> Rahade hesi bëhoho mue bövie bise'e vae'iröhoho God hu eni jiajëjo.

<sup>38</sup> Eni jiajëjamu Mary-ro uavadeje: Iae mae höjo. Na Badare mu vaejaje magonahe jevajëjo. Ëhuni jaehu uevanue ëhi jië'e muehu nasi örire rovë'oho iae mae höjo. Ëhi uavamu anerahuro hu nugo'i va'adeje.

*Mary-hu Elizabeth ga'i ajiomade jöhoje.*

<sup>39</sup> Va'amu gagorovo Mary-ro ri'öromo dahorunörire Judea sa'are ë ma-burëro ajiomoromo amore höröjajedeje.

<sup>40</sup> Hörönugoromo Zechariah-are osare va'oromo Elizabeth jecamijadeje.

<sup>41</sup> Jecamijamu hejë'i Elizabeth-ro hejadeje hesi dëre aharihoho tiöjavamu. Tiö'ego God-are Aru'ahohuro hesi dë vövöbajo'ere sino haho'ere aho'obëhe rumorovavamu hegorovo

<sup>42</sup> Mary-ni ma-darugo'o uvadeje: Ja huë mae baejë'e javajëjo. Magonaho ioro'ioroho iosirëmijë'e javajëjo. Jaehu raho'iranoho huë mae jiajëjo.

<sup>43</sup> Aveho na diehi'oromo huë mae baejëvë'e höjo nasi Börömo hesi vëmehu nasi örire rovanoho.

<sup>44</sup> Ëhesi bëhoho jero jecamijamu hejë'i hejode höjo nasi dëre aharihohuro nimorohoromo tiöjavamu.

<sup>45</sup> Ja huë mae javajëjo Badahu uvadëhi ëhi jio'a'ajë uvanohuro.

*Mary-hu jö ioromo God rajahijade jöhoje.*

<sup>46</sup> Ëhi uavamu hegorovo Mary-ro uavadeje:

Naro nasi dë vövöbajo'o uhure Bada mabëhe uavajëjo.

<sup>47</sup> God na ajemaje aho uehorovoromo na nimorohevajëjo.

<sup>48</sup> Na hesi mu magonahe ma-bise'e jevajëjo röhu huro nasi örire uehorovevë'e höjo.

Aviavejë'e aevoromo ae aho'obëhe uvonövo'aruëjo: Nörö huë mae baejë'e höjo.

<sup>49</sup> Darugo ma'e Ahuro mu böröme vaejehë'e höjo.

Hesi ihoho gemu maemu höjo.

<sup>50</sup> Hu mae uehorovarue aribövi jabesi jöëni vavaenimaje höjo.

Jabesi a ujo ömo'ömohuni hesi vavaenoho ëhi jiemu jiobe va'a'ajëjo.

<sup>51</sup> Hesi darugo'e mu maho røjëhiromo

a masije javuajë uvarue aribövioho rarovö'öjëvamu huruomë'e höjo.

<sup>52</sup> Huro darugo'e a masijo jabesi ihoho sa'aro ba'obue'i

iho rumo'e aribövioho banigojiomëvë'e höjo.

<sup>53</sup> Vadunehu vuovë'e aribövioho iruno'o mahuro da'uojëhi'i

bövi bise'o marohë'e aribövioho rëmö'öjamu ma-övemu va'oruomë'e höjo.

<sup>54-55</sup> Huro hesi mu aribövie Israel raje no ajamuijë'e höjo.

Nosi hijo miono'o uëvadëhi huro ëhi Abraham'o hesi ujo ömo'ömohu'o nosi jöëni vavaenimemu vavaenimobe rovë'e höjo.

<sup>56</sup> Ëhi jövonugoromo Mary-ro Elizabeth'o hiromo manaere niö'i gemu barëjamu hesi amëro vuonorö'ö abuejadeje.

*Bapataeto vaejaje ae John rahade jöhoje.*

<sup>57</sup> Iae Elizabeth-are majaho rovamu harihoho rahadeje.

<sup>58</sup> Rahamu hesi amo rajohu'o aganohu'o hejare uëvavamu: Badaro huë baeromo Elizabeth mabëhe ajamijade hö uëvavamu hegorovo jabu'o nimorohoruomadeje.

<sup>59</sup> Nimorohoromo rahadoho hurae gemu barëjamu gagorovo rueruo-madeje garöhëni jabesi Jew rajo muoho vaeromo aharihu hesi sinoho tariojahego. Rueromo ihoho hesi vavu hesi ihe Zechariah ë ihe gemuoho jumuvo'ië'areje.

<sup>60</sup> Jumuvo'ia'amu gagorovo vëmohuro uëvadeje: Bogajo. Hesi ihoho John ua'ëjarëjo.

<sup>61</sup> John ua'ëjarëjamu uavareje: Iae mae höjo röhu jasi aganoho ëhi jië'e ihoho bogohöjo.

<sup>62</sup> Bogohö uanugoromo vavuoho övëremu ua gavareje: Harihu hesi ihoho rahuo jio'a'ajëjo.

<sup>63</sup> Rahuo jio'a'ajëjamu vavuohuro övëremu uëvadeje: Ijo ha'osoho barovego na jajivöjo. Ijo ha'osoho baro bojamamu jajivoromo uëvadeje: Hesi ihoho John höjo. Hesi ihoho John hö uëvamu gagorovo rue aribövioho gövögövövereje.

<sup>64</sup> Ëhi'amu evare Zechariah-are jö'oho bitaroho marëjamu God rajahijadeje.

<sup>65</sup> Rajahijamu gagorovo rue amo rajohuro ae aho'obëhe juhuonivoruo-madeje. Juhuonivoromo ë mu börömo hesi jöho aho'o Judea dahorunörire sa'a börömore ë vaerovemu vaerovoruo-madeje.

<sup>66</sup> Vaerovemu vaerovoromo ë jöho sisë maro uehorovoruo-madeje. Uehorovoromo gavare Badaro aharihoho mae ajamamu gagoro uvareje: Ëaharihoho hu diehi jië'e a mabëhe jio hesi höjo.

*Zechariah-hu jö God-aro baeromo majëhijade jöhoje.*

<sup>67</sup> Iae aharihu hesi vavue Zechariah-ro hejade God-are Aru'ahoho hesi dë vövöbajore sino haho'ere rumorovoromo uehore bojamamu hegorovo ave jöho majëhiromo uëvadeje:

<sup>68</sup> Bada God Israel rajo muebejavuaje aho hu mabëhe höjo.

Huro uehoro ma-mae baeromo hesi aribövioho ajamui'i rovë'e höjo.

Rueromo sisë'i raromaroho maro bamavuë'e höjo.

<sup>69</sup> Huro darugo'e aho God-are mu vaenövade ae David-are ujoho bojamuijë'e höjo no baejavuoromo maro ramuo'iröhego.

<sup>70</sup> Huro ëhi ë'iröhëro mami gö'e hesi jö baejare aribövi maho ëhi huruoho'ego jabumëro ë jöho ae majëhinövare höjo.

<sup>71</sup> Huro no'o muorovarue aribövioho ruahö'öjëvoromo no baejavuoromo maro ramuo'iröhëro

no nu huodaguarue aribövi jabesi övore javuego baeniëhiromo maro bamavuo'iröhëro ëhi uvade höjo.

<sup>72</sup> Huro muebejavuobe va'iröhe jöho uehorovoromo nosi hijo miono'oho huë baejëvo'i uvade höjo.

<sup>73</sup> Huro nosi hije Abraham darugo'e jöho majahiromo uavade höjo

74-75 ajamuiromomo no'lo muorovarue aribövi jabesi övore javuego baeniëhi'iröhëro.

Baeniëhijego noro bogo juhuonivo'i ma-ioro'ioeremo hesi nuniro raro-moromo

hu gemu uehorovoromo ae mae vaejëvoromo hesi muoho vaenövo'iröhëgo.

76 Röhu jue'iajo. Dö mare hijaje Aho God-ro ave jöho majahiromomo ua'a'ajëjo: Ja jö God nasiro baeromo a majëhijanue ae javajëjo.

Jero Badare jöho baeromo urimo va'a'anuejo huhu rueröhe öroho avoha-hego maro rueröhëgo.

77 Jero jöe majëhijego God-are ariböviohuro heromo uvoruomoröhëgo: God-ro nosi sisëho uehorovoromo vuonugoromo no baejavuoromo maro ramuajë hö uvoröhëgo.

78-79 Èhesi bëhoho God-ro noni vavaenimajohuro majaëro ö'idöre rojomanovoromo

ramoramore vuovo örire jijiharue aribövioho no ajivavuo'ajëjo.

Ajivavuoromo huë mae bae'iröhe öroho röjahui'a'ajëjo.

80 Zechariah-ro ëhi jövë'ëro John-ro böviraebe hesi aru'ahoho dë vövöbajo'oho biririvobe va'adeje. Biririvobe va'oromo a rumo'e sa'are va'lo hijadeje u'emü Israel rajo jabesi nunire muoho ma-va'orahoro vaeröhëni.

## 2

### *Iesu rahade jöhoje.*

1 Èhi'amu evare Rome a böröme sa'ae aho'obëhe muebejaje a ihe Caesar Augustus-ro jöe nugö'öjadeje. Jöe nugö'öromomo uëvadeje: Nasi aribövie sa'ae dinö'e dinö'e raromarujo jemëro va'oromo jemesi ihoho census aribövioho bojëmirego jajivëho'irarëjo.

2 Röhu evare majaho ëho iho aevoromo jajivo'amare majaho jiadeje. Evare majaroho Quirinius-ro bövie vaeromo Syria sa'aho muebenövadeje.

3 Amo ë jöho rovamu gagorovo ae gemu gemu amo göre göre va'lo raromaroho jabesi amo mare vuonorö'ö rueruomadeje jabesi ihoho uëvego jajivojöro.

4 Rueruomamu Joseph-ro hu'lo Galilee sa'are Nazareth amore hiromomo vuonugoromo hu David-are ujëro jië'ëro David-hu aevo'i hijade amore Bethlehem ë rovadeje.

5 Rue'i Mary hu'irae rovadeje jabesi ihohu'lo jajivëhojöro rabëni Mary huro masuröhe magonahego. Röhu hu dë'e jiadeje.

6 Bethlehem rueromomo arijamu magonahehu rahoröhe majaho rovadeje.

7 Majaho rovamu gavare aehu nuharue osaho rarovamu gagorovo mi nugo'amarue osare va'lo harihu murioho rahoromomo niögëro numoromomo mi jabesi i bahijarue röhore ë bamareje.

### *Aneraehu jö barovamu sheep muebejarue ariböviehu hejare jöhoje.*

8 Èhi'amu gavë'i iae dirö'e gemuore aëro vahi'e sheep mure raromomomo sheep-oho muebe'amareje.

9 Sheep-oho muebe'i gavare Badare anerahuro ro nami'ego Badare ajohuro ajivëvamu gagorovo sisë maro juhuonivareje.

10 Juhuonivamu gagorovo anerahuro uëvadeje: Nadi juhuonivohëjo. Naehu rovaje hesi bëhoho na jö mae baeromomo rovajëjo jemë'lo jemesi a ioro'iorohu'lo aho'obëhe heromomo börömo bëhe nimoroho'irarijego.

11 Aruëre David-hu hinövade amore jemë baejëvoromomo mare bamëvo'iröhe aho jaruvo rahë'e höjo. God-hu uavë'ëro böröme namiromomo ajëmi'iröhe aho höjo. Hu Bada höjo.

<sup>12</sup> Röhu jemëro va'oromo ga'irarije aharihoho niögëro numë'e mi jabesi i bahijarue röhore raromamu gavë'iroho uvorëjo: Nörö jö mae uövuade höjo.

<sup>13</sup> Jö mae uövuade hö uëvamu gavë'i anerae aho'obëhe ö'idöre jioromo ma-majioho ruvebiruomoromo urimore rovade anerahu'o gemu mae rira-voromo God rajahiromo uvoruomadeje:

<sup>14</sup> Dö mare hijaje aho God hu mabëhe höjo.

Sa'are raromarue aribövioho huhu huë baejëvajo maro raro-moruomo'ajëjo.

<sup>15</sup> Aneraho jaburo ëhi uvoruomoromo ö'idöre vuonorö'ö iojiomamu gagorovo nume sheep muebejarue ariböviohuro uarovareje: Rovego Beth-lehem va'oromo Badahu uövuade muoho gavarëjo.

<sup>16</sup> Ëhi uarvonugoromo ma-burëro rueromo nahoromo gavareje Mary'o Joseph'o ari'irögoro aharihoho miehu i ijarue röhore raromamu.

<sup>17</sup> Ëhi ganugoromo aharihu hesi jö aneraehu uëvamu hejaroho Mary'o Joseph'o majëhijareje.

<sup>18</sup> Majëhijamu hegorovo ae aho'obëhe tiöjëvadeje.

<sup>19</sup> Tiöjëvamu Mary-ro jöho avoho heromo hesi simanore bamoromo uehorovemu uehorovadeje.

<sup>20</sup> Ëhi'amu rue sheep muebejarue ariböviohuro aneraehu uëvadëhi ëhi jiamu gavë'ëro o jöho ëhi hejë'ëro God rajahibe mae uabe jabesirëro sionëro va'areje.

### *Iesu jumuvare jöhoje.*

<sup>21</sup> Iesu rahadoho hurae gemu barëjamugo Iesuare örire Jew rajo muoho vaeromo sinoho tariö'öjahoromo urimo Mary bogo ma'enorohë'e mahijadevare aneraehu iho uavadëhi ëhi Iesu jumuvareje.

### *Iesu osa börömore bava'oromo God-are örire bojamare jöhoje.*

<sup>22</sup> Mary-ro aharihoho rahoromo hijuvo gavade Moses-hu bojëmade mu vaeromo jabesi sisë u'oröhe majaho rovamu gagorovo huro Joseph-mu niö'iro aharihe Iesu baeromo Jerusalem amore ajiomareje aharihoho Bada bojami'iröhëni.

<sup>23</sup> Ëmu hesi jöho God-are surire jajivoromo uvë'eje: Harihu murioho aho'obëhe God-are öroro i'imamego hesiremu jio'amo'irajo. Amo Mary'o Joseph'o aharihoho bava'areje ëhi jië'e muoho vaeröhëni.

<sup>24</sup> O jö göho Badare surire jajivoromo ëhi uvë'eje: Ihitore niö'i o guaho harihe niö'i ëhi jië'e ugoho priest bojëmego God-ni vënëro muejëvo'irajo. Ëmuohu'o vae'iröhëni jabumë aharihoho bava'areje.

<sup>25</sup> Röhu ae gemu Jerusalem amore hijë'e jiadeje. Hesi ihoho Simeon jiadeje. Hu ae mae vaejëvoromo God-are muoho gemu uehorovaje aëro jië'ëro muebenövadeje God-ro Israel rajoho ajëmiromo jabesi huë vavaenoho tugohëhoröhego. Röhu God-are Aru'ahohuro hu'o juvonövadeje. Hu ëhi jië'e ae jiadeje.

<sup>26</sup> Simeon hu ëhi jië'e ae jiamu God-are Aru'ahohuro röjahiromo uavadeje: Ja bogo avevej'öho guomo'i Badahu uavë'ëro böröme namiromo ajëmi'iröhe aho rue'iramu ganugoromo evare guomo'a'anuëjo.

<sup>27</sup> Ëhi uavë'ëro ijonö God-are Aru'ahohuro uehore bojamamu Simeon-ro God-are osa börömore rovadeje. Rovamu evare Iesuare vëmu vavu'ohuro aharihoho God-are osa börömore barovareje Jew rajo jögoru jiaje ëhi jië'e muoho vae'iro.

<sup>28</sup> Barovamu gagorovo Simeon-ro aharihoho övëro huohudëromo God rajahiromo uavadeje:

29 Bada jaruvo jero jasi nimoromo uevego na muoho vuonugo'i huë mae ö'iröjo jaehu uevanëhi ëhi jië'e jiaje.

30 No maro bamavuo'iröhe aho nasi nunëro gavë'e jevajëjo.

31 Ëaehu vaeröhe muoho jero avohane höjo sa'ae aho'o garöhego.

32 Avohane hesi bëhoho huro ajoho barovego ëhuro jasi jö bogo hejë'e aribövioho jasi öroho ga'i jasi aribövie Israel rajo nosi ihoho döro jioröhego.

33 Simeon-ro ëhi jövamu hegorovo Iesuare vëmohu'o vavuohu'o tiöjövadeje.

34 Tiöjövamu God-ro jabumë huë mae bojëmi'iröhego Simeon-ro God uanugoromo Iesuare vëme Mary uavadeje: Aveho hejëjo. Ave aharihoho God-ro bamade höjo huro muoho vaejego ëhuro Israel rajo a ioro'ioroho sa'are rirerömëvo'i ioro'ioroho döro ri'öröhego. God-ro bamade höjo huro hesi jöho barueröhego. Huro hesi jöho barue'iramu aëro ahoruomo'ajëjo.

35 Ahoromo ëhuro ae aho'obëhe jabuhu diehi diehi uehorovaruoho va'orahoro jio'iramu ga'ëjarëjo. Ëhi'o'iramu jero jasi dë vövöbajo'o uhure huë vavaene börömoho bae'a'anuëjo.

36 Simeon-ro Mary ëhi uavadeje. Röhu magonaho mavoje gemu ë hijë'e jiadeje. Hesi ihoho Anna jiadeje. Hu jö God-aro baeromo majëhijaje magonahe jiadeje. Phanuel-are aboje jiadeje. Asher-are uje gemuoho jiadeje. Röhu hesi vadunoho aho'obëhe mae jiadeje. Urimë'i barue masuromo baru'o hijadoho vadune aho'obëhe 7 barëjamu

37 baru guomamu doru hijadoho rahade vadunoho aho'obëhe 84 jiadeje. Ëhu'ëro mavoji mae jiadeje. Röhu huro ë God-are osa börömoremu va'oromo majae vahie jene ioho vuonugo'i God gemu uehorovoromo hesi örire jö jövoromo rajahinövadeje.

38 Amo Mary'o Joseph'o God-are osa börömore arijamu ë magonahohuro jabesire rovideje. Rueromo aharihoho garomo God huë mae uavadeje. Huë mae uaromo va'oromo ganövade di ariböviohuro God-ro Jerusalem amo rajoho maro bamëvoröhego muebejarue ë aribövioho gëromo aharihu hesi jöho majëhinövadeje.

*Iesu Nazareth amore vuonorö'ö barovare jöhoje.*

39 Ëhi'amu Mary'o Joseph'o Badare surire jiaje ëhi jië'e muoho vae barënugoromo Galilee sa'are vuonorö'ö rueromo ro jabesi amore Nazareth ë arijareje.

40 Arijamu aharihoho böviraebe biririvobe va'adeje. Hu uehoro mabëhe hesi simanore jiadeje. God-ro hesi örire huë bae avohobe va'adeje.

*A harihe Iesuhu God-are osare hiromo ë'ade jöhoje.*

41 Ëhi jië'ëro God-hu Vörö Tugohade Maja Börömoho rue'ego vadune göro göro Iesuare vëmu vavu'ohuro Jerusalem ajiomoromo ë hesi söröho inövareje.

42 Ëhi'obe rovaroho Iesu vadune aho'obëhe 12 baejamu gagoro Iesuare vëmu vavu'ohuro ëhi gemuoho ë'oromo Jerusalem amore ajiomareje.

43 Ajiomoromo sörö majaho barëjamu vuonorö'öromo sionëro jabesi amëro rue'ië'areje. Röhu jabesi harihe Iesuro ë Jerusalem hijadeje. Hijamu vëmu vavu'oho dadivëvadeje.

44 Dadivëvamu uehorovoromo uvareje: Evaho Iesu nosi a ioro'iorohu'o gemu mae rovajëromo rovaroho majae gemu barëjadeje. Majae gemu barëjamu agano ioro'iohehu örire rovaruire Iesu nahobe jirehojuvo

<sup>45</sup> gavare Iesu bogojiamu gagorovo öri ahore vuonorö'öromo Jerusalem naho va'areje.

<sup>46</sup> Nahujuvo jiamëhi va'i gavareje Iesu God-are amo börömore hiromo God-are jö öri röjëhijarue aribövi jabesi jöho hejë'i hu'o mana uë gëvamu.

<sup>47</sup> Hejareje huro ëhi'ego ae aho'obëhe tiöromo uvoruomamu: Rabu simano ma-mabëhe baejë'lëro jöho mana bu'öjajëjo.

<sup>48</sup> Ëhi'amu vëmu vavu'ohuro Iesu garomo tiöromo vëmohuro uavadeje: Jue'i ja rabëni nosi öriroho ëhioho ë'ane höjo. No jasi vavuohumu niö'iro nurunurumë'i nahavobe rovere höjo.

<sup>49</sup> Rovare höjamu Iesuro uëvadeje: Jemë rabëni na nahevobe rovarije höjo. Jemë rabëni bogo uvarije höjo: Nörö hesi Vavuohuro nimo'ego hesi osare hijajëjo.

<sup>50</sup> Ëhi uëvamu hegoroovo vëmu vavu'oho Iesuhu uëvaje jö hesi bëhoho dadivëvadeje.

<sup>51</sup> Dadivëvamu Iesuro vëmu vavu'ohu'o sionëro vuonorö'ö rovadoho jabesi amore Nazareth ë hiromo jabesi jöho ejëhë'e hinövadeje. Hijamu vëmohuro gavade hejade jöho hesi simanore bamoromo uehorovemu uehorovonövadeje.

<sup>52</sup> Ëhi'amu Iesuro simano mae jiobe daje böviraebe va'adeje. God o ae aho'obëhe jaburo hesi örire huë bae avohobe va'areje.

### 3

#### *Bapataeto vaejaje ae John-hu jö majëhinövade jöhoje.*

<sup>1</sup> Iae Tiberius Caesar-hu Rome amore bövie namiromo hesi sa'ae dinö'e dinö'e aevoromo muebejavuadoho vadune aho'obëhe 14 barë'i 15-ho jiaadeje. Röhu Pontius Pilate-ro Judea sa'aho muebe'i Herod-ro Galilee sa'aho muebe'i Herod-are murie Philip-ro Iturea sa'ahu'o Trachonitis sa'ahu'o muebejëvo'i Lysanias-ro Abilene sa'aho muebejadeje.

<sup>2</sup> Annas'o Caiaphas'o jabumë niö'i Jew rajo jabesi priest böröme jëvadeje. Ësa'are a masijo'o priest masijo'o ëhi jio'amade majare evare Zechariah-are harihe John-ro a rumo'e sa'are hijamu God-are jöhuro dëre abuejadeje.

<sup>3</sup> Abuejamu hegoroovo jöho majëhibe juvoromo Jordan jovonörire öri ari'oho juvo barëjadeje. Juvo barëromo majëhiromo uënövadeje: Uehoro sisëho vuonugo'i uehoro mae baeromo bapataeto vaehego God-ro jemesi sisëho uehorovoromo vuonugëhajo.

<sup>4</sup> John-hu ëhi ë'iröhe jöho urimë'i jö God-aro baeromo majëhinövade ae Isaiah-ro surire jajivoromo uvadeje:

Aëro a rumo'e sa'are hiromo ma-darugo'o uvo'a'ajëjo:

Badahu rueröhe öroho avohorego hu maro rue'irajo.

Hesi öroho ahorrëro vajivorego hu maro juvo'irajo.

<sup>5</sup> Guoröte aho'obëhe huo'amo'iramu rojomo'amo'ajëjo.

Dahoru ëgohu'o bunohu'o aho'obëhe aho'amo'iramu ahorrëro jio va'a'ajëjo.

Tagu tagu'e öroho vajivo'iramu ahorrëro jio'amo'ajëjo.

Abue ajiomë'e öroho avoho'iramu ahorrëro jio va'a'ajëjo.

<sup>6</sup> Ëhi'o'iramu ae aho'obëhe garuomo'ajëjo God-hu baejëvoromo mare bamëvajoho.

<sup>7</sup> Ëhi jajivë'lëro jië'lëro iae John-ro gavade ae aho'obëhe mae huro bapataeto vaejëvojöro rueruomamu gëgoroovo uëvadeje: Sigobu aboji harihu'e jëvanovajëjo. Jemë raro uëvade höjo: God-are vöröehu rue'iröhire jioromo huruomoromo manö va'irarijoho eni jëvo'ajëjo. Bogajo.

<sup>8</sup> Ijehu bajo mae raejajëhi ëhi mu mae vaerego no garomo uvo'irarëjo: Iae jemë uehoro sisëho vuonugo'i uehoro mae baejë'e jëvadjëjo. Röhu nadi uvorëjo: Abraham nosi bëhohuro jië'ëro ëhu'ëro no mae javuajëjo. Naro jemë uëvadjëjo: Jemë Abraham-are ujo ömo'ömo jëvadjoho ëho ma-bise'e höjo. God-ro nimo'ibejajo ave munëho ujuohoromo avohëvego araeromo Abraham-are ujo ömo'ömo jio'amo'ibejajo. Ëhuni nadi nimorohë'ioho ëhioho atorëjo.

<sup>9</sup> Röhu tonëro ijoho bëhi'o huo'ö'ië'ajëjo. Di ijohuro bajoho bogo ma raejë'e jiego huo'öromo vëniro huo'ie'ajëjo.

<sup>10</sup> Ëhi jië'e jöho majëhi'ego aëro uanövareje: Ëhi jië'oho no diehi jië'e muoho vae'ejarejo.

<sup>11</sup> Vae'ejare'ego John-ro uënövadeje: Ae rahu niöge niö'i jëvë'oho gö baeromo niögu rumo'e aho bojaminëjo. O ie jëvë'oho i rumo'e aho gö bojaminëjo.

<sup>12</sup> Ëhi uë'ego tax baejarue aribövioho jabu'o bapataeto vae'i ruenövareje. Rueromo uanövareje: Tisa no diehi jië'e muoho vae'ejarejo.

<sup>13</sup> Vae'ejare'ego John-ro uënövadeje: Tax baejë'iroho sa'are a masijehu uëvaruëhi ëmino'e bae'i nadi gö'oho döroho jemesi ëma baerëjo.

<sup>14</sup> Ëhi uë'ego muorovo aribövioho jabu'o uanövareje: Jabesi muoho ëhi höjo röhu nomë diehi jië'e muoho vae'ejarejo. Vae'ejarejamu uëvadeje: Jemëro va'oromo nadi ae gö jabesi monioho baeniëhirëjo o nadi sarerëmiromo uërëjo: Jemë mu sisë vaejë'e jëvaje monie mana bojamuihëjo. Nadi ëhi jië'e muoho vaeromo monioho ujuoho'i ma-uvorëjo: No suvuro baejaruoho iae eni höjo.

<sup>15</sup> Ëhi majëhijamu hegorovo ae aho'obëhe dë vövöbajo'ere uvoruomadeje: Nani mu börömëro rovajëjo. O nani John hu God-hu uavë'ëro böröme namiromo ajamui'iröhe ahuro jöe majahuijajëjo.

<sup>16</sup> Ëhi uvoruomamu gagorovo John-ro uëvadeje: Naro jovëremu bapataeto vaejëvaje höjo. Röhu ae gö nasi ijonö rue'ie'ajëjo. Huro na iosiremiromo börömoho höjo. Naehu hesi mu bise'o vaejahoromo höru sino jiovaho'ibejodoho o mu bise'o bise'e rabe vaejaho'ibejodoho röhu na ma-bise'e jevajëjo. Naro ma-jovëremu bapataeto vaejëvaje höjo. Ëahuro God-are Aru'ahohuro o vënëro bapataeto vaejëvo'ajëjo.

<sup>17</sup> Hesi ijo garanoho övore höjo. Ijo garanoho övore jië'ëro ioho tevoromo döro hijiohijiovoromo mevoromo i maho gagovoromo hesi iruno'e osare ë avoho bahi'i subueho sinoho ravemu ravaje vënire huo'a'ajëjo.

<sup>18</sup> Ëhi jië'e jöho o jöe gö gö John-ro majëhiromo ëhuro jabesi simanoho huotovëho ganövadeje. Ëhi'oromo God-are jö maho majëhinövadeje.

*John savoji gagore ba'amare jöhoje.*

<sup>19</sup> Ëhi'amu gagorovo iae ë sa'a muebejaje a böröme Herod-ro hesi muri hesi vabore Herodias gohoniahiromo mu sisë gö gö vaejamu gagorovo John-ro ri'öromo birevadeje.

<sup>20</sup> Birevamu Herod-ro mu sisë aho'obëhe vaejë'ëro röhu ave mu sisëhu'o vaejadeje. Huro ae uëvamu John guduamo bava'oromo savoji gagore ba'amareje.

*John-hu Iesu bapataeto vaejade jöhoje.*

<sup>21</sup> Röhu ë hesi urimo John-hu a bapataeto vaejëvade majare huro ae aho'obëhe bapataeto vaejëvonugoromo Iesu'o bapataeto vaejadeje. Bapataeto vaejamu Iesuro God-are örire jöe jövamu gavë'i ö'idöho arorovadeje.



22 Arorovamu God-are Aru'ahohuro sino haho'e jioromo guaho va'ënohuro Iesuaro ruvebijamu gavë'i ae aho'obëhe hejareje ö'idöre uvavamu: Ja nasi Harihu mabëhe javajëjo. Naro ja garomo ëhuro nasi dë vövöbajo'oho nimorohevajëjo.

*Iesuare hijo miono'o jabesi iho jajivobe va'ade jöhoje.*

23 Röhu Iesuhu mu aevade majaho hu vadune aho'obëhe 30 rabu'e jiadeje. Ae aho'obëhe uvoruomadeje: Iesu hu Joseph-are harihe höjo. Röhu Joseph hu Heli-are harihe jiadeje.

24 Heli hu Matthat-are harihe jiadeje. Matthat hu Levi-are harihe jiadeje. Levi hu Melchi-are harihe jiadeje. Melchi hu Jannai-are harihe jiadeje. Jannai hu Joseph-are harihe jiadeje.

25 Joseph hu Mattathias-are harihe jiadeje. Mattathias hu Amos-are harihe jiadeje. Amos hu Nahum-are harihe jiadeje. Nahum hu Esli-are harihe jiadeje. Esli hu Naggai-are harihe jiadeje.

26 Naggai hu Maath-are harihe jiadeje. Maath hu Mattathias-are harihe jiadeje. Mattathias hu Semein-are harihe jiadeje. Semein hu Josech-are harihe jiadeje. Josech hu Joda-are harihe jiadeje.

27 Joda hu Joanan-are harihe jiadeje. Joanan hu Rhesa-are harihe jiadeje. Rhesa hu Zerubbabel-are harihe jiadeje. Zerubbabel hu Shealtiel-are harihe jiadeje. Shealtiel hu Neri-are harihe jiadeje.

28 Neri hu Melchi-are harihe jiadeje. Melchi hu Addi-are harihe jiadeje. Addi hu Cosam-are harihe jiadeje. Cosam hu Elmadam-are harihe jiadeje. Elmadam hu Er-are harihe jiadeje.

29 Er hu Joshua-are harihe jiadeje. Joshua hu Eliezer-are harihe jiadeje. Eliezer hu Jorim-are harihe jiadeje. Jorim hu Matthat-are harihe jiadeje. Matthat hu Levi-are harihe jiadeje.

30 Levi hu Simeon-are harihe jiadeje. Simeon hu Judah-are harihe jiadeje. Judah hu Joseph-are harihe jiadeje. Joseph hu Jonam-are harihe jiadeje. Jonam hu Eliakim-are harihe jiadeje.

31 Eliakim hu Melea-are harihe jiadeje. Melea hu Menna-are harihe jiadeje. Menna hu Mattatha-are harihe jiadeje. Mattatha hu Nathan-are harihe jiadeje. Nathan hu David-are harihe jiadeje.

32 David hu Jesse-are harihe jiadeje. Jesse hu Obed-are harihe jiadeje. Obed hu Boaz-are harihe jiadeje. Boaz hu Shelah-are harihe jiadeje. Shelah hu Nahshon-are harihe jiadeje.

33 Nahshon hu Amminadab-are harihe jiadeje. Amminadab hu Admin-are harihe jiadeje. Admin hu Arni-are harihe jiadeje. Arni hu Hezron-are harihe jiadeje. Hezron hu Perez-are harihe jiadeje. Perez hu Judah-are harihe jiadeje.

34 Judah hu Jacob-are harihe jiadeje. Jacob hu Isaac-are harihe jiadeje. Isaac hu Abraham-are harihe jiadeje. Abraham hu Terah-are harihe jiadeje. Terah hu Nahor-are harihe jiadeje.

35 Nahor hu Serug-are harihe jiadeje. Serug hu Reu-are harihe jiadeje. Reu hu Peleg-are harihe jiadeje. Peleg hu Eber-are harihe jiadeje. Eber hu Shelah-are harihe jiadeje.

36 Shelah hu Cainan-are harihe jiadeje. Cainan hu Arphaxad-are harihe jiadeje. Arphaxad hu Shem-are harihe jiadeje. Shem hu Noah-are harihe jiadeje. Noah hu Lamech-are harihe jiadeje.

37 Lamech hu Methuselah-are harihe jiadeje. Methuselah hu Enoch-are harihe jiadeje. Enoch hu Jared-are harihe jiadeje. Jared hu Mahalaleel-are harihe jiadeje. Mahalaleel hu Cainan-are harihe jiadeje.

<sup>38</sup> Cainan hu Enos-are harihe jiadeje. Enos hu Seth-are harihe jiadeje. Seth hu Adam-are harihe jiadeje. Adam hu God-are harihe jiadeje.

## 4

### *Iesuhu mu sisë vaejoro Satan-hu bijioho gavade jöhoje.*

<sup>1</sup> Iae Iesuro hejade God-are Aru'ahohuro hesi dë vövöbajo'ere sino haho'ere rumorovavamu hegorovo Jordan jovoho vuonugo'irögoro God-are Aru'ahuhu uavajire a rumo'e sa'a göre ë va'o juvadeje.

<sup>2</sup> A rumo'e sa'are juvamu gagorovo Iesuro God-are jöho ahojoro Satan-ro hesi dëho bijioho gabe va'adoho majae aho'o 40 barëjadeje. Bijioho ga'i hijamu evare majaroho Iesuro ioho bogo ijë'e ma-hibe va'oromo ë majaho barëjamu vadunëro hömadeje.

<sup>3</sup> Vadunëro hömamu Satan-ro ri'öromo uavadeje: Ja God-are Harihe javë'oho ave munëho uavego iraejajo.

<sup>4</sup> Iraejajamu ruehuro uavadeje: Röhu God-are jöho jajivoromo ëhi uvë'e höjo: Aehu iemu uehorovë'oho bogo maho raromo'aruëjo.

<sup>5</sup> Ëhi uavamu Satan-ro Iesu hu'irae ba'ojomoromo a masijehu dinö'e dinö'e raromoromo muebe'amarue öri ari'oho ëho ma-burëro röjahi barëjadeje.

<sup>6</sup> Röjahiromo uavadeje: Ëöri ari'oho aho'obëhe naro bojami barë'ejöjo jero mueberomo ë bövi bise'o maho ujuoho'iranego. Ëhesi bëhoho ë öri ari'oho naro baejë'ëro jevë'ëro ae rahu bojëmi'i negë'oho iae bojëmaje höjo.

<sup>7</sup> Ëhuni jaehu uvene aho röjehijë'oho aho'obëhe jasi jio'amo'ajëjo.

<sup>8</sup> Jasi jio'amo'ajëjamu Iesuro uavadeje: Röhu God-are surire jöho ëhi uvë'e höjo: Bada jasi God gemu rajahiromo hesi muohemu gemu vaejahonëjo.

<sup>9</sup> Ëhi uavamu Satan-ro Iesu Jerusalem hu'irae baeromo ajiomadoho ruhe God-are osa börömo hesi döre ba'ojio ë nugamu namijadeje. Namijamu Satan-ro uavadeje: Ja God-are Harihe javë'oho avehuro nami'i jörö'örovëjo.

<sup>10</sup> Ëhesi bëhoho God-are surire jöho ëhi uvë'e höjo: God-ro hesi aneraho uë'iramu ja avoho muebejavo'aruëjo.

<sup>11</sup> O hesi surire jö göho ëhi uvë'e höjo: Aneraho jaburo övore ma'enagonövo'aruëjo jasi hörure munëro bibejavojöëni. Ëhuni jörö'örovëjo.

<sup>12</sup> Jörö'örovëjamu uavadeje: Röhu God-are jöho ëhi uvë'e höjo: Nadi ri'öromo Bada jasi God hesi dëho ëma bijiohoromo uanëjo: God jero ëhi ëhi ë'ëjo.

<sup>13</sup> Ëhi uavamu Iesuro mue gö gö aho'o vaejoro Satan-ro hesi dëho bijioho ganugoromo vuonugo va'adeje majae eni jiego vuonorö'ö rueröhëro.

### *Iesuhu Galilee sa'are hiromo aevoromo mu vaejade jöhoje.*

<sup>14</sup> Va'amu iae Iesuro God-are Aru'aho hesi darugoho baeromo vuonorö'öromo Galilee sa'are va'adeje. Va'amu huhu rovade jöho ë sa'aho aho'obëhe heruomadeje.

<sup>15</sup> Iesuro Jew rajehu God rajahjarue osare osare jöe röjëhibe juvamu ae aho'obëhe uvoruomadeje: Hu a mae höjo.

### *Iesuar ame Nazareth rajehu Iesu bijönimoruomade jöhoje.*

<sup>16</sup> Ëhi'amu Iesuro jöe röjëhibe juvoromo urimë'i asisö'o'ere hiromo böviraejade amore Nazareth ë rovadeje. Rueromo nuho majae rovamu amo göre göre va'oromo ë'ajëhi ëhi huro God rajahjarue osare va'adeje. Va'oromo God-are surire jöho adaho'i ri'ö namijadeje.

<sup>17</sup> Namijamu jö God-aro baeromo majëhinövade ae Isaiah-hu jajivade jö'e suroho ae göëro bojamijadeje. Bojamamu Iesuro baeromo jiovö'öromo ave jajivade jöho nahoromo bihoromo adahoromo

<sup>18</sup> uvadeje:

Badare Aru'ahohuro nasi simanore rumorovevajëjo Badaro hesi Aru'ahoho nasirire bamë'ëro jië'ëro.

Huhu bamade hesi bëhoho naro hesi jö maho baeromo bogo eni jië'e aribövioho majëhi'irodego bamade höjo.

Huro na remö'öjade höjo naro va'oromo tövëvë'e aribövioho uë'irodego: Jiovo rëmö'ö'irode majaho rovë'e höjo.

Nuni tugorohëvë'e aribövioho uë'irodego: Nuni dadovëho'irode majaho rovë'e höjo.

Remö'öjade höjo sisëhu ruahö'öjëvë'e aribövioho naro manö bamëvo'irodego.

<sup>19</sup> Naro ae uë'irodego: Badahu ajëmi'iröhe majaho iae rovë'e höjo.

<sup>20</sup> Ëjöhö adahonugoromo Iesuro suroho huhoho taemoromo osa muebejaje aho sionëro bojamiromo jö bëhoho røjëhi'i sa'aro hijadeje. Hijamu gagorovo ë osare raromare ariböviohuro ae aho'obëhe he'i Iesu gemu ërimahareje.

<sup>21</sup> Ërimahamu uëvadeje: God-are jö adahamu hejarije ë hesi muoho aviavejö'e rovë'e höjo.

<sup>22</sup> Iesuro ëhi jië'e jöho jövamu hegorovo ae aho'obëhe uvoruomadeje: Hu jö mae jövajëromo hesi huë ma jöho heromo tiöjëvadeje. Tiöjëvamu uvoruomadeje: Ëiaho bogo a börömehu jio'i hu Joseph-are harihe höjo.

<sup>23</sup> Ëhi uvoruomamu Iesuro uëvadeje: Ave uhu jö atarujoho jemëro ëhi ue'a'arujëjo: Oso muebejanue aho jero jasi ajamirovego mae javajo. Ëhesi bëhoho jemëro ueromo ë'arujëjo: Arue Capernaum amore mu vaejane ë hesi jö hejaroho ëhi jië'e muoho ave jasi amoro vaejago no gavarëjo.

<sup>24</sup> Röhu ave jöho na jö mae uë'ië'ajëjo. Jö God-aro baeromo majëhjarue aribövioho nosi sa'a rajohuro bogo ma uehorovavuarue höjo. Bogo mae bogajo.

<sup>25</sup> Röhu aveho na jö mae uë'ië'ajëjo. Elijah-hu hijade majaroho ave Israel sa'are magonaho dorue aho'obëhe jio'amade höjo. Evare majare ëni bogo mae bogo rovadoho vadune niö'i gemu röhu döre manaere 6 ëhi barëjë'ëro ëhu'ëro sa'ae aho'obëhe majae ëgobövie vadune raromare höjo. Vadune raromamu evare

<sup>26</sup> magonaho dorue aho'obëhe ave Israel sa'are raromaroho God-ro Elijah hesi sa'a rajo magonaho doruoho bogo gemu vadu'e ajamijöro jabumënioho nugö'ö'i sa'ae gö Sidon amonörire sa'are Zarephath amore hijade magonaho doruhuni gemu nugö'öjade höjo ajami'iröhego.

<sup>27</sup> O jö God-aro baeromo majëhinövade ae Elisha-hu hijade majaroho ave Israel sa'are sino jomo'e ae aho'obëhe jio'amade höjo. Röhu Elisha-ro Israel raromarue jomo'e aribövi bogo ae gemu vadu'e jabesi sinoho avohëho'i Syria rajemu gemu a ihe Naaman hesi sinoho avohahade höjo.

<sup>28</sup> Ëhi majëhijamu hegorovo ë God rajahjarue osare raromarue ariböviohuro heromo sisë maro dë vörönimoruomadeje.

<sup>29</sup> Dë vörönëgamu ri'öromo Iesu amore jiamu guduamo baeromo amo'e dahoru bönure iojioromo dahoru vösöre suorovareje barado döre riravo'i baba'amo'irovo.

<sup>30</sup> Ëhi'o'i ë'oruomamu gëgorovo Iesuro jabesi ririre jioromo rëmö'öromo va'adeje.

*Aru'aho sisë ae gemu hesi dëre jiamu Iesuhu rarovö'öjade jöhoje.*

<sup>31</sup> Va'oromo Iesuro abuejadoho abo Galilee sa'are Capernaum amore höröjadeje. Höröromo Jew rajo jabesi nuho majaho rovamu God rajahijarue osare va'oromo jöho röjehijadeje.

<sup>32</sup> Jöho röjehijamu heromo tiöromo uvoruomadeje: Hesi jöho darugo'e mabëhe javavajëjo. Ëhi uvoruomade hesi bëhoho hesi birire baejë'ëro hu jöho majëhijadeje.

<sup>33</sup> Amo ë osare Satan-are a sisëhu dëre abuejë'e aho hijë'e jiadeje. Hijë'ëro ma-darugo'o uvadeje:

<sup>34</sup> Hë-ajo. Iesu Nazareth rajoho ja rabëni sihusihuaguo'i rovane höjo. Na ja ijumavuo'i ë'anuëjo. Na iae ja gavajëjo. Ja God-aro jioromo rovë'e a ma-maemu jië'e ae javajëjo.

<sup>35</sup> Ëhi uavamu hejë'i Iesuro uavadeje: Jöho vuonugo'i höröjëjo. Höröjëjamu hejë'i uhure a sisëhuro ë a hesi simanoho huotovahamu ë aribövi jabesi nunire sa'are behumorovadeje. Sa'are behumorovamu uhure a sisëhuro ë a hesi sino haho'o'oho bogo ijumaho'i ma-höröromo va'adeje.

<sup>36</sup> Höröromo va'amu gagorovo ae aho'obëhe garomo tiöjëvamu uarovareje: Aveho rabu'e jöho höjo. Darugo'e jöho jövego a sisëhuro ma-burëro ejahoromo suorovo va'oruomaje höjo.

<sup>37</sup> Ëhi'amu Iesuhu vaejaje mu hesi jöho ë sa'aho aho'obëhe he barëjareje.

*Iesuhu ae aho'obëhe jabesi sino avohëhade jöhoje.*

<sup>38</sup> Röhu a sisëho dëre jioromo hörö va'amu Iesuro God rajahijarue osare jioromo va'adeje. Va'oromo Simon-are osare va'adeje. Röhu Simon-are jure magonaho hesi sino haho'o'oho vörö'irae avohë'e jiadeje. Vörö'iraejamu Iesu uavareje: Na ja magonahoho ajaminëjo.

<sup>39</sup> Ajaminëjamu hegorovo Iesuro va'oromo bëhire ruaho'amo namiromo uavadeje: Vörö'iraejanuoho u'uhëjo. U'uhëjamu sino haho'ere vörö'iraejadoho u'uhadeje. U'uhamu hejë'i ri'öromo iruno'e avohëhoromo i'imëmadeje.

<sup>40</sup> I'imëmamu majae beva'amu gagorovo ae rahu hesi ae guomo guome gö gö jië'o'oho ujuoho rovamu Iesuro hesi övoho ae aho'obëhe jabesi sinore bamëho'ego marë'amonövadeje.

<sup>41</sup> Marë'amo'ego aru'aho sisë ae aho'obëhe jabesi dëre raromarohuro suorovo va'onövareje. Suorovo valië'iroho ma-darugo'o uvonövareje: Ja God-are Harihe javajë'ego heromo uënövadeje: Jöe nugohëjo. Nadi nasi jöho huruohohëjo. Iesuhu ëhi jië'e jö jövade hesi bëhoho ë aru'aho sisëho jaburo garomo uvareje: Hu böröme namiromo ae ajëmaje aho höjo.

*Iesuhu Judea sa'are jö majëhibe juvade jöhoje.*

<sup>42</sup> Ëhi ë'ë'ëro sisonuvamugo Iesuro ri'öromo va'oromo a rumo'e sa'are ë hijadeje. Hijamu ae aho'obëhe hu nahobe rovareje. Nahobe rueromo gavare ë hijamu gagorovo nijio'iraeromo uavareje: Nadi va'i rueromo no'o hijëjo.

<sup>43</sup> No'o hijëjamu hegorovo uëvadeje: Iae mae uevarujëjo röhu God-hu böröme namiromo muebejëvaje jöho ë jöho amo ioro'iorohu'o majëhibe va'ejöjo ë hesi bëhoho God-ro ëhuni remö'öjamu rovë'ëro.

<sup>44</sup> Ëhi'onugoromo Judea sa'are God rajahijarue osare osare jöho majëhibe juvadeje.

## 5

*Iesuare ijore ijore jijihoröhego Iesuhu aevoromo a uëvade jöheje.*

<sup>1</sup> Iae Iesuro Gennesaret e'u riröre namijadeje. Namijamu ae aho'obëhe God-are jöho he'i tagavoromo bijimö'örovobe rueruomadeje.

<sup>2</sup> Rovamu Iesuro namiromo gavadeje boat niö'i e'u riröre raromëvo'i visu suovarue aribövioho rori'o raromoromo viöho u'ovamu.

<sup>3</sup> Ehi ganugoromo boat gemu Simon-are boat-re ajio hiromo Simon uavadeje: Ave riröre jioromo biduohö'öjogo rori'o va'ajo. Rori'o va'a uanugoromo gavade eni jiamu gagorovo boat-re ehi hiromo jöho röjèhijamu rue sa'are raromare ariböviohuro heruomadeje.

<sup>4</sup> Heruomamu Iesuro hesi jöho jövobe va'ojuvo barëjamu Simon uavadeje: Ave jasi boat-oho baeromo e'u umahë'inö huo'öbe va'oromo ja'o jasi ariböviohu'o viöho ba'amorëjo ehuro visue aho'o suovo'irarije höjo.

<sup>5</sup> Suovo'irarije höjamu Simon-ro uavadeje: Tisa ëho iae mae höjo röhu no vahi bövie visu suovo'i ë'o gabe rovaroho gavare höjo bogo eni javuamu. Röhu jero uë'ego ehuni viöho ba'amo'ejöjo.

<sup>6</sup> Ehi uanugoromo viöho ba'amoromo visue aho'obëhe suovamu viöho dadorovo'ië'adeje.

<sup>7</sup> Dadorovo'ia'amu gagorovo Peter-mëro jabesi a ioro'iore boat göre arijaruoho övëro uëvareje: Ro ajamuihëjo. Ro ajamuihëjamu rueho jaburo rueromo ajëmiromo visue aho'obëhe suovoromo ë boat niö'ire bahijamu irijiomoromo diruvëvo varijëne jiadeje.

<sup>8</sup> Ehi'amu gagorovo Simon Peter-ro Iesuare bëhire ague aho hiromo uavadeje: Bada na remo va'ëjo. Na a sisë jevajëjo.

<sup>9</sup> Peter-mëro visue aho'obëhe mae suovoromoromo tiöjëvë'ëro jië'ëro ehü'ëro ehi uavadeje.

<sup>10</sup> Peter-më tiöjëvo'i James'o John'o jabu'o tiöjëvadeje. Röhu James'o John'o jabumë Zebedee-are harihe jëvadeje. Jabumë Simon'o gemu mae muoho vaenövareje. Amo tiöjëvamu Iesuro Simon uavadeje: Nadi juhuonivonëjo. Aviavejö'e aevoromo ja bogo visuoho gagovo'i ae mago-nahe gagovëvo'iramu nasinö jioruomo'ajëjo.

<sup>11</sup> Ehi jövamugo boat-re rueromo ravo'amoromo boat-oho jagu ömëvo va'o nie'uahore ötöjëvareje. Ötöjëvonugoromo jabesi muoho bövioho bise'oho vuonugo'i aevoromo Iesuare ijore ijore jijihonövareje.

*Iesuhu sino jomo'e a ajamade jöheje.*

<sup>12</sup> Iae Iesuro amore hijadeje. Hijamu ae gemu sino haho'e jomemu jië'ohuro rueromo Iesu garomo ague aho hiromo ëninamiromo uavadeje: Bada ja nasi sino avoheho'iranoho ja eni javajëjo. Ehuni jasi nimoromo ajemijë'ohuro iae ajemi'anuejo.

<sup>13</sup> Ajemi'anuejamu Iesuro övoho nugö'öromo sinoho rëhahoromo uavadeje: Iae na negajëjo ajami'iro. Marëjëjo. Marëjëjamu gavë'i jomoho rireromoromo hesi sinore sisë sisëho barëjadeje.

<sup>14</sup> Sisëho barëjamu gagorovo Iesuro uavadeje: Naehu ehi ë'odoho nadi aho huruoho majëhinëjo. A'i ma-va'oromo jasi sinoho priest röjahijego ga'irajo. Ehi'oromo Moses-hu uövuade ehi jië'e suvorocho God-are öroro bojamego aëro garomo uvo'irarëjo: Jasi sinore sisëho barëjë'ëro iae mae javajëjo.

<sup>15</sup> Bogo aho huruoho majëhi'iröhego uavadeje röhu ë huhu vaejade mu jöho börömo mae rumorovamu ae gö gö hebe va'oruomadeje. Hebe va'oruomë'ëro ae aho'obëhe rueromo gagovoruomadeje hesi jöho heruomo'i huro jabesi sino haho'oho ajëmego marëjëvo'iröhego.

<sup>16</sup> Ro gagovoruumamu gëgorovo Iesuro a rumo'e sa'are va'lo hiromo God-are örire jöe jövadeje.

*Övo höru'e vuovahë'e a Iesuhu ajamade jöhoje.*

<sup>17</sup> Èhi'oromo iae Iesuro aribövioho jöho røjëhijamu Pharisee ariböviohu'lo Jew rajo jögoru öri røjëhijarue ariböviohu'lo èho jaburo hesi bëhire raro-moruomadeje. Urimë'i è aribövioho ioro'iorohuro è Galilee sa'are amo göre göre jioromo ioro'iorohuro arue Jerusalem amore Judea sa'are amo ioro'iorore jioromo rueruomë'ëro è raromoruomadeje. Raromamu Iesuro jöho røjëhiromo Badare darugoho baejë'ëro guomo guomo'e a jabesi sino avohëho'iröhoho eni jiadeje.

<sup>18</sup> Sino avohëho'iröhoho eni jiamu iae aëro övo höru'e vuovahë'e aho maratuoroho giojimo barovareje. Barueromo osanö bava'oromo Iesure bëhire bamo'iröhe öroho nahareje.

<sup>19</sup> Öroho nahoromo gavare ae aho'obëhe tagavoromo ojanoho urahë'e jiamu gagorovo ba'ojiomoromo javuoho dönö dadovö'öromo maratuohu'lo nume osare riravarue aribövi jabesi ririre Iesure bëhire è ba'amareje.

<sup>20</sup> Ba'amamu gagorovo Iesuro gavade i'e rovere ariböviohuro hu mae uehorovoruumamu gëgorovo övo höru'e vuovahë'e aho uavadeje: Isiajo. Jasi sisëho uehorovoromo vuonugoromo mu'u barëjahë'e höjo.

<sup>21</sup> Mu'u barëjahë'e höjamu hegorovo jögoru öri røjëhijarue ariböviohu'lo Pharisee ariböviohu'lo uarovareje: Asë'ëjo. Sareri ae höjo. Huro God sivoromo èhi jië'e jöho jövajëjo. Hu ma-ae höjo. Röhu huro è aho uavajëjo: Naro jasi sisëho uehorovoromo vuonugoromo mu'u barëjahë'e jevajëjo. Èhi jië'e muoho hesi God-ro gemuëro vaejaje höjo. Ma-aho bogajo.

<sup>22</sup> Èhi atamu gagorovo Iesuro uëvadeje: Jemë rabëni uehore gö gö baejarujëjo.

<sup>23</sup> Jemë'lo uehorovohëjo. Nani ja ae ëma ua'a'anuëjo: Jasi sisëho uehorovoromo vuonugahë'e hö ua'a'anuëjo. Ja èhi ua'ibejanëjo aho nunoho bogo ga'ibejarëjo ja mae o sarere jövë'e javego. Röhu ja bogo ëma ua'a'anuëjo: Ri'öromo nami juvëjo hesi guomo guomoho bogo barëjago ja javojagojöëni.

<sup>24</sup> Röhu è bogo ëma jövo'ibejane jöho iae na jövo'ejöjo huro ejehoromo ri'öo nami juvego jemëro è muoho garomo ehuro ga'irarijago God-are A Maho naro sa'are hijajire evare sisë mu'uvaje darugoho èhu'lo baejë'e jevego. Èhi uënugoromo röhu övo höru'e vuovahë'e aho uavadeje: Naro ja uavajëjo: Jero ri'öromo raromanue maratuoho banigojiomoromo baeromo jasirëro va'ëjo.

<sup>25</sup> Va'ëjamu hejë'i ruehuro ae aho'obëhe jabesi nunire ri'öromo maratuoho banigojiomoromo baeromo God rajahibe hesirëro va'adeje.

<sup>26</sup> Va'amu gagorovo è aribövioho aho'obëhe tiöjëvamu juhuonivoromo God rajahiromo uarovareje: Asë'ëjo. No bogo gavarue muoho jaruvo gavë'e javuajëjo.

*Levi-hu Iesure ijore ijore juvoröhego Iesuhu uavade jöhoje.*

<sup>27</sup> Èhi'amu gagorovo Iesuro ri'öromo va'adeje. Va'i gavade tax baejaje ae hesi ihoho Levi hesi mu vaejaje osare hijamu gagorovo uavadeje: Rueromo nasi ijoro ijoro juvonövonëjo.

<sup>28</sup> Juvonövonëjamu hegorovo hesi muoho aho'lo vuonugoli ri'öromo aevoromo Iesure ijore ijore juvonövadeje.

29 Ëhi'oromo Levi-ro Iesu rajahi'i sörö böröme hesi osare bamoromo Iesu'o a ioro'iorohu'o aho'obëhe uëvadeje: Rueromo söröe ihëjo. Ihëjamu hegorovo tax baejarue ae aho'obëhe ëhi jië'e a ioro'iore aho'obëhe ëho jaburo ro gemuoro raromoromo ie ue'ahareje.

30 Ie ue'ahamu gëgorovo Jew rajo jögoru öri røjëhjarue Pharisee ariböviohu'o Pharisee aribövi ioro'iorohu'o ëho jaburo dë vörönëgamu Iesuare aribövioho uëvareje: Jemë rabëni tax baejarue ariböviohu'o sisë a ioro'iorohu'o gemuoro ioho jovoho ue'aharujëjo. Ëhi jië'oho sisë höjo.

31 Sisë höjamu hegorovo Iesuro uhu'e uëvadeje: Röhu guomo guomo'e ariböviohuremu doctor gavarue höjo mae jëvë'e aribövioho bogajo.

32 Ëhesi bëhoho naro sisë aribövioho sisë vaejaruoho vuonugojöro uë'i rovode höjo ma-döemu mae jëvë'e aribövioho bogajo.

*Bëhoho rabëni Iesuare ariböviehu i bogo vuonugare jöhoje.*

33 Iae aëro Iesu uavareje: John-are jö hejarue ariböviohuro majae aho'obëhe God uehorovo'i ioho vuonugoromo hesi örire jöe ato'i arijarue höjo. O Pharisee jabesi jö hejarue aribövioho jabu'o ëhi jië'e muoho vae'i arijarue höjo. Jabumëhu ëhi ë'aruoho iae mae höjo. Röhu jasi aribövioho ioho bogo vuonugo'i ma-iemu jovemu ue'aharue höjo. Rabëni ëhioho ë'arue höjo.

34 Rabëni ëhioho ë'arue höjamu hegorovo Iesuro uhu'e uëvadeje: I'o masuröhe a hesi söröre aemo'aemehu rueromo i i'ie'iroho jemë tugohëvo'irarijoho na eni jëvajëjo o bogajo. Bogajo.

35 Röhu majae ijonö i'o masuröhe aho aëro guduamo bava'iramu evare majare ioho vuonugo'aruëjo. Avevejö'oho naro jabu'o hijë'ego jabu ioho bogo vuonugo'aruëjo.

*Jew rajehu gororovo'iröhe jögoru mamiohu'o Iesuhu barovade mu i'ohu'o bogo gemuore havo'iröhe jöhoje.*

36 Ëhi uënugoromo Iesuro uhu jöe gö'o majëhiromo uëvadeje: Niögu i'ohu'o mamiohu'o bogo havo'anuëjo. Bogo havoromo dadovadiroho niögu i'oho baeromo bisemu tariö'öromo niögu mami hesi gagoroho bamoromo sigohi'anuëjo. Ëhi ë'ibejanëjo niögu i'oho tariö'öjë'ëro ëhuro sisërë'ibejajo. O niögu mamioho ëho nu ano'e gö jio'i i'oho nu ano'e gö jioromo ëhuro niögu mamiohu'o sisërë'ibejajo.

37 O wine jovo mi sino gagore bigu'ie'iroho jovo i'ohu'o mi sino mamiohu'o bogo gemuoro havoromo jovo i'oho mi sino mamiroho bigu'anuëjo. Ëhi ë'ibejanëjo jovohuro gatovoromo ögohuro bibivoromo mi sinoho mamiëro jië'ëro tögömoromo ioro'iohemu dadorovego jovoho rova'ibejajo.

38 A'i jovo i'oho mi sino i'o hesi gagoremu bigu'anuëjo.

39 Röhu jovo mami ue'ahë'oho aëro uvarue höjo: Mamioho mae höromo ëhuni i'oho bijönimarue höjo. ËJew rajehu Iesuare mu i'o bijönimarue jöho Iesuro uhu'e ëhi majëhjadeje.

## 6

*Jew rajehu nuharue maja hesi jöhoje.*

1 Iae Jew rajo jabesi nuho majaho rovamu gagorovo Iesumëro mure jijihareje. Jijihoromo hesi ijorajo ömo'ömhuro ioho babovoromo övëro uhiromo ue'ahobe va'oruomadeje.

<sup>2</sup> Ioho övëro uhiromo ue'ahobe va'amu gëgorovo Pharisee ariböviëro uëvareje: Jaruvoho nuho majae höjo. I avoharujoho ëho nuho maja hesi jögoroho aharujëjo. Rabëni ëhi jië'o'ho ë'arujëjo.

<sup>3</sup> Ë'arujëjamu Iesuro uëvadeje: David nosi a böröme jionövade höjo. Röhu hu'o hesi ariböviohu'o hömëvamu hegorovo huhu ë'ade jö God-are surire adaharujoho ëho diehi'oromo bogo avoho uehorovarujëjo.

<sup>4</sup> David-ro God-are osare va'oromo God-are nunire bahijare ioho ujoohoromo vituoho i'i vituoho hesi aribövioho i'imëmamu ue'ahare höjo. Ëhi jië'e ioho aho bogo ue'aho'i hesi ma-priest-ëremu ue'aho'iröhe ie höjo. Röhu jabuhu ue'aharohuro ëhuro jögoroho ahare höjo. Röhu ë hesi jöho bogojiade höjo.

<sup>5</sup> Ëhi uëngoromo uëvadeje: God-are A Maho naro nuho maja hesi jögoroho muebejaje höjo.

*Övo guomahë'e a Iesuhu ajamade jöhoje.*

<sup>6</sup> Ëhi uëvë'ëro Jew rajo jabesi nuho majae gö'o rovadeje. Nuho majae gö'o rovamu Iesuro God rajahijarue osare va'oromo hesi jöho röjëhijadeje. Amo ë osare övo manörire övo hitahi guomahë'e aho hijë'e jiadeje.

<sup>7</sup> Jew rajo jögoru öri röjëhijarue ariböviohu'o Pharisee ariböviohu'o ëho jaburo Iesure jö sisëho nahoromo uvareje: Iesuhu guomo guomo'e aribövi jabesi sino avohëhë'o'ho noro a masijoho huruoho majëhiromo uë'ëjarëjo: Iesuro a ajëmaje muoho vaeromo nuho maja hesi jögoroho ahade höjo. Ëhi uvoromo jabumëro ma-hu gemu ërimahareje ga'iro nuho majare hu guomo guomo'e aribövi jabesi sinoho avohëhego o bogo.

<sup>8</sup> Ërimahamu Iesuro gëromo uvadeje: Jabumë ëhi ëhi uehorovarüë uvoromo övo guomahë'e aho uavadeje: Ro ave nosi riroro namijëjo. Namijëjamu ro jabesi ririre namijadeje.

<sup>9</sup> Namijamu hu bijönimoromo ërimaharuoho Iesuro uëvadeje: Na ave jöho uë gë'ië'ajëjo. Nosi nuho maja hesi jögoroho diehi höjo. Nuho majaroho na ae mae vaejëvo'ëjarëjo o sisë vaejëvo'ëjarëjo. I'ovëvo'ëjarëjo o muo'amo'ëjarëjo.

<sup>10</sup> Ëhi uëngoromo uherihoromo ë aribövioho aho'obëhe gëngoromo övo guomahë'e aho uavadeje: Jasi övoho nugö'öjëjo. Ëhi uavamu hegorovo övoho nugö'öjamu marëjadeje.

<sup>11</sup> Marëjamu rue ariböviohuro gavare Iesuro ë aho ajami'ëgo marëjamu gagorovo dë vörönëgo avohadeje. Dë vörönëgamu jöe atoromo uarovareje: No Iesure öriroho diehi'o'ëjarëjo.

*Iesuhu hesi apostle 12 baejövade jöhoje.*

<sup>12</sup> Ëhi'o'irögoro Iesuro God-are örire jöe jövo'iro dahorure ajiomadeje. Ajio hiromo vahi bövie God-are örire jöe jövobe va'ojuvo ëhi sisonuvadeje.

<sup>13</sup> Sisonuvamu gagorovo hesi ijore ijore jijiharue ariböviohuro ruejoro uëvadeje. Uvëvoromo rovamu ae aho'obëhe 12 hesi baejövadeje. Baejëvoromo uëvadeje: Jemë nasi apostle jëvëjëjo.

<sup>14</sup> Iesuro Simon baejadeje. Baeromo iho göho Peter jumuvadeje. O Peter-are öho Andrew baejadeje. O göho James John Philip Bartholomew

<sup>15</sup> Matthew Thomas o James Alphaeus-are harihe o Simon aehu uvaruoho Jew rajehu jabesi mueberovo'i nimaje aho

<sup>16</sup> o Judas James-are harihoho o göho Judas Iscariot ë aribövioho baejövadeje. Judas Iscariot Iesuni hiruëmiromo a jabesi övore bojëmi'iröhe aho jiadeje.



*Iesuho a jabesi sino avohēhade jōhoje.*

<sup>17</sup> Ēaribövioho baejēvonugoromo Iesuro jabu'o gemu mae abueromo enure ē namijadeje. Namijamu hesi aribövie aho'obēhe mae o a ioro'iorohu'o arue Jerusalem amore jioromo Judea sa'a ioro'iorore jioromo nume Tyre amo Sidon amo jiajinö sö jovo bēhire sa'are jioromo ae aho'obēhe mae ē ro riravareje

<sup>18</sup> Iesuale jōho heruomo'i huro ajēmego jabesi sino haho'oho marējēvo'irōhego. Ro riravamu a sisēhu dēre abuejēv'ēro i'u baejarue aribövioho Iesuro ajēmamu marējēvadeje.

<sup>19</sup> Marējēvamu ae aho'obēhe gavare Iesuale darugohuro rueromo guomo guomo'e ae aho'obēhe ajēmamu gagorovo Iesu rēho'i ē'lo gavareje ēhuro guomo guomoho barējēvo'irōhego.

*Huē mae baerōhe ariböviohu'o huē vavaene baerōhe aribövi jabesi jōhoje.*

<sup>20</sup> Ēhi'amu Iesuro hesi ijorajo ömo'ömoho gēromo uēvadeje:

Bövi bise'lo rumo'e aribövioho jemē huē mae jēvajējo  
God-ro muebejēvego hesi aharire mae raromo'iē'ēro.

<sup>21</sup> Avevejō'e hōmēvaje aribövioho jemē huē mae jēvajējo  
maja ijonōho eni da'uēgo'iē'ēro.

Avevejō'e nierusuburu'e bamaruje aribövioho jemē huē mae jēvajējo  
maja ijonōho nimoroho'iē'ēro.

<sup>22</sup> Jemēhu God-are A Maho na uehorovevamu aehu gēromo bijönēgoromo nu huodēgoromo sivēgoromo jemesi ihoho sisē hōromo vuonugēh'oho huē mae jēvaje hōjo.

<sup>23</sup> Jabuhu ēhi sisē vaejēv'iroho jemēro hirohiromoromo nimoroho avo-horējo God-hu suvuro jemēni ö'idöre bamēhajoho bōrōme jiē'e jiaje. Ēaribövi jabesi hijo miono'ohuro jō God-aro baeromo majēhinōvare aribövi jabesi örire ēhi gemuoho sisē vaejēvonōvare hōjo.

<sup>24</sup> A'i bövi bise'lo marohē'e mae jēv'e aribövioho vaev'e jēvajējo.

Jemesi bövi bise'lo maho ujuoho barējē'ēro ijonōho bogo ujuoho hesi jēvajējo.

<sup>25</sup> Avevejō'e da'uēgē'e aribövioho vaev'e jēvajējo.

Maja viture vadunēro vuovēvo hesi hōjo.

Avevejō'e nimoroharuje aribövioho vaev'e jēvajējo.

Maja viture huē vavaene baejē'i nierusuburu'e bae hesi jēvajējo.

<sup>26</sup> Ae aho'obēhe jemesi jō ma-mabēhe atē'oho vaev'e jēvajējo. Ēaribövi jabesi hijo miono'ohuro God-are jō huotohuotovoromo majēhinōvare aribövi jabesi örire ēhi gemuoho mae atonōvare hōjo.

*Nu huodaguarue aribövi jabesi örire noehu huē baejēvo'irōhe jōhoje.*

<sup>27</sup> Röhu jemē nasi jō hejaruje ariböviohumē ave jōho majēhi'iē'ajējo. Jemē'o muorovarue aribövioho huē baejēvorējo. Jemē nu huodēgarue aribövioho mae vaejēvorējo.

<sup>28</sup> Jō sisē uēvarue aribövioho jō mae uērējo. Sisē vaejēvarue ariböviohuni God-are öroro ēninamirējo.

<sup>29</sup> Aehu a'isabi gönö anagē'iroho hunuorovego a'isabi gönöhu'lo anago'irajo. Aehu niögu gö baeniahijē'oho nadi nijio'iraejego niögu göhu'lo bae'irajo.

<sup>30</sup> Aehu jasi örire böviēni bise'ēni ēninamijē'oho bojaminējo. Aehu jasi mae sisē baejahē'oho nadi uanējo: Sionēro bojēmējo.

<sup>31</sup> Jemē ae göehu diehi vaejēvojōro nēgē'oho jemē'o ēhi jiē'e muoho ae gö jabesi öroro vaejēvorējo.

<sup>32</sup> O jemë huë baejēvarue aganohemu huë baejēvē'oho rabēni uvorējo: God-are nunire mabēhe javuajējo. Sisē aribōviohuro jabu'o huë baejēvarue aganoho mana huë baejēvarue hōjo.

<sup>33</sup> O jemë mae vaejēvarue aribōviohemu mae vaejēvē'oho rabēni uvorējo: God-are nunire mabēhe javuajējo. Sisē aribōviohuro jabu'o ēhi gemuoho ē'arue hōjo.

<sup>34</sup> O uvē'oho: Ēhi gemuoho vuonorō'ō bae'ejōromo ēhuni bōvi bise'oma-jahuri ae gō bojēmijē'oho rabēni uvorējo: God-are nunire mabēhe javuajējo. Sisē aribōviohuro jabu'o uvoruomaje hōjo: Ēhi gemuoho vuonorō'ō bae'ejōromo ēhuni bōvioho bise'oho ma-jahuri ae gō bojēmijarue hōjo.

<sup>35</sup> A'i jemë nu huodēgarue aribōvioho huë baejēvorējo. Mae vaejēvorējo. Nadi uvorējo: Mana bojemi'aruë uvē'i jemesi bōvioho bise'oho ma-bojēmirejo. Ēhi ē'ē'oho God-ro jemë suvuro bōrōme bojemi'ajējo. Ēhuro God-hu dō mare hijaje a hesi aboji harihu'o mae jēvo'ajējo. Ēhesi bēhoho God-ro gēvaje a sisē jioruomō'i bogo mana mabēhe uavē'e suvure ēma baejarue aribōvie jēvego gēgorovo huro ēma huë baejēvoromo ajēmijaje hōjo. Huhu ē'aje ēhi jiē'e mu vaejē'oho jemë hesi aboji harihu'o mae jēvo'ajējo.

<sup>36</sup> Ēhuni jemesi Vavuehu jemēni vavaenimajēhi ēhi ae gōēni vavaenimorējo.

*Bogo dōro bamorovoromo a jabesi sisē mevo'irōhe jōhoje.*

<sup>37</sup> Nadi dōroho bamorovoromo a jabesi sisēho mevorējo. Jabesi sisē bogo mevē'oho God jemesi sisēhu'o bogo mevo'ajējo. Nadi a jabesi sisēhunioho i'uoho bojēmirejo. I'u bogo bojēmijē'oho God jemē'o i'uoho bogo bojemi'ajējo. A'i ae gō jabesi sisēho uehorovoromo vuonugorējo. Ēhi ē'ē'oho God-ro jemesi sisēhu'o uehorovoromo vuonugo'ajējo.

<sup>38</sup> Ae suvorerēmirejo. Jemë ēhi ē'ē'oho God-ro jemē'o suvorerēmi'ajējo. Bōrōmo mae suvorerēmiromo jemēro övoho avoho'iramu sōrō va'ēne ē bamēho'iramu övo duvahoho rarovoromo oteroho'a'ajējo. Bogo bise'ovadu'oho suvorerēmi'ajējo. Jemë dimino'e bojēmē'ohuro ēhuro ē bojēmarije mino'e ēhi bae'a'arujējo. Iesuro ēhi jōvadeje.

<sup>39</sup> Rōhu Iesuro rōjēhi'iro ave uhu jōho uēvadeje: Nuni sisē'e a gōhuro nuni sisē'e a gōho diehi öroho rōjahibe va'a'ajējo. Bogajo. Rōjahijē'oho jabumē niō'i guare bejēvo va'a'ajējo.

<sup>40</sup> Jō hejaruje aribōvioho jō rōjēhijaje aho na bogo iosiremiromo jō maho bae'a'arujējo. Jōho he barē'iramu evare jō rōjēhijaje aho va'ēne jēvo'ajējo.

<sup>41</sup> Rōhu ja diehi'oromo ijo ugobajo'e biseharihehu isiare nunire namijajohogaga'i ijo bōrōmehu jasi nunire namijavajoho bogo gavanuējo.

<sup>42</sup> Ijo bōrōmehu jasi nunire namijavajoho bogo gavē'oho ēhu'oho ja rabēni jasi aemo'aemoho uanējo: Isi ē'ego na jasi nunire ijo ine namijavajohojahahōjo. Sareri ae javajējo. Jasi nunire ijo bōrōmehu tugohavajohojerourimo jahonējo. Jahonugoromo evare avoho garomo ijo ino harihoho isiare nuniroho jahaho'anuējo.

*Aho mu vaejajire garomo uvarueje: Hu mae o sisē hōjo. Ēhesi uhu jōhoje.*

<sup>43</sup> Ijo maho bajo sisēho bogo rae'i ijo sisēho bajo maho bogo raejaje hōjo.

<sup>44</sup> Ijoho bajo garomo uvo'a'anuējo: Ēijoho mae hōjo ēho sisē hōjo. Meso böso uro'iē'iroho mesoremu uro'i bibē'e ijo sisēroho bogo uro'a'anuējo. Rihu'e grape bajo uro'iē'iroho ē ö'iremu uro'i bibē'e resu sisēroho bogo

uro'a'anuëjo. Ijo sisëhuro bajo sisëho rae'amaje höjo. Ijo mahuro bajo maho rae'amaje höjo.

<sup>45</sup> Èhesi bëhoho a maho ijo maehu bajo mae raejajëhi ëhi jëvaje höjo. A maho uehoro maëremu jabesi dë vövöbajo'ere jëvë'ëro mu maemu vaeruo-maje höjo. A sisëho uehoro sisëremu jabesi dë vövöbajo'ere jëvë'ëro mu sisëmu vaeruomaje höjo. Aëro diehi jië'e uehorehu jabesi dë vövöbajo'ere irijiomëvajoho jabesi jö'ëro atarue höjo.

*Simano ma'e ahu'o simano sisë'e ahu'o javu vaejare uhu jöhoje.*

<sup>46</sup> Jemëro uevaruje höjo: Bada ja no mu bojamuijanue aho javajëjo. Èhi jië'oho jemë rabëni naehu bojëmaje muoho bogo vaejaruje höjo.

<sup>47</sup> Röhu ae rahu nasi örire rueromo nasi jö heromo ejehajoho ëhi jië'e a hesi jöho naro uhu'e majëhi'ejöjo.

<sup>48</sup> Ae gemuëro javue vae'ië'ade höjo. Javue vae'irögoro ëgobövie umo abuejuvo munë'e sa'aho birohogoro öboho ë ruhoromo javuoho vaejade höjo bibivoröhego. Javuoho vae barëromo hijamu jovo börömëro ruomoromo ë javuoho anade höjo. Anamu javuoho mae vaejë'ëro jië'ëro bogo orivo'i ma-bibivoromo namijade höjo. Nasi jö ejehaje aho ë bibivë'e javu vaejade aho va'ëne höjo.

<sup>49</sup> A'i ae rahu nasi jö heromo bogo ejehajoho ëhi jië'e a hesi jöho naro uhu'e majëhi'ejöjo. Ae gemuëro javue vae'ië'ade höjo. Röhu sa'aho bogo umo abueromo öboho ruho'i ma-sa'a döre vaejade höjo. Vaejë'ëro ë javuoho jövëro ro anamu dadorovo barë nahonahovade höjo.

## 7

*Rome raje muorovo simano vaejaje a hesi mu vaejaje a guomo'ia'amu Iesuhu ajamade jöhoje.*

<sup>1</sup> Iesuro hesi jöho ae aho'obëhe majëhinugoromo va'adoho va'o Capernaum amore hijadeje.

<sup>2</sup> Röhu Rome raje muorovo simano vaejaje ae gemuëro ë hijë'e jiadeje. Hu bogo Jew rajehu jio'i sa'a gö raje jiadeje. Hesi muemu vaejahaje ahuro hu'o hijadeje. Hijamu rue simano vaejaje ahuro ë iaho mae uehorovo avohadeje. Mae uehorovo avohamu rue aho guomo guomo böröme baejë'ëro guomo'ië'adeje.

<sup>3</sup> Guomo'ia'amu gagorovo rue simano vaejaje ahuro Iesuhu a ajëmaje jöho hegoro Jew rajo a duvaho ioro'ioroho uëvadeje: Va'oromo Iesu uarego rueromo nasi mu vaejehaje a hesi sinoho avohahego marë'irajo.

<sup>4</sup> Èhi uëvamu hegorovo va'areje. Va'oromo Iesu ëninamiromo uavareje: Èaho ajaminëjo. Hu a maego jaehu ajamijë'oho iae mae höjo.

<sup>5</sup> Hu sa'a gö raje höjo röhu huro ave sa'a rajoho no uehorovavuaje höjo. Uehorovavujëro jië'ëro huro ajamuiromo ae uëvade höjo noehu God rajahijarue osaho vaejahuoröhego.

<sup>6</sup> Èhi uavamu Iesuro ri'öromo jabu'o va'adeje. Va'oromo ë simano vaejaje a hesi osa bëhire rovamu gavë'i rue simano vaejaje ahuro hesi aho uëvadeje: Va'oromo Iesu birohoro uarëjo: Badajo. Nadi nasiroho rueromo u'uoho baejëjo. Na ae ma-bise'e jevoromo sisë jevë'e jaehu nasi osare rovë'oho bogo maehu höjo.

<sup>7</sup> Èhuni na uehorovoromo uvode höjo: Na ö'irodoho röhu na bogo maehu jevajëjo. Èhuni nadi rue'i ma-jö'ëro jöe jövego nasi mu vaejehaje aho marë'irajo.

<sup>8</sup> Ma-jö jövego mu rovaje hesi öroho iae na gavë'e jevajëjo. Ëhesi bëhoho na nasi a masijo jabesi aharire jevë'ëro jabesi jöho ejëhoromo muoho vae'i muorovo aribövioho nasi aharire jëvë'ëro nasi jöho ejëhoromo muoho vaejarue höjo. Naehu muorovo ae gö uavë'ocho: Va'ë uavë'iroho iae hu va'aje höjo. O muorovo ae gö uavë'ocho: Rovë uavë'iroho iae hu rovaje höjo. O nasi mu ajemaje a uavë'ocho: Mue ëhi ëhi vaejehë uavë'iroho iae hu ëhi vaejaje höjo. Ëhu'ëro jö jövego mu rovaje hesi bëhoho iae na gavë'e jevajëjo. Ëhuni uavajëjo: Ma-jö'ëro jöe jövego marë'irajo. Ëjöho baeromo Iesu majahirego he'irajo.

<sup>9</sup> He'irajamu simano vaejaje a hesi ariböviohuro ë jöho bava'oromo Iesu majahijareje. Majahijamu Iesuro heromo tiöjadeje. Tiöromo huotorovoromo hu rihromare aribövioho uëvadeje: Hu mabëhe uehorovevade höjo. Ëhi jië'e aho na bogo birohë'e jevajëjo. Nosi Israel rajoho jabu'o bogo ëhioho mae uehorovevaruëjo. Iae na mae jövajëjo.

<sup>10</sup> Ëhi uëvamu hegorovo rue ariböviohuro vuonorö'ö rueromo simano vaejaje a hesi osare ro gavareje hesi mu vaejahaje aho mami'e marëjë'e jiamu.

*Magonaho doru hesi harihu guomo raromamu Iesuhu ajamamu i'ovade jöhoje.*

<sup>11</sup> Ëhi'o'irögoro iae Iesuro Nain amore va'i va'adeje. Va'amu Iesuare ijorajo ömo'ömohu'o a ioro'iorohu'o ae aho'obëhe mae hu'o va'oruomadeje.

<sup>12</sup> Va'oromo amo rejo ojo bëhire hörö'ia'amu suorovo'ia'amu evare aëro guomë'e a hesi sinoho amore jioromo guavo'i giojimo baeromo rovaraje. Röhu vaevë'ocho guomë'e aho magonaho doru hesi harihu gemu'ocho jiadeje. Amo raje ae aho'obëhe ë magonahohu'o rueruomadeje.

<sup>13</sup> Rueruomamu Badaro magonahoho ganugoromo huni vavaenimamu uavadeje: Nadi nivonëjo.

<sup>14</sup> Nadi nivonëromo rueromo sino bamare maratuoho rëhadeje. Rëhamu giojimo barovare ariböviohuro ëhi riravareje. Riravamu gagorovo Iesuro a juvijoho uavadeje: Jue'iajo. Naro ja uavajëjo: Guomanoho ri'öjëjo.

<sup>15</sup> Ri'öjëjamu döro ri'ö hiromu aevoromo jöe jövadeje. Jöe jövamu gagorovo Iesuro harihoho vëmu hesi övore bamadeje.

<sup>16</sup> Ëhi'amu gavë'i ae aho'obëhe juhuonivoromo God rajahiromo uvoruomadeje: Asë'e jö God-aro baeromo majahuijaje a börömohuro nosi örire rovë'e hö uvoromo God-ro hesi aribövi nosi jöëni vavaenimë'e hö uvoruomadeje.

<sup>17</sup> Ëhi'amu gagorovo ae aho'obëhe Judea sa'ahu'o sa'a ioro'iore bëhirohu'o Iesuare jöho ëhi vaerovemu vaerovobe va'areje.

*Bapataeto vaejaje ae John-hu ae rëmö'öjamu rueromo Iesu jö ua gavare jöhoje.*

<sup>18</sup> Iesuhu ëhi jië'e mu vaejade jöho John-are ijore ijore jijiharue ariböviohuro John majahijareje.

<sup>19</sup> Ëhi majahijamu hegorovo John-ro hesi aribövioho niö'iro ruejoro uëvamu rovaraje. Rovamu uëvadeje: Va'oromo Iesu ua garëjo: No uvaruëjo: God-ro ae nugö'ö'iramu nosi örire rue'a'ajëjo. Na ja ë aho javajëjo. O na no muebe'ejarejo ae göëro rueröhego.

<sup>20</sup> Ëhi uëvamu hegorovo va'oromo Iesu uavareje: John bapataeto vaejavuajaje ahuro uövuamu rovarae höjo. Huro uövuade höjo: Iesu uarëjo: No

uvaruëjo: God-ro a böröme nugö'ö'iramu nosi örire rue'a'ajëjo. Na ja ë aho javajëjo. O na no muebe'ëjarëjo ae göëro rueröhego.

<sup>21</sup> Ëhi uavamu hegoro evare Iesuro guomo guome gö gö juhuonini'oho aho'o aru'aho sisë'oho aho'o avoho'amadeje. Nuni tugorohë'e aribövioho aho'o jabesi nunoho dadovëhadeje.

<sup>22</sup> Ëhi'oromo John-are ae niö'ioho uëvadeje: Va'oromo diehi gavarijoho hejarijoho John majahirego he'irajo. Uarëjo: Nöröro ae nuni sisë'oho ajëmijego mae uheriharue höjo. Höru sisë'oho ajëmijego mae jijiharue höjo. Jomo'e aho ajëmijego marëjëvoromo jabesirire sisë sisëho barëjëhaje höjo. Hia'i sisë'oho ajëmijego hia'e dadovoromo jöe hejarue höjo. Vuovë'e aho ajëmijego i'ovarue höjo. Bogo eni jië'e aribövioho ajëmiromomo majëhijego God-are jö maho hejarue höjo. Va'oromo John ëhi majahirëjo.

<sup>23</sup> Röhu John o ae rahu birivoromo nasi örire mae uehorovevë'oho ë ahuro maho hi'a'ajëjo.

<sup>24</sup> Maho hi'a'ajëjamu John-are ae niö'iohuro vuonorö'öromomo va'areje. Va'amu gavë'i Iesuro ë hesi bëhire gagovare aribövioho John-are jöho majëhiromomo uëvadeje: Urimë'ioho jemë rabe ga'irögoro John-hu a rumo'e sa'are hijajiroho ëho va'onövarije höjo. Ijo rudu burehu huosihego arue anume va'aje ëhi uehorovaje aho na John ëhi jië'e ae jiamu jemë ga'i va'arije höjo. Bogajo.

<sup>25</sup> O diehi jië'e ae ga'i va'arije höjo. Na niögu mabëhe sanu'e io'amë'e ae jiego ga'i va'arije höjo. Röhu ëhi jië'e niögu ma io'amoromomo bövi bise'o marohë'e ma baeromomo raromarue aribövioho bogo a rumo'e sa'aroho raromomo'i a masijehu raromarue osaremu raromarue höjo.

<sup>26</sup> Röhu diehi jië'e ae ga'i va'arije höjo. Na John jö God-aro baeromomo majëhijaje ae jiamu ga'i va'arije höjo. Io'ajo. John iae hu ëhi jië'e ae höjo. Röhu aveho hehëjo. Jö God-aro baeromomo majëhinövare a ioro'ioroho iosirëmiromomo John hu börömoho höjo.

<sup>27</sup> Iae ë a hesi jöho God-are surire jajivoromomo ëhi uvë'e höjo:

Ave aho God nasi jö bajuvaje aho höjo.

Ja va'ië'iroho naro hu urimo nugö'ö'iramu va'oromomo ae uë'a'ajëjo jaehu va'irane öroho iogorahoröhego.

Ëhi jajivë'e höjo.

<sup>28</sup> Ave jöho na jö mae uë'ië'ajëjo. Ave sa'are raromarue aho ae gemu vadu'oho John bogo iosiramimomomo börömoho jië'e höjo. A'i God-hu böröme namimomomo muebejëvego hesi aharire raromarue a inino mahuro John iosiramimomomo döroho jioruomajëjo.

<sup>29</sup> Iesuro ëhi majëhijamu tax baejarue ariböviohu'o a ioro'iorohu'o aho'obëhe ë jöho heromomo uvoruomadeje: God hu mae höjo. Rabëni John-hu bapataeto vaeröhe jöho jaburo ejahë'ëro.

<sup>30</sup> A'i Pharisee ömo'ömo'ohu'o Jew rajo jögoru öri röjëhijarue a ömo'ömo'ohu'o ë jöho heromomo jabuhu ë'ojöro God-hu nimaje muoho juahovareje rabëni John-hu bapataeto vaeröhe jöho jaburo bijönimë'ëro.

<sup>31</sup> Röhu Iesuro hesi jö vituoho majëhiromomo uëvadeje: Ave jaruvore raromaruje aribövi jemesi jöho uhu'e majëhi'ië'ajëjo.

<sup>32</sup> Amo ririre raromomomomo jö bijönimoromomaje asisö'oho jëvanovajëjo. Amo ririre raromomomomo asisö'oho ioro'iorohuro ioro'ioroho uvëvoruomajëjo: Noehu aninivoromomo jemëni virikö huosihëharoho jemëro bijönimoromomo bogo ejahuoromomo javavarije höjo. Noehu aninivoromomo huë vavaeni'e jö iaroho jemëro bijönimoromomo bogo ejahuoromomo nierusuburu'e bamarije höjo.

<sup>33</sup> Ĕhesi bēhoho bapataeto vaejavuaje ae John-ro rueromo God uehorovoromo ma-hi'i ioho wine jovoho bogo inövade höjo. Ĕhi'onövadoho jemēro ē jō bijōnimarue asisō'oho va'ēne bijōnēgamu John-are jōho bogo ejaho'i sisē'i uehorovoromo uvonövarije höjo: Aru'aho sisē dēre jiē'ēro Ĕhu'ēro ioho jovoho bogo ijaje höjo.

<sup>34</sup> O God-are A Maho naro rueromo ioho jovoho ma-ijaje höjo. Ĕhi ē'ajoho jemēro Ĕhu'o bijōnimoromo uvaruje höjo: Nörö gahējo. Ioho mahunö'e iromo vörö'e jovemu ijaje höjo. Hu vajiohu'e tax baejarue ahu'o a sisē ioro'iorohu'o ēho jabesi aemo'aeme höjo.

<sup>35</sup> Jemēro John-are muohu'o nasi muohu'o bijōnimaruje höjo röhu no God-are uehoro maho baejē'ēro muoho vaejarue höjo. Ĕmu nimarue aribövioho aho'o jaburo garomo uvoruomo'ajējo: God-are uehoroho iae mae höjo. Ĕhu'ēro muoho vaejare höjo.

### *Iesuhu Pharisee ae gemu Simon-are osare hiromo ē'ade jōhoje.*

<sup>36</sup> Ĕhi'amu Pharisee ae gemuēro Iesu uavadeje: Nasi osaro rovego no ie ijarējo. Ie ijarējamu ē a hesi osare va'oromo ie i'i sa'aro hijadeje.

<sup>37</sup> Röhu sisē magonahe gemuēro ē amore hijadeje. Hiromo hejade uvavamu: Iesuro Pharisee a hesi osare hiromo ie ijajē uvavamu hegorovo ridi'e ose munē huono mabēhiroho baeromo rovadeje.

<sup>38</sup> Barueromo Iesure dejonö hörü bēhire hiromo nivoromo hesi nuni jovohuro Iesure hörure aho'amodivamu buejahoromo simano uohuro uhijahoromo höröho dudöhahoromo ridi'e jovohuro otehahadeje.

<sup>39</sup> Ĕhi'amu gagorovo ē Pharisee ae Iesu uavamu rueromo i ijade ahuro uehorovoromo uvadeje: Ave aho jō God-aro baeromo majahuijaje ae jio'ibejajo hu ga'ibejajo magonahehu ma'enajoho rahuo jio'i o diehi jiē'e mue vaebe juvaje magonahe jiego ahego Ĕhuro mae jio'ibejajo. Ĕhesi bēhoho hu magonaho sisē höjo. Röhu Iesuhu ē magonaho bogo avoho gavajoho Ĕhuro hu bogo jō God-aro baeromo majahuijaje aehu höjo.

<sup>40</sup> Ĕhi uehorovamu gagorovo Iesuro Simon ē Pharisee a hesi ihoho Simon uavadeje: Simon na jō harihe majahi'iē'ajējo. Majahi'iē'ajējamu Simon-ro uavadeje: Tisa iae mae höjo. Majehego hejōjo.

<sup>41</sup> Hejōjamu Iesuro uhu'e uavadeje: Iae ae niö'iehu ae gemu hesi örire moni mana sionehu bojami'iröhoho jēvade höjo. Göhuro 500 kina göhuro 50 kina ē a hesi örire bojami'iröhoho jiade höjo.

<sup>42</sup> Röhu bogo eni jēvade höjo. Bogo eni jēvamu gagorovo moni bae'iröhe ahuro ē ae niö'iehu moni bojami'iröhoho uehorovoromo vuonugēhade höjo. Ĕhi jiē'oho ē ae niö'ioho di ahuro ē moni bae'iröhe a hesi öriroho böröme rajahi'i di ahuro ma-bisemu rajahi'ajējo.

<sup>43</sup> Rajahi'ajējamu Simon-ro uavadeje: Na uehorovoromo uvajējo: Moni böröme bojami'iröhe ahuro ē moni bae'iröhe aho böröme rajahi'ajējo ē hesi bēhoho huro moni börömo mae uehorovoromo vuonugahē'ego. Rajahi'ajējamu Iesuro uavadeje: Ja mae uevanuējo.

<sup>44</sup> Ĕhi uaromo huotorovoromo magonahoho gavē'i Simon uavadeje: Ave magonahoho gavējo. Naro jasi osare rovode höjo röhu ja bogo rajehiromo jovoho bojemijane höjo nasi höröho u'ojöro. A'i ave magonahohuro rajehiromo hesi nuni jovohuro nasi hörure aho'amodegamu Ĕhuro u'ovehade höjo. U'ovehoromo hesi simano uohuro uhijehade höjo.

<sup>45</sup> Ja bogo rajehiromo dudöhev'e javajëjo. A'i ë magonahohuro naehu jasirire rovodevare evare aevoromo rajehiromo nasi höroho dudöhobe rov'e höjo.

<sup>46</sup> Ja bogo rajehiromo ninugu'e jovoho nasi simanoroho oteheho'i ë magonahohuro rajehi avohoromo ridi'e jovo mabëhohuro nasi hörure otehehade höjo.

<sup>47</sup> Èhuni uavajëjo: Èmagonahohuro na rajehi avohë'ëro ëhu'ëro hesi sisë aho'obëhe jiadoho uehorovoromo vuonugë'e höjo. A'i sisë ma-bisemu uehorovoromo vuonugëhë'o ho ëhi jië'e aribövioho ma-bisemu rajehi'aruëjo.

<sup>48</sup> Èhi uanugoromo magonahoho uavadeje: Jasi sisëho uehorovoromo vuonugahë'e höjo.

<sup>49</sup> Vuonugahë'e höjamu Iesu'o raromoromo i ue'aharue ariböviohuro jabesi uehorovoromo uvareje: Èaho hu diehi jië'e aëro jië'ëro huro God-are muoho baeromo ae magonahe jabesi sisëho uehorovoromo vuonugëhaje höjo. Hu ëhi jië'e muohu'o vaejaje höjo.

<sup>50</sup> Èhi uvamu Iesuro magonahoho uavadeje: Jero nasi örire mae uehorovevamu God-ro ja baejavoromo maro ramë'e höjo. Vaev'e va'onëjo.

## 8

*Magonaho göehu göehu Iesu'o gemu mae jijihoromo Iesu ajaminövare jöhoje.*

<sup>1</sup> Èhi ë'ë'ëro Iesuro va'adeje. Va'oromo God-hu böröme namiromo muebejavuaje jö maho baeromo ae majëhibe amo masijore ininore ë va'adeje. Röhu hesi iJORAJE 12-ho jabu'o

<sup>2</sup> magonaho ömo'ömo'u'o ëhi Iesu'o gemu mae va'areje. Èmagonahoho ioro'ioroho urimo aru'aho sisëhu dëre abuejëvo'i ioro'ioroho guomo guomo baejëvadoho Iesuro ajëmijamu marëjëvadeje. Èmagonaho jabesi ihoho göho Mary aehu uvaruoho Mary Magdalene jiadeje. Iesuro ë magonaho hesi dëre jio'amaje aru'aho sisë 7 raro'vamadeje.

<sup>3</sup> O magonaho gö hesi ihoho Joanna jiadeje. Joanna hu Chuza-are vabore jiadeje. Chuza hu a böröme Herod-are bövi bise'o muebejahaje ae jiadeje. Röhu magonaho gö hesi ihoho Susanna jiadeje. Èmagonaho ömo'ömo'u'o magonaho ioro'iorohu'o aho'obëhe jaburo jabesi bövi bise'o jëvadohuro ëhuro Iesumë rabe rabe bogo eni jëvajoho ajëmibe va'onövareje.

*Aehu i ujo sa'a mare sa'a sisëre riremade uhu jöhoje.*

<sup>4</sup> Èhi'amu iae ae aho'obëhe amo göre göre jioromo gagovamu sa'aho rarovadeje. Rarovamu gagorovo Iesuro uhu'e majëhiromo uëvadeje:

<sup>5</sup> Iae ae gemuëro hesi i uje ujuohoromo mure riremomi va'ade höjo. Riremobe va'amu ujo ioro'ioroho örire rireromade höjo. Rireromamu gagorovo aëro taemotaemovamu ugëro ro i barëjare höjo.

<sup>6</sup> Ujo ioro'ioroho munë uhunö jië'e sa'are rireromade höjo. Rireromonu-goromo rijamu saho'amade höjo sa'aho jovo rumo'ëro jië'ëro.

<sup>7</sup> Ujo ioro'ioroho bibë'e resu resu'e sa'are rireromade höjo. Rireromë'ëro ujo ma hesi gemuoro riromo baba'amade höjo.

<sup>8</sup> Ujo ioro'ioroho sa'a mare rireromade höjo. Rireromoromo riromo maho aho'obëhe 100 100 ëhi rae'amade höjo. Uhu'e ëhi uënu goromo madarugo'o uëvadeje: Ae rahu ja God-are jö hejanue ae javë'o ho bëhoho nahoromo birohonëjo.

*Iesuhu rabëni uhu'e majëhinövade ë hesi jöhoje.*

9 Ëhi'amu Iesuare ijorajo ömo'ömohuro uhu jö hesi bëhoho he'i ua gavareje.

10 Ua gavamu Iesuro uëvadeje: God-ro böröme namiromo aho'obëhe muebejaje jöho urimoho subivëhade höjo. Ësubivëhade jöho huro hesi suvuore jemë bojëmijë'e höjo jemëremu he'irarijego. Ëhu'ëro jemëro jö bëhoho he'i a'i a ioro'ioro jabesi öriroho ma-uhu jöemu rovaje höjo ëhuro nunëremu ga'i bëhoho bogo avoho ga'i hia'ëremu he'i bëhoho bogo avoho heruomoröhego.

*I ujo sa'are riremade uhu jö Iesuhu huruoho majëhijade jöhoje.*

11 Röhu ë uhu jö hesi bëhoho aviëhi höjo. I ujo hesi bëhoho God-are jö höjo.

12 Ujehu örire rireromamu ugehu i barëjare jö hesi bëhoho aehu God-are jö hejamu gavë'oho Satan-ro rueromo jöho baeniëhiromo rori'o bu'öjaje höjo ëhuro jabumë bogo ma uehorovoromo maroho va'oruomoröhego.

13 O i ujehu munë uhunö jië'e sa'are rireromoromo riromo sahuri'amade jö hesi bëhoho aëro God-are jöho heromo nimorohoromo jöho ejaharue höjo. Ejahoromo jöho ma-döëremu baej'ëro majae ma-bunemu mae uehorovoromo Satan-ro dinëmego evare vuonugarue höjo.

14 Ujehu bibë'e resu resu gemuore rireromade jö hesi bëhoho aëro God-are jöho hejarue höjo. Heromo röhu jabesi muohuni nurunurumoromo monie bövie bise'e uehorovoromo ave sa'a hesirohemu nimoronimorohoromo ëhi jië'e muohemu uehorovaruohuro God-are jö jabesi dëre jiajoho taemego jabumë bogo rae avoharue höjo.

15 Ujehu sa'a mare rireromade hesi bëhoho aëro jabesi dë vövöbajo'oho maëro jië'ëro God-are jöho heromo ejahoromo ma'eno titimoromo biririvobe va'o ijonö rae avohoruomaje höjo.

*Iro bueromo va'orahore bahijarue uhu jöhoje.*

16 Röhu iro bunö'iraej'ëroho bogo hevö gagoroho o maratu ahariroho gurihi'i ma-va'orahoro bamo'anuejo ae osare rovë'oho ajivëvoröhego.

17 Nasi jö bëhoho rabe rabe gurihiro jiajoho aho'obëhe ma-va'orahoro jio'a'ajëjo. O rabe rabe subivëhajoho aho'obëhe ma-samaro jio'a'ajëjo.

18 Ëhuni naehu jövaje jöho avo'avoho herëjo. Aji'e jö javë'oho God-ro gö'o bojami'iramu bae'a'anuejo. O bogojavë'oho ma-döëremu baejanoho God-ro ë uehoroho mu'uvaho'ajëjo.

*Iesuare vëmu ömo'öme o ö ömo'öme rahumë jëvaje jöhoje.*

19 Ëhi uëvamu iae Iesuare vëmohu'o ö ömo'ömohu'o jaburo rovareje. Rueromo gavareje ae aho'obëhe tagavoromo öroho rarovë'ëro hu jiajiroho bogo rue varijënoho jëvamu.

20 Bogo rue varijënoho jëvamu gagorovo aëro Iesu uavareje: Jasi vëmohu'o ö ömo'ömohu'o ja ga'i nimoromo amonö riravaruejo.

21 Riravaruejamu Iesuro ë aribövioho uhu'e uëvadeje: Iae hejajëjo. Röhu ae magonahe rahu God-are jö heromo ejahë'oho ëhuro ë aribövioho nasi vëme ö ömo'öme jioruomajëjo.

*Iesuhu uavamu jovo börömehu ruhosöjade jöhoje.*

22 Ëhi ë'ë'ëro iae Iesuro hesi ijorajoho jabu'o gemu mae boat-re ajio hijadeje. Hiromo uëvadeje: Ruehego no e'u ioni gönö va'arëjo. Va'arëromo ri'öromo va'areje.



<sup>23</sup> Ri'öromo va'aroho va'oromo Iesuro niavadeje. Niavamu gavë'i buru börömëro e'ure rovadeje. Bure rovamu jovëro hasaromo boat gagore abueromo irijiomoromo diruvëvo'ië'adeje.

<sup>24</sup> Diruvëvo'ia'amu gavë'i Iesuare ijorajoho jaburo va'o Iesu ioromo uavareje: Asë'e Tisa vuovavuo'ië'ajëjo. Vuovavuo'ië'ajëjamu ri'öromo burohu'o hasajaje jovohu'o uëvadeje: Vuonugohëjo. Vuonugohëjamu buru rovadoho barë'i jovoho u'uhadeje.

<sup>25</sup> U'uhamu gagorovo Iesuro hesi aribövioho uëvadeje: Jemë rabëni bogo ma uehorovevarujëjo. Ëhi'amu rueho jaburo tiöromo juhuonivoromo uarovareje: Ave aho diehi jië'e ae höjo. Huhu uëvë'o'oho bogo aëremuoho ejaho'i burohu'o jovohu'o jabu'o hesi jöho ejaharue höjo.

*Satan-are a sisë aho'obëhe ae gemu hesirire jioruomamu Iesuhu rarovö'ö'amade jöhoje.*

<sup>26</sup> Ëhi'amu Iesumëro e'u döre va'adoho va'o Gergesa sa'are va'o baboro bejareje. Galilee sa'aho nume e'u ioni gönö jio'i Gergesa sa'aho ruhe ioni gönö jiadeje.

<sup>27</sup> Gergesa sa'are va'o baboro bejamu gagorovo amo raje ae gemuëro rueromo Iesu birohadeje. Ëaho aru'aho sisë aho'obëhëro dëre abue'amamu simane huotorovë'e jiadeje. Niögu rumo'e ma-dë'ahobatëremu majae ëgobövie hibe rovë'e jiadeje. Osaroho bogo hi'i guavo'amarue munë gagoremu hinövadeje.

<sup>28</sup> Hijë'ëro rueromo Iesu garomo jö'e dadovoromo Iesuare höru bëhire ague aho hiromu ma-darugo'o uvadeje: Iesu ja God dö mare hijaje a hesi Harihe javajëjo. Ja rabëni sihusihuego'i rovane höjo. Vuonugevëjo. Nadi huë sisëho vi'ehoho bojëmëjo.

<sup>29</sup> Vi'ehoho nadi bojëmijë uvade hesi bëhoho urimë'i aru'aho sisëhuro höröjörö Iesuro uavë'ego ëhuni uvadeje. Röhu urimoho ë aru'aho sisëhuro hu baenövadeje. Bae'ego aëro hu avoho mueberomo hesi övoho höröho tövaho'amonövareje. Tövaho'amo'ego ö'oho tarivo ruruhö'öromo aru'aho sisëhuro hesi uhure jië'ëro ua'ego a rumo'e sa'are va'onövadeje.

<sup>30</sup> Ëhi ë'onövë'ëro Iesuro uavadeje: Jasi ihoho rahuo höjo. Rahuo höjamu uavadeje: Nasi ihoho Siriehu Bimuvanovë'o'oho jevajëjo. Huhu ëhi uavade hesi bëhoho a sisë aho'obëhe siri va'ëne hesi dëre abue'amë'ëro jië'ëro ëhi uavadeje.

<sup>31</sup> Ëhi'amu ë dë uhure sisë ariböviohuro Iesu ëninamiromo uaruomadeje: Nadi uönego no sisëroho revo'irarëjo.

<sup>32</sup> Röhu mahe aho'obëhe aruhëre dahoru ahore gemuoro ie ue'ahamu gagorovo dëre sisë ariböviohuro Iesu uaruomadeje: Uövüego no suorovo va'oromo aruhe mahu jabesi dëre va'o abuejarëjo. Abuejarëjamu uëvadeje: Ëhuro va'ohëjo.

<sup>33</sup> Ëhuro va'ohë uëvamu hejë'i rue sisë ariböviohuro ë a hesi dëre jioromo suorovo va'oromo ruhe mahu jabesi dëre abueruomadeje. Abueruomamu ë mahohuro va'o baradore rireromoromo e'ure siö ruruhö'ö va'oromo jove ue'ahoromo vuovadeje.

<sup>34</sup> Vuovamu gavë'i mahu muebe'amarue ariböviohuro huruomoromo amo börömëro amo ininore jöho majëhibe va'areje.

<sup>35</sup> Jöho majëhijamu hejë'i ae aho'obëhe rueruomadeje ga'iro diehi jiego. Iesuro rueromo gavareje aru'aho sisëhu dëre jioromo suorovo va'oruomade aho simanoho mae jio'ego niöge ba'amë'e Iesuare höru bëhire hijamu. Ëhi gagorovo juhuonivoruomadeje.

<sup>36</sup> Juhuonivamu Iesuhu mu vaejamu gavare ariböviohuro uëvareje: Sisë ariböviehu dëre abue'amade aho Iesuro ëhi ajami'lego marëhijajo.

<sup>37</sup> Marëhijajamu Gergesa sa'a rajoho jaburo heromo sisë maro juhuonivë'ëro Iesu uavareje: Nosi sa'aho vuonugo'i va'ëjo. Vuonugo'i va'ëjamu Iesuro boat-re ajiomoromo sionëro vuonorö'ö va'ië'adeje.

<sup>38</sup> Va'ia'amu aru'aho sisëhu dëre jioromo suorovo va'oruomade ahuro Iesu uavadeje: Na ö'lo ja'o hi'i negajëjo. Negajëjamu Iesuro nijio'iraeromo sionëro nugö'öromo

<sup>39</sup> uavadeje: Bogo rue'a'anuëjo. Sionëro jasi amoro va'oromo uënëjo: God-ro ëhi mabëhe ajemijamu rovode höjo. Ëhi uavamu rue ahuro va'oromo amo börömo jöe majëhibe juvo barëjadeje. Majëhiromo uëvadeje: Iesuro ëhi mabëhe ajemijamu rovode höjo.

*Iesuhu magonahe niö'i Jairus-are abojohu'o magonahe gö'o ajëmade jöhoje.*

<sup>40</sup> Ëhi'amu Iesuro boat-re vuonorö'ö rueromo ve e'u ioni gönö rovadeje. Rovamu ae aho'obëhe hu muebejë'ëro gavare rovamu gagorovo nimoro-horomo rajahiruomadeje.

<sup>41-42</sup> Rajahiruomamu iae ae gemu hesi ihe Jairus-ro rovadeje. Jairus hu God rajahijarue osa muebejaje ae jiadeje. Röhu hu aboje ihevae gemu jiadeje. Abojoho vadune aho'obëhe 12 rabu'e jiadeje. Amo guomo'ië'adeje. Guomo'ia'amu gagorovo Jairus-ro rueromo Iesure höru bëhire ague aho hiromo dinamiromo uavadeje: Nasi osaro rueromo nasi abojoho ajamëjo. Ajamijëjamu hegorovo Iesuro hu'o va'adeje. Va'amu ae aho'obëhe hu'o gemuore ëhi tatijiomobe va'areje.

<sup>43</sup> Tatijiomobe va'amu gagorovo iae magonahe gemuëro jabu'o va'adeje. Ëmagonahoho manaero garorovade guomo guomoho bogo barë'i ëhi jiemu jiobe va'adoho vadune aho'o 12 barëjë'e jiadeje. [Hesi ijo baje doctor jabesi örire bu'ö barëjadeje.] Röhu ajami'iröhoho bogo eni jëvë'ëro ëhi jiemu jiadeje.

<sup>44</sup> Ëhi jiemu jië'ëro ë magonahohuro Iesure dejonö rovadeje. Rueromo niögu vituoho rëhamu gavë'i kö rovadoho ijoho bogo rovadeje.

<sup>45</sup> Ijoho bogo rovamu Iesuro ae uëvadeje: Ja rahuaro rëhevane höjo. Rëhevane höjamu hegorovo ae aho'obëhe uavareje: No bogo rëhavë'e javuajëjo. Rëhavë'e javuajëromo Peter-ro uavadeje: Tisa ja rabëni ëhioho uövuanuëjo. Ae aho'obëhe jasi bëhire jijihoromo tatijiomavaruëjo.

<sup>46</sup> Tatijiomavaruëjamu uëvadeje: Iae aëro rëhevade höjo. Na hejajoho nasi darugoho ae ajëmi'i gö va'ë'e jiavajëjo.

<sup>47</sup> Va'ë'e jiavajëjamu ë magonahohuro garomo uvadeje: Naehu Iesu niögure rëhodoho bogo subivo varijënoho jëvajë uvoromo juhuonivadeje. Juhuonivoromo butubutumobe rueromo Iesure höru bëhire ague aho hijadeje. Ague aho hiromo ae aho'obëhe jabesi nunire Iesu uavadeje: Na ëhi marëjevojöro negamu ëhuni rëhavode höjo. Rëhavamu ëhuro ma-burëro marëjevade höjo.

<sup>48</sup> Ëhi uavamu hegorovo Iesuro uavadeje: Abojëjo. Jero na mae uehorovevamu ëhuro marëjavë'e höjo. Vaevë'e va'onëjo.

<sup>49</sup> Iesuro ëhi uavamu gavë'i ae göëro Jairus-are osare jioromo rueromo uavadeje: Jasi abojoho mami'e guomë'e höjo. Ëhuni mino'e tisaho u'uoho bojamëjo.

<sup>50</sup> Mino'e u'uoho bojamëjamu Iesuro mu'öjahiromo Jairus uavadeje: Nadi juhuonivo'i mae uehorovonëjo. Ëhi jië'ohuro jasi abojoho i'ovo'ajëjo.

<sup>51</sup> I'ovo'ajë uanugoromo Iesuro Jairus-are osare va'oromo Peter John James magonaho harihu hesi vëmu vavu'o'oho ëho jaburo hu'o va'ojöro uë'i a ioro'ioroho nijio'iraejêvadeje.

<sup>52</sup> Nijio'iraejêvonugoromo osare va'oromo gavade ae aho'obëhe magonaho hesi jöëni nierusuburu'e bamoromo jabesi muo'amorovamu gëgorovo Iesuro uëvadeje: Nadi nierusuburu'e bamohëjo. Ëmagonaho hariho bogo guomo'i ma-niavajëjo.

<sup>53</sup> Ma-niavajëjamu hegorovo rueho jaburo garomo uvareje: Magonahoho iae mae guomë'e höromo Iesu sivoromo ijo'ijahareje.

<sup>54</sup> Ijo'ijahamu Iesuro va'oromo magonaho hesi övore ma'enoromo mardarugo'o uvadeje: Bësu ri'öjêjo.

<sup>55</sup> Ri'öjêjamu magonaho hesi aru'ahohuro vuonorö'ö rovamu hejë'i maburëro ri'öjêdeje. Ri'öjamu gagorovo Iesuro uëvadeje: Ie bojamego ijajo.

<sup>56</sup> Ëhi'amu vëmu vavu'o'oho tiöjêvadeje. Tiöjêvamu Iesuro uëvadeje: Naehu vaejode muoho nadi aho uërëjo.

## 9

*Iesuale ijoraje 12 jabuhu va'oromo mu vaeröhego Iesuhu rëmö'öjêde jöhoje.*

<sup>1</sup> Iae Iesuro hesi ijoraje 12-ho uëvadeje: Ro gemuoro gagovohëjo. Gagovohëromo rovamu uëvadeje: Jemëhu mu vae'irarijohuni nasi darugoho bojëmijajëjo ëhuro jemëro Satan-are a sisë a dëre jio'amë'o'ohorarovö'ö'amoromo guomo guomo'e aribövioho ajëminövo'irarijêgo.

<sup>2</sup> Ëjöho darugoho bojëmijê'e jevaje ëhuni va'oromo God-hu böröme namiromo muebejêvaje jöho majêhibe guomo guomo'e aribövioho ajëmibe jijihorëjo.

<sup>3</sup> Ëhi uëromo uëvadeje: Va'ië'iroho bövioho bise'o'oho nadi ujuohorëjo. Ha'itoho esöho iruno'o'oho ijo bajoho nadi ujuohorëjo. Niögoho nadi göho ujuoho'i ma-gemu ruohoromo jijihorëjo.

<sup>4</sup> Amo göre göre va'oromo aehu di osare raromöjörö uëvamu va'ororomë'o'oho ëhuremu raromoromo va'onövorëjo.

<sup>5</sup> O di amore ariböviehu jemesi örire nu huodëgë'o'oho amoho nugo va'irögoro jabesi sa'a hesi tohotohe jemesi höru hitahire jiajoho sa'aroriremo va'ego ë amo rajohuro garomo uvo'irarëjo: No sisë ë'ë'e javuajëjo.

<sup>6</sup> Ëhi majêhijamu hegorovo Iesuale ijorajoho jaburo ri'öromo va'areje. Va'oromo jö maho majêhibe guomo guomo'e aribövi jabesi sinoho ajëmibe ame aho'o jijihareje.

*Herod-hu Iesuale jö heromo dadivade jöhoje.*

<sup>7</sup> Iae Galilee sa'are a böröme Herod-ro hejade uvoruomamu: Iesumëro ëhi jië'e mu masije vae'amë'e hö uvavamu hegorovo Iesuale jöho uehorovoromo uvadeje: Diehi'oromo ë'ajëjo. Ëhesi bëhoho hu hejadeje a ioro'iorohuro uvoruomamu: Iesu hu John bapataeto vaenövade ahuro guomoromo ri'öjê'e höjo. Ëhu'ëro ëhi jië'e muoho vae'amaje höjo.

<sup>8</sup> O a ioro'iorohuro uvoruomamu: Iesu hu mami'e hijade ae Elijah-ro rovë'ëro ë'ajëjo. O a ioro'iorohuro uvoruomamu: Mami gö'e jö God-aro baeromo majêhinövare aribövioho röhu gemuëro i'ovoromo ri'öjê'ëro ë'ajëjo.

<sup>9</sup> Ae göëro göëro jöe gö gö ëhi atavamu hegoro Herod-ro dadivamu uvadeje: Nani ë aho bogo John-hu höjo. Mami'e na John-are sönöho

tariojahode hōjo. Röhu ë mu masijo vae'ego aehu garomo ato'ego na hejajoho ë iaho rahuo hōjo. Ëhi uvoromo Iesu ga'i nimadeje.

*Iesuhu ae aho'obëhe 5,000 da'uojëhade jōhoje.*

<sup>10</sup> Ëhi'amu apostle ömo'ömohuro vuonorö'ö rueromo Iesu uavareje: No ëhi ëhi ë'oromo rovere hōjo. Rovare hōjamu Iesuro sōjëvoromo Bethsaida amore jabesi sivue raromo'i va'areje.

<sup>11</sup> Bethsaida jabesi sivue raromo'i va'i va'amu ae aho'obëhe ë jōho heromo rueruomadeje. Rueromo birohoruomamu gëgorovo Iesuro uëvadeje: Iae mae rovë'e jëvajë uëngoromo God-hu bōröme namiromo muebejavuaje jōho majëhiromo guomo guomo'e aribövioho ajëmijadeje.

<sup>12</sup> Ëhi'ojuvo majae garobo'e bamamugo hesi ijoraje 12-ho jaburo rueromo uavareje: Aveho a rumo'e sa'ae hōjo. Ëhuni ave aribövioho rëmö'öjego ave bëhire amo masijore amo ininore va'oromo ie nahoromo ue'ahoromo momorö'ö'irarëjo.

<sup>13</sup> Momorö'ö'irarëjamu uëvadeje: Bogajo. Jemëro iruno'oho da'uojëhirëjo. Da'uojëhirëjamu uavareje: Iae mae hōjo röhu no ie övo gö mine visue niö'i ëhemu javuo'i gö bogojavuajëjo. O na ja uöromo ë'anuëjo noro va'oromo ave ariböviohuni ie imo'amojoro. Ae aho'obëhe jië'ëro no bogo eni javuajëjo.

<sup>14</sup> Ëhi uavare hesi bëhoho ama'e aho'obëhe 5,000 rabu'e ë raromë'ego ëhuni uavareje. Ëhi uavamu Iesuro hesi ijorajo ömo'ömoho uëvadeje: Uëvego 50 50 rabu'e hahagu hahagu gagovoromo ëhi raromobe va'arëjo.

<sup>15</sup> Raromobe va'arëjamu rue ijorajoho jaburo uëvamu ae aho'obëhe ëhi raromobe va'oruomadeje.

<sup>16</sup> Ëhi raromobe va'amu gagorovo ie övo gö mine visue niö'i ujuoho rovaroho ëho Iesuro ujuohoromo ö'idöho sioroho garomo God huë mae uavadeje. Huë mae uanugoromo ioho ato'atovoromo hesi ijorajo ömo'ömoho i'imëmijamu suvuorëmijareje.

<sup>17</sup> Suvuorëmijamu ae aho'obëhe uel'ahamu da'uëgadeje. Da'uëgamu gagorovo ijorajoho jaburo vitu vituho gagovoromo esöe aho'obëhe 12 aego'amareje.

*Iesu hu ëhi jië'e ae jiaje jōho Peter-hu jövade jōhoje.*

<sup>18</sup> Ëhi'amu Iesuro huro hesi sivue parie vaejamu evare hesi ijorajoho jaburo hu'o raromareje. Raromamu gagorovo uëvadeje: Na rahuo jevaje jōho ae aho'obëhe diehi atoruomaje hōjo.

<sup>19</sup> Diehi atoruomaje hōjamu uavareje: A ioro'iorohuro uvoruomaje hōjo: Ja John bapataeto vaejavuonövane ahuro rovë'e javajëjo. A ioro'iorohuro uvoruomaje hōjo: Ja Elijah-ro rovë'e javajëjo. A ioro'iorohuro uvoruomaje hōjo: Mami gö'e jö God-aro baeromo majëhinövarije aribövioho röhu jero gemuëro i'ovoromo rovë'e javajëjo.

<sup>20</sup> Ëhi uavamu Iesuro uëvadeje: Röhu jemë nasi jōho diehi ataruje hōjo. Diehi ataruje hōjamu Peter-ro ri'öromo uavadeje: Ja God-hu uavë'ëro bōröme namiromo ajamuijanue aho javajëjo.

*Iesuhu huë vavaeni baeromo guomoröhe jö jövadohoje.*

<sup>21</sup> Javajëjamu Iesuro jōho darugo'o majëhiromo uëvadeje: Ëjōho nadi aho huruoho majëhirëjo.

<sup>22</sup> Ëhi uëngoromo uëvadeje: God-ro ëhi bamë'ëro ëhu'ëro hesi A Maho naro vi'ehe huë vavaene bövie bise'e bae'ejōjo. Jew rajo a duvaho

ömo'ömoho priest masijoho Jew rajo jögoru öri röjehijarue aribövioho ëho jaburo na bijönegoruomo'ajëjo. Bijönegoruomo'iramu aëro anego'iramu guomevo'ajëjo. Guomoromo majae niö'i gemu hesi uhure i'ovoromo ri'ö'ejöjo.

<sup>23</sup> Iesuro hesi ijorajoho ëhi majëhinugoromo ae aho'obëhe uëvadeje: Ae rahuaro nasi ijore ijore juvo'i nimë'o'oho jasi sinehu nimajoho nadi uehorovo'i vae majae uvonëjo: Iesure jöëni vi'ehe huë vavaene javoje rabe baeromo guomevë'o'oho iae hesi hö uvoromo korosi hesi i'uoho banigojiomanovoromo nasi ijoro ijoro juvonövonëjo.

<sup>24</sup> Ja jasi sinohuni uehorovoromo biririvoromo ave sa'are hi'i ëhemu uehorovë'o'oho ijönöho guomo öriro va'a'anuëjo. O ja nasi jöëni guomë'o'oho ijönöho maro hi'a'anuëjo.

<sup>25</sup> Jaehu are jove sa'ae mae sisë aho'obëhe bae barëli röhu arijo'arije ijumorovë'o'oho o sisërërovë'o'oho na ja ëhuro mae javo'ajëjo. Bogajo.

<sup>26</sup> Ehesi bëhoho ae rahu nasi jöëni o naehu majëhijaje jö hesi jöhuni javojëgë'o'oho u'emu God-are A Maho naro nasi ajohu'o nasi Vavu hesi ajohu'o anera maemu jië'e jabesi ajohu'o rue'iramu evare nani javoji-moruomade ariböviohuni javojego'ajëjo.

<sup>27</sup> Röhu ave jöho na jö mae uë'ië'ajëjo. Jemë a ioro'iore ave riravarujoho bogo vuovë'e raromoromo God-hu böröme namiromo muebejaje ajoho ga'a'arujëjo.

*Iesure nu ano'ehu ajivoromo gorosovade jöhoje.*

<sup>28</sup> Ehi uënugoromo hurae gemu barëjamu Iesuro Peter John James ëhi söromo God-are örire jöe jövo'i dahorure ajiomadeje.

<sup>29</sup> Ajiomoromo God-are örire jöe jövamu Iesure nu ano'o'oho gorosovoromo ma-mabëhe jio'i hesi niögoho majaehu bamajëhi ëhi ajivo avohadeje.

<sup>30-31</sup> Ajivo avohamu gavë'i iae urimë'i arinövare ae niö'i Moses'o Elijah'o ma-majioho aji mare rirarovoromo jabu'o Iesu'o jöe atareje. Atoromo God-hu nimaje mu Iesuhu vaeromo Jerusalem guomoröhe jöho atareje.

<sup>32</sup> Atoruomamu Peter-mëro nunëhëgamu momorö'ö uro'amareje. Momorö'ö uro'amë'ëro ri'ö'i gavareje Iesu aji'ere nami'ego ë ae niö'ioho jabu'o ë rirarovamu.

<sup>33</sup> Rirarovoromo Moses'o Elijah'o Iesu nugo va'ia'amu gavë'i Peter-ro Iesu uavadeje: Tisa no ave raromaruoho iae mae höjo. Uövüego no javu harihe niö'i gemu vae'amarëjo jani gemu Moses-ni gemu Elijah-ni gemu. Peter-ro bëhoho bogo avoho uehorovë'e ë jöho ëma jövadeje.

<sup>34</sup> Jövamu gavë'i suëro rueromo aegëhadeje. Aegëhamu Peter-mëro gavare Iesu Moses Elijah suëro numëvamu gagorovo juhuonivareje.

<sup>35</sup> Juhuonivë'i hejareje sue uhure uvavamu: Ave aho nasi Harihe naehu baejode aho höjo. Huhu jövaje jöho avoho herëjo.

<sup>36</sup> Ehi uvavamu hejë'i gavareje Iesu hesi sivue namijamu. Ehi gavë'ëro Peter-mëro rabe rabe gavaroho subivëhoromo aho bogo majëhijareje u'emu majëhi'iröhëro.

*Iesuhu Satan-are a sisë aharihu hesi dëre jiamu rarovö'öjade jöhoje.*

<sup>37</sup> Ehi ë'ië'ëro sisonuvamu gagorovo Iesu o hesi ae niö'i gemu dahorure abuejareje. Abuejamu gavë'i ae aho'obëhe rueromo Iesu birohuruomadeje.

<sup>38</sup> Ae aho'obëhe ro birohoro röhu ae gemuëro ma-darugo'o uvadeje: Tisa huë baejevoromo nasi harihoho ro gavëjo. Na aboji harihu'e bogojëvo'i avehuremu gemu jëvajëjo.

<sup>39</sup> Röhu Satan-are a sisëro hesi dëre abueromo ijumahego aharihoho simane sisërëromo ma-majioho jö'e dadovoromo bijöbijövoromo övo'lo hörü'lo ajiomoromo jö'onö obohu tatogo'e rovaje höjo. Obohu tatogo'e rovego a sisëhuro bogo burëroho hörö va'i sino haho'oho ijumahojuvo u'uhego evare höröromo va'aje höjo.

<sup>40</sup> Ëhi ë'i hijë'lego naro jasi ijorajo ömo'ömoho uëvode höjo: Aru'aho sisëho rarovö'öhego va'ajo. Ëhi uëvamu rarovö'ö'i ë'lo gavaroho bogo eni jëvade höjo.

<sup>41</sup> Bogo eni jëvade höjamu Iesuro uëvadeje: Asë'e ave jaruvore raromaruje aribövioho jemë bogo ma uehorovo'i jöe gö gö ëma uehorovaruje aribövie jëvajëjo. Na majae dimino'e jemë'oho hiromo jemesi mu sisëho garomo manunëro ga taemobe va'ejöjo. Jemesi uehoro sisëhuro na u'uvevajëjo. Jasi harihoho avehuro barovego na gavöjo.

<sup>42</sup> Gavöjamu ë harihoho rovamu gavë'i Satan-are a sisë dëre hijadohuro dë vövöbajo'oho ijumahamu simane sisërëromo sa'are darugo'lo behumorovoromo bijöbijövoromo övo'lo hörü'lo ajiomadeje. Övo'lo hörü'lo ajiomamu gagorovo Iesuro aru'aho sisëho rarovö'öjamu marëjadeje. Marëjamu Iesuro aharihoho baeromo vavuohe sionëro bojamijadeje.

<sup>43</sup> Bojamamu ae aho'obëhe God-are darugo bërömohe garomo jöe barëjëvadeje.

*Iesuhu guomoröhe jö röhu maho majëhijade jöhoje.*

Ae aho'obëhe Iesure mu masijoho aho'lo uehorovoromo jöe barëjëvamu gavë'i Iesuro hesi ijorajo ömo'ömoho majëhiromo uëvadeje:

<sup>44</sup> Ave jöhuremu avoho hehëjo. God-ro ëhi bamë'ëro hesi A Maho na a jabesi övore va'iramu baejevorumo'ajëjo.

<sup>45</sup> Ëhi uëvamu hejareje röhu jö bëhoho dadivëvadeje. Subivëhë'ëro bëhoho bogo gavareje. O ua ga'iröhoho juhuonivareje.

*Di aehu a ioro'oro iosirëmiromo bëröme jiaje jöhoje.*

<sup>46</sup> Ëhi'onugoromo ë ijorajoho jaburo jö aho'ahamirovoromo uarovareje: Iesure ijorajo ömo'ömoho di aho bërömohe javuajëjo.

<sup>47</sup> Bërömohe javuajëjamu Iesuro jabesi uehoroho garomo aharihe gemu baro hesi bëhire nugamu namijadeje.

<sup>48</sup> Namijamu hesi ijorajo ömo'ömoho uëvadeje: Ae rahu aviëhi jië'e aharihoho nasi ihore rajahiromo baejë'oho ëhuro na'lo rajahiromo baejevorumaje höjo. O ae rahu na rajahiromo baejëvë'oho ëhuro remö'öjamu rovode ahu'lo rajahiruomaje höjo. Ëhesi bëhoho jemesirire di aho bise'lo jiajoho God-hu gavajoho ëhi jië'e aho bërömohe höjo.

*Ae rahu jemë'o bogo iro muorovo'e vaejë'oho jemë'o gemuore jiaje a hesi jö Iesuhu jövadohoje.*

<sup>49</sup> Ëhi uëvamu John-ro ri'öromo uavadeje: Tisa no gavare höjo ae gemuëro jasi ihoho uvoromo aru'aho sisë a jabesi dëroho rarovö'öjëvamu. Rarovö'öjëvamu garomo röhu gavare hu bogo no'lo juvaje aho jiamu gagorovo uavare höjo: Vuonugëjo.

<sup>50</sup> Vuonugëjamu Iesuro uavadeje: Nadi ëhi jië'oho ë'orëjo. Ae rahu jemesi örire bogo bijönimë'oho ë aribövioho jemesi aemo'aeme jioruomajëjo.

*Iesuhu Samaria sa'are amore ro hi'ia'amu amo rajehu hesi öri ahare jöhoje.*

<sup>51</sup> God-hu Iesu uavego ö'idöre ajiomo'iröhe majaho dunovamu gagorovo Iesuro uehore gemu baeromo uvadeje: Iae na Jerusalem ajiomo'ie'ajëjo.

<sup>52</sup> Ëhi uvoromo ae rëmö'öromo uëvadeje: Jemëro urimo va'irarijoho Samaria sa'are amo göhuro va'oromo amo rajoho uënëjo: Nörö ö'a'ajëjo. Ö'a'ajëjamu hegoro rueho jaburo va'oromo amore suorovareje bövie bise'le Iesuni avohahoröhëro.

<sup>53</sup> Suorovamu ë amore ariböviohuro uvoruomadeje: Jerusalem amoho sisë jië'e Iesuro ë amore va'i rovajëromo ëhuni Iesuhu jabesi amore hi'iröhoho ahoruomadeje.

<sup>54</sup> Ahoruomamu gagorovo Iesure ijoraje James'o John'o jaburo Iesu uavareje: Tisajo. Na ja nagajëjo noro uavego vënëro ö'idöre jioromo ruvebiromo ë amo rajoho ravëvojöro.

<sup>55</sup> Ëhi uavamu hegoro Iesuro huotorovoromo James'o John'o uëvadeje: Bogave ëhioho uvo'irarijëjo.

<sup>56</sup> Ëhi uënogoromo ame göro va'areje.

*A ioro 'iorehu Iesure ijore ijore jijihö'ia'amu Iesuhu majëhijade jöhoje.*

<sup>57</sup> Örire va'oruomoromo ae gemuëro Iesu uavadeje: Ja dinö'e dinö'le va'ë'iroho na jasi ijore ijore juvonövo'ejöjo.

<sup>58</sup> Juvonövo'ejöjamu Iesuro uavadeje: Jero nasi ijore ijore juvo'i uevanuëjo röhu je'ö majehu sa'a gagore röho avohoromo mare raromaruoho iae jiajëjo. Je'ö ugehu iju vaeromo mare raromaruoho iae jiajëjo. A'i God-are A Ma naehu niavaje hijaje osaho bogojevajëjo. Nadi uvonëjo: Nörö'ö hibe juvë'öho mae hibe juvo'ejöromo nasiriroho ruenëjo.

<sup>59</sup> Ëhi ë'ë'ëro Iesuro ae gö uavadeje: Rueromo nasi ijoro ijoro juvëjo. Juvëjamu ruehuro uavadeje: Iae mae höjo röhu uevego na nimo vuonorö'ö va'oromo nasi vavuoho guavoromo hujeji evare jasi ijore ijoro juvo'iröjo.

<sup>60</sup> Juvo'iröjamu Iesuro uavadeje: O-ajo. Vuonugego vuovo örire jijiharue ariböviohuro jabesi aribövioho guavo'amo'irarëjo. A'i jero va'oromo God-hu böröme namiromo muebejëvaje jöho majëhibe juvonövonëjo.

<sup>61</sup> Ëhi uavamu ae göëro Iesu uavadeje: Bada iae na jasi ijore ijore juvonövo'ejöjo. Röhu uevego na urimo va'oromo nasi aganohe jejëmiromo rueromo evare jasi ijore ijoro juvo'iröjo.

<sup>62</sup> Juvo'iröjamu Iesuro uhu'e uavadeje: Röhu aehu aevoromo mu ravoromo vuonorö'ö uherihobe ravobe va'ë'öho hu muoho bogo avo'avoho ravaje höjo. Ëhesi bëhoho ja uehoro niö'i bæjë'öho ëhuro God-are aji'e öri ari'ö hesi mu vae'iranohe bogo eni javo'ajëjo.

## 10

*Ae aho'obëhe 72 jabuhu va'oromo mu vaejöro Iesuhu rëmö'ö'irögoro jö majëhijade jöhoje.*

<sup>1</sup> Ëhi ë'ë'ëro Badaro ae gö aho'obëhe 72 bæjëvoromo rëmö'öromo uëvadeje: Naehu juvo'irode ë amoro amoro ëhuro jemëro ae niö'i niö'i urimo va'orëjo.

<sup>2</sup> Ëhi uënogoromo uhu'e uëvadeje: Ae aho'obëhe nasinö sö rue'iröhoho ëho mure iruno'e gagovo'iröhoho va'ëne höjo. Mure gagovo'iröhe iruno'öho bövi mae jio'i gagovarue aribövioho no ma-gemu gemu javuajëjo. Ëhuni mu Arijo'öho ëninamiromo uarego huro ae gö'ö rëmö'öjego mure rueromo ajamuiromo iruno'öho gagovo'irarëjo.

<sup>3</sup> Jemëro va'orëjo. Röhu gavë'iajo. Naro rëmö'öjego jemë vaevë'e sheep harihunö'e vörö'e miehu jioruomajire va'ië'arujëjo.

<sup>4</sup> Monioho esöho hörü sinoho nadi ujuoho va'orëjo. Öriroho nadi ae gö gö jabesi öriroho jejëmibe va'oromo örisanuoho ë'orëjo.

<sup>5</sup> Jemë ae gö jabesi osare va'ië'iroho urimo jejëmiromo uënövorëjo: Ave osare aribövioho huë mae baerëjo.

<sup>6</sup> Huë mae baerë'iramu God-are huë ma bae'i nimaje aho ë osare hijë'oho iae huë mae bae'a'ajëjo. O God-are huë ma baeröhoho bijönimoruomë'oho uërëjo: God-are huë ma jö uëvodoho vuonugajëjo. Èhu'ëro bogo bae'a'arujëjo.

<sup>7</sup> Nadi osa göroho göroho momorö'öbe va'i ma-osae gemuoro raromoromo ie jove rabe i'imëmijë'oho ëho ue'ahorëjo. Jemëhu jabesi iruno'o o jovo ue'ahë'oho iae mae höjo rabëni jemë jabesi mue vae'ië'ëro. Èhesi bëhoho ae rahu mu vaeromo mana baejë'oho iae mae höjo.

<sup>8</sup> Jemë di amore va'o suorovamu jabuhu huë baejëvamu gavë'ohuro ie rabe rabe i'imëmë'oho ëho ue'ahorëjo.

<sup>9</sup> Guomo guomo'e aribövie ë amore raromë'oho ajëmirëjo. Amo rajoho jöe majëhiromo uërëjo: Avevejë'oho God-ro böröme namiromo jemë mue-bejëvo'ië'ajëjo.

<sup>10</sup> O jemë di amore va'o suorovamu jabuhu jemë bijönëgë'oho amoho nugo va'irögoro amoro jijihoromo jöe majëhiromo uërëjo:

<sup>11</sup> Noro jemesi bövioho bise'oho rirem'öromo jemesi amore sa'a hesi tohotohehu nosi hörure aegadoho no va'i ëhu'o riremomo va'ëjarëjo ëhuro jemë garomo uvo'irarijego: No sisë aribövie javuajëjo. Röhu ave jöhu'o avo'avoho uehorovohëre. God-ro böröme namiromo aevoromo jemë mabëhe mue-bejëvo'ië'oromo vuonugë'e höre. Ame gö gö jemesi jö bijönimë'oho ëhi majëhinövorëjo.

<sup>12</sup> Naro jemë uëvajëjo: God-hu i'u bojëmi'iröhe maja rovë'iroho Sodom amo rajo jabuhu i'u baeröhoho ëho ma-jianovo'i a'i jemesi jö bogo eruomaje aribövioho jaburo i'u börömo maho baeruomo'ajëjo.

*Ame göehu göehu Iesu bogo ma uehorovare jö Iesuhu jövadohoje.*

<sup>13</sup> Chorazin'o Bethsaida'o amo rajohumë vaevë'oho sisëro revo hesi jëvajëjo. Naro darugo'e muoho jemesi amore vaejego garomo röhu nasi jöho bijönimaruje höjo. Naehu darugo'e mu jemesi amore vaejedoho Tyre amore o Sidon amore vaejego ga'ibejarëjo mami'e jabesi sisëni huë vavaene baeromo niögu sisë io'amoromo uonëro buerovoromo raromoromo uehoro sisëho vuonugo'i uehoro mae baeruomo'ibejajo.

<sup>14</sup> God-hu i'u bojëmi'iröhe maja rovë'iroho Tyre o Sidon rajo jabuhu i'u baeröhoho ma-jianovo'i jemëro i'u börömo maho bae'a'arujëjo.

<sup>15</sup> Röhu Capernaum amo rajohumë jemëro jemesi sivue uehorovoromo uvaruje höjo: Nosi ihoho ö'idöre ajiomo'ajëjo. Bogo ëhioho jio'i sa'aro be'a'ajëjo.

<sup>16</sup> Röhu nasi ariböviohumë ae rahu jemesi jö ejëhë'oho nasi jöhu'o ejeharue höjo. O ae rahu jemë juahëmijë'oho na'o juahemijarue höjo. Ae rahu na juahëmijë'oho rëmö'öjamu rovode ahu'o juahamijarue höjo. Hesi ae 72-ho ëhi uënuoromo rëmö'öjamu va'areje.

*Ae aho'obëhe 72 jabuhu Iesuarue mu vaenugoromo vuonorö'ö rovarue jöhoje.*

<sup>17</sup> Va'ë'ëro ë ae aho'obëhe 72-ho jaburo nimorohë'i vuonorö'ö rueromo Iesu uavareje: Bada mue aho'obëhe mabëhe vaebe jijihë'ëro rovaruëjo.



No jasi ihore uëvamu Satan-are sisë ariböviohuro ejahuoromo suorovo va'oruomade höjo. Ëhi jië'e muoho ëhu'o gavë'e javuajëjo.

<sup>18</sup> Gavë'e javuajëjamu Iesuro uëvadeje: Satan-are ariböviehu jemë ejëhare hesi bëhoho naro gavode höjo Satan-are vöröe barëromo baderehu baderivajëhi Satan ëhi ö'idöre jioromo berovamu.

<sup>19</sup> Iae nasi mu vae'irarije darugoho bojëmijë'ëro ëhuro jemëro vörö'le sigobohu'o niani'öhu'o hörëro taemo'amoromo Satan-are vöröho aho'obëhe ruahö'ö'amo'arujëjo. Ëhi ë'iramu bövioho bise'oho jemë bogo ijumëvo'ajëjo.

<sup>20</sup> Iae ëhi höjo. Röhu Satan-are ariböviehu jemesi jö ejëharuoho ma-jianovë'e jiaje nadi uehorovo'i a'i jemesi ihe ö'idöre jajivë'e jiajoho ëho uehorovoromo nimorohorëjo.

### *Iesuhu nimorohade jöhoje.*

<sup>21</sup> Ëhi uëromo evare majare Iesuro God-are Aru'aho hesi huë maho baeromo nimoroho avohadeje. Nimorohoromo God uavadeje: Apo ja ö'idörohu'o sa'arohu'o muebejanue ae javajëjo. Naro jasi örire huë mae uavajëjo. Rabëni hesi bëhoho jero gavane nuni aji'e a masijohuro uvoruomamu: Nosi simanoho mae javuoromo bövie bise'le ga barëjë'le javuajë uvamu gëgorovo jero jasi jöho jabesi örire subivëhë'e javajëjo. A'i gavane bogo gavë'e ariböviohuro bogo döroho bamorovo'i jöho he'i nëgamu gëgorovo jero jasi jö bëhoho röjëhi'ë javajëjo. Apo iae mae höjo. Jero jasi nimoromo ë'ane höjo.

<sup>22</sup> God ëhi uanugoromo ë aribövioho uëvadeje: Nasi Vavuohuro jöe aho'o bojëmijë'le höjo muebe'irodego. Vavuohuro gemuëro Harihoho na avoho gevaje höjo. Harihoho naremuëremu Vavuoho avoho gavaje höjo. O Harihu naehu di aribövi röjëhi'i negë'ohuro ëhuro ë ariböviohuremu röjëhijego jabu'o Vavuoho gavarue höjo.

<sup>23</sup> Ëhi uëvë'ëro Iesu'o hesi ijorajoho jabu'o jabesi sivue raromoromo Iesuro hunuorovoromo uëvadeje: Jemë mu maho gavarujëro jëvë'ëro ëhu'ëro jemë mae jëvajëjo.

<sup>24</sup> Ave jöho na jö mae uë'ië'ajëjo. Jemëhu gavaruje muoho o hejaruje jöho urimë'i jö God-aro baeromo majëhinövare ariböviohu'o sa'are a masijohu'o aho'obëhe jaburo nimoruomade höjo garomo he'iro. Röhu bogo garomo heruomade höjo. Röhu God-ro jemë ajëmijë'ëro ëho gavaruje höjo. Ëhu'ëro jemë huë mae baejë'e jëvajëjo.

### *Sa'a gö rajehu sa'a gö rajo ajamade uhu jöhoje.*

<sup>25</sup> Ëhi'amu gagorovo Jew rajo jögoru öri röjëhijaje ae gemuëro Iesure dëho bijioho ga'irögoro ri'öromo uavadeje: Tisajo. Na diehi'oromo ioro'ioremuoho maroho hi'ejëjo.

<sup>26</sup> Maroho hi'ejëjamu Iesuro uavadeje: God-are surire jöho diehi jajivë'le höjo. Ja uehorovanuoho bëhoho diehi höjo.

<sup>27</sup> Bëhoho diehi höjamu ruehuro uavadeje: Jasi dë vövöbajo'e aru'ahe daruge uehore aho'obëhe Bada jasi God ma-hu gemu bojaminëjo. O jö göho jaehu jasi arijo'arije rajahirovanuëhi jasi ae gemuoho ëhi rajahinëjo.

<sup>28</sup> Rajahinëjamu Iesuro uavadeje: Ja jö mae jövanuëjo. Ëhi ë'ë'oho ëhuro ja maro hi'a'anuëjo.

<sup>29</sup> Hi'a'anuëjamu rue röjëhijaje ahuro hesi ihoho mae jiojöro nimamu Iesu uavadeje: Röhu nasi ae gemuoho rahumë höjo.

<sup>30</sup> Rahumë höjambu Iesuro uhu'e uavadeje: Iae Jew raje ae gemuëro Jerusalem jioromo Jericho amore abue'ië'ade höjo. Örire abueromo nume vajiohu'e aribövi jabesi övoro va'ade höjo. Övoro va'amu guduamoromo niögoho maho sisëho vajiohëro ujuohahoromo sa'ijosa'ijovoromo gavare guomo'ia'amu gagorovo nugo va'are höjo.

<sup>31</sup> Va'amu gagorovo priest-ëro ijönö örire ruvebijade höjo. Ruvebi'i gavade aho raromamu gagorovo iosiramiro mo öri ioni gönö va'ade höjo.

<sup>32</sup> Èhi'amu Levi raje God-are mu ajamaje ahuro èhi gemuoho ë'ade höjo. Ruvebiromo bëhire va'oromo aho ërimahonugoromo öri ioni gönö va'oromo iosirami va'ade höjo.

<sup>33</sup> Va'amu gagorovo sa'a gö raje ae gemuëro örire ruvebijade höjo. Hu Samaria sa'a raje jemëhu nu huodëgaruje sa'a raje ae gemuëro ruvebijade höjo. Èho rajëro ruvebiromo Jew rajoho birohade höjo. Birohoromo gavade raromamu gagorovo huni vavaenimade höjo.

<sup>34</sup> Vavaenimamu va'o garomo nemo'amade sagohore ninugu'e osuhu'o wine jovo osuhu'o otehahoromo muohaho'amade höjo. Muohahonugoromo banigojiomoromo hesi mi dejore bamonugoromo hu'irae ba'obuejadoho abo öri jijihoromo momorö'öjarue osare rovade höjo. Rueromo hiromo aho avoho ajamijade höjo.

<sup>35</sup> Ajamiromo diroharëro sisonuvamu gagorovo Samaria rajohuro ajivë'e ijo baje niö'i jabesi uhure aho'o jje'oho baeromo osa muebejaje aho bojamiromo uavade höjo: Na va'ajëjo. Jero ave aho avoho muebenëjo. Monie gö'o bu'öjè'oho vuonorö'ö rueromo naro jaehu bu'öjane ë hesi manaho bojami'ejöjo. Èhi'ade höjo.

<sup>36</sup> Röhu ja diehi uehorovanuëjo. ÈJew rajohuro vajiohu'e aribövi jabesi övore va'oromo sisë birohade höjo. Sisë birohamu ae niö'i gemu ro hu gavare höjo. Göho priest-ëro göho God-are mu ajamijaje ahuro göho nu huodëgaruje sa'a gö rajohuro èhi ro gavare höjo. Röhu di aho hesi ae gemuoho jiade höjo.

<sup>37</sup> Ae gemuoho jiade höjambu jögoru öri röjèhijaje ahuro uavadeje: Huë baeromo ajamijade aho hu hesi ae gemuoho jiade höjo. Èhi uavamu Iesuro uavadeje: Jero va'oromo èhi jje'e muoho vaenövonëjo.

*Iesuhu Martha'o Mary'o gë'i va'ade jöhoje.*

<sup>38</sup> Èhi uënugoromo iae Iesu'o hesi ijorajoho jabu'o va'aroho va'o amore suorovareje. Suorovamu magonahe gemu hesi ihe Martha-ro Iesu uavadeje: Nasi osaro ro hijëjo.

<sup>39</sup> Hijëjambu Iesuro osare va'o hijadeje. Hijamu Martha-are öe Mary-ro ro Badare höru bëhire hiromo huhu jö röjèhijajoho hejadeje.

<sup>40</sup> Hiromo jöho hejambu gagorovo Martha-ro Iesuni bövie bise'e avohoromo bogo eni jiamu nurunurumoromo Iesu uavadeje: Bada nasi öho na remö'öjè'ëro nasi sivue mue vaejajëjo. Na ja nasi jöënioho bogo uehorovanuëjo. Uavego ro ajemajo.

<sup>41</sup> Ajemajambu Badaro uavadeje: Asë'e Martha-ajo. Jero mue aho'obëhe uehorovo'lego ehuro nurunuruagajëjo.

<sup>42</sup> Röhu ja mue gemu bogo baejè'e javajëjo. A'i Mary-ro mu maho baejè'e höjo. Èmuoho no bogo aho'ëjarëjo.

## 11

*Noehu pari vae'iröhe öri Iesuhu röjèhijade jöhoje.*

<sup>1</sup> Iae Iesuro hiromo God-are örire jöe jövadeje. Jöe jövoromo barëjamu gagorovo hesi ijarahoho gemuëro uavadeje: Bada God-are örire jö ato'iröhego John-hu hesi ijaraho ömo'ömo röjëhijadëhi jero no'o ëhi ë hesi öroho röjahuijëjo.

<sup>2</sup> Röjahuijëjamu hegorovo Iesuro uëvadeje: Jemëhu God-are örire jö atë'iroho ëhi uarëjo:

Apo ae aho'obëhe nosi dë vövöbajo'oho avohahuego ja gemu mae uehorovavo'irarëjo.

Jero böröme namiromo aho'obëhe muebejavuego no jasi aharire gemu raromo'irarëjo.

<sup>3</sup> Vae majae ioho bojamuibe va'ego ue'ahago da'uaguo'irajo.

<sup>4</sup> Nosi sisëho uehorovoromo vuonugahuëjo no a jabesi sisëho uehorovoromo vuonugëharue jiaje. Nadi vörö'eroho ramuö'öjago rireromavuo'irajo.

<sup>5</sup> Ëhi uënogoromo Iesuro hesi ijaraho ömo'ömoho uhu'e uëvadeje: Nani jemë ae gemuëro vahi riri'e aemo'aemo hesi osare va'oromo ua'a'anuejo: Isiajo. Ie gö bojemëjo.

<sup>6</sup> Nasi aemo'aeme gö örire juvë'ëro nasi osare ro hijajëjo. Röhu i bojami'irodoho bogojevajëjo.

<sup>7</sup> Bogojevajë'iramu nani jasi aemo'aemohuro osare raromoromo ua'a'ajëjo: Nadi nunëhoho iegëjo. Mami'e oje tugohoromo asisö'o'o na'o momorö'öjë'ëro na bogo ri'öromomo ajami'ejëjo.

<sup>8</sup> Nani ëhi ua'a'ajëjo. Röhu naro jemë uëvajëjo: Nani hu bogo uehorovoromo uvo'a'ajëjo: Nasi aemo'aemego ri'öromomo ajami'ejëjo uvoromomo ajami'i röhu heröhe jero biririvoromomo ua ga'i hi'iramu evare hu ri'öromomo ja rabe rabe nimanuoho bojami'ajëjo.

<sup>9</sup> Ëhuni na jemë uëvajëjo: Biririvoromomo God ua garëjo. Biririvoromomo ua gavë'oho ujuoho'arujëjo. Biririvoromomo nahorëjo. Nahë'oho biroho'arujëjo. Ojoho ano'anovorëjo. Ano'anovë'oho God-ro jiovëho'ajëjo.

<sup>10</sup> Ae rahu ua gavë'oho ujuohoruomomo'ajëjo. Nahë'oho birohuruomomo'ajëjo. Ano'anovë'oho ojoho jiovëho'ajëjo.

<sup>11</sup> Nasi jö hejarujoho ae gö vavu ömo'ömo'e jëvajëjo. Jemesi harihehu uëvë'iroho: Jovo mie bojemego na ijö uëvamu hejë'oho na jemë sareramimomomo sigobu sisëho bojamirëjo.

<sup>12</sup> O uëvë'iroho: Ugo une bojemego na ijö uëvamu hejë'iroho na jemë sareramimomomo ögusuru une bojamirëjo. Bogajo. Jemë i mae i'imami'arujëjo.

<sup>13</sup> Jemë sisë aribövie jëvajëjo röhu jemesi aboji harihu'o avoho suvuorëmi'irarije öroho iae gavaruje höjo. Jemë sisë jëvo'i ö'idöre hijaje jemesi Vavuoho mae jiaje jemëro uvorëjo: Hu maëro jië'ëro ae rahu ua gavë'oho nosi Vavuohuro hesi Aru'ahoho iae mabëhe suvuoramui'ajëjo.

*Iesuhu Satan-are aribövi a dëre jio'amamu rarovö'öjëvadoho hu bogo Satan-are darugoho baeromomo ëhioho ë'adeje. Ëhesi jöhoje.*

<sup>14</sup> Ae gemu aru'aho sisë dëre jië'ëro bitare tövoromomo jöe bogo jövë'e hijadeje. Hijamu Iesuro aru'aho sisëho rarovö'öjadeje. Rarovö'öjamu ë aho aevoromomo jöe jövadeje. Jöe jövamu gagorovo ae aho'obëhe tiöjëvadeje.

<sup>15</sup> Tiöjëvamu a ioro'iorohuro uarovareje: Beelzebul sisë a börömhuro vöröho bojamijego ëhuro Iesuro a dëre aru'aho sisëho rarovö'ö'amaje höjo.

16 A ioro'iorohuro nimareje Iesuare darugoho ga'i diehi jië'e jiego. Ëhi nimoromo uavareje: Bogo gavarue darugo'e muoho røjahuijego no gavarëjo God-ro ja ajamego o bogo ajamego.

17 Ëhi uavamu Iesuro jabesi sareri sarerioho gëromo uëvadeje: Sa'ae gemuehu adovoromo jabesi arijo'arije muorovë'o ho barërovo'ajëjo. O agane gemuehu adovoromo jabesi arijo'arije muorovë'o ho sisërërovo'ajëjo.

18 Ëhuni Satan-ro ri'öromo hesi ariböviohu'o muorovo'ibejajo hesi darugoho uehoroho muoho diehi'oromo biririvoromo nami'ibejajo. Jemëro uvarujëjo: Sisë a börömohuro nörö vöröho bojamego hesi sisë aribövioho rarovö'öjaje höjo.

19 Ëhi jië'o ho na jemesi ariböviohuro sisë a börömo hesi vöröho baeromo rarovö'ö'amarue höjo. O diehi'oromo ë'arue höjo. Jaburo uë'a'aruëjo: Sarerivarujëjo. Aho bogo sisë a börömo hesi vöröho baeromo ëhioho ë'arue höjo.

20 A'i naro God-are darugoho baeromo raro'v' amaje höjo. Ëhuni uvorëjo: God-ro aevoromo böröme namiromo nosi örire muebejavuajëro jië'ëro ëhu'ëro ë'ajëjo.

21 Biriri'e aehu bije tone bahiromo javuoho avoho muebejë'o ho hesi inömo inömoho ma-jiemu jio'a'ajëjo.

22 O ae göehu rueromo javu arijo'o hesi biriri iosiramijë'o ho javu arijo'ohuro uvo'a'ajëjo: Bije tone eni javajëromo hi'iramu rühuro osare rueromo arijo'ohu guduamoromo ruahoromo bijoho tonoho ujuohoniahiromo inömo inöme aho'o ujuoho va'a'ajëjo. Vajiohehu ujuohadoho ae suvuorëmi'ajëjo. Naro Satan ëhi ruahö'öjaje höjo.

23 Ae rahu bogo nasi a jië'o ho ëho huro na'o muorovaje höjo. O na bogo ajemiromo nasi aribövi gagovë'o ho ëho huro arua anumiae nugö'ö' amaje höjo.

*Satan-are a sisëhu a hesi dëre vuonorö'ö abueromo ijumahade uhu jö Iesuhu jövadohoje.*

24 Röhu Satan-are mu ajamaje aru'aho sisëhuro ae gemu hesi dëre hi'a'ajëjo. Hiromo hörö va'a'ajëjo. Va'oromo jovo rumo'e sa'are va'oromo hi'iröhe röho nahobe juvojuvo bogo birohogorovo uvo'a'ajëjo: Na vuonorö'ö va'oromo hijode sionore röhu maho ë hi'ejëjo.

25 Ëhi uvonugoromo vuonorö'ö va'oromo urimo hijade a hesi dëre abueromo ga'a'ajëjo dë vövöbajo'ohu bibivoromo iogorë'e ma-mabëhe osa va'ëne jio'iramu.

26 Ëhi jio'iramu gagorovo va'oromo Satan-are aru'aho sisë aho'obëhe söromo rue'a'ajëjo. Eurimore ro hijade aru'ahoho a sisë höjo. Ijore huhu sörovade ariböviohuro hu iosiramiro mo jabumë sisë bëhi mae jioruomajëjo. Ëhu'ëro urimo sisë'i hijade aho ijönöho sisë bëhe hi'a'ajëjo.

*Huë mae raromo'iröhe hesi jöhoje.*

27 Iesuro ëhi uëvamu hejë'i magonahe gemuëro ae aho'obëhe jabesi ririre jië'ëro Iesu ma-darugo'o uavadeje: Ja rahavoromo amu bojamijade magonahohuro maroho hijaje höjo.

28 Maroho hijaje höjamu uavadeje: Ëho ma-jianovo'i a'i ae rahu God-are jö heromo ejahë'o ho ë ariböviohuro ma-maroho raromarue höjo.

*Ariböviehu Iesu bogo ma uehorovoromo huhu darugo'e mu vaejöro dinamare jöhoje.*

<sup>29</sup> Iae ae aho'obêhe Iesuare bêhire ro tagavoruomadeje. Tagavoruomamu gëgorovo Iesuro uëvadeje: Ave jaruvore raromaruje aribövioho sisë aribövie jëvajëjo. Jemëro darugo'e muoho ga'i uevaruje höjo ga'i God-ro na ajemego muoho vaejaje jevego o bogo. Na ëhi jië'e muoho bogo vae'i a'i Jonah-hu God-are mu börömo rjöhijadëhi ëhi jië'e muohuremu rjöhie'ejöjo. Mue gö gö bogajo.

<sup>30</sup> Nineveh amo rajehu mae uehorovoröhego Jonah-hu mu rjöhijadëhi God-are A Maho naro ëhi jië'e muohemu rjöhie'ejöjo ave jaruvore raromaruje ariböviohuro mae uehorovevo'irarijago.

<sup>31</sup> God-hu mevoromo gëröhe majaho rue'iramu arue sa'a göre börömo vaenövade magonahohuro ave jaruvore raromaruje ariböviohu'o gemu mae ri'öromo God-are nunire nami'a'ajëjo. Nami'iramu God-ro ë sa'a gö rajo magonaho hesi mu maho garomo jemesi mu sisëho garomo jemë uë'a'ajëjo: Ëmagonahehu vaejade ëhi jië'e mu maho bogo vaejë'ego ëhuni na uëvajëjo: Jemë sisë'e aribövie jëvaje sisëro va'ohëjo. Ëhesi bëhoho ë sa'are börömo vaenövade magonahohuro hesi sa'aho vuonugo'i öri ëgoböviro rovade höjo a böröme Solomon-hu nuni aji'e jö jövajoho he'iro. Solomon-hu ae ma-bisemu börömo jioromo jö majëhijajoho ë magonahohuro he'i nimade höjo. A'i naehu Solomon iosiramiro mo börömo mae jioromo jö majëhijajoho he'irarijoho jemë bijönëgajëjo. Ëhu'ëro jië'ëro mevo gëröhe majaho rue'iramu jemë sisërëjëvo'ajëjo.

<sup>32</sup> O ëho majaho rue'iramu ë sa'ae gö aribövie Nineveh amo rajohuro ave jaruvore raromaruje ariböviohu'o gemu mae ri'öromo God-are nunire riravoruomajëjo. Riravo'iramu God-ro jabesi mu maho garomo jemesi mu sisëho garomo jemë uë'a'ajëjo: Nineveh amo rajehu vaejare ëhi jië'e mu maho bogo vaejë'ego ëhuni na uëvajëjo: Jemë sisë'e aribövie jëvaje sisëro va'ohëjo. Ëhesi bëhoho ë Nineveh amo rajohuro mu sisë vaeruomë'ëro hejare Jonah-ro God-are jöe majëhijamu hegoroovo jabesi uehoro sisëho vuonugo'i uehoro mae baejare höjo. Jonah ma-bise'o jioromo jö majëhijadoho Nineveh amo rajohuro hesi jöho ejahare höjo. A'i naehu hu iosiramiro mo börömo jioromo jö majëhijajoho jemë bogo ejeharuje höjo. Ëhu'ëro jië'ëro mevo gëröhe majaho rue'iramu jemë sisërëjëvo'ajëjo.

*Sino haho'o hesi iroho nuni jiaje uhu jö Iesuhu jövadohoje.*

<sup>33</sup> Iro buno'iraejë'iroho bogo sa'a gagoroho hevö gagoroho gurihi'i ma-va'orahoro bamo'anuëjo ae ë osare rovë'oho ajivëvoröhego.

<sup>34</sup> Jasi sino hesi iroho nunoho höjo. Jasi nuni mae jië'oho ëhuro aji maro hi'a'anuëjo. O jasi nuni sisë jië'oho ëhuro ja ramoramoro hi'a'anuëjo. Ëhesi bëhoho naro uëromo ë'ajëjo: Jasi uehoro mae jië'ohuro God-are aji'e jöho baeromo aji maro hi'a'anuëjo. O uehoro sisë jië'ohuro nunoho ramoramovavo'iramu ramoramoro hi'a'anuëjo.

<sup>35</sup> Avo'avoho mueberovonëjo. Nani jasi uehoroho sisëremu jioromo ramoramoro'eremu javajëjo.

<sup>36</sup> Röhu jasi nuni mae jiego ajire hijanuëhi ramoramoho bogojio'i ma-aje gemu jië'oho ëhuro aje aho'obêhe jasirire rueromo ja ajivavo barë'ajëjo. Irehu ajivavajëhi ëhi ajivavo'ajëjo.

*Pharisee ariböviohu'o Jew rajo jögoru öri rjöhijarue ariböviohu'o Iesuhu birëgade jöhoje.*

<sup>37</sup> Iesuro jöho majëhiromu barëjamu gavë'i Pharisee ae gemuëro uavadeje: Nasi osaro rovego no i harihe gemuoro ijarëjo. Ijarëjamu Iesuro va'oromo osare va'o hijadeje ie i'irovo.

<sup>38</sup> Hijamu rue Pharisee ahuro gavade Iesuro a mami muoho bogo vaeromo övoho bogo eguë'e ioho ëma ijamu gagorovo tiöromu uehorovoromo uvadeje: Iesu diehi'oromo övoho bogo eguë'e ioho ëma ijajëjo. Ëhi jië'e muoho God hu bijönimaje höjo.

<sup>39</sup> God bijönimaje höjamu Badaro uavadeje: Övo eguo jö uvanuoho aveho hejëjo. Ëhi jië'e muoho ëho ma-döemu höjo. Pharisee aribövioho jemëro döre muohemu vaeromo hevöho enatuoho u'o'amoromo uvaruje höjo: God iae ëhuni nimorohajëjo. Röhu jemesi uhoho vajiohu'e mu o mu sisë gö gö uehorovarujohuro ëhuro jemesi dë vövöbajo'oho irijiomëhë'e höjo.

<sup>40</sup> Simano sisërëjë'e aribövie jëvajëjo. Nani jemë uvarujëjo: Nunehu ga'amarue inömohe mu God-ro avoho'amo'i nosi dë vövöbajo'oho bogo avohade höromu ëhuni öve hevöe enatue ëhi jië'e inömo hesi va'inumohemu uehorovo'i dë vövöbajo'o hesi sisëho bogo uehorovaruje höjo.

<sup>41</sup> Röhu ae huë baejëvoromo jemesi enatu gagore jovoho hevö gagore ioho ae suvuoreminövorëjo. Ëhi ë'ë'ohuro uvo'a'arujëjo: Inöme bövie bise'e ma-mae gemu jio'amajëjo.

<sup>42</sup> Pharisee ariböviohumë vaevë'oho jemë sisërëjëvo'ajëjo. Jemëro jemesi i jögoru e avohoromo i'o buarohoromo ijarue rihu'e oso harihu harihue gö gö garue gö gö mevoromo 10 10 bahibe va'oromo gemu gemu God suvuore bojamijaruje höjo. Ëhi jië'e jögoru ininoho ejaho avoharuje höjo. Ëhi jië'oho iae mae höjo. Nadi vuonugorëjo. Röhu a mu ma-maemu vaejëvo'irarije muohu'o God-are örire dë vövöbajo'ere uehorovo'irarije muohu'o rumonimaruje höjo. Nadi rumonimo'ibejarijëjo.

<sup>43</sup> Pharisee ariböviohumë vaevë'oho sisërëjëvo'ajëjo. God rajahijarue osare va'ë'iroho jemëro jemesi sinohemu uehorovoromo ëhuni a masijehu raromaruire ë va'o raromo'i nimaruje höjo. O imo'amaruire va'ë'iroho jemë nimaruje höjo ae aho'obëhe uvoruomoröhego: Jemë a masijëro jijiharujëromu rajëhiromu jejëmiruomoröhego.

<sup>44</sup> Vaevë'oho sisërëjëvo'ajëjo. Jemë ma-döhuremu mae jëvo'i uhoho sisë jëvajëjo. A guavoromo hure guodo sibiri'e bogo ruhë'oho jëvanovajëjo. Aëro sagohe sa'a uhure jiaje jöho bogo uehorovë'e ëma uvarue höjo: Ma-sa'a maemu höromu hu döre ë jijiharue höjo. Ëhesi bëhoho ae göëro uvarue höjo: Jemë maemu jëvajëjo. Röhu uhoho ëhi sisë bëhe jëvajëjo.

<sup>45</sup> Iesuro ëhi majëhijamu hegorovo Jew rajo jabesi jögoru öri röjëhijarue ae gemuëro ri'öromu uavadeje: Tisa jaehu ëhi jië'e jö jövanuoho ëho ja bogo Pharisee ariböviohemuoho agëvo'i jögoru öri röjëhijarue aribövioho aho'obëhe no'o agavuanuëjo.

<sup>46</sup> Agavuanuëjamu Iesuro uëvadeje: Iae mae uvanuëjo. Jögoru öri röjëhijaruje ariböviohumë vaevë'oho jemë'o sisërëjëvo'ajëjo. Aehu i'u'e inömu ujuoho va'oruomöjoro buahore bahijëhoromo va'ego bogo ajëmiromu övo name gemu vadu'ehu vitu banigojiomëharuëhi jemëro ëhi ë'aruje höjo. Jemëro i'u'e muoho aho'o ae bojëmiromu bogo mae bogo ajëmi'i manunëremu gëvaruje höjo.

<sup>47</sup> Vaevë'oho sisërëjëvo'ajëjo. Jö God-aro baeromo majëhinövere aribövioho jemesi hijo miono'ohuro muo'amare höjo. Muo'amë'ëro jemëro ëma uvaruje höjo: No God-are aribövioho uehorovëvaruëromu jabesi sino guavo'amare huoho avoho'amaruje höjo.

<sup>48</sup> Röhu jabesi hu avoharujoho ëho uöromo ë'aruje höjo: Jö God-aro baeromo majëhinövare aribövioho nosi hijo miono'ehu muo'amaroho iae mae höjo. Naehu uëvaje hesi bëhoho jemesi hijo miono'ehu muo'amaroho jemëro jabesi sionoho avoho'amaruje höjo.

<sup>49</sup> Jemëhu a ano'irarije uehore ëhi jëv'ëro God-are simano ma'e jöho ëhi uvë'e höjo: Jö nasiro baeromo majëhi'iröhe ariböviohu'o nasi apostle ariböviohu'o ëhi naro rëmö'ö'iramu a jabesi örire va'a'aruëjo. Va'iramu aëro a ioro'ioroho muo'amo'i ioro'ioroho huë vavaene bojëmi'aruëjo. Ëhi uvë'e höjo.

<sup>50</sup> Ëhu'ëro jië'ëro God-hu sa'a bamadevare evare aevoromo jemesi hijo miono'ehu jö God-aro baeromo majëhinövare aribövi muo'amobe rovere ë hesi i'uocho ave jaruvore raromaruje aribövioho jemëni rue'a'ajëjo.

<sup>51</sup> Aevö'ioho aëro Abel anoromo God-are aribövi ioro'ioroho ëhi muo'amobe ruejuvo ro ijo tugoho'ioho Zechariah anare höjo. God-are suvuro bahijarue maratuoho ruhëhi jio'i God-are osa böromö numëhi jiamu Zechariah ë ririre anare höjo. Ave jöho na jö mae uë'ië'ajëjo. God-are aribövi ëhi muo'amobe rovere ë hesi i'uocho ave jaruvore raromaruje aribövioho jemëni rue'a'ajëjo.

<sup>52</sup> Jögoru öri röjëhijaruje ariböviohumë vaevë'ocho sisërëjëvo'ajëjo. God-are mu ma hesi jöho jemëro bogo röjëhi'i aëro heruomöjööni jemëro ë hesi ojo jiovaruoho gurihi bamë'e jëv'ajëjo. Jemë ë mu ma hesi jöho bogo baejaruje höjo. O ae göehu bae'ia'amu gëvë'ocho ahëvaruje höjo.

<sup>53</sup> Iesuro ëhi majëhinugoromo va'adeje. Va'amu gavë'i Jew rajo jögoru öri röjëhijarue ariböviohu'o Pharisee ariböviohu'o ëho jaburo Iesu'o va'oromo aevoromo hu nue huodivoromo dinamiro mo jöe gö gö ua ga'i arijareje.

<sup>54</sup> Jöe gö gö ua ga'i ariromo mu'öjahareje he'i hu guaro berovoromo jöe sisë'i jövego.

## 12

### *Noehu bogo ma-döhemu mu mae vae'iröhe jöhoje.*

<sup>1</sup> Iae ae aho'obëhe mae ro tagavoromo tatijiomorovoromo hörëro bijööro vaerovamu hesi ijorajoho jaburo urimo hejöro Iesuro ëhi majëhiromo uëvadeje: Jemëro gavë'iajo. Pharisee aribövi jabesi i dë huaje osohuro jemesirire rumorovo'ajëjo. Jabuhu sareri'e mu vaejarue ëhi jië'e muohuro jemesirire rumorovo'jööni uëv'ajëjo.

<sup>2</sup> Jaruvoho Pharisee ariböviohuro jabesi mu sisëho gurihijarue höjo. Röhu mue rabe gurihiro jiajoho aho'obëhe va'orahoro jio'a'ajëjo. Rabe rabe saginiëri vaejaruoho aho'obëhe ma-samaro jio'a'ajëjo.

<sup>3</sup> Ëhu'ëro jië'ëro jemëhu jöe rabe vahi'e saginiëri atë'ocho ijönö maja'e ë jöho ma-va'orahoro heruomö'ajëjo. O osa gagore raromöromo saginiëri hia'ire majëhijë'ocho aëro amo ririre ë jöho ma-darugo'o majëhiruomö'ajëjo.

### *Noehu bogo a juhuonëmi'i God juhuonami'iröhe jö Iesuhu jövadohoje.*

<sup>4</sup> Röhu nasi ariböviohumë naro ave jöho jemesi örire majëhi'ië'ajëjo. Nadi uvorëjo: Ëariböviohuro anaguö'ajëromo juhuonëmiromo jabesi jöho uehorovorëjo. Jemesi sino haho'o muo'amë'ocho eni jëv'ajëjo. Röhu sino haho'o muo'amonugoromo ijönö mu sisë gö jemesi örire vaejëvë'ocho bogo eni jioruomo hesi höjo. Ëhuni nadi ë aribövioho juhuonëmirëjo.

<sup>5</sup> A'i juhuonami'irarije aho naro uë'ië'ajëjo. God juhuonamiromo hesi jöho uehorovorëjo. Ëhesi bëhoho God-hu jemesi aru'aho baejëhego

vuovëvego evare ijonö vëni'e öri ari'ere ujuoho ruruhö'öjëvo'iröhoho hu eni jiajëjo. Iae mae-ëjo. Jemë ë aho gemu juhuonamirëjo.

<sup>6</sup> A'i aho bövioho bise'oho nadi juhuonëmirëjo. Èhesi bëhoho God-ro uvajëjo: Jemë iae masije jëvajëromo avo'avoho muebejëvaje höjo. Monie ma-bisemu bu'öromo ugo inine övo gö mine imo'arujëjo. Röhu God bogo uvaje höjo: Ugoho ininego bogo muebe'amo'ejöjo. Bogo ëhioho uvo'i iae hu avo'avoho muebe'amaje höjo.

<sup>7</sup> A'i jemë God-ro jemesi bövie bise'e aho'o muebejëhoromo röhu jemesi simano uoho ëhu'o adahëhoromo avo'avoho muebejëhaje höjo. Èhuni nadi juhuonivorëjo uge aho'obëhe jio'amajoho ëho ma-jianovo'i ae gemu gemu jemë masije jëvë'e jiaje.

*Keriso-are jö a nunire huruoho majëhi'iröhe jöhoje.*

<sup>8</sup> Röhu ave jöho naro uëvajëjo. Ae rahu a nunire uvë'oho: Na Iesuarë ae jevajë uvë'oho God-are A Maho naro God-are anera jabesi nunire uvo'ejöjo: Èho nasi ae magonahe höjo.

<sup>9</sup> O ae rahu a nunire uvë'oho: Na bogo Iesuarë aehu jevajë uvë'oho naro God-are anera jabesi nunire uvo'ejöjo: Èho bogo nasi aehu magonahehu höjo.

<sup>10</sup> O ae rahu God-are A Ma nasi jö sisë'i atë'oho God-ro uehorovoromo vuonugo'ajëjo. A'i ae rahu God-are Aru'aho hesi jö sisë'i atë'oho ëho God bogo uehorovoromo vuonugo'ajëjo.

<sup>11</sup> O jemë nasi mu vaejamu gavë'oho aëro uvo'a'aruëjo: Iesuarë mu vaejarujoho ëho mu sisë vaejarue höromo jemë gudumëvoromo God rajahijarue osare mu vaejarue a masijo jabesi nunire o gavana jabesi o sa'are a masijo gö gö jabesi nunire rëmoruomo'ajëjo court vaejëvojöro. Èrëmë'iroho nadi uvorëjo: No diehi nosi jöho majëhi'ëjarëjo. O rabu jöe majëhi'ëjarëromo nurunurumorëjo.

<sup>12</sup> Èhesi bëhoho jemëhu jö majëhi'irarije majaho rue'iramu evare majare God-are Aru'ahohuro röjëhi'iramu garomo uvo'a'arujëjo: Iae no ëhi ëhi majëhi'ëjarëromo ëhuni nadi nurunurumorëjo.

*Bövi bise'o maröhë'e aehu sisë'i uehorovade jöhoje.*

<sup>13</sup> Iae ae aho'obëhe jiareje röhu ae gemuëro ri'öromo Iesu uavadeje: Tisa nasi öho uavego nosi vavuehu guomo'i nugahuadoho na gö bojemi'irajo.

<sup>14</sup> Gö bojemi'irajamu Iesuro uavadeje: Raro uvade höjo naro jemesi muoho gavëhoromo jemesi inömo inömo maho sisëho mevonövo'irodego. Èho bogo nasi muehu höjo.

<sup>15</sup> Èhi uanugoromo ae aho'obëhe uëvadeje: Jemëro gavë'i avo'avoho mueberovorëjo. Jemesi sinohemu uehorovoromo bövie bise'e bae'i ëma nëgojöëni uëvajëjo. Ja sa'ae jove inömo inöme rabe rabe bövi mae baejë'oho bogo ëhuro maroho hi'a'anuëjo.

<sup>16</sup> Èhi uënugoromo ave uhu jöho röjëhiromo uëvadeje: Iae bövi bise'o maröhë'e ae gemuëro hijade höjo. Hijamu hesi sa'aroho iruno'oho ma-mabëhe ri'amade höjo.

<sup>17</sup> Ma-mabëhe ri'amamu gagorovo huro hesi simanore uehorovoromo uvade höjo: Nasi iruno'oho börömo böröme jevajëjo. Èhu'ëro nasi iruno'oho avoho bahi'irode röho bogo eni jio'amajëjo bise'ëro jië'ëro. Èhi jië'oho na diehi'o'ejöjo.



18 O iae na ëhi ë'ejöjo. Nasi i bahijaje osaho bise'e jio'amë'ëro naro dadovo'amo'i javu masijo masije vae'amo'ejöjo nasi iruno'e nasi bövie bise'e ë maro bahi'irodëni.

19 Vaenugoromo naro nasi uvo'ejöjo: Na eni jevë'e ae jevajëjo. Iruno'oho inömo inömoho bövi mae avoho bahijë'ëro vadune aho'obëhe eni jevobe va'a'ajëjo. Ëhuni na nuhoromo ma-hijë'i ie jove iromo nimoronimoro-honövo'ejöjo.

20 Nimorohonövo'ejöjamu God-ro uavade höjo: Ja simano sisë'i uehorovanue ae javajëjo. Jaruvo vahi'e naro jasi aru'ahoho baejaho'iramu guomo'a'anuëjo. Guomo'iramu jaehu bahijane iruno'oho bövioho bise'oho raro bae'a'ajëjo. God-ro ëhi uavade höjo.

21 Ëaehu ë'ade mu hesi bëhoho ëhi höjo. Ae rahu hesi sinohemu uehorovoromo bövi bise'oho marohë'e mae bahiromo uvë'oho: Ëhuro na eni jevajë uvamu röhu God-hu uvë'oho: Bogo ëhioho jio'i hu bogo eni jië'e hö uvë'oho ëhuro ë ahu'o hesi muohu'o be'a'ajëjo.

*Bogo nurunurumo'i God mae uehorovo'iröhe jöhoje.*

22 Ëhi uënugoromo Iesuro hesi ijorajo ömo'ömoho uëvadeje: Inömemu uehorovë'oho bëhi rumo'e jië'e jiaje ëhuni nadi uvorëjo: No i rabe ue'ahoromo bogo vuovo'i biririvoromo raromo'ejarëjo. Uho niögu'o rabëro sino haho'oho riogivo'ejarëromo nurunurumorëjo.

23 Ëhesi bëhoho ioho bise'e jio'i jemëhu biririvoromo raromarujohe ëho börömoho höjo. Uho niögu'oho bise'e jio'i sino haho'o jëvajohe ëho börömoho höjo.

24 Magugoho uehorovohëjo. Noehu ë'aruëhioho magugoho bogo ëhioho iruno'oho bivarue höjo o gagovarue höjo. I bahijarue osaho bogojëvajëjo. Röhu God-ro ë ugoho mio'amaje höjo. Röhu jabumë ma-bise'e jio'amo'i jemë masijo mae jëvajëjo. Ëhuni hu jemë'oho avo'avoho muebejëvo'ajëjo.

25 O jemëhu uvë'oho: No diehi'oromo ave sa'aroho majae ëgo'o raromo'ejarë uvoromo nurunurumë'oho na ëhuro jemesi vuovo'irarije majaho iosiramiro mo ruëhi ma-bisemu gö'o raromobe va'orëjo. Bogajo.

26 Ajamirovoromo bogo vuovo'i majae ëgo'o raromë'oho ëho mu bise'e höjo. Röhu nurunurumë'ohuro ëgo'o raromo'irarijohe jemë bogo eni jëvajëjo. Ëhu'oho rabëni mu göëni göënioho nurunurumaruje höjo. Bëhe bogohöjo.

27 O je'ore resu resuehu diehi'oromo ri'amaruoho ëhu'o uehorovohëjo. Aehu mu vaeromo niögu avoharuëhioho resu resuoho bogo ëhioho ë'arue höjo. Bogo ëhioho ë'arue höjo röhu ave resu resuoho ma-mabëhe kavuego garomo nosi dëho vuëvavuaje höjo. Naro jemë uëvajëjo: A böröme Solomon niögu ma-mabëhe io'amonövadoho ëho ma-jianovo'i ave resu resuoho ma-mabëhe mae kavuo'amaje höjo.

28 Jaruvëhi resu resuoho sa'are rijego nërëhi ëhi aëro jahoromo vëniro huo'amarue höjo. Röhu ëhi jië'e resu resuoho God-ro muebejego marëromo kavuo'amaje höjo. Resu resuoho ma-bise'e jio'amo'i jemë masijo mae jëvajëjo. Ëhuni uvorëjo: Hu no'o avo'avoho muebejavuoromo uhe niöge i'imamui'ajëjo. Nurunurumarujoho God bogo ma uehorovaruje aribövie jëvajëjo.

29 Röhu jemëro nadi uvorëjo: No i rabe jovo rabe i'ejarëromo nurunurumorëjo.

30 God-are jö bogo hejë'e raromarue ariböviohuro ie jove bövie bise'e ëhuremu uehorovoruomaje höjo. Röhu jemëro nadi ëhioho ë'orëjo. Jemesi

Vavuohuro iae mae garomo uvajëjo: Jemë iëro jovëro rabëro ëhuro biririv-  
oromo raromarujëjo.

<sup>31</sup> Ëhuni nadi ëhemuoho uehorovo'i a'i God-hu bëröme namiromo mue-  
bejëvaje muoho ëho uehorovorëjo. Ëhi ë'ë'oho God-ro jemesi aru'ahoho  
muebejëvoromo röhu ie jove niöge ëhu'o romoromoro bojëmi'ajëjo.

*Ö'idöre mabëhe ujuoho 'iröhe suvuoro hesi jöhoje.*

<sup>32</sup> Jemë bogo ae aho'o jëvo'i God-are ö mahu'e ma-gemu gemu jëvajëjo.  
Röhu nadi juhuonivorëjo. Jemesi Vavuohuro iae nimajëjo hesi aji'e öri ari'e  
ë hesi huë maho bojëmi'iröhëni.

<sup>33</sup> Röhu jemesi bövioho bise'oho imo'amoromo monioho baeromo bogo  
eni jië'e aribövioho suvuorëmirëjo. Ëhi ë'ë'oho jemesi bövioho bise'oho  
ö'idöre bahi'arujëjo. Ëhuro bogo sisërëjëho'i vajiohu'e aho bogo bëhiroho  
va'oromo ujuohëho'i majo majoho bogo tarivëho'i a'i jemesi bövioho  
bise'oho marohë'e mae jiemu jiëho'ajëjo.

<sup>34</sup> Jemesi mae sisë dinö'e jiajire jemesi dë vövöbajo'oho ë gemu jio'a'ajëjo.

*Nosi a bëröme Kerisohu rueröhego noehu muebe'iröhe jöhoje.*

<sup>35</sup> Röhu jö göho ave muohu'o vaenövorëjo. Jemëro avohorovoromo uho  
niögu'e vaeromo iroho bueromo avoho raromorëjo.

<sup>36</sup> Avoho raromoromo mu ajamijarue ariböviehu jabesi bërömehu rovego  
ajami'i muebejaruëhi ëhi avoho raromoromo mueberëjo. Ëhesi bëhoho  
mu ajamarue aribövi jabesi bërömhuro aehu masu'iröhe söröre va'ë'ëro  
vuonorö'ö rueromo ojore ano'anovo'iramu rueho jaburo heromo ojoho ma-  
burëro jiovaho'aruëjo.

<sup>37</sup> Ma-burëro jiovaho'iramu jabesi a bërömhuro garöhe jabumë nune  
jioruomoromo eni jëvamu gevë'oho huë mabëhe bojëmi'ajëjo. Huë mabëhe  
bojëmiromo hesi niögoho avoho ruahoromo jaburo sa'are raromöjoro  
uënugoromo ioho jovoho i'imëmi'ajëjo.

<sup>38</sup> Ëa bërömehu bogo burëro rue'i vahi riri'e o vahi riri duvahoho  
iosiramiro mo ëhi ruëhi rueromo gëröhe jabumë eni jëvamu gevë'oho huë  
mabëhe bojëmi'iramu baeruomo'ajëjo.

<sup>39</sup> Ave uhu jöhu'o avo'avoho uehorovohëjo. Vajiohu'e aehu rueröhe  
majaho osa arijo'oho bogo gavade höjo. Ga'ibejajo vajiohu'e a hesi öroho  
tugohahego osaho bogo dadovoromo inömo ujuoho'ibejajo.

<sup>40</sup> Osa arijo'ohuro gavë'i hi'ibejajo mae jio'ibejajo. Jemë'o gavë'i raro-  
morëjo. Jemë bogo uehorovë'e raromaruje majare evare God-are A Maho  
naro rue'ejöjo.

*A bërömo hesi mu aehu avoho o sisë'i mueberöhe jöhoje.*

<sup>41</sup> Ëhi uëvamu hegoroovo Peter-ro Iesu uavadeje: Bada na ja jasi ijorajoho  
noremuëremu röjahui'i o ae aho'obëhe röjahui'i ë uhu jöho majahuijanuëjo.

<sup>42</sup> Majahuijanuëjamu Badaro uëvadeje: Naehu ë jö majëhijaje hesi bëhoho  
aehu hesi a bërömo hesi muohemu uehorovë'i simano mae uehorovoromo  
mu vaejajëhi jemëro ëhi muoho vaenövo'irarijego uëvajëjo. Ëhi jië'e mu  
muebejaje a hesi a bërömhuro ua'a'ajëjo: Na va'ië'ajëjo. Jero nasi mu  
vaejarue a ioro'ioroho muebejëvonëjo. Muebejëvoromo majae eni jiego  
jabesi iruno'oho i'imëminövonëjo. I'imëminövonë uanugoromo va'a'ajëjo.

<sup>43</sup> Va'o hijuvo röhu ijönö vuonorö'ö rueromo garöhe ë ahuro hesi muoho  
avoho vaejaho'iramu gagorovo huë mabëhe bojami'ajëjo.

<sup>44</sup> Huë mabëhe bojamiromo ua'a'ajëjo: Ja mu mae vaejanohuni ëhuni na  
mu bërömore bamavo'ejöjo. Jero bövie vaeromo nasi sa'ae inömo inöme

bövie bise'e aho'o muebejehonëjo. Mu avo'avoho muebejë'oho iae hu ëhi ua'a'ajëjo.

<sup>45</sup> A'i ë mu vaejahaje aho sisë jië'ohuro ëhuro uehorovoromo uvo'a'ajëjo: Nasi börömoho bogo burëroho rue'i örisanuovajëromo ri'öromo mu vaejarue aho magonahoho muo'amoromo ie jove iromo ëhuro simane sisërë'ajëjo.

<sup>46</sup> Ëhi'oromo bogo gavë'e uehorovë'e hi'iramu evare hesi börömoho majioho rue'a'ajëjo. Rueromo sino haho'oho sisë maro ijumahoromo nugö'ö'iramu sisëro va'oromo jö aho'aho'e ariböviohu'o hi'a'ajëjo.

<sup>47</sup> A börömehu nimajoho mu vaejahaje aehu heromo röhu jö bogo eja-horomo bövi bise'o bogo avoho'amë'oho ëhuro hesi a börömohuro rueromo sisë maro ano'ajëjo.

<sup>48</sup> O a börömehu nimajoho mu vaejahaje aehu bogo hejë'e mu sisë vaejë'ëro mana anoröhe bëhi jië'oho iae ma-bisemu ano'ajëjo. Röhu mu vae'irarije simano ma-mabëhemu o suvuoro gö gö bövi mae God-hu jemesi örire bojëmijë'oho huro uvo'a'ajëjo: Na böröme bojëmijë'ëro ëhuro mu böröme vaeruomo'ajëjo. O bogo vaeruomë'oho ëho sisë höjo.

*Iesuhu rovë'ëro ëhu'ëro ae adovoromo göehu jöe gö göehu jöe gö uehorovarue jöhoje.*

<sup>49</sup> Naehu rovode hesi bëhoho sa'ae aho'obëhe vëninö'e ravëvo'i rovode höjo mu sisëho barë'i aho'obëhe ma-maemu jioröhego. Ëmuoho mami'e vae barë'ibejajo iae mae jevo'ibejajo.

<sup>50</sup> Röhu ë hesi urimo na vi'ehe huë vavaene bae'irodoho ëho nasi örire jovëro rovanovo hesi höjo. Ëho bapataeto vaejevanovo'ajëjo. Ëhuni naehu nurunuru börömo baejajoho hujeji ë huë vavaenoho baegorovo evare mae hi'ejöjo.

<sup>51</sup> Nani jemëro uehorovoromo uvarujëjo: Nöröhu rovade hesi bëhoho nöröro ajamuego sa'ae aho'obëhe iro muorovo'oho vuonugo'i ma-huë baerovoromo gemuoro raromo'iröhego rovade höjo. Jemëro ëhi uvarujëjo röhu na bogo ëhunioho rovode höjo. Bogo mae bogajo. A'i naehu rovode hesi bëhoho naro nasi jöho majëhijego aëro heromo adovoromo ae göëro jöe gö uehorovo'i ae göëro jöe gö uehorovo'irarijego rovode höjo.

<sup>52</sup> Ëhesi bëhoho nani agane gemuoho ae aho'obëhe övo gö mine osae gemuore huë mae raromoromo röhu a ioro'iorohuro avevejö'e aevoromo nasi muoho nimo'i ioro'iorohuro bogo nimoromo ae niö'i gemu jaburo jöe gö uehorovo'i ae niö'iro jöe gö uehorovoromo ëhuro huë sisë baeromo bogo gemuoroho avoho raromo'aruëjo.

<sup>53</sup> Vavuohuro uehore gö baeromo harihoho nue huodivo'i harihohuro uehore gö baeromo vavuoho nue huodivo'ajëjo. Vëmohuro uehore gö baeromo abojoho nue huodivo'i abojohuro uehore gö baeromo vëmoho nue huodivo'ajëjo. Ajohuro uehore gö baeromo ajoho nue huodivo'i ajohuro uehore gö baeromo ajoho nue huodivo'ajëjo. Ëhi jiobe va'a'ajëjo.

*Iesuhu mu masijo vaejade majae ë hesi bëhoho ariböviehu bogo avoho gavare jöhoje.*

<sup>54</sup> Ëhi uëngoromo Iesuro ae aho'obëhe uëvadeje: Jemëro gavaruje anumëhi sue rojomego uvaruje höjo: Iae ënëro rue'ië'ajëjo. Rue'ië'ajëjogo evare ënoho rovaje höjo.

<sup>55</sup> O jemëro gavaruje aruëhi bure rovego uvaruje höjo: Birebire böröme jio'ië'ajëjogo iae ëhi birebire böröme jiaje höjo.

<sup>56</sup> Jemë sareri sareri'e ae jëvajëjo. Jemëro sa'aho ö'idöho uherihoromo sue bure rabe rabe garomo uvaruje höjo: Ëhesi bëhoho iae ëhi jio'ië'ajëjo.

Röhu ave jaruvore rovaje muoho garomo ë hesi bëhoho bogo avoho garomo uvarujëjo: Iae God-are mu bërömo rorovajëjo. Diehi'oromo bogo avoho gavarujëjo.

*Aehu nosi jö sisë majahuijego noehu ma-burëro ahorire vae'iröhe jöhoje.*

<sup>57</sup> Röhu jemë rabëni bogo avoho mevoromo gavaruje höjo di muoho mae jiejo.

<sup>58</sup> Ae göehu jasi jö sisë hesirire jië'ëro ja baejavoromo court-re va'ië'iroho jemë niö'iro örire va'arujevaro jero hu'o jöho mevoromo ahorire vae ganëjo. Bogo ahorire vaejë'o ho huro guduamavoromo court gavaje a hesi övore bojami'ajëjo. Bojami'iramu court gavaje ahuro police bojami'iramu savoji gagore ba'amavo'iramu ë hi'a'anuëjo.

<sup>59</sup> Ehi hiemu hijuvo moni bojami'irano ho aho'obëhe bojami barë nahona-hovo'anuëjo. Iae na mae uavajëjo.

## 13

*Uehoro sisë bogo vuonugë'o ho sisë'rëjëvo'iröhe jöhoje.*

<sup>1</sup> Ehi uëvamu gavë'i ë raromarohuro Iesu uavareje: Galilee sa'a raje ae göëro God-ni mie bahi'irögoro muo'amare höjo. Muo'amoromo köe otehamu gavë'i Pilate-are muorovo ariböviohuro ro ë aribövioho muo'amamu ehuro jabesi köhu'o God-are mi köhu'o gemuore buarohë'e höjo.

<sup>2</sup> Buarohë'e höjamu hegoro vo Iesuro uëvadeje: Na jemëro uvarujëjo: EGalilee rajohuro Galilee rajo ioro'ioro ho iosirëmiromo sisë bëhe jioruomë'ëro ehü'ëro ehi jië'e huë vavaenoho baeromo vuovade höjo.

<sup>3</sup> Hesi bëhoho bogo ehioho höjo. Bogo mae bogajo. A'i jemëhu uehoro sisë bogo vuonugo'i God mae uehorovë'o ho jabumë vuovëvadëhi ae aho'obëhe jemë'o ehi i'uoho mana baeromo vuovëvo'ajëjo.

<sup>4</sup> O Jerusalem raje ae aho'obëhe 18 vuovëvade jöho uehorovohëjo. Jerusalem amore Siloam jovo bëhire javu egoböviohuro ahoro mo ae aho'obëhe 18 jabesi döre ruvebiromo taemo'amade höjo. Na jemëro uvarujëjo: Taemo'amade Jerusalem amo rajohuro Jerusalem amo rajo ioro'ioro ho iosirëmiromo sisë bëhi mae jioruomë'ëro ehü'ëro ehi jië'e huë vavaenoho baeromo vuovade höjo.

<sup>5</sup> Bogo mae bogajo. A'i jemëhu uehoro sisë bogo vuonugo'i God mae uehorovë'o ho jabumë vuovëvadëhi ae aho'obëhe jemë'o ehi jië'e i'uoho mana baeromo vuovëvo'ajëjo.

<sup>6</sup> Ehi uënu goromo ave uhu jöho majëhiromo uëvadeje: Ae gemu hesi ö'i bajo mure meso ho ri'öjë'e jiade höjo. Ri'öjë'e jiamugo rueromo böse nahoromo gavade höjo bogojiamu.

<sup>7</sup> Bogojiamu gagorovo mu arijo'ohuro mu ajamijaje aho uavade höjo: Aveho gavëjo. Na aviae rueromo böse nahoromo ga'i hijode höjo meso ho bajoho bogo raejë'e jiamu ga'i hijodoho vadune aho'obëhe niö'i gemu barëjë'e höjo. Ehi jië'e jiaje meso ho uejëjo. Rabëni ëma nugo'iramu sa'a rihuoho barë'ajëjo.

<sup>8</sup> Ehi uavamu hegoro vo mu ajamaje ahuro uavade höjo: Iae mae höjo röhu vuonugego vadune gemu gö'o namijego naro bëhire vo'onöe umorova'oromo mi dëho ë bahijego ehuro rihue bae'iröhe höjo.

<sup>9</sup> Rihu baebe va'oromo vadune gemu barëjamu bajoraejë'iroho ehö iae mae jio'a'ajëjo. O bogo raejë'o ho uevego na meso ho ue'iröjo.

*Magonahe gemu hesi dejo gurorovë'e nuho majare Iesuhu ajamade jöhoje.*

<sup>10</sup> Iae Jew rajo jabesi nuho majae jiamu gagorovo Iesuro God rajahijarue osare hiromu jöho röjehijadeje.

<sup>11</sup> Röhu ë osare magonahe gemu hijë'e jiadeje. Satan-are a sisë hesi dëre abuejë'ëro ëhu'ëro hesi sino haho'o sisërëjadoho vadune aho'obëhe 18 barëjadeje. Sisërëromu hesi dejoho gurorovë'ëro ahorire nami'iröhoho bogo eni jiadeje.

<sup>12</sup> Ëhi jiamu gagorovo Iesuro magonahoho garomu uvamu rovadeje. Rovamu uavadeje: Ma'ino ja marëjavë'e höjo.

<sup>13</sup> Marëjavë'e hö uaromu övoho sinore bamahamu gavë'i ahorire namiromu God huë mae uavadeje.

<sup>14</sup> Ëhi'amu God rajahijarue osa muebejaje ahuro gavade nuho majare Iesuro magonahoho ëhi ajamamu gagorovo dë vörönimadeje. Dë vörönimamu ae aho'obëhe uëvadeje: Mu vaejarue majaho majae aho'o övo gö mine övo göre gemu ëhi höjo. Ëmajaro rovego hu jemesi sinoho ajëmi'irajo. Nosi nuho majaroho nadi ruerego hu ajëmi'irajo.

<sup>15</sup> Ëhi uëvamu hegorovo Badaro ë osa muebejaje aho uavadeje: Jemë sareri sareri'e aribövie jëvajëjo. Nuho maja jië'iroho jemë ae aho'obëhe mue vaeromu jemesi ö mahu'oho jiovo'amoromo jovore sö ujuoho va'aruje höjo jove ue'ahojöro. Na mae-ëjo.

<sup>16</sup> Jemëro jemesi ö mahu'oho nuho majare ëhi ajamijaruje höjo. Röhu ave magonahoho bogo ö mahu'ehu jio'i hu Abraham-are ujëro jië'ëro ëhu'ëro God-ro huë baejaje magonahe höjo. Röhu Satan-hu hu tövahadoho vadune aho'obëhe 18 barëjajëjo. Ëhi jië'oho naro rabëni nuho majaroho bogo ajamego bogo marëjöräjo.

<sup>17</sup> Ëhi uëvamu hegorovo Iesu bijönimoruomade aribövioho aho'obëhe javoje böröme bae'i a ioro'iorohuro aho'obëhe uvoruomadeje: Iesuro mu mabëhe aho'obëhe vaejaje hö uvoromu nimorohoruomadeje.

#### *Ijo hisue mustard-hu ëgovade uhu jöhoje.*

<sup>18</sup> Ëhi'amu Iesuro jöe gö majëhiromu uëvadeje: God-hu böröme namiromu muebejëvaje öroho naro uhu'e bu'öromu jemë'o na'o uehorovo'ëjarëjo.

<sup>19</sup> Ijo hisu ihe mustard ujehu riromu ëgovoromo börömo rijajëhi God-ro böröme namiromu ae gö'o gö'o ëhi gagovoromo muebejëvobe va'a'ajëjo. Ae gemuëro mustard ijo hisu uje gemu baeromu hesi mure öjade höjo. Öjamu riromu ijo va'ëne ëgovoromo börömorijade höjo. Börömorijamu ugëro rueromu hesi adore ijue vae'amare höjo.

#### *I dë huaje osehu ire rumorovade uhu jöhoje.*

<sup>20</sup> Ëhi uënugoromu jö göho majëhiromu uëvadeje: God-hu böröme namiromu muebejëvaje öri ë hesi uhu jö göho naro majëhi'ie'ajëjo.

<sup>21</sup> I dë huaje osehu ire rumorovajëhi God-hu böröme namiromu muebejëvaje muohuro sa'ae aho'o ëhi rumorovobe va'aje höjo. Magonahe gemuëro ie aho'obëhe gagovoromo i dë huaje osoho i gemuore bamoromu iohu'o buarohade höjo. Buarohamu ë ioho aho'obëhe rumorovo barëjade höjo.

#### *Ojo harihure va'iröhe ë hesi uhu jöhoje.*

<sup>22</sup> Ëhi'onugoromu Iesuro Jerusalem va'iröhëni amo masijore amo ininore jöho röjëhibe va'adeje.

<sup>23</sup> Va'amu ae gemuëro uavadeje: Bada naehu jö ua ga'ie'ajoho hejëjo. Na ae ma-gemu gemu ëhemu vuovoromu sisëroho bogo va'i God-are öri

ari'eroho va'oromo maroho raromo'ejarëjo. O diehi jio'a'ajëjo. Diehi jio'a'ajëjamu Iesuro ae aho'obëhe uëvadeje:

<sup>24</sup> Sivochemu sivochoromo ojo harihoro rumo va'lo garëjo ëhuro ijönö God-are öri ari'ere va'irarije. Naro jemë uëvajëjo: Ae aho'obëhe rumo va'ië'iroho bogo eni jëvo'ajëjo.

<sup>25</sup> Röhu jemë ojo harihure bogo rumo va'ë'oho majae ijönö ë osa ar-ijohuro ri'öromomo ojoho tugoho titimo'ajëjo. Ojoho tugoho titimo'iramu jemëro amonö riravoromo aevoromo ojoho ano'anovoromo osa arijo'oho ua'a'arujëjo: Bada oje jiovahuego ö'arëjo. Ö'arë'iramu huro uë'a'ajëjo: Jemë a rabëro rueruomoromo ojoho jiovehöjörö uvarujëjo. Ojoho na bogo jiovehö'ejöjo.

<sup>26</sup> Ojoho na bogo jiovehö'ejö'iramu jemëro ua'a'arujëjo: Röhu no ie jove ja'lo gemu mae inövare höjo. Nosi amoroho jero jöho röjahuinövane höjo.

<sup>27</sup> Röjahuinövane hö'iramu rue osa arijo'ohuro uë'a'ajëjo: Jemë a rabëro rueruomoromo ojoho jiovehöjörö uvarujëjo. Jemë mu sisë vaejaruje aribövie jëvaje rori'lo va'ohëjo.

<sup>28</sup> Va'ohë'iramu jemëro ga'a'arujëjo jemesi hijo miono'e Abraham Isaac Jacob o jö God-aro baeromo majëhinövare ae aho'obëhe God-are öri ari'ere ë raromo'i jemë babu'öjëvo'iramu gagorovo nierusuburu'e bamoromo ane ja'ihö vuogigimo'arujëjo.

<sup>29</sup> Röhu maja rojomajire beva'ajire arua anumiae jioromo ae aho'lo God-are öri ari'ere va'oromo ie ue'ahoruomo'ajëjo.

<sup>30</sup> Ue'aho'iramu a ioro'iore dejonö jiaruoho nuninö jioruomo'i a ioro'iore nuninö jiaruoho dejonö jioruomo'ajëjo. Ehuremu uehorovorëjo.

*Iesuhu Jerusalem amo rajëni vavaenimade jöhoje.*

<sup>31</sup> Iesuro ëhi uëvamu gavë'i Pharisee ae göëro rueruomoromo uavareje: Ri'öromomo öre gö va'ëjo. Ave sa'a muebejaje ae Herod-ro anago'ië'ajëjo.

<sup>32</sup> Anago'ië'ajëjamu hegorovo Iesuro uëvadeje: Herod hu sareri'e mu vaejaje ö sisëho va'ëne ae höjo. Va'oromo hu uarëjo: Ave jöho hejëjo. Nörö hirono Satan-are aru'aho sisë aribövi jabesi dëre jio'amajoho rarovö'öjëvobe a jabesi sinoho avohëvobe va'ojuvo evare nasi muoho barë'ajëjo. Ehi uarëjo.

<sup>33</sup> Röhu iae na ave sa'aho vuonugoromo örire juvobe hibe va'ojuvo evare Jerusalem hörö'ejöjo nasi muoho ëhi jië'ëro. Ehesi bëhoho jö God-aro baeromo majëhijarue ae aho'obëhe ë amoremu muo'amamu vuovëvobe rovë'e höjo. Ehuni na'lo ë amore va'iramu anego'iramu guomo'ejöjo.

<sup>34</sup> Vaevë'e Jerusalem amo rajohumë jemëro jö God-aro baeromo majëhijarue aribövioho muo'amaruje höjo. God-hu jemëni rëmö'öjaje aribövioho munëro vajëmijaruje höjo. Kököröko vëmehu harihu vivoju uhure nugo'amoromo diehehu aegëharuëhi naro jemë ëhi gagovëvoromo gemuore rëmo'i nimo'i hijode höjo röhu jemëro bijönimarije höjo.

<sup>35</sup> Ehuni ave jöho hehëjo. God-ro jemesi amoho vuonugego jemesi sivue jëvo'ië'ajëjo. Naro jemë'lo hirono va'iramu jemë nasi nu ano'oho bogo ga'a'arujëjo hujeji na vuonorö'ö rue'iramu evare avoho geromo ue'a'arujëjo: Bada God-are ihore rovanuoho mabëhe rovanuëjo. Ehuremu uehorovorëjo.

## 14

*Övo höru'e huë'e a Iesuhu nuho majare ajamade jöhoje.*

<sup>1</sup> Iae Jew rajo jabesi nuho majaho rovamu Iesuro Pharisee a böröme gemu hesi osare ie i'i va'adeje. Osare va'amu gagorovo Pharisee ariböviohuro ë raromoromo Iesu ga'i muebejareje hu mu sisë o rabe ë'ego.

<sup>2</sup> Röhu ë osare ae gemu hijë'e jiadeje. Hesi övo höru'e aho'obëhe huo'amë'e jiadeje.

<sup>3</sup> Huo'amë'e jiamu gagorovo Iesuro ri'öromo Jew rajo jögoru öri røjëhijarue ariböviohu'o Pharisee ariböviohu'o uëvadeje: Nuho majare a jabesi sino ajëmijë'oho na ëhuro no nosi jögoroho aharue höjo o bogajo.

<sup>4</sup> Bogajamu rueho jaburo jörumoraejareje. Jörumoraejamu Iesuro aho baeromo sinoho avohahoromo nugö'öjamu va'adeje.

<sup>5</sup> Va'amu gavë'i Iesuro uëvadeje: Nuho majare jemesi harihoho o mioho jovo'e guare beva'ibejajo na jemë burëro io barojomo'ibejarijëjo o bogajo. Iae jemë ëhi ë'ibejarijëjo.

<sup>6</sup> Èhi ë'ibejarijëjamu jö mana uaröhoho bogojëvadeje.

*Nosi arijo'arije ba'obuerovo'iröhe jöhu'o inömo rumo'e aribövi ajëmi'iröhe jöhu'o ë jöho niö'i jëve.*

<sup>7</sup> Jöe bogojëvamu Iesuro gavade ë ruenugade ariböviohuro röho ma-mahemu baeromo raromamu gëgorovo uhu'e uëvadeje:

<sup>8</sup> Aehu ja uavë'oho: Rueromo masuröhe sörö inë uavë'iroho nadi jasi sivuoho uehorovoromo va'o a masijo raromaruiroho hinëjo. Ja ëhi ë'ë'oho nani ae gö jasi iho iosiramijë'ohuro söröre rue'a'ajëjo sörö arijo'ohuro mami'e uavë'ëro.

<sup>9</sup> Rovë'oho ja'o a börömohu'o ruejöro uëvade ahuro rueromo ja ua'a'ajëjo: Röhe bojamego hu ë hijajo. Èhi uavë'oho ja javoje baeromo rori'o va'o hi'a'anuëjo.

<sup>10</sup> A'i aehu ja sörö ro ijöro uavë'iroho va'oromo ma-rori'o hinëjo. Èhi ë'ë'oho ro ijöro uavade ahuro rueromo ua'a'ajëjo: Isio döro ajio hijëjo. Ajio hi'iramu gagorovo sörö ue'aharue ariböviohuro uehorovavoromo uvo'a'aruëjo: Ja a böröme javajëjo.

<sup>11</sup> Èhesi bëhoho ae rahu hesi sivue uehorovoromo döre bamorovë'oho hesi ihoho abue'a'ajëjo. O ae rahu ba'obuerovë'oho hesi ihoho döro ajiomö'ajëjo.

<sup>12</sup> Èruenugade aribövioho Iesuro ëhi uënugoromo huotorovoromo ro i ijöro uavade aho uavadeje: Jaehu i harihu maja'e o jeni'e bamo'ië'iroho nadi jasi aemo'aemoho ö mueno'oho bövi bise'o marohë'e mae jië'e bëhire raromarue aribövioho nadi ëhi jië'e ariböviohemuoho uëvego ro ioho ue'aho'irarëjo. Uëvë'oho jabumëro ijönö mana bojami'iramu jasi suvuoroho bae barë'anuëjo.

<sup>13</sup> A'i jaehu i bamo'ië'iroho bövi bise'o bogo eni jië'e aribövioho övo höru sisë'e o nuni sisë'e aribövioho ëhi jië'e aribövioho uëvego rue'irarëjo.

<sup>14</sup> Èhi ë'ë'oho ë ariböviehu mana bojami'iröhoho bogo eni jëvë'ëro ja huë mabëhe bae'a'anuëjo. Hujeji mu mae vaejarue aribövioho vuovë'ëro i'ovoromo ri'öruomo'iramu evare God-ro jasi manaho bojami'ajëjo.

*Sörö bamamu aehu juahamare uhu jöhoje.*

<sup>15</sup> Èhi uavamu hegorovo Iesu'o raromoromo i iruomade ae gemuëro Iesu uavadeje: Ariböviehu ri'öromo God-are öri ari'ere va'o raromoromo i ue'aho'iröhoho no huë mae bae'ejarejo.

<sup>16</sup> Huë mae bae'ejarejamu Iesuro uhu'e uavadeje: Iae ae gemuëro sörö böröme baeromo ae aho'obëhe uëvade höjo: Rueromo söröe i'a'aruëjo.

17 Ëhi ël'ë'ëro sörö majaho rovamu hesi mu vaejahaje aho nugö'öjamu sörö anue va'oromo ae uëbe juvoromo uëvade höjo: Söröho eni jiajêjo. Evaro rühêjo.

18 Ëhi uëvamu hegoroovo ae aho'obêhe mae juahamare höjo. Ae göëro ri'öromomo uavade höjo: O asë'êjo. Na ö'ibejodoho röhu na sa'ae i'e imë'ëro ë va'oromo ga'ejêjo.

19 Ae göëro uavade höjo: O asë'êjo. Na ö'ibejodoho röhu na mu vaejaje mioho aho'obêhe 10 imë'ëro ëhuni ë va'oromo ga'ië'ajêjo gë'i mae ë'oruomego.

20 Ae göëro uavade höjo: Na magonahe masuvë'e jevë'ëro ëhuni bogo ö'ejêjo.

21 Ëhi'amu rue ahuro vuonorö'ö rueromo hesi a börömo uavade höjo: Ëhi ëhi uevare höjo. Ëhi uevare höjamu rue osa arijo'ohuro vörö'iraeromo hesi aho uavade höjo: Ma-burëro va'iranoho amo'e öri masijoho ininoho aho'obêhe juvo barënjêjo. Juvo barëromomo bogo eni jië'e aribövioho sino sisërëjê'e aribövioho nuni sisë'e aribövioho höru sisë'e aribövioho ëhi jië'e aribövioho ujuoho ruenêjo.

22 Ëhi uavamu ejahoromo ëhi ël'ë'ëro jië'ëro rueromo hesi börömo uavade höjo: Ja uevanëhi iae na ëhi ël'ë'e jevajêjo. Röhu röhe iae jiajêjo.

23 Röhe iae jiajêjamu rue börömo uavade höjo: Mu öroro je'o öroro va'iranoho dinëmiromomo uëvego ae aho'obêhe rueruomö'irajo ëhuro nasi osaho irijiomö'iröhe höjo.

24 Na jemë ae aho'obêhe uëvajêjo: Na urimo uëvamu juahemijare aribövioho nasi i sörö'ohomo bogo i'a'aruêjo. Bogo mae bogajo.

*Bëhoho uehorovo avohoromo evare Iesuare ijore ijore jijihö'iröhe jöhoje.*

25 Iae ae magonahe aho'obêhe siri va'ëne Iesu'o gemu mae örire jijihö-ruomonövadeje. Jijihöjuvo Iesuro huotorovoromo uëvadeje:

26 Jemëhu nasiro rovë'ohomo jemesi vëmu vavu'e vabore aboji harihu'e öe ma'ine nadi ë aribövioho nuninöho bamö'i na dejonöho remorêjo. Röhu avehu'o gemuoho höjo. Jemëhu ave sa'are raromö'irarijohomo nadi ëho nuninöho bamö'i na dejonöho remorêjo. Jemëhu bövie bise'e göemu göemu nuninö bamë'ohomo nasi ijore ijorohomo bogo jijihö'aruêjo.

27 O ae rahu ja bogo uvë'ohomo: Iesuare jöëni vi'ehe huë vavaene javoje rabe baeromomo guomevë'ohomo iae hesi hö uvoromomo bogo korosi hesi i'u banigojiomanovoromomo nasi ijore ijore juvë'ohomo ja bogo nasi ijorajohomo javö'ajêjo.

28 Nasi ijore ijore jijihö'ië'irohomo ëho mu böröme jiaje nadi ëma jijihö'i urimo uehorovo avohoromomo evaro nasi ijore ijorohomo jijihörêjo. Ëhesi bëhoho ae rahu ja javu ëgöbövi vae'ië'irohomo bogo ëma vae'i urimo sa'aro hiromomo javu vae'irane monioho adahomo ga'a'anuêjo ga'i vae barë'irane monioho eni jiego o bogo.

29 Ja bogo adahomo gavë'ohomo ëhuro nani sa'ahemu vaeromomo ga'a'anuêjo monioho barë'iramomo vituohomo vuonugö'anuêjo. Vuonugö'iramomo ae aho'obêhe ëho garomomo ja sivagoromomo uvoruomö'ajêjo:

30 Ësareri'e aho javu ëgöbövie vae'ië'oromomo bogo eni jiamu vituohomo vuonugade höjo.

31 O uhu jö göhomo bëhe gemuoho höjo. Sa'are a börömo göehu sa'a a börömo göhu'o muorovo'ië'irohomo hu bogo ëma muorovo'i urimo sa'aro hiromomo uehorovoromomo uvo'a'ajêjo: Rue a börömo göhuro muorovo ae aho'obêhe 20,000 ae aho'obêhe mae sö ujuoho rovajêjo. Na muorovo ae aho'obêhe



10,000 ma-vemino'e ehemu jevajëjo. Naehu hu'o muorovë'o ho na na eni jevo'ajëjo o bogo eni jevo'ajëjo.

<sup>32</sup> Èhi uvonugoromo uvë'o ho: Bogo eni jevo hesi hë uvë'o ho muorovo'i rovaje a bërömo ho bëhiro ho rovë'e evare ve hijaje a bërömo göhuro hesi aho rëmö'ö'iramu va'oromo rue rovaje a bërömo göho sanuamiromo jö mae majahiromo ua'a'aruëjo: No diehi'oromo muorovo ho tugohoromo avo ho raro mo'ëjarëjo.

<sup>33</sup> Èuhu jö hesi bëho ho jemëhu jemesi sa'ae inömo inöme bövie bise'e uehorovarujö ho bogo vuonugë'o ho bogo nasi ijarajo ömo'ömo ho jëvo'ajëjo.

*Rihu rumo'e sö hesi uhu jöhoje.*

<sup>34</sup> Nasi ijore ijore jijiharujö ho jemë sö va'ëne jëvajëjo. Söho rihu'e mabëhe höjo. Röhu sö hesi rihu barëjë'o ho röhu bogo maho avo ho hesi höjo.

<sup>35</sup> Èhu'ëro ë hesi muo ho bogohöjo. Bogo muro ho ruruhö'öjeko muo ho rihuvo'i bogo mi dëhu'o buarohoromo bahijeko muo ho marë'i a'i èhi jïë'e söho ma-ruruhö'öjarue höjo. Ae rahu ja God-are jö hejanue ae javë'o ho bëho ho nahoromo birohönëjo.

## 15

*Sheep subirö'öjamu nahoromo birohade uhu jöhoje.*

<sup>1</sup> Iae vajiohu'e tax baejarue ariböviohu'o sisë aribövi ioro'ioro hu'o èho jaburo Iesuare jö ho heli rueruomadeje.

<sup>2</sup> Rovamu gagorovo Pharisee ariböviohu'o Jew rajo jögoru öri röjëhjarue ariböviohu'o uarovareje: Èsareri'e ahuro sisë aribövio ho rajëhiro mo jabu'o gemuoro ie ijaje höjo.

<sup>3</sup> Ijaje höjamu Iesuro uhu'e uëvadeje:

<sup>4</sup> Jemë ae gemu sheep aho'obëhe 100 javo'i gemu subirö'öjë'o ho ja diehi'onëjo. Ja sheep ioro'io re mure raromaruho èhi nugo'amo'i va'oromo è sheep gemu'o ho nahobe juvojuvo hujeji vae göro biroho'anuëjo.

<sup>5</sup> Birohonugoromo nimorohë'i babuariromo amëro rue'a'anuëjo.

<sup>6</sup> Rueromo jasi amo rajö ho agano ho uë'a'anuëjo: Nasi sheep subirö'öjadö ho iae birohë'e jevajëjo. Èhuni ruehego no gemuoro nimoroharëjo.

<sup>7</sup> Èhesi bëho ho naro uë'ië'ajëjo. Ö'idöre raromarue ariböviohuo gavarue ae gemu öri sisëre juvajö ho vuonugo'i huotorovoromo öri mare juvamu gavë'o ho nimorö ho avoharue höjo. O gavarue ae aho'obëhe jakesi sivue uehorovoromo uvamu: No mae javuë'ëro èhu'ëro mu sisë vuonugo'iröhö ho bogojavuajë uvamu gevë'o ho bogo èhio ho nimoroharue höjo.

*Subirö'öjë'e ijo bajo nahoromo birohade uhu jöhoje.*

<sup>8</sup> O uhu jö göho hehëjo. Magonahe gemu ajivë'e ijo baje aho'obëhe 10 jiajö ho gemu subirö'öjë'o ho hu diehi ë'a'ajëjo. Iro ho buenugoromo ari sisuho bibivë'i ma-avo ho nahobe juvoromo hujeji vae göro biroho'ajëjo.

<sup>9</sup> Birohonugoromo hesi amo rajö ho agano ho uë'a'ajëjo: Subirö'öjade ijo bajö ho birohë'e jevaje èhuni ruehego no gemuoro nimoroharëjo.

<sup>10</sup> Èhesi bëho ho na uë'ië'ajëjo. God-are anerahuo gavarue ae gemu öri sisëre juvajö ho vuonugo'i huotorovoromo öri mare juvamu gavë'o ho nimoroharue höjo.

*Ijarajo subirö'öromo vuonorö'ö rovamugo vavuehu hu rajahi'i muriehu bijönimade jöhoje.*

11 Ëhi uënu goromo Iesuro uhu jõe gö'o majëhiromo uëvadeje: Iae ae gemu harihe niö'i jëvade höjo.

12 Harihe niö'i jëvë'ëro i jorajohuro ri'öromo vavuoho uavade höjo: Apo ja guomavego naehu ujuoho'irodego uevane bövioho bise'oho avevejö'e bojëmëjo. Bojemijëjamu rue vavuohuro hesi bövioho bise'oho adovoromo harihu göho ioni göho bojami'i harihu göho ioni göho bojämijade höjo.

13 Bojamamu majae ma-gemu niö'i barëjamu rue i jorajohuro huhu ujuohadoho imo'amo barëromo monioho baeromo va'ade höjo. Va'adoho va'ojuvo öri ëgoböviro sa'a göro va'oromo nimoronimorohë'i hiromo hesi maho sisëho ma-bu'önövade höjo.

14 Ëhi bu'öbe va'amu hesi bövioho bise'oho barëjahade höjo. Barëjahamu ë sa'are iruno'oho aho'o barëromo ë sa'are aribövioho vadunëro vuovamu ë aho huë vavaene böröme baejë'e hijade höjo.

15 Ëhi hiromo va'oromo ë sa'aho raje ae gemu uavade höjo: Ja mue javë'oho uevego na ë jasiro mue vaejöjo. Mue vaejöjamu ruehuro uavade höjo: Mahu muohuro va'oromo mahe mio'amonëjo.

16 Mahe mio'amonëjamu ë Jew rajehu sisë hö uvarue muoho baeromo va'oromo mahoho mueberomo hömamu uvade höjo: Raro mahu ioho babojemego na ijego da'uego'irajo. Ëhi uvade höjo röhu a vadu'oho ioho bogo bojamare höjo.

17 Bogo bojamamu hiromo ijonö avoho uehorovoromo uvade höjo: O apare mu aribövioho ie aho'obëhe jëvë'ëro i barë'iröhoho bogo eni jëvajëjo. Na aviae harihoho jëvajëjo röhu vadunëro guomevo'ië'ajëjo.

18 Ëhuni naro ri'öromo aparö va'oromo ua'ejöjo: Apo naehu God-are örire jasi örire huë vavaeni bojëmodoho ëho naro mu sisë vaejë'e jëvajëjo.

19 Na a sisë jëvë'ego ëhuni ja bogo na harihoho ue'a'anuëjo. A'i jasi muoro bamevego na muoho vaejahoromo manaho bae'iröjo.

20 Ëijorajohuro ëhi uvonugoromo ri'öromo hesi vavuehu hijajire va'i va'ade höjo.

Va'i va'amu vavuohuro gavade höjo arue riribövire hesi harihoho rovamu. Ganugoromo vavaenimoromo tutuvo va'oromo guduamoromo dudöhade höjo.

21 Dudöhamu rue harihohuro uavade höjo: Apo naehu God-are örire jasi örire huë vavaeni bojëmodoho ëho naro mu sisë vaejë'e jëvajëjo. Na a sisë jëvë'ego ëhuni ja bogo na harihoho ue'a'anuëjo.

22 Ëhi uavamü hejë'i rue vavuohuro harihoho bogo ejaho'i hesi mu vaejharue aribövioho uëvade höjo: Ma-burëro va'oromo niögu maho jaegoho höru guduoho ëhi jue'ini ujuohaho rueromo sinoro övo gaenoro höroro io'amahohëjo.

23 Jëmëhu ma-je i muoharue sanuovë'e mioho baro anohego no i sörö'e iromo nimoronimoroharëjo.

24 Urimoho naro uvode höjo: Nani nasi harihoho guomë'e höjo. Nani diehi ë'ë'e höjo. Avevejö'oho na gavajoho hu iae hijajëjo. Urimoho öri ari'e göro subirö'öjade höjo. Avevejö'oho iae birohë'e jëvajëjo. Ëhuni ë'ego no nimoroharëjo. Ëhi uëvë'ëro söröe iromo nimoro nimore bamare höjo.

25 Ëhi'amu gavë'i iae muriohuro muro hijade höjo. Muro hiromo amo bëhire rue'i hejade höjo javavo'ego jajoho hëgöho rovavamü.

26 Jajoho hëgöho rovavamü hegorovo mu vaejarue ae gemuëro ruejörö uaromo rovamu uavade höjo: Rabëni ë'aruëjo.

<sup>27</sup> Rabëni ë'aruëjamu ruehuro uavade höjo: Jasi ijorajohuro rovamu jasi vavuohuro gavade hesi harihoho raboho raboho bogo ë'ë'e hesi örire ma-mae rovamu gagoro ma-je i muoharue sanuovë'e mioho huni anahade höjo.

<sup>28</sup> Anade höjamu rue muriohuro dë vörönimamu osare va'iröhoho bijönimade höjo. Bijönimamu vavuohuro amonö hörö rueromo uavade höjo: Nadi juahovo'i osaëro rueromo ioho ma-ijëjo.

<sup>29</sup> Ijëjamu rue muriohuro uavade höjo: Aveho hejëjo. Jasi jöho na bogo gemu vadu'oho ahaho'i vadune vadune na jasi muohemu vaejahobe rovë'e jevajëjo. Iae ëhi höjo röhu mi mae o mi sisë ëhu'o bogo bojemijane höjo ëhuro naehu nasi aemo'aemohu'o iromo nimoroho'irodoho. Bogo mae bogajo.

<sup>30</sup> Nasi öriroho bogo bojemi'i jasi harihoho magonaho sisëho ga'amoromo ëhuro jasi maho sisëho i barëjël'ëro rovamu gavë'i jero sanuovë'e mi mabëhoho anoromo hesi örire bojamane höjo.

<sup>31</sup> Bojamane höjamu rue vavuohuro uavade höjo: Jue'i ja majae ëhi na'o gemu mae hijanue höjo. Nasi sa'ae are inömo inöme ie bövie bise'e aho'o ma-jasiremu höjo.

<sup>32</sup> Ëhi höjo röhu urimoho naro uvode höjo: Nani jasi ijorajoho guomë'e höjo. Nani diehi ë'ë'e höjo. Avevejö'oho na gavajoho hu iae hijajëjo. Urimoho öri ari'e göro subirö'öjade höjo. Avevejö'oho iae birohë'e jevajëjo. Ëhuni noehu huë mae baeromo nimoronimorohë'oho iae mae höjo.

## 16

*Ae gemuehu hesi a börömo hesi mu sisë'i muebejahoromo röhu uehoro mae birohade uhu jöhoje.*

<sup>1</sup> Iae Iesuro hesi ijorajo ömo'ömoho uhu'e uëvadeje: Iae moni marohë'e jië'e ahuro hesi mu muebejahaje ahuro jaburo niö'iro arijare höjo. Ariromo eni jië'e ahuro hejade höjo uavam: Jasi mu vaejahaje ahuro jasi inömo inömoho ma-bu'öjahaje höjo.

<sup>2</sup> Ma-bu'öjahaje höjamu hegorovo ë iahuni uvoromo rovamu uavade höjo: Jaehu ë'anuoho na hejë'e jevajëjo. Nasi mu muebejanuoho vuonugo'anuëjo. Ëhuni nasi mu suri surioho ujuoho ro memego na gavöjo ja nasi mu diehi muebejanoho.

<sup>3</sup> Ëhi uavam rue mu muebejaje ahuro uehorovoromo uvade höjo: Nasi a börömhuro uevajëjo naro muoho vuonugojöro. Ëhuni na diehi'o'ejöjo. Sa'a umoromo o ëhi jië'e i'u'e mu gö vae'irodoho darugoho bogo eni jevajëjo. Ae gö jabesi örire ëninëmi'irodoho na javojegajëjo.

<sup>4</sup> O iae na uehorovajëjo. Na ae ajëmiromo ëhi ë'ejöjo ëhuro nasi börömhuro remö'öjogo na va'ego jabumë ae göëro göëro ueruomoröhego: Nasi osaro rovëjo.

<sup>5</sup> Ëhi uvonugoromo ae rahu rahu inömo inöme rabe rabe hesi a börömo bojami'iröhohuni jöe nugö'löromo uëvade höjo ae gemu gemu ruejöro. Urimore ahuro rovamu mu vaejaje ahuro uavade höjo: Nasi a börömo hesi örire mana bojami'iranoho dimino'e javajëjo.

<sup>6</sup> Dimino'e javajëjamu uavade höjo: Jovo'e rama masije aho'obëhe 100 bojami'irodoho jevajëjo. Bojami'irodoho jevajëjamu uavade höjo: Ja dimino'e bojami'irane jöho jië'e jiaje ave suroho baejëjo. Baeromo ma-burëro sa'aro hiromo ramae 100 bojami'irane jöho mu'u'i ba'obueromo ramae aho'obëhe 50 bojami'iranoho jajivëjo.

7 Ĕhi ě'ě'ěro ae gĕěro rovamu mu vaejaje ahuro uavade hĕjo: Ja'ojami'iranoĥo dimino'e javajĕjo. Dimino'e javajĕjamu uavade hĕjo: I esĕe aĥo'obĕhe 100 bojami'irodohoj javajĕjo. Jevajĕjamu uavade hĕjo: Ja bojami'irane jĕho jiĕ'e jiaje ave suroĥo baeromo esĕe 100 bojami'irane jĕho mu'u'i ba'obueromo esĕe aĥo'obĕhe 80 bojami'iranoĥo jajivĕjo. Ĕhi'obe va'ade hĕjo.

8 Ĕhi ě'ade jĕho hejĕ'ěro a bĕrĕmohuro hesi mu sisĕ'i muebejaje aĥo uavade hĕjo: Ja ueĥoro mabĕhe mae rovavamu ěho ě'ane hĕjo. Ĕhi rajahijade hesi bĕhohoj ave sa'a hesi muohemu ueĥorovarue aribĕviovuro ueĥoro mabĕhe biroĥoromo jabesi muohoj vaeruomaje hĕjo. A'i God-are aji'e mu ueĥorovarue aribĕviovuro simane sisĕ'i sisĕ'i ueĥorovoromo muohoj vaeruomaje hĕjo.

9 Ĕhesi bĕhohoj na uĕ'ejĕjo. Jemĕro ave sa'a hesi monioĥoj baeromo ĕhuro mu mae vaeromo jemesi agane baejĕvorĕjo. Ĕhi ě'ĕ'ohoj ĕhuro vuovĕvo'iramu moni hesi bĕhohoj barĕ'iramu God-ro uĕ'a'ajĕjo: Nasi amoro rueromo ma-ioro'ioremu raromohĕjo.

10 Ae rahu mu inino avohoj muebejĕ'ohuro mu masijohu'oj avohoj mueberuomaj'ajĕjo. Ae rahu mu inino sisĕ'i muebejĕ'ohuro mu masijohu'oj sisĕ'i mueberuomaj'ajĕjo.

11 Ĕhuni jemĕ ave sa'a hesi inĕmo sisĕ'i muebejĕ'ohoj God rabĕni ō'idĕ hesi inĕmo mahoj bojĕmi'ajĕjoj jemĕro muebejĕro.

12 O jemĕhu ae gĕ hesi bĕvi bise'oj bogoj avohoj muebejahĕ'ohoj God rabĕni bĕvioĥoj bise'ohoj i'imĕmi'ajĕjoj jemesi ujuohojĕro.

13 Ae niĕ'i bĕrĕmohoj gemuohoj jĕvajĕromoj jabesi mu gemuore havoromoj vaejĕ'ohoj bogoj eni javoj'ajĕjoj. Ja gĕho nue huodivo'i gĕho rajahi'anuĕjoj. O gĕho mae ueĥorovo'i gĕho bijĕnimoj'anuĕjoj. Ĕhesi bĕhohoj God'oj moni'oj niĕ'i bĕrĕmohoj gemuohoj jĕvajĕromoj gemuore havoromoj mu vaejĕ'ohoj bogoj eni javoj'ajĕjoj.

### *Iesuhu jĕ masije gĕ gĕ majĕhijade jĕhoje.*

14 Iesuro ĕhi uĕvamu hejĕ'i Pharisee aribĕviovuro moniemu ueĥorovoruumĕ'ěro Iesu sivareje.

15 Sivamu hegorovo Iesuro uĕvadeje: Jemĕ ma-dĕĕremu mu mahoj vaejaruje hĕjoj aĕro jemĕ gĕromoj uvojĕro: Ĕaribĕvioĥoj mu mae vaeruomaje aribĕvie jioruomajĕjoj. Rĕhu jemesi dĕ vĕvĕbajoj'ohoj diehi jiajohoj God iae gĕ barĕjaje hĕjoj. Huhu jemesi dĕ vĕvĕbajoj'oj gĕvĕ'ohoj aehu gĕvaruĕhioĥoj hu bogoj ĕhioĥoj gĕvaje hĕjoj. Ĕhesi bĕhohoj aehu sarerivoromoj uvarujohoj: Mabĕhe hĕj uvarujohoj God-hu gavajohoj sisĕ bĕhe hĕjoj.

16 Urimĕ'i Moses-hu surire jajivade jĕgorohu'oj jĕ God-aro baeromoj majĕhinĕvare a ioro'ioroj jabesi surire jĕhu'oj aehu hebe rovarohoj evare John rovade hĕjoj. John rovamu evare God-hu bĕrĕme namiromoj ae aĥo'obĕhe muebejĕvaje ĕ hesi huĕ ma jĕho aevoromoj rovĕ'e hĕjoj. Aevoromoj rovĕ'ego ae aĥo'obĕhe daruge aĥo'oj bojamirovoromoj birivoromoj ŕroĥoj jiovoruomajej hĕjoj ĕhuro God-ro muebejĕvego hesi aĥarinĕjĕvorĕhego.

17 Ĕhi jiĕ'e mu i'ohoj rovĕ'e hĕjoj rĕhu God-hu urimoj bojĕmade jĕgorohoj bogoj barĕ hesi hĕjoj. Ō'idĕ'oj sa'a'oj sisĕrĕjĕ'ohoj ĕho samaej hĕjoj. A'i God-are jĕgorohoj gĕ bogoj bisemu vadu'ohoj sisĕrĕ hesi hĕjoj.

18 Rĕhu jĕ gĕhajo. Baruehu vaboroj nugĕ'ŕ'i gĕ masuvĕ'ohoj ĕho bogoj masuvĕ'e muohoj jio'i goĥo'amarue muohoj hĕjoj. O aehu nugĕ'ĕjĕ'e

magonaho masuvë'oho bogo hesi vaboro maho masu'i ëho goho'amarue muoho höjo.

*Inömo ma'e ahu'o Lazarus'o jabu niö'ihu ë'are jö Iesuhu jövdohoje.*

<sup>19</sup> Iae ae gemuëro hijade höjo. Hesi inömo inöme are sa'ae bövie mae jiade höjo. Niöge sanuovë'e kavuë'e mabëhe io'amonövade höjo. Iruno'e aho'obëhe sörönö'e iromo nimoronimorohonövade höjo. Majae aho'o ëhi gemu ëhi'obe rovade höjo.

<sup>20</sup> Ëhi'ego inömo'e a hesi ojanore bövi bise'o bogojië'e ahuro ë raromonövade höjo. A ihoho Lazarus jiade höjo. Lazarus-are sino haho'oho ma-sagohemu jië'e jiade höjo.

<sup>21</sup> Sagohemu jio'ego Lazarus-ro nimonövade höjo eni jië'e a hesi i vitu vituoho i'irovo ëhuro da'uomojöro. Röhu vaevë'oho öëro rueruomoromo hesi sagohoho sëhahonövare höjo.

<sup>22</sup> Ëhi'ojuvo iae ë bövi bise'o bogojië'e aho guomade höjo. Guomamu aneraëro hesi aru'ahoho bava'amu nosi bëhe Abraham-are guruto mare avoho hijade höjo. Hijamu ë eni jië'e ahu'o guomade höjo. Guomamu guavare höjo.

<sup>23</sup> Guavamu vuovarue ariböviehu raromaruire va'o hijade höjo. Hiromo vi'ehi sisë bëhe baejë'ëro nunëro ga avoho'i gavade höjo Abraham arue riribövire hi'i Lazarus Abraham-are guruto mare hijamu.

<sup>24</sup> Ëhi gënuGOROMO ma-darugo'o uvade höjo: Saso Abraham-ajo. Nani vavaenimoromo Lazarus nugö'öjego huro hesi övo namoho jovore ba'amoromo rueromo nasi bitaroho rëhoromo sanuoveho'irajo. Na vëniro jevë'ëro sisë maro vi'ehégavajëjo.

<sup>25</sup> Vi'ehégajëjamu Abraham-ro ri'öromo uavade höjo: Sasajo. Aveho uehorovëjo. Sa'are hijë'i ja huë ma-mabëhe birohane höjo. Lazarus hu hijë'i ma-huë sisëmu birohade höjo. Röhu jaruvoho Lazarus-ro sanue baeromo hijajëjo. Jero vi'ehi bëröme baeromo hijanuëjo.

<sup>26</sup> Röhu jö göho ëhu'o hejëjo. No aviae javuo'i jemë aruae jëvajëjo. Röhu ririre hahe guoröte jië'ëro ëhuro ave jioromo jemesirire ö'ë'oho bogo eni jio'i jemesirire jioromo ave rovë'oho bogo eni jiajëjo.

<sup>27</sup> Bogo eni jiajëjamu uavade höjo: Saso ëhi jië'oho huë baejevoromo Lazarus nugö'öjego huro nasi aganehu raromaruire va'ajo.

<sup>28</sup> Na öe aho'obëhe övo gö mine jevë'e jiaje uavego Lazarus-ro va'oromo nasi ö ömo'ömoho jögore majëhi'irajo ëhuro ave vörö'eroho bogo rueruomoröhe höjo.

<sup>29</sup> Ëhi uavamu Abraham-ro uavade höjo: Röhu jasi ö ömo'ömoho Moses-are surire jöho mami'e gavarue höjo. Jö God-aro baeromo majëhinövare a ioro'ioro jabesi surire jöhu'o gavarue höjo. Ehuni nadi'ego jabumëro jabesi jöho ejëho'irarëjo.

<sup>30</sup> Ejëho'irarëjamu uavade höjo: Saso Abraham iae ëhi höjo. Röhu surire jöho bogo eruomo'ajëjo. A'i vuovoromo ave ro raromajire aehu ë jioromo ri'ö va'oromo jö majëhijamu hejë'iroho iae jabu huotorovoromo mae uehorovo'aruëjo.

<sup>31</sup> Mae uehorovo'aruëjamu Abraham-ro uavade höjo: Bogo ëhioho jio'a'ajëjo. Jasi ö ömo'ömoho Moses-are surire jöho bogo ejaharue höjo. Jö God-aro baeromo majëhinövare a ioro'ioro jabesi surire jöho bogo ejëharue höjo. Jabesi jöho bogo ejëhobe rovë'ëro he'iröhe ae gö guomoromo ri'öromo jö majëhijamu hejë'oho hesi jöhu'o bogo ma uehorovo'aruëjo.

## 17

### *Mu sisë hesi jöhoje.*

<sup>1</sup> Ëhi'oromo Iesuro hesi ijarahajo ömo'ömoho uëvadeje: Göehu gö bijioho gavego sisë vaeröhe muoho iae ruenövo'ajëjo. Iae ëhi jio'a'ajëjo röhu ae rahu ë mu barovë'o ho vaevë'o ho sisërë'ajëjo.

<sup>2</sup> Asisö'onö'e jörume raromarue ae gemu mu sisë röjahijamu bejë'o ho mu sisë bogo röjahijajevare ë mu sisë röjahijaje a hesi sönö'ahore aëro i'u'e munë hitahiohuro tövoromo sö jovore ba'amego e'ure beva'oromo guomo'ibejajo ëho ma-jianovo'ibejajo. A'i ë mu sisë röjahi'iröhe ë hesi i'uo ho börömo bëhe bae'a'ajëjo.

<sup>3</sup> Ëhuni avo'avoho mueberovorëjo.

Jasi öehu jasi örire sisë vaejavë'o ho ahonëjo. Ahamu huhu huotorovoromo uehoro mae baejë'o ho ëhuro jero hesi sisëho uehorovoromo vuonugonëjo.

<sup>4</sup> O majae gemu röhu mu sisë gö'o gö'o vae 7 vaejavo'i hiromo röhu vae 7 ro ua'i hijë'o ho: Iae naro mu sisëho vaejë'ëro jevë'ëro vuonugo'ejö ua'i hijë'o ho jero uehorovoromo vuonugaho'i hinëjo.

### *God mae uehorovoromo ëhuro mu masijo vaeröhe jöhoje.*

<sup>5</sup> Ëhi uëvamu Iesuale apostle ömo'ömohuro ri'öromo Bada uavareje: Iae no jasi darugoho ma-bisemu mae uehorovarue höjo. Röhu jero ajamuego no mae uehorovo avoho'irarëjo.

<sup>6</sup> Mae uehorovo avoho'irarëjamu huro uhu'e uëvadeje: Mustard bajoho inino mae jio'amajëjo. Mustard baje gemu ma-bise'o jiajëhi ëhi uehoro mae ma-bisemu baeromo God mae uehorovo'ibejarijëjo ave namijaje ijo börömo ho ua'ibejarijëjo: Jasi jahorovëjo. Jahorovoromo va'oromo sö jovohuro jasi ba'amorovë ua'ibejarijëjo ë ijohuro jemë ejëho'ibejajo. Mae uehorovo'ibejarijëjo ëhi jië'e muoho vae'ibejarijëjo.

### *A börömo hesi mu vaejarue uhu jöhoje.*

<sup>7</sup> Röhu jö göho jemë nasi jö hejaruje aribövioho nani ja ae gemu jasi muemu vaejaje ae javajëjo. Nani huro jasi muro hiromo sa'aho avo-haho'ajëjo o ö mahu'o ho muebejaho'ajëjo. Mu vaeromo rovë'o ho na ja hu uanëjo: Ro hiromo ie ijëjo. Ja bogo ëhi jië'e jöho ua'i

<sup>8</sup> a'i ua'a'anuëjo: Nasi ioho avohehoro jasi niögoho avoho ruohoromo ro ioho jovoho i'imemego na i'iröjo. Na ijego evaro ja'o inëjo.

<sup>9</sup> Jaehu mu jö ëhi bojamamu hu ejahoromo mu vaejë'o ho na ja uanëjo: Mabëhe huë baejevoromo ajemijane höjo. Bogo ëhioho ua'a'anuëjo hu jasi muemu vaejajego.

<sup>10</sup> Ëuhu jö hesi bëhoho jemë God-are muemu vaejaruje aribövie jëvajëjo. God-hu jemë bojëmaje mu jemë vae barëjë'iroho uvorëjo: No mu aribövi sisë sisë javuajëjo. Ëho nosi muego ë'are höjo.

### *Iesuhu ae 10 ajëmamamu ae gemuehu God huë mae uavade jöhoje.*

<sup>11</sup> Iae Iesuro Jerusalem amore va'ë'i va'ë'i Galilee sa'a vituohu'o Samaria sa'a vituohu'o birorohadinö ëhunö va'adeje.

<sup>12</sup> Va'oromo ë dirö'ore amore hörö'ia'amu gavë'i sino jomo'e ae aho'obëhe 10 rueromo rori'o riravareje.

<sup>13</sup> Riravoromo ma-darugo'o uvoruomadeje: Iesujajo. Badajajo. Noni vavaenimoromo ajamuijëjo.

14 Ajamuijĕjĕjamu Iesuro gĕromo uĕvadeje: De va'irarijoho arue priest ōmo'ōmoho rōjĕhirego jabumĕro morijĕgo gĕ'irarĕjo. Morijĕgo gĕ'irarĕjamu ōrire va'amu gavĕ'i marĕjĕvadeje.

15 Marĕjĕvĕjamu gagorovo ae gemuĕro vuonorō'ōromo ma-darugo'o God mabĕhe uabe rovadeje.

16 Rueromo Iesure hōru bĕhire ague aho hiromo rajahijadeje. Rōhu ĕ aho bogo Jew rajehu jio'i Samaria raje jiadeje.

17 Rovĕjamu gagorovo Iesuro uavadeje: Jomo'e ae aho'obĕhe 10 marĕjĕvade hōjo. Na mae-ĕjo. Rōhu a ioro'iore 9-ho diehi'oromo bogo rovere hōjo.

18 Diehi'oromo nosi Jew rajoho bogo rueruomo'i ave sa'a gö rajohuremu God mae ua'i vuonorō'ō rovade hōjo.

19 Ĕhi uanugoromo ĕ Samaria rajoho uavadeje: Ri'ō va'ĕjo. Jero God mae uehorovĕmu ĕhuro marĕjavĕ'e hōjo.

*God-hu aevoromo hesi aji ma rōjahuiromo bōrōme namiromo muebejavuo'irōhe jōhoje.*

20 Ĕhi'amu Pharisee a ioro'iorĕro ri'ōromo Iesu uavareje: God divare aevoromo bōrōme namiromo muebejavuo'iramu no hesi ahariremu raromo'ĕjarĕjo. Raromo'ĕjarĕjamu Iesuro uĕvadeje: God-hu bōrōme namiromo aho'obĕhe muebejĕvajoho vōrō'e muoho jemesi nunoho bogo garomo uvo'a'arujĕjo: God-ro aevoromo muebejavuo'ego no hesi ahariremu raromaruĕjo.

21 O ja bogo aho uĕ'a'anuĕjo: Aveho gahĕjo. God-ro ave dirō'oremu bōrōme namiromo muebejavuajĕjo. O arueho gahĕjo. God-ro ĕ dirō'oremu bōrōme namiromo muebejĕvajĕjo. Bogo ĕhioho uĕ'a'anuĕjo ĕ hesi bĕhoho God-ro jemesirire bōrōme namiromo muebejĕvajĕro jiĕ'ĕro.

22 Ĕhi uĕnugoromo hesi ijorajo ōmo'ōmoho uĕvadeje: Majae ijonō jemĕro God-are A Maho ge'i nimo avohoromo uvo'a'arujĕjo: Majae ĕgobōvie bogo gavĕ'ĕro nōrō majae ma-bisemu ga'ibejarĕjo mae javuo'ibejajo. Rōhu bogo ge'a'arujĕjo.

23 Bogo ge'iramu aĕro jemĕ sarerĕmiromo uĕ'a'aruĕjo: Gahĕjo. Nōrō aruae hōjo. O nōrō aviae hōjo. Ĕhi uĕvĕ'oho nadi ĕjĕhoromo ge'i jabu'oho va'orĕjo.

24 Ĕhesi bĕhoho naehu rue'irode majaho rue'iramu na bogo dirō'e gemuoroho ro hi'i a'i baderehu ō'idōre baderivoromo ō'idōe aho'o ajivo barĕjĕgo ae aho'obĕhe ga barĕjaruĕhi God-are A Maho naro ĕhi rue'iramu ge'a'arujĕjo.

25 Iae ĕhi jio'a'ajĕjo rōhu urimoho na vi'ehe huĕ vavaene bōvie bise'e bae'ĕjōjo. Ave jaruvore raromarue aribōviahuro na bijōnegoruomo'ajĕjo.

26 Rōhu God-are A Ma naehu a nunire rue'iĕ'iroho a mami ae Noah-hu hijade majare jiadĕhi ĕhi gemuoho jio'a'ajĕjo.

27 Noah hijadevare evare aĕro ie jove ue'ahobe masurovobe ĕhi jiĕ'e muohemu uehorovobe va'ojuvo evare Noah-mĕro boat bōrōmore rumo va'amu gavĕ'i jovo bōrōmĕro rojomoromo a ioro'ioroho baeniagĕgamu vuovo barĕ nahonahovade hōjo.

28 O a mami ae Lot-hu hijade majare jiadĕhi God-are A Ma naehu a nunire rue'iĕ'iroho ĕhi gemuoho jio'a'ajĕjo. Lot hijade majare evare ae aho'obĕhe ie jove ue'ahobe bōvie bise'e imobe i'o mu'e vaebe javue vaebe ĕhi jiĕ'e muohemu uehorovobe va'ojuvo

<sup>29</sup> evare Lot-ro Sodom amore jioromo mae va'amu gavë'i vënëro girosi-jiomë'e munëhuro rireromo ruvebiromo a ioro'ioroho bijuëmamu vuovo barë nahonahovade höjo.

<sup>30</sup> God-are A Ma naehu rue'ië'iroho aëro ëhi gemuoho ë'obe va'ojuvo evare ë majaho ma-majioho rue'a'ajëjo.

<sup>31</sup> Ëmaja rovë'oho ae rahu javu dönö haradare raromo'i jabesi inömo inömo osanö jië'oho nadi inömoho ujuoho'i abo osaroho rumo va'i o mure raromë'oho jabu'o nadi inömoho ujuoho'i uehorovoromo vuonorö'ö rue'i ma-huruomo'irarëjo.

<sup>32</sup> Lot-are vaborehu hesi inömo uehorovoromo vuonorö'ö'ia'amu i'uehu hesi örire rovade jöho avoho uehorovorëjo.

<sup>33</sup> Ae rahu hesi sinohuni uehorovoromo biririvoromo ave sa'are hi'i ëhemu uehorovë'oho vuovo öriro va'a'ajëjo. O ae rahu hesi sinëni bogo uehorovo'i nasi jöhuremu uehorovoromo ma-guomorovë'oho ë ahuro maro hiemu hi'a'ajëjo.

<sup>34</sup> Röhu na avehu'o uëvajëjo. Naehu rue'irode vahire evare ae niö'iro röhe gemuore diroho'aruëjo. Diroho'iramu God-ro göho bae'i göho ë vuonugo'ajëjo.

<sup>35</sup> Magonahe niö'iro gemuoro ariromo ioho sa'ijovoromo avoho'iramu God-ro göho bae'i göho ë vuonugo'ajëjo.

<sup>36</sup> [Ae niö'iro mure ari'iramu God-ro göho bae'i göho ë vuonugo'ajëjo.]

<sup>37</sup> Ëhi uëvamu rue ijorajo ömo'ömohuro uavareje: Bada ja di öri ari'ere vuonorö'ö ruenëjo. Ruenëjamu uhu'e uëvadeje: Sagohe dinö'e jiajire ë ugoho gagovoruomo'ajëjo.

## 18

*Magonahe doruehu jö mevaje a hesi örire biririvoromo ëninamijamu ajamade uhu jöhoje.*

<sup>1</sup> Iae Iesuro uhu jöe gö majëhijadeje aëro heromo uvoröhego: No bogo u'uhö'i biririvoromo parie vae'i ari'ëjarëjo.

<sup>2</sup> Majëhiromo uëvadeje: Iae ae gemuëro hijade höjo. Hu jö heromo mevaje a böröme jiade höjo. Hu God bogo ma uehorovoromo a jabesi örirohu'o bogo ma uehorovonövade höjo.

<sup>3</sup> Hu bogo mae uehorovë'e ae jio'i röhu magonaho doruëro ë ame gemuore hijade höjo. Hiromo ë jö mevaje a hesi örire rueromo ua'i hinövade höjo: Ajemego sisë vaejevaje aho iosiramil'iröjo.

<sup>4</sup> Ëhi ua'ego bogo ejahonövade höjo. Ëhi'o'i arijuvo ë jö mevaje ahuro hesi uehorovoromo uvade höjo: Na God bogo uehorovoromo a jabesi örirohu'o bogo uehorovaje höjo

<sup>5</sup> röhu ave magonaho doruohuro dinemi'i hi'ego na bijönego'ego ëhuni na hesi öroho avohaho'ëjöjo huro ro uel'i hijego na he'i hijego u'uvevojöëni.

<sup>6</sup> Badaro ë uhu jöho ëhi majëhinugoromo jö bëhoho uëvadeje: Ëjö mevaje a sisëhu diehi jövadoho uehorovorëjo.

<sup>7</sup> A'i God-ro diehi ë'a'ajëjo. Hesi aribövi maehu vahie sisone jene hesi örire ëninami'i arijaruoho na hu jabesi mu öroho bogo avohëho'ajëjo. Na hu majae ëgobövie örisanuovo'i bogo burëroho ajëmi'ajëjo.

<sup>8</sup> Iae hu ma-burëro ajëmi'ajëjo. Röhu God-are A Ma naehu sa'are rovë'iroho na na ga'ëjöjo aëro biririvoromo God mae uehorovo'iramu o bogo.

*Ae döemu mae jiajohu'o a sisë'o pari vaejare uhu jöhoje.*



<sup>9</sup> Iae Iesuro gëvadeje ae gö jabetesi sivue uehorovoromo uvamu: Noremuëremu maho javuajëromo a ioro'ioro jabetesi jöho bogo uehorovoromamu gëgorovo jabetesi örيره ave uhu jöho majëhiromo uëvadeje:

<sup>10</sup> Iae ae niö'iro God-are osa börömore parie vae'i ajiomare höjo. Göho Pharisee ae jiade höjo. Göho vajiohu'e tax baejaje ae jiade höjo.

<sup>11</sup> Ajiomoromo Pharisee ahuro va'oromo namiromo parie vaeromo ëhi uavade höjo: God-ajo. Na jasi örيره huë mae uavajëjo rabëni a ioro'ioro jahu anano'e vajiohu'e goho'amarue mu vaeruomajëhi naehu bogo ëhi ë'ajohuni. O aruëre tax baejaje ae jiajëhi na bogo ëhi jevajohuni.

<sup>12</sup> A'i hurae gemu gemu hesi uhure majae niö'i jasi jöëni na ioho bogo ijaje höjo. Inöme rabe ujuohë'o ho 9 nasi bahi'i gemu jani bamahobe va'aje höjo.

<sup>13</sup> Ëhi ua'irögoro rue tax baejaje ahuro rori'o namiromo javojimamu nunoho bogo ö'idöho sioroho'i vineboho övëro ano'anovoromo God uavade höjo: Na a sisë jevaje nani vavaenimëjo. Ëhi'are höjo.

<sup>14</sup> Naro jemë uëvajëjo: Tax baejaje aho God-ro hesi sisëho uehorovoromo vuonugamu God-are nurire mae namijë'ëro hesi osare vuonorö'ö abuejade höjo. A'i rue Pharisee aho bogo ëhioho maho abuejade höjo. Ëhesi bëhoho ae rahu hesi sivu uehorovoromo döre bamorovë'o ho hesi ihoho abue'a'ajëjo. O ae rahu ba'obuerovë'o ho hesi ihoho döro ajiomo'ajëjo.

*Iesuhu hesi övo asisö'o inino jabetesi sinore bamëhade jöhoje.*

<sup>15</sup> Ëhi uëvamu aëro asisö'o ininoho ëhu'o sö ujuoho rueruomadeje Iesuro öve jabetesi sinore bamëhojoro. Ujuoho rovamu gëgorovo Iesure ijorajo ömo'ömohuro birëgareje.

<sup>16</sup> Birëgamu hegoro Iesuro asisö'o ho ujuoho ruejoro uvoromo hesi ijorajoho uëvadeje: Nadi ahëvo'i uëhego rueruomajo. Ëhi jië'e asisö'o va'ëne jörume raromë'e aribövioho God-ro böröme namiromo muebejëvego hesi ahariremu raromoruomaje höjo.

<sup>17</sup> Ave jöho na jö mae uë'ië'ajëjo. Asisö'o ininehu bogo sivu uehorovo'i God-hu muebejavuajoho mae hö uvaruëhi ae rahu bogo ëhi uvë'o ho God-are ahariroho bogo va'o raromo'aruëjo.

*Bövi bise'o marohë'e a hesi jöhoje.*

<sup>18</sup> Ëhi'amu iae Jew rajo a böröme gemuëro ri'öromo Iesu uavadeje: Tisa ja a mae javajëjo. Na diehi'oromo ma-ioro'io remuoho maroho hi'ejöjo.

<sup>19</sup> Maroho hi'ejöjamu uavadeje: Jero na uevanuëjo: Ja a mae javajëjo. Iae mae höjo röhu hesi God gemu a maho höjo.

<sup>20</sup> Röhu mae hi'iranëro ue gevanuoho ja God-are jögoroho iae gavanue höjo. Nadi goho'amonëjo. Nadi aho anonëjo. Nadi vajiohoho baenëjo. Nadi sareri'e jöho aho majëhinëjo. Jasi vëmoho vavuoho mae uehorovëvonëjo. Mae hi'irane öroho ëhi höjo.

<sup>21</sup> Öroho ëhi höjamu uavadeje: Iae mae-ëjo röhu na asisö'ere aevoromo jö ebe rovodoho jaruvohu'o ëhi gemuoho ë'aje höjo.

<sup>22</sup> Ëhi gemuoho ë'aje höjamu hegoro Iesuro uavadeje: Iae mae ë'anue höjo röhu mue gemu bogo vaejë'e javajëjo. Jasi bövioho bise'o ho imo'amoromo monioho baeromo inömo bogo eni jië'e aribövioho suvuorëminëjo. Ëhi ë'ë'o ho bövie bise'e maho maho janioho ö'idöre jiaho'ajëjo. Ëhi'oromo rueromo nasi ijoro ijoro juvonövonëjo.

<sup>23</sup> Ëhi uavamu hegoro ruehuro hesi uehorovoromo uvadeje: Na bövie bise'e börömo mae jevë'ëro suvuorëmi'irodoho na bogo eni jevajëromo huë vavaene böröme baejadeje.

24 Huë vavaene baejamu Iesuro hu garomo a ioro'ioroho uëvadeje: Bövi bise'o marohë'e mae jië'e ariböviehu God-hu muebejaje öri ari'ere va'è'oho anoji'e mae höjo.

25 Mi börömo anugo gagore nugö'öjè'oho ja bogo eni javo'ajëjo. Röhu ëhi è'è'oho samae jianovo'i a'i bövi bise'o marohë'e ariböviehu God-hu muebejaje öri ari'ere va'iröhoho ëho anoji'e mae höjo.

26 Ëhi jövamu heromo uavareje: Ëhi jië'oho no diehi'oromo maroho va'ejarëjo. No ae aho'obëhe bogo eni javuajëjo.

27 Bogo eni javuajëjamu Iesuro uëvadeje: Iae ëhi höjo röhu jemë ma-aëro jëvè'ëro mu vaejè'oho bogo eni jëvajoho ëho God hu eni jiajëjo.

28 Ëhi uëvamu Peter-ro ri'öromo Iesu uavadeje: Aveho gavëjo. Noro bövie bise'e nosiroho vuonugo'i jasi ijore ijore jijihë'e javuajëjo.

29 Jijihë'e javuajëjamu Iesuro uavadeje: Ëho iae mae höjo. Aveho na jö mae uë'iè'ajëjo. Ae rahu God-hu muebejëvo'iröhe mu uehorovoromo ëhuni javue vabore ö ömo'öme vëmu vavu'e aboji harihu'e vuonugo'amè'oho

30 ëhi jië'e aribövioho jemë jemesi bövioho bise'oho ëho ma-bise'e vuonugarije höjo röhu avevejö'e ave sa'are bövi mae bae'a'arujëjo. O majae ijönö jemë ma-ioro'ioremu maro raromo'arujëjo.

*Iesuhu guomoröhe jö urimo vae niö'i majëhijadoho ijönö röhu maho majëhijade jöhoje.*

31 Iae Iesuro hesi ijoraje 12-ho rori'o sö va'oromo uëvadeje: Aveho hehëjo. No Jerusalem amore ajiomaruëjo. Ajio raromo'iramu evare urimo jö God-aro baeromo majëhinövare ariböviehu jö jajivo'amarëhi ëhi jië'e muoho Jerusalem rajëro God-are A Ma nasi örire vaejevo'aruëjo.

32 God-ro hesi ëhi bamè'ëro naro sa'a göre jioromo rovere aribövi jabesi övore va'ejöjo. Va'iramu jaburo baejevoromo sivegoromo ijumevoromo sabëro ödegoromo

33 hisuebijevoromo anego'iramu guomevo'ajëjo. Guomoromo majae niö'i gemu hesi uhure ri'ö'ejöjo.

34 Ëhi uëvamu hegorovo hesi ijorajoho jabu bogo mae bogo hejareje. Bëhoho subivëhë'ëro hesi jöho bogo avoho baejareje.

*Iesuhu Jericho amore rueromo nuni sisë'e ae ajamade jöhoje.*

35 Ëhi'amu iae Iesuro va'adoho va'o Jericho amore hörö'iro è'adeje. Röhu nuni sisë'e ae gemuëro è öri ionire hiromo maëni sisëni ae ëninëmijadeje.

36 Ae ëninëmiromo hejade ae aho'obëhe mae rova'avamu hejë'i ae uëvadeje: Jabumë rabë'i rova'aruëjo.

37 Rabë'i rova'aruëjamu aëro uavareje: Iesu Nazareth rajohuro rova'ego ëhuni è'aruëjo.

38 Ëhi uavamu hegorovo nuni sisë'e ahuro ma-darugo'o uvadeje: David-are ujoho böröme javaje Iesu jero nani vavaenimëjo.

39 Vavaenimëjamu hegorovo rue urimo va'are ariböviohuro birevoromo uavareje: Jöe vuonugëjo. Jöe vuonugëjamu hejë'i ma-darugo ma'o uvo'i hijadeje: Hë David-are ujoho nani vavaenimëjo.

40 Ëhi uvo'i hijamu Iesuro va'adoho vuonugo'i è namiromo uëvadeje: Nuni sisë'e aho hu'irae baruehëromo barovamu nuni sisë'e aho uavadeje:

41 Naro diehi ajamijöro nagajëjo. Nagajëjamu uavadeje: Bada ajemego na nune dadovoromo uherihöjo.

42 Uherihöjamu Iesuro uavadeje: De nune dadovoromo uherihëjo. Jero God mae uehorovamu ëhuro marëjavë'e höjo.

43 Ëhi uavamu ma-burëro uherihadeje. Uherihoromo God huë mae uabe Iesuare ijore ijore va'adeje. Va'amu ae aho'obëhe garomo God rajahiruomadeje.

## 19

*Zacchaeus-hu Iesu ga'i nimamu ëhi ë'ade jöhoje.*

1 Ëhi'amu Iesuro Jericho amore rovë'ëro amo ririre rova'adeje.

2 Röhu ë amore ae gemu hijë'e jiadeje. Hesi ihoho Zacchaeus jiadeje. Hu tax baejaje a böröme jiadeje. Hesi bövioho bise'oho marohë'e mae jiadeje.

3 Amo Iesuro rueromo va'ia'amugo Zacchaeus-ro Iesu ga'i sivohoromo röhu ae aho'obëhe tagavoromo urahë'ëro bunosirivamu bogo avoho gavadeje.

4 Bogo gagorovo uvadeje: Iesuro ë örire va'a'ajë uvoromo urimo tutuvo va'oromo öri bëhire ijo duvahore ajio hijadeje Iesu rovego niomo'amo ga'iro.

5 Ajio hijamu Iesuro hu jiaji'ere ruegoro namiromo sioroho garomo uavadeje: Zacchaeus-ajo. Ma-burëro ruvebijego va'arëjo jaruvoho na jasi osare hi'ië'e jevaje.

6 Ëhi uavamu hejë'i Zacchaeus-ro nimorohoromo ma-burëro abueromo Iesu hu'irae baeromo hesi osare va'oromo rajahijadeje.

7 Rajahijamu ae aho'obëhe gavare Iesuro Zacchaeus-are osare va'amu gagorovo bijönimoromo uarovareje: Asë'e Zacchaeus a sisë höjo. Iesu rabëni ëhi jië'e a hesi osaroho niavo'i va'ajëjo.

8 Ëhi uarovamu Zacchaeus-ro ri'öromo Bada uavadeje: Bada aveho hejëjo. Nasi bövioho bise'oho ririre tarioromo vituoho bae'i vituoho bogo eni jië'e aribövioho suvuorëmi'ejöjo. Naehu a rahuare inömo sarerëmiromo vajiohehu ujuohodoho iae na ëhi niö'i ëhi niö'i ëhi mana vuonorö'ö bojëmibe va'ejöjo.

9 Bojëmibe va'ejöjamu hegoroovo Iesuro ae aho'obëhe uëvadeje: Jaruvo ave osare raromarue aribövi jabesi sisëho uehorovoromo vuonugëhë'ëro mae jëvajëjo. Ëhesi bëhoho Zacchaeus hu'o Abraham-are ujëro jië'ëro ëhu'ëro God-hu huë baejaje ae höjo.

10 Zacchaeus va'ëne ëhi subirö'ö'amë'e aribövi ioro'ioroho naho'amoromo sö rueromo maro nugo'amo'irodëni ëhuni God-are A Maho na rovode höjo.

*A böröme gemuehu hesi mu aribövi ijo bajo bojëmiromo avoho muebeje-horë uëvade uhu jöhoje.*

11 Ëhi uëvamu ae aho'obëhe hejareje. Heromo uvareje: Iesu Jerusalem hörö'i dunovajëjo. Hörö'iramu gavë'i no aevoromo ga'ejarëjo God-ro böröme namiromo no muebejavuo'iramu. Ëhi uvoruomamu gëgorovo Iesuro hesi jöho uhu'e majëhiromo uëvadeje:

12 Iae a böröme gemuëro hijade höjo. Hiromo öre ëgoböviro sa'a göro va'ië'ade höjo hesi sa'a mueberöhe darugoho baeromo vuonorö'ö rue'iröhëni.

13 Va'irögoro hesi mu vaejahaue ae aho'obëhe 10 jaburo ruejoro uëvoromo rueruomamu ae gemu gemu 20 kina 20 kina ëhi bojëmibe va'ade höjo. Bojëmibe va'oromo uëvade höjo: Ave monioho baeromo muoho ma-vaemu vaeromo monie gö'o döro baejehorego evare na vuonorö'ö rueromo bae'iröjo.

14 Ëhi uëvë'ëro va'amu gagorovo ë a börömo hesi sa'a rajohuro nue huodivë'ëro ae gö rëmö'öjamu a börömo hesi ijore va'are höjo. Va'oromo ë sa'a göre suorovoromo a masijoho uëvare höjo: Ëaehu böröme namiromo nosi sa'a muebejavuo'iröhoho no bijönaguajëjo.

15 Ëhi'amu ë ahuro hesi sa'a mueberöhe darugoho baeromo vuonorö'ö rovide höjo. Rueromo jöe nugö'öromo hesi moni bojëmade mu aribövioho uëvade höjo: Ruehego na gëvöjo monioho dimine dimine gö'o döroho baejehë'e jëvego.

16 Ëhi uëvamu ae gemuëro urimo rueromo uavade höjo: Jaehu 20 kina bojemijanohuro ëhuro na mue vaeromo gö'o döre 200 kina baejahë'e jevajëjo.

17 Baejahë'e jevajëjamu ruehuro uavade höjo: Mabëhëjo. Ja mu mae vaejanue ae javajëjo. Ja mu bise'oho mabëhe muebejehobe rovanohuni ëhuni naro darugoho bojami'ejöjo jero ame aho'o 10 muebejeho'iranego.

18 Ëhi uavamu gavë'i mu vaejaje a göhuro rueromo uavade höjo: Jaehu 20 kina bojemanohuro ëhuro na mue vaeromo gö'o döre 100 kina baejahë'e jevajëjo.

19 Baejahë'e jevajëjamu ruehuro uavade höjo: Jero ame 5 muebenëjo.

20 Muebenëjamu gavë'i mu vaejaje a göhuro rueromo uavade höjo: Jasi 20 kinaho aviae höjo. Niögëro numoromo avoho bamahë'e jevajëjo.

21 Ëhesi bëhoho naro ja juhuonamijode höjo ja vörö'e ae javë'ego. Ae göehu ba'amaroho bivaroho ja ma-ijanue höjo.

22 Ëhi uavamu hesi börömo huro uavade höjo: Ja mu sisë vaejanue ae javajëjo. Jaehu jasi jö'ehu jövanue jöe gemuoho ëho naro baeromo vuonorö'ö ja mana majahi'ie'ajëjo jero heromo uvo'iranego: Ojo'e na sisë ë'aje ae jevajëjo. Jero uvane höjo: Nörö vörö'e aëro jië'ëro ae göehu ba'amaroho bivaroho ma-ijaje höjo.

23 Ëhi uvanoho röhu ja rabëni nasi ijo bajoho bogo baeromo avoho bahi-jarue aribövi jabesi övoroho bamane höjo na rueromo nasiroho baeromo gö'o döre bamaroho ëhu'o bae'irode.

24 Ëhi uanugoromo ë bëhire riravarue aribövioho uëvade höjo: Ëia hesi 20 kina baeniahiromo 200 kina baejade aho bojami'hëjo.

25 Bojami'hëjamu rue ariböviohuro uavare höjo: Iae mae höjo röhu mami'ie hu 200 kina baejade höjo.

26 Baejade höjamu ruehuro uëvade höjo: Na aveho uëvajëjo. Mu vae'irane suvuore javë'oho God-ro gö'o bojami'iramu bae'a'anuëjo. O bogojavë'oho bisemu baejanoho God-ro baeniahi'ajëjo.

27 Röhu na nu huodegarue aribövi jabesi jöho uë'ie'ajëjo. Naro böröme namiromo muebejëvo'ia'amu bijönimare jiaje ëhuni guduamo ujuoho rueromo nasi nunoro muo'amego vuovajo.

### *Iesuhu Jerusalem mabëhe rovide jöhoje.*

28 Ëaribövioho ëhi uënugoromo Iesuro urimo Jerusalem hörö'i ajiomamu gavë'i ë ariböviohuro ijore rihromareje.

29 Ëhi'oromo Iesuro Olives Dahorure Bethphage amo o Bethany amo jiajinö ë ajio höröjadeje. Hörönugoromo hesi ijorajoho niö'i rëmö'öromo

30 uëvadeje: Arue jemesi nuninörire amohuro va'ohëjo. Va'o hörö'i ga'a'arujëjo donkey harihe bise'ego aehu döre bogo hiromo va'aruoho benugë'e jio'iramu. Benugë'e jiego jiovoromo hu'irae ruerëjo.

31 O aehu uëvë'o'oho: Jemë rabëni jiovarujë uëvë'o'oho uërëjo: Badaro ave mioho nimo'ego ëhuni jiovaruëre.

32 Ëhi uëvamu va'oromo gavareje Iesuhu uëvadëhi ëhi jiamu.

33 Ëhi jiamu gagorovo jaburo donkey harihoho jiovamu gavë'i ë mi ar-ijo'o'oho jaburo gëromu uëvareje: Jemë rabëni donkey harihoho jiovarujëjo.

34 Rabëni jiovarujëjamu rueho jaburo uëvareje: Badaro ave mioho nimo'ego jiovaruëjo.

35 Ëhi uëromu jiovoromu hu'irae barueromu jabesi niögoho mi dejore ruaho'amo bahiromu Iesu ma'enamumu ajio döre hijadeje.

36 Hiromu va'amu gavë'i ae aho'obëhe niögoho örire ahahobe va'areje.

37 Ahobe va'amu Iesuro ë va'oromu Olives Dahorure ajiomoromu hojire höröromu Jerusalem hörö'i abue'ia'adeje. Abue'ia'amu Iesure aribövie aho'obëhe Iesuro mu masije aho'o vaejamu garuomë'ëro ma-darugo'o God mae uabe nimorohobe abueruomadeje.

38 Abuejë'i uvoruomadeje:

Ave aho a bërömehu Badare ihore rovajoho mabëhëjo.

Ö'idöre aribövioho huë maro raromaruëjo.

Aje aho'o God-aremu höjo.

39 Ae aho'obëhe hu'o gemuore va'oruomadeje röhu Pharisee a ioro'iorohuro Iesu uavareje: Tisa jasi aribövioho uëvego ja rajahijaruoho vuonugarëjo.

40 Vuonugarëjamu Iesuro uëvadeje: Bogajo. Na aveho uëvajëjo. Nasi ariböviehu rajehijaruoho vuonugo'ibejarëjo ë munëho jaburo aëro ë'anovoromu nasi örire rajehiruomoromu ma-darugo'o uvoruomo'ibejajo.

*Iesuhu Jerusalem amo rajëni nivade jöhoje.*

41 Ëhi uëngoromu Iesuro va'adoho Jerusalem amo bëhi mare va'adoho va'o amoho garomu vavaenimoromu

42 nivë'i uvadeje: Vaevë'o'oho jemë jaruvo ga'ibejarijëjo jemë diehi ë'oromu ma-mae raromö'irarije öroho ëhi jiego ga'ibejarijëjo mae jëvo'ibejajo. Röhu jaruvo ga'ibejarijoho tugohë'ëro bogohöjo.

43 Majae ijoho rue'iramu jemë'o muorovarue ariböviohuro rueromu sa'ae babaenemi rova'oromu tugohoromu ruë numë numëvo barë'aruëjo.

44 Numëvoromu jemë ujuoho sa'are behumëvo'amo'aruëjo jemë'o jemesi asisö'ohu'o. Munë javu vaeromu babaenemibe ajiomaroho jaburo dadovo'iramu ahoromu sa'aro ruvebi barë nahonahovo'ajëjo. Rabëni hesi bëhoho God-ro jemë ajëmi'i rovamu jemëro ëho bogo uehorovë'ego ëhunijajo.

*Iesuhu God-are amo bërömore va'oromu diehi ë'ade jöhoje.*

45 Iesuro nivë'i ëhi uvoromu God-are amo bërömore ajiomoromu bövie bise'e imo'amarue aribövioho osare jëvamu rarovö'öjëvadeje.

46 Rarovö'öjëvoromu uëvadeje: God-are surire jöho ëhi uvë'e höjo: God nasi osaho nasi örire jö ato'irarije osae höjo. Ëhi uvë'e höjo röhu jemëro mu sisë ë'ë'ëro ëhuro ave osaho vajiohu'e ariböviehu gurihirovarue juju gagoho va'ëne höjo.

47 Ëhi ë'ë'ëro Iesuro majae ëhi God-are osare hiromu jöho röjëhinövadeje. Röjëhijamu priest masijohu'o Jew rajo jögoru öri röjëhijarue ariböviohu'o Iesu ano'iröhe öroho naho'i amo rajo a masijoho jabu'o ëhi ë'areje.

48 Öroho nahoromu gavare ae aho'obëhe Iesure jöhuremu heli hia'e avohamu gëgorovo uvareje: No Iesu anë'o'oho ë aribövioho jaburo diehi'avuo'aruëjo. Ëhi jië'ëro Iesu anoröhe öroho bogo birohareje.

## 20

*Jew rajo a masijehu Iesu bogo ma uehorovoromo darugoho dinö'e baejane hö uavare jöhoje.*

<sup>1</sup> Ëhi'amu Iesuro God-are amo börömore hiromo ae magonahe hesi jö maho majëhiromo hesi öroho røjëhijadeje. Røjëhijamu gavë'i Jew rajo priest masijohu'o jabesi jögoru öri røjëhijarue ariböviohu'o ëho jaburo a duvaho ömo'ömo'hu'o gemu mae rueruomadeje.

<sup>2</sup> Rueromo Iesu uavareje: Ave jöho uövüego no he'irarëjo. Jaehu God-are amo börömore hiromo mue gö gö vaejanuoho diehi jië'e daruge javoromo o raro darugoho bojamijë'ëro ëhi jië'e muoho vaejanue höjo.

<sup>3</sup> Vaejanue höjumu Iesuro uëvadeje: Nasi darugo hesi jö ue gevarujoho na'o jemë jöe gemu uë gë'ië'ajëjo.

<sup>4</sup> John-hu bapataeto vaejavuonövadoho na God-ro o ma-aëro darugoho bojamijë'ëro ëhioho ë'onövade höjo.

<sup>5</sup> Ë'onövade höjumu rue a masijohuro Iesu diehi mana ua'iröhe jöho jabesi mevoromo uarovareje: Noehu uavë'o'ho: God-ro John darugoho bojamade hö uavë'o'ho Iesuro uö'a'ajëjo: Ëhi jië'o'ho jemë rabëni John bogo ma uehorovarije höjo.

<sup>6</sup> O noehu Iesu uavë'o'ho: Ma-aëro John uavamu ë'ade hö uavamu hejë'o'ho ae aho'obëhe munëro vajamui'aruëjo ë hesi bëhoho jaburo uvoruomë'ëro: John hu jö God-aro baeromo majahuinövade ae hö uvoruomë'ëro.

<sup>7</sup> Ëhi uarovoromo Iesu uavareje: No dadivavuajëjo John darugoho dinö'e baeromo muoho vaejade höjo.

<sup>8</sup> Vaejade höjumu Iesuro uëvadeje: Ëhi jië'o'ho jemëhu uevariye jöho na'o bogo uë'ejöjo: Ëhi jië'e darugohuro na muoho vaejaje höjo.

*Mu ariböviehu a börömo hesi ö'i bajo mu mueberomo sisë ë'are uhu jöhoje.*

<sup>9</sup> Iesuro ëhi uënu'goromo ë Jew rajo aribövi jabesi jö sisëho uhu'e majëhiromo ae aho'obëhe uëvadeje: Iae ae gemuëro mure grape ö'o'ho bivo'amade höjo. Bivonugoromo ae uëvade höjo: Na va'ejöjo. Jemëro nasi muoho muebejehorëjo. Mueberomo ö'i bajoho raeromo mavego nasiroho bahi'i ioro'ioroho jemesi ujuohorëjo. Ëhi uënu'goromo ri'öromomo sa'a göro va'oromo majae ëgobövie ë hijade höjo.

<sup>10</sup> Hijuvo gavade ö'i bajo urarue majaho rovamu mu vaejharue aho gemu uavade höjo: Va'iranoho mu muebejarue aribövioho uënego ö'i baje gö i'imamego ujuoheho ruenëjo. Ujuoheho ruenëjamu rühuro va'ade höjo. Va'o mure höröjamu gavë'i rue mu muebejarue ariböviohuro ë aho anoromo sihö'öjamu sionëro övemu rovade höjo.

<sup>11</sup> Övemu rovamu gagorovo mu arijo'ohuro mu vaejahaje a göho nugö'öjamu mure va'ade höjo. Va'o höröjamu gavë'i rue mu muebejarue ariböviohuro ë aho anoromo hesi örire mu sisë vaeromo sihö'öjamu sionëro övemu rovade höjo.

<sup>12</sup> Rovamu gagorovo mu arijo'ohuro mu vaejahaje a göho nugö'öjamu mure va'ade höjo. Va'amu gavë'i mu muebejarue ariböviohuro ë aho anojuvo gavare hesi sino haho'o'ho ma-köëremu rumorovoromo rövamu rori'o babu'öjare höjo.

<sup>13</sup> Ëhi'amu gagorovo mu arijo'ohuro uehorovoromo uvade höjo: Ëhi jië'o'ho na diehi'oromo ö'i bajoho ujuoho'ejöjo. Iae na nasi harihu mabëhoho nugö'ö'ejöjo. Nugö'ö'iramu va'iramu rue ariböviohuro hu

garomo uvoruomo'ajëjo: Nöruare harihe hö uvoromo ëhuni nani hu mae uehorovoruomo'ajëjo.

14 Ëhi uvoromo hesi harihoho nugö'öjamu mure va'ade höjo. Va'ohöröjamu gavë'i rue mu muebejarue ariböviohuro uarovare höjo: Arue rovaje ahuro hesi vavu hesi sionoho bae hesi höjo. Ëhuni ë'ego ano bamarëjo ëhuro ave muoho noro baeröhe höjo.

15 Ëhi uarovoromo ë aho guduamoromo mure jiamu rori'o bijimo bu'öromomo anamu guomade höjo. Ëhi'are höjo.

Ëhi jië'ohomo mu arijo'ohuro ë mu muebejarue aribövioho diehi'ëvo'ajëjo.

16 Huro ruero mo i'ue bojëmiromo muo'amo'i ë muoho ae gö bojëmi'ajëjamu hegoroovo ae aho'obëhe bëhoho uehorovoromo uvareje: Mu muebejare ariböviehu sisë ë'oromo i'u baejarëhi nosi a masijo ëhi jëvoröhoho no bijönaguajëromo Iesu uavareje: Asë'ëhi jië'ohomo mu sisë höjo.

17 Mu sisë höjamu hegoro Iesuro jabumë ërimëhoromo uëvadeje: Jemesi a masijehu ëhi jië'e mu sisë vaeromo i'u baeröhoho jemë bijönëgajëjo röhu ave uhu jö God-are surire jajivadoho bëhe gemuoho höjo:

Munë javue vae'irögoro munë gemu bijönimoromo vuonugare höjo.

Vuonugaroho jaruvoho ë munëhuro javuoho nigemo'ego bibivoromo mae namijajëjo.

Ëhi jajivë'e höjo.

18 Röhu aehu ë munë döre bejë'ohomo ahoro ahoro bae'a'ajëjo. O ë munëhu a döre berovë'ohomo aho sa'ijovo barë'ajëjo.

*Iesuhu guaro berovojöro aehu tax jö ua gavarohoje.*

19 Ëhi uëvamu hegoroovo rue Jew rajo jögoru röjëhijarue ariböviohu'o priest masijohu'o ëho jaburo garomo uvareje: Iesuro a masijoho no biraguoromo ëhuni uhu jöho jövajëjo. Jövajë uvoromo evare Iesu guduamo bava'ië'oromo ae aho'obëhe juhuonëmiromo vuonugareje.

20 Vuonugonugoromo Iesu garomo muebejuvo majae eni jiamu gagorovo ae uëvareje: Va'irarijoho Iesu sareramijego huro uvo'irajo: Jemë a mae jövajëjo. Ëhi'oromo hesi öroro jöe ua gavego huro jöe sisë'i jövoromo guaro berovo'irajo. Berovego evare no guduamo bava'oromo gavanare övore bojami'iröhe höjo.

21 Ëhi uëvamu hegoroovo jaburo va'oromo Iesu sarerisareriamiromo uavareje: Tisajo. Iae no gavarue höjo ja jö maemu jövoromo mu maemu röjahuijego. Jero no göromo ma-gemu uehorovavuoromo God-are örohemo mae röjahuijanue höjo.

22 Ëhuni jö harihe ua ga'ië'aruëjo tax jöho. Rome a börömhuro nosi sa'aho muebejego noro hu tax bojamiarue höjo. Noehu ëhi ë'aruoho na ëhuro nosi jögoroho aharue höjo o bogajo.

23 Bogajamu Iesuro gëromo uvadeje: Naehu io'a o boga uëvë'ohomo ijumevo'i nimiruëromo uëvadeje:

24 Ijo baje gemu röjehihego na gavöjo. Röjahijamu uëvadeje: Rahuare nu ano'ohu'o ihohu'o jajivë'e höjo. Jajivë'e höjamu uavareje: Rome a börömo hesi höjo.

25 Rome a börömo hesi höjamu Iesuro uëvadeje: Ëhuni Rome a börömo hesiroho ëho hesi öroro bojami'i God-arohe ëho God-are öroro bojaminövorëjo.

26 Ëhi uëvamu hegorovo rue Iesuare jö sisë nahare ariböviohuro uvareje: Noro uvare höjo: Noro Iesu bijioho ga'iramu huro tax jöho sisë'i jövoromo a nuniro be'a'ajë uvaroho röhu hu bogo bejade höjo. Ëhi uvoromo jöe barëjëvamu jörumoraejareje.

*Iesuhu guaro berovojöro vuovë'e ariböviehu ri'öruomo'iröhe jö Sadducee ariböviehu hu ua gavarohoje.*

27 Jörumoraejamu iae Jew rajo a masijo ioro'iorohuro rovareje. Jabumë Sadducee jö uehorovarue aribövie jioruomadeje. Sadducee ariböviohuro uehorovoromo uvoruomajeje: A vuovë'oho ijonöho bogo ri'ö'amo'i ma-ioro'iore gemu vuovo'ajëjo.

28 Ëhi uvoruomaje ariböviohuro rueromo Iesu guaro berovojöro sareris-areriamiromu uavareje: Tisajo. Moses-ro jögore jajivoromo uövuë'e höjo: Aboji harihu'o rumo'e a vuovego diehi ë'iröhe öroho aviëhi höjo. Aehu vaboro masuromo vaboroho aboji harihu'oho bogo vaejë'e baruehu guomo'i vaboro nugë'oho hesi öhuro vuojiroho masuromo ëhuro guomade ö hesi ihoro ujoho vaejaho'ajëjo. Moses-are jögoroho ëhi höjo.

29 Ëhi jië'ëro iae ma-ö ömo'ömëremu ae aho'o 7 raromare höjo. Raromoro muriohuro magonahoho masuvade höjo. Masuromo vaboroho aboji harihu'oho bogo vaejë'e baruoho guomade höjo.

30 Guomamu hesi vaboroho dorue hijamu gagorovo ö göhuro vuojiroho masuvade höjo.

31 Masuromo guomade höjo. Guomamu hesi vaboroho röhu maho dorue hijamu gagorovo ö göhuro vuojiroho masuvade höjo. Masuromo guomade höjo. Ö ömo'ömo ioro'iorohu'o ëhi gemuoho ë'obe rovere höjo. Ö ömo'öme 7 jabuhu ë magonahe gemuoho masube rovaroho magonahoho aboji harihu'oho bogo vaejë'e aho ma-vuovëvobe rovade höjo.

32 Vuovobe ruejuvo barëjamu ijo tugoho'ioho ë magonahoho hu'o guomade höjo. Ëhi'are höjo.

33 Ëhi ë'arohuni ëhuni ave jöho no ua ga'ië'aruëjo. Jero uvanue höjo: Vuovoromo ri'ö'ëjarëjo. Ëhuni vuovë'e ariböviehu ri'öruomoröhe majaroho ë magonahoho di ahu'o hi'a'ajëjo. Barue aho'o 7 masuvë'ego ëhuni uavaruëjo.

34 Uavaruëjamu uëvadeje: Bogajo. Ave sa'are raromarue aribövioho masurovarue höjo.

35 A'i God-hu uvë'oho: Mae jëvë'ego vuovoromo ri'öromo maja i'ore raromo'aruë uvë'oho ë aribövioho evaroho bogo masurovo'aruëjo

36 bogo röhu maho vuovëvo'ië'ëro. Ëhesi bëhoho ëhi jië'e aribövioho vuovoromo ri'ö'amë'ëro jabumë God-are aboji harihu'e jëvoromo anera va'ëne jëvo'ajëjo.

37 Röhu vuovë'e ariböviehu ri'ö'iröhoho ë jöho Moses-ro röjëhijade höjo. Ijo hisu vënehu ravade jö jajivadevare evare surire jajivoromo uvë'e höjo: Bada God-hu Abraham Isaac Jacob ëhi muebejëvaje ae höjo.

38 God-hu Abraham Isaac Jacob muebejëvaje jö hesi bëhoho jabumë vuovoromo bogo ioro'ioemuoho barë'i va'o raromego God-ro muebejëvaje höjo. God bogo vuovoromo ioro'ioemu barëjë'e aribövioho muebejëvo'ibejajo. A'i hu vuovoromo va'o raromarue aribövioho muebejëvaje höjo. God gavaje höjo vuovë'e o bogo vuovë'e aribövioho bogo barë'i raromego muebejëvaje höjo.



39 Ĕhi uēvamu hegoroŖo Jew rajo jōgoru ōri rōjēhijarue aribōvi ioro'iorohuro uavareje: Tisa ja mae uvanuējo.

40 O Iesu bijōnimare aribōviohuro Iesuare dēre bijioho garōhe jōho ua ga'iē'aroho juhuonivoromo ioro'ioŖemu vuonugareje.

*Bōrōme namiromo ajamuaje a hesi jō Iesuhu rōjēhi'i uē gēvadohoje.*

41 Vuonugamu Iesuro uēvadeje: Aēro atoromo uvoruomaje hōjo: Bōrōme namiromo ajamui'irōhe aho hu ma-David-are uje jio'a'ajējo. Rabēni ēhioho uvoruomaje hōjo.

42 David-ro Psalms jajivo'amare surire jajivoromo uvē'e hōjo: Bada God-ro nasi Bada uavade hōjo: Nasi ōvo manō rojo hijego

43 ja'o muorovarue aribōvioho naro ruahō'ōjēvego hōrēro vijuvo taemo'amō'irane hōjo.

44 Ĕhesi bēhoho bōrōme namiromo ajēmi'irōhe a hesi jōho David-ro jajivoromo uvē'e hōjo: Bada hōjo. Bada hō uvadoho ēhu'oŖo rabēni uvoruomaje hōjo: Bōrōme namiromo ajamui'irōhe aho ma-David-are uje hōjo.

*Jew rajo jōgoru ōri rōjēhijarue aribōviehu sareri'e mu vaejaruēhi aehu bogo ēhi ē'trōhego Iesuhu jōvadohoje.*

45 Ma-David-are uje hōjamu rue Jew rajo jōgoru ōri rōjēhijarue aribōviohuro jōho bogo mana uavareje. Bogo mana uavamu ae aho'obēhe riravoromo mu'ōjahijamu gavē'i Iesuro hesi aribōvioho uēvadeje:

46 Jew rajo jōgoru ōri rōjēhijarue aribōvioho gē avohorējo. Ĕhesi bēhoho ē aribōvioho jaburo jabesi sinohemu uehorovoromo niōgu ēgobōvie hōru'o utahē'oŖo io'amoromo jijiharue ēhi jiē'e muoho nimarue hōjo aēro gēromo rajēhijōro. O imo'amaruire va'ē'oŖo jaburo nimarue hōjo aēro uvoruomorōhego: Jabumē a masijēro jijihajēromo rajēhiromo jejēmiruomorōhego. O God rajahijarue osare va'ē'iroho o sōrō i'i va'ē'iroho a masijehu raromuire ē va'o raromo'i nimarue hōjo.

47 Raromo'i nimoromo magonaho doru jabesi bōvioho bise'oŖo ēma ujuohēharue hōjo. Ujuohoromo sarerivoromo pari ēgobōvie jaguvarue hōjo aēro gēromo uvojōro: Mu mae vaejaruējo. Ĕhi jiē'e sareri'e muoho vaejaruego ēhuni God-ro i'u bōrōmo mae bojēmi'ajējo. Ĕhuni avoho mueberovo'i nadi ēhi jiē'e muoho vaerējo.

## 21

*Bōvi bise'o rumo'e magonaho doruehu God-ni suvuro ba'amade jōhoje.*

1 Ĕhi uēnugoromo Iesuro avoho uheriho'i gavadeje bōvi bise'o marohē'e mae jiē'e aribōvioho God-are amo bōrōmore riravoromo God-are suvuro bahijaruire ē va'oromo jabesi suvuroho io'amamu.

2 Io'amamu gēvē'i gavadeje bōvi bise'o rumo'e magonaho dorue gemuēro rueromo rōvē'e ijo baje niō'i ē gemuore ba'amēvamu.

3 Ba'amēvamu gagorovo Iesuro ae uēvadeje: Ĕbōvi bise'o marohē'e jiē'e aribōviohuro ijo baje aho'o io'amō'i arue bogo eni jiē'e magonahohuro rōvē'e ijo bajoho niō'i ba'amade hōjo. Rōhu God-ro ēhi uvajējo: Ĕmagonaho hesi suvurohuro a ioro'ioro jabesi suvuroho iosirami'amoromo bōrōmo mae hōjo. Na mae uēvajējo.

4 God-hu ēhi uehorovaje hesi bēhoho ē a ioro'iorohuro inōmo marohē'e maēro jiē'lēro ma-vituohemu bojami'i ē magonahohuro inōmo rumo'lēro jiē'lēro hesi i i'ibejade monioho bōvioho bise'oŖo aho'o bojami barējē'e hōjo.

*Aehu God-are amo bōrōmo dadovoruomo'irōhe jō Iesuhu majēhijadohoje.*

<sup>5</sup> Ëhi'lamu aëro God-are amo börömo hesi jöho atareje. Munë mabëhëro iromë'ëro God-ni suvuoro nu ano'e mabëhe ë amore bahijë'ëro ëhu'ëro ë amo hesi nu ano'e mabëhe jiajoho ë hesi jöho atareje. Ëhi atamu hegorovo Iesuro uëvadeje:

<sup>6</sup> Jemë ave aho'o gavarujoho majae ijönö ë munë javuoho aho'obëhe aëro dadovoruomo'iramu munëho ahoromo sa'aro ruvebi barë nahona-hovo'ajëjo.

*Huë vavaeni börömo rueröhe jö Iesuhu majëhijadohoje.*

<sup>7</sup> Ëhi uëvamu rue ariböviohuro uavareje: Tisa jaehu uövuanue muoho ëho divare jio'a'ajëjo. O mu rabe garomo uvo'ëjarëjo: Iae ë majaho rue'ië'ajëjo.

<sup>8</sup> Rue'ië'ajëjamu Iesuro uëvadeje: Gavë'iajo. Aëro sarerëmi'iramu jemë rirerömëvo va'a'ajëjo. Ae aho'obëhe rueromo sarerëmiromo uë'a'aruëjo: Nöruare ihoro rovajëjo. God-hu uevë'ëro böröme namiromo ajëmi'irode aho na jevajëjo. O uë'a'aruëjo: Jemëhu muebejaruje majaho iae aviae rovajëjo. Ëhi jië'e jö uëvamu hejë'o ho jabesi ijore ijoroho nadi jijihorëjo.

<sup>9</sup> O he'irarije sa'ae göehu sa'a göhu'o muorovarue jöhu'o sa'a gemuehu arijo'arije muorovamirovarue jöhu'o hejë'o ho nadi juhuonivorëjo. Öre gö bogojië'ëro ëhi jië'e mu sisëho iae urimo jio'a'ajëjo. Röhu sa'aho bövioho bise'o ho evaroho bogo barë'i hesi majae göro jio'a'ajëjo.

<sup>10</sup> Ëhi uënu goromo röhu ave jö börömohu'o majëhiromo uëvadeje: Sa'ae göëro göhu'o muorovonövo a masijo ioro'iorohuro ioro'iorohu'o muorovonövo'aruëjo.

<sup>11</sup> Sa'ae darugo'o hijohijiovo'amo'ajëjo. Sa'ae gö gö iruno'e bogojioromo guomo guomo sisë rue'a'ajëjo. Bogo gavarue vörö'e mu masijoho ö'idöre jio'a'ajëjo.

<sup>12</sup> Röhu ë mue aho'o ë hesi urimo aëro na bijönegoromo jemë gudu-amëvoromo sisë vaejëvo'aruëjo. Ujuohëvo va'oromo God rajahijarue osae göre göre court vaejëvoromo savoji gagore io'amëvo'aruëjo. Gavana o sa'are a masijo gö gö jabesi nunire rëmo'iramu ë riravo'arujëjo.

<sup>13</sup> Jabesi nunire riravo'iramu ëhuro jemëhu nasi jö huruoho majëhi'irarije öroho jiovëho'ajëjo.

<sup>14</sup> Nasi jö majëhi'irarije öroho jiovëho'ië'aje jiaje ëhuni a masijo jabesi nunire riravo'irarije maja ë hesi urimo uehore gemu baeromo uvorëjo: Noehu jabesi nunire riravë'iroho no bogo uvo'ëjarëjo: Diehi mana uë'ëjarëromo nurunurumo'ëjarëjo.

<sup>15</sup> Ëhesi bëhoho Iesu naro jemesi jö'e simane sasohëho'iramu jöho majëhi'arujëjo. Majëhi'iramu jemë nu huodëgarue aribövioho jemesi jöho heromo röhu ahëhoromo jö mana majëhi'iröhoho bogo eni jioruomo'ajëjo.

<sup>16</sup> Bogo a göho gemu a'i jemesi vëmu vavu'ëro ö ömo'ömëro aganëro aemo'aemëro jabu'o jemë guduamëvoromo ujuohëvo va'oromo a masijo jabesi övore bojëmi'iramu baejëvoruomo'ajëjo. Baejëvoromo a ioro'ioroho jemë muo'amëvo'iramu vuovëvo'ajëjo.

<sup>17</sup> Jemëhu na uehorovevarujohuni ae aho'obëhe jaburo jemesi örire nue huodëgoruomo'ajëjo.

<sup>18</sup> Röhu jemesi aru'ahoho bogo ëhi ëhi'o'i ma-mabëhe jëvo'ajëjo.

<sup>19</sup> Biririvë'ohuro ëhuro mae raromo'irarije öroho biroho'arujëjo.

*Aehu rueromo Jerusalem dadovo'iröhe jö Iesuhu majëhijadohoje.*

<sup>20</sup> Röhu jemëro ga'irarije muorovo ariböviehu rueromo amo numamu gavë'iroho uvorëjo: Jerusalem ijumo barë'iröhe majaho iae rovajëjo.

21 Ĕhi uvoromo ave Judea sa'are raromaruje aribövioharo huruomoromo dahoru'ero iojomorëne. O Jerusalem raromaruje aribövioharo rori'o va'orëne. O mure je'ore raromaruje aribövioharo nadi amo börömoroho va'orëne.

22 Huruomo va'o jö uëvaje hesi bëhoho i'ue mana ave sa'are rueröhego God-are surire jajivare jöho ë i'uoho aho'obëhe evare majare rue barë'ajëjo.

23 Ĕhuë vavaeni rue'iröhe majaroho dë'e magonahohu'o aboji harihu'o inino jio'amë'e magonahohu'o jabumë vaevë'o ho jëvo'ajëjo. God-ro ave aribövi jabesi örire dë vörönimoromo i'ue nugö'ö'iramu huë vavaene sisë mae ave sa'are rue'a'ajëjo.

24 Huë vavaene ave sa'are rue'iramu muorovo ariböviohuro bije bune baeromo sa'ae göro jioromo rueromo jemesi a ioro'ioroho muo'amo'iramu vuovo'i a ioro'ioroho guduamoromo tövo'amoromo sa'ae göro göro ujuoho va'oruomo'ajëjo. O sa'a göre göre jioromo rueröhe ariböviohuro Jerusalem ijumo barëromo ave sa'aho jabesi baeromo sisë'i muebejëvobe va'ojuvo hujeji God-hu bamade majaho rue'iramu evare jabesi vöröho barë'ajëjo.

*God-are A Mae Kerisohu sa'are rueröhe jöhoje.*

25 Röhu majare manaerore jijire mujörure vörö'e muoho jio'iramu aëro sioroho garuomo'ajëjo. O sa'aroho sa'a gö gö rajëro he'iröhe sö jovoho ma-darugo'o hasajavo'iramu hegorovo uehorovoromo uvoruomo'ajëjo: Rabëro ë'ajëromo juhuonivoromo huë vavaene böröme baeruomo'ajëjo.

26 Garöhe ö'idöre inömoho aho'o arua anumiae va'iramu gagorovo nune örijanovoromo dë vövöbajo'e butubutumoromo uvoruomo'ajëjo: Sa'aho diehi diehi jio'ië'ajëjo.

27 Ĕhi uvoromo garuomo'ajëjo God-are A Maho naro darugo'o aji'o böröme baeromo suere ruvebi'iramu. Ĕhi jio'a'ajëjo.

28 Röhu ëhi jië'e mu aevoromo jië'iroho döro riravoromo sioroho garomo uvorëjo: God-ro nosi i'u'e muoho tugoho'i hesi sasohë'e muoho röjahui'irögoro ë'ajëjo.

*Mesehu gumutivego Jew rajo jabesi vama maja dunovaje uhu jöhoje.*

29 Iesuro ëhi uënogoromo ave uhu jöho uëvadeje. Mesohu'o ijo ioro'iorohu'o uehorovohëjo.

30 Gavaruje hane gumutivego garomo evare jemë uvaruje höjo: Jew rajo nosi vama majaho iae dunovajëjo.

31 Ĕhesi bëhoho ga'irarije naehu uëvodëhi mue gö gö rovamu gavë'iroho uvo'a'aruëjo: No ga'ië'aruëjo God-ro böröme namiromo aho'obëhe muebejavuego.

32 Ave jöho na jö mae uë'ië'ajëjo. Ave jaruvore raromaruje aribövioho bogo vuovëvo barëjë'iro naehu uëvaje muoho aho'obëhe rue'a'ajëjo.

33 Ö'idöe sa'ae bövie bise'e barë'i nasi jöho gemu bogo barë'ajëjo.

*Avoho mueberovo'iröhe jöhoje.*

34 Röhu gavë'i raromorëjo. Nadi nimoronimorohoromo iruno'emuoho uehorovoromo vörö'e jovemuoho ue'ahoromo simanoho sisërërovorëjo. O ave sa'a hesi muohemu nadi uehorovoromo nurunurumorëjo. Ĕhi ë'ë'o ho jemëhu bogo uehorovo'irarije majare evare nasi majahuro ma-majiohëvo'ajëjo.

35 Ö'ehu mahu mi'e ma-majioho baejajëhi majae höröjajire beva'ajire aëro ma-raromo jijihö'i ga'a'aruëjo nasi majaho ëhi ma-majioho rue'iramu.

<sup>36</sup> Al'i jemëro nune jioromo muebenövorëjo. Mueberomo God uanövorëjo: Ëhuë vavaeni maja rovë'iroho jero ajamuego no mae biririvo'irarëjo ëhuro mae javuobe va'oromo jasi A Ma hesi nunire mae riravo'iröhe höjo.

<sup>37</sup> Iesuro ëhi majëhijadeje. Röhu hesi muoho aviëhi jionövadeje. Sisonuvo'ego God-are amo börömore hiromomo God-are jöho ae röjëhiromomo vahiromomo'ego va'oromo ajio Olives Dahorure ë hinövadeje.

<sup>38</sup> Ëhi ë'ego sisonu sisonu'e ae aho'obëhe rueromomo God-are amo börömore gagovonövareje Iesuhu jövaje jöho he'iro.

## 22

### *Iesu anoröhe öri nahare jöhoje.*

<sup>1</sup> Jew rajehu Dë Huaje Oso Rumo'e I Ue'aharue Söröho dunovadeje. Sörö hesi iho göho God-hu Vörö Tugohade Söröhoje.

<sup>2</sup> Amo sörö majaho dunovamomo priest masijohu'o Jew rajo jögoru öri röjëharue ariböviohu'o ëho jaburo Jew rajo a ioro'ioroho juhuonëmiromomo öre nahareje Iesu ma-saginiëri baeromomo anego guomoröhego.

### *Judas-hu Iesuni Jew rajo a masijo hiruëmijade jöhoje.*

<sup>3</sup> Öre nahamomo Judas hesi iho göho Iscariot-ro rovadeje. Iesuare ijoraje ae aho'obëhe 12 röhu Judas hu jabesi gemuoho jiadeje. Judas hu Iesuare ijorajo jabesi gemuoho jiamu Satan-ro hesi dëre abueromomo jöe bojamadeje.

<sup>4</sup> Jöe bojamamomo Judas-ro va'oromomo priest a masijohu'o osa börömore muebejarue ariböviohu'o jöe jövadeje hu diehi'oromomo Iesu ë aribövi jabesi övore bojëmego guduamomo'iröhoho.

<sup>5</sup> Jöe jövamomo hegorovo rueho jaburo nimorohoromomo Judas uavareje: Iae mae höjo. Ëhi jië'ooho no monie mana bojami'ejarëjo.

<sup>6</sup> Bojami'ejarëjamomo Judas-ro uëvadeje: Ëhi jië'ooho iae mae höjo. Iae mae hö uëromomo va'oromomo öre nahadeje ae aho'o bogojëvego evare Iesu a masijo jabesi övore bojëmi'iröhëro.

### *God-hu Vörö Tugohade Sörö Iesuhu i'tiro bövi bise'o avohade jöhoje.*

<sup>7</sup> Ëhi'amomo iae Oso Rumo'e I Ue'aharue Sörö majaho rovadeje. Röhu ë maja rovë'iroho Jew rajëro sheep harihoho bijuëmarueje God-hu Vörö Tugohade Söröho i'iro.

<sup>8</sup> Sörö majaho rovamomo Iesuro Peter'o John'o nugö'öjëvoromomo uëvadeje: Va'oromomo söröho avohorego no ue'aho'irarëjo.

<sup>9</sup> Ue'aho'irarëjamomo uavareje: Ja nagajoho no dinö'e va'oromomo söröho avoho'ejarëjo.

<sup>10</sup> Avoho'ejarëjamomo Iesuro uëvadeje: Aveho hehëjo. Jerusalem amo börömore va'orëjo. Va'i ga'a'arujëjo aëro jovo'e ramahomomo simanëro baeromomo ro birohëvo'iramomo. Ro birohëvego hesi ijoro ijoro va'orëjo. Va'oromomo ga'irarije hu di osare rumo va'ego gagorovo jemë'o ë osaro va'orëjo.

<sup>11</sup> Osaro va'oromomo osa arijo'ooho uarëjo: Tisahuro jani uvade höjo: Osahomomo dinö'e höjo naehu nasi ijorajoho jabu'o gemu mae sörö i'irodoho. Ëhi uarëjo.

<sup>12</sup> Ëhi ua'iramomo osa arijo'ohuro jemë hu'iraejëvo ajiomoromomo döre osa börömore röjëhi'a'ajëjo. Röjëhi'iramomo ga'a'arujëjo maratue bövie bise'le eni avohoromomo bahijë'e jio'iramomo. Ëhi jiamomo gavë'iroho ë dirö'oro söröho avohorëjo.

<sup>13</sup> Ëhi uëvamomo rueho jaburo va'areje. Va'oromomo gavare Iesuhu uëvadëhi ëhi jiamomo gagorovo söröho avohareje.

*Sino'lo kö'lo aevoromo ijare jöhoje.*

14 Ëhi ë'l'ëro sörö majaho rovamu Iesuro hesi apostle ömo'ömohu'lo gemuore hijadeje ie i'irovo.

15 Hiromo uëvadeje: Na nego avohajëjo God-hu Vörö Tugohade ë hesi Ioho jemë'lo i'irovo ijönö vi'ehe baeromo guomevoröhego.

16 Ëhesi bëhoho na uë'ië'ajëjo. Na ijoho ë ioho bogo i'ejöjo. Hujeji God-ro a nunire böröme namiromo aho'obëhe muebejëvo'iramu sörö bëhoho va'orahoro jio'iramu evare i'ejöjo.

17 Ëhi uënuqoromo enatuore jovoho baeromo God mae uaromo hesi aribövioho uëvadeje: Aveho jemë ae gemu gemu ba ibe göëro göho bojamibe va'orëjo.

18 Aveho hehëjo. Na ijoho ö'i bajo jovoho bogo i'ejöjo. Hujeji God-ro rueromo a nunire böröme namiromo aho'obëhe muebejëvo'iramu evare i'ejöjo.

19 Ëhi'onuqoromo ioho baeromo God mae uanuqoromo ato'atovoromo hesi aribövioho suvuorëmiromo uëvadeje: Aveho nasi sine höjo. [Na nasi sinoho God-are örire bojamirovo'ië'ajëjo jemë mae jëvoröhego. Aviëhi jië'e muoho vaenövorëjo ëhuro na uehorovevo'irarije höjo.

20 Ëhi ë'l'ëro ioho ue'ahonuqoromo enatuore jovoho baeromo ëhi jië'e mue gemuoho vaeromo hesi aribövioho uëvadeje: Ave enatuore jovo hesi bëhoho iae nasi köho jemëni rovevo'ajëjo ëhuro God-hu muebejëvonövoröhe jögoru i'oho marë'iröhego.]

21 Iae ëhi höjo. Röhu gahëjo. Aehu na bijönegarue a jabesi övore bojëmi'iröhe ahuro na'lo ie ijajëjo.

22 God-hu bamadëhi hesi A Maho na iae ëhi guomevo'ajëjo röhu na bijönegarue a jabesi övore bojëmi'iröhe aho vaevë'oho sisërë'ajëjo.

23 Ëhi uëvamu hesi ariböviohuro uarovareje: Di aho noro ëhi jië'e mu sisëho vae'ejarëjo.

*Di aehu a ioro'ioro iosirëmiromo börömo jiaje jöhoje.*

24 Ëhi'oromo Iesuare ijorajo ömo'ömohuro jö aho'ahamirovoromo uarovareje: Di aho a nuniroho a börömo javuajëjo.

25 Ëhi uarovamu Iesuro uëvadeje: Sa'a ioro'ioro rajohuro jabesi sa'a rajoho ruahö'öjëvoromo jabumëremu masije riravarue höjo. Riravoromo röhu jabesi jumuvorovoromo jabesi sa'a rajoho uëvarue höjo: Uönövorëjo: Sa'a aribövi ajamuijaruje a masije jëvajëjo.

26 Röhu jemë'lo nadi ëhioho döroho bamorovorëjo. A'i ae rahu a börömo börömo jië'oho ë aho jero ijorajönö'e jionövonëjo. O ae rahu simano vaejë'oho ë aho jero ae gö ajëmi'irane ae jionövonëjo.

27 Röhu jemë diehi uehorovarujëjo. Di aho böröme jio'i di aho bise'e höjo. Na hiromo i ijaje aho börömo höjo o ajëmiromo jabesi i ujuoho mëmijajoho börömo höjo. Hiromo i ijaje aho iae börömo höjo. O ajëmijaje aho ma-bise'e höjo. Na mae-ëjo. Röhu Iesu na ajëmiromo i ujuoho mëmijaje aho va'ëne jevajëjo.

28 Na i'ue bövie bise'e bae'ego jemëro biririvoromo na'lo jijihobe ru-enövarije höjo.

29 Nasi Vavuohuro darugoho bojëmijade höjo naro böröme namiromo nasi aribövioho muebejëvo'irodego. Huhu ë'adëhi naro ëhi jemesi örire daruge bojëmijajëjo masije riravo'irarijego.

30 Naro böröme namiromo nasi aribövioho muebejëvo'iramu jemëro na'lo raromoromo ioho jovoho ue'aho'arujëjo. Ioho ue'ahoromo jemë ae

aho'obêhe 12 na'o gemu mae arêto göro göro raromoromo Israel rajo nosi agane gö gö 12 jabesi muoho mevo ga'a'arujêjo ga'i mae o sisê jiego.

*Peter-hu Iesu gavaje jö a subivêho'iröhe jö Iesuhu majahijadohoje.*

<sup>31</sup> Röhu Simon-ajo. Ave jöho hejêjo. Satan-ro God ua gavê'e höjo jemê baejêvoromo jemesi dère bijêho'irohêni. Èhuni aehu i hijiohijiovoromo garuomaje diho mae jiego diho sisê jiego gavaruêhi Satan-ro êhi jemesi dère bijêho gè'a'ajêjo gè'i rahuo darugo'oho jio'i rahuo darugo rumo'oho jiego. Amo Satan-ro êhi ua gavamu God-ro jemê hesi övore bojêmijê'e höjo.

<sup>32</sup> Èhi jie röhu Simon naro jani parie vaejê'e jevajêjo jero bogo uehorovevoromo vuonugo'iranego. Röhu ijonö Satan-hu jasi dè bijioho garomo barêjamu jaehu huotorovoromo nasi örire avoho uehorovevê'iroho jasi aganoho ajêmego biririvo'irarêjo.

<sup>33</sup> Biririvo'irarêjamu Peter-ro uavadeje: Bada iae êhi höjo röhu na ja'o gemu mae juvoromo ja'o savoji gagore va'ê'oho o ja'o guomevê'oho iae na eni jevajêjo.

<sup>34</sup> Eni jevajêjamu Iesuro uavadeje: Peter röhu nasi jöho hejêjo. Jaruvo vahi'oho kökörökoho bogo uvê'e jero majae niö'i gemu ae uè'a'anujêjo: Na Iesu bogo gavaje höjo.

*Iesuare ariböviehu monie esöe muorovo'iröhe kaejoe ujuoho'iröhego Iesuhu majêhijadohoje.*

<sup>35</sup> Iae Iesuro hesi ijarahö ömo'ömoho uêvadeje: Urimoho naro rêmö'öromo uêvode höjo: Monioho esöho bövioho bise'oho nadi ujuoho va'orêjo. O hörü sinoho nadi io'amoromo va'orêjo. Röhu na jemê bövi bise'oho nimarijoho eni baejarije höjo o bogajo. Bogajamu uavareje: Iae no eni baejare höjo.

<sup>36</sup> Eni baejare höjamu Iesuro uhu'e uêvadeje: Urimoho aëro ajêmamü êhi baejarije höjo röhu avevejö'oho bogo êhioho jio'a'ajêjo. Èhuni monie o esöe jêvê'oho ujuohoromo va'orêjo. O muorovo'irarije kaejö êge bogojêvê'oho jemê dère io'amaruje niögoho imo'amoromo monie mana ujuohoromo kaejö êgoho imo'amorêjo.

<sup>37</sup> Èhesi bêhoho hehêjo. God-ro êhi bamade höjo hesi surire jö jajivarêhi êhi jioröhego. God-are surire jajivoromo êhi uvê'e höjo: Aëro uvoruomê'e höjo: Hu jö ahoruomaje ariböviohu'o gemuore höjo. Nasi jöho êhi uvê'e höjo. God-are surire jö jajivarêhi iae êhi jio'irögoro è'ajêjo.

<sup>38</sup> Èhi jio'irögoro è'ajêjamu ijarahö jaburo uavareje: Bada gavêjo. Aviae kaejö êge niö'i javuajêjo. Kaejoe niö'i javuajêjamu uêvadeje: Èhi jîê'e jöho iae mino'êjo.

*Iesuhu Gethsemane sa'are hiromo God-are örire êninamijade jöhoje.*

<sup>39</sup> Èhi'oromo Iesuro è osaho vuonugo'i Olives Dahorure mami'e va'onövadire röhu maho è va'adeje. Va'amu hesi ijarahö jaburo hu rihromareje.

<sup>40</sup> Rihromoromo va'o suorovoromo Iesuro uêvadeje: Èninamihego God-ro ajêmego Satan-ro bogo dinêmego êhuro bogo bejêvo'irajo.

<sup>41</sup> Èhi uênugoromo rori'oho va'adeje. Munê bu'öjêgo va'oho bejaje êmino'oho va'oromo ague aho hiromo parie vaeromo uavadeje:

<sup>42</sup> Apajo. Ja nagê'oho i'ue huê vavaene nasi örire rovajoho ahego na bogo bae'iröjo. Röhu naehu nimajoho nadi è'i jaehu nimanuêhi êhi è'onêjo.

<sup>43</sup> [Èhi'amu gavê'i anerae gemuëro ö'idöre jioromo rueromo Iesu ajamü biririvadeje.

<sup>44</sup> Biririvoromo röhu huë vavaene bogo bise'lo vadu'oho baeromo parioho ma'eno titimoromo vaemu vaejadeje. Parie vaemu vaejamu nu ano'ere jöho köe direjohijë'ehu sa'are ahajëhi ëhi aho'amadeje.]

<sup>45</sup> Parie vaenugoromo döro ri'öjadeje. Ri'öromo vuonorö'ö va'oromo gavadeje ijorajoho jabumë huë vavaene böröme baejël'ëro momorö'öjamu.

<sup>46</sup> Momorö'öjamu gëgorovo uëvadeje: Jemë rabëni momorö'öjarujëjo. Ri'öromo ëninamihëjo. Satan-ro dinëmi'iramu bejëvo'ajëjo.

### *Iesu guduamare jöhoje.*

<sup>47</sup> Ëhi uëvamu gavë'i ae aho'obëhe Judas-ro öroho röjëhiromomo sö ujuohoromo rovamu rueruomadeje. Iesuare ijoraje aho'obëhe 12 röhu Judas hu'o jabesi ae gemuoho jadeje. Judas-ro rueromomo Iesu dudöho'i bëhire rovadeje.

<sup>48</sup> Dudöho'i rovamu Iesuro uavadeje: Judas-ajo. Na God-are A Maho jevajëjo. Ja diehi'oromo ma-döëremuoho rajehiromomo dudöhevanuëjo arue ariböviohuro guduamo baejevo va'ojöro.

<sup>49</sup> Ëhi uavamu Iesuare aribövie hesi bëhire riravaroho jaburo gavare a ioro'iorohuro mu sisë vae'ia'amu gëgorovo uavareje: Bada na no kaejö ëgöbövioho jijöromomo muo'amo'ëjarëjo o diehi'o'ëjarëjo.

<sup>50</sup> Ëhi uaromomo Iesuare ae gemuëro priest börömo hesi mu vaejaje aho anoromomo övo manörire hia'oho tariö'öjahadeje.

<sup>51</sup> Tariö'öjahamu Iesuro uavadeje: Ëhi jië'e muoho vuonugëjo. Vuonugë'i ë anade a hesi hia'i sionoho rëhamu marëjadeje.

<sup>52</sup> Marëjamu priest masijohuro God-are osa börömo atovarue ariböviohuro a duvahohuro Iesu guduamo bava'i rovël'ëro riravareje. Riravamu gagorovo Iesuro uëvadeje: Aveho na bogo vajiohu'e anano'e aehu jevajëjo. Jemë rabëni siravaho kepataho ujuohoromomo rovarujëjo.

<sup>53</sup> Mami'e majae aho'o naehu God-are amo börömore jemë'o hinövodoho jemë evaroho bogo guduamevariije höjo. Röhu jaruvoho jemesi majae höjo. Ramoramomo'e mu muebejaje a hesi vöröho rovë'e höjo.

### *Peter-hu Iesu gavaje jö a subivëhadohoje.*

<sup>54</sup> Ëhi uëvamu Iesu guduamo barueromomo priest börömo hesi osare rovareje. Priest hesi osare rue'irögoro Peter-ro arue riribövire Iesu rihromomomomo ijore rovadeje.

<sup>55</sup> Osare rueromomo gavade aehu raromaruire vëne huël'ëro ravo'ego ae uono bëhire raromamu. Ae uono bëhire raromamu gagorovo jabu'o gemu mae hijadeje.

<sup>56</sup> Hijamu gagorovo mu ajëmijarue magonahe gemuëro gavade Peter uono bëhire hi'ego nu ano'oho vënëro ajivë'e jiamu. Ajivë'e jiamu gavë'i Peter ërimahë'i ë aribövioho uëvadeje: Ave iaho hu'o Iesu'o gemu mae juvonövade ae höjo.

<sup>57</sup> Juvonövade ae höjamu Peter-ro uavadeje: Sarerivanuëjo. Na ë iaho bogo mae bogo gavaje höjo.

<sup>58</sup> Bogo gavaje höjamu majae ma-bunemu jioromomo barëjamu ae göëro Peter garomomo uavadeje: Ja'lo Iesuare ae javajëjamu Peter-ro uavadeje: Sarerivanuëjo. Na bogojevajëjo.

<sup>59</sup> Bogojevajëjamu hour gemu rabu'e barëjamu ae göëro biririvoromomo ë aribövioho uëvadeje: Iae mae-ëjo. Iae na gavajëjo ave aho Iesu'o juvonövade ae höjo. Hu'o Galilee sa'a raje höjo.

60 Ëhi uëvamu Peter-ro uavadeje: Sarerivanuëjo. Ja jövanue jöho na dadivevo avohajëjo. Dadivevo avohajëjamu kökörökoho uvadeje.

61 Kökörökoho uvamu Badaro huotorovoromo Peter gavadeje. Gavamu gavë'i Peter-ro uehorovoromo uvadeje: O Badaro mami'e uevade höjo: Jaruvo vahire kökörökoho bogo urimoho uvë'e jero urimo vae niö'i gemu ae uë'a'anuëjo: Na Iesu bogo gavaje höjo.

62 Ëhi uevade hö uvoromo Peter-ro amonö hörö va'oromo sisë maro nivadeje.

*Aehu Iesu sivare jöhoje.*

63 Ëhi'amu iae Iesu mueberuomaje ariböviohuro Iesu sivoromo sino haho'ere ano'anovareje.

64 Ano'anovoromo nu ano'e niögëro tugohahoromo uavareje: Na jö God-aro baeromo majëhijaje ae jevajë uövuanue javaje ëhuni anagade a hesi ihoho huruoho majahuijego no hejarëjo.

65 Ëhi jië'e jö sisë gö gö aho'obëhe atoromo Iesu sivareje.

*Iesu Jew rajo a masijo jabesi nunire namijade jöhoje.*

66 Ëhi ë'ë'ëro sisonuvamu Jew rajo a duvaho ömo'ömohuro priest masijohuro Jew rajo jögoru öri röjëhijarue ariböviohuro gagovorovoromo ae uëvareje: Iesu hu'irae barovego no court vaejarëjo.

67 Barovamu rue a masijohuro Iesu uavareje: Na ja God-hu uavë'ëro böröme namiromo ajamui'irane aho javajëjo. Ja ë aho javë'o'oho uövuego no hejarëjo. Hejarëjamu Iesuro uëvadeje: Na uëvë'o'oho röhu jemë bogo ma uehorovo'arujëjo.

68 O na jö uë gevë'o'oho jemë bogo mana ue'a'arujëjo.

69 Röhu majae dunovo'iramu evare God-are A Maho naro börömëro jevë'ëro ajiomoromo God darugo eni jië'e A hesi övo manö ëhi hiemu hi'ejöjo.

70 Hi'ejöjamu rue a masijohuro uavareje: Ëhi jië'o'oho na ja God-are Harihe javajëjo. Uëvadeje: Iae mae-ëjo. Jemëro jemesi uevarujëjo: Ja ëhi javajëjo.

71 Ëhi javajëjamu rue a masijohuro uarovareje: Iesuro hesi jö'ëro hesi jö sisëho majahuijamu iae mami'e hejë'e javuajëjo. Ëhuni rabëni ae gö uë'ejarejo: Gavarije o hejarije jöho majahuijego no hejarëjo. Court-oho iae barëjajëjo.

## 23

*Iesu Pilate-are nunire namijade jöhoje.*

1 Ëhi uarovonugoromo ë a masijo ömo'ömohuro ri'öromomo Iesu hu'iraeromo Pilate-are nunire va'areje.

2 Va'oromo Pilate-are nunire riravoromo Iesure jö sisëho aevoromo huruoho majahijareje. Majahiromo uavareje: Iae no hejare höjo ë iahe sareri'e jöe majëhijavamu. Ëhi majëhijë'ëro ëhu'ëro nosi sa'a rajohuro sa'are a masijo jemesi jöho bogo eruomo hesi höjo. No hejare höjo Iesuro uvavamu: Rome a börömoho tax-oho nadi ijoho bojamirëjo ë hesi bëhoho sa'are a börömoho na jevë'e jiaje. God-hu uevë'ëro böröme namiromo ajëmi'irode aho Keriso na jevajëjo.

3 Keriso jevajëjamu Pilate-ro Iesu uavadeje: Na ja Jew rajo jabesi a börömoho javajëjo. Börömoho javajëjamu Iesuro uavadeje: Ëjöho jero jasi jövanuëjo.



<sup>4</sup> Jövanuëjamu Pilate-ro priest masijohu'o a ioro'iorohu'o uëvadeje: Ave aehu i'u baeröhe hesi sisëho bogo birohë'e jevajëjo.

<sup>5</sup> Ëhi uëvamu hegoroovo ae aho'obëhe birivoromo uavareje: Ëiahuro Galilee sa'are aevoromo jö sisë ae rjöhïromu muorovojöro simane huotövëhobe Judea sa'aho aho'o juvoromo avehu'o rovë'e höjo.

*Iesu Herod-are nunire namijade jöhoje.*

<sup>6</sup> Ëhi uaruomamu hegoroovo Pilate-ro uëvadeje: Na ë iaho Galilee sa'a raje höjo.

<sup>7</sup> Galilee sa'a raje höjamu rue aribövïohuro uavareje: Io'ajo. Io'ajamu hegoroovo Pilate-ro uehorovoromo uvadeje: Herod hu Galilee sa'a muebejaje ae höjo. Röhu hu aviae Jerusalem rovë'e höjo. Rovë'e hö uvoromo Iesu nugö'öjamu aëro bava'areje Herod-ro court vaeröhego.

<sup>8</sup> Iesu bava'amu Herod-ro garomo uehorovoromo uvadeje: Na mami'e Iesuhu mu vae'amade jöho hejë'ëro ga'i nimobe rovë'e jevajëjo. Nani huro darugo'e muoho vaejeho'ïramu na ga'ejö uvoromo Iesu garomo nimoroho avohadeje.

<sup>9</sup> Nimorohoromo jöe aho'obëhe Iesu ua gavadeje. Ua gavamu jöho bogo mana uavadeje.

<sup>10</sup> Bogo mana uavamu priest masijohu'o Jew rajo jögoru öri rjöhïjarue aribövïohu'o ëho jaburo Herod-are nunire rïravoromo Iesuare jö sisëho darugo'o huruoho majahijareje.

<sup>11</sup> Majahijamu Herod-ro heromo hu'o hesi muorovo aribövïohu'o Iesu nue huodivoromo sisë vaeromo sivareje. Sivoromo Iesu niögu ëgo mabëhëro ba'amahoromo nugö'öjamu sionëro Pilate-aro bava'areje.

<sup>12</sup> Bava'amu evare majae gemuore Herod'o Pilate'o urimo nu huodivovaroho vuonugo'i huë baerovoromo ma-mae arijareje.

*Iesu anego guomojöro Pilate-hu uëvade jöhoje.*

<sup>13</sup> Iesu barueruomamu gëgorovo Jew rajo priest masijoho ë sa'are a masijoho a ioro'ioroho ëho jabumëni Pilate-ro uvadeje gagovoromo raromojöro.

<sup>14</sup> Gagovamu gëgorovo Pilate-ro uëvadeje: Ëiaho jemëro barueromo uevarijë höjo: Huro sareri'e jöho majëhijë'ëro ae aho'obëhe sa'are masijho nosi jöho bogo e hesi jëvajëjo. Jemëro ëhi uevamu hejode höjo. Röhu naro jemesi nunire namiromo Iesuare jöho morijovoromo gavode höjo Iesuare jö sisëho uevarijoho bogojiamu.

<sup>15</sup> O Iesu mae jïajoho Herod-ro hu'o gavade höjo. Ëhi gagorovo sionëro nosi örire nugö'öjade höjo. Ëhuni aveho hehëjo. Hu mu sisë vaejë'ëro mana anego guomoröhe bëhoho bogohöjo.

<sup>16</sup> Ëhuni naro ae uë'ïramu hisuebiromu jïovo nugö'ö'ïramu va'a'ajëjo.

<sup>17</sup> [Röhu God-hu Vörö Tugohade Sörö maja rovë'ïroho savoji gagore raromarue aho gemu Pilate-ro Jew rajo aribövïohuni jïovo nugö'öjëhonövadeje hu bojamare muoho ëhi jïë'ëro.]

<sup>18</sup> Muoho ëhi jïamu ae aho'obëhe ma-gemu mae uvoruomadeje: Ëiaho anëjo. Barabbas jïovahuëjo.

<sup>19</sup> Röhu Barabbas savoji gagore hijade hesi bëhoho urimë'i a masijohu'o amo börömoro muorovare majaho jïamu hu'o muorovoromo ae anamu police aribövïohuro hu guduamo bava'oromo savoji gagore ba'amareje.

<sup>20</sup> Röhu Pilate-ro Iesu jïovo nugö'ö'i nimamu jöe gö'o majëhijadeje.

<sup>21</sup> Majëhijamu hejë'i ae aho'obëhe uvo'i arijareje: Korosïoro anego guomajo. Korosïoro anego guomajo.

<sup>22</sup> Guomajamu Pilate-ro urimo vae niö'i röhu maho uëvadeje: Rabëniajo. Diehi jië'e mu sisë vaejë'e höjo. Na gavajoho mu sisë ë'ë'ëro mana anego guomoröhe bëhoho bogohöjo. Ëhuni hisuebiromo jiovo nugö'ö'ejöjo.

<sup>23</sup> Jiovo nugö'ö'ejöjamu ae aho'obëhe birivoromo dinamiromo madarugo'o uvo'i arijareje: Korosioro anego guomajo. Ëhi uvamu jabesinö marëjadeje.

<sup>24</sup> Marëjamu jabuhu uvarëhi Pilate-ro jöho ëhi majëhijadeje.

<sup>25</sup> Urimo Barabbas-ro a sisë ioro'iorohu'o gemuoro bu'öromo sa'are a masijohu'o muorovoromo ae muo'amadeje. Ëhi ë'ë'ëro savojire raro-madeje. Ëhi jië'e a sisë jadeje röhu Pilate-ro hejade Jew rajohuro Barabbas nimoromo uvo'i arijavamu hegorovo hesi mu aribövioho uëvadeje: Barabbas jiovo nugö'ö'i jaburo nimë'e jiarue Iesu anohëjo.

### *Iesu korosire ano taemare jöhoje.*

<sup>26</sup> Anohëjamu aëro Iesu court-re jioromo ano'i bava'areje. Bava'oromo örire va'i gavareje Cyrene amo raje ae gemu hesi ihe Simon muro jië'ëro Jerusalem rovamu. Rovamu gagorovo övëro ma'enoromo korosioho hesi dejore bamoromo uavareje: Baeromo Iesuare ijoro va'ëjo. Va'ëjamu Simon-ro Iesuare korosioho bava'adeje.

<sup>27</sup> Bava'amu iae ae aho'obëhe Iesu rihromareje. Rihromoromo mago-naho ioro'iorohuro muo'amorovë'i nierusuburu'e bamobe rovarëje.

<sup>28</sup> Nierusuburu'e bamobe rovamu gagorovo Iesuro hunuorovoromo uëvadeje: Jerusalem magonaho ömo'ömomë nadi naniöho vavaenimoromo nierusuburu'e bamo'i jemë'o jemesi aboji harihu'ohu'o uehorovoromo nivo'amirovorëjo.

<sup>29</sup> Huë vavaene bogo bise'o vadu'oho rue'iramu aëro uvoruomo'ajëjo: Dë tjojë'e magonahoho aboji harihu rumo'e raromarue magonahoho huë mae jëvajëjo.

<sup>30</sup> Ëhi uvoromo juhuonivoromo uvoruomo'ajëjo: Dahoru masijoho ininoho jemëro ahoromo taemavuorëjo. Ëhi uvoruomo'ajëjo.

<sup>31</sup> Na ijo ma va'ëne jëvajëjo röhu ije uejevanovaruëjo. A'i jemë ijo sahonö'e huo'öjëvoromo baradore siö'öjëvo'amo'aruëjo.

<sup>32</sup> Iae mu sisë vaejare ae niö'ioho guduamo ömëvo va'areje Iesu'o gemu mae vuovëvoröhego.

<sup>33</sup> Va'aroho ajiomoromo sa'a ihe Simano Gijo ajio suorovareje. Suorovoromo Iesu baeromo korosire ano taemareje. Iesu ano taemo'i ë a sisëho niö'i jabu'o ano taemëvareje. Ano taemoromo ujuoho nigemo'amoromo Iesu ririre amo'i a sisë göho ruëhi Iesuare övo manö amo'i göho viëhi övo adonö amareje.

<sup>34</sup> Amamu Iesuro uavadeje: Apajo. Aehu nasi örire mu sisë vaejevaruoho uehorovoromo vuonugëjo. Jabumë ë mu hesi bëhoho dadibijiohajëjo.

Dadibijiohajëjamu rue muorovo ariböviohuro Iesuare niögoho adovoromo ajajovoromo ae gemu niöge gemu ëhi baebe rovarëje.

<sup>35</sup> O ae aho'obëhe riravoromo ërimahareje. Ërimahamu a masijohuro sivoromo uarovareje: Ëahuro uövuade höjo: Naro a ioro'ioroho ajëmego marëjëvaje höjo. Ëhuni nadi'ego hu hesi arijo'arije ajamirovego hu mae jiajo. Huro uövuade höjo: God-hu uevë'ëro böröme namiromo ajëmi'irode aho na jëvajëjo. God-hu nimoromo baejevade aho na jëvajëjo. Ëhuni nadi'ego hu hesi arijo'arije ajamirovajo.

<sup>36</sup> A masijohuro ëhi sivamu muorovo ariböviohuro jabu'o Iesu sivareje. Sivoromo rueromo nioga'i'e wine jovoho bojami'ië'areje.

<sup>37</sup> Bojami'ië'oromo uavareje: Jew rajo jabesi a börömo javë'oho ëhuro jasi ajamirovego mae javajo. Sivoromo ëhi uavareje.

<sup>38</sup> Röhu Iesuare simano namore ijo viture jajivoromo uvë'e jiadeje: Ave aho Jew rajo jabesi a börömoho höjo.

<sup>39</sup> Iae korosire iromë'e a sisë göhuro Iesu sivoromo uavadeje: God-hu uavë'ëro böröme namiromo ajamui'irane aho ja javajëjo. Na mae-ëjo. Ëhi jië'oho jasi arijo'arije ajamirovoromo no'o ajamuego mae javuajo.

<sup>40</sup> Ëhi uavamu a sisë göhuro uavadeje: Nadi ëhi jië'e jöho jövëjo. Ja'o i'ue gemuoho baejanuëjo. Ëhi jië'oho ja diehi'oromo God bogo juhuonami-januëjo.

<sup>41</sup> No niö'iro mu sisë vaejë'ëro ëhu'ëro iae mae no i'ue baeromo ë'aruëjo. A'i ë iaho mu sisëho bogo vaejë'e höjo.

<sup>42</sup> Bogo vaejë'e hö'i Iesu uavadeje: Iesuajo. A muebejavuo'irane darugo barueromo böröme namijë'iroho nasi öroro uehorovevonëjo.

<sup>43</sup> Uehorovevonëjamu Iesuro uavadeje: Aveho na jö mae uavajëjo. Jaru-voho ja'o na'o gemu mae Paradise-re ari'ëjarëjo.

#### *Iesu guomade jöhoje.*

<sup>44</sup> Iae majae ririre jiadeje. Majae ririre jiamu öri ari'e aho'o ramoramovadeje. Ramoramovobe va'ojuvo majae huotorovamu gavë'i ajivadeje.

<sup>45</sup> Ajivamu gavë'i God-are osa börömo ojo göho gagonö jiajoho niögehu tugoharoho arorovadeje.

<sup>46</sup> Arorovamu gavë'i Iesuro God ma-darugo'o uavadeje: Apajo. Naro nasi aru'ahoho jasi övo döre nugajëjo. Nugajëromo evare nugo'amadeje.

<sup>47</sup> Nugo'amamu muorovo a börömëro gavade ëhi jië'e mue gö gö ë'amu gagorovo uvadeje: Iae mae-ëjo. Ëaho iae a mae jiade höjo. Ëhi uvamu ëhuro God-are ihoho mae jiadeje.

<sup>48</sup> Ae aho'obëhe urimo ë mu börömo ga'i gagovarohuro gavare ëhi jië'e mue gö gö ë'amu gagorovo vuonor'öromo vavaenimoromo vinebe anobe va'areje.

<sup>49</sup> Va'amu Iesuare ariböviohu'o Galilee sa'are jioromo Iesuare ijore ijore rovere magonaho ömo'ömohu'o ëho jaburo rori'o riravoromo gavareje ëhi jië'e mue gö gö ë'amu.

#### *Iesuare sino munë gagore bamare jöhoje.*

<sup>50</sup> Ëhi'amu ae gemu hesi ihe Joseph-ro iae hijadeje. Hu Arimathea amo raje jiadeje. Hu Jew rajo jabesi a ðuvahëro jië'ëro a masijo ioro'iorohu'o hiromo jöe mevonövadeje. Hu a mabëhe God-are jöho avoho ejahaje ae jiadeje.

<sup>51</sup> A maëro jië'ëro ëhu'ëro a masijo ioro'iorohu'o hiromo hejade uvoruomamu: Ë'ego no Iesu ano'irarë uvoruomamu hegorovo bogo ejëhadeje. Bogo ejëhoromo gavade jaburo Iesu anamu gëgorovo uvadeje: Ëhi jië'oho sisë höjo. Röhu huro muebejë'e hijadeje God-ro böröme namiromo aho'obëhe muebejëvoröhego. Joseph ëhi jië'e ae jiadeje.

<sup>52</sup> Ëhi jië'e aëro jië'ëro huro va'oromo Pilate uavadeje: Uevego na Iesuare sinoho bae'iröjo.

<sup>53</sup> Sinoho bae'iröjamu Pilate-ro ejahamu va'oromo sinoho baruvebiromo niögu maëro numoromo munë ubuvarire ë bamadeje. Ëmunë gagoho ae gö bogo bamë'e Iesu ë bamadeje.

<sup>54</sup> Ëmajaho Friday jië'ëro Jew rajehu nuharue majaho rue'ie'adeje.

<sup>55</sup> Joseph-hu Iesuare sino bava'oromo bamadevare evare Galilee sa'are jioromo Iesu'o gemuore rovare magonaho ömo'ömohuro Joseph-are ijore rueromo ubuvarire munëho garomo gavareje Iesuare sinoho ë avoho bamamu.

<sup>56</sup> Iesuare sinoho ë avoho bamamu gagorovo vuonorö'ö va'oromo ridi'e ose gö gö avoho'amareje Iesuare sinore bahi'iröhëro. Avohoromo nuho majaho rovamu Jew rajo jögoroho eromo ma-nuhareje.

## 24

### *Iesu ri'öjade jöhoje.*

<sup>1</sup> Nuhë'ëro hura börömore sue'o sue'o ë magonaho ömo'ömohuro ri'öromo ridi'e oso avoharoho ujuohoromo Iesu bamarire ë vuonorö'ö va'areje.

<sup>2</sup> Iesu bamarire va'i gavareje munë gago tugohare munë börömo rori'o höhö bava'ë'e jiamu.

<sup>3</sup> Höhö bava'ë'e jiamu gagorovo munë gagore rumo va'areje röhu Bada Iesuare sinoho bogo birohareje.

<sup>4</sup> Bogo birohogoro ë riravoromo uehore gö gö baejareje. Uehore gö gö baejamu gavë'i ae niö'iro ma-majioho rovareje jabesi niögoho majaehu bamanovë'e ëhi ajivë'e niögoho io'amë'ëro. Rueromo ë magonaho jabesi bëhire rirarovareje.

<sup>5</sup> Bëhire ro rirarovamu gëgorovo rue magonahoho jaburo juhuonëmiromo uruho'amo riravareje. Uruho'amo riravamu gavë'i rue ae niö'iohuro uëvareje: Jemë rabëni i'ovë'e aho guomë'e a sino bamaruiroho naharujëjo.

<sup>6</sup> Iesu aveho bogohöjo. Hu mamie ri'öjë'e höjo. Ri'öröhe jö Galilee sa'are hiromo majëhijadoho uehorovohëjo.

<sup>7</sup> Huro jemë uëvade höjo: Aëro God-are A Maho na baejevoromo a sisë jabesi övore bojëmi'iramu baejevoromo korosire ano taemevoruomö'ajëjo. Ano taemevo'iramu guomoromo majae niö'i gemu hesi uhure ri'ö'ejöjo. Nasi muoho God-ro ëhi bojemë'e höjo. Iesuro ëhi uëvamu hejarije höjo.

<sup>8</sup> Hejarije höjamu rue magonahoho jaburo ë jöho uehorovareje.

<sup>9</sup> Uehorovoromo Iesu bamarire jioromo vuonorö'ö va'areje. Va'oromo rabe rabe gavare hejare jöho majëhijamu Iesuare ijoraje 11-ho jabu'o Iesuare aribövi ioro'iorohu'o ë jöho heruomadeje.

<sup>10</sup> Röhu ë jö majëhijare magonaho jabesi ihoho Mary Magdalene o Joanna o James-are vëme Mary ëhi jëvadeje. Ëmagonahohu'o magonaho ioro'iore jabu'o gemu mae jijiharohu'o ëho jaburo ë jöho apostle aribövioho majëhijareje.

<sup>11</sup> Majëhijamu hegorovo rue apostle ariböviohuro uvareje: Ëmagonahoho jaburo ë jöho ëma ataruëromo bogo ma uehorovareje.

<sup>12</sup> Bogo ma uehorovoromo röhu Peter-ro ri'öromo sino bamarire tutuoromo ë va'adeje. Va'oromo munë gagoho hohitohoromo gavadeje Iesu numare niögohemu jio'amamu. Niögohemu jiamu gagorovo uehorovoromo uvadeje: Aveho diehi'ade hö uvoromo hesirëro vuonorö'ö va'adeje.

### *Emmaus amore va'i örire diehi ë'are jöhoje.*

<sup>13</sup> Va'ë'ëro jeniromamu Iesuare ae niö'iro Emmaus amore va'irögoro örire va'areje Jerusalem jioromo Emmaus va'iröhe öri hesi vahuoho 11 kilometre jië'ëro.

<sup>14</sup> Örire va'oromo mu rabe rabe jiade jöho jörovobe va'areje.

<sup>15</sup> Jöho jörovoromo berohobe va'amu Iesuro birohëvoromo jabu'o gemu mae va'adeje.

<sup>16</sup> Va'amu ë ae niö'i jabesi uehoroho tugohëhamu bogo avoho garomo uvareje: Ëho Iesu höjo.

<sup>17</sup> Bogo avoho gavamu Iesuro uëvadeje: Jemë diehi jië'e jöho jörovobe jireharujëjo. Jireharujëjamu rueho jaburo jireharoho vuonugo'i nu ano'e sisë'irëvoromo rirarovareje.

<sup>18</sup> Rirarovoromo ae gemu hesi ihe Cleopas-ro uavadeje: Ae aho'obëhe Jerusalem raromaruohuro avevejö'e rabehe ë'adoho iae garuomo'i ja gemu diehi'avo'ego bogo gavanuëjo.

<sup>19</sup> Bogo gavanuëjamu Iesuro uëvadeje: Diehi jië'e muohajo. Uavareje: Nazareth raje Iesuare örire vaejare jöho uavaruëjo. Iesu hu jö God-aro baeromo no majahuijaje ae jiade höjo. Ëhi jië'e aëro jië'ëro God-are nunire o ae aho'obëhe nosi nunire namiromo biriri'e muoho vaenövo biriri'e jöho jövonövade höjo.

<sup>20</sup> Iesu hu ëhi jië'e ae jiade höjo. Röhu nosi priest masijohu'o nosi a masijo ioro'iorohu'o ëho jaburo Rome aribövi jabesi övore bojëmijare höjo ëhuro ëho jaburo court vaeromo Iesu ano'iröhe jöho uëröhego. Rome aribövi jabesi övore bojëmamu ëhuro Iesu korosire ano taemare höjo.

<sup>21</sup> Röhu noro uehorovoromo uvare höjo: Ëaho nani God-ro nugö'öjade höjo rueromo no ajamuiromomo Israel rajo nosi i'u'e muoho ahavuo'i hesi sasohë'e muoho röjahuiröhego. No ëhi uehorovare höjo. Röhu jöe gö'o ë mu sisë vaeruomadoho majae niö'i barëjamu röhu aveho majae göho rovë'e höjo.

<sup>22</sup> Iae ëhi höjo röhu no'o gemu mae Iesuare ijore ijore jijiharue magonahohuro ave jö börömo majahuijamu hegoro no tiöjavuade höjo. Jaburo jaruvo sue'o ri'öromo Iesu bamarire va'are höjo.

<sup>23</sup> Va'oromo gavare höjo Iesuare sinoho bogojiamu. Bogojiamu gagorovo vuonorö'ö rueromo uövuare höjo: No va'oromo nia'ovo'iraejanovoromo garomo hejare höjo aneraho jaburo uövuamu: Iesu bogo guomo'i i'ovë'e höjo. Magonahoho jaburo ëhi uövuamu hejare höjo.

<sup>24</sup> Jöho henugoromo nosi ae göëro göëro Iesu bamarire va'oromo gavare höjo magonahuhu uövuadëhi ëhi jiamu. Röhu Iesu bogo gavare höjo.

<sup>25</sup> Iesu bogo gavare höjamu Iesuro ri'öromo ë ae niö'ioho uëvadeje: Asë'e jemë simane i'uhëgo'ego God-are jöho bogo ma-burëroho baejarujëjo. Ëhu'ëro jië'ëro jö God-aro baeromo majëhinövare a jabesi jöho bogo maho uehorovarujëjo.

<sup>26</sup> Jemë diehi'oromo ave jöho bogo uehorovarujëjo. God-ro bamade höjo böröme namiromo ajëmi'iröhe aho vi'ehi böröme baeromo guomjöro röhu ijönö aji'ere ajio hiröhego.

<sup>27</sup> Ëhi uënuoromo Iesuro hesi jöe God-are surire jajivo'amadoho huruoho majëhi barëjadeje. Moses-hu jajivade jöho aevo'i majëhiromomo jö God-aro baeromo majëhinövare a ioro'iohehu jajivo'amade jöhu'o huruoho majëhijadeje. Majëhijamu rue ae niö'iohuro hebe va'areje.

<sup>28</sup> Hebe va'aroho va'i nimare amore hörö'ië'areje. Hörö'irögoro Iesu öre ëgo'o va'o hesi jiamu gagorovo

<sup>29</sup> rueho jaburo nijio'iraeromo uavareje: Nadi va'i no'o hijëjo. Mae mami'e barëjë'ëro vahiomavuo'ië'ajëjo. Vahiomavuo'ië'ajëjamu ejëhoromo jabu'o va'oromo osare hijadeje.

<sup>30</sup> Hiromo jabu'o ie i'irögoro sa'aro hiromo ie baeromo God mae uaromo ato'atovoromo i'imëmamu rueho jaburo baejareje.

<sup>31</sup> Baeromo God-ro jabesi simanoho jiovëhamu evare Iesu avoho garomo uvareje: Ojo'e ë aho Iesu höjo. Iesu höromo ga'i gavareje Iesu ëma bogojio va'amu.

<sup>32</sup> Va'amu gagorovo uarovareje: Ja'o uehorovëjo. Eähuro no'o jöe jövoromo God-are suri bëhoho huruoho majahuibe örire rovamu heromo nosi dë vövöbajo'oho sasohavuoromo ri'öjavuo avohade höjo.

<sup>33</sup> Eëhi uarovoromo ma-burëro sionëro vuono bu'öromo Jerusalem amore va'areje. Jerusalem va'oromo gavare Iesuare ijoraje 11-hu'o jabesi a ioro'iorohu'o gagovoromo raromë'e jiamu.

<sup>34</sup> Raromë'ëro jaburo ë ae niö'ioho uëvareje: Bada iae ri'öjë'e höjo. Ri'öromo Simon-are örire rovamu huro gavade höjo.

<sup>35</sup> Gavade höjamu rue ae niö'iohuro uëvareje: Noro niö'iro örire jirehoromo eëhi eëhi gavare höjo. Eëhi uëromo uëvareje: Iesuro ie ato'atovoromo i'imamumu evare no avoho garomo uvare höjo: Iae Bada höjo.

*Iesuhu hesi ijorajo jabesi nunire rovade jöhoje.*

<sup>36</sup> Bada höjamu gavë'i Iesuro ro ma-majioho jabu'o gemu mae namijadeje. Namiromo uëvadeje: Aganomë vaevë'e raromarujëjo.

<sup>37</sup> Vaevë'e raromarujëjamu juhuonivoromo jiodudu'iraeromo uvareje: No aru'ahe gavaruëjo.

<sup>38</sup> Aru'ahe gavaruëjamu uëvadeje: Jemë rabëni juhuonivarujëjo. Rabëni uehore gö gö baejarujëjo.

<sup>39</sup> Ave nasi övoho höroho geromo uvorëjo: Nörö höjo. Ma'enegro heromo uvorëjo: Nörö bogo aru'ahemuoho jio'i a mae höjo. Aru'ahoho sine ijo'ahe bogohöjo. Röhu jemë iae gevarujëjo na sino'e ijo'aho'e jevo'ego.

<sup>40</sup> Eëhi uënogoromo övohu'o hörohu'o röjëhijamu gavareje.

<sup>41</sup> Garomo uehorovemu uehorovo'i arijareje. Uehorovoromo uvareje: Aveho mu ma-mabëhe jië'e nani noro sisë'i gavaruëromo bogo ma uehorovareje. Bogo ma uehorovamu gavë'i Iesuro uëvadeje: Na jemë ioho jëvavëjo o bogojëvavëjo.

<sup>42</sup> Eëhi uëvamu visue vënire buejë'oho babojamareje.

<sup>43</sup> Babojamamu Iesuro baeromo ae aho'obëhe jabesi nunire ijadeje.

<sup>44</sup> Iromo uëvadeje: Urimo naehu jemë'o hiromo majëhijamu hejarije jöho iae avevejö'e röhu maho majëhi'irögoro ë'ajëjo. Na uëvode höjo: Nasi jöho aho'obëhe Moses-hu jajivadoho jö God-aro baeromo majëhinövare a ioro'iorehu jajivaroho Psalms jö jajivaroho nasi jöe aho'obëhe God-are surire jajivarëhi iae eëhi jio'a'ajëjo. Öre gö bogohöjo. Eëhi uëvamu hejarije höjo.

<sup>45</sup> Hejarije hö uëromo jabesi simanoho huotovëhamu God-are surire jö bëhoho avoho gavareje.

<sup>46</sup> Avoho gavamu huro uëvadeje: God-are surire jajivoromo eëhi uvë'e höjo: God-ro bamë'ëro böröme namiromo ajëmijaje aho nörö vi'ehi böröme baeromo guomoromo majae niö'i gemu hesi uhure ri'ö'a'ajëjo.

<sup>47</sup> Ri'ö'iramumu aëro nöruare ihore jöe majëhiromo ae uë'a'aruëjo: Ae aho'obëhe öri sisëre jijiharujoho vuonugohëjo. Mu sisëho vuonugo'i avoho uehorovoromo mu mae vaehego God-ro jemesi sisëho uehorovoromo

vuonugajo. Ëhi jië'e jöho Jerusalem amore aevoromo majëhiromo maja rojomajire beva'ajire sa'are sa'are majëhibe jijihö'aruëjo. God-are surire jöho ëhi uvë'e höjo.

<sup>48</sup> Röhu ëhi jië'e muoho jemë gavë'e jëvaje ëhuni ë jöho majëhibe jijihorëjo.

<sup>49</sup> Röhu aveho hehëjo. Urimo nasi Vavuehu hesi Aru'aho suvuorëmi'i mae uëvadëhi naro ë Aru'aho suvuoroho jemëni nugö'ö'iramu bae'a'arujëjo. Ëhuni ë hesi urimo jemëro va'oromo Jerusalem amohuremu raromorego hujeji God-are darugohuro ruvebiromo ruahö'öjëvo'iröhe höjo. God-are darugohuro ruvebiromo ruahö'öjëvo'iramu evare va'oromo nasi muoho vae'a'arujëjo.

*Iesu ö'idöre ajiomade jöhoje.*

<sup>50</sup> Ëhi uënuoromo sö ujuohoromo Bethany amonö va'adeje. Va'oromo övoho nigemëvoromo uëvadeje: God-ro jemë huë mae bojëmi'ajëjo.

<sup>51</sup> God-ro jemë huë mae bojëmi'ajë uëromo God-ro uavamu jabumë ë rëmo'i huro ö'idöre ajiomadeje.

<sup>52</sup> Ajiomamu gagorovo rue Iesuare ariböviohuro hu rajahiromo börömo bëhe nimorohobe Jerusalem vuonorö'ö va'areje.

<sup>53</sup> Va'oromo raromoromo God-are osa börömore va'oromo majae aho'o God rajahinövareje. Ahia mino'e.

## JOHN

*God-are Jö Jövaje Aehu God-arire jioromo sa'are rueromo mu ma barovade jöhoje.*

<sup>1</sup> Ni'i'ivade majaroho ae gemu hesi ihoho God-are Jö jumuvë'o ho iae hijë'e jiadeje. Hu God'o gemu mae hi'i hu'o God jiadeje.

<sup>2</sup> Ni'i'ivadire ë aho God'o gemu mae hijë'e jiadeje.

<sup>3</sup> God-ro uavamu huro sa'ae bövie bise'e bamadeje. Bogo bamo'ibejo bövioho bise'o ho bogo mae bogojio'ibejo.

<sup>4</sup> Darugoho aho'o hesirire gemu jioromo rovadeje. Rueromo ae aho'o ajoho bojamuadeje.

<sup>5</sup> Äajohuro ramoramore ajivajeje. Ramoramoho ajoho bogo tugohë'eje.

<sup>6</sup> Ae gemu God-ro nugö'öjamu rovadeje. Hesi ihoho John jiadeje.

<sup>7</sup> Hu rovadeje aji hesi bëhi gavadoho huruoho majahui'iröhëro. Majahuijego ae aho'obëhe hesi jöho heromo mae uehorovo'iröhego.

<sup>8</sup> Hu bogo ajoho jiadeje. A'i huro aji hesi bëhoho majahui'i rovadeje.

<sup>9</sup> Äajoho iae aji maho jiohijo. Evare majare ë aje ae aho'obëhe ajivavuajohuro sa'are ruehijo.

<sup>10</sup> Amo God-are Jö jumuvade ahuro ave sa'are hijadeje. Urimë'i God-ro uavamu ave sa'aroho avoho'amadeje röhu ave sa'are ariböviohuro hu bogo avoho garuomadeje.

<sup>11</sup> Hu hesiro rovadeje röhu hesi aribövi mahuro hu bijönimoruomadeje.

<sup>12</sup> Röhu hesi a ioro'iorohuro hu nimoromo mae uehorovoruumadeje. Mae uehorovoruumamu ëhuni uëvadeje: Avevejö'e jemë God-are aboji harihu'e raejëvajejo.

<sup>13</sup> God-are aboji harihu'e raejëvade hesi öroho bogo aehu nimoromo baejëvamu i'oroho rahëvo'i a'i God-ro baejëvë'ëro ëhuro hesi aboji harihu'e jëvadeje.

<sup>14</sup> Röhu God-are Jö jumuvë'e ahuro sino haho'e baeromo ro God-are jöho mae röjahui avohoromo huë baejavuo avohoromo no'o gemu mae hibe juvadeje. Hi juvamu no hesi ajoho gavareje ë ajoho hesi Vavu hesi Harihe hu gemu'ëro jië'ëro baejë'ëro.

<sup>15</sup> Ëhi'amu gagorovo John-ro ë a hesi jöho ae huruoho majëhijadeje. Majëhiromo ma-darugo'o uvadeje: Naehu uëvode aho aviae höjo. Na mami'e uëvode höjo: Naro urimo rovë'e jevajëjo. Ae gemuëro nasi ijonö rue'ië'ajëjo. Ëhi höjo röhu ë ahuro na iosiremiromo hu bërömo ho höjo na bogo rahevadevare hu jiobe rovë'ëro jië'ëro. Ëhi uëvadeje.

<sup>16</sup> Iae hu huë baejavuo avohë'ëro ëhu'ëro huë mae no ae aho'obëhe bojamuiromo döre döre bojamuibe rovë'eje.

<sup>17</sup> Mu vae'iröhe jögoroho God-ro uavamu Moses-ro bojamuadeje. A'i God-ro uavamu Iesu Kerisoro huë baejavuoromo God-are bëhoho maemu röjahuijadeje.

<sup>18</sup> Aho God bogo mae bogo gavë'e javue. God Harihoho gemu Vavu hesi bëhi mare hijaje aëro jië'ëro huro God röjahuijë'eje.

*John bapataeto vaejaje aehu a jö majëhijadohoje.*

<sup>19</sup> Röhu Jerusalem raromarue Jew rajo a masijohuro priest ömo'ömohu'o priest ajëmiarue a ömo'ömohu'o uëvareje: Va'irarijoho John uarëjo: Ja



rahuo javajëre. Ëhi uëvamu va'oromo ë jöho ua gavamu huro aviëhi jië'e jöho majëhijadeje.

<sup>20</sup> Hu bogo jöho subivëho'i sama'e huruoho majëhiromo uëvadeje: Na bogo böröme namiromo ajëmi'irode aho jevajëjo.

<sup>21</sup> Uavareje: Ëhi jië'oho na ja Elijah javajëjo. Uëvadeje: Bogajo. Uavareje: No muebejaruëjo a börömohuro jöe God-aro barueromo majahui'iröhego. Na ja ë aho javajëjo. Uëvadeje: Bogajo.

<sup>22</sup> Uavareje: Ëhi jië'oho ja rahuo javajëjo. Majahuijego no va'oromo ramuö'öjamu rovere aho majëhi'iröhe höjo. Jasi jöho ja diehi jövanue höjo.

<sup>23</sup> Diehi jövanue höjamu John-ro uëvadeje:

Na a rumo'e sa'are hiromo aviëhi jië'e jöho ma-darugo'o majëhijaje ae jevajëjo.

Badahu rueröhe öroho ahorirëro vajivahorego hu maro rue'irajo.

Urimë'i jö God-aro baeromo majëhinövade ae Isaiah-ro ë jöho jajivadeje. Ëho John-ro uëromo ë'adeje: Isaiah-hu jajivade jö hesi muoho iae na vaeromo ë'ajëjo.

<sup>24</sup> Ëhi jövamu rueho jaburo Pharisee a masijohuro rëmö'öjamu rovë'ëro

<sup>25</sup> uavareje: Ja bogo böröme namiromo ajamui'irane aho javajëjo bogo Elijah javajëjo bogo jö God-aro baeromo majahuijanue a börömoho javajëjo röhu ja diehi'oromo aho bapataeto vaejëvanue höjo.

<sup>26</sup> Vaejëvanue höjamu John-ro uëvadeje: Naro jovëro bapataeto vaejëvaje höjo. Röhu jemëhu bogo gavaruje aho jemesi ririre namijajëjo.

<sup>27</sup> Huro nasi ijonö rue'ie'ajëjo röhu huro na iosiremiromo börömoho höjo. Naehu hesi mu bise'o vaejahoromo hesi höru sino jiovaho'ibejodoho o mu bise'o bise'e rabe vaejaho'ibejodoho na ma-bise'e jevajëjo. John-ro ëhi uëvadeje.

<sup>28</sup> John'o Jerusalem jioromo rovere ariböviohu'o jö ëhi vaerovaroho ëho Bethany jiadeje. Bethany amoho Jordan jovo ruhëhi jiadeje. Ësa'are Jordan jovore John-ro ae bapataeto vaejëvonövadeje.

### *Iesu God-are Sheep Harihu jiaje jöhoje.*

<sup>29</sup> Nërö John-ro gavade Iesu rovamu gagorovo ae uëvadeje: Arueho gahëjo. Sheep harihu muo'amamu God-hu mu sisë rori'o babu'öjadëhi ëhi ë ahuro sa'ae gö gö aho'obëhe nosi sisëho rori'o babu'ö'ajëjo.

<sup>30</sup> Ëa hesi jöho na mami'e majëhijode höjo. Majëhiromo uëvode höjo: Naro urimo rovë'e jevajëjo. Ae gemuëro nasi ijonö rue'ie'ajëjo. Ëhi höjo röhu huro na iosiremiromo hu börömoho höjo na bogo rahevadevare hu jiobe rovë'ëro jië'ëro. Ëhi majëhijode höjo.

<sup>31</sup> Mami'oho na hu bogo avoho gavode höjo. Röhu naehu rueromo jovehu bapataeto vaejëvode hesi bëhoho ëho naro hu röjëhijego Israel ariböviohuo jemëro ga'irarijego ëhuni ë'ode höjo.

<sup>32</sup> O ave jöho John-ro gavë'ëro huruoho majëhiromo uëvadeje: Naro gavode höjo God-are Aru'ahe guaho va'ënohuro ö'idöre jioromo ë a hesi simano namore ruvebiromo gerejamu.

<sup>33</sup> Mami'e na hu bogo gavode höjo röhu naehu jovehu bapataeto vaejëvojöro uevadohuro uevade höjo: Ga'irane Aru'ahohuro ruvebiromo di a hesi simanore gerejamu gavë'oho uvonëjo: Ëahuro God-are Aru'aho Mahuro ëhuro bapataeto vaejëvo'ajëjo. Vavuohuro ëhi uëvamu hejë'ëro ijonö gavode höjo Aru'ahoho ruvebiromo ë a hesi simanore gerejamu.

<sup>34</sup> Ĕho nasi nunĕro gavode hĕjo. Gavĕlĕro naro jemĕ uĕvajĕjo: Arue aho God-are Harihe hĕjo.

*Iesuhu aevoromo ae uĕvamu hesi ijore ijore jijihare jĕhoje.*

<sup>35</sup> Ĕhi uĕvĕlĕro nĕrĕ John-ro rĕhu maho ĕ rueromo hesi ijorajoho niĕ'i jabu'o gemu mae namijadeje.

<sup>36</sup> Nami'i gavade Iesu rova'amu gagorovo ijorajo niĕ'ioho uĕvadeje: Arueho gahĕjo. God-are Sheep Harihoho iae jiajĕjo.

<sup>37</sup> Ĕhi uĕvamu hegorovo rueho jaburo John nugo'i Iesuare ijore va'areje.

<sup>38</sup> Iesuare ijore va'amu huro huotorovoromo gĕvade ĕ ae niĕ'ioho hesi ijore rovamu gĕgorovo uĕvadeje: Jemĕ rabe naharujĕjo. Rabe naharujĕjamu jabesi huĕro uavareje: Rabae ja dinĕ'e hijanue hĕjo. Rĕhu Rabae uavaroho ĕho uaromo ĕ'areje: Rĕjahuijanue a bĕrĕmohajo.

<sup>39</sup> Rabae ja dinĕ'e hijanue hĕ uavamu hegorovo Iesuro uĕvadeje: Rueromo gahĕjo. Gahĕjamu hegorovo majae garobo'e bamamu hu'o va'oromo hu hijaje osaho gavareje. Garomo hu'o arijuvo vahiromamu va'areje.

<sup>40</sup> Ae niĕ'iohuro John-are jĕho hejĕlĕro Iesuare ijore rovere a gĕ hesi ihoho Andrew Simon Peter-are ōho jiadeje.

<sup>41</sup> Andrew-ro ma-burĕro hesi ōho Simon naho va'oromo bihoromo uavadeje: Bĕrĕme namiromo ajamui'irĕhe aho noro birohĕ'e javuajĕjo. Bĕrĕme namiromo ajamui'irĕhe aho Greece huĕhu huotovĕ'oho Kerisoje.

<sup>42</sup> Bĕrĕme namiromo ajamui'irĕhe aho birohĕ'e javuajĕromo Simon hu'irae baeromo Iesu ga'iro rovadeje. Rovamu Iesuro hu garomo uavadeje: Ja Simon John-are harihe javajĕjo. Jasi ihoho Cephas jio'a'ajĕjo. Hebrew huĕhu Cephas huotovĕ'oho Greece huĕho Peter-je. Ĕiho hesi bĕhoho munĕje.

*Iesuhu Philip'o Nathanael'o uĕvamu hesi ijore ijore jirehare jĕhoje.*

<sup>43</sup> Ĕhi ĕ'lĕlĕro nĕrĕ Iesuro uvadeje: Jaruvo na Galilee sa'are ajiomolĕjĕjo. Ajiomolĕjĕ uvonugoromo ajiomadoho ajio Philip birohadeje. Philip bihoromo uavadeje: Nasi ijoro ijoro rovĕjo.

<sup>44</sup> Rĕhu Philip hu Bethsaida amo rajo ae jiadeje. Andrew'o Peter'o jabu'o ame gemuoho jĕvadeje.

<sup>45</sup> Ĕhi'amu Philip-ro Nathanael naho va'oromo bihoromo uavadeje: Urimĕ'i Moses-ro hesi jĕgoru surire uĕvuade hĕjo: Ijonĕ a bĕrĕme rue'a'ajĕjo. O jĕ God-aro baeromo majĕhinĕvare aribĕviahuro jĕe gemuoho jajivoromo uĕnĕvare hĕjo. Ĕruerĕhego jajivoruomade aho iae no birohĕ'e javuajĕjo. Hesi ihoho Iesu hĕjo. Hu Joseph-are harihe hĕjo. Hesi amo ihoho Nazareth hĕjo.

<sup>46</sup> Nazareth hĕjamu Nathanael-ro uavadeje: Asĕ'e a maho ĕhi jiĕ'e amoroho bogo rue hesi hĕjo. Bogo rue hesi hĕjamu Philip-ro uavadeje: Ja'o ro gavĕjo.

<sup>47</sup> Ĕhi'amu Iesuro gavade Nathanael rovamu gagorovo ae uĕvadeje: Arueho gahĕjo. Israel rajo a ma-maĕro rovajĕjo. Hesi uhuroho sareri'e jĕho bogohĕjo.

<sup>48</sup> Ĕhi uavamu Nathanael-ro uavadeje: Ja diehi'oromo na gevanue hĕjo. Gevanue hĕjamu Iesuro uavadeje: Jaehu ruejĕro Philip-hu uavade hesi urimo ja meso gurutore hijamu gavode hĕjo.

<sup>49</sup> Gavode hĕjamu Nathanael-ro uavadeje: Tisa ja God-are Harihe javajĕjo. Ja bĕrĕme namiromo Israel rajo muebejavuanue aho javajĕjo.

<sup>50</sup> Muebejavuanue aho javajëjumu Iesuro uavadeje: Na uavode höjo: Ja meso gurutore hijamu gavode höjo. Ëmu harihu vaejode jöho uavamu hejë'ëro jero mae uehorovevanuëjo. Röhu u'emu mu masijo maho ga'amo'anuëjo.

<sup>51</sup> Ëhi uanugoromo uëvadeje: Ave jöho na jö mae uë'ië'ajëjo. Jemë iae ga'a'arujëjo ö'idöho arorovo'i God-are A Ma naehu jiajire God-are anerahuro iojioromomo ruvebi'i ari'iramu.

## 2

*Iesuhu Cana amore hiromo masurovare sörö iromo bëhi'e mu börömo vaejade jöhoje.*

<sup>1</sup> Majae niö'i gemu hesi uhure iae masurovo'iröhe söröho Cana amore Galilee sa'are avohareje. Avohamu Iesure vëmohuro ë hijadeje.

<sup>2</sup> Iesu'o hesi ijarahoho jabu'o söröre ruejoro uëvë'ëro ë ro raromareje.

<sup>3</sup> Raromoromo sörö'e ariböviohuro wine jovoho ue'aho barënuogoromo vëmohuro Iesu uavadeje: Wine jovoho barëjë'e höjo.

<sup>4</sup> Barëjë'e höjumu uavadeje: Mamajo. Rabëni ajëmijoro uevanuëjo. Nasi maja börömoho bogo rovë'e höjo.

<sup>5</sup> Bogo rovë'e höjumu hegoro vëmohuro mu ajëmijarue aribövioho uëvadeje: Ëaehu diehi uëvamu hejë'o ho ëhi ë'orëjo.

<sup>6</sup> Röhu Jew rajëro God uehorovoromo jabesi sine inöme u'o'amarue jögoroho enövareje. Ëhuni jovo hevöe munëhu ubovoromo avoho'amaroho aho'obëhe övo gö mine övo göre gemu ë momorö'öjadeje. Jovo bövi mae 80 o 120 litre gemu gemu oteho'amo'ego irijiomomo'amonövadeje.

<sup>7</sup> Ëhi jië'e jië'ëro Iesuro mu aribövioho uëvadeje: Ëmunë hevöro jovo maho oteho'amego irijiomomo'amo'irajo. Ëhi uëvamu irijiomomo'amo barëjareje.

<sup>8</sup> Ëhi'amu uëvadeje: Jove gö ë hevöro vuoromo ujuoho va'oromo sörö muebejaje aho i'imamirëjo. I'imamirëjumu ujuoho va'oromo i'imamijareje.

<sup>9</sup> I'imamamu rue sörö muebejaje ahuro i heromo hejadeje jovoho rihu'e jiamu ë jovo maho mami'e wine-rëjë'ëro jië'ëro. Röhu ë wine jovoho dinö'e jioromo ujuoho rovaroho bogo ga'i hesi jovo vuare mu ariböviohuro gavareje. Amo hejade rihu'e jiamu hegoro i'o masuvade aho uvamu rovadeje.

<sup>10</sup> Rovamu rue sörö muebejaje ahuro uavadeje: Ae aho'obëhe wine jovo mabëhoho urimo bahijëharue höjo. Bahijëhonugoromo aëro jovo bövi mae ue'ahago ijonö jove ma-bisemu sisëho bahijëharue höjo. A'i jero wine jovo maho avoho runo'e bamane höjo aviavejë'e i'iröhohuni.

<sup>11</sup> Iesuro Cana amore Galilee sa'are hiromo bëhi'e mu börömoho aevo'i ëhi vaejadeje. Vaeromo ehuro hesi aji maho röjëhijumu gagorovo hesi ijarahoho jaburo hu mae uehorovareje.

<sup>12</sup> Ëhi'amu Iesu o hesi vëmoho o ö ömo'ömoho o ijaraho ömo'ömoho ëho jaburo Capernaum amore abuejareje. Abueromo ë raromaroho majae gemu niö'i rabu'e barëjadeje.

*Iesuhu God-are amo börömore ajioromomo inömo imo'amarue aribövi rarovö'öjëvade jöhoje.*

<sup>13</sup> God-hu Vörö Tugohade Sörö Jew rajehu ijarue majaho dunovadeje. Sörö majaho dunovamu Iesuro Jerusalem ajiomadeje.

<sup>14</sup> Ajioromomo God-are amo börömore va'oromo gavadeje a ioro'ioroho cow-ho Sheep-oho guaho va'ëne ugoho ëhi imo'amo'i o a ioro'ioroho mu

maratu bēhire raromoromo ijo bajoho ujuoho'i amo bōrōmo hesi ijo bajoho mana i'imēmijamu.

<sup>15</sup> Ēhi gēnugoromo ö'e ujuohoromo baduno'e ö'oho huadeje ēhuro hisuebi'amoröhēni. Huonugoromo ē aribövioho aho'obēhe God-are amore jioruomamu hisuebijēvoromo rarovö'öjēvoromo sheep-ohu'o cow-hu'o rarovö'ö'amadeje. Ijo bajo mu vaeruomaje aribövi jabesi mu maratuoho huotovö'öjēhamu ijo bajoho rireromoromo arua anumiae va'adeje.

<sup>16</sup> Guaho va'ēne ugo imoruomaje aribövioho uēvadeje: Ave inōmo inōmoho rori'o ujuoho va'ohējo. Nadi aveho imohējo. Nasi Vavu hesi amoho bogo bövi bise'o imarue amoho hōjo.

<sup>17</sup> Bogo bövi bise'o imarue amoho hōjamu hegoroovo Iesuare ijorajoho jaburo uehorovoromo uvareje: Huhu ē mu vaejaje hesi bēhoho God-are surire jajivoromo uvē'e hōjo: Vavuoho jasi osa hesi mu nimajohuro ēhuro vēninö'e nasi dē vövöbajo'ere ravevajējo.

<sup>18</sup> Röhu Jew rajo a masijohuro gavare Iesu ēhi'amu uavareje: Rabēni ēhioho ē'anuējo. Bogo gavarue darugo'e muoho rōjahuijego no garomo uvarējo: God-ro uavē'ēro ē'anuējo.

<sup>19</sup> Ē'anuējamu Iesuro uēvadeje: Ave God-are amoho dadovorējo. Dadovē'oho majae niö'i gemu hesi uhure naro röhu maho vae barē'iramu mae nami'a'ajējo. Ēhi jiē'e darugo'e muohemu rōjēhi'ejōjo.

<sup>20</sup> Rōjēhi'ejōjamu Jew rajohuro uēvareje: Sarerivanuējo. Ave amo vaebe rovaroho vadune aho'obēhe 46 barējē'e hōjo. Ēhuni dadovē'oho röhu ja diehi'oromo majae niö'i gemu hesi uhuroho vae barē'iramu maho nami'a'ajējo.

<sup>21</sup> Jaburo uvareje: Nani God-are amo bōrōmoho dadovo barējego huro vae barē'i jövajējo. Röhu bogo amo hesi jōho jövo'i hesi sino haho'ehu guomoromo röhu maho ri'öröhe jōho jövadeje.

<sup>22</sup> Ēhu'ēro jiē'ēro ijonö Iesuhu guomoromo ri'öjadevare evare hesi ijorajoho jaburo uehorovoromo uvareje: Iesuro mami'e uönövade hōjo: God-are amoho naro avoho vae'iramu nami'a'ajēromo evare Iesu ri'ö'iröhe jö God-are surire jajivare Iesuhu majēhijadoho ēho mae uehorovareje.

*Iesuhu ae aho'obēhe gö barējaje jōhoje.*

<sup>23</sup> God-hu Vörö Tugohade Sörö majare Iesuro Jerusalem amo bōrōmore hijamu evare ae aho'obēhe gavare hu mu masije vaejamu gagorovo hesi örire mae uehorovoruomadeje.

<sup>24</sup> Mae uehorovamu Iesuro uvadeje: Ēaribövioho ma-döēremu uehorovevaruēromo jabesi öriroho bogo ma uehorovēvadeje ae aho'obēhe mami'e gēvē'ēro jiē'ēro.

<sup>25</sup> Iae hu ae aho'obēhe jabesi dē vövöbajo'oho gē barēnövadeje. Ēhu'ēro ae gö jabesi jö Iesuare örire majahi'iröhe bēhoho bogojiadeje.

### 3

*Iesuhu Nicodemus'o jö jövade jōhoje.*

<sup>1</sup> Iae Jew rajo a bōrōme gemuēro hijadeje hesi ihoho Nicodemus. Hu Pharisee ae jiadeje.

<sup>2</sup> Vahie gemu huro Iesu ga'i va'adeje. Va'oromo Iesu uavadeje: Tisa no ja garomo uvarue hōjo: God-hu ramö'öjamu rōjahui'i rovane ae javajējo. Rabēniajo. God a'oho bogo hi'ibejajo jaehu vaejanue ēhi jiē'e mu masijo vaejē'oho bogo eni javuo'ibejajo.

<sup>3</sup> Bogo eni javuo'ibejajamu Iesuro uavadeje: Ave jöho na jö mae ua'ie'ajëjo. Ae mami'e rahadoho röhu maho bogo raho'amë'oho God-hu muebejaje öri ari'o garuomoröhoho bogo eni jioruomo'ajëjo.

<sup>4</sup> Bogo eni jioruomo'ajëjamu Nicodemus-ro uavadeje: Iae mae höjo röhu aho mavojiraej'oho diehi'oromo röhu maho raho'amo'iröhoho eni jioruomo'ajëjo. Vëmu jabesi dëre vuonorö'ö rumo va'oromo suorovonöv'oho bogo eni höjo.

<sup>5</sup> Bogo eni höjamu Iesuro uavadeje: Ave jöho na jö mae ua'ie'ajëjo. Jovohu'o God-are Aru'ahohu'o bogo ajëmijamu röhu maho rahë'oho God-are öri ari'ere va'iröhoho bogo eni jioruomo'ajëjo.

<sup>6</sup> Sino haho'o'e aëro sino haho'o'e harihoho baeruomo'i a'i God-are Aru'ahohuro iae aru'aho'e harihoho avoho'amaje höjo.

<sup>7</sup> Na uavode höjo: Jemë mami'e rahëvadoho röhu maho rahëvë'oho ëhuremu mae jëvo'ajë jöho hejanuoho nadi tiönëjo.

<sup>8</sup> Buroho dinö'e dinö'e va'i nimë'oho hesi ëma va'aje höjo. Ja he'a'anuëjo rovavo'iramu röhu bogo ga'a'anuëjo dinö'e jioromo rovajoho o dinö'e va'ajoho. God-are Aru'ahuhu a rahu ajëmamu röhu maho rahë'oho jabesi öroho iae ëhi dadivavo'iramu bogo ga'a'anuëjo.

<sup>9</sup> Bogo ga'a'anuëjamu Nicodemus-ro uavadeje: Röhu ëhi jië'e muoho diehi jio'a'ajëjo.

<sup>10</sup> Diehi jio'a'ajëjamu Iesuro uavadeje: Ja Israel rajo röjahuijanue a böröme javajëjo. Röhu ja diehi'oromo ëhi jië'e muoho bogo gavanue höjo.

<sup>11</sup> Ave jöho na jö mae ua'ie'ajëjo. Simane javuë'ëro ë jöho no atarue höjo. Nunehu gavë'e jöho huruoho majëhijarue höjo. Majëhijego jemëro bogo ejahuaruje höjo.

<sup>12</sup> Sa'a hesi mu jö majëhijodoho jemë bogo maho uehorovevaruje höjo. Ehuni ö'idö hesi mu jö majëhijë'oho jemë diehi'oromo mae uehorovevorëjo.

<sup>13</sup> A ioro'ioroho bogo ö'idöroho ajio raromoruomade höjo. God-are A Maho ö'idöre jioromo ruvebijodoho naro gemuëro ëho hijode höjo.

<sup>14</sup> Röhu urimë'i Moses-ro a rumo'e sa'are hiromo sigobu va'ëne inömo ma-mabëhe avohoromo ijore bamoromo a jabesi nunire banigojiomade höjo aëro ëho garomo mae raromonövoröhego. Sigobu va'ëne inömo banigojiomadëhi God-ro bamë'ëro aëro ëhi hesi A Maho na a jabesi nunire banigojiomevo'aruëjo

<sup>15</sup> ehuro ae rahu na mae uehorovevë'oho i'e rahanovoromo ma-ioro'ioremu maro raromo'iröhego.

<sup>16</sup> Sa'ae dinö'e dinö'e God-ro dë vövöbajole aho'o uehorovavuadeje. Uehorovavuoromo hesi Harihu gemu'oho bojamuijadeje ehuro ae rahu Harihu mae uehorovë'ohuro ehuro bogo sisëroho va'i ma-ioro'ioremu maro raromoröhego.

<sup>17</sup> God-hu hesi Harihu sa'are nugö'öjade hesi bëhoho bogo nosi sisëho garomo sisëroho bamavuo'i a'i ajamuïromo maro ramuo'iröhego ehuni nugö'öjadeje.

<sup>18</sup> Ae rahu Harihu mae uehorovë'oho bogo sisëroho va'o hesije. O bogo ma uehorovë'oho mami'e sisënö bamë'eje ë hesi bëhoho hu God-are Harihu gemu'oho bogo ma uehorovë'ego.

<sup>19</sup> A sisënö bamëvaje hesi öroho aviëhije. Ajohuro sa'are rovë'eje. Rovë'e jiamu aëro ajoho bijönimo'i ramoramoho nimoruomadeje mu sisëmu vaejaruëro jië'ëro.

<sup>20</sup> Ae rahu mu sisë vaejë'oho ajoho garomo bijönimoromo bogo bëhiroho rovajeje hesi mu sisëho va'orahoro jiojööni.

21 A'i ae rahu mu ma vaejè'ohuro aji bēhire rovajeje huhu God-are jō ejahoromo mu vaejajoho ēho samaro jiorōhego.

*John-hu Iesuare jō majēhijade jōhoje.*

22 Ēhi'amu Iesu'o hesi ijorajo ōmo'ōmohu'o ēho jaburo Judea sa'are va'areje. Va'oromo huro jabu'o hiromo ae bapataeto vaejēvonōvadeje.

23 Bapataeto vaejēvo'i John-ro Aenon sa'are Salim amo bēhire hiromo hu'o bapataeto vaejēvonōvadeje ē dir'ōho jove aho'obēhe jiē'ero. Bapataeto vae'ego ae aho'obēhe ē rueromo vaenōvareje

24 ē hesi bēhoho John bogo guduamoromo savoji gagoroho ba'amē'ero ijonō ba'amo'irōhego.

25 John-ro bapataeto ēhi vaejēvamu hesi ijorajo ōmo'ōmohu'o Jew rajo ae gō'o jō aho'ahamirovoromo uarovareje: Jovehu sisē u'o'irōhe ōroho ēhi ēhi hōjo.

26 Jōho ēhi aho'ahamirovoromo John-are ijorajohuro va'oromo John uavareje: Tisa Jordan jovo ioro'iorore ja'o hijamu jaehu hesi jō majahuijanoho ē ahuro jasi muoho vajiohunō'e baeromo bapataeto vaejēvego jabu ae aho'obēhe hesirire va'oruomaje hōjo.

27 Va'oruomaje hōjamu John-ro uēvadeje: Rōhu aehu nosirire rueruomē'oho o muehu o rabehu rabehu rovē'oho bogo ēma rovego bae'i a'i God-ro bojamuijago baejarue hōjo.

28 Jemē mami'e hejarije hōjo naro jemē uēvamu: Bōrōme namiromo ajēm'i'irode aho bogo naehu jevajējo. A'i God-ro na urimo remō'ōjamu rovē'e jevajējo ē ahuro ijore ruerōhego.

29 Ēa hesi jōho uhunō'e majēhi'iē'ajējo. I'o masurōhe aho huro gemuēro vaboroho bae'a'ajējo. O ē a hesi aemo'aemohuro namiromo mu'ōjamiromo herōhe masurōhe aho jōe jōvavamu hejē'oho nimoroho'ajējo. Nimoroho'irōhēhi jemēhu uevaruje a hesi mu jōho heromo na nimorohevo avohajējo.

30 God-ro ēhi nimo'ego ē a hesi ihoho ajiomō'i nasi ihoho abuejajējo.

*Iesuhu ō'idōre jioromo ruvebijē'ero jō bōrōmo majahuijaje jōhoje.*

31 John-hu majēhijadēhi iae ēhije. Dōre jioromo ruvebijade ahuro ae aho'obēhe iosiramuiromo bōrōmohoje. Bogo dōre jioromo ruvebi'i a'i ma-sa'are rahēvare aribōvioho jabumē ma-sa'aremu raromarue aribōviēro jēvē'ero sa'a hesi jōhemu majahuijarueje. O ō'idōre jioromo ruvebijade ahuro aho'obēhe iosiramuiromo hu bōrōmohoje.

32 Bōrōmoho jiē'ero garomo hejade jōho huro ae majēhijajeje. Majēhijago hesi jōho aho bogo ejaharueje.

33 Rōhu ae rahuro hesi jō ejahē'oho ēhuro uvarueje: Iae mae-ējo God mae hōjo.

34 Ēhesi bēhoho God-hu nugō'ōjade ahuro God-are jōhuremu jōvajeje. Rabēni hesi bēhoho God-ro hesi Aru'ahoho bojami avohego dē vōvōbajole raroahaego jōho jōvajeje.

35 Vavuohuro Harihoho rajahijajeje. Rajahiromo bōvie bise'e hesi ōvore bamē'eje.

36 Ae rahu Harihu mae uehorovē'oho ma-ioro'iolemu maro hijajeje. O ae rahu Harihu bogo ejahē'oho bogo maroho hi'i God-ro hesi ōrire dē vōrōnimemu vōrōnimajeje.

## 4

*Iesuhu Samaria rajo magonahohu'o jö jövadohoje.*

<sup>1</sup> Iae Pharisee ariböviohuro hejareje aëro uvoruomamu: John rinëgoromo bapataeto vaejëvobe rovaje aho ma-jianovo'i Iesuhu rinëgoromo bapataeto vaejëvobe rovaje aho börömoho höjo.

<sup>2</sup> Èhi hejareje röhu Iesu bogo hesi övoho bapataeto vaejëvo'i a'i hesi ijorajoho jaburo ë'areje.

<sup>3</sup> Amo Iesuro hejade uvavamu: Huhu ë'aje muohuro John hesiroho iosiramijë'e jöho Pharisee ariböviohuro hejë'e hö uvavamu hegorovo Judea sa'aho vuonugo'i vuonorö'öromo Galilee sa'are ajiomo'i va'adeje.

<sup>4</sup> Galilee ajiomo'irögoro Samaria örëro va'adeje hesi muëro jië'ëro.

<sup>5</sup> Va'oromo Samaria sa'are ajiomoromo amo ihe Sychar ë rovadeje. Röhu Sychar amo bëhire jiaje sa'aho urimë'i a mami ae Jacob-ro hesi harihoho Joseph bojamijadeje. Èsa'anö Iesu rovadeje.

<sup>6</sup> Rueromo maja ririvanovë'iro öri ëgoböviro rovë'ëro u'uvamu hegoro Jacob-mëhu jovëni umare gua bëhire hijadeje.

<sup>7-8</sup> Hesi ijorajoho jabu ie imo'i amore va'ë'ëro hesi sivue hijadeje. Hijamu iae Samaria sa'a rajo magonahe gemuëro jove vuo'i rovadeje. Rovamu gagorovo Iesuro uavadeje: Jove vuo bojemego na ijöjo.

<sup>9</sup> Jove bojemego na ijöjamu rue magonahohuro uavadeje: Ja Jew raje javo'i na Samaria rajo magonahe jevajëjo. Èhu'oho rabëni jovo jöho ue gevanuëjo. Èmagonahehu ëhi uavade hesi bëhoho Jew rajohuro uvoruomajeje: Samaria rajo jabesi ano sabo'e hevöho enatuoho unoho ioho bogo i'ëjarëjo. Jew rajehu ëhi uvoromo ömaruëhi Iesu bogo ëhioho ömë'ëro ëhu'ëro magonahohuro uavadeje: Rabëni jovo jöho ue gevanuëjo.

<sup>10</sup> Ue gevanuëjamu hegorovo Iesuro uavadeje: God-hu a bojëmijaje suvuroho jero bogo gavanuëjo. O naehu jovo bojemijöro ua gavaje aho jero bogo gevanuëjo. Ge'ibejanëjo ja ue ge'ibejanëjo naro a i'ovëvaje jovoho bojami'ibejööjo iromo maro hi'iranego.

<sup>11</sup> Bojami'ibejööjamu magonahohuro uavadeje: Iae mae höjo röhu jovo vuoromo bojemil'irane hevöho bogojavajëjo. Röhu jovo vuo'irane guaho ëgobövi mae jio abuejajëjo. Èhi jië'oho ja diehi'oromo a i'ovëvaje jovoho vuo bojeminëjo.

<sup>12</sup> Nosi hije bövi mae Jacob-ro ave jovo vuarue guaho bojamuijade höjo. Hu'o hesi harihu ömo'ömo'u'öho ëho jaburo ave guare rueromo jovoho vuoromo ue'ahë'i jabesi mioho mio'amonövare höjo. Na jero Jacob iosiramiro mo börömoho javajëromo ëhu'ëro jero a i'ovëvaje jovoho bojemi'i uevanuëjo.

<sup>13</sup> Uevanuëjamu uavadeje: Ae rahu ave jovo ue'ahë'oho huë girihëvo'iramu röhu maho gö'o i'i nimonövo'arujëjo.

<sup>14</sup> O naehu jovo mëmamu ue'ahë'oho huëho bogo girihëvo'i ioro'ioire gemu ma-maemu jioruomö'ajëjo. Èhesi bëhoho naro jovoho bojemi'iramu nasi jovo mahuro jabesi dë vövöbajo'ere jovëro bubujivanovo rojomëvo'iramu ma-ioro'ioire gemu maro raromö'aruëjo.

<sup>15</sup> Raromö'aruëjamu magonahohuro uvadeje: Mae jovo jöe jövajëromo uavadeje: Iae mae höjo. Èhi jië'e jovoho bojemego na ijöjo. Iromo ijönöho huëho bogo girihevego aveho bogo rueromo jovoho vuo'irode höjo.

<sup>16</sup> Bogo vuo'irode höjamu Iesuro uavadeje: Va'oromo jasi baruoho uaromo hu'irae baruenëjo.

<sup>17</sup> Baruenëjambu rue magonahohuro uavadeje: Baru rumo'e jevajëjo. Baru rumo'e jevajëjambu uavadeje: Iae mae uevanuëjo: Baru rumo'e jevajëjo.

<sup>18</sup> Urimo baru masu nugobe rovanoho aho'obëhe övo gö mine höjo. Avevejö'e garomo hijanuoho ëho bogo jasi baruoho höjo. Ëhuni ja mae uevanuëjo.

<sup>19</sup> Mae uevanuëjambu rue magonahohuro uavadeje: Iae na gavajoho ja jö God-aro baeromo majahuijanue ae javajëjo.

<sup>20</sup> Ëhuni ave jöho uevego na hejöjo. Nosi Samaria hijo miono'o ömo'ömohuro rue dahorure iojiomoromo God rajahibe rovë'e höjo. Röhu Jew rajoho jemëro uvaruje höjo: Jerusalem amohuremu rojomoromo God rajahinövorëjo. Di öri ari'oho maho höjo.

<sup>21</sup> Maho höjambu uavadeje: Röhu ave nasi jöho mae uehorovëjo. Majae ijonöho aho bogo rue dahoruroho o Jerusalem amoroho Vavuoho rajahiruomo'ajëjo.

<sup>22</sup> Samaria rajoho jemëhu rajahijaruje bëhoho bogo gavë'e ëma ë'aruje höjo. Röhu Jew rajo noehu rajahijaruoho noro avoho garomo ë'aruje höjo. Rabëni hesi bëhoho God-hu a manö babamëvo'iröhe muoho Jew rajo nosirire aevë'ëro jië'ëro ëhu'ëro noro öroho avoho garomo God rajahijaruje höjo.

<sup>23</sup> Majae gö rue'ie'ajëjo. Röhu mami'e rovanovë'e höjo. Evare majare aehu uhohu'o God rajahijë'oho God-are Aru'ahoho baeromo Vavuoho avoho uehorovoromo ëhi rajahi'aruëjo. Vavuohuro iae nimajëjo ëhi jië'e ariböviohuro hu rajahinövoröhego.

<sup>24</sup> God hu aru'ahe höjo. Ëhuni ae rahu God rajahijë'iroho hesi Aru'ahoho baeromo God avoho uehorovoromo rajahi'aruëjo. Öre gö bogohöjo.

<sup>25</sup> Bogohöjambu rue magonahohuro uavadeje: Iae na gavajëjo. Böröme namiromo ajamui'iröhe aho Keriso iae rue'a'ajëjo. Rueromo jöe aho'obëhe huruoho majahui barë'ajëjo.

<sup>26</sup> Majahui barë'ajëjambu Iesuro uavadeje: Jaehu uvanue aho iae na aviae jevajëjo ja'o jö jövajoho.

<sup>27</sup> Ëhi uavamu gavë'i Iesuare ijorajoho jaburo vuonorö'ö rovarereje. Rue'i gavare Iesuro magonaho'o jöe jövamu gagorovo tiöjëvadeje. Tiöjëvamu röhu aho Iesu bogo uavareje: Ja rabe nagajëjo. O bogo uavareje: Ja rabëni hu'oho jöho jövanuëjo.

<sup>28</sup> Ëhi'amu magonahohuro ri'öromo jovo'e hevöho ë nugoli amëro va'adeje. Va'oromo ae uëvadeje:

<sup>29</sup> Rueromo ae gemu gahëjo. Naehu bövi bise'o ömode jöho huro majehijambu hejë'e jevajëjo. Na ë aho böröme namiromo ajamui'iröhe aho höjo o rahuo höjo.

<sup>30</sup> Ëhi uëvamu amoho vuonugo'i Iesu ga'i örire rueruomadeje.

<sup>31</sup> Ëmagonahohuro ëhi ë'irögoro Iesuare ijorajoho jaburo ioho imë'ëro uavareje: Tisa ie ijëjo.

<sup>32</sup> Ijëjambu Iesuro uëvadeje: Iae nasi ie jiajëjo. Röhu jemë bogo gavarujëjo.

<sup>33</sup> Bogo gavarujëjambu rueho jaburo uarovareje: Na aëro ioho ba ro bojamijare höjo. O dinö'e baejade höjo.

<sup>34</sup> Ëhi uarovamu Iesuro uëvadeje: Ëho na bogo i jöho uë'iro a'i Vavuehu sa'are remö'öromo nimaje jöho naro ejahoromo huhu bojemade muoho vae barëjego ëhuro inö'e da'uegaje höjo.

<sup>35</sup> Jemë'o uehorovohëjo. Jemë atoromo ëhi uvaruje höjo: Manaere ëhi niö'i ëhi niö'i mueberomo iruno'oho mavo'iramu evare gagovo'ëjarëjo.



Röhu aveho hehëjo. I'o mu'oho ruë numë uherihoromo gahëjo. Iruno'oho iae mavo'amë'e höjo gagovo'amo'iröhego. Ëhi uëvade jö hesi bëhoho bogo iruno'o jöho jio'i a'i Samaria raje ae aho'obëhe magonahohuro uëvë'ëro Iesu ga'i örire rueruomade jöhoje.

<sup>36</sup> Röhu uhu jö hesi vituoho majëhiromo uëvadeje: Gagovarue ariböviohuro aviavejö'e jabesi suvuoroho ujuohoromo aribövioho iruno'o va'ëne gagovëvaruëjo jaburo ma-ioro'ioemu maro raromoröhego. Ëhu'ëro iruno'e bamarue ariböviohu'o gagovarue ariböviohu'o ma-gemuoro nimorohoruomo'ajëjo.

<sup>37</sup> Röhu ave jöhu'o atoromo uvarue höjo: A ioro'iorohuro iruno'oho bamego a ioro'iorohuro gagovarue höjo. Ëjöho iae mae höjo.

<sup>38</sup> Naro jemë rëmö'öjode höjo i'u'e mu bogo vaejarijire ë va'oromo magagovo'irarijigo. Hesi a ioro'iorohuro i'u'e muoho ë vaejamu jemëro jabesi mu vituoho baejë'ëro ae ma-gagovëvo'ië'arujëjo nasinö jëvojöro.

<sup>39</sup> Ëhi'amu Samaria sa'a rajo aribövie ë amore raromaruohuro hejare magonahoho uëvamu: Naehu bövi bise'o ömode jöho majehijamu hejë'e jevajë uëvamu hegorovo ae aho'obëhe Iesu mae uehorovareje.

<sup>40</sup> Mae uehorovoromo rueromo Iesu uavareje: Ro nosi amoro no'o hijëjo. Hijëjamu Iesuro va'oromo majae niö'i jabu'o hijadeje.

<sup>41</sup> Hijamu urimo ae aho'o magonaho hesi jöho heromo mae uehorovë'ëro hejare Iesuro jöe majehijamu hegorovo ae gö gö aho'obëhe mae uehorovareje.

<sup>42</sup> Mae uehorovoromo magonahoho uavareje: Urimoho jasi jöho heromo Iesu mae uehorovare höjo. Jaruvoho bogo ëhunioho mae uehorovo'i a'i nosi hia'ëro hejare Iesuro jöe majahuijamu hejë'ëro ëhu'ëro noro mae garomo uvarue höjo: Iae mae-ëjo. Ëaho sa'ae dinö'e dinö'e raromarue aribövioho manö babamavuaje aho höjo.

*Gavamen mu vaejaje a hesi harihu hesi sino Iesuhu ajamamu marëjade jöhoje.*

<sup>43</sup> Ëhi uavamu Iesuro ë amore hiromo majae niö'i barëjamu gagorovo va'adeje. Va'oromo Galilee sa'are ajiomadeje.

<sup>44</sup> Urimë'i Iesuro ae majëhiromo uëvadeje: Jö God-aro baeromo majëhijarue aribövioho ëhi jië'e aribövioho nosi sa'a rajohuro bogo masijoho höromo maho uehorovavuoruomaje höjo.

<sup>45</sup> Röhu va'oromo Galilee sa'are rovamu gagorovo ë sa'a rajohuro hu rajahiruomadeje ë hesi bëhoho mami'e söröho i'i Jerusalem va'oromo gavare Iesuro darugo'e mu masijoho vaejamu gavë'ëro.

<sup>46</sup> Rajahijamu Iesuro Galilee sa'are hiromo röhu maho va'oromo Cana amore höröjadeje. Urimë'i huro ë amore hiromo jovo maho baeromo avohamu wine-rëjadeje. Ëamore röhu maho rovadeje. Röhu gavamen mu vaejaje aëro ë sa'ae gemuore hijë'e jiadeje. Sa'ae gemuore Capernaum amore hi'i hesi harihoho guomo guome baeromo hu'o hijadeje.

<sup>47</sup> Hijamu vavuohuro hejade uvavamu: Iesuro Judea jioromo Galilee ro hijajë uvamu hegorovo ajio Cana höröromo Iesu uavadeje: Nasi harihoho guomeho'ië'ajëjo. Ëhuni na'o ruvebiromo anume Capernaum amoro ajamego mae jio'irajo.

<sup>48</sup> Mae jio'irajamu Iesuro uavadeje: Na jemë nasi darugo'e mu masijoho garomo mae uehorovevo'i ëhuni na bogo maho uehorovevaruje höjo.

<sup>49</sup> Uehorovevaruje höjamu rue vavuohuro uavadeje: Iae ëhi höjo röhu ruvebiromo ajamijëjo. Jue'i guomo'ië'ajëjo.

<sup>50</sup> Guomo'ië'ajëjamu Iesuro uavadeje: Val'ëjo. Jasi harihoho iae i'ovoromo hi'ië'ajëjo. Hi'ië'ajëjamu hegoroovo rue vavuohuro jöho mae uehorovoromo abuejadeje.

<sup>51</sup> Abuejamu gagorovo hesi mu vaejharue ariböviohuro rueromo örire birohoro uavareje: Jasi harihoho iae i'ovoromo hijajëjo.

<sup>52</sup> Hijajëjamu uëvadeje: Maja raburo jue'i i'ovade höjo. I'ovade höjamu uavareje: Nëri jeni'e majae huotorovamu gavë'i evare hesi sino dajo'e vörö'iraejadoho u'uhade höjo.

<sup>53</sup> U'uhade höjamu rue vavuohuro uehorovoromo uvadeje: O majae ëhi gemuoho jiamu gavë'i Iesuro uevade höjo: Jasi harihoho iae i'ovoromo hi'ië'ajëromo hu'o hesi ö mueno'e aho'obëhe jabu'o mae uehorovareje.

<sup>54</sup> Röhu urimë'i Iesuro Judea sa'are jioromo Galilee rueromo evare bëhi'e mu börömo gö vaejadoho avevejö'e jö jövamu a börömo hesi harihu i'ovadoho ëho bëhi'e mu göho jiadeje.

## 5

### *Iesuhu jovo riröre va'oromo a hesi sino ajamamu marëjade jöhoje.*

<sup>1</sup> Èhi'amu Jew rajehu God uehorovoromo sörö ijarue majaho gemu rovadeje. Sörö majaho rovamu Iesuro Jerusalem ajiomadeje.

<sup>2</sup> Röhu Jerusalem amo börömo oje gemu hesi ihoho Sheep Ojohoje. Èjojo hesi bëhire jovo e'ue gemu ruhijë'eje. Èjovo hesi ihoho Hebrew huëhu uvaruoho Bethzatha-je. Röhu ë jovo hesi ruhëhi numëhi ionire ionire ririre javu ëge övo gö mine jio'ame. Javuoho bogo iromë'e ma-döhemu vaeromo ëhi ma-gagemu nugo'amë'eje ë raromonövoröhëni.

<sup>3</sup> Èjavuore guomo guomo'e ae aho'obëhe raromonövareje. Nuni sisë'e hörü sisë'e övo hörü'o tövë'e ëhi jië'e aribövioho ë raromoromo [muebejareje jovoho avadu'avaduvoröhego.

<sup>4</sup> Èhesi bëhoho Badare anerae gemuëro majae gö gö ë jovore abueromo jovoho huotohuotovo'ego avadu'avaduvonövadeje. Avadu'avaduvo'ego guomo guomo'e aribövioho di aho urimo jovore abuejadoho marënovadeje.]

<sup>5</sup> Iae ae gemuëro ë raromadeje. Guomo guomo maminö gö'e baeromo ëhi jiove rovadoho vadune aho'obëhe 38 barëjë'e jiadeje.

<sup>6</sup> Èraromamu Iesuro hu gavadeje. Garomo uvadeje: Èaho guomo guomo baejadoho majae ëgobövie barëjë'e hörömo uavadeje: Na ja marëjavojoëro nagajëjo.

<sup>7</sup> Marëjavojoëro nagajëjamu rue guomo guomo'e ahuro uavadeje: Na aemo'aeme bogojevë'ëro jovo avadu'avaduvë'iroho bogo baejevoromo jovoroho ba'amevarue höjo. O na jovore abue'ië'iroho ae göëro na iosiremiromo urimo abuejaje höjo.

<sup>8</sup> Urimo abuejaje höjamu uavadeje: Ri'ö namiromo raromanue suhoho banigojiomoromo baeromo juvëjo.

<sup>9</sup> Juvëjamu ë aho ma-burëro marëjadeje. Marëjamu hesi suhoho banigojiomoromo baeromo juvo va'adeje.

Èhi ë'adeje röhu ë majaho Jew rajehu mu bogo vae'i nuharue majaho jiadeje.

<sup>10</sup> Nuharue majaho jiamu gagorovo Jew rajo a masijohuro gavare ë ahuro suhoho bava'amu gagorovo uavareje: Jaruvo nosi nuho majae höjo. Èhuni ja suhi baeromo juvanuoho ëho jero nosi jögoroho ahanuëjo.

<sup>11</sup> Ahanuëjamu uëvadeje: Röhu ajemamu marëjevade ahuro uevade höjo: Jasi suhoho banigojiomoromo baeromo juvë uevadohuni ëhuni baeromo juvajëjo.

<sup>12</sup> Baeromo juvajëjamu uavareje: Raro ëhioho uavade höjo.

<sup>13</sup> Ëhi uavamu röhu dadivamu bogo uëvadeje rabëni ae aho'obëhe jovo riröre tagavamu Iesuro ajamiromo va'ë'ëro jië'ëro.

<sup>14</sup> Ëhi ë'ë'ëro Iesuro God-are amo bërömore va'oromo ë aho birohoro uavadeje: Hejëjo. Iae mami'e marëjavë'e jiaje ijoho nadi mu sisëho vaenëjo. Urimo huë vavaene ma-bisemu baejanoho röhu ijonöho bërömo bëhe bae'a'anuëjo.

<sup>15</sup> Ëhi uavamu hegoroovo rue ahuro va'oromo Jew rajo a masijoho uëvadeje: Ajemamu marëjevade aho Iesu höjo.

<sup>16</sup> Iesu hö uëvamu hegoroovo Jew rajo a masijohuro uvareje: Iesuro ë muoho nuho majaro ömade hö uvoromo dë vörönimoromo aevoromo Iesu huë vavaene bojami'i arijareje.

<sup>17</sup> Huë vavaene bojami'i arijamu Iesuro uëvadeje: Nasi Vavuoho bogo nuho'i a'i ma-muemu vaemu vaejogo na'o ëhi ë'aje höjo.

<sup>18</sup> Ëhi uëvamu hegoroovo rue a masijohuro uvareje: Nuho maja hesi jögoroho ahë'e höjo. Röhu göho hu uvajëjo: God nasi Vavu mae höjo. Ëhu'ëro hu uvoromo ë'ajëjo: Na God'o gemuoho jevajëjo. Ëhi uvoromo ëhuni jaburo uehore aho'o ma-gemu baeromo uvareje: Iaho ano'ëjarëjo.

*God-are Harihehu God-are darugo baeromo mu vaejaje jö Iesuhu jövadohoje.*

<sup>19</sup> Ëhi uvamu Iesuro jöe majëhiromo uëvadeje: Ave jöho na jö mae uë'ië'ajëjo. God-are Harihu naehu nasi sivu mu vae'iroadoho bogo eni jevajëjo. A'i Apohu vaejogo gavaje muohemu vaejaje höjo. Apohu vaejajëhi Harihoho naro ëhi gemuoho vaejaje höjo.

<sup>20</sup> Ëhesi bëhoho Aporo Harihoho na uehorovevoromo huhu mu bövi bise'o vaejajoho ëho röjehijaje höjo. Röhu ë mu röjehijajoho u'emu iosiramiromo masijo maho röjehi'a'ajëjo naro vaejogo jemëro garomo tiöromo uvo'irarijogo: Mabëhe ë'ajëjo.

<sup>21</sup> Vavuehu vuovë'e aribövi ajëmijego i'ovaruëhi ëhi Harihoho na'o vuovë'e ae rahu ajëmi'i negë'o ho ajëmego i'ovarue höjo.

<sup>22</sup> Vavuohuro aho bogo mevoromo gëvaje höjo mae o sisë jio'amego a'i mevoromo mae o sisë jëvego gë'irode muoho Vavuohuro Harihu nasi övore bamo barëjë'e höjo naro ë muoho vae'irodego.

<sup>23</sup> Naro vaejogo ae aho'obëhe Vavu rajahijaruëhi Harihoho na'o ëhi rajehiruomoröhego. Ae rahu Harihoho bogo rajehijë'o ho ëhuro Vavue remö'öjadohu'o bogo rajahijarue höjo.

<sup>24</sup> Ave jöho na jö mae uë'ië'ajëjo. Ae rahu nasi jö heromo sa'are remö'öjade aho mae uehorovë'o ho ma-ioro'ioremu mae raromo'iröhe örire jijihoruomaje höjo. Mae raromo'iröhe örire jijihobe va'ojuvo mevoromo gë'irode majaho rue'iramu God-are i'uoho bogo baeruomo'ajëjo vuovo örire jijiharoho mami'e vuonugo'i i'ovo örire jijiharuëro jië'ëro.

<sup>25</sup> Ave jöho na jö mae uë'ië'ajëjo. Majaho rue'a'ajëjo. Röhu mami'e rovanovë'e höjo. Evare majare vuovëvë'e aribövie göëro göëro he'a'aruëjo God-are Harihoho naro uvavo'iramu. Ae rahu Harihu naehu uvamu hejë'o ho vuovo örire jijiharuoho vuonugo'i i'ovo örire jijiharuëjo.

<sup>26</sup> Vavuehu ae uëvego i'ovaruëhi huro na ajëmijë'ëro Harihoho na'o ëhi uëvego i'ovarue höjo.

27 Vavuohuro ëhi ajemiromo röhu jöho bojemijade höjo naro ae mevëvoromo gë'irodego mae o sisë jëvego rabëni na hesi A Maho jevë'ego.

28 Ëjö hejarujoho nadi tiörëjo. Majaho rue'iramu evare ae aho'obëhe hure raromaruohuro heröhe naro uvavo'iramu

29 hegorovo hure jioromo suorovoruomo'ajëjo. Suorovoromo mu ma vaejare ariböviohuro ri'öromo ma-ioro'ioremu maro raromo'irögoro mu sisë vaejare ariböviohuro ri'öromo naro mevëvo gëromo i'ue mana bojëmi'iramu sisëro va'oruomo'ajëjo.

*Rabe rabe garomo heromo ëhuni uvo'ejo: Iesu mae höjo. Ëhesi jöhoje.*

30 Naehu nasi sivu mu vae'irodoho bogo eni jevajëjo. Vavuehu uevego hejajëhi na ëhi mevëvoromo gëvaje höjo ae mae o sisë jëvego. Bogo ëma mevëvo'i a'i mae mevëvoromo gëvaje höjo rabëni hesi bëhoho nasi nimajoho bogo uehorovo'irögoro a'i sa'are na remö'öjade aehu nimajoho uehorovajëro jië'ëro. Iae ëhuni avoho mevëvoromo gëvaje höjo.

31 Naro nasi sivue nasi jöho huruoho majëhijego he'ibejarijëjo nani aëro uvo'ibejarijëjo: Sarere höjo.

32 Röhu bogo nasi sivuoho jövo'i ae gö na ömego gevajohuro jövo ajemiromo uëvaje höjo: Nörö jö mae jövaje höjo. Iae na gavajoho ë aho hu jö maemu jövaje höjo nasi Vavuohuro jië'ëro.

33 Mami'e jemëro jemesi ae rëmö'öjamu John-are örire va'are höjo. Va'oromo hejare höjo huro jö ma hesi jöho mae majëhijamu.

34 Ëhesi bëhoho nasi jöho majëhijade höjo. Na ëhi uëvaje hesi bëhoho bogo aëro nasi jöho ajemiromo majëhijöro nego'ego uëvajëjo. A'i ëhi uëvaje hesi bëhoho jemëro ejehoromo bogo sisëroho va'i maro va'irarijego ëhuni uëvajëjo.

35 Röhu John-ro irehu höduvoromo ajivavuajëhi huro ëhi ajivëvonövade höjo. Ëhi'amu majae ma-bunemu nimarije höjo hesi ajire raromogoro nimoroho'irovo.

36 John-hu nasi jö majëhijamu hejarijoho iae mae höjo röhu ëho majianovo'i Vavuehu bojemego vae'amaje muoho ëho masijoho höjo. Ëho garomo uvo'ibejarijëjo: Iae mae-ëjo. Vavuohuro nörö nugö'öjamu rovë'e höjo.

37 Röhu Vavue na sa'are remö'öjade ahuro hu'o ajemiromo nasi jöho majëhijë'e höjo. Hesi huëho jemë bogo heromo nu ano'ocho bogo gavë'e jëvajëjo.

38 Hesi jöho jemesi dë vövöbajo'erocho bogo'e höjo rabëni huhu remö'öjamu rovode aho na bogo ma uehorovevarujëro jëvë'ëro.

39 Röhu jemëro uehorovoromo uvaruje höjo: God-are surire jö adahë'ocho noehu ma-ioro'ioremu mae raromo'iröhe örocho birocho'ejärëromo ë hesi örocho naho'irögoro surocho adaho avoharuje höjo. Röhu nasi jöho jemëhu adaharuje surire iae ë jajivë'e höjo.

40 Nasi jöe ë surire jajivare höjo röhu jemëhu ë jö eromo nasirire rueromo ëhuro mae raromo'irarijoho bijönimaruje höjo.

41 Ma-aehu nasi iho döre bameho'irarijoho ëho na bogo uehorovoromo jövajëjo.

42 Röhu jemesi dëho iae na gëvajëjo. God-are örirocho jemesi dë vövöbajo'erocho bogo uehorovaruje höjo.

43 Naro nasi Vavu hesi ihore rovode höjo. Röhu jemëro bogo ejeharuje höjo. Ae göehu hesi ëma rovë'ocho ëma ejëho'arujëjo.

<sup>44</sup> Jemë nimarujëjo jemesi ariböviëro jemesi ihoho döro bamëhojëro. A'i God gemu eni jië'e aehu jemesi iho döre bamëhoröhe ë hesi öroho bogo naho gavaruje höjo. Bogo naho gavë'oho jemë diehi'oromo na mae uehorovevorëjo.

<sup>45</sup> Röhu nadi uvorëjo: Nöröro hesi Vavu hesi örire nosi jö sisëho huruoho majahi'ajëjo. Na bogo ëhioho ë'ejëjo. A'iro Moses-ro jemesi jö sisëho huruoho majahi'ajëjo. Jemë uvaruje höjo: Moses-ro ajamui'iramu mae raromo'ejare uvaruje höjo röhu hesi jöho bogo ejaharuje höjo. Ëhuni huro huruoho majahi'ajëjo.

<sup>46</sup> Ëhesi bëhoho jemëro Moses-are jöho ejaho'ibejarijëjo nasi jöhu'o ejeho'ibejarijëjo. Huro nasi jöho jajivë'ego ëhuni uëvajëjo.

<sup>47</sup> Röhu huhu jajivo'amade jö bogo ejaharujoho jemë diehi'oromo nasi jöho ejehorëjo.

## 6

### *Iesuhu ae aho'obëhe 5,000 da'uojëhade jöhoje.*

<sup>1</sup> Ëhi'onugoromo Iesumëro boat-re ajio raromoromo Galilee e'u döre e'u hesi iho göho Tiberias e'u ioni göre ë va'areje.

<sup>2</sup> Va'amu ae aho'obëhe mae Iesuro darugo'e muoho vaeromo guomo guomo'e ae ajëmamu mami'e gavë'ëro Iesu ijore rihomoruomadeje.

<sup>3</sup> Amo Iesuro hesi ijorajo ömo'ömoho söjëvo ujuohoromo dahorure ajiomoromo jabu'o ë hijadeje.

<sup>4</sup> Ëmajaho God-hu Vörö Tugohade Majaho Jew rajo jabesi sörö majaho dunovadeje.

<sup>5</sup> Evare majare Iesuro dahorure hiromo uheriho'i gavadeje ae aho'obëhe ijore rojomoruomamu. Rojomamu gëgorovo Philip uavadeje: No dinö'e ioho imoromo ë aribövioho aho'o da'uojëho'ejarejo.

<sup>6</sup> Hu mami'e gavadeje rabe ë'iröhoho. Röhu huro Philip uavadeje he'i Philip-ro diehi uavego.

<sup>7</sup> Amo ëhi ua gavamu Philip-ro uavadeje: Monie aho'obëhe 200 kina röhu döre gö'o bu'öromomo ie imoromo i'imëmi'ibejarëjo ae aho'o jië'ëro ma-bisemu bisemu ue'ahoruomo'ibejajo.

<sup>8</sup> Ëhi uavamu Iesure ijoraje ae gö hesi ihoho Andrew Simon Peter-are öhuro uavadeje:

<sup>9</sup> Aharihe gemu iae höjo. Hu ie aho'obëhe 5 visue niö'i ëhi jiajëjo. Röhu ja'o uehorovëjo ëho bogo eni höjo ae aho'obëhe jië'ëro.

<sup>10</sup> Ëhi uavamu hegorovo Iesuro hesi aribövioho uëvadeje: Ae aho'obëhe uëvego sa'are raromarëjo. Röhu ë dirö'oho ma-garasiemu jië'e jiadeje. Ëhi'amu ae aho'obëhe 5,000 rabu'e ë raromareje.

<sup>11</sup> Raromamu Iesuro ë aharihehu ujuoho rovade ioho ujuohoromo God mae uaromo raromarue aribövioho i'imëmadeje. Ëhi'oromo visuohu'o ujuohoromo ëhi gemuoho ë'adeje. Ëhi'amu ë ariböviohuro dimino'e i'i nimarëhi ëhi ue'ahareje.

<sup>12</sup> Ue'ahoromo da'uëgamu gagorovo Iesuro hesi ijorajo ömo'ömoho uëvadeje: I vitu vituoho gagovorego bogo mae bogo mu'u'irajo.

<sup>13</sup> Ëhi uëvamu ie aho'obëhe 5 ue'ahare ë hesi vitu vituoho gagovoromo esöe aho'obëhe 12 irijiomomo'amareje.

14 Irijimo'amamu Iesuhu bëhi'e mu börömo vaejadoho ae aho'obëhe garomo uarovareje: No muebejarue höjo jö God-aro baeromo majahuijaje a börömohuro sa'are rueröhego. Èaho jiajèjo.

15 Èhi uvoromo rueromo Iesu ëma guduamoromo ua'irögoro ë'areje: Jero nosi börömoho jionèjo. Èhi ë'ia'amu gëgorovo Iesuro va'adeje. Va'oromo dahorure vuonorö'ö ajiomoromo hesi sivue hijadeje.

*Iesuhu e'u döre hörehu va'ade jöhoje.*

16 Majae beva'ia'amu Iesuaru ijorajo ömo'ömohuro e'u riröre abuejareje.

17 Abueromo boat-re ajio raromoromo Capernaum amore va'i jovo döre va'areje. Va'amu vahiromëvadeje. Röhu Iesu evaroho jabetesiroho bogo rovë'e jiadeje.

18 Bogo rovamu gavareje buru börömoho rue'ego jovoho hasajamu.

19 Jovoho hasajamu jovo döre huo'öbe va'aroho 5 o 6 kilometre ëmino'e va'aroho va'ihö gavare Iesuro jovo döre juvobe jabesi bëhire rovamu gagorovo juhuonivareje.

20 Juhuonivamu uëvadeje: Na jevajèjo. Nadi juhuonivohèjo.

21 Nadi juhuonivohëjamu hegorovo jaburo nimareje Iesuro boat gagore rojomöjoro. Èhi'oromo dinö'e va'i nimarire ë ma-burëro va'areje.

*Ae aho'obëhe Iesu biroho'i nahoruomade jöhoje.*

22 Iesu'o hesi ijorajo ömo'ömohu'o ëhi jovo ioni gönö va'i a'i i'o visu'o ue'ahare aribövie aho'obëhe mae jovo ioni gönö ëhi raromareje. Raromë'ëro nërö gavareje Iesu bogojiamu. Bogojiamu uvoruomadeje: Nëröho boat gemuëro ave jovo riröroho nami'i boat gö gö bogojiohijajo. Röhu Iesu ë boat-roho bogo va'i hesi ijorajohuremu va'oruomade höjo.

23 Èhi uvoromo gavareje boat gö gö Tiberias amore jioromo rueromo Bada Iesuhu Vavu mae uavamu i ue'aharinö ë ro riravamu.

24 Boat gö gö ro riravamu gagorovo gavare Iesu'o hesi ijorajo ömo'ömohu'o bogojëvamu gëgorovo arue boat göre göre iojiomoromo Iesu naho'irögoro Capernaum amore va'oruomadeje.

*Iesu i va'ëne jië'ëro i'ovavuo'iröhe jö Iesuhu jövadohoje.*

25 Va'aroho jovo ioni gönö va'o baboro beromo Iesu birohuruomadeje. Birohoromo uaruomadeje: Tisa ja divare aveho rovane höjo.

26 Divare aveho rovane höjamu hegoro uëvadeje: Ave jöho na jö mae uë'ië'ajèjo. Jemëhu na nahevaruje hesi bëhoho jemë bogo uehorovoromo uvarije höjo: Nöröro bëhi'e mu masijoho röjahuijè'e hö uvoromo ëhuniöho nahevo'i a'i jemë ie aho'obëhe ue'ahamu da'uëgadohuni ëhuni nahevarujèjo.

27 Röhu muduroho'iröhe iëniöho nadi muoho vae'i a'i jiemu jioröhe iohuremu uehorovoromo muoho vaerego ëhuro ma-ioro'iohemu maro raromo'irarije höjo. Èioho God-are A Maho naru suvuorëmi'ejöjo rabëni God Vavuohuro a nuniro uevë'ego: Jasi muoho mae höjo.

28 Èhi uëvamu uaruomadeje: Èhi jië'oho no diehi jië'e muoho vaeromo ëhuro God-hu nimaje muoho vae'amo'ejarejo.

29 Vae'ejarejamu uëvadeje: God-hu nimaje mu vae'irarijoho aviëhi höjo huhu sa'are remö'öjade aho na jemëhu mae uehorovevo'irarijoho. Iae ëhi ë'orèjo.

30 Èhi ë'orëjamu uaruomadeje: Röhu ja'o ja mu rabe vaenèjo. Diehi jië'e darugo'e muoho ömo'iramu no garomo mae uehorovo'ejarejo

<sup>31</sup> Iae urimë'i nosi hijo miono'ohuro darugo'e muoho iae gavare höjo. A rumo'e sa'are raromo jijiharevare evare bogo ijarue i mabëhi hesi ihe manna ue'ahoruomade höjo. God-are surire uvë'e höjo: Ö'idöre jioromo ruvebijade ioho huro i'imëmade höjo jaburo ue'ahoröhego.

<sup>32</sup> Èhi uavamu Iesuro uëvadeje: Iae jemë uevarujëjo: Ö'idöre jioromo ruvebijade ioho Moses-ro nosi hijo miono'oho i'imëmade höjo ue'ahoröhego. Röhu aveho na jö mae uëvajëjo. Èjö hesi bëhoho avoho uehorovoromo uvorëjo: Bogo Moses-hu mami'e bojëmade jöho jio'i a'i nöruare Vavuehu avevejö'e ö'idöre i ma bojamuijaje jöho höjo.

<sup>33</sup> God-hu bojëmaje iohuro ö'idöre jioromo ruvebiromo birire bojëmego sa'ae dinö'e dinö'e i'ovoromo maro raromarue höjo.

<sup>34</sup> Maro raromarue höjamu uvareje: I ma hesi jöho jövajëromo uavareje: No naguajëjo jero majae èhi è ioho bojamuinövo'iranego.

<sup>35</sup> Èhi uavamu uëvadeje: Röhu è i hesi bëhoho na i'ovëvajoho jevajëjo. Ae rahu nasinö rovë'oho ijoho bogo hömo'ajëjo. Mae uehorovevë'oho ijoho bogo huëho giriho'a'ajëjo.

<sup>36</sup> Röhu na mami'e uëvode höjo: Jemë na gevë'e jëvajëjo röhu bogo ma uehorovevaruje höjo.

<sup>37</sup> Nasi Vavuehu ae rahu bojemijë'oho è ariböviohuro nasi örire rueruomaje höjo. Ae rahu nasi örire rovë'oho na bogo mae bogo uë'ejöjo: Rori'ö va'ohëjo

<sup>38</sup> rabëni naehu ö'idöre jioromo ruvebijode hesi bëhoho bogo nasi nimaje muoho ömo'i a'i sa'are na remö'öjade aehu nimajohemu ömo'irodëni rovë'lëro.

<sup>39</sup> Hu nimajëjo huhu bojemade aribövioho na bogo ae gemu vadu'oho boremi'ö'i a'i muebejëvojuvo ijo tugoho'i majare naro ajëmego vuovoromo ri'öruomoröhego.

<sup>40</sup> Nasi Vavuohuro aveho nimaje höjo ae rahu Harihu na geromo mae uehorovevë'oho ma-ioro'ioremu maro raromoruomoröhego. Èaribövioho ijo tugoho'i majare naro i'ovëvo'iramu jabumë ri'öromo raromo'aruëjo.

<sup>41</sup> Röhu Iesuhu ö'idöre jioromo inö'e rueromo a i'ovëvaje jöho èhi majëhijamu hegorovo Jew rajo ariböviohuro dë vörönëgamu jöe sisë'i atoruumadeje.

<sup>42</sup> Jöe sisë'i atoromo uarovareje: Ave iaho Joseph-are harihe höjo. Hesi vëmu vavu'oho iae no gëvarue höjo. Röhu hu rabëni uvajëjo: Na ö'idöre jioromo ruvebijë'e jevajëjo.

<sup>43</sup> Èhi uarovamu uëvadeje: Nadi nasi jöho sisë'ioho atohëjo.

<sup>44</sup> Aho bogo jabesi ëma rueromo na'oho raromo'i a'i nasi Vavue sa'are remö'öjadohuro rinëgamu ehuro nasirire rueruomë'oho eni jëvaje höjo. A ioro'ioroho bogajo. Rovë'oho naro ijo tugoho'i majare i'ovëvo'iramu vuovoromo ri'öruomo'ajëjo.

<sup>45</sup> Mami'e jö God-aro baeromo majëhinövare ariböviohuro jajivoromo uvare höjo: God-ro ae aho'obëhe røjëhi'iramu hesi jöho heruomo'ajëjo. Èhi jajivë'e höjo. Röhu Vavuehu hesi jö røjëhijamu ae rahu heromo ejahë'oho nasi örire rueruomaje höjo.

<sup>46</sup> Èhi höjo röhu aho Vavuoho bogo gavë'e höjo. God-arire jioromo ruvebijode aho naremuëremu Vavuoho gavë'e jevajëjo.

<sup>47</sup> Ave jöho na jö mae uë'ië'ajëjo. Ae rahu mae uehorovevë'oho mami'e aevë'lëro ma-ioro'ioremu maro raromaruje höjo.

<sup>48</sup> A i'ovëvaje ioho na jevajëjo.

<sup>49</sup> Jemesi hijo miono'ohuro a rumo'e sa'are raromo jijihoromo bogo ijarue i mabëhi hesi ihe manna inövare höjo. Inövare höjo röhu vuovëvade höjo.

<sup>50</sup> A'i ö'idöre jioromo ruvebijaje ioho ae rahu ijë'oho ëhuro bogo vuovëvo'ajëjo.

<sup>51</sup> Ö'idöre jioromo ruvebijë'ëro a i'ovëvaje ioho na jevajëjo. Ae rahu ë i ijë'oho ma-ioro'ioremu maro raromo'arujëjo. Naehu bojëmi'irode ioho ëho nasi sine höjo. Ëhesi bëhoho nasi sinoho bojamirovo'ejöjo sa'ae aho'obëhe vuovëvadoho i'ovoromo mae raromo'irarijego.

<sup>52</sup> Ëhi majëhijamu hegorovo Jew rajohuro dë vörönëgamu jö aho'ahamirovoromo uarovareje: Ëaho diehi hesi sinoho bojamui'iramu i'ëjarëjo.

<sup>53</sup> I'ëjarëjamu uëvadeje: Ave jöho na jö mae uë'ië'ajëjo. God-are A Ma nasi sinohu'o köhu'o bogo ijë'oho darugoho bogo bae'i vuovëvo'ajëjo.

<sup>54</sup> Ae rahu nasi sino kö ijë'oho ma-ioro'ioremu maro raromarue höjo. Raromojuvo ijo tugoho'i majare i'ovëvo'iramu ri'ö'a'aruëjo.

<sup>55</sup> Ëhesi bëhoho nasi sinoho iae i mae jio'i nasi köho iae jovo mae jië'ëro ëhu'ëro ijë'oho mae raromo'aruëjo.

<sup>56</sup> Ae rahu nasi sinohu'o köhu'o ijë'oho na'o gemu mae jio'i na jabu'o gemu mae jevaje höjo.

<sup>57</sup> Vavue daruge eni jië'ëro hijajohuro na sa'are remö'öjade höjo. Remö'öjë'ëro darugoho bojëmijego na hijaje höjo. Naehu hesi darugo baeromo hijajëhi ae rahu na ijevë'oho nasi darugoho ëhi baeromo raromo'aruëjo.

<sup>58</sup> Ëhu'ëro jië'ëro ö'idöre jioromo ruvebijade i hesi jöho na majëhijë'e jevajëjo. Jemesi hijo miono'e jabesi i mabëhe ue'ahare höjo röhu vuovëvade höjo. O naehu uëvaje ioho bogo ëhioho jio'i ae rahu ijë'oho bogo vuovëvo'i ma-ioro'ioremu maro raromo'aruëjo. Ahia mino'ëjo.

<sup>59</sup> Iesuhu Capernaum hiromu God rajahijarue osare jö röjëhijadevare evare hu ë jöho majëhijadeje.

*Iesuhu jövaje jö baejë'oho ëho darugo baejarue ë hesi jöhoje.*

<sup>60</sup> Ëhi majëhijamu hegorovo Iesuarue ijore ijore jijiharue a ioro'ioroho ae aho'obëhe uarovareje: Ëhi jië'e jöho i'u ma'e höjo. Nomë diehi'oromo bae'ëjarëjo.

<sup>61</sup> Bae'ëjarëjamu Iesuro hesi simanore garomo uvadeje: Nasi ijore ijore jijiharue ariböviohuro nasi jöho bijönimoromo sisë'i ataruëromu uëvadeje: Naehu ö'idöre jioromo ruvebijode jö hejarijoho jemë diehi uehorovarujëjo. Na jemë nëgajëjo na'o jijiharujoho vuonugo'i.

<sup>62</sup> Röhu jemë gevë'oho God-are A Ma naehu urimo hijodire sionëro ajiomamu gevë'oho jemë diehi uehorovorëjo.

<sup>63</sup> Hesi God-are Aru'ahohuro darugoho bojëmi'iramu i'ovoromo mae raromo'arujëjo. Jemesi sino hesi biriroho baeromo arijo'arije ajamirovo'ië'iroho bogo eni jëvo'ajëjo. Röhu naehu jövaje jö ejahë'ohuro ëhuro Aru'aho daruge baeromo i'ovoromo mae raromo'arujëjo.

<sup>64</sup> Röhu a ioro'ioroho jemëro bogo ma uehorovevaruje höjo. Ëhi uëvade hesi bëhoho mami'e huhu urimo ijorajo gagovëvade majare aevoromo gëromu uvobe rovadeje: Ëaribövioho bogo ma uehorovevo'iröhoho höjo. O ë aho a hiruëmiromu na baejevoromo jabesi övore bojëmi'iröhoho höjo. Ëhi gëromu uvobe rovë'ëro ëhu'ëro uëvadeje: A ioro'ioroho jemëro bogo ma uehorovevaruje höjo.



<sup>65</sup> Röhu hesi jö viture uëvadeje: A ioro'ioroho jemëro bogo ma uehorovevaruje höjo. Ëhuni uëvode höjo: Aho nasi öriroho bogo ëma rueruomaje höjo bogo eni jëvë'ëro. Ma-Vavuehu uëv'ohuremu rueruomaje höjo.

<sup>66</sup> Ëhi uëvamu hegoroovo Iesuare ijore ijore jijiharue aribövi ioro'ioroho ae aho'obëhe hu nugo va'oruomadeje ijönöho hu'oho bogo gemuoroho jijihoruomoröhëni.

<sup>67</sup> Va'amu gëgorovo Iesuro gëvade hesi ijoraje 12-ho ëhi raromamu gëgorovo uëvadeje: Röhu jemëjo. Na jemë'o na remo va'orëjo.

<sup>68</sup> Remo va'orëjamu Simon Peter-ro uavadeje: Bada no rahuare örire va'ojörajo. Jero jöho jövego ëhuro no darugoho baeromo ma-ioro'ioemu maro raromarue höjo.

<sup>69</sup> Iae no garomo mae uehorovoromo uvarue höjo: God-hu baejavade A Mahuremu ja javajëjo.

<sup>70</sup> Ja javajëjamu Iesuro uëvadeje: Jemë'o uehorovohëjo. Naro jemë ae aho'obëhe 12 baejëvode höjo. Röhu jemesirire ae gemu hu Satan höjo.

<sup>71</sup> Ëhi uëvadeje. Röhu Satan hö uëvade hesi bëhoho Judas Simon Iscariot-are harihu hesi jöho uëromo ë'adeje. Iesuare ijoraje aho'obëhe 12 jio'amajoho Judas hu'o ë ae gemuoho jiadeje. Röhu huro ijönö ae hiruëmiromo Iesu jabesi övore bojëmadeje. Iae ëhuni Iesuro Satan hö uëvadeje.

## 7

### *Iesuare ö ma jabuhu hesi örire bogo ma uehorovare jöhoje.*

<sup>1</sup> Ëhi'amu Iesuro garomo uvadeje: Jew rajohuro anego'i nimiruëromo Judea sa'aroho bogo hi'i Galilee sa'aremu hibe juvadeje.

<sup>2</sup> Galilee sa'are hibe juvamu Jew rajo jabesi sörö maja börömoho duno-vadeje. Sörö hesi ihoho Amo Harihu Ma-Jahuri Vae'amë'e Söröhoje.

<sup>3</sup> Ësörö majaho dunovamu Iesuare ö maho jaburo ri'öromo Iesu uavareje: Ave amoho nugo'i Judea sa'ahuro va'oromo jasi mu masijoho röjëhijego jasi ijore ijore jijiharue aribövioho jaburo garuomoi'irajo.

<sup>4</sup> Ae aho'obëhe jabuhu nosi iho hejoro noehu nimë'oho bogo gurihiroho muoho vaejarue höjo. Ëhuni ja mu masije vaejanue javaje jero va'oromo ma-va'orahoro muoho vaenego ae aho'obëhe garuomoi'irajo.

<sup>5</sup> Ëhi uavare hesi bëhoho jabumë Iesuare ö ömo'öme jëvadeje röhu hesi öriroho bogo ma uehorovë'ëro ëhuni ëhi uavareje.

<sup>6</sup> Ëhi uavamu uëvadeje: Nasi majaho bogo rovë'e höjo ijönö rue'iröhëro. Jemëhu söröro va'irarije majaho majae aho'obëhe höjo.

<sup>7</sup> Sa'are mu sisëmu uehorovoruomaje aribövioho jemesi öriroho bogo nu huodëgo varijënoho höjo bëhe bogojio'ego. A'i nasi örire iae nue huodegarue höjo. Rabëni hesi bëhoho naro majëhiromo uëvaje höjo: Jemë mu sisë vaejaruje hö uëvego ëhuni nue huodegarue höjo.

<sup>8</sup> Jemesi iojiomoromo maja börömoho vaerëjo. Nasi majaho bogo rovë'ego söröroho bogo ajiomoi'ejöjo.

<sup>9</sup> Ëhi uënugoromo Galilee sa'are ëhi hijadeje.

### *Iesuhu Jerusalem ajiomoromo Amo Harihu Ma-Jahuri Vae'amë'e Sörö garomo jö röjëhijade jöhoje.*

<sup>10</sup> Hijamu hesi ö ömo'ömhuro iojiomareje maja börömoho vaeröhëro. Iojiomamu evare Iesuro hu'o ajiomadeje. Bogo va'orahoroho ajiomoi' ma-saginiëri ajiomadeje.

11 Saginiëri ajiomamu Jew rajo a masijohuro sörö ririre Iesu nahoromo uvoruomadeje: Ëaho dinö'e höjo.

12 Ëhi atoromo ae aho'obëhe gemuore gagovë'ëro göëro göho saginiëri majahirovoromo Iesuare jöho uarovareje. Uarovoromo a ioro'iorohuro uvareje: Ëaho a mae höjo. A ioro'iorohuro uvareje: Bogajo. Huro ae aho'obëhe sareramuijaje höjo.

13 Ëhi atoromo Jew a masijoho juhuonëmiromo aho bogo va'orahoroho Iesuare jöho ato'i ma-saginiëri atoruomadeje.

14 Ëhi'amu Iesuro sörö maja hesi ririre God-are amo börömore ajiomoromo ae jöe majëhijadeje.

15 Jöe majëhijamu hegorovo Jew rajohuro tiöromo uvareje: Ae gö hu bogo röjahijë'e höjo. Ëhi jië'o'ho hu diehi'oromo nuni aji'e jioromo jöho majahuijajëjo.

16 Jöho majahuijajëjamu Iesuro uëvadeje: Naehu röjëhaje jöho bogo naehu uehorovoromo röjëhi'i sa'are na remö'öjade ahuro bojëmijë'ëro röjëhijaje höjo.

17 Ae rahu God-hu nimaje mu vae'i nimë'o'ho ë ariböviohuro garomo uvoruomajëjo: Nörö bogo hesi simanëremuoho jöho ëma röjahui'i a'i God-ro jöho bojämijego röjahuijaje höjo.

18 Ae rahu jabesi simanëremu jö majëhijë'o'ho jö majëhijarue hesi bëhoho jaburo nimoruomaje höjo jabesi ihoho döro jiojöro. O noehu naguë'o'ho ramuö'öjamu rovare a hesi iho döro jiojöro naguë'o'ho ëhi javuë'e aribövioho sareroho bogojavuo'i ma-maemu javuajaje höjo.

19 Jemë'o uehorovohëjo Moses-ro God-are jögoroho jemë bojëmijade höjo. Röhu jemë bogo ae gemu vadu'o'ho jögoroho ejaharuje höjo. Jemë rabëni ë jöho ahoromo anego'iro ë'arujëjo.

20 Ëhi uëvamu ae aho'obëhe uaruomadeje: Sarerivanuëjo. Sisëhuro baejavë'ëro simane sisërëromo jövanuëjo. Raro ja anago'ië'lego uvanuëjo.

21 Uvanuëjamu Iesuro uëvadeje: Naro mue gemu vaejamu jemë ae aho'obëhe tiöromo uehore gö gö baejë'e jëvajëjo.

22 Röhu Moses-ro aharihu jabesi sino tarivëho'irarije muoho bojëmijade höjo. Bogo huro aevoromo bojëmi'i a'i urimore jemesi a mamiohuro aevoromo bojëmijare höjo. Bojëmijë'ëro ëhu'ëro jemëro nuho majaro mue vaeromo aharihu jabesi sinoho tarivëharuje höjo.

23 Nuho majaro jemëro a sino tarivëharuje muoho vaejaruje höjo Moses-are jögoroho ahojöëni. A'i nuho majare naro a hesi sinoho avohahamu marë barëjade höjo. Ëhi jië'o'ho röhu jemë rabëni uvarujëjo: Nöröro nuho maja hesi jögoroho ahade höromo nasi öriroho dëho vörönimarujëjo.

24 Ëhi'oromo jemë nasi muoho ma-döemu garomo mevoromo nasi öriroho dëho vörönëgajëjo. Nadi ëhiho ë'i nasi mu öroho ma-avoho garomo mevorëjo.

*Ariböviohuro uarovareje: Na böröme namiromo ajamui'iröhe aho Iesu höjo o bogajo. Ëhi uarovare jöhoje.*

25 Ëhi uëvamu gagorovo Jerusalem amo rajo a ioro'iorohuro uarovareje: Ëaho nosi a masijehu ano'ië'arue aho höjo. Na mae-ëjo.

26 Röhu gahëjo. Hu a nunire jöe jövajëjo röhu nosi a masijohuro hesi öriroho jöho bogo ua'i ma-nunëremu gavaruëjo. Na jabumë garomo uvaruëjo: Ëaho böröme namiromo ajamui'iröhe aho höromo ëhiho ë'aruëjo.

27 Röhu böröme namiromo ajamui'iröhe aehu rovë'iroho hu di amore jioromo rueröhoho no dadivavuo'ajëjo. A'i ë aho di amore jioromo rovadoho iae no gavaruëjo. Ëhuni hu bogo ë aho höjo.

28 Ëhi atamu Iesuro hejadeje. Heromo God-are amo börömore hiromo jöho majëhiromo ma-darugo'o uvadeje: Jemëro uvarujëjo: Noro nörö iae mae gavaruëjo. Di amore jioromo rovadoho ëhu'o gavaruëjo. Röhu jemë bogo avoho gevaruje höjo. Na bogo nasi ëma rue'i Vavuohuro remö'öjamu rovode höjo. Ëaho hu mae höjo. Röhu jemë hu bogo gavaruje höjo.

29 Naro hu gavaje höjo naro hu'o jiamu huro na remö'öjamu rovë'ëro jevë'ëro.

30 Ëhi uëvamu hegorovo guduamo'ie'oromo hesi majaho bogo rovë'e jiamu vuonugareje.

31 Vuonugamu a ioro'ioroho aho'obëhe Iesu mae uehorovareje. Mae uehorovoromo uarovareje: Böröme namiromo ajamui'iröhe aehu rovë'iroho na huro ave aho iosiramiro mo bëhi'e mu masijoho vae'a'ajëjo. Bogajo. Ëhuni nani hu ë rueröhe a börömoho höjo.

*Iesu guduamo'iröhego atovarue aribövi rëmö'öjamu rueruomade jöhoje.*

32 Jö ëhi vaerovobe rovaruoho Pharisee ariböviohuro hejareje. Heromo jabu'o priest masijohu'o ëho jaburo jabuni atovarue aribövi ioro'ioroho rëmö'öjareje va'oromo Iesu guduamo barueröhego.

33 Ëhi'amu Iesuro ae uëvadeje: Majae ma-bunemu jemë'o hiromo remö'öjamu rovode a hesirire vuonorö'ö va'ejöjo.

34 Va'iramu jemëro na nahevoromo bogo birohevo'arujëjo. Naehu hi'irodire jemëhu ë ö'irarijoho bogo eni jëvo'ajëjo.

35 Ö'irarijoho bogo eni jëvo'ajë uëvamu Jew rajo a masijohuro uarovareje: Ëaho dinö'e va'ego no bogo biroho'iröhego uövuajëjo. Na hu Jew rajehu sa'a göre va'o raromaruire ë va'oromo God rumo'e aribövioho jöe röjëhi'iröhëni uvajëjo o dinö'e va'i uvajëjo.

36 Hu uvajëjo: Jemë na nahevoromo bogo birohevo'arujëjo. O naehu hi'irodire jemëhu ö'irarijoho jemë bogo eni jëvo'ajëjo. Ëhi jië'e jöho hu diehi jövoromo ë'ajëjo.

*A i'ovëvaje jovo hesi jö Iesuhu jövadohoje.*

37 Ëhi'amu sörö maja böröme jiobe ruejuvo ijo tugoho'i maja börömo maho rovadeje. Rovamu evare Iesuro döre ri'ö namiromo ma-darugo'o uvadeje: Jovo ue'aho'i nëgë'iroho nasi öroro rueromo irëjo.

38 Ae rahu na mae uehorovevë'oho God-are surire jö jajivoromo uvarëhi ëhi jëvo'ajëjo. Ëhesi bëhoho ae rahu mae uehorovevë'oho a i'ovëvaje jovohuro jemesi dë vövöbajo'ere jioromo rojomoromo suorovo va'iramu aho i'ovëvo'ajëjo.

39 Ëjovo jö hesi bëhoho God-are Aru'aho hesi jöho jövoromo ë'adeje Iesu mae uehorovarue ariböviohuro ijönö ëho bae'iröhego. Iesuhu ëhi jövade majaroho Aru'ahoho bogo sa'aroho nugö'öjë'e jiadeje ë hesi bëhoho Iesu ö'idöroho bogo ajiomoromo ajoho baejë'ëro.

*Iesuarë jö ae göehu gö uehorovo'i ae göehu gö uehorovare jöhoje.*

40 Ëhi jövamu hegorovo a ioro'ioroho ae aho'obëhe uvareje: Ëaho iae jö God-aro baeromo majahuijaje a börömoho rueröhego muebejaruoho höjo.

41 A ioro'iorohuro uvareje: Ëaho böröme namiromo ajamui'iröhe aho höjo. A ioro'iorohuro uvareje: Hu bogo ë aho höjo. Hu Galilee rajo ae höjo.

Röhu böröme namiromo ajamui'iröhe aho bogo Galilee sa'aroho jioromo rue'a'ajëjo.

<sup>42</sup> A'i God-are surire jajivoromo uv'e höjo: Böröme namiromo ajamui'iröhe aho David-are ujoho jië'ëro David-hu hijade ame Bethlehem ë raho'a'ajëjo. A'i Iesu Galilee rajëro jië'ëro ëhu'ëro hu bogo ë uehorovarue a börömo höjo.

<sup>43</sup> Ëhi atoromo ae aho'obëhe Iesuare jöho jöe gö gö uehorovareje.

<sup>44</sup> A ioro'iorohuro Iesu guduamo'i nimareje. Röhu aho hesi sinoroho övoho bogo bamareje.

*Jew rajo a masijehu Iesu bogo ma uehorovare jöhoje.*

<sup>45</sup> Ëhi'amu Pharisee ömo'ömohuni priest masijohuni atovarue ariböviohuro mami'e Iesu guduamo barue'i va'ë'ëro övemu vuonorö'ö rovamü gëgorovo jabesi masijohuro uëvareje: Jemë rabëni hu bogo guduamo barovarije höjo.

<sup>46</sup> Barovarije höjamu uëvareje: Urimë'i aehu bogo ëhi jië'e jö ma jövamu hejaroho ë iahuro jö maho jövamu hegoro ëhuni vuonugare höjo.

<sup>47</sup> Vuonugare höjamu Pharisee ariböviohuro uëvareje: Na hu jemë'o sarerëmiromo jaguvëvade höjo.

<sup>48</sup> Jemë gavarujoho di a masijohuro o di Pharisee ahuro hesi öriroho maho uehorovë'e javuajëjo. Bogo'e höjo.

<sup>49</sup> Hesi ma-raromo jijihole vaejarue ariböviohuremu Iesu mae uehorovarue höjo. Jabumë Moses-are jögoroho bogo hejaruëro jië'ëro ëhu'ëro God-are i'uoho baeruomo hesi höjo.

<sup>50</sup> Pharisee ömo'ömohuro ëhi uënugoromo jabesi ae gemu Nicodemus-ro mami'e Iesu ga'i va'adohuro ri'öromo uëvadeje:

<sup>51</sup> Ejöho bogo maehu höjo. No aho bogo ëma uavarue höjo: Sisëro va'ëjo. Nosi jögoroho bogo ëhioho höjo. Urimo huro hesi jö'ëro jöho jövego heromo huhu rabe rabe ë'adoho heromo evare uavarue höjo: Ja i'ue baejë'e javajëjo.

<sup>52-53</sup> Ëhi uëvamü sivoromo uavareje: Sareri ae javajëjo. Na ja Iesuare sa'ae gemuoho Galilee rajëro javë'ëro ëhuni ja hesi öroho avohanuëjo. Röhu ja'o God-are surire jöho avoho adahoromo ganëjo jö God-aro baeromo majahuijarue aehu Galilee sa'are jioromo rueröhe jöho bogojiajoho.

## 8

*Magonahehu a goho'amamu garomo Iesuare nunire barovare jöhoje.*

<sup>1</sup> [Ëhi'amu ae gemu gemu jabesi osaëro osaëro va'irögoro Iesuro aruhe Olives Dahorure ajiomadeje.

<sup>2</sup> Ajiomoromo niavë'ëro sue'ö ri'öromo God-are amo börömore vuonorö'ö rovadeje. Rueromo gavade ae aho'obëhe hesi bëhire rueruomamu gëgorovo sa'aro hiromo aevoromo jöho röjëhijadeje.

<sup>3</sup> Jöho röjëhijamu gagorovo Moses-are jögoru öri röjëhijarue ariböviohu'ö Pharisee ömo'ömohu'ö ëho jaburo masuvë'e magonahe gemu hu'irae baeromo rovareje mami'e ë magonahohuro ae gö'ö niavamü aëro garomo guduamë'ëro. Hu'irae barueromo ae aho'obëhe jabesi nunire nugareje.

<sup>4</sup> Nunire nugoromo Iesu uavareje: Tisa ave magonahohuro ae gö'ö niavamü aëro gavare höjo.

<sup>5</sup> Röhu mami'e Moses-ro jögoroho jajivoromo uövuade höjo ëhi jië'e magonahoho munëro vajami'iröhego. Röhu ja diehi uehorovanuëjo.

<sup>6</sup> Ĕhi uavare hesi bēhoho jabumē nimareje Iesuro jōe sisē'i jōvego jōho jaburo court-re huruoho majēhi'irōhēro. Ĕhuni Ĕhi uavareje. Ĕhi uavamu hegorovo Iesuro jōho bogo uēv'e ma-uruho'amoromo ōvo namēro sa'are jajivadeje.

<sup>7</sup> Sa'are jajivamu jō ua ga'i arijaroho bogo mana uēv'e ma-sa'are jajivojuvo hujeji ijonō ririrohoromo uēvadeje: Jemē di aharo sisē rumo'le javego aevoromo munēro vajamijējo.

<sup>8</sup> Munēro vajamijēromo rōhu maho uruho'amoromo sa'are jajivadeje.

<sup>9</sup> Sa'are jajivamu huhu jōvade jōho heromo ē aribōviahuro va'oruomadeje. Ama'i mavojoho jaburo aevoromo huruomoromo gemu gemu ri'ō va'ojuvo ijore a i'oho va'amu barējadeje. Barējamu Iesu hesi sivue jio'i magonahoho hesi nunire ē namijē'le jiadeje.

<sup>10</sup> Namijē'le jiamu Iesuro ririrohoromo magonahoho uavadeje: Ma'ino aribōvioho dinō'le jioruomajējo. Na jasi sisē mevoromo i'u bojami'irōhe aho bogohōjo.

<sup>11</sup> Uavadeje: Bada ae bogohōjo. Ĕhi uavamu uavadeje: Ĕhi jiē'oho na'o jasi jō sisēho bogo jōvoromo i'uoho bojami'ejōjo. Va'oromo nadi ijoho Ĕhi jiē'le muoho vaenējo.]

*Iesuhu sa'ae aho'obēhe ajivavuaje jō huhu jōvadohoje.*

<sup>12</sup> Ĕhi'ē'ēro Iesuro rōhu maho jōe majēhiromo uēvadeje: Na ajoho jevē'ēro sa'ae dinō'le dinō'le ajivēvaje hōjo. Ae rahu nasi ijore ijore jijihē'iroho bogo mae bogo ramoramoroho jijihō'i ajoho baeromo maro raromo'aruējo.

<sup>13</sup> Maro raromo'aruējamu Pharisee ōmo'ōmohuro uavareje: Rōhu jero jasi sivue jasi jōho majahuiromo uōvuānuējo: Nasi jōho mae hōjo. Ĕhi jiē'oho no jasi jōho diehi maho uehorovo'ejarejo. Ōre bogohōjo.

<sup>14</sup> Ōre bogohōjamu uēvadeje: Iae mae-ējo. Iae na nasi sivue jōho majēhijajējo. Rōhu nasi jōho iae mae hōjo. Rabēni hesi bēhoho na dinō'le jioromo rovodoho o dinō'le va'irodoho naro gavaje hōjo. Jemē ēho bogo gavaruje hōjo.

<sup>15</sup> Jemēro ma-sa'a hesi uehore baeromo ae magonahe sisēro bahijaruje hōjo. Na bogo aho sisēroho bahijaje hōjo.

<sup>16</sup> Rōhu na sisēro bahi'i uehorovo'ibejōjo sareri'le jōho bogo uehorovo'i ma-mae ē'ibejōjo. Rabēni hesi bēhoho na bogo nasi sivuoho mevoromo jōho jōvo'i na'o Vavue remō'ōjadohu'o noro niō'iro mevoromo jōho majēhijaruje hōjo.

<sup>17</sup> Ĕhesi jōho jemesi jōgoru surire ave jōho jajivoromo uvē'le hōjo: Ae niō'iehu mu garomo ajamirovoromo jōe gemuoho majēhijamu gavē'oho uvorējo: Jabesi jōho iae mae hōjo. Ĕhi jajivē'le hōjo.

<sup>18</sup> Naro nasi jōho majēhijego nasi Vavue sa'are remō'ōjadohuro hu'o nasi jōe gemuoho majēhijaje hōjo. Ĕhuni nasi jōho iae mae hōjo.

<sup>19</sup> Mae hōjamu uavareje: Rōhu jasi Vavuoho dinō'le hōjo. Dinō'le hōjamu Iesuro uēvadeje: Jemē na'o nasi Vavuohu'o bogo gōvuaruje hōjo. Jemē na ge'ibejarijējo nasi Vavuohu'o ga'ibejarijējo.

<sup>20</sup> Iesuro God-are amo bōrōmore hiromo God-ni suvuro bahijaruje osare jō rōjēhijadevare evare ē jōho majēhijadeje. Majēhijamu aho hu bogo guduamo bava'areje hesi majaho bogo rovē'ēro jiē'ēro.

*Iesuro uēvadeje: Naehu va'tirodire jemē'o ē ō'irarijoho bogo eni jēvājējo. Ĕhesi jōhoje.*

21 Ĕhi ě'ě'ěro iae Iesuro jĕe gĕ Jew rajoho majĕhiromo uĕvadeje: Naro ĕre gĕ va'ejĕjo. Va'iramu jemĕro nahevo'arujĕjo. Nahevo'iramu rĕhu mu sisĕ'e jĕvoromo vuovĕvo'ajĕjo. Vuovĕvo'iramu naehu va'irodire ě ĕ'irarijoho bogo eni jĕvo'ajĕjo.

22 Bogo eni jĕvo'ajĕjamu rue Jew rajohuro uarovareje: Huro uĕvuajĕjo: Naehu va'irodire ě ĕ'irarijoho bogo eni jĕvo'ajĕjo. Hu diehi uĕromo jĕvajĕjo. Na hu anorovo'i jĕvajĕjo. O diehi ě'iro jĕvajĕjo.

23 Diehi ě'iro jĕvajĕjamu Iesuro uĕvadeje: Jemĕ ave sa'are sisĕ'i raro-maruje aribĕvie jĕvo'i na aruhe dĕre jioromo ruvebijĕ'e jevajĕjo. Jemĕ ave sa'aho raje jĕvo'i na bogo ave sa'a rajehu jĕvo'i dĕ raje jevajĕjo.

24 Ĕhuni uĕvajĕjo: Jemĕ sisĕ'e jĕvoromo vuovĕvo'ajĕjo. Jemĕ bogo ma uehorovevoromo uvĕ'oho: Nĕrĕhu uĕvaje ě aho hĕ uvĕ'oho sisĕ'e jĕvoromo vuovĕvo'ajĕjo.

25 Vuovĕvo'ajĕjamu uavareje: Ĕhi jiĕ'oho ja rahuo javajĕjo. Ja rahuo javajĕjamu uĕvadeje: Na aevoromo uĕbe rovode ě aho jevajĕjo.

26 Jemesi mu sisĕ jĕho aho'obĕhe nasiro jiajĕjo jĕvo'irodoho. Rĕhu remĕ'ĕjade aehu uevamu hejode jĕho na ĕhuremu jĕvaje hĕjo sa'are raro-maruje aribĕvioho jemĕro hejĕro rabĕni hesi bĕhoho remĕ'ĕjade aho jĕ maemu jĕvajĕro jiĕ'ĕro.

27 Ĕhi uĕvamu jaburo bogo avoho uehorovoromo uvareje: Remĕ'ĕjade hĕ uĕvuaje aho Vavuoho hĕjo.

28 Bogo ĕhioho uvoruomamu Iesuro uĕvadeje: God-are A Maho na banigo-jiomevoromo dĕre nugevĕ'iroho evare jemĕ avoho garomo uvo'a'arujĕjo: Nĕrĕhu uĕvaje ě aho hĕjo. Evare jemĕ garomo uvo'a'arujĕjo: Na bogo nasi simanoho muoho vae'i Vavuehu rĕjehijade jĕhuremu jĕvaje hĕjo.

29 Remĕ'ĕjade ahuro bogo vuororemiromo va'i na'o hijaje hĕjo hu nimaje muoho naro majae ĕhi vaejajego.

30 Ĕhi uĕvamu hegorovo ae aho'obĕhe hesi ĕrire mae uehorovareje.

*Sisĕ hesi darugore raromaruoho Iesuhu jiovĕho'i uvade jĕhoje.*

31 Jew rajo ioro'iorohuro Iesure jĕho mae uehorovamu gagorovo uĕvadeje: Jemĕ nasi jĕ ejehonĕvĕ'oho nasi ijorajo mae jĕvo'ajĕjo.

32 Ĕhi jĕvo'iramu jĕ maho ga'a'arujĕjo. Jĕ maho garomo ĕhuro ijonĕho i'u'e mu hesi uhure jĕvajoho barĕjĕvo'i ma-sasohĕ'e mu hesi aharire jĕvo'ajĕjo.

33 Jĕvo'ajĕjamu uavareje: Iae ĕhi hĕjo rĕhu no Abraham-are ujo ĕmo'ĕmĕro javuĕ'ĕro avare i'u'e mu hesi uhuroho bogo raromobe rovĕ'e javuajĕjo. Ĕhi jiĕ'oho ja diehi uĕromo ě'anuĕjo: I'u'e mue jĕvajoho barĕjĕvo'ajĕjo.

34 Barĕjĕvo'ajĕjamu Iesuro uĕvadeje: Ave jĕho na jĕ mae uĕ'iĕ'ajĕjo. Ae rahu sisĕ vaejaruoho mu sisĕ hesi uhure jioruomajĕjo.

35 I'u'e mu vaemu vaejarue aribĕviohuro aganohu'o ma-jahuri raromo'i harihu ĕmo'ĕmohuro aganohu'o ma-ioro'ioremu raromarue hĕjo.

36 Jemĕ i'u'e mu hesi uhure jĕvamu Harihu naehu tugohĕhĕ'oho ĕhuro iae mu ma hesi aharire jĕvo'ajĕjo.

37 Iae na garomo uvajĕjo: Jemĕ Abraham-are a uje jĕvajĕjo. Rĕhu nasi jĕho bijĕnĕgo'ego ĕhuni anego'iĕ'arujĕjo.

38 Nasi Vavuehu rĕjehijamu gavode jĕho naro jĕvaje hĕjo. A'i jemĕro jemesi vavuehu uĕvamu hejarije jĕho ejahoromo ĕmaruje hĕjo.

39 Ĕmaruje hĕjamu uavareje: Rĕhu nosi aevo'i jiade vavuoho Abraham jio'i no hesi ujo ĕmo'ĕmoho javuajĕjo. Hesi ujoho javuajĕjamu uĕvadeje:

Iae ëhi jëvavjëjo röhu jemë Abraham-are ujo mae jëvo'ibejajo huhu mu ma vaejade ëhi jië'e mu maho vae'ibejarijëjo.

<sup>40</sup> God-hu uevamu hejode jö maho majëhibe rovode höjo röhu jaruvoho jemëro na anego'ië'arujëjo. Abraham ëhi jië'e muoho vaenövade höjo.

<sup>41</sup> Jemesi vavuehu sisë'i ë'adëhi ëhi ë'arujëjo. Ëhi ë'arujëjamu uavareje: Asë'e no bogo öbiehu javuo'i God gemu nosi Vavuoho höjo. No hesi ujo mahuremu javuajëjo.

<sup>42</sup> Ujo mahuremu javuajëjamu Iesuro uëvadeje: Jemë ëhi uvarujëjo röhu jemesi Vavuoho God jio'ibejajo nasi örire rajehi'ibejarijëjo. Rabëni hesi bëhoho na God jiajire jioromo rovodoho aviae jevavjëjo. Bogo nasi ma-rue'i God-ro na remö'öjamu rovode höjo. Röhu jemëhu bogo rajehijarujohuni ëhuni God bogo jemesi Vavuehu höjo.

<sup>43</sup> Jemë rabëni nasi jö bëhoho bogo avoho hejarujëjo. Nasi jöho bijönëgo'ego ëhuni ë'arujëjo.

<sup>44</sup> Jemë jemesi vavu hesi agane gemuoho jëvavjëjo. Röhu jemesi vavuoho Satan höjo. Jemesi vavuehu nimajëhi ëhi ömo'i nimaruje höjo. Ni'i'ivadire Satan-ro aevoromo ae muo'amobe rovë'e höjo. Hu ma-sareri'e jöemu uehorovajëro ëhuni hu jö maho bogo ajamijaje höjo. Hu sareri'e jö jövë'iroho hesi muoho ëhi jië'ëro ëhu'ëro hu ëhi gemu muoho vaejaje höjo rabëni sareri'e mu hesi bëhoho hu jië'ëro sareri'e jöhemu uehorovajëro jië'ëro. Jemë'o ëhi gemuoho jëvavjëjo.

<sup>45</sup> Naehu jö ma jövajoho ëho bijönimoromo jemë nasi jöho bogo ma uehorovaruje höjo.

<sup>46</sup> Di aho ja nasi sisë garomo huruoho'iranoho eni javavjëjo. Nasi sisëho bogojië'ëro jemë huruoho'irarijoho bogo eni jëvavjëjo. Naehu jö ma majëhijajoho jemë rabëni nasi öriroho bogo maho uehorovevarujëjo.

<sup>47</sup> God-are aganoho hesi jöho hejarue höjo. Röhu jemë bogo God-are agane gemuoho jëvë'ëro ëhu'ëro hesi jöho bogo hejaruje höjo.

*Iesuro uëvadeje: Abraham bogo rahadevaroho evaroho naro hibe rovode höjo. Ëjöhö Iesuhu jövadohoje.*

<sup>48</sup> Ëhi uëvamu Jew rajohuro Iesu birevoromo uavareje: Iae no mae uavare höjo: Ja sareri'e Samaria rajo va'ëne javanovajëjo. Satan-are a sisëho jasi dëre jiajëjo.

<sup>49</sup> Jiajëjamu uëvadeje: Satan-are aho nasi dëroho bogohöjo. A'i naro nasi Vavu hesi ihoho banigojiomego döro jiaje höjo. Röhu jemëro nasi ihoho sisë vaejeharujëjo sa'aro jiehojöro.

<sup>50</sup> Röhu nasi ihehu döro jioröhoho ëho bogo naehu uehorovo'i a'i A Göhuro iae uehorovaje höjo. Ëho uehorovoromo huro böröme namiromo nasi jöho mae mevehaje höjo.

<sup>51</sup> Ave jöho na jö mae uë'ië'ajëjo. Ae rahu nasi jö ejehë'o ho ijonöho bogo mae bogo vuovëvo'ajëjo.

<sup>52</sup> Bogo vuovëvo'ajëjamu rue Jew rajohuro uavareje: Avevejö'o ho iae no gavaruoho Satan-are a sisëho jasi dëre jiajëjo. Abraham'o jö God-aro baeromo majahuinövare a masijohu'o mami'e vuovobe rovë'e höjo. Röhu jero uövuanuëjo: Ae rahu nasi jö ejehë'o ho bogo mae bogo vuovëvo'ajëjo.

<sup>53</sup> Nosi aevo'i jiade vavuoho Abraham guomade höjo. Na jero uvanuëjo: Na Abraham iosiramijë'e a böröme jevavjëjo. O jö God-aro baeromo majahuinövade aribövioho vuovobe rovë'e höjo. Diehi jië'e aharo nimoron-imorohë'i jövanuëjo.

<sup>54</sup> Jövanuëjamu Iesuro uëvadeje: Naro nasi ihoho banigojiomo'ibejōjo ëho bëhe bogojio'ibejajo. Röhu nasi Vavuohuro nasi ihoho banigojiomehego döro jiaje höjo. Ëaho jemëro uvaruje höjo: God nosi Börömoho höjo.

<sup>55</sup> Röhu jemë hu bogo gavë'e jëvajëjo. Naro iae hu gavaje höjo. Na uë'ibejōjo: Na hu bogo gavaje hö uë'ibejōjo jemë jö sareri'e ae jëvajëhi na ëhi jië'e ae jevo'ibejajo. Röhu iae naro hu garomo hesi jōho ejahaje höjo.

<sup>56</sup> Jemesi aevo'i jiade vavuoho Abraham-ro naehu hijode maja ga'iröhohuni ëhuni nimoroho avohade höjo. Nimorohë'ëro naehu hijode majaho iae hu gavamu dë sasohade höjo.

<sup>57</sup> Dë sasohade höjamu rue Jew rajoho jaburo uavareje: Sarerivanuëjo. Hu mami gö gö'e guomadoho ja vadune aho'obëhe 50-ho bogo baejë'e javajëjo. Ëhi jië'o ho ja diehi'oromo Abraham gavane höjo.

<sup>58</sup> Gavane höjamu Iesuro uëvadeje: Ave jōho na jö mae uë'ië'ajëjo. Abraham bogo rahadevaroho na urimoho jevë'e jiade höjo.

<sup>59</sup> Ëhi jövamu hejë'i vajami'irōgoro munëho ujuohareje. Ujuohamu Iesuro gurihrovë'ëro God-are amo börömoho nugo'i va'adeje.

## 9

### *Iesuhu nuni ramoramovë'e a ajamamu marëjade jōhoje.*

<sup>1</sup> Iae Iesuro juvo va'adeje. Va'ihö gavadeje nuni sisë'e ae gemu hijamu rahade majare aevoromo hesi nunoho sisërëjävë'ëro jië'ëro.

<sup>2</sup> Ëaho ë hijamu gagorovo Iesure ijorajo ömo'ömohuro uavareje: Tisa rahuare sisëro ëhuro nuni sisë'oho rahade höjo. Na hesi sisëro o hesi vëmu vavu'o jabesi sisërajo.

<sup>3</sup> Ëhi uavamu uëvadeje: Bogo hesi sisëhuro o bogo hesi vëmu vavu'o jabesi sisëhuro ëhuro nunoho sisërëjade höjo. A'i sisërëjade hesi bëhoho jemë ga'irarijigo God-ro hesi darugohuro diehi ajamego mae jiajoho iae ëhuni nuni sisë'oho jiade höjo.

<sup>4</sup> Aji maja jiajevare evare sa'are remö'öjade aehu nimaje muoho no vaenövo'ëjarëjo. Vahiromavuo'ië'ajëjo. Evaroho aehu mu vae'iröhoho bogo eni jio'a'ajëjo.

<sup>5</sup> Na ave sa'are hijajevare evare na ajoho jevë'ëro sa'ae aho'obëhe ajivëvaje höjo.

<sup>6</sup> Ëhi uëngoromo sabëro sa'aho ödivoromo tevoromo övëro hatohatovoromo nuni sisë'e a hesi nunoho buejahadeje.

<sup>7</sup> Buejahoromo uavadeje: Siloam jovo e'uoro va'oromo nu ano'oho eguëjo. Röhu Siloam nosi jöehu huotovë'oho nugö'öjade jōhoje. Nu ano'oho eguëjamu hegorovo rue nuni sisë'e ahuro va'oromo nu ano'oho eguoromo mae uherihoromo vuonorö'ö rovadeje.

<sup>8</sup> Rovamu hesi amo rajohu'o a ioro'iorohu'o böviëni bise'ëni ëninëmi'ego ganövë'ëro jaburo uarovareje: Ave iaho urimë'i hiromomo noehu ajamijöro ëninamuinövade aho höjo. Na mae-ëjo.

<sup>9</sup> Na mae-ëjamu a ioro'iorohuro uvareje: Io'ajo. Iae ë aho höjo. A ioro'iorohuro uvareje: Bogajo. Ae gö ë iaho va'ëne höjo. Ëiaho va'ëne höjamu rue ahuro uëvadeje: Na bogo ae göehu jevo'i jemesi örire ëninëmijode aho jëvajëjo.

<sup>10</sup> Ëninëmijode aho jëvajëjamu uavareje: Ëhi jië'oho diehi'amu jasi nunoho marëjahade höjo.

<sup>11</sup> Marëjahade höjamu uëvadeje: Ae gemu hesi ihe Iesu ë ahuro busasovë'e sa'aho hatohatovoromo nunoho buejehoromo uevade höjo: Siloam jovo



e'uoro va'oromo nu ano'o'oho eguëjamu naro va'oromo eguoromo evare mae uherihode höjo.

<sup>12</sup> Mae uherihode höjamu uavareje: Röhu hu dinö'e höjo. Dinö'e höjamu uëvadeje: Hesi nani'ajo.

<sup>13</sup> Ëhi uëvamu ë urimo nuni sisë'e jiade aho ë ariböviohuro hu'irae baeromo Pharisee aribövi jabesirire va'areje.

<sup>14</sup> Röhu mami'e Iesuhu busasovë'e sa'a hatohatovoromo ë ia hesi nuni dadovahade majaho Jew rajehu mu bogo vae'i ma-nuharue majaho jiadeje.

<sup>15</sup> Ma-nuharue majare Iesuro nunoho dadovahë'ego Pharisee aribövioho jabu'o jöe gemuoho uavareje: Diehi'amu jasi nunoho marëjahade höjo. Marëjahade höjamu uëvadeje: Huro busasovë'e sa'aho hatohatovoromo nunire buejhamu naro va'oromo nu ano'o'oho eguë'ëro ëhu'ëro mae uherihaje höjo.

<sup>16</sup> Mae uherihaje höjamu Pharisee aribövi ioro'iorohuro uvareje: O ë ahuro nunoho dadovahoromo ëhuro nuho maja hesi jögoroho ahade höjo. Ëhu'ëro ë aho bogo God-hu nugö'öjamu rovë'e aho höjo. Bogo God-hu nugö'öjamu rovë'e aho höjamu Pharisee a ioro'iorohuro uvareje: Iae ëhi höjo röhu hu a sisë jio'ibejajo hu diehi'oromo ëhi jië'e mu masijoho vae'ibejajo. Ëhi uarovoromo Pharisee ariböviohuro jöe gö gö uehorovo'amareje.

<sup>17</sup> Jöe gö gö uehorovoromo urimo nuni sisë'e jiade aho röhu maho jöe majahiromo uavareje: Jero uövuanejo: Huro nasi nunoho dadovehade höjo. Ëhi jië'o'oho ja uehorovanuoho hu diehi jië'e ae höjo. Diehi jië'e ae höjamu uëvadeje: Hu jö God-aro baeromo majahuijaje ae höjo.

<sup>18</sup> Röhu rue Jew rajohuro uvareje: Nani sareramuiromo uövuaruëjo: Aveo'i nuni sisë'e jiadoho avevejö'oho gavajëromo ae uëvareje: Uëvego ave a hesi vëmu vavu'ohuro rue'irarëjo.

<sup>19</sup> Jabumë rovamu uëvareje: Na ave aho jemesi harihe höjo. Jemë uövuarije höjo: No ave harihu baejare majare evare hu aevoromo nuni sisë'e jiade höjo. Na mae o sarerëjo. Mae jië'o'oho diehi'ë'ëro jaruvoho hu mae uherihajëjo.

<sup>20</sup> Mae uherihajëjamu rue vëmu vavu'ohuro uëvareje: No gavaruoho ave aho iae hu nosi harihe höjo. No hu baejarevare evare aevoromo nuni sisë'e jiade höjo. Ëjöho iae no gavaruëjo.

<sup>21</sup> Röhu rahuho diehi ajamamu nuni dadovadoho no bogo gavë'e javuajëjo. Jue'io ua garego huro hesi jö'ëro majëhi'irajo hu bövie jiaje.

<sup>22</sup> Röhu vëmu vavu'ehu ë jö uëvare hesi bëhoho jaburo ë Jew rajo masijoho juhuonëmijareje. Urimë'i ë a masijohuro jöe mevoromo ae aho'obëhe uëvareje: Ae rahu huruoho majahuiromo uövuë'oho: Böröme namiromo ajamuijaje aho Iesu hö uövuë'oho ëhi jië'e aribövioho noro ahëvo'iramu ijönöho nosi osa börömoroho bogo rueromo God rajahinövo'aruëjo. Ëjöho uehorovoromo vëmu vavu'ohuro juhuonëmijareje.

<sup>23</sup> Juhuonëmiromo ëhuni uëvareje: Ëaho bövie jiaje ëhuni jemëro hu ua garëjo.

<sup>24</sup> Hu ua garëjamu hegoroovo rue a masijohuro jöe nugö'öjareje urimo nuni sisë'e jiade ahuro vuonorö'ö rueröhego. Jöe nugö'öromo rovamu Iesuarë jöho atoromo uavareje: God-are nunoro jöe ma-maemu jövego no hejarëjo. No gavaruoho ë aho a sisë höjo.

<sup>25</sup> A sisë höjamu uëvadeje: Na'o bogo gavajëjo. Nani hu a sisë höjo o bogajo. Röhu jöe gemu iae na gavajëjo urimo nuni sisë'e jevadoho jaruvoho

mae uherihevo'ego.

<sup>26</sup> Ĕhi uėvamu uavareje: Hu diehi'avade hōjo. Hu diehi nunoho dadovahade hōjo.

<sup>27</sup> Dadovahade hōjamu uėvadeje: Na mami'e uėvamu jemėro bogo ejeharije hōjo. Rabėni rōhu maho he'i nėgajėjo. Nani jemė'o hesi ijore ijore jijih'o'i nėgo'ego o rabėni ue ge'i arijarujėjo.

<sup>28</sup> Ue ge'i arijarujėjamu sivoromo uavareje: Ja ě ia hesi ijore ijore juvanue ae javajėjo. No bogajo. No Moses-are jōgoru ijore ijore jijiharue aribōvie javuajėjo.

<sup>29</sup> No iae garomo uvarue hōjo: God-ro Moses jōe bojamamu majahuijade hōjo. A'i ě a gō hesi bėhoho no bogo gavaruėjo.

<sup>30</sup> Bogo gavaruėjamu rue nuni sisė'e jiade ahuro uėvadeje: Asė'e jemė diehi'oromo hesi bėhoho bogo gavaruje hōjo. Iae huro nasi nunoho dadovehade hōjo rōhu jemė hu bogo gavaruje hōjo.

<sup>31</sup> No gavaruoho God a sisė jabesi jōho bogo ejėhaje hōjo. O aehu God uehorovoromo huhu nimaje mu vaejė'o'ho ěhi jiė'e aribōvioho God-ro ejėhaje hōjo.

<sup>32</sup> Ni'i'ivadire jioromo ěhi ro avevejō'oho bogo hebe rovė'e javuajėjo uvavamu: Vėmu dėre jioromo nuni sisė'e raharoho aėro nunoho dadovėhade hōjo.

<sup>33</sup> God bogo nugō'ōjego rue'ibejajo ěhi jiė'e darugo'e mu vaejajoho hu bogo mae bogo eni jio'ibejajo.

<sup>34</sup> Bogo eni jio'ibejajamu uavareje: Jasi vėmu hesi dėre jioromo mu sisėmu vaebe rovė'e javajėjo. Ĕhi javajėjo rōhu ja diehi'oromo jōgoroho bojamuijanuėjo. Ĕhi uanugoromo jabesi osa bōrōmoroho rarovō'ojamu va'adeje.

*Ae gō dē vōvōbajo'e ramoramovė'e raromarue jō Iesuhu jōvadohoje.*

<sup>35</sup> Ĕrarovō'ojamu va'ade jōho aėro atamu Iesuro hejadeje. Heromo ě aho birohoromo uavadeje: Na ja God-are A Ma hesi ōriroho mae uehorovanuėjo.

<sup>36</sup> Mae uehorovanuėjamu uavadeje: Rōhu God-are A Maho rahuo hōjo. Uevego na hesi ōrire mae uehorovōjo.

<sup>37</sup> Mae uehorovōjamu Iesuro uavadeje: God-are A Maho jero mami'e gavane hōjo. Rōhu aviavejō'e ja'o jōe jōvajėjo. Iae na jevajėjo.

<sup>38</sup> Na jevajėjamu uavadeje: Bada naro jasi ōrire mae uehorovavajėjo. Mae uehorovavajėromo ague aho hiromo rajahijadeje.

<sup>39</sup> Rajahijamu Iesuro uėvadeje: Naro sa'are rovode hōjo mae o sisė aribōvie mevėvo'irodėni. Nuni ramoramo'e aribōvioho nune dadovėho'i ma-dōhemu nuni ma'e aribōvioho nune tugohėho'irodėni ěhuni sa'are rovode hōjo.

<sup>40</sup> Ĕhi uėvamu Pharisee a ioro'iore bėhire raromarohuro ě jōho heromo uavareje: Na ja nosi jōho jōvoromo ě'anuėjo. No bogo nuni ramoramo'e aribōviehu javuajėjo.

<sup>41</sup> Javuajėjamu Iesuro uėvadeje: Jemė nuni ramoramo'e jėvo'ibejajo jō sisėho bogojėvo'ibejajo. Rōhu jemė ěma uvaruje hōjo: Iae no mae gavarue hōjo. Ĕhuni jemesi sisėho iae jėvajėjo.

## 10

*Sheep-ehu raromarue amo hesi uhu jō Iesuhu jōvadohoje.*

<sup>1</sup> Iae Iesuro uhu'e uëvadeje: Ave jöho na jö mae uë'ië'ajëjo. Ae rahu sheep jabesi amore va'ië'iroho bogo ojoroho va'i buoru iromaroho ruahoromo va'amu gavë'oho uvo'a'anuejo: Ëhi jië'e aho anano'e vajiohu'e ae höjo.

<sup>2</sup> O ae rahu ojore va'amu gavë'oho uvo'a'anuejo: Ëho sheep muebe'amaje aho höjo.

<sup>3</sup> Sheep muebe'amaje aho sheep amore va'ia'amu gavë'iroho ojo muebejaje ahuro ojoho jiovahego ë va'aje höjo. O sheep-ohuro hesi huëho heruomaje höjo. Hejego hesi sheep gemu gemu hesi ihoho uvoromo sö ujuohoromo va'o amonö höröjaje höjo.

<sup>4</sup> Sö ujuoho va'o barënuigoromo evare jabesi nuninö va'ego sheep-ohuro ijore va'oruomaje höjo hesi huëho heruomajëro jië'ëro.

<sup>5</sup> A ioro'ioro jabesi huëho bogo hejaruëro jië'ëro jabesi ijoroho bogo va'i huruomoromo va'oruomo'ajëjo.

<sup>6</sup> Ëjöho Iesuro uhu'e uëvamu ë jö hesi bëhoho bogo avoho hejareje.

*Sheep muebe'amaje a maho hu Iesu jiaje jö Iesuhu jövadohoje.*

<sup>7</sup> Bogo avoho hejë'ëro Iesuro uëvadeje: Ave jöhu'o na jö mae uë'ië'ajëjo. Na sheep-ehu va'oruomaje ojoho va'ëne jevajëjo.

<sup>8</sup> Urimo rueruomade aribövioho anano'e vajiohu'e a va'ëne jëvobe rovadoho nasi sheep mahuro jabumë bogo ejëhare höjo.

<sup>9</sup> Na ojo va'ëne jevajëjo. Ae rahu nasirire ruaho rovë'oho maro jioruomo'ajëjo. Maro jioromo ruaho rueromo osare jioromo ruaho va'oromo va'orahonö ioho birohoro uo'aho'aruëjo. Ëhi gemu ë'onövo'aruëjo.

<sup>10</sup> Röhu anano'e vajiohu'e ahuro rueruomaje höjo vajiohëro ujuoho'i bijuëmo'i ijumo'amo'irovo. Naro rovode höjo nasi sheep ömo'ömohuro i'ovoromo ma-marö raromoröhego.

<sup>11</sup> Sheep muebe'amaje a maho na jevajëjo. Sheep muebejaje a mahuro uvaje höjo: Naehu sheep jabesi jöëni nasi arijo'arije bojamirovoromo guomorovë'oho iae mae höjo.

<sup>12</sup> O ma-moniemu nimoromo ae gö hesi sheep muebejahaje aho ëho bogo sheep jabesi vavuoho jio'i ma-muebe'amajëro jië'ëro ga'iröhe vörö'e mioho rovamu gavë'iroho sheep-oho rëmö'öromo ju'ebiro mo va'aje höjo. Ju'ebiro mo va'ego miohuro ro sheep-oho umi ujuoho va'ego sheep ioro'iorohuro huruomoromo arua anumiae va'aje höjo.

<sup>13</sup> Amo a hesi sheep muebejahajohuro moniemu nimë'ëro sheep-oho bogo huëho baejëvaje höjo. Ëhu'ëro huruomaje höjo.

<sup>14-15</sup> A'i na sheep muebe'amaje a maho jevajëjo. Vavuohuro na ge'i naehu Vavu gavajëhi ëhi naro nasi sheep-oho ga'amaje höjo. O nasi sheep-ohuro na geruomaje höjo. Ëhi jië'ëro naehu sheep jabesi jöëni nasi arijo'arije bojamirovoromo guomorovë'oho iae mae höjo.

<sup>16</sup> Röhu sheep ioro'ioroho iae jevajëjo. Jabumë ave sheep amoroho bogo raromarue höjo. Bogo raromaruoho jabu'o söjëvo rue'ejöjo. Rueromo jöe majëhi'iramu ejehonövo'aruëjo. Ëhu'ëro jië'ëro sheep aho'obëhe magemuoro jio'i sheep muebejaje aho ma-gemu jevo'ajëjo.

<sup>17</sup> Vavuehu na rajehijaje hesi bëhoho naro guomorovo'ejöjo i'ovoromo röhu maho hi'irodëni.

<sup>18</sup> Aho bogo ma-anego'i nasi nimoromo bojamirovo'iramu anego'iramu guomevo'ajëjo. Naehu bojamirovamu anegamu guomevë'oho iae mae höjo. O ajamirovoromo i'ovoromo röhu maho hijë'oho ëhu'o iae mae höjo

ëhi guomoromo röhu maho ri'ö'irodoho nasi Vavuohuro uevamu hejë'ëro jevë'ëro.

<sup>19</sup> Ëhi uëvamu hegoroovo rue Jew rajohuro röhu maho jöe gö gö uehorovareje.

<sup>20</sup> A ioro'ioroho aho'obëhe jaburo atoromo uarovareje: Satan-are a sisë gemuëro hesi dë vövöbajo'ere abuejë'ëro simane sisë'i uehorovoromo jövajëjo. Jemë rabëni hesi jöho hejarujëjo.

<sup>21</sup> A ioro'iorohuro uarovareje: O huhu jö jövajoho bogo Satan-are a hesi dëroho abuejë'ëro jöho jövajëjo. Ëhesi bëhoho Satan-are a sisëhuro nuni sisë'e aho diehi ajamego mae jio'ibejajo. Bogajo. Ëhi atoruomadeje.

*Jew rajo ariböviehu Iesuale örire bijönimoruomade jöhoje.*

<sup>22</sup> Iae Jerusalem amore maja börömo rovadeje. Ëmaja börömo hesi bëhoho Jew rajo ömo'ömohuro uehorovoromo uvonövareje: Evare majare nosi a mamiohuro God-are amo börömo hesi ojoho jiovoromo God-are örire ma-ioro'ioremu bojamare höjo hesi baeröhego. Ëmaja börömo runoni majae jië'iro evare rovadeje.

<sup>23</sup> Ëmaja börömo rovamu Iesuro God-are amo börömo hesi haradare juvadeje. Harada hesi ihoho Solomon-are Haradae jiadeje.

<sup>24</sup> Juvamu gagorovo Iesu ririre jio'i Jew rajohuro ruë numë riravo rova'oromo uavareje: Ja divare jö subivahuanuoho vuonugo'iramu ëhuro bogo dadivavuo'ajëjo. Ma-sama'e majahuijigo hejarëjo. Na ja böröme namiromo ajamui'irane aho javajëjo o bogajo.

<sup>25</sup> Ëhi uavamu Iesuro uëvadeje: Naro mami'e uëvode höjo. Röhu jemë bogo ma uehorovevaruje höjo. Naro nasi Vavu hesi ihore mu masijoho vaejaje höjo jemëro ë muoho garomo uvo'irarijigo: Iae mae-ëjo. Nörö iae a mae höjo.

<sup>26</sup> Röhu jemëhu na bogo ma uehorovevaruje hesi bëhoho jemë bogo nasi sheep-oho jövajëjo.

<sup>27</sup> Nasi sheep-ohuro nasi huëho heromo ejehoruomego naro jabumë gëvaje höjo. Gëvego jaburo nasi ijore ijore jijihoruomaje höjo.

<sup>28</sup> Nasi ijore ijore jijihoruomego naro jabu ajëmego ma-ioro'ioremu maro raromarue höjo. Ëhu'ëro jië'ëro jabumë bogo mae bogo sisëroho va'oruomo'ajëjo. O nasi övo döre raromaruoho aho bogo baenieh'i'aruëjo.

<sup>29</sup> Nasi Vavue jabumë baejëvoromo nasi örire bojemade ahuro aho'obëhe iosirëmijë'e höjo. Ëhuni Vavu hesi övo döre raromaruoho aho bogo baeniahi'aruëjo.

<sup>30</sup> Na'o nasi Vavuohu'o no gemuoho javuajëjo.

<sup>31</sup> Na'o nasi Vavuohu'o no gemuoho javuajëjamu hegoroovo Jew rajohuro urimo munëhu vajami'ie'aroho röhu maho munëho ujuohareje vajami'irovo.

<sup>32</sup> Munëho ujuohamu gagorovo Iesuro uëvadeje: Vavuohuro na ajemamu mu mae aho'obëhe vae'amamu gavarije höjo. Di mu vaejamu gavarijohuni munëho vajemi'ie'arujëjo.

<sup>33</sup> Munëho vajemi'ie'arujëjamu uavareje: Bogo mu ma hesi jöënioho munëho vajami'ie'aruëjo. A'i jero God-are ihoho ijumo'ego ëhuni ë'aruëjo. Ja ma-ae javajëjo. Röhu jero uvanuëjo: Na God jiaje gemuoho jevajë uvanuohuro ëhuro God-are ihoho ijumanuëjo.

<sup>34</sup> Ijumanuëjamu Iesuro uëvadeje: Röhu jemesi jögoru surire jajivoromo ëhi uvë'e höjo: God naro uëvajëjo: Jemë god ömo'öme jëvajëjo.

<sup>35</sup> Ëhi jajivë'e höjo. God-are surire jöho ioro'ioemu jioröhe jöho höjo. Ësurire jajivoromo uvë'e höjo: God-are jö baejare aribövioho jabumë god ömo'öme jio'amajë uvë'e höjo.

<sup>36</sup> Röhu na bogo ma-God-are jöho bae'i a'i Vavuohuro na baejevoromo sa'are remö'öjamu rovë'ëro uëvajëjo: Na God-are Harihe jevajëjo. Ëhi jië'ocho jemë rabëni uevarujëjo: Jaehu uövuanuoho: Na God-are Harihe jevajë uövuanuohuro ëhuro God-are ihoho ijumanuëjo. Ëhi jië'ocho bogo maehu höjo.

<sup>37</sup> Röhu nasi Vavuehu bojemade muoho na na vaejaje höjo o bogo vaejaje höjo. Bogo vaejaje jevamu gavë'ocho nadi maho uehorovevorëjo.

<sup>38</sup> Röhu Vavuehu bojemade muohuremu iae na vaejaje höjo. Nani jemëro na bogo ma uehorovevo'arujëjo röhu nasi muoho ëhuro garomo uvorëjo: Iae mae-ëjo. Vavuohuro ajamamu vaejade höjo. Jemë ëhi uehorovë'ocho ëhuro avoho ga barëromo uvo'a'arujëjo: Vavuohuro nasi dë vövöbajo'ere jio'i naro Vavu hesi dë vövöbajo'ere jiaje höjo.

<sup>39</sup> Ëhi jövamu hegorovo rueho jaburo röhu maho Iesu guduamo'ië'areje. Guduamo'ia'amu garaedëgoromo va'adeje.

<sup>40</sup> Va'adoho va'o Jordan jovoho beromo ioni gönö va'oromo John-hu aevoromo bapataeto vaejëvadire ë va'o hijadeje.

<sup>41</sup> Va'o hijamu gagorovo ae aho'obëhe rueruomadeje. Rueromo uarovareje: John bogo darugo'e mu masijoho vaenövade höjo. Röhu ave a hesi jö John-hu majahuijamu hejaroho ë jöho aho'obëhe iae mae uövuade höjo.

<sup>42</sup> Ëhi uarovoromo ae aho'obëhe Iesu ë öri ari'ere mae uehorovoruo-madeje.

## 11

### *Lazarus guomade jöhoje.*

<sup>1</sup> Iae guomo guomo'e ae gemu hesi ihoho Lazarus Bethany amore hijadeje. Röhu hesi ma'ine niö'i Mary'o Martha'o jabesi amoho gemuoho jiadeje.

<sup>2</sup> Röhu Mary hu majae ijönö hiromo Badare hörure ridi'e jovehu otehodi-voromo simano uehu uhijaho'iröhe magonahoho jiadeje. Amo ë magonaho hesi ma'ine Lazarus-ro guomo guome baeromo hijadeje.

<sup>3</sup> Hijamu Lazarus-are ma'ine niö'iro jöe nugö'öromo Iesu uavareje: Bada jaehu huë baejanue aho guomo guome baejë'e höjo.

<sup>4</sup> Guomo guome baejë'e höjamu hegorovo Iesuro uëvadeje: Ëguomo guomo baejade hesi bëhoho hu bogo ioro'ioemuoho guomo'irögoro God-are ihoho döro jioröhego. Hu guomo guome baejë'ëro ëhu'ëro God-ro ajemi'iramu hesi Harihe nasi ihohu'o dö maro jio'a'ajëjo.

<sup>5</sup> Röhu Iesuro ö'o ö'o Martha'o Mary'o jabesi ma'ine Lazarus'o ëhi dë vövöbajo'e aho'o uehorovëvadeje.

<sup>6</sup> Amo hejade uavamu: Lazarus guomo guome baejë'e hö uavamu heromo bogo Judea sa'aroho va'oromo Lazarus ga'irögoro ëhi hijamu majae niö'i barëjëvadeje.

<sup>7</sup> Majae niö'i barëjëvamu gagorovo hesi ijorajo ömo'ömoho uëvadeje: Ruehego no Judea sa'are vuonorö'ö va'arëjo.

<sup>8</sup> Va'arëjamu ijorajoho jaburo uavareje: Tisa iae mae höjo röhu avevejë'e Jew rajoho jaburo ja munëro vajami'ië'are höjo. Ëhi jië'ocho ja rabëni ë sa'aroho vuonorö'ö va'ië'anuëjo.

<sup>9</sup> Va'ië'anuëjamu Iesuro uëvadeje: Aveho aji majaromëro jië'ëro va'ejöjo. Jemë'o uehorovohëjo. Majae höröromo hour aho'obëhe 12 barëjego evare beva'aje höjo. Èhu'ëro ae rahu maja'e jijihë'oho ave sa'ae aho'o hesi ajire jijihoromo èhuro bogo biberovarue höjo.

<sup>10</sup> O vahi'e jijihë'oho ajoho bogojëv'ëro èhuro biberovarue höjo.

<sup>11</sup> Èhi uëromo ijonö uëvadeje: Nosi aemo'aemoho Lazarus niavë'e höjo. Èhuni na va'oromo io'ejöjo.

<sup>12-13</sup> Io'ejöjamu hesi ijarahoho jaburo uvareje: Nani Iesuro uëromo è'ajëjo: Lazarus ma-niavajë uövuajëromo uavareje: Bada hu niavë'oho iae marë'ajëjo. Röhu Iesu bogo èhioho uë'i a'i uëromo è'adeje: Lazarus hu guomë'e höjo.

<sup>14</sup> Èhuni Iesuro huruoho majëhiromo uëvadeje: Lazarus guomë'e höjo.

<sup>15</sup> Guomamu naehu bogo hu'o hijodohuni èhuni jemesi jöëni nimorohajëjo èhuro jemëro nasi muoho garomo mae uehorovo'irarijego. Röhu ruehego no hesirire va'arëjo.

<sup>16</sup> Èhi uëvamu hegorovo Thomas hesi ihoho aehu uvaruoho Huodi'e Rahade Aho huro ijaraho ioro'ioroho uëvadeje: Go va'ohego no'o va'oromo Iesu'o gemu mae vuovo'irarëjo.

*Iesuhu vuovë'e aribövi ajëmego i'ovoromo ri'öromo mae raromarue jö Iesuhu jövadohoje.*

<sup>17</sup> Èhi'amu Iesuro va'oromo Bethany amore hörö'irögoro hejade uavavamu: Lazarus mami'e guomamu guavaroho majae èhi niö'i èhi niö'i barëjë'e höjo.

<sup>18</sup> Röhu Bethany amoho Jerusalem bëhire jië'ëro 3 kilometre rabu'e jiadeje.

<sup>19</sup> Èhu'ëro Jew raje ae aho'obëhe jaburo Jerusalem jioromo Bethany rovë'ëro è raromareje Martha'o Mary'o jabesi ma'inoho guomë'ëro huë vavaeni baejaruoho sanuëmiröhëro.

<sup>20</sup> Èhi'amu Martha-ro hejade uvavamu: Iesu rovajëjamu hegorovo osare jioromo höröromo Iesu biroho'i rovadeje. Rue'irögoro Mary-ro èhi osare hijadeje.

<sup>21</sup> Hijamu Martha-ro rueromo Iesu birohoromo uavadeje: Bada ja ave hi'ibejanëjo nasi ma'inoho bogo guomo'ibejajo.

<sup>22</sup> Nasi ma'inoho iae guomë'e höjo. Röhu jaruvohu'o God-hu diehi ajamijöro Iesu jaehu ua gavë'oho iae ajami'ajëjo.

<sup>23</sup> Ajami'ajëjamu Iesuro uavadeje: Jasi ma'inoho iae i'ovoromo ri'ö'a'ajëjo.

<sup>24</sup> Ri'ö'a'ajëjamu Martha-ro uavadeje: Iae na garomo uvajëjo: Ijo tugoho'i rueröhe majaho rue'iramu evare ae aho'obëhe i'ovoromo ri'öruomo'iramu hu'o ri'ö'a'ajëjo.

<sup>25</sup> Ri'ö'a'ajëjamu Iesuro uavadeje: Vuovoromo i'ovoromo ri'öromo mae raromo'irarije darugo hesi bëhoho na jevajëjo. Èhu'ëro ae rahu nasi örire mae uehorovevë'ohuro daruge baeromo mae raromo'aruëjo. Nani vuovo'ajëjo röhu iae i'ovëvo'ajëjo.

<sup>26</sup> Ae rahu i'ovoromo raromoromo nasi örire ma uehorovevë'oho bogo sisëroho va'i mae raromemu raromo'aruëjo. Na ja è jöho mae uehorovanuëjo.

<sup>27</sup> Mae uehorovanuëjamu uavadeje: Bada io'ajo. Iae na mae uehorovoromo uvajëjo: Böröme namiromo ajamui'irane aho God-are Harihoho ja javajëjo. Ave sa'are rue'iranego God-hu uövuade aho ja javajëjo.

*Iesuhu nivade jöhoje.*

<sup>28</sup> Martha-ro Iesu ähi uanugoromo va'adeje. Va'oromo osare va'o hesi öho Mary saginiëri uavadeje: Tisae rovë'e höjo. Rovë'ëro uvajëjo jero ruejëro.

<sup>29</sup> Ruejëro uvajëjamu hejë'i ma-burëro ri'öromo Iesu biroho'i va'adeje.

<sup>30-31</sup> Ma-burëro ri'öromo Iesu biroho'i va'amu gagorovo Jew raje Mary'o osare raromoromo sanuamijarohuro uvareje: Nani Lazarus-are sino bamarire nivoli va'ajëromo rihromareje. Rihromamu Iesuro amo maroho bogo rueli Martha-hu birohadiëre ë hijë'ëro Mary-ro ë biroho'i rovadeje.

<sup>32</sup> Rueromo Iesu garomo hesi bëhire ague aho hiromo uavadeje: Bada ja ave hi'ibejanëjo nasi ma'inoho bogo guomo'ibejajo.

<sup>33</sup> Ähi uaromo nivamu Jew raje hu'o gemu mae rovarohu'o nivoruomamu gëgorovo Iesuro hesi dë vövöbajo'o uhure hara'uoromo vavaenimo avohadeje.

<sup>34</sup> Vavaenimoromo uëvadeje: Jemë sinoho dinö'e bamarije höjo. Bamarije höjamu uavareje: Bada rueromo gavëjo.

<sup>35</sup> Rueromo gavëjamu Iesuro nivadeje.

<sup>36</sup> Nivamu gagorovo rue Jew rajohuro uarovareje: Aroriaho gahëjo. Hu Lazarus-are örire hesi dë vövöbajo'ere bogo bisemuoho uehorovë'ëro ehuni nivajëjo.

<sup>37</sup> Nivajëromo ae göëro göëro uvareje: Ähuro nuni sisë'e aho ajamamu marëjade höjo. Ehuni nani huro Lazarus mami'e ro ajami'ibejajo hu bogo guomo'ibejajo.

*Iesuhu Lazarus ajamamu guomoromo i'ovoromo ri'öjade jöhoje.*

<sup>38</sup> Ähi uarovamu hegorovo Iesuro röhu maho hara'uoromo vavaenimamu sino bamarire va'adeje. Va'oromo gavadeje juju gagoho munëro tugohë'e jiamu.

<sup>39</sup> Tugohë'e jiamu gagorovo uëvadeje: Munëho rori'o bava'ohëjo. Bava'ohëjamu guomë'e a hesi ma'ine Martha-ro uavadeje: Bada iae ähi höjo röhu majae ähi niö'i ähi niö'i barëjë'ëro jië'ëro usihövajëjo.

<sup>40</sup> Usihövajëjamu Iesuro uavadeje: Iae ähi höjo röhu na mami'e uavode höjo: Jaehu mae uehorovë'oho God-are aji maho ga'a'anuëjo. Naehu uavode jöho na ja ëho uehorovanuëjo o bogajo.

<sup>41</sup> Ähi uavamu hegorovo rueho jaburo munëho bava'areje. Bava'amu Iesuro sioroho garomo uavadeje: Apo naro jasi örire huë mae uavajëjo rabëni jero nasi jöho ejehë'ego.

<sup>42</sup> Iae na garomo uvajëjo: Jero majae ähi ejehanue höjo. Röhu naro ave jöho uavajëjo arue aribövi jabesi jöëni ehuro jaburo uvoruomoröhego: Iae mae-ëjo. God-ro nörö nugö'öjamu rovade höjo.

<sup>43</sup> Ähi uanugoromo ma-darugo'o uvadeje: Lazarus va'orahonö hörö rovëjo.

<sup>44</sup> Hörö rovëjamu guomamu bamare ahuro i'ovoromo hesi övo hörü'oho nu ano'oho niögëro muoho taemo'amë'e juju gagore jioromo hörö rovadeje. Rovamu gagorovo Iesuro uëvadeje: Niögoho jiovahohego va'ajo.

*Jew rajo a masijehu Iesu ano'iro jö atare jöhoje.*

<sup>45</sup> Ähi'amu Jew raje ae aho'obëhe Mary ga'i rovarohuro gavare Iesuro Lazarus ähi ajami'ego i'ovoromo ri'öjamu gagorovo hesi örire mae uehorovareje.

<sup>46</sup> A ioro'iorohuro bogo ma uehorovo'i va'oromo Pharisee aribövioho huruoho majëhiromo uëvareje: Iesuro ähi jië'e muoho vaejade höjo.

<sup>47</sup> Ëhi majëhijamu hegoroovo priest masijohu'o Pharisee ömo'ömohu'o ëho jaburo Jew rajo a masijo ioro'ioroho uëvareje: Gagovohego no jöe mevarëjo. Jöe mevarëromo gagovamu uëvareje: No ave a hesi öriroho diehi'o'ejarëjo. Huro darugo'e mu masijoho aho'obëhe vaejaje höjo.

<sup>48</sup> Ëhi jië'e mu masijoho vaemu vaejamu noehu bogo tugohë'oho ae aho'obëhe hesi örire mae uehorovoruomo'ajëjo. Mae uehorovo'iramu gagorovo Rome ariböviohuro rueromo nosi amo börömo'u'o sa'ahu'o iju-mavuo barë'ajëjo.

<sup>49</sup> Röhu ae gemu hesi ihoho Caiaphas hu jabu'o jiadeje. Evare vaduniroho hu priest böröme namijë'e jiadeje. Ëahuro ri'öromo uëvadeje: Jemë ave muoho bogo avo'avoho gavarujëjo.

<sup>50</sup> Jemë diehi'oromo bogo uehorovarujëjo ae gemuehu ae aho'obëhe noni guomë'oho ëhuro jemë marëjëvo'ajëjo. Ëhi jië'oho nosi sa'aho aho'obëhe bogo barëjavuo'ajëjo. Caiaphas-ro ëhi jövadeje.

<sup>51</sup> Ëjöho bogo hesi ëma jövo'irögoro evare vaduniroho hu priest börömëro jië'ëro ijonö jioröhe jöho God-ro bojамamu majëhijadeje. Majëhijade jö hesi bëhi huruoho majëhijë'oho Iesu guomo'a'ajëjo Jew raje aho'obëhe ajëmi'iröhëro.

<sup>52</sup> Röhu bogo Jew rajo jabesi jöëni ëhemuoho guomo'i a'i guomoromo ëhuro God-are aboji harihu'e aho'obëhe dinö'e dinö'e raromaruoho gemuoro gagovo'iröhego Caiaphas-ro jö bëhoho bogo uehorovë'e ëhi ma-jövadeje.

<sup>53</sup> Iesu guomoröhe jöho ëhi atoromo evare majare aevoromo öroho nahoromo avohobe rovereje hu anoröhëro.

<sup>54</sup> Ëhi'amu Iesuro Judea sa'are va'orahore juvadoho vuonugo'i va'adeje. Va'oromo a rumo'e sa'a hesi bëhire amo ihe Ephraim ë va'oromo hesi ijorajo ömo'ömohu'o gemu mae hijadeje.

<sup>55</sup> Hijamu Jew rajo jabesi maja börömo'oho dunovadeje. Maja börömo hesi ihoho God-hu Vörö Tugohade hesi Majaho jiadeje. Ëmaja börömo'oho dunovamu ae aho'obëhe amo harihu harihure jioromo Jerusalem amo börömore iojomareje Moses-are jögoroho ejahoromo jabesi sisëho avohorovo'i sörö majaho rovego avoho ue'ahoröhëni.

<sup>56</sup> Iojomoromo Iesu nahoromo God-are amo börömore gagovoromo uarovareje: Jemë diehi uehorovarujëjo. Na jemë uehorovarujoho Iesu sörö börömoroho rue'a'ajëjo o bogajo. Nani bogajo.

<sup>57</sup> Röhu mami'e priest masijohuro Pharisee ömo'ömohuro ae aho'obëhe jöe bojëmiromo uëvareje: Iesu dinö'e hijajoho ae rahu gavë'oho ro huruoho majahuirego no heromo va'oromo hu guduamo'irarëjo.

## 12

*Magonaho göehu ridi'e oso baeromo Iesuarë hörure otehodivade jöhoje.*

<sup>1</sup> Ijonö majae aho'obëhe 6 barëjëgo God-hu Vörö Tugohade Sörö maja rue'iröhoho jiadeje. Rue'iröhoho jiamu evare Iesuro Bethany amore Lazarus-hu hijajire ë ajiomadeje. Lazarus guomamu Iesuhu ajamamu ri'öjade aho jiadeje.

<sup>2</sup> Amo Iesuro ë ajiomamu ariböviohuro i harihe avohoromo Iesu bojami-jareje. Bojamiromo Martha-ro ajëmiromo ie i'imëmamu Lazarus-ro ie i'i Iesumë'o ro hijadeje.

<sup>3</sup> Ëhi ro raromamu Mary-ro ridi'e osoho bisemu bövie barovadeje. Osoho bogo jovo'oho buarohë'e ma-oso maemu jiadeje. Hesi manaho bogo bise'o vadu'oho jiadeje. Ësoho Mary-ro barueromo Iesuarë hörü döre



otehodivoromo simano uohuro hōroho uhijahadeje. Uhijhamu ridohuro osae aho'obēhe rumorovo barējadeje.

<sup>4</sup> Rumorovo barējamu Iesuare ijorajo ömo'ömoho ae gemu hesi ihe Judas Iscariot Iesuni hiruēmiromo a jabesi övore bojēmi'irōhe ahuro uēvadeje:

<sup>5</sup> Ridi'e osoho rabēni bogo aroho imēvoromo 300 kina rabu'e baeromo bövi bise'o rumo'e aribövioho suvuorēmijare hōjo. Ĕhi jiē'oho iae mae jio'ibejajo.

<sup>6</sup> Ĕhi uēvade hesi bēhoho Judas Iscariot-ro bövi bise'o rumo'e ariböviohunioho bogo uehorovoromo jōvo'i a'i vajiohu'e aēro jiē'ero Ĕhi jōvadeje. Ĕhesi bēhoho huro Iesumesi moni'e esōho muebenövadeje. Muebejē'i gö vajiohēro baenövadeje. Vajiohēro baenövē'ero Ĕhu'ero uēvadeje: Ridi'e osoho rabēni bogo aroho imēvoromo bövi bise'o rumo'e aribövioho suvuorēmijare hōjo.

<sup>7</sup> Bövi bise'o rumo'e aribövioho suvuorēmijare hōjamu hegorovo Iesuro uavadeje: Bogave magonahoho vavaenoho bojami'iranējo. Huro nimade hōjo osoho avoho mueberomo guomevego otehodegoromo guavevo'irōhēni.

<sup>8</sup> Bövi bise'o rumo'e aribövioho jemē'o jiemu jioruomo'i na bogo jemē'oho hiemu hi'ejōjo. Ĕhuni hu iae mae otehodegade hōjo.

*Jew rajo priest masijehu Lazarus ano'i jō atarohoje.*

<sup>9</sup> Ĕhi'amu Jew raje ae aho'obēhe hejare uvavamu: Iesuro Lazarus'o gemuore hijajē uvamu hegorovo rueruomadeje Iesu ga'irovo. Röhu bogo Iesu gemu ga'i rue'irōgoro Lazarus'o ga'i rovareje Iesuro ajamamu i'ovē'ero jiē'ero.

<sup>10</sup> Lazarus ga'i rueruomaje jōho hegoro priest masijohuro jōe mevoromo uarovareje: Ĕ'ego Lazarus'o ano'irarējo.

<sup>11</sup> Lazarus ano'i atare hesi bēhoho Jew raje ae aho'obēhe uvareje: Iesuro Lazarus mabēhe ajamijade hōromo priest masijo jabesi jōho vuonugo'i Iesu mae uehorovareje. Ĕhuni ano'i atareje.

*Iesuhu Jerusalem mae rovamu gavē'i aehu mabēhe rajahiruomade jōhoje.*

<sup>12</sup> Ĕhi'amu nērō sörö i'i rovare aribövioho aho'obēhe hejareje uvavamu: Iesu Jerusalem rojomajējo.

<sup>13</sup> Rojomajējamu hegorovo ijo rude ujuohoromo Iesu biroho'irōgoro uvobe va'oromo uvoruomadeje:

God mabēhējo.

Ave aho Badare ihore rovajoho mabēhējo.

Israel rajo nosi bōrōmoho mabēhējo.

<sup>14</sup> Ĕhi uvoruomamu Iesuro donkey harihe baeromo hesi dōre ajio hijadeje. Donkey dōre hijego Jerusalem amo rajehu garuomo'irōhe jōho mami'e God-are surire jajivoromo uvē'eje:

<sup>15</sup> Zion rajomē nadi juhuonivo'i arueho gahējo.

Jemesi bōrōmohuro donkey harihu dōre hiromo rovajējo.

Ĕhi jajivē'eje. Röhu mami'e God-are surire jajivadēhi Iesuro Ĕhi ē'adeje.

<sup>16</sup> Urimoho Iesuare ijorajo ömo'ömohuro ē surire jō hesi bēhoho bogo avoho uehorovareje. Röhu ijönö Iesuro dōre ajiomoromo aje baeromo bōrōme namijamu evare ē jōho uehorovoromo uvareje: Iae mae-ējo. Iesuare jō God-are surire jajivarēhi no hesi örire Ĕhi vaejahare hōjo.

<sup>17</sup> Röhu ae aho'obēhe Iesu biroho'i rueruomade hesi bēhoho urimē'i Lazarus guomamu Iesuro huni uvamu i'ovoromo munē gagore jioromo

hörö rovamu evare ae aho'obëhe Iesu'o raromoromo ë muoho gavareje. Gavë'ëro ë jöho majëhibe jijihareje.

<sup>18</sup> Èbëhi'e mu börömo hesi jöho majëhijamu hejë'ëro ëhuni ae aho'obëhe Iesu biroho'i rueruomadeje.

<sup>19</sup> Iesu biroho'i rueruomamu gëgorovo Pharisee ariböviohuro uarovareje: Jemë'o gahëjo. Èa hesi mu tugohë'o ho bogo eni javuo hesi höjo. Iae ae aho'obëhe mae hu gemu uehorovoromo hesi ijore ijore jijihoruomajëjo.

*Greece sa'a rajo a ioro'iorehu Iesu ga'i nimoruomade jöhoje.*

<sup>20</sup> Èhi'amu ae aho'obëhe Jerusalem rojomamu Greece raje ae gö gö jabu'o rojomareje sörö majaho rovego God rajahi'iröhëro.

<sup>21</sup> Rojomoromo Philip ga'i rovareje. Philip hu Galilee sa'a raje Bethsaida amo raje jiadeje. Jaburo Philip ga'i rueromo uavareje: No naguajëjo Iesu ga'irovo.

<sup>22</sup> Èhi uavamu hegoroovo Philip-ro va'oromo Andrew uanugoromo jaburo niö'iro va'oromo ë jöho Iesu majahijareje.

<sup>23</sup> Majahijamu Iesuro uëvadeje: God-are A Ma nasi iho döre jioröhe majaho iae rovë'e höjo.

<sup>24</sup> Ave naehu ë'irode jöho uhu'e majëhi'ie'ajëjo. Èhesi bëhoho iae jö mae ma-gemuohemu höjo. I ujo gemu sa'are beruvebiromo sisërë'ajëjo. Sisërëjë'ëro ëhu'ëro tögömoromo ëgovoromo baje aho'o rae'amo'ajëjo. Bogo sisërë'ibejajo ëhi ma-gemu jio'ibejajo. Sisërëjë'ohuro ëhuro bogo sivuoho jio'i aho'o jio'amo'ajëjo. Na ëhi sisërëjevo'iramu ëhuro ae aho'o gemuore jio'a'ajëjo.

<sup>25</sup> Ae rahu jabesi sinohemu uehorovë'o ho ijumorovarue höjo. O ave sa'are raromoromo sinehu nimaje mu bogo uehorovë'o ho ëhuro ioro'ioere gemu raromo'aruëjo.

<sup>26</sup> Ae rahu nasi mu vae'i nimë'o ho nasi ijore ijore jijih'o'aruëjo. Na dinö'e hijë'iroho nasi mu aribövioho jabu'o ë raromonövo'aruëjo. Ae rahu nasi mu vaejehë'o ho nasi Vavuohuro jabesi ihoho döro bamo'ajëjo.

*Iesu guomoröhe jö huhu jövdohoje.*

<sup>27</sup> Avevejö'o ho na dë vövöbajo'ere vavaenegavajëjo. Èhuni na diehi ua'ejöjo. Na na ua'ejöjo: Apajo. Ave vavaeni maja rueröhoho tugohehego bogo bae'iröjo. Bogajo. Na bogo ëhioho ua'ejöjo rabëni na ë vavaenoho bae'i rovë'ëro.

<sup>28</sup> Èhuni bogo tugoho jöho ua'irögoro a'i ua'ejöjo: Apo jasi aji'e muoho röjëhijego aëro garomo uvarëjo: Jasi ihoho böröme höjo. Jasi ihoho böröme hö uanugoromo hejadeje ö'idöre uvavamu: Na mami'e nasi aji'e muoho röjëhijë'e jevajëjo. Röhu maho röjëhi'ejöjo aëro uvoruomoröhego: God nasi ihoho böröme höjo.

<sup>29</sup> Èhi uvavamu hegoroovo ae aho'obëhe bëhire riravarohuro a ioro'iorohuro uvareje: Varurëro anavohijajo. A ioro'iorohuro uvareje: O aneraëro Iesu jöe majahiromo uvavohijajo.

<sup>30</sup> Èhi atoruomamu hegoroovo Iesuro uëvadeje: Èjö uvavamu hejarijoho bogo nasi jöënioho uvo'i jemesi jöëni uvade höjo.

<sup>31</sup> Jaruvoho ave sa'are mu sisë vaeruomaje aribövioho God-ro mevëvo'irögoro ë'ajëjo. Jaruvoho ave sa'are mu sisë simano vaejaje aho God-ro ruahö'ö'irögoro ë'ajëjo.

<sup>32</sup> Na sa'are jevajoho aehu banigojiomevë'o ho evare naro ae aho'obëhe rinëgo'iramu nasinö rueruomajëjo.

<sup>33</sup> Aehu hu banigojiomo'iröhe jö majëhijadoho huro uëromo ë'adeje: Aëro ëhi korosire banigojiomevo'iramu guomo'ejöjo.

<sup>34</sup> Ëhi uëvamu hegoro rue ariböviohuro uaruomadeje: Guomo'irane jö uövuanuoho röhu no hejë'e javuajëjo nosi jögoru surire adahoromo uövuanu: Böröme namiromo ajamui'iröhe aho nosirire rovë'iroho hu bogo guomo'i ma-ioro'ioremu hi'a'ajëjo. Ëhi jië'oho ja diehi uöromo ë'anuejo: Aëro God-are A Maho na banigojiomevo'aruëjo. God-are A Maho ja diehi jië'e aëro javë'ëro ja guomo'i uvanuejo.

<sup>35</sup> Guomo'i uvanuejamu hegorovo Iesuro uëvadeje: Ajoho naro majae ma-bunemu jemë'o hiromo ajivëvo'ejöjo. Jemë'o hiromo ajivëvego ajiro jijihorëjo ëhuro bogo ramoramovëvo'iröhe höjo. Ramoramore jijihë'oho öroho sidövëvo'ajëjo.

<sup>36</sup> Ëhi jië'e jiaje aji naehu jemë'o hijajevaro evaro ajoho na mae uehorovevorëjo. Mae uehorovevë'oho aji'e aribövie jëvo'ajëjo.

*Jew rajo ariböviehu Iesu bogo ma uehorovare jöhoje.*

Ëhi uënuqoromo va'adeje. Va'oromo gurihirovoromo dirö'o göro hijadeje jaburo gajöëni. Ëhi'adeje.

<sup>37</sup> Urimo Iesuro Jew rajohu'o hiromo bëhi'e mu masije aho'obëhe jabesi nunire vaebe rovadeje. Röhu jabumëro hesi öriroho bogo maho uehorovareje.

<sup>38</sup> Ëhesi bëhoho jö God-aro baeromo majëhinövade ae Isaiah-hu maminö gö'e jajivadëhi ëhi jioröhego ëhuni Iesu bijönimareje. Isaiah-ro God-are surire jajivoromo uvadeje:

Bada rahuro nosi jöho mae uehorovë'e höjo.

Badare darugo'e mu hesi bëhoho rahuro avoho gavë'e höjo.

Isaiah-ro ëhi jajivadeje ijönö jioröhego. Huhu jajivadëhi jaburo ëhi ë'oromo Iesu bogo ma uehorovareje.

<sup>39</sup> Iesu mae uehorovo'iröhoho bogo eni jëvadeje. Bogo eni jëvade hesi bëhoho Isaiah-ro ave jöhu'o surire uhunö'e jajivadeje. Jajivoromo uvadeje:

<sup>40</sup> God-ro uvajëjo: Naro jabesi nunoho tugohëhoromo

uehoroho ijumëhë'e jevajëjo

ëhuro nunoho ramoramovëvoromo uehoroho bogojëvoröhego.

Uehoroho bogojëvego bogo huotorovoromo nasi öriroho bogo rovego naro bogo i'ovëvego bogo mae jëvoröhego.

<sup>41</sup> Isaiah-hu ëhi jajivade hesi bëhoho huro uehore God-aro baeromo Iesuhu baeröhe ajoho garomo huhu vaeröhe jöho jövadeje.

<sup>42</sup> Iae a ioro'ioroho Iesu bogo ma uehorovareje röhu a ioro'ioroho aho'o Jew rajo a masijo ioro'iorohu'o iae hu mae uehorovareje. Mae uehorovoromo röhu uvareje: Pharisee ömo'ömohuro uö'a'aruëjo: Iesu mae uehorovarujohuni God rajahjarue osaroho nadi ijoroho ruerë uö'a'aruëromo ëhuni Pharisee juhuonëmiromo Iesu mae uehorovare jöho subivëhareje.

<sup>43</sup> Uvareje: God-hu no rajahui'iröhoho ëho ma-jianovo'i aehu no rajahuijaruoho iae mae höjo.

*Iesuhu majëhijade jö bijönimë'ohuro sisëro va'iröhe jöhoje.*

<sup>44</sup> Iae Iesuro ma-darugo'o uvadeje: Ae rahu na mae uehorovevë'oho bogo nasi öriroho gemu uehorovevo'i sa'are remö'öjade ahu'o mae uehorovarue höjo.

<sup>45</sup> Ae rahu na gevë'oho sa'are na remö'öjade ahu'o gavarue höjo.

<sup>46</sup> Naro sa'are rovë'ëro aho'o ajivëvaje höjo ëhuro ae rahu na mae uehorovevë'o'ho ë aribövioho bogo ramoramoro'ho raromoröhego.

<sup>47</sup> O ae rahu nasi jö heromo bogo ejehë'o'ho na bogo jabesi jöho mevoromo sisëroho bamëvo'ejöjo. Sa'ae aho'o bogo sisëroho bamëvo'i maro bamëvo'i rovode höjo.

<sup>48</sup> Röhu na'o nasi jöhu'o bijönimë'o'ho sisëre va'iröhe bëhoho iae jiajëjo. Bëhoho ëho naehu majëhibe rovode jöho höjo. Hujeji ijo tugoho'i majaho rue'iramu ë jöho bijönimë'ëro ëhu'ëro sisëro va'a'aruëjo.

<sup>49</sup> Rabëni hesi bëhoho naehu majëhibe rovode jöho bogo nasi ëma jövo'i Vavue sa'are remö'öjadohuro jöho bojemijade höjo naro ëhuremu jövo'irodego.

<sup>50</sup> Röhu naro garomo uvaje höjo: God-hu bojemijade jö aehu ejahë'ohuro ëhuro ma-ioro'io'oremu maro raromarue höjo. Ehu'ëro jië'ëro naehu jövaje jöho Vavuehu uevadëhi iae ëhi gemuoho höjo.

## 13

### *Iesuhu hesi ijorajo ömo'ömo jabesi höru hitahi u'ovëhade jöhoje.*

<sup>1</sup> Iae God-hu Vörö Tugohade Sörö majaho nërëhi jio hesi jiadeje. Nërëhi jio hesi jiamu Iesuro garomo uvadeje: Naehu sa'a nugo'i Vavu hesi örire va'irode majaho iae rovë'e höjo. Röhu hesi aribövi maho ave sa'are raromaruoho mami'e dë vövöbajo'e aho'o uehorovëvobe rovodoho bogo vuonugo'i uehorovëvobe va'adeje ëhi ma-guomoröhego.

<sup>2</sup> Iae Satan-ro mami'e Simon Iscariot-are harihe Judas-are simanoho ijumahadeje huro Iesu bijönimarue a jabesi övore bojëmi'iröhego. Ehi jië'ëro Iesu'o hesi ijorajoho jabu'o raromoromo i harihe ue'ahareje.

<sup>3</sup> Ie ue'ahoromo Iesuro garomo uvadeje: Vavuohuro daruge aho'obëhe nasi övoro bamehë'e höjo. Na God-arire jioromo rovodoho hesi örire vuonorö'ö va'ejöjo.

<sup>4</sup> Hesi örire vuonorö'ö va'ejöromo Iesuro ie ijë'ëro ri'öromo döre niögoho jijöromo uhivarue niögoho dë'ahore muohorovadeje.

<sup>5</sup> Muohorovoromo jovoho hevöre otehoromo aevoromo hesi ijorajo jabesi höroho eguehoromo muohorovade niögoho baeromo höroho uhijëhadeje.

<sup>6</sup> Ehi'obe va'oromo Simon Peter-hu hijajire rovadeje. Rovamu uavadeje: Bada na ja nasi hörohu'o eguehonëjo.

<sup>7</sup> Eguehonëjamu uavadeje: Naehu ömaje hesi bëhoho jaruvoho ja bogo gavanuëjo. U'emu ga'a'anuëjo.

<sup>8</sup> Ga'a'anuëjamu hegoro'vo Peter-ro uavadeje: Nasi höroho bogo egueho'anuëjo. Bogo mae bogajo. Bogajamu uavadeje: Naehu jasi höru bogo eguahë'o'ho ijönöho ja bogo nasi ae gemuoho javo'ajëjo.

<sup>9</sup> Javo'ajëjamu hegoro'vo Simon Peter-ro uavadeje: Ehi jië'e jiaje nadi höremuoho egueho'i a'i övohu'o simanohu'o ëhu'o eguehëjo.

<sup>10</sup> Eguehëjamu Iesuro uavadeje: Rabëni övoho simanoho eguahojörajö. Bëhoho bogohöjo. Ae rahu jabesi sino haho'o jovo eguoromo u'o barëjë'o'ho röhu maho bogo eguoromo'i jabesi hörohëmu eguonövo'aruëjo. Röhu jemesi sisëho mami'e u'ovëhë'ëro mae jëvavëjo. Mae jëvo'i sisëho jemesi ae gemu hesiriremu höjo.

<sup>11</sup> Iesuhu ëhi uëvade hesi bëhoho huro garomo uvadeje: Judas-ro na bijönegarue a jabesi övore bojëmi'ajëjo. Ehuni uëvadeje: Jemë mae jëvo'i sisëho jemesi ae gemu hesiriremu höjo.

<sup>12</sup> Ĕhi uëromo ijorajo jabetesi hërohohu eguëhonugoromo niögu jijö bamadoho röhu maho ba'amoromo va'ohesi röhore hinugoromo uëvadeje: Naehu jemesi örire ömode mu hesi bëhohohu na jemë gavarujëjo o bogajo.

<sup>13</sup> Bëhohohu iae na majëhi'ie'ajëjo. Jemëro uevaruje hëjo: Tisajo o Badajo. Iae mae uevaruje hëjo na ëhi jevë'ego.

<sup>14</sup> Na jemesi Bada'oh Tisa'oh jevajëjo röhu na bogo uvode hëjo: Böviëro jevë'ërohohu bogo eguëho'ejö uvo'ima-eguëhode hëjo. Ĕhuni jemë'oh nadi bövie javuajë uvo'igöërohohu huë baerovoromo hërohohu eguahorovorëjo.

<sup>15</sup> Ĕhesi bëhohohu naru mu mae röjëhijë'e jevajëjo ëhuru naehu jemë ajëmijodëhi jemë'oh ëhi huë baerovoromo ajamirovo'irarijeko.

<sup>16</sup> Ave jëhohu na jë mae uë'ie'ajëjo. Mu ariböviohuru o anue jijiharue ariböviohuru jabetesi a bërömhohu bogo iosiramihohu masije riravarue hëjo.

<sup>17</sup> Ĕjëhohu mae jio'ego jemë iae gavarujëjo. Ĕhuni nadi na iosiremiromu uvorëjo: No masijëroh javuë'ërohohu aho bogo ajëmi'ëjarë uvo'ima-ajamirovorëjo. Ĕhi ë'ë'ohohu huë mae jëvo'ajëjo.

<sup>18</sup> Huë mae jëvo'ajë uëvaje jëhohu ëhohu bogo aho'obëhe jemesi jëhohu uëromohu ë'ajëjo. Jemë diehi jïë'e ariböviohuru baejëvodohu iae na gëvaje hëjo. Mami'e God-are surire jëhohu jajivoromohu uvë'e hëjo: Na'oh gemu mae i ijajohuru huotorovoromohu na'oh muorovo'ih nimade hëjo. Ĕhi jiorëhego God-are surire jajivadëhi iae ëhi jïë'e mu sisëhohu jio'a'ajëjo God-are surire jëhohu bogo bejajëroh jïë'ërohohu.

<sup>19</sup> Ĕmu sisëhohu bogo vejë'ohohu jio'ih u'ëmu jio'a'ajëjo. Röhu aviavejë'oh uëvajëjo jemëroh gairarijeko ë mu sisëhohu rovego garomohu uvo'irarijeko: Iae mae-ëjo. Nörö jiemu jiaje A Bërömhohu hëjo.

<sup>20</sup> Röhu ave jëhohu na jë mae uë'ie'ajëjo. Naehu rëmö'öjeko rovarue ariböviohohu aho rahu huë ariböviohuru rajëhiromohu baejëvë'ohohu ëhuru na'oh rajëhiromohu baejëvoruomaje hëjo. O aho rahu na rajëhiromohu baejëvë'ohohu ëhuru rëmö'öjamu rovode ahu'oh rajahiruomaje hëjo.

*Judas-hu Iesu bijönimarue a jabetesi övore bojëmi'tröhejö Iesuhu jövadohoje.*

<sup>21</sup> Ĕhi uëromohu hesi dë vövöbajohere huë vavaene bërömhohu baejadeje. Huë vavaene bërömhohu baeromohu ma-sama'eh majëhiromohu uëvadeje: Ave jëhohu na jë mae uë'ie'ajëjo. Jemesirire jiaje aho gemuëroh na bijönegarue ariböviohuru jabetesi övore bojëmi'anuejo.

<sup>22</sup> Ĕhi uëvamuh hegorovohu hesi ijorajohu jaburo nuniro garorohu garorohu baeromohu uvareje: Rahuare jëhohu uëromohu ë'ajëjo.

<sup>23</sup> Röhu Iesuare ijoraje aho gemuëroh Iesuare bëhi mare hijë'e jiajeje. Iesuro ë aho hesi dë vövöbajohere aho'oh rajahinövadeje.

<sup>24</sup> Ĕahohu Iesuare bëhire hijë'e jiamuh Simon Peter-ro ë aho hesi örire uvenëroh uavadeje: Ua gavëjo: Rahuare jëhohu uëromohu ë'anuejo.

<sup>25</sup> Uëromohu ë'anuejamuh ë ijorajohuru Iesu hiah'iro saginiëroh uavadeje: Bada jia rahuare jëhohu uëromohu ë'anuejo.

<sup>26</sup> Uëromohu ë'anuejamuh Iesuro uavadeje: Naru iohohu baeromohu ijo baje nemarire ba'amoromohu ioromohu aho gemu bojami'ejëjo. Bojamijeko garomohu uvonëjo: Iae ë ahuru ëhi sisë vaejevo'ajëjo. Ĕhi uanugoromohu ioh gemu baeromohu ba'amoromohu ioromohu Simon Iscariot-are harihohu Judas bojami-jadeje.

<sup>27</sup> Bojamamuh Judas-ro baeromohu ijamuh gavë'ih Satan-ro ë aho hesi dë vövöbajohere abuejadeje. Abuejamuh Iesuro uavadeje: Jaehuh vae'ih ë'anue muohohu ma-burëroh va'ohomohu vaejëjo.

<sup>28</sup> Vaejĕjĕmĕ hegorovo raromoro i ijarue ariböviohuro bĕhoho rabĕni Iesuhu Judas ĕhi uavajoho bogo avoho hejareje.

<sup>29</sup> Bogo avoho he'irögoro a ioro'iorohuro uvareje: Judas-ro moni bahi-jaruoho muebejajego ĕhuni nani Iesuro uaromo ĕ'ajĕjo: Va'oromo söröĕni ie imahuĕjo. O va'oromo inömo rumo'e aribövioho monioho gö suvuorĕmijĕjo. Ĕhuni uaromo ĕ'ajĕjo.

<sup>30</sup> Röhu Judas-ro Iesuhu bojamijade ioho baeromo ma-burĕro höröromo ramoramoro va'adeje.

*Göehu gö rajahirovo'iröhe jö i'ohoje.*

<sup>31</sup> Judas va'amĕ gagorovo Iesuro uĕvadeje: Avevejö'oho God-are A Ma nasi aji'e muoho röjĕhijĕ'e höjo. God-ro daruge bojemijĕ'ĕro hesi aji'e muohu'o röjĕhijĕ'e jevajĕjo.

<sup>32</sup> Naro God-are ajoho ae röjĕhi'iramĕ evare God-ro hesi A Ma nasi ihoho banigojiomĕho'ajĕjo. Hu ma-burĕro iae ĕhi ĕ'iĕ'ajĕjo.

<sup>33</sup> Nasi harihu ömo'ömohumĕ na jemĕ'oho majae ma-bunĕmu hi'ejöjo. Hiromo va'iramĕ nahevo'arujĕjo. Röhu Jew rajo masijo mami'e uĕvodĕhi jemĕ'o ĕhi uĕ'iĕ'ajĕjo: Naehu va'irodire jemĕ ĕ ö'irarijoho bogo ĕni jĕvajĕjo.

<sup>34</sup> Röhu jögoro i'e bojĕmi'iĕ'ajĕjo. Göĕro göho rajahirovorĕjo. Naehu jemĕ rajĕhibe rovodĕhi jemĕ'o ĕhi gemuoho ĕ'orĕjo.

<sup>35</sup> Jemĕ rajahirovĕ'oho ĕhuro ae aho'obĕhe gĕromo uvoruomo'ajĕjo: Jemĕ nöruare ijore ijore jijiharuje aribövio ĕevajĕjo.

*Peter-hu Iesu gavajoho subivĕho'iröhe jö Iesuhu jövdohoje.*

<sup>36</sup> Ĕhi uĕvamĕ Simon Peter-ro uavadeje: Bada röhu ja dinö'e va'onĕjo. Dinö'e va'onĕjamĕ uavadeje: Naehu va'irodire avevejö'e ĕ ö'iranoho bogo ĕni javajĕjo. U'ĕmu ö'a'anuĕjo.

<sup>37</sup> Ö'a'anuĕjamĕ hegorovo Peter-ro uavadeje: Bada röhu avevejö'e naehu jasi ijore ö'ĕ'oho rabĕro bogo ĕni jevajĕjo. Naehu ajamiromo jani guomevĕ'oho iae mae höjo.

<sup>38</sup> Iae mae höjamĕ Iesuro uavadeje: Peter jero uvanuĕjo: Naro nöro ajamiromo guomorovo'ejöjo. Röhu ave jöho na jö mae ua'iĕ'ajĕjo. Kökörökoho bogo uvĕ'e jero majae niö'i gemu ae uĕ'a'anuĕjo: Na Iesu bogo gavaje höjo.

## 14

*Vavu hesirire va'arue öroho Iesu jiaje jö Iesuhu jövdohoje.*

<sup>1</sup> Iae Iesuro hesi ijorajo ömo'ömoho uĕvadeje: Nadi nurunurumoro uehore gö gö bae'i a'i God-are öroro mae uehorovoromo nasi örohu'o ĕhu'o mae uehorovorĕjo.

<sup>2</sup> Ĕhesi bĕhoho nasi Vavu hesi osare röhoho aho'obĕhe jio'amajĕjo. Ĕhuni na ĕ va'oromo jemĕhu raromo'irarije röhoho avohĕho'ejöjo. Naehu jövaje jöho bogo maehu jio'ibejajo bogo uĕ'ibejöjo.

<sup>3</sup> Va'oromo jemesi röhoho avohĕhonugoromo vuonorö'ö rueromo söjĕvoromo nasirĕro va'ejöjo ĕhuro naehu hijajire jemĕ'o ĕ raromo'irarijĕjo.

<sup>4</sup> Naehu va'oromo hi'irode öroho jemĕ iae gavaruje höjo.

<sup>5</sup> Gavaruje höjamĕ Thomas-ro uavadeje: Bada jero ĕhi uövuanuĕjo röhu jaehu dinö'e va'o hi'iranoho no bogo gavaruĕjo. Ĕhi jiĕ'oho ja diehi'oromo uövuanuĕjo: Öroho iae gavaruje höjo.

<sup>6</sup> Gavaruje hōjamu Iesuro uavadeje: Mare va'irarije öroho na jevajëjo. Jö ma ga'irarije öroho na jevajëjo. Darugo bae'irarije öroho na jevajëjo. Vavuohu'o gemu mae jëvojöro nëgë'iroho öroho na gemu jevajëjo.

<sup>7</sup> Jemë na gevë'e jëvë'ëro nasi Vavuohu'o ga'a'arujëjo. Jaruvoho aevoromo jemë ë A hesi bëhoho uehore baeromo gabe va'a'arujëjo.

<sup>8</sup> Gabe va'a'arujëjamu Philip-ro uavadeje: Vavuoho röjahuijego no gavarëjo. Gavë'oho ëhuro no mae javuo'ajëjo.

<sup>9</sup> Mae javuo'ajëjamu uavadeje: Philip na majae ëgobövie jemë'o hijë'e jevajëjo. Èhu'oho ja diehi'oromo bogo avoho gevanuëjo. Ae rahu na gevë'oho nasi Vavuohu'o garuomaje hōjo. Èhu'oho ja diehi'oromo uevanuëjo: Vavuoho röjahuijego no gavarëjo.

<sup>10</sup> Ja diehi'oromo bogo uehorovoromo uvanuëjo: Nöröro Vavu hesi dë vövöbajo'ere jio'i Vavuohuro nöruare dë vövöbajo'ere jiajëjo. Naehu jemë uëvaje jöho bogo nasi ëma uehorovoromo uë'i a'i Vavue nasi dë vövöbajo'ere hijajohuro huro hesi muoho nasi dë vövöbajo'ere vaejego na vaejaje hōjo.

<sup>11</sup> Na uëvode hōjo: Naro Vavu hesi dë vövöbajo'ere jio'i Vavuohuro nasi dë vövöbajo'ere jiajëjo. Èjöhö heromo uvorëjo: Iae mae-ëjo. O jemë uvë'oho: Nöruare jöho bogo eni hō uvë'oho naehu vaejaje mu masijoho uehorovoromo uvorëjo: Nöruare jöho mae hōjo.

<sup>12</sup> Ave jöho na jö mae uë'ië'ajëjo. Ae rahu na mae uehorovevë'oho naehu vaejajëhi jië'e darugo'e muoho vae'a'arujëjo. Röhu naehu vaejaje darugo'e muoho ma-jianovajoho u'emu jemëro darugo'e mu masijo maho vae'a'arujëjo rabëni naro Vavu hesi örire va'iramu.

<sup>13</sup> O jemë rabe rabe Vavuoho nasi ihore ua gavë'oho naro ëhi vaejëho'ejöjo ëhuro Harihu nasi muoho garomo uvo'irarijego: Vavuoho böröme hōjo.

<sup>14</sup> No nöruare aribövie javuajë uvoromo rabe rabe ue gevë'oho iae na vaejëho'ejöjo.

*God-hu hesi Aru'aho mëmi'iröhe jö Iesuhu jövodohoje.*

<sup>15</sup> Jemë na rajehijë'ohuro nasi jögoroho ejeho'arujëjo.

<sup>16</sup> Ejeho'iramu naro Vavuoho ua'iramu Ajëminövo'iröhe A göho bojëmi'ajëjo huro rueromo jemë'o ma-ioro'ioemu hi'iröhego.

<sup>17</sup> Ajëminövo'iröhe Aho iae jö maemu barovaje Aru'ahoho hōjo. Sa'arohemu uehorovarue ariböviohuro ë Aru'ahoho bogo uehorovoromo simanoho bogo avoho gavaruëro jië'ëro ëhuni bae'iröhoho bogo eni jëvajëjo. A'i jemëro hu avoho gavaruje hōjo. Avevejö'e hu jemë'o hijajoho u'emu jemesi dëre abo hibe va'a'ajëjo. Iae ëhuni jemë gavaruje hōjo.

<sup>18</sup> Naro jemë rëmo va'iramu jemë bogo sivuoho öbioho raro-manovo'arujëjo. A'iro na vuonorö'öromo jemesirire rue'ejöjo.

<sup>19</sup> Majae ma-bunemu barë'iramu sa'arohemu uehorovarue ariböviohuro bogo geruomajëjo. Röhu jemëro iae ge'a'arujëjo. Na hiemu hijajohuro ëhuro jemë'o daruge baeromo raromo'arujëjo.

<sup>20</sup> Èho majaho rue'iramu jemë garomo uvo'a'arujëjo: Nörö hesi Vavu hesi dë vövöbajo'ere jio'i no nöruare dë vövöbajo'ere javuo'i nörö nosi dë vövöbajo'ere jiajëjo.

<sup>21</sup> Ae rahu nasi jögoru baeromo ejehë'oho ëhi jië'e ariböviohuro rajehiruo-maje hōjo. Rajehijë'oho nasi Vavuohuro jabumë rajëhi'ajëjo. Rajëhi'iramu na'o ë aribövioho rajëhiromo va'orahoro röjahirovo'ejöjo geruomoröhego.

<sup>22</sup> Èhi uëvamu Judas-ro bogo Judas Iscariot a'i Judas göhuro Iesu uavadeje: Bada ja diehi'oromo nosi örire gemu jasi arijo'arije röjahirovo'i sa'arohemu uehorovarue aribövi jabesi öriroho bogo röjahirovo'ië'anuëjo.

<sup>23</sup> Bogo rōjahirovo'ie'lanuējamu uavadeje: Ae rahu na rajehijē'oho ē aribōviohuro nasi jōho ejehoruomo'ajējo. Ejeho'iramu nasi Vavuohuro jabumē rajēhiromo hu'o na'o ō'oromo jabu'o gemu mae ari'ejarejo.

<sup>24</sup> O ae rahu bogo rajehijē'oho nasi jōho bogo ejehoruomaje hōjo. Jemē hejaruje jōho bogo nasirehu jio'i a'i Vavuehu remō'ōjamu rovode a hesi jōho hōjo.

<sup>25</sup> Na jemē'o hijē'i ē jōho majēhijē'e jevajējo.

<sup>26</sup> O Vavuohuro jemē Ajēminōvo'irōhe Aho ē hesi bēhoho Vavu hesi Aru'ahoho nasi ihore nugō'ō'iramu huro jemē bōvioho bise'oho rōjēhiromo simanoho huotovēho'iramu naehu majēhijode jōho uehorovo barē'arujējo.

<sup>27</sup> Nasi huē maho jemesi ōrire bojēmijajējo rēmo va'iē'ēro. Sa'arohemu uehorovarue aribōviehu huē ma bojēmijaruēhioho na bogo ēhioho bojēmi'i uhohu'o bojēmijajējo. Nadi nurunurumoromo juhuonivorējo.

<sup>28</sup> Mami'e jemē hejarije hōjo naro uēvamu: Na va'ejōjo. Rōhu na vuonorō'ōromo jemesirire rue'ejōjo. Jemē na avoho rajehi'ibejarijējo nasi Vavu hesirire va'irode jōho heromo nimoroho'ibejarijējo Vavuehu na iosiremiromo bōrōmo jiajohuni.

<sup>29</sup> Avevejō'oho ē muoho bogo vaejē'e rōhu urimo na ma-majēhijē'e jevajējo ēhi'ego garomo evare mae uehorovo'irarijego.

<sup>30</sup> Rōhu na bogo majae ēgo'oho jemē jōho majēhi'ejōjo ave sa'are Sisē A Bōrōmoho rue'ego ēhunivo. Rōhu hu bogo nasi bōvioho jiē'ēro hu jōho bogohōjo.

<sup>31</sup> Rōhu na nege sa'ae aho'o jaburo garomo uvoruomorōhego: Nōrōro Vavuoho iae rajahiromo Vavuehu jō bojamijadēhi nōrōro ēhi ē'aje hōjo. Ahia mino'ējo. Ri'ōhego no va'arējo.

## 15

*Iesu grape bajo rae'amaje ō'i mae jiaje uhu jō Iesuhu jōvadohoje.*

<sup>1</sup> Iae Iesuro hesi ijorajo ōmo'ōmoho jō viture uhu'e uēvadeje: Grape bajo rae avohaje ō'oho na jevajējo. Ō'i muebejaje aho nasi Vavuoho hōjo.

<sup>2</sup> Na'o bimuvaruje aribōvioho ēho ō'i ado sirino'oho jio'amajējo. Ō'i muebejaje ahuro garōhe di adoho bajoho bogo rae'amamu gavē'oho duvahore tarivoromo ruruhō'ōjaje hōjo. O garōhe di adoho bajoho raejamu gavē'oho iogororomo sirino sirino harihu sahori'amē'oho tarivo ruruhō'ō'i mahemu nugaje hōjo ēhuro ē adohuro bajoho rae avohorōhego.

<sup>3</sup> Rōhu naehu majēhijode jōho ejehē'ēro ēhuro jemē adonō'e mami'e iogorēvē'e hōjo.

<sup>4</sup> Rōhu jemē na'o gemuore bimuvoromo raromarujoho ēhi raromorējo. O naro jemē'o gemuore bimuvoromo hijajoho ēhi hi'ejōjo. Jemēhu na'o bogo gemuore bimuvoromo raromē'oho bogo rae avoho hesi jēvajējo. Ō'i adehu aho najore bogo bimuvē'ēro sisērōromo bajo bogo ma raejajēhi ēhi jēvo'ajējo.

<sup>5</sup> Ō'i bēhoho na jevo'i jemē ado sirino'oho jēvajējo. Ae rahu na'o gemuore bimuvoromo raromo'i naehu jemē'o gemuore bimuvoromo hijē'ohuro ēhuro rae avoho'arujējo. O na'o gemuore bogo bimuvē'oho i'o mu'o vaejē'oho bogo mae bogo eni jēvo'ajējo.

<sup>6</sup> Ae rahu na'o bogo gemuore bimuvoromo raromē'oho ado suaromo ruruhō'ōjego sisērējajēhi ēhi jēvo'ajējo. Ēhi jiē'e adoho gagovoromo vēnire huego ravo'amaje hōjo.



<sup>7</sup> Röhu jemë na'o gemuore bimuvoromo raromë'oho o nasi jö jemesi dë vövöbajo'ere jië'oho ehuro jemë rabe rabe God ua ga'i nögë'oho uarëjo. Ua gavë'oho iae bae'a'arujëjo.

<sup>8</sup> Jemë bajo rae avohë'ohuro ehuro nasi Vavu hesi ihoho döro jiaje höjo. O bajo rae avohë'ohuro ehuro nasi ijore ijore jijiharuje aribövi mae jëvo'ajëjo.

<sup>9</sup> Iae Vavuehu na rajehijadëhi naro ëhi jemë rajëhijë'e jevajëjo. Naro ëhi rajëhijë'e jevaje ehuni na'o gemu mae ëhi raromorego na rajëhiemu rajëhinövo'iröjo.

<sup>10</sup> Jemëhu nasi jögoru ejehë'oho ehuro na'o gemu mae raromo'iramu ehuro na rajëhinövo'ejöjo. Naehu nasi Vavu hesi jögoru ejahë'ëro hu'o hijego huhu rajehijajëhi jemëro ëhi na'o raromo'iramu rajëhinövo'ejöjo.

<sup>11</sup> Naehu jö ëhi jövaje hesi bëhoho naehu nimorohajëhi jemë'o na'o gemu mae nimoroho'irarijego bogo bisemuoho nimoroho'i nimoroho avoho'irarijego.

<sup>12</sup> Ave jögoroho naro bojëmi'ië'ajëjo. Naehu jemë dë vövöbajo'e aho'o uehorovëvajëhi jemëro göëro göho ëhi uehorovëvorëjo.

<sup>13</sup> Göehu gö dë vövöbajo'ere uehorovëvarue mu börömocho aviëhi höjo nosi aganoho ajëmi'i vuovorovo'ejarëjo. Mu ioro'ioroho ma-jianovajëjo.

<sup>14</sup> Nasi jögoru ejehë'oho jemë nasi agane jëvaje höjo.

<sup>15</sup> Urimoho na bogo aganoho uë'i a'i uënövode höjo: Nasi mu vaejaruje aribövie jëvajëjo. Ae gö jabesi mu vaejarue ariböviohuro jabesi masijehu vaejarue mu hesi bëhoho bogo garuomaje höjo. Ehuni avevejö'oho na bogo nasi mu vaejaruje aribövioho uë'i a'i agane uëvajëjo ë hesi bëhoho nasi Vavuehu rabe rabe uevamu hejode jöho naro röjëhijamu jemë gavë'ego.

<sup>16</sup> Jemë na bogo baejevo'i a'i naro jemë baejëvode höjo. Baejëvoromo muro bamëvode höjo jemëro va'oromo ioro'ioemu jioröhe bajoho rae avoho'irarijego. Ehü jië'e bajo rae avohë'oho ehuro jemëhu Vavu hesi örire rabe rabe nasi ihore ua gavë'oho iae huro bojëmi'ajëjo.

<sup>17</sup> Ehü'ëro jië'ëro ave jögoroho naro bojëmijajëjo. Göëro göho dë vövöbajo'e aho'o uehorovëvorëjo.

*Sa'are mu sisë uehorovoruomaje ariböviehu Iesuare aribövi nu huodaguo'iröhe jö Iesuhu jövadohoje.*

<sup>18</sup> Sa'arohemu uehorovarue ariböviehu jemë nu huodëgaruoho uvorëjo: Urimo ëhi jië'e ariböviohuro nöro nue huodivoruomade höjo.

<sup>19</sup> Jemë'o sa'arohemu uehorovaruje aribövie jëvo'ibejajo ë ariböviohuro uvoruomo'ibejajo: Jemë nosi aribövie gemuoho jëvajëromo rajëhi'ibejarëjo. A'i jemë sa'arohemu uehorovarijoho naro baejëvode höjo nasinö jëvoröhego. Baejëvë'ego jemë bogo jabu'oho havoromo ave sa'a hesirohemuoho uehorovaruje höjo. Ehuni ë ariböviohuro jemë nue huodëgarue höjo.

<sup>20</sup> Jemë'o uehorovohëjo. Naro mami'e uëvode höjo: Mu ariböviohuro jabesi a masijoho bogo iosirëmiromo masijoho riravarue höjo. Ejö hesi bëhoho jemesi börömocho na sisë vaejevë'ëro ehü'ëro sa'ae aho'o jaburo mu vaejaruje aribövioho jemë'o sisë vaejëvo'aruëjo. O nasi jö ejehë'oho jemesi jöhu'o ejëho'aruëjo.

<sup>21</sup> Jemëro nasi ihoho baejë'ego ehuni ëho jaburo jemesi örire ëhi sisë vaejëvoruomo'ajëjo rabëni hesi bëhoho sa'are na remö'öjade aho jabumë bogo gavaruëro jië'ëro.

<sup>22</sup> Na bogo sa'aroho rueromo jöho jabetesi öriroho majëhi'ibejjo jabetesi jö sisëho bogojio'ibejajo. Röhu nasi jöho majëhijamu hejare höjo. Hejë'ëro bogo uö'a'aruëjo: Noehu mu sisë vaejaroho bogo gavë'e ëma ë'are höjo.

<sup>23</sup> Na nu huodegë'o'oho nasi Vavuohu'o nue huodivoruomaje höjo.

<sup>24</sup> Ae göehu bogo vaejarue ëhi jië'e darugo'e mu masijoho naro jabetesi nunire vaenövode höjo. Jabetesi nuniroho ëhi jië'e muoho bogo vae'ibejjo ëhuro jabetesi jö sisëho bogojio'ibejajo. O avevejö'oho jabumë nasi muoho iae gavare höjo röhu na'o nasi Vavuohu'o nue huodaguoruomaje höjo.

<sup>25</sup> Jabuhu nu huodaguarue hesi bëhoho urimë'i jabetesi jögoru surire jajivoromo uvë'e höjo: Na sisëho bogo ömë'e jabumë ëma nue huodegare höjo. Röhu nue huodego'iröhe jö jajivadëhi ëhi nue huodegarue höjo God-are jöho bogo bejajëro jië'ëro.

<sup>26</sup> Röhu jemë Ajëminövo'iröhe Aho jö maemu barovaje Aru'ahohuro jië'ëro Vavuohu'o gemu mae hijaje höjo. Ëhi hijajëro jië'ëro naro nugö'ö'iramu Vavu hesirire jioromo jemesi örire ruvebi'ajëjo. Ruvebiromo nasi jöho huruoho majëhi'ajëjo.

<sup>27</sup> O jemë'o nasi jöho huruoho majëhi'arujëjo aevo'i na'o raromobe rovë'ëro jëvë'ëro.

## 16

<sup>1</sup> Ëjöho naro uëvajëjo jemë mae uehorovevarujoho vuonugojöëni.

<sup>2</sup> Jew rajehu God rajahjarue osare osare jemëhu gagovoromo God rajahjarujoho aëro ahëvoruomö'ajëjo. O majae ijonö aehu jemë muo'amëvë'iroho uvoruomö'ajëjo: Noehu Iesuare aribövi muo'amaruoho ëho God-are mue vaejaruëjo.

<sup>3</sup> Ëhi jië'e huë vavaeni'e muoho jemesi örire vaejëvo'aruëjo ë hesi bëhoho Vavuohu'o na'o bogo gövuaruëro jië'ëro.

<sup>4</sup> Röhu naro ë jöho uëvajëjo ëhuro naehu ëhi uëvode huë vavaeni majaho rovego jemëro uehorovoromo uvo'irarijego: Nöröro uövuade höjo: Ëhi jië'e mu sisëho rue'a'ajëjo.

### *God-are Aru'ahuhu mu vaejaje jö Iesuhu jövadohoje.*

Ëhi jië'e jöho na bogo aevo'ioho uëvode hesi bëhoho na urimë'i jemë'o hibe juvoromo ëhuni bogo uëvode höjo.

<sup>5</sup> Röhu avevejö'oho na jemë'oho bogo hi'i a'i na remö'öjamu sa'are rovode a hesi örire vuonorö'ö va'ië'ajëjo. Jemë bogo ae gemu vadu'oho uevarujëjo: Ja dinö'e va'ië'anuejo.

<sup>6</sup> Röhu na va'i uëvodohuni ëhuni jemë sisë maro vavaenimarujëjo.

<sup>7</sup> Ave jöho na jö mae uë'ië'ajëjo. Na bogo va'ibejjo bisemu sisë jëvo'ibejajo. O na va'ë'ohuro ëhuro maho jëvo'ajëjo. Ëhesi bëhoho na bogo va'ibejjo ëhuro God-are Aru'ahuhu Ajëminövo'iröhoho jemesi öriroho bogo rue'ibejajo. O va'ë'oho ëhuro naro Aru'ahoho jemëni nugö'ö'iramu rue'a'ajëjo.

<sup>8</sup> Aru'ahohuro rueromo sama'e röjëhi'a'ajëjo ae aho'o ga'irarijego sa'arohemu uehorovarue aribövioho jaburo mu sisë hesi öroho mu ma hesi öroho sisë mevëho'iröhe hesi öroho bogo avoho uehorovoromego.

<sup>9</sup> Mu sisë hesi öri bogo avoho uehorovarue hesi bëhoho jabumë nasi öriroho bogo maho uehorovevoruomaje höjo.

<sup>10</sup> Mu ma hesi öri bogo avoho uehorovarue hesi bëhoho naro Vavu hesi örire maro va'iramu ijonöho bogo ge'a'arujëjo.

11 Sisë mevëho'iröhe hesi öri bogo avoho uehorovarue hesi bëhoho ave sa'are Sisë A Börömo hesi muoho mami'e mevamu bejë'e höjo.

12 Naehu jemë jöe aho'obëhe majëhi'irodoho avevejö'e simanore uehorovo'irarijoho jemë bogo eni jëvajëjo.

13 Iae ëhi höjo röhu jö mae barovaje Aru'ahohuro rovë'iroho huro mu ma hesi öroho röjëhi barë'ajëjo. Hu bogo hesi ëma uehorovoromo jöho jövo'i a'iro jöe rabe rabe hejë'o ho ëho jövoromo röhu u'emu jioröhe mu jöho huruoho majëhi'ajëjo.

14 Naro jöe jövo'iramu Aru'ahohuro nasi jöho baeromo jemë huruoho majëhi'iramu ëhuro nasi ihoho döro jio'a'ajëjo.

15 Vavuehu jövaje jöho aho'o nasirohu'o gemuoho höjo. Iae ëhuni na uëvajëjo: Naro God-are jöe jövo'iramu Aru'ahohuro nasi jöho baeromo jemë majëhi'ajëjo.

*Iesuare ariböviehu huë vavaeni baeromo barëjego huë mae bae'iröhe jö Iesuhu jövadohoje.*

16 Majae ma-bunemu barë'iramu jemë na bogo ge'a'arujëjo. Bogo geromo röhu va'o majae ma-bunemu barë'iramu evare röhu maho ge'a'arujëjo.

17 Ge'a'arujëjamu hegorovo hesi ijorajo ioro'iorohuro uarovareje: Iesuro no uövuajëjo: Majae ma-bunemu barë'iramu bogo geromo röhu majae ma-bunemu barë'iramu ge'a'arujëjo. Hu diehi uöromomo jövajëjo. O uövuajëjo: Na bogo ge'irarije hesi bëhoho na Vavu hesi örire va'ië'ajëjo. Èhu'o hu diehi uöromomo ë'ajëjo.

18 Majae ma-bunemu uvaje jö bëhoho rabe höjo. Hu rabu jö jövajoho no dadivavuajëjo.

19 Èhi uarovamu Iesuro garomo uvadeje: Arue aribövioho ue ge'i nimarue'romo uëvadeje: Na uëvajëjo: Majae ma-bunemu barë'iramu bogo ge'a'arujëjo. Bogo geromo röhu va'o majae ma-bunemu barë'iramu röhu maho ge'a'arujëjo. Na jemë ë jö hesi bëhoho naho'i atarujëjo.

20 Ave jöho na jö mae uë'ië'ajëjo. Jemë sisë maro nierusuburu'e bamo'arujëjo. A'i ave sa'arohemu uehorovarue ariböviohuro nimoroho avoho'aruëjo. Jemë huë vavaene bae'a'arujëjo röhu huë vavaeni bae'irarijoho barëromomo dë mae jövo'iramu nimoroho'arujëjo.

21 Magonahehu raho'ië'iroho hejaje höjo vi'ehimavego huë vavaene baejaje höjo. Huë vavaene baeromo harihoho rahonugoromo uvaje höjo: Iae harihoho mabëhe baejë'e jevajëromomo nimorohaje höjo. Nimorohego ëhuro hesi vi'ehoho rumonimaje höjo.

22 Magonahehu huë vavaeni rumonimajëhi jemë'o huë vavaeni baejarujoho ëhi rumonimo'arujëjo. Avevejö'o ho jemë nasi jöëni huë vavaene baejarujëjo. Huë vavaeni baejarujoho u'emu naro röhu maho ro gë'iramu nimoroho'arujëjo. Jemëhu nimoroho'irarijoho aho bogo ahëvo hesi höjo.

23 Èmajaho rue'iramu jemë bogo nasi öriroho ue ge'a'arujëjo naro ajëmijöro. Röhu ave jöho na jö mae uë'ië'ajëjo. Jemë rabe nëgamu Vavuoho nasi ihore ua gavë'o ho hu iae ajëmi'ajëjo.

24 Urimoho nasi ihoroho bogo uabe rovarijoho röhu aevoromo nasi ihoro ua ganövorëjo. Èhi jië'o ho jemë ua ga'irarijoho iae baeromo nimoroho avoho'arujëjo.

*Sa'are mu sisë uehorovoruumaje aribövi jabesi mu sisë Iesuhu ruahö'öjëho'iröhe jö Iesuhu jövadohoje.*

<sup>25</sup> Na uhu'e jöe gö gö jövoromo ehuro nasi jöho majehijajëjo. Röhu ijönö majaho rue'iramu evare uhu'oho bogo majëhi'i Vavu hesi jöho ma-sama'e majëhi'ejöjo.

<sup>26</sup> Eho majaho rue'iramu jemë Vavuoho nasi ihore ua ganövo'arujëjo huro ajëmi'iröhego. Ua ga'irarijoho na bogo uëvajëjo: Naro jemesi jöëni hu ua ga'ejöjo

<sup>27</sup> rabëni hesi bëhoho Vavuohuro iae hesi dë vövöbajo'e aho'o jemë uehorovëvajëro jië'ëro. Ehuni jemesi jöëniho na bogo ua ga'i jemesi ua ganövo'arujëjo. Vavuehu jemë uehorovëvaje hesi bëhoho jemëro na rajehiromo mae uehorovoromo uvaruje höjo: Nörö Vavu hesirire jioromo rovade höjo.

<sup>28</sup> Iae mae-ëjo. Iae na Vavu hesirire rovë'ëro ave sa'are hijajëjo. Hijajëro ave sa'aho nugo'i Vavu hesi örire vuonorö'ö va'ië'ajëjo.

<sup>29</sup> Va'ië'ajëjamu hesi ijorajoho jaburo uavareje: Asë'e avevejö'oho ja bogo uhu'oho jövo'i ma-sama'e jövanuëjo.

<sup>30</sup> Avevejö'oho no garomo uvaruëjo: Ja bövie bise'e ga barëjë'e javajëjo. Ja bogo ae gö uö gövuanue höjo: Jö rabe ue ge'i nëgajëjo. Uö gö'irane bëhoho bogohöjo jero mami'e gövuë'ëro. Ehuni no mae uehorovoromo uvaruëjo: Ja God-arire jioromo rovane höjo.

<sup>31</sup> Rovane höjamu Iesuro uëvadeje: Na jemë jaruvoho mae uehorovarujëjo.

<sup>32</sup> Majae ijönöho majae ma-bunemu jio'iramu jemëro na remö'ö barëromo jemesi osare osare huruomo va'iramu sivue jevo'ajëjo. Röhu na bogo sivuoho jevo'i Vavuoho na'o jiaje höjo.

<sup>33</sup> Ejöho na majehijajëjo ehuro jemë heromo nasi ae gemuohuro jëvë'ëro juhuonoho bogojëvo'i huë mae jëvo'iröhego. Sa'are jiaje mu sisëro jië'ëro ehuro sa'are raromoromo huë vavaene bae'a'arujëjo. Ehi höjo röhu naro mu sisëho ruahö'öjë'e jevaje ehuni biririvorëjo.

## 17

### *God-hu Iesuare aribövi ajëmiröhego Iesuhu ëninamade jöhoje.*

<sup>1</sup> Iesuro hesi aribövioho ëhi uënugoromo ö'idöre siorohoromo uavadeje: Apajo. Majaho rovë'e höjo. Na jasi Harihe jevaje nasi ihoho döro banigojiomehonego naro jasi ihohu'o döro banigojiomaho'iröjo.

<sup>2</sup> Jero jöho bojëmijane höjo naro döro namiromo ae aho'obëhe muebejëvo'irodego. Muebejëvoromo ehuro jaehu bojëmijane aribövioho naro darugoho bojëmego jaburo ma-ioro'ioremu maro raromo'iröhego.

<sup>3</sup> Aehu ma-ioro'ioremu maro raromarue hesi bëhoho ëho God ja gavarue höjo ja gemu maho javego. O jaehu remö'öjamu ave sa'are rovode aho Iesu Keriso na gevarue höjo. Ma-ioro'ioremu maro raromarue hesi bëhoho iae ëhi höjo.

<sup>4</sup> Naro ave sa'are hiromo jaehu bojëmane muoho vae barëromo ehuro jasi ihoho döro banigojiomë'e jevajëjo.

<sup>5</sup> Röhu Apo avevejö'e na ja'o hijajoho jero nasi ihoho döro banigojiomehonëjo. Urimo sa'a bövi bise'o bogo bamanëvare evare naro ja'o hijamu nasi ihoho dö maro jiade höjo. Ehi jië'e ihe gemuoho bojëmego na bae'iröjo.

<sup>6</sup> Ave sa'a hesirohemu uehorovarue aribövioho God jero a ioro'ioroho baejëvoromo nasi örire bojëmamumu baejëvode höjo. Baejëvoromo ja diehi jië'e ae javajoho naro röjehijode höjo. Jabumë jasinö jiaroho jero na bojëmamumu baejëvode höjo. Baejëvamumu jabumë jasi jöho ejahë'e höjo.

<sup>7</sup> Ejahë'ëro avevejö'oho jaburo garomo uvarue höjo: Jaehu bojemijane jöho muoho bövioho bise'oho jasi örire jioromo rovë'e höjo.

<sup>8</sup> Jabuhu ëhi uvarue hesi bëhoho jaehu röjehijane jöho naro jabesi örire röjehijë'e jevajëjo. Röjehijamu heromo baejare höjo. Baejë'ëro garomo uvarue höjo: Iae mae-ëjo. Nörö jasi örire jioromo rovade höjo. Ëhi uvoromo mae uehorovoromo uvarue höjo: God jero nörö ave sa'are nugö'öjane höjo.

<sup>9</sup> Na jabumëni ëninamijajëjo. Na bogo uavajëjo jero sa'arohemu uehorovarue aribövioho ajëmi'i a'i jaehu bojemane aribövioho ajëmi'iranego jasinö jëvë'ëro.

<sup>10</sup> Ae bövie bise'e na'o jiaruoho jasirohu'o jioruomajëjo. O ae bövie bise'e ja'o jiaruoho nasirohu'o jioruomajëjo. Nasi iho börömoho jabumëro ae ma-va'orahoro röjehijë'e höjo.

<sup>11</sup> Na jasirire ö'ië'ajëjo. Ave sa'aroho bogo ëgo'oho hi'i a'i jabumë ave sa'are ëhi raromonövo'aruëjo. Sa'are raromo hesi jioruomë'e jiaje ëhuni Apo maemu javajoho jero jasi darugohuro avoho muebejëvonëjo. Ëdarugoho jero na bojemane höjo. Ëdarugo gemuohuro jabumë muebejëvego ëhuro ja'o na'o ma-gemu jiaruëhi jabu'o ëhi ma-gemu jioruomoröhe höjo.

<sup>12</sup> Naro jabu'o hijodevare jaehu bojemijane darugohuro ëhuro avoho muebejëvonövode höjo rireromëvojöëni. Muebejëvoromo nasi gurutore rëmamü aho sisëroho bogo va'ë'e höjo. Sisëro va'iröhe ahuremu sisëro va'ë'e höjo jasi surire jö jiajëhi ëhi jioröhego.

<sup>13</sup> Aviavejë'e naro jasi örire ö'ië'ajëjo. Röhu naro ave sa'are hiromo ave jöho jasi örire uavajëjo ëhuro naehu nimorohajëhi jabu'o ëhi nimoroho avoho'iröhego.

<sup>14</sup> Naro jasi jöho jabesi örire röjehijamu baeruomë'e höjo. Baeruomamu sa'arohemu uehorovarue ariböviohuro jabesi örire nue huodëgoruomë'e höjo. Rabëni hesi bëhoho naehu bogo sa'arohemu uehorovajëhioho ëhioho nasi aribövioho jabu'o bogo sa'arohemuoho uehorovaruego ëhuni nue huodëgë'e höjo.

<sup>15</sup> Röhu na bogo ëninamiromo uavajëjo: Sö va'ego ave sa'aroho bogo raromo'irarëjo. A'i naro uavajëjo: Avoho muebejëvego A Sisëho bogo baejëvo'irajo.

<sup>16</sup> Naehu sa'arohemu bogo uehorovajëhioho ëhioho jabu'o sa'arohemuoho bogo uehorovarue höjo.

<sup>17</sup> Jero jabumë baejëvego jö mahemu ejahoromo ëhuro jasi aribövieu jio'amo'irajo. Jö mahemu uavaje ë hesi bëhoho aviëhi höjo. Jaehu jövanue jöho höjo.

<sup>18</sup> Jaehu na sa'are remö'öjanëhi ëhi naro jabumë rëmö'öjë'e jevajëjo sa'are ariböviohu'o raromoromo mue vaeröhego.

<sup>19</sup> Rëmö'öjë'ëro jabesi jöëni uehorovoromo naro nasi arijo'arije jasi örire bojamirovajëjo naro jabumë ajëmijego ëhuro jabu'o jasi gemu jioruomoröhego.

<sup>20</sup> Na'o raromarue aribövi jabesi jöëni ëhi ëninamijajëjo. Bogo jabesi jöënioho gemu uehorovo'i u'emu nasi jö majëhijego heromo na mae uehorovevo'iröhe aribövi jabesi jöhu'o uehorovajëjo.

<sup>21</sup> Uehorovoromo ëninamijajëjo ëhuro jabumë ae aho'obëhe ma-gemu jioröhego. Apajo. Na negajëjo jaehu na'o bimuvo'i naehu ja'o bimuvajëhi jaburo ëhi no'o gemuoro bimuvoröhego. Bimuvego sa'arohemu uehorovarue ariböviohuro ëho garomo uvoruomoröhego: Iae mae-ëjo. Godro nörö nugö'öjamu sa'are rovade höjo.

<sup>22</sup> Jaehu nasi iho banigojiomoromo aji bojemijanëhi naro ëhi jië'e ajoho bojëm'e jevajëjo ëhuro ja'o na'o ma-gemu javuajëhi jabu'o ëhi ma-gemu jioruomoröhego.

<sup>23</sup> Naehu jabu'o bimuvo'i jaehu na'o bimuvanëhi ëhi jabu'o bimuvoromo ma-gemu jëvego sa'arohemu uehorovarue ariböviohuro ëho garomo uvoruomoröhego: God-ro nörö nugö'ojamu rovade höjo. O God-hu nörö rajahijadëhi huro hesi ariböviohu'o ëhi rajëhijaje höjo.

<sup>24</sup> Apajo. Na negajëjo jaehu bojemijane ariböviohuro nasinö ö'oromo na'o gemu mae raromoruomoröhego. Raromoromo nasi aji maho garuomoröhego. Ëajoho jero na bojemane höjo rabëni mami gö'e sa'a bövi bise'o bogo bamanevare evare jaehu na rajehinövanohuni.

<sup>25</sup> O Apo ja mu maemu vaejanue ae javajëjo. Sa'arohemu uehorovarue aribövioho ja bogo gavarue höjo. A'i naro iae ja gavaje höjo. O ave nasi ariböviohuro iae garomo uvoruomaje höjo: Jero nörö nugö'ojamu rovade höjo.

<sup>26</sup> Ja diehi jië'e ae javajoho naro nasi aribövioho rjëhijë'e jevajëjo. Iae na ëhi rjëhinövo'ejöjo ëhuro jaehu na rajehijanuëhi jaburo ëhi göëro göho rajahirovego naro jabu'o gemu mae juvo'irodëro.

## 18

*Judas-hu Iesu bijönimarue aribövi ajëmiromo Iesu jabesi övore bojëmade jöhoje.*

<sup>1</sup> Iesuro ëhi ëninaminugoromo hesi ijorajo ömo'ömohu'o gemu mae va'adeje. Va'oromo Kidron dodure abueromo iojiomoromo aehu ijo bivare öri ari'ere ë va'o raromareje.

<sup>2</sup> Röhu Iesuni hiruëmade aho Judas ë öri ari'oho iae gavadeje mami'e Iesuro hesi ijorajoho jabu'o ë ro hinövë'ëro.

<sup>3</sup> Judas-ro ë öri ari'oho gavë'ëro ae säjëvo ujuohoromo rovadeje. Muorovo aribövioho söromo God-are amo börömo atovarue aribövie priest masijohu'o Pharisee ömo'ömohu'o jabuhu rëmö'ojamu rovaroho sö ujuohoromo rovamu bijo buno'o ujuohoromo iroho gae ujuohoromo rueruomadeje.

<sup>4</sup> Rovamu gëgorovo diehi jië'e muehu hesi örire rue'iröhoho Iesu iae ga barëromo ro birohëvoromo uëvadeje: Jemë rahuo naharujëjo.

<sup>5</sup> Rahuo naharujëjamu uavareje: Iesu Nazareth rajoho naharuëjo. Naharuëjamu uëvadeje: Ëuvaruje aho iae na aviae jevajëjo.

Röhu Iesuni hiruëmade aho Judas jabu'o gemu mae namijadeje.

<sup>6</sup> Jabu'o gemu mae namijamu gagorovo rueho jaburo hejare Iesuro uëvamu: Na jevajë uëvamu hegorovo dejonö va'oromo sa'are rireromareje.

<sup>7</sup> Ëhi'amu Iesuro röhu maho uëvadeje: Jemë rahuo naharujëjo. Naharujëjamu uavareje: Iesu Nazareth rajoho naharuëjo.

<sup>8</sup> Naharuëjamu uëvadeje: Na mami'e uëvode höjo: Iae na aviae jevajëjo. Jemë na nahevogoro ave nasi aribövioho rëmö'öjega ma-va'arëjo.

<sup>9</sup> Ëhi uëvade hesi bëhoho mami'e Iesuro Vavuoho uavadeje: Jaehu bojemane aribövioho naro bogo ae gemu vadu'oho nugö'ojamu sisëroho va'ë'e höjo. Hu Vavu uavadëhi hesi aribövioho ëhi mae jio'amoröhego ëhuni guduamo'i rovare aribövioho uëvadeje: Nasi aribövioho rëmö'öjega va'arëjo.

<sup>10</sup> Ëhi uëvamu Simon Peter-ro kaejoe gurihi bamë'ëro jië'ëro jijöromo priest börömo hesi mu vaejaje a ihe Malchus anoromo övo manörire hia'oho tariö'öjahadeje.

11 Hia'oho tariö'öjhamu Iesuro Peter uavadeje: Kaejöho sionoro ba'amëjo. Naehu i'u baejöro Vavuehu uevajoho rabëni bogo baejöräjo.

*Aehu Iesu Annas-are nunire bava'lo nugare jöhoje.*

12 Ëhi'amu gagorovo muorovo ariböviohu'o jabesi a börömo'lo Jew rajo atovarue ariböviohu'o ëho jaburo Iesu guduamoromo tövonugoromo

13 hu'irae baeromo urimo Annas ga'i rovaraje. Annas hu Caiaphas-are vaboro hesi vavue jiadeje. Ëvaduniroho Caiaphas hu priest böröme jiadeje.

14 Caiaphas-ro urimë'i Jew rajo a masijoho uëvadeje: Ae gemuehu ae aho'obëhe noni guomë'oho iae mae höjo. Ëhi jövade a hesi juroho Annas ga'irögoro Iesu hu'irae bava'areje.

*Peter-hu Iesu gavaje jö a subivëhade jöhoje.*

15 Hu'irae bava'amu Simon Peter'o ijoraje gö'lo jaburo niö'iro Iesu rihiro-mareje. Rihromoromo priest börömo hesi amo rejo iromare ojore rovaraje. Rueromo göhuro Iesuhu va'ajire ë va'adeje priest börömo'ho ë aho mami'e gavajego. Huro ë va'i Peter-ro rejo ojore viëhi amonö namijadeje.

16 Ojore viëhi amonö namijamu Iesuarë ijoräjo göho priest böröme'hu gavaje ahuro sionëro ojore rueromo ojo muebejaje magonahoho uanugoromo Peter ojore namijajoho osanö hu'irae bava'adeje.

17 Bava'amu ë ojo muebejaje magonahohuro Peter uavadeje: Na mae ja'lo ë ia hesi ijoraje javajëjo. Ijoraje javajëjamu uavadeje: O na bogäjo.

18 Ëhi uanugoromo va'oromo gëvade mu ariböviohu'o atovarue ariböviohu'o runonëgamu vëni muraege biho'amë'ëro bëhire riravoromo jurovoruomamu gëgorovo va'oromo jabu'lo gemu mae namiromo vënoho jurovadeje.

*Iesu priest börömo hesi nunire namijamu jöe gö gö ua ga'i hijade jöhoje.*

19 Ëhi'amu priest böröme Annas-ro Iesu uavadeje: Jasi ijore ijore jijiharue aribövioho rahumë höjo. Ja diehi jië'e jöho aho röjëhianue höjo. Ëjöho majehijego hejöjo.

20 Majehijego hejöjamu uavadeje: Na bogo gurihiromo jöho majëhi'i mava'orahoro sama'e majëhinövode höjo ae aho'obëhe heruomoröhego. God rajahijarue osare osare o God-are amo börömore ë röjëhibe juvonövode höjo Jew raje aho'obëhe ë gagovaruëro jië'ëro.

21 Ëhu'oho ja rabëni nasi öriroho ue gevanuëjo. Nasi jö heruomade aribövioho jabumë uë gënego majahiruomö'iräjo. Naehu majëhijode jöho jabumë iae gavarue höjo.

22 Ëhi jövamu hejë'i evare atovarue ae gemu Iesuarë bëhire namijadohuro Iesu övo hitahiëro anoromo uavadeje: Hë ja rabëni priest börömo'ho ëhioho uavanuëjo.

23 Uavanuëjamu hegorovo uavadeje: Naehu jö sisë majahamu hejanoho huruoho majahuego no ae aho'obëhe hejarëjo. O naehu jö mae majahamu hejanoho röhu rabëni na aneganuëjo.

24 Ëhi uavamü hegorovo Annas-ro Iesu tövare ö'oho bogo jiovahë'e ëhu'lo ëhi nugö'öjadeje va'oromo priest böröme Caiaphas-are nunire namiröhego.

*Peter-hu Iesu gavaje jö röhu maho subivëhade jöhoje.*

25 Ëhi'amu Simon Peter-ro ëhi namiromo vënoho jurovadeje. Jurovamu gagorovo aëro uavareje: Na mae ja'lo hesi ijoraje javajëjo. Ijoraje javajëjamu uëvadeje: O na bogäjo.

<sup>26</sup> Ëhi uavamu priest börömo hesi mu vaejarue röhu ae gemu Peter-hu anoromo hia'i tariö'öjahade ë a hesi agane gemuohuro Peter uavadeje: Iae na gavode höjo ijo bivare öri ari'ere ja Iesu'o gemuore namijamu. Na mae-ëjo.

<sup>27</sup> Ëhi uavamu Peter-ro uavadeje: Bogajo. Bogajamu gavë'i evare kökörökoho uvadeje.

*Iesu barovamu Pilate-are nunire namijade jöhoje.*

<sup>28</sup> Ëhi'amu Iesu Caiaphas-are nunire namijë'ëro sisonuvamu aëro hu hu'irae baeromo sa'a muebejaje a börömo hesi osare rovarije. Rueromo röhu uvareje: Osare va'ë'oho no sisë baeromo God-hu Vörö Tugohade Söröho bogo avoho i'ejare uvoromo bogo osaroho va'i ma-ojanore riravareje.

<sup>29</sup> Ojanore riravamu Pilate-ro hörö rueromo uëvadeje: Ave ia hesi sisëho rabe jiamu baeromo rovarije höjo.

<sup>30</sup> Baeromo rovarije höjamu uëvareje: Ëiaho bogo mu sisë vaejaje aho jio'ibejajo no bogo barueromo jasi öriroho bojami'ibejarëjo.

<sup>31</sup> Bogo bojami'ibejarëjamu Pilate-ro uëvadeje: Jemëro jemesi bava'oromo court vaeromo jemesi jögoroho atoromo hesi muoho mevo garëjo mae o sisë jiego. Ëhi uëvamu Jew rajo masijohuro uvareje: Iae ëhi höjo röhu aehu mu sisë vaejarohuni noehu uëvego vuovoröhe darugoho nosi öriroho bogohöjo.

<sup>32</sup> Uëvego vuovoröhe darugoho nosi öriroho bogohö uavare hesi bëhoho God-ro nimadeje Iesu korosire anego guomoröhe jöho Iesuhu mami'e jövadëhi ëhi jioröhego. Ëhuni uvareje: Ëhi jië'e darugoho bogojavuajëjo.

<sup>33</sup> Bogojavuajëjamu Pilate-ro hesi osa börömore vuonorö'ö va'adeje. Va'oromo Iesuni uvoromo rovamu uvadeje: Na ja Jew rajo jabesi a börömo javajëjo.

<sup>34</sup> Börömo javajëjamu Iesuro uvadeje: Na jasi ëma uehorovoromo uevanuëjo. O na ae göëro nasi jöho uavë'ëro uevanuëjo.

<sup>35</sup> Uevanuëjamu Pilate-ro uvadeje: Asë'e na bogo Jew rajehu jevajëjo. Jasi sa'a rajohu'o jasi priest masijohu'o ëho jaburo baejavoromo ro nasi övore bojemare höjo. Ja diehi'amu baejavo rovare höjo.

<sup>36</sup> Rovare höjamu uvadeje: Ave sa'are masije riravarue aribövi jabesi muoho gö jio'i naehu börömo namijaje muoho gö höjo. Nasi muoho sa'are jiaje mue gemuoho jio'ibejajo nasi mu ariböviohuro muorovoromo ahëvo'ibejarëjo ehuro Jew rajohuro bogo guduamevoröhego. Röhu bogo ëhioho höjo. Naehu börömo namijaje muoho bogo ave sa'are vaejarue mue gemuoho höjo.

<sup>37</sup> Ëhi uavamu Pilate-ro uvadeje: Ëhi jië'oho na ja böröme namiromo ae muebejëvanue ae javajëjo. Javajëjamu Iesuro uvadeje: Naehu börömo namijajoho jero jasi jövanuëjo. Röhu na sa'are ruvebijamu rahevade hesi bëhoho jö mahuremu majëhi'iroadëro ruvebijamu rahevade höjo. Ae rahu jö mahuremu ninaruoho nasi jöe ejeharue höjo.

<sup>38</sup> Ejeharue höjamu Pilate-ro uvadeje: Röhu jö ma hesi bëhoho diehi höjo.

*Iesu anego guomoröhego Pilate-hu majëhijade jöhoje.*

Jö ma hesi bëhoho diehi hö uaromo amonö röhu maho hörö va'oromo Jew rajoho uëvadeje: Ave aehu i'u baeröhe hesi sisëho bogo birohë'e jevajëjo.

<sup>39</sup> Röhu ave sörö majaho rovego evare naro savoji ojoho jiovoromo jemëni ae gemu nugö'öjhego hu mae va'aje höjo jemesi muoho ëhi gemu jioje



rov'ego. Ĕhi ji'el'oho na jem' n'egaj'ejo naro Jew rajo jemesi b'or'omoho jiovo nug'ol'oj'ehago mae va'oj'oro.

<sup>40</sup> Ĕhi u'evamu hegoroovo j'ol'e dadovoromo uvoruomadeje: Bogo 'e iahajo. A'i Barabbas-ajo. Ĕhi uvoruomadeje. Jaburo Barabbas jiovahego va'oj'oro nimareje rohu hu vajiohu'e anano'e ae jiadeje.

## 19

<sup>1</sup> Iae Pilate-ro u'evamu muorovo arib'oviohuro Iesu bava'oromo hisuebi-jareje.

<sup>2</sup> Hisuebiromo a masijehu bos'ol' didi'arue 'ehi ji'el'e bos'oho Iesuare simanore didi'ahareje. R'ohu bogo in'omo maho baeromo bos'oho avo-haho'i bib'e'le ijo hisuoho ujuoho huoromo simanore ba'amahareje. Ba'amahoromo a masijehu kavu'e'le ni'ogu 'ego io'amarue 'ehi ji'el'e ni'ogoho ba'amahoromo

<sup>3</sup> ro sivoromo ua'i arijareje: Jew rajo a b'or'omoho vaev'e'le hijanu'ejo. Ĕhi uaromo 'ovo hitahi'ero ano'i arijareje.

<sup>4</sup> Ĕhi'amu gagorovo Pilate-ro osare jioromo rohu maho hor'ol' rueromo 'e gagovare arib'ovioho u'evadeje: J'oe heh'ejo. Naro 'e iaho hu'irae barue'ie'aj'ejo jem'ero garomo uvo'irarijago: I'u bojami'irode b'ehoho na bogo biroh'e'le jevaj'ejo.

<sup>5</sup> Ĕhi u'evamu gav'e'i Iesuro bib'e'le bos'oho simanore didi'e'le kavu'e'le ni'ogoho ba'am'e'le hu'ol' hor'ojadeje. Hor'ojamu gagorovo Pilate-ro u'evadeje: Gah'ejo. Ĕiaho aviae h'oj'o.

<sup>6</sup> Iesu ganugoromo priest masijohuro God-are osa atovarue arib'oviohuro uvoruomadeje: Korosioro anego guomajo. Korosioro anego guomajo. Guomajamu Pilate-ro u'evadeje: Jem'ero jemesi bava'oromo korosioro anohego guomajo. I'u bojami'irode b'ehoho na bogo biroh'e'le jevaj'ejo.

<sup>7</sup> Bogo biroh'e'le jevaj'ejamu rue Jew rajohuro uaruomadeje: R'ohu j'ogoru b'or'omoho nosi 'orire jiaj'ejo. Ĕiahuro 'e j'oho ahoromo u'ovuade h'oj'o: Na God-are Harihe jevaj'ejo. Ej'ogoru ahadohuni 'ehuni guomo'a'aj'ejo.

<sup>8</sup> Ĕhi uavamu hegoroovo Pilate-ro urimo juhuonivadoho 'e jabesi j'oho hegoro evare juhuonivo avohadeje.

<sup>9</sup> Juhuonivo avohoromo Iesu hu'irae baeromo rue osa b'or'omore vuonor'ol' va'oromo uavadeje: Ja din'ol'e jioromo rovane h'oj'o. Rovane h'oj'amu Iesu bogo mana ua'i ma-j'orumoraejadeje.

<sup>10</sup> J'orumoraejamu Pilate-ro uavadeje: Ja diehi'oromo j'oho bogo mana majehijanu'ejo. Aveho uehorov'ejo. Na jiovo ram'ol'irode darugoho korosire ano taemavo'irode darugoho iae na jevaj'ejo.

<sup>11</sup> Jevaj'ejamu uavadeje: Iae 'ehi h'oj'o rohu God darugoho bogo bojami'ibejajo nasi 'orire mae o sis'e' vae'irane darugoho bogojavo'ibejajo. A'i God-ro bojami'j'e'ero 'ehu'ero iae eni javaj'ejo. Ĕhi ji'e'ero jasi 'ovore bojamamu ja baejevane a hesi j'ol' sis'ehuro jasiroho iosiramiro mo b'ovi mae h'oj'o.

<sup>12</sup> Ĕhi uavamu hegoroovo Pilate-ro 'ore nahadeje Iesu jiovo nug'ol'irovo. Jiovo nug'ol'ol' 'ore nahamu Jew rajohuro ma-darugo'ol' uvoruomadeje: Jaehu hu jiovo nug'ol'oj'e'oho 'eho ja bogo Rome a b'or'omo nimanue aho javo'aj'ejo. Ae rahu uv'e'oho: Na b'or'ome namijaje ae jevaj'e uv'e'oho 'e iahuro Rome a b'or'omo hesi muoho ahaje h'oj'o.

<sup>13</sup> Ahaje h'oj'amu hegoro Pilate-ro va'ol' Iesu hu'irae baeromo amon'ol' ro hor'onugoromo va'adoho mun'ehu ahare 'ori ari'ere Hebrew hu'ehu huotov'e'oho Gabbatha 'e va'oromo j'ol' mevarue ar'eto b'or'omore hijadeje.

14 Rõhu God-hu Vörö Tugohade Sörö irõhe majaho nêrêhi jio'i rõhu evaroho majae ririre jio'iro ê'adeje. Evare majare Pilate-ro arêto bôrõmore hiromo Jew rajoho uêvadeje: Jemesi a bôrõmoho gahêjo.

15 Gahêjamu hejê'i rue aribõviohuro ma-darugo'o uvoruomadeje: Anêjo. Anêjo. Korosioro anego guomajo. Pilate-ro uêvadeje: Na na jemesi bôrõmoho korosiroho ano'ejõjo. Ano'ejõjamu priest masijohuro uaruomadeje: Rome a bôrõmoho êhemu nosi bôrõmoho jiajêjo. Ae gö bogohõjo.

16 Ae gö bogohõjamu Pilate-ro ê aribõvioho ejêhoromo muorovo a jabesi õvore Iesu bojêmadeje jaburo bava'oromo korosire anego guomõjõro. Bojêmamumu Iesu baeruomadeje.

*Iesu korosire ano taemare jõhoje.*

17 Iesu baeruomamu huro korosioho banigojiomoromo dejore bamoromo baeromo va'adoho ajio ê'o ihe Simano Gijo Va'êne Ê'oho Hebrew huêhu huotovê'oho Golgotha ê ajio suorovareje.

18 Suorovonugoromo ê dirõ'ore korosire ano taemareje. Rõhu ae niõ'i jabu'o ano taemêvareje u'emu ujuoho nigemo'amoromo Iesu ririre amo'i a göho ruêhi amo'i göho viêhi amo'irõhêro.

19 Êhi'o'i rõhu urimo Pilate-ro Iesuare jõho jajivoromo ae bojêmijadeje bava'oromo Iesuare simano namore korosire ano taemego aêro garuomorõhego. Jõho jajivoromo êhi uvê'e jiadeje: Iesu Nazareth raje Jew rajo jabesi a bôrõmoho hõjo.

20 Êjõho Jew raje ae aho'obêhe adahoruomadeje Iesuhu korosire iromadoho amo bôrõmo bêhiro jiê'êro. Êjõho Hebrew jõero Rome jõero Greece jõero jajivo'amê'e jiadeje.

21 Jajivê'e jiamu gagorovo Jew rajo priest masijohuro va'oromo Pilate uavareje: Nadi êhioho jajivoromo uvo'ibejanêjo: Jew rajo jabesi a bôrõmoho hõjo. A'i jajivoromo uvonêjo: Ave iahuro hesi êma uvade hõjo: Na Jew rajo jabesi bôrõmoho jevajêjo.

22 Bôrõmoho jevajêjamu Pilate-ro uêvadeje: Bogajo. Na jajivodoho hesi êhi jiemu jio'a'ajêjo.

23 Êhi'amu muorovo aribõviohuro Iesu korosire ano taemonugoromo hesi niõgoho adovoromo muorovo ae êhi niõ'i êhi niõ'i jiê'êro gemu gemu ujuohareje. Rõhu hesi niõgu êgobõvioho êhu'o baejareje. Baeromo gavareje bogo niõgu göho göho gemuoroho bimuvoromo sigohijê'e jio'i ma-bôrõme gemu jiamu gagorovo

24 uarovareje: Ê'ego no niõgoho bogo arororomo gemu gemu bae'irõgoro a'i ajajovoromo gavarêjo raro baejêgo. Jabuhu êhi ê'are hesi bêhoho mami'e God-are surire jajivoromo uvê'eje:

Nasi uho giva'oho adovoromo ujuohare hõjo.

Nasi niõgoho ajajovoromo ae gemuêro baejade hõjo.

Surire jajivadêhi ê muorovo aribõviohuro êhi ê'areje.

25 Êhi'amu Iesuare vêmoho o vêmu hesi õho o Mary Clopas-are vaboroho o Mary Magdalene êho jaburo korosi bêhire riravareje.

26 Riravamumu gagorovo Iesuro gavadeje aruêre hesi vêmohu'o hesi ijo-raje huhu dê vovõbajo'e aho'o rajahijajoho jabu niõ'iro rirarovamumu. Rirarovamumu gëgorovo vêmoho uavadeje: Mamajo. Ave iahuro harihêro muebejavanovo'ajê ua'i

27 ijorajoho uavadeje: Ave magonahoho vëmunõ'e muebenêjo. Êhi uavê'êro rue ahuro magonahoho hu'irae bava'amu hesi osare hijadeje.

*Iesu guomade jöhoje.*

<sup>28</sup> Ëhi ë'ë'ëro Iesuro garomo uvadeje: God-hu nimade muoho mami'e barëjë'e höjo. Mami'e barëjë'e höromo diehi ë'iröhego God-are surire jö jajivadëhi ëhi ë'i nimamu uvadeje: Na jove i'i negajëjo.

<sup>29</sup> Jove i'i negajëjamu ramaho roriae jiadeje. Nioga'i'e wine jovëro ë ramaho irijiomë'e jiadeje. Ëhi jiamu aëro u'uhë'e inömohe jovore ba'amonugoromo rumorovamu ioromo ijaho viture bijiohonugoromo nige-moromo hirore bamahadeje.

<sup>30</sup> Bamahamu jovoho sunuohonugoromo uvadeje: Iae barëjajëjo. Ëhi uvoromo simanoho uruhoromo aru'ahoho nugö'önugoromo guomadeje.

*Muorovo aehu Iesuarë ionire bijehu bijiohade jöhoje.*

<sup>31</sup> Guomamu majaho Friday jië'ëro Jew rajohuro uvareje: Nëröho nuho majae sörö maja börömohe jio'ië'ëgo ëhuni vuovë'e sinehu korosire nuho majare rae'amo'iröhoho no bijönaguajëromo iae va'areje. Va'oromo Pilate uavareje: Uëvego korosire rae'amaje aribövioho aëro va'o höroho aho'amëhego vuovëvo'irajo. Vuovëvego evare korosire jiajoho ujuoho ruvebi'irarëjo.

<sup>32</sup> Ruvebi'irarëjamu Pilate-ro ejëhamu muorovo ariböviohuro va'oromo va'o Iesu'o gemu mae ano taemare a gö hesi hörohu'o gö hesi hörohu'o ahëhoromo

<sup>33</sup> Iesuaro va'oromo gavare mami'e guomë'e jiamu gagorovo höroho bogo ahahareje.

<sup>34</sup> Bogo ahaho'irögoro muorovo ae gemuëro bijohuro Iesuarë ionire bijiohamu gavë'i kö'o jovo'o rovadeje.

<sup>35</sup> Kö'o jovo'o rovamu gavade ahuro majahuijë'eje jemëro heromo mae uehorovo'irarijego. Hesi jöho bogo sareri'ehu jio'i iae maeje. Huro mae garomo uvareje: Naehu majëhijode jöho iae mae höjo.

<sup>36</sup> Röhu Iesuarë höru bogo ahahare hesi bëhoho mami'e diehi ë'iröhego God-are surire jö jajivadëhi ëhi jioröhego. Jöho jajivoromo ëhi uvë'eje: Hesi ijo'ahë gemu vadu'oho bogo ahö'öjaho'aruëjo.

<sup>37</sup> O Iesuarë ionire bijiohade hesi bëhoho mami'e God-are surire jö göho jajivoromo ëhi uvë'eje: Bijëro bijiohoromo ë aho nunëro garuomö'ajëjo. Diehi ë'iröhego God-are surire jajivadëhi iae ëhi bijiohadeje.

*Iesuarë sino munë gagore bamare jöhoje.*

<sup>38</sup> Ëhi'amu Joseph Arimathea amo rajohuro rovadeje. Joseph hu Iesuarë ijore ijore juvaje ae jiadeje. Röhu Jew rajo a masijoho juhuonëmiromo bogo huruoho majëhi'i ma-saginiëri Iesu uehorovobe juvadeje. Ëähuro rueromo Pilate uavadeje: Uevego na va'oromo Iesuarë sinoho bava'iröjo. Bava'iröjamu Pilate-ro ejahamu Iesuarë sinoho bae'i va'adeje.

<sup>39</sup> Röhu Nicodemus-ro hu'o gemu mae va'adeje. Nicodemus hu urimë'i vahi'e Iesu ga'i rovade aho jiadeje. Hu'o hesi ariböviohu'o ridi'e osoho ujuohoromo Joseph'o va'areje. Ësoho ridi'e ije niö'i jabesi siva buaroharoho ë hesi i'uohe 40 kilo rabu'e ëhi jiadeje.

<sup>40</sup> Ësoho ujuoho va'oromo Iesuarë sinoho baeromo Jew rajehu sino guavo'i ë'aruëhi Joseph'o Nicodemus'o ëhi niögohu'o ridi'e osohu'o ujuohoromo ëhuro sinoho avohahoromo numareje.

<sup>41</sup> Röhu Iesu korosire anare ë hesi bëhoho mue jiadeje. Ëmure munë gage gemu bogo aho bamë'e ëma uno'e jië'e jiadeje.

<sup>42</sup> Uno'e jiëlëro Iesuare sinoho numonugoromo uvareje: Nëröho Jew rajo nosi nuho majae jio'a'ajëromomo munë gagoho bëhiro jiëlëro ë dunemu bamareje.

## 20

*Iesu i'ovoromo ri'öjëlëro hesi sino bamariroho bogojiade jöhoje.*

<sup>1</sup> Iae hura börömoho bogo ajivë'e i'o ma-sisonuvo'ia'amu Mary Magdalene-ro Iesu bamarire va'adeje. Va'i gavadeje ojo tugohare munëho rori'o bava'ë'e jiamu.

<sup>2</sup> Bava'ë'e jiamu gavë'i ë magonahohuro tutuvoromo va'adoho Simon Peter'o ijoraje Iesuhu dë vövöbajo'e aho'o rajahinövade ë ahu'o uëvadeje: Badare sinoho munë gagoroho bava'ë'e höjo. Bava'oromo dinö'e bamaroho no dadivavuajëjo.

<sup>3</sup> Dadivavuajëjamu gagorovo Peter'o Iesuare ijorajo göhu'o ri'öromomo Iesu bamarire va'areje.

<sup>4</sup> Jaburo niö'iro tutuvo va'oromo ijorajo göhuro Peter iosiramiroho munë bëhire urimo rovadeje.

<sup>5</sup> Urimo rueromo hohitohoromo sino numo'amare niögoho ga'amadeje. Ga'i munë gagoroho bogo rumo va'adeje.

<sup>6</sup> Bogo rumo va'amu Simon Peter-ro ijore rovadoho ro munë gagore va'adeje. Va'oromo gavadeje sino numo'amare niögoho momorö'ö'i

<sup>7</sup> Iesuare simano numare niögoho hesi hahagu huhohë'e raromamu.

<sup>8</sup> Èhi gavamu gavë'i urimo rovade Iesuare ijorajo göhuro hu'o rumo va'oromo nunëro garomo mae uehorovadeje.

<sup>9</sup> Jaburo niö'iro Iesuhu guomoromo ri'ö'iröhe God-are surire jajivare jöho bogo uehorovareje.

<sup>10</sup> Bogo uehorovë'ëro Iesuare ijoraje niö'iro sionëro jabesirëro va'areje.

*Iesuhu Mary Magdalene-are nunire rovamu gavade jöhoje.*

<sup>11</sup> Iesuare ijoraje niö'iro va'irögoro Mary-ro sino bamare ojo bëhire namiromomo nivadeje. Nivoromo hohitohoromo sino bamarire uherihadeje.

<sup>12</sup> Uheriho'i gavadeje anerae niö'i ajivë'e niögoho io'amë'e Iesuare sino bamare sionore göho simano bamarinö hi'i göho höru bamarinö hijamu.

<sup>13</sup> Èhi gëvamu gagorovo rue aneraho jaburo uavareje: Ma'inoho ja rabëni nivanuëjo. Ja rabëni nivanuëjamu rue magonahohuro uëvadeje: Aëro nasi Badare sinoho bava'ë'e höjo. Bava'oromo dinö'e bamaroho na bogo gagoro ëhuni nivajëjo.

<sup>14</sup> Èhuni nivajëromomo huotorovo'i gavade Iesu namijamu gagorovo uvadeje: Nani hesi ae gö höjo.

<sup>15</sup> Hesi ae gö höjamu Iesuro uavadeje: Ma'inoho ja rabëni nivanuëjo. Ja rahuo nahanuëjo. Ja rahuo nahanuëjamu magonahohuro uvadeje: Nani ave mu muebejaje aho höromomo uavadeje: Jero sinoho bava'ë'e javego röjehego na va'o baejjo.

<sup>16</sup> Baejjamu ruehuro uavadeje: Mary-ajo. Mary-ajamu magonahohuro huotorovoromo Hebrew jöëro uavadeje: Raboniajo. Rabonia uavade hesi bëhoho uaromo ë'adeje: Tisajo.

<sup>17</sup> Rabonia uavamu uavadeje: Nasi Vavu hesi öriroho bogo ajiomë'e jevaje ma'eneganuoho vuonugëjo. Vuonugo'i va'oromo nasi ö ömo'ömo uënëjo: Nörö God-are örire ajiomo'ië'ajëjo. God hu nöruare Vavue jioromo jemesi Vavue höjo. Hu nöruare God jioromo jemesi God höjo.

18 Ëhi uavamu Mary Magdalene-ro va'oromo Iesuare ijorajo ömo'ömoho uëvadeje: Na Bada gavë'e jevajëjo. Gavamu huro jöho ëhi ëhi majehade höjo.

*Iesuhu hesi ijorajo jabesi nunire rovamu gavare jöhoje.*

19 Evare majare hura börömore vahiomamu Iesuare ijorajo ömo'ömohuro Jew rajo a masijoho juhuonëmiromo osare gagovoromo ojoho tugoho titimë'ëro ë raromareje. Raromamu gavë'i Iesuro jabesi ririre ëma ro namiromo uëvadeje: Huë mae raromohëjo.

20 Huë mae raromohë'i hesi övohu'o ionohu'o røjëhijadeje. Røjëhijamu gagorovo uvareje: Iae Bada hö uvoromo nimorohareje.

21 Nimorohamu röhu maho uëvadeje: Huë mae raromohëjo. Nasi Vavuehu na remö'öjamu sa'are rovodëhi ëhi naro jemë rëmö'öjajëjo jemëro va'oromo nasi muoho vaebe jijiholirarijago.

22 Ëhi uënogoromo nu öge ahodëgoromo uëvadeje: God-are Aru'ahoho baerëjo.

23 Jemëhu ae rahuare örire uavë'oho: God-ro jasi sisëho uehorovoromo vuonugajë uavë'oho God-ro ë a hesi sisëho uehorovoromo ma-ioro'ioemu vuonugo'ajëjo. O jemëhu ae rahuare örire uavë'oho: God-ro jasi sisëho majae ëhi uehorovaje hö uavë'oho God-ro ë a hesi sisëho majae ëhi uehorovo'ajëjo.

*Iesuhu Thomas-are nunire rovamu gavade jöhoje.*

24 Ëhi'amu ijoraje ae gemu bogojië'ëro Iesu rovajoho bogo gavadeje. Ëijorajo hesi ihoho Thomas aehu uvaruoho Huodi'e Rahade Ahoje.

25 Thomas Iesu bogo gavë'ego Iesuare ijorajo ioro'iorohuro Thomas uavareje: No Bada gavë'e javuajëjo. Bada gavë'e javuajëjamu uëvadeje: Hesi övore vio'uehu ano taemo'amare sionoho naehu bogo garomo nasi övo namehu bogo rëhë'oho o hesi ionil'ahore bijehu bijiohadire nasi övo bogo nugö'öjë'oho ehuro bogo ma uehorovoromo bogo uvo'ejöjo: Iesu ri'öjë'le höjo.

26 Röhu urimo Iesuhu jabesi nunire rovadoho hurae gemu barëjamu hesi ijorajoho jaburo röhu maho osare raromareje. Raromamu Thomas-ro jabu'o hijadeje. Ojoho tugoho titimoromo osare raromamu gavë'i Iesuro jabesi ririre ëma ro namiromo uëvadeje: Huë mae raromohëjo.

27 Ëhi uënogoromo Thomas uavadeje: Jasi övo namoho barueromo ave nasi övoho gavehëjo. Jasi övoho barueromo nasi ionil'ahoro nugö'ö gavëjo. Ëhi'oromo naehu ri'öjode jöho mae o sarere hö uvanuoho vuonugo'i mavohoho uehorovonëjo.

28 Avoho uehorovonëjamu Thomas-ro uavadeje: Nasi Bada nasi God ja javajëjo.

29 Nasi God ja javajëjamu Iesuro uavadeje: Jero na gevë'ëro ehü'ëro mae uehorovanuëjo. Röhu bogo gevë'e ëma mae uehorovë'oho ëhi jië'le aribövioho huë mae bae'a'aruëjo.

*Ave surire jö jajivade hesi bëhoho ëhi jiaje jöhoje.*

30 Iae Iesuhu bëhi'le mu masije aho'o hesi ijore ijore jijiharue aribövi jabesi nunire vae'amadoho ave suriroho ë jöho bogo jajivo'amë'ëje.

31 Ëhi jie röhu naehu ave jö jajivobe rovode hesi bëhoho jemëro adahoromo uvo'irarijago: Iae mae-ëjo. Iesu hu böröme namiromo ajamuaje aho höjo. Hu God-are Harihe höjo. Ëjöho uehorovoromo hesi darugoho baeromo ehuro i'ovoromo maro raromolirarijago ehuni jajivë'e jeve.

## 21

*Iesuhu hesi ijoraje 7 jabesi nunire rovamu gavare jöhoje.*

<sup>1</sup> Ëhi'amu ijönö röhu maho Iesuro hesi ijorajo jabesi nunire rovadeje. Evare majaroho Tiberias e'u riröre ë rovadeje. Rueromo huhu ë'ade jöho na jajivo'ië'e.

<sup>2</sup> Iae Simon Peter o Thomas aehu uvaruoho Huodi'e Rahade Aho o Nathanael Galilee sa'a raje Cana amo rajoho o Zebedee-are harihe niö'i o ijoraje gö'o niö'i ëho jaburo gemuore gagovoromo raromareje.

<sup>3</sup> Raromoromo Simon Peter-ro ri'öromo a ioro'ioroho uëvadeje: Na visu maje va'ië'ajëjo. Va'ië'ajëjamu jaburo uavareje: No'o ö'ië'aruëjo. Ö'ië'aruëromo va'oromo boat gagore ajiomoromo jovo döre va'oromo vahi bövie visuëni viöe jovore ba'amoromo io gabe jijihoromo visuoho bogo birohë'e gavareje sisonuvamu.

<sup>4</sup> Sisonuvamu gavë'i gavare arue Iesu jovo riröre namijamu gagorovo jaburo hu garomo uvareje: Nani hesi ae gö höjo.

<sup>5</sup> Hesi ae gö höjamu Iesuro jabumë gëromo uvëvadeje: Aganomë na jemë visuoho suovë'e jëvajëjo. Suovë'e jëvajëjamu rueho jaburo uvareje: Visuoho no bogo suovë'e javuajëjo.

<sup>6</sup> Bogo suovë'e javuajëjamu uvëvadeje: Boat-re viöho ioromo övo manö ba'amohëjo visue suovo'irarije. Ëhi uëvamu viöho ba'amoromo gavareje visue aho'obëhe ro abuejë'ëro viö barojomo'iröhoho bogo eni jëvamu.

<sup>7</sup> Bogo eni jëvamu gagorovo Iesuhu dë vövöbajo'e aho'o rajahijaje ijorajohuro Peter uavadeje: Iae Bada höjo. Bada höjamu hegorovo Peter-ro döre ba'amaje niögoho mami'e jijövë'ëro röhu maho ba'amoromo avoho ruohoromo jovore jörö'öromo Iesu biroho'i va'adeje.

<sup>8</sup> Peter-ro jovore jörö'öromo va'irögoro ijorajo ioro'iorohuro boat gagore raromoromo viöre visuoho ioninö jagu baeromo rovareje jovo riröho bogo ëgoho jio'i ma-90 metre rabu'e ëhi jië'ëro.

<sup>9</sup> Rueromo sa'are ravo'amoromo gavareje vëni muraege biho'amë'ëro visuoho ë mue'i ioho ë bëhire momorö'öjamu.

<sup>10</sup> Ëhi'amu Iesuro uëvadeje: Avevejö'e suovarije visuoho gö ujuoho ruehëjo.

<sup>11</sup> Ujuoho ruehëjamu Simon Peter-ro va'oromo boat-re ajiomoromo viöho sa'are jagu barovadeje. Röhu viöre visu masijoho aho'obëhe 153 jië'ëro ëhuro irijiomë'e jiadeje. Visuoho aho'obëhe jiadeje röhu viöho bogo dadorovadeje.

<sup>12</sup> Viöho barovamu Iesuro uëvadeje: Ro ie ihëjo. Ro ie ihëjamu rue ijorajoho jabu bogo biririvoromo uavareje: Ja rahuo javajëjo. Jabumë iae garomo uvareje: Iae hu Bada höjo.

<sup>13</sup> Ëhi'amu Iesuro rueromo ioho ujuoho i'imëmiromo visuohu'o ëhi gemuoho ë'adeje.

<sup>14</sup> Urimë'i Iesuro guomoromo ri'önugoromo urimo vae niö'i hesi ijorajo jabesi nunire rovadoho evare majare röhu maho jabesi nunire rueromo iohu'o visuohu'o ëhi suvuorëmijadeje.

*Iesuhu Peter'o jö jövade jöhoje.*

<sup>15</sup> Suvuorëmiromo ue'ahamu gagorovo Iesuro Simon Peter uavadeje: Simon John-are harihoho na jero ave aribövioho iosirëmiromo na rajehi avohanue höjo. Ëhi uavamu Peter-ro uavadeje: Bada io'ajo. Jero na gevanue höjo naro ja rajahijego. Ëhi uavamu uavadeje: Ëhi jië'oho jero nasi sheep harihoho mio'amego jabesi aru'ahoho da'uomo'amo'irajo.

<sup>16</sup> Da'uomo'amo'ira uanugoromo röhu maho uavadeje: Simon John-are harihoho na jero na rajehijanue höjo. Rajehijanue höjamu Peter-ro uavadeje: Bada io'ajo. Jero na gevanue höjo naro ja rajahijego. Ëhi uavamu Iesuro uavadeje: Ëhi jië'ocho jero nasi sheep-ocho muebejehonövonëjo.

<sup>17</sup> Muebejehonë uaromo urimo vae niö'i uavadoho röhu maho uavadeje: Simon John-are harihoho na jero na rajehijanue höjo. Vae niö'i gemu ë jöe gemuoho ëhi ua'i hijamu hegorovo Peter vavaenimadeje. Vavaenimoromo uavadeje: Bada jero bövioho bise'ocho gavanue höjo. Jero na gevanue höjo naro ja rajahijego. Ëhi uavamu Iesuro uavadeje: Ëhi jië'ocho jero nasi sheep-ocho mio'amego jabesi aru'ahoho da'uomo'amo'irajo.

<sup>18</sup> Ave jöho na jö mae ua'ië'ajëjo. Urimo ja a i'o javadevare evare jasi arijo'ëro niögohu ruoho titimoromo dinö'e juvo'i nagadire ëma juvonöwane höjo. Röhu ijönö ja mavojirae'irane majare evare jero jasi öve niö'i ahorire vae'iramu ae göëro jasi övoho muoho titimëvoromo ja ë dirö'ore va'ë'ocho bijönagajire ë baejavo va'a'ajëjo.

<sup>19</sup> Ëhi uavade hesi bëhoho hu Peter röjahiromo ë'adeje huro heromo uvoröhego: Aëro ëhi ëhi'oromo na anego'iramu guomevo'ajëjo. Guomevo'iramu ehuro God-are ihoho döro jio'a'ajëjo. Amo Iesuro ë jöho uanugoromo Peter uavadeje: Nasi ijoro ijoro juvonövonëjo.

*Iesuhu dë vövöbajo'e aho'o rajahijaje ijorajo hesi jöhoje.*

<sup>20</sup> Juvonövonëjamu Peter-ro huotorovo'i gavade Iesuhu dë vövöbajo'e aho'o rajahijaje ijorajoho ijore rovamu. Urimë'i ë ahuro Iesuarë bëhire ie iromo va'o hia'iro saginiëri uavadeje: Bada ja bijönagarue a jabesi övore bojami'iröhe aho rahuo höjo. Ëhi ua gavade ae gemuohuro rovamu Peter-ro huotorovoromo gavadeje.

<sup>21</sup> Garomo uavadeje: Bada ave iaho diehi jio'a'ajëjo.

<sup>22</sup> Diehi jio'a'ajëjamu Iesuro uavadeje: Hesi jöho ëho bogo jasi muehu höjo. Na negë'ohuro hu birivoromo ëhi hiemu hi'iramu na vuonorö'ö rue'ejöjo ëho bogo jasi muoho höjo. Jero nasi ijoro juvonövonëjo.

<sup>23</sup> Ëhi jövä'ëro Iesuhu Peter ëhi majahijade jöho Iesuarë aribövioho jaburo jabesi ëma vaerovemu vaerovoromo uvoruomadeje: Ëjö hesi bëhoho ë iaho bogo guomo'i ma-hiemu hi'iröhe jöho höjo. Ëhi uvoruomadeje röhu Iesuro Peter bogo uavadeje: Iaho bogo guomo'a'ajë ua'i a'i uavadeje: Na negë'ohuro hu birivoromo ëhi hiemu hi'iramu na vuonorö'ö rue'ejöjo ëho bogo jasi muoho höjo. Iesuro dë vövöbajo'e aho'o rajahijaje ijorajo hesi jöho ëhi jövadeje.

<sup>24</sup> Röhu ë adaharije mu hesi jöho ë ijoraje gemuohuro garomo hejë'ëro no majahuijajeje. Röhu ë jöho huro surire jajivë'eje. Noro garomo uvarueje: Hu iae jö mae majahuijaje höjo.

<sup>25</sup> Röhu ë mu jö jajivadoho Iesu bogo ë muohemuoho vae'i mue aho'obëhe vae'amadeje. Röhu na uehorovoromo uve: Iesuhu vaejade muoho aho'obëhe aëro mue gemu gemu surire jajivo'amo va'o barë'ibejajo suri bahi'iröhe röhoho sa'ae dinö'e dinö'e jio'amajoho nani bogo eni jio'ibejajo. Ahia mino'e.

## ACTS

*God-hu hesi Aru'aho mëmi'iröhëni mae uëvade jö Iesuhu jövade jöhoje.*

<sup>1-2</sup> O asë'e Theophilus ave jöho naro jajivo'ië'e. Urimë'i Iesuhu mue rabe rabe vaejade jöho naro jajivo barëjamu ja adahaneje. Huro muoho aevo'i vaenugoromo mue vaebe jöe røjëhibe ëhi'obe ruejuvo God-ro uavamu ö'idöre ajiomadeje. Urimore jöho na ëhi jajivodeje. Röhu Iesuro ö'idöre ajiomo'irögoro God-are Aru'aho hesi darugohuro jögoroho apostle ömo'ömoho bojëmijadeje jabumë mami'e hesi baejëvë'ëro.

<sup>3</sup> Guomoromo ri'öjël'ëro majae aho'obëhe 40 hesi uhure jabetesi nunire rueromo hesi arijo'arije røjahirovo'i hinövadeje. Røjahirovamu jaburo garomo uvareje: Iae hijajëjo. Huro jabetesi nunire rueromo God-hu böröme namiromomo muebejavuaje ë hesi jöho majëhi'ego henövareje.

<sup>4</sup> Hejamu huro jabu'o hiromomo uëvadeje: Naro mami'e uëvode höjo: Vavuohuro suvuoroho mëmi'ajëjo. Ehuni Jerusalem va'irarijoho nadi nugo va'i ë amoremu raromoromo ë suvuoroho mueberëjo.

<sup>5</sup> Suvuoro hesi bëhoho ëhi höjo. Urimë'i John jovëro bapataeto vaejëvade höjo. Bogo majae ëgoho baebe va'ë'iro God-ro hesi Aru'ahoho mëmiromomo ëhuro jovoho bogo a'i Aru'ahohuro bapataeto vaejëvo'ajëjo.

*Iesuhu ö'idöre ajiomade jöhoje.*

<sup>6</sup> Eh'i'amu iae apostle ömo'ömohuro Iesu'o gemuore jioruomë'ëro uavareje: Bada na ja avevejö'e ajamui'iramu Israel rajoho nomëro urimo ë'arëhi ëhi masije riravoromo sa'a ioro'ioroho muebejëvo'ëjarëjo o bogajo.

<sup>7</sup> O bogajamu uëvadeje: Eh'i jïë'e muoho bövioho bise'oho divare majare jio'amoröhoho hesi Vavuohuro bamël'ëro ëhu'ëro bogo ga'a'arujëjo.

<sup>8</sup> Iae eh'i höjo röhu God-are Aru'ahohuro jemesirire ruvebi'iramu darugoho bae'a'arujëjo. Baenugoromo naehu diehi diehi ë'amu gavarije jöho ë jöho Jerusalem amore majëhibe Judea sa'ae bövioho majëhibe Samaria sa'ae bövioho majëhibe sa'ae gö gö majëhibe jijiho barë'arujëjo.

<sup>9</sup> Eh'i uëvamu hegoro gavareje hu ö'idöre ajiomamu God-ro uavë'ëro. Ajiomamu suëro riogivë'ëro hu bogo gavareje.

<sup>10</sup> Röhu ajiomamu bogo gavë'e ö'idöho ëma ërimahamu gavë'i ae niö'i ajivë'e niögu io'amë'oho jaburo ma-majioho rueromo bëhire rirarovareje.

<sup>11</sup> Rirarovoromo uëvareje: Asë'e Galilee rajomë jemë rabëni riravoromo ö'idöho ërimaharujëjo. Eäho Iesu jemesirire jioromo ö'idöre ajiomë'ëro sionëro ruvebi'ajëjo. Sue uhure ajiomamu gavarijëhi eh'i rue'a'ajëjo.

*Judas-are siono baeromo apostle jioröhe a baejare jöhoje.*

<sup>12</sup> Eh'i majëhijamu hegorovo apostle ömo'ömohuro Olives Dahorure jioromo öri dunonö 1 kilometre rabu'e vuonorö'ö va'oromo abo Jerusalem va'o suorovareje.

<sup>13</sup> Suorovonugoromo va'oromo urimo raromonövare döre osa gagore ë iojiomareje. Eäpostle jabetesi ihoho Peter John James Andrew Philip Thomas Bartholomew Matthew o Alphaeus-are harihe James o Simon. Röhu Simon hu Jew rajehu jabetesi mueberovo'i nimade aho jiadeje. O apostle gö James-are harihe Judas jiadeje. Apostle jabetesi ihoho eh'i jio'amadeje.



<sup>14</sup> Ēaribövioho aho'obēhe ē iojioromomo Iesuare ō ōmo'ōmoho hesi vēmē Mary magonaho ioro'ioroho ē ariböviohu'o gemu mae raromoromo God-are ōrire jōe ato'i arinōvareje.

<sup>15</sup> Ēhi'oromo majae vemino'e barējamu evare Iesu mae uehorovarue aribövioho 120 rabu'e ēho jaburo gemuore gagovorovē'ēro Peter-ro ri'ōromomo uēvadeje:

<sup>16</sup> Ō mueno'ohumē Judas-hu ē'ade jōho God-are surire jajivarēhi ōre gō bogojiē'ēro iae ēhi jiade hōjo. Urimē'i God-are Aru'ahohuro David uavamū Judas-hu majae ijonō vaerōhe jōho jajivade hōjo. Judas hu aehu Iesu guduamojōro ōri rōjēhijade ae jiade hōjo.

<sup>17</sup> Hu no'o gemu mae hi juvonōvade hōjo. Huro no'o bimuvoromo mue gemu vaerōhego ēhuni Iesuro hu baejade hōjo.

<sup>18</sup> Peter-ro ēhi jōvadeje rōhu hesi jō bēhoho Judas-hu mu sisē vaeromo ujuohade ē ijo bajohuro ēhuro sa'aho imadeje. Imoromo ē sa'are beruvebiromomo dēho tōgōmamu dē hōtōre suoro suoro baeromomo guomadeje.

<sup>19</sup> Guomamu ē jōho Jerusalem raje ae aho'obēhe jaburo henugoromomo ē sa'aho jabesi jōero Akeldama jumuvareje. Akeldama huotovē'e hesi bēhoho Kō Rovē'e Sa'ahoje.

<sup>20</sup> Amo Peter-ro Judas-are jō vituoho majēhiromomo uēvadeje: David-ro Judas-are jōho Psalms surire jajivoromomo uvē'e hōjo:

Hesi amoho a rumo'e jiorōhe hōjo.

Nadi a gōho ēho hi'irajo.

O jō gōho uvē'e hōjo: Ae gōero hesi sionoho baeromomo mue bae'a'ajējo.

<sup>21-22</sup> Ēhi uvē'ego na negajējo ae gemuēro Judas-are sionoho baeromomo no'o gemu mae juvoromomo Bada Iesu ri'ōjē'ēro hijamu nunehu gavade jōho ae majēhinōvorōhego. Na negajējo Iesuhu no'o hibe juvo'ego John-hu bapataeto mu vaejamu aevo'i no'o hibe ruejuvo Iesu ō'idōre ajiomamū ēhi hiemu hibe rovade ēhi jiē'e ae jio'irōhego.

<sup>23</sup> Peter-ro ēhi uēvamū hegorovo rueho jaburo ae niō'i jabesi ihoho uvareje Judas-are sionoho baerōhego. A gō hesi ihoho Joseph jiadeje. Ēa hesi iho gōho Barsabbas jio'i iho gōho Justus jiadeje. Hesi ihoho niō'i gemu jiadeje. O a gō hesi ihoho Matthias jiadeje.

<sup>24</sup> Ēae niō'i jabesi ihoho uvonugoromomo God-are ōrire ēninamiromomo uavareje: Bada ae aho'obēhe nosi dē vōvōbajo'oho jero gōvuanue hōjo. Ēhuni ae niō'i rōhu di aho gemu nimanuoho jero rōjahuijēgo no bae'irarējo

<sup>25</sup> ēhuro hu Judas-are sionoho baeromomo apostle muoho vae'irōhe hōjo. Ēhesi bēhoho urimē'i Judas apostle jiē'ēro rōhu muoho vuonugo'i guomomomomo hesi rōho sisere va'ade hōjo.

<sup>26</sup> God ēhi uanugoromomo munē inine ōmēvonugoromomo ē ae niō'i jabesi ihoho ē munē jabesi dōre jajivoromomo hevō gagore ba'amoromomo hijiohijiovareje ga'iro di aho bae'irōhoho jiego. Hijiohijiovoromomo gavareje bae'irōhe aho Matthias jiamu gagorovo uavareje huro Iesuare apostle 11-ho jabu'o gemuore juvonōvorōhego.

## 2

### *God-are Aru'ahēhu ruvebijade jōhoje.*

<sup>1</sup> Ēhi'lamū Pentecost majaho rovamū Keriso mae uehorovarue ariböviohuro aho'obēhe osae gemuore raromoruomadeje.

<sup>2</sup> Raromoromomo ma-majioho hejareje buru bōrōmonō'e ō'idōre jioromomo ruvebiromomo jabuhu raromarue osaho aho'o huosihuosihavamū.

<sup>3</sup> Huosihavamu hejë'i gavareje vëni hödu va'ëne bitaroho rumorovoromo ae gemu gemu jabesi simano döre jiorovamu.

<sup>4</sup> Jiorovamu gagorovo God-are Aru'ahohuro ae aho'obëhe jabesi dë vövöbajo'ere abueromo rarovadeje. Rarovoromo bitaroho ajëmijamu aevoromo huë göëro göëro jöe vaerovobe va'areje.

<sup>5</sup> Röhu Jew rajo ae göëro göëro Jerusalem amore ë raromoruomadeje God mae uehorovaruëro jië'ëro sa'ae göre göre jioromo rueruomë'ëro.

<sup>6</sup> Jerusalem raromoro hejare Iesuarë ariböviohuro atavavamu hegorovo ae aho'obëhe gemuore rueromo gagovoromuomadeje. Gagovoromo ae gemu gemu hejare jaburo jabesi huë göëro göëro vaerovavamu hegorovo hire görö'öjévadeje.

<sup>7</sup> Hire görö'öjévamu ri'öromo uvoruomadeje: Jabumë bogo nosi sa'ae gemuoho jio'i Galilee rajemu jioruomajëjo.

<sup>8</sup> Ëhi jië'o ho diehi'oromo nosi huë göëro göëro ato'ego no hejaruëjo.

<sup>9</sup> No Parthia sa'a raje javuajëjo. Media raje Elam raje Mesopotamia raje Judea raje Cappadocia raje Pontus raje Asia raje

<sup>10</sup> Phrygia raje Pamphylia raje Egypt raje javuajëjo. Cyrene amo bëhire Libya sa'a raje javuajëjo. Rome amo raje javuajëjo.

<sup>11</sup> Rome amo rajo a ioro'ioroho Jew rajo ae javuajëjo. A ioro'ioroho bogo Jew aehu javuo'i röhu Jew rajo jabesi muoho noro ijonö bæjë'e javuajëjo. Crete sa'a raje javuajëjo. Arabia sa'a raje javuajëjo. No sa'ae gö gö ëhi javuajëjo. Röhu no ae aho'obëhe hebe rovaruëjo God-hu mu masije gö gö ë'ade jöho ë aribövioho jaburo ae gemu gemu nosi jöëro atavavo'ego.

<sup>12</sup> Ëhi uvoromo ae aho'o tiöromo uehore gö gö baeromo uarovareje: Diehi'ego ëhioho ë'aruëjo.

<sup>13</sup> A ioro'ioroho bogo ëhioho uvo'i a'i ma-sivëgoromo uarovareje: Ëaribövioho rihu'e jovo sisë ue'aho avohë'ëro simane huotovëho'ego ë'aruëjo.

*God-are Aru'ahëhu rovamu Peter-hu Iesuarë jö majëhijade jöhoje.*

<sup>14</sup> Ëhi'amu Peter-ro apostle ioro'iore 11-ho jabu'o gemu mae jië'ëro ri'öromo ae aho'obëhe ma-darugo'o uëvadeje: Jew raje Jerusalem raro-marujohumë ae aho'obëhe naehu jö jövo'ië'ajoho avo'avoho hehëjo.

<sup>15</sup> Jëmëro uvarujëjo: Ave aribövioho simane sisërëjë'ëro ë'aruëjo. Bogo ëhioho höjo rabëni majae rojomanovego vörö'e jovocho aho bogo ue'ahoruomajëro jië'ëro.

<sup>16</sup> Ëhuni bogo ëhioho jio'i a'i ë mu hesi bëhoho urimë'i Joel-ro ave jöho God-aro baeromo jajivoromo uvade höjo:

<sup>17</sup> God-ro uövuavohijajo: Ijo tugoho'i majaho rue'iramu naro ave muoho vae'ejöjo.

Naro nasi Aru'ahoho jvonö'e otehëho'iramu ae magonahe aho'o rumorovo'ajëjo.

Rumorovo'iramu jemesi ujo ömo'ömoho a'o magonaho'o nasi jöho huruoho'aruëjo.

Jemesi a i'ohuro nasi muoho nia'ovoro ga'a'aruëjo.

Jemesi a mavojohuro momorö'öromo mue gemuoho ga'a'aruëjo.

<sup>18</sup> Ëho majaho rue'iramu nasi Aru'ahoho otehëho'iramu nasi mu vaejarue aho magonahoho jabu'o rumorovo'ajëjo.

Rumorovo'iramu nasi jöho huruoho'aruëjo.

<sup>19</sup> Ö'idöre vörö'e muoho vae'ejöjo.

Sa'are darugo'e muoho ömo'ejöjo.

Sa'are ömo'iramu köemu jioromo vëne ravoromo u'e ajiomola'ajëjo.

<sup>20</sup> Ö'idöre vae'iramu majaho ramoramovoromo manaeroho kö'e jio'a'ajëjo. Badare aji'e maja börömo rueröhe ë hesi urimo ëho jio'a'ajëjo.

<sup>21</sup> Evare ae rahu Badani uvë'oho maro jëvo'ajëjo.

<sup>22</sup> Röhu Israel rajomë ave jöho hehëjo. Naro Nazareth raje Iesuare jöho majëhi'ië'ajëjo. God-ro Iesu ajamijamu bogo gavarue darugo'e muoho vae'amade höjo ëhuro jemëro tiöromo ma-sama'e uvo'irarijago: Iesu bogo ëma rue'i God-ro nugö'öjamu rovade höjo. Ëmuoho jemesirire vaejë'ëro jemë'o iae gavaruje höjo.

<sup>23</sup> Ëaho jemesi övore rovade höjo God-ro ëhi nimoromo uvë'ëro. Jemesi övore rovamu jemëro baeromo sisë aribövioho uëvamu korosire anare höjo. Jemesi sisë höjo.

<sup>24</sup> Röhu vavaene baeromo guomo raromoromo God-ro hesi vavaenoho avohahamu ri'öjade höjo bogo ioro'ioremu guomoröhe ahuro jië'ëro.

<sup>25</sup> Ëhi ri'ö'iröhe jöho urimë'i David-ro God-are surire jajivoromo uvë'e höjo:

Naro gavode höjo Badaro na'o gemu mae juvo'i hijamu.

Huro nasi bëhire juvo'ego na bogo juhuonivo'ejöjo.

<sup>26</sup> Ëhuro dë vövöbajo'oho sasohevaje höjo. O bitarohuro nimorohë'i jöe jövaje höjo.

Iae nasi sino haho'oho guomo hesi höjo. Röhu na mae hiromu muebe'ejöjo hujeji God-ro ajemi'iröhego.

<sup>27</sup> Ëhesi bëhoho guomevo'iramu vuovoromo raromaruiroho God ja nasi aru'ahoho ëho bogo nugeho'iramu bogo ioro'ioremuoho ëho hi'a'ajëjo.

Na jasi aëro jevë'ëro ëhu'ëro jero ajemi'iramu nasi sinoho bogo sagohori-jevo'ajëjo.

<sup>28</sup> Naehu hiemu hi'irode öroho jero röjehijë'e javajëjo.

Jero na'o gemu mae juvo'ego ëhuro na nimorohevo avoho'ajëjo.

Iesuhu ëhi ë'iröhe jöho David-ro jajivade höjo.

<sup>29</sup> Aganomë naro nosi hijo miono'e David-are jöho jemesi örire huruoho majëhi'ejöjo. David guomamu guavare höjo. Hu guavare huoho jaruvohu'o aviae jiajëjo. Ëhuni hesi sinoho bogo sagohori'iröhe jöho hu bogo jövo'i Iesuare jöho jövade höjo.

<sup>30</sup> Ëhesi bëhoho David-ro jö God-aro baeromo juvaje aëro jië'ëro ijonö jioröhe jöho gavade höjo. Ëhu'ëro hu garomo uvade höjo: God-ro na jöe darugo ma'e majehiromu uevë'e höjo: God naro jasi uje gemu baeromo böröme bamo'ejöjo David jaehu öri ari'e muebejanuëhi ëhi ë'iröhego.

<sup>31</sup> God-hu Keriso böröme bamoröhe jöho David-ro gavë'ëro ëhuni Kerisohu ri'öröhe jöho jajivoromo uvade höjo:

Vuovoromo raromaruiroho God ja hesi aru'ahoho ëho bogo nugahamu bogo ioro'ioremuoho ëho hijade höjo.

Jero hu ajamamu hesi sinoho bogo sagohorijahade höjo.

<sup>32</sup> Röhu ë aho Iesu God-ro ajamijamu ri'öromo röhu maho hijade höjo. Hijamu hesi aribövioho aho'o no iae nunëro gavë'e javuajëjo.

<sup>33</sup> Ri'ö hiromu God-ro böröme bamamu ajiomoromo hesi övo manö hijë'e höjo. Hiromu Vavuehu uavadëhi ëhi hesi Aru'ahoho bojamamu baeromo jovonö'e otehahuë'ëro jemë garomo hejaruje muoho nomëro vaejaruëjo.

<sup>34</sup> Röhu Iesuhu God-arire ajiomade jöho iae mae jio'ego röjëhi'ejöjo. Iesuhu ajiomadëhioho David God-ariroho bogo ëhioho ajiomade höjo. David hu bogo ajiomade höjo röhu God-are surire jajivoromo uövuade höjo:

Bada God-ro nasi Bada uavade höjo:

Nasi övo manö rojo hijego

ja'o muorovarue aribövioho

<sup>35</sup> naro ruahö'öjëvego

hörëro vijuvo taemo'amo'irane höjo.

Bada Iesuhu ajio God-are övo manö hi'iröhe jöho David-ro ëhi jajivade höjo.

<sup>36</sup> Ëhuni Israel aribövioho aho'obëhe jemëro ave jöho avoho hehëjo. Jemëhu korosire anarije aho Iesu ë aho God-ro böröme bamë'ëro hu Bada höjo. Böröme namiromo ajamuijaje ae höjo.

<sup>37</sup> Peter-ro ëhi majëhijamu hegorovo ë aribövioho jaburo juhuone böröme baeromo Peter'o apostle ioro'iorohu'o uëvareje: Ö ömo'ömoho no diehi ë'ëjarëjo.

<sup>38</sup> Diehi'o'ëjarëjamu Peter-ro uëvadeje: Jemë ae gemu gemu uehoro sisëho vuonugo'i uehoro mae baeromo Iesu Keriso-are ihoro bapataeto vaejego God-ro jemesi sisëho uehorovoromo vuonugo'irajo ëhuro God-ro hesi Aru'ahoho suvuore mëmego bae'irarije höjo.

<sup>39</sup> Ëhesi bëhoho God-ro hesi Aru'ahoho jemë'o jemesi aboji harihu'ohu'o mëmi'i uvade höjo. Ae dinö'e dinö'e raromoromo nosi Bada God-hu uvamu ejahë'oho hesi Aru'ahoho mëmi'i uvade höjo.

<sup>40</sup> Peter-ro ëhi uënogoromo ëhi jië'e jö göho aho'obëhe majëhiromo uëvadeje: Sisëho vuonugo'i avoho raromohego ave sisë ariböviehu i'u bae'iröhoho jemë bogo ëhioho bae'irarije höjo.

<sup>41</sup> Peter-ro ëhi majëhamu hegorovo hesi jö ejahare ariböviohuro bapataeto vaeruomadeje. Vaejë'ëro ëhu'ëro evare majare ae aho'obëhe 3,000 ëhi aevoromo Iesure aribövi ioro'iorohu'o gemu mae jijihonövareje.

<sup>42</sup> Gemu mae jijihoromo apostle jabesi jöho heromo agane vaerovoromo gemuoro ie ue'ahoromo God-are örire jöe atonövareje. Ëhi jië'e muohuremu uehorovonövareje.

*Iesure ariböviehu gemuore raromo jijihoromo aviëhi jië'e mu vaejare jöhoje.*

<sup>43</sup> Ëhi'o'ego God-ro apostle-ho ajëmi'ego bogo gavarue darugo'e muoho vaenövareje. Vae'ego ae aho'obëhe ëho gagorovo tiöromo uvonövareje: O mu mabëhe barueromo röjahuijaruëjo.

<sup>44</sup> Ëhi'o'ego Iesu mae uehorovarue aho jaburo agane gemuoho va'ëne gemuoro raromo jijihoromo bövie bise'e bogo sivu sivuoho bae'i magemuoro bahinövareje.

<sup>45</sup> Jabesi sa'ae inömo inöme bövie bise'e imo'amoromo ijo baje ujuhoromo ae gö rabe rabe bogojië'oho suvuorëminövareje.

<sup>46</sup> Majae ëhi God-are amo börömore gagovorovonövareje. O osare osare gemuoro raromoromo nimorohë'i huë baerovë'i ie ue'ahonövareje.

<sup>47</sup> Ue'ahoromo God rajahiromo a ioro'ioro jabesiro huë mae baenövareje. Ëhi'o'ego Badaro ae gö gö baejëvoromo maro bamëvoromo ekaresia gemuore bimuvëvonövadeje.

### 3

*Peter'o John'o hörü sisë'e a ajamamu marëjade jöhoje.*

<sup>1</sup> Majae sanuovamu Jew rajehu pari vaejarue majare Peter'lo John'lo jaburo niö'iro ruhe God-are amo börömore hörö'i ajiomareje.

<sup>2</sup> Ajiomoromo amo börömo hesi rejo ojo behire rovereje. Eöjo hesi iho jumubaroho Ojo Mabehere. Rue'i gavareje ae gemu e hijamu mami'e hörü sisë'e ehi rahë'e jië'ëro. Hörü sisë'ego majae ehi hesi ariböviohuro barueromo ojo behire e bamonövareje. Ojo behire bamo'ego ae gö gö osa börömore va'ië'iroho jaburo hu ijo baje bojamijöro enineminövadeje.

<sup>3</sup> Ehi e'ojuvo hiromu gavade Peter'lo John'lo jabu'lo osare rova'ia'amu gëgorovo eninemadeje.

<sup>4</sup> Eninëmamü hegoroovo rueho jaburo hu erimahoromo Peter-ro uavadeje: No gövuëjo.

<sup>5</sup> Gövuëjamü hegoroovo rue ahuro uvadeje: Jaburo suvuore memi'i uevaruëromu gëvadeje.

<sup>6</sup> Gëvamü Peter-ro uavadeje: Ijo baje bogojevajëjo. Röhu nasi örيره jevajohuro ehuro ajami'ejöjo. Naro Nazareth amo raje Iesu Keriso-are ihore ja uavajëjo: Ri'öromu juvëjo.

<sup>7</sup> Ri'öromu juvëromu hesi övo manö ma'enoromo nigemadeje. Nigëmamü gavë'i hejade hesi hörü hitahioho öbinajoho mae jiavamü hegoroovo

<sup>8</sup> döro majioho ri'öromu namiromu hesi hörëro juvadeje. Hesi hörëro juvoromu tiöbe God rajahibe jabu'lo gemu mae God-are osare va'adeje.

<sup>9</sup> Ehi'amu ae aho'obëhe garuomadeje huro God rajahibe juvamü gagorovo

<sup>10</sup> gavare Ojo Mabëhi hesi behire hiromu ijo bajëni eninëmaje aho jiamü garomu tiöjëvamü uvareje: Diehi'oromo höröho marëjë'ëro juvajëjo.

*Peter-hu God-are osa börömore namiromu Iesuare jö majëhijade jöhoje.*

<sup>11</sup> Ehi uvoromu gavare e aho Peter'lo John'lo jabesi övoro jiorovoromu jabu'lo ehi juvamü God-are amo börömo hesi harada ihe Solomon-are haradare e juvamü garomu tiöjëvamü tutuvoromu e gemu va'oromu gagov-oruomadeje ga'irovo.

<sup>12</sup> Gagovamü gëgorovo Peter-ro uëvadeje: Israel rajomë jemë ave aho garomu rabëni tiöjarujëjo. Jemë rabëni John'lo na'lo erimahuarujëjo. Bogave uvo'irarijëjo: No vörö'e aëro javuë'ëro o mu maemu vaejaruëro ehü'ëro noro ajami'ego marëromu juvajëjo. Bogo ehioho höjo.

<sup>13</sup> A'i hu marëjade hesi bëhoho aviëhi höjo. God-hu Abraham Isaac Jacob nosi hijo miono'lo ioro'oro muebe'amadohuro hesi mu vaejaje aho Iesuare ihoho döro nigëmahade höjo. Eaho jemëro guduamoromu a masijo jabesi övore bojëmijarije höjo baeromu sisë vaeröhego. Bojëmiromu hejarije Pilate-ro uvavamü: E'ego naro Iesu jiovo nugö'ö'irö uvamü hegoroovo jemëro Pilate-are nunire Iesu bijönimarije höjo.

<sup>14</sup> Iesu hu God gemu uehorovoromu mu maemu vaenövade höjo röhu jemëro hu bijönimoromu Pilate uavarije höjo huro a muo'amaje aho jemëni jiovo nugö'öjehëgo va'iröhego.

<sup>15</sup> A muo'amaje aho jiovo nugö'öjehöjörö ua'i a i'ovavuaje aho Iesu anojörö uavarije höjo. Ehi'amu guomoromu God-ro ajamamü ri'öromu hijamü nosi nunëro gavë'ëro e jöho majëhijarue höjo.

<sup>16</sup> Eaho Iesu mae uehorovadohuro ehuro hesi darugohuro ajamamü ave hörü sisë'e a jemë gavarujo biriroho bæjade höjo. Eaho Iesu mae uehorovamü ehuro marëjadoho jemë ae aho'obëhe iae gavarujëjo.

<sup>17</sup> Aganomë iae ëhi höjo röhu na gavajoho jemë'o jemesi a masijohu'o bëhoho bogo avoho gavë'ëro Iesu anarije höjo.

<sup>18</sup> Röhu jemëhu vaejarije mu sisë hesi bëhoho urimë'i God-ro jöho nugö'öjamu jö hesiro baeromo majehinövare ariböviohuro surire jajivoromo uöbe rueruomade höjo: God-hu uavë'ëro böröme namiromo ajamui'iröhe aho vi'ehe baeromo guomo'a'ajëjo. God-ro mami'e jö bamoromo uövuadëhi öroho ëhi avohamu Iesu guomade höjo.

<sup>19</sup> Ëhi jië'e jiaje ëhuni öri sisëre jijiharujoho vuonugo'i God-are öroro jijihago huro jemesi sisëho mu'uvëho'irajo.

<sup>20</sup> Ëhi ë'ë'oho Badaro jemesi aru'ahoho biririvëho'ajëjo. Biririvëhoromo Iesu nugö'ö'iramu jemëni rue'a'ajëjo. Iesu böröme namiromo ajëmi'iröhe aho ë aho God-ro jemesi jöëni baejade höjo.

<sup>21</sup> Baejë'ëro huro ö'idöre hijuvo hujeji God-ro sa'ae bövie bise'e röhu maho i'e avoho'iramu evare rue'a'ajëjo. Ëhi jië'e jöho mami gö'e nugö'öjamu jö hesiro baeromo majehinövare aribövi mahuro surire jajivobe rovare höjo.

<sup>22</sup> Iesuare jöho Moses-ro God-are surire jajivoromo uövuade höjo: Jemesi a bövie God-hu na remö'öjamu rovodëhi huro jö hesiro baeromo majëhi'iröhe a göhu'o ëhi nugö'ö'iramu rue'a'ajëjo. Hu jemesi sa'a raje jio'a'ajëjo. Jö rabe uëvë'oho ejahonövorëjo.

<sup>23</sup> Ae rahu hesi jö bogo ejahë'oho ë aribövioho rori'o sö va'oromo ijumëvo'aruëjo. Iesuare jöho ëhi jajivë'e höjo.

<sup>24</sup> Ëhi jajivamu jö God-aro baeromo majahinövare a ioro'ioroho Samuel-arire aevoromo hesi ijore rueromo jö majëhijare ae aho'obëhe ëho jaburo jaruvore mu rabeju rovaje jöho majëhibe rovare höjo.

<sup>25</sup> Röhu jemë'o huë mae bae'irarijago ëhuni ë ariböviohuro jöho God-aro baeromo majëhiromo uënövare höjo: Huro mu mabëhe nugö'ö'iramu rue'a'ajëjo. Jemë'o huë mae bae'irarijago ëhuni God-ro jemesi hijo miono'oho darugo'e jögoroho bojëmiromo uëvade höjo: Iae naro muebejëvonövo'ejöjo. Huro ëhi jië'e jögoroho Abraham bojamiromo uavade höjo: Naro jasi a ujoho mae avohëvo'iramu ëhuro sa'ae dinö'e dinö'e raromarue ariböviohu'o huë mae baeruomo'ajëjo.

<sup>26</sup> Ëhi uavë'ëro huro hesi mu vaejaje aho Iesu baeromo urimo jemesirire nugö'öjade höjo huro rueromo jemë huë mae bojëmiromo dë vövöbajo'oho huotovëhego jemë ae aho'obëhe mu sisëho vuonugo'irarijago.

## 4

### *Peter'o John'o Jew rajo a masijo jabesi nunire rirarovare jöhoje.*

<sup>1-2</sup> Peter'o John'o jaburo jöho ëhi majëhijamu hejë'i Jew rajo a masijohuro rueruomadeje. Priest ömo'ömhuro God-are amo börömo atovarue jabesi a böviohuro Sadducee ömo'ömhuro ëho jaburo hejare Peter'o John'o ae uëvamu: Iesu guomoromo ri'öjël'ëro ëhu'ëro vuovarue ae aho'obëhe no'o ri'ö'ejare uëvamu hegorovo uvareje: Jö sisë ae majëhijaruëromo dë vörönëgamu rovareje.

<sup>3</sup> Rueromo Peter'o John'o guduamo ömëvo va'oromo majae barëjamu gagorovo savoji gagore ba'amëvareje hujeji nërö rueromo jabesi nunire rirarovoröhego.

<sup>4</sup> Amo ae aho'obëhe Peter'o John'o majëhijare jöho heromo Iesu mae uehorovoruomadeje. Mae uehorovë'ëro ëhu'ëro Iesu mae uehorovarue aribövioho aho'obëhe 5,000 rabu'e jiadeje.

<sup>5</sup> Peter'o John'o savoji gagore ba'amëvamu momorö'öjël'ëro sisonuvamu gagorovo council a masijohuro a duvaho ömo'ömhuro jögoru öri röjêhjarue ariböviohuro ëho jaburo Jerusalem rueromo gemuore gagovoruomadeje.

<sup>6</sup> Gagovoruomamu priest böröme Annas-ro Caiaphas-ro John-ro Alexander-ro priest börömo hesi agano ioro'iorohuro ëho jaburo a masijo ioro'iorohu'o gemuoro gagovareje.

<sup>7</sup> Gagovoromo Peter'o John'o hu'iraejëvo ruejöro jöe nugö'öjamu rueromo jabesi nunire ë rirarovareje. Rirarovamu gëgorovo uëvareje: Jemë diehi'oromo hörü sisë'e aho ajamijamu marëjade höjo. Diehi jië'e vöröho baeromo rahuare ihoro uvoromo ë'arije höjo.

<sup>8</sup> Èhi uëvamu God-are Aru'ahohuro Peter-are dë vövöbajo'o ho rarovamu ri'öromu uëvadeje: Jew rajo a masijohu'o a duvahohu'o nasi jöe hehëjo.

<sup>9</sup> Noehu hörü sisë'e a ajamamu marëjade jöho evaho nani jemë he'i nëgamu ëhuni noro jemesi nunire rirarovojo atë'ëro uö gövuarujëjo.

<sup>10</sup> Èhi jië'oho na negajëjo jemë'o Israel a ioro'iorohu'o ae aho'obëhe jemëro ave jöho he'irarijego. Ave aho jemesi nunire marëjê'e namijaje hesi bëhoho Nazareth rajë Iesu Keriso hesi darugohuro ëhuro ajamamu marëjê'e höjo. Èaho Iesu jemë korosire anamu guomamu God-ro i'ovamu ri'öjade höjo.

<sup>11</sup> Èaho Iesuare jöho God-are surire uhunö'e jajivoromo uövuë'e höjo: Jemë munë javue vae'irögoro munë gemu bijönimoromo vuonugarije höjo. Vuonugarijoho jaruvoho ë munëhuro javuoho nigemo'ego bibivoromo mae namijajëjo.

Èhi jajivë'e höjo.

<sup>12</sup> Iesuro huro gemuëro ajamuijego i'uoho bogo bae'i marëjavuajë höjo. Èhesi bëhoho God-ro Iesuare ihe gemu sa'ae dinö'e dinö'e bojamuijê'e höjo aho bogo sisëroho va'i mae javuoröhego. Iho göho bogohöjo.

<sup>13</sup> Èhi uëvamu hegorovo rue Jew rajo a masijoho jaburo gavare Peter'o John'o bogo nuni aji'e aho jëvo'i ëma uno'e ae jëvë'e bogo juhuonivo'i birivoromo jöho majëhijamu gagorovo tiöromadeje. Tiöromu evare garomo uvareje: Èaho jaburo niö'iro Iesu'o gemu mae jirehonövä'ëro ëhu'ëro ë'aruëjo.

<sup>14</sup> Èhi uvoromo gavare hörü sisë'e aho mami'e marëjê'ëro Peter'o John'o jabesi gemuore namijamu gagorovo jabesi jö aho'iröhoho bogo eni jioruomadeje.

<sup>15</sup> Bogo eni jioruomamu aëro Peter'o John'o hu'iraejëvoromo gagovarue osaho vuonugo'i rori'o va'ojöro uënugoromo jabesi sivue jöho mevoromo uarovareje:

<sup>16</sup> Noro ave ae niö'ioho diehi'ëvo'ëjarëjo. Èhesi bëhoho Jerusalem raromarue ae aho'obëhe hejare uvamu: Èae niö'iohuro bogo gavarue müe gö vaejê'e hö uvamu hejê'ëro ëhu'ëro subivo'iröhoho bogo eni javuajëjo.

<sup>17</sup> Röhu ae göëro göëro hebe va'ojöëni ë'ego no jögore bojëmiromu uë'irarëjo: Bogave ijoho Iesuare ihoroho jöho majëhi'irarijëjo.

<sup>18</sup> Èhi uarovoromo ae uëvamu Peter'o John'o osaëro hu'iraejëvo rovarëje. Hu'iraejëvo rovamu uëvareje: Bogave gemu Iesuare ihoroho jöho majëhiromu röjêhi'irarijëjo.

<sup>19</sup> Èhi uëvamu hegorovo rue ae niö'iohuro uëvareje: Jemëhu uövuarujoho nadi Iesuare ihoroho jöho majëhirë uövuarujoho iae no hejaruëjo. Röhu na

no jemesi jöho ejëho'ejarëjo o God-are jöho ejaho'ejarëjo. Jemesi garëjo God di muoho nimego.

<sup>20</sup> Iesuhu ë'amu noehu garomo hejare jöho diehi'oromo vuonugojörajo.

<sup>21</sup> Ëhi uëvamu rue Jew rajo a masijohuro Peter'o John'o i'u bojëmi'ibejaroho röhu uvareje: Höru sisë'e aho marëjamu gavël'ëro ae aho'obëhe God rajahiruomajëromo i'u bojëmi'iröhe öroho bogo birohogoro vuonugo'i jöe gö'o darugo ma'e majëhiromo jiovo rëmö'öjëvamu va'areje.

<sup>22</sup> Amo ae aho'o God rajahijare hesi bëhoho ë höru sisë'e aehu hijade hesi vadunoho aho'o 40 ëmino'e iosiramiro mo ruëhi jië'ëro bogo marë hesi jiadoho röhu Peter'o John'o Iesuare daruge baeromo ajamamu marëjadeje.

*God-hu ajëme go bogo juhuonivë'e ma-biririvoromo jö majëhi'iröhëro Iesuare ariböviehu ëninamare jöhoje.*

<sup>23</sup> Iae jiovo rëmö'öjëvamu va'oromo Peter'o John'o ma-burëro vuonorö'ö va'oromo jabesi aribövioho uëvareje: Jew rajo priest masijohu'o a duva-hohu'o jaburo no uövuare höjo: Iesuare ihoroho nadi ijoho jöho majëhirëjo.

<sup>24</sup> Ëhi uëvamu hegorovo rue Iesuare ae aho'obëhe jaburo uehore gemu baeromo God uaruomadeje: O asë'e nosi A Börömo ho ö'idöe sa'ae jove bövie bise'e jero bamavuane höjo.

<sup>25</sup> Urimë'i jero ave jöho bojamamu jasi Aru'ahohuro jasi mu vaejaje ae David nosi hije David-are simanore bojamamu huro jajivade höjo. Jajivoromo uövuë'e höjo:

Sa'a ioro'ioro rajoho rabëni jovëro gatovanovoromade höjo.

Sa'ae göre göre aribövioho rabëni simano rumo'e muoho vae'i öroho naho garuomade höjo.

<sup>26</sup> Sa'ae dinö'e dinö'e raromarue a masijohuro muorovo'i avohorovare höjo.

Sa'are simano vaejarue ariböviohuro gagovorovare höjo

Bada God'o muorovo'i God-hu uavë'ëro böröme namiromo ajamuaje ahu'o muorovo'i.

<sup>27</sup> David-hu ë jö jajivadëhi ëhi ave amore iae gagovoromade höjo Iesu'o muorovo'irovo. A masije niö'i Herod'o Pontius Pilate'o ëho jaburo sa'a ioro'ioro rajohu'o Israel rajohu'o gemuoro gagovare höjo Iesu'o muorovo'irovo. Iesu jasi muohuremu vaejaje aho höjo. Jero hu uavane höjo huro böröme namiromo ajamui'iröhego. Ëahu'o muorovo'i gagovoromade höjo.

<sup>28</sup> Ëmuoho vae'i gagovare höjo. Röhu urimë'i ëhi jië'e muoho jioröhego God jero darugo'ëro javë'ëro jasi nimoromo ëhi bamane höjo.

<sup>29</sup> Bada röhu jaruvoho ë ariböviehu uövuaro ho Iesuare jö majëhijë'oho i'ue bae'a'arujë uövuare jöho jero ëho heromo uehorovoromo no jasi mu vaejarue aho ajamuinego bogo juhuonivo'i biririvoromo jasi jöho ma-sama'e majëhinövo'irarëjo.

<sup>30</sup> Jasi muemu vaejaje ae Iesuare jöëni ri'öromo guomo guomo'e aribövioho ajëmiromo darugo'e mue gö gö vaejago aëro garomo jöho mae uehorovo'irarëjo. Ahia mino'ëjo.

<sup>31</sup> God-are örire ëhi atamu gagorovo jabuhu raromaruoho hijiohijiovamu God-are Aru'aho hesi darugohuro ae aho'obëhe jabesi dë vövöbajo'oho rarovamu bogo juhuonivo'i biririvoromo God-are jöho atobe va'areje.

*Iesuare ariböviehu huë baeromo ajamirovonövare jöhoje.*



<sup>32</sup> Ĕhi'lamu iae Iesu uehorovarue aribövioho aho'obëhe uehore gemu dë vövöbajo'e gemu baeromo bogo uvonövareje: Nasi höromo sivu sivue bahi'i a'i uvonövareje: Ae aho'obëhe nosi höromo ma-gemuoro bahinövareje.

<sup>33</sup> Apostle ömo'ömohuro darugo ma'o ae majëhiromu uënövareje: Bada Iesu guomoromo ri'öjë'ëro hijamu nosi nunëro gavë'e javuajëjo. Ĕhi'o'ego God-are huë mahuro ë aribövioho aho'o ruahö'öjëvonövadeje.

<sup>34</sup> Ruahö'öjëvo'ego Iesuare aribövioho aho'obëhe i runo'e bövie bise'e eni jëvonövadeje. Ĕhesi bëhoho ae rahu sa'ae o javue ma-jio'amë'o'ho imo'amoromo monioho ujuohoromo rueromo

<sup>35</sup> apostle jabesi övore bahinövareje. Bahi'ego apostle-ho jaburo ganövare Iesuare ae gö gö rabe bogojiamu gavë'o'ho suvuorëminövareje.

<sup>36</sup> Suvuorëmijamu iae ae gemu hesi ihoho Joseph-ro mue gemuoho vaejadeje. Joseph-are iho göho apostle ömo'ömohuro Barnabas jumuvareje. Barnabas huotovë'e hesi bëhoho biriri bojëmaje ahoje. Hesi agano ihoho Levi raje jiadeje. Cyprus sa'are jioromo rovadeje.

<sup>37</sup> Rovë'ëro hiromu sa'ae gö imoromo monioho barueromo apostle jabesi övore bojëmajeje ae suvuorëmiröhego.

## 5

### *Ananias'o Sapphira'o sareri sareri'e jö majëhijare jöhoje.*

<sup>1</sup> Ĕhi jië'e mu maho vaejamu röhu ae göëro mu sisëho vaejadeje. A hesi ihoho Ananias jio'i hesi vaboro ihoho Sapphira jiadeje. Ananias-ro mu sisëho vaeromo jabesi sa'aho gö imoromo

<sup>2</sup> subivëhoromo moni vitu hesi tario bamadoho vaborohuro iae gavadeje. Vituoho hesi tario bamo'i vituoho apostle ömo'ömoho i'imëmiromu sarerëmiromu uëvadeje: Sa'a imode hesi ijo bajoho iae bojëmi barëjë'e jevajëjo.

<sup>3</sup> Bojëmi barëjë'e jevajëjamu Peter-ro uavadeje: Ananias Satan-hu dinamijadoho ja rabëni ejahoromo hesi jöho baejane höjo. Nadi God-are Aru'ahoho sareramiro mu sa'a moni vituoho subivëhoromo tario bamoromo uö'ibejanëjo: Na sa'a hesi monioho iae bojëmi barëjë'e jevajëjo.

<sup>4</sup> Sa'a bogo imane majaroho ëho jasi jiade höjo. Jero jasi ga'ibejanëjo imavego o bogo. O sa'a imanevare monioho aho'o jasi jiade höjo. Jero jasi ga'ibejanëjo ae bojëmavego o jasi ma'enavego. Röhu ja rabëni ëhioho ë'i uehorovane höjo. Ĕhi ë'ano'ho ja bogo ma-aemuoho sareramui'i God'o sareramijane höjo.

<sup>5</sup> Jöho ëhi majahijamu hejë'i Ananias sa'are beromu guomadeje. Guomamu ae aho'obëhe ë jöho hegorovo sisë maro juhuonivareje.

<sup>6</sup> Amo guomamu a i'o ömo'ömohuro rueromu sinoho niögëro numoromo bava'oromo guavareje.

<sup>7</sup> Guavamu majae 3 hours rabu'e barëjamu gagorovo vaborohuro hesi baru guomade jöho bogo hejë'e ma-rovadeje.

<sup>8</sup> Rovamu gagorovo Peter-ro uavadeje: Ave jöho uevego na hejëjo. Sa'aho imoromo na jemë monioho avemino'e baejarije höjo o gö'o döre baejarije höjo. Baejarije höjamu sareramiro mu uavadeje: Iae ëmino'e baejë'ëro jemesi örire bojëmi barëjë'e javuajëjo.

<sup>9</sup> Bojëmi barëjë'e javuajëjamu hegorovo Peter-ro uavadeje: Ja'o jasi baruohu'o jemë rabëni uvarije höjo: Nani Badare Aru'ahohuro bogo göromo i'uo'ho bojamui'ajëromu ëma sareramuijarije höjo. Nadi ëhioho ë'ibejarijëjo. Aveho gavëjo. Aribövioho jasi baruoho guavë'ëro aruëre ojanore rovaruoho hejëjo. Jasi sinohu'o bava'oromo guavo'aruëjo.

10 Ëhi uavamu gavë'i vaborohuro Peter-are bēhire ma-majioho beromo guomadeje. Guomamu rue a i'ohuro osare rueromo gavare vaboroho mami'e guomë'e jiamu gagorovo amonö bava'oromo hesi baru hesi bēhire guavareje.

11 Ëhi'amu ekaresiae aho'obēhe o a ioro'ioroho jabu'o ë jōho hegoro sisë maro juhuonivoruomadeje.

*Apostle ömo'ömehu noehu bogo gavarue darugo'e mu vaenövare jōhoje.*

12 Ëhi ë'ë'ëro iae God-ro ajëmi'ego apostle ömo'ömohuro bogo gavarue darugo'e muoho aho'obēhe vae'ego ae aho'obēhe ganövareje. Ëhi'o'ego Iesuare ariböviohuro God-are amo börömore iojiomoromo amo börömo hesi harada ihe Solomon-are haradare ë gemuoro gagovorovonövareje.

13 Gagovo'ego a ioro'ioroho jaburo Iesuare aribövioho mae uehorovëvo'i röhu juhuonivoromo bogo ëma gemuoroho va'o raromonövareje.

14 Bogo ëma gemuoroho raromo'i röhu ae magonahe gö'o gö'o aho'obēhe Bada mae uehorovoromo Iesuare ariböviohu'o aevoromo gemu mae raromo jijihonövareje.

15 Ëhi jië'e mu masijoho rovë'ego aëro guomo guomo'e aribövioho örire ujuoho ruenugoromo momorö'öjarue röho nu ano'e göre göre ë bahinövareje Peter rova'ego hesi övehu bogo ajëmijë'oho röhu hesi maja aru'ahohuro bamëvego marë'iröhego.

16 Ëhi'o'ego ae aho'obēhe Jerusalem-nörire amo göre göre raromarue aribövioho jaburo guomo guomo'e ariböviohu'o aru'aho sisëhu simano sisë vaejēhë'e ariböviohu'o ujuoho rue'ego apostle ömo'ömohuro jabumë aho'obēhe ajëmiromo avohëvonövareje.

*Jew rajo a masijehu Iesuare apostle aribövi sisë vaejëvare jōhoje.*

17 Ëhi'amu gagorovo iae Jew rajo priest börömo'u'o hesi aemo'aeme Sadducee ariböviohu'o ëho jaburo apostle jabesi mu maho garomo dë vörönimareje.

18 Dë vörönimoromo ri'öromo apostle aribövioho guduamëvoromo ujuoho va'oromo savoji gagore io'amamu sisë ariböviohu'o gemuore raromareje.

19 Savoji gagore raromamu vahiomamu gagorovo Badahu nugö'öjädë anerahuro rueromo ojoho jiovëhoromo apostle aribövioho sōjëvo va'oromo amonö höröjädëje. Höröromo uëvadeje:

20 Va'irarijoho God-are amo börömore riravoromo Iesu uehorovoromo mae raromo'iröhe öri hesi jōho majëhirego ae aho'obēhe he barë'irarëjo.

21 He barë'irarëjamu hegoro va'oromo sisonuvamu gagorovo God-are amo börömore ajio riravoromo aevoromo Iesuare jōho majëhijareje.

Ëhi'amu Jew rajo priest börömo'u'o hesi ariböviohu'o ëho jaburo rueromo Jew rajo a duvahoho aho'obēhe jöe nugö'öromo uëvareje: Jew rajo a masijoho aho'obēhe ro gemuoro gagovorego no jöe mevo'irarëjo. Mevo'irarëromo jöe nugö'öromo police-oho uëvareje: Savoji gagore aribövioho sō ujuoho ruehëjo.

22 Sö ujuoho ruehëjamu hegoro va'oromo gavare savoji gagoroho apostle aribövioho bogojëvamu gagorovo vuonorö'ö rueromo Jew rajo a masijoho uëvareje:

23 Noro va'oromo gavare höjo savoji gago hesi ojoho tugoho titimo'amë'ëro muebejarue aribövioho ojore ojore atovoromo riravoruomamu gëgorovo ojoho jiovoromo osare va'ihö gavare höjo Iesuare aribövioho bogojëvamu.

<sup>24</sup> Ĕhi uĕvamu hegorovo God-are amo bĕrĕmo atovaje police bĕviohu'o priest masijohu'o uvareje: Diehi jiĕ'ĕro bogo'e hĕjo.

<sup>25</sup> Bogo'e hĕjamu ae gemuĕro rueromo uĕvadeje: Jĕe hehĕjo. Savoĵi gagore io'amarije aribĕvioho jaburo God-are amore riravoromo ae aho'obĕhe jĕe rĕjĕhijaruĕjo.

<sup>26</sup> Rĕjĕhijaruĕjamu hegorovo rue police bĕviohu'o hesi bĕhire raromarue aribĕviohu'o ĕho jaburo apostle ōmo'ōmoho sĕ ujuoho rue'i va'areje. Va'oromo uvareje: Noehu jabumĕ guduumĕvĕ'oho ae aho'obĕhe no gĕromo bijĕnimoromo munĕro vajamui'aruĕromo juhuonivoromo apostle bogo guduumĕvĕ'e ma-sĕ ujuoho rovareje.

<sup>27</sup> Ujuoho rueromo Jew rajo a masijo jabesi nunire rĕmamu ĕ riravareje. Riravamu gagorovo priest bĕrĕmohuro uĕvadeje:

<sup>28</sup> Noro darugo'e jĕho mami'e bojĕmiromo jemĕ uĕvare hĕjo: Iesuare ihoroho bogave gemu aho jĕho rĕjĕhi'irarijĕjo. Rĕhu jemĕro jemesi jĕ sisĕho rĕjĕhi'i arijamu Jerusalem amo rajoho ae aho'obĕhe heruomĕ'e hĕjo. Ĕhi'oromo nimarujĕjo Iesu anamu guomade mu hesi i'uoho noro bae'irĕhego.

<sup>29</sup> Ĕhi uĕvamu hegorovo Peter'o apostle ioro'iorohu'o jaburo uĕvareje: Iae no hejaruĕjo rĕhu jemesi jĕho gĕ jio'i God-are jĕho gĕ jio'ego ĕhuni nomĕ God-are jĕho ejaho'ejarĕjo a jĕho bogajo.

<sup>30</sup> God nosi hijo miono'o muebe'amonĕvade ahuro Iesu ajamamu guomoromo ri'ĕjade hĕjo jemĕro hu ijore ano taemamu guomĕ'ĕro.

<sup>31</sup> Ri'ĕjamu God-ro hesi ihoho dĕro bamoromo uavade hĕjo: Roĵo nasi ōvo manĕ hijĕjo. Hiromo ae aho'obĕhe jabesi bĕrĕme namiromo maro bamĕvo'irane aho jionĕjo. Ĕhi jioromo ōroho jiovĕhego Israel rajoho jaburo uehoros sisĕho vuonugego God naro jabesi sisĕho deĵonĕ bu'ĕjĕho'irode hĕjo.

<sup>32</sup> God-ro ĕhi jiĕ'e muoho vaejamu nosi nunĕro gavĕ'ĕro ĕ hesi jĕho ae majĕhijarue hĕjo. Rĕhu bogo no gemu majĕhi'i God-are Aru'ahohu'o ajamuiromo ae majĕhijaje hĕjo. Ae rahu God-are jĕ ejahĕ'oho Aru'ahoho God-aro baejarue hĕjo. Amo hu'o ajamuiromo ae majĕhijaje hĕjo.

<sup>33</sup> Ĕhi uĕvamu hegorovo rue Jew rajo a masijohuro vĕrĕ'iraeromo apostle ōmo'ōmoho muo'amojĕro uvoruomadeje.

<sup>34</sup> Uvoruomamu jabesi ae gemuĕro jĕe jĕvo'i ri'ĕjadeje. Ĕa hesi ihoho Gamaliel ĵiadeje. Hu Pharisee ae ĵiadeje. Hu Jew rajo jĕgoru ōri rĕjĕhijaje ae ĵiamu ae aho'obĕhe hesi ōrire mae uehorovoruomadeje. Ĕaho Gamaliel-ro ri'ĕromo a masijo ioro'ioroho uĕvadeje: Ĕaribĕvioho rori'o sĕ va'ego na jĕ harihe majĕhijego evaro sionĕro sĕ ruerĕjo.

<sup>35</sup> Sĕ ruerĕjamu sĕ ujuoho va'amu evare uĕvadeje: Israel rajomĕ rue Iesuare aribĕvi muo'amo'i uvarujoho o jabesi ōrire rabe rabe vae'i uehorovĕ'oho nadi nuni rumo'oho ma-vae'i uehorovo avohoromo vaerĕjo.

<sup>36</sup> Ĕhesi bĕhoho rabĕni ma-bisemu urimo ae gemu hesi ihoho Theudas-ro rovade hĕjo. Rueromo ae uĕnĕvade hĕjo: Na a bĕrĕme jevajĕjo. Ĕhi uĕ'ego ae aho'obĕhe 400 rabu'e hesi ijore ijore ĵiĵhonĕvare hĕjo. Hesi ijore ijore ĵiĵhojuvo aĕro Theudas anamu guomamu hesi aribĕvioho aho'obĕhe arua anumiae va'oruomamu hesi muoho sisĕrĕ barĕromo bogojiade hĕjo.

<sup>37</sup> Ĕhi ĕ'ĕ'ĕro sa'are a jabesi iho baeruomade majare ae gĕ hesi ihe Judas Galilee sa'a rajohuro rovade hĕjo. Rueromo jĕe majĕhiromo jabesi simanoho huotovĕhĕ'ĕro ae aho'obĕhe hesi ijore ijore ĵiĵhonĕvare hĕjo. Ĵiĵhamu aĕro Judas'o anamu guomamu ĕ hesi aribĕvioho aho'obĕhe arua anumiae va'o barĕjade hĕjo.

<sup>38</sup> Va'lo barëjê'ego êhuni naro ave jôho majêhiromo uëvâjêjo: ÊIesuare aribövioho ma-nunëremu gêromo vuororëmirêjo. Êhesi bêhoho rabëni jabuhu vae'i nimoruomaje muoho ma-a jabesi mu jiajoho Theudas'lo Judas'lo jabesi muehu sisërëjadêhi Iesuare aribövi jabesi muohu'lo êhi sisërë'ajêjo.

<sup>39</sup> O God-hu bojêmade mu vaejaruohuro jemê jabumê bogo iosirëmi varijënoho jëvâjêjo. Iosirëmi'ië'oho uvo'a'arujêjo: Nani no ae gö'lo muorovaruë'i ga'a'arujêjo God'lo muorovëvo'iramu.

Jôho êhi majêhamu hegorovo ë Jew rajo a masijohuro ejahoruomadeje.

<sup>40</sup> Ejahoromo ae uëvamu apostle aribövioho osaëro sô rovareje. Sô rovamu gagorovo hisuebijëvojôro uëromo apostle-ho uëvareje: Ijoho bogave Iesuare ihoroho jôho aho majêhi'irarijê uënugoromo jiovo rëmö'ôjareje.

<sup>41</sup> Rëmö'ôjamu uvareje: God-ro no mae uehorovavuë'ëro êhuni hu uvajêjo: Noehu Iesuare jöëni i'u baejaruoho iae eni javuajêromo nimorohobe Jew rajo a masijehu jiaruire jioromo va'areje.

<sup>42</sup> Va'ë'ëro Iesuare jö mae majêhinövaroho bogo vuonugo'i majae êhi God-are amo bôrömore va'oromo jabesi osare osare va'oromo ae uënövareje: God-hu uavë'ëro bôröme namiromo ajamuaje aho iae Iesu hōjo. Jôho êhi majêhiromo ë hesi ôroho rjêhinövareje.

## 6

*Ae aho'obêhe 7-hu ekaresia ajëmiromo moni mu muebejëhoröhego ekare-siaehu baejëvare jôhoje.*

<sup>1</sup> Êhi'amu ae magonahe aho'lo ro Iesuare aribövi gemuoro havobe va'amu bôrömoraejadeje. Bôrömoraejamu Greece huêhu atarue Iesuare ariböviohuro dë vörönëgamu jöe atoromo uvareje: Ijo bajo magonaho doru majae êhi suvuorëmijaruoho nosi Greece huêhu atarue magonahoho ijo bajoho bogo avoho baejarue hōjo.

<sup>2</sup> Êhi atamu hegorovo apostle aho'lo 12-ho jaburo Iesuare ae magonahe aho'obêhe gemuoro gagovojôro jöe nugö'ôjareje. Jöe nugö'ôjamu ro gemuoro gagovamu gagorovo uëvareje: Apostle nosi muoho God-are jö majêhijaruoho hōjo. Noehu God-are jö majêhijaruoho bogo avoho ma'eno'i moni suvuorëmijarue muohu'lo vaejê'oho êho bogo maho hōjo.

<sup>3</sup> Aganomê bogo maho jiê'e jiaje êhuni ga'irarije di aho ae aho'obêhe uvarujoho: God-are Aru'ahohuro dë vövöbajo'ere rarovë'ëro jabumê simano mae uehorovarue aribövioho hō uvarujoho êhi jiê'e aho aho'obêhe 7 ëmino'e jabesi ihoho uövuego noro ë moni muro bamëvego jabumê êho muebel'irarêjo.

<sup>4</sup> Êaribövioho 7 jaburo suvuorëmi'iröhe muoho muebe'iramu noro ë muoho vuonugo'i God-are örire jöe atoromo hesi jôho majêhinövo'ejarejo. Êhuremu uehorovonövo'ejarejo.

<sup>5</sup> Apostle-ho jaburo êhi majêhijamu hegorovo ae magonahe aho'obêhe uvareje: Jö mae hōjo. Jö mae hō uvoromo ejêhoromo Stephen baejareje. Stephen Iesu mae uehorovo avohamu God-are Aru'ahëro rumorovë'e ae jiadeje. Stephen baeromo Philip Prochorus Nicanor Timon Parmenas Nicolaus êho jabu'lo baejëvareje. Nicolaus mami'e Antioch amore jioromo rovadeje. Urimoho bogo Jew rajo jiadoho ijönö Jew rajo muoho baejadeje.

<sup>6</sup> Ĕaribövioho 7 baejėvonugoromo sŏ ujuoho va'oromo apostle jabesi nunire rėmareje. Jabesi nunire rėmamu apostle-ho jaburo jabesi jŏėni God-are ōrire jŏe atoromo ōve simanore bamėvareje ě ijo bajo suvuorėmirŏhe muoho vaerŏhego.

<sup>7</sup> Ĕhi ě'ė'ėro God-are jŏho Jerusalem ame bŏvioho rumorovamu Iesuare ae magonahe Jerusalem raromaruoho ae aho'obėhe jiobe va'adeje. Ae aho'obėhe jiobe va'ojuvo Jew rajo priest ae aho'obėhe Iesuare jŏho aevoromo ejahareje.

*Jew rajo a masijehu uėvamu Stephen guduamare jŏhoje.*

<sup>8</sup> Ĕhi'amu iae God-ro Stephen mabėhe ajamiromo darugoho bojami'ego ěhuro bogo gavarue darugo'e mu masije gŏ gŏ ae aho'obėhe jabesi nunire vaenŏvadeje.

<sup>9</sup> Mu masijoho vaejamu Jew rajo a ioro'iorohuro ri'ŏromo Stephen-are jŏho aho'ahamijareje. Jŏ aho'ahamijare aribŏvioho ioro'iorohuro Cyrene amore Alexandria amore jioromo rov'ėro Jerusalem raromoromo Jew rajehu God rajahijarue osae gemuore gagovoromo God rajahinŏvareje. Ĕosa hesi ihoho Jiovo Rėmŏ'ŏjė'e Aribŏvi Jabesi Osaho jiadeje. O ioro'iorohuro Cilicia sa'are Asia sa'are jioromo rov'ėro raromareje. Ĕaribövioho jabu'o Stephen-are jŏho aho'ahamareje.

<sup>10</sup> Aho'ahami'ego God-are Aru'ahohuro Stephen simano mae bojami'ego huhu jŏvaje jŏ ahorŏhoho bogo eni jėvonŏvadeje.

<sup>11</sup> Bogo eni jėvamu gagorovo jabumėro a ioro'ioroho ijo bajoho bojėmiromo uėvareje: Jemėro ae aho'obėhe sarerėmiromo uėrėjo: Noro hejare hŏjo Stephen-ro Moses'o God'o jabesi jŏho sis'ė'i jŏvavamu.

<sup>12</sup> Ĕhi majėhiromo Jew rajo a duvaho jabesi o jŏgoru ōri rŏjėhijarue aribŏvi jabesi o ae magonahe aho'obėhe jabesi dė vŏvŏbajo'oho huotovėhamu dė vŏrŏnimoruomadeje. Dė vŏrŏnimoruomoromo rueromo Stephen guduamo bava'oromo Jew rajo a masijo jabesi nunire nugareje.

<sup>13</sup> Jew rajo a masijo jabesi nunire nugoromo a ioro'ioroho sŏ rovarere jaburo ě a masijo jabesi nunire Stephen-are jŏho sarerėmirŏhego. Sŏ rovamu ěho jaburo Jew rajo a masijoho sarerėmiromo uėvareje: Ave iahuro God-are osa bŏrŏmoho sivoromo Moses-hu bojamuijade jŏgorohu'o sivemu sivaje hŏjo.

<sup>14</sup> Ĕhesi bėhoho noro hejare hŏjo Stephen-ro uvamu: Nazareth rajoho Iesuro God-are osa bŏrŏmoho dadovoromo Moses-hu bojamuijade muoho aho'o tugoho'i mu i'e bojamui'ajėjo. Stephen-ro ěhi jiė'e jŏ sisėho jŏvamu hejare hŏjo.

<sup>15</sup> Sarerėmiromo ěhi majėhijamu hegorovo rue Jew rajo a masijohuro Stephen gemu ěrimahoromo gavareje hesi nu ano'oho anera jabesi nu ano'o va'ėne jiamu.

## 7

*Israel rajehu God-are jŏ bijŏnimobe rovarere jŏ Stephen-hu majėhijadohoje.*

<sup>1</sup> Anera jabesi nu ano'o va'ėne jiamu gagorovo priest bŏrŏmohuro Stephen uavadeje: Jasi jŏ sisė uŏvuaruoho ě jŏho na ma jŏe o sareri jŏe hŏjo.

<sup>2</sup> Mae o sareri jŏe hŏjamu hegorovo Stephen-ro uėvadeje: A duvahohu'o agano ioro'iorohu'o naehu jŏ harihu majėhi'ie'ajoho hehėjo. Urimė'i God-ro nosi hije Abraham-are nunire rovade hŏjo. U'emu Abraham-ro Haran sa'are va'irŏhėro ě hesi urimo Mesopotamia sa'are hijamu evare God aji'ere hijaje ahuro hesi ōrire rovade hŏjo.

<sup>3</sup> Rueromo uavade höjo: Jasi aganoho sa'aho vuonugo'i naehu röjahi'irode sa'ahuro ehuro va'onëjo.

<sup>4</sup> Ëhi uavamu hegorovo Chaldea sa'aho vuonugo'i Haran sa'are va'oromo ë hijade höjo. Hiromo hesi vavuoho guomamugo God-ro uavamu ave jemëhu raromaruje sa'are ro hijade höjo.

<sup>5</sup> Rueromo hijamu evare majaroho God-ro sa'aho bogo gö bisemu vadu'oho bojamade höjo. Bogo bojami'i a'i mae majahiromo uavade höjo: U'emu bojëmi'ejöjo ja'o jasi ujohu'o ave sa'aho bae'irarijeko. Abraham harihu rumo'e jïë'e röhu God-ro ëhi jövade höjo.

<sup>6</sup> Ëhi uaromo uavade höjo: Jasi ujo ömo'ömoho sa'ae göro va'o raro-moruomo'ajëjo. Raromo'iramu ë sa'a rajohuro i'u'e mue huë vavaene bojëmi'iramu jabesi darugoremu raromoromo huë vavaene baebe va'ojuvo vadune aho'obëhe 400 barë'ajëjo.

<sup>7</sup> Barë'iramu jemesi ujo ömo'ömehu vaejöro i'u'e mu bojëmaje aribövioho God naro gëromo i'ue mana bojëmi'ejöjo. I'ue bojëmi'iramu evare jasi ujo ömo'ömohuro ri'öromo ë sa'are jioromo rueröhoho ro ave dir'ore na rajehiruomo'ajëjo.

<sup>8</sup> Ëhi mae uanugoromo uavade höjo: Jasi a jabesi sinoho tarivo'amobe va'onövorëjo. Ehuro na uvo'irode höjo: Nasi aribövie jëvajeromo muebejëvo'irode höjo. Ja'o jasi ujo ömo'ömohu'o jemëro ëhi ë'onövorëjo. Ëhi uavë'ëro ijönö Abraham-ro harihoho Isaac baeromo hurae gemu barëjamu gagorovo sinoho tarijahamu God-are harihuraejade höjo. Ëhi'amu ijönö Isaac-ro harihoho Jacob baeromo hesi sinoho ëhi tarijahade höjo. Ëhi'amu ijönö Jacob-ro hesi harihe aho'obëhe 12 nosi hijo miono'o jabesi sinoho ëhi tarivëhobe rovade höjo.

<sup>9</sup> Ëhijo miono'ohuro masijoraeromo Joseph-are mu mahuni dë vörönëgamu hu ae gö imëvoromo mana baejare höjo. Mana baejamu rue imare ariböviohuro Joseph baeromo Egypt sa'are abuejare höjo. Abuejamu God-ro Joseph'o gemu mae juvade höjo.

<sup>10</sup> Joseph'o gemu mae juvoromo Joseph-ro vavaene bae'ego gagoro ajami'ego mae hinövade höjo. Mae hijamu God-ro hu ajamiromo huë mae uehoro mae bojami'ego mu mae vaenövade höjo. Mu mae vaejamu gagorovo Pharaoh Egypt sa'are simano vaejaje ahuro Joseph-are muoho garomo rajahiromo uavade höjo: Nasi Egypt sa'aho o bövie bise'e avoho muebejehonëjo.

<sup>11</sup> Ëhi uavamu muebebe val'ë'ëro iruno'e bogojiego ëma raromarue majaho rovamu ae aho'obëhe nume Egypt sa'are ave Canaan sa'are raromaruohuro huë vavaeni döro raromare höjo. Raromoromo nosi hijo miono'ohuro ie nahoromo gavare höjo bogojiamu.

<sup>12</sup> Ie bogojiamu gagorovo Jacob-ro hejade uvavamu: Nume Egypt sa'are iruno'e iae jiajëjamu hegorovo hesi harihu ömo'ömoho uëvade höjo: Egypt sa'aro abueromo iruno'e imoromo ujuoho ruerëjo. Ruerëjamu aevoromo Egypt abuejare höjo.

<sup>13</sup> Abuejë'ëro vuonorö'öromo Canaan sa'are rojomareje. Rojomë'ëro röhu maho Egypt abuejamu gagorovo Joseph-ro huruohoromo uëvade höjo: Na jemesi öe jevajëjo. Ëhi uëvamu Egypt sa'are simano vaejaje ahuro Joseph-are agano jabesi jöho hejade höjo.

<sup>14</sup> Hejamu Joseph-ro jöe nugö'öromo vavuoho uavade höjo: Ja'o agano ioro'iorohu'o Egypt sa'aro ruerëjo. Ëaganoho aho'obëhe 75 ëmino'e jiade höjo.

<sup>15</sup> Jöe nugö'öjumu hegoroovo Jacob'lo hesi aganohu'lo Egypt abueruomade höjo. Abuejè'ëro ë vuovëvade höjo.

<sup>16</sup> Vuovëvamu jabesi sinoho vuonorö'ö ujuoho rojomoromo Shechem amore ë guavare höjo mami'e jabesi hije Abraham-ro Hamor rajo aribövioho monie bojëmiromo ë sa'aho imë'ëro.

<sup>17</sup> Guavamu nosi hijo miono'e Egypt raromaruohuro ae aho'obëhe jiobe ruejuvo God-hu mami'e hesi ujo ajëmi'i Abraham uavadëhi ëhi ajëmi'iröhe majaho dunovade höjo.

<sup>18</sup> Dunovamu gagorovo sa'are simano vaejaje ae gö Joseph bogo gavadohuro ri'öromo Egypt sa'aho muebejade höjo.

<sup>19</sup> Egypt mueberomo nosi aribövioho sarerëminövade höjo. Sarerëmiromo nosi hijo miono'oho sisë vaejëvoromo uëvade höjo: Jemesi harihu ini-noho amonö bahiromo ëhuro vuonugo'amego vuovëho'irajo. Uë'ego ëhi ë'onövre höjo.

<sup>20</sup> Ëhi'amu Moses rahade höjo. Aharihu hesi nu ano'oho mabëhe jiade höjo. Nu ano'oho mae jiamu hesi vëmu vavu'ohuro jabesi osare muohojuvo manaere niö'i gemu barëjade höjo.

<sup>21</sup> Manaere niö'i gemu barëjumu gagorovo amonö banugare höjo. Banugamu gagorovo sa'are simano vaejaje a hesi abojohuro ruel'i gavade Moses raromamu gagorovo baeromo va'lo hesi muohade höjo. Muohamu böviraegade höjo.

<sup>22</sup> Böviraejumu Egypt rajohuro jabesi mu mae jö mae bövie bise'le röjahijumu bae barëjade höjo. Bae barëjè'ëro jö börömo jëvoromo mu masijo vae'amaje ae jiade höjo.

<sup>23</sup> Ëhi'ojuvo Moses vadune aho'obëhe 40 barëjumu gagorovo huro uehorovoromo uvade höjo: Jaruvoho na va'oromo nasi Israel rajo aribövioho gë'ejöjo gë'i diehi raromego.

<sup>24</sup> Ëhi uvonugoromo va'i gavade Egypt raje ae gemuëro Israel raje ae gemu hesi örire mu sisë vaejumu gagorovo Israel rajoho ajamiromo Egypt rajoho i'ue mana bojamiromo ano bamade höjo.

<sup>25</sup> Ano bamoromo uvade höjo: Nani nasi ariböviohuro uehorovoromo uvarue höjo: God-ro nörö ua'iramu nöröro no ajamui'iramu avare darugore raromaruoho vuonugo'i va'lo mae raromo'ejarëjo. Ëhi uvarue hö uvadoho bogo ëhioho jiade höjo.

<sup>26</sup> Ëhi'ë'ëro nërö Moses-ro gavade höjo Israel raje niö'iro muororovamu. Muororovamu gëgorovo ahëvë'i uëvade höjo: A niö'imë agane gemuoho jëvajëjo. Röhu jemë rabëni muorovarujëjo.

<sup>27</sup> Ëhi uëvumu hegoroovo mu sisë vaejade ahuro ri'öromo Moses övëro rori'lo biduohö'öromo uavade höjo: Ja raro ua'ego böröme vaeromo nosi muoho garomo ahavuanuëjo.

<sup>28</sup> Ja nëri Egypt rajo ananëhi na ja ëhi anego'iro ë'anuëjo.

<sup>29</sup> Ëhi uavumu hejè'i Moses-ro Egypt sa'are jioromo ju'ebiro mo va'adoho va'lo Midian sa'are ë hijade höjo. Ëhiromo harihe niö'i ömëvade höjo.

<sup>30</sup> Harihe niö'i ömëvoromo hijuvo vadune aho'obëhe 40 barëjumu Moses-ro a rumo'e sa'are Sinai dahoru bëhire nami'i gavade höjo ijo hisue vënehu ravo'ego anerae gemu ririre hijumu.

<sup>31</sup> Ëhijumu gagorovo tiöromo avoho ga'i bëhire va'ihö hejade höjo Badaro uavavamu:

<sup>32</sup> Na jasi hijo miono'e Abraham Isaac Jacob muebejävaje aho God jevajëjo. God jevajëjamu hegorovo Moses-ro avoho ga'ië'adoho juhuoniv-  
oromo butubutumoromo bogo avoho gavade höjo.

<sup>33</sup> Bogo avoho gavamu Badaro uavade höjo: Ave sa'aho nasi sa'ae jiaje na  
mae uehorovevoromo höru guduoho jijövëjo.

<sup>34</sup> Naro iae gëvode höjo nasi ariböviohuro Egypt sa'are sisë'i raromamu  
gavë'i hejode höjo jabumë hara'uavavamu. Èhuni na ruvebijë'e jevajëjo  
jabumë ajëmego sisë'i raromaruoho vuonugo'i mae raromoröhego. Èhi jië'e  
jiaje ri'öjego na ramö'öjego Egypt sa'aro va'ëjo. God-ro Moses-are örire èhi  
uavade höjo.

<sup>35</sup> Èaho iae Moses höjo. Urimë'i Israel rajo ariböviohuro è ae gemuoho  
bijönimoromo uaruomade höjo: Ja raro ua'ego böröme vaeromo nosi muoho  
gavanuëjo. Israel rajo ariböviohuro Moses èhi bijönimoruomamu God-ro hu  
baejade höjo. God-ro hu baeromo mu börömoho bojamade höjo. Èhesi  
bèhoho God-ro uavamu vënehu ravade ijo hisu ririre hijade anerahuro  
Moses nugö'öjamu Egypt sa'are abueromo a böröme namiromu Israel rajo  
aribövioho vavaene jëvamu baejëvoromo maro bamëvade höjo. Èhi jië'e mu  
börömoho God-ro Moses bojamade höjo.

<sup>36</sup> Èae gemuoho Moses-ro Egypt sa'are hiromu bogo gavarue vörö'e  
muoho vae'amoromo Israel rajoho Egypt sa'are jioromu søjëvo va'adoho  
va'lo jovo e'ure jovo ihe Kavüë'e Jovore darugo'e muoho vaeromu søjëvo  
va'adoho va'lo a rumo'e sa'are darugo'e muoho vae'amobe va'ojuvo vadune  
aho'obëhe 40 barëjade höjo.

<sup>37</sup> Èae gemuoho Moses-ro Israel rajoho uëvade höjo: God-hu na  
remö'öjamu rovodëhi jö hesiro baeromu majëhi'iröhe a göhu'lo huro èhi  
nugö'ö'iramu rue'a'ajëjo. Hu jemesi sa'a raje jio'a'ajëjo. Èhi uëvade höjo.

<sup>38</sup> Èae gemuoho Moses Israel rajehu a rumo'e sa'are gagovoromu raro-  
maruire hu'lo è gemuore hijade höjo. Hu Sinai dahorure hiromu anera  
hesi jöho baeromu anumiae abo hijo miono'oho majëhinövo numeho jabesi  
jöho aruhiae ajio aneraho majahinövade höjo. A i'ovëvo'iröhe jöho God-aro  
baejade höjo nosi örire bojamui'iröhëro.

<sup>39</sup> Èhi è'amu nosi hijo miono'ohuro Moses-are jöho bogo ejahare  
höjo. Bogo ejaho'irögoro a'i Moses juahamiromu Egypt sa'are vuonorö'ö  
va'irögoro è'are höjo.

<sup>40</sup> Va'irögoro Aaron uaruomade höjo: Inömoho avoho'amego no èho  
masije hö uvoromu jabesi ijore ijore jijihö'irarëjo. A'i Moses søjavuo rovade  
aho no bogo gavaruëjo hu dinö'e höjo.

<sup>41</sup> Èhi atonugoromu cow harihu nu ano'lo va'ëne inömoho avohoromu  
uvare höjo: Ave inömoho darugo'ego ma-hu gemu uehorovonövo'ëjarëjo.  
Èhi uvoromu mie muo'amoromu vëniro mueromu rajahiromu bahijahare  
höjo. Jabumë övehu avohare inömoho èho uvare höjo: Börömoho höromu  
hesi ihoro söröho ijare höjo.

<sup>42</sup> Èhi'amu gagorovo God-ro jabesinö dejoho bu'öromu uëvade höjo:  
Jemëro jije mujöre èho rajëhibe va'orëjo. Jemëhu nëgajëhi èhi è'orëjo. Èhesi  
jöho jö God-aro baeromu majëhinövare aribövi jabesi surire jajivoromu  
uvë'e höjo: God-ro uëvajëjo: Israel rajomë mie muo'amoromu vëniro  
mueromu bahibe a rumo'e sa'are vadune aho'lo 40 jijiharije höjo. Na jemë  
na rajehi'i è'arije höjo. Bogajo.

<sup>43</sup> A'i ae gö jabesi god ihe Moloch è hesi niögu javuoho baeromu  
jijiharije höjo. Ae gö jabesi god ihe Raphan hesi jiji nu ano'oho baeromu



jijiharije höjo. Ĕinömo sisëho jemesi övëro avoho'amarije höjo uvene aho röjahi'irarijëro. Ĕhuni na jemë rëmö'ö'ejöjo öre ëgoro va'oromo Babylon iosiramiro rori'o va'o raromo'irarijego. God-are surire jöho ëhi jajivë'e höjo.

<sup>44</sup> Nosi hijo miono'ehu a rumo'e sa'are raromo jijiharevare evare God-are niögu javu börömo jakesi örire jiade höjo jaburo ëho garomo uvoröhego: God-ro no'o gemu mae juvaje hö uvoröhego. Ĕjavu vaeröhe hesi öroho God-ro röjahijamu Moses-ro ëho garomo ae uëvamu ëhi vaejare höjo.

<sup>45</sup> Vaejamu nosi hijo miono'ohuro baejare höjo. Baejë'ëro vuovëvamu jakesi ujoho jaburo baejare höjo. Baeromo Joshua-are ijore va'oromo ave sa'are rueromo gavare höjo urimore raromare aribövioho God-ro bisihö'öjëvamu gagorovo ave sa'aho baeromo javu börömo ë bamare höjo. Bamamu javuho ë jiobe ruejuvo David-ro böröme namiromo Israel muebejëvade höjo.

<sup>46</sup> Muebejëvoromo mu mae vaeromo God-ro hu mae uehorovamu uvade höjo: Na negajëjo javu maho vaejego Jacob muebenövade aho God-ro ë hiröhego.

<sup>47</sup> Röhu hu bogo a'i Solomon-ro God-ni javu maho vaejahade höjo.

<sup>48</sup> Ĕhi ë'ade höjo röhu God dö mare hijajëro aehu övehu vaejharue osaroho bogo hijaje höjo. Osare bogo hijaje jöho jö God-aro baeromo majëhinövade ahuro jajivoromo uvë'e höjo:

<sup>49</sup> Badaro uvavohijajo: Na hijajoho ö'idöre höjo.

Höroho sa'are bamaje höjo.

Ĕhi jië'oho diehi jië'e javue nanioho vaerëjo.

Nuhu'irode osaho dinö'e avohorëjo.

<sup>50</sup> Jemë bogo eni jëvo'ajëjo naro nasi övëro ave inömo aho'obëhe bamë'ëro jevë'ëro.

God-are surire ëhi jajivë'e höjo.

<sup>51</sup> Sareri hia'i biriri'e aribövie jëvajëjo. Dë vövöbajo'oho gö gö uehorovarue aribövie jëvajëjo. Hia'e tugohë'e aribövie jëvajëjo. Jemesi hijo miono'ehu ë'onövarëhi ëhi ë'aruje höjo. God-are Aru'ahoho bijönimobe rovaruje höjo.

<sup>52</sup> God-are jö majëhijarue aribövioho jemesi hijo miono'oho rabu'e aribövioho bogo sisë vaejëvare höjo. Mami gö'e God-ro ae rëmö'öjamu jaburo ae majëhiromo uëbe rovere höjo: God-are mu ma vaejaje aho rue'a'ajë uëvare höjo röhu jemesi hijo miono'ohuro muo'amare höjo. O avevejö'e jemëro God-are mu ma vaejaje aho a sisë jakesi övore bojëmamu anare höjo. Ĕho jemesi sisë höjo.

<sup>53</sup> Jemesi jöëni aneraëro jö börömo God-aro baeromo bojëmare höjo. Röhu jemëro bogo ejaharije höjo.

*Stephen munëhu vajamiromo ano bamare jöhoje.*

<sup>54</sup> Stephen-ro jöho ëhi majëhijamu hejë'i Jew rajo ariböviohuro hesi örire dë vörönëgamu vörö'iraeromo ane vuogigimoruomadeje.

<sup>55</sup> Ane vuogigimamu God-are Aru'ahohuro hesi darugohuro Stephen-are dë vövöbajo'ere rarovamu ö'idöre sioroho gavadeje God ajivo'ego Iesuro God-are övo manö namijamu.

<sup>56</sup> Iesu ë namijamu gagorovo uëvadeje: Arueho gahëjo. Na gavajëjo ö'idöho arorovo'ego God-are A Mahuro hesi övo manö nami'ego.

<sup>57</sup> Ëhi uëvamu hejë'i rueho jaburo jö'e dadovoromo hia'e övo hitahiëro tugohoromo ma-darugo'o tutuvo rueruomoromo Stephen ruë numë baba'amoromo riravareje.

<sup>58</sup> Riravoromo jagu bava'oromo rori'o nugoromo munëro vajamiruomadeje. Munëro vajami'irögoro urimo utaho'amojöëni niögoho jövo bahiruomadeje a i'e gemu Saul-ro muebejëhoröhego.

<sup>59</sup> Niögoho bahinugoromo munëro vajamemu vajamijamu Stephen-ro uavadeje: Bada Iesu nasi aru'ahoho baejehego jasi örire ö'iröjo.

<sup>60</sup> Ëhi uanugoromo ague aho hiromomo ma-darugo'o uvadeje: Bada ave aribövi jabesi sisëho uehorovoromo vuonugëhëjo. Ëhi uvoromo guomadeje.

## 8

<sup>1</sup> Stephen guomamu gagorovo Saul-ro uvadeje: Stephen anaroho iae mae höjo.

### *Saul-hu ekaresia sisë vaejëvobe juvade jöhoje.*

Ëhi'amu evare majare aëro aevoromo ekaresiae Jerusalem raromaruoho mu sisë bëhe vaejëvonövareje. Vaejëvamu Iesuare aribövioho aho'obëhe Jerusalem jioromo huruomoromo adovoromo va'o Judea sa'are Samaria sa'are dirö'e göro göro raromobe va'areje. Apostle ömo'ömohuremu ëhi ë Jerusalem raromareje.

<sup>2</sup> Amo God uehorovarue a ioro'iorohuro Stephen-are jöëni darugo'o nierusuburu'e bamoromo hesi sinoho guavareje.

<sup>3</sup> Guavamu Saul-ro ekaresiae aho'obëhe ijumëvo'i ë'onövadeje. Ijumëvo'irögoro osare osare va'oromo Iesuare aho magonahoho guduamo'amoromo ruho ujuoho rueromo savoji gagore io'amonövadeje.

### *Philip-hu Iesuare jö bava'oromo Samaria sa'a rajo majëhijade jöhoje.*

<sup>4</sup> Iae huruomoromo va'are ariböviohuro dirö'e göro göro Iesuare jöho majëhibe va'onövareje.

<sup>5</sup> Ëhi majëhibe va'oromo iae Philip-ro Samaria rajo jabesi amo börömore va'adeje. Va'oromo majëhiromomo uëvadeje: God-hu uavë'ëro böröme namiromomo ajamuijaje aho iae Iesu höjo.

<sup>6</sup> Ëhi jïë'e jöho majëhi'ego Samaria raje ae aho'obëhe jaburo hesi jöhuremu avoho henövareje. Hesi jöho heromo ganövareje Philip-ro darugo'e muoho vae'amo'ego.

<sup>7</sup> Vae'ego aru'aho sisëhuro jö'e dadovoromo a dëre jioromo suorovo va'onövareje. Övo hörü'e vuovëhë'e hörü sisë'e ëhi jïë'e aribövioho marë'amonövadeje.

<sup>8</sup> Ëhi'o'ego Samaria aribövioho nimorohëvo avohonövadeje.

<sup>9</sup> Nimorohamu ae gemuëro ë amore hijadeje. Ëa hesi ihoho Simon jiadeje. Simon-ro iro oso'e vaebe rovamu Samaria sa'a raje ae aho'obëhe garomo jöe barëjëvadeje. Jöe barë'ego huro uënövadeje: Na a böröme jevajëjo.

<sup>10</sup> Ëhi uë'ego amo raje ae aho'obëhe ininore va'o masijore avoho heromo uvonövareje: Nani Simon hu God-are vörö röjahuijaje ae hesi ihoho Vörö'e A Börömo höjo.

<sup>11</sup> Iro oso'e majae ëgobövie vaebe rovë'ëro ëhuni ë sa'a rajoho jöe barëjëvo'ego hesi jöhuremu avoho henövareje.

12 Hesi jöhuremu hejë'ëro hejareje Philip-ro jö maho majëhiromu uëvamu: God-hu böröme namiromu muebejavuaje majaho rovë'e höjo. Iesu Kerisore ihoho böröme höjo. Ëhi jië'e jö maho Philip-ro majëhi'ëgo Samaria rajo a'lo magonaho'lo mae uehorovoromo bapataeto vaenövareje.

13 Röhu iae Simon hu'lo mae uehorovadeje. Mae uehorovoromo bapataeto vaeromo Philip'lo gemu mae juvonövadeje. Juvoromo ganövade Philip-ro bogo gavarue darugo'e mue gö gö vae'ëgo garomo tiönövadeje.

14 Ëhi'amu apostle ömo'öme Jerusalem raromaruohuro hejare uvavamu: Samaria rajohuro God-are jöho ejaharuëjamu hegorovo Peter'lo John'lo rëmö'öjëvareje Samaria va'oröhego.

15-16 Rëmö'öjëvamu Peter'lo John'lo va'aroho va'lo Samaria höröjareje. Hörönugoromo gavare God-are Aru'ahoho Samaria rajo jabesi öriroho bogo ruvebijë'e jabumë Bada Iesure ihoro ma-bapataeto vaejë'e jiamu gagorovo God ëninamiromu uavareje Iesure ariböviohuro Aru'ahoho baerumoröhego.

17 Ëninamiromu simane öve taemëhamu God-are Aru'ahoho baeruomadeje.

18 Simane öve taemëho'ëgo Aru'ahoho baeruomamu gëgorovo Simon-ro ri'öromu Peter'lo John'lo uëvadeje: Naro ijo baje bojëmi'ejöjo.

19 Ëhuni jemëro daruge bojemego na'lo bae'iröjo ëhuro ae rahuare rahuare simanore öve bamego God-are Aru'ahoho baerumo'iröhe höjo.

20 Ëhi uëvamu Peter-ro uavadeje: Ja'lo jasi moniohu'lo vënëro ravëvo'ajëjo. Jero uvanuëjo: Naro monie bojamiromu ëhuro Aru'aho ae gö bojëmi'irode darugoho bae'ejöjo. Röhu ëhi jië'e darugoho hesi God-are suvuore höjo.

21 God-are nuniroho jasi dë vövöbajo'oho bogo maho jio'ëgo ja bogo no'oho havo'anuëjo.

22 Ëhuni sisë uehorovanuoho vuonugo'i Bada uavego mae jië'oho jasi uehoro sisëho uehorovoromo vuonugaho'irajo.

23 Iae na gavajoho jero ganiganimoromo mu sisë uehorovo'i hi'ëgo ëhuro jasi dë vövöbajo'oho ma-sisëremu rarovavë'e höjo.

24 Ëhi uavamu hegorovo Simon-ro Peter'lo John'lo uëvadeje: Jemëro Badare öroro ëninamego huro ajemego jemëhu uevariye i'uoho bogo bae'iröjo.

25 Ëhi'amu Peter'lo John'lo Badahu mu rabe vaejamu gavare jöho majëhinugoromo vuonorö'öromu Iesure jö maho Samaria rajo jabesi amore amore majëhibe va'aroho va'lo Jerusalem höröjareje.

*Philip-hu Iesure jö majahijamu Ethiopia sa'a rajehu heromo mae uehorovade jöhoje.*

26 Ëhi'amu Badare anerahuro Philip uavadeje: De ri'öromu va'iranoho arue Jerusalem jioromo anume Gaza abuejarue öroro hörönëjo. A rumo'e sa'are va'arue öroho uavajëjo.

27 Ëhi uavamu hegorovo ri'öromu va'adeje. Va'ihö gavadeje Ethiopia sa'a raje aho örëro rova'amu. Ëaho Ethiopia sa'are simano vaejaje magonaho Candace uvaruoho ë magonaho hesi mu vaejahaje a böröme jiadeje. Hesi mu vaejahaje a börömëro jië'ëro huro ë magonaho hesi inömo inömoho aho'obëhe muebejahnövadeje. Hesi muoho ëhi jiadeje. Urimë'i God rajahi'i Jerusalem va'ë'ëro

28 vuonorö'öromu maratu döre hiromu miohuro jaguvamu va'ë'i suri surire jöho adahobe va'adeje. Surire jöho ëho Isaiah God-are jö majëhinövade aehu jajivade jöho jiadeje.

<sup>29</sup> Surire jöho adahobe va'amu gavë'i God-are Aru'ahohuro Philip uavadeje: Va'oromo arue maratuore hiromo va'aje aho bihoromo ajio hu'o hiromo va'onëjo.

<sup>30</sup> Hiromo va'onëjamu hegoro Philip-ro tutuvo va'oromo hejade rue Ethiopia rajohuro Isaiah-are surire jöho adhamu hegoro uavadeje: Ëjö adahanuoho na ja hejanuëjo o bogajo.

<sup>31</sup> Ruehuro uavadeje: Aehu bëhi bogo röjehijë'oho na diehi hejöräjo. Rojomoromo na'o hijego va'arëjo.

<sup>32</sup> Ëhi uavamu hegoro Philip-ro ajio hu'o hijadeje. Hiromo gavadeje Ethiopia rajohuro ave jöho adhamu.

Vaevë'oho sheep ano'i hu'irae va'aruëhi ëhi bava'are höjo.

Sheep harihu u tarivahego bogo uë'uëvë'e namijajëhi ëhi jörume namijade höjo.

<sup>33</sup> Aëro hesi iho mu'uvahamu aho bogo ajamiromo hesi jö maho jövade höjo. Raro hesi aboji harihu'o jabesi jöho majahui'ajëjo.

Aboji harihu'o rumo'e ave sa'are hijadoho iae barëjë'e höjo.

<sup>34</sup> Ëjöho adahoromo rue Ethiopia rajo a börömohuro Philip uavadeje: Ave jöho na uevego hejöjo. Jö God-aro baeromo majëhinövade ahuro rahuare jöe jajivë'e höjo. Na hesi jöe o ae gö hesi jöe jajivade höjo.

<sup>35</sup> Ëhi uavamu hegoro Philip-ro ë adahade jöho aevoromo Iesuare jö maho majahijamu Ethiopia rajohuro hejadeje.

<sup>36</sup> Heromo örëro va'ihö gavare jove jiamu gagorovo rue a börömohuro Philip uavadeje: Ëhuro gavëjo jove jiego. Naehu avevejö'e bapataeto vaejë'oho na mae höjo o sisë höjo.

<sup>37</sup> [Mae o sisë höjamu Philip-ro uavadeje: Ja jasi dë vövöbajo'e aho'o mae uehorovë'ohuro bapataeto vaejë'oho iae mae höjo. Iae mae höjamu ruehuro uavadeje: Io'ajo. Iae na mae uehorovoromo uvajëjo: Iesu Keriso iae God-are Harihe höjo.]

<sup>38</sup> Ëhi uanugoromo maratu jagu bava'ajoho ëhi namijöro uavadeje. Nami-jamu Philip'o ë a börömohu'o jaburo niö'iro jovore abueromo Philip-ro ë aho bapataeto vaejadeje.

<sup>39</sup> Bapataeto vaeromo jovore jioromo rojomareje. Rojomamu gavë'i Badare Aru'ahohuro Philip ma-majioho hu'irae baeromo va'adeje. Va'amu Ethiopia rajo a börömohuro ijoho hu bogo gavadeje. Bogo ga'irögoro maratuore ajio hiromo nimorohobe va'adeje.

<sup>40</sup> Va'amu Philip-ro gavadeje mami'e Ashdod amore rovë'e jiamu. Ashdod rueromo amore amore höröbe jö maho majëhibe ruejuvo Caesarea amore höröromo ë hijadeje.

## 9

### *Saul-hu aevoromo Christian vaejade jöhoje.*

<sup>1</sup> Ëhi'amu Saul-ro bogo vuonugo'i Badare aribövioho muo'amo'i ma-vöröëremu jövonövadeje. Ma-vöröëremu jövë'ëro Jerusalem ajiomoromo va'oromo Jew rajo priest börömoho uavadeje:

<sup>2</sup> Na negajëjo jero surire jajivoromo i'imemego na Damascus amore ujuoho va'oromo Jew rajehu God rajahjarue osare osare i'imëmege jaburo garomo uvo'iröhego: Nörö priest börömo hesi ihoro rovë'e höjo. Jabuhu ëhi uvë'oho ue'iramu naro gë'irode ae o magonahe Iesuare örire jiji-hamu gavë'oho naro guduanëvoromo Jerusalem amore vuonorö'ö ujuoho rue'ejöjo.

<sup>3</sup> Ëhi ë'ë'ëro iae va'adeje. Va'adoho va'o Damascus amore hörö'i gavade ajoho ma-majioho ö'idöre jioromo ruvebiromo hu ajivamu gavë'i

<sup>4</sup> sa'are behumorovoromo hejadeje ëhi uvavamu: Asë'e Saul ja rabëni sisë vaejevanue höjo.

<sup>5</sup> Sisë vaejevanue höjamu uavadeje: Bada ja rahuo javajëjo. Rahuo javajëjamu uavadeje: Jaehu sisë vaejevanue aho Iesu na jevajëjo.

<sup>6</sup> Röhu ri'öromo va'oromo rue Damascus amoro hinëjo. Hiromo he'a'anuejo ae gemuëro ua'iramu: Jero ëhi ëhi ë'ëjo.

<sup>7</sup> Ëhi uavamu Saul'o va'are ariböviohuro aho bogo ga'i ma-huëhemu heromo ma-jörume riravareje.

<sup>8</sup> Ma-jörume riravamu Saul-ro sa'are raromadohuro ri'öromo nune dadovo'i röhu öri ari'oho bogo gavadeje. Öri ari'oho bogo gavamu gagorovo rueho jaburo övëro ma'eno bava'oromo Damascus amore suorovareje.

<sup>9</sup> Suorovonugoromo Saul-ro öri ari'oho bogo gavë'e ioho jovoho bogo ijë'e ma-hijuvo majae niö'i gemu barëjadeje.

<sup>10</sup> Majae niö'i gemu barëjamu Iesuare ae gemu hesi ihe Ananias Damascus amore hiromo nia'ovo'iraeromo gavadeje Badaro rueromo uavamu: Ananias-ajo. Ëhi uavamu ruehuro uavadeje: Bada na aviae jevajëjo.

<sup>11</sup> Na aviae jevajëjamu Badaro uavadeje: De ri'öromo öri ihe Ahorirehu Va'arue Öroro va'onëjo. Va'oromo Judas-are osaro höröromo uënëjo: Tarsus amo rajo a ihe Saul na ëho jiajëjo. Na hu ga'i rovode höjo. Ëhi uënëjo. Iae hu parie vaejajëjo.

<sup>12</sup> Urimë'i huro nia'ovo'iraeromo gavade höjo ae gemu Ananias-ro rueromo hesi övoho sinore bamamu nunoho marëjoro. Ëhuni va'oromo gavëjo.

<sup>13</sup> Ëhi uavamu hegorovo Ananias-ro uavadeje: Bada iae mae höjo röhu na hejode höjo ae aho'obëhe Saul-are jö sisëho uevamu hejode höjo. Jaburo uevare höjo: Huro Jerusalem amore hiromo jasi aribövioho mu sisë bëhe vaejëvo'i hijade höjo.

<sup>14</sup> Mu sisë vaejëvë'ëro Jerusalem priest masijo jabesi darugoho baeromo aviae rovë'e höjo ehuro ae rahu ja uehorovavë'oho guduamo ujuoho va'o barërohëro.

<sup>15</sup> Ëhi uavamu Badaro uavadeje: O-ajo. Va'ëjo. Ëhesi bëhoho naro ë iaho baejë'e jevajëjo huro nasi muoho vaeröhego. Huro nasi jöho bava'oromo sa'a ioro'ioro rajo aribövioho jabesi a masijoho Israel rajo aribövioho huruoho majëhibe juvego ae aho'obëhe heruomöhego ehuni na Saul baejode höjo.

<sup>16</sup> Baejë'ëro naro hu röjahi'ejöjo huro garöhego huhu nasi jöëni vi'ehe huë vavaene rabe bae'iröhoho diehi jië'e jiego garöhego.

<sup>17</sup> Ëhi uavamu hegorovo Ananias-ro va'adoho osare rumo va'oromo övoho Saul-are sinore bamoromo uavadeje: Öho Saul-ajo. Badaro rem'öjhamu rovode höjo. Ja ave amore rue'irögoro örire gavane aho Iesuro rem'öjjade höjo naro rueromo ajamego jasi nunoho marë'i God-are Aru'ahohuro jasi dë vövöbajolare abueromo rarovavo'iröhego.

<sup>18</sup> Ëhi uavamu gavë'i hiobaro ginioru nu ano'o va'ënoho Saul-are nunire jioromo sa'are rireromo rovamu nunoho marëjadeje. Marëjamu ri'öromo bapataeto vaejadeje.

<sup>19</sup> Bapataeto vaenugoromo ie inugoromo röhu maho biririvoromo mae hijadeje.

*Saul-hu Damascus amore hiromo Iesuare jö majëhijade jöhoje.*

Mae hijë'ëro Iesuare ariböviohu'o Damascus hijamu majae ma-gemu niö'i barëjadeje.

<sup>20</sup> Hiromo ma-burëro aevoromo Jew rajehu God rajahjarue osare osare Iesuare jöho majëhibe juvadeje. Majëhiromo uënövadeje: Iesu iae God-are Harihe höjo.

<sup>21</sup> God-are Harihe hö uëvamu heromo tiöromo uarovareje: Asë'e ë aho Saul na ae gemuoho höjo o ae gö höjo. Èhesi bëhoho Saul Jerusalem hiromo bogo ëhioho ë'onövade höjo. A'i Iesu uehorovarue ariböviohu muo'amonövade höjo. Muo'amë'ëro huhu ave rovade hesi bëhoho Iesuare ariböviohu guduamo ujuoho va'oromo Jew rajo priest masijoho i'imëmege baejëvo'iröhego ëhuni rovade höjo. Èhi jië'oho hu diehi'oromo Iesuare jöho majahuijajëjo.

<sup>22</sup> Èhi uarovamu Saul-ro biririvo avohoromo jöho jövole va'oromo majëhiromo uënövadeje: God-hu uavë'ëro böröme namiromo ajamuijaje aho Iesu höjo. Èhi uëromo ë jö bëhoho avoho garomo hejë'ëro darugo'o majëhijamu hegorovo Jew raje Damascus amore raromaruoho jabuhu Saul-are jö aho'iröhoho bogo eni jioruomadeje.

<sup>23</sup> Bogo eni jioruomamu ëhi'ojuvo majae aho'obëhe barëjamu Jew rajo-huro gagovoromo Saul ano'i atareje.

<sup>24</sup> Ano'i atamu ë jöho heromo ae göëro Saul majahijadeje. Röhu jene vö'öe majae vahie Jew rajo ariböviohuo Damascus amo rejo ojore ojore atovo raromareje Saul hörö rovego ano'iro.

<sup>25</sup> Èhi'obe va'ojuvo hujeji vahie gemu evare Saul-are aemo'aemohuro uavamu niomonio mo bojö gagore abo hijadeje. Abo hijamu ö'ëro beromo ma-saginiëri ö'ire ma'enë'i rejo sigagure ö'oho a'ohö'öjë'i ma-u'emu ba'amamu je'onö ruvebi sa'are ravo'amoromo va'adeje.

*Saul-hu Jerusalem amore va'oromo ë'ade jöhoje.*

<sup>26</sup> Va'oromo Jerusalem höröjadeje. Höröromo Iesuare ariböviohu'o gemu mae juvo'i ë'o gavadeje. Juvo'ia'amu gagorovo rue ariböviohuo uvareje: Nani Saul bogo Iesuare aehu jio'i ma-sareramuijajëromo juhuonamiruo-madeje.

<sup>27</sup> Juhuonamijamu gagorovo Iesuare ae gemu Barnabas-ro Saul ajamiromo hu'irae baeromo apostle jabesi ö'ire rovadeje. Rueromo uëvadeje: Saul urimo mu sisë vaenövadëhioho bogo ëhioho vae'i a'i Damascus ö'ire va'ihö gavade höjo Badaro birohoromo jöe ëhi ëhi majahijamu. Jöe ëhi ëhi majahijamu hegorovo Damascus va'oromo darugo'o maëro Iesuare jöho majëhibe juvade höjo. Èhuni jaruvoho Saul hu a mae höjo.

<sup>28</sup> Èhi'amu gagorovo Saul-ro Iesuare ariböviohu'o gemu mae hi juvadeje. Hi juvoromo biririvoromo Badare jöho Jerusalem ame bövioho majëhibe juvadeje.

<sup>29</sup> Majëhibe juvoromo Jew rajehu Greece huëhu atarue ariböviohu'o Iesuare jöho jövoromo jö aho'ahamirovareje. Jö aho'ahamirovoromo rueho jaburo Saul ano'irögoro ë'areje.

<sup>30</sup> Ano'ia'amu gagorovo Iesu uehorovarue ö mueno'o ömo'ömohuro Saul hu'irae baeromo Caesarea amore abuejaroho abo nugö'öjamu hesi amëro Tarsus va'adeje.

<sup>31</sup> Va'amu Judea sa'are Galilee sa'are Samaria sa'are jioruomaje ekaresia ariböviohuro huë vavaeni'e raromaro ho barë'i mae raromareje. Mae raromamu God-are Aru'ahohuro ekaresiaho ajëmamu Bada mae uehorovoromo biririvobe va'amu ae aho'obëhe jëvobe va'adeje.

*Peter-hu Lydda amore Joppa amore va'lo hiromo ë'ade jöhoje.*

<sup>32</sup> Ëhi'ego Peter-ro amore amore juvonövadeje. Juvoromo iae God-are aribövioho gë'iro Lydda amore abueromo ë hijadeje.

<sup>33</sup> Hiromo gavadeje ae gemu hesi ihe Aeneas övo höru'e vuovahë'ëro maratuoremu raromamu. Mami'e aevoromo raromobe rovadoho vadune aho'obëhe 8 barëjë'e jiadeje.

<sup>34</sup> Raromamu gagorovo Peter-ro uavadeje: Aeneas Iesu Kerisoro jasi sinoho avohahajëjo ëhuro mae javojöro. Ëhuni ri'öromomo jaehu raromanue maratuoho avoho bamëjo. Ëhi uavamu hejë'i ma-burëro ri'öjadeje.

<sup>35</sup> Ri'öromomo juvamu Lydda amo rajohu'lo Sharon sa'a rajohu'lo ae aho'obëhe Aeneas garomo aevoromo Badare ijore ijore jijihadeje.

<sup>36</sup> Ëhi'amu Iesuare magonahe gemu hesi ihe Tabitha Joppa amore hijadeje. Hesi ihoho Greece huëhu uvaruoho Dorcas-je. Dorcas iho bëhoho mi ihe deer-je. Huro hiromo huë baejë'e muoho vaeromo ae ajëminövadeje.

<sup>37</sup> Ae ajëmiromomo ijönö guomo guome baeromo guomadeje. Guomamu hesi sinoho u'oromomo baeromo javu döre osare ajio bamareje.

<sup>38</sup> Bamamu Iesuare ariböviohuro hejareje uvavamu: Peter-ro Lydda amore hijajë uvamu hegoro öroho bogo ëgoho jië'ego ae niö'i uëvareje: Va'irarijoho Peter uavego ma-burëro rue'irajo. Rue'irajamu va'lo majahijareje.

<sup>39</sup> Majahijamu hegorovo Peter-ro ri'öromomo jabu'lo rovamu hu'irae baeromo döre osare iojiomareje. Iojiomamu magonaho doru ömo'ömohuro nierusuburu'e bamë'i Peter-are bëhire ro ruë numë gagovo rova'lo rojomoromo Dorcas-hu jabu'lo hijë'i sigohi'amade niögoho Peter-ro gajöro röjahijareje.

<sup>40</sup> Röjahijamu huro jabumë aho'obëhe ë döre osare jëvamu rëmö'öjamu va'lo barëjadeje. Va'amu Peter-ro ague aho hiromo God-are örire ëninamiromomo huotorovoromo sinoho garomo uavadeje: Tabitha ri'öjëjo. Ri'öjëjamu Tabitha-ro nune dadovoromo Peter garomo ri'öromomo döre hijadeje.

<sup>41</sup> Hijamu gagorovo Peter-ro öve nugö'öromomo ma'enoromo nigemamu namijadeje. Namijamu Peter-ro uvëvadeje magonaho doru ömo'ömohu'lo Iesuare ae magonaho ioro'iorohu'lo ruejöro. Rovamu Peter-ro uëvadeje: Ave magonahoho i'ovoromo mae hijaje gahëjo.

<sup>42</sup> Ëhi'ade jöho Joppa amoho aho'lo uarovo barëjadeje. Jöho uarovamu hegorovo ae aho'obëhe Bada aevoromo mae uehorovoruomadeje.

<sup>43</sup> Mae uehorovamu Peter-ro majae aho'obëhe Joppa amore baeromo mi sino mae avohaje a hesi osae gemuore hijadeje. A ihoho Simon jiadeje.

## 10

*Peter-hu Jew raje jiadeje röhu sa'a gö raje Cornelius ga'i va'ade jöhoje.*

<sup>1</sup> Peter-ro Simon'lo gemuore hijamu iae ae gemuëro arue Caesarea amore hijë'e jiadeje. Hesi ihoho Cornelius jiadeje. Cornelius bogo Jew rajoho jio'i hu muorovo simano vaejaje aëro jië'ëro muorovo aribövi ioro'ioroho ma-gemuoro bu'öromomo hijë'ëro ëhi muebejëvonövadeje. Ëmuorovo aribövi gemuore bu'öjare jabesi ihoho Italy muorovo aribövie jiadeje.

<sup>2</sup> Röhu Cornelius God mae uehorovaje ae jiadeje. Hu'o hesi agane aho'o jaburo God rajahinövareje. Huro Jew rajo aribövioho huë baejëvoromo ajëminövo God-are örire jöe jövonövadeje. Ëhi jië'e ae jiadeje.

<sup>3</sup> Ëhi jië'e aëro jië'ëro iae majae sanuovamu gagoro Cornelius-ro nia'ovo'iraeromo ma-samaro gavadeje God-are anerae gemuëro rovamu. Rueromo uahijo: Cornelius-ajo.

<sup>4</sup> Cornelius-ajamu hegorovo Cornelius-ro aneraho juhuonamiromo ërimahoromo uavadeje: Ja diehi uehorovoromo rovanuëjo. Rovanuë'ego anerahuro uahijo: Jaehu God-are örire jö jövanuoho ae gö huë baejëvanuoho ëho God-ro ejahoromo ja mae uehorovavajëjo.

<sup>5</sup> Ëhuni ae gö rëmö'öjego rue Joppa amore va'arëjo ae gemu Simon hesi iho göho Peter-ro rueröhe höjo.

<sup>6</sup> Simon Peter-ro Simon göhu'o mi sino mae avohaje a hesi osae gemuore ma-jahuri hijajëjo. Hesi javuoho sö jovo bëhire jiajëjo.

<sup>7</sup> Anerahuro ëhi majahinugoromo va'amu gagorovo Cornelius-ro hesi osa muebejहारue ae niö'iro o muorovo ae gemuëro ëhi ruejëro jöe nugö'öjadeje. Ëmuorovo aho God mae uehorovoromo Cornelius hu'o gemu mae juvoromo ajamijaje ae jiadeje.

<sup>8</sup> Ëaho niö'i gemu rueruomamu Cornelius-ro diehi ë'amu gavade jöho majëhiromo rëmö'öjamu Joppa amore va'areje.

<sup>9</sup> Nërö ë ariböviohuro örëro va'oromo Joppa suorovo'i rovareje. Suorovo'i rovamu gavë'i majae ririre rabu'e jiamu gagorovo evare Peter-ro ruhëre javu döre ajiomoromo hitavë'ëro raromaruire ë hijadeje God-are örire jöe jövo'irovo.

<sup>10</sup> Hiromo hömamu hegorovo ae uëvadeje: Ie avohoromo bojemirego na i'iröjo. I'irö uëvamu hegoro ioho avohahareje. Ioho avohahamu hu nune jioromo nia'ovo'iraegadeje.

<sup>11</sup> Nia'ovo'iraeromo gavadeje ö'idöho arorovo'ego niögu va'ëne inömo böröme veneguöruvë'o ho hesi bëhire ruvebi raromamu.

<sup>12</sup> Raromamu gavë'i gavadeje sa'are jijihaje maje gö gö sigobe je'o uge rabe rabe niögu va'ëne inömo hesi döre jio'amamu.

<sup>13</sup> Jio'amamu gagorovo hejadeje uavavamu: Peter jero ri'öromo muo'amoromo ijëjo.

<sup>14</sup> Ijëjamu hegorovo Peter-ro uavadeje: Bada bogajo. Jew rajo noehu bogo ijaruë i sisëho bogo mae bogo ibe rovë'e jevajëjo jögore ahojöëni.

<sup>15</sup> Peter-ro ëhi uanugoromo hejadeje röhu maho uavavamu: O-ajo. God-hu sisë barëjë'e hö uvoromo jiovëhë'e mioho raboho ëho nadi uvorëjo: Sisë höjo.

<sup>16</sup> Vae niö'i gemu ëhi jië'e muoho Peter-ro ga'i hijuvo evare gavadeje ë inömo ho sionëro ö'idöre ba'oijiomamu.

<sup>17</sup> Ba'oijiomamu gagorovo Peter-ro hesi uehorovoromo uvadeje: Nia'ovo'iraeromo gavode hesi bëhoho rabe höjo. Hesi bëhoho rabe hö uvamu iae nume Cornelius-are ariböviohuro Simon-are osaho dinö'e jiaje jöho hejë'ëro ë osa hesi ojanore ro riravareje.

<sup>18</sup> Riravoromo ma-darugo'o uvareje: Na ae ihe Simon Peter ëho jiajëjo.

<sup>19</sup> Ëhi uvamu iae Peter-ro nia'ovo'iraeromo gavade mu hesi bëhoho uehorovë'e hijamu gavë'i God-are Aru'ahohuro hu uavadeje: Hejëjo. Ae niö'i gemu jaburo ja nahavaruëjo.

<sup>20</sup> Ri'ö abue'i nadi uvonëjo: Sa'ae gö raje jëvo'ego bogo va'ejö uvo'i ma-va'onëjo. Naro rëmö'öjamu rovare höjo.



21 Ëhi uavamu hegorovo Peter-ro abueromo nume rovare aho uëvadeje: Jemë nahevarujoho na aviae jevajëjo. Jemë rabe nëgamu rovarije höjo.

22 Rovarije höjamu uavareje: Muorovo simano vaejaje ae Cornelius-ro uövuamu rovare höjo. Hu a mae God mae uehorovaje ae höjo. Ëhuni Jew raje ae aho'obëhe jaburo hesi örire mae uehorovarue höjo. Ëhi jië'ego God-are anerae gemuëro rueromo Cornelius uavade höjo: Jero uavego Peter rue'irajo jöe majahijego he'irane höjo. Ëhuni rovare höjo.

23 Ëhuni rovare höjamu hegorovo Peter-ro uëvadeje: Osaro ro raro-moromo vahiromego momorö'örëjo.

Ëhi ë'ë'ëro nëröho Peter-ro ri'öromu jabu'o va'adeje. Röhu Joppa raje Iesuare ö mueno'o ioro'iorohuro hu'o va'areje.

24-27 Va'aroho va'o nëröho Caesarea amore suorovareje. Amore suorovoromo Cornelius-are osare va'ia'amu Cornelius-ro Peter bihoromo uvadeje: Peter God va'ëne höromu hesi bëhire sa'are ague aho hiromu Peter rajahijadeje. Rajahijamu gagorovo Peter-ro Cornelius banigojomoromo uavadeje: Nadi ëhioho ë'i ma-ri'öromu döro namijëjo. Na bogo God jevo'i ma-ae jevajëjo. Ma-ae jevajë uanugoromo hu'o Cornelius'o jöe jörovobe osare va'oromo Peter-ro gëvade Cornelius-are agane aemo'aeme ruejoro uëvadoho ae aho'obëhe gagovoromo gemuore raromoromo muebejamu.

28 Muebejamu gëgorovo uëvadeje: Iae jemë'o gavarujëjo Jew rajo noehu sa'a ioro'ioro rajo jemë'o gemu mae jijihö'iröhoho o jemesi osare va'iröhoho nosi öroho tugohahuë'e höjo. Ëhi höjo röhu God-ro na röjehiromu uevë'e höjo: Jero nadi uvonëjo: Sa'a ioro'ioro rajoho o rahuo rahuo sisëgo gorëvo'iröhe aribövioho jio'amajëjo.

29 Ëhuni naru ruejoro jero jöe nugö'öjamu hegorovo na bogo uvode höjo: Ja sa'a gö raje javajëromu nue gö gö uehorovo'i ma-burëro rovode höjo. Ëhi jië'oho rabëni ruejoro uevane höjo.

30 Uevane höjamu Cornelius-ro uavadeje: Naehu uavode hesi bëhoho urimo riröhe majae sanuovamu jaruvo jiajëhi naru nasi osare hiromu God-are örire jöe jövode höjo. God-are örire jöe jövä'i gavode höjo ae gemuëro niögu aji mabëhe ba'amë'e nasi örire rovamu.

31 Rueromo uevavohijajo: Cornelius jaehu God-are örire jö jövanuoho God-ro ejahoromo jaehu ae gö huë baejëvanuoho huro ëhu'o uehorovajëjo.

32 Ëhuni ae rëmö'öjego Joppa va'arëjo ae gemu Simon hesi iho göho Peter-ro rueröhe höjo. Simon Peter-ro Simon göhu'o mi sino mae avohaje a hesi osae gemuore ma-jahuri hijajëjo. Hesi javuoho sö jovo bëhire höjo.

33 Ëhi uevamu hejë'i naru ma-burëro jöe nugö'öjode höjo jero ruejoro. Röhu ja rovanoho iae mabëhe ë'ane höjo. Ëhu'ëro no ae aho'obëhe aviae God'o gemuoro raromoromo muebejaruëjo he'i Badaro diehi diehi jöho bojamë'ëro jero majahujego.

### *Peter-hu Cornelius-mesi örire majahijade jöhoje.*

34 Ëhi uavamu hegorovo Peter-ro jöho majëhiromu uëvadeje: Iae na gavajoho God bogo Jew rajohemu nimo'i sa'a ioro'ioro rajoho bijönimo'i

35 a'i ae aho'obëhe sa'ae dinö'e dinö'e raromoromo God uehorovoromo mu mae vaejaruoho no aho'o huro ëhi ma-gemu uehorovavuoromo ejahuaje höjo.

36 Iae jemë'o gavarujëjo God-ro Israel rajo nosi örire ave jö mahu majahuiromu uövuade höjo: God na'o jemë'o hahagu hahagu javuadoho

jaruvoho Iesu Kerisoro gagovavuë'e höjo. Röhu huro böröme namiromo sa'ae dinö'e dinö'e muebejavuaje ae höjo.

<sup>37</sup> Jemë'o gavarujëjo Iesuare mu börömo Judea sa'ae bövioho rumorovade höjo. Bapataeto vae'iröhe jöho John-ro majahuijamu evare ë mu börömo Galilee sa'are aevoromo Judea sa'ae bövioho rovade höjo.

<sup>38</sup> Nazareth rajo ae Iesu hesi jöho jemë'o iae hejaruje höjo. God-ro Iesu muro bamo'irögoro hesi Aru'ahohu'o darugohu'o bojamiromo muro nugade höjo. Muro nugë'ëro hu'o gemu mae juvo'ego Iesuro ae mae vaejëvobe Satan-are darugoro raromarue aribövioho aho'o ajëmibe ëhi ë'obe ë sa'ae bövioho juvonövade höjo.

<sup>39</sup> Juvoromo Jew rajo nosi sa'are o Jerusalem amore mu rabe rabe vaejadoho iae nosi nunëro gavë'e javuajëjo. Aëro hu korosire anamu guomade höjo.

<sup>40</sup> Guomamu majae niö'i gemu hesi uhure God-ro uavamu ri'öjë'ëro hijamu gavare höjo.

<sup>41</sup> Ae aho'obëhe Iesu bogo gavare höjo. Noehu hu garomo a majëhiröhego God-hu mami'e baejavuade aribövioho noremuëremu hu gavare höjo. Hu guomoromo ri'öjade hesi ijore hu'o i jovo ue'ahare aribövioho noremuëremu gavare höjo.

<sup>42</sup> Noro hu gavamu Iesuro uövuade höjo noro hesi jöho ae majëhiromo uënövoröhego: God-ro Iesu gemu uavade höjo ae aho'obëhe vuovë'oho o bogo vuovë'oho hesi nunire riravego mevëvoröhego. Ëhi uënövoröhego Iesu majahuijade höjo.

<sup>43</sup> Röhu ë a hesi jöho jö God-aro baeromo majëhinövare ae aho'obëhe avoho majahuiromo jajivobe rovere höjo. Jajivoromo uövuare höjo: Ae rahu ë a mae uehorovë'oho God-ro hesi jöeni nosi sisëho uehorovoromo vuonugahu'ajëjo.

*Sa'a ioro'ioro rajehu aevoromo God-are Aru'aho baejare jöhoje.*

<sup>44</sup> Peter-ro ëhi majëhijamu gavë'i God-are Aru'ahohuro ruvebiromo jö hejarue aribövie aho'o jabesi dë vövöbajo'ere abue'amadeje.

<sup>45-46</sup> Abue'amamu gagoro Jew raje Iesu mae uehorovë'i Peter'o rovere ariböviohuro hejare ë sa'a ioro'ioro rajohuro bogo hejarue huë göëro göëro atoromo God böröme hö uvavamu hegoroovo tiöjëvadeje. Tiöjëvamu uehorovoromo uvareje: Asë'e God-ro hesi Aru'ahoho bogo Jew rajohemu bojamui'i sa'a ioro'ioro rajohu'o bojëmijade höjo. Bojëmijade höjamu Peter-ro ri'öromo uëvadeje:

<sup>47</sup> Jew rajo noehu God-are Aru'aho baejarëhi ave sa'a ioro'ioro rajo ariböviohu'o God-are Aru'ahoho ëhi baejare höjo. Ëhi jië'oho no rabëni ahëvo'iramu bogo bapataeto vae'a'aruëjo. Bëhe bogohöjo.

<sup>48</sup> Ëhi uëngoromo hesi aribövioho uëvadeje: Iesu Keriso-are ihoro bapataeto vaejëvohëjo. Ëhi ë'ë'ëro Cornelius-mëro Peter uavareje: Nadi maburëroho va'i majae ëgo'o no'o hiromo va'onëjo. Ëhi uavamu jabu'o hijadeje.

## 11

*Sa'a ioro'ioro rajehu bapataeto vaejare jö Peter-hu majëhijamu Jerusalem ekaresia ariböviehu hejare jöhoje.*

<sup>1</sup> Iae apostle ömo'ömo'ömo'u'o Keriso-are ö mueno'o ioro'iorohu'o Judea sa'are röhu ë sa'ae gemuore dirö'e göre göre raromaruohuro hejareje

uvavamu: Bogo Jew rajoho gemu a'i sa'a gö rajohu'o God-are jöho baejare höjo.

<sup>2</sup> Ëhi uvamu hegoroovo Jew rajo a ioro'ioroho Jew rajehu ë'aruëhi sa'a gö rajo jabesi sino tarivëhoröhego nimoruomaje ariböviohuro gavare Peter Jerusalem rovamu gagorovo birevoromo uavareje:

<sup>3</sup> Jew rajo nosi sino tarivahuaruëhioho aho jabesi sinoho bogo ëhioho tarivëhare höjo röhu jero jabesi osare va'oromo jabu'o gemu mae hiromo ioho ijane höjo.

<sup>4</sup> Ëhi uavamu Peter-ro ri'öromo huhu sa'a gö rajohu'o hiromo vaejade mu hesi bëhoho huruoho majëhi barëjajede.

<sup>5</sup> Majëhiromo uëvadeje: Naehu vaejode mu hesi bëhoho na anumiae Joppa amore hijode höjo. Hiromo God-are örire jöe jövode höjo. Jöe jövë'i nia'ovo'iraeromo gavode höjo niögu va'ëne inömo böröme veneguöruvë'oho nasi bëhire ruvebi raromamu.

<sup>6</sup> Raromamu ga'i gavode höjo amo maje je'lo maje sigobe uge rabe ëhi ë inömo hesi döre jio'amamu.

<sup>7</sup> Hejode höjo uevavamu: Peter ri'öromo muo'amoromo ijëjo.

<sup>8</sup> Ijëjamu hegoro naro uavode höjo: Bada bogajo. Jew rajo noehu bogo ijarue i sisëho bogo mae bogo ibe rovë'e jevajëjo jögore ahøjöeni.

<sup>9</sup> Ëhi uanugoromo hejode höjo ö'idöre röhu maho uevavamu: O-ajo. God-hu sisë barëjë'e hö uvoromo jiovëhë'e mioho raboho ëho nadi uvorëjo: Sisë höjo.

<sup>10</sup> Ëhi uevamu ëhi jië'e muoho vae niö'i gemu naro ga'i hijuvo evare gavode höjo ë inömo aho'o sionëro ö'idöre ba'o'jomë'e jiamu.

<sup>11</sup> Ëhi'amu gavë'i ae niö'i gemu naehu hijaje osare ö'are höjo Caesarea amore jioromo rëmö'öjë'ëro jië'ëro.

<sup>12</sup> Ö'amu God-are Aru'ahohuro uevade höjo: Nadi uvonëjo: Sa'a gö raje jëvo'ego nani na jabu'oho bogo va'ejö uvo'i ma-va'onëjo. Ëhi uevamu ave raromarue Iesuare ö ömo'ömoho övo gö mine övo göre gemu ëho jaburo na'ö gemu mae ri'öromo ë rovare ariböviohu'o gemuore va'oromo Cornelius-arire suorovoromo hesi osare va'are höjo.

<sup>13</sup> Noro hesi osare va'amu Cornelius-ro uövuade höjo: Na gavode höjo anerae gemuëro rueromo uevavamu: Ae rëmö'öjëgo Joppa va'arëjo ae gemu Simon hesi iho göho Peter-ro rueröhe höjo.

<sup>14</sup> Huro rueromo jöe majëhi'ajëjo ja'lo jasi aganohu'o heromo bogo sisëroho va'i maro raromo'irarijëgo.

<sup>15</sup> Cornelius-ro ëhi uövuamu hegoroovo naro aevoromo jöho majëhijamu gavë'i God-are Aru'ahohuro jabesi örire ruvebijade höjo. Urimë'i Jew rajo nosi örire ruvebijadëhi ëhi ë'ade höjo.

<sup>16</sup> Ruvebijamu gagorovo naro uehorovoromo uvode höjo: O Badaro mami'e uövuade höjo: Urimë'i John jövëro bapataeto vaejëvade höjo. U'emu God-ro hesi Aru'ahoho mëmiromo ëhuro jovoho bogo a'i Aru'ahohuro bapataeto vaejëvo'ajëjo. Iesuro ëhi uövuade höjo.

<sup>17</sup> Amo urimë'i noehu Bada Iesu Keriso mae uehorovamu God-hu hesi Aru'aho suvuro mamuijadëhi ëhi sa'a gö ariböviohu'o mëmade höjo. God-hu ëhi sa'a gö rajo ajëmijadoho ëhu'oho na rabëni God-are öroho tugohojörajo.

<sup>18</sup> Peter-ro ëhi uëvamu hegoro rue Jew rajohuro Peter birevaroho vuonugo'i God rajahiromo uavareje: Ëhi jië'oho God-ro sa'a ioro'ioro rajo

jabesi öroho jiovëhë'e höjo ëhuro jabu'o dë vövöbajo'e huotorovoromo mae raromo'iröhego.

*Antioch amo rajehu aevoromo Keriso mae uehorovare jöhoje.*

<sup>19</sup> Urimë'i Jew rajëro Stephen anonugoromo Iesu mae uehorovarue aribövioho sisë vaejëvamu gagorovo huruomoromo sa'are sa'are va'o raromareje. Va'aroho ioro'iorohuro ma-bisemu dunoro va'o raromo'i ioro'iorohuro öri ëgobövie va'oromo Phoenicia sa'are o Cyprus sa'are o Antioch amore ë va'o raromoruomadeje. Raromoromo Jew rajohemu Iesuare jöho majëhinövareje.

<sup>20</sup> Röhu Iesu mae uehorovarue a ioro'ioroho Cyprus sa'a rajohu'o Cyrene amo rajohu'o ëho jaburo Antioch amore va'o raromareje. Raromoromo bogo Jew rajohemu a'i sa'a gö ariböviohu'o Bada Iesuare jö maho aevoromo majëhijareje.

<sup>21</sup> Sa'a gö ariböviohu'o jöho majëhijamu Bada God-ro daruge ajëmijamu Antioch amo rajë ae aho'obëhe Bada Iesu mae uehorovoromo aevoromo hesi örire jijihareje.

<sup>22</sup> Hesi örire jijihamu Jerusalem ekaresiahuro ë jöho hejareje. Heromo Barnabas nugö'öjumu Antioch rajoho gë'i va'adeje.

<sup>23</sup> Va'oromo gavade God-ro mae ajëmijë'e jiamu gëgorovo nimorohoromo uëvadeje: Ae aho'obëhe jemëro birivoromo jemesi dë vövöbajo'e aho'o Bada gemu uehorovorëjo.

<sup>24</sup> Ëhi uëvade hesi bëhoho Barnabas hu a mae jiadeje. God-are Aru'ahohuro hesi dë vövöbajo'oho aho'o rarovamu huro God mae uehorovo avohadeje. Ëhi'amu ae aho'obëhe aevoromo Badare örire jijihareje.

<sup>25</sup> Ae aho'obëhe Badare örire jijihamu gagorovo Barnabas-ro ri'öromo Tarsus amore va'adeje Saul naho'irovo.

<sup>26</sup> Nahoromo birohonugoromo hu'irae baeromo sionëro Antioch rovadeje. Rueromo Barnabas'o Saul'o jaburo niö'iro Antioch ekaresiahu'o gemu mae ariromo ae aho'obëhe röjëhibe va'aroho vadune gemu barëjadeje. Ëhi'amu Antioch amore ë dirö'ore aëro Keriso-are aribövioho gëromo aevoromo uvareje: Jabumë Christian aribövioho jëvajëjo. Urimoho ëhi jië'e ihoho bogojëvadeje.

<sup>27</sup> Röhu evare majare jö God-aro baeromo majëhijarue a ioro'iorohuro Jerusalem jioromo Antioch rovareje.

<sup>28</sup> Rueromo ae gemu hesi ihoho Agabus-ro jöe God-are Aru'aho hesiro baeromo ri'öromo uëvadeje: Ijonö i bogojio majaho sa'ae aho'obëhe rue'a'ajëjo. Huhu uëvadëhi ijonö Claudius Rome a börömo jiadevare evare ë i bogojio majaho rovadeje.

<sup>29</sup> Amo Agabus-ro ë jöho majëhijamu hegoro Antioch amore raromarue Keriso-are ariböviohuro uvareje: No ae gemuëro gemuëro ga'iröhe no ijo bajo bövie bæjë'e javuamu gavë'oho bövie tarioromo bise'e bæjë'e javuamu gavë'oho bisemu tarioromo baro gemuoro bamoromo Christian agane Judea sa'are raromaruohuni nugö'öjëho'ëjarëjo.

<sup>30</sup> Ëhi uvonugoromo suvuoroho gagovoromo Barnabas'o Saul'o i'imëmijareje jaburo niö'iro ujuoho va'oromo Jerusalem ekaresia a duvaho jabesi övo döre bahijëhoröhego.

## 12

*Peter savojire ba'amare jöhoje.*

<sup>1</sup> Evare majaroho Judea sa'are börömo vaeromo hijaje a böröme Herod-ro ri'öromo jöe nugö'öjaje aëro ekaresia a ioro'ioroho ijumëvoröhego.

<sup>2</sup> Huro ae uëvamu jaburo John-are öho James guduamoromo siravaëro anareje.

<sup>3</sup> Anamu Herod-ro gavade Jew rajo ariböviohuro ëhi nimoruomamu gëgorovo ae uëvamu Peter'o guduamo bava'areje. I Dë Huaje Oso Rumo'le Jew rajehu Ue'aharue Maja börömo jiadevare evare ëhi ë'areje.

<sup>4</sup> Peter guduamo bava'oromo savoji gagore ba'amareje. Ba'amamu muorovo aëro 4 aevo'ioho Peter muebejareje. Muebejamu muorovo ae 4 gö'o ro jabesi sionoho baejareje. Röhu ae 4 gö'o ro jabesi sionoho baejareje. Röhu ae 4 gö'o ro jabesi sionoho baejareje. Ëhi ë'onövareje. Urimoroho va'ego ae göëro ro sionoho baenövareje. Ëhi ë'ë'ëro Herod-ro uvadeje hujeji God-hu Vörö Tugohade Söröho barëjago evare Peter ae aho'obëhe jabesi nunire barueromo court vaeröhego.

<sup>5</sup> Ëhi uvamu Peter-ro savoji gagore ëhi hijadeje. Hi'ego ekaresiaho jaburo biririvoromo God uanövareje hu ajamiröhego.

*Aneraehu Peter ajamamu Peter-hu savoji gagore jioromo hörö va'ade jöhoje.*

<sup>6</sup> Ëhi'ojuvo nërö Herod-ro Peter ae aho'obëhe jabesi nunire bava'i uvë'iro röhu jaruvëhi a göhuro ruëhi hi'i göhuro viëhi hiromo Peter muebe'i Peter ririre ö'e niö'iro tövë'ëro niavë'e jiadeje. Ae göëro savoji ojoho muebejareje.

<sup>7</sup> Muebejamu iae Badare anerae gemuëro ma-majioho rovamu savoji gagoho ajivadeje. Ajivamu gavë'i anerahuro Peter-are ionire anoromo ioromo uavadeje: Ma-burëro ri'öjëjo. Ëhi uavamu gavë'i övore muohahare ö'ohuro jiovo bu'öromo sa'are bejadeje.

<sup>8</sup> Bejamu anerahuro uavadeje: Jasi götaho ruoho bibivo'i hörü guduoho io'amëjo. Io'amëjamu Peter-ro götaho ruoho bibivoromo hörü guduoho io'amadeje. Io'amamu uavadeje: Niögohu ba'amoromo nasi ijoro rovëjo.

<sup>9</sup> Nasi ijoro rovëjamu savoji gagoroho höröromo hesi ijore va'adeje. Va'oromo uvadeje: Aneraehu ömajoho nani bogo maho ga'i na nia'ovo'iraejajë'i va'ojuvo

<sup>10</sup> va'o urimo mueberomo riravaruire rova'oromo ijore mueberomo riravaruire rova'oromo suorovoromo amo börömore va'arue biriri'e ojore ë rovereje. Ruel'i gavare ojoho hesi ëma jiororovamu gagorovo va'orahonö va'oromo örire jirehareje. Jirehoromo anerahuro ma-majioho va'adeje.

<sup>11</sup> Va'amamu gagorovo Peter-ro uehorovo avohoromo uvadeje: Avevejö'oho iae na garomo uvajëjo: Iae mae-ëjo. Badaro hesi aneraho nugö'öjamu Herod-are övore jevadoho baeniahi baejevo rovë'e höjo. Baeniahi baejevo rovë'ëro Jew rajo ariböviohuro bövi bise'ö vaejevo'i uvaroho ëhi ë'oröhoho bogo eni jëvo'ajëjo.

<sup>12</sup> Peter-ro ëhi uehorovonugoromo John Mark-are vëme Mary-arire va'adeje. Röhu Iesure ae aho'obëhe Mary-are osare raromoromo ëninamijareje God-ro Peter ajamijöro.

<sup>13</sup> Ëninamamu gavë'i Peter-ro rueromo oje jiovahojöro ano'anovadeje. Ano'anovamu hegoro magonaho aboride gemu hesi ihoho Rhoda-ro ojoho jiovaho'i rovadeje.

<sup>14</sup> Rueromo Peter-are huëho hegoro nimorohoromo ojoho bogo jiovo'i ma-burëro vuonorö'ö va'oromo osare aribövioho uëvadeje: Peter mami'le rovë'e aviae ojanore namijajëjo.

<sup>15</sup> Namijajëjumu uvoruomadeje: Nani Peter savoji gagore hijajëromomagonahoho uavareje: Simane huotorovoromo ëma uövuanuëjo. Ëma uövuanuëjumu magonahohuro uëvadeje: O-ajo. Na mae uëvajëjo. Hu iae rovë'e höjo. Uavareje: Peter bogo rue'i ma-hesi aru'ahohuremu rueromomamijajëjo.

<sup>16</sup> Ëhi'amu gagorovo ojo jiovahojöro Peter-ro ojore ano'anovo'i hijadeje. Ano'anovo'i hijamu va'o ojoho jiovoromo Peter gavamu jöe barëjëvadeje.

<sup>17</sup> Jöe barëjëvamu Peter-ro övëro tugohëvoromo uëvadeje: Na savoji gagore jevamu Badaro ëhi ëhi ë'oromo hu'irae baejevo rovade höjo. Ëhi jjië'e jöho majëhinugoromo uëvadeje: Jemëro va'oromo James'o agano ioro'iorohu'o nasi jöho majëhirego he'irarëjo. Ëhi uënuigoromo öre gö va'adeje.

<sup>18</sup> Öre gö va'ë'ëro sisonuvamu savoji gago muebejarue ariböviohuro gavare Peter bogojiamu gagorovo tiöromomajuhonivoromo uehoroho bogojëvamu ma-jöe gö gö atoromo uvareje: Peter dinö'e va'ë'ëro bogojiajëjo.

<sup>19</sup> Bogojiajëjumu Herod-ro uëvamu hesi ariböviohuro Peter nahemu nahujuvo gavareje bogojiamu. Bogojiamu gagorovo Herod-ro Peter atovarue aribövi jabesi jöho heromo jöe mevoromo hesi ariböviohuro atovarue aribövioho muo'amojöro uëvadeje. Ëhi'onugoromo Herod-ro Judea sa'are jioromo abuejadoho abo Caesarea amore ë hijadeje.

### *Herod guomade jöhoje.*

<sup>20</sup> Caesarea hiromomHerod-ro Tyre o Sidon amorajo jabesi örire sisë maro dë vörönimadeje. Dë vörönimamugagorovo rue amorajohuro uvareje: Noehu ijarue iruno'ohomHerod-hu muebejaje sa'are jioromorovaje höjo. Ioro'iohemutugohojöëni ëhuni Herod ga'i gemuore ruenugadeje. RueromomHerod-are osa muebejaje aho Blastus jabesi jöho ajëmiromomHerod sanuamijörodinamiromojöe nugö'öromomHerod uavareje: Noni vavaenimoromojamuijego ja'o no'o huë baerovoromoraromoirarëjo.

<sup>21</sup> Ëhi'amu Herod-ro majahomajohëmadeje ë majare rueruomoröhego. Ëmajahomrovamugagorovo Herod-ro hesi niögu ma-mahomio'amadeje. Io'amoromomhu bövi namiromomhijajeröhommare hiromomae aho'obëhe jöemajëhijadeje.

<sup>22</sup> Jöemajëhijamuhejë'i rue ariböviohuro uvoruomadeje: Asë'e jö böromehöjo. Bogo ma-aehumajohomajahui'i a iosiramuiromomdö mare jjië'e aru'ahohuro jöhomajahuijajëjo.

<sup>23</sup> Ëhi uvoruomamugavë'i Badare anerahuro Herod anamumuiniëromohesimuhomijahamugomadeje. Anadehesimöhohomhu God-are ihmogomnigemadohuni ëhuni anamugomadeje.

<sup>24</sup> RöhumGod-are jöhomajahoruomamumaromumorovobe va'adeje.

<sup>25</sup> Ëhi'amu Barnabas'o Saul'o Jerusalem va'oromommoniohomekaresia jabesimaduvahomomimëmijë'ëromJohn hesimihomgöhomMark hu'irae baeromomAntioch amore vuonorö'ö va'areje.

## 13

*Barnabas'o Saul'o va'oromomGod-are jö majëhibejirehoröhego Antioch ekaresia ariböviehumbaejëvoromomrëmö'öjare jöhoje.*

<sup>1</sup> Iae Antioch amore ekaresia a ioro'iorohomjö God-arobaeromomajëhijarue ariböviohumo Iesuare örimajëhijarue ariböviohumojëvadeje. ËaribövimjabesimihomBarnabas omSimeon ihmogöhomNiger omCyrene amoraje

Lucius o sa'a a böröme Herod'lo gemu mae bövi raejade aho Manaen o Saul ëhi jio'amadeje.

<sup>2</sup> Ëhi jio'amamu ekaresiaho jaburo ioho bogo ijë'e God ma-rajahiemu rajahijamu gagorovo hesi Aru'ahohuro uëvadeje: Jemëro Barnabas'lo Saul'lo baejëvoromo nani rëmhëjo jabuhu ë'ojöro baejëvode muoho vaenövoröhe höjo.

<sup>3</sup> Ëhi uëvamugo ekaresiaho jaburo ioho bogo ijë'e God-are örire jöe atonugoromo Barnabas'lo Saul'lo jabesi simanore öve bamëhoromo rëmö'öjamu va'areje.

*Barnabas'lo Saul'lo Cyprus sa'are va'oromo Keriso-are jö majëhijare jöhoje.*

<sup>4</sup> God-are Aru'ahohuro Barnabas'lo Saul'lo ëhi rëmö'öjadeje God-are muohuremu vaeröhego. Rëmö'öjamu abuejaroho abo Seleucia amore höröjareje. Höröromo boat-re ajiomoromo jovo döre va'aroho Cyprus ruë numë sö jovemu jië'e sa'are ë va'lo ravo'amareje.

<sup>5</sup> Cyprus sa'are ravo'amoromo Salamis amore höröromo Jew rajehu God rajahijarue osare osare God-are jöho majëhibe jirehareje. Röhu John Mark hu'irae baeromo hu'lo jirehareje huro ajëmego jaburo muoho vaebe jirehoröhëro.

<sup>6</sup> Jirehoromo Salamis amoho nugo va'oromo Cyprus sa'aho jirehobe numëhi va'lo viture juvö'öromo Paphos amore höröjareje. Höröromo sareri sareri'e iro oso'e ae gemu birohareje. Hesi ihoho Bar-Iesu jiadeje. Hu Jew rajëro jië'ëro aribövioho sarerëmiromo uënövadeje: Na jö God-aro baeromo majëhijaje ae jevajëjo.

<sup>7</sup> Bar-Iesu ë sa'are a börömo hesi ae jiadeje. Ësa'are a börömo hesi ihoho Sergius Paulus jiadeje. Hu uehoro ma'e ae jiadeje. Uehoro ma'e aëro jië'ëro jöe nugö'öromo Barnabas'lo Saul'lo uëvadeje: Rueromo God-are jöho majehirego na he'iröjo.

<sup>8</sup> Na he'iröjamu rueromo God-are jöho majahijamu hejë'i ë iro oso'e aho Bar-Iesu röhu iho göho Greece jöehu uvaruoho Elymas-ro jabesi jöho aho'ahovadeje. Elymas-ro Barnabas'lo Saul'lo jabesi jöho aho'ahovoromo ë sa'are a börömoho nijio'irae gavadeje Iesuare jöho ejahojöëni.

<sup>9</sup> Nijio'irae gavamu Saul hesi iho göho Paul-are dë vövöbajo'e aho'lo God-are Aru'ahohuro rarovamu gagorovo Paul-ro Elymas gemu ërimahoromo

<sup>10</sup> uavadeje: Ja Satan-are ae javajëjo. Sareri sareri'e muohemu vaejanue mu maho bövi bise'lo maho ijumanue ae javajëjo. Badare jö ma huotohuotovo jövanuoho divare vuonugonëjo.

<sup>11</sup> Ëhuni Badahu i'u mana bojami'ië'ajoho gavëjo. Jasi nunoho sisërëjavo'ië'ajëjo. Sisërëjavo'iramu majaehu ajivajoho majae ëgo'lo bogo uherihoromo ga'a'anuëjo.

Ëhi uavamu gavë'i hesi nunoho sisërëjamu ramoramoro hijadeje. Ramoramoro hiro mo övëro morijovobe juvadeje aëro övëro ma'eno bava'ojöro.

<sup>12</sup> Ëhi'amu ë sa'are a börömohuro gavade Paul-ro jöe jövo'ego ë a hesi nunoho sisërëjamu gagorovo tiöromo uvadeje: Badare jö Paul-hu majahuijajoho iae jö böröme hö uvoromo Iesuare örire mae uehorovadeje.

*Barnabas'lo Paul'lo Pisidia sa'are Antioch amore va'oromo God-are jö majëhijare jöhoje.*

<sup>13</sup> Ëhi'amu Paul'lo hesi ariböviohu'lo ëho jaburo Paphos amore boat-re iojiomoromo jovo döre va'oromo Pamphylia sa'are Perga amore

ë ravo'amareje. Ravo'amonugoromo John Mark-ro jabumë rëmoromo Jerusalem vuonorö'ö va'adeje.

<sup>14</sup> John va'irögoro Barnabas'o Paul'o jaburo niö'iro Perga amore jioromo va'oromo Pisidia sa'are Antioch amore ro arijareje. Ariromo Jew rajo jabesi nuho majaho rovamu God rajahijarue osare va'o arijareje.

<sup>15</sup> Arijamu aëro Moses-hu bojëmade jögoru surire jöho adaho jö God-aro baeromo majëhinövare ariböviehu jajivare surire jöho adhamu evare God rajahijarue osa muebejarue ariböviohuro Barnabas'o Paul'o jöe nugö'öromo uëvareje: Jew rajo aganomë jemë jögore jëvë'o ho majahuijego no heromo birivoromo God mae uehorovo'irarëjo.

<sup>16</sup> Ëhi uëvamu hegorovo Paul-ro ri'öromo jaburo hejoro övëro tugohëvoromo uëvadeje: Israel rajomë God mae uehorovarue a ioro'iorohumë na jö harihe majëhi'ie'ajëjo. Hehëjo.

<sup>17</sup> God Israel rajo aribövi muebejavuajohuro nosi hijo miono'o ho hesi baejëvade höjo. Baejëvë'e jiamu jabumëro Egypt sa'are abueromo majahuri raromamu God-ro ajëmijamu ae aho'obëhe jëvobe va'ade höjo. Aho'obëhe jëvobe va'amu God-ro hesi darugëro ajëmiromo Egypt sa'are jëvamu söjëvo ujuo ho rovade höjo.

<sup>18</sup> Söjëvo ujuo ho rovamu vadune aho'obëhe 40 a rumo'e sa'are mu sisë vaebe juvo'ego ma-nunëremu gë taemoromo ajëminövade höjo.

<sup>19</sup> Ëhi'ojuvo jabumëro Canaan sa'are rueruomamu evare ë sa'a uhure ëne aho'obëhe 7 mamirovoromo raromonörovare aribövioho God-ro muo barëromo jabesi sa'aho nosi Jew rajo hijo miono'o ho mëmijade höjo jabesi sionoho baeröhego.

<sup>20</sup> Röhu God-ro Israel rajo baejëvadoho aevoromo Egypt sa'are abo raro-mojuvo a rumo'e sa'are raromobe jijihojuvo ro Canaan sa'are raromaro ho vadune aho'o 450 ëhi barëjade höjo. Vadune 450 barëjamu gagoro God-ro a mevëvarue a masijoho bojëmibe rovade höjo nosi hijo miono'o ho muebejëvonövoröhego. A mevëvarue a masijoho bojëmibe ruejuvo evare Samuel jö God-aro baeromo majëhijaje ahuro hijo miono'o ho muebejëvade höjo.

<sup>21</sup> Samuel-ro muebejëvamu evare Israel rajo ariböviohuro ri'öromo God ua gavare höjo huro böröme namiromo muebejëvo'iröhe aho bojëmijoro. Ua gavamu God-ro jabesi örire Kish-are harihe Saul bojëmijade höjo böröme namiromo muebejëvoröhego. Saul hu Benjamin rajo ae jiade höjo. Saul bojëmijamu muebejëvojuvo vadune 40 barëjade höjo.

<sup>22</sup> Vadune 40 barëjamu God-ro Saul rori'o babu'ö'i David Saul-are sionore nugade höjo böröme namiromo muebejëvoröhego. David nugoromo uëvade höjo: Jesse-are harihe David iae na garomo nego avohajëjo. Huro naehu nimaje bövioho bise'o ho vae'a'ajëjo. David-are jöho ëhi uëvade höjo.

<sup>23</sup> Ëhi uëromo va'ojuvo majae ijonö David-are ujoho gemu Iesu God-hu Israel rajo uëvadëhi ëhi bojamuade höjo no Israel aribövioho manö bamavuoröhego.

<sup>24</sup> Iesu rue'ia'amu John-ro Israel raje ae aho'obëhe majahuiromo uövuade höjo: Uehoro sisëho vuonugo'i uehoro mae baeromo bapataeto vaerëjo.

<sup>25</sup> Ëhi jië'e jöho majahuijuvo muoho barë'ia'amu uövuade höjo: Jemëro uvarujëjo: Na rahuo jevajëjo. Na bogo ro ajëmi'irode a muebejarujoho jevajëjo. Röhu gahëjo. Ëahuro nasi ijonö rue'ie'ajëjo. Na hesi mu bise'o vaejahoromo höru sino jiovaho'ibejodoho o mu bise'o bise'e rabe vaejaho'ibejodoho röhu hu böröme jio'i na ma-bise'e jevajëjo.



<sup>26</sup> Röhu aganomë Abraham-are ujo ömo'ö mohumë o sa'a gö raje God mae uehorovarujohumë God-hu ajamuiromo manö bamavuaaje jöho ë jöho nosi jöëni rovë'e höjo.

<sup>27</sup> Èhesi bëhoho Jerusalem raromarue ariböviohu'o jabesi a masijohu'o ëho jaburo Iesuare bëhoho bogo avoho garomo bogo uvare höjo: Iesu iae ajamuiromo manö bamavuaaje aho höjo. Bogo avoho garomo röhu Jew rajo nosi nuho majaho rue'ego henövare jö God-aro baeromo majëhinövare a jabesi surire jöho adahoromo uvo'ego: U'emu a börömëro rueromo ajamui'ajë'ego dadivëvo'ego uvonövare höjo: Èa börömoho bogo Iesuhu jio'i ae gö jio'a'ajëjo Iesuare bëhoho bogo avoho gavë'ëro. Bogo gavë'ëro aehu Iesuare örire vaeromoröhego ë surire jajivarëhi Jerusalem raromarue ariböviohuro ëhi ë'oromo Iesu court vaeromo uaruomade höjo: Sisë ae javë'ëro guomo'a'anuëjo.

<sup>28</sup> Guomo'a'anuë uanugoromo nahoromo gavare guomoröhe bëhoho bogojiamu gavë'i Pilate ëma uaruomade höjo: Uëvego ano'irarëjo.

<sup>29</sup> Amo Iesuare örire bövi bise'o sisë'i vaeröhego God-are surire jö jajivarëhi Jerusalem raromarue ariböviohuro ëhi vae barënuigoromo Iesu ijore jiamu baruvebiromo hure bamare höjo.

<sup>30</sup> Hure bamamu God-ro ajamijamu ri'öjade höjo.

<sup>31</sup> Ri'öjamu Galilee sa'are jioromo Jerusalem Iesu'o gemu mae urimo rovere a jabesi nunire rue'i hijadoho majae aho'obëhe barëjade höjo. Rue'i hijamu hu gavare ariböviohuro jaruvoho Israel rajo jabesi örire hesi jöho ma-mae majëhijarue höjo.

<sup>32</sup> Iae noro jö maho majëhiromo uëvaruëjo: God-hu nosi hijo miono'o uëvadëhi

<sup>33</sup> no jabesi ujëro javuë'ëro ëhi ajamuijade höjo. Ajamuiromo nosi jöëni Iesu ajamijamu guomoromo ri'öjade höjo. Èhesi bëhoho God-hu Iesu ajamego ri'ö'iröhe jöho God-are surire Psalm 2-re jajivoromo uvë'e höjo:

Ja nasi Harihoho javajëjo.

Jaruvoho naro ja baejavë'e jevajëjo.

<sup>34</sup> O God-are surire jö göho huhu ajamego Iesu ri'öjego ijönö bogo guomoromo sino sagohori'iröhe jöho jajivoromo ëhi uvë'e höjo: God naehu David uavodëhi iae ëhi ma-maemu ajëmi'ejöjo jemë mae jëvo'iröhego.

<sup>35</sup> O God-are surire jö göho jajivoromo uvë'e höjo: Jasi aëro jevë'ëro God jero ajemi'iramu nasi sinoho bogo sagohorijevu'ajëjo.

<sup>36</sup> Iae David-hu hijade majare God-hu nimade muoho vaebe juvojuvo guomade höjo. Guomamu hesi hijo miono'o guavarire sionore guavamu hesi sinoho sagohorijade höjo. Èhuni hesi sino bogo sagohori'iröhe jöho David-ro bogo jajivo'i

<sup>37</sup> a'i Iesuare jöho jajivade höjo. Èhesi bëhoho God-ro ajamamu guomoromo ri'öj'ëro ëhu'ëro hesi sinoho bogo sagohorijade höjo.

<sup>38-39</sup> Aganomë ëhu'e jiaje ave jö hesi bëhoho ga avohohëjo. Iesuare jöëni God-hu mu sisë uehorovoromo vuonugo'iröhe öroho jemesi örire majëhijë'e höjo. O ae rahu Iesu mae uehorovë'o mu sisë vaejarije hesi i'uoho iae barëjaje höjo. Moses-hu bojamuade jögoru ejahë'o bogo ëhuro mu sisë hesi i'uoho barë'i a'i Iesu mae uehorovë'o iae barëjaje höjo.

<sup>40</sup> Èhuni avoho mueberovohëjo ëhuro jö God-aro baeromo majahuinövare a jabesi surire jajivare i'uoho bogo bae'irarije höjo.

<sup>41</sup> Èhesi bëhoho God-are jöho jabesi surire jajivoromo uvë'e höjo:

God-ro uëvadjëjo: Nasi jö ahoromo sivaruje ariböviohumë nasi muoho garomo tiöromo vuovorëjo.

Ëhesi bëhoho jemë bogo vuovo'i raromaruje majare evare naro vörö'e mu börömo vae'ië'ajëjo.

I'u'e mu börömëro jië'ëro aëro jemë sama'e röjëhi'ibejarëjo röhu bogo avoho heromo mae uehorovo'ibejarijëjo.

Ëhi uvë'e höjo. Ëhuni avoho uehorovohëjo.

<sup>42</sup> Paul-ro ëhi uënugoromo hu'o Barnabas'o höröjamu gëvë'i rue ariböviohuro uëvareje: Ruëre hura gö hesi nuho majaho rovego vuonorö'ö rueromo ëhi jië'e jöho majahuirego no he'irarëjo.

<sup>43</sup> Ëhi uëruomoromo suorovoromo Jew raje ae aho'obëhe o sa'a ioro'ioro rajehu jabesi mu vuonugo'i Jew rajo mu baeromo God mae uehorovarue aribövioho aho'obëhe jaburo Paul'o Barnabas'o jabesi ijore va'areje. Ijore va'amu gëgorovo jaburo niö'iro jabesi örire jögore mëmiromo uëvareje: Biririvoromo uvorëjo: Hesi God-ro huë baeromo ajamui'ajëromo muoho vaenövorëjo.

<sup>44</sup> Ëhi ë'l'ëro hura gö hesi nuho majaho rovamu amo raje ae aho'obëhe Badare jöho he'i ë osare gemu gagovoroumadeje. Ae gemu gemu bogo rovareje.

<sup>45</sup> Amo raje ae aho'obëhe gagovamu gëgorovo Jew rajoho jaburo Paul'o Barnabas'o jabesi mu mahuni dë vörönëgo avohamu Paul-are jöho aho'ahovoromo jö sisë atareje.

<sup>46</sup> Jö sisë atamu hegorovo Paul'o Barnabas'o bogo juhuonivo'i ma-biririvoromo jöho majëhiromo uëvareje: God-ro nimade höjo Jew rajo jemëro hesi jöho urimo hejëro. Ëhi höjo röhu jemë ë jöho heromo bijönimarujëjo. Bijönimoromo ëhuro jemëhu ioro'ioeremu maro raromo'irarije öroho tugohë'e jëvadjëjo. Ëhuni no huotorovoromo sa'a ioro'ioro rajoho jöho majëhinövo'ejarëjo.

<sup>47</sup> Ëhesi bëhoho rabëni Badaro jöe bojamuiromo uövuë'e höjo: Naro ja bamavode höjo jero sa'a ioro'ioro rajoho ajivëvo'iranego. Ajivëvego ae aho'obëhe majae beva'ajire majae hö'öjajire maro raromo'iröhego.

<sup>48</sup> Ëhi uëvamu hegorovo sa'a ioro'ioro rajohuro nimorohoromo uvoruomadeje: Badare jöho iae mae höjo. Ëhi uvoromo ioro'ioeremu raromo'iröhego God-hu uvade ariböviohuro Iesu mae uehorovoroumadeje.

<sup>49</sup> Mae uehorovamu Badare jöho ë sa'ae bövioho uarovobe va'adeje.

<sup>50</sup> Uarovobe va'irögoro a'i rue Jew rajoho jaburo God uehorovarue mago-naho masijohu'o amore a masijohu'o ë aribövi jabesi dëho iëhamu ri'öromo Paul'o Barnabas'o sisë vaejëvoroumadeje. Sisë vaejëvoromo Antioch sa'anö jëvamu rëmö'öjëvoroumadeje.

<sup>51</sup> Rëmö'öjëvamu gagorovo va'irögoro höru tohotoho'e jëvamu riremoromo va'areje amo rajohuro sisë vaejaruoho gajëro. Va'oromo Iconium amore höröjareje.

<sup>52</sup> Amo Antioch raromaruje Keriso-are aribövi jabesi dë vövöbajo'oho aho'o sasohëvoromo God-are Aru'ahohuro rarovëhadeje.

## 14

*Paul'o Barnabas'o Iconium amore ariromo God-are jö majëhijare jöhoje.*

<sup>1</sup> Paul'o Barnabas'o Iconium amore hörönugoromo urimo Antioch ë'arëhi ëhi Jew rajehu God rajahijarue osare va'oromo Iesure jöho majëhijareje.

Jöho majëhijamu ëhuro Jew raje ae aho'obëhe sa'a ioro'ioro raje ae aho'obëhe Iesu mae uehorovoruomadeje.

<sup>2</sup> Mae uehorovamu gëgorovo Jew raje jö bogo ma uehorovarue ariböviohuro sa'a ioro'ioro rajo jabesi örire uehoro sisëho bojëmiromo jabesi dë iëhamu jaburo Keriso-are aribövioho nue huodëgoruomadeje.

<sup>3</sup> Nue huodëgamu Paul'o Barnabas'o majae ëgobövie ariromo bogo juhuonivo'i ma-biririvoromo Badare jöho majëhijareje. Majëhiromo Badaro ajëmamu ëhuro bogo gavarue darugo'e mue gö gö vae'amareje ae aho'obëhe garomo uvoröhego: Iae mae-ëjo. God-hu huë baeromo ajamuijaje jöho mae hö uvoröhego.

<sup>4</sup> Ëhi'amu amo rajo ariböviohuro jöe gö gö uehorovareje. A ioro'iorohuro Jew rajo jabesi dönö jio'i a ioro'iorohuro Paul'o Barnabas'o jabesi dönö jëvadeje.

<sup>5</sup> Ëhi'oromo Jew rajohu'o sa'a ioro'iorohu'o ëho jaburo jabesi masi-johu'o gemu mae ri'öromo Paul'o Barnabas'o ijumëvoromo munëro vajëmi'i atareje.

<sup>6</sup> Munëro vajëmi'i atamu Paul'o Barnabas'o ë jöho heromo ju'ebiro mo va'areje. Va'oromo Lycaonia sa'are Lystra amo Derbe amo jiajinö ë va'areje.

<sup>7</sup> Va'oromo ë sa'are aribövioho Iesuare jö maho majëhibe jirehareje.

*Paul'o Barnabas'o Lystra amore ariromo God-are jö majëhiromo huë vavaeni bihoromo ju'ebiro mo Derbe amore va'are jöhoje.*

<sup>8</sup> Jirehoromo Lystra amore ro arijareje. Röhu höru sisë'e ae gemuëro ë hijë'e jiadeje. Urimë'i vëmehu rahadire aevoromo höru sisë'e jiobe rovë'ëro ëhu'ëro bogo mae bogo juvadeje.

<sup>9</sup> Bogo juvë'ëro hejadeje Paul ae jöe majëhijamu. Paul-ro jöho majëhiromo gavade ë aho hu'o jöho hejamu gagorovo ma-hu gemu ërimahoromo gavade hu mae uehorovo'ego marë'iröhoho eni jiamu gagorovo

<sup>10</sup> ma-darugo'o uavadeje: Döro ri'öromo avoho namijëjo. Namijëjamu hejë'i ma-burëro döro ri'öromo aevoromo juvadeje.

<sup>11</sup> Juvamu ae aho'obëhe gavare Paul-ro ë höru sisë'e aho ëhi ajamamu gagorovo simane sisë'i uehorovoromo uvoruomadeje: Paul-hu ë höru sisë'e aho ajamamu aevoromo juvade hesi bëhoho Paul'o Barnabas'o bogo ma-aehu jëvo'i a'i aru'aho börömoho niö'iro araeromo rueromo jabesi darugoho börömëro jëvë'ëro ëhu'ëro Paul-ro ë iaho ajamade höjo. Simane ëhi sisë'i uehorovoromo ri'öromo jabesi Lycaonia jöëro ma-darugo'o uvoruomadeje: O aveho bogo ma-aehu rue'i a'i muebejavuarue aru'aho börömoho niö'iro araeromo nosi örire ruvebijë'e höjo.

<sup>12</sup> Aru'aho börömoho niö'i ruvebijë'e höromo Barnabas jabesi sareri'e god hesi ihe Zeus jumuvoromo Paul-are jöho sarerivoromo uvoruomadeje: Nani ë aho nosi god Hermes jö bajuvaje aru'ahoho höromo Paul Hermes jumuvoruomadeje Paul jögoru jövaje aego.

<sup>13</sup> Zeus aru'aho böröme höromo rajahijarue osaho amo bëhiro jië'ëro Zeus rajahijarue mu muebejaje ahu'o uvadeje: Nani iae mae-ëjo. Nosi aru'aho böröme Zeus-më amore rovë'e höromo cow ano'oho ujuohoromo ijino inovaroho ujuohoromo amo börömore rejo ojo bëhire rovadeje. Rueromo hu'o a ioro'iorohu'o ëho jaburo Paul'o Barnabas'o aru'aho böröme jëvajëromo uvene aho röjëhiromo ë mioho muo'amoromo vëniro mueromo i'imëmi'irögoru ë'oruomadeje.

<sup>14</sup> Ëhi ë'iröhe jöho henugoromo Barnabas'o Paul'o ë apostle-ho niö'iro uvareje: Ëhi jië'o ho mu sisë bëhe höromo jabesi niögoho dadovo'amareje

ae göëro garomo uvoröhego: Jaburo nosi muoho bijönimoromo ë'aruëjo. Niögoho dadovoromo ma-ba viëhi jiaroho rue ae aho'obëhe jabesi ririre rirarovoromo ma-darugo'lo uvareje:

<sup>15</sup> Asë'e jemë rabëni ëhioho ë'arujëjo. No bogo aru'aho börömoho javuo'li no ma-ae jemë va'ëne javuajëjo. No jö maho majëhi'li rovare höjo ëhuro ëhi jië'e darugo rumo'e inömo ëma rajëhijarujoho vuonugo'li darugo jië'e aho God uehorovo'irarijego. God-ro ö'idöe sa'ae jove bövie bise'e no bamavuade höjo.

<sup>16</sup> Urimë'i sa'a göre göre raromaruje aribövioho jemesi nimaruje nimaruje muoho vae'ego huro ma gë taemonövade höjo.

<sup>17</sup> Iae ëhi jiade höjo röhu God-ro hesi muoho aho'lo bogo gurihi'li a'li jemë mae avohëvoromo hesi muoho röjëhibe rovade höjo jemëro garomo uvo'irarijego: Iae mae-ëjo. Hu ëhi jië'e a böröme hö uvo'irarijego. Huro ëne nugö'öromo i majaho rovego uvaje höjo: Iëro tagavëjo. Ioho tagavego uëvaje höjo: Jemëro i avohego da'uëgo'irajo. Nimoronimorohego dë vövöbajo'e sasohëvo'irajo. Huro hesi muoho ëhi röjëhibe rovë'e höjo.

<sup>18</sup> Biririvoromo ëhi jië'e jöho majëhiromo dë vövöbajo'e huotovëho'li ë'lo gavaroho mi suvuro vënire bueromo bamëho'li ë'aroho bogo vuonugo varijënoho jië'e ëma vuonugareje.

<sup>19</sup> Vuonugamu iae Jew rajo a ioro'iorohuro Antioch amore Iconium amore jioromo rueromadeje. Rueromo Lystra amo rajoho jabesinö jioruomajöro mu sisë jöho biririvoromo majëhijareje. Majëhijamu Lystra amo rajoho jaburo ejëhoromo ajëmiromo Paul munëro vajamiruomadeje. Vajamiromo uvoruomadeje: Paul guomë'e höromo amoro jiamu rori'lo ruho baeromo va'oruomadeje.

<sup>20</sup> Bava'amu Keriso-are ariböviohuro ro Paul-are bëhire gagovoromo riravo rova'areje. Riravo rova'amu Paul-ro ri'öromo rue amo börömore vuonorö'ö va'adeje. Va'oromo nëröho Barnabas-mu niö'iro ri'öromo va'aroho va'lo Derbe amore höröjareje.

*Paul'lo Barnabas'lo Syria sa'are Antioch amore vuonorö'ö va'are jöhoje.*

<sup>21</sup> Derbe höröromo Iesuare jö maho majëhijamu ae aho'obëhe aevoromo Iesuare ijore ijore jijiharue aribövie jioruomadeje. Ëhi'amu gagorovo Paul'lo Barnabas'lo jaburo vuonorö'öromo Lystra Iconium Antioch amore ekaresiae ajëmibe va'areje.

<sup>22</sup> Ajëmiromo jabesi dë vövöbajo'oho biririvëhoromo uënövareje: Biririvoromo Iesuare jöhemu mae uehorovonövorëjo. Ëhesi bëhoho God-are aji öri ari'ere va'li naguë'oho no vavaene böröme baebe va'ojuvo evare va'ëjarëjo.

<sup>23</sup> Ëhi uëbe a duvahe ekaresia jabesi simano vaeröhoho nugo'amobe ie bogo ijë'e ma-pariemu vaeromo uëbe va'areje: Jemë Bada mae uehorovaruje a hesi övo döre rëmaruëjo. Ekaresiaho ëhi ajëmibe va'areje.

<sup>24</sup> Va'oromo Pisidia sa'aho jireho barënugoromo Pamphylia sa'are rovareje.

<sup>25</sup> Pamphylia rueromo Perga amore ariromo Iesuare jöho majëhinugoromo va'lo Attalia amore abuejareje.

<sup>26</sup> Attalia amore abo ariromo boat-re ajiomoromo jovo döre va'aroho va'lo sionëro Antioch amore rovareje. Urimoho Antioch ekaresiaho jaburo Paul'lo Barnabas'lo God-are övo döre rëmareje huro ajëmego mu mae vaebe jireho'iröhego. Jaruvoho ë muoho barëjë'ëro Paul'lo Barnabas'lo sionëro rovareje.

<sup>27</sup> Rueromo ekaresiaho uëvareje: Gagovohego jöe majëhijarëjo. Majëhijarë uënuqoromo gagovamu uëvareje: God-ro ajamuijambu ëhi jië'e muoho vaeromo rovere höjo. Huro öroho sa'a ioro'ioro rajohuni jiovëhamu jaburo Iesu mae uehorovare höjo. Èhi'ade höjo.

<sup>28</sup> Èhi majëhiromu Keriso-are ariböviohu'o gemu mae majae ëgobövie ë arijareje.

## 15

*Ekaresia jabeti a masijehu Jerusalem gagovoromo Moses-hu bojëmade jögoru ë hesi jö mevare jöhoje.*

<sup>1</sup> Paul'o Barnabas'o Antioch amore arijambu iae ae göëro Judea sa'are jië'ëro rueromo Keriso-are ariböviohu majëhiromu uënövareje: God-arire mae va'i nëgë'iroho Moses-hu Jew rajo nosi jögoru jajivadëhi sa'a ioro'ioro rajoho jemë'o sinoho ëhi tarivëhego God-are aribövie jëvo'irajo. Sino bogo tarivëhë'oho bogo maroho va'a'arujëjo.

<sup>2</sup> Bogo maroho va'a'arujëjambu heqorovo Paul'o Barnabas'o jaburo ri'öromu irovoromu darugo'o jö aho'ahëmiromu i'e rovere ariböviohu uëvareje: Sa'a ioro'ioro rajoho nadi ëhi jië'e jöho majëhirëjo. Majëhirëjambu Antioch ekaresiaho jaburo Paul Barnabas Antioch amore ekaresia a ioro'ioroho ëhi bæjëvareje jaburo Jerusalem amore va'oromo apostle ömo'ömuhu'o Jerusalem ekaresia a duvaho ioro'iorohu'o sino tarivo'iröhe jöho mevo'iröhego.

<sup>3</sup> Bæjëvoromu rëmö'öjambu Paul'o Barnabas'o jaburo a ioro'iorohu'o gemu mae ae jöe majëhibe Phoenicia sa'are Samaria sa'are va'areje. Majëhiromu uënövareje: Sa'a ioro'ioro rajoho iae aëvoromu God mae uehorovoruomohijajo. Èhi uë'ego Christian aganoho aho'obëhe ë jöho heromu börömu bëhe nimorohonövareje.

<sup>4</sup> Amo ëhi jië'e jöho majëhibe rueromu Jerusalem suorovareje. Suorovambu gëgorovo apostle ariböviohuro ekaresia a duvaho ömo'ömuhuro ekaresia a ioro'iorohuro ëho jaburo jejëmiruomadeje. Jejëmijambu rueho jaburo jöho majëhiromu uëvareje: God-ro ëhi ajamuumu muoho vaeromo rovere höjo.

<sup>5</sup> Èhi majëhijambu Pharisee aribövie Iesu mae uehorovarue a ioro'iorohuro ri'öromu uëvareje: Iae ëhi höjo röhu sa'a ioro'ioro rajo jabeti sinoho tarivëhoromu jöe majëhiromu uë'ëjarëjo: Moses-hu bojamuade jögoroho ejahonövorëjo. Èhuremu mae höjo.

<sup>6</sup> Èhi uëvambu heqoro apostle ariböviohu'o Jerusalem ekaresia a duvaho ioro'iorohu'o ë jöho mevo'i gagovareje.

<sup>7</sup> Jöho mevojuvo Peter-ro ri'öromu uëvadeje: Aganomë jemë'o gavarujëjo urimë'i God-ro na jemesi ririre bæjevade höjo naru hesi jö mahu majëhijego sa'a ioro'ioro rajoho jaburo heromu Iesu mae uehorovoröhego.

<sup>8</sup> Jaburo mae uehorovambu God-hu hesi Aru'aho Jew rajo Keriso-are aribövi mamuadëhi sa'a ioro'ioro rajoho jabu'o ëhi mëmade höjo ëhuro noro garomu uvoröhego: God ae aho'o nosi dë vövöbajo'o gövuajohuro hesi Aru'ahoho sa'a ioro'ioro rajoho mëmijë'ëro ëhuni huro jabu'o mae uehorövëvqjëjo.

<sup>9</sup> God-ro Jew rajohu'o sa'a ioro'ioro rajohu'o bogo gö gö uehorovavuo'i ma-gemu uehorovavuade höjo. Èhesi bëhoho sa'a ioro'ioro rajohuro Keriso mae uehorovambu God-ro jabeti sisëho u'ovëho bæjëjade höjo.

<sup>10</sup> Moses-hu bojamuade jögoroho i'u ma'ëro jië'ëro no'o nosi hijo miono'ohu'o vaeromu mare va'iröhoho bogo eni javuade höjo. Èhi jië'oho

jemë rabëni nêgajêjo sa'a ioro'ioro rajohu'o êhi jiê'e i'u'e muoho bojëmi'iro. Jemë rabëni God-are dêho bijioho ga'i nêgajêjo.

<sup>11</sup> Bogajo. No mae uehorovoromo uvarue hõjo: Bogo noehu mu vaejaruohuro a'i hesi Bada Iesuhu huë baeromo ajamuijajohuro iae êhuro Jew rajoho no maro raromo'ejarêjo. Sa'a ioro'ioro rajo jabesi ôri jiajêhi noehu maro raromo'irõhe ôroho gemuoho hõjo.

<sup>12</sup> Peter-ro êhi majêhijamu Barnabas'o Paul'o ri'ôromo uêvareje: God-ro ajamuamu noro darugo'e mu gö gö êhi êhi vaeromo sa'a ioro'ioro rajoho ajëmibe jirehare hõjo. Êjõho he'iro ae aho'obêhe jõrumoræjareje.

<sup>13</sup> Jõrumoræjamu Barnabas'o Paul'o jõho majêhi barêjamu hegorovo James-ro ri'ôromo uêvadeje: Aganomë nasi jõhu'o hehêjo.

<sup>14</sup> God-hu sa'a ioro'ioro rajo aevoromo uehorovëvoromo a ioro'ioro hesi baejêvade jõho Simon-ro ë jõho majahuijamu no hejare hõjo.

<sup>15</sup> Êjõho iae mae hõjo. Êhesi bêhoho God-hu sa'a ioro'ioro rajo baejêvorõhe jõho urimë'i jõ God-aro baeromo majêhinõvare aribõviohuro jajivare hõjo. Jabesi ae gemuëro David-are ujo gagovëvorõhe jõho uhu'e huotovoromo jajivoromo uvê'e hõjo:

<sup>16</sup> Badaro uvavohijajo: Êhesi ijõnõ naro vuonorõ'õ rueromo David-are javu dadorovadoho evare avoho vae'ejõjo.

Sisêrêjadoho naro avoho'iramu urimë'i namijadêhi êhi nami'a'ajêjo.

<sup>17</sup> Nami'iramu sa'a göëro göëro Bada na birohevo'i nahevo'aruêjo.

Nasi jõ bogo henõvare aribõviehu nasi iho baejarohuro êhi ë'a'aruêjo.

Badaro êhi uvajêjo.

<sup>18</sup> Mami gö'e huro ë jõho aevoromo majêhadoho hebe rovê'e javuajêjo.

Êhi jajivê'e hõjo.

<sup>19</sup> Êhuni na êhi uehorovajêjo. Sa'a ioro'ioro rajehu huotorovoromo God mae uehorovë'o'ho no nosi i'u'e muoho jabesi ôriroho bogo bojëmi'i

<sup>20</sup> a'i ma-suriro jõho nugõ'ôromo uê'ejarêjo: Aehu sareri'e god göëni göëni bahijê'e mioho uvorêjo: Sisê hõromo nadi ue'ahorêjo. Nadi õnõ'oho jijihorêjo. Mi hesi kõho nadi ue'ahorêjo. Huë ahahê'e mioho kõ'e jiaje nadi ue'ahorêjo. Êjõhemu jajivo'ejarêjo.

<sup>21</sup> Êhi jiê'e jõgoru jajivo'irõhe ë hesi bêhoho Moses-hu êhi jiê'e jõ bamadoho mami'e ame aho'obêhe majêhibe rovê'e hõjo. O hesi jõho Jew rajo nosi nuho majaho rovego noehu God rajahijarue osare osare Moses-are jõho adahego jaburo hejarue hõjo. Êhuni êhi jiê'e mu gororovo'irõhe jõho sa'a ioro'ioro rajo jabesi ôrire nugõ'õ'ejarêjo.

*Jerusalem ekaresia a masijehu suri suri jajivoromo sa'a ioro'ioro rajehu Keriso mae uehorovarue aribõvi jabesi ôrire bamêhare jõhoje.*

<sup>22</sup> James-ro êhi uêvamu hegoro apostle-ho jabu'o ekaresia a duvaho õmo'õmohu'o êho jaburo jõe mevoromo uvareje: Ê'ego no nosi a ioro'ioroho baejêvego jaburo Paul'o Barnabas'o gemu mae Antioch amore va'irarêjo. Êhi majêhijamu ekaresiae ae aho'obêhe uvareje: Êhi jiê'oho iae mae hõjo. Êhi uvoruomoromo Judas hesi iho göho Barsabbas'o Silas'o jabumë niõ'i baejêvareje ekaresiaho jaburo ë ae niõ'i jabesi ôrire mae uehorovaruëro jiê'ëro.

<sup>23</sup> Baejêvoromo suroho jajivoromo bava'ojõro bojëmijareje. Surire jajivare jõho êhi uvê'e jiadeje: O asê'e Jew rajoho bogo a'i sa'a ioro'ioro rajoho Antioch amore Syria sa'a ioro'iore Cilicia sa'are raromaruje aribõviohumë

apostle ariböviohu'o Jerusalem ekaresia a duvaho ömo'ömo'hu'o jemesi ö mueno'ëro javuë'ëro noro jemesi örire jejëmaruëjo.

<sup>24</sup> Röhu no hejare höjo uvavamu: A ioro'iorohuro nosirire jioromo ö'are höjo. Ö'oromo jöe gö majëhiromomo jemesi simanoho sisëvo'jëhamu uehore gö gö baejarije höjo. Röhu ëho bogo noehu uëvamu ë'are höjo.

<sup>25</sup> Èhuni no ae aho'obëhe gemuoro gagovoromo jöe mevoromo uehore gemuoho baeromo uvare höjo: Noro ae gö baejëvo'ëjarëjo jemesi örire rëmö'öjëvego jaburo nosi aemo'aeme Barnabas'o Paul'o gemu mae ö'iröhego.

<sup>26</sup> Barnabas'o Paul'o vuovëvoröhe jöho bogo uehorovë'e ma-biririvoromo nosi Bada Iesu Keriso-are muohuremu uehorovë'e arijare höjo.

<sup>27</sup> Röhu Judas'o Silas'o jabu'o gemu mae rëmö'öjëvaruëjo jaburo ö'oromo noehu jajivarue jöe gemuoho majëhijego he'irarijego.

<sup>28</sup> God-are Aru'ahohu'o no'o jöe gemuoho uehorovoromo uvaruëjo: Jew rajo nosi i'u'e mue gö gö bogo bojëmi'i ave jögorohuremu bojëmi'ëjarëjo.

<sup>29</sup> Aehu sareri'e god göëni göëni bahijë'e mioho nadi ue'ahorëjo. Mi hesi köho nadi ue'ahorëjo. Huë ahahë'e mioho kö'e jiaje nadi ue'ahorëjo. Nadi önö'o'ho jijihorëjo. Èhi jïë'e mu gororovë'o'ho ëhuro mae jëvo'ajëjo. Ahia mino'ëjo. Surire jöho ëhi jajivoromo bojëmijareje bava'oröhego.

<sup>30</sup> Bojëmiromomo rëmö'öjamu Paul Barnabas Judas Silas ëho jaburo va'aroho va'lo Antioch amore suorovareje. Suorovonugoromo Christian aribövioho aho'obëhe gagovëvoromo suroho bojëmijareje.

<sup>31</sup> Suroho bojëmamu ekaresiae ae aho'obëhe hejare adahoromo uvavamu: Jew rajo nosi i'u'e muoho sa'a ioro'ioro rajoho bogo bojëmi'ëjarëjamu hegorovo uvareje: Sasohë'e mu maho rovë'e höromomo nïmorohoruomadeje.

<sup>32</sup> Èhi'amu Judas'o Silas'o jö God-aro baeromo majëhijarue aëro jëvë'ëro majae ëgobövie jöe majëhiromomo Christian agano jabesi dë vövöbajo'o'ho biririvëhareje.

<sup>33</sup> Èhi'oromo majae ëgo'lo Antioch arijamu evare ë Christian aganhuro rëmö'öjëvoromo uëvareje: Huë mae baeromo va'orëjamu jaburo Jerusalem jioromo rëmö'öjëvamu rovare ë aribövi jabesirire sionëro va'areje.

<sup>34</sup> [A'i Silas-ro ëhi hi'i uvadeje.]

<sup>35</sup> Iae Paul'o Barnabas'o jaburo Antioch majae ëgo'lo arijareje. Ariromomo jabu niö'i o a ioro'ioroho aho'obëhe ëho jaburo Badare jöho ekaresiae majëhiromomo bëhoho røjëhinövareje.

*Paul'o Barnabas'o jö aho'ahamirovoromo gemuore jireharoho vuonugo'i öre gö öre gö va'are jöhoje.*

<sup>36</sup> Èhi'ojuvo iae Paul-ro Barnabas uavadeje: No urimo Badare jöho majëhibe amo göre göre dinö'e dinö'e jireharire ë'ego no ë vuonorö'ö va'oromo gëvarëjo Christian aganhoho diehi diehi muoho vaeruomego.

<sup>37</sup> Èhi uavamu hegoro Barnabas-ro uavadeje: Iae mae höjo röhu na negajëjo John Mark-ro no'o ö'ojöro.

<sup>38</sup> Èhi uavamu Paul-ro uavadeje: Bogajo. John Mark-hu no'o ö'ë'o'ho bogo maehu höjo. Èhesi bëhoho urimë'i mue ajamuibe juvoromo Pamphylia sa'are ramuö'ö'i sionëro rovade höjo. Èhi jïë'e a bava'ë'o'ho na bijönegajëjo.

<sup>39</sup> Bijönegajë uaromo Paul'o Barnabas'o irorovoromo göëro öre gö va'i göëro öre gö va'adeje. Va'iro Barnabas-ro Mark hu'irae baeromo boat-re ajiomoromo Cyprus sa'are va'adeje.

<sup>40</sup> Cyprus va'irögoro Paul-ro Silas uavadeje: Rovego ja'o na'o muoho vaebe jireho'irarëjo. Jireho'irarëjamu Silas-ro uavadeje: Iae ëhi'o'ejarëjamu Christian agano ömo'ömohuro Paul'o Silas'o Badare övo döre rëmareje huro ajëmego mu mae vaebe jirehoröhego. Rëmamu Paul-ro Silas hu'iraeromo va'adeje.

<sup>41</sup> Hu'iraeromo va'adoho va'o Syria sa'are Cilicia sa'are ekaresia aribövioho jöe majëhiromomo ehuro jabesi dë vövöbajo'oho biririvëhobe va'adeje.

## 16

### *Timothy-hu aevoromo Paul'o Silas'o gemu mae juvade jöhoje.*

<sup>1</sup> Va'oromo Paul-ro va'adoho va'o Derbe amore ro hiromomo va'adoho Lystra amore rovadeje. Röhu Keriso uehorovaje ae gemuëro ë hijadeje. Hesi ihoho Timothy jiadeje. Hesi vëmoho Jew raje Iesu mae uehorovaje magonahe jiadeje. A'i hesi vavuoho Greece raje jiadeje.

<sup>2</sup> Christian agane Lystra amore Iconium amore raromaruohuro uvoruumadeje: Timothy hu mu mae vaejaje ae höjo.

<sup>3</sup> Paul-ro nimadeje Timothy hu'irae va'ego hu'o juvoröhego. Hu ëhi nimoromo röhu uvadeje: Jew raje ave sa'are röhu dir'öle göre göre raromaruohuro garomomo uvaruëjo: Timothy-are vavuoho bogo Jew rajoho jië'ëro sinoho bogo tariojahë'e höjo. Ehi uvoromomo Timothy-are sinoho bogo tariojahëgo Jew rajëro hesi jöho bogo ejahojöëni Paul-ro uëvadeje Jew rajëhu ë'aruëhi Timothy-are sinoho tariojahojöro. Ehi ë'ë'ëro hu'irae baeromomo va'adeje.

<sup>4</sup> Va'oromomo Paul'o Silas'o amore amore jöe majëhibe va'areje. Majëhiromomo Keriso-are aribövioho uënövareje: Apostle-ho jabu'o Jerusalem ekaresia a duvaho ömo'ömohu'o ëhi jië'e jögoroho uehorovë'ëro bojëmijare höjo jemëro ejëhonövo'irarijëgo. Ejöho ejëhonövorëjo.

<sup>5</sup> Ehi jië'e jöho majëhibe va'ego ekaresia ariböviohuro biririvoromomo Keriso mae uehorovobe va'areje. O majae ehi ekaresiae aho'obëhe marohëvobe va'adeje.

### *Paul-hu Troas amore va'oromomo nia'ovo'iraeromomo gavade jöhoje.*

<sup>6</sup> Paul'o Silas'o jöho majëhibe va'amomo gavë'i God-are Aru'ahohuro jabumë tugohëvadeje Asia sa'arohomo jöho bogo majëhiröhego. Tugohëvë'ëgo Phrygia sa'a'o Galatia sa'a'o birorohade ënire ë jireho va'areje.

<sup>7</sup> Va'arohomo va'o Mysia sa'a viture va'arohomo Bithynia sa'are va'ia'amomo Iesuare Aru'ahohuro uëvadeje: Nadi ë sa'aho va'ohëjo.

<sup>8</sup> Ehi uëvamu Bithynia sa'arohomo bogo va'i Mysia sa'aremu rova'oromomo abuejarohomo abo Troas amore höröjareje.

<sup>9</sup> Troas hörönugoromomo vahiromomomo Paul-ro nia'ovo'iraeromomo gavadeje Macedonia raje ae gemuëro namiomomo dinamiomomo uavamomo: Macedonia sa'aro rueromomo ajamuinëjo.

<sup>10</sup> Nia'ovo'iraeromomo ehi ganugoromomo Paul-ro Silas-ro naro evare uvareje: God-ro uöromomo ë'ajëjo: Macedonia sa'a rajohomo Iesuare jö maho majëhihë uövuajë uvoromomo ma-burëro va'iro bövioho bise'oho avohareje.

*Paul'o hesi ariböviohu'o Philippi amore ro jö atamomo hegorovo Lydia-hu mae uehorovade jöhoje.*



<sup>11</sup> Ĕhi'onugoromo Troas jioromo boat-re iojioromoro ma-ahorirĕro jovo dĕre va'aroho va'o Samothrace sa'are suorovĕ'ĕro nĕrĕho jovo dĕre va'aroho Neapolis amore suorovareje.

<sup>12</sup> Neapolis suorovonugoromo ĕrĕro va'aroho Philippi amore suorovareje. Ĕamoho Macedonia sa'are jiadeje. Macedonia sa'a bĕrĕmoho rĕhu ĕ sa'aho taritarivĕ'e ihe gĕ gĕ jiadeje. Rĕhu sa'a dirĕ'e gemu bĕrĕmoho jiadeje. Ĕdirĕ'ore sa'are Philippi amoho jiadeje. Rome amo rajohuro rueruomoro ĕ amoho aevo'i iĕromo raromobe rovĕ'e jiareje. Amo noro ro Philippi amore suorovoromo majae gemu niĕ'i ĕ raromareje.

<sup>13</sup> Raromoro iae Jew rajo nuho majaho rovamu noro uvareje: Nani Jew rajo aribĕviohuro God-are ĕrire jĕe ato'i nume jovo rirĕre abo raromarue hĕromo amore jioromo ĕ abuejareje. Abueromo ĕ raromoro gagovoromo raromarue magonaho ĕmo'ĕmoho Iesuare jĕho majĕhijareje.

<sup>14</sup> Jĕe majĕhijamu magonahe gemu hesi ihoho Lydia-ro ĕ hiromo hejadeje. Lydia hu Thyatira amo rajo magonahe jiadeje. Hu kavuĕ'e niĕgu maho imo'amaje magonahe jiadeje. Hu bogo Jew rajo magonahehu jiadeje rĕhu Jew rajo aribĕviohu'o gemuore God rajahinĕvadeje. Rĕhu Badaro Lydia-are dĕ vĕvĕbajo'oho jiovahĕ'ĕro huro hejade Paul-ro Iesuare jĕho majĕhijamu hegorovo jĕho ejahadeje.

<sup>15</sup> Ejahoromo hu'o hesi osare raromarue aribĕviohu'o bapataeto vaejareje. Vaenugoromo ĕ magonahohuro uĕvuadeje: Jemĕ uvarujoho: Iae mae-ĕjo. Nĕrĕro Bada mae uehorovajĕ uvarujoho jemĕro rueromo nasi osaro raromohĕjo. Ĕhi uĕromo dinamuijamu ejahareje.

*Philippi amo rajo jabesi a masijehu Paul'o Silas'o savoji gagore ba'amĕvare jĕhoje.*

<sup>16</sup> Ĕhi ĕ'ĕ'ĕro iae noro God-are ĕrire jĕ ataruire va'i va'amu gavĕ'i magonaho aboride gemuĕro ĕrire birohavuadeje. Ĕmagonahoho hesi ma-a masijo jabesi muemu vaejĕhaje magonahe jiadeje. Rĕhu Satan-are aru'aho sisĕ gemuĕro hesi dĕ vĕvĕbajo'ere abuejamu simanoho sisĕrĕjĕ'ĕro ĕhu'ĕro rabe rabe ijono jiorĕhe jĕho iae hu ae huruoho majĕhinĕvadeje. Majĕhiromo monie mana baenugoromo hesi a masijo ĕmo'ĕmoho i'imĕmi'ego rueho jaburo moni bĕrĕmo mae baenĕvareje.

<sup>17</sup> Amo ĕ magonahohuro simanoho sisĕrĕjĕ'ĕro Paul'o no'o rihromavuoromo darugo'o uvobe rovadeje: Ĕaribĕvioho jabumĕ God dĕ mare hijaje hesi mu aribĕvie jĕvajĕjo. Jemĕhu sisĕroho bogo va'i maro va'irarije ĕroho rĕjĕhijarue hĕjo.

<sup>18</sup> Ĕjĕe gemuoho majae aho'o rihromavuoromo uvobe ruenĕvadeje. Ĕhi'ojuvo Paul-ro he'i hiromo vĕrĕnimamu hegorovo huotorovoromo magonaho hesi dĕre aru'aho sisĕho uavadeje: Iesu Keriso-are ihoro naro ja uavajĕjo: Aruĕre magonaho hesi dĕ vĕvĕbajo'eroho hĕrĕ va'ĕjo. Va'ĕjamu gavĕ'i evare hĕrĕromo va'adeje.

<sup>19</sup> Hĕrĕromo va'amu ĕ magonaho hesi a masijohuro garomo uvareje: Aru'ahoho magonaho hesi dĕre rarovĕ'ĕjahĕ'ĕro jiĕ'ĕro ĕ magonahoho rabe rabe ijono jiorĕhe jĕho bogo majĕhiromo ĕhuro monie gĕ'o bogo baeromo bojamui'iramu bae'ejarĕromo Paul'o Silas'o guduamĕvoromo amo ririre jagu baejĕvo rovareje amore a masijo jabesi nunire rĕmorĕhĕro.

<sup>20</sup> Jagu baejĕvo rueromo Rome rajehu court mevarue a jabesi nunire rĕmonugoromo Paul'o Silas'o jabesi jĕ sisĕho majĕhiromo uĕvareje: Ave aho Jew raje aĕro jĕvĕ'ĕro nosi amore mu sisĕ barueromo ijumavuaruĕjo.

21 Ĕhesi bēhoho Rome nosi jōgoroho ahoromo jabesi muoho rōjahuijaruējo. No Rome rajero javuē'ero jabuhu rōjahuijarue mu ejēhoromo vaejē'oho bogo maehu hōjo.

22 Bogo maehu hōjamu hegoro rue amo raje ae aho'obēhe gemuore gagov-  
oromo ajēmiromo anēgo'iē'areje. Anēgo'ia'amugo amore a masijohuro  
Paul'o Silas'o jabesi niōgoho ma'eno dadovēhoromo jījōvēhoromo police  
uēvareje: Hisuebijēvohējo.

23 Hisuebijēvohējamu hisuebijēvo'i arijuvo hisuebijēvonugoromo baejēvo  
va'lo savoji gagore ba'amēvoromo savoji muebejaje aho uavareje: Ave ae  
niō'ioho avoho muebejēvonējo. Ju'ebi'aruējo.

24 Ĕhi uavamu hegorovo baejēvo va'oromo savoji osa ririro avoho ba'amo  
rēmoromo hōroho ijo dirō'ore bahijēhoromo evare i'u'e ijo ha'osi gōho baro  
havoromo muoho taemēvamu ēhi ariemu arijareje.

25 Ariromo vahi riri'e jiamu Paul'o Silas'o God-are ōrire jōe majahiromo  
hu rajahiromo jōe iareje. Rajahiromo jōe iavavamu savojire a ioro'iorohuro  
heruomadeje.

26 Ĕhi'amu gavē'i sa'aho ma-majioho hijiohijiovamu savoji gagoho  
aho'obēhe ē javu vaejare munē sa'a uhure jio'amajohu'lo sisē maro hijio-  
hijiovadeje. Hijiohijiovamu gavē'i evare oje aho'obēhe jiororovoromo ae  
aho'obēhe tōvēvare ō'oho jiororovo'amadeje.

27 Jiororovo'amamu iae savoji muebejaje ahuro niavē'ero ri'ōromo  
gavade ojoho aho'lo jiororovo'amē'e jiamu gagorovo uvadeje: Huruomē'e  
hōromo kaejō ēgoho jījōromo hesi arijo'arije anorovo'iē'adeje.

28 Hesi anorovo'ia'amu gavē'i Paul-ro ma-darugo'lo uavadeje: Ĕhi jiē'oho  
vuonugējo. No ae aho'obēhe aviae javuajējo.

29 Aviae javuajējamu uvadeje: Iroho gae ujuoho ruehego gavōromo ma-  
burēro rovadeje. Rueromo juhuonivoromo butubutumoromo Paul'o Silas'o  
jabesi bēhire behumorovadeje.

30 Behumorovē'ero hu'irae ōmēvoromo amonō va'oromo uēvadeje: Na  
diehi ē'ejōjo ēhuro maja ijoho na sisēroho bogo va'i maro va'irode.

31 Diehi ē'ejōjamu uavareje: Bada Iesu mae uehorovonējo. Mae ue-  
horovē'oho God-ro ja manō bamavo'iramu maro va'a'anuējo. Ja'lo jasi  
osare raromaruohu'lo ēhi jēvo'ajējo.

32 Ĕhi'onugoromo Badare jōho majēhijamu rue savoji muebejaje ahu'lo  
hesi osare raromaruohu'lo jaburo hejareje.

33 Henugoromo evare majaroho vahiromē'iro Paul'o Silas'o hu'irae  
ōmēvo va'oromo sinore nemo'amadoho u'ovēho'amoromo hu'lo hesi osare  
raromaruohu'lo ma-burēro bapataeto vaejareje.

34 Bapataeto vaenugoromo Paul'o Silas'o hu'irae ōmēvoromo osare  
ajiomoromo ie i'imēmijadeje. Ie i'imēmiromo hu'lo hesi osare raro-  
maruohu'lo God mae uehorovē'ero nimoroho avohareje.

35 Ĕhi ē'l'ē'ero sisonuvamu gagorovo Rome rajehu court mevarue a masijo-  
huro police-oho jōe bojēmiromo rēmō'ōjamu va'oromo savoji muebejaje aho  
uavareje: Savoji gagore arijarue ae niō'ioho ojoho jiovēhego va'irarējo.

36 Va'irarējamu hegorovo savoji muebejaje ahuro Paul uavadeje: Court  
mevarue aribōviahuro jōe nugō'ōjē'e hōjo naro rēmō'ōjēgo Silas'lo ja'lo  
hōrōromo va'irarijego. Ĕhuni hōrōromo mae va'orējo.

37 Mae va'orējamu Paul-ro ri'ōromo police-oho uēvadeje: Rōhu nosi sisē  
bogo birohē'e a nuniro ēma hisuebijavuare hōjo. Ĕho bogo maehu hōjo  
no Rome rajero javuē'ero. Ĕhi'oromo savoji gagore ba'amavuare hōjo. Ĕhi

ë'are höjo röhu jaruvoho jabumë diehi'oromo saginiëri ramuö'ö'lië'aruëjo noro va'ojöro. Bogo ëhioho höjo. Nadi'ego court mevarue ariböviohuro rueromo jabesi övëro baejavuego höröromo va'irarëjo.

<sup>38</sup> Ëhi uëvamu hegorovo police-ohuro jöho bava'oromo court mevarue aribövioho majëhijareje. Majëhijamu hegorovo hejare Paul'o Silas'o Rome raje ae jëvamu hegorovo juhuonivareje.

<sup>39</sup> Juhuonivoromo rueromo Paul'o Silas'o sanuëmiromo savoji gagore jëvamu hu'irae ömëvo rueromo uëvareje: Jemëro nosi amoho vuonugo'i va'orëjo.

<sup>40</sup> Va'orëjamu Paul'o Silas'o jaburo savoji gagore jioromo höröromo Lydia-are osare va'areje. Va'oromo Christian agano ömo'ömoho gëromo jögore mëmiromo va'areje.

## 17

*Paul'o Silas'o Thessalonica amore va'oromo huë vavaeni baejare jöhoje.*

<sup>1</sup> Va'oromo Paul'o Silas'o Amphipolis amore va'aroho Apollonia amore va'aroho va'o Thessalonica amore höröjareje. Höröromo gavareje Jew rajehu God rajahjarue osaho ë jiamu.

<sup>2</sup> Jew rajehu God rajahjarue osaho jiamu gagorovo Paul-hu amore amore juvoromo God rajahjarue osare va'onövadëhi ëhi ë osare va'adeje. Va'oromo God-are surire jöho adahoromo ë jö hesi bëhoho Jew rajo ariböviohu'o gemu mae mevadeje jabesi simane huotovëho'i. Nuho majae niö'i gemu rue'ego ëhi ë'onövadeje.

<sup>3</sup> Bëhoho röjëhiromo uënövadeje: God-are surire jö urimë'i jajivare hesi bëhoho God-hu uavë'ëro böröme namiromo ajamui'iröhe aehu rovë'iroho huro huë vavaene baeromo guomoromo i'ovoromo ri'ö'a'ajëjo. Surire jö hesi bëhoho ëhi höjo. Röhu naehu majëhijaje aho Iesu hu iae ë böröme namiromo ajamuijaje aho höjo.

<sup>4</sup> Ëhi jië'e jöho majëhijamu Jew rajo a ioro'iorohuro uvareje: Iae jö mae höjo. Jö mae hö uvoromo aevoromo Paul'o Silas'o gemu mae jijihareje. Greece rajehu God mae uehorovarue aho aho'obëhe magonaho masijoho aho'obëhe jabu'o Paul'o Silas'o gemu mae jijihoruomadeje.

<sup>5</sup> Ae aho'obëhe Paul'o Silas'o gemu mae jijihamu gëgorovo Jew rajoho ëhuni dë vörönëgadeje. Dë vörönëgamu örire ëma jijiharue a sisëhu mu sisë vaejöro gemuoro gagovëvareje. Gemuoro gagovëvoromo muorovo jöho madarugo'o atamu amo raje ae aho'obëhe heromo muorovo'i ë'oruomadeje. Muorovo'i ë'oromo ri'öromo Jason-are amoho ro juhiromo osare va'oromo Paul'o Silas'o nahëvareje guduamëvoromo amonö baejëvo rueromo ae aho'o jabesi nunire rëmo'iro.

<sup>6</sup> Jason-are osare va'oromo gavare Paul'o Silas'o bogojëvamu gagorovo jaburo Jason o Christian agane gö gö guduamoromo jagu ujuoho va'oromo amore a masijo jabesi nunire bamëvoromo ma-darugëremu uëvareje: Majae hö'öjajire nume beva'ajire huë sisë öri röjëhibe jijihaje aribövioho ave nosi amohu'o rovë'e höjo.

<sup>7</sup> Nosi amohu'o rovamugo Jason-ro uëvade höjo: Ro nasi osaro arihëjo. Huro ëhi uëvamu hesi osare arijë'ëro Rome a börömehu bojamuijade jöho ahoromo sareramuiromo uövuarue höjo: A ioro'ioro iosiramuiromo böröme namijaje aho bogo Rome hiromo böröme namiromo no muebejavuaje aho jio'i a'i hesi ae gö höjo. Hesi ihoho Iesu höjo.

<sup>8</sup> Ëhi majëhijamu hegorovo amore ae aho'obëhe o jabesi masijoho aho'o vörö'iraeruomadeje.

<sup>9</sup> Vörö'iraeromo amore a masijohuro Jason'o Christian a ioro'iorohu'o uëvamu monioho bojëmijamu ehuro rëmö'öjamu va'areje.

*Paul'o Silas'o Berea amore va'oromo ë'are jöhoje.*

<sup>10</sup> Ehi'oromo vahiomamu gavë'i Christian aganhuro Paul'o Silas'o Thessalonica amore jëvamu rëmö'öjëvareje Berea amore va'iröhego. Rëmö'öjëvamu va'oromo Berea amore höröjareje. Höröromo Jew rajehu God rajahijarue osare va'oromo Iesuare jöho majëhijareje.

<sup>11</sup> Jöho majëhijamu Berea amo rajohuro Thessalonica amo rajoho iosirëmiromomo simano mae uehorovë'e aribövie jioruomadeje. Simano mae uehorovë'ëro God-are jöho he'i nimo avohareje. Heromo God-are surire jöho adaho'i arijareje ga'iro Paul-hu majëhijade jöho jö mae o sareri jöe jiego.

<sup>12</sup> Mae o sareri jöe jiego ga'i adahonugoromo Jew raje ae aho'obëhe Iesu mae uehorovareje. Jew rajëro mae uehorovo'i Greece rajo mago-naho masijohu'o Greece rajo ama'i'o ae bogo bise'o vadu'oho Iesu mae uehorovoruomadeje.

<sup>13</sup> Ehi'amu Jew raje rue Thessalonica amore raromaruoho jaburo hejare uvavamu: Paul-ro God-are jöho Berea amore majëhijë'e jiajëjamu hegoro Berea rueromo amo raje ae aho'obëhe jabesi dëho iëhareje jaburo vörö'iraeromo Paul'o muorovo'iröhego.

<sup>14</sup> Ehi'amu gavë'i Christian aganhuro Paul nugö'öjamu abuejadoho abo sö jovore höröjareje. Ehi'o'irögoro Silas'o Timothy'o Berea amore ëhi arijareje.

<sup>15</sup> Arijamu Paul namijaho va'are ariböviohuro hu'irae bava'oromo Athens amore suorovoromo ë nugareje. Paul ë nugaromo Berea vuonorö'ö va'ia'amu gagorovo Paul-ro uëvadeje: Va'irarijoho Silas'o Timothy'o uërego ma-burëro rue'irarëjo. Ehi uëvamu hegorovo va'areje.

*Paul-hu Athens amore hiromo Iesuare jö majëhijade jöhoje.*

<sup>16</sup> Va'amu gagorovo iae Paul-ro Athens amore hiromo Silas'o Timothy'o muebejëvadeje. Hiromo muebejëvoromo gavade aru'aho'e höromo uvene aho röjahi'amarue inömo aho'obëhe amore jiorovamu gagorovo uvadeje: Amo rajoho God-are jöho bogo hejarue höromo ehuni dë vövöbajo'e aho'o vavaenimadeje.

<sup>17</sup> Vavaenimoromo Jew rajehu God rajahijarue osare va'oromo Jew rajohu'o sa'a ioro'ioro rajehu God mae uehorovarue ariböviohu'o Iesuare jöho mevoromo jabesi simane huotovëho'iro vae majae imo'amarue öri ari'ere va'lo namiromomo ganövade ae rue'ego jabu'o Iesuare jöho mevonövadeje jabesi simanohu'o huotovëho'iro.

<sup>18</sup> Jöho mevo'ego Epicurus-are jö hesi ijore ijore jijiharue ariböviohu'o Stoic jö hesi ijore ijore jijiharue ariböviohu'o ëhi jië'e ariböviohuro God-are jöho bogo hejaruëro jië'ëro Paul-are örire rueromo jö aho'ahaminövareje. Jö aho'ahamiromomo a ioro'iorohuro uarovonövareje: Simano bogojië'e aho rahuro rajahijöro jöho jövajëjo. Rabu jöe jövo'i ë'ajëjo. A ioro'iorohuro uarovonövareje: Nani sa'a gö rajehu böröme hö uehorovarue aru'aho jabesi jöho huro majahuiromomo ë'ajëjo. Jabuhu ëhi uarovare hesi bëhoho Paul-ro Iesuare jöhu'o aehu vuovoromo ri'öjarue jöhu'o majëhijamu hejë'ëro ehuni uarovareje: Sa'a gö rajo aru'aho jabesi jöho majahuijajëjo.

<sup>19</sup> Ehi uarovoromo Paul uavareje: Rovego no Areopagus dahorure ajiomarëjo ehuro ë gagovarue a masijo jabesi nunire jasi jöho jövego

heröhe höjo. Ëhi uanugoromo hu'irae bava'oromo Areopagus a masijo jabesi nunire nugoromo uavareje: Jö i'e jaehu baeromo rovanuoho no he'i naguajëjo.

<sup>20</sup> Jaehu jövanue jöho bogo hejaruëro jië'ëro ëhuni no naguajëjo avoho he'iro.

<sup>21</sup> Ëhi uavare hesi bëhoho Athens amo rajohu'o sa'a ioro'iorore jioromo ro Athens raromarue ariböviohu'o ëho jaburo jö i'e ëhemu atemu atoromo hemu henövareje. Ëhi jië'e muohemu uehorovonövareje.

<sup>22</sup> Ëhi'lamu Paul-ro ë a masijo jabesi nunire ri'ö namiromo uëvadeje: Athens amo rajomë na jö harihe majëhi'ië'ajëjo. Na gëvajoho jemë aru'ahë gö gö mae uehorovëvaruje aribövie jëvajëjo.

<sup>23</sup> Ëhesi bëhoho na jemesi amore juvode höjo. Juvoromo jemëhu aru'aho rajëhijarue öri ari'oho gabe juvo'i gavode höjo munë maratue hitavoromo sehoromo jajivoromo uvë'e jiamu: Ave maratu hesi bëhoho hesi iho bogo hejarue aru'ahohuni ave maratuoho ëma hitavo nugaruëjo. Ëhi uvë'e jiamu gavë'ëro jemë hesi iho bogo hejë'e ëma rajahijarue aru'aho hesi jöho iae na röjëhi'irögoro ë'ajëjo.

<sup>24</sup> Ëaru'ahoho iae God höjo. God-hu sa'a bövi bise'o bamade aho höjo. Huro böröme namiromo ö'idörohu'o sa'arohu'o muebejavuaje höjo. Ëhuni ma-aehu hu rajahi'i vae'amare osaroho hu bogo ëho hijaje höjo.

<sup>25</sup> Hu eni jië'e aego no bogo hunioho vavaenimoromo bövioho bise'oho avohoromo hu i'imami'ëjarëjo. Ëhesi bëhoho huro gemuëro no ae aho'o birire bojamuego nue ahoromo daruge bövie bise'e baeromo raromarue höjo.

<sup>26</sup> Huro ae gemu bamade höjo. Bamoromo ë aho baeromo ëhuro sa'ae aho'obëhe raje avohëvobe rovë'e höjo jaburo sa'ae dinö'e dinö'e va'oromo raromoröhego majae hö'öjajire beva'ajire. A bogo bamadevare evare huro uvade höjo: Aribövioho ë majare raromo'i ë majare rireromobe va'oromo ë sa'are ë sa'are raromobe va'a'ajëjo.

<sup>27</sup> Huhu bamëvade hesi bëhoho aëro God ga'i nahobe va'iröhego. Nahobe va'öjuvo nani bihoröhego. Röhu God bogo ëgoroho jio'i ae gemu gemu no'o hi juvaje höjo.

<sup>28</sup> Ëhesi bëhoho noro hesi darugoro raromo jijihole vaejarue höjo. Ëjëe gemuoho jemesi gavë'e ariböviohuro jajivoromo uvë'e höjo: Iae no ae aho'obëhe hesi aboji harihu'e javuajëjo. Ëhi uvare höjo.

<sup>29</sup> No God-are aboji harihu'ëro javuë'ëro ëhuni no bogo uehorovoromo uvo'ëjarëjo: God hu aehu gold silver munë gö gö ujuohoromo övo sasohoromo simano sasohoromo sehoromo avoho'amare inömoho va'ëne höjo. No bogo uvo'ëjarëjo: God hu ëhi höjo.

<sup>30</sup> Urimoho aehu God-are jö bogo hejare majare God-ro gëvade aëro ëhi jië'e inömoho aru'ahole höromo uvene aho röjëhi'ëgo gëromo ma-gë taemonövade höjo. A'i avevejö'oho ae aho'obëhe sa'ae dinö'e dinö'e raromaruje aribövioho uëvajëjo: Uehoro sisëho vuonugo'i nasi öroro rüehëjo.

<sup>31</sup> Ëhi uëvaje hesi bëhoho huro majaho bamë'e höjo sa'are ae aho'obëhe hesi court-re riravo'iröhego. Riravo'iramu huhu uavade ahuro hesi ihore court vaejëvoromo ae aho'o jabesi jöho avoho mevoromo gë'a'ajëjo gë'i ae mae o sisë jëvego. Aëro ma-samaro uvoröhego: Ëahuro mevo gö'a'ajë uvoröhego ëhuni hu ajamamu guomoromo ri'öjade höjo.

<sup>32</sup> Guomoromo ri'öjade jöho heruomoromo a ioro'iorohuro sivareje. A ioro'iorohuro uavareje: Jasi jöho röhu maho u'emu he'ëjarëjo.

<sup>33</sup> Ëhi'amu Paul-ro gagovaruire jioromo va'adeje.

<sup>34</sup> Va'amu a ioro'iorohuro aevoromo hu'o gemu mae jijihō va'oromo Iesu mae uehorovareje. Areopagus dahorure gagovaje a bōrōme gemu hesi ihe Dionysius o magonahe gemu hesi ihe Damaris o ae gō gō ēho jaburo mae uehorovareje.

## 18

### *Paul-hu Corinth amore va'oromo ë'ade jōhoje.*

<sup>1</sup> Ëhi'amu gagorovo Paul-ro Athens amore jioromo va'adoho va'o Corinth amore hörōjadeje.

<sup>2</sup> Corinth hörōromo Jew rajo a ihe Aquila birohadeje. Aquila hu Pontus amore rahade ae jiadeje. Rahë'ëro ijonō va'o Italy sa'are hijadeje. Hiromō Rome a bōrōme Claudius-ro Jew rajo aribōviohuro Rome jëvamu va'o barëjōro uëvamu gagoro hu'o hesi vabore Priscilla'o Rome jioromo Corinth amore aviavejō'e rovarēje. Corinth aviavejō'e rovamu Paul-ro jabumë gë'i va'adeje.

<sup>3</sup> Va'oromo Paul o Aquila o Priscilla mue gemuho vaeromo niōgu javue vaejaruëro jië'ëro Paul-ro jabu'o hiromō ë muoho gemu mae vaeromo ijo bajoho mana baenōvareje.

<sup>4</sup> Ëhi'oromo Jew rajo nuho majaho rue'lego Paul-ro Jew rajehu God rajahijarue osare va'oromo Jew rajohu'o Greece rajohu'o jabu'o jōe mevoromo jabesi dë vōvōbajo'o huotovëho'i ë'o ganōvadeje jaburo aevoromo Iesuare örire jijihorōhego.

<sup>5</sup> Ëhi'ojuvo Silas'o Timothy'o jaburo niō'iro Macedonia sa'are arijë'ëro Corinth amore rovarēje. Corinth amore rovamu gagorovo Paul-ro mue gō gō vuonugo'i Iesuare jōhuremu ae majëhijadeje. Majëhiromō Jew rajoho uënōvadeje: God-hu uavë'ëro bōrōme namiromō ajamuijaje aho iae Iesu hōjo.

<sup>6</sup> Ëhi majëhijamu hegorovo rue Jew rajo aribōviohuro jō aho'ahamiromō Paul-are jō sisëho atamu hegorovo huro niōgure uono'uonoho jabesi nunire hijiovo rōjëhijadeje jaburo garōhego hu jabesi muoho bijōnimego. Rōjëhiromō uëvadeje: Jemë i'u baejë'o ho ēho jemesi mue hōjo. Bogo nasi muehu hōjo. Ijoho naro Jew rajoho jemë vuonugëvo'i va'oromo sa'a ioro'ioro rajoho jōho majëhinōvo'ejōjo.

<sup>7</sup> Ëhi uënugoromo Jew rajehu God rajahijarue osaho vuonugo'i va'oromo ruëre osa göre Titius Justus-are osare va'o hijadeje. Titius Justus bogo Jew rajo aho jiadeje rōhu Jew rajoho jabu'o God rajahijaje ae jiadeje.

<sup>8</sup> Ëhi'amu gagorovo Crispus Jew rajehu God rajahijarue osa muebejaje aho Crispus'o hesi osare raromarue aribōvioho aho'obëhe jabu'o aevoromo Bada mae uehorovareje. Mae uehorovamu Corinth amo raje ae aho'obëhe Iesuare jōho heromo mae uehorovoromo bapataeto vaeruomadeje.

<sup>9</sup> Ëhi'amu vahiromamu gagorovo Paul-ro nia'ovo'iraeromo gavadeje Badaro rueromo uavamū: Nadi juhuonivo'i jōho jōvonōvonëjo. Bogave vuonugo'iranëjo.

<sup>10</sup> Ëhesi bëhoho na ja'o hi juvaje hōjo. Aho bogo anago'aruëjo ave amore nasi aribōvioho bōrōmo mae jië'ëro.

<sup>11</sup> Ëhi uavamū Paul-hu ë amore hiromō God-are öri rōjëhibe va'adoho vadune gemu manaere 6 ëhi barëjadeje.

<sup>12</sup> Vadune gemu manaere 6 ëhi barëjumu Gallio-hu Greece sa'a Rome jabesi ihore muebejevadevare evare Jew rajoho jaburo gagovoromo Paul guduamoromo court-ro bava'oruomadeje.

<sup>13</sup> Paul court-ro bava'oromo ë a börömo Gallio uavareje: No ave a barovare hesi bëhoho huro aribövi jabesi dë vövöbajo'oho huotovëho'i ë'ajëjo jaburo God sisë'i sisë'i rajahiröhego. God ëhi rajahijë'oho jögoroho ahoruomo'ajëjo.

<sup>14</sup> Ahoruomo'ajëjumu Paul-ro hesi jöho majahi'ia'amu gavë'i Gallio-ro uëvadeje: Jew rajomë ave aho vajiohu'e anano'e muoho vae'ibejajo naehu ma-taemorovoromo jemesi jö hejë'oho iae mae jio'ibejajo.

<sup>15</sup> Röhu bogo ëhi jië'e jöho barovarije höjo. A'i jemesi jö bëhi iho bëhi mu jögoru bëhi rabe rabe Jew rajo jemëhu atoromo berohemu beroharujoho ëhi jië'e jöhemu court-ro barovë'e jëvaje ëhuni jemëro jemesi gahëjo. Ëhi jië'e mu öri mevë'oho na bijönegajëjo.

<sup>16</sup> Ëhi uënugoromo hesi aribövioho uëvamu sihö'öjëvareje.

<sup>17</sup> Sihö'öjëvoromo ae aho'obëhe ri'öromo Jew rajehu God rajahijarue osa muebejaje a hesi ihoho Sosthenes guduamoromo court a masijo jabesi nunire baro anoromo köe bojamareje. Köe bojamamu gëgorovo Gallio-ro ma-nunëremu gëvadeje.

*Paul-hu Antioch amore vuonorö'ö va'ade jöhoje.*

<sup>18</sup> Ëhi'amu Paul-ro Corinth amore Christian aganohu'o gemu mae hijamu majae ëgobövie barëjadeje. Majae ëgobövie barëjumu huro aribövioho ë rëmo'i Cenchreae amore abuejadeje. Abueromo höröromo mue vaeröhëni God-are nunire mae uanugoromo aëro simano uoho tarijahojöro uavadeje hujeji muoho barëjego evare ijönö aëro röhu maho tarijahoröhego. Simanoho tarijahamu Paul-ro Priscilla'o Aquila'o gemu mae boat-re ajiomadeje Syria sa'are va'oröhëni.

<sup>19</sup> Va'adoho va'o Ephesus amore höröjadeje Aquila'o Priscilla'o ë amore rëmo va'ië'ëro. Höröromo huro Jew rajehu God rajahijarue osare va'oromo Iesuare jöho Jew rajohu'o mevadeje jabesi simanoho huotovëho'i.

<sup>20</sup> Mevamu hegorovo rue ariböviohuro uavareje: Avehuro majae ëgo'o hiromo u'emu va'onëjo. U'emu va'onëjumu bogo ejëhadeje.

<sup>21</sup> Bogo ejëhoromo va'irögoro uëvadeje: God-hu nimë'ohuro na vuonorö'ö rueromo gë'ejöjo. Ëhi uënugoromo boat-re ajiomoromo Ephesus amoho vuonugo'i va'adeje.

<sup>22</sup> Va'adoho Caesarea amore ravo'amoromo ajiomadoho ajio Jerusalem amore höröromo ekaresia aho magonahoho jejëminugoromo va'adoho va'o Antioch amore höröjadeje.

<sup>23</sup> Antioch majae ëgo'o hiromo va'adoho Galatia sa'a'o Phrygia sa'a'o birorohade ënire Keriso-are aribövioho aho'o jöe majëhiromo ëhuro jabesi dë vövöbajo'oho biririvëhobe juvadeje.

*Apollos-hu Ephesus amore ro hiromo va'oromo Corinth amore hiromo ë'ade jöhoje.*

<sup>24</sup> Ëhi'amu iae Jew raje ae gemu hesi ihoho Apollos-ro Ephesus amore rovadeje. Hu Alexandria amore rahade ae jö'e sasohoromo jöe jövaje ae God-are surire jöho ga avohë'e ae jiadeje.

<sup>25</sup> Ae göëro Badare öroho Apollos röjahijumu hejë'ëro hesi dë vövöbajo'e aho'o ri'öromo Iesuare jöho majëhiromo ma-ahorirëro röjëhinövadeje. Ëhi

jiadeje röhu Iesuare ihore bapataeto vaeröhe jöho bogo he'i John-hu bapataeto vaejövade jöhemu hejël'ero jöho jövonövadeje.

<sup>26</sup> Amo Apollos-ro Ephesus amore rueromo Jew rajehu God rajahijarue osare va'oromo aevoromo God-are jöho biririvoromo majëhijadeje. Majëhijamu Priscilla'o Aquila'o hejare Apollos-ro God-are jö vituoho he'i vituoho bogo ma hejël'ero jöho majëhijamu hegorovo jabesi osare hu'irae bava'oromo avoho röjahiromo uavareje: God-are mu öroho ëhi höjo.

<sup>27</sup> Ëhi'amu Apollos-ro uvadeje: Na Greece sa'are va'ejöjo. Va'ejöjamu Ephesus amore Keriso-are ariböviohuro hu ajamiromo suroho jajivoromo bojamijareje huro bava'ego Greece sa'are raromarue Keriso-are ariböviohuro adahoromo hu rajahiromo baerumoröhego. Suroho bojamamu baeromo va'o Greece sa'are höröjjadeje. Höröromo jöho majëhjadeje. Majëhiromo God-hu huë baejëvoromo jabesi simano huotovëhë'e Keriso mae uehorovarue aribövioho ë aribövioho Apollos-ro mabëhe ajëmijadeje.

<sup>28</sup> Ëhesi bëhoho huro biririvoromo Jew rajo jabesi jöho a nunire aho'ahëmiromo God-are surire jöho adahoromo avoho röjëhijadeje jaburo garomo uvoröhego: Iae mae-ëjo. God-hu uavë'ero böröme namiromo ajamuijaje aho iae Iesu höjo.

## 19

### *Paul-hu Ephesus amore hiromo ë'ade jöhoje.*

<sup>1</sup> Apollos-ro Corinth amore hijamu evare majae gemuore Paul-ro sa'a ririre va'adoho va'o Ephesus amore höröromo ë hijadeje. Hiromo Keriso-are aribövi ioro'ioroho birohëvadeje.

<sup>2</sup> Birohëvoromo uëvadeje: Jemë Iesu mae uehorovarijevaroho na jemë God-are Aru'ahoho baejarije höjo o bogajo. O bogajamu uavareje: O-ajo. God-are Aru'aho hesi jöho no bogo hejë'e javuajëjo.

<sup>3</sup> Bogo hejë'e javuajëjamu uëvadeje: God-are Aru'aho hesi jö bogo hejë'oho jemëhu bapataeto vaejarijoho bëhoho diehi jiade höjo. Uavareje: John-hu bapataeto hesi bëhi majëhinövadoho bëhe gemuoho jiade höjo.

<sup>4</sup> Bëhe gemuoho jiade höjamu Paul-ro uëvadeje: Iae mae höjo röhu John-hu a bapataeto vaejövade hesi bëhoho aëro uvoröhego: Ëaribövioho uehoro sisëho vuonugo'i uehoro i'e baejël'ero ëhu'ëro ë'aruëjo. Röhu bapataeto vaejëvoromo uënövade höjo: Nasi ijore rueröhe aho rovego ë a hesi öroro mae uehorovorëjo. Ëhesi bëhoho Iesu mae uehorovo'iröhe jöho uëromo ë'ade höjo.

<sup>5</sup> Ëhi uëvamu hegoro ë Ephesus amo rajohuro Bada Iesuare ihoro bapataeto vaejareje.

<sup>6</sup> Bapataeto vaejamu Paul-ro öve simane taemëhamu God-are Aru'ahohuro jabesi dë vövöbajo'ere ro abuejadeje. Aru'ahohuro abueromo jabesi simanore ajëmiromo huotovëho'ego jöho bogo hejarue huë göëro göëro atonövo jöe God-aro baeromo huruoho majëhinövareje.

<sup>7</sup> Ae aho'obëhe 12 rabu'e jaburo ëhi jï'e muoho vaejareje.

<sup>8</sup> Ëhi'amu Paul-ro Jew rajehu God rajahijarue osare va'oromo biririvoromo ë ariböviohu'o jöe mevoromo jabesi uehoroho aho'o huotovëho'i ë'o gavadeje jaburo uvoröhego: Iae mae-ëjo. God-ro böröme namiromo ëhi muebejavuaje höjo. Ëhi'obe va'ojuvo manaere niö'i gemu barëjadeje.

<sup>9</sup> Manaere niö'i gemu barëjamu a ioro'iorohuro biriri'övoromo jöho bogo ejahoromo Badare mu öri hesi jöho ae aho'o jabesi nunire sisë'i atareje. Jöho sisë'i atamugo Paul-ro ri'öromo ë Jew rajehu God rajahijarue osare



aribövioho rëmo'li Keriso-are aribövioho sö ujuohoromo va'adeje. Va'oromo Tyrannus-hu jö majëhijaje osa börömore va'oromo majae ëhi Iesuare jöho jövonövadeje.

<sup>10</sup> Ëhi'obe va'ojuvo vadune niö'li barëjamu Asia sa'are raromarue ae aho'obëhe Jew rajohu'o sa'a ioro'ioro rajohu'o ëho jaburo Badare jöho hejareje.

*Sceva-are harihu ömo'ömehu sareri sareri ë'are jöhoje.*

<sup>11</sup> Ëhi'ë'ego God-ro Paul ajami'ego bogo gavarue darugo'e mu masijoho vaenövadeje.

<sup>12</sup> Mu masijoho vae'ego Paul-are sinore rëho'amade niögoho aëro ujuohoromo guomo guomo baejë'e aribövi jabesi örire va'ego jabesi guomoho barënövo Satan-are a sisë dëre jië'o'ho suorovo va'onövareje.

<sup>13</sup> Va'ego iae Jew rajo a ioro'iorëro sisë aribövi dëre jioruomajoho suorovo va'ojöro uvobe jijihonövareje. Jijihoromo ma-sarerivoromo Bada Iesuare ihoho uvo ganövareje surovoromo va'ojöro. Uvo garomo aru'aho sisëho uënövareje: Paul-hu majahujego hejarue aho Iesu ë a hesi ihore uëvaruëjo: A dëre jiarujoho surovoromo va'ohëjo.

<sup>14</sup> Jew rajo priest böröme gemu Sceva-are harihe 7 ëho jaburo ëhi jië'e sareri'e muoho vaejareje.

<sup>15</sup> Ëhi jië'e muoho vae'i ë ö ömo'ömo 7-ho jaburo aru'aho sisë hesi dëre abuejë'e ae gemu hesi osare va'areje. Va'oromo sarerivoromo Paul-are ihohu'o Iesuare ihohu'o ëma jöho majahiromo aru'aho sisëho sarerami'i ë'o gavareje. Sarerami'i ë'o garomo uavareje: Paul-hu majahuego hejarue aho Iesu ë a hesi ihore noro uavaruëjo: Ëa hesi dëre jianuoho höröromo va'ëjo. Höröromo va'ëjamu hejë'i rue aru'aho sisëhuro uëvadeje: Jemë Iesuare jöhu'o Paul-are jöhu'o majehijaruëjo. Iesu iae na gavaje höjo o Paul-are jöho iae na hejë'e jevajëjo. Röhu jemë rahumë jëvajëjo.

<sup>16</sup> Rahumë jëvajëjamu hejë'i aru'aho sisë dëre jië'e ahuro ri'öromo ë ö ömo'öme 7-ho darugo'o muo'amoromo jabesi darugoho ruahö'öjëhoromo jabesi niögoho jaho'amoromo ruruhö'öjëhamu dë'ahobatëremu ma-köemu jië'e hesi osare jioromo huruomoromo va'areje.

<sup>17</sup> Huruomoromo va'amu Jew rajohu'o sa'a ioro'ioro rajohu'o Ephesus raromaruohuro ë jöho heruomadeje. Heromo ae aho'obëhe juhuonibijiohamu Bada Iesuare ihoho ma-döro jiadeje.

<sup>18</sup> Ma-döro jiamu Iesu mae uehorovarue ae aho'obëhe mu sisë gö gö gurihiromo vaejaroho sama'e huruoho majëhijareje.

<sup>19</sup> Majëhiromo röhu ae gö gö urimo iro oso'e mu vaenövarohuro uvoruumadeje: Nosi iro oso'e muoho sisë hö uvoromo jabesi iro oso'e mu hesi suri surioho ujuoho rueromo gemuoro gagovoromo ae aho'o jabesi nunire vëniro huareje. Vëniro huoromo suri suri hesi manaho adahoromo gavareje ajivë'e ijo baje 50,000 ëhi vëniro ravë'e jiamu.

<sup>20</sup> Ëhu'ëro jië'ëro ae aho'obëhe Badare jöho hebe mae uehorovobe va'areje.

*Ephesus amo rajehu muorovo 'irögoro vörö 'iraeruomade jöhoje.*

<sup>21</sup> Ëhi'amu Paul-ro uehorovoromo uvadeje: Macedonia sa'are Greece sa'are juvo va'onugoromo evare ajiomoromo Jerusalem amore höröromo ë hi'ejöjo. Hiromo hujeji evare na Rome amoho va'o ga'ejöjo.

22 Ëhi uvonugoromo hu ajamijarue aho niö'i Timothy'o Erastus'o rëmö'öjëvamu Macedonia sa'are va'areje. Va'irögorovo huro Ephesus amore Asia sa'are ëhi hijadeje.

23 Hijamu evare aëro Badare öroho bijönimoromo iro muorovo'oho Ephesus amore vaejareje.

24 Ëhesi bëhoho ae gemu Demetrius-ro Ephesus hijadeje. Hu silver-ehu inömo avoho'amaje ae jiadeje. Silver-ehu inömo avoho'amaje aëro jië'ëro Artemis rajahijarue javu börömo hesi nu ano'o va'ëne inömo ininoho silver-ëro avohoromo imo'amonövadeje. Ëhesi bëhoho ë amo raje ae aho'obëhe sarerivoromo uvonövareje: Artemis aru'aho magonahe höromo rajahi'irögoro huni javu böröme vaejahareje. Vaejë'ëro ë javu hesi nu ano'o va'ënoho javu inino avohoromo imo'amarue muoho Demetrius-ro muebenövadeje. Muebe'ego hesi mu ajamarue aribövioho ijo bajo böröme baenövareje.

25 Ëhu'ëro jië'ëro Demetrius-ro hu ajamijarue ariböviohu'o ëhi jië'e mu vaejarue aribövi ioro'iorohu'o ëho jabuni jöe nugö'öromo uëvadeje: Gagovorovego no jöe ato'irarëjo. Ëhi uëvamu gemuoro gagovareje. Gagovamu uëvadeje: Ae aho'obëhe nasi jöho hehëjo. Jemë'o uehorovarujëjo. Noehu Artemis-are javu va'ëne inino avohoromo imo'amaruohuro ëhuro no ijo bajo bövie baejarue höjo.

26 Ijo bajo bövie baejarue höjo röhu ë a sisë Paul-hu diehi jië'e mu vaejajoho jemëro jemesi nunëro garomo jemesi hia'ëro hejaruje höjo. Huro uövuaje höjo: Aehu övehu avoho'amaje vörö'e inömoho ëho vörö rumo'e jio'amajëjo. Ëhi uöromo Ephesus amo rajohu'o Asia sa'a rajo ioro'iorohu'o jabesi simanoho huotovëhamu ae ma-vemino'e bogo e'i a'i ae aho'obëhe ëma sarerivoromo uvoruomë'e höjo: Paul jö mae jövajëjo.

27 Ëhi uehorovoromo nani jaburo uvoruomo'ajëjo: Noehu Artemis-are javu inino avohoromo imo'amaruoho mu sisë vaejarue höjo. Röhu gö'o ae aho'o jaburo nani uvoruomo'ajëjo: Artemis nosi aru'aho magonaho börömo hu rajahijarue javu börömoho iho rumo'e höjo. Ëaru'aho magonahoho ae aho'obëhe Asia sa'are sa'ae dinö'e dinö'e raromarue ariböviohuro hu gemu börömo bëhe rajahijarue höjo. Röhu jabumë Paul-are jö ejahë'ohuro ëhuro ijönöho ë magonahoho bogo börömoho uehorovo'iramu hesi ihoho bogojio'ajëjo.

28 Demetrius-ro ëhi uëvamu hegorovo ae aho'obëhe dë vörö'iraeromo mardarugo'o uvo'i arijareje: Ephesus nosi aru'aho magonahoho Artemis hu böröme höjo.

29 Ëhi uvo'i arijamu hegorovo ë amoho muorovo'i vörö'iraebe va'oruomadeje. Vörö'iraebe va'oromo ae aho'obëhe jaburo Macedonia raje ae niö'i Paul'o gemu mae jireharuoho jabesi ihoho Gaius'o Aristarchus'o ë ae niö'ioho gudumëvoromo hu'iraejëvoromo tutubijiohoromo jabuhu gagovarue öri ari'ere va'oromo gemuoro gagovorovareje.

30 Gagovorovamu Paul-ro ë öri ari'ere va'oromo ae aho'obëhe jabesi nunire namiromo jöe jövo'i nimamu gagorovo Keriso-are ariböviohuro ahoromo uavareje: Vuonugëjo.

31 Vuonugëjamu Asia sa'are a masijo ioro'iorohuro Paul mae uehorovë'ëro jöe nugö'öromo uavareje: Nadi ë öri ari'eroho va'ego ae aho'obëhe ja ga'irarëjo.

32 Ëhi'amu jö ataroho sisërëjamu gagovare hesi bëhoho ae ma-gemu gemu ga'i ae aho'o bogo gagoro ae göëro göëro jöe gö gö ëma mardarugo'o

uvoruomadeje.

<sup>33</sup> Uvoruomoromo a ioro'iorohuro gavare Jew rajëro Alexander nun-inö nugoruomamu gagorovo uvareje: Nani Alexander-are jöëni gagovare höjo. Gagovare höjamu Alexander-ro övëro tugohëvoromo hesi jöho hesi arijo'arije ajamirovoromo majëhi'i ë'o gavadeje.

<sup>34</sup> Majëhi'i ë'o gavamu rue ariböviohuro ae aho'obëhe gavare Alexander Artemis bogo ma uehorovaje aehu jio'li Jew raje jiamu gagorovo gemu mae uvemu uvareje: Ephesus nosi aru'aho magonahoho Artemis hu böröme höjo. Ëhi gemu uvo'li arijuvo 2 hours barëjadeje.

<sup>35</sup> 2 hours barëjamu amo rajo a böröme gemuëro ahëvo gabe va'oromo gavade jörumorae barëjamu gagorovo uëvadeje: Ephesus rajomë jemëro nasi jöho hehëjo. Ae aho'obëhe iae gavarue höjo Ephesus rajoho no aru'aho magonaho böröme Artemis-are osa muebejarue aribövie javuego. O hesi vörö'e munë ö'idöre jioromo beruvebijadoho muebejarue aribövie javuego.

<sup>36</sup> Aho ë jöho bogo aho'a'aruëjo. Ëhi jië'e jiaje nadi uehoro rumo'e muoho vae'li ma-sanuovorëjo.

<sup>37</sup> Ave ae niö'li ma-baejëvo rovarijoho jabumë bogo nosi aru'aho jabesi javu masijoroho va'oromo vajiohoho ujuohare höjo. Nosi aru'aho magonaho hesi jöho bogo sisë'ioho atare höjo.

<sup>38</sup> Ëhu'ëro jië'ëro Demetrius-hu o hesi mu ajamijarue ariböviehu ae gö jabesi jö sisë huruoho majëhi'i nimë'oho court vaejarue majae iae jiajëjo. Court vaejarue aribövie iae jioruomajëjo. Ëhuni ë va'oruomoromo jö sisëho majahirovo'aruëjo.

<sup>39</sup> Röhu jemë jöe gö jëvë'oho amo rajo a masijehu gemuore gagovoromo atarue majaho rovego evaro jemesi jöho bu'öjego jaburo heromo avoho mevëho'irarëjo.

<sup>40</sup> Naehu ëhi uëvaje hesi bëhoho noehu jaruvo vaejarue mu hesi jö hejë'oho nani ave sa'are a masijohuro no uö'a'aruëjo: Jemëro rabëni muorovo sisëho barovarije höjo. Ëhi uövuë'oho no rabu jöe mana majëhijöëni ma-hia'ëremu he'ëjarëjo.

<sup>41</sup> Ëhi uënugoromo uëvadeje: Iae barëjajëjo. Va'ohëjo.

## 20

*Paul-hu Macedonia sa'are va'oromo jö majëhibe juvoromo Greece sa'are va'ade jöhoje.*

<sup>1</sup> Iro muorovo'oho barëjamu gagorovo Paul-ro jöe nugö'öjadeje Keriso-are ariböviohuro gagovorovoröhego. Gagovorovamu ajëmiromo jögoroho bojëmiromo jejëmiromo Macedonia sa'are va'adeje.

<sup>2</sup> Macedonia va'oromo Christian aribövioho ajëmiromo jögore aho'o bojëmibe va'adeje. Va'onugoromo Greece sa'are rovadeje.

<sup>3</sup> Greece sa'are ro hijadoho manaere 3 barëjadeje. Manaere 3 barëjamu gagorovo Syria sa'are jovo döro va'ië'iro evare hejade uvavamu: Jew rajo ariböviohuro ja anago'li saginiëri jöe ataruë uvamu hegorovo uvadeje: Ëhi jië'oho na bogo jovo döroho va'li vuonorö'öromomo Macedonia örëro va'ëjjo.

<sup>4</sup> Ëhi uvamu Pyrrhus-are harihe Berea amo raje Sopater-ro Paul'o ë va'adeje. Röhu Thessalonica amo raje ae niö'li Aristarchus'o Secundus'o Derbe amo raje ae Gaius-ro Timothy-ro Asia sa'a raje ae niö'li Tychicus'o Trophimus'o ë aribövioho jaburo Paul'o gemu mae va'areje.

<sup>5</sup> Va'aroho jabumëro urimo Troas amore va'oromo raromoromo muebejavuareje no ijore va'oröhego.

<sup>6</sup> Muebejavuamu noro Philippi amore ariromo Jew rajehu I Dë Huaje Oso Rumo'e I ijarue majaho barëjumu evare boat-ëro baejavuoromo va'adoho majae övo gö mine barëjumu Troas amore ravo'amoromo no muebejavuarue aribövioho birohëvareje. Birohëvoromo ë raromaroho hurae gemu barëjadeje.

*Paul-hu Troas amore hiromo ë'ade jöhoje.*

<sup>7</sup> Hurae gemu barëjumu hura bise'ore vahiromamu gagorovo no gagovorovareje ie gemuoro ue'aho'irovo. Gagovorovamu gagorovo Paul-ro ë amo rajo aribövioho jöe majëhibe va'adoho vahi riri'e jiadeje sisonuvego va'oröhëro.

<sup>8</sup> Röhu ë javu döre osare noehu gagovarire ire aho'obëhe bue'amë'e jiadeje.

<sup>9</sup> Bue'amë'e jiamu iae a i'e gemu hesi ihe Eutyclus-ro döre ahë'e ojo arëtoe hijadeje. Hijamu Paul-ro jöho ma-jövemu jövobe va'amu gavë'i Eutyclus nunëhimobe va'ojuvo nunëhimamu niavamu döre jioromo amonö beva'adeje. Osa uhure ririre döre ëhi jiobe ajiomë'e döre javu hesi osare jioromo amonö beva'adeje. Beva'amu ruhe döre ariböviohuro abueromo banigojiomoromo gavareje mami'e guomë'e jiamu.

<sup>10</sup> Guomë'e jiamugo Paul-ro abueromo Eutyclus bu'ö taemoromo huohudëromo no uövuadeje: Nadi huë vavaenoho baehëjo. Hu bogo guomë'e iae hijajëjo.

<sup>11</sup> Ëhi uönugoromo ajiomoromo ie ato'atovoromo iromo ë aribövioho jöe majëhibe va'ojuvo va'o sisonuvadeje. Sisonuvamu gagorovo va'adeje.

<sup>12</sup> Röhu a i'oho bogo guomë'e hijamu gagorovo Keriso-are ariböviohuro hu bava'oromo huë mabëhe baejareje.

*Paul-hu Troas jioromo Miletus amore va'ade jöhoje.*

<sup>13</sup> Ëhi'amu iae Paul-ro uövuadeje: Jemëro urimo boat baeromo Assos amoro va'lego na ijore sa'aëro ö'iröjo jemë'o na'o ë jioromo boat-re gemu mae va'oröhe. Ëhi uövumugo boat-re va'areje.

<sup>14</sup> Va'oromo Assos rueromo Paul hu'irae baeromo jovo döremu va'onövojuvo va'o Mitylene amore rovarereje.

<sup>15</sup> Mitylene rovë'ëro nërö jovo döremu va'ojuvo Chios sa'a bëhire rovë'ëro nërö va'aroho Samos sa'are rovë'ëro nërö va'aroho Ephesus amoho iosirami va'oromo hujeji Miletus amore ë ro suorovareje.

<sup>16</sup> Ephesus amo iosiramijare hesi bëhoho Paul-ro ëhi iosirami'i nimadeje ëhuro bogo Asia sa'aroho ëgoho hi'i ma-burëro evare Jerusalem va'oromo eni jië'oho Pentecost majaho rovego Jerusalem höröröhëni.

*Paul-hu Ephesus ekaresia muebejëvarue a duvaho jabesi örire jögoru majëhijade jöhoje.*

<sup>17</sup> Miletus amore suorovoromo ë ravo'amoromo Paul-ro Ephesus amore jöe nugö'öjadeje ekaresia a duvahohuro ruvebiruomoröhego.

<sup>18</sup> Ruvebiruomamu uëvadeje: Naehu urimo Asia sa'are rovodevare evare naehu diehi diehi mu vaebe rovodoho jemë iae uehorovarujëjo.

<sup>19</sup> Jew rajëro ijumevo'i ato'i ari'lego na huë vavaene baeromo nivë'i bogo döroho bamorovo'i ma-taemo hiromo Badare muohuremu vaejahonövode höjo.

<sup>20</sup> Jemë ajëmi'irode jöho na bogo subivëho'i ekaresiae ae aho'obëhe jemesi nunire ekaresiae ae gemu gemu jemesi osare osare jöho majëhi barëromo öroho röjëhi barënövode höjo.

<sup>21</sup> Jew rajohu'o sa'a ioro'ioro rajohu'o jemesi örire darugo'o majëhiromo uënövode höjo: Jemëhu öri sisëre jijiharujoho vuonugo'i God-are öroro jijihoromo nosi Bada Iesu mae uehorovorëjo.

<sup>22</sup> Röhu avehu'o hehëjo. Avevejö'oho God-are Aru'ahohuro ue'ego na Jerusalem va'ajëjo. Va'o höröjego diehi'evoruomoröhoho na bogo gavajëjo.

<sup>23</sup> Na aviëhi jië'e muohuremu gavajëjo. Ame göre göre hibe rue'ego God-are Aru'ahohuro uebe ruehijajo: Ja Jerusalem hörö'iramu savoji gagore ba'amavo'iramu huë vavaene gö gö bae'a'anuëjo.

<sup>24</sup> Èhi uevade höjo röhu na nasi sinohunioho bogo uehorovaje höjo ëhuro Bada Iesuhu bojemade muoho aho'o vae barë'irodëni. Èmu hesi bëhoho God-hu no huë baejavuoromo ajamuijaje jöho a majëhibe juvo'irodoho höjo.

<sup>25</sup> God-hu böröme namiromo muebejavuaje jöho ae aho'o jemesirire jövobe juvë'e jevajëjo. Röhu iae na gavajëjo. Ijonöho ae gemu vadu'oho na bogo ge'a'arujëjo.

<sup>26</sup> Èhuni avevejö'oho naro darugo'o majëhiromo uëvajëjo: Jemë ae gö gö sisëre va'ë'oho ëho bogo nasi sisëhu höjo.

<sup>27</sup> Èhesi bëhoho rabëni God-hu uvaje jöho na bogo subivëho'i na majëhi barëjë'e jevajëjo.

<sup>28</sup> Jemesi dë vövöbajo'oho mueberovorëjo. O God-are Aru'ahuhu jemë bojëmijade aribövioho aho'o muebejëvorëjo. Èaribövioho God-are sheep-nö'e jio'amajëjo. Hu hesi Harihu mae nugö'öjamu guomadohuro ëhuro jabumë hesi baejëvade höjo. Èhuni hesi ekaresiaho sheep-nö'e mio'amoromo muebejëvorëjo.

<sup>29</sup> Èhesi bëhoho na gavajoho na va'iramu vörö'e miehu rueromo sheep ijumo'amaruëhi a sisë göëro göëro jemesirire rueromo sareri sareri'e jöho majëhiromo ekaresia jemesi uehoroho ijumëho'aruëjo.

<sup>30</sup> Röhu gö'o jemesi a ioro'iorohuro ri'öromo sareri sareri'e jöho ato'a'aruëjo Keriso-are aribövioho jemëro jabetesinö va'irarijego.

<sup>31</sup> Èhuni gavë'i raromorëjo. Uvorëjo: Nöröro muoho bogo vuonugo'i majae jene vahie vö'öe sisone huë vavaene baeromo nivë'i no ae gemu gemu röjahuibe ruejuvo vadune aho'obëhe 3 barëjade höjo.

<sup>32</sup> Röhu jaruvoho na negajëjo God-ro jemë muebejëvego huhu no huë baejavuoromo ajamuaje jöho jemëro uehorovego ma-mae jëvoröhego. Jemëhu hesi jö uehorovë'oho ëhuro jemëro biririvobe va'oromo God mae uehorovo'iramu God-hu hesi aribövie aho'o mae avohavujajëhi jemë'o ëhi avohëvo'ajëjo.

<sup>33</sup> Röhu jemesi ijo bajënioho niögënioho na bogo ganiganiegade höjo.

<sup>34</sup> A'i jemë'o iae gavarujëjo na'o nasi ariböviohu'o no huë vavaene javuadoho ave nasi övohuro muoho vaeromo hesi manaho baeromo ëhuro bövioho bise'oho ujuohonövode höjo.

<sup>35</sup> Muoho ëhi vaeromo ëhuro naro jemë röjëhijode höjo jemëro garomo uvo'irarijego: Mu rabe rabe rovë'oho Paul-hu ë'adëhi no'o ëhi biririvoromo muoho vaeromo ëhuro darugo u'uhë'e aribövioho ajëminövö'ëjarëjo. Uehorovoromo uvorëjo: Bada Iesuro huro hesi uövuade höjo: Suvuoro ma-baejë'oho ja ma-bisemu vuëvavo'ajëjo. A'i suvuorëmijë'ohuro ëhuro vuëvavo avoho'ajëjo.

<sup>36</sup> Paul-ro ëhi uëngoromo a duvahoho aho'o jabu'o gemu mae ague aho hiromo God-are örire jöe jövadeje.

<sup>37</sup> Jöe jövamu jabumë aho'obëhe nierusuburu'e bamë'i Paul guduamoromo dudöhoromo jejamareje.

<sup>38</sup> Uvareje: Huë vavaeni jö gö hejaroho ma-jianovo'i a'i noehu ijönö hu bogo ga'iröhe jöho ëho börömoho hörömo sisë maro vavaenimareje. Ëhi'oromo Paul boat-re hu'irae bava'areje.

## 21

### *Paul-hu Jerusalem va'ade jöhoje.*

<sup>1</sup> Hu'irae bava'amu Paul'o no'o boat-re iojiomoromo Ephesus aribövioho ë rëmo'i va'areje. Jovo döremu va'onövojuvo ahörirëro va'aroho va'o Cos sa'are rovareje. Rovë'ëro nërö va'aroho Rhodes sa'are rova'aroho va'o Patara amore ë suorovareje.

<sup>2</sup> Patara amore suorovonugoromo gavare boat göho Phoenicia sa'are va'i ë namijamu gagorovo noehu rovare boat-oho vuonugo'i ë boat gagore iojiomoromo va'areje.

<sup>3</sup> Va'aroho gavare Cyprus sa'aho arue nosi övo adonö jiamu iosiramiro mo viëhi rova'aroho Syria sa'are rueromo Tyre amore ravo'amareje jabumëro inömo inöme suovo bahi'iro.

<sup>4</sup> Ravo'amoromo noro Keriso-are aribövioho nahëvojuvo birohëvoromo jabu'o raromamu hurae gemu barëjadeje. Jabu'o raromamu God-are Aru'ahohuro ë Keriso-are a jabesi örire uehore bojëmi'ego Paul uanövareje: Jerusalem bogave va'iranëjo.

<sup>5</sup> Ëhi uavamu noro jabu'o raromoromo nosi majaho barëjamu ri'örom o va'areje. Valia'amugo rue Keriso-are aribövioho ae aho'obëhe jabesi vaborohu'o aboji harihu'ohu'o no sö ujuohavuoromo amore jioromo va'areje. Va'oromo sö jovo riröre jabu'o no'o ague aho raromoromo God-are örire jöe atareje.

<sup>6</sup> Atonugoromo göëro göho jejamirovonugoromo noro boat gagore iojiomo'i jaburo vuonorö'ö amëro va'areje.

<sup>7</sup> Va'iro noro Tyre amoho vuonugo'i boat-re va'aroho va'o Ptolemais amore ro ravo'amareje. Ravo'amoromo Christian aganoho jejëmirom o jabu'o majae gemu raromareje.

<sup>8</sup> Majae gemu raromë'ëro nërö noro ri'örom o va'aroho va'o Caesarea amore suorovareje. Suorovonugoromo Iesuare jö ma majëhijaje ae Philip-are osare va'oromo ë raromareje. Ëaho Philip urimë'i Jerusalem ekare-siahuro hu'o a ioro'iorohu'o 6 ëhi baejëvareje ijo bajo a suvuorëmi'iröhe muoho muebenövo'iröhego.

<sup>9</sup> Röhu Philip-are abojoho aho'o 4 jaburo bogo masuvë'ëro jöho God-aro baeromo ae huruoho majëhinövareje.

<sup>10</sup> No majae gemu niö'i Philip'o gemu mae raromamu ae gemuëro Judea sa'are jioromo ruvebijadeje. Hesi ihoho Agabus jadeje. Hu jö God-aro baeromo ae huruoho majëhijaje aëro jië'ëro

<sup>11</sup> ri'örom o Paul-are götaho jijövahonugoromo baeromo hesi övo hörü'oho tövorovo'amadeje. Tövorovoromo Paul uavadeje: God-are Aru'ahohuro uvavohijajo: Ave göta arijo'ohuro Jerusalem ajiomo'iramu gagorovo Jew rajohuro ë aho ëhi tövonugoromo sa'a ioro'ioro rajo jabesi övore bojëmi'aruëjo.

<sup>12</sup> Agabus-ro jöho ëhi majahijamu hegorovo ë amore Christian ariböviohu'o no'o Paul dinamiro mo ual'i arijareje: Ëhi jië'oho bogave Jerusalem ajiomo'iranëjo.

<sup>13</sup> Bogave ajiomo'iranëjamu Paul-ro uövuadeje: Jemë rabëni nierusuburu'e bamoromo nasi uehoroho aheho'ego na huë vavaenoho baejajëjo. Ëhi jië'oho vuonugohëjo. Naehu Jerusalem ajiomo'iramu Bada Iesuare jöhuni

tövavo'aruë uevarujoho iae eni jiajêjo. O anegamu guomevë'oho êhu'o iae eni jiajêjo.

<sup>14</sup> Êhi uövuamu noro gavare bogo ejahuamu gagorovo dinamijaroho vuonugo'i uavareje: Êhi jië'oho no naguajêjo Badahu nimaje muoho jioröhego.

<sup>15</sup> Êhi'amu gagorovo inömo inömoho avohoromo Jerusalem amore iojiomoiro ë'areje.

<sup>16</sup> Iojiomoi'irögoro Caesarea amo rajo Keriso-are a ioro'iorohuro söjavuo va'oromo a ihe Mnason-are osare rovareje noro hu'o raromoi'iröhego. Röhu Mnason hu Cyprus sa'a raje jiadeje. Hu mami gö'e aevoromo Keriso mae uehorovadeje.

*Paul-hu Jerusalem ajiomoromo ekaresia muebejêvaje ae James ga'i va'ade jöhoje.*

<sup>17</sup> Iojiomoromo Jerusalem suorovamu nosi Christian ö mueno'ohuro jabesi dë vövöbajo'e aho'o jejamuijareje.

<sup>18</sup> Jejamuijê'ëro nêrö Paul-ro no'o gemu mae James ga'i va'adeje. Va'oromo gavadeje ekaresia a duvahoho aho'obêhe jaburo James'o gemuore raromoruomamu.

<sup>19</sup> Raromamu gëgorovo Paul-ro jejëmijadeje. Jejëmiromo uëvadeje: Naehu Keriso-are jö majêhibe juvodohuro êhuro God-ro sa'a ioro'ioro rajoho êhi êhi ajëmijade höjo. Êhi jië'e jöho Paul-ro majêhi barëjjadeje.

<sup>20</sup> Majêhijamu hegorovo rueho jaburo God rajahijareje. Rajahiromo Paul uavareje: Öho röhu Jerusalem amoroho diehi jiego ja gavanue höjo. Êhesi bêhoho Jew raje ae aho'obêhe Iesu mae uehorovarue höjo. Mae uehorovoromo röhu jabumë ae aho'o Moses-are jögoroho nimo avoharue höjo.

<sup>21</sup> Moses-are jögoru nimaruohe hejare höjo sareri'e jöho uvavamu: Paul jero sa'a göre göre va'oromo Jew rajoho aho'obêhe jöe bojëmibe juvoromo uëvanue höjo: Moses-are jögoroho vuonugohêjo. Moses-are jöho vuonugoromo jemesi harihu jabesi sino tarivêharujoho vuonugoromo Jew rajo nosi mu ioro'iorohu'o vuonugohêjo.

<sup>22</sup> Jaehu êhi majêhijane sareri jö ave raromarue aribövioho hejaroho he'a'aruêjo uvavo'iramu: Jero Jerusalem rovane höjo. Êhuni ja diehi'oromo Jew rajoho röjêhi'iramu garomo uvoruomo'ajêjo: No sareri jöe hejare höjo. Moses-are jögoroho ja bogo vuonugê'e javajêjo.

<sup>23</sup> Jaehu diehi ë'irane jöho no ua'ië'aruêjo. Ae aho'o 4 jabu no'o raromaruêjo. Iae urimo ë ariböviohuro Jew rajo nosi muoho aevoromo vaeromo God uavare höjo: God jasi nunëro jero gö'ëgo no muoho êhi êhi vae'ëjarêjo.

<sup>24</sup> Jabumë êhi jië'e Jew rajo muoho vaejê'e jioruomaje êhuni jero jabumë söjêvo va'oromo ajëmiromo jabu'o gemu mae bimuvoromo sisë barëjêho'iröhe muoho vaeromo eni jiego ë ae 4 jabesi jöëni monie bojëmego mie imoromo God-ni suvuore bahijahego êhuro jabesi simano uoho tarijêho'irarêjo. Jaehu êhi Jew rajo mu ajëmiromo vaejê'ohe êhuro Jew raje Christian ae aho'obêhe ja garomo uehorovoromo uvoruomo'ajêjo: Paul jaehu Moses-are jögoru vuonugane jö hejaroho êho ma-sareri'e jöe höjo. A'i Moses-hu uövuade jöho iae ja ejahê'e hijanue höjo. Jabumëro êhi uvoruomo'ajêjo.

<sup>25</sup> Iae Jew raje noro Moses-are jöho êhi ma'ëno'ëjarêjo. Röhu sa'a ioro'ioro raje Iesu mae uehorovarue ariböviohuni urimë'i noro jöe gö uehorovoromo

jajivoromo nugö'öromo uëvare höjo: Aehu sareri'e god göëni göëni bahijë'e mioho nadi ue'ahorëjo. Mi hesi köho nadi ue'ahorëjo. Huë ahahë'e mioho kö'e jiaje nadi ue'ahorëjo. Nadi önö'oho jijihorëjo.

<sup>26</sup> Ëhi uavamu hegorovo Paul-ro ejëhë'ëro nërö ë Jew raje ae 4-ho söljëvo va'oromo ajëmiromo jabu'o gemu mae Jew rajo muoho vaejadeje jabesi sisëho barë'iröhego. Ëhi'onugoromo Paul-ro God-are osa börömore va'oromo priest aribövioho uëvadeje: Majae ëmino'e barë'iramu evare ë ae 4 jabesi o nasi sisëho barë'ajëjo. Barë'iramu evare ae gemu gemu nosi jöhuni God-ni mi suvuore bahi'ëjarëjo.

*Paul-hu God-are osa börömore hijamu Jew rajehu guduamo bava'oruomade jöhoje.*

<sup>27</sup> Paul-ro ëhi majëhijamu va'o huhu uëvade majae 7 barë'ië'adeje. Barë'ia'amu evare Asia sa'are jioromo rovare Jew rajo a ioro'iorohuro gavareje Paul God-are osa börömore jiamu. Paul osa börömore jiamu gagorovo ri'öromo iro muorovo'e vae'iro jöe darugo'o atamu ae aho'obëhe heromo uehoro sisë baeruomadeje. Uehoro sisë baeruomamu Asia jioromo rovare ariböviohuro Paul guduamareje.

<sup>28</sup> Guduamoromo ma-darugo'o uvareje: Israel rajoho jemëro ro aja-muihëjo. A sisëho aviae höjo. Huro Jew rajo nosi ihoho Moses-are jögoroho ave God-are amo börömohe ë hesi jöho ijumo'amoromo ae aho'o jabesi örire sisë'i röjëhibe sa'ae dinö'e dinö'e juvaje höjo. Jaruvoho huro sa'a gö rajo aho söromo ave God-are osare rovamu ëhuro osa maho ijumë'e höjo. Ëmu sisëhu'o ë'ë'e höjo.

<sup>29</sup> Ëhi uvare hesi bëhoho urimo jaburo gavare Ephesus amo rajo ae Trophimus Paul'o gemu mae Jerusalem jiamu gavë'ëro uvareje: Nani Paul-ro God-are osare hu barovë'e höromo ëhuni darugo'o uvareje: Paul-ro sa'a gö rajo ae aviae barovë'e höjo.

<sup>30</sup> Ëhi uvamu hegorovo Jerusalem amo raje ae aho'obëhe ri'öromo vörö'iraeromo tutubijiohoromo gemuoro gagovoromo Paul God-are osare jiamu guduamo bava'areje. Bava'amu gavë'i God-are javuoho ojoho tugoho'amareje.

<sup>31</sup> Tugoho'amamu ae aho'obëhe jaburo Paul guomojöro ano'ia'amu gavë'i aëro jöe bava'oromo Rome muorovo a börömohe uavareje: Jerusalem muorovo'irögoro ë'oruomajëjo.

<sup>32</sup> Muorovo'irögoro ë'aruëjamu hejë'i rue muorovo a börömohe hesi bëhire muorovo simano vaejarue ariböviohu'o muorovo a ioro'iorohu'o söljëvoromo ma-burëro tutuvo ruvebijadeje muorovo'i ë'aruoho ahëvo'i. Ruvebijamu ae aho'obëhe gavare muorovo a börömohe muorovo a ioro'iorohu'o rovamu gëgoro Paul anaroho vuonugareje.

<sup>33</sup> Vuonugamu muorovo a börömohe rueromo Paul guduamoromo ae uëvadeje: Ö'e niö'i barueromo tövohë uëvamu tövareje. Tövamu gagorovo muorovo a börömohe uëvadeje: Ave aho rahuo höjo. Rabe ë'ego ëhuni anarujëjo.

<sup>34</sup> Anarujëjamu ae aho'obëhe ri'öromo jöe gö gö mana ma-darugo'o uvoruomadeje. Amo ëhu'ëro jöjöje böröme jiamu a börömohe Paul-are jöho bogo avoho hejadeje. Bogo avoho hejë'ëro hesi aribövioho uëvadeje: Ave aho hu'iraeromo aruhe muorovo a nosi osaro iojiomohëjo.

<sup>35-36</sup> Iojiomohëjamu hu'irae bava'oromo vuahure iojiomo'irögoro gavare ae aho'obëhe vörö'iraeromo gemuoro tatijiomobe Paul anojöro uvobe ijore jijihoruomamu gëgorovo Paul döro nigemo baeromo iojiomareje.



*Paul-hu ae aho'obēhe jabesi nunire namiromo hesi arijo'arije ajamirovoromo jō majēhijade jōhoje.*

<sup>37</sup> Iojiomoromo muorovo osare bava'ia'amu gagorovo Paul-ro a bōrōmoho uavadeje: Naehu jasi ōrire jō majahijē'o ho na mae hōjo. Na mae hōjamu rue a bōrōmohuro uavadeje: O-ajo. Ja Greece a jabesi jōero jōvanuējo.

<sup>38</sup> Naro uvode hōjo: Ja Egypt sa'a rajo ae javajējo. Na uehorovoromo uvode hōjo: Jero urimē'i muorovo jōho barueromo vōrō'e aribōvioho 4,000 gagovoromo a rumo'e sa'are sō va'ane hōjo Rome a masijohu'o muorovo'iro. Ja ē aho javajē uvode hōjo rōhu nani ja ae gō javajējo.

<sup>39</sup> Javajējamu Paul-ro uavadeje: Io'ajo. Na Jew raje jevajējo. Cilicia sa'are Tarsus amore rahevade hōjo. Nasi amo hesi ihoho bōrōme hōjo. Rōhu na negajējo jero uevego na ae aho'obēhe jabesi ōrire jō harihe majēhi'iro.

<sup>40</sup> Ēhi uavamumu rue a bōrōmohuro Paul uavadeje: Iae mae hōjo. Jōho jōvējo. Jōvējamu hegorovo Paul-ro vuahure namiromo ae aho'obēhe ōvōro tugohēvadeje. Tugohēvoromo jōrumoraejamu jabesi Hebrew jōero majēhijadeje.

## 22

<sup>1</sup> Majēhiromu uēvadeje: Nasi a duvahohu'o ō mueno'o ioro'iorohu'o nasi jō harihu majēhi'iē'ajoho hehējo. Na mu sisē rabe rabe bogo ōmē'ēro i'uoho bogo bae'irodēro ē hesi jōho majēhi'iē'ajējo.

<sup>2</sup> Majēhi'iē'ajējamu ae aho'obēhe urimo jō vuonugaroho hejare Paul-ro jabesi Hebrew jōero majēhijavamu hegorovo jōrumorae barējareje. Jōrumorae barējamu Paul-ro uēvadeje:

<sup>3</sup> Na Jew rajo ae jevajējo. Cilicia sa'are Tarsus amore rahevē'ēro Jerusalem rovode hōjo. Rovamu Gamaliel-ro rōjehijamu Jew rajo muoho hebe rovode hōjo. Nosi hijo miono'ehu rōjahuibe rovere jōgorohuremu he avohoromo jemēhu God-are muemu uehorovarujēhi na'o ēhi gemuoho uehorovonōvode hōjo.

<sup>4</sup> Ēhi gemuoho uehorovoromo ganōvode aēro Iesuare ōrire jijihō'ego gēgorovo huē sisē bojēminōvode hōjo. O aēro jabu muo'amego vuovēvojōro uēnōvode hōjo. Aho magonahoho guduamo'amoromo savoji gagore io'amonōvode hōjo.

<sup>5</sup> Priest bōrōmohu'o Jew rajo a masijo ioro'ioroho aho'o nasi muoho gavē'ēro jemē uē'a'aruējo: Nōrōro mae uēvajējo. Ēhesi bēhoho urimē'i ē a masijoho jaburo Christian a guduamo'amo'irode jō'e suri surioho i'imemijare hōjo naro Damascus amore ujuoho va'oromo Jew rajo nosi ō ōmo'ōmoho i'imēmi'irodego. I'imemamu naro ujuohoromo ē va'ode hōjo Christian aribōvioho guduamoromo tōvo ujuohoromo Jerusalem vuonorō'ō rovego i'ue baerumorōhego.

*Paul-hu aevoromo Keriso mae uehorovade jō majēhijade jōhoje.*

<sup>6</sup> Ōrire va'ojuvo maja ririre jiamu Damascus amore hōrō'i gavodeje aji bōrōmoho ma-majioho ō'idōre jioromo ruvebiromu ajivevamu.

<sup>7</sup> Ajivevamu gavē'i sa'are behumorovoromo hejodeje uevavamu: Asē'e Saul ja rabēni na sisē vaejevanue hōjo.

<sup>8</sup> Sisē vaejevanue hōjamu uavode hōjo: Bada ja rahuo javajējo. Rahuo javajējamu uevade hōjo: Na Nazareth rajoho Iesu jaehu sisē vaejevanue aho jevajējo.

<sup>9</sup> Ēhi uevamu na'o jijihare aribōviohuro ajohemu ga'i huēho bogo hejare hōjo. A'i naremuēremu huēho hejode hōjo.

<sup>10</sup> Heromo uavode höjo: Bada na diehi ë'ejöjo. Diehi ë'ejöjamu uevade höjo: Ri'öromo va'oromo rue Damascus amoro hinëjo. Hiromo jaehu vae'irane mu God-hu uvadoho aho'o he'a'anuejo.

<sup>11</sup> Ehi uevamu aji börömoho gavë'ëro nasi nunoho sue'iraejehade höjo. Nunoho sue'iraejehamu nasi ariböviohuro övore ma'eno baejevo va'oromo Damascus amore suorovare höjo.

<sup>12</sup> Röhu ë amore ae gemu hesi ihe Ananias hijë'e jiade höjo. Hu Jew rajo nosi jögoroho avoho eromo God rajahijaje aëro jië'ëro Jew raje Damascus raromarue aho aho'obëhe jaburo hesi jöho mae uehorovare höjo.

<sup>13</sup> Eäho Ananias-ro rueromo bëhire namiromo uevade höjo: Öho Saul nunoho dadovahego röhu maho avoho uherihëjo. Uherihëjamu gavë'i nunoho ma-burëro dadovehamu hu gavode höjo.

<sup>14</sup> Gavamu uevade höjo: God nosi hijo miono'e muebejevobe rovade ahuro ja baejavade höjo jero huhu nimaje muoho baeromo hesi A Maho nunëro garomo A Ma hesi huëho he'iranego.

<sup>15</sup> Ehesi bëhoho hesi jö majëhijanue ae javo'ajëjo jaehu garomo hejane jöho ma-maemu majëhijego ae aho'obëhe heruomo'iröhego.

<sup>16</sup> Röhu rabëni gö'oho muebenëjo. Ri'öromo bapataeto vaeromo Badare ihoho uvego jasi sisëho u'ovaho'irajo.

*God-hu Paul uavamu Jew rajo jabesi sa'are bogo a'i sa'a ioro'ioro rajo jabesi sa'are va'oromo ajëmade jö Paul-hu majëhijadohoje.*

<sup>17</sup> Ehi'lamu naro vuonorö'öromo Jerusalem rovode höjo. Rueromo God-are osa börömore va'oromo hesi örire jöe jövoromo nia'ovonö'e gavode höjo

<sup>18</sup> Bada Iesuro ro uevamu: Ma-burëro Jerusalem amoho vuonugo'i va'ëjo. Ehesi bëhoho jaehu nasi jö majëhijë'oho ave amo rajoho bijönëgo'ajëjo.

<sup>19</sup> Bijönëgo'ajëjamu uavode höjo: Iae mae höjo röhu naehu diehi jië'e mu vaenövodoho ave ariböviohuro iae mae gavarue höjo. Naro Jew rajehu God rajahijarue osare osare va'oromo ja mae uehorovavarue aribövioho guduamo ujuoho va'oromo savoji gagore io'amonövo hisuebijëvonövode höjo.

<sup>20</sup> O aëro jasi jö majëhijaje ae Stephen anamu gagorovo na ë jevë'ëro uvode höjo: Jabuhu Stephen anaruoho iae mae ë'aruëromo jabesi niögu jövo bahijaroho muebejëhode höjo. Ejöho ave ariböviohuro iae mae gavarue höjo.

<sup>21</sup> Mae gavarue höjamu Badaro uevade höjo: O va'ëjo. Naro öre ëgoböviro ramö'ö'ejöjo jero sa'a ioro'ioro rajoho nasi jöho majëhi'iranego.

<sup>22</sup> Paul-ro ehi majëhijamu ae aho'obëhe hebe rueruomë'ëro hejare uëvavamu: Sa'a ioro'ioro rajoho majëhi'iranego ramö'ö'ejö uëvamu hegorovo hejaroho vuonugo'i vörö'iraeromo ma-darugo'o uvo'i arijareje: Eäho anohëjo. Huhu ave sa'are hijajoho sisë höjo.

<sup>23</sup> Ehi ma-darugo'o uvoruomë'i niögoho jövoromo hijiohijiovë'i tohotohoho döro ruruhö'ö'i arijareje.

<sup>24</sup> Ruruhö'ö'i arijamu gagorovo rue muorovo a börömohuro hesi aribövioho uëvadeje: Jemëro ave iahe nosi osahuro hu'irae bava'oromo hesi dëho bijioho ga'i hisuebiromo uarëjo: Rabëni anagöjoro uvaruëjo.

<sup>25</sup> Uvaruëjamu Paul osare bava'oromo hisuebi'irögorovo tövamu Paul-ro gavade a börömo ajamiromo mu simane vaejaje ae gemu aruëre namijamu gagorovo uavadeje: Na Rome raje jevajëjo. Röhu bogo court vaejevë'e ëma hisuebijevo'iro ë'aruëjo. Rome rajo nosi jögoroho bogo ehioho höjo. Ehi jië'oho jemë rabëni ëma hisuebijevo'ië'aruëjo.

26 Ëhi uavamu hejë'i rue simano vaejaje ahuro va'oromo muorovo a börömoho uavadeje: Ja rabë'i ë'anuëjo. Ëaho Rome raje höjo.

27 Ëhi uavamu hegorovo rue a börömohuro rueromo Paul uavadeje: Uevego na hejëjo. Na ja Rome raje javajëjo. Javajëjamu Paul-ro uavadeje: Io'ajo.

28 Io'ajamu a börömohuro uavadeje: Naro moni böröme bu'öjè'ëro ëhu'ëro na Rome raje jevajëjo. Jevajëjamu Paul-ro uavadeje: Röhu na monioho bogo bojëmi'i a'i nasi vëmu vavu'ohuro baejevamu evare na Rome raje jevade höjo.

29 Ëhi uavamu hejë'i evare Paul hisuebijë'i ua ga'ië'are ariböviohuro huruomo va'o rori'o riravareje. Rori'o riravamu rue a börömohuro uehorovoromo uvadeje: Rome raje tövë'e jevajëromo juhuonivadeje.

*Paul Jew rajo a masijo jabesi nunire namijade jöhoje.*

30 Muorovo a börömohuro juhuonivë'ëro nërö uvadeje: Nume Jew rajo ariböviohuro Paul-are jöho rabu jö sisë majahui'ië'aruëromo ae gö uëvadeje: Paul tövare ö'oho jiovahohë'i ae gö uëvadeje: Abueromo uëvego Jew rajo priest masijohu'o Jew rajo masijo ioro'iorohu'o gagovorego na jabesi jöho he'iröjo. Ëhi ë'ë'ëro Paul hu'irae ba'obueromo Jew rajo a masijo jabesi nunire nugadeje.

## 23

1 Jew rajo a masijo jabesi nunire nugamu Paul-ro gö avohoromo uëvadeje: Aganomë God-are nunire na sa'are hiromu rabe rabe ë'obe rovodoho na nasi herovajoho na ma-mae jevajëjo.

2 Ma-mae jevajëjamu hegorovo priest böröme Ananias-ro Paul-are bëhire riravare aribövioho uëvadeje: Paul jö'oro anohëjo.

3 Anohëjamu hegorovo Paul-ro ri'öromo priest börömoho uavadeje: God-ro ja'o anago'ajëjo döhemu ajivavë'e aego. Ja aviae hijanuëjo mevoromo ga'iranëro na nosi jögoroho mae ejë'e jevego o bogo ejë'e jevego. Röhu jero ë jögoroho ahoromo uëvanuëjo: Paul anohëjo.

4 Paul anohëjamu Paul-are bëhire riravare ariböviohuro Paul uavareje: Asë'e jero God-are priest börömoho aganuëjo.

5 Aganuëjamu Paul-ro uëvadeje: Aganomë naro uvode höjo: Ëaho bogo priest börömehu höromo jövode höjo. Na uehorovo'ibejëjo na bogo ëhioho jövo'ibejëjo. Ëhesi bëhoho God-are surire jöho jajivoromo ëhi uövuë'e höjo: Jasi aribövi muebejëvaje aho nadi agonëjo.

6 Ëhi uënuogoromo Paul-ro gavade ë a masijo ioro'ioroho Sadducee aribövie jioruomoi a ioro'ioroho Pharisee aribövie jioruomamu gëgorovo ë a masijo jabesi nunire ma-darugo'o uëvadeje: Aganomë na Pharisee ae jevajëjo. Nasi vëmu vavu'oho Pharisee aribövie jëvade höjo. Na court-re namijaje hesi bëhoho Pharisee aribövi noehu uehorovaruëhi naro ëhi uehorovoromo uvaje höjo: Vuovë'e ariböviohuro i'ovoromo röhu maho ri'öruomo'ajëjo.

7 Ëhi uëvamu hejë'i Pharisee ariböviohu'o Sadducee ariböviohu'o irovoromo uehore gö gö baeruomadeje.

8 Uehore gö gö baeruomade hesi bëhoho Sadducee ariböviohuro uvoruomajeje: Vuovë'e aribövioho bogo i'ovo'aruëjo. O anerahu'o aru'aho ioro'iorohu'o bogohöjo. A'i Pharisee ariböviohuro uvoruomajeje: Vuovë'e aribövioho iae i'ovo'aruëjo. Anerahu'o aru'aho ioro'iorohu'o iae jioruomajëjo. Iae ëhuni Sadducee ariböviohu'o Pharisee ariböviohu'o Paul-are jöho heromo irovareje.

<sup>9</sup> Irovoromo darugo'o uvobe rueromo Jew rajo jabesi jögoru öri röjehijarue ahuro Pharisee aëro jëvë'ëro ri'öromoma ma-darugo'o uëvareje: No gavaruoho ave aho sisë rumo'e ae höjo. Nani mae-ëjo. Nani aneraëro o aru'aho göëro hesi örire jöe majahijë'ëro jövajëjo.

<sup>10</sup> Ëhi uënuogoromo irovoromo börömo bëhe vörö'iraeruomamu gëgorovo rue muorovo a börömhuro juhuonivadeje Jew rajohuro Paul-are övore duruajore ruhamirovego tariorovojöeni. Juhuonivoromo va'lo hesi muorovo aribövioho uëvadeje: Abo nume ae aho'obëhe jiaruoro ëhuro Paul baeniëhiromoma hu'irae ba'ojiomoromoma muorovo a nosi osaro nugorëjo.

<sup>11</sup> Ëhi'amu vahiromoma gagorovo Badaro rueromo Paul-are bëhire namiromoma uavadeje: Nadi juhuonivo'i ma-biririvoromoma hinëjo. Ja nasi jö Jerusalem ma-mae majëhijanëhi Rome amoho ëhu'lo va'oromoma nasi jöho ëhi ma-maemoma majëhi'anuejo.

*Jew rajo ae göehu göehu Paul ano'i uvoruomade jöhoje.*

<sup>12</sup> Ëhi uavë'ëro sisonuvamoma gagorovo Jew rajo ariböviohuro gagovoromoma jöe atoromoma uarovareje: God-ro gö'ëgo no ioho jovoho bogoma i'ëjarëjo hujeji Paul anogoro evare iröhëro.

<sup>13</sup> Ëhi uarovare aribövioho ae aho'obëhe 40 iosirëmiromoma ruëhi jiadeje.

<sup>14</sup> Ëhi uarovoromoma va'oromoma priest masijohu'lo a duvaho ioro'iorohu'lo uëvareje: Noro darugo'e jöe atoromoma uarovare höjo: God-ro gö'ëgo no ioho jovoho bogoma i'ëjarëjo hujeji Paul anogoro evare iröhëro.

<sup>15</sup> Ëhuni ave muoho vaenëjo. Jemë'lo Jew rajo nosi a masijo ioro'iorohu'lo Rome muoromoma a börömhuni jöho nugö'öromoma sareramimomoma uarëjo: Paul röhu maho hu'irae baruvebijego jö mevarue ariböviohuro hesi jöho he avoho'irarëjo. Jöe nugö'öromoma ëhi uarëjo. Röhu muoromoma ariböviohuro jemesi jöho eromoma Paul hu'irae barovamoma gavë'oho noro örire atovoromoma rue'iramoma ano'ëjarëjo.

<sup>16</sup> Ëhi majëhijamoma Paul-are ma'ino hesi harihohuro Paul anoröhe jöho hejadeje. Heromoma ruhe muoromoma aehu raromarue osare ajiomoromoma Paul huruoho majahijadeje.

<sup>17</sup> Majahijamoma hegoromoma Paul-ro muoromoma simano vaejaje ae gemuëni uvadeje: Rovego na jöe majahijöromoma rovamoma uavadeje: Ave a i'oho muoromoma a börömo hesi öroro hu'irae va'ëgo hesi jöho majahi'irajo.

<sup>18</sup> Majahi'irajamoma hu'irae bava'oromoma muoromoma a börömhoma uavadeje: Ave a i'lo naehu barovode hesi bëhoho ë hisiehu tövë'e aho Paul-ro hesirire va'ojöro uvevonugoromoma nara va'amoma uevade höjo: Ave a i'oho bava'ëgo hesi jöho a börömhoma majahi'irajo. Ëhuni barovode höjo.

<sup>19</sup> Barovode höjamoma rue a börömhuro a i'oho övore ma'ëno bava'oromoma va'lo rori'lo jabesi sivue ariromoma uavadeje: Rabu jöe majehi'ie'anuejo.

<sup>20</sup> Majehi'ie'anuejamoma a i'ohuro uavadeje: Jew rajo ariböviohuro uarovare höjo: Nëri muoromoma a börömhoma sareramimomoma ua'ëjarëjo: Paul baruvebijego Jew rajo jö mevarue a masijohuro hesi jöho he avoho'irarëjo.

<sup>21</sup> Ëhi uarovë'e jiaje ëhuni Jew rajehuni nëri jö majahijë'oho nadi ejëhoromoma Paul Jew rajo a masijo jabesi öriroho hu'irae ba'obue'i ave osaro nugonëjo. Ëhesi bëhoho Jew raje ae aho'obëhe 40 iosirëmiromoma ruëhi ëmino'e gurihivoromoma atovo'aruëjo Paul rovego anoröhëni. Ëhesi bëhoho urimë'i uarovare höjo: God-ro gö'ëgo no ioho jovoho bogoma i'ëjarëjo hujeji Paul anogoro iröhëro. Ëhi uarovare höjo. Röhu jaruvo jabumë bövie bise'le avohë'ëro jië'ëro raromoma muebejaruëjo hujeji nëri jasi jöho he'iröhëro.

22 Ëhi majahijamu hegoroovo rue a börömohuro a i'oho uavadeje: Jaehu majehanue jöho bogave aho majëhi'iranëjo. Ëhi uanugoromo nugö'öjamu va'adeje.

*Muorovo a börömehu Paul nugö'öjamu Jerusalem jioromo Caesarea amore va'ade jöhoje.*

23 Va'amu gagorovo rue muorovo a börömohuro hu ajamiromo simano vaejarue aho niö'i uëvadeje: Ruehego na jöe majëhijöjo. Rovamu uëvadeje: Kaejö ëgehu muorovarue aribövioho 200 o horse-re jijihoromo muorovarue aribövioho 70 o bijehu muorovarue aribövioho 200 ëho gagovëvego jaburo vahi'e 9 o'clock evare va'irarëjo.

24 O horse gö avoho'amego Paul-ro jabesi döre hiromo va'onövo'irajo. Eni romoromo jiego evaro va'oromo Paul avoho hu'irae baeromo muebebe va'orego ëhuro bogo anego guomo'i sa'a muebejaje a böröme Felix-arire mae va'irajo.

25 Ëhi uënugoromo muorovo a börömohuro jöho surire jajivoromo uavadeje:

26 O asë'e Felix ja a börömego Claudius Lysias naro jasi örire jëjamijajëjo.

27 Ave nugö'öjaje aho Jew rajo ariböviohuro guduumoromo ano'ië'are höjo. Ano'ia'amu naro hejode uvavamu: Hu Rome raje hö uvamu hegoroovo naro nasi muorovo ariböviohu'o gemu mae va'oromo gëvode ano'ia'amu gëgoro baeniëhiromo hu'iraeromo rovode höjo.

28 Rueromo he'i negade höjo uevego: Ëhi ëhi ë'amu noro Paul ano'iro ë'are höjo. Ano'iro ë'are jöho he'i negamu naro Paul hu'iraeromo Jew rajo jabesi jö mevarue a masijo jabesirire abuejode höjo jö bëhoho he'iro.

29 Hu'iraeromo abueromo bëhoho hejode höjo. Ano'ië'are bëhoho Jew rajo ariböviohuro uevare höjo: Paul-ro Jew rajo nosi jögoroho ahade höjo. Ëhi jië'e jöhuni ano'ië'are höjo. Röhu na gavode höjo mu sisë vaejago mana anaruëhi jië'e mu sisëho o mu sisë vaejago savoji gagore ba'amaruëhi jië'e mu sisëho ëhi jië'e muoho Paul bogo vaejë'e jiamu.

30 Ëhi gavë'ëro va'o ijönö hejode ae göëro huruoho majehiromo uevamu: Jew rajëro Paul ano'i örire atovo'aruë uevamu hejë'ëro na ma-burëro Paul Felix jasi örire nugö'öjajëjo. Hu jasi örire nugö'öromo Jew rajo aribövioho uë'irögoro ë'ajëjo jaburo Felix jasi örire ö'oromo Paul-are jö sisëho majahego jero he'iranego. Ahia mino'ëjo.

31 Ëhi jajivoromo vahiomamu gagorovo muorovo ariböviohuro jabesi a börömoho ejahoromo Paul hu'irae va'oromo Antipatris amore ë suorovareje.

32 Amore suorovoromo sisonuvamu gagoro muorovo a ioro'iorohuro jabesirëro va'irögoro horse-re jijihoromo muorovarue ariböviohuro ri'öromo Paul hu'iraeromo va'areje.

33 Va'aroho va'o Caesarea amore ë suorovareje. Caesarea amore suorovoromo Paul barovare jö hesi suri surioho sa'a a börömoho bojamiromo uavareje: Aveho Paul höjo.

34 Aveho Paul höjamu sa'a a börömohuro suri surioho adahoromo Paul uavadeje: Ja di sa'aho raje javajëjamu Paul-ro uavadeje: Cilicia sa'a raje jëvajëjo.

35 Cilicia sa'a raje jëvajëjamu a börömohuro uavadeje: Jasi jö sisë atarue aribövioho rue'iramu evare na jasi jöho he'ejöjo. Ëhi uanugoromo hesi aribövioho uëvadeje: Paul hu'irae va'oromo Herod-hu vaejade osa börömoro nugego atovarue ariböviohuro ë muebe'irarëjo.

## 24

*Paul sa'a muebejaje a böröme Felix-are nunire namijamu Jew rajo a ömo'ömehu Paul-are jö sisë majahijare jöhoje.*

<sup>1</sup> Paul osare nugamu majae övo gö mine barëjamu gagorovo priest böröme Ananias-ro Jew rajo a duvaho ioro'iorohu'o jabesi court jö majëhijaje ae gemu Tertullus hu'o ë aribövioho sÿjëvoromo Caesarea amore ë ruvebi-jadeje. Ruvebiromomo sa'a a böröme Felix hesi nunire riravoromo Paul-are jö sisëho huruoho majahijareje.

<sup>2</sup> Majahijamu Tertullus-ro jöho majahijöro Felix-ro uavamu hegoro Tertullus-ro ri'öromomo Paul-are jö sisëho majahiromomo uavadeje: Na jö majahi'ië'ajoho henëjo. Ja a böröme javajëjo. Jero avoho muebejavuë'ëro majae ëgobövie no iro muorovo'oho bogo vae'i ma-mae raromobe rovë'le javuajëjo. O mue rabe rabe bogo eni javuobe rovë'oho jero ajamuego nosi sa'aho mu maëremu ri'öjego no huë mae raromarue höjo.

<sup>3</sup> Èhuni Felix jaehu vaejanue muoho dirö'le aho'o majae aho'o mae hö uvoromo dë vövöbajo'le aho'o jasi örire rajahijarue höjo.

<sup>4</sup> Röhu na jasi mu majaho bogo anahoromo jö ëgoho majahi'i ma-bunemu majahi'ië'ajëjo. Èhuni uavajëjo: Huë baejavuoromo nosi jö harihoho avoho henëjo.

<sup>5</sup> No gavë'le javuajëjo ave aho Paul a sisë bëhe jiamu. Hu jö sisë jövoobe sa'ae dinö'le dinö'le juvoromo Jew rajo jabesi dë iëhego muorovo'i vörö'iraeruomaje höjo. Iesu Nazareth rajo a hesi sisë aribövi jabesi simano vaejarue aho Paul hu'oje.

<sup>6</sup> Èhi jië'le aëro jië'ëro huro God-are osa börömoho ijumo'iro ë'amu gagorovo noro guduamare höjo. [Guduamo bava'oromo noro court vaeromo Jew rajo nosi jögoroho uehorovoromo hesi jö sisëho ga'irögoro ë'amu

<sup>7</sup> muorovo a böröme Lysias-ro ö'oromo ma-darugo'o baeniahuiromomo ruho bava'ade höjo.

<sup>8</sup> Bava'onugoromo huro Jew rajoho no uövuade höjo noro Caesarea ruvebiromomo Paul-are jö sisëho huruoho majëhijego Felix jero he'iranego.] Röhu jaehu Paul ua gavë'oho hesi jö sisë noehu majahijaruoho jasi hia'ëro he barë'anuëjo. Ahia mino'ëjo.

<sup>9</sup> Èhi majahijamu hejë'i Jew raje ae aho'obëhe jaburo hu ajamiromomo uavareje: Tertullus-ro jö mae jövajëjo. Paul hu ëhi jië'le ae höjo.

*Paul-hu Felix-are nunire namiromomo hesi arijo'arije ajamirovoromo majahijade jöhoje.*

<sup>10</sup> Èhi majahiruomamu rue sa'a a börömohuro uvene aho röjahijadeje Paul-ro garomo evare hesi jöho jövojöro. Èhi'amu gagorovo evare Paul-ro majahiromomo uavadeje: Iae na gavajëjo jaehu jö mevanue mu hesi öri muebebe rovanoho vadune aho'obëhe barëjë'le javajëjo. Èhuro na dë mae jevo'ego nasi jöho majahi'ië'ajëjo jero heromo uvojöro: Paul mu sisëho bogo vaejë'le höjo.

<sup>11</sup> Naehu majëhi'ië'aje jöho jasi nagë'oho ae uë henëjo mae o sarere jiego. Naehu God rajahi'i Jerusalem ajiomodoho maja ëgoho bogo barë'i majae 12 ëhuremu barëjë'le höjo.

<sup>12</sup> Jerusalem hijodevaroho nasi jö sisë majahijarue aribövioho na mu sisë vadu'oho bogo vaejamu jabumë gevë'le höjo. God-are amo börömore hiromomo na ae gö'oho bogo jö aho'ahoho ë'ode höjo. Jew rajehu God rajahijarue osare osaroho o Jerusalem uhure dinö'le dinö'le na bogo mu

sisëho vaeromo jö sisëho majëhijode höjo aëro iro muorovo'e vaejoro. Na ëhi jië'e mu sisëho bogo vaejamu jabumë gevë'e höjo.

<sup>13</sup> Bogo vaejamu gevë'ëro jö bëhi ja majahijego heromo mae uehorovo'iranoho jabesi öriroho bogohöjo. Bogojië'e nasi örire ëma nibeje-haruëjo.

<sup>14</sup> Ruëroho numëroho na bogo ömo'i ave ömaje jöhemu huruoho majëhi'irodoho jevajëjo. Na Iesuare öri i'ore juvaje höjo. Röhu ave Jew rajoho jaburo uevarue höjo: Eëroho sisë öriro juvanue höjo. Eërire iae na ë juvoromo ëhuro nosi hijo miono'o muebejevobe rovade aho God rajahijaje höjo. Iae na ëhi ë'laje höjo röhu Jew rajehu ë'aruëhi Moses-hu bojamuade surire jögorohu'o jö God-aro baeromo majahuinövare a jabesi surire jöhu'o na'o ëhi mae uehorovo avohaje höjo.

<sup>15</sup> O ave Jew rajehu ë'aruëhi na'o ëhi gemuoho God mae uehorovoromo uvaje höjo: God-ro vuovë'e aribövioho a mahu'o a sisëhu'o i'ovavuo'iramu ri'ö'ëjarëjo.

<sup>16</sup> Eëhi uehorovoromo God-are nunire o ae aho'o jabesi nunire mae namijego dë mae jevo'iröhohuni ehuni na ömo gavaje höjo. Na ëhi jië'e ae jevajëjo.

<sup>17</sup> Eëhi jië'e aëro jevë'ëro öre gö hiromu vadune gö gö barëjamu evare ijo bajoho ujuohoromo Jerusalem rovode höjo nasi aribövioho suvuorëmi'irodëro. O rovode höjo Jew rajo muoho vaeromo bijuëmare mioho God-are örire suvuorami'irodëro.

<sup>18</sup> Jerusalem ro hiromu ëhi jië'e muoho vaejamu evare Jew rajohuro ro gevare höjo na God-are osare jevamu. Röhu na urimo Jew rajo muoho vaejamu sisëho barë'i ma-mae jevë'ëro ëhu'ëro na God-are osare jevadoho iae mae jiade höjo. Röhu göho jabuhu gevare majare ae aho'o na'oho bogojio'i iro muorovo'e jöjöje rabe rabe bogojiade höjo.

<sup>19</sup> Na ëhi mae hijamu jaburo gevare höjo. Röhu Jew raje Asia sa'are jioromo rovarohuro ë osae gemuore jiare höjo. A'i jabumë aveho bogo rovare höjo. Eëaribövioho jabumë nasi jö sisë jëvo'ibejajo rueromo jasi örire majahi'ibejarëjo iae mae jio'ibejajo. Röhu bogo rovë'e höjo.

<sup>20</sup> O na Jew rajo jö mevarue a masijo jabesi nunire namijodevare jabuhu nasi mu sisë rabe gavaroho nadi'ego ave ariböviohuro majahijego hejëjo. Röhu nasi sisëho bogo birohare höjo.

<sup>21</sup> Ave jöhuremu hejare höjo. Na jabesi nunire namiromo ma-darugo'o uvode höjo: Jemëhu jaruvo court vaejevoromo uvarujoho: Paul-are ihoho sisë hö uvaruje hesi bëhoho naro mae uehorovoromo uvaje höjo: Vuovë'e aribövioho i'ovoromo ri'ö'ëjarëjo. Eëjhuremu hejare höjo. Ahia mino'ëjo.

<sup>22</sup> Paul-ro ëhi majahijamu hegorovo Felix-ro Iesuare öri hesi jöho mae hejë'ëro uëvadeje: U'emu muorovo a böröme Lysias ruvebi'iramu evare na jemesi jöho gö'o heromo uë'ëjjo: Paul-are jöho mae höjo o bejë'e höjo. Eëhi uëngoromo court-oho tugohadeje.

<sup>23</sup> Tugohoromo muorovo simano vaejaje aho uavadeje: Jero Paul muebejego bogo rori'oho va'i ë bëhiremu hi juvo'irajo. O hesi aganehu ö'oromo ajami'ie'iroho nadi nijio'iraejëvonëjo.

*Paul-hu Felix'o hesi vabore Drusilla'o jabesi nunire namiromo jö jövade jöhoje.*

<sup>24</sup> Eëhi'oromo majae gemu niö'i barëjamu Felix-ro hesi vaborohu'o gemu mae Paul ga'i va'adeje. Vaboro hesi ihoho Drusilla jiadeje. Hu Jew rajo magnahe jiadeje. Felix-ro va'oromo Paul-ro hesirire ruejoro jöe nugö'öjjadeje.

Jöe nugö'öjamu Paul-ro rueromo Iesu Keriso mae uehorovarue jöho majahijamu Felix-ro hejadeje.

<sup>25</sup> Hejamu Paul-ro mu maemu vaeröhe jöho ma-taemo raromo'iröhe jöho u'emu God-are nunire riravoröhe jöho ähi jië'e jöho jövobe va'amu Felix-ro heromo juhuonivadeje. Juhuonivoromo Paul uavadeje: Va'ëjo. Majae eni jevo'iramu jöe nugö'ö'ejöjo jero sionëro ruejoro.

<sup>26</sup> Ähi uaromo huro sareri'e muoho vae'i uehorovoromo uvadeje: Nani Paul-ro ue'a'ajëjo: Ä'ego na ja ijo bajo harihe saginiëri bojamego jero ëho bae'i na ëma jiovo remö'öjëjo. Felix-ro uehorovoromo uvadeje: Paul-ro ähi ue'a'ajëromomo ëhuni Paul-ni jöe nugö'ö'i hijadeje. Nugö'ö'i hiromomo rue'ego huro Paul'o jöe jövonövadeje.

<sup>27</sup> Ähi'ojuvo vadune niö'i barëjamu Felix-ro sa'a muebejaje muoho vuonugo'i Jew rajo ariböviohuro hu mae uehorovojoro Paul savoji gagore ähi nugoromo va'adeje. Va'amu Porcius Festus-ro rueromo hesi sionoho baejadeje.

## 25

*Paul-hu Rome va'oromo a böröme Caesar-are nunire namiromomo court avo'avoho vaeröhëro jöe jövade jöhoje.*

<sup>1</sup> Hesi sionoho baeromo Festus-ro sa'aho muebe'i rovadeje. Rueromo majae niö'i gemu barëjamu Caesarea amore jioromo Jerusalem ajiomadeje.

<sup>2</sup> Ajiomamu Jew rajo priest masijohu'o Jew rajo a masijo ioro'iorohu'o ëho jaburo Paul-are jö sisëho huruoho majahijareje Festus-ro hejoro. Paul-are jö sisëho majahinugoromo Festus uavareje:

<sup>3</sup> Jero huë baeromo ajamuiromomo va'o Paul nugö'öjëgo Jerusalem rojomomo'irajo. Ähi ua gavare hesi bëhoho urimë'i Paul öri ahore ano'i saginiëri atë'ëro ëhuni uavareje: Nugö'öjëgo Jerusalem rojomomo'irajo.

<sup>4</sup> Rojomomo'irajamu Festus-ro uëvadeje: O-ajo. Paul Caesarea amore savoji gagore jië'ëro rojomomo'iröhoho bogo eni jiajëjo. Röhu na aviae vejö'e vejö'e Caesarea vuonorö'ö'ejöjo.

<sup>5</sup> Ähuni jemesi masijohuro Caesarea amoro na'o ö'oromo Paul-are jö sisë rabe rabe jië'oho court vaeromo majehijëgo na he'iröjo.

<sup>6</sup> Ähi uënugoromo Festus-ro Jerusalem hiromomo majae gö'o 8 o 10 rabu'e barëjamu Caesarea amore vuonorö'ö abuejadeje. Abuejë'ëro nërö court vaeromo Paul hu'irae ruejoro uvadeje.

<sup>7</sup> Paul hu'irae rovamu Jew raje mami'e Jerusalem jioromo ruvebijaroho jaburo Paul-are bëhire gagovo rova'oromo sareri'e jö masijoho aho'obëhe Festus majahiromomo uavareje: Paul-ro ähi jië'e ähi jië'e mu sisëho vaejade höjo. Paul-are jö sisëho ähi majahiromomo röhu jö bëhi majahego mae uehorovo'iröhoho jabesi öriroho bogojiadeje. Bogojië'e ma-nibejahareje.

<sup>8</sup> Ma-nibejahamu Paul-ro Festus uavadeje: Na sisëho bogo vaejë'e jevajëjo. Jew rajo nosi jögoroho God-are osa börömoho Rome a börömehu no muebejavuajoho na jabesi jöho bogo ahoromo jabesi muoho bogo ijumëhë'e jevajëjo.

<sup>9</sup> Ähi majahijamu gavë'i Festus-ro Jew rajo ariböviohuro hu mae uehorovojoro nimamu Paul uavadeje: Na ja nagajëjo Jerusalem ajiomoromo ë amore nasi nunire namiromomo jasi jö sisë jabuhu ataruoho mevo'iro.

<sup>10</sup> Ähi uavamu Paul-ro uavadeje: Bogajo. Na aviae Rome a börömo hesi court-re namijajëjo. Ähuremu gemu iae maho höjo. Ja'o iae gavanuëjo Jew rajo aribövioho na bogo sisë vaejëvode höjo.



11 Na mu sisë vaejë'ëro guomevoröhe bëhoho jio'ibejajo na bogo ni-jio'iraejëvego jabesi anegego guomevo'ibejajo. A'i ë Jew rajo ariböviehu nasi jö sisë ëma barueromo nibejehiromo uavaruoho: Paul-ro ëhi ë'ade hö uavaruoho aho Jew rajo jabesi övoroho bogo ëma bojëmi'arujëjo court vaejevoromo i'ue bojemi'iröhego. Ëhuni na negajëjo Rome va'oromo muebejavuaje a börömo hesi nunire nami'iro.

12 Ëhi uavamu Festus-ro hesi jö ajamiromo mevarue aribövi jabesi jöho heromo Paul uavadeje: Jero uevanuëjo: Na negajëjo Rome va'oromo a börömo hesi nunire nami'iro. Ëhuni iae va'oromo hesi nunire nami'a'anuëjo.

*Paul-hu a böröme Agrippa'o Bernice'o ma'ino'o ma'ino'o jabesi nunire namiromo jövade jöhoje.*

13 Ëhi'amu va'o ririvanovamu evare a böröme Agrippa'o Bernice'o jaburo niö'iro Festus jejami'i rovaraje.

14 Rueromo majae bisemu ëge hu'o arijareje. Arijamu Festus-ro Paul-are jöho Agrippa majahiromo uavadeje: Ae gemu aviae höjo mami'e Felix-ro savoji gagore ba'amoromo nugo va'ë'ëro.

15 Na Jerusalem ajio hijodevare evare Jew rajo jabesi priest masijohu'o a duvaho ömo'ömo'u'o ëho jaburo hesi jö sisëho huruoho majehiromo uevare höjo naro hu i'ue bojami'irodego.

16 Ëhi uevamu uëvode höjo: Rome aribövioho no ëhi jië'e muoho bogo vaejarue höjo. No bogo aho a jabesi övoroho ëma bojëmijarue höjo i'ue bojëmi'iröhego. A'i urimo iho sisë'e ahu'o hesi jö sisë majahuijarue ariböviohu'o gemuore jio'iramu jaburo hesi jö sisëho majahui'iramu huro mana hesiroho majahui'ajëjo. Hujeji hesi jöe bejë'ohuro ëhuro i'uoho bojami'ejarejo.

17 Ëhi uëvode höjo. Röhu ë Jew rajo ariböviohuro Paul-are jö sisëho huruoho majehi'i ruvebijamu gëgorovo na bogo örisanuovo'i nëröho nasi aribövioho uëvode höjo: Paul hu'irae ruehego court vaejëjo.

18 Ëhi uëvamu hu'irae rovamu Jew rajo ariböviohuro ri'öromo Paul-are jö sisëho majahuijare höjo. Majahuijamu naro uvode höjo: Nani jaburo Paul-hu mu sisë bëhe vaejade jöho majahui'aruëjo. Röhu bogo ëhioho majahuijare höjo.

19 A'i Jew rajehu jabesi beroharue jöhuremu Paul'o jö aho'ahamirovare höjo. Jö aho'ahamirovoromo jabesi sarerile aru'aho hesi mu jöhu'o guomë'e a hesi ihe Iesu ë a hesi jöhu'o jö aho'ahamirovoromo Paul-ro uëvade höjo: Ëaho Iesu bogo guomë'e iae hijajëjo. Ëhi jië'e jöhuremu court-re barovare höjo.

20 Ëhi barovamu hegorovo naro uvode höjo: Ëhi jië'e jöho bogo avoho hejë'ëro na bogo mevo varijënoho jevajëjo. Bogo mevo varijënoho jevajëromo ëhuni Paul uavode höjo: Na ja nagajëjo Jerusalem ajiomoromo Jew rajo jabesi nunire namijego jaburo ë jöho mevo'iröhego.

21 Ëhi uavamu Paul-ro uevade höjo: Na bogo ajiomoejëjo. Na negajëjo jemëro na muebejevego hujeji na Rome amore va'ego muebejavuaje a börömohuro nasi jöho mevo'iröhego. Ëhi uevamu naro nasi muorovo aribövioho uëvode höjo: Paul avoho muebejago bogo rori'oho va'irajo hujeji naro Paul nugö'öjago va'o Rome rajo a börömo hesi nunire nami'iröhe höjo.

<sup>22</sup> Festus-ro jöho ëhi majahijamu hegoroovo Agrippa-ro uavadeje: Paul-ro jöho jövego na'lo nasi hia'ëro he'i negajëjo. He'i negajëjamu uavadeje: Jöho nëri jövo'iramu he'a'anuejo.

<sup>23</sup> Ëhi uavë'ëro nërö Agrippa'lo Bernice'lo rovamu ae aho'obëhe jaburo ri'öromo jabesi ihoho döro bamoromo rajëhijareje. Rajëhijamu gavë'i jaburo niö'iro muorovo a masijohu'lo amo rajo a masijohu'lo gemu mae gagovarue osa bërömore rueruomadeje. Rovamu gagorovo Festus-ro ae uëvamu Paul hu'irae rovarereje.

<sup>24</sup> Hu'irae rovamu Festus-ro jöe majëhiromo uëvadeje: Agrippa a bërömhajo. O a ioro'iore ave gemuore gagovarijohumë ave aho Paul aviae nami'ego gavarujëjo. Ëa hesi jö sisëho Jew raje ae aho'obëhe ave raro-maruo'u'lo Jerusalem raromaruohu'lo ëho jaburo nasi örire majehijarue höjo. Majëhiromo jö'e dadovoromo ma-darugo'lo ueruomaje höjo: Ave sa'are ëgo'lo ma-hijë'oho bogo maehu höjo.

<sup>25</sup> Jabuhu ëhi uevarue höjo röhu anego guomoröhe hesi bëhoho bogo birohë'e jevajëjo. Röhu Paul-ro hesi uevade höjo: Remö'öjego naro Rome va'ego ë a bërömhuro nasi jöho mevo'irajo. Ëhi uevamu ëhuni uvode höjo: Naro Paul nugö'ö'ejöjo Rome a bërömo hesire va'iröhego.

<sup>26</sup> Iae na nugö'ö'ejöjo röhu Paul-are mu sisë jö jajivoromo a bërömo hesi örire nugö'ö'irodoho bogojevajëjo. Bogojevë'ego ëhuni naro uëvode höjo Paul hu'irae rovego huro ae aho'obëhe jemesi nunire o Agrippa jasi nunire namijego noro hesi jöho heromo mevoromo bëhoho garomo eni jiego evare jöho jajivoromo nugö'ö'irodëro.

<sup>27</sup> Ëhesi bëhoho naro uvode höjo: Tövë'e a hesi jö sisë bogo jajivë'e ma-nugö'öjë'oho ëhi jië'oho bogo maehu höjo.

## 26

*Paul-hu Agrippa-are nunire namiromo hesi arijo'arije ajamirovoromo majahijade jöhoje.*

<sup>1</sup> Ëhi uëvamu Agrippa-ro Paul uavadeje: Jasi jöho majahuego no hejarëjo. Hejarëjamu Paul-ro jöe jövo'irögoro öve nigemoromo uëvadeje:

<sup>2</sup> Agrippa a bërömhajo. Na jö harihe majahi'ië'ajëjo. Jew rajehu nasi jö sisë rabe rabe majëhiruomego naehu aho'i jaruvo jasi nunire namijajoho na uvajëjo: Iae huë mae baejë'e jevajëjo.

<sup>3</sup> Huë mae jevaje hesi bëhoho aveho bërömhoho höjo. Jew rajehu mu diehi vaeromo jö rabe beroharuoho Agrippa jero mae gavanuego ëhuni Paul naehu jasi nunire namijajoho iae mae höjo. Ëhuni na negajëjo jero ma-taemorovoromo nasi jöhemu he'iranego.

<sup>4</sup> Na asisö'lo jevadire aevoromo nasi sa'a rajohu'lo gemuore hibe o ro Jerusalem amo rajohu'lo gemuore naehu diehi hibe rovodoho Jew raje ae aho'obëhe mae gavë'e höjo.

<sup>5</sup> Jew rajëro mami'e gabe rovë'ëro jaburo iae mae geromo uvarue höjo: Pharisee aribövi jabesi jöho mami'e aevoromo ebe rovode höjo. Jew rajo ioro'ioroho Jew rajo nosi jögoru ejaruoho ma-jianovo'i a'i Pharisee ariböviohuro e avoharue höjo. Naehu ëhi eromo vaebe rovodoho ave Jew rajohuro nimë'oho ua'a'aruëjo: Paul jö mae jövajëjo.

<sup>6</sup> Röhu avevejö'e naehu jasi nunire namijaje hesi bëhoho aveho höjo. Naro mae uehorovoromo uvaje höjo: Iae mae-ëjo. God-hu nosi hijo miono'lo uëvadëhi huro ëhi ajamui'iramu ma-mabëhe raro'mo'ejarëjo.

<sup>7</sup> Nosi Jew rajo anie aho'obëhe 12-ho jabumë ae aho'obëhe vae majae God rajahiemu rajahiro mo naehu uehorovajëhi jabu'o ëhi gemuoho uehorovoromo uvarue höjo: God-ro uövuadëhi ijonö nosi örire ajamui'iramu mae raromo'ejarëjo. Agrippa jabuhu uehorovaruëhi na'o ëhi gemuoho uehorovaje höjo röhu ë jöhuni Jew rajohuro nasi jö sisëho huruoho majëhi'ego naro jasi nunire namijajëjo.

<sup>8</sup> Röhu Iesu guomamu God-hu i'ovadoho jemë bogo maho uehorovarujëjo. Jemë rabëni uvarujëjo: God-hu vuovë'e aribövi i'ovo'amaje jö uehorovo'iröhoho no bogo eni javuajëjo.

<sup>9</sup> Urimë'i na'o uvonövode höjo: Naehu bövi bise'o vaeromo ëhuro Nazareth raje Iesuare iho ijumë'oho ëhi jië'oho ëho nasi mu maho höromo

<sup>10</sup> ëhuni Jerusalem hiromo hesi muoho ijumo'i ë'ode höjo. Ëhi'oromo naro priest masijo jabesi jöho baeromo God-are aribövioho aho'obëhe guduamo ujuoho va'oromo savoji gagore io'amonövode höjo. O Jew rajo a masijo ioro'iorohuro Iesuare aribövi jabesi jöho mevoromo vuovëvojöro uë'ego na'o ajëmiromo uënövode höjo: Iae mae uëvarujëjo. Jabumë vuovë'oho iae mae höjo.

<sup>11</sup> Ëhi'oromo majae aho'obëhe Jew rajehu God rajahijarue osare osare va'oromo Iesuare aribövi jabesi örire i'ue bojëmijöro uënövode höjo. I'ue bojëmijöro uëromo uënövode höjo: Uöhëjo: Noehu Iesu mae uehorovaroho avevejö'oho vuonugë'e javuajëjo. O naro jabumë muo'amëvo'i vörö'iraeromo ëhuni nasi sa'aho vuonugo'i sa'a göre göre amo göre göre va'onövode höjo sisë vae'amo'iro.

*Paul-hu aevoromo Keriso mae uehorovade jö majahijadohoje.*

<sup>12</sup> Iesuare aribövioho sisë vaejëvo'irögoro ëhuni jabumë guduamo ujuoho rue'irodego nosi Jew rajo priest masijehu jajivare jöho naro baeromo Damascus va'ode höjo.

<sup>13</sup> Röhu Agrippa naro örire va'oromo majae ririre jiamu va'ihö gavode höjo ajoho ö'idöre jioromo ruvebiromo na'o na'o gemu mae ö'arue ariböviohu'o ajivavuamu. Maja nuni hesi ajoho ma-jianovo'i ëho aji bëhe jiamu gavode höjo.

<sup>14</sup> Ajivavuamu gagorovo no ae aho'obëhe sa'are behumorovoromo naro hejode höjo nasi Hebrew jöëro uevavamu: Asë'e Saul-ajo. Ja rabëni sisë vaejevanuëjo. Naro ja minö'e sihavamu jero na ijumevo'i höromo jasi ijumorovë'e javajëjo.

<sup>15</sup> Ëhi uevamu naro uavode höjo: Bada ja rahuo javajëjamu uevade höjo: Jaehu sisë vaejevanue aho Iesu na jevajëjo.

<sup>16</sup> Röhu de jero ri'öromo jasi hörëro döro namijëjo. Naehu jasi nunire rovode ë hesi bëhoho naro ja nasi baejavego jero nasi muoho vaejehoromo jaehu na gevanue jöhu'o u'emu naehu röjahijego ga'irane jöhu'o ae majëhibe juvonövo'iranego ëhuni rovode höjo.

<sup>17</sup> Majëhibe juvo'iramu naro ja ajami'iramu Jew rajohu'o sa'a ioro'ioro rajohu'o ja bogo anago'aruëjo. Iae na sa'a ioro'ioro rajo jabesi örire ramö'ö'ejöjo.

<sup>18</sup> Ramö'ö'iramu jero va'oromo ajëmiromo jabesi nunoho dadovëho'iramu ramoramo'e muoho vuonugo'i ma-ajiro raromo'aruëjo. Satan-are vörö hesi uhure raromaruoho vuonugo'i God-are aharire raromo'aruëjo. God-are aharire raromoromo nasi örire mae uehorovevëlëro God-ro jabesi sisëho uehorovoromo vuonugoromo jabesi röhoho bojëmi'iramu God-hu baejëvade aribövi ioro'iorohu'o gemu mae raromo'aruëjo.

*Paul-hu Keriso-are mu vaebe rovade jö jövadohoje.*

19 Röhu King Agrippa Iesuro ö'idöre hiromo ëhi ajoho röjehiromo jöho majehijamu garomo hejode höjo. Heromo na bogo bijönimode höjo.

20 Bogo bijönimo'i a'i huhu uevadëhi ëhi vaeromo urimo Damascus amore ijonö Jerusalem amore Judea sa'ae bövioho sa'a ioro'ioro rajo jabesi sa'are ëhi Iesuale jöho majëhibe juvoromo uënövode höjo: Uehoro sisëho vuonugo'i God mae uehorovoromo mu maemu vaenövorëjo. Mu mae vaejë'o'ho ëhuro noro gëromo uvo'ëjarëjo: Iae mae-ëjo. Jemëro mu i'oho mabëhe baejë'e jëvajëjo.

21 Naro ëhi jië'e jöho majëhibe juvë'ego ëhuni Jew rajo ariböviohuro God-are osa börömore guduamevoromo anego'ië'are höjo.

22 Anego'ia'amu God-ro na ajemibe rovë'ëro ëhu'ëro jaruvoho iae na aviae jevajëjo. Aviae jevë'ëro naro namiromo nasi jö maho majëhi'ego jemë a ininore va'o a masijore ëhi hejarujëjo. Nasi jöho iae mae höjo. Èhesi bëhoho ijonö jioröhe mu jöho urimë'i jö God-aro baeromo majëhinövare aribövi jabesi surire o Moses-are surire jajivarëhi naro ëhi majëhijaje höjo.

23 Jabuhu jajivarëhi naro ëhi majëhijaje höjo. Jaburo jajivoromo uvonövare höjo: Böröme namiromo ajamui'iröhe aho huë vavaene böröme baeromo guomo'a'ajëjo. Guomo'iramu a ioro'ioroho taemëvo'i huro urimo ri'ö'a'ajëjo. Ri'öromo hesi aji'e jöho majëhi'iramu Jew rajohu'o sa'a ioro'ioro rajohu'o heruomo'ajëjo.

24 Paul-ro hesi jöho ëhi majëhijuvo evare Festus-ro ri'öromo ma-darugo'o uavadeje: Paul ja simane sisërëjavo'ego ëhi jië'e jöho jövanuëjo. Ja böröme gavë'e aëro javë'ëro ëhu'ëro jasi simanoho sisërëjahë'e höjo.

25 Sisërëjahë'e höjamu Paul-ro uavadeje: Bogajo. Nasi simanoho bogo sisërëjahë'e höjo. Na simano maëro jevë'ëro jö maemu jövajëjo.

26 Röhu naro Agrippa hesi örire jöho bogo subivaho'i ma-sama'e majahijajoho iae mae höjo. Iae hu bëhoho gavaje höjo. Iesuale örire mu diehi diehi rovadoho o huhu mu diehi diehi vaejadoho bogo gurihiroho vae'i ma-va'orahoro vaejë'ëro na uehorovajëjo iae Agrippa ë jöe aho'o garomo uehorovë'e höjo.

27 Agrippa-jo. Jö God-aro baeromo majahuinövare ariböviehu jajivare jöho na ja mae uehorovanuëjo o bogajo. Iae na gavajoho ja mae uehorovanue höjo.

28 Mae uehorovanue höjamu Agrippa-ro Paul uavadeje: Asë'e jero uvanuëjo: Naro Agrippa'o majae ma-bunemu jöe jövoromo dinami'iramu hu Christian vae'a'ajëjo. Röhu bogajo.

29 Bogajamu Paul-ro uavadeje: Majae ma-bunemu o majae ëgo'o baeromo Christian vaejë'o'ho iae mae höjo. Röhu naro God-are örire uavajëjo huro ja ajamijego bogo ja gemu ae aho'obëhe nasi jö jaruvo hejarujoho ajëmego na jevajëhi jemë'o ëhi jëvoröhego. Röhu ö'ehu tövevarëhi jemë'o ëhi tövëvo'iröhoho na bogo ëho uëromo ë'ajëjo.

30 Paul-ro ëhi majëhijamu hegorovo Agrippa Festus Bernice a ioro'ioroho ëho jaburo ri'öjareje.

31 Ri'öromo suorovoromo uarovareje: Èaho mu sisë vaejë'ëro guomoröhe o savoji gagore hi'iröhe hesi bëhoho bogohöjo.

32 Èhi uarovoromo Agrippa-ro Festus uavadeje: Èaho Rome va'oromo a börömo hesi nuniroho bogo nami'i uvo'ibejajo jaehu jiovo nugö'öjë'o'ho iae mae jio'ibejajo.

## 27

*Paul-hu Rome amore va'iröhëro boat baeromo sö jovo döre va'ade jöhoje.*

<sup>1</sup> Èhi'amu a böröme Festus-ro uvadeje ë majare noro boat-re ajiomoromo Italy sa'are va'oröhego. Èuvade majaho rovamu aëro Paul'o savoji'e a ioro'iorohu'o ujuohoromo ae gemu hesi örire bojamareje huro jabumë avoho muebejëvego boat-ohuro aegoromo va'oröhego. Èmuebe'amoröhe a hesi ihoho Julius jiadeje. Hu Rome raje muorovo a ioro'ioro ma-gemuore bu'öromu muebejëvobe juvaje ae jiadeje. Gemuore bu'öjare muorovo aribövi jabesi ihoho Rome A Börömo Hesi Muorovo Aribövioho jiadeje. Julius-ro ë aribövioho muebejëvonövadeje.

<sup>2</sup> Julius-are örire Paul'o savoji'e aribövi ioro'iorohu'o bojamamu Julius Paul na a ioro'ioroho no ae aho'obëhe boat-re iojiomareje. Èboat-oho Adramyttium amore jioromo rovë'ëro röhu vuonorö'öromu Asia sa'are jio'amaje amore amore höröbe va'irögoro ë'adeje. Va'ia'amu noro ë boat-re iojiomareje. Ajio raromamu evare boat-oho ri'öromu va'adeje. Röhu ae gö hesi ihe Aristarchus-ro no'o ö'adeje. Aristarchus hesi sa'a ihoho Macedonia jio'i amo ihoho Thessalonica jiadeje.

<sup>3</sup> Boat-ëro aegavuoromo va'aroho nërö Sidon amore suorovareje. Suorovoromo Julius-ro Paul huë baeromo uavadeje: Ja nagë'oho va'oromo jasi aganoho gëvego rabe rabe bogo eni javajoho i'imamego ujuohoromo vuonorö'ö ruenëjo.

<sup>4</sup> Èhi'amu boat-ohuro aegavuoromo Sidon amore jioromo va'areje. Va'ihö gavare bure boat nuninö rovamu gagorovo Cyprus sa'aho viëhi nugo'i ruëhi va'areje sa'ahuro buroho urahego mae va'oröhëro.

<sup>5</sup> Sö jovo döre va'aroho Cilicia sa'aho iosiramiro mu va'aroho Pamphylia sa'aho iosiramiro mu va'aroho va'o Lycia sa'are Myra amore ro suorovareje.

<sup>6</sup> Suorovoromo ravo'amoromo Julius-ro gavade boat gö Alexandria amore jioromo rovë'ëro Italy sa'are va'i namijamu gagorovo söjavuoromo ë boat-re ajiomadeje.

<sup>7</sup> Boat-re iojiomoromo va'amu burëro taemoromo unovamu ma-u'ëmu va'ojuvo majae gemu niö'i rabu'e ëhi barëjamu evare Cnidus amo bëhire boat-oho ro namijadeje. Namijamu gavare burëro darugo'o nuninö ro taemo'ëgo bogo va'o hesi javuamu huotorovoromo ruëhi dirö'o gönö va'areje. Va'aroho Crete sa'a vitu jovore ba'amade sa'a vösö hesi ihe Salmone iosiramiro mu va'aroho Crete sa'aho viëhi nugo'i ruëhi sa'a bëhire va'areje sa'ahuro buroho urahego mae va'iröhëro.

<sup>8</sup> Ioni bëhi mare va'adoho unamuibe va'ojuvo Lasea amo bëhire jiaje osore ro namijadeje. Oso hesi ihoho Boat Mae Riravaje Osoho jie.

<sup>9</sup> Boat Mae Riravaje Osore namiromo majae ëgobövie ë raromareje. Raromojuvo buru majae boat bogo jijiharue majaho dunovadeje Jew rajehu i bogo ijarue maja börömoho mamie barëjë'ëro. Buru majaho dunovamu Paul-ro ri'öromu boat-re raromarue aribövioho jöe majëhiromo uëvadeje:

<sup>10</sup> Aribövi jöe hehëjo. No boat-re röhu maho aevoromo va'ë'oho na gavajoho sisërëjavuo hesi höjo. Inömohu'o boat-ohu'o ijumo'amo'ajëjo. Röhu bogo ëhemuoho ijumo'i no ae gö vuovavuo hesi höjo.

<sup>11</sup> Vuovavuo hesi höjamu hegorovo Julius-ro Paul-are jöho bogo ejaho'i boat baeromo juvaje ahu'o boat arijo'ohu'o jabesi jöho ejëhoromo uvadeje: È'ëgo no ma-va'arëjo.

<sup>12</sup> Röhu göho buru maja rovë'iroho boat ë dirö'ore namiromo gurihi'iröhoho ë osoho bogo eni jio hesi jiamu gagorovo ae aho'obëhe

uvareje: Ë'ego no ma-sivoho gabe va'oromo mae javuë'oho Phoenix osore suorovoromo buru maja jië'oho ë gurihi raromobe va'irarëjo. Ëhi uvareje. Röhu Phoenix ëho Crete sa'are osohoje. Maja beva'ajire röhu viënöho ruënöho bogo tugohë'e ma-va'orahoreje. Ëdirö'ore va'i nimoruomadeje.

*Paul-mëhu sö jovo döre va'oromo buru börömehu rueromo boat anamu huë vavaeni baejare jöhoje.*

<sup>13</sup> Phoenix va'i nimoromo gavare buru burue aruëhi rovamu gagoro boat muebejarue ariböviohuro uvareje: Phoenix va'ë'oho iae no mae va'ejarëromo boat i'uhoromo namijöro be ba'amarue inömoho barojo dönö bamoromo evare va'areje. Va'oromo Crete sa'a bëhi mare va'areje.

<sup>14</sup> Ma-bisemu va'anovamu gavë'i evare buru börömoho Crete sa'anö jioromo rovadeje. Ëburu hesi ihoho uvarueje: Maja Rojomajinö Röhu Bisemu Aruëhi Rovaje Buroho höjo.

<sup>15</sup> Ëburohuro rueromo boat simanonö darugo'o anamu gagorovo buru rovajinö va'iröhoho bogo eni javuamu gagoro sivoho garomo vuonugo'i huotorovoromo burëro dirö'o göre bava'amu ëma va'areje.

<sup>16</sup> Va'aroho va'o sa'a bise'o hesi ihoho Cauda ruëhi nugo'i viëhi va'ihö gavare ë sa'ahuro buroho urahë'ëro ma-bisemu u'uhamu gagorovo noro sivohojuvo nosi boat bise'o ruho bava'aruoho ma'eno titimareje.

<sup>17</sup> Ma'eno titimoromo boat muebejarue ariböviohuro ë boat bise'oho io barojomoromo börömo hesi döre avoho bamareje. Bamonugoromo biriri'e ö'oho ujuohoromo boat börömoho avoho tövo rova'o rojomareje bibivego jovoho bogo dadovoröhego. Avoho tövo rova'o rojomoromo uvareje: Boat baejavuoromo öri ëgoböviro Libya sa'a bëhire va'iramu sa'a hurihuro iorovoromo diruvavuo'ajëromo juhuonivoromo burehu namijaje niögoho muotohoromo baruvebiromo bamamu burohuro boat-ohu'o baejavuoromo ëma va'adeje.

<sup>18</sup> Ëma va'oromo gavare buru böröme ma-darugo ma'o rovadoho bogo barëjamu gagorovo boat i'uhoromo diruvo'ajëromo boat-ehu ujuoho va'aje inömoho nërö aevoromo ujuohoromo jovore ruruhö'öjareje.

<sup>19</sup> Ruruhö'öj'ëro nërö boat mu vaejarue hesi inömoho ëhu'o jabesi övëro ujuohoromo jovore ruruhö'öjareje.

<sup>20</sup> Ruruhö'öromo va'aroho no majae bogo gavë'e jije bogo gavë'e ehuro öroho dadivavuoromo ëma va'aroho buru börömo bëhe ruemu ruejuvo majae aho'obëhe barëjamu gagorovo uehorovoromo uvareje: Bogo i'ovo'i vuovavuo hesi höjo.

<sup>21</sup> Vuovavuo hesi höjamu boat muebejarue aribövioho ioho bogo ue'ahë'e ma-muemu vaejuvo majae ëgobövie barëjamu gëgorovo Paul-ro ri'öromo uëvadeje: Aribövijaio. Mami'e nasi jöho ejeho'i Crete sa'aho bogo nugo rue'ibejarijëjo bövioho bise'oho bogo ehioho sisërëjahuo'ibejajo.

<sup>22</sup> Iae ëhi höjo röhu naro uëvajëjo: Biririvohëjo. Jemë ae gemu vadu'oho bogo guomëvo'ajëjo. Boat-ohemu dadorovo'i jemë mae raromo'arujëjo.

<sup>23</sup> Naehu ëhi uëvaje hesi bëhoho God-are aëro jevë'ëro naro hu rajahijaje höjo. Ëa hesi anerahuro jaruvo vahi'e ro nasi bëhire namiromo

<sup>24</sup> uevade höjo: Paul nadi juhuonivëjo. Ëhesi bëhoho jasi muëro jië'ëro ja va'oromo Rome a börömo hesi nunire namila'anuejo. Ëhuni bogo öriroho guomo'a'anuejo. Röhu ave jöhu'o hejëjo. God-ro jasi örire huë baejavë'ëro ëhi ajami'ajëjo. Huro jasi jöëni uehorovoromo ja'o boat-re jijiharue aribövioho aho'obëhe ajëmi'iramu bogo vuovëvo'ajëjo.

<sup>25</sup> Ĕhi jiē'e jō maho anerahuro uev'e jiaje ēhuni jemēro biririvohējo. Ĕhesi bēhoho naro God mae uehorovoromo uvajējo: Aneraehu uevadēhi iae ēhi mae javuo'ajējo.

<sup>26</sup> No mae javuo'i rōhu burēro boat-oho baeromo va'iramu sa'a motumoture iorovo'ajējo.

<sup>27</sup> Paul-ro ēhi majēhijamu majae aho'o 13 barē'i vahie 14 vahiromadeje. Vahie 14 vahiromamu Mediterranean sō jovore ēma va'areje. Va'aroho vahi riri'e jiamu gagorovo boat muebejarue aribōviahuro uvareje: Nani no sa'a bēhiro rovaruējo.

<sup>28</sup> Sa'a bēhiro rovaruēromo jovo vahuoho diehi jiego ga'irōgoro vahuvo garomo gavareje jovo hesi ēgoho 40 metre ēmino'e jiamu. Vahuvo ganugoromo rori'o va'oromo rōhu maho vahuvo garomo gavareje jovo hesi ēgoho 30 metre jiamu.

<sup>29</sup> 30 metre jiamu gagorovo uvareje: Nosi boat-oho va'o munē masijoro va'o titimo'ajēromo juhuonivareje. Juhuonivoromo boat i'uhoromo namijōro be io'amarue inōmoho 4 ēhi boat dejonō jovore be io'amoromo vahie ēgobōvie jiamu uvareje: Ma-burēro sisonuvego no ōri ari'e gavarējo.

<sup>30</sup> Ĕhi'ojuvo boat muebejarue aribōviahuro boat bise'ore huruomo va'i nimoromo sareramuiromo uōvuareje: Boat bōrōmoho avoho namijōro i'u'e inōmoho boat nuninō be io'amo'i ēhuni boat bise'oho ba'obueromo jovo dōre ba'amaruējo ē raromoromo muoho vae'iro. Ĕhuni ē'aruēromo boat bise'oho baba'amareje.

<sup>31</sup> Baba'amē'ero ē abueromo huruomo va'ia'amu gēgorovo Paul-ro muorovo a bōrōmoho Julius'o hesi muorovo aribōviahuro uēvadeje: Nume boat muebejarue aribōvioho ave boat bōrōmore bogo raromo'i huruomo va'ē'oho sa'are va'irarijoho bogo eni jēvo'ajējo. Vuovēvo'ajējo.

<sup>32</sup> Ĕhi majēhijamu hegorovo muorovo aribōviahuro boat muebejarue aribōviehu huruomo'irōhe ōroho tugoho'i boat bise'o tōvare ō'oho tariō'ōjamu boat bise'ohuro a rumo'e ma-gagēremu va'adeje.

<sup>33</sup> Ma-gagēremu va'amu sisonuvo'ia'amu gagorovo Paul-ro ae aho'obēhe uēvadeje: Ie ihējo. Jemē nurunuruēgamu ioho bogo ijē'e ma-dē gagēremu raromo jijiharijoho majae aho'o 14 barējē'e jēvajējo.

<sup>34</sup> Ĕhuni uēvajējo: Ie ihējo ēhuro jemesi dajoho bogo ma-ruhorovo'i biririvo'irarije hōjo. Ĕhesi bēhoho jovoho raboho bogo anēgo'i jemesi sino haho'oho aho'o ma-mae jēvo'ajējo.

<sup>35</sup> Ĕhi uēnugoromo ie baeromo ae aho'obēhe jabesi nunire God-are ōrire mae uaromo ioho atoromo ijadeje.

<sup>36</sup> Ijamu gagorovo ae aho'obēhe biririvoromo jabu'o ie ue'ahareje.

<sup>37</sup> Rōhu no ae aho'obēhe 276 ēmino'e boat-re raromareje.

<sup>38</sup> Ae aho'obēhe ie ue'ahoromo da'uēgamu hegorovo wheat iruno'oho suevoromo jovore ruruhō'ōjamu boat-oho sasohoromo ma-dōro hetebe va'adeje.

*Burehu rueromo jovehu boat anamu dadorovade jōhoje.*

<sup>39</sup> Hetebe va'ojuvo sisonuvamu boat muebejarue aribōviahuro sa'aho garomo uvareje: No ari rahu rovere hōjo. Ari rahu rovere hō'i uherihoromo gavareje osore nie'uahe jiamu gagorovo uvareje: No eni javuē'oho boat-oho baeromo ē nie'uahore va'ejarējo.

<sup>40</sup> Ĕhi uvonugoromo boat i'uhoromo namijōro be io'amare inōmo ē hesi ō'oho tarivamu i'u inōmohu'o ō'ohu'o jovore rireromo va'amu boat-oho sasohadeje. Sasohamu boat hunuovarue ijo be nugare ō'oho jiovo nugareje

ëhuro ijo damuoho ma'enoromo hunuovobe va'oröhëro. Jiovo nugoromo burehu ro namiromo boat bava'aje niögoho boat simanonörire ijo namore ba'ojiomoromo be nugareje ëhuro boat-oho nuninö darugo'o va'oröhego. Boat-oho ëhi avohonugoromo eni jiamu gagorovo nie'uahore va'i va'areje.

<sup>41</sup> Va'ihöromo boat-oho nie'u hurihuri'ere iorovadeje. Iorovamu boat simanonöho nie'ure diruvë'ëro unovamu da'irinöho jovo vöröhuro ano dadovo'amadeje.

<sup>42</sup> Dadovo'amamu gagorovo muorovo aribövioho jaburo jöe mevoromo uarovareje: Ë'ego no savoji'e aribövioho muo'amarëjo. Sövöe muoromo va'oruomo'ajëjo.

<sup>43</sup> Ëhi uarovamu jabesi börömohuro Paul bogo guomo'i ma-mae hijöro nimoromo ahëvadeje. Ahëvoromo no uövuadeje: Ae rahu sövö'e jëvë'oho urimo jovohuro revoromo sövöe muoromo va'o ravojiomorëjo.

<sup>44</sup> A ioro'ioroho jemëro ijo ha'ose o boat dadorovade ijo vitu vituoho ujuohoromo jovo döro va'oromo va'o ionoro ravojiomorëjo. Ëhi uövuadeje. Ëhi uöromo no ae aho'obëhe ëhi'oromo va'o ari mare ravojioho barëjareje.

## 28

### *Paul-hu Malta motumoture hijade jöhoje.*

<sup>1</sup> Ari mare ravojiomonugoromo hejareje uvavamu: Ave motumotu hesi ihoho Malta höjo.

<sup>2</sup> Ëhi hejamu ë sa'a arijo'e ariböviohuro huë mabëhe bojamuijareje. Huë mabëhe bojamuiromomo gavare ëne rueromo runone rovamu gagorovo vëne huoromo bövie bise'e ajamuijareje.

<sup>3</sup> Ajamuijamu Paul-ro ijo vëne gagovoromo huduamo va'oromo vënoho huamu gavë'i sigobohuro vëni vöröho juhuonamiromomo höröromo Paul-are övore ja'ihö titimadeje.

<sup>4</sup> Sigobohuro hesi övore ja'ihö titimoromo ëhi iromë'e jiamu ë sa'a rajo-huro garomo uarovareje: Sigobehu ja'ihaje hesi bëhoho iae no gavaruëjo. Hesi bëhoho ë ahuro ae anë'ëro ë'ajëjo. Ëahuro ae anade höjo röhu ë hesi manaho bogo baeromo sö jovoho iromomo guomade höjo. Bogo mana guomadohuni ëhuni i'u bojamuaje aru'ahohuro ë sigoboho uavamu rueromo ja'ihade höjo mana guomöjoro.

<sup>5</sup> Ëhi uarovamu gagoro Paul-ro övoho hijiohijiovamu sigobohuro Paul bogo ja'ihö avohë'e ma-juvo bu'öromomo vënire ravorovadeje.

<sup>6</sup> Vënire ravorovamu gagorovo ë sa'a rajo ariböviohuro uvareje: Sigobëro ja'ihë'ëro nani ë a hesi sinoho huo'a'ajëjo. O ma-majioho sa'are beromo guomo'a'ajëromomo raromoromo muebejareje Paul guomoröhego o diehi ë'oröhego. Muebebe va'ojuvo gavare bogo ëhi ëhi'amu gagorovo uehore gö baeromo uvareje: Nani hu bogo ma-aehu jio'i hu aru'aho böröme anö'e rovë'ëro ëhu'ëro hu mae höjo.

<sup>7</sup> Iae sa'are a börömo hesi sa'aho no raromarue bëhire jiadeje. Ëa börömo hesi ihoho Publius jiadeje. Publius-ro no uövuadeje: Nasi osaro ro raromohëjo. Raromohëjamu va'areje. Va'amu huro huë mae bojamuiromomo ajamuibe va'ojuvo majae niö'i gemu barëjareje.

<sup>8</sup> Huë mae ajamuamu ë a hesi vavuoho guomo guome baeromo raro-madeje. Guomo guome baeromo raromoromo hesi sinoho vörö'iraeromo dë sirövadeje. Ëhi jiamu gagorovo Paul-ro ë guomo guomo a hesi osare va'oromo God-are örire uanugoromo övoho hesi sinore bamamu guomo guomoho barëjareje.



<sup>9</sup> Barëjamu gagorovo guomo guomo baejë'e a ioro'ioroho rueruomamu Paul-ro ajëmamu mae jëvadeje.

<sup>10</sup> Mae jëvamu rajahuiromo suvuore aho'o i'imamuijareje. I'imamuijë'ëro röhu ijonö noro va'iro ë'amu gagorovo inöme rabe rabe no bogojavuajoho ujuohoromo noni boat-re bahijahuareje.

*Paul-hu rueromo Rome amore hijade jöhoje.*

<sup>11</sup> Manaere niö'i gemu barëjamu boat göre iojio mareje. Eboat hesi ihoho Huodi'e Rahëvade Aru'aho Jabesi Boat jiadeje. Eboat-oho urimë'i Alexandria amore jioromo rueromo buru börömo hesi majaroho ë namijuvo buroho barëjamu evare va'iro ë'adeje. Va'iro ë'amu evare no iojio moromo va'areje.

<sup>12</sup> Va'aroho va'o Syracuse amore suorovoromo ë raromoromo majae niö'i gemu barëjadeje.

<sup>13</sup> Majae niö'i gemu barëjamu ë amoho vuonugo'i boat-re va'aroho va'o Rhegium amore suorovoromo ë raromareje. Raromoromo nërö gavare burohuro no va'iro ë'aruinö ë va'amu gagorovo noro ri'öromo boat-oho baeromo va'amu burohuro nosi dejonö boat-oho bijimobe ö'amu evare va'areje. Va'aroho nërö Puteoli amore rueromo sa'are ravo'amareje.

<sup>14</sup> Puteoli amore ravo'amoromo va'oromo Christian aganoho birohëvareje. Birohëvoromo uövuamu jabesi osare va'o raromoromo hurae gemu baejareje. Hurae gemu baeromo Rome amore va'i va'areje.

<sup>15</sup> Va'amu Rome raromarue Christian aganohuro noehu va'arue jöho hegoro nahavuo'i ro vareje. Rueromo a ioro'iorohuro Appius örire bövi bise'o imo'amaruire ro birohavuo'i a ioro'iorohuro nuharue osae niö'i gemu jiajire ë ro birohavuareje. Birohavuamu gëgorovo Paul-ro God huë mae uavamu hesi dë vövöbajo'oho sasohadeje.

<sup>16</sup> Dë vövöbajo'oho sasohamu noro va'oromo Rome amore suorovareje. Suorovamu gavamen a masijëro osae bojamamu Paul-ro hesi sivue hijamu muorovo ae gemuëro hu muebe hijadeje.

*Paul-hu Rome amore hiromo Keriso-are jö majëhijadohoje.*

<sup>17</sup> Ehi'amu majae niö'i gemu barëjamu Paul-ro Jew rajo a masije bëhire raromaruohuni jöe nugö'öromo uëvadeje: Ro gagovorego no jöe ato'irarëjo. Jöe ato'irarëjamu ro gemuoro gagovareje. Gagovamu gagorovo uëvadeje: Jew rajo ö ömo'ömomë nasi jöho hehëjo. Na nosi Jew rajo aganoho bogo sisë vaejëvode höjo. Jew rajo nosi a mami muoho bogo ahëvode höjo. Ehi höjo röhu Jerusalem amore Jew rajo ariböviohuro ëma guduamevoromo Rome rajo jabesi övore bojëmare höjo baejevoromo court vaejevoröhego.

<sup>18</sup> Bojëmamu Rome ariböviohuro baejevoromo court vaejevoromo gavare höjo na mu sisë vaejë'ëro guomo'irode bëhoho bogojiamu. Bogojiamu gagorovo jiovo remö'ö'irögoro ë'are höjo.

<sup>19</sup> Jiovo remö'ö'ia'amu Jew rajo ariböviohuro nijio'iraejëvoromo uëvare höjo: Nadi ehi jië'o'ho ë'ohëjo. Nadi ehi jië'o'ho ë'ohëjamu naro gavode mae va'irode öri göho bogojiamu gagorovo uëvode höjo: Iae na Rome va'oromo a börömo hesi nunire nami'ejöjo. Na ehi uëvode höjo. Röhu na Jew rajo agano jabesi jö sisëho bogojevë'ëro na bogo ehunioho Rome a börömo hesi nuniroho nami'i uvode höjo.

<sup>20</sup> Ehi jië'ëro ehuni jemëni jöe nugö'öromo uëvode höjo: Ruehego na gëromo jemë'o jöe jövöjo. Röhu ave ö'ehu tövevare hesi bëhoho aji mu börömo rueröhego Israel aribövi ioro'io'orehu muebejarujëhi na ehi gemuoho muebejajëro jië'ëro ehuni na ave ö'ohuro tövevë'e höjo.

21 Paul-ro ëhi uëvamu hegoroovo rue Jew rajo ariböviohuro uavareje: Jew rajo Judea sa'are raromarue aribövioho jasi jöho bogo suriroho jajivoromo nugö'öjamu baejë'e javuajëjo. O nosi Jew rajo aganoho Judea sa'are jioromo rovarvaroho jasi jö sisë jöho o jaehu rabe rabe ë'ane jöho bogo majahuijare höjo.

22 Röhu jasi uehoroho diehi jiajoho no he'li naguajëjo. Ëhesi bëhoho ae aho'obëhe dinö'e dinö'e raromaruohuro uvoruomaje höjo: Jaehu uehorovanuëhi ëhi uehorovarue aribövi jabesi öroho sisë höjo.

23 Ëhi uanugoromo majaho bojamiromo uavareje: No ë majare rue'ejarëjo. Ëhi uavë'ëro ë bojamare majaho sisonuvamu Jew raje ae aho'obëhe Paul-are osare rovareje. Rovamu sisonu'e aevoromo Paul-ro jöe majëhiemu majëhibe va'ojuvo va'o vahiromadeje. Majëhiromo uëvadeje: God-hu böröme namiromo muebejavuaje hesi öroho ëhi höjo. Ëhi majëhiromo Moses-are jögoru surire jöhu'o God-are jö baeromo majëhinövare a ioro'ioro jabesi surire jöhu'o adahoromo bëhoho röjëhiromo ëhuro jabesi simanoho huotovëho gavadeje jaburo Iesu mae uehorovo'iröhego.

24 Ëhi'amu hegoro a ioro'ioroho mae uehorovo'i a ioro'ioroho bogo ma uehorovareje.

25 Ëhi'oromo va'oromo Paul-hu jövamu hejare jöho berohemu berohoromo amonö suorovo va'oromo göëro mae uehorovareje göëro bogo. Röhu bogo va'oruomë'iro Paul-ro ave jöhuremu majëhiromo uëvadeje: God-are Aru'ahohuro jemesi jöho iae mae jövade höjo. Ëhesi bëhoho Isaiah jö God-aro baeromo majëhinövade a hesi simanore God-are Aru'ahohuro jöe bojamijade höjo huro jemesi hijo miono'oho uëröhego.

26 Jöe bojamiromo uavade höjo:

Va'oromo ë aribövioho ëhi uënëjo:

Jemë hemu he'a'arujëjo röhu bëhoho bogo avoho he'a'arujëjo.

Jemë gaemu ga'a'arujëjo röhu bëhoho bogo avoho ga'a'arujëjo.

27 Ëaribövi jabesi dë vövöbajo'oho i'uhëgaje höjo.

Hia'oho tugohëhë'e höjo.

Nunoho sigohijëhë'e höjo.

Bogo ëhioho jëvo'ibejajo nunëro ga'ibejarëjo.

Hia'ëro he'ibejarëjo.

Dë vövöbajo'oho sasohoromo jöho bae'ibejarëjo

ëhuro jabumë huotorovoromo rue'ibejarëjo naro avohëvego mae jëvo'ibejajo.

Ëjöho God-are Aru'ahohuro iae mae jövade höjo.

28 Ëhuni ave jöho majëhi'ië'ajëjo jemëro hejëro. God-hu maro ramuaje jö naehu majëhijajoho sa'a ioro'ioro rajo jabesi örire nugö'öjë'e höjo. Jemëhu ma-he taemarujo jabumëro iae he'a'aruëjo.

29 [Paul-ro ëhi uëvamu rue Jew rajoho jaburo darugo'o jö aho'ahamirovobe va'areje.]

30 Ëhi'amu vadune niö'li hesi uhure Paul-ro osae gemu ma-jahuri hiromo monioho mana bojëmibe va'onövadeje. Ëösare hiromo gënövade aëro hu ga'i rue'ego huë mae bojëminövadeje.

31 Huë mae bojëmiromo God-hu böröme namiromo muebejavuaje jöho majëhibe Bada Iesu Keriso-are öroho röjëhibe va'onövadeje. Röhu jö majëhinövadoho aho bogo ahonövareje. O hu'o bogo juhuonivë'e aho jöho ma-sama'e majëhinövadeje. Ahia mino'e.

## ROMANS

*Paul-hu apostle mu hesi bëhi jajivade jöhoje.*

<sup>1</sup> Paul naro ave jöho jajivo'irögoro ë'e. Na Iesu Keriso-are mu vaemu vaejahaje ae jeve. Na apostle jeve ë hesi bëhoho God-ro uev'ëro. Huro na baejevoromo bamevadeje huhu bojamuade jö mahuremu naro ae majëhinövo'irodego.

<sup>2</sup> Ejö maho urimoroho huro hesi jö majëhijarue aribövioho bojëmi'ego jabumëro hesi surire jajivobe rueromo uvonövareje: God-ro iae ëhi ëhi ajamui'ajëjo.

<sup>3</sup> Röhu ë jö maho iae God-are Harihu hesi jöhoje. Hu araeromo a daje baejadire hu David-are uje jiadeje.

<sup>4</sup> Röhu guomamu God-ro hu i'ovoromo hesi Aru'aho Maho bojami avohë'ëro uavadeje: Jaruvo ja nasi Harihe darugo baejë'e ae javajëjo. Eäho hu Iesu Keriso nosi Badaje.

<sup>5</sup> Eäho God-ro uavamu huro Paul na huë baeromo ajemiromo apostle muoho bojemiromo uevadeje: Nasi jöho majëhijego sa'a ioro'ioro raje aho'obëhe mae uehorovoromo jöho ejeho'irarëjo ehuro Keriso nasi ihoho döro jioröhe. Eämuoho bojemamu naro baejë'ëro sa'a ioro'ioro rajoho ajëmijajeje.

<sup>6</sup> Röhu Rome aribövime jemë'o iae ëhi jië'e aribövie jëvo'ego jemë'o ajëmi'irodoho jëve. God-ro jemë'o uëv'ëro ehü'ëro Iesu Keriso-are aribövie gemuoho jëve.

<sup>7</sup> Ehuni Rome amo rajo God-hu rajëhiromo hesi baejëvade aribövime naro jemesi örire jajive. Na nege God nosi Vavuohu'o Bada Iesu Keriso'o huë baeromo ajëmijego maro raromo'irarijego.

*Paul-hu Rome va'oromo amo rajo gë'i nimade jöhoje.*

<sup>8</sup> Urimoho naro Iesu Keriso-are ihore God mabëhe uave ae aho'obëhe jemesi jöëni. Ehesi bëhoho ae aho'obëhe sa'ae dinö'e dinö'e hejarueje atoromo uvoruomavego: Rome aribövioho jaburo Keriso mae uehorovarue höjo. Ehuni jemesi jöëni mabëhe uave.

<sup>9</sup> Iae ave jöho na jö mae jövo'ie'e God-are nuniro. God hu nasi börömohoje. Ehuni God-are nuniro ave jöho jemë mae majëhi'ie'e. Na bogo vuonugo'i majae ëhi jemëni uehorovëvoromo

<sup>10</sup> parie vaejajeje. Urime'i jemë bogo gënövë'ëro ehuni God-are örire uavajeje huro hesi nimoromo nasi öroho avohehego naro ma-marö ö'oromo gë'irodëni.

<sup>11</sup> Ehesi bëhoho na jemë gë'i nego avohe ehuro naro jemë ajëmijego God-are Aru'ahëhu bojamuijaje suvuoroho jemëro baeromo biririvo'irarijego.

<sup>12</sup> Na negajoho jemë'o na'o Keriso mae uehorovë'ëro ehü'ëro ajamirovo'iramu mae javuo'ë'e. Na ëhi nege.

<sup>13</sup> Nasi ö mueno'e na nege ave jöho ga'irarijego. Na majae göro göro ö'ie'oromo muëro böviëro bise'ëro ma'enegro'i hijamu bogo ö'odeje. Na negadeje sa'a ioro'ioro rajo jabumë ajëmibe juvajëhi na jemesirire ö'oromo ëhi jemë'o ajëmiromo ae gö Keriso-arinö ujuohëvo rue'irodëro.

<sup>14</sup> Sa'ae aho'o Keriso-are jöho majëhibe juvo'ëjo. Amore raromarue je'ore raromarue gavë'e bogo gavë'e ëhi jië'e aribövioho aho'o jöho majëhibe juvo'ëjo God-ro muoho ëhi bojëmijë'ëro.

<sup>15</sup> Ĕhuni na nego avohe Rome amore ö'oromo Keriso-are jö maho jemë'o majëhi'irodëni.

*Keriso-are jö mae uehorovë'oho God-hu no i'ovavuaaje darugo røjahuiromo ajamuaje jöhoje.*

<sup>16</sup> Ĕjö ma hesi jöhuni röromo na javojoho bogojevo'i ma-mae jeve. Rabëni ë jö maho ae rahu heromo Keriso mae uehorovë'oho God-ro i'ovavuaaje öroho no røjahuiromo ajamuiromo öri sisënö javuajoho baejavuoromo öri manö ramuajeje. Urimo Jew rajoho ëhi ajëmiromo röhu sa'a ioro'ioro rajohu'o ajëmijego maro raromarueje.

<sup>17</sup> Ĕjö uehorovoromo maro raromarue hesi bëhoho God-ro ë jöe gemuoho bojamuiromo ëhuro hesi muoho røjahuijego no garomo uvarueje: God-hu nosi sisë mu'uvahuo'iröhe öroho aviëhi höjo. Noehu Keriso mae uehorovë'ohuro iae ëhuro God-ro nosi sisë mu'uvahuego hesi nunire mae riravarue höjo. Öre gö bogohöjo. Ĕhi uvarueje. Röhu God-are surire jöho ëhi gemuoho uvë'eje: Ae rahu God mae uehorovoromo hesi nunire mae riravë'oho ë aribövioho iae maro raromo'aruëjo.

*Ae aho'obëhe God-are i'hu hesi uhure raromobe rovere jöhoje.*

<sup>18</sup> Röhu God-ro ö'idöre hiromo røjahuego no garomo uvarueje: Hu sisë aribövioho aho'obëhe jabesi jöëni dë vörönimoromo i'ue mana bojëmaje höjo. Ĕhi jië'e ariböviohuro God bijönimoromo ae sisë vaejëvoruomajeje. Mu sisë vaeromo ëhuro mu ma hesi öroho subivëho'i ë'o garuomajeje.

<sup>19</sup> God-hu diehi jië'e ae jiajoho vituoho gavarueje vituoho bogo. Röhu gavarue vituoho ë sisë ariböviohuro iae va'orahoro garuomajeje God-ro røjëhijë'e jiego.

<sup>20</sup> No bogo nunoho gavarueje God diehi jië'e jiego. Röhu God-hu sa'a bövi bise'o bamadevare evare aëro aevoromo gabe rovereje sa'ae jove bövie bise'e God-hu bamadoho jio'amamu. Ĕhi jiamu gagorovo ëhuro uvobe rueruomadeje: Bövie bise'e aho'o bamë'ëro ëhuni hu bogo ma-aehu jio'i hu gemu böröme jio'i hu gemu eni jië'ëro ëhi jiemu jiobe rovdohö ëhi jiemu jiobe va'a'ajëjo. Ĕhi uvobe rueruomë'ëro jabumë God bogo mana uaruomo hesije: O no ja bogo gavë'ëro jië'ëro ëhuni mu sisëho vaejare höjo. Ĕhi jië'e jöho bogojio'ë'e.

<sup>21</sup> Jabumë iae God jabesi simanëro gabe rueruomadeje. Röhu bogo uvareje: God gemu börömoho hö uvoromo rajahijareje. Suvuoro gö gö bojëmadoho bogo huë mae uavë'e ëma ujuohareje. Ĕhi'oromo God bogo uehorovo'i a'i sisë'i sisë'i uehorovobe nu ano'e ramoramovobe simane sisë maro sisërërovobe rueruomadeje.

<sup>22</sup> Uvobe rueruomadeje: No simano ma'e aribövie javuajë'i simane sisërëbe rueruomadeje.

<sup>23</sup> Simane sisërërovë'ëro ëhu'ëro bogo uvareje: God hu ioro'ioeremu aji'e hijaje ae jio'i ave sa'are aribövioho nomë ma-jahuri raromarue aribövie javuajë uvo'i a'i God ioro'ioeremu jiaje aho bijönimo'i ma-jahuri raromarue aribövi no va'ëne inömoho avohoromo ëhi rajahi'amobe rovereje. A va'ëne ugo va'ëne majo va'ëne sigobu va'ëne ëhi jië'e inömoho avohoromo rajahi'amobe rovereje.

<sup>24</sup> Ĕhi jië'e simano rumo'e muoho vaejë'ëro ëhuni God-ro jabu manunëremu gëromo rëmö'öjadeje jabesi nimarue muoho vae'iröhego. Rëmö'öjamu jabesi nimoromo öëro jijihanovoromo göëro göho mu gö gö vaeromo jabesi dajoho ijumorovobe rovereje.

<sup>25</sup> God hu diehi jië'e a jiaje uehoro maho vuonugo'i sareri'e muohemu uehorovobe rovaruje. God-hu avoho'amade bövioho bise'oho God höromo uvene aho röjahi'amobe rovaruje. Bövi bise'o avohade ë aho bogo uehorovareje. Röhu hesi ihoho ma-mabëhe jiemu jiobe va'ë'e. Iae mae.

<sup>26</sup> Jaburo God bogo uehorovë'ego huro ma-nunëremu gëromo rëmö'öjamu öëro jijihanovobe rovaruje. Iae magonahohuro ama'i'o masurovarue muoho vuonugo'irögoro magonahohuro jabesi arijo'arije sihamirovobe rovaruje.

<sup>27</sup> O ama'ohuro ëhi jië'e mu sisë gemuoho vaeromo vaboro masëgarue muoho vuonugo'i dëre ri'öromo öëro jijihanovoromo a'o a'o sihamirovobe rovaruje. Ëhi jië'e javoji'e mu sisëho vaerovë'ëro ëhu'ëro i'ue mana baebe rovaruje.

<sup>28</sup> Jabumë uvareje: God uehorovë'oho bëhi rumo'e hö uvoruomamu ëhuni God-ro ma-nunëremu gëromo rëmö'öjamu jabesi uehoroho ihesi ma'e sisërëromo bogo ë'o varijëne muoho vaebe rueruomadeje.

<sup>29</sup> Bogo mu maho vaejamu mu sisë göëro göëro jabesi dëho irijiomëhë'eje. Mu sisë uehorovarueje. Bövie bise'e ma-bae taemarueje. Mu gö gö vaejarueje. Ae gö jabesi mu mahuni dë vörönëgajeje. Ae muo'amarueje. Iro muorovo'e vaejarueje. Sareri sareri'e muoho vaejarueje. Nue huodëgarueje. Ëhi jië'e uehoro sisëhuro jabesi dë vövöbajo'ere irijiomëvë'eje. O ae gö jabesi jö sisëho saginiëri atarueje.

<sup>30</sup> A göëro gö hesi ihoho ijumarueje. God nue huodivarueje. A ioro'ioro jabesi ihoho ijumarueje. Döro bamorovarueje. Nimoronimorohë'i atarueje. Mu gö gö barovarueje. Vëmu vavu'o jabesi jöho bogo ejëharueje.

<sup>31</sup> Uehoro maho mu maho huë maho dë maho bövi bise'o maho bogojëve.

<sup>32</sup> Iae garomo uvarueje: Ae rahu ëhi jië'e mu sisë vaejë'oho vuovo hesi höjo God-are jögoroho ëhi jië'ëro. Iae ëhi uvarueje röhu jabumë ëhi jië'e muoho vaejarueje. Röhu bogo jabesi ëma vae'i a'i garöhe ae gö ëhi jië'e mu sisë vaejamu gavë'oho uëvarueje: Iae mu mae vaejarujëjo.

## 2

### *God-hu ae aho'obëhe avoho mevavuo'iröhe jöhoje.*

<sup>1</sup> Nani jero döro bamorovoromo uvo'a'anue: Ëaribövioho sisëgo sisëro va'ë'oho iae mae höjo. Ja ëhi uvo'a'anue röhu jabuhu vaejaruëhi ëhi jië'e mu sisë gemuoho ja'o vaejanueje. Ëhuni God-ro uvajeje: Jero uvanue höjo: Ësisë aribövioho sisëro va'a'aruë uvanuoho ëhuro ja'o i'ue gemuoho bae hesi javajëjo. Ëhu'ëro ja jö God mana ua'iranoho bogojavo'ë'e.

<sup>2</sup> Iae no garomo uvarueje: Ëhi jië'e mu sisë vaejarue aribövioho God-hu i'u mana bojëmijë'oho iae mae höjo.

<sup>3</sup> Ae gö jabesi sisëho mevanueje röhu ja'o iae ëhi jië'e mu sisë gemuoho vaejanueje. Na ja uvanueje: God-hu bojamuijaje i'u'oho na bogo bae'ejöjo.

<sup>4</sup> God-ro huë baejavuo avohoromo nosi sisëho garomo bogo burëroho i'uoho bojamui'i ma-göromo hesi vöröho nimo ëhi taemajeje. Iae ëhi jie röhu na jero uehorovoromo uvanueje: Iae hesi höjo. Röhu huro jasi öriroho bogo ëma huë baejavo'i a'i huhu huë baejavaje hesi bëhoho hu nime jasi dë vövöbajo'oho huotovahego jasi sisëho vuonugoromo hu mae uehorovo'iranego. Röhu ëho ja rabëni bogo avoho uehorovanueje.

<sup>5</sup> Röhu jero mu sisë vaejanuoho bogo vuonugo'i a'i hia'e biriri'övoromo ma-vaemu vaebe va'ego ëhuro God-ro gö'o gö'o dëre dë vörönimobe va'ojuvo hujeji hesi maja bërömohe rue'iramu evare i'uoho sisë maro mana

bojami'iramu bae'a'anue. Ĕmaja bōrōmoroho huro a nuniro namiromo jabesi sisēho avoho mevoromo ae aho'obēhe hesi dēre vōrōho baeromo evare i'ue bojēmi'ē'e.

<sup>6</sup> Aehu diehi jiē'e mu vaejaruoho evare majare huro ēhi jiē'e manaho ae gemu gemu bojēmi'ē'e.

<sup>7</sup> Ae gōero biririvoromo mu mae vaeromo nimarueje hujeji God-ro hesi aji maho bojēmiromo jabesi ihoho mae uēvego ma-ioro'ioeromu God'oraromo'irōhēro. Ĕhi jiē'e aribōvioho God-ro ajēmi'iramu ma-ioro'ioeromu maro raromo'ē'ō.

<sup>8</sup> O ae gōero jabesi sinohemu uehorovoromo God-are jō maho bijōnimoromo ōri sisēro jijihoruomajeje. Ĕhi jiē'e aribōviohuni God-ro dē vōrōnimo'iramu i'ue sisē maro bojēmi'ē'e.

<sup>9</sup> Mu sisē vaejē'oho ae aho'o vi'ehe huē vavaene bae'ē'ō. Jew rajohuro urimo bae'iramu rōhu sa'a ioro'ioro rajoho jabu'o gemuoho bae'ē'ō.

<sup>10</sup> O mu mae vaejē'oho ēhi jiē'e ae aho'o God-ro aji maho bojēmiromo jabesi ihoho mae uēromo ajēmi'iramu huē mae raromo'ē'ō. Jew rajoho urimo ajēmiromo rōhu sa'a ioro'ioro rajoho jabu'o ēhi gemuoho ajēmi'ē'e.

<sup>11</sup> God-ro ae aho'obēhe ma-gemu gōromo sisē bojamuibe mae bojamuibe va'lajeje.

<sup>12</sup> Sa'a ioro'ioro rajohuro Moses-are jōgoroho bogo hejē'e mu sisēho ma-vaeruomajeje. Hesi jōho bogo hejē'e mu sisē ma-vaejaruēro jiē'ēro ēhuni ijōnō God-ro Moses-are jōho bogo majēhijē'e ma-uē'ē'e: Sisē jēvaje sisēro va'ohējo. O Jew rajohuro Moses-are jōgoroho iae hejarueje. Heromo rōhu sisē vaeruomajeje. Heromo rōhu mu sisē vaejaruēro jiē'ēro ēhuni ijōnō God-ro jabesi ōrire Moses-are jōho majēhiromo uē'ē'e: Jemēro hesi jōgoroho ahē'e jēvaje sisēro va'ohējo.

<sup>13</sup> Ĕhesi bēhoho bogo jōgoru hejarue aribōvioho a'i jōgoru ejahoromo mu vaejarue aribōviohuro God-are nunire mae riravo'ē'ō.

<sup>14</sup> Sa'a ioro'ioro rajoho Moses-are jōgoroho bogo hebe rovē'eje. Rōhu hesi jōgoru jiajēhi ēhi jiē'e muoho vae'ē'ō. Vaejē'oho ē hesi bēhoho God-are jōgoroho bogo he'i a'i jabesi uehororo jiē'ēro ē muoho vaejarueje.

<sup>15</sup> Ĕhi vaejēgo noro garomo uvarueje: God-are jōgoru jiajēhi jiē'e mu vaerōhe hesi uehoroho huro jabesi dē vōvōbajo'ere ba'amēhē'e hōjo. Jabesi dēre herovarueje jabesi arijo'ēro mu mae o sisē vaejē'e jiavego. Jabesi uehore gō gō rovego uvarueje: No sisē vaejē'e javuajējo o nani majae gō uvarueje: Mae vaejē'e javuajējo.

<sup>16</sup> Rōhu ēho majaho rue'iramu iae ēhi jio'ē'e. Naehu Keriso-are jō mae majēhiromo ae uēvajēhi God-ro ēhi ē'oromo Iesu Keriso ua'iramu huro ae aho'o jabesi uehoro gurihi taemarohe mevo'ē'e ga'i mae o sisē jiego.

*Mu vaerōhe jōgoru Moses-hu bojēmamu Jew rajehu bogo ejahare jōhoje.*

<sup>17</sup> Rōhu nani jero ae uēvanueje: Na Jew rajēro jevē'ēro iho mabēhe jevajējo. Jero uvanueje: Na Moses-are jōgoru ijore ijore juvaje aēro jevē'ēro ēhu'ēro God-are nunire mae nami'ejōjo. Jero sivue dōro bamorovoromo ae uēvanueje: Na God-are a maēro jevē'ēro ēhu'ēro ma-mabēhe jevajējo.

<sup>18</sup> Iae maeje. God-hu rabe rabe nimajoho jero uehorovanueje. Moses-are jōgoroho hejē'ēro ēhu'ēro jero gavanueje di muoho maho jiego.

<sup>19</sup> Jero biririvo avohoromo uvanueje: Nuni tugorohē'e jabesi ōri rōjēhijaje aho na jevajējo. Ramoramo'ere raromarue aribōvi jabesi ojo jiovēhaje aho na jevajējo ajivēvo'irodoho.

20 Simano bogojië'e aribövi röjehijaje aho na jevajëjo. Asisö'ö röjehijanovaje aho na jevajëjo. Moses-are jögoroho hejë'ëro ëhu'ëro na nuni aji'e jö maho ga barë nahonahov'e jevajëjo. Na ëhi jië'e ae jevajëjo. Nani jero ëhi uvanueje.

21 Iae maeje. Jero a ioro'ioroho jöho röjehanueje. Röhu ja rabëni jasi arijo'arijoho bogo röjahirovanueje. Jero a ioro'ioroho majëhiromo uëvanueje: Nadi vajiohoho ë'orëjo. Iae mae uëvanueje röhu na ja vajiohoho ë'anueje.

22 O jero a ioro'ioroho uëvanueje: Nadi goho'amorëjo. Röhu na ja goho'amanueje. O jero uehorovoromo uvanueje: Sareri vörö'e inömo sisë bëhe jio'amajëjo. Röhu na ja ë inömo uehorovarue osaroho rumo va'ö'amoromo vajiohoho ujuohoromo ë inömo hesi sisëho baejanueje.

23 Jero uvanueje: Na God-are jögoroho hejë'ëro mae jevajëjo. Iae ëhi jie röhu na ja God-are jögoroho ahoromo hesi ihoho ijumanueje.

24 God-are iho ijumanue jöho iae hesi surire ëhi gemuoho uv'eje: Jew raje jemëro sisë vaejago ëhuni sa'a ioro'ioro rajohuro God-are ihoho sisë'i uvarue höjo.

25 Jew rajehu ë'aruëhi ëhi jasi sinoho tariojahë'eje. Ja God-are jögoru ejahamu sino ëhi tariojahë'o'oho ëhuro mae javo'ë'e. O God-are jögoru bogo ejahamu sino ëhi tariojahë'o'oho bogo ëhuro maho javo'ë'e.

26 Ave jöhu'ö uehorovore. Sa'a ioro'ioro rajoho Jew rajo muoho bogo vaeromo sinoho bogo tarivo'amarueje. Röhu jabumë ae rahu God-are jögoru ejahë'o'oho ëhuro God-ro uvo'ë'e: Ëaribövioho sa'a gö raje jio'i röhu Jew rajo jabesi sino tariojëharuëhi jië'e aribövie jëvë'ëro ëhu'ëro jabu'ö nasi aribövi mae jio'amajëjo.

27 Sa'a ioro'ioro raje ae göëro göëro sinoho bogo tarivo'amë'e God-are jögoroho iae ejaharueje. God-ro jabesi mu maho garomo Jew rajoho ja ua'ë'e: Ja nasi surire jöho baejë'e javajëjo. Nasinö javojöro jasi sinoho tariojahë'e höjo. Röhu sa'a ioro'ioro rajehu ë'arëhioho ja rabëni jögoroho bogo ebe rovane höjo.

28 Ëhesi bëhoho ja Jew rajo iho javo'i Jew rajehu ë'aruëhi jasi sino tariojaho'i röhu God bogo uhohu'ö uehorovë'o'oho ja ma-döhemu Jew rajoho javë'ëro ëhu'ëro ja bogo God-are a maho javajeje.

29 Döremu Jew rajo javë'o'oho ëho bëhi rumo'e javo'i a'i Jew rajehu God uehorovaruëhi ëhi uhure uehorovë'o'oho ëho börömohoje. Ëhesi bëhoho bogo jasi sinoho tarioromo avohaho'i a'i jasi dë vövöbajo'oho avohahë'eje. Bogo ma-jajivë'e jögoru ejahoromo aehu jasi sinoho tariojaho'i a'i God-are Aru'ahohuro jasi dë vövöbajo'oho avohahë'eje. Dë vövöbajo'oho avohaho'iramu bogo aehu ja rajahi'i God-ro rajahi'ë'e.

### 3

1 Ëhi jië'o'oho na Jew rajo ariböviohuro sa'a ioro'ioro rajoho iosirëmiromo God-are mu maho baejë'ejö o bogo. O Jew rajo mu vaeromo sino tari-varuoho na ëhuro mae baejë'ejö o bogo.

2 Io'ö mue aho'ö iae mae baejë'ejö. Aevo'i jöho aviëhije. God-ro Jew rajo jabesi övore hesi jögoroho bamadeje jaburo mueberöhego.

3 Jabesi övore bamamu röhu Jew rajo a ioro'iorohuro ë jögoroho bogo avoho ejaho'i vuonugareje. Vuonugarohuni na ëhuni God-ro huhu uëvade muohu'ö vuonugo'i jö göho uehorovo'ë'e o bogo.

4 God bogo mae bogo ëhioho ë'ë'e. Ëhesi bëhoho God bogo sareri'o'oho jio'i hu ma-maëremuje. Ae aho'obëhe sareri sareri'e javuë'o'oho röhu God hu'ö

bogo ëhioho jio'i hu ma-maemu jio'ë'e. God-are surire jöhu'o ëhi gemuoho uvë'eje:

No gavarue höjo God jasi jöho ma-maemu majahuijego.

Aëro uvoruomo'ajëjo: God jasi muoho sisë hö uvoruomo'ajëjo röhu iae ga'ejarëjo jasi muoho mae jio'iramu.

<sup>5</sup> Röhu noehu mu sisë vaeromo God-are mu mahu'o gemuore havoromo gavë'oho ëhuro hesi mu maho ma-va'orahoro jio'ë'e. Ëhuni nani aëro ëho garomo sarerivoromo ave sa'are ariböviehu uvaruëhi ëma uvo'ë'ö: Noehu sisë vaejamu ëhuro God-are mu ma va'orahoro jië'oho noehu mu sisë vaejago huhu i'u mana bojamui'iröhoho ëho sisë höjo.

<sup>6</sup> Röhu bogo ëhiohoje. God-hu a sisë i'u mana bojëmi'iröhoho sisë jio'ibejo hu diehi'oromo sa'a raje aho'obëhe göromo mevavuo'ibejo mae o sisë javuego. Röhu huro ae aho'obëhe iae mevavuo'ë'e. Ëhuni God-hu a sisë i'u mana bojëmi'iröhoho iae maeje.

<sup>7</sup> O nani aëro ëma uehorovoromo uvo'ë'e: Naehu jö sareri jövë'ohuro ëhuro God-are jö maho va'orahoro jio'a'ajëjo. Ëhi jië'ëro God-are ihoho döro jio'a'ajëjo. Nasi sisëhuni hesi ihoho döre jië'oho God-hu na ue'iröhoho: Ja sisë javaje sisëro va'ë ue'iröhoho ëho sisë höjo. Röhu aehu ëhi jövë'oho ëho sisëje.

<sup>8</sup> Ëhi jië'e jöho aviëhi jianove. Ruehego no mu sisë vaejarëjo ëhuro God-are ihoho mae jio'iröhe höjo. Iae aëro Paul nasi ihoho ijumoromo ëma uëvarueje: Nöröro ëhi jië'e jö sisëho jövaje höjo. Ëhi ataruëro jië'ëro sisëro va'oruomë'oho iae maeje.

*Ae aho'obëhe sisë javuaje jöhoje.*

<sup>9</sup> Röhu Jew raje noro God-are mu mabëhe baejë'e javue. Mu mabëhe baejaroho na ëhuro noro sa'a ioro'ioro rajoho mue aho'o iosirëmiromo mae javue o bogo. Bogo. Jew rajohu'o sa'a ioro'ioro rajohu'o no aho'o mu sisë darugo hesi uhuremu javue. Ëjöho na mami'e jajivodeje ga'irarijego.

<sup>10</sup> God-are surire jöhu'o ëhi gemuoho uvë'eje:  
Bogo mae bogo ae gemu vadu'oho maho höjo.

<sup>11</sup> Aho bogo simano maho uehorovoromaje höjo.  
God birohharue öroho bogo nahoruomaje höjo.

<sup>12</sup> Ae aho'obëhe öri maho nugö'ö'i je'oro va'oruomë'e höjo.  
Ae aho'obëhe sisë mae sisërërovë'e höjo.

Bogo mae bogo ae gemu vadu'oho mu maho vaejaje höjo.

<sup>13</sup> Jö sisë ataruohuro ëhuro sisë bëhe jëvajëjo.

Ae guavoromo bogo duho'i ma-nugego usihövo rojomajëhi jabesi huë gagore ëhi rojomanovaje höjo.

Jö'ëro jö sareri sareri'e atoromo jövëro rovanovaje höjo.

Bitaro vuodovë'ohuro bitaro gagore sigobu vörö va'ënoho rojomaje höjo.

<sup>14</sup> Jö'ore ajuo'e rojomego nu huë'e jöemu atarue höjo.

<sup>15</sup> Hörohuro tutuvo va'oromo ae muo'amarue höjo.

<sup>16</sup> Dinö'e va'ë'iroho bövie bise'e ijumobe ae huë vavaene bojëmibe va'arue höjo.

<sup>17</sup> Huë mae bae'iröhe öroho bogo gavë'e höjo.

<sup>18</sup> Simanohuro God bogo uehorovë'e ma-jijiharue höjo.

God-are surire jögoroho ëhi uvë'eje.

<sup>19</sup> Ëmu sisë vaejarue jöho iae no gavarueje. God-hu ë jö bojamuijade hesi bëhoho ëhuro Moses-are jögoru hesi uhure raromarue ariböviohuro heromo jabumë'o sa'a ioro'ioro rajohu'o ae aho'obëhe jö mana uaröhoho



bogojavuego jö'e tugorohoromo hesi nunire gövögövövë'e riravo'iröhego ae aho'obëhe maja hö'öjajire beva'ajire.

<sup>20</sup> Gövögövövë'e riravo'iröhe hesi bëhoho aehu mu vaeröhe jögoru heromo ijore ijore va'ë'oho bogo ëhuro God-are nuniroho maho riravo'i a'i ma-uvarueje: Noro ë jögoroho bogo avoho ejaruëro javuë'ëro sisë javuajëjo.

*Keriso mae uehorovaruohuro ëhuro God-are nunire mae riravarue jöhoje.*

<sup>21</sup> Iae ëhi sisë javue röhu jaruvoroho noehu hesi nunire mae riravo'iröhe öroho God-ro röjahuijë'eje. Moses-are jögoru surire o jö God-aro baeromo ae majëhinövare aribövi jabesi surire ë hesi öroho iae jajivë'eje. Röhu ë öroho bogo jögoru heromo mu vaeröhe örehu jio'i a'i öroho aviëhije.

<sup>22</sup> Aehu Iesu Keriso mae uehorovë'ohuro ëhuro God-ro nosi sisëho uehorovoromo vuonugego hesi nunire mae riravarueje. Ae aho'obëhe mae ae rahu Keriso mae uehorovë'oho ëhi ajamuijajeje. God-ro gövuajeje no ae aho'obëhe bogo göho göho javuo'i ma-gemuoho javuego.

<sup>23</sup> No ae aho'obëhe sisë vaejë'ëro God-are aji'e muoho vae'iröhoho bogo eni javuego ma-raromarueje.

<sup>24</sup> Röhu God-ro hesi uehorovoromo no huë mae bojamuiromo Iesu Keriso noni guomöjoro sa'are nugö'öromomo ëhuro sisë hesi darugore javuadoho baeniahijë'ëro no hesi nunire mae riravarueje.

<sup>25</sup> God-ro Keriso nugö'öjadeje hesi köho rueromo guomego noro ë muoho mae uehorovego God-ro nosi sisëho dejonö bu'öjego hesi dë vörönimadoho barë'iröhego. God-ro nosi sisëho ëhi ajamuijade hesi bëhoho röjahuijego noro garöhego hu maemu vaejaje ae jiego. Ehesi bëhoho mamioho aëro sisë vae'ego God-ro ma-taemorovoromo nunëremu gëbe ruenövadeje.

<sup>26</sup> Avevejö'oho nosi sisëho bogo ma-nunëremu gö'i a'i Keriso nosi sisëni nugö'öjahuadeje. Hu nimadeje röjahuijego noro garöhego hu maemu vaejaje ae jiego. Noro garöhego hu mu maemu vaejajoho o Iesu mae uehorovarue aribövi nosi sisë mu'uvahuego hesi nunire mae riravaruoho.

<sup>27</sup> Ehi jië'oho no diehi nimorohë'i uvo'ejo: Nosi birirohuro God-are nunire mae javuajëjo. Ehi jië'e jöho bogoje. Ehesi bëhoho rabëni no bogo ëhioho uvo'ejo. Na nosi birirohuro mu vaeröhe jögoroho baejë'ëro ehuni no bogo nimorohë'ioho atarueje. Bogo ehiohoje. Nosi biriroho bogo a'i God-are birire mae uehorovo'iröhe jögoroho baejë'ëro ehuni bogo ehioho ato'ejo.

<sup>28</sup> Ehesi bëhoho rabëni. Noro uehorovoromo uvarueje: Jew rajo mu vaeröhe jögoru ijore ijore va'ë'oho bogo ëhuro God-are nuniroho maho riravarue hö uvo'i a'i Keriso mae uehorovë'oho ëhuro God-are nunire mae riravarue höjo.

<sup>29</sup> Jew rajo mu vaejë'ohuro ëhuro maro javuo'ibejo no uvo'ibejo: God hu ma-Jew rajohemu muebe'amaje höjo. Röhu hu bogo jabumëremu muebejëvo'i a'i sa'ae aho'o muebe'amajeje.

<sup>30</sup> Iae God hu ma-gemuje. Huro Jew rajohu'o sa'a ioro'iorohu'o mae riravoröhe öre gemuoho röjëhijajeje. Jew rajohu'o sa'a ioro'ioro rajohu'o jabumë Keriso mae uehorovë'ohuro ëhuro ajëmijego mae riravarueje.

<sup>31</sup> Keriso mae uehorovo'iröhe jöho baejë'ohuro na no ëhuro God-are jögoru mamioho aharueje. Bogo aho'i a'i ëho ma'eno titimarueje.

## 4

*Abraham bogo aehu hesi sino tariojaharohuro bogo ëhuro God-are nunire mae nami'i a'i huhu God mae uehorovadohuro ëhuro God-are nunire mae namijade jöhoje.*

<sup>1</sup> Bëhe vaeromo jiade Jew rajo nosi hijoho Abraham jie. Röhu Abraham-hu gavade God-hu diehi ajamamu gavade jöho no uehorovo'ejo.

<sup>2</sup> Nani aëro uvo'ë'ö: Abraham-hu God-are nunire mae nami'ië'adevarocho huro mu mae vaeromo ëhuro God-are nunire mae namijade höjo. Ëhuni döro bamorovoromo nimorohë'i uvo'ibejajo: Naro nasi birivoromo ëhuro God-are nunire mae namijaje hö uvo'ibejajo ëho iae mae jio'ibejajo. Nani ëhi uvo'ë'ö. Röhu God-hu gavajoho Abraham-hu döro bamorovo'iröhoho bëhoho bogoje.

<sup>3</sup> God-are surire jöho ëhi uvë'eje: Abraham-ro God-are örire mae uehorovoromo uvade höjo: Hesi God-ro ajemi'ajëjo. Huro mae uehorovamu gagorovo God-ro huni vavaenimoromo uvade höjo: Na gavajoho hesi sisëho barë'ego iae hu a mae höjo.

<sup>4</sup> Röhu göehu gö hesi mu vaejhamu ë hesi mana bojamamu gavë'ocho uvarueje: Ëaho bogo ëma vavaenimoromo suvurocho bojami'i a'i mu vaejadohuni hesi manaho bojamade höjo.

<sup>5</sup> O ae göehu mu mae bogo vae'i ma-uvë'ocho: Iae mae-ëjo. No a sisë javuë'ego God-ro nosi sisëho mu'uvahuego hesi nunire mae riravarue höjo. Ëhuni hesi huro na'o ajemi'iramu mae jevo'ajë uvë'ocho God-ro uvajeje: Ëhuro na mae uehorovevë'ëro ëhu'ëro na gavajoho hesi sisëho barë'ego iae hu a mae höjo.

<sup>6</sup> David-ro jöe gemuoho jajivadeje. Aehu bogo hesi birivoromo mu mae vae'i ma-God mae uehorovego God-hu vavaenimoromo ajamego hesi nunire mae namiromo huë mae baejaje jöho David-ro God-are surire jajivoromo ëhi uvë'eje:

<sup>7</sup> O asë'e mabëhëjo.

Aehu God-are jö ahamu huhu uehorovoromo vuonugahuë'ocho mu sisë vaejamu u'ovahuë'ocho no huë mae baejarue höjo.

<sup>8</sup> Noehu sisë vaejaroho Badahu bogo ijonö jö majahuijë'ocho ëhuro no huë mae baejarue höjo. Ëhi uvë'eje.

<sup>9</sup> Röhu ë huë ma baejarue ariböviocho rahumëje. Na ma-Jew rajo mu vaeromo sino tarivo'amarue ariböviochuremu God-are nunirocho maho riravoromo huë maho baejarueje. O na sa'a ioro'ioro rajohu'o ëhi gemuoho huë mae baejarueje. Bogo Jew rajohuremuocho a'i Jew rajo mu bogo vaeromo sino bogo tarivo'amarue ariböviocho jabu'o ë huë maho baejarueje. Ëhesi bëhoho urimë'i naro ave God-are surire jöho adahoromo jajivë'e jeve. Jajivoromo uëvë'e jeve: Abraham-ro God-are örire mae uehorovoromo uvade höjo: Hesi God-ro ajemi'ajëjo. Huro mae uehorovamu gagorovo God-ro huni vavaenimoromo uvade höjo: Na gavajoho hesi sisëho barë'ego iae hu a mae höjo.

<sup>10</sup> Röhu rabu'e majare God-ro uvadeje: Abraham hu mae höjo. Na hu sino tarijahare maja hesi urimo o ijonö evare uvadeje. Sino tarijahare maja hesi urimo evare God-ro uvadeje: Abraham hu mae höjo.

<sup>11</sup> Abraham mae hö uvonugoromo ijonö God-ro sino tarivoröhe muocho Abraham bojamadeje ae aho'o ëho garomo uvoröhego: Urimë'i sino bogo tarijahare majare Abraham-ro God mae uehorovoromo ëhuro hesi nunire mae namijade höjo. Ëhu'ëro jië'ëro Abraham-hu ë'adëhi Jew rajo mu bogo vaeromo sino tarivo'amë'e ma-God mae uehorovoromo hesi nunire mae riravarue ariböviocho ë aribövi jabesi bëhoho iae Abraham-je.

<sup>12</sup> Röhu Jew rajo mu vaeromo sino tarivare aribövie gö gö nosi bēhoho iae Abraham gemuje. Ĕhesi bēhoho Abraham ě'adēhi nosi sinohu'o tari-vahuē'eje. Röhu ēho ma-jianovo'i a'i Abraham sino bogo tarijahē'e mahijade majare huhu God mae uehorovadēhi Jew raje ae rahu ēhi gemuoho God mae uehorovē'oho ēhuro Abraham hu nosi bēhohoje.

*Noehu jōgoru ejaruohuro bogo ēhuro God-are huē maho nosiroho rue'i a'i noehu God mae uehorovoromo ĥesi nunire mae riravaruohuro ēhuro God-are huē mahuro nosirire rovajeje. Ĕhesi jōhoje.*

<sup>13</sup> God-ro Abraham uavadeje: Ave jōho na mae uavajējo. Naro ja'o jasi ujohu'o sa'ae aho'o bojēmi'iramu bae barē'arujējo. Rabēni baerōhego God-ro uavadeje. Bogo Abraham-hu mu vaerōhe jōgoru ejahadohunioho bogo ēhunioho God-ro mana uavadeje: Sa'ae aho'o bae barē'arujējo. A'i Abraham-ro God mae uehorovoromo uvadeje: Hesi God-ro ajemi'ajē uvadohuni ēhuni God-ro uvadeje: Na gavajoho Abraham-are sisēho barē'ego hu mae hō uvadohuni ēhuni uavadeje: Sa'ae aho'o bae barē'arujējo.

<sup>14</sup> O God-ro uō'ibejo: Ave jōho na mae uēvajējo. Jemēhu jemesi biririv-romo mu vae'irarije jō ejehē'ohuro ēhuro na sa'ae aho'o bojēmi'ejōjo. O bogo ejehē'oho bogo bojēmi'ejō uō'ibejo no mae uehorovoromo uvaruoho: Hesi God-ro ajamui'iramu mae javuo'ajē uvaruoho ē hesi bēhe bogojio'ibejo. O nosi biriroho bogo eni javuē'ero huhu bojamui'i uōvuadoho bogo bae'ibejo. Röhu bogo ēhiohoje. Mu vaerōhe jōgoru ejaharuohunioho God-ro bogo ēhunioho ajamui'i a'i noehu hesi ōrire mae uehorovaruohuni ēhuni ajamuajeje.

<sup>15</sup> Mu vaerōhe jō God-hu bojamuadoho no bogo ejahego mae javuo'i a'i ahego God-ro no göromo dē vōrōnimego i'ue bojamuajeje. O mu vaerōhe jōgoroho bogojio'ibejo bogo aho'ibejo.

<sup>16</sup> Ĕhu'ero jiē'ero God-hu no ajamui'i Abraham uavadoho ēho no bogo mu vaerōhe jōho ejahoromo bae'i a'i God mae uehorovoromo ēhuro baejarueje. Ĕhu'ero God-ro bogo nosi muoho garomo huhu Abraham uavadēhi ēhi mana ajamui'i a'i hesi ěma nimoromo huhu Abraham uavadēhi iae hu ēhi ajamuego ēhuro Abraham-are ujoho no ae aho'obēhe iae baejarueje. Bogo Moses-are jōgoru ejaharue aribövie gemuohemuoho bae'i a'i ae rahu Abraham-hu ě'adēhi God mae uehorovē'oho iae bae'ejo ē hesi bēhoho God mae uehorovarue aribövioho aho'obēhe nosi bēhoho Abraham jiē'ero.

<sup>17</sup> Abraham nosi bēhi jio'irōhe jō God-hu Abraham uavadoho God-are surire jajivoromo ēhi uvē'eje: God naro ja ajami'iramu ēhuro sa'a gö gö raje aho'obēhe jabesi hijoho ja javo'ajējo. Ĕhu'ero jiē'ero noehu God mae uehorovarue aribövie aho'obēhe nosi bēhoho Abraham-je hu God-are nunire ēhi jiē'ero. God gemu Abraham-ro mae uehorovadeje. God hu vuovē'e aho ajamuijego i'ovavuaje ahoje. God-hu uvego urimo bogojio'amē'e bövi bise'o ěma jio'amaje ahoje. God hu ēhi jiē'e a jiajoho Abraham-ro hu mae uehorovadeje.

<sup>18</sup> Mae uehorovamu God-ro uavadeje: Sa'ae gö gö aho'obēhe jabesi hijoho ja javo'ajējo. Ĕhi uavamu Abraham-ro uvadeje: Diehi'oromo bae'ejōjo. Ōroho bogohōjo. Iae ēhi uvadeje röhu huro God mae uehorovoromo uvadeje: Iae hesi hōjo. God-hu uevadēhi iae ēhi jio'a'ajē uvoromo hiromo muebejadeje. God ēhi mae uehorovoromo muebejē'ero ēhu'ero Abraham sa'ae gö gö aho'obēhe nosi bēhoho jiē'eje. Nosi bēhi jiorōhe jō God-hu Abraham uavadoho God-are surire ēhi uvē'eje: Abraham jasi ujoho aho'obēhe jiji va'ēne jiobe va'a'ajējo. Surire jō jiadēhi iae ēhije.

19 Röhu Abraham vadune aho'obëhe 100 rabu'e bae'irögoro ë'ë'ëro ëhu'ëro hesi sino haho'e u'uhoromo guomanovë'e jiadeje. O hesi vaboroho Sarah dë tjojë'e magonahe jiadeje. Baruohu'o vaborohu'o ëhi sisërëjävë'e jiadeje. Röhu Abraham-ro uehorovoromo uvadeje: Iae ëhi höjo röhu God-ro iae uje bojemi'iramu ëhuro aho'obëhe jieho'ajëjo. Abraham-ro ëhi birivoromo God mae uehorovobe rovadeje.

20 God mae uehorovadoho hu bogo vuonugoromo uvadeje: Na God-hu uevadëhi ëhi jio'a'ajëjo o bogajo. Bogo ëhioho uvo'i a'i biririvo avohoromo God mae uehorovobe rovadeje. Mae uehorovobe rueromo God-are örire rajahiromo

21 uvadeje: Iae mae-ëjo. God-hu uevadëhi ëhi ajemi'iröhoho iae hu eni jiajëjo.

22 Ëhi mae uehorovoromo uvamu gagorovo God-ro Abraham-ni uehorovoromo uvadeje: Ëhu'ëro na gavajoho hesi sisëho barë'ego iae hu a mae höjo.

23 Röhu ë jöho bogo Abraham-nioho gemu jajivo'i

24 ae aho'obëhe nosi jöhu'o jajivë'eje. God-hu no ae rahu mae javuajë uvoromo baejavuade aribövi nosi jöhoje ë hesi bëhoho no Iesu nosi Bada i'ovade ae God hesi örire mae uehorovaruëro jië'ëro.

25 Röhu God-ro Iesu a övore bojëmadeje baeromo anego nosi sisëhuni guomoröhego. Guomamu God-ro hu ajamijamu i'ovoromo ri'öjadeje ëhuro noro God-are nunire mae riravo'iröhego.

## 5

*God-are nunire mae riravaruëro jië'ëro hu'o huë mae baeromo nimoroharue jöhoje.*

1 Noro Keriso mae uehorovamu God-ro nosi sisëho mu'uvahuamu hesi nunire mae riravë'ëro javuë'ëro ëhu'ëro God'o no'o gemuoro mae raromarueje nosi Bada Iesu Kerisoro buore vaejavuë'ëro.

2 Buore vaejavuoromo ajamuijë'ëro ëhuro no God-are huë maho bihoromo birivoromo hesi nunire mae riravarueje ë hesi bëhoho noro hesi örire mae uehorovë'ëro javuë'ëro. Hesi nunire mae riravoromo noro uvarueje: Noro God-are aji mare rarom'ejarë uvoromo ëhuni noro nimorohë'i muebejarueje.

3 Röhu göho no huë vavaeni bövi bise'o baejë'iroho ëhu'o nimoroharueje. Rabëni hesi bëhoho no uvarueje: Huë vavaeni baejë'ohuro ëhuro birire baeromo God mae uehorovobe va'arue höjo.

4 Birivoromo God mae uehorovobe va'ë'ohuro ëhuro God-ro uvajeje: Jemë ruahö'öjë'e jëvajë uvajohuro ëhuro no dë ma-mabëhe jioromo muebejarueje ijönö huro ajamuego ma-mabëhe javuoröhego.

5 No mabëhe javuo'iröhego muebejaruoho ëho bogo sarerivoromo ë'arueje. Ëhesi bëhoho God-ro hesi Aru'ahoho no bojamuijë'ëro no dë vövöbajo'ere herovarueje God-ro no mabëhe uehorovavuo avohego.

6 God-hu no uehorovavuae öroho aviëhije. Urimoho nosi arijo'arije ajamirovë'ohoho bogo eni javuadeje. Bogo eni javuobe rovamu God-hu nimate majaho rovamu evare Kerisoro guomadeje hu bijönimarue aribövioho ajamui'iro.

7 O noro garöhe ae gö mae jië'e hu ëma vörö'ere hijamu gagorovo hu ajami'i vuovorovë'ohoho ëho juhuoni'e muego nani no hu bogo ajami'ejo. O ga'iröhe ae gö huë bae avohaje a mabëhe jië'e hu ëma vörö'ere hijamu

gavë'oho hesi nani'o. Nani no hu ajami'i biririvoromo vuovorovo'ejo nani bogo.

<sup>8</sup> A'i Kerisoro gavade no sisë aribövie javuamu evare huro no ajamui'i guomorovadeje. No sisë aribövie javuamu evare guomë'ëro jië'ëro ëhu'ëro God-ro no røjahuijë'eje noro garomo uvoröhego: God-ro no uehorovavuo avohaje höjo.

<sup>9</sup> No ae sisë javuamu evare Kerisoro noni guomë'ëro ëhu'ëro no God-are nunire mae riravarueje. Ëmuoho i'u'e mae jiadeje. Ëhuni no biririvo avohoromo uvo'ejo: Kerisoro mami'e ajamuijë'ego majae ijönöho God-hu bojamui'iröhe i'uooho no bogo bae'ejarejo.

<sup>10</sup> Hu'o no'o gororamirovarue aribövie javuamu evare hesi Harihoho noni guomamu ëhuro hesinö ramuadeje. Ëmuoho i'u'e mae jiadeje. Ëhuni biririvo avohoromo uvo'ejo: God-ro mami'e hesinö ramuë'ëro jië'ëro hesi Harihe biririvoromo hijajohuro ëhuro God-ro baejavuoromo maro bamavuo'iramu mae javuo'ajëjo.

<sup>11</sup> Iae u'emu mae javuo'ë'e röhu avevejö'ohu'o no God rajahiromo nimoroharueje nosi Bada Iesu Keriso-are jöëni ë hesi bëhoho huro mami'e vöröho tugohahuoromo God-arinö ramuë'ëro.

*Adam-hu mu sisë vaejamu vuovarue muehu rue'i Kerisohu mu mae vaejamu i'ovarue muehu rovade jöhoje.*

<sup>12</sup> Ëhi jië'ëro urimoho ae gemuëro aevoromo mu sisëho vaejadeje. Ae gemuëro mu sisëho vaejamu ëhuro mu sisëho sa'are rovadeje. Sisëho rovamu ëhuro aevoromo aho vuovëvadeje. Vuovëvë'ëro ëhuro no ae aho'obëhe vuovavuobe rovajeje ae aho'obëhe mu sisë vaejë'ëro.

<sup>13</sup> Urimë'i Moses-hu God-are jögoru bogo barovadevare evare mu sisëho iae sa'are jiove rovadeje. Röhu Moses-are jögoroho bogojiamu aribövioho ëho bogo heromo ahë'ëro ëhuni God-ro mu sisëho gemu gemu garomo bogo adaho'i ma-nunëro gëbe rovadeje.

<sup>14</sup> Mu sisëho bogo adaho'i ma-nunëremu gëbe rovamu röhu Adam-hu mu sisë vaejadevare evare ae aho'obëhe aevoromo vuovobe rovadoho röhu evare Moses rovadeje. Ëaribövioho Adam-hu God-are jö heromo ahadëhioho bogo ëhioho heromo ahobe rovë'e jabu'o vuovëvobe rovadeje.

Röhu Adam hu God-aro jioromo ijönö sa'are rovade aho Keriso va'ëne ëhi jianove.

<sup>15</sup> Iae ëhi jie röhu Adam'o ijönö sa'are rovade ahu'o ae niö'i jabesi muoho bogo gemuoho jio'irögoro gö gö jiadeje. Gö gö jië'ëro God-are suvuorohuro Adam-hu sisë ë'adoho iosiramijë'eje. Ëhesi bëhoho Adam hu ma-gemu jiadeje. Huro God-are jöho ahamu ëhuro ae aho'o vuovëvobe rovë'eje. Iae ëhi jie röhu Iesu Keriso hu'o ma-gemuje. Röhu God-ro no huë baejavuoromo ë aho uavamu nosi sisëho ajamuijë'ëro ëhu'ëro ae aho'obëhe hesi huë maho bae avohobe maro raromobe rovë'e javue.

<sup>16</sup> Ae gemuëro sisë vaejë'ëro ëhu'ëro no'o sisë javue röhu God-are suvuoro-huro ë muoho iosiramijë'eje. Ëhesi bëhoho huro mu sisë gemu vaejë'ëro ëhu'ëro God-ro no uövuajeje: Jemë'o sisë'e aribövie jëvajëjo. A'i noehu mu sisë aho'obëhe vaejaruoho God-ro hesi nimoromo huë baejavuoromo uövuajeje: Jemesi sisëho iae mu'uvëhë'e höjo.

<sup>17</sup> Ae gemuëro mu sisë vaejë'ëro ëhu'ëro a vuovavuaje muoho börömoraejë'eje ae gemuëro huro ëhi sisë ë'ë'ëro. Ëhuni no biririvo avohoromo uvo'ejo: Ae gemu Iesu Kerisoro ajamuijë'ëro ëhu'ëro ae rahu God-are suvuoro mabëhe baeromo aevoromo hesi nunire mae riravë'oho

ëhi jië'e aribövioho noro bogo vuovo'li Keriso-are darugoho baeromo masije riravo'ejarëjo.

18 Ëhu'ëro jië'ëro mu sisë gemu jië'ëro ëhuro ae aho'o God-are nunire sisë'e javue. A'i ae gemuëro mu maho vaej'ëro ëhuro ae aho'obëhe nosi sisëho mu'uvahuë'ego no God-are nunire mae jioromo hu'o maro raromo'ejo.

19 Ëhesi bëhoho ae gemuëro God-are jöho ahamu ae aho'obëhe sisërëjavuadeje. A'i ae gemuëro hesi jöho ejahë'ëro ëhu'ëro ae aho'obëhe hesi nunire marëjavuo'ë'e.

20 Moses-are jögorehu ijönö rovade hesi bëhoho aëro ëho heromo biriri'övoromo jöho ahobe va'ego mu sisë börömo bëhe ma-va'orahoro jioröhego. Mu sisë böröme jio'amadeje röhu God-ro hesi nimoromo huë baejavuoromo bogo bise'o vadu'oho ajamuiromono nosi sisëho iosir-ami'amoromo hesi mu börömoho röjahuijadeje.

21 Ëhu'ëro urimoho mu sisëho börömoho jiadeje. Mu sisë hesi uhure javuë'ëro vuovavuonövadeje. Jaruvoho God-hu huë baejavuade muoho börömohoje. God-are huë ma hesi uhure javuë'ëro hesi nunire mae riravarueje. Mae riravoromo ma-ioro'iore gemu maro raromo'ejo nosi Bada Iesu Kerisoro ajamuij'ëro.

## 6

*Noehu Keriso'o bimuovoromo hu'o vuovanovoromo uehoro mami vuonugo'i i'ovoromo uehoro i'e baejarue jöhoje.*

1 God-hu hesi nimoromo huë baejavuoromo nosi sisëho ajamuij'ë'oho no diehi uvo'ejo. Na no uvo'ejo: Ë'ego no ëhi ma-mu sisëmu vaebe va'ego nosi sisëho aho'o jiego God-ro no huë baejavuo avohoromo mu'u'amajo.

2 Bogo mae bogo ëhioho uvo'ejo. Mu sisë uhure javuadoho no vuovaruëhi ëhi jianovoromo iae barëjahuë'eje. Ëhi jië'oho no diehi vuonorö'öromono mu sisë hesi uhuroho biririvoromo raromonövo'ejo. No bogo ëhioho ë'ejo.

3 Ave jöho jemë'o uehorovo'ibejarije. Ae rahu bapataeto vaejamu Iesu Keriso'o gemuore bimuvavuë'oho ëhuro hu'o gemuore bimuovoromo vuovavuë'eje.

4 Ëhuni no bapataeto vaejamu ëhuro Keriso'o bimuovoromo vuovoromo hu'o gemuore sa'a gagore raromareje ëhuro Vavuehu hesi aji'e darugohuro ajamamu Kerisohu guomadoho i'ovoromo ri'öjadëhi ëhi no'o mu i'ore raromo jijihonövoröhego.

5 No Keriso'o gemu mae bimuovoromo hu guomadëhi no'o ëhi vuovaru-huni ëhuni iae no Keriso'o gemu mae bimuovoromo hu i'ovadëhi no'o ëhi i'ovoromo mu i'e bae'ejo.

6 Ave jöho iae no gavarueje. No Keriso'o gemu mae bimuovoromo korosire ano taemavuoromo hu'o vuovavuade hesi bëhoho sisëhu nosi uehorore dajore biririvobe rovadoho barëjahuego ëhuro mu sisë hesi darugore javuadoho ijönöho bogo vaenövoröhego. Ëhuni no Keriso'o gemu mae vuovavuë'eje.

7 Keriso'o gemu mae bimuovoromo vuovavuë'iroho sisë uhure javuadoho iae barëjahuë'eje.

8 No Keriso'o gemu mae bimuovoromo vuovavuë'ëro ëhuni no mae uehorovoromo uvarueje: Iae no i'ovoromo hu'o gemu mae raromonövo'ejarëjo.

<sup>9</sup> No ëhi uehorovarue hesi bëhoho no gavaruoho God-ro ajamamu Keriso guomoromo ri'öjël'ëro hiromu röhu maho bogo guomo'e'e hu guomoröhe hesi vöröho ruahö'öjël'ëro.

<sup>10</sup> Keriso urimo guomadeje. Ëhesi bëhoho hu guomoromo ëhuro sisëho ioro'iore gemu taemadeje. O jaruvoho iae hu hije ë hesi bëhoho hu God'o gemu mae hijajëro jil'ëro.

<sup>11</sup> Ëhuni jemëro uvore: No'o vuovavuamu ëhuro ma-ioro'ioyemu mu sisëho taemë'e javuajëjo. Röhu no i'ovoromo Iesu Keriso'o gemuore javuël'ëro iae God'o gemu mae raromaruëjo.

<sup>12</sup> Ëhuni mu sisë uehoro sisë jemesi vuovëvoröhe sinehu nimajoho ëho nadi ejahorego ëhuro sisëho jemë bogo ruahö'öjël'ëro.

<sup>13</sup> O jemesi öve höre simane rabe sisë öriroho nadi bojamirovoromo mu sisëho vaere. A'i uvore: No i'ovoromo mu i'e bæjël'e aribövie javuajë uvoromo jemesi dë vövöbajo'e aho'o ma-God gemu bojamirovoromo jemesi öve höre simane rabe ëhu'o hesi öroro bojamirovoromo mu mae vaere.

<sup>14</sup> Mu sisëho jemë bogo ruahö'öjël'ë'e. Ëhesi bëhoho God-are jögoru aharuje ë hesi i'uoho bogo bæ hesi jëve. God-ro hesi nimoromo huë bæjëvoromo jemesi sisëho uehorovoromo vuonugëhajeje. Jemë ëhi maro raromarujeje.

*Mu ma hesi darugoremu raromarue jöhoje.*

<sup>15</sup> Jögoru aharue hesi i'uoho bogo bæ'i God-are nimoro nosi sisë uehorovoromo vuonugahuël'oho na no ëhuniöho mu sisëho vae'ëjo. Bogo mae bogo ëhioho ë'ëjo.

<sup>16</sup> Jemë'o uehorovore. Jemë ae gö hesi jöhemu ejahoromo hesi muohemu vaejaho'i nëgamu jemesi arijo'arije bojamirovël'oho ëhuro jemë ë a hesi darugoremu raromaruje. Jemë mu sisëmu vae'i nëgamu bojamirovël'oho ëhuro jemë sisë hesi darugoremu raromoromo vuovoromo sisëro va'o hesi jëve. O God-are jö ejahoromo hesi muemu vaejaho'i nëgamu bojamirovël'oho ëhuro hesi darugoremu raromoromo hesi nunire mae jëvajeje.

<sup>17</sup> Röhu na God mabëhe uave. Ëhesi bëhoho urimoho jemë mu sisë hesi darugoremu raromonövarijeje röhu avevejö'oho jemë God-are jö diehi diehi röjëhijamu hejarijoho ë jöho jemesi dë vövöbajo'e aho'obëhe ejaharujeje.

<sup>18</sup> Mu sisë hesi darugoremu raromarijoho God-ro jiovëhadeje. Ëhu'ëro ae göehu gö hesi darugoremu hijajëhi ëhi jemëro mu ma hesi darugoremu raromarujeje.

<sup>19</sup> Ae göehu gö hesi darugoremu hijajëhi jemëhu mu ma hesi darugoremu raromaruje jö naehu uëvaje hesi bëhoho nasi jöho sama'e huruohë'e jioröhego jemesi uehoroho u'uhëvego bogo avoho hejööni. Urimoho jemëro jemesi öve höre simane rabe aho'o bojamirovarijeje ëhuro va'inumi'e mu o mu sisë gö gö hesi darugoremu raromoromo ëhi jil'ë'e muohemu vaenövo'irarijëro. O avevejö'oho ëhi jemesi öve höre simane rabe aho'o bojamirovoromo mu ma hesi darugoremu raromoromo God-are mu mahemu vaenövore.

<sup>20</sup> Urimë'i jemë mu sisë hesi darugoremu raromarijevaroho evaroho mu ma hesi darugorocho bogo raromo'i ma-raromarijeje.

<sup>21</sup> Ma-raromoromo mu sisë vaejarijoho uehorovoromo javojëge. Röhu evare majare ëhi jil'ë'e mu sisë vaejarijoho ë hesi maho rabe bæjarijeje. Bogojiadeje. Ëhi jil'ë'e mu sisë vaejël'oho ëhuro ma-vuovoromo sisëro va'arujeje.

<sup>22</sup> O avevejö'oho God-ro ajëmamu mu sisë hesi darugoremu raromarijoho vuonugo'i God-are darugoremu raromë'e jëve. Èhu'ëro jemë God-are aribövi mae jëvoromo èhuro ma-ioro'ioremu maro raromo'aruje.

<sup>23</sup> Noro mu sisë vaejego ë hesi manaho baeromo vuovoromo sisëro va'arueje. O God-ro hesi huë baejavuaje suvuoroho bojamuego èhuro no ma-ioro'iore gemu maro raromarueje Iesu Keriso nosi Badare ae gemuohuro javuë'ëro.

## 7

*God-are jögoru ahoromo vavaeni'ere raromaroho vuonugo'i Keriso-are aribövie javuaje jöhoje.*

<sup>1</sup> Aganomë sa'a a masijo jabesi mu vae'irarije jögoru hesi öroho jemë gavarujëro jëvë'ëro èhuni ave jöho iae ga'a'aruje. Ja sa'are hijë'oho sa'a hesi jögoru uhure hibe va'ojuvo guomavo'iramu jögoru uhuroho bogojavo'ë'e.

<sup>2</sup> Bëhoho èhi jianove. Baru hijë'oho vaborohuro hu gemu gabe va'ë'e jögorure èhi uövuë'ego. A'i baru guomë'oho magonahoho ë jögorehu nijio'iraejadoho iae barëjë'eje.

<sup>3</sup> Èhi jië'ëro baru hijamu sionoho ioro bamë'oho aëro uvo'ë'ö: Èmagonahoho önö'e ma-juvë'e magonahe höjo. A'i baru guomë'oho jögorehu nijio'iraejadoho barëjë'ego hesi nimoro ae gö baeromo hu'o gemuoro hijë'oho bogo önö'e ma-juvë'e magonahe jio'ë'e.

<sup>4</sup> Baru mamioho guomamu magonahohuro baru i'e baeromo gemu mae hijajëhi jemë'o èhi jëvanove. Jemë Keriso-are sinohu'o gemuore bimuvorovoromo vuovëvë'ëro èhu'ëro jögoru aharuje hesi i'uocho ma-ioro'iore gemu barëjähë'eje èhuro guomoromo ri'öjade ahu'o gemuoro jemëro raromoromo God-hu nimaje muoho vae avoho'irarijego.

<sup>5</sup> Röhu urimë'i nosirire jiaje sisëhemu uehorovarevare evare mu vaeröhe jögoroho no uehorovoromo dë iahuo'ego mu sisëmu vae'i nimonövareje. Èhi nimoromo sisëho dajo haho'ëro vaeromo èhuro vuovoromo sisëro va'o hesi javuadeje.

<sup>6</sup> Avevejö'oho mu vaeröhe jögorehu no nijio'iraejavuadoho Keriso'o gemu mae vuovavuanovë'ëro ma-ioro'ioremu barëjahuë'eje. Èhuro ë jögoru aharue hesi i'uocho bogo bae hesi javue. Èhu'ëro ijönöho no öri mamioho bogo va'oromo ma-surire jajivë'e jögoroho adahobe God-are muoho masivoho gabe va'i a'i öri i'ore va'oromo God-are Aru'aho hesi darugohuro hesi muoho vaejarueje.

*Mu vaeröhe jögoru adahoromo èhuro mu sisë hesi bëhi gavarue jöhoje.*

<sup>7</sup> Èsurire jajivë'e jögoru hesi uhure javuadoho iae barëjë'eje. Èhuni no diehi uvo'ejo. Na no ëma uvo'ejo: Èjögorocho sisë höjo. Bogo mae bogo èhiocho uvo'ejo. Èjögorocho bogojio'ibejo Paul na bogo ga'ibejo mu sisë hesi örocho diehi jië'e jiego. Èhesi bëhoho jögore gemu jajivoromo èhi uvë'eje: Nadi ae gö hesi böviëni bise'ëniocho ganiganimonëjo. Bogo èhiocho jajivo'ibejo naro uvo'ibejo: Ganigani muoho nani mae höjo.

<sup>8</sup> Röhu ganigani hesi jögoroho iae jajivë'eje. Jajivë'ëro naro garomo uvodeje: Èganigani muoho God-ro bijönimaje hö uvamu nasi dë ihamu sisëhuro börömo mae rojomamu avare böviëni bise'ëni ganiganiego avohadeje. O surire jajivë'e jögoroho bogojio'ibejo uehoro sisëho bogo èhiocho rojom'o'ibejo.



<sup>9</sup> Urimoho ë jögoroho bogo hejë'e ëma hibe rueromo uvodeje: Nani na mae jevajëjo. A'i ganigani jögoroho hejamu mu sisëhuro baejevamu naro biriri'övoromo jögoroho ahoromo

<sup>10</sup> uvodeje: Ëhu'ëro na guomo örire jevajëjo. Röhu mami'e God-hu ganigani jögoru bamade hesi bëhoho ëhuro no mae raromo'iröhego. Röhu ë ganigani jögoroho jië'ëro ëhu'ëro sisëhuro baejevamu na guomo örire jevadeje.

<sup>11</sup> Guomo örire jevade hesi bëhoho surire jajivë'e jögoroho na hejë'ëro ëhu'ëro ë mu sisëhuro sareremiromo dë ihamu naro jögoroho ahamu ëhuro guomo örire jevadeje.

<sup>12</sup> Röhu ë surire jajivë'e jögoroho aho'obëhe God-aro jioromo rovë'eje. Ëhesi jöe gö gö God-ro bamadeje noro mu mae vaejago marëjavuoröhego. Ëhu'ëro ë jöho iae maeje.

<sup>13</sup> Mae jië'ocho na no ëma uvo'ejo: Jö mahuro ëhuro na ijumevamu guomo örire jevade höjo. Bogo ëhiocho uvo'ejo. A'i uehoro sisëhuro ëhuro ë'adeje. Uehoro sisëhuro ë jö maho huotovoromo ijumevamu guomo örire jevadeje. Ëhesi bëhoho God-ro nimadeje no samaro garöhego sisë hesi bëhoho i'u'e mae jiego. Hu nimadeje jögoroho jioromo ëhuro mu sisëho börömoräeröhego.

*Uehoro ma'o uehoro sisë'o umogirohaje ë hesi jöhoje.*

<sup>14</sup> Röhu no gavaruoho God-are jögoroho hesi Aru'ahohuro bojamuaje jöjeje. Röhu na bogo hesi Aru'aho ejahaje aho jevo'i sino hesi mu sisë eromo hesi darugoremu hijaje ae jeve.

<sup>15</sup> Ëhuni na uvajeje: Naro diehi ë'ego ë'aje höjo. Mu mae negajoho bogo vae'i a'i mu sisë bijönegajoho ëma vaejajeje.

<sup>16</sup> Röhu naehu mu sisë vaeromo God-are jögoru ahajoho bijönegego ëhuro na uvajeje: God-hu bojamuade jögoroho iae maho höjo.

<sup>17</sup> Ëhi jië'ëro bogo naehu nimoromo sisëho vae'i a'i uehoro sisëro dëre rojomego ëhuro vaejajeje.

<sup>18</sup> Na gavajoho uehoro maho nasiroho bogo mae bogoje. Ëhesi bëhoho nasi dëre uehoro mami jioje rovadoho ëho sisëmuje. Na ëhi gavaje hesi bëhoho na mu mae vae'i negajoho bogo vae hesi jeve.

<sup>19</sup> Mu mae vae'i negajoho ëho bogo vae'i a'i mu sisë bijönegajoho ëho iae na vaejajeje.

<sup>20</sup> Na bijönegaje muoho ëma vaejë'ëro ëhuro bogo naehu nimoromo vae'irögoro uehoro sisëhuro nasi dëre rojomego ëhuro vaejajeje.

<sup>21</sup> Ëhu'ëro na gavajeje aviëhi jië'e muoho jiego. Na mu mae vae'i negë'iroho mu maho bogo rue'i mu sisëhuremu nasirire rovajeje.

<sup>22</sup> Nasi dë vövöbajo'ere God-are jögoroho negajeje.

<sup>23</sup> Röhu na gavajoho uehoro göhuro nasi sino haho'e ruahö'öjevajeje. Ruahö'öjevoromo God-are jögoru simanehu nimajohu'o umogihorovajeje. Umogihorovoromo ëhuro sino haho'ere jiaje sisëhuro na ruahö'amoniagegajeje.

<sup>24</sup> Asë'e vaevë'e jevaje. Sisëhu sino haho'e ruahö'öjevo'ego guomevo hesi jevajoho raro ajemi'iramu maho jevo'ë'e.

<sup>25</sup> Röhu na God mabëhe uave. Huro ua'iramu Iesu Keriso nosi Badaro ajemi'iramu mae jevo'ë'e.

Ëhu'ëro jië'ëro na ëhi jeve. Naro nasi uehoroho bojamirovoromo God-are jögoroho ejahajeje. Röhu sisë nasirire jioje rovadohuro mu sisë hesi jöhu'o ejahajeje.

## 8

*God-are Aru'aho baeromo ehuro mae raromarue jöhoje.*

<sup>1</sup> Röhu jaruvoho Iesu Keriso-are ae gemuoho javuë'oho mu sisë hesi i'uoho bogo bae hesi javue.

<sup>2</sup> Urimoho ja mu sisëmu vaeromo guomo örire mu juvonövaneje. Jaruvoho ja Iesu Keriso-are ae gemuoho javë'ëro i'ovavuae Aru'ahohuro ja ajamiromo ë sisëhu ruahö'öjavadoho bisihö'öjamu mae javë'eje.

<sup>3</sup> God hu eni jië'ëro hesi Harihu Maho nugö'öjadeje araeromo sino haho'e baeromo no a sisë javuajëhi hu ëhi jioromo rueromo sisëni guomoröhego. Ëhi'amu ehuro nosirire jiaje sisë hesi darugoho barëjahuadeje. Noehu mu vaeröhe jögorohuro bogo ehuro sisë hesi darugoho barëjahuadeje. Sisë nosirire jië'ëro jögoru hesi biriroho bogojiadeje.

<sup>4</sup> Röhu God-hu sisë hesi darugo ëhi tugohahuade hesi bëhoho hu nimadeje noro God-are jögoru hesi mu maho aho'obëhe vaeröhego sino hesi sisëhu nimajoho no bogo e'i God-are Aru'ahehu nimajëhi ëhi vaejaruëro javuë'ëro.

<sup>5</sup> Sinehu nimaje sisë ejë'oho ë hesi muohuremu uehorovarueje. O God-are Aru'ahehu nimajëhi vaejë'oho Aru'ahehu uövuajohuremu uehorovarueje.

<sup>6</sup> Nosirire jiaje sisëhuremu uehorovë'oho ehuro no vuovoromo sisëro va'arueje. A'i God-are Aru'ahehu uövuajohuremu uehorovë'oho ehuro ma-ioro'ioere gemu huë mae raromarueje.

<sup>7</sup> Nosirire jiaje sisëhuremu uehorovego vuovavuae hesi bëhoho ëhi jië'e uehoro sisë baejë'oho God-are jögoroho bogo ejaharueje. Ejaho'iröhoho bogo eni javuajeje. Ehuro God'o muorovarue aribövie javuajeje.

<sup>8</sup> Nosirire jiaje sisëhuremu uehorovë'oho God-hu nimaje muoho bogo biroho hesi javuajeje.

<sup>9</sup> Röhu jemë bogo ehioho ë'arueje. Jemë sinehu nimaje sisëho bogo e'i a'i God-are Aru'ahehu nimajëhi ëhi vaejarueje God-are Aru'ahoho jemesi dë vövöbajo'ere mami'e abo gemu mae hijë'ego. Ae rahu Keriso-are Aru'aho dë vövöbajo'ere bogojië'oho hu bogo Keriso-are ahoje. Röhu hesi Aru'ahoho jemesirire jië'ego ehuni huhu nimaje jöho iae ejaharueje.

<sup>10</sup> Keriso jemesi dë vövöbajo'ere jie. Ehü'ëro jemë sisë vaejarujohuro jemesi sino haho'oho iae vuovëho hesije röhu jemë God-are nunire mae riravarujohuro jemesi aru'ahoho biririvëhego raromarueje.

<sup>11</sup> Röhu God-ro Iesu ajamamu guomoromo ri'öjadeje. Ehuni hesi Aru'ahoho jemesirire jië'ëro God-hu Keriso ajamamu guomoromo i'ovadëhi jemesi vuovo sinohu'o ëhi ajëmi'iramu i'ovëvo'ë'e God-are Aru'ahohuro jemesi dëre abo hijë'ëro.

<sup>12</sup> Ehü jië'ëro noehu mu vae'iröhoho iae jiahue. Röhu nosi sinehu nimaje mu sisëho ëho bogo nosi muehuje.

<sup>13</sup> Ehü jië'e sisë vaejë'ohuro ehuro jemë ioro'ioeremu vuovëvo'ë'e. A'i God-are Aru'aho hesi birire baeromo jemesi sino hesi mu sisë mu'uromo bogo gavanovë'oho ehuro jemë ma-ioro'ioeremu raromo'arueje.

<sup>14</sup> Ae rahu God-are Aru'aho ejahobe va'ë'oho ë aribövioho God-are aboji harihu'e jio'ame.

<sup>15</sup> God-are Aru'aho baejarijohuro jemë bogo tövo rëmo'ego röhu maho sisëroho raromoromo juhuonibijioho'irögoro a'i God-are Aru'ahohuro jemë ajëmijë'ëro hesi aboji harihu'e jëve. Ehuni no God-are örire uavarueje: Asë'e Apajo.

<sup>16</sup> Noehu ëhi uavarue hesi bëhoho God-are Aru'ahohuro nosi aru'ahoho ajamiromo uövuajeje: Jemë iae God-are aboji harihu'o mae jëvajejo.

17 No hesi aboji harihu'ëro javuë'ëro no God nosi Vavu hesi maho bae hesi javue. Kerisohu baejajëhi no'o ëhi bae'ejo. No Keriso'o huë vavaene baejaruëro jië'ëro ëhuro hu'o gemuore aji maho bae'ejo.

*U'emu God-are aji ma baeröhe jöhoje.*

18 Na uve: Huë vavaene jaruvo baejaruoho ma-bise'e jio'ego bogo uehorovo'i a'i God-hu röjahuijego garöhe aji mabëhoho ëho börömo mae höjo.

19 Röhu vaevë'oho sa'ae mie bövie bise'e God-hu bamadoho bogo eni jiobe ruejuvo God-ro hesi aboji harihu'oho va'orahoro bamavuo'iramu ëho ma-marö jio'amo'ë'e.

20 Ëhesi bëhoho God-ro uvadeje: Sa'ae bövie bise'e sisërë'amo'ajëjo. Bogo hesi ëma sisërë'amobe rue'i God-ro hesi nimoromo sisërëjörö uvadeje hujeji avohego marë'amoröhego.

21 God-hu bamade bövioho bise'oho jaruvoho ëhi ma-sagohoriemu sago-horibe va'ajeje. U'emu God-ro avoho'amo'iramu ëhi jiobe va'ajoho iae barë'irögoro huro i'ovo'amo'iramu hesi aboji harihu'e ma-marö javuoröhëhi ëhi huhu bamade bövioho bise'oho marö jio'amo'ë'e.

22 Vaevë'oho iae no gavö God-hu bamade bövioho bise'oho sisërëbe rovë'e jio'ego ijönö mae jio'amo'ië'ëro.

23 Sa'ae bövie bise'e bogo ëhemuoho sisërë'i röhu huhu hesi Aru'aho aevö'i suvuoramumu baejare aribövioho no'o sisë'i huë vavaeni'e raromë'ëro hara'uë'i mueberomo raromö ijönö God-ro hesi aboji harihu'oho no avohavuoromo nosi sino haho'e aho'obëhe i'ovavuego ma-maemu javuoröhego.

24 Ëhi mae javuoröhoho ëho noro muebejörö God-ro ajamuiromo marö bamavuë'eje. Mue gö gö no avevejö'e nunehu ga'amaruoho ëho bogo ga'amo'i muebejarueje iae mami'e gavaruëro.

25 A'i mae javuo'iröhoho nunoho bogo ga'i ma-raromoromo muebejaruëro jië'ëro ëhuni ga'irögoro biririvoromo raromoromo muebebe va'arueje.

26 Röhu no u'uhavuë'ego God-are Aru'ahohuro nosirire rueromo ajamuijajeje. Ëhesi bëhoho God-are örire diehi avoho ato'iröhoho no dadivavue. Dadivavuego God-are Aru'ahohuro hesi ajamuiromo nosi jöëni huë vavaene börömo bëhe baeromo sisë marö hara'uoromo ëhuro God-are örire ëninamijajeje. Huhu hara'uoromo ëninamijaje jöho aho ë jöho bogo ato hesi javue.

27 Röhu God-hu dë vövöbajo'ere bijioho gövuajohuro hesi Aru'aho hesi uehorohu'o iae gavajeje rabëni God-hu nimajëhi hesi Aru'ahohuro ëhi jië'e uehoroho baeromo hesi aribövi nosi jöëni ëninamijajego.

28 No gavaruoho ae rahu God rajahijë'iroho mu mae mu sisë huë mae huë sisë jabesi örire rovego röhu God-ro jabumë ajëmiromo huë mahu'o huë sisëhu'o aho'obëhe avohëhajeje ëhuro ijönö jabumë mae jëvo'iröhego hesi nimadëhi rinëgade ariböviëro jëvë'ëro.

29 Ëaribövioho urimë'i God-ro söjëgo'irögoro uehorovëvadeje. Uehorovëvoromo hesi simanëro mevoromo uvadeje: Hujeji ë aribövioho naro tarioromo baejëvo'ejöjo ëhuro nasi Harihu ma va'ëne jëvoröhego. Ëhi jië'oho jabumë ijoraje aho'obëhe jëvo'i nasi Harihoho murioho jio'a'ajëjo. Mevoromo ëhi uvadeje.

<sup>30</sup> Ēaribövie gemuoho mevoromo röhu hesinö rinëgadeje. Rinëgoromo röhu jabesi jö sisëho uehorovoromo vuonugëhamu hesi nunire mae riravareje. Hesi nunire mae riravamu huro baejëvoromo aji mare rëmadeje.

*God-hu dë vövöbajo'ere no uehorovavuafe muoho ëho a göehu o mu göehu bogo aho'iröhe jöhoje.*

<sup>31</sup> God-hu ëhi ajamuijadoho no diehi uehorovo'ejo. Iae no ëhi uvo'ejo: God nosi dönö jiajoho raro no bisihö'öjavuo'ajëjo.

<sup>32</sup> God bogo uvadeje: Nasi Harihoho maego bogo bojëmi'ejö uvoromo nijio'irae'i a'i Harihoho nugö'öjadeje ae aho'obëhe nosi jöëni huë vavaene baeröhego. Hesi Harihoho ëhi bojamuijë'ëro ëhuni noro birivoromo uvarueje: Hesi suvuro börömoho mami'e bojamuijë'ëro ëhuni suvuro ioro'iorohu'o iae bojamui barë'ajëjo.

<sup>33</sup> God-hu baejavuade aribövi nosi jö sisëho raro jövo'ë'e. Jövoröhe aho bogoje. Rabëni God-ro nosi sisëho avohahuë'ëro uvajeje: Jemë mae jëvajëjo.

<sup>34</sup> O raro uö'ë'e: Sisë'e jëvaje sisëro va'ohëjo. Ēhi uö'iröhe aho bogoje. Rabëni hesi bëhoho Iesu Kerisoro guomadeje. Guomoromo röhu ri'öromo ajiomë'ëro God-are övo manö hiroho nosi jöëni God-are örire jöe majahijajeje.

<sup>35</sup> Kerisoro no dë vövöbajo'e aho'o uehorovavuoromo ajamuijajeje. Uehorovavuoromo ajamuijaje öroho raro tugohahuo'ë'e. Aho bogo. Huë vavaeni bövi bise'o rovë'oho ae göehu ijumavuë'oho ie o niögu suhi'e bogojavuë'oho vörö'ere va'ë'oho aehu bijuëmavuamu vuovë'oho bogo ëhuro tugohahuo'ë'e.

<sup>36</sup> Iae ëhi jië'e mu sisëho nosi örire rovajeje. Ējöho God-are surire ëhi uvë'eje:

God no jasi ariböviëro javuë'ëro ëhuni aëro vae majae muo'amavuo'ië'ego no vöröre ma-raromarue höjo.

Sheep rinovoromo bijuëmo'ië'aruëhi aëro nosi örire ëhi ë'arue höjo.

<sup>37</sup> Iae no ëhi javue. Röhu rabe rabe rovë'iroho Kerisoro no uehorovavuoromo ajamuijago ëhuro no ruahö'ö avohoromo ma-mae javua-jeje.

<sup>38</sup> Ēhesi bëhoho na mae uehorovoromo uvajeje: Huhu dë vövöbajo'e aho'o uehorovavuoromo ajamuijaje öroho mu gö gö rovë'oho bogo tugohahuo'ajëjo. Vuovavuë'oho o ave sa'are raromë'oho anerae maja aru'ahe vörö'e mue gö gö rovë'oho mu rabu rabu jaruvo o u'emu rovë'oho

<sup>39</sup> noehu dö mare ajiomë'oho o sa'a gago ëgobövire abuejë'oho bövie bise'e dinö'e dinö'e jiajoho rovë'oho God-hu uehorovavuafe öri Iesu Keriso nosi Badarire röjahuijajoho ëho bogo tugohahuo'ajëjo.

## 9

*God-hu hesi nimoromo Israel rajo hesinö baejëvade jöhoje.*

<sup>1</sup> Na Keriso-are ae gemuohuro jevë'ëro jö mae majëhi'ië'e sareri'e jöho bogo. God-are Aru'ahohuro nasi dë vövöbajo'oho ajemiromo avoheho'ego herovoromo na jö mae majëhi'ië'e.

<sup>2</sup> Huë vavaene na bogo bise'o vadu'oho baeromo majae ëhi vavaenegajeje.

<sup>3</sup> Nasi sa'a raje ö mueno'e gemuoho jëvanovo'ego jabesi jöëni vavaene baeje. Ēhesi bëhoho jabumë Keriso bogo mae uehorovoruomajeje. Röhu jabesi aru'ahohuni na böröme uehorovevo'i nasi sinoho mabisemu uehorovajeje. Ēhuni na uve: God-ro sisë bojemiromo Keriso-are bëhiroho rori'o babu'öjevego nasi sa'a rajohuro aevoromo Keriso mae

uehorovoruomo'ibejajo ehuro iae mae jevo'ibejajo. Jabesi jöeni ehi dä vövöbajo'e aho'lo uehorovëvoromo vavaenimajeje.

<sup>4</sup> Nasi sa'a rajoho Keriso bogo ma uehorovarueje röhu huë mabëhe God-are örire baerumë'eje. Jabumë Israel rajo God-hu baejêvade aribövie jioruome. Huro jabumë hesi aboji harihu'e vaejêvadeje. Hesi aji maho röjêhijadeje. Hesi jögoru maho bojëmiromo uêvadeje: Iae na jemë muebejêvo'ejôjo. Mu vaeröhe jögoroho bojêmadeje. Osa bôrömore rueromo hu rajahi'iröhe öroho röjêhijadeje. Ijonö mae ajëmi'iröhe jöho bojêmadeje.

<sup>5</sup> Jabesi hijo miono'ocho God-are a masije jêvadeje. Bôröme namiromo ajamuaje aho Keriso jabesi sa'a raje gemuoho jiadeje. Keriso hu bogo ma-aehu jio'i hu God jië'ëro sa'ae bövie bise'e muebejajego ehuni noro hesi örire rajahiemu rajahibe va'ejo.

<sup>6</sup> Iae Israel-are ujo ömo'ömoho noro ehi jië'e mu maho baejê'e javue. Röhu hesi ujoho ma-ae gemuëro gemuëro Keriso mae uehorovo'i a ioro'ioroho bogo ma uehorovarueje. Bogo ma uehorovarueje röhu Israel-are ujo muebejavuoröhëro God-hu uvade jöho bogo barêjê'eje. Ehesi bëhoho Israel-are siono baeromo mu ma bövi bise'o baejarue ariböviohuremu God-ro muebejavuo'i uvadeje. Röhu ehi jië'e aribövioho bogo aho'ocho jio'i magemu gemu javue. God-hu Israel-are mu ma baejarue aribövi muebejavuo'i uvadëhi ehi muebejavuajeje. Ehuni Israel-are ujo muebejavuoröhëro uvade jöho bogo barêjê'eje.

<sup>7</sup> Göho Abraham-are ujoho aho'obëheje röhu ujo ioro'ioroho hesi mu maho bövioho bise'oho bogo baerumë'eje. Ehesi jöho God-hu Abraham uavadoho God-are surire jajivoromo uvê'eje: Jasi harihe Isaac'o hesi ujohu'o ë ariböviohuremu jasi sionoho baeromo bövioho bise'oho baebe va'i jasi ujo ioro'ioroho bogajo. Ehi uvê'eje.

<sup>8</sup> Ejö hesi bëhoho bogo Abraham hesi arijo'ëro ëma nimoromo baejade harihohu'o ë harihu hesi ujohu'o God-are aboji harihu ömo'ömehu jio'i a'i God-hu Abraham bojami'i uavade ujo ömo'ömoho ëho jaburo Abraham-are sionoho baejarueje.

<sup>9</sup> God-ro Abraham harihe bojami'i majahiromo uavadeje: Evare majare na vuonorö'ö rue'iramu Sarah harihe raho'a'ajêjo. Ehi uvê'eje.

<sup>10</sup> Abraham-are harihu göhuremu Abraham-are sionoho bae'iröhego ehi uvadeje röhu bogo ehemu jio'i a'i ijonö Rebecca harihe niö'i huodi'e dëre jêvadeje. Harihu niö'i jabesi vavuocho gemu jiadeje. Hu nosi hijo miono'e Isaac jiadeje.

<sup>11-12</sup> Röhu harihe niö'i bogo rëhëvê'e dëre jêvamu mu maho o mu sisëho bogo vaejê'iro evare majare God-ro jabesi vëmoho Rebecca uavadeje: Naro ijorajohemu ajami'iramu bôröme jio'iramu muriohuro bise'e jioromo ijorajo hesi muoho vaejahonövo'ajêjo. Mu ma o mu sisë bogo vaejare majare harihe gemu ajami'i uvade hesi bëhoho ehuro huhu nimadëhi ehemu uehorovoromo ae baejêvoröhëni hu bogo aehu mu ma vaejaruoho gëromo rinëgo'i hesi nimoro ëma rinëgajëro jië'ëro. Iae ehuni mu bogo vaejare majare harihe gemu ajami'i uvadeje.

<sup>13</sup> God-hu ijoraje Jacob ajami'i murie Esau bogo ajamijade jöho God-are surire jajivoromo ehi uvê'eje: Na Jacob nego'i Esau bijönegade höjo. God-ro ehi uvê'eje.

<sup>14</sup> Ehi jië'oho no diehi uvo'ejo. Na no ëma uehorovoromo uvo'ejo: God-hu a sisëro jië'ëro sisë'i uehorovoromo ehioho ë'ade höjo. Ehi jië'oho jö sisëgo bogo ehioho uvo'ejo.

15 Ĕhesi bēhoho God-ro Moses uavadeje: Di aribōvi sisē jēvajoho huē baejēvo'i negē'oho ē aribōvioho huē baejēvo'ejōjo. O di aribōviohuni na vavaenimo'i negē'oho ē aribōviohuni vavaenimo'ejōjo.

16 Ĕhu'ēro jiē'ēro God-hu hesinō rinaguaje hesi bēhoho bogo noehu nimoromo biririvoromo muoho vae'i a'i huro noni vavaenimoromo rinaguajeje.

17 God-hu sisē a bōrōmo Pharaoh-are ōrire jō majahijade jōho God-are surire jajivoromo ēhi uvē'eje: God naehu ja bōrōme vaejavoromo dōro bamavode hesi bēhoho naro jasi sisē hesi i'uoho bojamiromo ēhuro nasi vōrōho ae rōjēhijego sa'ae gōre gōre raromarue aribōvioho aho'obēhe nasi ihoho hebe va'orōhego.

18 Ĕhu'ēro jiē'ēro God hesi nimē'oho a ioro'ioro jabumēni vavaenimoromo hesinō javuojōro gagovavuo'i a ioro'ioroho ma-rēmajeje jabesi nimoromo biriri'ōvoromo mu sisēhemu vaenōvorōhego.

*God-hu dē vōrōnimoromo i'u bojamuibe noni vavaenimobe va'aje jōhoje.*

19 Ĕhu'ēro jiē'ēro nani jero ae gō jō sisē uehorovoromo nasi jōho ahoromo sarerivoromo ue'a'anue: God-ro hesi nimoromo ramuē'ēro ēhu'ēro noro biriri'ōvoromo mu sisēho vaejarue hōjo. Noehu mu sisē vaejaruoho ēho bogo nosi sisēhu jio'i God-hu nimade muoho hōjo. Hesi nimade muoho bogo aho varijēnoho javuego ēhuni no mu sisēho vaejarue hōjo. Ĕhuni God-ro sarerivoromo ēma uōvuaje hōjo: Jemēhu mu sisē vaejarujoho jemesi sisē hōjo. Ĕho bogo nosi sisēho jio'i God-ro hesi nimoromo ramuē'ēro ēhu'ēro no mu sisēho vaejarue hōjo.

20 Jaehu ēhi jiē'e sareri'e jō majehijē'oho naro ja ua'ejo: Ja ma-ae javajējo. Ja ma-a javē'oho rōhu ja rabēni biriri'ōvoromo God-are ōriroho ēhi jiē'e jō sisēho jōvanuējo. No sa'aehu rama avoharuēhi ēhi javuo'i God hu rama avoho'amaje aho va'ēne jiē'ego ēhuni no bogo ri'ōromo ua'ejarējo: Ja rabēni no ēhioho avohavuane hōjo. Bogo ēhioho ua'ejarējo.

21 Ja'o uehorovone. Rama avoho'amarue aribōviehu sa'a mugōru baeromo jabesi nimoromo avohē'oho iae maeje. Nimē'oho sa'a mugōre gemu baeromo rōhu ramae niō'i avohēvo'ē'e rama gōho maego maja bōrōmohuni runo'e bamo'irōgoro gōho sisēgo majae ēhi ē nemonōvo'irōhēro.

22 Ĕhu jō hesi bēhoho God no avohavuaje aeje. No avohavuaje aēro jiē'ēro ēhu'ēro jiē'ēro hu hesi nimoromo ē'ē'oho iae maeje. Hu nimadeje huhu a i'u bojēmi'irōhe vōrōhu'o darugohu'o ae aho'obēhe rōjēhi'irōhēni. Ĕhuni huhu dē vōrōnimego sisērōhe aribōvi jabesi ōriroho i'uoho bogo burēroho bojēmi'i ma-biririvoromo gē taemobe rovadeje ijonō i'uoho bojēmi'irōhēni.

23 Ma-gē taemobe rovade hesi bēhoho hu nimadeje hesi aji mabēhe nosi ōrire rōjahui avoho'iro rabēni hu noni vavaenimaje aribōvie javuē'ego. Noehu hesi aji baerōhego huhu huē baeromo avohavuade aribōvie javuē'ego.

24 Jew rajo ioro'ioroho no hesinō javuojōro rinaguade aribōvie uēve. Rōhu bogo Jew rajoho gemu rinaguo'i a'i sa'a gō gō raje a ioro'iorohu'o rinēgē'eje.

25 God-hu sa'a ioro'ioro rajo hesinō jēvojōro rinēgorōhe jōho urimē'i Hosea-ro God-are surire jajivoromo uvē'eje:

God-ro uvajējo: Ĕaribōvioho bogo nasi aribōvie jēvajoho

ijonō naro uē'ejōjo: Ĕho nasi aribōvie jioruomajējo.

Ĕaribōvioho bogo nasi huē baejēvaje agane jēvajoho

ijonō naro uē'ejōjo: Naehu huē baejēvaje agane jioruomajējo.

26 Di sa'are ariböviohuro henövare God-ro uë'ego: Jemë bogo nasi ariböviehu jëvajë'ego henövaroho

ë aribövioho naro uë'ejöjo: God darugo'o hijaje a nasi aboji harihu'e jëvajëjo.

27 God-hu sa'a ioro'ioro rajo rinëgade hesi jöho ëhi jio'i röhu Israel rajo jabesi jö Isaiah-hu darugo'o uvade jöho God-are surire jajivoromo ëhi uvë'eje: Nani Israel rajoho nie'u va'ëne ae jëvo'ajëjo röhu ae ma-vemino'e i'uoho bogo bae'i mae jioruomo'ajëjo.

28 Èhesi bëhoho God-ro sa'ae aho'o jabesi sisëho ma-burëro mevoromo i'uoho ma-ioro'ioremu bojëmi'ajëjo.

29 O Isaiah-ro ave jöhu'o jajivoromo uvadeje:

Jögoru eni jië'e ae Bada God-ro noni a uje gemu gemu bogo vuonugahuo'ibejajo

Sodom amo barëjadëhi no'o ëhi barëjavuo'ibejajo.

Gomorraah amo sisërëjadëhi no'o ëhi sisërëjavuo'ibejajo.

Isaiah-hu urimo uvadëhi avevejö'oho Israel rajoho no ëhi ae ma-gemu gemu God-are aribövi mae javue.

*Israel rajehu Keriso bogo ma uehorovarue jöhoje.*

30 Èhi jië'oho no diehi uvo'ejo. No ëhi uvo'ejo: Israel rajoho bogo a'i sa'a ioro'ioro rajoho bogo sivoho gabe rovere höjo God-are nunire mae riravoröhoho. Èhi höjo röhu jabumëro Keriso-are örire mae uehorovoromo ëhuro God-are nunire mae riravo'iröhe öroho iae baejë'e höjo.

31 Sa'a ioro'ioro rajohuro baejare höjo a'i Israel rajohuro uvare höjo: No God-are jögoru ejahë'oho ëhuro hesi nunire mae riravo'ejarëromo God-are jöho ejaho'i sivoho gabe rovaroho mae riravo'iröhe öroho bogo baejare höjo.

32 Bogo baejare hesi bëhoho bogo uvareje: Kerisoro gemuëro ajamui'iramu mae javuo'ajë uvo'i a'i ömo gavareje ga'i avohorovë'ëro God-are nunire mae riravo hesi jëvego. Èhi jië'e öroho nahoromo bogo biroho'i God-are munë Iesu bijönimoromo hesirire munëro biberovanovareje.

33 Keriso munë va'ëne jiaje jöho uhu'e jajivoromo ëhi uvë'eje:

Èhuro gahëjo. God naro munë va'ëne aho Zion bamajëjo.

Aëro hesirire ro biberovo'aruëjo.

Hesirire ro rireromo'aruëjo.

A'i ae rahu ë aho mae uehorovë'oho bogo javojimo ga'a'ajëjo.

## 10

1 O asë'e aganomë nasi dë vövöbajö'oho aho'o nimo avohoromo God-are örire ëninamijajeje nasi Israel sa'a rajohuro God-are i'uoho bogo bae'i maro va'iröhego.

2 Èhesi bëhoho naro jabesi muoho garomo uëve: God-are muoho nimo avohoruomaje höjo. Röhu bogo ma garomo ë'oruomaje höjo.

3 God-hu nosi iho avohahuaje öroho bogo gavanovo'i sarerivoromo uvoruomë'eje: No mu mae vaejë'oho God-ro göromo nosi sisëho uehorovoromo vuonugo'iramu hesi nunire mae riravo'ejarëromo jabesi birivoromo God-are jögoroho ejaho'i ë'o gavë'eje. Èhi'oromo God-hu nosi sisë avohahuego hesi nunire mae riravo'iröhe jöho bijönibijöhë'eje.

4 Èhesi bëhoho aëro sarerivoromo uvoruomajeje: No God-are jögoru ejahoromo mu mae vaejë'oho ëhuro hesi nunire ma-mae riravo'ejarëjo. Èhi uvoruomajeje. Röhu ae rahu Keriso mae uehorovë'oho ijönöho bogo

ëhioho uvo'i a'i uvarueje: Hesi Kerisoro ajamui'iramu God-are nunire riravo'ejarëjo.

*Israel rajohu'o sa'a ioro'ioro rajohu'o Keriso mae uehorovego God-hu baejavuoromo maro bamavuaje jöhoje.*

<sup>5</sup> Jögoru ejahoromo God-are nunire mae riravo'iröhe ë hesi jöho Moses-ro jajivoromo uvë'eje: Ae rahu jögoru e barëjë'ocho ëhuro maro raro-moruomo'ajëjo.

<sup>6</sup> Röhu God-are jögoru ejahoromo hesi nunire mae riravo'iröhe ë hesi darugoho bogo nosirehu jio'i a'i Keriso mae uehorovoromo God-are nunire mae riravo'iröhe öroho iae nosirire jie. Ëhesi jöho God-are surire jajivoromo ëhi uvë'eje: Nadi jemesi simanoho uehorovoromo uvorëjo: No diehi'oromo ö'idöroho iojiomo'ejarëjo. Ësurire jö hesi bëhoho uöromo ë'adeje: Nadi uvorëjo: No diehi'oromo iojiomo'ejarëjo ëhuro Keriso hu'irae baeromo vuonorö'ö ruvebijego huro no ajamui'iröhego.

<sup>7</sup> O jö göho nadi uvorëjo: No diehi'oromo vuovë'e ariböviehu raromaruiroho abue'ejarëjo. Ësurire jö hesi bëhoho uöromo ë'adeje: Nadi uvorëjo: No diehi'oromo vuovë'e ariböviehu raromaruiroho abue'ejarëjo ëhuro Keriso hu'irae barojomego ajamui'iröhego.

<sup>8</sup> Keriso-are muoho bogo rori'ohoje. A'i God-are surire jöho ëhi uvë'eje: God-are jöho iae jemesirire höjo.

Hesi jöho dë vövöbajo'ere jëvë'ëro jemesi jö'ehu ato'irarijoho höjo. God-are jö hesi bëhoho Keriso mae uehorovoröhego noehu majëhijarue jöho uöromo ë'adeje.

<sup>9</sup> Jaehu dë vövöbajo'ere mae uehorovoromo uvë'ocho: God-ro Iesu ajamamu guomoromo ri'öjade hö uvoromo röhu mae uehorovanue jö jasi jö'ehu a huruoho majëhiromo uëvë'ocho: Iesu gemu Bada hö uëvë'ocho bogo sisëroho va'i maro hi'a'anue.

<sup>10</sup> Dë vövöbajo'o o jö'o jabesi bëhoho dë vövöbajo'ere noro Iesu mae uehorovoromo ëhuro God-are nunire mae riravarueje. O jö'ëro no Iesuarue jöho ae huruoho majëhiromo ëhuro bogo sisëroho va'i maro va'o hesi javue.

<sup>11</sup> Ëhi jië'e jöho God-are surire jajivoromo uvë'eje: Ae rahu ë aho mae uehorovë'ocho bogo javojimo ga'a'ajëjo.

<sup>12</sup> Ësurire jöho sa'ae aho'obëhe aribövi nosi jöhoje. Jew rajo ariböviohu'o sa'a ioro'iorohu'o bogo göho göho javuo'i ma-gemuoho javue. Badaro gemuëro böröme namiromo ae aho'obëhe muebejavuoromo göröhe di ahuro huro ajamijöro ua gavamu gövuë'ocho no ae aho'obëhe mabëhe ajamuijajeje.

<sup>13</sup> God-are surire jöho ëhi gemuoho uvë'eje: Ae rahu Badaro ajamijöro ua gavë'ocho ajëmi'iramu bogo sisëroho raromo'i maro raromo'aruëjo.

<sup>14</sup> Ëhi jie röhu aehu Bada Iesu bogo ma uehorovë'ocho ajamijöro diehi ua ga'ë'ö. Ua ga'iröhe öroho bogoje. O hesi jö bogo hejë'ocho diehi mae uehorovo'ë'ö. Mae uehorovo'iröhe öroho bogoje. O aehu hesi jö bogo majëhijë'ocho diehi he'ë'ö. He'iröhe öroho bogoje.

<sup>15</sup> O God-hu a bogo rëmö'öjamu rovë'ocho hesi jöho diehi majëhi'ë'ö. Majëhi'iröhe öroho bogoje. God-are surire jöho ëhi uvë'eje: Jö ma barovarue aribövioho mabëhe rovego gëvarue höjo.

<sup>16</sup> Mabëhe rovego gëvarue hö jajivadeje röhu Jew raje ae aho'o bogo a'i ma-gemuëro gemuëro Iesuarue jö maho ejahë'ejö. Urimë'i Isaiah-ro jöe gemuoho jajivoromo uvë'eje: Bada rahuro nosi jöho mae uehorovë'e höjo. Ae vemino'ëro ejahuë'e höjo.



17 Ëhu'ëro jië'ëro Keriso-are jöho majahuijego ëhuro no hejarueje. Heromo ëhuro no mae uehorovarueje.

18 Ëhi jie röhu naro uëve: Na Israel rajoho hejë'e höjo o bogajo. Iae jabumë hejareje. God-are jö hejaroho iae hesi surire jajivoromo ëhi uvë'eje:

Jabesi huëho sa'a viture viture he barëjë'e höjo.

Jabesi jöho maja rojomajire maja beva'ajire rërirae barëjë'e höjo.

19 Röhu ave jöhu'o uë gë'ejo. Na Israel rajoho God-are jö bëhoho gavare höjo o bogajo. Iae jabumë bëhoho gavareje röhu bogo ejareje. Urimo Moses-ro God-are surire jajivoromo uvë'eje:

Jabesi sivu sivue raromarue aribövioho God naro ajëmi'iramu

Jew rajoho jemëro gëromo dë vi'ehëgo'iramu uvo'a'arujëjo:

God-ro rabëni jabumë ajëmi'i no bogo ajamuijaje höjo.

O God na bogo avoho gevarue aribövioho naro ajëmi'iramu

Jew raje jemëro jabumë gëromo dë vörönimo'arujëjo.

Ëhesi bëhoho Israel rajohuro God-are jöho iae hejareje röhu bogo ejahareje.

20 Ëhi jië'e jöe gemuoho Isaiah-ro ma-sama'e huruoho jajivoromo uvë'eje:

Bogo birohevo'i nahevare ariböviohuro God na birohevare höjo.

Nasi jöëni bogo uë gëvare aribövioho naro jabesi örire röjahirovamu gevare höjo.

21 Sa'a ioro'ioro rajehu God biroho'iröhe jöho ëhi jajivo'i a'i Israel rajo jabesi jöho jajivoromo ëhi uvë'eje: Jaburo nasiro ruejöro na vae majae öve nugö'öbe rovë'e jevajëjo röhu jabumë jöe bogo e'i biriri'övoruomaje aribövie jioruomajëjo.

## 11

*God-hu Israel raje ae aho'obëhe bogo vuonugëvo'i a vituohuni vavaenimoromo ajëmibe rovade jöhoje.*

1 Israel rajoho ëhi jië'e hia'i biriri'övä'e aribövie jioruomë'ego Paul naro uëve: Na ëhuni God hesi aribövioho ioro'ioremu vuonugëvë'e höjo. Bogo mae bogo vuonugëvë'eje. Paul na'o Israel raje jeve. Na Abraham-are uje jeve. Na Abraham-are uje Benjamin hesi uje gemuoho jeve.

2 Urimë'i God sa'a bövi bise'o bogo bamadevare evare Israel aribövioho hesi baejavuo'i uvë'ëro ëhu'ëro ijonöho bogo ramuö'öjë'eje. Elijah-hu ë'ade jöho jemë'o iae gavarueje. Elijah-ro Israel rajo jabesi jö sisëho God majahiro mo uavade höjo:

3 Bada jani suvuro vënire buejharue maratuoho Israel rajohuro dadovo'amë'e höjo. Jö jasiro baeromo majëhijarue aribövi ioro'ioroho muo'amë'e höjo. Vaevë'e na gemu jevajëjo. Röhu na'o anego'i nimiruëjo.

4 Elijah-ro God ëhi uavade höjo. Ëhi uavamu God-ro Elijah mana diehi uavade höjo. Huro ëhi uavade höjo: Ja uvanuoho: Na gemu jevajë uvanuoho röhu na Israel raje ae aho'obëhe 7,000 avoho nugo'amë'e jevajëjo. Ëhu'ëro jabu'o na bogo vuonugevo'i sareri'e god gö Baal ague aho raromoromo rajahiruomë'e höjo. God-ro ëhi uavade höjo.

5 God-hu Israel rajo ioro'ioro avoho nugo'amadëhi avevejö'oho ëhi gemuohoje. God-ro hesi nimoromo huë baejavuoromo Israel rajo a vituoho avohoromo maro ramuë'eje.

6 Avoho ramuade hesi bëhoho noehu vaejarue muoho bogo uehorovë'e hesi ëma nimoromo huë baejavuoromo ajamuijadeje. O noro mu mae vaejeho huro ëho garomo avoho ramuö'ibejo ëho bogo hesi ëma nimoromo huë baejavuajë muoho jio'ibejo.

<sup>7</sup> Ĕhu'ëro jiël'ëro Israel rajohuro God-are nunire mae riravoröhe öri nahobe rovaroho bogo birohareje. Ae ma-gemu gemu God-ro hesinö baejavuël'ëro ë öroho birohareje. Israel rajo a ioro'ioroho God-ro marëmamumu jabetesi biriri'övoromo mu sisëho vaebe jijihadeje.

<sup>8</sup> God-are surire jöho ëhi gemuoho jajivoromo uvë'eje: God-ro jabetesi öroho tugohëhamu momorö'ö uro'amël'ëro God-are muoho jabetesi nunoho bogo garomo hesi jöho jabetesi hia'oho bogo hebe rovaroho jaruvohu'o ëhi gemuoho höjo.

<sup>9</sup> Röhu Israel rajo jabetesi jöho David hu'o God-are surire jajivoromo uvë'eje: God jero ëhi'onego jabumëro uvo'irarëjo: No mae javuajëromomo söröe ijanovego evare guaeväro jiomëvanovoromo buorëro taemëvanovoromo guaro rireromëvanovoromo ëhi'oromo ëhuro jabetesi i'uoho mana baerumomoröhe.

<sup>10</sup> God jero jabetesi nunoho tugohëhonego ramoramovëhego bövioho bise'oho bogo garuomol'irajo. I'u böröme bojëminego baeromomo ma-ioro'iore gemu deje gurorovë'e jijihol'irajo. David-ro ëhi jajivë'eje.

*God-hu sa'a ioro'ioro rajo baejavuoromo mare bamavuaaje jöhoje.*

<sup>11</sup> Ĕhuni na uëve: Israel raje rireromëvadoho na ëhuro ioro'ioeremu sisërëjëvo hesi höjo. Bogo mae bogo. A'i Israel raje Keriso bijönimë'ego ëhuro sa'a ioro'ioro raje sisëli jëvajoho God-ro baejëvoromo maro bamëvë'eje. Baejëvoromo maro bamëvade hesi bëhoho ëhuro Israel rajohuro dë vi'ehëgego uvoruomoröhego: God-ro diehi'oromo sa'a ioro'ioro rajoho ajëmi'i no bogo ajamuijaje höjo.

<sup>12</sup> Israel rajohuro Keriso bijönimoromo God-hu ajëmaje muoho boremi'öjamu ëhuro sa'a ioro'ioro raje dinö'e dinö'e raromaruohuro Keriso-are mu maho baerumö'eje. Ĕhuni jemë'o uehorovore. Israel raje aribövie aho'obëhe vuonorö'öromomo God-are örire avo'avoho uehorovol'iramu ëhuro sa'a ioro'ioro rajohuro Keriso-are mu maho bae avohoruomol'ë'e.

<sup>13</sup> Röhu sa'a ioro'ioro rajomë naro jemesi örire ave jöho uël'ië'e. Kerisoro na remö'öjël'ëro na hesi jö baeromomo sa'a ioro'ioro rajo jemesi örire majëhibe juvaje ae jeve. Naro uvajeje: Ĕmuoho böröme hö uvoromo nimorohë'i Keriso-are jöho jemesi örire majëhijajeje.

<sup>14</sup> Keriso-are jöho sa'a ioro'ioro rajo jemesi örire majëhiromomo na nime nasi sa'a rajohuro dë vi'ehëgego uvoruomoröhego: Sa'a ioro'ioeremu mu ma baerumajëhi rabëni no'o bogo ëhioho baejare höjo. Jabuhu ëhi uvë'oho nani naehu ajëmi'irodoho eni jevo'l'ë'e. Ĕhuro jabumë Keriso uehorovoromomo bogo sisëroho val' maro va'oruomol'ë'e.

<sup>15</sup> God-ro Israel rajoho rori'o rëmö'öjël'ëro ëhu'ëro sa'ae aho'o jemë'o buore vaeromomo hu'o jemë'o gemu mae raromarujeje. Ĕhu'ëro jiël'ëro God-ro Israel rajoho sionëro baejëvol'iramu ëhuro aji'e mu göëro urimore muoho iosiramioromomo börömo bëhe rue'l'ë'e. Ĕho vuovoromomo i'ovanovë'e muoho jianovol'ë'e.

<sup>16</sup> Röhu i mugöru vitu harihoho urimo atoromomo God bojamijë'iroho i mugöru vitu göhu'o ëhu'o hesije. O ijo dirume God bojamijë'iroho ijo mahu'o ëhu'o hesije. Ĕhu jö hesi bëhoho Israel rajo hijo miono'e God-are ariböviëro jëvël'ëro ëhu'ëro ijore jiohe rovaje hijo miono'ohu'o jabetesi ujohu'o God-are aribövie javue.

<sup>17</sup> Röhu uhu jö göho olive ije gö amore bivarohe gö je'ore ëma rijadohoje. Israel rajoho no amore bivare ijoho va'ëne javue. O sa'a ioro'ioro rajoho jemë je'ore ëma rijade ijoho va'ëne jëve. Röhu God-ro amore ijo hesi

ade gö tarivo'amoromo rori'lo bahili je'ore ijo hesi adoho ujuohoromo sionore bijioho nugo'amadeje. Ëhu'ëro jië'ëro je'ore ijo adohuro amore ijo hesi rihuoho baeromo sirihiromo ma-mabëhe gemuoro iojiojë'eje. Ëhu jö hesi bëhoho God-ro sa'a ioro'ioro raje jemë Israel rajohu'o gemuore bimuvëvamu jemë'o God-are mu maho baejarijeje.

<sup>18</sup> Tarivoromo rori'lo bahijade ijo adoho garomo nadi uvore: Noro jabumë iosirëmiromomo ma-mabëhe javuoromo jabesi sionoho baejë'e javuajëjo. Jemë ëhi uvë'o avo'avoho uehorovoromo uvore: No ma-ijo ado va'ëne javuajëjo. No ijo bëhoho bogo rihuoho bojëmijarue höjo. A'i ijo bëhohuro no rihuoho bojamuijaje höjo. Ëhu'ëro no bogo masijoho javuajëjo.

<sup>19</sup> Röhu nani jero ue'a'anue: Iae mae höjo röhu ë ijo adoho tarivë'e höjo ëhuro naro jabesi sionoho bae'irodego. Ëhu'ëro naro jabumë iosirëmiromomo ma-mabëhe jevajëjo.

<sup>20</sup> Iae mae uevanue röhu jabumëro Keriso-are jöho bogo ma uehorovamu ëhuni tarivë'eje. Röhu jero Keriso mae uehorovë'ëro ëhuro biririvoromo sirihiromo namijanue. Ëhuni nadi jasi sivuoho uehorovoromo uvone: Na böröme namijajëjo. Nadi ëhioho uvo'i a'i juhuonivone.

<sup>21</sup> Israel rajo ijo ado ma va'ëne jëvadoho röhu God-ro jabesi sisëho bogo ma-nunëremuoho gë'i tarivoromo rori'lo ruruhö'öjajadeje. Ëhi jië'e jiaje ëhuni je'ore ijo adoho jero nadi uvone: Na sisë vaejë'o hu ma-nunëro ge'a'ajë uvo'i a'i uvone: Na sisë vaejë'o hu ë Israel aribövi i'u bojëmadëhi God-ro ëhi jië'e i'uo na'o bojemi'ajëjo.

<sup>22</sup> Ëhuni ave jöhuremu uehorovone. God hu huë baejavuaje aeje. Röhu hu i'ue bojamuijaje aeje. Sa'are rireromare aribövi jabesi örire i'ue bojëmijë'eje. O jasi örire huë baejavajeje. Huhu huë baejavaje muoho jaehu mae uehorovobe va'ë'o iae huë baejavonövo'ë'e. O bogo mae uehorovë'o huro ja'o tariö'öjavö'ë'e.

<sup>23</sup> O Israel rajoho Keriso bogo mae uehorovarueje. Röhu ë mu sisëho vuonugo'i Keriso mae uehorovë'o God-ro ë aribövioho tariö'öjëvadoho ujuohoromo röhu maho sionore bimuvëvo'ë'e ëhi jië'e mu vae'iröhoho God hu eni jië'ëro.

<sup>24</sup> Ëhesi bëhoho sa'a gö rajo ae javajoho ja je'ore ijoho va'ëne javadeje. Ëhi javamu röhu God-ro ja je'ore ijo adoho va'ëne tariojavoromo amore ijo gemuore bimuvavadeje. Ëhi jië'e anoji'e muoho vaejë'ëro ëhu'ëro noro biririvo avohoromo uvarueje: God-hu Israel rajo ë amore ijo ado tarivoromo rori'lo bahijadoho ujuoho sionore bimuvëvanövë'o ëho ma-samae jio'a'ajëjo.

*God-hu ae aho'obëhe nosi jöëni vavaenimoromo maro bamavuo'iröhe jöhoje.*

<sup>25</sup> Aganomë ave jöho urimë'i God-hu gurihijadoho avevejö'oho röjahuijë'eje. Ëjöho na nege jemëro avoho ga'irarijago jemëro jemesi sivue uehorovoromo uvojöëni: Nosi simanoho mabëhëro javuë'ëro mae raromarue höjo. Ëjöho na majëhi'ie'e. Israel rajo a ioro'iorohuro hia'e biriri'övaroho bogo ioro'ioemuoho ëhioho jëvobe va'i hujeji sa'a ioro'ioro raje ae aho'obëhe God-arinö rueruomö'iramu evare barë'ë'e.

<sup>26</sup> Sa'a ioro'ioro rajohuro rueruomö'iramu evare Israel rajoho ae aho'obëhe sisëre jëvajoho God-ro baejëvoromo maro bamëvo'ë'e. God-hu Israel rajo baejëvoromo mare bamëvo'iröhe jöho God-are surire ëhi gemuoho jajivoromo uvë'eje: Bada God-ro uvajëjo:

Ajëmi'iröhe ahuro nasi dahorure Zion jioromo ruvebi'ajëjo.

Ruvebiromo God bijönimarue mue aho'o Jacob-are ujo ömo'ömehu vaejaruoho rori'o babu'ö barë'ajëjo.

<sup>27</sup> Jabesi sisë u'ovëho'irode majare evare ëhi jië'e ioro'ioyemu jioröhe jögoroho naro bojëmi'ejöjo.

Israel rajo jabesi jöho ëhi jajivë'eje.

<sup>28</sup> Israel rajehu Keriso-are jö ma bijönimaruohuro ëhuro jabu rori'o tario rëmaje aribövie jëve ë hesi bëhoho God-ro sa'a ioro'ioyero rajoho ajëmi'ini më'ëro. A'i God-hu Israel rajo nimoromo baejëvadohuro ëhuro jabumë God-hu huë baejëvaje aribövie jëve ë hesi bëhoho God-ro Israel rajo jabesi hijo miono'o jabesi ujoho ajëmi'ini uvë'ëro jië'ëro.

<sup>29</sup> Èhesi bëhoho God-hu di aribövi hesinö jioruomoröhego uëromo hesi mu ma suvuro bojëmijë'oho huro bogo jö göho uehorovo'ini ëhi gemuoho uehorovëvobe va'ë'e. Èhuni Israel rajoho bogo vuonugavuo'ë'e.

<sup>30</sup> Urimoroho sa'a ioro'ioyero rajoho jemëro God-are jöho bogo eja-honövarijeje. Bogo ejahamu God-ro gavë'ëro röhu jaruvoho gavade Israel rajohuro hesi jöho bogo ejahamu gëgorovo huotorovoromo sa'a ioro'ioyero rajo jemesi jöëni vavaenimë'eje.

<sup>31</sup> God-ro sa'a ioro'ioyero rajoho jemëni vavaenimoromo ajëmijë'ëro Jew rajehu avevejö'e God-are jö bogo ejaharuoho ijönö God-ro jabesi jöëni ëhu'o vavaenimo'iramu maro jëvo'ë'e.

<sup>32</sup> God-ro ae aho'o jögoru aho'iröhe hesi darugo uhure ramuë'eje ëhuro ijönö ae aho'obëhe no huë baejavuo'iröhëro.

<sup>33</sup> Asë'e God-are huë maho bogo bise'oho vadu'ohoje. Hesi simano maho nuni aji maho börömo maeje. Huhu uehoro mae baejaje hesi bëhoho rahuro biroho'ibejo. Huhu diehi ë'aje öroho rahuro ga'ibejo.

<sup>34</sup> God-are surire jöho ëhi gemuoho jajivoromo uvë'eje:

Rahuro Badare uehoroho gavë'e höjo.

Hesi öriroho rahuro jögoroho mamijë'ajëjo.

<sup>35</sup> Raro suvuroho bojämijë'ëro ëhu'ëro

God-ro mana vuonorö'ö bojämijë'ajëjo.

<sup>36</sup> Èhesi bëhoho God-ro bövioho bise'oho hesiremu javuoröhego avo-havuë'ëro huro döre hiromo aho'obëhe muebejavuajeje. Èhuni hesi ihoho gemu rajahiemu rajahibe va'ejo. Iae mae.

## 12

*Noehu God-are örire dë vövöbajo'e aho'o bojamiromo hesi mu vaenövoröhe jöhoje.*

<sup>1</sup> Aganomë God-ro ëhi noni vavaenimë'ëro ëhuni na nege jemëro jemesi sino haho'e dë vövöbajo'e aho'o baeromo God-are örire gemu bojamirovo'irarijego. Èhi bojamirovë'oho ëhuro Jew rajehu vuovë'e mi suvuro God-ni bahijaruoho bogo ëhioho jio'ini nune jië'e suvure jio'ë'e. Èhi jië'e suvuroho God-aremu jio'iramu ëhuro hu nimo avoho'ë'e. Jemesi ar-ijö'arije God-are örire ëhi bojamirovë'oho ëhuro jemë simano mae jioromo God avoho rajahi'aruje.

<sup>2</sup> O ave sa'arohemu uehorovarue ariböviehu nunire bahijarue mu sisëho nadi ejëhoromo vaenövore. A'ini nugego God-ro jemesi uehore aho'o huotovëho'iro ëhuro jemesi dë vövöbajo'ere God-are aji mahemu baebe va'irarije. Èhi ë'ë'oho God-hu diehi diehi jië'e mu nimajoho jemë ga'a'aruje.

Ga'a'aruje diehi jië'e muoho sisëho bogojio'i God-are nunire ma-maemu jio'iramu.

<sup>3</sup> Röhu God-ro hesi nimoromo huë baejevoromo apostle mu hesi darugoho bojemijë'ego ëhuni ave jöhu'o majëhi'ejo jemë ae aho'obëhe he'irarijego. Nadi jemesi sivuoho uehorovoromo uvore: No a masije javuajëjo. A'i jemë ae gemu gemu avoho uehorovoromo uvore: Naro hesi örire mae uehorovoromo mu vaejoro God-hu ajemadëhi naro hesi örire ëhi mae uehorovoromo ëhi jië'e muoho vaenövo'ejöjo.

<sup>4</sup> No sino haho'e gemu gemu javuo rove. Röhu öve höre nune ëhi jië'e inömoaho aho'obëhe javuë'ëro inöme göëro mue gö vaejarueje inöme göëro mue gö vaejarueje.

<sup>5</sup> Ëhesi bëhoho ekaresiaho no ae aho'obëhe javue. Ëhi javue röhu Keriso-are ae gemuoho javuë'ëro ëhuro aho'o sino haho'e gemuoho javue. Ëhi javuë'ëro no ae aho'obëhe gemuore bimumovorö'e javue. Nosi sino haho'o bimumovorarëhi ëhi gemuoho javue.

<sup>6</sup> Röhu God-ro hesi nimoromo huë baejavuoromo ae gemu gemu suvuoro gö gö bojamuijamu baebe rovarëje. Ëhuni suvuoro diehi baejare ëhi jië'e muoho vaebe va'ejo. Jö God-aro baeromo a majëhi'iröhe suvuoro baejë'o ho mae uehorovoromo uvo'ejo: God-are jöho ëhi röjahuijë'e hö uvaruëhi ëhi jië'e jöhemu ae majëhibe va'ejo.

<sup>7</sup> O ae gö a ajëmi'iröhe suvuoro baejë'o ho iae no ae ajëmibe va'ejo. O God-are öri röjëhijarue ae javuë'o ho iae no ae röjëhibe va'ejo.

<sup>8</sup> O jögoru bojëmijarue ae javuë'o ho iae no jögore bojëmibe va'ejo. O ae suvuorëmijarue ae javuë'o ho iae no öve sasohavuo'iramu suvuorëmibe va'ejo. O masijo riravoromo muebejëvarue ae javuë'o ho ëhuremu uehorovoromo muebejëvobe va'ejo. O huë baejarue ae javuë'o ho dajë nimorohoromo huë baeromo ajëmibe va'ejo.

<sup>9</sup> Ae gö rajëhijë'iroho nadi ma-döhuremuoho rajëhi'i jemesi uhohu'o rajëhibe va'ore. Mu sisë rovajoho bijönimoromo nadi gavanovo'i mu maemu ma'ënobe va'ore.

<sup>10</sup> Göëro göho Christian ö mueno'e hö uvoromo huë baerovore. A ioro'ioro jabesi ihoho döro bamoromo rajëhi avohore.

<sup>11</sup> Muoho nadi bijönimo'i biririvoromo vaebe va'ore. Jasi dë vövöbajo'e aho'o Badare öroro gemu bojamirovoromo hesi muoho vaejahobe va'ore.

<sup>12</sup> Uvore: Ijonö God-ro mae ajamui'iramu aji maro raromo'ëjarëromo nimorohobe va'ore. Huë sisë rovë'iroho biririvoromo riravobe va'ore. Majae ëhi God-are öroro jöe atoromo ë muohuremu uehorovobe va'ore.

<sup>13</sup> God-are aribövie huë vavaene jëvë'o ho suvuorëmiromo ajëminövore. Aehu vejö'e i'e rovë'o ho nihudëgonövore.

<sup>14</sup> Aehu sisë vaejëvo'i arijë'o ho jemëro God uavego huro jabumë huë mae bojëmi'iro. Nadi uavego huro sisëho bojëmi'i a'i uavego mae bojëmi'iro.

<sup>15</sup> Ae nimorohë'o ho jemë'o gemuoro bimumovoromo nimorohore. Ae vavaenimë'o ho jemë'o gemuoro bimumovoromo vavaenimore.

<sup>16</sup> Jemë aho'obëhe ma-gemu uehorovoromo huë baerovore. Nadi uvore: No masijëro javuë'ëro mu ininoho bogo vae'ëjarë'i mu böröme o bise'e ma-vaere. Nadi sivuoho uehorovoromo uvore: No simano ma'e ae javuajëjo.

<sup>17</sup> Ae göehu sisë vaejëvë'o ho nadi mana sisë vaejëvore. Ae aho'obëhe uvaruoho: Ëmuoho mae hö uvaruoho ëhi jië'e muoho vae'i ë'o gare.

<sup>18</sup> Huë mae hesi örohuremu uehorovoromo ë hesi muohuremu vaeromo ae aho'o jabu'o gemu mae raromo gare.

<sup>19</sup> Aganomë aehu sisë vaejêvê'oho nadi mana i'uoho bojëmi'i ma-ga taemorego hesi God-ro vörö'iraeromo i'uoho bojëmi'iro. Ëjöho God-are surire uvê'eje: Badaro uövuajëjo: I'u bojëmi'irodoho nasi mue höjo. Naro mana bojëmi'ejöjo.

<sup>20</sup> Ëhi uvê'e jiaje nadi mana bojëmi'i a'i God-are surire jöho uvê'e jiajêhi ëhi vaere. Ëjöho ëhi uvê'eje: Ja'o muorovaje aho hömê'iroho ioho ma-bojaminëjo. O jovo i'i nimê'iroho jovoho ma-bojaminëjo. Ëhi ë'ê'oho ruehuro êho garomo tiöromo gövögövvöromomo avo'avoho uehorovo'ajëjo.

<sup>21</sup> Mu sisë rovê'iroho nadi ejahorego jemë ruahö'öjêvego bejêvo'i a'i mu mae vaeromo êhuro ë sisë rovajoho ruahö'öre.

## 13

### *Sa'are a masijehu bojamuaje mu noehu vaeröhe jöhoje.*

<sup>1</sup> Ae gemu gemu aho'obêhe ave sa'are a masijo jabesi jöho ejêhore. Sa'ae dinö'e dinö'e raromoromo masijo vaejarue aribövi jabesi darugoho bogo ëma ri'ö'i God-ro darugoho bojëmiromomo uêvadeje: Ëmuoho vaerëjo.

<sup>2</sup> Ëhuni ae rahu ave sa'are a masijo jabesi jö ahê'oho êhuro God-hu bamade muohu'o mu'uvajeje. God-hu bamade mu mu'uvê'oho êhuro i'uoho mana bae'ê'e.

<sup>3</sup> Sa'are a masijo jabesi mu bêhoho mu ma vaejarue ariböviohuro bogo juhuonivo'i a'i mu sisë vaejarue ariböviohuro juhuonivo'iröhego. Jabesi mu bêhoho êhije. Ëhuni ja sa'are a börömo bogo juhuonami'iê'oho mu mahemu vaene. Mu ma vaejê'oho huro jasi ihoho mae ua'ê'e.

<sup>4</sup> Sa'are a börömoho God ajamiromomo mu vaejaje aeje êhuro ja mae javo'iröhego. A'i jaehu sisë vaejê'iroho juhuonamine. Rabëni i'u bojämui'iröhe vöröho ave sa'are a börömoho bogo ëma bae'i a'i God-are mue vaeromomo mu sisë vaeruomaje aribövioho God-are vörö'e i'uoho mana bojëmijajeje.

<sup>5</sup> Ëhuni jero ave sa'are a masijo jabesi jöho ejêhone. Ejahê'oho êhuro i'uoho bogo bae'a'anue. Röhu göho jasi dë vövöbajo'ere herovoromomo uvo'a'anue: Na mu mae vaejê'e jevajëjo.

<sup>6</sup> Iae êhuni ave muohu'o vaejarujeje. Jemëro jabumë tax-oho bojëmijarujeje rabëni ave sa'are a masijohuro God-are muoho vaeromomo avoho muebejaruëro jiê'ëro ë hesi bêhohuni.

<sup>7</sup> A masijo jabesi örire diehi jiê'e mu vae'irarijoho ëhi vaere. Tax ihe gö gö bojëmi'irarijoho ëhi bojëmire. Mae uehorovo'irarije aribövioho mae uehorovore. Rajêhi'irarije aribövioho rajêhire.

### *Göehu gö hesi örire diehi jiê'e mu vaeröhe jöhoje.*

<sup>8</sup> Suvuore rabe a mana bojëmi'irarijoho ma-burëro mana bojëmirego ë muoho barë'iro. A'i ave muohuremu jiemu jiobe va'ê'e dë vövöbajo'e a bojëmi'irarije muohoje. Göehu gö dë vövöbajo'e aho'o bojämijê'oho êhuro God-hu bojamuade jögoroho e barë'aruje.

<sup>9</sup> Rabëni hesi bêhoho God-hu bojamuade jögoroho ëhi uvê'eje: Nadi goho'amonëjo. Nadi ae anonëjo. Nadi vajiohe ë'onëjo. Nadi ae gö hesi böviëni bise'ënioho ganiganimonëjo. Ëjöhu'o jögoru ioro'iorohu'o ë hesi bêhoho ëhi uvê'eje: Jasi arijo'arije rajahirovanuëhi jasi ae gemuoho ëhi rajahinëjo.

<sup>10</sup> Jasi ae gemuoho dë vövöbajo'ehu rajahijë'ocho hesi öriroho mu sisëho bogo vae'a'anue. Ëhuni göehu gö rajahirovë'ocho ëhuro God-are jögoroho e barë'anue.

<sup>11</sup> Ëhi jië'e muoho vaenövore rabëni hesi bëhoho jaruvocho diehi jië'e maja jiajoho jemë iae gavaruje. Momorö'öjarujoho ri'ö'irarije majaho rovë'eje. Ëhesi bëhoho aevo'i Keriso mae uehorovare majare evare noehu God'o maro raromo'iröhe majaho ëgo'o jadeje. Jaruvocho ë majaho dunove.

<sup>12</sup> Vahiocho barë'i Badahu rueröhe majaho sisonuvo'irögoro ë'e. Ëhuni ramoramo'e muoho vuonugo'i muorovo'iröhe inömo inömocho ujuoho'ejo aji'e majare muorovo'iröhëro.

<sup>13</sup> Aehu majare avoho raromo jijiharuëhi noro ëhi ë'ejo. O gemuore gagovoromo mahunö'e uruvoromo tiöromo jijihë'ocho bogo. Jovo iromo simano sisërëjë'ocho bogo. Öehu jijihanovoromo mu gö gö vaejë'ocho bogo. Ire muorove bogo. Ae gö jabesi mu mahuni dë vörönimë'ocho bogo.

<sup>14</sup> A'i jemëro Bada Iesu Keriso-are darugoho baeromo ëhuro sinehu sisë nimajoho nadi eromo hesi muoho vaere.

## 14

*Noehu bogo masije riravoromo uvo'iröhe: Christian ö mueno'oho sisë hö uvo'iröhe jöhoje.*

<sup>1</sup> A ioro'iorohuro Keriso mae uehorovarueje. Röhu bogo avo'avoho uehorovo'i ma-juhuoni juhuonie mae uehorovarueje. Ëhi jië'e aribövieu ekaresiae jemë'o bimuvo'i nimamu gëvë'iroho jemesi baejëvore. Röhu nadi uvore: Jabumë rue'iramu noro jabesi jöho aho'ahovo'ëjarëromo baejëvore.

<sup>2</sup> Ae göëro birivoromo Keriso avoho uehorovoromo uvo'ë'e: I mi bövi bise'o ijë'ocho iae mae höjo. Ae göëro juhuoni juhuonie uehorovë'ëro mioho bogo i'i ma-iemu i'ë'e.

<sup>3</sup> Röhu mi bövi bise'o ijanue aharo nadi sivoromo uvone: Mi bövi bise'o juahovaje aho ma-asisö'o va'ënëro jië'ëro juahovaje höjo. Nadi ëhiocho uvone. O mi juahovanue aharo nadi uvone: Bövi bise'o ijaje aho vajamirovajëjo. Nadi ëhiocho uvone. God-ro ë aho hesinö baejë'e höjo.

<sup>4</sup> Ae gö hesi mu ajamaje aho jaehu garomo sisë hö ua'iranoho ëho bogo jasi muehuje. God hesi böviahuremu ga'ë'e hesi mu ajamijaje aho mae nami'iramu o be'iramu. Röhu hu iae nami'ë'e. Rabëni hesi bëhoho. Hesi Böviocho ajami'iröhoho eni jië'ëro ëhuro hu ajami'iramu birivoromo mae nami'ë'e.

<sup>5</sup> Ae göëro uvajeje: Ëmajaho ë majaho börömecho ëhuni ë majaroho no God mae uehorovoromo raromo'ëjarëjo. O maja ioro'ioroho ma-mu majaemu höjo. Ae göëro uvajeje: O bogo ëhiocho jio'i a'i majae aho'obëhe God-are majae jië'ëro no God uehorovë'i muoho vae'ëjarëjo. Ëhi jië'e uehoroho niö'i jëve. Röhu ae gemu gemu di uehoroho mae hö uvanuoho ë uehoroho gemu ma'enoromo hi juvone.

<sup>6</sup> Ae rahu uvë'iroho: Ëmajaho böröme hö uvë'iroho huro Bada mae uehorovoromo ëhuni ë majaho uehorovajeje. O ae rahu mie rabe ijë'iroho huro uvajeje: God-ro suvoro mae bojemijë'e höromo ijajeje. Ëhu'ëro Bada mae uehorovoromo ijajeje. O ae rahu mie rabe juahovë'iroho Bada mae uehorovoromo ëhuni juahovajeje. Juahovoromo röhu i rabe ijajohuni God huë mae uavajeje.

7 Ĕhesi bēhoho no ave sa'are raromē'iroho bogo nosi jōēnioho gemu raromarueje. O vuovē'iroho bogo nosi jōēnioho gemu uehorovoromo vuovo'i

8 a'i raromē'oho Badare jōēni uehorovoromo raromarueje. O vuovē'oho Badare jōēni uehorovoromo vuovarueje. Ĕhu'ero jiē'ero raromē'oho o vuovē'oho no Badare javue.

9 Kerisohu guomoromo rōhu ri'ōromo hijade hesi bēhoho vuovē'le aribōviohu'o ave sa'are raromarue aribōviohu'o nosi Bada jioromo muebejavuo'irōhēni. Ĕhu'ero no Keriso-aremu javue.

10 Ja rabēni jasi ōehu mu ē'ajoho garomo sisē hōromo aganueje. O ja rabēni ōho juhuoni'e ae hōromo sivanueje. Hujeji God-are majaho rue'iramu no aho'obēhe hesi nunire riravo'ejo hesi huro mevavuorōhego.

11 Ĕhesi jōho God-are surire jajivoromo uvē'eje: Badaro ēhi uōvuajējo: Na daruge jioromo hijajoho iae mae jio'ego ave jōhu'o mae majēhi'ie'ajējo. Ae aho'obēhe God nasi jōēni gemu ague aho raromo'aruējo.

Ae aho'obēhe jō'ero huruohoromo uvo'a'aruējo: Nōrō God hōjo.

12 Noehu God-are nunire gemu riravo'irōhe jōho ēhi jajivē'ero ēhuni no ae aho'obēhe gemu gemu God-are nunire riravoromo mu vaebe rovere bēhoho huruoho majahi'ejo huro herōhego.

*No mue gö gö nosi Christian ō mueno'o jabesi nunire bogo vaejego jabuhu no göromo nosi dōre bogo ō'oromo mu sisē vaejego rireromēvo'irōhe jōhoje.*

13 Ĕhuni ē'ego no ijonōho bogo uvo'iro: Ĕaho mi ijajoho o ēhi jiē'e mu vaejajoho ēhuro mu sisēho vaejaje hōjo. Ĕ'ego no bogo ēhioho uvo'i. A'i uvore: Noro mue gö gö agano jabesi nuniroho bogo vae'ejarējo jaburo no göromo nosi dōre ō'oromo mu sisē vaejego rireromēvojōēni.

14 Na Bada Iesuare ae gemuohuro jevē'ero ēhu'ero na ma-mae garomo uvajeje: Ijarue ioho mioho bövioho bise'oho God bogo ahavuaje hōjo. Iae ēhi jie rōhu aehu uvē'oho: God-ro ahavuade hō uvoromo ē uvade aehu ijē'oho sisēje.

15 Ĕhesi bēhoho mae hōromo jaehu ie mie jasi Christian ae gö hesi nunire ijamu ē ahuro garomo uvē'oho: O God-hu ahavuade ioho ijane hōjo. Ĕhuni na'o God-are jōho ahoromo i'ejō uvē'oho jaehu hesi nunire ijanoho ēho bogo maho ē'aneje. Jero hesi ōrire bogo uehorovē'e ma-ijaneje. Ĕa hesi jōēni Kerisoro guomē'e jiaje ēhuni nadi ioho mioho ēma iromo ēhuro hu ijumone.

16 Jemēhu uvarujoho: Ie mie jove bövie bise'e ijē'oho mae hō uvarujoho gavē'i ue'ahore. Ae göero gēromo jemesi mu ma hesi jōho sisē'i ato'ē'ō.

17 God-hu bōrōme namiromo muebejavuaje hesi bēhoho bogo ie jove ue'aharuoho jio'i a'i mu mae vaeromo huē baerovoromo God-are Aru'ahehu dē vōvōbajo'o sasohavuego raromaruohoje.

18 Ĕhi jiē'e mu ma vaeromo Keriso-are mu vaejahē'oho God-ro ēhi jiē'e aho nimo'iramu ae aho'obēhe uvoruomo'ē'e: Ĕahuro mu maho ōmaje hōjo.

19 Ĕhu'ero jiē'ero no ave muohemu ē'o ga'ejo. Noro gemuoro avoho huē mae raromoromo ajamirovo'ejo ēhuro avoho birivoromo riravo'irōhēni.

20 Jemēro nadi iemuoho miemuoho uehorovoromo God-hu ae gö jabesi dē vōvōbajo'ere mu vaejajoho ijumēhore. Ie aho'obēhe God bogo tugohē'eje. Rōhu jemēhu i ue'ahamu ae göehu gēromo jabu'o ue'ahoromo God-are jō ahē'oho ēhuro jemēhu ue'aharujoho sisē jio'ē'e.



21 A'i aveho mu mahoje. Jaehu mi ijamu wine jove ijamu o mu rabe vaejamu jasi Christian aganehu ja garomo döre ö'oromo rireromo'iröhe ëhi jië'e muoho gorone.

22 Jaehu uvanuoho: Na ie mie bövie bise'e ijë'o'oho iae mae hö uvanuoho jero ine. Röhu jasi sivue God-are nunoro ine. Jaehu uvë'o'oho: Ave muoho iae mae hö uvë'o'oho röhu ë muoho vaeromo he'irane dë vövöbajo'oho mae jivamu hejë'o'oho huë mae javajeje.

23 A'i jaehu i i'ie'iroho uehore niö'i baeromo röhu ë i ëma ijë'o'oho God-are nunire mu sisë vaejanueje ë hesi bëhoho ja bogo herovoromo uvaneje: Iae mae-ëjo. God-ro ëhi jië'e muoho nimajë uvë'e ëma ijë'ëro. Jaehu bogo uvë'o'oho: Iae God-ro ë muoho nimajë uvë'e mu ëma vaejë'o'oho ëho mu sisë vaejanueje.

## 15

*Nosi sino bogo uehorovo'i a ioro'ioro jabesi jöhu'o uehorovoromo mu vaeröhe jöhoje.*

1 No biririvoromo Keriso avoho uehorovarue aribövioho noro aviëhi jië'e muoho vae'ëjo. Noro garöhe ae göehu ma-juhuoni juhuonie uehorovamu gëvë'o'oho nosi sinehu nimajoho bogo uehorovë'e ma-u'emu sanuovoromo ajëminövo'ëjo.

2 Nosi Christian aganehu uvaruoho: Ëmuoho mae hö uvaruoho ëhi jië'e muoho no ae gemu gemu vaenövo'ëjo ajëmego jaburo avoho biririvoromo Keriso mae uehorovo'iröhego.

3 Keriso'o hesi sinehu nimajoho bogo uehorovadeje. A'i huhu ë'ade jöho God-are surire jajivoromo ëhi uvë'eje: Aehu jö sisë rabe rabe God ja bojamaroho na'o ë i'uo'oho baejode höjo.

4 Röhu urimë'i God-are surire jö diehi diehi jajivo'amare hesi bëhoho ëhije röjahuego noro ë surire jöho adahoromo dë sanuovahuego biririvoromo ëhuro muebebe va'ëgo God-ro ajamuijego mae javuoröhego.

5 Röhu avevejö'oho God-ro ajamuijajeje ëhuro no dë sanuovahuego biririvobe va'oröhego. Ëhuni na nege huro jemë ajëmijego Iesu Kerisohu uehorovadëhi ëhi gemuoho uehorovoromo jemë aho'obëhe simane gemuoho uehorovo'irarijego.

6 Simane gemuoho uehorovë'o'oho ëhuro jöe gemuoho atoromo gemuore bimuvoromo God rajahi'aruje hesi ihoho böröme jioröhego God hu nosi Bada Iesu Keriso-are Börömoho o hesi Vavuoho jië'ëro.

*God-hu bogo Jew rajemuoho a'i sa'a ioro'ioro rajohu'o ajamuaeje jöhoje.*

7 Ëhuni Kerisohu jemë rajëhiromo baejëvadëhi jemë'o göëro gö rajahivoromo baerovorego ëhuro God-are ihoho böröme jio'iro.

8 Ëhesi bëhoho majëhi'ie'e. Kerisoro Jew rajoho no ajamui'i rovadeje. Jew rajo no ajamui'i rovade hesi bëhoho God-ro nosi Jew rajo hijo miono'oho uëvadeje: Ijonö naro ëhi'oromo jemesi ujoho ajëmi'ëjöjo. God-ro ëhi uëvë'ëro Kerisoro ijonö rueromo nimadeje God-hu Jew rajo jabesi ujo ajamui'i uëvadëhi Jew rajoho ëhi ajamui'iro ëhuro noro garöhego God hu jö maemu majahuijaje aho jiego.

9 O sa'a ioro'ioro rajohuro uvoröhego: God-ro noni vavaenimoromo no'o mabëhe ajamuijë'e hö uvoromo hesi ihoho doro bamo'iröhego. Ëhesi jöho God-are surire ëhi uvë'eje:

Ëhuni naro sa'a ioro'ioro rajohu'o hiromo God jasi örire huë mae ua'ëjöjo. Na jöe ioromo jasi ioho rajahi'ëjöjo.

10 O God-are surire jö göho uvë'eje: Sa'a ioro'ioro rajoho jemëro God-are ariböviohu'o gemu mae nimorohorëjo.

11 O surire jö göho ëhi uvë'eje:

Sa'a ioro'ioro rajoho jemëro ae aho'obëhe Bada mabëhe uarëjo.

Sa'ae dinö'e dinö'e raromarujoho ae aho'obëhe hesi öroro rajahirëjo.

12 O Isaiah-ro Keriso-are mu diehi jioröhe öroho jajivoromo uvë'eje:

A mami ae Jesse bëhoho jiade höjo.

Röhu sahorijadoho hujeji bunohuro sirinohiromo ri'ö sionore nami'a'ajëjo.

Ëhi'oromo böröme namiromo sa'a ioro'ioroho muebejëvo'ajëjo.

Muebejëvo'iramu jaburo uvo'a'aruëjo: Iae ë ahuro ijönöho no aja-muinövo'ajëjo.

Ëhi uvë'eje.

13 Iae God-ro nosi dë vövöbajo'e avohahuego ëhuro no uvarueje: Ijönöho huro ajamui'iramu mae javuo'ajëjo. Ëhuni na nege huro ëhi ajëmijego jemëro hesi örire mae uehorovoromo ëhuro huë vavaenoho juhuonoho bogo bae'irögoro ma-nimorohoromo mae raromo'irarijego. Ëhi jië'oho God-are Aru'ahohuro hesi darugoho bojëmi'iramu jemëro ma-mabëhe biririvoromo muebebe va'a'aruje hesi aji maho bae'irarijëro. Ëhi jië'oho iae na nege.

*Paul-hu rabëni Rome ariböviëni biririvoromo jajivade hesi bëhohoje.*

14 Aganomë iae na mae garomo uve: Jemesi muoho iae ma-maemu jiajëjo. Uehoro maho jemesi simanëro eni baejë'e jëvajëjo. Nuehu uehorovoromo röjahirovarujoho eni jëvajëjo. Iae na ëhi uve

15 röhu naehu jö jajivodoho na ma-bisemu biririvanovoromo majëhijodeje jemëro garomo avoho uehorovo'irarijego. Naehu ëhi jajivode hesi bëhoho God-ro huë baejevoromo muoho bojemadeje

16 naro Iesu Keriso-are muoho vaejahoromo sa'a ioro'ioro rajoho jemë ajëmi'irodego. Ëhuni naro jemë ajëmiromo priest-ehu vaejarue ëhi jië'e muoho vaeromo God-are jö maho majëhijajeje ëhuro priest-ehu suvuoro ujuohoromo God-are örire bojamego nimorohajëhi naro sa'a ioro'ioro rajoho jemë ëhi ujuohëvoromo God-are örire suvuore bojamijego hesi Aru'ahohuro jemesi dë vövöbajo'oho avohëvego maemu jëvego God-ro baejëvoromo nimoroho'iröhego.

17 Ëhu'ëro jië'ëro na Iesu Keriso-are ae gemuohuro jevë'ëro God-are mu vaejahajohuro ëhuro na mae jeve.

18-19 Ave jöhuremu biririvoromo jövo'ejo jö göho bogo. Kerisoro uevë'ëro naro hesi jöho majëhibe hesi muoho vaebe darugo'e mu masijoho röjëhibe hesi Aru'aho hesi darugoro biririvobe juvamu ëhuro sa'a ioro'ioro rajohuro God-are jöho ejahë'eje. Ëjöhemu jövo'ejo. Naro Keriso-are jö maho baeromo ruhëhi Jerusalem amoho numëhi Illyricum sa'aho röhu ë rirohu'o aho'o majëhibe juvë'e jeve.

20 Na negadeje Keriso-are jö bogo hejë'e ariböviohuremu majëhibe juvo'irodëni ae göëro mami'e vaejë'e naro maho döre vaejëni.

21 Ëjöho God-are surire jajivoromo ëhi uvë'eje:

God-are jö bogo majëhijamu hejare ariböviohuro iae garuom'o'ajëjo.

Bogo hejare ariböviohuro iae jö bëhoho baerum'o'ajëjo.

Ëhi jioröhego negamu bogo heruomë'e aribövioho majëhibe juvë'e jeve.

*Paul-hu Rome amore va'i uehorovade jöhoje.*

22 Ĕhi ji'e muoho vaebe juvoromo ehuro na o'i ehohiodoho bogo eni jevonovohijo.

23 Røhu avevejø'oho ave sa'anørire mu vae'irodoho iae barøje. Barøjè'ero vadune aho'obèhe ø'i nimobe rovodohuni

24 ehuni na uehorovoromo uve: Spain sa'are va'iè'iroho ø'oromo gè'ejøjo. Gøromo jemè'o ma-bisemu hiromo huè mae jevo'iramu evare jemèro ajemi'iramu ehuro na Spain sa'are mae va'ejøjo. Na ehinege.

25 Røhu avevejø'oho na Jerusalem amore va'iè'e God-are aribøvioho ajemiromo suvuro harihe i'imèmi'irodøro.

26 Ehese bèhoho God-are aribøviehu Macedonia sa'are Greece sa'are raromaruohuro jabesi nimoromo uvareje: È'ego no suvure gagovoromo Jerusalem raromarue aribøviohuni nugø'øjèho'irarøjo God-are aribøvi bøvi bise'o rumo'oho jaburo ujuohorøhe højo.

27 Jabesi nimoromo ehine uvareje. Røhu Jerusalem ekaresia ajemi'irøhoho èho jabesi mueje. Rabèni. Jew rajo ekaresiahuro sa'a ioro'ioro rajo aru'aho muoho ajemiromo Keriso-are jøho majèhijè'ero ehuni Jew rajo jabesi ørire sino hesi muoho mana ajemiromo ijo bajo nugø'øjèhè'oho iae maeje.

28 Naro jabesi suvuroho bava'oromo ekaresia jabesi øvore bamèhoromo barè'iramu evare ø'oromo jemè gøromo Spain sa'are va'ejøjo.

29 Røhu na gavajoho ø'è'iroho Kerisohu ajamuijaje darugoho bøvi mae baeromo ø'oromo ajemi'ejo.

30 Røhu na aveho nimo avohoromo uè'iè'e. Jemèro nosi Bada Iesu Keriso uehorovoromo God-are Aru'ahuhu dè vøvøbajo'ere huè ma bojamuijajoho uehorovore. Èho uehorovoromo na'o bimuvoromo birivoromo nasi jøeni God-are øroro ua ganøvore.

31 Ua garomo uare: God jero Paul ajaminego huro Judea sa'are va'oromo Keriso bogo uehorovarue a jabesi øvoro bogo va'irajo. Bogo va'i Paul-hu Jerusalem amore hiromo bogo eni jèvaje aribøvi ajemijè'iroho jero hu ajaminego God-are aribøviohuro uvo'irarøjo: Paul-ro mabèhe ajamuijade højo.

32 Ĕhi ua gavè'oho God-ro hesi nimoromo ajemi'iramu naro nimorohè'i jemesi ørire ø'oromo jemè'o hi'ejo. Hi'iramu daje sasohevo'è'e.

33 Huè mae bojamuaje aho God-ro ae aho'o jemè'o hi'è'e. Iae mae.

## 16

### *Paul-hu a jejèmijade jøhoje.*

1 Røhu ave magonahoho Phoebe nosi Christian ma'ineje. Hu Cenchree amore ekaresia ajemijaje magonaheje. Hu magonaho maeje.

2 Ehuni God-are aribøviehu a rajèhiromo bæjèvaruèhi ehine nosi Badare ihero hu'o rajahiromo baere. O huè vavaene rabe jiè'oho ajamire rabèni hu ae aho'obèhe ajemiromo na'o ajemijè'e jiaje ehuni.

3 O Prisca'o Aquila'o jejèmijode høre jabu'o na'o havoromo Iesu Keriso-are mu vaejarue a magonaho'ego.

4 Na bogo guomevorøhego jaburo niø'iro vørø'ere va'areje. Ehuni naro jabesi ørire huè mae jevajeje. Bogo naremuèremuoho a'i sa'a ioro'ioro rajo ekaresiae ae aho'obèhe jabu'o jabesi ørire huè mae jioruomajeje. Ehuni jejèmijode høre.

5 O jabesi osare gagovarue ekaresiahu'o jejèmijode høre.

O nasi aemo'aeme Epaenetus jejamijode høre Asia sa'aroho huro aevo'ioho Keriso mae uehorovè'ego.

<sup>6</sup> O Mary jejamijode höre mu böröme biririvoromo jemesirire vaejè'ego.

<sup>7</sup> O Andronicus'o Junias'o jejemijode höre nasi Jew rajo aganego. Jaburo niö'iro na'o savoji gagore arijareje. Apostle jabumëro ë ae niö'i jabesi ihoho mae hebe rovarueje. Urimo ë ae niö'ioho jaburo Keriso'o gemuoro bimuvamu naro jabesi ijore bimuvodeje.

<sup>8</sup> O Ampliatus jejamijode höre. Hu'o na'o Badare ae gemuohuro javuë'ëro ëhu'ëro naro hesi örire dë vövöbajo'e aho'o uehorovajeje.

<sup>9</sup> O Urbanus no'o gemuore havoromo Keriso-are muoho vaejajego jejamijode höre. O Stachys naro hu dë vövöbajo'e aho'o uehorovajëro jevë'ëro jejamijode höre.

<sup>10</sup> O Apelles hu biririvoromo Keriso gemu uehorovego no ae aho'obëhe gavaruëro jië'ëro jejamijode höre. O Aristobulus-are aganoho jejemijode höre.

<sup>11</sup> O Herodion jejamijode höre nasi Jew rajo aganego. O Christian ö mueno'e Narcissus-are aganoho jejemijode höre.

<sup>12</sup> O Tryphaena'o Tryphosa'o jabesi örire jejemijode höre ë magonaho niö'iohuro Badare muoho biririvoromo vaejaruego. O magonaho göho Persis jejamijode höre. Naro hesi örire dë vövöbajo'e aho'o uehorovo'i huro Badare muoho biririvoromo bövi mae vaejajego.

<sup>13</sup> O Rufus jejamijode höre hu Badare a ma-mabëhego. O Rufus-are vëmoho jejamijode höre nasi vëmu maehu ë'anovajohuni.

<sup>14</sup> Röhu Asyncritus Phlegon Hermes Patrobas o Hermas ëhi jejemijode höre. Jabu'o gemu mae raromarue Christian aganoho ëhu'o jejemijode höre.

<sup>15</sup> O Philologus'o Julia'o niö'i o Nereus'o hesi ma'inohu'o niö'i o Olympas o God-are aribövie aho'o jabu'o raromaruoho ëhi jejemijode höre.

<sup>16</sup> God-are ariböviehu jejamirovaruëhi jemë'o ëhi rajahirovoromo jejamirovore. Röhu Keriso-are ekaresiae aho'obëhe jemesi örire jejemiruomadeje.

### *Ijo tugoho'i jöhoje.*

<sup>17</sup> Aganomë ave jöhuremu uehorovore. Gavë'i raromore Keriso-are jö majëhijamu hejarijoho nani aëro ö'oromo ahoromo jöe gö majëhi'ë'ö. Jöe gö majëhiromo jemesi mu maho ijumo'iramu jemëro jöe gemuoho bogo ato'i jöe gö gö ato'a'aruje. Ëhi jië'e aribövi ö'amü gevë'oho jabesi jöho nadi ejëhore.

<sup>18</sup> Ëhi jië'e aribövioho nosi Bada Keriso-are muoho bogo vaejaho'i jabesi sinehu nimaje muohemu vaejarueje. Jabesi sinehu nimaje muohemu vaeromo ae sanusanuëmiromo ma-döëremu jö mae majëhijego ae göëro mu sisë jöho bogo uehorovo'i ma-heromo uvarueje: Jö mae majahuijaruëromu ejëharueje.

<sup>19</sup> A'i jemëro jabesi mu sisëho garomo nadi ejëhore. Naehu ëhi üevaje hesi bëhoho jemëhu God-are jö mae ejaharuje jöho ae aho'obëhe hejë'ejö. Ëhuni na nimorohe. Röhu na nege jemëro mu sisëho bogo uehorovo'i ma-mu mahemu uehorovo'irarijego.

<sup>20</sup> Majae dunovo'iramu huë mae bojamuaje aho God-ro Satan-are muoho ruahö'ö'iramu jemesi hörëro vijuvo taemo'aruje.

Nosi Bada Iesuro jemë huë baeromo ajëminövo'ë'e.

<sup>21</sup> Röhu na'o havoromo mu vaejaje ae Timothy-ro jemesi örire jejemije. O Lucius o Jason o Sosipater ëho jaburo jemesi örire jejemijö jabumë nasi Jew rajo aganëro jioruomë'ëro.

<sup>22</sup> Tertius naro Badare ihore jejëmije. Paul-ro ue'ego naro hu ajamiromo ave surire jöho jajivahe.

<sup>23</sup> Röhu Gaius-ro jemë jejëmije. Ëa hesi osare Paul naro hijego huro muebejevajeje. O ekaresiae ae aho'o hesi osare gagovoromo God rajahi'i raromarueje. Röhu ave amo hesi ijo bajo muebejaje aho Erastus'o nosi Christian agane Quartus'o ëho jaburo niö'iro jemë jejëmijö.

<sup>24</sup> [Nosi Bada Iesu Kerisoro jemë ae aho'o huë baeromo ajëminövo'ë'e. Iae mae.]

<sup>25</sup> Röhu God hu mabëhego rajahi'ejo. Ëhesi bëhoho hu eni jië'ëro ajëmi'iramu jemë biririvoromo naehu majëhijaje jö maho Kerisohu ajamuaje jöho mae uehorovo'aruje. Keriso-are jöho God-ro urimo subivahuobe rovadoho

<sup>26</sup> jaruvoho ma-sama'e huruohoromo röjahuijë'eje. Ijonö jioröhe jö God-are surire jajivare hesi bëhoho noro garomo ë subivahuade jöho baejarueje. Baeromo ioro'ioemu hijaje aho God-ro uövuë'ëro noro ë jöho ae majëhibe jijiharueje sa'ae aho'obëhe raromarue ariböviohuro mae uehorovoromo ejahoruomoröhego.

<sup>27</sup> God hu gemu simano mae uehorovaje ahoje. Ëhuni noro Iesu Keriso-are ihore hu rajahiemu rajahibe va'ejo. Iae mae.

## 1 CORINTHIANS

*Paul-hu Corinth amo rajo ekaresia jejëmiromo jabesi jöëni God mae uavade jöhoje.*

<sup>1-2</sup> O asë'e God-are ekaresiae Corinth amore raromarujohumë God-ro jemë uëvë'ëro ëhu'ëro jemë God-are aribövi mae jëve jemë Keriso-are ae gemuohuro jëvë'ëro. Jemë God-are aribövie jëve röhu ae aho'obëhe sa'ae dinö'e dinö'e raromoro nosi Bada Iesu Keriso-are iho uvaruoho jabu'o jemë'o God-are aribövie gemuoho jëve Keriso hu jabesi o nosi börömohuro jië'ëro. Röhu Paul na Iesu Keriso-are apostle jeve God-ro nimë'ëro. Nosi öe Sosthenes-mu niö'iro jemesi örire jejëmö.

<sup>3</sup> No nague God nosi Vavuohu'o Bada Iesu Keriso'o huë baeromo ajëmijego maro raromo'irarijego.

<sup>4</sup> Naro majae ëhi jemëni uehorovoromo nasi Böröme God-are örire mabëhe uavajeje rabëni huro jemë huë mae bojëmiromo Iesu Keriso uavamu huro jemë ajëmijë'ego.

<sup>5</sup> Jemë Keriso'o gemuoro jëvë'ëro ëhu'ëro mabëhe baejë'e jëve. Simano mae jö mae o ëhi jië'e suvuore gö gö aho'obëhe baejë'ëro ëhu'ëro jemë God-are jöho mabëhe uehorovoromo atarujeje.

<sup>6</sup> O Keriso-are jö noehu majëhijaruoho ëho jemesi dë vövöbajo'ere ma-mae uehorovoromo biririvoromo ma'enujeje.

<sup>7</sup> Ëhu'ëro jië'ëro mue gö gö vae'irarije suvuoroho gö bogo vuonugo'i aho'obëhe bae barëjë'e jëve. Ëhi jëvë'ëro muebejarujeje nosi Bada Iesu Kerisoro va'orahoro rovego ga'irarijëro.

<sup>8</sup> Jemëhu hu muebejarujoho huro jemë ajëmi'iramu biririvobe va'ojuvo va'lo ijo tugoholi majare nosi Bada Iesu Kerisoro göromo mevavuo'iramu evare jemë hesi nunire ma-maemu riravo'aruje

<sup>9</sup> ë hesi bëhoho God hu maëro jië'ëro. Huro uëvamu jemë aevoromo hesi Harihe Iesu Keriso nosi Bada'lo bimuvë'ëro hu'lo jemë'o gemuoro jëve. Ëhi ajëmade aho God-ro iae jemë ajëmi'iramu biririvobe va'a'aruje.

*Ekaresia ariböviehu bogo jöe gemuoho uehorovo'i jöe gö gö uehorovoruo-made jöhoje.*

<sup>10</sup> Nasi ö mueno'ohumë ave jöho na Bada Iesu Keriso-are ihore majëhi'ië'e. Jemë ae aho'obëhe jöe gemuoho atore. Nadi sivu sivuoho jöe gö gö ato'i o uehore gö gö bae'i a'i uehore gemu baeromo raromoro.

<sup>11</sup> Nasi ö mueno'e naehu ëhi jajivaje hesi bëhoho here. Chloe-are agano ioro'iorohuro rueromo jemesi jö sisëho huruoho majehiromo uevareje: Corinth rajo ariböviohuro jö aho'ahamirovarue höjo. Ëhi majehijamu hejodeje.

<sup>12</sup> Ëhi ë'arujoho na uë'ië'e. Jemë ae göëro göëro jöe gö gö atarujeje. Ae göëro uvanueje: Paul börömego na hesi ijore ijore juvaje ae jevajëjo. Ae göëro uvanueje: Paul bogajo. A'i Apollos börömego na hesi ijore ijore juvaje ae jevajëjo. Ae göëro uvanueje: Apollos bogajo. A'i Peter börömego na hesi ijore ijore juvaje ae jevajëjo. Ae göëro uvanueje: Keriso börömego na hesi ijore ijore juvaje ae jevajëjo. Jemë bogo ëhioho ë'aruje höjo. Jemëro ëhi atarujeje.

<sup>13</sup> Nani sarerivoromo uvarujeje: Keriso-are sino haho'oho tariö'ö tariö'ö jië'e höjo. No ioro'ioroho Keriso-are javuo'i ioro'ioroho bogo Keriso-aro

javuajëjo. Èhioho bogojië'e jiaje nadi èhioho uvore. Keriso gemu börömoho jio'i apostle aribövioho no bogo masijehu javue. Jemesi jöënioho bogo Paul naro guomodeje. Jemë bogo Paul nasi ihoroho bapataeto vaejëvareje. Èhu'ëro na bogo börömehu jeve.

<sup>14</sup> Na bogo nasi övoho jemë bapataeto vaejëvonövodeje. Crispus'o Gaius'o èhemu bapataeto vaejëvo'i a ioro'ioroho jemë bogo bapataeto vaejëvodeje. Èhuni na God huë mae uave.

<sup>15</sup> Na nasi övoho jemë bogo bapataeto vaejëvë'ëro èhuni bogo uvo'a'aruje: Paul-ro bapataeto vaejavuamu noro hesi ihoro bapataeto vaejë'ëro èhu'ëro hesi aribövie javuajëjo. Jemë bogo èhioho uvo'a'aruje. Èhuni naehu bapataeto bogo vaejëvodoho na mae jeve.

<sup>16</sup> O iae na uehorovajoho jemesi ae Stephanus-are aganoho jabu'o naro bapataeto vaejëvodeje. Röhu na uehorovoromo uve: Na na jemesi aribövi ioro'ioroho bapataeto vaejëvode höjo o bogajo. Nani bogajo.

<sup>17</sup> Röhu na ae ma-vemino'e bapataeto vaejëvode hesi bëhoho èhije. Kerisoro remö'öromo na bogo uevadeje: Bapataeto vaejëvobe va'onëjo. A'i remö'öromo uevadeje: Nasi jö maho majëhibe va'onëjo. Kerisoro nimadeje ave sa'are ariböviehu simano ma'e jöe höromo ataruèhioho na bogo èhioho jövoromo hesi jöho aho majëhi'irodego ae aho'obëhe èhi jië'e jöho heromo èhuro Kerisohu korosire guomade jöho bogo avoho heromo dë vövöbajo'oho bogo marëjëvojöëni. Èhi jio'ibejo ë jöho daruge bogojio'ibejo.

*God-are uehoro darugo röjahujaje ae Keriso-are jöhoje.*

<sup>18</sup> Kerisohu korosire guomade jöho sisëre va'arue ariböviohuro heromo uvarueje: Èho simano rumo'e jöe höjo. O God-hu ajamuego mare va'arue aribövioho noro ë jöho heromo uvarueje: Keriso guomadohuro èhuro God-hu no ajamujaje öroho jiovahu'e höjo. Èhuro God-hu no ajamujaje darugoho iae no gavarue höjo.

<sup>19</sup> God-are surire jajivoromo èhi uvë'eje: Aëro ave sa'a hesi uehorohemu baeromo èho simano ma'e jöe hö uvoruomaje höjo.

Röhu God naro ë jöho mu'u'ejöjo.

Noro nuni aji'e jöho baejë'e javuajë uvoruomaje höjo.

Röhu naro èho rori'o babu'ö'ejöjo.

<sup>20</sup> Èhi jië'oho ave sa'arohemu uehorovarue aribövioho simano ma'e aribövi jabesi uehoroho diaje. Nuni aji'e aribövi jabesi uehoroho diaje. Jö'e sasohoromo darugo'e majëhijarue aribövi jabesi uehoroho diaje. God-ro röjahujë'eje jabesi uehore aho'o bogojiajoho noro garöhego.

<sup>21</sup> Èhesi bëhoho God-ro hesi simanoho maëro jië'ëro uvadeje: Aëro sa'arohemu uehorovoromo uvoruomaje höjo: Nosi simanoho mae höjo. Èhi uvarue höjo röhu bogo jabesi simanoho uehorovoromo God na ge'a'aruëjo. A'i jaburo uvoruomaje höjo: Kerisohu guomade jöho Paul-mëhu majahuijaruoho èho simano rumo'e jöe höjo. Èhi uvoruomaje höjo röhu ë jöho ae rahu mae uehorovë'oho God naro baejëvoromo maro bamëvo'ejöjo. God-ro èhi uvadeje.

<sup>22</sup> Jew rajo ariböviohuro uvoruomajeje: Darugo'e muoho röjahujiego garomo uvo'irarëjo: God-are muoho rovë'e höjo. O Greece rajo ariböviohuro uvoruomajeje: Ave sa'a hesi simano ma'e jöhuremu he'i naguajëjo.

<sup>23</sup> Röhu no bogo ëhi jië'e muoho jöho röjëhi'i a'i noro ave jöhuremu ae majëhiromu uëvarueje: Kerisoro noni korosire guomade höjo. Ëhi majëhijarueje röhu Jew rajo ariböviohuro ë jöho bijönimarueje. O sa'a ioro'ioro rajohuro uvarueje: Ëjöho simano rumo'e jöe höjo.

<sup>24</sup> Jaburo ëhi uvo'i a'i God-hu uövuë'ëro hesi aribövie javuajoho Jew rajohu'o sa'a ioro'iorohu'o noro uvarueje: Keriso guomadohuro ëhuro God-ro hesi darugohu'o hesi simano mahu'o röjahuijë'e höjo.

<sup>25</sup> Ëhesi bëhoho aëro sa'arohemu uehorovoromo God-hu Keriso sa'are nugö'öjamu rueromo korosire guomade jöho heromo uvoruomajeje: Ëho God-ro simano rumo'e darugo rumo'e muoho vaejade höjo. Röhu a nosi simano maho ëho ma-jianovo'i God-hu vaejaje mu jabuhu uvarue simano rumo'e mue hö uvaruoho ëho börömo mahoje. A nosi darugoho ëho ma-jianovo'i God-hu vaejaje mu jabuhu uvarue darugo rumo'e mue hö uvaruoho ëho börömo mahoje.

<sup>26</sup> Nasi ö mueno'e God-hu jemë uëvamu aevoromo hesi aribövi jëvadevare jemë diehi jië'e aribövi jëvadoho ëhuremu uehorovore. Ave sa'a hesi simano ma'e aribövioho jemë ae ma-gemu gemu jëvadeje. O darugo ma'e aribövioho o iho döre jië'e aribövioho ëho ae ma-gemu gemu jëvadeje. Ëhi jië'e aribövioho ma-gemu gemu God-ro baejëvadeje.

<sup>27</sup> Röhu God-ro uvadeje: Aehu ma-sa'arohemu uehorovoromo uvarue simano rumo'e darugo rumo'e ae jioruomajë uvaruoho röhu ëhi jië'e aribövioho God naro baejëvo'ejöjo. Ëhi jië'e aribövioho baejëvo'iramu ëhuro sa'are simano ma'e ariböviohu'o sa'are darugo ma'e ariböviohu'o ëhi jië'e ariböviohuro uvoruomo'ajëjo: Noro uvare höjo: No simano ma'e darugo ma'e aribövie javuajëjo. Ëhi uvare höjo. Röhu God-ro no bogo baejavuo'i simano rumo'e darugo rumo'e aribövioho baejëvade höjo. Ëhu'ëro no gavaruoho nosi uehoroho bogo maehu jioromo nosi darugoho bogo eni jië'e höjo. Ëhi uvoruomo'ajëjo.

<sup>28</sup> Aehu ma-sa'arohemu uehorovoromo uvarue a inine iho rumo'e bëhi rumo'e jioruomajë uvarue aribövioho ëhi uëvarue aribövioho God naro baejëvo'ejöjo. Baejëvo'iramu ëhuro ae aho'obëhe ga'a'aruëjo sa'are mu hesi bëhoho bogojio'iramu.

<sup>29</sup> Ëhi jië'e aribövioho God-ro baejëvë'ëro jië'ëro ëhu'ëro aho God-are nuniroho bogo riravoromo nimorohë'i uvoruomo'ë'e: No a masije javuë'ego ehuni God-ro no baejavuë'e höjo. Bogo ëhioho uvo'ë'ö.

<sup>30</sup> Röhu jemë bogo jemesi arijo'arijoho ajamirovo'i a'i God-ro jemë ajëmiromu baejëvë'ëro ëhu'ëro Iesu Keriso'o gemuoro jëve. God-ro ëhi bamë'ëro ëhu'ëro Kerisoro sisëhu tövavuadoho jiovahuoromo uehoro maho nosirire barueromo nosi ihoho God-are nunire avohahuoromo mu mahuremu röjahuijajeje.

<sup>31</sup> Ëhu'ëro jië'ëro God-are surire jajivoromo uvë'eje: Nimoronimorohë'i ato'ië'iroho Badahu ë'ade jöho ëhuremu nimorohë'i atorëjo.

## 2

### *Kerisohu korosire guomade jöhoje.*

<sup>1</sup> Nasi ö mueno'e naehu jemesi örire ö'oromo God-are jö urimo gurihi-jahuadoho huruoho majëhijodevaroho na bogo sine nimorohoromo ave sa'a hesi simano ma'e jöho bö'oromo bitare sasohoromo ave sa'a hesi vuëvo'e jöho majëhijodeje.



<sup>2</sup> Ëhesi bëhoho naro nasi nuëro uehorovoromo uvodeje: Naro jemë'o hiromo jö ioro'ioroho vuonugo'i Iesu Kerisohu korosire guomade jöho börömege ëhuni hesi jöhuremu uehorovoromo majëhinövo'ejöjo.

<sup>3</sup> Naro ëhi uvoromo ö'oromo jemë'o hiromo na daruge bogojevoromo juhuoninegoromo butubutuego avohadeje.

<sup>4</sup> Naehu majëhijode jöho o naehu jö majëhijode ë hesi öroho na bogo sine nimorohoromo sanusanuëmiromo ave sa'a hesi simano ma'e jöho jövoromo ëhuro jemesi simanoho jaguvëho ga'i a'i God-are Aru'aho hesi darugoho jemë röjëhiromo Keriso-are jöho majëhijodeje

<sup>5</sup> ëhuro jemëro bogo ave sa'a hesi simano ma'e jöho heromo Keriso mae uehorovo'i a'i God-are darugoho baeromo ëhuro Keriso mae uehorovo'irarijego.

*God-are Aru'ahehu hesi uehoro ma röjahuijaje jöhoje.*

<sup>6</sup> Iae ëhi jie röhu simano ma'e jöho iae no majëhijarueje God-are jö heromo mae biririv'e ariböviohuro heruomoröhego. Simano ma'e jöho iae majëhijarueje röhu ë jöho göje o ave sa'a hesi jöho göje. Aehu ave sa'arohemu uehorovoromo ë jöho simano ma'e höromo ataruëhioho no bogo ëhioho majëhijarueje. O ave sa'a hesi muohemu muebejarue a masijehu jö mae höromo jö ataruëhioho nosi jöho bogo ëhiohoje ë a masijoho rireromo barë'ië'ego.

<sup>7</sup> Ëhi jië'e aribövi jabesi simano ma'e jöho no bogo ato'i a'i God-are simano ma'e jöho urimo gurihijahuë'e jiadoho ëho huruoho majëhijarueje. Urimë'i sa'a bövi bise'o bogo bamadevare God-ro uvadeje noro ë jöho heromo aji maho baeröhego.

<sup>8</sup> Noehu aji baeröhe jöho ave sa'a hesi muohemu muebejarue a masijoho jabu bogo mae bogo garuomadeje. Jabumë garuomo'ibejo Bada hesi iho döre jië'e aho uehorovoromo korosiroho bogo ano taemoruomo'ibejo.

<sup>9</sup> Röhu jabumë bogo gavareje. Bogo gavare hesi jöho God-are surire jajivoromo ëhi uövuë'eje:

Nunehu bogo garomo hia'ehu bogo heromo

aehu nosi dë vövöbajo'ere bogo uehorovaroho ëhi jië'e ajoho God-ro avohahuade höjo

hu rajahijarue aribövioho noro baeröhego.

Ëhi uvë'eje.

<sup>10</sup> Ëaji baeröhe jöho sa'a hesi muohemu muebejarue aribövioho bogo garuomadeje. Röhu God-ro uavamu hesi Aru'ahohuro ë jöho nosi örire röjahuijë'eje. Aru'ahehu röjahuijade hesi bëhoho huro aho'obëhe ga barëromo God-hu hesi dë vövöbajo'ere uehorovajoho ëhu'o iae ga barëjajeje.

<sup>11</sup> No ae gemu gemu diehi uehorovaruoho ae göho bogo ga'i nosi aru'ahohuremu sivue gavajeje. God-are Aru'ahoho ëhi gemuohoje. God-are Aru'ahohuremu God-are uehoroho gavajeje. No bogo gavarujeje.

<sup>12</sup> Aji baeröhe jö God-are Aru'ahehu no röjahuijaje hesi bëhoho no bogo ave sa'a hesi jö uehorovaje aru'ahoho bae'i a'i God-hu nugö'öjade Aru'ahoho baej'e javue ëhuro God-hu bojamuade suvuore bövie bise'e aho'obëhe huro röjahuijago garöhëro.

<sup>13</sup> Ëhu'ëro jië'ëro aehu ave sa'arohemu uehorovoromo jö röjëhijaruëhioho no bogo ëhioho jöho röjëhi'i a'i God-are Aru'ahehu röjahuijajëhi ëhi majëhijarueje. Majëhiromo God-are Aru'aho hesi jö bëhoho huruoho majëhijarueje Aru'aho baej'e ariböviohuro heruomoröhego.

<sup>14</sup> Röhu God-are Aru'aho bogo baejê'e ariböviohuro uvoruomajeje: God-are Aru'aho hesi jöho simano rumo'e jöe höromo bogo eruomajeje. Jö bēhoho bogo garuomajeje. Bogo garuomaje hesi bēhoho ēhi jiê'e jöho God-are Aru'ahohuremu ajamuego avoho mevoromo gavarueje mae jiego. Röhu God-are Aru'ahoho jabumē bogojëvê'ëro ēhu'ëro God-are Aru'ahoho jö bēhoho bogo rjēhijego ēhuro bogo garuomajeje.

<sup>15</sup> A'i God-are Aru'aho baejê'e aribövioho noro jöe aho'obēhe garomo mevarueje. Röhu noehu God-are Aru'aho baejaroho a ioro'ioroho bogo avoho mevavuarueje gö'i mae o sisē javuego.

<sup>16</sup> Bogo mevavuarue hesi bēhoho Kerisohu diehi uehorovajoho God-are Aru'aho rumo'e ariböviehu mevo'iröhoho bogo eni jëve. Ēhesi jöho God-are surire jajivoromo uvê'eje:

Rahuro Badare uehoroho gavê'e höjo.

Hesi öriroho rahuro jögoroho mami'ajëjo.

Ēhi uvê'eje. Ēhu'ëro God-are Aru'aho rumo'e aribövioho Keriso-are uehoroho bogo garuomajeje. Röhu huhu uehorovajēhi no'o uehorovaruëro jiê'ëro ēhu'ëro God-are Aru'aho rumo'e aribövioho nosi uehorohu'o bogo garomo bogo avoho mevavuoruomajeje.

### 3

*God-are mu vaeromo ekaresia ajëmarue aribövioho bogo masijehu jio'amo'i God gemu bōrōme jiaje jōhoje.*

<sup>1</sup> Nasi ö mueno'e urimē'i naro gavodeje jemē God-are Aru'aho hesi jöho bogo avoho uehorovo'i ave sa'arohemu uehorovamu. Jemē ave sa'arohemu uehorovamu gëgorovo Christian jö aevoromo rjēhijarue ēhi jiê'e jöhemu rjēhijodeje.

<sup>2</sup> Asisō'o i mi bogo mēmi'i ma-amu rihu mēmijaruēhi na God-are jöho amu rihunō'e bojēmibe rovodeje. Ēhesi bēhoho Keriso-are jö aevoromo sama'e rjēhijaruohuremu ēhuremu jemesi örire rjēhijodeje. Ijore rjēhijarue jö bōrōmoho bogo rjēhijodeje. Ēhesi bēhoho ijore rjēhijarue jö hejê'oho jemē bogo eni jëvadeje. Jemē bogo eni jëvobe rovadoho röhu jaruvohu'o bogo eni jëve.

<sup>3</sup> Ēhesi bēhoho ave sa'arohemu uehorovarijoho ēho bogo vuonugê'e jëve. Bogo vuonugo'i a'i jemē göëro gö hesi muoho garomo dē vōrōnimoromo iro muorovo'e vaejarujeje. Jemē ēhi ë'arujohuro ēhuro ave sa'arohemu uehorovaruje aribövie jëve. God rumo'e aribövi jabesi muoho baeromo ēhi raromo jijiharujeje.

<sup>4</sup> Ēhesi bēhoho jemē ae göëro uvanueje: Na Paul-are ae jevajëjo. Ae göëro uvanueje: Na Apollos-are ae jevajëjo. Ēhi jiê'e jö gö gö atarujohuro ēhuro jemē God rumo'e aribövioho va'ëne jëve.

<sup>5</sup> Röhu Apollos-are muoho diehi jio'i Paul nasi muoho diehije. No bogo a masijehu javuo'i no God-hu bojamuade muohemu vaejarue ae javue. Hesi muoho vaeromo jöho majēhijamu jemëro aevoromo Keriso mae uehorovarijeje. No ēhi jiê'e ae javue. Badahu ae gö gö mue gö gö bojamuibe rovadoho ēho no vaejarujeje.

<sup>6</sup> Mue gö gö vaeromo naro ujane bivëvanovodeje jemē aevoromo Keriso-are aribövie jëvorōhego. O Apollos-ro ijore ö'oromo ujanore jove otehanovadeje sanuovëvego marë'irarijego. Noro ēhi jiê'e muoho vae'i God-ro hesi sivue avohëvamu marëromo ri'öjarijeje.

<sup>7</sup> Ujonö'e bivëvaje ahu'o jovehu sanuovëvaje ahu'o no ma-bise'e javuo'i God avohëvego ri'öjaruje aho hu börömohoje.

<sup>8</sup> O ujonö'e bivëvaje ahu'o jovehu sanuovëvaje ahu'o no bogo göho böröme göho bise'e javuo'i ma-gemuoho javue. No diehi jië'e mu vaejë'oho God-ro manaho ëhi bojamui'ë'e.

<sup>9</sup> Iae no God'o gemu mae mu vaejarue ae javue. Jemë God-are i'o mu'o va'ëne jëve. Röhu uhu'e jöe göho. Jemë God-are javu va'ëne jëvanove. Ëjöhu'o uehorovo'ejo.

<sup>10</sup> God-ro na huë baejevoromo muoho bojemamu ëhuro aehu javu ma vaejaruëhi naro aevoromo jemë vaejëvoromo sa'a uhure umoromo biriri'oho bamëhodeje ëhuro jemëro döre javu va'ëne ëhi biririvoromo mae riravo'irarijego. Ëhi vaejëv'ëro ae göëro javue döre vaeruome. Javue döre vaejaruoho ae gemu gemu gavë'i javuoho ma-avoho vae'iro.

<sup>11</sup> Ëhesi bëhoho God-ro aevoromo Iesu Keriso bamë'eje munënö'e bibiv-oromo namiromo jemë nigemëvego riravo'irarijego. Javu uhure gö gö bogojio'i Iesu Keriso gemuje. Aho munë göho bogo bamo'ë'ö javuoho biririvoröhego.

<sup>12-13</sup> Javu uhure Iesu Keriso jio'i döre aëro javue vaejarueje. Javu döre vaejaruoho ae gemu gemu diehi diehi vaejaruoho ijonö va'orahoro jio'ë'e. Munë ma-mabëhe gold silver oho inajo'e ujuohoromo munë mae gö gö oho inajo'e ujuohoromo avoho vae'i o ma-jahuri javu vaejarue inömo ijo ö'e sare oho inajo'e ujuohoromo sisë'i vaejaruoho ëho va'orahoro jio'ë'e. God-are maja rovë'iroho vëni börömëro rueromo ë javuoho ravo ga'ë'e. Vënëro ravo'iramu no ga'ejo di ahuro biriri'oho vae'i di ahuro sisë'ioho vaejë'e jio'iramu.

<sup>14</sup> Mami'e vaejare muoho vënehu ravamu biririvoromo namijë'oho ë javu vaejare aribövioho suvuore mana baeruomö'ë'e.

<sup>15</sup> O mu mami'e vaejaroho ravo barëjë'oho ëhuro ë javu vaejare aribövioho suvuroho bogo baeruomö'ë'e. Röhu jabumë bogo sisëroho va'i iae mae raromoruomö'ë'e. Raromoromo röhu uvoruomö'ë'e: Ravavuo'ië'ajëromu huruomare höjo. Röhu vaevë'e nosi muoho ravo barëjahuoromo sisërejahuë'e höjo. Ëhuni ae aho'obëhe gavë'i javuoho ma-avoho vaeruomö'iro.

<sup>16</sup> Jemë iae gavaruje ekaresiaho jemë God-hu hijaje javuoho va'ëne jëvë'ego God-are Aru'ahehu jemesirire hijajoho.

<sup>17</sup> Jemë God-hu hijaje javuoho va'ëne jëvë'ëro ëhu'ëro God-are javu hesiremu jiajëhi jemë ëhi hesi ariböviemu jëve. Jemë hesi ariböviemu jëvë'ëro ae rahuhu mu sisë jemë røjëhiromo ijumëvë'oho ëhi jië'e aribövioho God-ro mana ijumëvo'ë'e.

<sup>18</sup> Nadi jasi arijo'arijoho sareramirovone. Ja ae rahuaru nimorohoromo uvë'oho: Ave sa'arohemu uehorovarue a jabesi nunire na simano ma'e ae jevajë uvë'oho ëhi jië'e uehoroho vuonugone. Vuonugo'i uvone: Ave sa'arohemu uehorovarue a jabesi nunire na simano rumo'e ae jevë'oho iae mae höjo. Ja ëhi uvë'oho God-are nunire ja simano ma'e ae javo'ajëjo.

<sup>19</sup> Ëhesi bëhoho ave sa'arohemu uehorovarue simano ma'e jöho ëho God-hu gavajoho simano rumo'e jöjeje. Ëhesi jöho God-are surire jajivoromo uvë'eje: Ave sa'arohemu uehorovarue ariböviohuro sareri sarerie ë'oromo uvoruomaje höjo: No simano mae baeromo jijiharuëjego evare aevenëro mie jiomëvanovaje höjo.

<sup>20</sup> O jöe gö'o jajivoromo uvë'eje: Badaro gavaje höjo simano ma'e a jabesi uehoroho bogo maehu jiego.

21 Ĕhu'e jiaje a nosi ihoho nadi dōroho bamoromo nimoronimorohē'ioho atoromo uvorējo: Paul o ae gō bōrōmego no jabesi ijore ijore jijiharue aribōvie javuajējo. Ĕhesi bēhoho ae inōme bōvie bise'e God-hu bamavuadoho ēho noehu ajēmi'irōhoho javue.

22 Paul na Apollos Peter ēho no jemē ajēmi'irōhe aho javue. Sa'ae bōvie bise'e ēhu'o jemē ajēmi'irōhoho jio'ame. Jemē birivoromo raromē'oho o vuovēvē'oho ē bōvioho bise'oho ēhu'o jemē ajēmi'irōhoho jio'ame. Rabe rabe avevejō'e jio'amajoho ijonō jio'amo'irōhoho ēhu'o jemē ajēmi'irōhoho jio'ame.

23 Ĕho aho'obēhe jemesi javue. Rōhu jemē Keriso-are jēve. O Keriso hu God-areje. Ĕhuni nadi a nosi ihoho dōroho bamoromo nimoroni-morohē'ioho atore.

## 4

*Corinth aribōviehu apostle ōmo'ōmo bogo gō nimo'i gō bijōnimo'irōhe jōhoje.*

1 Ĕhu'e jiaje ēhuni uvore: Paul-mē ēhi jiē'e aribōvie jēvajējo. Jabumē Keriso-are mu vaejarue aribōvie jēvajējo. God-are jō mami'e subivahuade hesi mu muebejहारue aribōvie jēvajējo. Ĕhi uvore.

2 Ae rahu ae gō hesi mu muebejahē'oho birivoromo muoho avoho ma'enobe va'arueje. Ĕhuremu maeje. Ĕhu'ēro no'lo ēhi ē'ejo.

3 Naro uvajeje: Jemē o ae gō ave sa'a hesi uehore baeromo nasi mu mae o sisē jiego mevo gavarujo ēho ma-bise'e hōjo. Iae na'lo nasi arijo'arijoho bogo mevorovajeje ga'i na mae o sisē jevego.

4 Ĕhesi bēhoho naehu mu sisē vaejode jōho na bogo uehorovoromo dēroho juhuoninege. Iae ēhi jie rōhu bogo ēhuro na God-are nuniroho maho namije. A'i Badaro gemuēro na gevajeje nasi muoho mae o sisē jiego.

5 Ĕhuni nadi sarerivoromo masijoho riravoromo ae gō nosi muoho mevo gavahuore ga'i no mae o sisē javuego. Mevo gō'irōhe majaho bogo rovē'eje. Hujeji Badaro rueromo nosi mue rabe rabe gurihijē'e bogo gavaruoho o noehu uhure ma-uehorovo taemaruoho va'orahoro bamoromo evare mevo gō'ē'e. Mevo gōromo evare God-ro ae gemu gemu nosi mu diehi vaejare atoro huē maho ēhi ajiomē'e o abuejē'e mamui'ē'e.

6 Nasi ō mueno'e ē jōho naro jemē majēhiromo ae gō jabesi jōhu'lo majēhiromo Apollos-mu nosi ihore jajivodeje rōjēhijego jemēro garomo ave jōgoru hesi bēhoho avoho uehorovo'irarijego. Jōgoroho ēhi uvē'eje: Nadi aruēroho anumēroho jijihō'i God-are surire jōhuremu ēhuremu uehorovobe jijihorējo. Ĕjōgoru hesi bēhoho avoho uehorovoromo nadi jemesi sivuoho uehorovoromo dōroho bamorovoromo nimorohē'ioho uvore: Ĕa masijoho ēho nego'i ēho bijōnegajējo.

7 Raro uē'ego masijoho riravō. Inōmoho raboho na ēma baejarijeje. Bogo. Hesi God-ro bojēmadeje. Ĕhi jiē'oho jemē rabēni uvarujeje: Bōvie bise'e nosi birivoromo baejare hōromo nimorohē'i atarujeje.

8 Sareri aribōvie jēve. Nani jemē uvarujeje: Mami'e God-are jōho no da'uaguē'e hōjo. Mami'e hesi ajoho bae barējē'e javuajējo. No masije riravoromo bōvie bise'e muebe'amarue hōjo. Apostle-ho no bogo ēhioho masijoho javuē'e jemēro jemesi sivue uehorovoromo ēma uvarujeje: Noremuēremu masije javuajējo. Ĕhi uvarujeje rōhu jemē bogo ēhioho jēve. Jemē mae masije riravo'ibejarije ēhuro na nimorohevo'ibejo. Ĕhesi bēhoho jemē

mae masije riravo'ibejarije ehuro no'o jemë'o gemuoro masije riravo'ibejo. Ehi jië'o'oho mae jio'ibejo.

<sup>9</sup> A'i avevejö'oho na uehorovoromo uve: God-ro apostle nosi ihoho sa'aro bamë'e höjo. Aehu i'u baeromo a nuniro guomo'ië'ego hesi iho sa'are jiajëhi nosi ihoho ehi sa'aro jiego ae anerae aru'ahe dinö'e dinö'e raromaruohuro apostle nosirire ë gemu nunoho bamoromo ërimahuarue höjo. Na ehi uehorove.

<sup>10</sup> Nosi ihoho sa'aro jië'ëro aëro nosi jöho uehorovoromo ëma uvoruomajeje: Paul-mëro Keriso mae uehorovo'ego ehuro simano rumo'e aribövie jëvájëjo. Röhu jemëro jemesi jöho ëma uvarujeje: Keriso'o gemuore javuë'ëro Corinth rajoho nomë simano mabëhe javuajëjo. Aëro apostle nosi jöho ëma uvoruomajeje: Paul-mesi muoho darugo rumo'e höjo. Röhu jemëro jemesi jöho ëma uvarujeje: Corinth rajo nosi muoho darugo ma'e höjo. Jemëro uvarujeje: Nosi ihoho dö mare höjo. Röhu apostle nosi ihoho sa'aroje.

<sup>11</sup> Io'o apostle no iëni jovëni vuovavuobe rovadoho jaruvohu'o iae ehi javue. Niögu sisëmu io'amarueje. Aëro anaguo'i arijarueje. Amo ari'e bogojavuë'ëro ëma jijiharueje.

<sup>12</sup> Nosi övëro biririvoromo i'u'e muoho vaeromo ioho ë ijarueje. Aehu nosi örire agavuë'iroho no ma-jö maemu mana majëharueje. Aehu nosi örire huë vavaeni bojamuijë'oho no ma-biririvoromo raromaruëje.

<sup>13</sup> Aehu nosi iho ijumoromo jö sisë atë'oho no ma-u'emu jöe sanu'e mana majëhijarueje. Sa'ae dinö'e dinö'e raromaruë aribövi jabesi nuniroho no sisë javuego musisinö'e bu'öjavuarue aribövie javue. Sa'osa'ëro ruhi-janovë'e aribövie javue. Nosi ihoho ehi jiobe rovadoho jaruvohu'o ehi gemuohoje.

<sup>14</sup> Ejö naehu jajivaje hesi bëhoho bogo jemëro adahoromo javoje bae'irarijego ehunioho jajive. A'i naro uve: Jemë nasi aboji harihu'o mae jëvájëromomo öroho röjëhiromomo jajive.

<sup>15</sup> Nani Keriso-are mu röjëhijarue aribövie marohë'e mae jëve. Röhu jemesi vavuoho na gemu jeve. Ehesi bëhoho jemë'o na'o Keriso-are aëro javuë'ëro ehü'ëro jemesi vavuoho na jeve rabëni naro aevoromo Keriso-are jö maho majëhijë'ëro.

<sup>16</sup> Jemesi vavue jevë'ego ehuni uëve: Na negajëjo naehu mu vaejajëhi jemë'o ehi ë'irarijego.

<sup>17</sup> Ehi nego'ego Timothy jemesi örire nugö'ö'ië'e. Hu nasi huë baejaje harihu maeje. Hu Badare muemu uehorovaje aeje. Eaho nugö'ö'iramu huro ö'oromo uë'ë'e: Nöröro ehi jië'e jöho ejahoromo Iesu Keriso-arire juvoromo hijaje höjo. O ë jöe gemuoho ekaresiae aho'obëhe dinö'e dinö'e jioruomajoho röjëhibe juvaje höjo. Ehi jië'e jöho huro majëhi'iramu jemë röhu maho uehorovo'aruje.

<sup>18</sup> Röhu jemë a ioro'iorëro uvarujeje: Nörö nosiroho bogo rue'a'ajëromomo jemëro jemesi ihoho döro bamorovë'e jëve.

<sup>19</sup> Röhu God-hu nimë'ohuro iae na ma-burëro ö'ejo. Ö'oromo nasi ga'ejo simano bövi'e aribövioho diehi jëvo'iramu. Na bogo jabesi jö huhu jöhemu he'i ö'i a'i ö'ejo ga'i jabumë God-are darugoho baejë'e jioruomego o bogo.

<sup>20</sup> Ehesi bëhoho God-hu böröme namiromomo no muebejavuajohu eho bogo ma-jö ataruoho jio'i a'i darugo'e muohoje.

<sup>21</sup> Röhu jemë di muoho nimö. Na na ha'ite bö'oromo hisuebijëvo'ejo o huë baejëvoromo jö sanu'e majëhi'ejo.

## 5

*Masuarue jögoru ahade a hesi jöhoje.*

<sup>1</sup> Röhu jemesi jö sisëho na hejë'e jeve. Aëro atoromo uvoruomohijo: Corinth rajo ekaresia jabsirire öehu jijihanovarue muoho jiajëjo. Ae gemuëro vavu hesi vaboroho vajiohëro baeromo niö'iro gemu mae arijarue höjo. Ëhi jië'e muoho sisë bëheje. God-are jö bogo hejë'e aribövioho jabu bogo ëhi jië'e muoho vaerumajeje. A'i jemesi aëro ëhi jië'e muoho vaejajeje.

<sup>2</sup> Ëhi jëvë'eje röhu jemëro jemesi ihoho ëma döro bamorovarujeje. Nadi ëhioho ë'ibejarije. A'i huë vavaene böröme baeromo ëhi jië'e mu vaejaje aho jemesirire jiajoho nugö'ö'ibejarije iae mae jio'ibejo. Röhu bogo nugö'ö'jarijeje.

<sup>3</sup> Nasi sino haho'oho bogo jemë'oho jie. A'i nasi uehoroho aho'o jemesirire jie. Ëhuro na jemë'o jevanove. Jemë'o jevanovoromo hesi sisëho mevoromo nosi Bada Iesuare ihore uvë'e jeve: Hu mu sisë bëhe vaejajëro i'ue bae'a'ajëjo.

<sup>4</sup> Ëhuni jemëro gemuoro gagovorovoromo nasi uehorohu'o nosi Bada Iesuare vöröhu'o jemë'o jiego

<sup>5</sup> ë iaho rori'o nugoromo Satan-are öröro bojamego ëhuro hesi sinore jiaje mu sisëho barë'iro ëhuro Badare majaho rovego ë ia hesi aru'ahoho bogo sisëroho va'i mae hiröheje.

<sup>6</sup> Röhu jemëhu jemesi mu uehorovoromo iho döre bamorovarujoho ëho sisëje. Ave uhu'e ataruoho jemë'o iae uehorovaruje. I dë huaje oso biseharihoho ëhuro ie aho'obëhe rumorovego dë huaje höjo.

<sup>7</sup> Edë huaje oso jemesirire jiajoho bul'öjego ma-i mahemu jëvo'i. Ëhesi bëhoho ë mu sisë jemesirire jiajoho ahego bogo rumorovo'i a'i barë'iro ëhuro jemë i ma va'ëne aribövie jëvo'iröhe. Röhu jemë iae i ma va'ëne aribövie jëve. Rabëni hesi bëhoho naro majëhi'ie'e. God-hu Vörö Tugohade Söröho Israel rajehu ue'ahë'iroho dë huaje oso rumo'e iohemu ue'aharueje. Ue'ahoromo röhu ave muohu'o vaejarueje. God-are jöëni sheep harihoho bijuëmarueje. Röhu Keriso sheep harihu va'ëne anamu guomë'eje ëhuro God-ro nosi sisëho uehorovoromo vuonugo'iröhego. God-ro jemesi sisëho uehorovoromo vuonugë'ëro ëhuro jemë i ma va'ëne jëve.

<sup>8</sup> Nosi sisëho uehorovoromo vuonugë'ëro jië'ëro ëhuni Jew rajehu i dë huaje osoho sisë höromo vuonugoromo evare God-hu Vörö Tugohade Sörö ijaruëhi no ëhi jië'e muoho vaeromo nu huohue mu sisë gö gö vuonugo'i God-hu vörö tugohahuade muoho uehorovoromo maemu raromo'ejo.

<sup>9</sup> Röhu urimë'i naro jöho jajivoromo majëhiromo uëvodeje: Öehu jijihanovarue ariböviohu'o nadi gemuoroho raromo jijihorëjo.

<sup>10</sup> Ëjö jajivodoho na bogo uëromo ë'odeje: God-are jö bogo hejë'e ariböviohu'o nadi gemuoroho jijihorëjo. Na bogo uëromo ë'odeje: Ga'irarije God-are jö bogo hejë'e aho önö'e mahunö'e mu vaebe vajiohu'e mu vaebe jijiamu God dejonö bamo'i bövi bise'o nuninö bahibe jijiamu gëvë'iroho ëhi jië'e ariböviohu'o nadi gemuoroho raromo jijihorëjo. Naehu uëvode jö hesi bëhoho bogo ëhioho jiadeje. Nasi bëhoho ëhi jio'ibejo jemëro ejeho'ibejarije God-are jö bogo hejë'e aribövioho bogo gë vadë'ibejarije. Ëhuni God-are jö bogo hejë'e ariböviehu ëhi jië'e mu sisë vaejamu jemëhu jabu'o gemu mae raromo jijihë'oho iae maeje.

<sup>11</sup> Röhu jajivode hesi bëhoho aviëhije. He'irarije aëro jemë'o raromoromo uëvamu: No Christian ae javuajë uëvamu hejë'iroho röhu ga'irarije jabumë

önö'e mahunö'e jijihamu gëvë'iroho God dejonö bamo'i bövi bise'o nuninö bahijamu gëvë'iroho ae gö jabesi jö sisë atobe jijihamu hejë'iroho jovo ue'ahoromo simano sisërëbe bövi bise'o ujuohoniëhibe jijihamu gëvë'iroho ëhi jië'e ariböviohu'oho nadi gemuoroho ioho ue'ahore o raboho raboho ë'ore.

<sup>12</sup> Naro rabëni God-are jö bogo hejarue aribövi jabesi muoho garomo mevojöro. Ëho bogo nasi muehuje. A'i Christian agano jabesi muoho ëho garomo mevore.

<sup>13</sup> God-are jö bogo hejarue aribövi jabesi muoho hesi God-ro sivue garomo mevo'ë'e. No bogo mevarueje. A'i God-are jö hejarue aribövi jabesi mu jemëhu garomo mevo'irarije jöho God-are surire jajivoromo uvë'eje: A sisë jemesirire jiajoho nugö'öregö va'irajo. Ëhi uvë'e jiaje ë a sisëho nugö'öregö va'iro.

## 6

*Corinth ekaresiaehu Christian agano bogo court-re sö va'ego God-are jö bogo hejë'e ariböviehu mevoröhe jöhoje.*

<sup>1</sup> Röhu aviëhi jië'e muoho jemë rabëni biriri'övoromo ë'arujeje. Ja'o Christian a göhu'o jemë niö'i jö sisë jëvë'oho jemë God-are jö bogo hejë'e aribövi jabesi nunire va'o rirarovoromo jemesi jö sisëho majëhijarujeje jaburo mevëhojöro. Bogo ëhioho ë'i a'i God-are aribövi jabesi nunire riravoromo jöho ato'ibejarije iae mae jio'ibejo.

<sup>2</sup> Jemë diehi'oromo bogo uehorovoromo uvö: God-are majaho rue'iramu God-are aribövioho noro sa'ae aho'obëhe jabesi muoho garomo mevo'ëjarëjo. Ëhi uvo'ibejarije iae mae jio'ibejo. Röhu jemë majae ijonö mu böröme vaeromo ae aho'obëhe jabesi muoho garomo mevo'ië'ëro jëvë'ëro ëhu'ëro avevejö'e jö bise'o bise'o mevë'oho jemë iae eni jëve.

<sup>3</sup> Jemë'o iae gavaruje Keriso-are aribövioho no majae ijonö anera gëromo jabesi mu masijo mevëho hesi jëvajoho. Iae ëhuni uvore: Ave sa'are mu ininoho garomo mevë'oho iae no eni javuajëjo.

<sup>4</sup> Ave sa'a hesi jö inino mevo'irarijoho jëvë'oho jemë diehi'oromo ë jöho bava'oromo God-are jö bogo hejarue aribövi jabesi nuniroho riravoromo majëhijarujeje mevëhoröhego. Jabesi ihoho Keriso-are ekaresia jemesiriroho bogojië'e jiaje jemesi jö sisëho jebesiriroho nadi bava'ore.

<sup>5</sup> Jemesi arijo'arije javojimorovohe. Christian agano jemesi jöehu umogihëgo mevo'irarijoho na jemesiriroho simano ma'e aho bogojië'ëgo ëhuni dirö'e göro va'oromo jemesi jöho majëhijarujeje God-are jö bogo hejë'e ariböviohuro mevëhoröhego. Röhu simano ma'e aribövioho jemesirire iae jio'ame.

<sup>6</sup> Röhu Christian agane göëro göho dirö'e göro bava'oromo jemesi jöho majëhijarujeje God-are jö bogo hejë'e ariböviohuro mevëho'iröhego.

<sup>7</sup> Röhu jemë göëro göhu'o iro muorovo'e vaeromo court-re va'arujoho ëhuro jemesi Christian muoho mami'e bejë'eje. Jemë court-roho bogo va'i uvo'ibejarije: Sisë vaejevadoho o vajiohehu baejehadoho iae hesi hö uvo'ibejarije iae mae jio'ibejo.

<sup>8</sup> Röhu jemë bogo ëhioho uvo'i jemëro ri'öromo göëro gö hesi örire sisë vaejarujeje. O vajiohëro baejëharujeje. Bogo God-are jö bogo hejë'e a jabesi örire gemu ë mu sisëho vae'i a'i jemesi Christian agano jabu'o ëhi'ëvarujeje.

<sup>9</sup> Jemë iae gavarujeje sisë aribövie God-are aji'e öri ari'ere bogo va'o hesi jioruomajoho. Nadi sareramirovore. Önö'e jijiharue aribövioho God-are

öri ari'eroho bogo va'ë'ö. God dejonö bamo'i bövi bise'lo nuninö bahijarue aribövioho bogo va'ë'ö. Goho'amarue aribövioho mu gö gö barueromo a'lo a'lo sihorovarue aribövioho bogo va'ë'ö.

<sup>10</sup> Vajiohu ë'arue aribövioho mahunö'e ë'arue aribövioho jovo iromo simano sisërëjarue aribövioho ae gö jabesi jö sisë atarue aribövioho bövi bise'lo ae gö ujuohoniëhijarue aribövioho ëhi jië'e aribövioho God-are öri ari'eroho bogo va'ë'ö.

<sup>11</sup> Urimoho jemë a ioro'ioroho ëhi jië'e sisë aribövie jëvadeje. Jaruvoho jemesi sisëho u'ovëhë'eje. Jemë God-are aribövie jëve. Jemë God-are nunire mae riravaruje. Ëhesi bëhoho God-ro Bada Iesu Keriso-are ihore hesi Aru'ahoho nugö'öjamu jemëni rueromo dë vövöbajo'oho avohëhë'ëro ëhu'ëro mae jëve. Ëhuni mu sisëho vuonugo'i ma-raromore.

*Sino haho'ehu mu maemu vaejego God-are iho dö mare jioröhe jöhoje.*

<sup>12</sup> Jemë ae göëro uvarujeje: Noehu mue aho'obëhe vaejë'oho iae mae höjo. Ëhi uvarujeje. Iae ëhi jie röhu mu ioro'ioro vaejë'oho bogo ëhuro marëjavuo'ë'e. Nani noehu mue aho'obëhe vaejë'oho iae maeje röhu mu göehu göehu ruahö'öjevo'iröhoho na bijönego'ego ëhuni ëhi jië'e muoho na bogo vae'ejo.

<sup>13</sup> Röhu jemëro uvarujeje: I hesi bëhoho dëre abuejajëjo. Dë hesi bëhoho ioho baejajëjo. Iae ëhi jie röhu God-ro uvo'iramu iohu'lo dëhu'lo barë'ë'e. Dë hesi bëhoho ioho baeje röhu nadi uvore: Nosi sino haho'lo hesi bëhoho öëro ë'anovajëjo. A'i uvore: Nosi sino haho'lo hesi bëhoho Badare örire bojamijaruëjo. O Badare bëhoho nosi sino haho'oho muebejajëjo.

<sup>14</sup> Iohu'lo dëhu'lo barë'ë'e. Röhu Bada guomoromo bogo barë'i God-ro daruge bojamamu ri'öjajëje. Ri'öjë'ëro no'lo ëhi daruge bojamui'iramu vuovoromo ri'öjavuo'ë'e. Ëhuni nosi sino haho'oho ma-Badaremuje.

<sup>15</sup> Jemë'lo uehorovore. Jemesi sino haho'oho Keriso-are övo duruajo'e jëve. Ëhi jië'oho na no öëro jijihanovoromo Keriso-are övo duruajo'oho baeromo ö va'ëne magonaho sisëhu'lo gemuoroho havoromo momorö'ö'ëjo. Bogo mae bogo ëhioho ë'ëjo.

<sup>16</sup> Ae rahu magonaho sisëhu'lo gemuore havoromo momorö'öjë'ohuro ëhuro sine dë vövöbajo'e gemuoho javuo'ë'e. Ëhuremu uehorovore. Ëjöho God-are surire ëhi gemuoho jajivoromo uvë'eje: Jabumë niö'i jëvadoho röhu gemu jio'a'ajëjo.

<sup>17</sup> Jabumë gemu jiajeje röhu Bada'lo bimuvë'ohuro ëhuro Iesu'lo no'lo Aru'ahe gemuoho javue. Ëhuni magonaho sisëhu'lo bogo gemuoroho momorö'ö'ëjo.

<sup>18</sup> Önö'e muoho gorore. Mu sisë ioro'iorohuro ëhuro sinoho dë vövöbajo'oho bogo sisë vaerovo'i a'i öehu jijihanovë'ohuro ëhuro sinoho dë vövöbajo'oho sisë vaerovarueje.

<sup>19</sup> Ave jöhu'lo avo'avoho uehorovore. Jemesi sinoho dë vövöbajo'oho God-are Aru'aho hesi osa maho jëvanove. Ëhesi bëhoho God-are Aru'ahohuro God-are örire jioromo jemesi sinore dë vövöbajo'ere rovë'ëro jemesi uhure ë hijajeje. Jemesi sinoho dë vövöbajo'oho aho'obëhe bogo jemesirehu jio'i God-areje.

<sup>20</sup> God-ro jemë bogo ëma baejëvo'i a'i hesi Harihoho nugö'öromu huë vavaene sisë maro baejë'ëro ëhu'ëro jemë hesi baejëvadeje. Ëhuni jemesi sino haho'oho mu maemu vaerego hesi ihoho dö maro jio'iro.



## 7

*Masuvarue mu hesi jöhoje.*

<sup>1</sup> Röhu jemëhu jajivoromo ue gevarije jöho na majëhi'irögoro ë'e.

Aehu magonaho bogo masuvë'ocho iae maeje.

<sup>2</sup> Röhu ae aho'obëhe önö'e jijiharue jiaje ëhuni ae gemu gemu magonahe measure o magonahe gemu gemu ae measure.

<sup>3</sup> Baruharo jasi vaborehu ja'ö niavo'i uavë'ocho ejahone. O vaboroharo jasi baruehu ja'ö niavo'i uavë'ocho ejahone.

<sup>4</sup> Ëhesi bëhoho vaboroho jasi sino haho'ocho bogo jasirehu jio'i jasi baru hesije. O baruoho jasi sino haho'ocho bogo jasirehu jio'i jasi vaboro hesije.

<sup>5</sup> Ëhuni vaboroharo nadi baruoho juahami'i baruoharo nadi vaboroho juahami'i ma-ejahorovore. Röhu nani jemë gemu mae jöe jörovoromo uarovo'aruje: Ë'ego no gemuore niavarue muoho majae ma-bisemu vuonugo'i God-are örire jöe jövojuvo va'ö majae eni jiego vuonugo'irarëjo. Ëhi jië'ocho iae maeje. Röhu ëhi ë'ë'ocho God-are örire jö jövo'irarije majaho barëjego ijonö röhu maho sionëro gemuoro niavore. Bogo ëhi ë'ë'ocho nani jemëro bogo avo'avoho biririvo'iramu Satan-ro bijëho gë'ë'e.

<sup>6</sup> Röhu jemëhu masurovo'irarije jö jajivajoho na bogo uëromo ë'e: Jemëhu bogo masurovë'ocho sisë hö uë'i a'i na uëromo ë'e: Jemë nëgë'ocho ëhi'orëjo.

<sup>7</sup> Röhu naehu vaboro bogo masuvë'e ma-hijajëhi ae magonahe aho'obëhe ëhi jëvo'ibejo ëhuro Paul na mae jëvo'ibejo. Röhu bogo ëhioho jio'ë'e. A'i ae magonahe gö gö diehi jië'e mu vaeröhe suvuroho mami'e God-ro bojamuibe rovë'eje. Ae göëro suvuore gö ae göëro suvuore gö ëhi baebe rovë'e javue. Ëhi jië'ëro ae magonahe gö gö masurovo'i göëro bogo masurovo'amë'eje.

<sup>8</sup> Röhu magonaho doruohu'ö bogo masuvë'e aribövi ioro'iorohu'ö ave jöho na jemesi örire majëhi'ië'e. Naehu ë'ajëhi jemë vabore o barue bogo masuvë'ocho iae maeje.

<sup>9</sup> Röhu biririvoromo avoho taemo raromo'irarijoho bogo eni jëvamu masurovo'amë'ocho iae maeje. Ëhesi bëhoho jemesi dë vövöbajo'ere simanore uehoro gö gö baejë'ocho ëho sisëje. Ëhuni masurovo'amore.

<sup>10</sup> Röhu masurovë'e aribövioho jemë na ave jöho bojëmi'ië'e. Bogo naehu uehorovoromo majëhi'i a'i Badaro bojamuijë'e jio'ego na majëhi'ië'e. Vaboroharo baruoho nadi nugö'öromo va'ö rori'ocho hine.

<sup>11</sup> O nugö'öromo va'ö rori'ö hijë'ocho nadi ae göho masu'i ma-hine. O vuonorö'ö rueromo jasi baruohumu huë baerovoromo avoho arire. Röhu baruoharo ja'ö vaboroho nadi nugö'öne.

*Vaboro'ö baru'ö göehu Keriso mae uehorovo'i göehu bogo ma uehorovë'ocho ëhuro ëhi ë'iröhe jöhoje.*

<sup>12</sup> Röhu a ioro'ioro jemesi örire ave jöho majëhi'ië'e. Bogo Badaro ave jöho jövo'i a'i naro nasi uehorovoromo jajive. Baruharo ja bogo Keriso uehorovanevare jaehu Keriso bogo ma uehorovaje magonaho masuromo hiromo evare ijonö Keriso mae uehorovo'i jasi vaborehu bogo ma uehorovoromo ja uavë'ocho: Iae na ja'ö hinövo'ejö uavë'ocho nadi nugö'öne.

<sup>13</sup> O vaboroharo Keriso bogo uehorovanevare jaehu Keriso bogo ma uehorovaje a masuromo hiromo evare ijonö Keriso mae uehorovo'i jasi baruehu bogo ma uehorovoromo uavë'ocho: Iae na ja'ö hinövo'ejö uavë'ocho nadi nugö'öne.

14 Ĕhesi bēhoho Keriso bogo uehorovaje aho Christian vaborohu'o niō'iro gemuoro arijē'ero ēhuro iae hu God-are aeje. O Keriso bogo uehorovaje magonahoho Christian baruohu'o niō'iro gemuoro arijē'ero ēhuro iae hu God-are magonaheje. Bogo ēhioho jio'ibejo jemesi aboji harihu'oho God rumo'e aboji harihu'e jioruomo'ibejo. Rōhu bogo ēhioho jio'i jabumē iae God-are aribōvie jioruome.

15 Rōhu ga'irane Keriso bogo ma uehorovaje jasi baruēro o jasi vaborēro ramō'ōromo va'o rori'o hi'ia'amu gavē'oho nadi uehorovoromo uvore: No mami'e mae masurovē'ego hu va'ē'oho God-ro bijōnimo'ajēromo nijio'irae'i ma-uane: Va'i nagego va'ējo. O nijio'iraeromo gemuore arijē'oho huē vavaene baejē'e ari'a'aruje. Rōhu God bogo ēhioho nimo'i a'i uēvadeje jemē hesi aribōvie jioromo huē baerovoromo gemuoro raromo'irarijego.

16 Rōhu Christian vaboroho ja bogo gavanue. Nani jero baruoho ajami'iramu hu Keriso mae uehorovoromo bogo sisēroho va'i Keriso'o maro hi'ē'e. O Christian baruoho ja bogo gavanue. Nani jero vaboroho ajami'iramu hu Keriso mae uehorovoromo bogo sisēroho va'i Keriso'o maro hi'ē'e.

*God-hu ae gemu gemu mu bojēmibe va'ego mu vaerōhe jōhoje.*

17 Rōhu Badahu ae gemu gemu mevoromo mure bamobe rovade muoho o jemēhu mu diehi vaebe rovamu evare God-hu hesinō rinēgadoho ēhi jiē'e muohemu vaere. Naro ekaresiae aho'obēhe ē jōgore gemuohemu bojēmibe va'ajeje.

18 Ae gō urimē'i Jew rajehu ē'aruēhi hesi sino tariojahamu hu hijuvo rōhu God-hu hesinō rinovē'oho nadi sino tariojare muoho mu'ure. O ae gō Jew rajehu ē'aruēhioho hesi ōriroho bogo ēhioho ē'amu hu hijamu rōhu God-hu hesinō rinovē'oho nadi uarego Jew rajo jabesi muoho vaeromo hesi sino tariojaho'iro.

19 Jew rajehu ē'aruēhi jemesi sino tarivēhē'oho o bogo tarivēhē'oho iae hesije. A'i God-are jōe gō gō ejahē'oho ēho bōrōmohoje.

20 Rōhu ae gemu gemu jemēhu diehi jiē'e mu vaebe rovamu evare God-hu hesinō rinēgadoho ēhi jiē'e muoho vaenōvore.

21 Nani ja a bōrōmo hesi darugore javē'ero hesi muohuremu vaejahē'iro evare God-ro ja hesinō rinagadeje. Nadi ēhunioho nurunurumo'i ē muohuremu vaenōvone. Rōhu jaehu ē a hesi darugore hijanuoho vuonugo'i va'oromo jasi nimanue mu ōri birohē'ohuro va'o ē muoho vaene.

22 Rōhu jaehu ae gō hesi darugoremu hiromo bogo nurunurumo'irane ē hesi bēhoho a bōrōmo gō hesi muohuremu vaejahamu evare Badahu hesinō rinagē'oho ja dōho jasi bōrōmo hesi darugoremu hi'i jasi uhoho jasi nimoromo Badare mu vaejanue ae jave. O ja jasi nimanue muohemu vaejamu evare Badahu hesinō rinagē'oho ja Keriso-are darugoremu hiromo hesi muohemu vaejanue ae jave.

23 God-ro jemē bogo ēma baejēvo'i a'i hesi Harihoho nugō'ōromo huē vavaene sisē maro baejē'ero ēhu'ero jemē hesi baejēvadeje. Ĕhuni nadi ae gō jabesi darugoremuoho raromoromo ma-muemu vae'i uehorovo'i a'i God-are muoho uehorovore.

24 Nasi ō mueno'e ja ae gemu gemu diehi jiē'e mu vaebe rovamu God-hu hesinō rinagadoho ē aho jero God-are nunoro juvoromo ēhi jiē'e muohuremu vaenōvone.

*Bogo masurovē'e o ma-doru raromarue aribōvi jabesi jōhoje.*

25 Rōhu bogo masurovē'e aribōvioho jemesi jōho na majēhi'iē'e. Ave jōho bogo Badaro uōvuē'ero majēhi'i a'i naehu uehorovaje jōho majēhi'iē'e. Iae

naehu uehorovaje jöho na majëhi'ië'e röhu Badaro huë vavaene baeromo uehoroho bojemijë'ëro ëhu'ëro nasi jöho heromo uvo'a'aruje: Iae jö mae höjo.

<sup>26</sup> Na uehorovoromo uve: Jaruvoho huë vavaeni majaho nosi örire rovë'ëgo ëhuni aehu raromaruëhi ëhi raromë'o'ho ëho iae maho höjo.

<sup>27</sup> Ehesi bëhoho nani jemë vabore masuvë'e raromarujeje. Ehi jië'o'ho nadi nugö'ö'i uehorovore. O nani jemë bogo masuvë'e ma-raromarujeje. Ehi jië'o'ho vaboroho nadi nahore.

<sup>28</sup> Röhu a juvijehu o magonaho aboridehu masuvë'o'ho bogo sisë'ioho ë'arujeje. Röhu masuvë'ohuro ehuro nurunurue uehore gö gö bae'a'aruje. Röhu na bijönege ëhi jië'e huë vavaenehu jemesi örire rueröhoho. Ehuni üeve: Vaboroho nadi nahorëjo.

<sup>29</sup> Nasi ö mueno'e nasi bëhoho ehije. God-ro majae ma-bunemu bamë'eje hesi majaho rueröhego. Ehi jië'e jiaje ave majare aevoromo raromobe va'ë'iroho masuvë'e aribövioharo masuvarije muoho barë'ië'e jiaje nadi masuvarije muohemuoho uehorovo'i God-are muohu'o uehorovore.

<sup>30</sup> O huë vavaeni baejë'e aribövioharo ave sa'a hesi huë vavaeni muoho barë'ië'e jiaje nadi huë vavaeni baejarujoho ehemuoho uehorovo'i God-are muohu'o uehorovore. O nimorohë'e aribövioharo ave sa'a hesi nimorohë'e muoho barë'ië'e jiaje nadi nimoroharujoho ehemuoho uehorovo'i God-are muohu'o uehorovore. O inöme rabe rabe imo'amaruje aribövioharo inöme bövie bise'e barë'ië'e jiaje uvore: Noehu imaroho bogo nosirehu jio'i hesi God-are höjo.

<sup>31</sup> Ave sa'are bövie bise'e jiego gavaruoho barë'ië'e jiaje ehuni ave sa'a hesi mue bövie bise'e vaejë'iroho nadi ehuremuoho uehorovoromo vae'i God uehorovë'i muoho vaere.

<sup>32</sup> Röhu na nege jemë bogo ave sa'a hesi muohuni uehorovoromo nurunurumo'irarijego. Bogo masuvë'e ariböviohuro Badare muohemu uehorovarueje ehuro Bada dë mae jioröhego.

<sup>33</sup> A'iro vaboro masuvë'e ariböviohuro ave sa'a hesi muoho böröme uehorovarueje ehuro jabesi vaboroho dë mae jioruomoröhego.

<sup>34</sup> Ehu'ëro Badare muohu'o ave sa'a hesi muohu'o gemuoro havoromo vaejego anoji'e jiajeje. Röhu magonaho aboridohu'o bogo masuvë'e magonaho ioro'iorohu'o jaburo Badare muohemu uehorovarueje jabesi sino haho'ohu'o aru'ahohu'o God-are örire gemu bojamirovoröhëro. A'i baru masuvë'e magonahohuro ave sa'a hesi muoho uehorovarueje jabesi baruoho dë mae jioruomoröhego.

<sup>35</sup> Na jö majëhijaje hesi bëhoho ëho bogo jemëhu masurovo'irarije öroho tugohëho'i a'i jemë ajëmijego mae jëvoröhego majëhije. Avo'avoho raro-moromo Badare muohuremu uehorovo'irarijego ehuni vabore o barue bogo naho'irarije jöho majëhije.

<sup>36</sup> Röhu a juvijo'o magonaho aborido'o aemo'aemo'o jëvoromo röhu uvë'o'ho: No bogo masurovo'ëjarë uvoromo ëhi uehorovobe va'ojuvo röhu aehu magonaho masu'iro nimo avohoromo ehuni uvë'o'ho: Naro nasi magonaho hesi öriroho muoho bogo maho vaegoro masu'ië'ajë uvoromo masuvë'o'ho iae maeje. Hesi nimoromo masurovoromo gemuore ari'ë'ö. Ehi jië'o'ho bogo sisëhu jio'i maeje.

<sup>37</sup> O aehu biririvoromo hesi dë vövöbajo'ere mae uehorovoromo uvë'o'ho: E'magonahohu'o na'o no aemo'aemëro javuë'ëro bogo masurovo'i ma-aemo'aeme vaejë'ëro bogo niavo'i ma-aribe jireho'ëjarë uvoromo hesi dë

vövöbajo'ere nimajoho bogo uehorovo'i hesi nimajoho taemorovoromo bogo masuvë'o'ho hu mae ë'ajeje mami'e birivoromo uehorovë'ëro jïë'ëro.

<sup>38</sup> Ëhu'ëro jïë'ëro aehu hesi aemo'aemo masuvë'o'ho iae maeje. O bogo masuvë'o'ho ëho ma-mabëheje.

<sup>39</sup> Röhu masuvë'e magonahoho baru hijë'iroho baru'o gemu mae hi'ë'e. God-are jöho ëhije. O baru guomë'iroho magonahohuro di a nimë'o'ho ëho bae'ë'e. Röhu Bada mae uehorovaje ahuremu masu'ë'e ae gö bogo.

<sup>40</sup> Röhu hu baru bogo bae'i ma-doru hijë'o'ho iae hu huë mabëhe hi'ë'e. O baru i'o baejë'o'ho ma-bisemu bogo ëhioho huë maho hi'ë'e. Nasi uehoroho ëhije. Röhu nasi uehoroho bogo sisëhuje. Ëhesi bëhoho naro uvajeje: God-are Aru'ahohuro bogo ae gö jabesi simanoho gemu huotovëho'i Paul nasi simanohu'o huotovehego ëhuro na uehoru mae baeromo jajivaje höjo.

## 8

*Aehu inömo sisëni bahijare mi hesi vitu Christian ariböviehu i'iröhe o bogo i'iröhe jö Corinth ariböviehu ua gavamu Paul-hu mana jajivade jöhoje.*

<sup>1</sup> Röhu jö göho na jajivo'ië'e. Övehu avohoromo uvene aho röjahjarue inömhuni mie anoromo aho'o bamëhoruomajeje sisëhuro baeröhego. Sisëni bamëhë'e mi vituoho na jemë ma-dajumo ue'ahore o uvore: Aru'aho sisëni bahijëhë'ego juahovo'ejarejo. Ëmioho i'irarije o juahovo'irarije di muoho mae jiajoho ëho no uehorovo'ejo. Jemëhu ë'arujëhi aehu uvë'o'ho: Aru'aho mue bövie bise'e eni ga barëjë'e jevajë uvë'o'ho ëhuro hesi ihohemu döro bamorovajeje. O aehu ae gö jabesi örire uehorovëvë'o'ho ëhuro hu ekaresia muoho nigemajeje.

<sup>2</sup> Ja uvë'o'ho: Na mue eni ga barëjë'e jevajë uvë'iroho ma-döhemu ga'i bogo avoho gavanueje.

<sup>3</sup> O jaehu God uehorovë'o'ho huro ja mae gavajeje.

<sup>4</sup> Röhu naehu urimo uëvode jöho inömo sisë hesi mi i'irarije o juahovo'irarije jöho na majëhi'ië'e. Iae no garomo uvarueje: Ëhi jïë'e inömo bëhi rumo'e höjo. God gemu jio'i gö bogohöjo.

<sup>5</sup> Iae God-are jö bogo hejë'e ariböviohuro sarerivoromo uvoruomajeje: Ö'idöre jio sa'are jïë'e aribövi noehu bogo gëvaruoho uvene aho röjëhi'iröhoho höjo. Iae ëhi jie. Aëro uvarueje: God gö gö aho'obëhe no bogo gavarue darugo'e a masijoho aho'obëhe jio'amajëjo.

<sup>6</sup> Röhu Christian aribövioho no bogo ëhioho uehorovo'i God gemu Vavuoho mae uehorovarueje. Huro sa'ae bövie bise'e bamavuë'ëro noro hesi jöhemu uehorovoromo raromo jijiharueje. O Darugo'e A Böröme gemu Iesu Keriso mae uehorovarueje. God-ro uavamu Kerisoro bövie bise'e bamavuadeje. Bamavuoromo ajamuamu no vuovo öroho vuonugo'i darugoho baejë'ëro mae raromarueje.

<sup>7</sup> Iae no garomo uvarueje: God gemu A Böröme Keriso gemu ëhi jëvajëjo. Röhu Keriso-are aribövi ioro'ioroho bogo ëhioho gavarueje. A'i urimë'i God-are jö bogo hejare majare uvonövareje: Inöme gö aru'aho'e höromo ëho rajëhinövareje. Majae ëgobövie ëhi ë'obe rovë'ëro ëhu'ëro jabumë inömëni bamëhare mi vitu i'ie'iroho uvoruomajeje: Ëmioho iae aru'aho sisë hesi mie höjo. Ëhi uvoromo ëma ijë'ohuro ëhuro herovoromo uvarueje: Nani no sisë ijaruëromo juhuonivarueje mu öroho bogo avo'avoho gavë'ëro.

<sup>8</sup> Jabumë uvarueje: No sisë ijaruëromo juhuonivarueje röhu i ijë'o'ho bogo ëhuro God-are bëhiroho va'ejo. I juahovë'o'ho God-are nuniroho bogo sisëho javuo'ë'e. O ijë'o'ho God-are nuniroho bogo maho javuo'ë'e.

<sup>9</sup> Jemë i ijë'oho o juahovë'oho God-ro uvajeje: Ëho jemesi mue höjo. Röhu gavë'i ë mioho ue'ahore. Nani bogo avoho biririvë'e Christian aribövioho jaburo jemë gëromo sisëro rireromo'ë'ö.

<sup>10</sup> Ëhesi bëhoho ja iae garomo uvanueje: I ijë'oho o juahovë'oho hesi höjo. Röhu ë jöho Keriso-are ae göëro bogo avoho uehorovë'ëro jië'ëro juhuonivoromo uvo'ë'e: Sisë ariböviohuni bahijare mioho naehu ijë'oho sisë höjo. Nani ë ahuro garöhe jero inömo sisë rajëhijarue osare hiromomo ie i'iramu gagorovo uvo'ë'e: Ëaru'aho sisë hesi mi vitu aehu ijë'oho ëho God bijönimajë uvoromo röhu ja gavë'i hu'o ëma i'ë'e.

<sup>11</sup> I'iramu ë biriri rumo'e a hesi aru'ahoho sisërë'ë'e. Jasi öhuni Kerisoro uehorovoromo guomadeje. Röhu jero uvaneje: Mi hesi öroho na ga barëjë'e jevajëromomo ë a hesi nunire mioho ijamu huro ja gavë'i iromomo sisërëjadeje.

<sup>12</sup> Ëhi jië'e mu vaejë'oho jemëro jemesi Christian agano jabesi dë vövöbajo'oho biriri rumo'ëro jië'ëro ijumëhoromo jabesi örire sisë vaejëvarujohuro ëhuro Keriso'o sisë vae'a'aruje.

<sup>13</sup> Ëhi jië'ego naehu mi ijamu nasi aganehu geromo nasi döre rueromomo sisërërovo'ia'amu gavë'oho naro mi ijajoho ioro'ioere gemu vuonugo'ejo nasi aganoho sisërëjöëni.

## 9

*Paul-hu bogo apostle jevajë uvoromo bövi bise'o maho hesi nijio'irae'i a'i a gö jabesi jöëni uehorovoromo vuonugonövade jöhoje.*

<sup>1</sup> Jemë'o uehorovore Paul na bogo a jabesi darugoremuoho hi'i nasi nimoromo hijajeje. Na apostle ae jeve. Na nosi Bada Iesu nunëro gavë'e jeve. Naehu Badare mu vaejodohuro iae ëhuro jemë hesi aribövioje jeve.

<sup>2</sup> Ëhuni ame göehu göehu na bijönegoromo uvë'oho: Nörö bogo apostle-hu hö uvë'oho hesije röhu jemë bogo ëhioho uvo'i uvo'a'aruje: Paul iae apostle höjo hesi örire noro Keriso-are muoho baejë'ëro.

<sup>3</sup> Röhu naehu vaejaje mu aehu garomo uevë'oho: Paul ja rabëni ëhi jië'e muoho vaejanue hö uevë'oho na ave jöho mana majëhijajeje.

<sup>4</sup> No God-are jö majëhiromomo ie jove mana i'ibejo na mae o sisë jio'ibejo. Iae mae jio'ibejo.

<sup>5</sup> O Peter'o apostle ioro'iorohu'o Bada Iesuarë ö ömo'ömohu'o ë'aruëhi no'o vabore masuromomo sö ujuoho jireho'ibejo na mae o sisë jio'ibejo. Iae mae jio'ibejo.

<sup>6</sup> O nani jemëro ëma uvarujeje: Nosi ekaresia ajamuijarue a ioro'iorohuro God-are muoho vaeromomo ekaresia no ajamuiromomo ë muohuremu vae'iramu no mana bojëmi'ëjarëjo. Röhu Paul'o Barnabas'o jabumëremu bogo ëhioho mana bae'i God-are muoho vaeromomo no ajamuiromomo jabesi övëro mue gö ionire vaeromomo manaho baenövo'aruëjo.

<sup>7</sup> Jemë nani ëhi uehorovaruje röhu muorovo aribövioho na jabumë jabesi övëro mu gö ionire vaeromomo mana baeromomo ioho ue'aharueje. Bogo. Jabumë muorovo muohemu vaeromomo baejarueje. O iruno'e ba'amo bivo'e vaejarue aribövioho na jabumë ë iruno'oho ue'aharueje o bogo. Iae ue'aharueje. O mi muebejarue aribövioho na jabumë ë mi hesi amo rihuoho ue'aharueje o bogo. Iae ue'aharueje.

<sup>8</sup> Aehu mu vaeromomo mana baejarue jöho jajivë'e jeve jemëro heromomo uvo'irarijego: God-are ekaresia muebejavuoromomo mana baejë'oho iae mae höjo. Röhu God-are jöho ëhi gemuoho jajivë'eje.

<sup>9</sup> Moses-hu jajivade jögoru surire ëhi uvë'eje: Jasi mu vaejahaje miehu jasi mu vaejahoromo i hörehu sa'ijovobe juvë'o ho hesi jö'o ho nadi tugohahego hu juvoromo hesi manaho baeromo huhu hörehu sa'ijovaje i vitu vituoho ibe juvo'irajo. Ehi jië'o ho miohuro ëho hesi manae bae'a'ajëjo. God-are jöho ëhije. Röhu God bogo miohemuoho uehorovoromo ë jöho bojamui'i

<sup>10</sup> a'i nosi jöho uehorovoromo bojamuadeje. Ehesi bëhoho iruno'o mu muebejë'iroho sa'a ato'atovarue ariböviohu'o i sa'ijovarue ariböviohu'o jabesi muoho vaejë'i uehorovoromo uvoruomajeje: No i mu vaejaruohuni ehuni u'emu ë ioho ue'aho'ejarejo. Ehi uvë'o ho iae maeje.

<sup>11</sup> Röhu no iruno'o bivarue aribövioho va'ëne javue. Noro God-are jöho jemesi örire majëhijë'e javue ehuro God-are jö majëhijaroho muro iruno'e bivanovë'e javue. No ehi jië'e aru'aho muoho jemëni vaejëhë'ëro ehuni ave sa'a hesi inöme ie rune mana baejë'o ho bogo sisëhu jio'i maeje.

<sup>12</sup> Jemesi ekaresia muebejëvarue a ioro'iorehu jemesi örire mana bae'i uehorovë'o ho maeje jabumëro jemë bisemu ajëmijë'ego. Röhu no jemë böröme ajëmijë'e javuë'ëro ehuni no biririvoromo uvo'ejo: No mana baejë'o ho iae mae höjo.

Röhu nosi nimoromo manaho bogo bae'i a'i no biririvoromo huë vavaene bövie bise'e baejë'e javue aëro uvojöëni: Paul-mëro nosi monioho bae'i nimoromo ekaresiaho muebejavuaje höromo Keriso-are jö maho bogo eruomajöëni.

<sup>13</sup> Jew rajehu God-are amo börömo hesi mu vaejë'o ho God-are amore bahijare ioho jabesi manaego ujuohoromo ue'aharueje. O God-are maratuore mi bamoromo vënehu bue'öjarue ariböviohuro ë mi vituoho jabesi manaego ue'aharueje. Eho na jemë uehorovö o bogo.

<sup>14</sup> O Keriso-are mu vaejarue aribövioho ehi gemuoho ë'arueje. Badaro uövuë'eje hesi jö majëhijarue aribövioho noro mana baeromo raromo jijihonövoröhego.

<sup>15</sup> Ehi uövuë'eje röhu na manaho bogo baejë'e jeve. O naehu avevejö'e jajivaje jö hesi bëhoho bogo ehuro jemëro bojemi'irarijego. Naehu guomë'o ho iae hesije. A'i naehu Keriso-are jö ma majëhiromo ehuni mana baejë'o ho ëho bogo maehuje. Na bijönege ae göëro mana bojemiromo ehuro naehu nimorohë'i jövaje jö hesi bëhoho tugoho'iröhoho.

<sup>16</sup> Naehu Keriso-are jö ma a majëhijë'o ho nimorohë'i jövo'irode bëhoho bogoje God-ro ë muoho bojëmijë'ego. Hesi jö bogo majëhijë'o ho na i'ue bae'ejo.

<sup>17</sup> Naehu nasi nimoromo Keriso-are jö majëhijë'o ho suvuore mana baejajeje. A'i na bogo negë'e Keriso-are jö ëma majëhijë'o ho God-hu bojemade muoho ma-vaejajeje.

<sup>18</sup> Röhu naehu baejaje suvuoroho rabeje. Keriso-are jö majëhijë'o ho na ave sa'a hesi mana baejë'o ho maeje. Röhu ëho bogo uehorovoromo manaho bogo baejë'e hesi jö ëma majëhijajoho ehuro dë vuëevajeje. Eho nasi suvuoreje.

<sup>19</sup> Na bogo ae gö jabesi darugoremuoho hiromo jabesi muohemu vaejëhaje aehu jevo'i a'i naro nasi mueberovoromo nasi nimoro muoho vaebe juvajeje. Röhu na bogo nasi nimaje muoho vae'i a'i ae aho'obëhe jabuhu diehi namaruoho ëho vaejajeje ehuro ae aho'obëhe baejëvoromo Keriso-arire rëmo'irodëro.

<sup>20</sup> Jew rajo jabu'o gemuore hiromo God-are jö majëhijë'iroho Jew rajehu raromaruëhi na'o ehi hibe juvajeje ehuro Jew rajoho baejëvoromo Keriso-

arire rëmo'irodëro. O Moses-are jögoruremu raromarue ariböviohu'o hiromo God-are jö majëhijë'o ho jabuhu Moses-are jö ejaharuëhi na'o ëhi ejahajeje ëhuro Moses-are jögoruremu raromarue aribövioho baejëvoromo Keriso-arire rëmo'irodëro. Moses-are jögoroho iae na ejahajeje röhu bogo hesi jögoruremuo ho hijajeje.

<sup>21</sup> O Jew rajo jögoru bogo hejë'e ariböviohu'o hiromo God-are jö majëhijë'iroho jabuhu Jew rajo jögoru bogo ejaharuëhi na'o ëhi ë'ajeje ëhuro Jew rajo jögoru bogo hejë'e aribövioho baejëvoromo Keriso-arire rëmo'irodëro. Iae na Jew rajo jögoroho bogo ejahajeje röhu na God-are jögoroho bogo vuonugo'i Keriso-are jögoruremu hiromo God-are jöho ejahajeje.

<sup>22</sup> O juhuoni juhuoni mu vaejarue ariböviohu'o gemuore hiromo God-are jö majëhijë'iroho jabuhu raromaruëhi na'o ëhi hijajeje ëhuro ë aribövioho baejëvo'irodëro. Ëhu'ëro di ariböviohu'o hijë'o ho jabuhu mu vaejaruëhi na'o ëhi hibe juvoromo öre aho'obëhe ë'o gavajeje ëhuro a ioro'ioroho maro va'iröhego.

<sup>23</sup> Ëhi jië'e mu vaejaje hesi bëhoho aëro Keriso-are jö maho heromo jabu'o na'o huë mae baeröhëro ëhuni ë'ajeje.

<sup>24</sup> Jemë'o iae gavaruje tutuvoromo ae göehu gö iosirëmi'ië'iroho ae aho'obëhe birivoromo tutubijioharueje röhu ae gemuëro iosirëmiromo urimo ma-burëro tutuvoromo suvoro baejajoho. Jabuhu ë'aruëhi jemë'o ëhi jemesi uehoroho darugoho aho'o bojamiromo Keriso-are muohuremu birivoromo vaere hujeji jemesi suvoro ho bae'irarije.

<sup>25</sup> Röhu tutuvoromo aehu a ioro'ioro iosirëmi'ië'iroho urimë'i birivoromo dajoho avoho mueberovobe va'oruomajeje ëhuro darugo ma'ëro tutuvoromo suvoro ho baeröhëni. Ësuvoro ho ijino inovoromo simanore didi'aharuoho jië'ëro ëhu'ëro ma-burëro sisërë hesi jiajeje. Röhu ë sisërërohe suvoro ho baeröhëro ëhuni ë ariböviohuo birivoromuomajeje. Röhu Christian aribövioho no bogo ëhi jië'e suvoro ho bae'i a'i ioro'io remu jioröhe suvoro ho baeröhëni ëhuni Keriso-are muoho vaejarueje.

<sup>26</sup> O Paul naro ioro'io remu jioröhe suvoro ho bae'irodëni ëhuni aehu övo mugö mugöehu ano'irögoro övo aruëre anumëre ma-bu'öjaruëhioho na bogo ëhioho Keriso-are muoho sisë'i sisë'ioho vaejajeje. A'i aehu ma-ahorirehu birivoromo tutuvaruëhi na ëhi Keriso-are muoho ma-ahorirëro birivoromo vaejajeje.

<sup>27</sup> Keriso-are muoho vaeromo nasi dajehu nimajoho ma-taemorovajeje ëhuro birivevoröhego. Ëhi'oromo nasi dajoho nasi mueberovoromo ahorirëro va'ajeje naro ae gö jabesi örire jögore majëhijajëro röhu Kerisoro uejëöni: Paul jasi muoho bogo eni jio'ego jasi suvoro ho bogo bae'a'anuë uejëöni.

## 10

### *Aehu övehu avohare inömo bogo uehorovo'iröhe jöhoje.*

<sup>1</sup> Nasi ö mueno'e na nege jemëro ave jöho uehorovo'irarijigo nosi Jew rajo hijo miono'ehu ë'are jöho. Nosi Jew rajo hijo miono'o ho aho'obëhe God-are suehuro riogëgoromo öroho röjëhi'ego ë örire jijihö va'onövareje. Jabumë ae aho'obëhe jovo ihe Kavüë'e Jovoho beromo mae iojijomareje.

<sup>2</sup> Jovo beruomamu suehu aegëhadoho ëho noehu bapataeto vaeromo Keriso'o bimuvoruëhi jabu'o ëhi bisemu gemuoho vaejanovareje. Ëhesi bëhoho jovo beruomamu suehu aegahadoho ëho Moses'o bimuvoro hoje.

<sup>3</sup> Röhu jabumë ae aho'obëhe ie gemuoho ue'ahareje. Ue'ahoromo ëhuro God-are Aru'aho hesi darugoho baejareje.

<sup>4</sup> Jabumë ae aho'obëhe jove gemuoho ue'ahareje. Ëjovoho munë gagore jovo mae suorovajoho ue'ahareje. Röhu ë jovoho bogo jovo maemuoho jiadeje. Ëhesi bëhoho munënö'e aehu jabu'o gemuore va'onövdoho ë ahuro aru'aho'e jovohu'o bojëmamu jaburo jovo maho iromo ëhuro aru'aho hesi birirohu'o baejareje. Ëmunënö'e aho ëho Keriso jiadeje.

<sup>5</sup> Jew rajo hijo miono'e ae aho'obëhe ëhi jië'e huë maho baeruomamu röhu ae ma-gemu niö'i jabesi muoho God-ro garomo nimorohadeje. A ioro'iorohunioho bogo nimoroho'i jabesi örire bijönimadeje. Bijönimamu a rumo'e sa'are vuovo momorö'öbe va'adeje.

<sup>6</sup> Mu sisë ëhi vaeromo vuovare jöho ëho God-are suriroho bogo ëma jajivo'i a'i noni jajivë'eje noro garomo adahoromo avo'avoho uehorovo'iröhego. Ëhi jië'o ho jabuhu mu sisë nimarëhioho no bogo ëhioho nimo'ejo.

<sup>7</sup> O jabumë a ioro'iorehu inömo aru'aho'e höromo rajahi'amarëhioho no bogo ëhioho ë'ejo. Jabuhu ë inömo sisë aru'aho'e höromo rajahi'amo'irögoro nimorohare jöho God-are surire jajivoromo ëhi uövuë'eje: Ariböviohuro sa'aro raromoromo jovoho ioho mahunö'e ue'ahoromo ri'öromo mu sisë'o vaemarumijë'i ajajovare höjo.

<sup>8</sup> Röhu jabumë a ioro'iorehu öehu ë'anovarëhioho no bogo ëhioho ë'ejo. Öero ë'anovë'ëro ae aho'obëhe 23,000 majae gemuore rireromoromo vuovëvadeje.

<sup>9</sup> Röhu jabumë a ioro'iorohuro mu sisë vaebe va'oromo ëhuro Badare dëho bijioho garuomadeje ga'iro hu ma-nunëremu gëbe muebejëvobe va'ego o bogo. No ëhi jië'e muoho bogo vae'ejo. Röhu jabumë ëhi ë'ë'ego sigobëro umijëvamu vuovëvadeje.

<sup>10</sup> Röhu jabumë a ioro'iorohuro huë sisë barueromo nurunuruëgamu God-are örire jöe sisë'i atoromadeje. Ëhi jië'o ho no bogo ë'ejo. Jabumë ëhi ë'ë'ego a muo'amego vuovavuaje anerahuro rueromo muo'amamu vuovëvadeje.

<sup>11</sup> Ëhi jië'e i'uoho aho'obëhe nosi hijo miono'o jabesi örire rovadeje ëhuro no ae aho'obëhe uehorovo'iröhego. Jabuhu mu sisë vaeromo i'u mana baejare jöho iae God-are surire jajivë'eje noro garomo adahoromo avo'avoho raromo'iröhego jaruvore maja barë'iröhoho mami'e dunovo'ego.

<sup>12</sup> Ëhu'e jiaje ja ae rahuaru uvë'o ho: Na bibivoromo namijajë uvë'o ho gavë'i va'one. Bejavo'ë'e.

<sup>13</sup> Röhu uehoro sisë gö gö jemesi örire rovajeje. Iae ëhi jie röhu diehi jië'e uehoro sisëhu rueromo jemesi dëre bijëhë'o ho ëhi jië'e uehoro sisëho bogo jemesiroho gemu rue'i ae aho'obëhe nosi dëre ro bijahua-jeje. Röhu God-hu no ajamui'i uövuadëhi iae hu ëhi ajamuijajëro jië'ëro ëhu'ëro huro garöhe biriri ma'e uehoro sisëhu jemesi örire rue'ia'amu jemë nijio'iraerovo'irarijoho bogo eni jëvamu gavë'iroho hu bogo ma-nunëremuoho gë'ë'e. A'i uehoro sisë jemesi örire bijëho'i rovë'iroho huro öroho röjëhi'ë'e jemëro ë jijihoromo uehoro sisëho vuonugo'i birivoromo maro va'irarijeho.

<sup>14</sup> Nasi ö mueno'e ëhi jië'e jiaje ëhuni inömo ho god höromo rajëhjarue muoho gororomo rori'o va'ore.

<sup>15</sup> Röhu jemëro jemesi simanoho avo'avoho uehorovarujeho ëhuni ave jöho majëhi'ie'e. Mevoromo gare jö hesi bëhoho diehi jiego.



<sup>16</sup> Jemë'o uehorovore. Enatuore wine jovohuni God huë mae uaromo hesi suvuro baeromo ijë'iroho ëhuro no Keriso-are köho gemu mae baejarueje. O i ato'atovoromo ijë'iroho ëhuro no Keriso-are sinoho gemu mae baejarueje.

<sup>17</sup> No ae aho'obëhe ie gemuho ma-gemuoro ijë'ëro ëhu'ëro no ae aho'obëhe javue röhu ae gemuho javue ie gemuho ijë'ëro.

<sup>18</sup> Röhu Israel rajo jabesi muohu'o uehorovore. Jaburo mioho tarioromo vituoho God-ni hesi maratuore bahi'i vituoho ijarueje. Iromo ëhuro ë mure bimubarueje. O inömo sisë hesi öroho gemuhoje. Noehu inömo sisë hesi i vitu ijë'ohuro ë mure bimubarueje.

<sup>19</sup> Nani ë jöho adahoromo uvo'a'aruje: Paul-ro uöromö ë'ajëjo: God-are jö bogo hejë'e ariböviehu rajëhijarue inömoho darugo'e jio'amajëjo. O inömo sisë bojëmijë'e mioho bëhi'e höjo. Nani ëhi uvo'a'aruje röhu na bogo ëhioho uëve.

<sup>20</sup> A'i na uëromö ë'e: God-are jö bogo hejë'e ariböviehu inömohuni i bamëhë'ohö bogo God-ni bahijaho'i Satan-are aru'aho sisëho jabuni bahijëharue höjo. Ëhuro aru'aho sisë jabesi mure bimubarue höjo. Röhu jemëhu Satan-are aru'aho sisëhu'o gemuore bimuvë'ohö na bijönegajëjo.

<sup>21</sup> Jemëhu Badare enatuore jovohu'o Satan-are aru'aho sisë jabesi enatuore jovohu'o gemuore havoromo ijë'ohö bogo maehuje. O Badare maratuore iohu'o aru'aho sisë jabesi maratuore iohu'o gemuore havoromo ijë'ohö bogo maehuje.

<sup>22</sup> O noehu biriri'övoromo Satan-are aru'aho sisë jabesi i jovo iromö jabu'o bimuvë'ohö God-ro uvo'ë'e: Jemë bogo na gemu rajehijarujëromö ëhuni dë vörönimo'ë'e. Ëhi jïë'ohö na no aru'aho sisëhu'o bimuvo'ejo. Bogo. O ëhi jïë'e mu vaejë'ohö nani no sisë'i uehorovoromo uvarueje: God-are darugohö bise'e höjo nosiroho böröme höjo. Ëhu'ëro no hesi i'uohö bogo bae'ëjarëjo. Ëhi uehorovë'ohö sisëje. No aru'aho sisë'o bimuvë'ohö iae no i'ue bae'ejo.

*Ave jö masijohö uehorovoromo inömo sisëni bahijare mi gororovo'iröhe ë hesi jö vituohöje.*

<sup>23</sup> Jemë ae göëro uvarueje: Mue aho'obëhe vaejë'ohö iae mae höjo. Iae ëhi jie röhu mu ioro'ioro vaejë'ohuro bogo ëhuro marëjavuo'ë'e. Nani mue aho'obëhe vaejë'ohö iae maeje röhu mu ioro'ioro vaejë'ohuro bogo ëhuro ajamirovarueje avohö biririvoromo Keriso mae uehorovobe va'iröhëro.

<sup>24</sup> No bogo nosi sinohemuohö uehorovo'i ae gö jabesi sinohu'o uehorovo'ejo.

<sup>25</sup> Market-re imarije mioho aho'o ma-dajumo ue'ahore. Nadi juhuoniv-oromo uvore: Na ave mioho aru'aho sisëni bamëhare mioho höjo o gö hö uvo'i ma-ue'ahore.

<sup>26</sup> Ëhesi bëhohö God-are surire jajivoromo uvë'eje: Sa'ae iruno'e bövie bise'e aho'obëhe Badare höjo.

<sup>27</sup> O God bogo ma uehorovarue aehu jemë uëvë'ohö: Ruerego no i harihe gemuoro i'irarë uëvamu jabu'o ie i'i nëgë'ohö va'oromo ga'irarije ie rabe rabe i'imëmamü gavë'ohö ma-dajumo ue'ahore. Nadi dë vövöbajö'eroho uehorovoromo uvore: Na ave mi ue'ahë'ohö mae o sisë höromö mi hesi jöho uë gë'i ma-ue'ahore.

<sup>28</sup> Röhu ae göehu jemë uëvë'oho: Ave mioho aru'aho'e inömëni bamahë'e mie hö uëvë'oho nadi ue'ahore. Uvove: No ue'ahë'oho ë jö majahuijade ahuro garöhe noehu ue'ahamu gavë'oho uvo'a'ajëjo: Ëho God bijönimajëromo juhuonivo'ajëjo. Ëhuni no'o vuonugo'ejarejo. Ëhi uvove.

<sup>29</sup> Na uëve: Jemë ë mi juahovo'irarije hesi bëhoho ë jö majëhijade ahuro juhuonivoromo uvojöëni: Ëmi ue'aharujoho sisë hö uvojöëni uëve. Na bogo uëve jemëro juhuonivoromo uvojöro: Sisë höromo juahovo'irarijego. Nani jemëro na ue'a'aruje: Röhu God-ro uövuë'e höjo: Ie rabe rabe i'i nëgë'oho irëjo. Ëhi jië'oho no rabëni juhuoni'e a hesi jöho uehorovoromo ë mioho juahovo'ejarejo.

<sup>30</sup> O no God-are örire huë mae uaromo mi ue'ahë'iroho rabëni ae göho uö'a'aruëjo: Jemë sisë ue'aharujëjo. Röhu ë miohuni no mami'e God mae uaromo ue'ahare höjo. Nani ëhi ue'a'aruje.

<sup>31</sup> Iae ëhi jie röhu ie jove ue'ahë'oho o mue bövie bise'e vaejë'oho God uehorovoromo vaenövore hesi ihoho döro jioröhe.

<sup>32</sup> Jew rajoho o sa'a ioro'ioro rajoho o ekaresia aribövioho ëho jabesi jöëni jemëro uehorovoromo nadi mue gö gö vaejego jaburo ëho gavego jabesi aru'ahoho sisërëjëho'iro.

<sup>33</sup> Röhu na'o mu rabe rabe vaejë'iroho avo'avoho vaejajeje ae aho'obëhe na gevego mae jëvoröhego. Nasi sinoho bogo uehorovo'i ae aho'obëhe jabesi sinoho uehorovoromo muoho vaejajeje jaburo maro va'oruomoröhego.

## 11

<sup>1</sup> Naehu Keriso-are mu garomo vaejajëhi jemë'o nasi muoho garomo ëhi vaenövore.

*Magonahehu God rajahiruomotië'iroho simano nomorovo'amoröhe jöhoje.*

<sup>2</sup> Röhu naro jemesi örire rajëhije. Ëhesi bëhoho jemë majae ëhi nasi örire uehorovevoromo naehu jöe rabe hejë'ëro bojëmijodoho ejeharujeje. Ëhuni naro jemesi örire rajëhije.

<sup>3</sup> Röhu na nege jemëro garomo uvo'irarijego: A nosi simanoho Keriso höjo. No hesi uhure javuajëjo. Vaboro hesi simanoho baruoho höjo. Vaboroho baru hesi uhure höjo. Keriso-are simanoho God höjo. Ëhi uvove.

<sup>4</sup> Ëhi jië'ëro God rajahi'i gemuore gagovë'iroho ama'e o asë rahu simano nomorovoromo pari vaejë'oho o God-are jö a majëhijë'oho ëhuro no Keriso bogo avoho uehorovarueje ë hesi bëhoho Keriso nosi simanoho jië'ëro.

<sup>5</sup> O magonahe rahu simano bogo nomorovë'e pari vaejë'oho o God-are jö a majëhijë'oho baruoho bogo avoho uehorovarueje ë hesi bëhoho baruoho jabesi simanoho jëvë'ëro. Simano bogo nomorovë'oho u seho barëjë'e magonahoho gemuoho jëvanove.

<sup>6</sup> Magonahehu simano bogo nomorovë'oho simano uoho tario'ibejo iae mue gemuoho jio'ibejo. Röhu magonahehu simano u tariojë'oho o simano u seho barëjë'oho ëho javoji'e muohoje. Ëhuni magonahehu simano nomorovë'oho iae maeje.

<sup>7</sup> God-ro aho bamavuoromo hesi aru'ahoho ajoho bojamuijë'ëro God jiajëhi aho ëhi javue. Ëhuni simano nomorovë'oho bogo ama'i nosirehuje. O God-ro a ijo'ahe baeromo magonahoho avohoromo a nosi ajoho magonahoho bojëmijadeje. Ëhuni magonahehu simano nomorovë'oho iae maeje.

<sup>8</sup> Aevo'ioho God bogo magonahoho baeromo ëhuro ama'oho avoho'i a'i ama'e baeromo ëhuro magonahoho avohadeje.

<sup>9</sup> O God bogo ama'oho magonaho jöenioho avoho'i a'i magonahoho ama'i jöeni avohadeje.

<sup>10</sup> Ehu'ëro jië'ëro magonaho jabuhu simano nomorovë'oho iae maeje ehuro aneraho jaburo gëromo uvoröhego: Emagonahoho jaburo baru jabeti aharire raromarue höjo.

<sup>11</sup> Iae ëhi jie röhu a'o magonaho'o Bada'o gemuoro javuë'ëro ehü'ëro magonahoho bogo a rumo'oho riravo'i ama'oho bogo magonaho rumo'oho riravo'ë'ö.

<sup>12</sup> Ae jië'ëro ehuro God-hu magonaho avohadëhi ëhi magonahe jio'amë'ëro jië'ëro ehuro aho rahavuajeje. Röhu God-ro aho'obëhe bamavuë'ëro ehuro aho magonahoho bövioho bise'oho javue.

<sup>13</sup> Röhu jemesi uehorovore. Magonahehu ekaresiae aho'obëhe jabeti gemuore raromoromo simano bogo nomorovë'e ma-pari vaejë'oho na mae o sisëje. Eho sisëje.

<sup>14</sup> No ae magonahe aho'obëhe dinö'e dinö'e raromaruoho uehorovoromo uvarueje: A nosi simano u ëgo jië'oho sisë höjo.

<sup>15</sup> Röhu magonaho jabeti simano u ëgo jië'oho iae ma-mabëhe höjo. Ehesi bëhoho God-ro magonahoho simano u ëgobövioho bojëmijadeje ehuro simanoho riogivoröhego.

<sup>16</sup> Ae göehu nasi jö aho'ahovo'ië'iroho röhu God-are ekaresiae dinö'e dinö'e raromaruohu'o no'o ëhi jië'e muohuremu vaejarueje.

*Badare i jovo avoho ue'aho'iröhe jöhoje.*

<sup>17</sup> Röhu na bogo jemë rajëhiromo ave jöho majëhi'irögoro ë'e. Jemesi ekaresia gagovë'iroho ehuro jemë bogo marojëvo'i a'i sisërëjävajeje.

<sup>18</sup> Ehesi bëhoho aevo'ioho na hejodeje uevamu: Corinth rajo ekaresia jabumë gemuore gagovorovë'iroho Christian ariböviohuro uehoroho bogo gemuoho bae'i ae göëro uehore gö ae göëro uehore gö baejarue höjo. Ehi jië'e jöho hejë'ëro na uehorovoromo uve: Ejöho nani bogo sareroho jio'i mabisemu jö mae jië'ëro Corinth ekaresiaho jemëro nani ëhi jië'e mu sisëho vaejaruje höjo.

<sup>19</sup> Röhu jemëhu hahagu hahagu uehorovë'oho ëho a jabeti mueje. Öre göho bogoje. Hahagu hahagu uehorovë'ëro ehuro uhohu'o mae uehorovarue aribövioho va'orahoro jio'amo'ë'e.

<sup>20</sup> Amo jemëhu gemuore gagovorovë'iroho jemë bogo uvarujeje: Noehu i'iröhe ioho wine-oho ëho Badare hö uvo'i ma-ue'aharujeje.

<sup>21</sup> Ehesi bëhoho ë i jovo ue'ahë'iroho jemë a ioro'ioroho bogo uehorovë'e sivu sivue jemesi ioho jovoho ëma ue'aharujeje. Ioho jovoho ëma ue'ahoromo a ioro'ioroho hömëvo'i a ioro'ioroho vörö'e jovo böröme iromo simane sisërëjarujeje.

<sup>22</sup> Na jemë osaho bogojëve ë raromoromo iruno'e jove i'irarijoho ehuni gemuoro gagovoromo Badare ioho jovoho sisë'i ijarujeje. O na jemë God-are ekaresiaho bijönimoromo ehuni iruno'o rumo'e aribövi jabeti örire javoje bojëmiromo ioho jabeti nunire ëma ue'aharujeje. Jemë ëhi ë'arujoho na diehi jië'e jöho jövo'ejo. Na na jemesi muohuni rajëhi'ejo. Na bogo rajëhiromo jövo'ejo.

<sup>23</sup> Röhu ave jöho Badaro bojëmijë'ëro naro jemë bojëmodeje. Bada Iesu a sisë bojëmi'iröhe vahire evare huro ioho baejade höjo.

<sup>24</sup> Ioho baeromo God mae uanugoromo ato'atovoromo hesi aribövioho uëvade höjo: Aveho nasi sine höjo. Na nasi sinoho bojamirovo'ië'ajëjo

jemë mae jëvoröhego. Aviëhi jië'e muoho vaenövorëjo ëhuro na uehorovevo'irarije höjo.

<sup>25</sup> Ioho inugoromo röhu i baejadëhi ëhi enatuore jovocho baeromo uëvade höjo: Ave enatuore jovo hesi bëhoho hehëjo. Na koe rovevoromo guomevo'ië'ajëjo. Guomevo'iramu ëhuro God-hu jemë muebejëvoröhe jögoru i'oho ioro'ioemu marë'ajëjo. Ëhuni jemë jovo ijë'iroho irëjo ëhuro na uehorovevo'irarije höjo.

<sup>26</sup> Bada Iesuhu ëhi jövade jö hesi bëhoho ë i o ë enatuore jovo ijë'iroho ëhuro huhu guomade jöho röjëhibe va'ujuvo va'o hu ruel'ë'e.

<sup>27</sup> Ëhu'ëro jië'ëro aehu Badare i o enatuore jovo bogo mae uehorovë'e ma-ijë'oho Badare sinoho köho ijumë'ëro ëhuro sisë jëve.

<sup>28</sup> Ëhuni ae aho'obëhe gemu gemu jasi dë vövöbajo'oho mevo avohoromo gare diehi diehi uehorovëvego. Ëhi ga avohoromo evaro ioho jovocho inövore.

<sup>29</sup> Badare sino bogo uehorovë'e ma-iemu jovemu ijë'oho ë ioho jovocho iromo ëhuro i'ue mana bae'a'aruje.

<sup>30</sup> I'ue baeromo jemesi a ioro'ioroho aho'obëhe sine u'uhëvoromo guomo guome gö gö baejë'ejö. A ioro'ioroho vuovëvë'eje.

<sup>31</sup> Röhu nosi dë vövöbajo'oho urimo mevo avohoromo ga'ibejo ëhi jië'e i'uocho bogo bae'ibejo.

<sup>32</sup> O Badahu i'u bojamuijë'oho ëho röjahuiromo bojamuijajeje ëhuro noro avoho uehorovoromo sisë ariböviohu'o gemuoroho sisëroho bogo va'iröhego.

<sup>33</sup> Nasi ö mueno'e Badare i jovo i'i gagovë'iroho göëro göho mueberovoromo gemu mae ire.

<sup>34</sup> Röhu hömëvë'oho jemesi osaro osaro raromoromo ire. Ëhi jië'oho gagovoromo God-are i'uocho bogo bae'a'aruje. Röhu jö ioro'ioroho naehu ö'ë'iroho avohëho'ejo.

## 12

### *Mu vaeröhe suvuore gö gö God-are Aru'ahehu bojamuajë jöhoje.*

<sup>1</sup> Nasi ö mueno'e God-are Aru'ahehu suvuoro bojamuijaje jöho na majëhi'ië'e. Ëhesi bëhoho na nege jemëro ë jöho avoho ga'irarijago.

<sup>2</sup> Iae jemë'o gavaruje jemë God bogo ma uehorovarije majaroho aëro jemë sarerëmi'ego jö mae höromo ejëhoromo ëma jijihonövariijeje. Jijihoromo ëhuro jöromo'e momorö'öjë'e inömo inömoho vörö'e höromo ëma uvene aho röjahinövariijeje.

<sup>3</sup> Ëhuni ave jöho uehorovore. God-are Aru'ahehu jö bojëmë'oho aho bogo uë'ë'ö: Iesu sisëgo sisëro va'a'ajëjo. God-are Aru'ahoho bogo ëhi jië'e jöho bojamuijajeje. A'i hesi God-are Aru'ahohuremu uehoroho bojamuijago uvarueje: Iesu böröme namijë'ëro iae Bada höjo. O God-are Aru'ahehu uehoro bogo bojamuijë'oho nosi sivuoho ëhi jië'e jöho bogo vaerovo hesi javue.

<sup>4</sup> Mu vaeröhe suvuoroho gö gö jiorove. Röhu Aru'ahe gemuëro ë suvuoroho bojamuibe va'ajeje.

<sup>5</sup> Christian muoho gö gö jiorove. Röhu Badare muoho gemu noro vaejहारueje.

<sup>6</sup> Mue gö gö vaejë'oho eni javue. Röhu God-ro gemuëro darugoho bojamuego no ae aho'obëhe ë muoho vaebe va'arueje.

<sup>7</sup> No ae gemu gemu God-are Aru'ahëro suvuore bojamuijego ëhuro hesi muoho røjahirovarueje ekaresiae ae aho'obëhe marëjavuoröhego.

<sup>8</sup> Ae gö God-are Aru'ahëro hesi suvuore bojamuijego uehoro mae jië'e jöho atarueje. Ae gö Aru'ahe gemuohuro aji'e jöho bojamuijego ae røjëhijarueje.

<sup>9</sup> Ae gö Aru'ahe gemuohuro ajamuijego no biririvoromo God mae uehorovoromo ëhuro mu bövi mae vaejarueje. Ae gö Aru'ahe gemuohuro ajamuijego guomo guomo'e a jabesi sinoho avohëharueje.

<sup>10</sup> Ae göëro darugo'e muoho vae'amarueje. Ae göëro jö God-aro baeromo ae huruoho majëhijarueje. Ae göëro gavarueje di muoho God-are Aru'ahëro vaejë'e jiego di muoho bogo. Ae göëro bogo hejarue huë göëro göëro ëma atarueje. Ëma atego ae göëro ëhi jië'e jöho huotovoromo nosi jöëro majëhijarueje aëro hejoro.

<sup>11</sup> Ëhi jië'e muoho aho'obëhe bogo aru'aho göho göho vae'amoli magemuëro vae'amajeje. God-are Aru'ahehu diehi nimë'oho ae gö gö hesi suvuore gö gö bojamuibe va'ajeje.

*No Keriso-are sine gemuoho javue röhu no hesi öve duruaje gö gö javuo'amaje jöhoje.*

<sup>12</sup> Röhu no ae gemu gemu sino haho'oho ma-gemu javue röhu öve höre nune hia'e bövie bise'e aho'o javue. Iae öve nune höre gö gö aho'o javuo'ame röhu sino haho'oho ma-gemu javue. Sino haho'o jiajëhi ëhi Keriso-are aribövioho no aho'o sinoho ma-gemu javue.

<sup>13</sup> No ae aho'obëhe Jew rajoho sa'a ioro'ioro rajoho a jabesi darugoremu raromarue aribövioho nosi nimoro mu vaejarue aribövioho God-are Aru'ahe gemuohuro bapataeto vaejavuoromo sine gemu bamavuë'eje. Ae aho'obëhe Aru'ahe gemuoho jovonö'e bojamuamu ijë'e javue.

<sup>14</sup> Röhu sino haho'o hesi öve höre nune bövie bise'e bogo gemuoho jio'i aho'obëhe javuo'ame.

<sup>15</sup> Röhu hörohuro jöe jövoromo uvo'ibejo: Na bogo övoho jevajëjo. Na bogo övoho jevë'ëro ëhuni sino haho'oho hahagu jevajëjo. Iae ëhi uvo'ibejo röhu ëho hesi jio'ibejo bogo ëhuro höroho sino haho'oho hahagu jio'i sino haho'e gemuoho jio'ibejo.

<sup>16</sup> O hia'ohuro jöe jövoromo uvo'ibejo: Na bogo nunoho jevë'ëro ëhuni na sino haho'oho hahagu jevajëjo. Iae ëhi uvo'ibejo röhu bogo ëhuro hia'oho sino haho'oho hahagu jio'i sino haho'e gemuoho jio'ibejo.

<sup>17</sup> Sino haho'oho ma-nuni'emu javuo'ibejo no diehi he'ibejo. O sino haho'oho ma-hia'emu javuo'ibejo no diehi ridamui'ibejo.

<sup>18</sup> Röhu bogo ëhiohoje. God-ro diehi nimadëhi öve duruaje nune gö gö baeromo havo'amoromo ëhuro sino haho'e gemu bamavuadeje.

<sup>19</sup> Öve duruaje nune gö gö bogojavuo'ibejo ëhuro sino haho'e bogojavuo'ibejo.

<sup>20</sup> Röhu öve duruaje nune gö gö aho'obëhe javuo'i röhu sino haho'oho magemu javue.

<sup>21</sup> Ëhi jië'ëro nunohuro jöe jövoromo övo hesi örire ua'ibejo: Ja bëhi rumo'e javo'ego na ja bogo negajë ua'ibejo ëho sisë jio'ibejo. O simanohuro jöe jövoromo höroho uë'ibejo: Jemë bëhi rumo'e jëvo'ego na jemë bogo negajë uë'ibejo ëho sisë jio'ibejo.

<sup>22</sup> Röhu sino haho'ere inöme gö gö jio'amajoho ga'amoromo uvarueje: Jabesi darugoho u'uhë'e höjo. Ëhi uvo'ëjo röhu ëho bogojio'amo'ibejo bogo eni javuo'ibejo.

<sup>23</sup> O sino haho'ere inöme gö gö jio'amajoho ga'amoromo uvarueje: Manine jio'amajëjo. Röhu ëho bogo sisëho hö uvo'i mueberovo avoharueje. Sino haho'ere inöme gö gö jio'amajoho ga'amoromo uvarueje: Ëho javoji'e inömoho höjo. Röhu ëho bogo sisëho hö uvo'i ma-mabëhe avoho riogivoruarueje.

<sup>24</sup> O javoji rumo'e inömo no ma-mae ga'amaruoho ëho no bogo ëhioho avoho riogivoruarueje. Röhu God-ro nosi sino haho'oho havo'amoromo gemuoro avohahuadeje ëhuro noro garöhego di inömoho javoji'oho jiego o darugo rumo'oho jiego ëho avo'avoho muebe'amoröhego.

<sup>25</sup> Ëhu'ëro jië'ëro nosi sino haho'oho gemuoho javuë'ego ë hesi inömo göhuro göho bogo sisë vae'i a'i uvo'ejo: Gemuoho javuajëromo huë baerovoromo ma-ajamirovo'ejo.

<sup>26</sup> Sino haho'o hesi inöme gö vi'ehimë'oho sino haho'e aho'o ë vi'ehoho herovajeje. O sino haho'o hesi inöme gö hesi iho döre jië'oho sino haho'e aho'obëhe gemuoro nimorohajeje.

<sup>27</sup> Röhu jemë ae aho'obëhe Keriso-are sino haho'e jëve. Jemë ae gemu genu sino haho'ere höre nune bövie bise'e jëve.

<sup>28</sup> God-ro hesi ekaresiaho aho'obëhe gemuoro havoromo avoho bamavuadeje. A ioro'ioroho apostle bamavuadeje rue nuni maroho javuoröhego. Ëhesi bëhire jö God-aro baeromo a majëhijarue aribövioho bamavuadeje. Ëhesi bëhire Keriso-are öri röjëhijarue aribövioho bamavuadeje. Ëhesi bëhire darugo'e mu vaejarue aribövioho bamavuadeje. Ëhesi bëhire darugo baeromo guomo guomo'e a jabesi sino avohëharue aribövioho bamavuadeje. O a ajëmarue aribövioho ekaresia muebejëvarue aribövioho o no bogo hejarue jö göehu göehu atarue aribövioho ëhi bamavuadeje.

<sup>29</sup> Na no ae aho'obëhe apostle javue. Bogo. Na no ae aho'obëhe jö God-aro baeromo majëhijarue aribövie javue. Bogo. Na no ae aho'obëhe Keriso-are öri röjëhijarue aribövie javue. Bogo. Na no ae aho'obëhe darugo'e muoho vaejarueje. Bogo.

<sup>30</sup> O na no ae aho'obëhe daruge baeromo guomo guomo'e aribövi jabesi sino avohëharueje. Bogo. Na no ae aho'obëhe God-are Aru'aho suvuoro baeromo jö göëro göëro atarueje. Bogo. Na no ae aho'obëhe God-are Aru'aho suvuoro baeromo huë göehu majëhijarue jöho huotovoromo sama'e majëhijarueje. Bogo.

<sup>31</sup> Jemëro uvarujeje: Aru'aho suvuoro mabëhe bae'ië'ajëromo bae gavarujeje. Röhu öri maho naro röjëhi'ejo göehu gö uehorovëvo'irarije öroho.

## 13

### *Göehu gö dë vövöbajo'ere uehorovo'iröhe jöhoje.*

<sup>1</sup> Noehu bogo hejarue huë göehu göehu naehu jövo'irodoho eni jevë'oho o anera jabesi huëhu ëhu'o jövo'irodoho eni jevo'i röhu a dë vövöbajo'ehu bogo uehorovëvë'oho na bitare garaegaraevanovoromo jöho ëma jövo'ejo.

<sup>2</sup> O naehu suvuoro God-aro baeromo hesi jö ma-mae majëhijë'oho o huhu subivahuade jöho aho'o nuni aji'e jöho aho'o ga barëjë'oho o biririvo avohoromo hesi örire mae uehorovoromo ëhuro dahoru ujuohoromo rori'o bahijanovobe va'i röhu a dë vövöbajo'ehu bogo uehorovëvë'oho na bëhi rumo'e ae jeve.

<sup>3</sup> O naehu a ajëmi'irögoro nasi bövi bise'o bojëmi barëjë'oho o nasi sinohu'o bue'öjevojöro bojamirovo'i röhu a dë vövöbajo'ehu bogo uehorovëvë'e ma-sino döhuremu ëhi ajëmijë'oho ëhuro bogo maroho jevo'ë'e.

<sup>4</sup> Jaehu a dë vövöbajo'ehu uehorovëvë'oho ëhuro biririvoromo ma-ga taemo'anue. Ae huë baejëvo'anue. A dë vövöbajo'ehu uehorovëvë'oho ëhuro ae gö hesi mu mahunioho bogo dë vörönago'ë'e. Bogo nimoronimorohë'ioho jövo'anue. Bogo sivuoho uehorovoromo döroho bamorovo'anue.

<sup>5</sup> Bogo ma-mahu urejonö'oho juvo'a'anue. Bogo jasi sinohemu uehorovo'anue. Bogo uehore gö gö baeromo vörönimo'anue. Bogo ae gö jabesi sisëho uehorovemu uehorovo'anue.

<sup>6</sup> Mu sisë garomo bogo ëhunioho nimoroho'anue. Jö maemu heromo ëhuro nimoroho'anue.

<sup>7</sup> A dë vövöbajo'ehu uehorovëvë'oho ëhuro huë vavaene rovë'oho magavë'i hinövo'anue. Mae uehorovonövo'anue. Mae jio'a'ajë uvoromo muebenövo'anue. Biririvoromo naminövo'anue.

<sup>8</sup> A dë vövöbajo'ehu uehorovëvarue muoho bogo barë'i ëhi ma-jiemu jiajeje. Jöe gö gö God-aro baeromo majëhijarue suvuoroho iae barë'ë'e. Noehu bogo hejarue huë göehu göehu atarue suvuoroho iae bogojio'ë'e. A ioro'ioro iosirëmiromo God-are jö mae gavarue suvuoroho iae barë'ë'e.

<sup>9</sup> Ëhesi bëhoho jaruvoho God-are mu vituoho gavarueje. Vituoho bogo. Jö vituoho God-aro baeromo majëhijarueje. Vituoho bogo.

<sup>10</sup> Hujeji aji ma-mabëhe rue'iramu evare jöe mue gö ga'i gö bogo gavarue ë muoho iae barë'ë'e.

<sup>11</sup> Ëhesi jöho uhu'e uë'ië'e. Na asisö'e jevade majaroho asisö'ehu ataruëhi ëhi jövonövodeje. Asisö'ehu nimiruëhi ëhi nimonövodeje. Asisö'ehu uehorovaruëhi ëhi uehorovonövodeje. A'i ma'e jevade majare evare asisö'oho uehoroho vuonugo'i ma-mae uehorovodeje.

<sup>12</sup> Ëhesi bëhoho jaruvoho no sisë'i sisë'i aririro gavanovarueje. Majae ijönöho avoho ga'ejo. Jaruvoho jö vituoho naro gave. Jö vituoho bogo gave. A'i evare majaroho God-hu na gevajëhi na'lo ëhi muoho ga barë'ejo.

<sup>13</sup> Ëhu'ëro ave muoho ma-jiemu jio'amobe va'ë'e. Göho God mae uehorovarue muohoje. Göho no uvarue: God-ro ajamui'iramu mae javuobe va'a'ajë uvarue muohoje. Göho a dë vövöbajo'ehu uehorovëvarue muohoje. Ëhi jië'e muoho niö'i gemu ëhi jiemu jiobe va'ë'e röhu a uehorovëvarue muoho ëho böviohoje.

## 14

*God-are Aru'aho hesiro baejarue suvuore niö'i God-are jö ae huruoho majëhijarue suvuorohu'o bogo hejarue huë göehu atarue suvuorohu'o ë suvuoro jabesi jöhoje.*

<sup>1</sup> Ëhuni göehu gö dë vövöbajo'ehu uehorovëvo'irarije muoho vae'i ëhuremu ömo gare. Röhu aru'aho suvuore gö gö bae'i nimore. Jö God-aro baeromo a huruoho majëhi'irarije suvuoroho ëho börömo bëhe nimore.

<sup>2</sup> Aehu aru'aho suvuoro baeromo bogo hejarue huëhu jövë'oho ëho bogo aho he'i ma-God-remu hejöro jövajeje. Huë göehu jövë'oho suvuore Aru'aho hesiroho baeromo gurihijë'e jöho jövego aho bogo hejarueje.

<sup>3</sup> A'i jö God-aro baeromo a huruoho majëhijë'oho aëro hejöro jövajeje heromo birire baeromo muoho avoho ma'enoröhego o huë vavaeni jëvadoho mae jëvoröhego.

<sup>4</sup> O bogo hejarue huëhu jövë'oho hesi dë vövöbajo'ohemu ajamirovajeje. A'i God-are jö huruoho majëhijë'oho ekaresiaho ajëmajeje.

<sup>5</sup> Jemë ae aho'obëhe huë göehu atë'oho iae na nego'ibejo. A'i jemë jö God-aro baeromo huruoho majëhi'irarijoho ëho iae na nego avoho'ibejo. Jö

God-aro baeromo a majëhijë'oho ëho mu börömeje. O huë göehu atë'oho ë muoho ma-bisemu bise'eje. Röhu huë göehu atamu ae göehu jö huotovë'oho ekaresiae ae aho'obëhe he'iramu mae jëvo'ë'e. Ëhi jïë'oho mu börömeje.

<sup>6</sup> Nasi ö mueno'e na ö'oromo subivëhë'e jö bogo huruoho majëhi'i nuni aji'e jö bogo majëhi'i bogo jö God-aro baeromo majëhi'i mu öri bogo röjëhi'i a'i bogo hejarue huë göëremu naehu jövë'oho jemë heromo bogo marëjëvo'ë'e.

<sup>7</sup> O hesi ëma momorö'öjaje inömo inömoho viriköe o gita ëhi jïë'e inömoho uehorovore. Aruëre anumëre ëma huë'oho o bejë'oho ëhuro huëho bogo avoho hejarueje rabu jö huajoho o bejajoho.

<sup>8</sup> O muorovo jöhu'o uehorovore. Hëgö sisë'i huë'oho bogo avoho heromo avoho raromo'ë'ö muorovo'iröhëni.

<sup>9</sup> Ejö hesi bëhoho no bogo hejarue huë göehu jemëhu atoromo sisë'i majahuijë'oho no bogo avoho he'ejo. Jemë jöho ma-bu'ö'a'aruje.

<sup>10</sup> Sa'ae aho'obëhe huë gö gö atoruomajeje. Röhu huë aho'obëhe bëhi'oje.

<sup>11</sup> Röhu na ave huë bogo baejë'oho jö jövaje ahuro uvo'ë'e: Nörö huë gö ae höjo. O naro uvo'ejo: Hu huë gö ae höjo.

<sup>12</sup> Huë göehu atë'oho jemë ëhi jëvo'ë'e. Huë göehu ato'irarijoho nadi ëhemu nimo'i a'i jemë suvuore God-are Aru'aho hesiro bae'i nëgë'e jiaje ëhuni ekaresia ajëmi'irarije suvuoroho baeromo ë hesi muoho avoho vae'i nimore.

<sup>13</sup> Ëhuni ja huë göehu jövë'oho God uavego ajami'iro ëhuro jöho huruoho majëhi'irane.

<sup>14</sup> Naehu bogo hejaje huë göehu pari vaejë'oho nasi aru'ahoho parie vae'i simanoho uehore bogojio'ë'e.

<sup>15</sup> Ëhi jïë'oho na diehi ë'ejo. Nasi aru'ahohuro parie vaeromo röhu nasi simanohu'o uehorovoromo parie vae'ejo. Nasi aru'ahohuro ëhuro jöho io'ejo. Röhu nasi simanohu'o uehorovoromo jöho io'ejo.

<sup>16</sup> Jemë'o uehorovore. Jemesi simanoho bogo uehorovë'e bogo hejarue huë göehu ma-aru'ahohuremu atoromo God mae uavë'iroho suvuoro bogo baejë'e ahuro jemesi gemuore rueromo jöho heromo bëhoho bogo he'ë'e. Bogo heromo dadivo'iramu bogo uvo'ë'e: Iae mae-ëjo.

<sup>17</sup> Ja God mae uavane jöho nani mae jövaneje. Röhu ë ahuro bogo avoho hejë'ëro ëhu'ëro dë vövöbajo'oho bogo maho jio'ë'e.

<sup>18</sup> Röhu Paul naro suvuore God-are Aru'aho hesirire baeromo jemë iosirëmiromo majae aho'o huë göëro göëro jövajeje. Ëhuni na God mae uave.

<sup>19</sup> Ëhi jie röhu na uehorovoromo uve: Ekaresia gemuore jevë'oho jö ëgobövie huë göehu jövë'oho ma-jianovo'i aëro God-are jöho avoho heruomojöro jö biseharihe ma-sama'e jövë'oho ëho börömohoje.

<sup>20</sup> Nasi ö mueno'e asisö'o ininehu mu sisë bogo uehorovaruehi jemë'o ëhi gemuoho uehorovore. Röhu mu ioro'ioro asisö'ehu uehorovaruehioho nadi ëhioho uehorovo'i a'i a duvahëro uehorovanovore.

<sup>21</sup> God-are surire jöho ëhi uvë'eje: Badaro uvajëjo:

Naehu ave aribövi jö majëhi'ië'iroho

huë göehu atarue aribövioho uë'iramu nasi jöho bava'oromo bojëmi'aruëjo. Sa'a gö rajoho röjëhi'iramu nasi jöho bava'oromo majëhi'aruëjo.

Röhu bogo ëhuro ave aribövioho ejeho'aruëjo.

<sup>22</sup> Ëhuni suvuore Aru'aho hesiro baeromo huë göehu atarue muoho ëho God bogo ma uehorovarue ariböviohuremu heromo uehore baeröhego. O jö God-aro baeromo huruoho majëhijarue muoho ëho God mae uehorovarue ariböviohuremu heromo huë mae jëvoröhego.



<sup>23</sup> Jemë'o uehorovore. God-are ekaresiae ae aho'obëhe gemuore gagov-  
oromo ae aho'obëhe bogo hejarue huë göehu göehu atamu ekaresia mu bogo  
gavë'e ariböviehu o Keriso bogo ma uehorovarue ariböviehu rovë'iroho  
jaburo heröhe bogo hejarue huë göehu ëhi atamu hejë'oho uehorovoromo  
uvo'ë'ö: Ëekaresia ariböviohuro simane sisërëromo ëhuro jöjjuvoruomajëjo.  
Jemëhu huë göehu atë'oho ëhi jio'i

<sup>24</sup> a'i ekaresiae ae aho'obëhe jö God-aro baeromo huruoho majëhijamu  
Keriso bogo ma uehorovaje aehu o ekaresia mu bogo gavë'e aehu rovë'iroho  
huro heröhe jemëro God-are jöho majëhi'iramu hegorovo uehorovoromo  
uvo'ë'e: Nasi jö sisëho iae ataruëjo. Na sisë jevajëjo. Ëhi uvo'ë'e.

<sup>25</sup> Ëa hesi uehoro sisë gurihijadoho jaburo ato'iramu va'orahoro jio'ë'e.  
Va'orahoro jio'iramu sa'are ague aho hiromo God rajahiromo uë'ë'e: God  
jemë'o jiajëjo.

*Gagovoromo God rajahijë'oho ma-avoho rajahi'iröhe jöhoje.*

<sup>26</sup> Nasi ö mueno'e naehu jajivaje jö hesi bëhoho uehorovore. Ekaresia  
gagovë'iroho ae göëro uë'ë'e: Ë'ego no ave jöho iarëjo. Ae göëro Keriso-  
are öroho röjëhi'ë'e. Ae göëro gurihijë'e jöho huruoho majëhi'ë'e. Ae göëro  
bogo hejarue huë göëro jövo'ë'e. Ae göëro ë jö hesi bëhoho huotovoromo  
majëhi'ë'e. Röhu ë muoho aho'obëhe avoho vaerego ëhuro ekaresiae aho'o  
birire baeromo'i.

<sup>27</sup> Röhu bogo hejarue huë göehu ato'ië'iroho ae niö'iro o ae niö'i gemuëro  
ato'i a ioro'ioroho nadi atore. Röhu bogo majae gemuoroho ae aho'o  
ato'i ae gemuëro gemuëro jövobe va'ore. Jövobe va'ego ae gemuëro ë jöho  
huotovoromo aho majëhine.

<sup>28</sup> O jö huotovo'iröhe a bogojië'oho huë göehu jövaje ahuro ekaresia  
gemuore jörume hiromo hesi arijo'arije majahirovë'i God-are örire jöe  
jövo'ë'e.

<sup>29</sup> O jö God-aro baeromo majëhi'ië'iroho ae niö'iro o niö'i gemuëro jöho  
majëhire. Majëhijego a ioro'ioroho jemëro jöho heromo mevo gare jöho mae  
o sisë jiego.

<sup>30</sup> O ae göehu jö majëhijamu röhu ae göehu sa'are hiromo hejë'iroho God-  
are jöehu hesi dë vövöbajo'ere rovamu hegorovo jö jövo'ië'iroho urimo  
jövane aharo vuonugonego ijore ahuro jöho jövo'iro.

<sup>31</sup> Ëhi'o'iramu jemë ae aho'obëhe röhu ae gemuëro gemuëro God-hu  
bojëmijaje jöho majëhibe va'a'aruje ëhuro ae aho'obëhe jöho he avohoromo  
birire baeromoröhego.

<sup>32</sup> Nadi ma-majioho majëhi'i a'i ma-taemorovoromo majae eni jiego evaro  
majëhinövore.

<sup>33</sup> Ëhesi bëhoho God bogo uövuajeje noro garatöhuritövë'e raromo'i ma-  
avoho taemo raromöjoro uövuajeje.

Röhu God-are aribövi ioro'iorehu gagovoromo vaejaruëhi jemë'o ëhi  
gemuoho vaere.

<sup>34</sup> Ekaresia jemëhu gemuore gagovë'iroho jemesi magonahohuro jörume  
raromo'iro. Jabumë jöho nadi majëhi'iro. God-are surire jiajëhi ëhi  
magonahohuro nadi masijoho riravo'i ma-jöemu ejëhobe jijihö'iro.

<sup>35</sup> Jabumë God-are jö avoho he'i nimoruomë'oho jabesi osaro raro-  
moromo baruoho uë gë'iro rabëni ekaresiae gemuore raromoromo jöe  
atë'oho bogo maehu jië'e jiaje.

<sup>36</sup> Röhu nani jemë sarerivoromo uvarujeje: Corinth rajo aribövioho noro aevoromo God-are jöho majëhibe va'are höjo. O nani uvarujeje: God-are jöho bogo sa'a göroho va'i ma-nosiriremu rovë'e höromo ëhuni jemë gemuore gagovë'oho jemesi sivue uehorovoromo magonahoho jabu'o God-are jöho atoruomajeje.

<sup>37</sup> A'i jemë ae rahu uvë'oho: No jö God-aro baeromo majëhijarue ae javuajë uvë'oho o no God-are Aru'ahuhu uehoro ma bojamuego jö atarue ae javuajë uvë'oho uvore: Paul bogo ma-jajivo'i a'i Badaro jöho bojamamu jajivade höjo.

<sup>38</sup> Ae rahu nosi jö bogo uehorovë'oho nadi jabesi öriroho uehorovore.

<sup>39</sup> Nasi ö mueno'e ëhu'e jiaje jöe God-aro baeromo huruoho majëhi'i nimo avohore. O suvuoro God-are Aru'aho hesiro baeromo bogo hejarue huë göehu ataruoho ëhi jië'e muoho nadi ahore.

<sup>40</sup> Röhu ekaresiae gemuore gagovoromo vaejaruje muoho aho'obëhe ma-avoho vaere.

## 15

### *Kerisohu guomoromo ri'öjade jöhoje.*

<sup>1</sup> Nasi ö mueno'e Keriso-are jö maho na majëhi'ejo jemë röhu maho uehorovo'irarijego. Ëjöho naro mami'e majëhijamu jemëro heromo ejë'ëro ëhuro mae birivoromo riravarujeje.

<sup>2</sup> Na majëhamu hejarije ë jöho birivoromo ma'enë'ohuro ëhuro maro raromarujeje. O ma-döhuremu uehorovë'oho bogo ëhioho maho jëvajeje.

<sup>3</sup> Jö börömo böröme hejë'ëro jemesi örire majëhijodoho röhu maho majëhi'ie'e. Kerisohu guomo'iröhe jöho God-are surire jajivarëhi ëhi huro nosi sisëni guomade höjo.

<sup>4</sup> Guomoromo guavamu raromoromo majae niö'i gemu hesi uhure God-ro i'ovamu ri'öjade höjo. Ëhi jië'e mu vaeröhe jöho God-are surire jajivo'amare höjo.

<sup>5</sup> Röhu Kerisoro ri'önugoromo Peter-are nunire rueromo evare apostle aho'obëhe jabesi nunire rovadeje.

<sup>6</sup> Ijonö hesi ijorajo ömo'ömoho 500 iosirëmiromo ruëhi jië'e majae gemuore jabesi nunire rovadeje. Jaruvoho ë aribövioho ma-gemu gemu vuovëvo'i röhu aho'obëhe birivoromo raromoruome.

<sup>7</sup> Ëhi jië'ëro James-are nunire ruenugoromo apostle ae aho'obëhe jabesi nunire rovadeje.

<sup>8</sup> Rueromo ijo tugoho'i nasi örire rovamu na'lo nasi nunëro gavodeje. Apostle ioro'iorehu Keriso aevoromo uehorovarëhioho na bogo ëhioho aevoromo hu mae uehorovo'i a'i mu sisë bëhe vaeromo ma-majioho mae uehorovodeje. Ëhu'ëro jië'ëro vëmehu sisë'i rahego harihehu ma-majioho rovajëhi na ëhi jevanove. Na urimo ramoramo'ere hiromu ma-majioho Keriso-are ajire rovodeje.

<sup>9</sup> Apostle a ioro'iorohuro na iosiremiromo a masije jio'i na ma-bise'e jeve. Urimë'i naro God-are ekaresiae huë sisë bojëmi'i hijë'ëro ëhu'ëro apostle iho baejodoho na bogo maho jeve.

<sup>10</sup> Ëhi jie röhu God-ro hesi nimoromo huë baeromo ajemijë'ëro ëhuro na mae jeve. Huro ajemijë'ëro na bogo ëma hi'i a'i naro apostle ioro'ioroho iosirëmiromo muoho darugo'lo vaejë'e jeve. Röhu bogo nasi biriroho baeromo ëhuro muoho vae'i hesi God-ro nimoromo huë baeromo ajemijë'ëro vaejodeje.

11 Ëhu'ëro jië'ëro Keriso-are jö naehu majëhijë'oho o apostle ioro'ioerehu majëhijë'oho Kerisohu guomoromo ri'öjade jöe gemuoho no majëhijarueje. Röhu ë jöho jemë iae mae uehorovarijeje.

*Noehu vuovoromo ri'ö'iröhe jöhoje.*

12 Kerisohu guomoromo ri'öjade jöho noro majëhibe jijiharueje. Ëjö majëhibe jijihë'oho jemë a ioro'ioroho diehi'oromo atoromo uvarueje: Aho vuovoromo röhu bogo maho ri'ö'ëjarëjo. Nadi ëhioho atore.

13 Aho vuovoromo bogo ri'ö hesi javuo'ibejo Keriso hu'o bogo ri'ö'ibejo.

14 Keriso bogo ri'ö'ibejo no ma-imo jöho majëhijego jemëro ma-imo mae uehorovo'ibejarije.

15 Röhu aviëhi jië'e mu sisë gö'o döre jio'ibejo. No bogo ri'ö hesi javuo'ibejo God-hu Keriso ajamamu ri'öjade jö noehu majëhijaruoho sareri'e jöe jio'ibejo ëhuro nomë God-are jöho a nuniro sareri'e majëhi'ibejo.

16 Vuovë'e aribövioho bogo ri'ö hesi javuo'ibejo ëhuro Keriso hu'o bogo ri'ö'ibejo.

17 Röhu Keriso bogo ri'ö'ibejo jemëro Keriso-are örire ma-imo uehorovo'ibejarije God jemesi sisëho bogo uehorovoromo vuonugo'ibejo ëhuro sisë jëvadoho avevejö'ohu'o ëhi gemuoho jëvo'ibejo.

18 O Keriso mae uehorovoromo vuovë'e aribövioho sisëro va'oruomo'ibejo.

19 No vuovoromo sisëro va'o hesi javuo'ibejo no uvo'ibejo: Kerisoro ajamui'iramu ave sa'arohemu maroho raromo'ëjarëjo. Ijonöho bogo maroho javuo'ajë uvo'ibejo ëhuro a ioro'ioro jabesi vavaenoho bise'e jio'i Keriso-are aribövi nosiroho börömo mae jio'ibejo.

20 Röhu bogo ëhioho jio'i a'i Keriso guomoromo iae ri'öjë'eje. Ri'öjë'ëro ma-ioro'ioeremu hijajeje. Ëhu'ëro no garomo uvarueje: Vuovavuaje aribövi ioro'ioroho no'o ri'ö'ëjarëjo.

21 Ave sa'are hijade ae gemuëro aevoromo mu sisë vaeromo guomë'ëro ëhuro vuovavuobe rovajeje. Röhu ave sa'are hijade a göho aevoromo ri'öjë'ëro ëhu'ëro vuovoromo ri'ö'ëjo.

22 Ëhesi bëhoho ae aho'obëhe Adam-are ae gemuohuro javuë'ëro ëhu'ëro vuovavuajeje. Röhu ae aho'obëhe Keriso-are ae gemuohuro javuë'ëro ri'öromo raromo'ëjo.

23 Ae gö gö aho'obëhe jabesi majaho rovego ri'öjarueje. Urimë'i Kerisoro ri'öjadeje. Ijonö Keriso rue'iramu evare hesi aribövioho no'o ri'ö'ëjo.

24 Ri'ö'iramu evare jaruvore majaho iae barë'ë'e. Jaruvore majaho barë'iramu evare Kerisoro vörö'e sisë aribövie gö gö ruahö'öjëvo barëromo öri ari'e aho'obëhe God Vavu hesi övore bojami'ë'e huro mueberöhego.

25 O avevejö'oho God-ro nimo'ëgo Kerisoro böröme namiromo öri ari'e aho'o muebejuvo hujeji ijonö God-ro a sisëho mu sisëho ruahö'ö'amo barë'ë'e Kerisoro hörëro vijuvo taemego barë'iröhego.

26 Huro mu sisë ioro'ioroho urimo ruahö'ö barë'nugoromo a vuovavuaje öroho ijo tugoho'i ruahö'ö'iramu barë'ë'e.

27 Ëhesi jöho God-are surire jajivoromo uvë'eje: God-ro ae mue bövie bise'e aho'obëhe bahijahamu huro hörëro taemë'e höjo. Kerisohu ë'aje jöho ëhi jajivë'eje. Ëhuni no uvarueje: Vuovavuaje örohu'o huro hörëro taemo'iramu iae barë'ajëjo. Röhu aho'obëhe Keriso-are aharinö jiaje hesi bëhoho God bogo a'i a ioro'ioroho aharinö jioruomajeje. Ëho samaeje. Rabëni God-ro bövie bise'e Keriso-are aharinö bahijadeje huro mueberöhego. Ëhuni God bogo Keriso-are aharinöho jio'ë'e.

<sup>28</sup> Röhu bövie bise'e Keriso-are aharinö bahi barë'iramu evare God-are Harihohuro God börömo mae jiaje hesi aharire va'o hi'ë'e God-ro aho'obëhe Keriso-are aharinö bahijahë'ëro jië'ëro. Ëhu'ëro jië'ëro God-ro gemuëro böröme namiromo bövie bise'e aho'o muebejavuo barë'ë'e.

<sup>29</sup> Röhu jemë'o uehorovore. A ioro'ioroho bapataeto vaejëvarueje mami'e vuovë'e aribövioho ajëmi'iröhego. Röhu vuovavuë'e aribövioho bogo ri'ö hesi javuo'ibejo bëhoho rabëni vuovë'e aribövi jabesi jöëni bapataeto vaejëvarueje.

<sup>30</sup> Röhu no diehi javuaje jöhu'o uehorovore. Noro Keriso-are jöho majëhijego aëro bijönimoruomoro huë sisë bojamuego ëhuro majae ëhi vörö'ere raromarueje. Vuovoromo bogo ri'ö hesi javuo'ibejo vörö'ere raromaruoho bëhi rumo'e jio'ibejo.

<sup>31</sup> Nasi ö mueno'e Paul na majae ëhi vörö'ere jevë'ëro guomevo'ië'ajaje. Na mae uëve. Jemë'o na'o nosi Bada Iesu Keriso-are ae gemuohuro javuë'ëro naro jemesi jöho uehorovoromo nimorohajeje. Ëjöho iae maeje. Röhu guomevo'ië'ajaje hö uëvaje jöho ëhu'o iae jö maeje.

<sup>32</sup> Na Ephesus hiro mo ave sa'a hesi suvuorohemu uehorovo'ibejo na Keriso-are jöënioho vörö'e miroho bogo va'oromo jabu'oho muorovanovoromo vavaenoho bae'ibejo. A'i vuovë'e aribövioho bogo ri'ö hesi javuo'ibejo aehu atarue jöho ejëhoromo uvo'ibejo: Ioho jovoho ma-ue'ahë'e raromo'ëjarëjo ruëroho no ma-vuovo va'ië'ëro.

<sup>33</sup> Ae gö jabesi sareri sareri'e jö uehorovarujoho vuonugore. Vuonugoromo ave a mami jögoroho uehorovore. Sisë ariböviohu'o gemuore buarohë'oho ëhuro nosi mu maho ijumahuaje höjo.

<sup>34</sup> Mu sisëho vuonugo'i avo'avoho uehorovore. Jemë ae gö gö God bogo mae bogo gavarujeje. Jemë javoje baejöro ëhuni uëve.

*Noehu vuovoromo ri'öjego nosi sino haho'oho nu ano'e gö javuoröhe jöhoje.*

<sup>35</sup> Ae göëro ue'a'anue: Röhu vuovë'e aribövioho diehi'avuo'iramu ri'ö'ëjarëjo. O diehi jië'e sino haho'e jioromo rue'ëjarëjo.

<sup>36</sup> Ja simane garaëj'ëro ëhi jië'e jöho majehi'anue. Ja ujo öj'ëiroho bogo ëma ri'ö'ë'e. Su'oho sagohori'iramu röhu i'e rëdijiomoromo ri'ö'ë'e.

<sup>37</sup> O ja iruno'e ö'ië'ëiroho ahohu'o hanohu'o u'emu jioröhoho bogo ö'i a'i ma-ujohemu ö'a'anue. Nani wheat uje o rabe ö'a'anue.

<sup>38</sup> Ö'iramu i'e rëdijio'moromo God-hu nimadëhi ëhi nu ano'e gö gö jiobe va'ë'e.

<sup>39</sup> Röhu göho amore je'ore jovore raromarue aho majoho bövioho bise'oho nosi sino haho'oho bogo gemuoho javuo'i nu ano'e gö gö javue. A nosi nu ano'oho gö javuo'i sa'are majo hesi nu ano'oho gö jio'i ugo hesi nu ano'oho gö jio'i jovo majo hesi nu ano'oho göje.

<sup>40</sup> Röhu ö'idö inömoho sa'a inömoho iae jiorove. Röhu ö'idö inömoho nu ano'e mabëheje röhu gö jio'amo'i sa'a inömoho nu ano'e mabëheje röhu gö jio'ame.

<sup>41</sup> Maja hesi nu ano'oho mabëhe röhu göje. Manaero hesi nu ano'oho mabëhe röhu göje. Jiji mujöru'o jabesi nu ano'oho mabëhe röhu gö jio'ame. Jiji mujöru'o jabesi nu ano'oho mabëhe röhu gö gö jiorove.

<sup>42</sup> Ëjö uhu'e majëhijode hesi bëhoho ëhije. Sa'are inöme ö'idöre inöme bövie bise'e gö gö jio'amajëhi ëhi sa'are guavarue sinohu'o ri'ö'iröhe sinohu'o gö gö jio'amajeje. Sa'are guavarue sinoho sagohori'iröhe sine jio'i ri'ö'iröhe sinoho bogo sagohori'iröhe sinohoje.

43 Sa'are guavarue sinoho nu ano'e bogo maehu jio'i ri'ö'iröhe sinoho nu ano'o ma-mabêhe ri'ö'ë'e. Sa'are guavarue sinoho darugo rumo'e jio'i ri'ö'iröhe sinoho darugo ma'e ri'ö'ë'e.

44 Sa'are guavarue sinoho sa'are raromoromo mu vaejarue sinoho jio'i ri'ö'iröhe sinoho God-arire raromoromo aru'oho mu vaeröhe sinoho javuo'ë'e. Sa'are mu vaejarue sino haho'e javuë'ëro ëhu'ëro uvarueje: Aru'aho muemu vaeröhe sino haho'e iae jiaje höjo.

45 Ëhesi jöho God-are surire jajivë'eje. Nosi urimore aevo'i jiade bëhoho Adam-are jöhoje. Jajivoromo uvë'eje: Ëhuro aevoromo darugoho baeromo ave sa'are hijade höjo. Ëhi jajivë'eje. Röhu nosi ijore aevo'i jiade bëhoho Keriso-are jöho uvarueje: Hu ijore rovade Adam jianovajëjo. Ëhuro aevoromo aru'aho'e muoho vaeromo nosi aru'ahoho darugoho bojamuadeje.

46 Aru'aho hesi darugoho bogo urimoho baeromo raromo jijihö'i a'i ave sa'a hesi darugoho urimo baeromo raromo jijiharueje. Evare ijönö aru'aho hesi darugoho baeromo raromo jijiharueje.

47 Röhu urimore jiade aho sa'aëro avohë'ëro sa'a sine jiadeje. Ijore jiade aho ö'idöre jië'ëro ruvebijadeje.

48 Sa'a sino a jiadëhi no'o sa'a sino javuobe rovajeje. Ö'idöre jioromo rovade a jiajëhi u'emu ö'idö aribövioho no'o ëhi javuobe va'ë'e.

49 Röhu sa'a sino a hesi nu ano'o baebe rovaruëhi u'emu ö'idö a hesi nu ano'oho ëhi baeruomo'ëjo.

50 Nasi ö mueno'e naehu jajivaje jö hesi bëhoho ave sa'a hesi sinoho no bogo ëhu'o baeromo va'o God-are öri ari'eroho raromo'ëjo. O sago-hori'iröhe sinoho bogo ioro'ioemuoho javuo'ë'e.

51 Gurihijë'e jöho na huruoho majëhi'ie'e here. A ioro'ioeroho bogo vuovavuo'ë'e. Röhu ae aho'obëhe nosi sinoho gorosovoromo ajoho bae'ëjo.

52 Ijo tugohö'i majare hëgöe huö'iramu baderivanovo'iramu evare ga'ëjo sinoho mami'e gorosovavuë'e jio'iramu. Hëgöe huö'iramu vuovë'e aribövioho ri'öruomo'ë'e ijönöho bogo vuovo'i ma-oro'ioemu raromoröhëro. Ri'öruomo'iröhoho no aho'obëhe gorosovavuo'ë'e.

53 Ëhesi bëhoho God-ro nimë'ëro ave sagohori'iröhe sinoho gorosovoromo ëhuro bogo sagohori'i ma-jiemu jioje va'oröhe sinoho javuo'ë'e. Vuovo'iröhe sinoho gorosovoromo ëhuro bogo vuovo'i ma-jiemu jioje va'oröhe sinoho javuo'ë'e.

54 No ëhi gorosovo'iramu evare ave God-are surire jö jajivarëhi ëhi jio'ë'e. Jajivoromo uvë'eje:

Vuovavuae öroho God-ro ruahö'öromo mu'u barëjë'e höjo.

55 Vuovavuae öri hesi darugoho dinö'e höjo.

Guomavuae öri hesi vöröho diae höjo.

56 Vuovavuae vörö hesi bëhoho no mu sisë vaejago vuovavuaeje. O mu sisëhu ruahö'öjavuae hesi bëhoho God-are jöho aharueje.

57 Iae ëhi jie röhu God-are örire mabëhe ua'ëjo. Huro nosi Bada Iesu Keriso uavë'ëro huro vuovavuae örohu'o mu sisë ioro'ioerohu'o ruahö'ö'amajeje ëhuro no mae javuoröhego.

58 Nasi ö mueno'e vuovavuae öroho barë'ie'e jiaje ëhuni nami bibivoromo God-are muohuremu avoho vaenövore. Ëhesi bëhoho jemë garomo uvarueje: I'u'e mu Badare ihore vaejaruoho ëho no bogo ma-imo'i vaejarue höjo.

## 16

*Jerusalem ekaresia ajëmi'i Corinth rajo ariböviehu ijo bajo gagovo'iröhe jöhoje.*

<sup>1</sup> Röhu God-are aribövi Judea sa'are bogo eni jëvajohuni jemëhu ijo bajo gagovo'irarije jöho na majëhi'ië'e. Naehu Galatia sa'are God-are ekaresia mu bojëmibe juvodëhi jemëro ëhi jië'e muoho vaere.

<sup>2</sup> Hura börömo jië'iroho jemë ae gemuëro gemuëro ga'irarije ijo baje bövie baejë'e jëvego bövie tario bamore. O bise'e baejë'e jëvego bisemu tario bamore. Ëhi jië'oho na ö'iramu jemë ijo bajoho bogo naho'i ma-burëro baeromo bojemi'aruje.

<sup>3</sup> Röhu ö'ë'iroho naro suri surire jajivoromo Jerusalem ekaresia a masijoho uë'ejo: Ave aribövi jabesi muoho ëhi höjo. Ëhi jajivonugoromo ë suri suriohu'o jemesi suvuorohu'o jemëhu baejëvarije aribövi jabesi örire i'imëmiromomo rëmö'ö'ejo ujuohoromo Jerusalem amore va'oröhego.

<sup>4</sup> O na'o Jerusalem va'irodoho mae hö uvë'oho jabumë na'o gemu mae ö'ë'ö.

*Paul-mëhu diehi ë'i uehorovare jöhoje.*

<sup>5</sup> Röhu Macedonia sa'are va'o juvoromo evare ö'ejo Macedonia sa'are juvo'ië'ëro jevë'ëro.

<sup>6</sup> Ö'oromo nani majae bisemu ëgo'o jemë'o hi'ejo. Hesi nani'o nani buru majaho hi va'oromo barë'iramu na dinö'e va'irodire va'iramu jemëro ajemi'iramu mabëhe va'ejo.

<sup>7</sup> Avevejö'e ö'oromo ma-burëro gëromomo va'ë'oho na bijönege. A'i na nege Badahu nimë'ohuro ëhuro na majae ëgobövie jemë'o gemu mae hi'irodëro.

<sup>8</sup> Röhu avevejö'oho ave Ephesus amoremu hibe va'ejo Pentecost majaho rueröhego.

<sup>9</sup> Ëhesi bëhoho nasi öroho jiovehë'eje naro aviae hiromomo i'o mu'e vae'irodego. Röhu ae aho'obëhe nasi muoho aho'ië'ö. Ëhuni hiromomo muebe'ejo.

<sup>10</sup> Röhu jö göho Timothy ö'ë'iroho avoho mueberegomo hu bogo juhuonivo'i jemë'o gemuoro mae hi'iro. Ëhesi bëhoho naehu Badare mu vaejajëhi hu'o ëhi jië'e muoho vaejajego ëhuni uëve.

<sup>11</sup> Nadi uvore: Hu ma-asisö'e höromomo nue huodivo'i a'i ajamiromomo nugö'öregomo nasi örire mae vuonorö'ö rue'iro. Rabëni na hiromomo muebeje Christian ö ömo'ömo rue'iröhire hu'o ë rueröhego.

<sup>12</sup> Röhu nosi öe Apollos-are jöho gare. Na Apollos dinamirokomomo uavodeje: Christian ö ömo'ömo ioro'iorehu Corinth amore va'ë'iroho ja'o va'onëjo. Ëhi uavodeje röhu avevejö'e jemesirire ö'iröhohomo hu bogo mae bogo nimadeje. Röhu garöhe majaho eni jio'iramu gagorovo evare ö'ë'e.

*Paul-are ijo tugoho'i jöhoje.*

<sup>13</sup> Röhu nadi momorö'ö'i öre uherihë'i raromomomo birivoromomo Keriso mae uehorovore. Nadi juhuonivo'i a duvahonö'e daruge baeromomo riravore.

<sup>14</sup> Mu bövi bise'o vaejë'iroho ae dë vövöbajo'ëro uehorovëvoromomo muoho vaere.

<sup>15</sup> Nasi ö mueno'e na negaje jö göhu'o uë'ië'e. Stephanus'o hesi aganohu'o jabesi jöho jemë iae gavaruje. Greece sa'a rajoho jabumëro aevo'ioho Keriso-are jöho mae uehorovareje. Mae uehorovë'ëro jaburo God-are aribövi jabesi örire dë vövöbajo'e aho'o uehorovëvoromomo ajëmi'aruje.

<sup>16</sup> Ĕhuni ĕhi jiĕ'e aribĕvi jabesi jĕho ejĕhoromo ae rahu mue gemuoho ajĕmiromo biririvoromo vaejĕ'oho jabesi jĕhu'oh ejĕhore.

<sup>17</sup> Jemĕ rueromo na'oh jio'irarijohoh bogo eni jĕvamu Stephanus Fortunatus Achaicus ĕho jabuhu jemĕ'oh rĕromo rovarohuro ĕhuro na nimoroheve.

<sup>18</sup> Ĕaribĕviohuro jemesi dĕ vĕvĕbajo'ohoh sasohĕhoromo nasirohu'oh sasohehĕ'ejĕ. Ĕhuni ĕhi jiĕ'e aribĕvi jabesi ĕroro mae uehorovĕvore.

<sup>19</sup> Rĕhu God-are ekaresiae aho'obĕhe Asia sa'are raromaruohoh jaburo jemesi ĕrire jejĕmijĕ. O Aquila'oh Priscilla'oh Badare ihore dĕ vĕvĕbajo'e aho'oh jejĕmijĕ. Jabesi osare gagovarue ekaresiaho jabu'oh ĕhi gemuohoh ĕ'ĕ.

<sup>20</sup> Christian ĕ mueno'e aho'obĕhe jemesi ĕrire jejĕmijĕ. God-are aribĕviehu jejamirovaruĕhi ĕhi rajahirovoromo jejamirovore.

<sup>21</sup> Ave jĕho narah nasi ĕvĕro jajivo'iĕ'e. Paul narah jemesi ĕrire jejĕmije.

<sup>22</sup> Ae rahumĕ Bada bogo ma uehorovĕ'ohoh sisĕro va'ĕ'ĕ. Bada jero maburĕro ruene.

<sup>23</sup> Bada Iesuro huĕ baeromo jemĕ ajĕminĕvo'ĕ'e.

<sup>24</sup> Jemĕ'oh na'oh Iesu Keriso-are agane gemuohuro javuĕ'ĕro narah nasi dĕ vĕvĕbajo'e aho'oh jemesi ĕrire bojĕmije. Ahia mino'e.

## 2 CORINTHIANS

*Paul-hu Corinth ekaresia jejëmijade jöhoje.*

<sup>1</sup> O asë'e God-are ekaresiae Corinth amore raromarujoho God-ro nimamu Iesu Keriso-are apostle jevë'ëro Paul na'o nosi öe Timothy'o noro niö'iro jemë jejëmiromo God-are aribövi Greece sa'a ioro'iorore raromarujoho jemë'o jejëmijö.

<sup>2</sup> No nague God nosi Vavuohu'o Bada Iesu Keriso'o huë baeromo ajëmijego maro raromo'irarijego.

*Paul-hu huë vavaeni baeromo barëjë'ëro God rajahijade jöhoje.*

<sup>3</sup> Asë'e God hu mabëheje. Hu nosi Bada Iesu Keriso-are Börömeje o göho hesi Vavueje. Ëaho God Vavuoho hu mabëheje. Ëhesi bëhoho hu noni vavaenimo avohaje Vavuohoje. Hu sanuamuiromo ajamui avohaje A Börömoheje.

<sup>4</sup> Huro gövuaje no huë vavaeni bövi bise'o baejamu gövuë'iroho sanuamuego biririvavuaajeje ehuro huë vavaeni bövi bise'o baejë'e aribövioho no'o sanuëmijë'oho eni javuoröhego. Sanuëmego jabu'o birire baeröhego. Huhu no sanuamuijadëhi no'o ëhi ë'oromo a ioro'ioroho sanuëmego mae jëvoröhego.

<sup>5</sup> Kerisohu baejade ëhi jië'e huë vavaeni jovehu ruomanovoromo nosi örire rovajëhi ëhi Kerisohu nosi örire bojamuaje biriroho jovëro ruomanovajeje.

<sup>6</sup> Noehu huë vavaeni baejarue ë hesi bëhoho jemesi jöëni baejarueje ehuro jemë biririvëvego maro va'irarijego. O God-hu sanuamuego biriri baejarue ë hesi bëhoho gemuohoje. Jemesi jöëni baejarueje noehu baejarue ëhi jië'e huë vavaeni baejë'iroho ehuro biririvëvego baberumi riravo'irarijego.

<sup>7</sup> Röhu noro uvarueje: Noehu huë vavaeni baejarue gemuoho jemë'o baejarujëhi ëhi noehu biriri baejarue gemuoho jemë'o baejaruje hö uvoromo ehuni uvarueje: Iae mae-ëjo. Jemë iae biririvo'arujëjo.

<sup>8</sup> Röhu nasi ö mueno'e noehu Asia sa'are raromoromo huë vavaeni baejare jöho no nague jemëro avoho ga'irarijego. Huë gage marijamuiromo ijo'aho rumorëjavuoromo uehoroho barëjavuamu uvareje: Noehu vuovavuo hesi höjo.

<sup>9</sup> Nosì herovoromo uvareje: Vuovavuo'iröhe jöho court-re majahuijamu hejanovë'e javuajëjo. Ëhi herovareje. Röhu ëhi herovare hesi bëhoho God-ro nimadeje noro uehorovoromo uvoröhego: Nosì sivuoho bogo eni javuo'i God-ro vuovë'e aribövioho ajëmego ri'ö'amajëro jië'ëro ëhu'ëro hesi huro ajamui'ajëjo.

<sup>10</sup> Sisë döro vuovavuo'i höjadoho God-ro ujuohavuoromo maro ramuadeje. God-hu mare ramuadoho u'emu sisëro javuë'oho maro ramuo'ë'e. No hesi örire mae uehorovoromo uvareje: U'emu sisëro javuo'iramu röhu maho maro ramuo'ajëjo.

<sup>11</sup> Jemëro ajamuiromo nosi jöëni God ua'iramu huro iae ëhi ajamui'ë'e. Ae aho'obëhe ëninami'iramu nosi örire huë baejavuoromo ajamui'ë'e. Ehuni ae aho'obëhe nosi jöëni hesi örire mabëhe uaruomo'ë'e.

*Paul-hu Corinth amore va'i uëromö röhu bogo va'ade ë hesi jö bëhi Paul-hu majëhijadoheje.*



12 Ave jöho no uehorovoromo nimoroharueje. Herovoromo uvarueje: Iae mae-ëjo. God-ro ajamuego no bogo ma-döëremuoho muoho vae'i nosi dë vövöbajo'o uhohu'o ma-va'orahoro a jabesi örire röhu jemesi örirohu'o vaejëvarue höjo. Bogo aehu ëma uvaruoho: Simano ma'e uehore hö uvaruoho bae'i a'i God-hu huë baejavuoromo bojamuaje darugoho ëho no baeromo muoho vaejarue höjo.

13 Ëhesi bëhoho jemëhu sama'e adahoromo mae hejaruje jöhemu no jajivarueje.

14 Jemëro nosi bëhoho ma-bisemu hejarujeje röhu na nege jemë he avohoromo uvo'irarijego: Bada Iesuare majaho rue'iramu Paul-mëhu nosi jöëni nimorohë'i uehorovo'iröhëhi noehu Paul-mesi jöëni ëhi nimorohë'i uehorovë'o ho iae mae jio'a'ajëjo.

15 Iae na mae uehorovoromo uvodeje: No ëhi mae garorovarue hö uvodohuni ëhuni uvodeje: Naro jemesi örire urimo ö'ejöjo ëhuro vae niö'i ö'ego huë mae bae'irarijego.

16 Urimo ö'oromo jemesirire hiromo Macedonia sa'are va'ejöjo. Macedonia va'oromo vuono bu'öromo jemesi örire röhu maho ö'ejöjo. Ö'iramu jemëro bövie bise'e ajemiromo remö'ö'iramu na mae va'oromo Judea sa'are hi'ejöjo.

17 Na ëhi ë'iro uehorovodeje röhu bogo ö'odeje. Ëhuni nani jemë ëma uvaruje: Nörö sareri'e aëro jië'ëro bogo rovade höjo. Nani ëhi uvaruje röhu na bogo ëhi jië'e aho jeve. O naehu ëhi ëhi ë'irode muoho uehorovë'o ho bogo nasi sinohemu uehorovoromo jöho huotohuotovoromo uëvajeje: Io'ajo. Iae na ë'ejö uëvë'i uëvajeje: Bogajo. Na bogo ë'ejöjo. Na bogo ëhioho jöho huotohuotovoromo jövajeje.

18 God-hu bogo uehore gö gö bae'i ma-gemu uehorovajëhi no'o jemë jö majëhijaruoho bogo uëvarueje: Io'a uëvë'i boga uëvarueje.

19 Ëhesi bëhoho God-are Harihe Iesu Keriso-are jöho noro baeromo jemë majëhijareje naro Silas-ro Timothy-ro. Noehu jö majëhijare aho Keriso hu bogo uvë'eje: Io'a uvë'i uvë'eje: Bogajo. Keriso bogo ëhioho uvë'eje. A'i Kerisohu diehi ajamuiröhego God-hu uavadëhi huro io'a gemu uvoromo ëhi ëhi ajamuibe rovë'eje.

20 Keriso bogo rovade majare God-ro mae uvobe rovadeje: Naro nasi aribövioho ëhi ëhi mae vaejëvo'ejöjo. Mae vaejëvo'ejö uvë'ego Kerisoro uvadeje: Io'a uvoromo God-hu uvade mu maho vae barëjë'eje. Ëhuni Keriso-are ihoro noro God-are örire uavarueje: Jaehu mu vaejahuo'i mae uvanëhi Kerisohu ëhi vaejahuadoho iae mae-ëjo. Iae mae-ë uavaruohuro ëhuro God-are ihoho börömeje.

21 Röhu no jemë'o gemu mae baejavuoromo Keriso'o gemuore ioro'ioremu bimuvavuoromo hesi mure bamavuade aho iae God-je.

22 Huro no hesinö ioro'ioremu baejavuoromo hesi Aru'ahoho nosi dë vövöbajo'ere bojamuijë'eje noro uvoröhego: Hu aevoromo hesi Aru'ahoho suvuore bojamuijë'ëro ëhu'ëro hesi suvuoro vituohu'o ijönö iae bojamui'ajëjo. God-ro ëhi ioro'ioremu ajamuijë'eje. Ëhi jië'ëro na'o bogo jöho huotohuotovoromo jövajeje. Amo bogo ëhunioho ö'i uëvodoho vuonugo'i hijodeje.

23 A'i ave jöho God-ro ge'ego na mae jöve. Naehu Corinth amore ö'ië'oromo vuonugode hesi bëhoho naro ö'oromo i'ue bojëmego baejöëni ëhuni bogo ö'odeje.

<sup>24</sup> Iae na i'u bojëmi'irode jöho uëve röhu nosi mu hesi bëhoho bogo masi-joho riravoromo jemesi öriroho darugo'e jöhuremu bojëmiromo uë'iröhëro: Èhi èhi God mae uehorovohëjo. A'i no jemë'o havoromo ajëmijarue ae javue jemë dë sasohëvonövoröhego ë hesi bëhoho jemë iae eni biririvoromo God mae uehorovarujego.

## 2

<sup>1</sup> Amo ö'ië'oromo vuonugo'i hijode hesi bëhoho naro nasi uvodeje: Na bogo röhu maho ö'oromo i'uoho huë vavaenoho bojëmi'ejöjo.

<sup>2</sup> Na jemesi örire i'u huë vavaeni bojëmijë'o ho rahumëro na huë maho bojëmi'ë'ö. Jemëremu huë maho bojëmi'ibejarijoho röhu huë vavaene jëvo'ibejo aho bogo huë maho bojëmi'ibejarije.

<sup>3</sup> Na bogo vejö'oho ö'irögoro a'i urimo jemëhu avo'avoho uehorovo'irarije jögoru jajivoromo nugö'öjode hesi bëhoho na bijönegadeje ö'oromo jemesi mu sisë garomo huë vavaeni bae'irodoho. Jemesi jöëni huë maemu baejë'oho iae maeje. Èhuni huë vavaeni jemesi jöëni baejë'oho na bijönegamu suri surioho jajivodeje. Èhesi bëhoho naro jemë ae aho'obëhe mae uehorovëvoromo uvodeje: Jemë'o na'o mu mae gemuoho nimo avohoromo èhuro huë mae baejarue höjo.

<sup>4</sup> Röhu na jajivodevare huë vavaene böröme baejë'i nurunurumë'i sisë maro nivë'i jemesi örire jajivodeje bogo èhuro jemë huë vavaenoho bae'i a'i ga'irarijeho naro jemesi örire uehorovëvo avohaje jevego. Iae èhuni jajivodeje.

*Mu sisë vaejade a hesi sisë Corinth ariböviehu uehorovoromo vuonugo'iröhego Paul-hu uëvade jöhoje.*

<sup>5</sup> Röhu huë vavaene nasi örire barovade aho hu bogo nasi öriroho ë'i a'i ekaresiae ae aho'o jemesi örire ma-bisemu huë vavaene barovanovadeje. I'u jö uë'irodoho na bijönege.

<sup>6</sup> Jemë ae aho'o ë a i'u bojamarijoho iae eni jië'eje.

<sup>7</sup> I'uoho mino'e bojami'i hesi sisë uehorovoromo vuonugoromo ma-ajamiromo biririvo'iröhe jö ma-sanu'oho majahire. Jemë bogo èhi ë'l'ë'oho nani hu huë vavaene böröme bae'iramu jövëro ruomoromo taemanovo'ë'e.

<sup>8</sup> Èhuni na nege jemëhu hu huë baejarujoho röjahi avohego hu garöhego.

<sup>9</sup> Rabëni na urimo jöho ave hesi bëhohuni jajivodeje gë'irodëro jemë nasi jöho aho'o ejehë'e jëvego o bogo.

<sup>10</sup> Ae rahuare sisë jemëhu uehorovoromo vuonugë'oho na'o gemuoho ë'ajeje. Mu sisë rabe na uehorovoromo vuonugodoho mu sisë uehorovoromo vuonugo'irode jië'oho Keriso-are nuniro namiromo jemesi jöëni na uehorovoromo vuonugë'e jeve

<sup>11</sup> Satan-ro sareramuiromo baejavuojöëni iae no hesi sareri sareri'e muoho mami'e gavaruëro jië'ëro.

*Paul-hu Troas amore hiromo nurunurumade jöhoje.*

<sup>12</sup> Röhu naro Troas amore va'odeje Keriso-are jö maho majëhi'irodëni. Va'oromo gavodeje Badaro nasi mu öroho mabëhe jiovehë'e jiamu.

<sup>13</sup> Èhi jiamu ga'irögoro röhu gavode nasi öho Titus jemesirire ö'adoho bogo rovë'e jiamu gagorovo uehore böröme baejodeje. Uehore böröme baeromo amo rajoho jejëmiromo rëmo va'odeje Macedonia sa'are va'ië'ëro.

*No Keriso-are gemuore javuë'ëro mu sisë huë vavaene ruahö'öjarue jöhoje.*

<sup>14</sup> Röhu no God mabêhe ua'ejo. Rabëni Kerisoro mu sisë'o no'o ru-ahö'öjavuë'ëro jië'ëro ëhu'ëro God-ro uvajeje no Keriso'o gemu mae javuajë uvoromo sôjavuo ujuoho va'ego nimorohë'i jijiharueje. Ëhi'oromo huro Keriso-are jôho no bojamuijê'ëro noro ae majêhibe va'ego ridi mabêhëro rumorovanovobe va'ajeje. Rumorovanovobe va'ego aëro heruomajeje God ëhi jië'e ae jiajoho.

<sup>15</sup> Noro Keriso-are jôho ëhi baeromo jijihago God-ro uvajeje: Ëho Kerisoro nasi örire ridi'e suvuore bojemijanovajë uvoromo vuëvajeje. Vuëvego no Keriso-are jôho ridi manö'e baeromo va'ego mare va'iröhe o sisëre va'iröhe ariböviohuro heruomajeje.

<sup>16</sup> Sisëre va'iröhe ariböviohuro Keriso-are jôho bogo ejahego ë jöhuro ridi sisënö'e ridëmego sisërëjêvo hesije. A'i mare va'iröhe ariböviohuro heromo ejahego jöhuro ridi maëro i'ovëvanovego ehuro maro raromo hesi jêve. Asë'e ëhi jië'e mu bôrömo vae'iröhoho rahuo eni javue.

<sup>17</sup> Ae göehu göehu aho'obêhe ë'aruëhioho no bogo ehioho sarerëmiromo uëvarueje: No eni javuajëjo. Ëhi jië'e ariböviohuro ijo bajemu uehorovoromo God-are jôho sareri sareri'oho majêhibe jijiharueje. Iae ehuni uvarueje: No eni javuajëjo. Röhu no bogo ehioho ë'i a'i uhohu'o maemu javuego God-ro uövuë'ëro Kerisohu nimaje muohemu vaeromo God-are nuniro atarueje.

### 3

#### *Paul-mëhu God-are jögoru i'o hesi mu vaejarue jöhoje.*

<sup>1</sup> Ëjöho garomo nani jemëro ëma uvo'a'aruje: Paul-ro hesi arijo'ëro hesi ihohu'o hesi aribövi jabesi ihohu'o mami'e nigemadoho röhu maho ëma nigemoromo ë'ajëjo noro uvoröhego: Paul-më God-are mu vae'iröhoho eni jëvajëjo. O ëma uvo'a'aruje: A ioro'iorehu nimaruëhi Paul-mëro nimaruëjo jabesi mu eni jiaje jôho ae göëro jajivego no suroho garomo uvoröhego: Paul-më eni jëvajëjo. O noro Paul-mesi jôho jajivego a ioro'iorohuro suroho garomo uvoruomoröhego: Paul-më eni jëvajëjo. Nani ëhi uvo'a'aruje röhu nomë bogo ëhi jië'e suri surioho nimö.

<sup>2</sup> Ëhi jië'e suri suriohu'o röromo iae jemë jêve. Kerisoro jemesi ihoho nosi dë vövöbajo'ere jajivahuë'ëro ëhu'ëro no jemesi örire bôrömo mae uehorovëvarueje. Bôrömo mae uehorovëvaruëro javuë'ëro ehuni uvarueje: Nosi mu eni jiaje jö jajivë'e suroho bogo naguajëjo aëro adaho garomo uvoröhego: Paul-më mu mae vaejarue höjo. Ae aho'o suroho bogo adaho ga'i a'i jemesi muohuremu garomo uvoruomo'ë'e: Corinth ariböviehu mu mae vaejarue hesi bëhoho Paul-mëro eni ajëmijê'ëro ëhu'ëro ë'aruëjo. Ëhuni Paul-mesi muoho iae eni jiajëjo.

<sup>3</sup> Iae ae aho'obêhe gavö jemë Kerisohu jajivade suri surire jôho va'ëne jëvo'ego. Ëjöho noro bö'areje. Röhu Keriso jôho bogo barigoho jajivo'i a'i God darugo bojamuaje a hesi Aru'ahohuro ehuro jajivë'eje. O Moses-hu God-are jögoru munë hitahi döre jajivadëhioho bogo ehioho rori'oho munë döroho jajivo'i a'i jemesi dë vövöbajo'ere jajivë'eje.

<sup>4</sup> Noro ëhi ajëmijê'ëro Keriso-are mu jemesirire jiajohuni ehuni God-are nunire riravoromo Keriso-are jöëni biririvoromo uehorovoromo uvarueje: Jemë noehu mu vaejarue suri ma va'ëne jëvajëjo.

<sup>5</sup> Bogo nosi simanohuro darugohuro God-are mu vae'iröhoho no eni javuo'i a'i hesi God-ro avohavuë'ëro ehuro eni javue.

<sup>6</sup> Huro no avohavuël'ëro ëhu'ëro no hesi jögoru i'o hesi öroho avoho röjëhi'iröhoho no eni javue. Ëjögöru i'oho bogo jajivë'e jögöroho jio'i a'i God-are Aru'ahëhu bojamuajë jögörohoje. Jajivë'e jögöroho ahoromo vuovarueje. A'i Aru'ahöhuro i'ovavuaajeje.

<sup>7</sup> Munë hitahire sehoromo jajivë'e jögöru ë hesi muoho rovego aëro ë jöho ahoromo vuovajeje röhu ë jögöru barovade majare evare God-are aji böröme a nunire rovadeje. Rueromo vuorövobe va'adeje röhu Israel rajoho Moses-are nu ano'o hesi ajoho bogo ga avoho'i ma-ga burutimoromadajeje.

<sup>8</sup> Ëhuni biririvoromo uvo'a'anue: God-are Aru'aho hesi muoho rovë'ëro ëhu'ëro ë mu hesi ajöhuro aji mamioho iosiramioromo bogo bise'o vadu'oho ruenövo'ajëjo.

<sup>9</sup> Jögöru mami hesi muoho rovego aëro heromo ë jöho ahoromo jö sisë God-are nunire baejarueje. Röhu ë hesi muoho aji'e jiadeje. Ëhuni biririvoromo uvo'a'anue: Jögöru i'o hesi muoho rovego aëro ë jöho ejego jabesi jö sisëho barëjëhjäjäro jië'ëro ë mu hesi ajöhuro mu mami hesi ajoho iosiramioromo bövi mae höjo.

<sup>10</sup> Aji mamioho börömo ajivadoho jaruvoho bogojianove aji i'öhuro rueromo börömo mae ajivoromo ruahö'öjë'ëro.

<sup>11</sup> Vuorövobe va'oröhe muoho iae aji'e jiadeje. Ëhuni biririvoromo uvo'a'anue: Ioro'ioremu jioröhe mu hesi ajoho börömo mae höjo.

<sup>12</sup> Mu i'ehu ioro'iore gemu jioröhego dë sasohoromo uvaruohuni ëhuni no biririvo avohoromo jöho ma-samae majëhijarueje.

<sup>13</sup> Samae majëhiromu Moses-hu hesi aji gurihijadëhioho no bogo ëhioho nosi aji'e jöho gurihijarueje. Ëhesi bëhoho Moses-ro hesi nu ano'oho niögëro riogivorovoromo gurihijadeje Israel rajoho jaburo bogo muebe'öromu garöhego ajoho vuorövo va'oromo barëjego.

<sup>14</sup> Röhu Israel rajoho hia'i biririrosi jabesi simanoho sisëjëhädajeje. Jaruvohu'o ëhi gemuohojë. Jögöru mami adahamu hejë'iroho Moses-hu hesi nu ano'o hesi aji riogivorovadëhi jabesi uehoroho ëhi riogivorovobe rovë'ejö. Ëhesi bëhoho jabumë Keriso bogo ma uehorovarueje röhu huro gemuëro riogivahuajoho jiovahuajeje.

<sup>15</sup> Io'o. Jaruvohu'o Moses-are jögöru adahë'iroho jabesi uehoroho riogivë'e maeje.

<sup>16</sup> Röhu jabumë ae rahu huotorovoromo Bada mae uehorovë'iroho evare uehoro riogivëhadoho iae jiovëho'ë'e.

<sup>17</sup> Röhu Bada hesi bëhoho God-are Aru'ahoho uave. Badare Aru'ahëhu dinö'e dinö'e jië'iroho öri mare jijihö'iröhoho iae jiovahuë'eje.

<sup>18</sup> Ëhu'ëro jië'ëro no Christian ae aho'obëhe nosi nu ano'oho bogo riogivahuë'ëro majaehu aririre bijiohego gavaruëhi ëhi Badare ajoho aririrosi gavanovoromo ëho uehorovo avohoromo gorosovoromo hu jiajëhi ëhi javuobe hesi ajoho gö'o gö'o baebe va'arueje. Badaro ëhi ajivavuaajeje. Bada hesi bëhoho God-are Aru'ahoho uaromo ë'e.

## 4

*Aji mu mabëhe baejë'ëro ëhuni Paul-mëhu biririvoromo mu vaejare jöhoje.*

<sup>1</sup> Ëhi jië'e aji'e muoho God-ro noni vavaenimoromo bojamuijë'eje. Ëhuni bogo u'uhoromo vuonugo hesi javue.

<sup>2</sup> Gurihijë'e javoji'e mu sisëho bijönaguego bogo vaejarueje. Sareri'e muoho bogo vaeromo God-are jöho huotuhuotovoromo majëhijarueje. A'i God-are jö maho sama'e huruoho majëhiromu hesi nunire riravoromo

mue vaeromo nosi arijo'arije ae aho'obëhe røjahirovarueje jabesi uhure uehorovoromo uvojöro: No ma-mae javuajëjo.

<sup>3</sup> Keriso-are jö maho noro iae sama'e majëhijarueje röhu ë jö hesi bëhi tugohëhë'o ho sisëre va'iröhe aribövi jabesi örohemo tugohëhë'eje.

<sup>4</sup> Ëhesi bëhoho Keriso bogo ma uehorovarue aribövioho ave sa'a hesi börömhuro jabesi uehoroho tugohëhë'eje jö ma hesi ajohuro ajivëvego Keriso-are ajoho garuomöjöni Keriso hu God jiajëhi ëhi jië'ego.

<sup>5</sup> Bogo nosi jöho majëhi'i a'i ae majëhiromo uëvarueje: Iesu Keriso hu Bada höjo. Nomë Iesuare jöeni jemesi mu vaejëharue aribövie javuajëjo.

<sup>6</sup> Keriso-are jö majëhijarue hesi bëhoho ni'i'ivadiroho God-ro uvade höjo: Ramoramoho ajivëjo. Ëhi uvade ahuro nosi dë vövöbajo'o ho ajivavuadeje noro hesi aji mahemu Keriso-are nu ano'ere garuomörohego.

*Paul-mesi sino haho'e u'uhëvadeje. Huë vavaene baejareje röhu God mae uehorovë'ero birivoromo mue vaejareje. Ëhesi jöhoje.*

<sup>7</sup> ËGod-are aji maho nosirire u'uhë'e rama gagore jianovajeje ëhuro noro garöhego daruge aho'o bogo nosirehu jio'i hesi God-are örire jioromo rovego.

<sup>8</sup> Majae ëhi huë vavaene böröme bae'i arijarueje. Röhu bogo ijumavuo barëjë'eje. Öre nahoromo uehore gö gö bae'i arijarueje. Röhu öroho iae birohharueje.

<sup>9</sup> Ae aho'obëhe sisë vaejavuoruomajeje. Röhu God bogo vuororamuijë'eje. Aëro anaguo'i arijarueje. Röhu bogo ma anaguë'eje.

<sup>10</sup> Iesuhu vi'ehi baeromo guomadëhi majae ëhi no'o sa'a sinore ëhi vi'ehi baeromo vuovo'ië'obe va'arueje God-ro nimë'ero noro garöhego Iesuare darugoho nosi sinore jiego.

<sup>11</sup> Majae ëhi ave sa'are raromaruevare evare Iesuare jöeni vuovo'iröhëro raromarueje God-ro nimë'ero noro garöhego Iesuare darugoho nosi sa'a sinore jiego.

<sup>12</sup> Ëhu'ero jië'ero noehu Keriso-are jö majëhijaruoho vuovo öriro muoho vae'i a'i jemë ë jöho heromo i'ovo örire jëvajeje.

<sup>13</sup> Röhu God-are surire jajivoromo uövuë'eje: Na mae uehorovode höjo. Ëhuni jöho jövode höjo. Ëaehu jajivadëhi no'o ëhi gemuoho mae uehorovë'e raromarueje. Mae uehorovoromo ëhuni jöho atarueje.

<sup>14</sup> Atarue hesi bëhoho no garomo uvarueje: Bada Iesu ajamamu ri'öjade aho God-ro no'o ëhi ajamui'iramu ri'ö'ejarëjo Iesu'o gemu mae javuë'ero. Ri'ö'iramu jemë'o gemu mae hesirire söjavuo va'a'ajëjo.

<sup>15</sup> Ëmuoho aho'obëhe nosirire rovaje hesi bëhoho ëhuro God-ro ae aho'o huë baeromo ajëmiromo dë vövöbajo'e huotovëhobe va'ego ae aho'o hu rajahi avohego hesi ihoho dö maro jioröhego.

<sup>16</sup> Ëhuni no bogo u'uhoromo muoho vuonugo hesi javue. Nosi sino haho'o ho sisërejavuobe va'irögoro a'i nosi aru'ahoho majae ëhi i'ovavuobe va'ajeje.

<sup>17</sup> Nosi huë vavaenoho ma-bisemu baeromo ma-burëro barë'iröhoho jio'i röhu ë huë vavaenohuro ëhuro ijönö aji ma-mabëhe ioro'ioremu bae'ejo. Huë vavaenoho ma-bisë'ego bogo uehorovo'ejo. A'i ajoho börömo mae jio'ë'e.

<sup>18</sup> Nunehu ga'amaruoho bogo nuroho vae'i a'i nunehu bogo ga'amaruoho nuro vaejë'e raromarueje rabëni hesi bëhoho nunehu ga'amaruoho ëho majae ma-bunemu jioromo barë'i a'i bogo ga'amaruoho ëho jiemu jio hesi jië'ego.

## 5

*Vuovavuë'oho no maro raromo'iröhe jöhoje.*

<sup>1</sup> Iae no garomo uvarueje: Nosi sa'a sinoho ma-jahuri raromarue javu va'ënoho ëho sisërë barëjë'oho God-hu nugahuade javu maho nosi jio'a'ajëjo. Bogo aho övoho avoho'i hesi God-ro bamahuë'e höjo noro ëho baeromo ö'idöre ioro'ioremu raromo'iröhego.

<sup>2</sup> Avevejö'oho vavaenimoromo hara'uë'i muebejarueje ö'idöre jiaje javuoho baeromo ëhuro niögunö'e aegorovo'iröhëni.

<sup>3</sup> Niögunö'e aegorovë'oho bogo niögu rumo'oho ëma raromo jiji-hanovo'ejo.

<sup>4</sup> Sa'are ma-jahuri raromarue nosi javuore raromaruevare evare vavaenimo avohoromo hara'uarueje. No vavaenaguaje hesi bëhoho bogo niögu mamioho boremi'ö'i nagujohunioho bogo ëhunioho vavaenimo'i a'i God-hu bojamui'iröhe niögu i'ohuro döre aegorovego ëhuro raromemu raromo'iröhe muohuro sisërëjavuobe va'aje muoho ruahö'öjego barë'i i'e javuoröhego. Ëhuni vavaenimarueje.

<sup>5</sup> Röhu hesi God-ro no avohavuadeje noro ëhi i'e baeröhego. Avohavuoromo hesi Aru'aho maho suvuore bojamuijë'eje noro uvoröhego: Iae mae-ëjo. Hesi Aru'aho bojamuijadëhi suvuro vituoho ëhi bojamui'iramu ma-mabëhe bae'ëjarëjo.

<sup>6</sup> Ëhuni majae ëhi no dë sasohoromo biririvarueje. Rabëni no gavaruoho nosi sino haho'ere raromaruoho ëhuro Bada'o gemuoroho bogo raromarueje.

<sup>7</sup> Bada mae uehorovoromo raromo jijiharuoho bogo hu garomo ëhioho ë'arueje.

<sup>8</sup> Amo noro dë sasohoromo biririvarueje. Dë sasohoromo biririvë'i uvarueje: Nosi sinoroho bogo raromo'i Bada'o gemu mae raromë'oho ëho iae maho höjo.

<sup>9</sup> Röhu no sinore raromë'oho o bogo raromë'oho ëho bogo uehorovo'i a'i nosi uehoroho ë gemu bamarueje noro muoho avoho vaejego Badaro göromo nimorohoröhego.

<sup>10</sup> Huhu nimorohoröhego vaejarue hesi bëhoho no ae aho'obëhe Kerisore nunire riravo'ejo no ae gemu gemu sinehu raromoromo mu mae o sisë vaejarue ëhi jië'e manaho baebe va'iröhëni.

*Kerisohu no buore vaejavuoromo God-are gemuore bamavuade jö Paul-mëhu a majëhinövare jöhoje.*

<sup>11</sup> Hesi nunire riravo'iröhohuni ëhuni Bada juhuonamiromo a jabesi simanoho huotovëho gavarueje jaburo hu mae uehorovoröhego. No ëhi mae ë'aruoho God-ro no gö barëjë'eje. Röhu na uehorovoromo uve: Nani jemë'o jemesi dë vövöbajo'ëro ma-va'orahoro gövuaruje höjo. Ëhi jië'oho iae na nege.

<sup>12</sup> Noehu mae ë'lego God-hu gövuaje jöho uëve röhu nadi uvore: Paul hesi arijo'ëro hesi ihohu'o hesi aribövi jabesi ihohu'o mami'e nigemadoho röhu maho ëma nigemoromo ë'ajëjo noro uvoröhego: God-are mu vae'iröhoho eni jëvajëjo. A'i ë jöho jajivode hesi bëhoho ëhuro jemë nosi jöëni nimoroho'irarijego. Nimorohoromo he'irarije aehu nosi jö sisë atoruumamu hejë'oho jö mana uë'irarijoho jemesi örire jioröhego. Nosi jö sisë atoruumaje aribövioho dë vövöbajo'oho bogo nimorohë'e ato'i a'i ma-sinoremu nimorohë'i atoromo nosi jö sisëho atoruumajeje.

<sup>13</sup> Aehu uvaruoho: Paul-mëro simane sisërëromo muoho vaejarue hö uvaruoho no God-ni ëhi jië'e muoho vaejarueje. O simano mae javuego mu vaejaruoho ëho jemesi jöëni ëhioho vaejarueje.

<sup>14</sup> Ëhesi bëhoho Kerisoro no dë vövöbajo'e aho'o uehorovavuajeje. Ëhuremu no uehorovoromo bogo nosi jöënioho a'i God-are o aribövi jemesi jöëni uehorovoromo muoho vaejarueje. Iae no uehorovoromo uvarueje: Ae gemuëro ae aho'obëhëni guomade höjo. Urimo ae aho'obëhe no mu sisëmu uehorovaroho röhu Kerisohu guomadohuro ëhuro ae aho'obëhe no'o ëhi vuovavuanovamu nosi mu sisëho barëjahuë'e höjo.

<sup>15</sup> Kerisohu ae aho'obëhëni guomade hesi bëhoho no ave sa'are raromarue ariböviohuro ijönöho bogo nosi sinemuoho uehorovoromo raromo jijihoi noni guomoromo ri'öjade aho uehorovoromo raromo jijihoi'iröhego. Iae ëhuni hu guomade höjo.

<sup>16</sup> Ëhi jië'ëro aehu uehorovaruëhioho no ijönöho bogo ëhioho uehorovoromo uvo'ejo: Ëaho mae o sisë höjo. Urimoho aehu jabesi mauehorovaruëhi no'o ëhi uehorovoromo uvonövareje: Iae Keriso ëhi ëhi jië'e ae höjo. Röhu jaruvoho no bogo ëhioho uehorovarueje.

<sup>17</sup> Ëhu'ëro jië'ëro ae rahu Keriso-are ae gemuoho javuë'oho no i'e javua-jeje. Mu mamioho barëjahuoi mu i'e rovë'eje.

<sup>18</sup> Ëmuoho aho'obëhe hesi God-ro avohahuadeje. Huro Keriso nugö'öromo ëhuro buore vaejavuoromo hu'o no'o aevoromo maro raromareje. O mue bojamuadeje buore vaejavuade jöho majëhijego aëro heromo ejahoruomöhego.

<sup>19</sup> Jöho aviëhije. God-ro Keriso-are dë vövöbajo'o uhure jioromo mue ajamiromo ëhuro ae aho'obëhe nosi sisë hesi i'uoho bogo uehorovahuoi buore vaejavuade höjo. Buore vaejavuoromo buore vaejavuade jöho bojamuade höjo noro majëhibe jijihoröhego.

<sup>20</sup> Ëhu'ëro jië'ëro no Keriso'o röromo jö majëhijarue aribövie javuë'ego God-ro jöho bojamuiromo uövuego no ae dinëmarueje. Keriso-are jöëni ae uëvarueje: Buore vaejavuade jöho eromo God'o gemuoro huë mae raromohëjo.

<sup>21</sup> Keriso hu mu sisëho bogojiadeje. Röhu God-ro nosi sisëho hesi örire bojamamu baejadeje ëhuro no Keriso-are ae gemuohuro javuë'ëro God-ro nosi ihoho avohavuego hesi nunire ma-mae riravoröhego.

## 6

<sup>1</sup> No God'o gemu mae mue vaejaruëro javuë'ëro no naguaje jöho jemesi örire majëhi'irögoro ë'ö jemëro ëhi ë'irarijego. God-hu huë baeromo bojëmade jö maho mu maho nadi ëma baeromo boremi'ö'i ma-avoho ma'enore.

<sup>2</sup> God-are surire jöho jajivoromo ëhi uvë'eje: God naehu huë baejëvo'irode majaho rovamu evare na jemesi jöho ejëhode höjo.

Jemë maro bamëvo'irode majaho rovamu evare na ajëmijode höjo.

God-ro ëhi majahuijadeje. Röhu ë hesi bëhoho gare. God-hu huë baejëvo'i uvade majaho jaruvoje. Maro bamëvo'i uvade majaho jaruvoje.

<sup>3</sup> Paul na'o nasi ariböviohu'o noehu God-are mu vaejaruoho ë muoho iho sisë hö uvë'oho no bijönague. Ëhuni nosi muoho bogo sisë'ioho vaejarueje aëro ëho garomo sisë'i uehorovoromo rireromajöëni.

<sup>4</sup> A'i God-are mu vaejarue ariböviehu ë'aruëhi ëhi mue aho'o a nunire avoho vaejarueje. Huë vavaene mu sisë gö gö rovë'o ho biririvo avohoromo riravarueje.

<sup>5</sup> Aehu hisuebijavuë'o ho savoji gagore io'amavuë'o ho muorovamui'i juhijavuë'o ho ma-biririvarueje. Noehu i'u'e mu vaejë'o ho röho dere bogo momorö'öjë'o ho i bogo ue'ahë'o ho ma-biririvarueje.

<sup>6</sup> Biririvoromo mu mahemu uehorovoromo Keriso-are jöho mae garomo a jabesi mu sisëho ma-ga taemoromo ae huë baejëvoromo God-are Aru'ahoho baeromo ae dë vövöbajo'e aho'o uehorovëvoromo

<sup>7</sup> God-are jö maho majëhiromo hesi darugoho röjëhijarueje. Ëhi'oromo God-are mu vaejarue ariböviehu ë'aruëhi no ëhi a nunire mae vaejarueje. Mu mae vaeromo ëhuro Satan-hu no'o muorovë'o ho övo göhuro tugohë'i övo göhuro mana muorovamijarueje.

<sup>8</sup> Aëro rajahuinövo sivaguonövarueje. Nosi ihoho ba'obuenövo ba'ojiomonövarueje. Aëro ma-uvarueje: Paul-më sareri'e aribövie jëvajëjo röhu ma-jö maemu atarueje.

<sup>9</sup> Aëro uvarueje: Paul-më iho rumo'e aribövie jëvajëjo röhu ae aho'obëhe nosi ihoho iae heruomajeje. Aëro uvarueje: Vuovëvo'ië'ajëjo röhu bogo vuovo'i iae biririvoromo raromarueje. Aëro uvarueje: Sisëni i'uoho baejarue höjo röhu bogo vuovavuaajeje.

<sup>10</sup> Aëro uvarueje: Huë vavaene baejarue höjo röhu majae ëhi nimoroharueje. Aëro uvarueje: Bövi bise'o rumo'e jëvajëjo röhu noro ae aho'o ajëmijego Keriso-are bövi bise'o maho baejarueje. Aëro uvarueje: Rabe rabe bogojëvajëjo röhu bövie bise'e aho'o nosi örire eni jïë'eje.

<sup>11</sup> Corinth amo rajomë nosi simanore dë vövöbajo'ere jöho ma-sama'e huruoho majëhijë'e javue. Nosi dë vövöbajo'e aho'o jemesi örire bojëmijë'e javue.

<sup>12</sup> No jemesi öriroho bogo uehorovëvoromo vuonugë'e jemëro nosi örire uehorovavuoromo vuonugavuanovë'e jëve.

<sup>13</sup> Vavuehu aboji harihu'e jö majëhijaruëhi ëhi naro jemë uëve: Jemëro mana ëhi dë vövöbajo'e aho'o nosi öroro bojamuirëjo.

*Christian ariböviehu God rumo'e aribövi jabesi uehoro bogo baeromo jabu'o bimuvorovo'iröhe jöhoje.*

<sup>14</sup> God bogo ma uehorovarue ariböviohu'o gemuoroho nadi bimuvoromo uehore gemuoho baere. Jabesiroho hahagu jio'i jemesiroho hahaguje. Na mu mahu'o mu sisëhu'o mu gemuohoje o hahagu hahaguje. Hesi hahagu hahaguje. Na ajohu'o ramoramohu'o gemuohoje o hahagu hahaguje. Hesi hahagu hahaguje.

<sup>15</sup> Na Keriso'o Satan'o jöe gemuoho uehorovarueje o hahagu hahagu uehorovarueje. Hesi hahagu hahagu uehorovarueje. Na God mae uehorovarue ariböviohu'o God bogo ma uehorovarue ariböviohu'o jöe gemuoho uehorovarueje o hahagu hahagu uehorovarueje. Hesi hahagu hahagu uehorovarueje.

<sup>16</sup> Na God-are osa börömo hu'o sareri'e vörö'e inömo hu'o gemuohoje o hahagu hahaguje. Hesi hahagu hahaguje. Röhu no God darugo'o hijaje a hesi osa börömo hu'o va'ëne javue. Ëhesi bëhoho God-are surire jöho ëhi uvë'eje:

God naro jabesirire hiromo jabu'o juvo'ejöjo.

Na jabesi Börömo hu'o jevo'i jabumë nasi aribövie jioruomö'ajëjo.



17 Ĕhuni Badaro uvajęjo: Jemęro jabumę goręvoromo jemesi hahagu raro-mohęjo.

Sisęho nadi gavanovohęjo.

Ĕhi ę'ę'oho naro jemę rajęhiromomo baejęvo'ęjęjo.

18 Baejęvo'iramu na jemesi Vavue jevo'i jemę nasi aboji harihu'e jęvo'ajęjo. Bada mu bęvi bise'oni jię'e ahuro ęhi uęvajęjo.

## 7

1 Nasi ę mueno'e God-hu ęhi mae vaejavuoröhęni uęvuadohuni ęhuni mu sisę aho'obęhe vae'amęgo ęhuro sino haho'oni dę vęvębajo'oni sisęrejvauajoho ę'ęgo no ęho goro'i God gemu bęręmoho hę uehorovoromo mu mae gemu vaeromo avoho raromoni'iro.

*Corinth ekaresiaehu mu mae vaejamu Paul-hu heromo nimorohade jęhoje.*

2 Jemesi dę vęvębajo'e aho'oni nosi ęroro bojamuire. Nomę aho bogo sisę'ioho vaejęvę'e javue. Aho bogo ijumęvę'e javue. Jemesi bęvioho bise'oho bogo sarerisarerięmiromomo ujuohęhę'e javue.

3 Ĕjęho na bogo uęromoni ę'e: Jemę a sisę jęvajęjo. Na mami'e uęvodeje: Jemę nosi dę vęvębajo'ere jęvajęjo ęhuro no biririvoromo raromę'oho o vuovavuę'oho jemę'oni no'oni gemuoro javuoręhego.

4 Na jemesi ęrire mae uehorovęvo avohajeje. Jemesi jęęni sisę maro nimoroheve. Iae no huę vavaene aho'oni javue ręhu na herove nasi dę vęvębajo'ere huę sanue rue avohoromo sasohevo'ęgo.

5 Iae no Macedonia sa'are rueromoni uvareje: Nosi dę vęvębajo'oho sanuovavuo'ajęjo ręhu bogo. A'i huę vavaene aho'oni nosi ęrire ruenęvohijo. Gahijo anaguo biraguo'e vae'i ari'ęgo. Nosi uhure juhuone rojomohijo.

6 Ręhu God-hu huę vavaeni sanuamuijaje ahuro jię'ęro Titus nugę'ęjamu rovadohuro ęhuro no sanuamuamoni biririvavuadeje.

7 Ręhu bogo huhu rueromoni sanuamuijadohuremu jio'i a'i Titus-hu jemesi ęrire huę sanu baejade jęho no hejamu ęhuro God-ro nosi dęho sanuamuijadeje. Huro rueromoni uęvuadeje: Corinth aribęviohuro nęrę ga'i nimohijajo. Jabesi sisęni vavaenimohijajo. Nęruare ęrire ajami'i nimohijajo. Iae ęhuni aveveję'oho na nimorohevo avohe.

8 Naro urimę'i uru'ę jęho jajivoromoni nugę'ęjamu jemęro garomoni huę vavaene baejarijeje. Iae ęhi ę'odeje ręhu na bogo uehore gę baeromoni uvajeje: Uru'ę jęho rabęni jajivode hęjo. Ręhu urimoni na uvodeje: Na rabęni jajivode hęjo. Na gavajoho jemę huę vavaeni baejarijoho ęho majae ma-bisemuni baeromoni baręjadeje. Ĕhi jię ręhu iae baejarijeje.

9 A'i jaruvo na ję jajivodoho dę mae jeve bogo vavaeni bojęmijodohuni a'i jemęhu vavaeni baeromoni ęhuni huotorovoromoni avoho uehorovarijohuni. God-hu nimaje ęhi jię'e vavaenoho baejarijeje. No bogo ęhuro jemę sisę vaejęvareje.

10 Ae rahu God-hu nimaje ęhi jię'e vavaeni baeję'ohuro ęhuro ja huotorovoromoni avoho uehorovoromoni maro hi'a'anue. Avoho uehorovoromoni avoho hiję'oho bogo ę hesi jęęnioho vavaenimoni'anue. A'i sinemuni uehorovoromoni vavaeni baeję'ohuro ęhuro ma-guomoni'anue.

11 Ręhu gare. God-hu nimaje ęhi jię'e vavaeni baejarijohuro ęhuro ave mu maho rovadeje. Jemesirire jiade mu sisę ma-nunęremuni gavarijoho vuonugoromoni aho'i uehorovarijeje. ęvo uno'e ma-maemuni jęvajoho ręjehi'i nimarijeje. Mu sisęhuni dę vęręnęgadeje. Ĕhesi i'uohuni juhuonivarijeje. Nasi jęęni vavaenimarijeje. Muoho avohoni nimarijeje. Sisę vaejade aho

i'ue mana bojami'i nimarijeje. Iae no gavö jemë ë mu sisë avoharijoho mabëhe jio'ego.

<sup>12</sup> Èhu'ëro jië'ëro iae na uru'ö jöho jemëni jajivodeje röhu na mu sisë vaejade aho bogo uehorovoromo sisë baejade aho bogo uehorovoromo jajivo'i a'i naehu jajivode hesi bëhoho jemëro God-are nunire riravoromo garomo uvo'irarijego: Iae no Paul-mesi jöëni uehorovo avoharue höjo.

<sup>13</sup> Jemëhu nosi jöëni uehorovarujohuro ëhuro no sanuamuijamu birire baejë'e javue.

Birire baeromo gavare Titus nimorohamu gagorovo no'o nimoroho avohareje ë hesi bëhoho jemë ae aho'o hu ajamamu hesi dë sasohahadohuni.

<sup>14</sup> Èhesi bëhoho urimë'i naro jemesi jöëni nimorohë'i jöe bisemu Titus-are örire majahiromo uavodeje: Corinth aribövioho mu mae vaejarue höjo. Èhi uavamu hegoroovo Titus-ro ö'oromo gavade jemë mu mae vaejamu gagorovo vuonorö'ö rueromo uevadeje: Paul ja Corinth amo rajo jabesi jöho mae uevane höjo. Jaehu uevanëhi Corinth aribövioho ëhi jië'e mu maho vaejamu gëvode höjo. Èhi uevamu hegoroovo na javojoho bogo bae'i mae jevadeje. Noehu Corinth amo rajo jemesi örire jöe aho'o ma-maemu majëhinövarëhi ëhi Titus-are örire jö mae majahijareje.

<sup>15</sup> O Titus-ro jemesi örire dë vövöbajo'e aho'o uehorovëvajeje. Èhesi bëhoho hu jemë gëromo simanoro vaejë'ëro uvajeje: Naro Corinth amore va'amu amo rajohuro juhuonivoromo butubutumoromo jejemiromo ae aho'obëhe nasi jöho gemu ejehare höjo.

<sup>16</sup> Èhu'ëro jië'ëro na uvajeje: Naehu nimaje muoho ae aho'obëhe jemëro majae ëhi vaejaruje hö uvoromo nimoroheve.

## 8

*Corinth ekaresiaehu rabëni öve sasohoromo bövie bise'e a bojëmi'iröhe hesi jö bëhi Paul-hu jajivadohoje.*

<sup>1</sup> Röhu nosi ö mueno'e no nague Macedonia sa'a rajo ekaresia jabesi jöho jemëro ga'irarijego. Macedonia sa'are ekaresia God-hu huë baeromo ajëmamu jabuhu ë'are jöho no majëhi'ie'ö.

<sup>2</sup> Macedonia ekaresiaho jabumë huë vavaene börömo böröme baeromo sisë'i raromareje. Iae sisë'i raromareje röhu evare majare nimoroho avohareje. Nimorohoromo ëhuro bövie bise'e biseharihe jëvadoho röhu öve sasohëvamu suvuore bogo bise'o vadu'oho God-are örire i'imamijareje.

<sup>3</sup> Jaburo rabe rabe jëvajoho i'imamiromo röhu gö'o döre mamareje. Èhi'amu gëvë'ëro na ë jöho jemë majëhije. Jabesi nimoromo ri'öromo

<sup>4</sup> dinamuiromo uövuareje: Uövuego no jemë'o bimuvoromo God-are aribövie Judea raromaruoho ajëmi'irarëjo. Èhi uövuë'oho huë mae javuo'ajëjo.

<sup>5</sup> Noro uehorovoromo uvareje: Jabumë ma-moniemu i'imamui'ajëjo. Èhi uvareje röhu bogo ëhemuoho ë'areje. A'i urimo jabesi dë vövöbajo'oho Badare örire bojamirovoromo evare God-hu nimajëhi nosi örire bojamirovareje.

<sup>6</sup> Èhi'amu gagorovo noro Titus uavareje huhu jemë'o hiromo mu aevadëhi huro röhu maho ö'oromo ëhi ajëmego jemëro ë huë baejarije mu mabëhoho röhu maho vaeromo barë'irarijego.

<sup>7</sup> Röhu jemë mue aho'obëhe vae avoharujeje. Jemë God mae uehorovo avoharujeje. Jöho mae ato avoharujeje. Simanëro mae ga avoharujeje. Mue bövie bise'e ajamui'i nimo avoharujeje. Nosi örire uehorovavuo

avoharujeje. Ëhuni no nague jemëro ë huë bae'irarije muoho ëhu'o vae avoho'irarijego.

<sup>8</sup> Na bogo darugo'e jögoroho jemesi öriroho bojëmi'i a'i aribövi ioro'iorehu ajëmi'i nimo avohare jöho naro majëhiromo jajivodeje ga'irodëni jemë ma-döhemu ae uehorovëvego o uhohu'o uehorovëvoromo huë baeromo ajëmijego.

<sup>9</sup> Nosi Bada Iesu Kerisohu huë baeromo ajamuade jöho iae jemë'o uehorovarujeje. Hesi örire börömo mae jiadeje röhu jemesi jöëni vuonugoromo rueromo bövi bise'o rumo'e hijadeje ëhuro hu bövi bise'o rumo'ëro jië'ëro ëhu'ëro jemëro aru'aho'e mue bövie bise'e bae avoho'irarijego.

<sup>10</sup> Nasi uehoroho jemë diehi ë'ego marëjëvo'iröhe öroho aviëhije. Vaduni göho jemëro urimo ë suvuoro muoho aevoromo vaejamu a ioro'iorohuro ijönö aevareje. Jemëro urimo ë muoho vae'i nimamu a ioro'iorohuro ijönö nimareje.

<sup>11</sup> Jaruvoho ë mu vituoho vae barëre. Jemëhu mu aevo'i börömo bëhi nimarijëhi ëhi vae barë'i nimo avohore. Nimoromo jemë rabe övore jëvajokho ëho bojamire.

<sup>12</sup> Jemë bojami'i nimoromo övore jëvamu bojamijë'ocho God-ro uvajeje: Ëho suvuoro mae höjo. Övore bogojëvë'ocho God bogo uëvajeje: Bojemihëjo.

<sup>13</sup> Na bogo uve jemëro bövi mae bojëmiromo ëhuro bogo eni jëvego huë vavaeni'e raromego a ioro'iorohuro ma-samae baeromo nimorohoröhego. Na bogo ëhioho nego'irögoro na nege ae aho'obëhe ma-gemuoho jëvoröhego.

<sup>14</sup> Avevejö'ocho jemë moni böröme jëvo'i jabumë bogojëvë'ëro jemëro jabumë ajëmi'aruje. Ëhi jië'ocho ijönöho jabumë moni böröme jëvo'i jemë bogojëvë'iroho jabumëro jemë ajëmi'ë'ö. Ëhi jië'ocho jemë'o jabu'o gemuoho jëvo'ë'e.

<sup>15</sup> God-are surire jöho ëhi gemuoho jajivoromo uvë'eje: Bövie gagovade aho i vituoho bogo rune vaejade höjo. Bisemu gagovade aho hu ie eni jiade höjo.

*Titus o ae gö niö'i Corinth amore va'oromo ajëmiromo suvuore gagovo'iröhe jöhoje.*

<sup>16</sup> No God-are örire huë mae uavö. Rabëni hesi bëhoho huro Titus-are dë vövöbajo'ocho huotovahë'ëro noehu jemë ajëmi'i nimiruëhi Titus'o ëhi ajëmi'i nimajeje.

<sup>17</sup> Nimë'ëro huro jemë ajëmijöro noro ua gavamu hegorovo ejahuadeje. Ejahuoromo röhu ajëmi'i nimo avohamu ëhuni hesi uvadeje jemesirire ö'iröhëni.

<sup>18</sup> Röhu Titus'o gemu mae va'iröhego nosi ö göho nugö'öjö. Ëahuro God-are jö maho ma-mae majëhibe juvajeje. Ëhuni ekaresiae dinö'e dinö'le jio'amajohuro hesi örire rajahiruomajeje.

<sup>19</sup> Röhu gö'o ekaresia ariböviohuro ë aho baerumadeje bövi bise'o bogojië'e aribövi jabesi suvuoroho noro baejëhoromo va'ego evare huro no'o gemu mae ö'oröhego. Ësuvuoro mu hesi bëhoho Badare ihoho mamabëhe jio'i o ae aho'obëhe göröhego nomë huë baejëvo'i naguego.

<sup>20</sup> Huhu Titus'o va'iröhego noehu nugö'öjarue hesi bëhoho aëro uvojöëni: Moni böröme sisë'i muebejarujëjo.

<sup>21</sup> Iae no nague muoho Badare nuniro avoho vaeromo röhu ëhi a nuniro avoho vae'iröhego.

<sup>22</sup> Titus'lo ë ö göhu'lo rëmö'öromo ö göhu'lo nugö'öjö ë ae niö'iohu'lo gemu mae ö'oröhego. Urimë'i ë ahuro Keriso-are muoho ajëmi'i nimo'ego no gabe ruenövareje. Röhu jaruvoho hu börömo bëhe ave muohu'lo jemë ajëmi'i nimajeje jemesi örire mae uehorovëvë'ëro jjië'ëro.

<sup>23</sup> Titus hu na'lo bimuvoromo jemëni mu vaejaje aeje. O nosi ö niö'ioho jabumë ekaresiaehu rëmö'öjare aho jëve. A maëro jëvë'ëro Keriso-are ihoho dö maro ajio jjië'eje.

<sup>24</sup> Èhuni ë ariböviohuro ö'ego jemëro mae rajëhijego jaburo uvo'i: Corinth aribövioho huë baejë'e aribövie jioruomajëjo. Èhu'ëro Paul-mëro jabesi jöho mae nimoronimorohë'i majahuijare höjo. Jabumë ëhi uehorovë'oho ekaresiae aho'obëhe jemesi jöho heromo uvoruomo'ë'ö: Paul-mëro Corinth aribövi jabesi jöho mae atare höjo.

## 9

*Christian ioro'ioro jabesi örire huë baejëvoromo moni bojëmi'iröhe jöhoje.*

<sup>1</sup> God-are aribövi ajëmi'irarije muoho iae jemë gavarujeje röhu na diehi jjië'e jöho jajivoromo majëhijego gare.

<sup>2</sup> Na gëvajeje jemëro ajëmi'i nimego. Èhuni bogo jajivo'ejo. Jemë nimarujoho naro Macedonia sa'a rajo jabesi örire nimorohë'i jövoromo uëbe rovë'e jeve: Greece sa'a rajoho jaburo mami'e vaduni göre aevoromo bövi bise'lo avoharoho ëhi jëvobe rovë'e höjo. Jemesi jöho ëhi uëvamu hegorovo Macedonia sa'a raje ae aho'obëhe uvareje: Corinth ariböviohuro ajëmi'i nimarue uvoromo jabu'lo ri'öromo ajëmi'i nimareje. Èhuni ajëmi'irarije jöho na bogo jajivoromo majëhi'ejo.

<sup>3</sup> A'i naro ö mueno'oho rëmö'öje jaburo ö'oromo ajëmego naehu Macedonia rajo uëvodëhi ëhi bövie bise'e eni avoho'irarijego noehu jemesi jö nimorohë'i majëhijaroho bëhi rumo'e jianovojöëni.

<sup>4</sup> Na juhuoninege ijönö Macedonia sa'a rajehu na'lo ö'ë'oho ö'oromo gëvego monioho bogo gagovë'ëro èhu'ëro ajëmi'irarijoho jemë bogo eni avohë'e jëvego na javoje baejöëni rabëni monioho gagovo'arujë uvoromo mae uehorovëvë'ëro. Jemesi javoji jöho bogo majëhi'ejo.

<sup>5</sup> Èhuni na uvodeje: Nasi muoho ëhi höromo ö mueno'oho uëvodeje: Corinth amoro urimo va'irarijoho jabuhu bojëmi'i uövuare suvuroho avohorego naro ijönö ö'oromo ga'iröjo suvuroho gagovë'e jiego. Èhesi bëhoho suvuro urimo ajëmiromo gagovamu eni jjië'oho na ö'oromo jemesi öriroho bogo dinëmi'iramu jemëro bogo övoho i'uho'i dë vövöbajo'ere nimo avohoromo öve sasohoromo suvuroho bojamui'aruje.

<sup>6</sup> Bëhoho aviëhije. Öve i'uhoromo suvuore ma-bisemu bamë'oho i uje bisemu öjël'ëro bisemu gagovaruëhi suvuro manaho ëhi bisemu bae'a'anue. Ö öve sasohoromo suvuro böröme bamë'oho i ujo böröme öromo i böröme gagovaruëhi suvuro manaho ëhi böröme bae'a'anue.

<sup>7</sup> Èhu'e jiaje jemë ae gemuëro gemuëro bojëmi'i dë vövöbajo'ere uehorovarijëhi ëmino'e ëhi bojëmire. Suvuro muoho nadi uvore: I'u'e höromo bijöni bijönioho vaere. Aehu nimorohoromo huë baeromo bojëmijë'oho ëhi jjië'e aribövioho God-ro nimajeje.

<sup>8</sup> Huhu bövi mae ajëmi'iröhoho iae eni jjië'eje. Ajëmego èhuro majae ëhi jemë bövie bise'e eni jëvego huë bae'irarije muoho aho'lo vae avoho'irarijego.

<sup>9</sup> Èhi jjië'oho suvuro'le aribövi jioruomajëhi jemë ëhi jëvo'ë'e. Suvuro'le aribövi jabesi jöho God-are surire ëhi uvë'eje:

Huro suvuoroho öve sasohoromo bövi rumo'e a jabesi örire i'imëmibe va'aje höjo.

Huhu mu ma vaejaje jöho ëhi jiemu jiobe va'a'ajëjo.

Jemë ëhi jëvo'ë'e.

<sup>10</sup> Iruno'o ujo ö'ië'iroho God-ro suvuoramuijago öjarueje. Iruno'o ue'aho'ië'iroho God-ro suvuoramuijago gagovoromo ue'aharueje. Iruno'o ujohu'o iruno'ohu'o suvuoramuijaje aho God-ro jemë'o aru'aho muoho bövioho bise'oho suvuorëmi'iramu rae avohëvo'iramu jemesi mu maho bövi mae jiëho'ë'e. Huro ëhi ajëmi'ë'e.

<sup>11</sup> Ajëmiromoma mae sisë rabe rabe suvuorëminövo'ë'e ëhuro ae huë vavaeni jëvamu gëv'oho jemëro öve sasohoromo i'imëmi'irarijago. Ëhi jië'oho jemëro suvuoroho nosi örire i'imamui'iramu noro ujuoho va'oromo suvuorëmi'iramu ae aho'obëhe ujuohoromo God-are örire huë mae uaruomo'ë'e.

<sup>12</sup> Iae jemëhu ajëmiromoma mae sisë i'imëmijë'oho ëhuro ë God-are ariböviohuro rabe rabe bogo eni jëvajoho eni ujuohoruomo'ë'e. Ujuohoromo röhu ëhuro ae aho'obëhe God mabëhe hö ua avohoruomo'ë'e.

<sup>13</sup> Jemëro ëhi ajëmi'iramu jaburo jemesi suvuoroho ujuohoromo ga'ë'ö jemë uhohu'o mae jëvo'iramu. Ëhi gëromoma uvoruomo'ë'e: O Corinth amo rajohuro Keriso-are jö maho bogo ma-jö'ëremuoho ejaho'i dë vövöbajo'o uhohu'o ejaharue höjo. Ejahoroma huë baeroma öve sasohoromo suvuoroho nosi örire i'imamuiromoma ae aho'o jabesi örire i'imëmijarue höjo. Jemesi jöho ëhi uvoroma God-are ihoho döro bamoruomo'ë'e.

<sup>14</sup> God-are ihoho döro bamoroma uvoruomo'ë'e: God-ro Corinth aribövioho huë mae bojëmi avohoromo dë vövöbajo'oho huotovëhamu öve sasohoromo ajamuiruomade höjo. Ëhi uvoroma jemesi jöëni vavaenimoroma God uaruomo'ë'e huro jemë ajëmiröhego.

<sup>15</sup> Asë'e God hu mabëheje rabëni huro huë baejavuoroma hesi Harihoho nosi örire suvuore börömo bëhe bojamuijë'ëro jië'ëro. Suvuoro börömo bëhe jië'ëgo no ë hesi jöho bogo ato varijënoho javue.

## 10

*A göëro sarerivoroma uvareje: Paul hu ma-u'uhoroma Keriso-are muoho vaejaje höjo. O hesi sinohemu uehorovoroma vaejaje hö uvamu Paul-hu jabesi jö mana ahëhoroma jajivade jöhoje.*

<sup>1</sup> Röhu Paul nara nasi jöho uë'ië'e. Jemëro avo'avoho here. Keriso ma-taemorovoroma sanu'e mu vaenövade a hesi ihore jöho majëhi'ië'e. Aëro jemesi amore raromoroma nasi jö sisë sareri'e atoroma uvoruomajeje: Nöröro rueroma Corinth hijë'oho juhuoni juhuonie hi'i öre gö hijë'oho Corinth aribövi jemesi örire biriri'övoroma darugo'e jöho surire nugö'öjaje höjo. Nörö ëhi jië'e ae höjo.

<sup>2</sup> Ëhi jië'e ae jiajë uvoruomaje aho nara jemesi örire ave jöho uëve. Avo'avoho uehorovego na ö'oroma Corinth hijë'iroho bogo biriri'övoroma darugo'e jöho majëhi'iro. Darugo'e jö majëhi'irodoho na bijönego'i röhu majëhi'irodoho iae na eni jeve. Ae rahumë nasi jö sarerivoroma uëv'oho: O Paul-më ma-sa'a hesi muohuremu uehorovoroma muoho vaejarue hö uëv'oho ëhi jië'e aribövi jabesi örire nara biririvoroma darugo'e jöho majëhi'irodëro uehorove.

<sup>3</sup> Jabumëro uëvarueje: Paul-më ma-sa'a hesi muohuremu uehorovoroma muoho vaejarue höjo. Iae mae. Iae no sa'are raroma jijiharueje röhu sa'a hesi muoho bogo uehorovë'e Satan'o muorovarueje.

<sup>4</sup> No muorovë'oho bogo ave sa'a hesi bijo buno'oho ujuohoromo muorovarueje. A'i God-are jöeni bijo bunonö'e hesi darugoho baeromo Satan-are rejoho dadovo'amarueje. Hesi sareri'e jöho mu'uvaharueje.

<sup>5</sup> Uehore rabe rabe simanore rovego ehuro döre bamorovoromo God bogo avoho gavarue ehi jië'e uehoro aehu baro bu'öjê'oho noro aho'amarueje. Ahoromo vöröe aho'o bojamiromo a ioro'ioro jabesi simanoho huotovëharueje Keriso-are jöhemu ejaho'iröhego. Ehi'oromo Satan'o muorovarueje.

<sup>6</sup> O jemëro Keriso-are jöho ejaho barë'iramu evare ae rahu jemesirire raromoromo Keriso-are jö bogo ejahoruomaje ehi jië'e aribövioho noehu i'u bojëmi'iröhoho eni javuo'ë'e.

<sup>7</sup> Bogo gurihijë'e jemesi nunire jiajoho avo'avoho gare. Aehu hesi uehorovoromo uvajoho: Na Keriso-are mu ajamijaje ae jevajë uvajoho ë'ego ehi jië'e ahuro uehorovo avohoromo uvo'iro: Na bogo nasi sivuoho Keriso-are mu ajamijaje aho jevo'i a'i na Keriso-are ae jevajëhi Paul-më jabu'o ehi jëvajëjo.

<sup>8</sup> No Keriso-are aribövie javue röhu göho Badaro darugoho bojamuijë'eje hesi muoho vaeröhego. Darugo hesi bëhoho bogo jemë ijumëvo'i a'i ajëmego jemëro avoho biririvoromo mae uehorovobe va'irarijego. Ehuni ë mu hesi darugo hesi jöhu'o naehu nimorohë'i jövë'oho eh'u'o jö maëro jië'ëro ijonöho bogo javojego'ë'e.

<sup>9</sup> Röhu nasi darugo hesi jöho na bogo uë'ejo jemëro uehorovoromo uvojöeni: Juhuoninaguojöro jero ëma jajivane höjo.

<sup>10</sup> Ehesi bëhoho aëro sarerivoromo uvoruomajeje: Paul-hu jö jajivoromo majahuijë'iroho darugo ma'o majahuijaje höjo. O rueromo no'o hijë'oho hu ma-u'uhë'e aëro jië'ëro bëhi rumo'e jöho jövego hejarue höjo.

<sup>11</sup> Ehi sarerivoromo uvoruomaruoho nadi'ego jabumë avoho uehorovoromo uvo'iro: Paul-mëhu öre gö raromoromo darugo'e jö jajivaruëhi jaburo rueromo no'o raromoromo muoho ehi darugo'o vae'iramu gë'ëjarëjo.

<sup>12</sup> Röhu aëro sarerivoromo uvoruomajeje: Paul-më juhuoni'e aribövie jëvajëjo. Iae mae. Iae no juhuoni'e ae javue. Juhuoni'e aëro javuë'ëro bogo biriri'övoromo uë'ejo: Jabesi sivu uehorovoromo jabesi iho nigemarue ariböviohu'o no jabu'o masije gemuoho javuajëjo. No bogo ehioho uë'ejo. Eho jaburo göëro gö hesi muoho garomo jabesi arijo'arije mevorovoruomajeje ga'i mae o sisë jëvego. Ehi jië'oho simane sisë'i uehorovoruomajeje.

<sup>13</sup> Röhu no bogo ehioho ë'ejo. Nosi mu maho no bogo iosiramiro ruëroho numëroho ëma nimoronimorohë'ioho ato'ejo. No bogo sarerivoromo uvo'ejo: Eho God-hu bojamuade muoho höromo nimoronimorohë'ioho ato'irögoro a'i huhu no bojamuade ë muohuremu nimorohë'i ato'ejo. Röhu ë muoho bogo öri göremuoho jio'i jemë'o ö'o baejëvë'e javue.

<sup>14</sup> No jemë bogo baejëvë'e javuo'ibejo noehu jemë ajëmijaruohuni nimoroharuoho God-hu bamahuade ënoho iosirami'ibejo. Röhu bogo iosiramijë'e javue. Ehesi bëhoho Keriso-are jöho noro aevo'ioho ö'oromo majëhijareje. Ehuni no nimoroharuoho iae maeje.

<sup>15</sup> Ae göehu mu vaejaroho garomo no bogo uvarueje: Noro vaejare höromo nimoronimorohë'i atarueje bogo noehu vaejare muoho jië'ego. Röhu no uvö: Jemëro avoho biririvoromo Keriso mae uehorovo'iramu evare God-hu bamahuade ëni jiajëhi ehi nosi muoho jemesirire tutuvoromo börömo bëhe ri'ö'a'ajëjo.

<sup>16</sup> Ri'ö'iramu noro va'o jemesi dejonörire sa'a ioro'ioro rajohu'o Keriso-are jö maho majëhibe jijihö'ejarejo. Majëhibe jijihë'iroho God-hu ae gö mu bojëmamu vaejare öri ari'eroho no bogo va'oromo jabuhu mu börömo vaejaroho garomo uvo'ejo: Noro vaejare höromo nimoronimorohë'ioho ato'ejo. A ioro'iorehu nimoronimorohë'i ataruëhioho no bogo ëhioho ë'ejo.

<sup>17</sup> A'i God-are surire jöho ëhi uvë'eje: Nimorohë'i ato'ië'iroho Badare jöhemu nimorohë'i atorëjo.

<sup>18</sup> Èhesi bëhoho ae rahu jabesi sivu uehorovoromo ae uëvë'o'oho: No eni javuajë uëvë'o'oho bogo ëhuro God-are nuniroho maho jioruomö'ë'e. A'i ae rahu Badahu uëvë'o'oho: Jabumë eni jëvajë uëvë'o'huro ë ariböviohuremu God-are nuniroho maho jioruomajeje.

## 11

*Corinth ekaresiaëro sarerivoromo uvareje: Nani Paul hu bogo apostle maho jio'i ae gö i'o rovaroho ëho apostle maho jio'amajë uvoruomamu Paul-hu jabesi uehoro ahëhoromo jajivade jöhoje.*

<sup>1</sup> Na bisemu simano rumo'e jöho jajivanovo'ië'e. Röhu na nege jemëro nasi jöho bogo bijönimo'i ma-taemorovoromo he'irarijego. Ma-taemorovoromo here.

<sup>2</sup> Jemëhu he'irarije hesi bëhoho sisëhu jemë baejëvojöëni God-hu avoho muebejëvajëhi naro ëhi jemë muebejëvajeje. Èhesi bëhoho naro vavunö'e jemë muebejëvajeje. Ae gemuehu masuröhego uaromo vavuehu aboji muebejajëhi naro ëhi ë'ajeje jemë Keriso-are övore bojëmego hesi aribövi mae jioromo hu gemu mae uehorovo'irarijego.

<sup>3</sup> Keriso gemu mae uehorovo'irarijego muebejëve röhu na juhuoni-nege jemë Keriso gemu uhohu'o uehorovarijoho vuonugo'i sareri'e jöho ejëhoromo simane sisërëjëvego rori'o va'ojöëni. Urimë'i sigobehu rueromo Eve sareri sareri'e jö majahijamu mae höromo ejahadëhi jemesi simanoho ëhi sisërëjëvego Keriso vuonugojöëni uëve.

<sup>4</sup> Naehu ëhi juhuonivaje hesi bëhoho ae göehu ö'oromo Iesuarë jö noehu majëhijaroho huotohuotovoromo majëhijego jemë bogo bijönimo'i ëho mabëhe ë'oromo ejarujeje. O God-are Aru'aho baejarijëhioho bogo ëhioho rue'i hesi aru'aho göëro ö'ego bogo bijönimarujeje. O jemë jö mae hejarijëhioho ae göëro bogo ëhioho majëhi'i hesi jöe gö majëhijego jemë ëhu'o bogo bijönimo'i ëho mabëhe ë'oromo ejarujeje. Jabesi sareri'e jö ejëharujohuni ëhuni nasi jöhu'o nadi bijönimo'i a'i ma-taemorovoromo here.

<sup>5</sup> Èhesi bëhoho jemëro sarerivoromo uvarujeje: Èi'o rovare aribövioho apostle masijo masije jioruomö'i nöruare ihoho bogohöjo. Èhi uvarujeje röhu na uehorovoromo uve: Jabesi ihohuro nasiroho bogo iosiramioromo taemehë'e höjo.

<sup>6</sup> Jemë uvarujeje: Nörö ave sa'a hesi vuëvo'e jöe gö gö jövo'iröhoho hu dadivaje höjo. Nani na bogo ëhi jië'e jö jövaje aho jeve röhu na nuni aji'e jöho baejë'e ae jeve. Ènuni aji'e jöho aho'o noro röjëhi'ego jemë ma-samabëhe ganövarijeje.

<sup>7</sup> O nani aveho uvarujeje sisë höjo. Naro manaho bogo baejë'e God-are jö maho jemesi örire ëma majëhiromo ëhuro nasi ihoho ba'obuejë'e jeve ëhuro jemesi ihoho nigemë'e jioröhego.

<sup>8</sup> Ekaresiae gö gö jabesi ijo bajoho ujuohëhoromo ëhuro hinövodeje jemë ajëmi'irodëni.

<sup>9</sup> Na jemë'o hiromo gavë'o'oho nasi mae sisë rabe rabe bogo eni jevamu gavë'o'oho na bogo jemesi öriroho huë vavaenoho bojëmiromo uë gënövodeje. Rabëni hesi bëhoho rabe rabe bogo eni jevajoho Christian ö mueno'ëro Macedonia sa'are jioromo ujuohoromo jemesi amore rueromo ajem-inövareje. Èhi jië'ëro na jemesirire jiaje maho sisëho bogo ëninëmi'i avo'avoho mueberovonövodeje huë vavaene bojëmijöëni. Èhi gemuoho ë'onövo'ejo.

<sup>10</sup> Keriso-are jö maho nasi dëreje. Èhu'ëro na aveho jö mae uëve. Naehu jemesi maho sisëho bogo ujuohëhë'ëro naehu nimorohë'i jövajoho Greece sa'are raromaruje aribövioho ae gemu vadu'o'oho bogo ahevo'anue.

<sup>11</sup> Na rabëni èhi jië'e jöho uëve. Na na jemë bogo uehorovëvoromo èhuni jöve. Röhu God-hu gevajoho iae naro jemesi örire uehorovëvajeje.

<sup>12</sup> Jemë ajëmijajohuni na manaho bogo ujuohajëro ijönöhu'o bogo ujuohëho'ejo. Èhesi bëhoho i'o ö'are ariböviohuro nimö a ioro'iorohuro ëma uvoröhego: Jabuhu nimorohë'i atarue jöho iae mae höjo. Jabu'o Paul-më'o masije gemuoho jëvajëjo. Èhuni i'o ö'are ariböviehu jemesi bövi bise'o ujuohëharuëhioho na bogo ëhioho ë'ejo a ioro'iorohuro uvoröhego: Èariböviohu'o Paul-më'o hahagu hahagu jëvajëjo.

<sup>13</sup> Èaribövioho bogo apostle maho jioruome'i ma-sareri'e apostle jioruome. Sareri'e mu vaejarue aribövie jioruome. Huotorovoromo ma-döhemu mu mae vaejarueje aëro gëromo uvoröhego: Iae Keriso-are apostle jëvajëjo.

<sup>14</sup> Èhi jië'e sareri'e mu vaejaruoho gëromo no bogo majiohavue. Èhesi bëhoho Satan'o huotorovoromo ma-döhemu mu mae vaejejo aëro uvoruomajeje: Aji'e aneraëro ë'ajëjo.

<sup>15</sup> Èhuni Satan-are mu vaejharue ariböviohu'o huotorovoromo ma-döhemu mu mae vaejaruoho ëho bogo börömehuje. Jabumë ë sisë vaejaruëhi èhi sisëro va'o hesi jioruome.

*Paul apostle jioromo huë vavaeni baebe juvaje jö huhu nimorohë'i jajivade jöhoje.*

<sup>16</sup> Röhu urimë'i jajivodëhi iae na èhi gemuoho majëhi'ië'e. Nadi ae gemu vadu'o'oho uvore: Paul simano rumo'e ae höjo. Röhu jemëhu uvë'o'oho: Nörö èhi jië'e ae hö uvë'o'oho iae hesije. Simano rumo'e ae höromo ma-baejevego na'o ma-bisemu rajahirovë'i jajivo'iro.

<sup>17</sup> Na avevejö'e jajivo'ië'aje jöho bogo Badahu nimajëhi jië'e jöho jajivo'i a'i simano rumo'e aehu ataruëhi èhi jajivo'ië'e rajahirovo'irode bëhoho na jevajë uvë'ëro jevë'ëro.

<sup>18</sup> Ae aho'obëhe sine rajahirovë'i ataruohuni èhuni na'o èhi gemuoho jajivo'ejo.

<sup>19</sup> Röhu jemë uvë'o'oho: Nörö simano rumo'e ae hö uvë'o'oho nasi jöho ma-baere. Èhesi bëhoho jemë uvarujeje: No simano ma'e javuajëromo ë i'o ö'are simano rumo'e aribövioho mae höromo iae rajëhijë'i baejëvarujeje.

<sup>20</sup> Jemëhu jabesi darugore raromajöro rëmaruoho jemesi mae sisë ijëharuoho sarerisareriëmiromo jemë baejëvaruoho jemë taemëvaruoho nu ano'ere hirimijëvaruoho èhi jië'e aribövioho jemëro baejëvarujeje.

<sup>21</sup> Iae mae nomë darugo rumo'ëro javuë'ëro jabuhu ë'aruëhioho no bogo ëhioho ë'arueje. Èhuni na javojego'ego uëve.

Jabuhu biriri'övoromo rajahirovë'i ataruëhi na'o biriri'övoromo ë'ejo. Na simano rumo'e aëro jöho jövevanove.



<sup>22</sup> Jemëro jabumë rajëhijëro uëvarueje: Nomë Hebrew sa'a raje javuajëjo. Röhu na diho raje jeve. O uëvarueje: Nomë Israel raje javuajëjo. Röhu na diho raje jeve. O uëvarueje: No Abraham-are ujo ömo'öme javuajëjo. Röhu iae na'o ëho raje jeve.

<sup>23</sup> Jemëro jabumë rajëhijëro uëvarueje: Nomë Keriso-are mu vaejharue ae javuajëjo. Röhu naro jabumë iosirëmiromo Keriso-are mu maho vaejajeje. Simano sisërëj'e ahuro jövevanove. Jabumë iosirëmiromo mu bövie vaej'e jeve. Iosirëmiromo Keriso-are jöëni savoji gagore hi'i hijë'e jeve. Majae aho'o hisuebijevoe rovë'ejö. Röhu jabumë bogo ëhioho hisuebijëvë'ejö. Iosirëmiromo vörö'ere va'amu guomevo'i höjë'eje.

<sup>24</sup> Jew rajehu vae aho'obëhe 39 hisuebijevo'i arijaroho ëho majae övo gö mine ëhi'obe rovë'ejö.

<sup>25</sup> Majae niö'i gemu Rome rajëro na hisuebijevo'i arijë'ejö. Majae gemu munëro vajemijë'ejö. Majae niö'i gemu boat-re hiromo va'amu dadorovo'amadeje. Boat dadorovamu na majae gemu vahie gemu jovo ririre ijo ha'osi döre hetejedeje.

<sup>26</sup> Majae aho'o öre göre göre juvodevare evare jövëro baejevo'i höjë'eje. Vajiohu'e aëro ijumevo'i höjë'ejö. Nasi sa'a rajëro ijumevo'i höjë'ejö. Sa'a ioro'oro rajëro ijumevo'i höjë'ejö. Amore hijamu ijumevo'i höjë'ejö. Örire juvamu ijumevo'i höjë'ejö. Sö jovore juvamu ijumevo'i höjë'eje. Madöëremu agane vaejevaruohuro ijumevo'i höjë'ejö.

<sup>27</sup> Mue vaeromo u'ue baenövodeje. Röho deroho bogo avoho ni-avonövodeje. I rumo'e jovo rumo'e ma-hinövodeje. Ioho bogo uehorovë'i hinövodeje. Javu rumo'e niögu rumo'e ma-hinövodeje.

<sup>28</sup> Ëhi jië'e huë vavaeni ioro'ioroho bogo uë'i ave jöhëmu uë'ejo. Majae ëhi ekaresiae dinö'e dinö'e jioruomajohuni na uehorovëvoromo nurunuruego avohe.

<sup>29</sup> Ae gö dë vövöbajo'e u'uhë'iroho na'o gemuoho herovajeje. Ae göehu gö hesi dëre bijiohamu sisëre beva'ë'iroho huë vavaene sisë maro jevajeje.

*Paul-ro Damascus jioromo ju'ebijadeje. Ëjöhö Paul-ro jajivadeje noro uvoröhego: Hu darugo rumo'e jiade höjo. Ëhesi jöhöje.*

<sup>30</sup> Öre gö bogojevë'ego nasi jöhö ëma nimorohë'i jövo'ejo. Röhu rabu muehu nasi örire rovadoho aehu heromo uvaruoho: Paul darugo rumo'e hö uvaruoho ëhi jië'e jöhëmu nimorohë'i jajivo'ejo.

<sup>31</sup> Naehu jö jajivo'ië'ajoho Bada Iesuare Börömo o göho hesi Vavue God-ro geve na bogo sarerëmi'ego. Hesi ihoho ma-mabëhe jiemu jiobe va'ë'e.

<sup>32</sup> Na Damascus amore hijodevare ë sa'a muebejaje ae Aretas-are uhure bamare ahuro ë amo börömo rejo hesi ojore ojore ae nugo'amadeje na va'ëgo guduamevoruomoröhego.

<sup>33</sup> Ëhi'amu niomoniomo bojöre arirovodeje. Arirovamu ö'ëro beromo ma-saginiëri ö'ire ma'enë'i amo rejo sigagure ö'oho a'ohö'öjë'i ma-u'ëmu ba'amevamu rue je'onö ruvebi sa'are ravo'amoromo ju'ebidëgodeje.

## 12

*God-hu mu mabëhe röjahi'ëgo Paul-hu nia'ovo'iraeromo ganövade jöhu'o huë vavaeni'e hijade jöhu'oje.*

<sup>1</sup> Röhu öre gö bogojevë'ego gö'o nimoronimorohë'i jajivo'ejo. Ni-moronimorohë'i jajivë'oho bogo ëhuro marëjevo'ë'e. Ëhi jie röhu Badahu ajemi'ëgo nia'ovo'iraeromo ga'amonövode jöhö mu masije gö gö röjehi'ëgo nia'ovonö'e ga'amonövode jöhö ëhi jië'e jöhö iae na jajivo'ië'e.

<sup>2</sup> Na Christian ae gö gavë'e jeve. Ëaho God-hu baejamu aruhe ö'idö mare ajiomadeje. Ajiomoromo vuonorö'ö ruvebijadoho vadune aho'obëhe 14 barëjë'eje. Nani hu sinohu'o ajiomadeje o nani sine diboromo ajiomadeje. Na'o bogo gave. Hesi God-ro gemuëro gave.

<sup>3</sup> Naehu gavajoho ë aho God-ro baejamu Paradise-re ajiomadeje. Röhu maho u'ë'ejo. Nani sinohu'o ajiomadeje o nani sine diboromo ajiomadeje. Na'o bogo gave. Hesi God-ro gemuëro gave.

<sup>4</sup> Hu ajiomoromo hejadeje jö mabëhe hesi jöho bogo ato'iröhe jöho uvavamu. Hejade jö ma-aehu atë'o'ho sisëje.

<sup>5</sup> Ëhi jië'e a hesi jöho nimoronimorohë'i jövo'ejo. Röhu nasi jöho bogo jövo'ejo. Majae göro göro na bogo eni jevaje ë jöhemu nimorohë'i jövo'ejo.

<sup>6</sup> Röhu nasi jöho nimoronimorohë'i jövo'ibejo ëho bogo simano rumo'e jöho jio'i ma-jö mae jio'ibejo. Röhu bogo nimorohë'ioho jövo'ejo jemëro manasi jöhemu heromo uvojöëni: Paul a böröme höjo. Ëhi jië'o'ho sisëje. O nasi mu jemesi nunehu garomo nasi jö jemesi hia'ehu heromo nöro mae hö uehorovë'o'ho ëhemu iae maeje.

<sup>7</sup> Röhu ae gö ö'idöre ajiomoromo Paradise garomo ruvebijade ë hesi jö majëhijode hesi bëhoho nasi jöho majëhiromo ë'odeje. Röhu ëhi jië'e mu masijo masijoho God-ro röjehijamu ga'amë'ëro na sisë'i uehorovoromo döre bamorovojöëni ëhuni huro huë vavaeni'ere bamevë'ëro huë vavaene gemuëro nasi sino uhure bibëro namijevanovajeje. Ëbibëho Satan-hu nugö'öjadohoje na sisë vaejevonövoröhego. Röhu ë vavaeni rovade hesi bëhoho naro bogo sisë'ioho uehorovoromo döroho bamorovo'irodego.

<sup>8</sup> Bibëro namijevanovamu hegorovo vae niö'i gemu Bada ëninami'i hi-jodeje rori'o babu'öjehoröhego.

<sup>9</sup> Ëninami'i hijamu uevadeje: Bogo ë'ejöjo. Naehu huë baejavoromo darugo bojamajohuro ëhuro ja eni javajëjo. Ëhesi bëhoho ae u'uhëvë'o'ho nasi darugohuro ëhuro biririvëvo avohaje höjo. Ëhi uevë'ëro ëhuni rabe rabe bogo eni jevë'o'ho ëhi jië'e jöhuremu na nimoronimorohë'i jövo'ejo. Ëho nimoronimorohë'i jövë'o'ho nasi dë vövöbajo'o uhure ma-mabëhe jevo'ë'e ëhuro Keriso-are birirohuro na aegehoröhego.

<sup>10</sup> Ëhu'ëro jië'ëro Keriso-are jöëni u'uhevë'o'ho o aehu sivegë'o'ho o naehu vörö'ere va'ë'o'ho o aehu sisë vaejevë'o'ho o huë vavaeni bövi bise'o baejevë'o'ho iae na huë mae jevajeje. Ëhesi bëhoho u'uhevë'o'ho iae evare na daruge baeromo biririvevajeje.

*Paul-hu Corinth aribövi jabesi jöëni börömo bëhe uehorovoromo ëhuni jajivade jöhoje.*

<sup>11</sup> Nasi arijo'ëro nasi jöho nimoronimorohë'i jövoromo ëhuro na simano rumo'e aëro jajivanovë'e jeve. Jemëro na bogo ajemijë'ëro ëhu'ëro na öre gö bogojevadeje. Bogo naehu a'i jemëro uvo'ibejarije: Paul mu mae vaejaje hö uvo'ibejarije iae mae jio'ibejo. Röhu jemë bogo ëhioho uvarijeje. Ëhuro öre gö bogojevadeje. Ëhesi bëhoho jemëro uvarujeje: Ëi'o rovere aribövioho apostle masijo masije jioruomö'i nöruare ihoho bogohöjo. Ëhi uvarujeje. Iae na bise'e jeve röhu jabesi ihohuro nasi ihoho bogo iosiramiro mo masijoho jioruomë'eje.

<sup>12</sup> Na jemë'o hijodevare evare apostle-ehu vaeruomaje ëhi jië'e mu masijoho bogo gavarue darugo'e mue gö gö u'urume vaenövodeje jemëro garomo uvo'irarijego: Nöro apostle höjo.

<sup>13</sup> Naro jemesi öriroho diehi sisë'i ajëmijë'ëro jemë uvarujeje: Paul ekaresia ioro'iorohuremu ajëmi'i no bogo ajamuijade höjo. Jemë nani ëma uvarujeje: Paul-hu nosi mana bogo baeromo huë vavaeni bogo bojamuinövadoho ëho sisë höjo. Ëhi jië'oho nasi sisëho uehorovoromo vuonugore.

<sup>14</sup> Röhu aveho gare. Urimë'i vae niö'i ö'oromo hijodoho iae na röhu maho ö'ië'e. Ö'ë'oho bogo huë vavaenoho bojëmiromo jemesiroho mu hesi manaho bae'ejo. Ëhesi bëhoho na jemesi maho sisëho bogo uehorovo'irögoro jemë uehorovëve. Jemë nasi aboji harihu'o va'ëne jëvanove. Aboji harihu'oho bogo vëmu vavu'o jabesi jöënioho maho sisëho gagovoromo bahijëhoruomoli a'i vëmu vavu'ohuro aboji harihu'ohuni gagovoromo bahijëhoruomajeje.

<sup>15</sup> Naehu jemë ajëmi'irodëni nasi mae sisë bojëmi barëromo nasi arijo'arije ëhu'o bojamirovë'oho na mae jeve. Naro jemesi örire dë vövöbajo'e aho'o uehorovëvajeje. Na ëhuni jemëro na bogo börömoho uehorovevarujeje.

<sup>16</sup> Nani jemë uvarujeje: Ja jö mae jövanuëjo. Jasi arijo'ëro nosiroho mu hesi manaho bogo baeromo huë vavaenoho bogo bojamuijane höjo. Iae mae-ëjo röhu ja sareri sareri'e aëro javë'ëro sareramuiromo nosi ijo bajoho ujuohahuane höjo.

<sup>17</sup> Ëhi uvarujoho na jemëro uvö: Paul-ro sarerivoromo hu'o röromo ae gö nugö'öjade höjo huro ö'oromo nosi maho sisëho vajiohuvodaguojöro.

<sup>18</sup> Röhu na Titus sisë maro uavodeje: Corinth amoro va'onëromo Christian ö göho nugö'öjodeje Titus'o gemu mae ö'oröhego. Ëhi ë'odeje. Titus-ro ö'oromo na huro sarerëmiromo jemesi inömoho vajiohëro ujuohëhadeje. Bogo. Jemë'o uehorovore. Hu'o na'o uehore gemuoho mue gemuoho baeromo jireharueje.

<sup>19</sup> Ave noehu jajivarue jöho nani jemëro adahobe va'oromo uvonövo'aruje: O Paul-mëhu jajivare hesi bëhoho jabumëro jabesi ihoho nosi nunire avohoröhëni ëhuni jöho jajivare höjo. Röhu no bogo jemesi nuniroho riravoromo jajivo'i Keriso-are aëro javuë'ëro God-are nunire riravoromo jöho jajivë'e javue. Nosi ö mueno'e noehu jö jajivëhë'oho o mu rabe vaejëhë'oho ë hesi bëhoho bogo nosi ihoho avohorovo'i a'i jemë ajëmego biririvëvoröhego ë'aruje.

<sup>20</sup> Na juhuoninege naro ö'oromo gëjööni jemë ëhi mae jëvojöro negajoho gö jëvego o jemëro na gëjööni jemë na sanu'e ae jëvojöro nëgajoho gö jëvego. Na juhuoninege gëjööni jemë iro muorovo'e vaejego o a jabesi mu mahuni dë vörönëgego o vörö'liraeromo muorovego o jemë sivu sivue uehorovego o jemëro ae göëro gö sivego o ae göëro gö hesi sisëho saginiëri atego o sivue döro bamorovego o jemesi nimarujohemu ëma vaejego. Ëhi jië'e mu sisëho jemëro vaejego gëjööni ëhuni juhuoninege.

<sup>21</sup> Na juhuoninege röhu maho ö'ego nasi Börömoho God-ro javoje bojemego jemesi nunire baejööni. Ëhesi bëhoho na gëjööni ae aho'obëhe jemesirire mami'e mu sisë vaejaroho bogo vuonugë'e jioruomego. Biriri'övoromo öehu jijihanovoromo bövi bise'o ëma vaejaroho bogo vuonugë'e jioruomego. Ëhi garomo huë vavaene böröme baejööni ëhuni juhuoninego'ego jöho jajive ajëmi'irodëro.

## 13

*Corinth rajehu avoho raromoröhego Paul-hu majëhiromo jögoru mëmade jöhoje.*

<sup>1</sup> Urimo vae niö'i ö'odoho röhu maho ö'ejo. Ëhi jië'oho vae niö'i gemu ö'ë'e jevo'ë'e. God-are surire jöho ëhi uvë'eje: Ae rahumëhu ae gö hesi sisë court-re majëhijë'oho ae niö'i o niö'i gemu mu sisë gavarijohuro jöe gemuoho ajamirovoromo huruoho majëhi'iramu hesi jö sisëho jio'a'ajëjo. God-are surire jöho ëhi uvë'eje. Ëhuni jemë bogo avoho raromë'oho naro ö'oromo jemesi jö sisëho majae niö'i gavodoho röhu maho gavëho'iramu jemesi sisëho va'orahore huruohëhë'e jio'ë'e.

<sup>2</sup> Urimë'i na ö'oromo rueromo röhu maho ö'ode majare evare jögore bojëmiromo uëvodeje: Mu sisë urimo vaejarije ariböviohu'o a ioro'iorohu'o naehu röhu maho rovë'oho bogo vuororëmi'i i'ue bojëmi'ejöjo. Jemë'o hiromo ëhi uëvodoho öre ëgo'o hiromo röhu maho ëhi gemuoho uëve.

<sup>3</sup> Naehu jemë i'u bojëmi'irode hesi bëhoho jemë uvarujeje: Ë'ego no ga'irarëjo Kerisoro Paul jöe bojamego o bogo bojamego huhu no majahui-jajoho. Iae naro Keriso-are darugoho baeromo ö'oromo i'ue bojëmi'iramu ga'a'aruje Kerisohu na jö bojemajoho. Kerisoro bogo ma-u'uhoromo jemesi öriroho muoho vae'i a'i darugo ma'o vaejajeje.

<sup>4</sup> Iae Keriso-are sino u'uhamu korosire anamu guomadeje röhu avevejö'oho hu God-are darugoho baeromo biririvoromo hijajeje. Keriso-are aribövie gemuohuro javuë'ëro no'o ëhi u'uhavuajeje. Röhu God-are darugoho baeromo Keriso'o gemu mae raromoromo biririvoromo jemesi örire ajëmi'ejö.

<sup>5</sup> Nasi öriroho nadi bijeho ge'i a'i jemesi arijo'arije garorovoromo gare jemë Keriso uhohu'o mae uehorovëvego o ma-döëremu mae uehorovëvego. Jemë iae garomo uvarujeje: Iesu Keriso Corinth rajo nosi dë vövöbajö'ere hijaje höjo. O na jemë ma-döëremu muoho vaejarujeje.

<sup>6</sup> Röhu naro uve: Jemëro garomo uvo'a'arujëjo: Paul-më bogo ma-döhemuoho muoho vaejarue höjo. Na nege jemëro ëhi uvo'irarijego.

<sup>7</sup> Noro God-are örire uavarueje huro ajëmege jemë bogo rireromëvo'iröhego. Ëhesi bëhoho bogo ae aho'obëhe uvo'irarijego: Paul-mesi darugoho ruahö'öjë'e hö uvo'irarijego bogo ëhunioho no uavarueje. A'i no uavarue hesi bëhoho jemëro mu maemu vae'irarijego ëhuni God uavarueje. Röhu jemë mu mae vaejamu noehu i'u bojëmi'iröhe darugo bogo röjëhijamu aehu uvë'oho: Paul-mesi darugoho bogohö uvë'oho iae hesije.

<sup>8</sup> God-are jö ma aho'iröhoho no bogo eni javuo'i ma-nigemo'iröhoho eni javue. Ëhuni jemëhu mu mahemu ejamu gëvë'oho no i'u bojëmi'iröhe darugoho bogo röjëhi'ejö.

<sup>9</sup> Jemëhu Keriso-are darugo baeromo biririvë'oho o noehu Keriso-are darugo jemë bogo röjëhiromo i'u bogo bojëmamü a nunire u'uhavuë'oho iae nimoroharueje. Jemëro avo'avoho uehorovo'irarijego ëhuni noro God-are örire ua gavarueje.

<sup>10</sup> Ëhu'ego na öre ëgo'o hiromo ave jö jajivaje hesi bëhoho na ö'oromo jemë'o hiromo nasi darugoho bogo baeromo vörö'e i'uoho bojëmi'irodëni. Ëdarugoho Badaro bojemadeje bogo jemë ijumëvo'i a'i ajëmege avoho biririvoromo mae uehorovobe va'irarijego.

*Paul-hu ijo tugoho'i jejëmijade jöhoje.*

<sup>11</sup> Nasi ö mueno'e ijo tugoho'i jöho uë'ië'e. Mae raromore. Avo'avoho uehorovoromo nasi jöho ejehore. Uehore gemu baeromo huë mae baerovore. Ëhi ë'ë'oho God huë ma o sanu'e jö bojamuijaje ahuro jemë'o hi'ë'e.

<sup>12</sup> Christian ö mueno'ehu jejamirovaruëhi ëhi jejamirovore.

God-are aribövie aho'obëhe jemesi örire jejëmijö.

<sup>13-14</sup> Bada Iesu Kerisoro huë baejëvoromo jemë aho'o ajëminövo'i God-ro jemë aho'o uehorovëvonövo'i God-are Aru'aho Mahuro ae aho'o jemë'o gemu mae hi juvo'ë'e. Ahia mino'e.

## GALATIANS

*Paul-hu Galatia aribövi jejëmade jöhoje.*

<sup>1</sup> O asë'e Galatia ekaresiaho Paul naro jemesi örire jajive. Na apostle jeve. Èhesi bëhoho bogo ma-aehu hesi uehorovoromo uevamu apostle muoho bae'i bogo God-ro ae uavamu ë ahuro rueromo uevamu apostle muoho bae'irögoro a'i Iesu Keriso'o God Vavuohu'o jaburo uevamu apostle muoho baejodeje. Iesu Keriso'o God Vavuehu Iesu ajamamu ri'öjade ë ahu'o ëho jaburo niö'iro uevamu muoho baejë'ëro ëhu'ëro na apostle jeve. Èhuni naehu majëhi'ie'aje jöho avo'avoho here.

<sup>2</sup> Röhu na'o gemuore arijarue Christian aganoho aho'obëhe na'o gemuore havoromo jemë jejëmijö ekaresiae aho'obëhe Galatia sa'are dinö'e dinö'e jëvajoho.

<sup>3</sup> Na nege God nosi Vavuohu'o Bada Iesu Keriso'o huë baeromo ajëmijego maro raromo'irarijego.

<sup>4</sup> Kerisoro God nosi Vavu hesi jöho ejahoromo nosi sisëni guomorovadeje ëhuro avevejö'e jiaje mu sisë hesi darugore javuajoho baeniahijego maro javuoröhego.

<sup>5</sup> Èhuni God-are ihoho noro mabëhe uabe va'onörovo'ejo. Iae mae.

*God-are jö mae ma-gemu jio'i gö gö bogojiaje jöhoje.*

<sup>6</sup> Röhu jemë diehi diehi sisë'i ë'arujoho na heromo jöe barëjeve. Èhesi bëhoho God-ro Keriso-are huë mae röjëhiromo ëhuro hesinö rinëgadeje. God-hu ëhi ë'adoho jemë rabëni ma-burëroho hu vuonugo'i jö göho God-are jö maho höromo ejëhoromo baejö.

<sup>7</sup> Ejöho bogo God-are jö maehuje Keriso-are jö maho gemu jio'i gö gö bogojië'ego. A'i aëro jemesi simanoho sisë vaejëhoromo Keriso-are jö maho huotohuotovo majëhi'i nimö.

<sup>8</sup> Noro urimë'i God-are jö maho majëhijareje. Noehu majëhijare jöho ae rahu vuonugo'i sarerëmiromo jöe gö majëhiromo jemë ëma uëvë'o'oho: Aveho God-are jö mae hö uëvë'o'oho God-are i'u börömoho baeruomo'ë'e. Naehu ëhi sareri sareri ë'ë'o'oho o aneraehu ö'idöre jioromo ruvebiromo ëhi sareri sareri ë'ë'o'oho o ae rahu ëhi ë'ë'o'oho no God-are i'u börömoho bae hesi javue.

<sup>9</sup> No mami'e jemë'o ariromo ëhi jië'e darugo'e jö majëhijaroho röhu jaruvo na jöe gemuoho majëhi'ejo. Jemëhu baejarije jö maho ae rahu vuonugo'i jemë sarerëmiromo uëvaruoho: Ave jö göho God-are jö mae hö uëvaruoho God-are i'u börömoho bae hesi jioruome.

<sup>10</sup> Naehu avevejö'e jajivaje jöho na na ma-aëro mae uehorovevojöro ë'e o na na God-ro mae uehorovevojöro ëhuni jajive. Na na ma-aëro rajehijöro jajive. Naehu ë'odëhi na ma-aëro rajehijöro jöho majëhi'ibejo ëhuro na bogo Keriso-are mu ajamijaje aho jevo'ibejo.

*Paul-hu a majëhijaje jö maho ë jöho bogo aroho bae'i Iesuro baejade jöhoje.*

<sup>11</sup> Röhu nasi ö mueno'e na nege jemëro ave jöho avo'avoho he'irarijego. Keriso-are jö ma naehu majëhijamu hejarijoho bogo ma-aehu jabesi ma-uehorovoromo na majehare jöhoje.

<sup>12</sup> Bogo aehu aevoromo jöho majëhiromo bëhoho huruoho majëhi'irögoro a'i Iesu Kerisoro huro jöho majëhijamu baejodeje.

<sup>13</sup> Iesu Kerisoro majehi'i bogo Keriso-are ariböviehu majehijamu hejodeje. Jemë'o uehorovore. Naehu bogo Christian vaejë'e Jew rajo a mami mu vaeromo God rajahinövode majare evare naehu diehi diehi hi juvonövode jöho mami'e hejarijeje. Evare majare naro biririvoromo God-are ekaresiae aho'obëhe sisë vaejëvobe mu'u'amo'i ë'o gabe rovodeje. Ëhuni Keriso-are jöho bogo jabesi öriroho hejodeje.

<sup>14</sup> A'i vadune gemuore jioruomade ë aribövioho nasi Jew raje gemuoho aho'o naro iosirëmiromo Jew rajo nosi hijo miono'o jabesi jögoroho ni-moromo nosi Jew rajo muoho bae avohodeje.

<sup>15</sup> Ëhi jië'e ae jevadoho röhu urimo mamu na bogo rahevë'e ma-dëre jevamu evare God-ro hesi jevojöro nijio'iraejevë'ëro ijonö huë baejevoromo hesinö ringadeje.

<sup>16</sup> Rinegoromo huhu nimadëhi hesi Harihohe röjehijadeje naro garomo Jew rajo nosi sa'aroho bogo a'i sa'a ioro'ioro rajo jemesirire Keriso-are jö maho majëhibe juvonövo'irodego. Röhu God-ro hesi Harihu röjehijadevaroho evaroho na bogo ë amoroho hiromo a jö'oroho baeromo

<sup>17</sup> bogo Jerusalem amo börömoreho ajiomoromo urimo riravare apostle ömo'ömohu'oho jöho atoromo jö maho ë bae'irögoro a'i na ma-burëro öre gö va'oromo Arabia sa'are hijodeje. Hijë'ëro Damascus amore vuonorö'öromo rovodeje.

<sup>18</sup> Amo röhu God-hu na hesi Harihu röjehijadoho vadune aho'obëhe niö'i gemu barëjamu evare na Peter'o jöe jörovo'i Jerusalem amore ajiomodeje. Röhu majae ma-bisemu hurae niö'i rabu'e ëhi hu'o hiromo va'odeje.

<sup>19</sup> Peter iae naro garomo röhu Bada Iesuarë öho James hu'o gavodeje. Röhu apostle ioro'ioroho bogo gëvë'e ma-va'odeje.

<sup>20</sup> Naehu jemesi örire jajivaje jöho God-hu gevajoho na bogo sarerëmije.

<sup>21</sup> Apostle ioro'ioroho bogo gëvë'e ma-va'odeje. Jerusalem amoho Judea sa'aho nugo'i va'odoho va'o Syria sa'are Cilicia sa'are hibe juvodeje.

<sup>22</sup> Röhu Keriso-are ekaresiae gö gö Judea sa'are raromaruoho ëho jabu nasi nu ano'oho bogo gavareje.

<sup>23</sup> Nasi nu ano'oho bogo ga'i ma-hejareje aëro uvavamu: Urimoho nöröro Christian aribövi nosi örire sisë'i vaejavuobe juvade höjo. Sisë'i vaejavuobe juvoromo Keriso mae uehorovarue mu mu'u'i ë'o gabe juvadoho röhu avevejö'oho Keriso mae uehorovo'iröhe jöho nöröro majëhibe juvaje höjo.

<sup>24</sup> Ëhi uvamu hejë'ëro jië'ëro nasi jöëni God mabëhe uavareje.

## 2

*Paul-hu a majëhijaje jöho Jerusalem ekaresia a masijohuro heromo uvareje: Ëho jö mae höjo. Ëhesi jöhoje.*

<sup>1</sup> Ëhi'oromo vadune aho'obëhe 14 barëjamu gagorovo naro Barnabas'o gemu mae Jerusalem amo börömore vuonorö'ö ajiomodeje. Röhu Titus hu'o hu'irae baeromo ajiomodeje.

<sup>2</sup> Ajiomode hesi bëhoho God-ro uevë'ego ajiomodeje. Ajiomoromo ekaresia a masijoho jaburemu na'o nosi hahagu gagovorovoromo jöho atareje. Atoromo naehu sa'a ioro'ioro rajo diehi jië'e jö majëhibe juvode jöho naro huruoho majëhijodeje ë ekaresia a masijohuro avoho heruomoröhego rabëni naehu mami'e vaebe rovode muoho jabumëro ahego bejöëni. Iae ëhuni avoho majëhijodeje.

<sup>3</sup> Röhu nasi muoho bogo ahehareje. Bogo ahehoromo uevareje: Sa'a gö rajoho Jew rajo jögoroho röjëhi'ibejanëjo. O na'o rovade aho Titus bogo

Jew rajehu jio'i sa'a gö raje a jiajoho röhu jabumë bogo uövuareje: Titus baeromo Jew rajo muoho vaeromo sinoho tariojahego hu God-are nunire mae nami'irajo. Ëa masijoho bogo ëhi jië'e jöho uö'i a'i

<sup>4</sup> hesi ae göëro nimareje Jew rajehu ë'aruëhi ëhi ë'oromo Titus-are sinoho tariojahojöro. Röhu jabumë ma-döëremu Christian aribövie jëvë'ëro ë'areje. Ma-döëremu Christian aribövie jioromo sisë'i uehorovoromo saginiëri rueromo nosi gemuore gagovareje ga'i no Iesu Keriso-are ae gemuohuro javuë'ëro no diehi jië'e sasohë'e muoho baejë'e javuego. Ëhesi bëhoho jaburo nimareje Jew rajo nosi i'u'e muoho noro röhu maho vaemu vaeröhego. Ëhuni nimareje Titus-are sinoho tariojahojöro.

<sup>5</sup> Ëhi nëgamu röhu jabesi jöho no bogo mae bogo ejëhareje ëhuro noro Keriso-are jö maho avo'avoho muebejego jemëro ë jöhemu he'irarijego.

<sup>6</sup> Röhu ekaresiaehu uvoruomaje a masije hö uvoruomaje aribövioho jabumë a masijoho o ininoho naro uehorovoromo uvajeje: Iae hesi höjo. Ëhesi bëhoho God-ro gövuajeje a masijoho o ininoho bogo göho göho javuo'i ma-gemuoho javuego. Röhu ë ekaresia a masijohuro naehu majëhibe juvaje jöho heromo röhu jö gö'oho bogo döroho bojemijareje ëhu'o majëhijöro.

<sup>7</sup> A'iro jabumëro iae mae garomo uvareje: God-hu Peter mu bojamijadëhi ëhi nörö muoho bojamijade höjo noro Keriso-are jö maho baeromo Peter-ro Jew rajo örire majëhibe juvo'i naro sa'a ioro'ioro rajo örire ëhi majëhibe juvo'irodego.

<sup>8</sup> Ëhesi bëhoho God-ro Peter darugoho bojamijadeje huro apostle muoho baeromo Jew rajoho ajëmi'iröhego. God-hu Peter darugo bojamijadëhi na'o ëhi bojemijadeje naro apostle muoho baeromo sa'a ioro'ioro rajoho ajëmi'irodego.

<sup>9</sup> Ëhuni ekaresiaehu uvoruomaje masije hö uvoruomaje aribövioho James Peter John ëho jaburo garomo uvareje: God-ro huë baeromo nörö muoho bojamade höromo na'o Barnabas'o öve ma'enaguoromo uövuareje: Jemë'o no'o uehore gemuoho javuajëjo. Noro Jew rajo nosi sa'are jöho majëhibe jijihoi jemëro sa'a ioro'ioro rajo jabesi sa'aro va'o jöho majëhibe jirehonövorëjo.

<sup>10</sup> Sa'a ioro'ioro rajo jabesi sa'aro va'o majëhibe jirehorëjo röhu nosi aribövi inömo bogojëvajoho ëho uehorövëvonövorëjo. Ekaresia a masijohuro ëhi uövuareje. Röhu ëhi jië'e huë baejë'e muoho iae naro vae'i nimobe rovë'e jeve.

*Antioch amore Peter-hu mu sisë vaejamu Paul-hu jögoru bojamade jöhoje.*

<sup>11</sup> Röhu Peter Antioch amore rovamu naro hesi nuniro hu jö aho'ahamijodeje hu mu sisë vaejë'ego.

<sup>12</sup> Naehu ëhi uavode hesi bëhoho urimoho Peter-hu aevoromo Antioch rovadevare evare uvadeje: Jew rajo mu vaeromo sino tarivarue Christian aribövioho no'o Jew rajo mu bogo vaeromo sino bogo tarivarue Christian aribövioho jabu'o gemuoho javuajë uvoromo sa'a ioro'ioro rajo Christian ö mueno'ohu'o gemuoro hiromo ioho inövadeje. Gemuore hiromo i ibe rovadoho gavade Jew rajohuro James-arire jioromo ro Antioch raromamu gëgorovo uvadeje: Ësino tarivojöro nimarue ariböviehu gevë'oho na Jew rajo mu bogo vaejarue ariböviohu'o gemuore hijamu gevë'oho bijönimoruomo'ajëromo juhuonivoromo sa'a ioro'ioro rajohu'o i ijadoho vuonugo'i rori'o va'o hijadeje.

<sup>13</sup> Peter-ro juhuonivoromo ëhi jië'e sareri sareri'e muoho vaejamu gagorovo Jew rajo ioro'ioroho jaburo sa'a ioro'ioro rajohu'o gemuore



raromoromo i ue'aharoho vuonugo'i jabu'o ëma sarere rori'o raromareje. Rori'o raromamu gëgorovo Barnabas-ro hu'o ëma sarere va'o rori'o hi-jadeje.

<sup>14</sup> Jabumëro ëhi'amu gëgorovo Paul naro mae gëromo uvodeje: Jabumë God-are jö maho bogo avo'avoho uehorovoromo ahoriroho va'aruëromo ëhuni ri'öromo Christian ae aho'obëhe jabesi nuniro namiromo Peter-are örire uavodeje: Ja Jew rajo ae javajëjo röhu Jew rajo muoho bogo uehorovo'i sa'a ioro'iorehu raromaruëhi ëhi hibe rovë'e javajëjo. Ëhi jië'o'ho ja rabëni sa'a ioro'ioro rajoho gorëvanuëjo. Jabu gorëvanuohuni dadibijiohoromo Jew rajo muoho baejörajo.

*God-are nunire mae riravo'iröhe hesi öroho ma-gemu jie. Iesu mae uehorovoromo ëhuro mae riravo'ëjo. Ëhesi jöhoje.*

<sup>15</sup> Röhu no Jew rajo mae javue nosi hijo miono'o'ho Jew raje jiobe rovë'ëro. No bogo God-are jögoru rumo'e sa'a ioro'ioro rajoho javuo'i no Jew raje javue.

<sup>16</sup> Röhu noro garomo uvarueje: Ae rahu rahu God-are nunire mae nami'i nimë'o'ho hu bogo Jew rajo nosi jögoroho ejego God-ro garomo hesi sisëho u'ovahego hesi nuniroho maho namijaje höjo. Öroho bogo ëhioho höjo. A'i Iesu Keriso mae uehorovego God-ro hesi sisëho u'ovahego hesi nunire mae namijaje höjo. Mae nami'iröhe hesi öroho iae ëhi höjo. Noro ëhi gavë'ëro ëhuni Jew rajo Christian aribövioho no'o Iesu Keriso mae uehorovë'e javue noro hu mae uehorovoromo ëhuro God-are nunire mae riravo'iröhëni. No bijönague mu vaeröhe jögoru e'i ë'o garomo ëhuro hesi nunire mae riravo'i ë'o ga'iröhoho. Ëhesi bëhoho bogo ae gemu vadu'o'ho noehu mu vaeröhe jögoroho ejego God-ro göromo nosi sisëho u'ovahuego hesi nuniroho maho riravarueje.

<sup>17</sup> Jew rajo Christian aribövioho no God-are nunire mae riravo'i naguajoho no bogo Jew rajo nosi jögoroho uehorovo'i a'i no nimarueje God-ro no Keriso'o gemu mae ramuego ëhuro God-are nunire mae riravoröhëni. Ëhi nimoromo no'o Jew rajo jögoru rumo'e aribövie sa'a ioro'ioro rajoho va'ëne javuanovajeje. Ëhi jië'o'ho na no ëma uehorovoromo uvo'ëjo: God-hu Jew rajo bojamuade jögoroho Kerisoro ajamuego ahoromo mu sisë vaejarue höjo. Bogo mae bogo ëhioho uvo'ëjo.

<sup>18</sup> Naro mami'e uëbe rovodeje: God-are nunire mae riravo'ië'iroho bogo Jew rajo jögoroho ejego ëhuro God-ro nosi sisëho u'ovahuego hesi nuniroho maho riravarue höjo. God-are nunire mae riravo'iröhe öroho bogo ëhioho höjo. Röhu naehu ëhi majëhinövode jöho ahoromo uë'ibejo: Jew rajo jögoroho ejego God-ro göromo nosi sisëho u'ovahuego hesi nunire mae riravarue hö uë'ibejo naro sisë'i majëhiromo ëhuro God-are jögoroho aho'ibejo. Röhu bogo ëhioho majëhi'ëjo.

<sup>19</sup> Naro mami'e uehorovoromo uvodeje: Jew rajo jögoru ejë'o'ho ëhuro na God-are nunire mae nami'ejöromo Jew rajo jögoroho e'i sivoho gajuvo gavode bogo eni jevamu gagorovo uvodeje: Noehu God-are nunire mae riravo'iröhe öroho bogo ëhioho höromo ëhi uehorovodoho vuonugodeje. Na ëhi jië'e uehoroho ioro'iore gemu vuonugë'e jeve. Aehu vuovoromo ioro'iore gemu va'aruëhi na ëhi ioro'iore gemu ë öroho vuonugë'e jeve ëhuro na i'ovoromo hiromo God-are muohuremu vaebe juvo'iroadëni. Keriso korosire guomadevare evare na hu'o korosire ano taamevamu guomevanovadeje.

20 Guomevël'ëro ëhu'ëro na bogo nasi darugoroho o nasi uehororoho hi'irögoro a'i Kerisoro nasi dë vövöbajo'ere hiromo darugoho uehoroho bojemego hijajeje. Sa'are hijajoho God-are Harihoho mae uehorovoromo ëhuro ave sa'aroho hijajeje huro na uehorovevoromo nasi jöëni guomorovë'ëro jië'ëro.

21 God-hu huë mae baejavuoromo hesi Harihoho suvuoroho bojamuijadeje. Ësuvuoroho na bogo mae bogo juahamiromo uvo'ejo: Na bogo Keriso gemu uehorovo'i a'i Jew rajo nosi jögoroho e ga'ejöjo God-ro geromo nasi sisëho u'ovehego hesi nunire mae nami'irodëni. Na bogo ëhioho uvo'ejo. Noro Jew rajo jögoroho ejego God-ro göromo nosi sisëho u'ovahuego hesi nunire mae riravo'ibejo Keriso nosi sisënioho ma-imo guomë'e jio'ibejo. Röhu bogo ëhiohoje. Ëhuni Keriso-are suvuoroho bogo juahovoromo Jew rajo jögoroho röhu maho uehorovo'ejo.

### 3

*God-hu nosi aru'aho ajamujaje hesi bëhoho bogo noehu mu vaeröhe jögoru ejahego God-hu göromo ajamui'i a'i noehu hu mae uehorovego ajamujaje jöhoje.*

1 Vaevë'e Galatia sa'a rajohumë sareri simano rumo'e aribövie jëve. Diehi'amu simanoho sisërëjähë'ëro sisë'ioho uehorovarujeje. Nadi ëhioho uehorovo'ibejarije. Ëhesi bëhoho Iesu Kerisohu korosire guomade jöho naro ma-sama'e majëhijamu jemë ae aho'obëhe hejarijeje. Ëhi hejarijoho röhu diehi'oromo sisë'ioho uehorovarujeje.

2 Ave jöhuremu majehirego na he'iro. God-are Aru'aho baejarije hesi öroho diehi jiadeje. Na jemë Jew rajo jögoroho eromo ëhuro Aru'ahoho mana baejarijeje. O na jemë Keriso-are jöho heromo mae uehorovoromo Aru'ahoho baejarijeje. Iae mae uehorovoromo Aru'ahoho baejarijeje.

3 Röhu jemë diehi'oromo sisë'ioho uehorovarujeje. Aevoromo Keriso-are örire jijiharijevare evare God-are Aru'aho hesi darugoho baeromo jijihonövarijeje. Ëhi jië'ocho diehi'oromo öri vituoho jemesi darugohuremu jijiho'i nëge.

4 Asë'e jemë Keriso-are mu öri bae avohobe rovarijoho na ë muoho ëma sisërë'l'ë'e. Bogo.

5 Iae God-ro hesi Aru'ahoho ma-mabëhe bojëmiromo darugo'e mu masijoho jemesirire vae'amajeje. Rabëni ëhi jië'e darugoho bojëmijajeje. Na jemë Jew rajo jögoroho ejë'ego ëhuni ë hesi manaho darugoho bojëmijajeje. Bogo. A'i jemëro Keriso-are jöho heromo mae uehorovë'ego ëhuni ë'l'ajeje.

6 Röhu Jew rajo nosi bëhoho Abraham ëhi gemuoho jiadeje. Hu'o God mae uehorovoromo ëhuro huë maho baejadeje. Ëhesi jöho God-are surire jajivoromo uvë'eje: Abraham-ro God mae uehorovamu huro ëho garomo uvade höjo: Ëhuro iae hu nasi nunire mae namijajëjo.

7 Ëhuni jemë ga'a'aruje Abraham-are ujo ömo'ömo maho ëho God mae uehorovarue aribövie jio'amo'iramu.

8 Iae God-ro uvadeje: Ijonö bogo Jew rajoho gemu a'i sa'a ioro'ioro rajohu'o nasi örire mae uehorovevë'ohuro ëhuro naro jabesi sisëho u'ovëho'iramu nasi nunire mae riravoruomajë uvoromo ë jö mabëhoho Abraham-are örire majahijadeje. Huhu majahijade jöho God-are surire jajivoromo uvë'eje: God naro ja ajami'iramu ëhuro sa'ae dinö'e dinö'e aho'obëhe nasi huë maho baebe va'oruomajëjo.

<sup>9</sup> Ëhesi bëhoho Abraham-ro God mae uehorovamu God-ro hesi örire ma-mabëhe ajamijë'ëro ëhuni ae rahu God mae uehorovë'o ho God-hu Abraham ajamijadëhi ëhi ma-mabëhe ajamuijajeje.

<sup>10</sup> O ae rahu uvë'o ho: No God-hu bojamuade Jew rajo jögoru ejaho'i ë'ë'o ho ëhuro hesi nunire mae riravo'ejarë uvë'o ho ëhi jië'e aribövioho God-ro i'ue bojëmego bae hesi jëve ë jöho bogo e barëjë'ego. God-are surire jöho ëhi uvë'eje: Mu vaeröhe jögoru surire jajivo'amadoho ae rahu ë jögoru bogo e barëjë'o ho God-are i'uoho bae hesi jëvájëjo.

<sup>11</sup> Aehu hesi darugehu Jew rajo jögoru e'i ë'ë'ohuro bogo ëhuro God-are nuniroho maho riravarueje. Ëjöho iae ma-va'orahoroje. Ëhesi bëhoho God-are surire jöho ëhi uvë'eje: Ae rahu God mae uehorovoromo ëhuro hesi nunire mae riravë'o ho ë ariböviohuremu maroho raromoruomo'ajëjo.

<sup>12</sup> Aehu hesi biriri baeromo Jew rajo jögoru e'iröhoho ëho mue gö jio'i mae uehorovoromo uvë'o ho: Hesi God-ro ajamui'ajë uvë'o ho ëho göje. God-are surire jöho ëhi uvë'eje: Ae rahu Moses-are jögoru e barëjë'ohuro ëhuro maro raromoruomo'ajëjo. Ëho bogo God mae uehorovego God-hu mae ajamui'ajë uvo'iröhe jöho jio'i nosi birivoromo mu vae'iröhe jöhoje.

<sup>13</sup> Röhu noro ë jögoroho ahë'ëro ëhu'ëro i'u börömo ho mana bae hesi javue. Ëi'u börömo bae'iröhoho Kerisoro no'o röromo ë i'uoho baeromo ëhuro noehu bae'ibejaroho tugohahuadeje. Ëhesi jöho God-are surire jajivoromo uvë'eje: A ijo döre iromë'o ho ë hesi bëhoho ë aho God-are i'u börömo ho baejë'ëro jië'ëro ëhuni ijoro ho iromaje höjo. Ëhi jajivë'eje. Röhu Kerisoro ijo döre ëhi iromoromo ëhuro nosi jöëni i'u börömo ho God-aro baeromo ëhuro noehu bae'ibejare i'uoho tugohahuadeje.

<sup>14</sup> Kerisohu nosi i'u ëhi tugohahuade hesi bëhoho iae naro majëhi'ië'e. Urimë'i God-ro Abraham mae uavadeje: U'emu naro jemë mabëhe ajëmi'iramu maro raromo'arujëjo. Röhu Iesu Kerisoro noehu bae'ibejare i'uoho tugohahuadeje ëhuro God-hu Abraham-më ajëmi'iröhëni uavadëhi sa'a ioro'oro rajoho jemë ëhi ajëmijego maro raromo'irarijego. Noehu hu mae uehorovaruhuro ëhuro God-hu hesi Aru'aho bojamui'i uövuadëhi ëhi bojamuijego noro bae'iröhego. Iae ëhuni Kerisoro noehu bae'ibejare i'uoho tugohahuadeje.

*Urimo God-hu hesi aribövi ajëmi'iröhe jögoroho Abraham majahiromo ijönö mu vaeröhe jögoroho Israel rajo bojëmijade ë jögoru niö'i jabesi jöhoje.*

<sup>15</sup> Nasi ö mueno'e noehu ataruëhi jië'e jöho jövo'irögoro ë'e jemëro ëho uehorovego jö bëhoho juvo bu'ö'iröhego. Ae niö'iehu jö gemuore uehorovoromo mae uarovë'o ho: Noehu jörovarue jöho iae ëhi jiemu jio'a'ajë uarovë'o ho aho jö göho bogo baro nosi jö gemuoroho havö'ë'ö o aho'ë'ö.

<sup>16</sup> Ëhesi bëhoho God-ro Abraham'o hesi ujohu'o mae uëbe rovadeje: Naro jemë ajëmi'ejöjo. Röhu God-are surire jajivare jöho bogo uvë'eje: Jasi ujoho aho'obëhe ajëmi'ejö uvo'i a'i uvë'eje: Jasi ujoho ajami'ejöjo. Ëhesi bëhoho a uje gemu ajami'iröhëni uavadeje. Ujoho iae Keriso jiadeje.

<sup>17</sup> Ëhesi bëhoho naro majëhi'irögoro ë'e. Urimë'i God-ro Abraham-are örire jögoroho bojamiromo jöho majahi barëromo röhu uavadeje: Na jövode jöho bogo vuonugo'i iae na ajëmi'ejöjo. Ëhi uavë'ëro va'o va'o va'o vadune aho'obëhe 430 ëmino'e barëjamu ijönö mu vaenövo'iröhe jögoroho bojëmijadeje. Bojëmamu röhu bogo ëhuro God-hu ajëmi'iröhe jögoru Abraham bojamijadoho tugoho'i a'i God-hu ajëmi'iröhëni mae jövade jöho ëhi jiemu jioje rovadeje.

<sup>18</sup> Noehu mu vaenövoröhe jögoroho ejahoromo ehuro God-are suvuoroho mana bae'ibejo no uvo'ibejo: God-ro no ajamui'i Abraham mae uavë'ëro bogo ehunioho hesi maho bojamui'i a'i huro gavade noro mu mae vaejamu gagorovo iae ehuni hesi suvuoroho mana bojamuade höjo. Röhu bogo ehiohoje. God bogo Abraham-are mu maho garomo hesi suvuoroho manaho bojami'i a'i God-ro no ajamui'i Abraham uavë'ëro ehuni hesi suvuoroho Abraham bojamadeje.

<sup>19</sup> Noehu mu vaenövoröhe jögoru ejahamu God-hu hesi suvuoro bogo mana bojamuijê'oho hu rabëni mu vaenövoröhe jögoroho bojamuadeje. God-ro ajamui'iröhe jöho urimo bojamuijê'ëro ijonö noehu mu vaenövoröhe jögoroho bojamuijadeje noro garomo uvoröhego: No God-are jögoru aharu aribövie javuajêjo. Noehu mu vaenövoröhe jögoroho bojamuijadeje ma-jahuri hebe uehorovobe va'ojuvo God-hu ajami'iröhëni uavade aho Abraham-are uje gemu Kerisoro rovego evare noehu mu vaenövoröhe jögoroho barë'iröhego. Röhu noehu mu vaeröhe jögoru God-hu bojamui'ie'adevaroho evaroho bogo ahoriroho nosi öriroho bojamui'i a'i ë jöho anerae bojëmamu jabumëro rueromo God'o no'o jiarue ririre namiromo nosi öri avohahuonövade aho Moses bojamamu huro ë jöho baeromo no bojamuijadeje. Ëhi'adeje.

<sup>20</sup> Röhu ae göehu göehu jö mevä'oho ae göëro rueromo öroho avohëhego jöho juvo bu'öjajeje. O ae gemuehu jö bojamuijê'oho a göho bogo rueromo jö bojamui'iröhe öroho avohahu'ë'e. Ëhesi bëhoho God-hu no ajamui'iröhe jö Abraham bojamadevaroho huro sivue ë jöho Abraham bojamadeje.

*Noehu mu vaeröhe jögoru God-hu bëhoho rabëni bojamuade jöhoje.*

<sup>21</sup> Ajamui'iröhëro God-ro Abraham jöe gö gö majahijê'ëro röhu ijonö noehu mu vaeröhe jögoroho bojamuadeje. Ëhi ë'adohuro na ehuro urimo uavade ajamui'iröhe jögoru öroho ahadeje. Bogo mae bogo. Ëhesi bëhoho mu vaeröhe jögoroho God-ro bojamuego noro ejahoromo ehuro daruge baeromo maro raromo'ibejo noehu mu vaeröhe jögoru ejaruohuro ehuro God-are nunire mae riravo'ibejo.

<sup>22</sup> Röhu God-are surire ëhi uvë'eje: Ae aho'obëhe dinö'e dinö'e raro-maruohe sisëro ruahö'öjavuë'e höjo. Ëhi jajivë'eje. Ëhu'ëro jië'ëro mu sisë vuonugo'i God-are suvuoro bae'ie'iroho ë hesi öroho ma-gemu jie. Ëöroho Iesu mae uehorovo'iröhohoje. Ae rahu Iesu Keriso mae uehorovë'ohuro ehuro iae God-are suvuoro maho baejarueje Keriso mae uehorovarue aribövioho no God-ro ajamui'i uövuë'ëro jië'ëro.

<sup>23</sup> Noehu Keriso mae uehorovë'oho God-ro ma-marö ramuajajeje. Ëhesi majaho jaruvoje. Röhu urimoho ë maja bogo rovadevare no tövavuë'ëro jië'ëro bogo ruëroho numëroho va'i ma-Jew rajehu mu vaeröhe jögoru hesi ahariremu raromobe rovarëje. Ëhi'obe rovaroho ijonö Keriso mae uehorovo'iröhe öroho huruorohadeje.

<sup>24</sup> Aehu asisö'ö söromo avo'avoho muebejävobe va'ego asisö'ehu ma-aharirehu va'aruëhi Jew rajehu mu vaeröhe jögoroho ëhi jiadeje. No Jew rajo jögoru ahariremu asisö'onö'e raromobe rovamu Kerisoro sa'are rovadeje. Jögoru hesi aharire raromare hesi bëhoho öre röjahuijego noro Keriso mae uehorovoromo ehuro God-are nunire mae riravo'iröhego.

<sup>25</sup> Röhu jaruvoho noehu Keriso mae uehorovo'iröhe majaho rovë'eje. Ëmajaho rovë'ego no bogo ë mu vaeröhe jögoru hesi ahariroho raromarueje.

<sup>26</sup> Jemë ae aho'obëhe Keriso mae uehorovoromo Keriso'o gemuore bimuvë'ëro ëhu'ëro jemë God-are aboji harihu'e jëve.

<sup>27</sup> Ëhesi bëhoho bapataeto vaejarijohuro ëhuro Keriso'o gemuoro bimuvoromo jemëro Keriso-are muoho niögu i'o va'ëne ëhi jemesi sinore io'amë'e jëve.

<sup>28</sup> Ëhuni Jew rajohu'o sa'a ioro'ioro rajohu'o jemë bogo hahagu hahaguho jëvo'i Keriso'o gemuoro havë'e jëve. A jabesi muemu vaejëho'i arijaruje ahu'o a uno'ohu'o bogo hahagu hahaguho jëvo'i Keriso'o gemuoro havë'e jëve. A'o magonaho'o bogo hahagu hahaguho jëvo'i Iesu Keriso'o gemuoro havë'e jëve. Jemë ae aho'obëhe Iesu Keriso'o gemuoro jëve.

<sup>29</sup> Keriso-are ariböviëro jëvë'ëro ëhu'ëro jemë Abraham-are uje jëve. Ëhuni mami'e God-ro Abraham'o hesi ujohu'o diehi ajamui'iröhëni Abraham uavadëhi iae jemë ëhi ajëmi'iramu mae jëvo'ë'e.

## 4

*Iesuro sa'are rueromo ajamuijë'ëro ëhu'ëro no bogo ma-muemu vaemu vaejarue aribövioho va'ëne javuo'i God-are aboji harihu'e javue. Ëhesi jöhoje.*

<sup>1</sup> Röhu ave uhu jöhu'o uë'ië'e. Harihoho bise'eje röhu ijonö vavu hesi sionoho bae'ië'ëro ëhu'ëro ë vavuehu muebe'amaje inömoho hesi harihu hesi ihoro jio'ame. Ëhi jie röhu a bise'ego mu vaemu vaejarue ahuni aehu ë'aruëhi harihu hesi örire ëhi ë'arueje.

<sup>2</sup> Aëro hu jögoroho bojamibe hesi maho sisëho muebejahobe va'arueje hujeji hesi vavuehu uvade majaho rueröhego.

<sup>3</sup> No ëhi javuadeje. Urimoho no asisö'o va'ëne javuadeje. Noro uvareje: Aru'ahe gö mue gö masijoho höromo ëma imo ëhemu uehorovoromo muoho vaejëhemu vaejëhonövareje.

<sup>4</sup> Ëhi'obe rovaroho röhu majae eni jiamu gagorovo God-ro hesi Harihoho nugö'öjamu sa'are rovadeje. Rovamu ma-magonahëro hu rahadeje. Rahamu hu Jew rajo nosi jögoru aharire jiobe rovadeje

<sup>5</sup> ëhuro Jew rajo jögoru aharire sisë'i raromarohe ajamuego no mae javuoromo God-are aboji harihu'e javuo'iröhego.

<sup>6</sup> Jemë hesi aboji harihu'e jëvë'ego God-ro hesi Harihu hesi Aru'ahoho nugö'öjamu nosi dë vövöbajo'ere abo hijë'ëro uvajeje: Apajo.

<sup>7</sup> Ëhu'ëro jië'ëro jemë ae gemu gemu bogo ma-mu vaemu vaejaruje aribövioho jëvo'i a'i God-are aboji harihu'e jëve. Hesi aboji harihu'ëro jëvë'ëro God-ro hesi darugoho bövioho bise'ohe jemë i'imëmi'iramu ujuoho'aruje.

*Paul-hu Galatia ekaresia jabesi jöëni nurunurumade jöhoje.*

<sup>8</sup> Röhu urimoho God-are jöho bogo henövarijeje. God-are jö bogo hejarijevare evare ëma sarerivoromo uvonövarijeje: Aru'ahoho bövioho bise'ohe masije höromo ëhemu uehorovoromo sisë'i raromonövarijeje.

<sup>9</sup> O jaruvoho jemë iae God birohë'e jëve ë hesi bëhoho God-ro jemë birohëvë'ëro. Röhu jemë mami'e asisö'o majëhijanovarue jögorohemu ejëhoromo aru'ahe gö gö masije hö uehorovarijëhi ëhi asisö'o majëhijanovarue jögoru göho ejëharujeje. Asisö'o majëhijanovarue jögoroho ejëhoromo sarerivoromo uvarujeje: No Jew rajo mu vaeröhe jögoru ejëhë'ohe ëhuro God-are nunire mae riravo'ejarëjo. Röhu ejëhë'ohe bogo ëhuro maho riravo'aruje ë jöho bogo eni jië'ëro.

<sup>10</sup> Ĕjögoroho ejëhoromo gavarujoho majaro huraro manaeroro vaduniro rovego gagorovo uvarujeje: Ĕmajaho maja masijo rue'amaje majaho höjo. Ĕmajaho avo'avoho uehorovë'oho God-ro göromo rajahui'ajëjo. Röhu ëhi jië'oho sisë'i uehorovarujeje.

<sup>11</sup> Na jemesi jöëni juhuoninegavave naehu jemëni vaebe rovode muoho sisërëjööni.

<sup>12</sup> O asë'e nasi ö mueno'e na jemesi jöëni vavaenego'ego uëve. Naehu majëhi'ië'aje jöho nadi bijönimore. Jemë bogo Jew rajoho jëvë'ëro Jew rajo mu vaeröhe jögoroho bogo uehorovonövarijeje. Na Jew raje jeve röhu Jew rajo mu vaeröhe jögrohemu uehorovodoho vuonugë'ëro jemë va'ëne jeve. Ĕhuni naehu God-are nunire mae nami'irodëro Jew rajo jögoru bogo uehorovo'i Keriso gemu mae uehorovajëhi jemë'o ëhi ë'ore. Urimoho jemë na bogo sisë'ioho vaejevonövarijeje.

<sup>13</sup> Jemë'o uehorovore. Naehu jemë'o aevo'i hiromo Keriso-are jö ma majëhijode hesi bëhoho na guomo guome baegoro jemë'o aevo'i hiromo jöho majëhijodeje.

<sup>14</sup> Nasi guomo guomohuro jemë esi'esiëmanovodeje. Röhu jemë na bogo bijönegoromo nuni juhuoninioho baejarijeje. A'i ma-mabëhe rajehijarijeje. God-are aneraëro o Iesu Kerisoro jemesi örire ö'ego mabëhe rajahi'ibejarijëhi ëhi gemuoho jemëro na rajehijarijeje.

<sup>15</sup> Rajehiromo evare majare nasi jöëni nimoroho avoharijeje. O jaruvoho bogo ëhioho nimoroharujeje. Ĕhesi bëhoho rabënivo bogo nasi jöënioho nimoroharujeje. O urimoho jemë eni jëvo'ibejo ri'öromo jemesi nuni baje jahoromo bojemi'ibejarije o bövie bise'e bojemi'ibejarije. Ajemiromo ëhi'o'ibejarije. Iae na mae uëve.

<sup>16</sup> Jemë ëhi rajehijarijeje. O jaruvo naehu jemë God-are jö maemu majëhijodoho na jemë ëhuni uvö: Nöröro nue huodaguoromo ë'ajëjo.

<sup>17</sup> O Jew raje sareri jö röjëhijarue aribövioho ëho jaburo jemë sanuëmiromo rajëhijarueje jemëro jabesi ijore ijore jijiho'irarijego. Röhu sisë'i uehorovoromo ëma döëremu ë'arueje. Ĕhesi bëhoho jaburo nimö jemëro Paul na uehorovevarujoho vuonugo'i jabumë gemu rajëhi'irarijego.

<sup>18</sup> Röhu jemëro mu maemu uehorovo'irarijego aehu jemë rajëhijë'oho ëho bogo sisëhuje. Naehu jemë'o hiromo jemë rajëhijë'oho o na jemë'oho bogojevamu ae göehu jemë rajëhijë'oho iae maeje.

<sup>19</sup> O asë'e nasi aboji harihu'ohumë vaevë'e jëve. Magonahehu raho'i hara'uoromo huë vavaene börömo baeromo harihu baegoro evare huë ma baejaruëhi na'o ëhi jeve. Na'o jemesi jöëni huë vavaene bogo bise'oho baeje hujeji Kerisohu uehorovajëhi jemë'o ëhi uehorovo'irarijego.

<sup>20</sup> O asë'e avevejö'oho naro jemë'o hi'ibejo na dë mae jevo'ibejo. Jemë'o hiromo naehu uru'ö jö jajivajoho vuonugo'i jöho ma-u'emu majëhi'ibejo. Röhu na jemesi jöëni uehorovajoho bogo eni jevoromo ëhuro nurunurueje.

*Magonahe niö'i jabesi ihoho Hagar'o Sarah'o jabesi uhu jöhoje.*

<sup>21</sup> Jemë ae göëro sarerivoromo uvarujeje: Jew rajo mu vaeröhe jögoru noehu birivoromo ejahë'oho ëhuro God-are nunire mae riravo'ëjarëromo ë jögrohemu uehorovarujeje. Jemë ë jögoroho iae uehorovarujeje röhu hesi jöho bogo avoho hejarujeje.

<sup>22</sup> Ĕjemëhu bogo avoho hejaruje jöho naro majëhi'ië'e. Urimoho Abraham harihe niö'i jëvade höjo. Harihu göho hesi muemu vaejahaje magonaho ihe Hagar-ro rahade höjo. Harihu göho hesi ihoho Isaac hesi ma-hiromo baruohu'o juvaje magonahohuro rahade höjo.

<sup>23</sup> Röhu harihu göho muemu vaejahaje magonahohuro nosi magonahehu ë'aruëhi ëhi'oromo dë'iraeromo hesi harihoho rahade höjo. A'i harihu göho Isaac God-ro Abraham ajami'i uavadohuro ëhuro vaboro mae dë tiojë'ohuro rahade höjo. Ëhi'are höjo.

<sup>24-25</sup> Röhu ëho bisemu uhu jöe jianove. Magonahe niö'i jabesi bëhoho iae God-hu hesi aribövi muebejavuo'iröhe jögore niö'i he'iröhoho jëve. Abraham-are muemu vaejaje magonahe Hagar-are bëhoho ëho God-hu Jew rajo mu vaeröhe jögoru bojamamu Moses-hu Arabia sa'are Sinai dahorure hiromo baeromo bojamuadeje. Ëhesi bëhoho Hagar-hu avare muemu vaeromo sisë'i hijadëhi Moses-hu bojamuade jö hesi ijore ijore jijiharue ariböviohuro sarerivoromo uvarueje: Noehu nosi biririvoromo ë jö ejahë'ohuro ëhuro God-are nunire mae riravo'ëjarëromo ë muohemu vae'i sivoho gavarueje. Ëhu'ëro Hagar-hu avare muemu vaeromo sisë'i hijadëhi ë ariböviohuro ëhi sisë'i raromarueje. Jaruvo jiaje Jerusalem amo rajohu'o Jew rajo ioro'iorohu'o ëhi jië'e muohuremu vaeromo sisë'i raromarueje.

<sup>26</sup> A'i Jerusalem amo göho bogo sa'aroho jio'i ö'idöre jiaje amore jioruo-maje ariböviohuro uvarueje: Bogo nosi biriroho baeromo God-are nuniroho maho riravo'i a'i Kerisoro ajamuego God-are nuniroho maho riravarue hö uvoromo bogo muoho sivohoromo sisë'ioho raromo'i mae raromarueje. Röhu ë amo hesi ado sirino'oho Keriso-are aribövie no javue.

<sup>27</sup> Ëhesi jöho God-are surire uhu'e uvë'eje:

Dë tiojë'e magonahoho jero sine sasohonëjo.

Bogo rahoromo vi'ehi baejanue magonahoho jö'e dadovoromo nimorohonëjo.

Uvonëjo: Baru'o hijaje magonahoho ado sirino'oho ma-jianovo'i

baruehu remo va'ade magonahoho ijonöho ado sirino'e marohë'e mae jevo'ajëjo.

<sup>28</sup> Nasi ö mueno'e God-hu Abraham ajami'iröhe jö bojamijadohuro ëhuro hesi vaboro mahuro Isaac rahadeje. God-hu ajami'iröhe jö Abraham bojamijadohuro ëhuro Isaac baejadëhi ëhi God-hu no ajamui'iröhëro Abraham mae uavadohuro ëhuro jemë God-are aboji harihu'e jëve.

<sup>29</sup> Röhu göho sa'are magonahehu ë'aruëhi ëhi'oromo hesi ma-rahade harihohuro ri'öromo God-are Aru'ahehu vëmu ajamamu rahade harihe Isaac huë vavaene bojaminövade höjo. Jaruvoho iae ëhi gemuohoje. Sa'are mararomarue ëhi jië'e ariböviohuro ri'öromo God-are Aru'ahehu ajamuijego i'ovoromo raromarue aribövioho huë vavaene bojamuiruomajeje.

<sup>30</sup> Röhu huë vavaeni bojamuijarue aribövi jabesi jöho God-are surire ëhi uvë'eje: Muemu vaejaje magonaho hesi harihohuro mae hijaje magonaho hesi harihohu'o gemuoroho bogo namiromo vavu jasi sionoho baeromo bövioho bise'oho bae'a'ajëjo. Ëhuni muemu vaejahaje vëmohu'o harihohu'o babu'öjëvego rori'o va'irarëjo.

<sup>31</sup> Nasi ö mueno'e Keriso-are aribövioho no bogo avare muemu vaeromo sisë'i hijade magonaho hesi aboji harihu'ehu javuanovo'i a'i vaboro maehu Abraham'o mae hiromo juvaje magonaho hesi aboji harihu'o va'ëne javuanove.

## 5

*Röhu maho bogo sisë'ioho raromo'i biririvoromo mae raromo'iröhe jöhoje.*

<sup>1</sup> No bogo Jew rajo mu vaeröhe hesi darugoroho raromoli mae raromol'iröhego ehuni Kerisoro no maroho ramuadeje. Ehu'e jiaje nadi röhu maho ehi jië'e mu hesi darugoroho va'o raromoli a'i biririvo riravoromo maro raromore.

<sup>2</sup> Röhu ave jöhuremu here. Paul naro majehi'ie'e. Aehu jemë sarerëmiromo uëvaruoho: Jew rajehu ë'aruëhi jemë'o ae uëvego jaburo jemesi sinoho tarivëho'irarëjo ehuro jemë God-are nunire mae riravo'irarije ehi uëvaruoho nadi ejëhore. Ejëhë'o ho jemë bogo Keriso gemu mae uehorovo'i Jew rajo jabesi muohu'o uehorovo'aruje ehuro God-are nunire mae riravo'irarijëro. Jemëhu ehi uehorovë'o ho Kerisoro diehi ajëmi'ë'e God-are nunire mae riravo'irarijëgo. Bogo ajëmi'ë'e.

<sup>3</sup> Röhu ave jö röhu maho majehi'ie'ajoho jemesi ehuremu here. Ae rahu Jew rajo jögoru eromo uëvë'o ho: Nosi sinoho tarivahuohego no God-are nunire mae riravo'irarë uëvë'o ho Jew rajo jögoru vituohu'o aho'obëhe e barë'iröhoho ehi jië'e i'u'e muoho baerumol'ë'e.

<sup>4</sup> O jemë ae göëro Jew rajo jögoru hesi ijore ijore jijiharujeje ehuro God-are nunire mae riravo'irarijëro. Ehi ë'arujohuro ehuro Keriso boremi'öjë'e jëve. Keriso boremi'öromo ehuro God-hu huë baeromo jemë ajëmi'iröhe mu öroho tugohë'e jëve.

<sup>5</sup> A'i no God-are Aru'ahohuro ajamuijë'ëro ehuro Keriso mae uehorovoromo uvarueje: O mabëhe höjo. U'emu God-are nunire mae riravo'ejarëromo ehuni huë mae raromoromo muebejö ehi javuoröhego.

<sup>6</sup> No Iesu Keriso'o gemuore javuë'iroho Jew rajehu ë'aruëhi nosi sino tarivahuë'o ho o bogo tarivahuë'o ho iae hesije. Keriso mae uehorovoromo a huë baejëvë'o ho ehemu börömohoje.

<sup>7</sup> Urimoho jemë mu mabëhe vaebe rovarijeje. Röhu God-are jö ma ejahobe rovarijoho raro ahëvamu vuonugarijeje.

<sup>8</sup> Bogo God-hu dinëmijadeje jemëro Keriso-are jöho vuonugojöro ë hesi bëhoho huro jemë hesinö rinëgajëro jië'ëro.

<sup>9</sup> Aëro ave uhu jöho atoromo uvoruomajeje: Dë huaje osoho ma-bisemu jioromo rumorovoromo ioho börömo mae dë huaje höjo. Ehesi bëhoho mu sisëro rumorovoromo börömorijajeje. Sareri jö röjëhijarue aribövioho nadi ejëhore. Jabesi jö sisëhuro jemë rumorovëvo'ë'e.

<sup>10</sup> Ehi jie röhu jemë'o na'o Badare gemuore javuë'ego naro jemesi örire mae uehorovoromo uvajeje: Jemë jö maho bogo vuonugoromo jö göho uehorovo'arujëjo. O jö göho naro uvajeje: Jemesi simano ijumëhaje aho nani a böröme o nani a bise'e höjo. Iae hesi höjo. Röhu ë ahuro God-are i'uoho iae bae'a'ajëjo. Na ehi uehorove.

<sup>11</sup> Nasi ö mueno'e naro urimo ae uënövodeje: Jemë God-are nunire mae riravo'ie'iroho Jew rajo nosi jögoroho eromo jemesi sinoho tarivorëjo. Sino tarivë'o ho ehuro God-are nunire mae riravo'arujëjo. Ehi jië'e jö majëhinövodoho vuonugë'e jeve. Röhu aëro sareri'e atoromo uvarueje: Nörö ë jöho bogo vuonugë'e höjo. Röhu ehi jië'e jöho majëhi'ibejo aho nasi öriroho bogo bijönimoruomol'ibejo. A'i Jew rajo jögoru ejahol'iröhe jöho na bogo majëhijajeje. Ehuni aëro Kerisohu korosire guomade jö naehu majëhijajoho bijönimoruomajeje.

<sup>12</sup> O jemesi simano huotovëharue aribövioho sareri aribövie jioruome. Jabumë sino tarivo'i nimë'o ho rabëni sinoho bogo tarivo barë naho nahovoromo ruruhö'öjarueje.



13 Nasi ö mueno'e God-hu hesinö rinëgade hesi bëhoho jemëro bogo Jew rajo mu vaeröhe jö hesi darugoroho raromo'i a'i mae raromo'irarijago. Ëhi jie röhu nadi uvore: Ëmu vaeröhe jö hesi darugoroho bogo raromo'i mae raromaruëromo jemesi sinehu nimaje mu sisëho vae'i a'i göëro göho huë baerovoromo muoho ajamirovore.

14 God-hu Jew rajo bojamuijade jögoru hesi bëhoho ma-gemuje. Jaehu jasi arijo'arije rajahirovanuëhi jasi ae gemuoho ëhi rajahinëjo.

15 Röhu jemë mahehu öehu muorovanovoromo hutitimobe jijihë'oho gavë'i ëhi jië'oho ë'ore. Ëhuro ijumorovo barë'aruje.

*Sinohuremu nimoromo vaejarue muohu'o God-are Aru'ahehu nosi dë vövöbajo'o huotovahuego vaejarue muohu'o ë mu niö'i jabesi jöhoje.*

16 A'i ave jöho na uëve. Ua'i arirego God-are Aru'ahohuro jemesi dë vövöbajo'oho huotovëho'iro maro raromo jijihonövo'irarije. Ëhi ë'ë'oho jemesi sinehu nimaje mu sisëho bogo enövo'aruje.

17 Sinehu nimajohuro God-are Aru'ahehu nimajoho nijio'irae'i God-are Aru'ahehu nimajohuro sinehu nimajoho nijio'iraejajeje. Ëmu niö'iohuro ëhi umogihorovajeje. Ëhu'ëro jië'ëro jemë mu rabe vae'i nëgë'oho bogo eni jëve.

18 Röhu God-are Aru'aho hesi ijore ijore jijiharujoho ëhuro bogo uvo'a'aruje: Nosi biriroho baeromo mu vaeröhe jögoroho ejahoromo ëhuro God-are nunire mae riravo'ejarëromo ë jögoroho bogo uehorovo'anue.

19 Röhu sinehu nimaje mu sisëho diehi jio'amajoho iae va'orahoro jie. Ëhi jië'e mu vaejë'iroho öëro jijihanovarueje. Va'inumi'e muoho vaejarueje. Biriri'övoromo bövie bise'e ëma ë'arujeje.

20 Aehu avohare inömo sisëho masije höromo uvene aho röjahijarujeje. Iro oso'e vaejarueje. Nue huodamirovarueje. Muorovarueje. Ae gö jabesi mu mahuni dë vörönimarueje. Vörö'iraejarueje. Ae gö iosirami'iröhohuremu uehorovarueje. Bogo agane gemuoho vaerovo'i adovorovoromo uehore gö gö baejarueje.

21 Ae gö jabesi böviëni bise'ëni ganiganimarueje. Jove iromo simane huotorovarueje. Jove iromo simane sisërëromo bövie bise'e ë'arujeje. Ëhi jië'e mue gö gö ë'arujeje. Naehu uëvodëhi röhu maho uë'ejo: Ëhi jië'e mu vaejë'oho God-hu muebejaje öri ari'eroho bogo va'oromo maroho raromoruomo'ajëjo. Sinehu nimaje mu sisë hesi bëhoho ëhije.

22 A'i God-are Aru'ahehu dë vövöbajo'o ri'öjähë'ohuro ëhuro ae gö uehorovëvarueje. Nimoroharujeje. Huë mae raromarujeje. Ma-taemorovoromo sisëho uehorovoromo vuonugarueje. Huë baeromo ajëmijarujeje. Mu mae vaejarueje. Biririvarueje.

23 Bogo döroho bamorovo'i ma-avoho raromarujeje. Taemo raromarujeje. Ëhi jië'e muoho mu vaeröhe jögorohuro bogo ahajeje.

24 Ae rahu Iesu Keriso-are aribövi javuë'oho Kerisohu korosire ijumor-ovadëhi ëhi nosi uehoro sisëho o nosi sinehu bövi bise'o nimajoho ëho no ioro'ioremu ijumë'e javue.

25 God-are Aru'ahohuro gemuëro darugoho bojamuijë'ëro ëhu'ëro maro raromarujeje. Ëhuni hesi Aru'ahehu diehi jië'e mu nimë'oho ëhuremu vaebe jijihonövo'ejo.

26 No bogo nosi sivuoho uehorovoromo döroho bamorovoromo bogo ri'öromo göëro gö hesi dëho iahoromo jö göho göho ato'ejo. O ae gö hesi mu maho garomo bogo dëho vörönimo'ejo.

## 6

*Ae göehu gö ajamirovoromo i'u'e mu nigemahorovo'iröhe jöhoje.*

<sup>1</sup> Nasi ö mueno'e ga'irarije ae gemu mu sisë vaejamu gavë'o'oho God-are Aru'aho ejaharuje aribövioho jemëro ëhi jië'e aho ma-u'emu ajamirego hu mu sisëho vuonugo'i röhu maho avo'avoho juvo'irovo. Röhu jemesi arijo'arije avoho garorovoromo ajamire. Sisëhuro jemesi dë vövöbajo'ere bijëhego jemë'o ëhi jië'e mu sisëho vaejago rireromëvojöëni uëve.

<sup>2</sup> Uehoro sisë huë vavaene rabe rovë'o'oho ajamirovoromo nigemahorovore. Ëhi ë'ë'o'oho Kerisohu bojamuade jögoroho ejaho'aruje.

<sup>3</sup> O ae gö jabesi sivue uehorovoromo uvë'o'oho: No a masijëro javuë'ëro aho bogo ajëmi'ëjarë uvë'o'oho ëma sareramirovarueje.

<sup>4</sup> Ae gemu gemu jemesi muoho sivu sivue mevorovoromo gare mae o sisë vaejë'e jëvego. Mae vaejë'e jëvamu gavë'o'oho jemesi muohuremu garomo nimorohë'i jijiho'aruje. Bogo ae gö jabesi muohu'o jemesirohu'o gemuoroho havoromo garomo uvo'a'aruje: Nosi muohuro jabesiroho iosiramijajëromomo nimoronimorohë'i jijiho'aruje.

<sup>5</sup> Ëhesi bëhoho ae gemu gemu mu diehi diehi vaejaroho ë hesi manaho ëhi baerumomo'ë'e God-ro ëhi bamë'ëro.

<sup>6</sup> Aehu Keriso-are jö bëhi röjëhijamu jemëhu hebe va'ë'o'oho bövie bise'e mana ajëmire. Ëhi jië'o'oho iae maeje.

<sup>7</sup> Nadi sareramirovore. A vadu'o'oho God bogo sarerami hesi jëve. Diehi jië'e ijo bajo öjë'o'oho iae ëhi jië'e nu ano'e gemuoho ri'amo'iramu gagovo'amo'anue.

<sup>8</sup> Ëuhu jö hesi bëhoho ëhi jie. Ja ae rahu sinehu nimajohemu ömë'o'oho ëhuro ijönö sisë mana baeromo guomo'a'anue. A'i Aru'aho hesi mu vaejë'o'oho ëhuro ijönö ma-ioro'ioeremu maro hi'a'anue.

<sup>9</sup> Ëhuni mu ma vaejaruoho bogo u'uvo'ëjo. Bogo u'uvoromo dë vövöbajo'o sisërëroromomo mu vuonugë'o'oho ëho majaho rue'iramu evare mana mabëhe gagovo'ëjo.

<sup>10</sup> Ëhu'ëro jië'ëro maja baejaruire ae aho'obëhe ajëmi'ëjo röhu nosi Christian aganoho avo'avoho ajëminövo'ëjo.

*Ave surire jajivade ijo tugoho'i jöhoje.*

<sup>11</sup> Nasi övehu masijo jajivo'amajoho gare.

<sup>12</sup> Ma-sino hesi muohuni nimoronimorohë'i jijiho'i nëgaje ariböviohuro biririvoromo jemesi örire uëruomajeje: Jew rajo noehu sino tarivaruëhi ëhi jemë'o jemesi sinoho tarivorëjo ëhuro God-are aribövie jëvo'iröhe. Rabëni ëhioho uëruomajeje. Jabumë uehorovoromo uvarueje: Kerisohu korosire guomade jö noehu mae uehorovaruohuni ëhuni nosi sa'ae gemuoho Jew rajëro huë vavaene bojamuiruomoma'ajëjo. Röhu noehu sa'a ioro'ioro rajo uëvë'o'oho: Jemë'o Jew rajo nosi muoho vaeromo sine tarivorë uëvë'o'oho ëhuro nosi sa'a rajohuro huë vavaenoho bogo bojamui'ajëjo. Huë vavaenoho bogo bojamui'ajëromomo ëhuni sa'a ioro'ioro jemesi örire uëvarueje: Jemesi sinoho tarivorego God-are aribövie jëvo'irajo.

<sup>13</sup> Röhu Jew rajo mu vaeromo sino tarivoruomaje ariböviohuro Jew rajo jögoroho bogo avoho ejëhoruomajeje. Röhu jabumë nimö jemëro sinoho tarivego jaburo nimorohë'i uvoruomoma'i: Mabëhëjo. Noro ë aribövioho dinëmijamu Jew rajo nosi muoho baejë'e höjo.

<sup>14</sup> Röhu Paul naro nosi Bada Iesu Kerisohu korosire guomade jöho ëhemu uehorovoromo nimorohë'i juvo'ëjo. Mu ioro'iorohunioho bogo. Rabëni Iesu Kerisohu korosire guomade jöho na ëhuremu uehorovajeje.

Ĕhuremu uehorovoromo naro uvajeje: Ave sa'a hesi mu sisĕho korosiro ano taemĕ'e hĕjo. O sa'arohemu uehorovarue aribĕviohuro uvoruomajeje: Nĕrĕ korosiro ano taemĕ'e hĕjo.

<sup>15</sup> Noehu Jew rajo mu vaeromo sino tarivĕ'o ho o bogo vaeromo sino bogo tarivĕ'o ho ĕho iae hesije. A'i God-hu nosi dĕ vĕvĕbajo'o i'ovahuĕ'o ho ĕhemu bĕrĕmohoje.

<sup>16</sup> Ae rahu naehu uvodĕhi ĕhi uvoromo ijore ijore jijihĕ'o ho God-ro vavaenimoromo ajĕmi'iramu maro raromo'aruje. O God-are aribĕvi ioro'iorohu'o aho'obĕhe ajĕmi'iramu mae raromo'ĕ'o. Na nege God-ro ĕhi ajĕmijĕro.

<sup>17</sup> Rĕhu naehu Iesuare mu vaejamu aehu anegare batatoho sino haho'ere jevo'ame. Ĕhuro ae aho'o garuomajeje na hesi muemu vaejaje ae jevego. Ĕhuni aho nadi ijoho uehoro bĕrĕmoho bojemirĕjo.

<sup>18</sup> Rĕhu nasi ō mueno'e nosi Bada Iesu Kerisoro jemesi aru'ahohu'o jioromo huĕ baeromo ajĕminĕvo'ĕ'e. Ahia mino'e.

## EPHESIANS

*Paul-hu Ephesus ekaresia jejëmijade jöhoje.*

<sup>1</sup> O asë'e God-are aribövi Ephesus amore raromarujoho ae rahu Iesu Keriso'o gemuore jëvego hu gemu uehorovarujohumë God-ro nimamu Iesu Keriso-are apostle jevë'ëro Paul naro jemesi örire jejëmije.

<sup>2</sup> Na nege God nosi Vavuohu'o Bada Iesu Keriso'o huë baeromo ajëmijego maro raromo'irarijego.

*God-hu nosi aru'aho mae ajamui'irögoro Keriso-are jöëni huë mabëhe bojamuijade jöhoje.*

<sup>3</sup> Asë'e God hu mabëheje. Hu nosi Bada Iesu Keriso-are Börömeje o göho hesi Vavueje. Èaho God Vavuoho hu mabëheje. Èhesi bëhoho no Keriso-are ae gemuohuro javuë'ëro Vavuohuro ö'idöre jio'amaje bövioho bise'oho suvuoramui barëjë'eje èhuro nosi aru'ahoho mabëhe jiahuoröhego.

<sup>4</sup> Ni'i'ivadire sa'a bövi bise'o bogo bamadevare evare uvadeje no Keriso'o gemuoro javuë'ëro baejavuego no jö sisë bövie bise'e bogojavuo'i hesi nunire ma-maemu javuoröhego.

Nosi örire dë vövöbajo'e aho'o uehorovavuë'ëro

<sup>5</sup> uvadeje: Ijonö Iesu Kerisoro jabumë ajëmi'iramu èhuro naro gagovëvo'ejöjo nasi aboji harihu'e jioruomoröhego. Hesi simanore nimamu èhi uvadeje.

<sup>6</sup> Èhi jië'e huë mabëhe bojamuijadohuni èhuni no hesi ihoho rajahi'ejo è hesi bëhoho no hesi Harihu Mabëhi hesi agane gemuoho javuamu hu bogo nijio'irae'i ma-ajamuijë'ego.

<sup>7</sup> Ajamui'irögoro hesi Harihoho nugö'öjamu köho rueromo guomadeje. Guomoromo no sisëhu tövavuadoho jiovahuoromo uehorovoromo vuonugahuë'ëro mae javue. Mae javuë'ëro no garomo uvarueje: God hu bogo bise'o vadu'oho ajamui'i börömo mae ajamuijë'e höjo.

<sup>8</sup> Börömo mae ajamuiromo hesi simanoho eni jiego bövie bise'e ga barëjajëro jië'ëro

<sup>9</sup> huhu röjahui'i uvadëhi èhi röjahuijë'eje noro garöhego. Èhesi bëhoho urimë'i God-ro uvadeje: Na muoho èhi èhi vae'ejö uvoromo subivahuobe rovadoho röhu iae röjahuijë'eje no garöhego hu èhi jië'e muoho vae'i nimë'e jiego. Èmu hesi jöho huro urimë'i uehorovoromo uvadeje: Naehu nimaje mu vaejë'iroho naro Keriso ua'ejöjo ajëmi'iröhego.

<sup>10</sup> Muebejuvo majae eni jio'iramu evare è muoho avoho barë'ejöjo. Èmuoho avohoromo bövie bise'e ö'idöre sa'are jio'amajoho Keriso-are uhunö gemuoro bamo'ejöjo huro simanoho jioromo muebe'amoröhego.

<sup>11</sup> O no Keriso-are ae gemuohuro javuë'ëro Vavuohuro baejavuadeje hesi javuoröhego. Hu muoho bövioho bise'oho bogo ëma vae'i a'i hesi simanëro nimego muoho vaejajeje. Èhuni baejavuo'iröhëro mami'e simanore uehorovoromo uvadëhi èhi baejavuadeje.

<sup>12</sup> Èhuni Jew rajoho no aevoromo Keriso uehorovare aribövioho javuë'ego Vavu hesi iho börömoho uehorovoromo rajahi'ejo.

<sup>13</sup> Röhu sa'a gö rajoho jemë'o mue gemuoho baejarijeje. Jemëro God-are jö maho hejarijeje uëvavamu: Jemë sisëro jëvego God-ro baejëvoromo manö bamëvaje höjo. Manö bamëvaje hö uëvamu hegorovo Keriso mae uehorovarijeje. Mae uehorovamu God-ro Keriso-are gemuore havëvoromo

hesi Aru'aho Ma bojamui'i uövuadëhi ëhi bojëmijadeje jemëro ë Aru'ahoho baej'ëro no ae aho'o ëho garomo uvoröhego: Iae jemë God-are aribövie jëvájëjo.

<sup>14</sup> Hesi Aru'aho Maho suvuore bojamuij'ëro uvarueje: Iae mae-ëjo. Maja viture Vavuohuro hesi aboji harihu'o nosi suvuoro vituohu'o iae bojamui'ajëjo. Suvuoro vituoho bojamuiromo ëhuro mu sisëhu rabehe i'uhaguajoho jiovahuo'iramu hesi aribövioho no ma-maroraromo'ëjarëjo. Ëhi uvarueje. Ëhuni hesi iho börömohe uehorovoromo rajahi'ëjo.

*God-hu Ephesus ekaresia ajëmi'iröhego Paul-hu ëninamade jöhoje.*

<sup>15</sup> Ëhu'ëro jië'ëro na hejodeje aëro uvavamu: Jemëro Bada Iesu mae uehorovoromo God-are aribövioho aho'obëhe huë baejëvaruje höjo.

<sup>16</sup> Ëhi ë'aruje hö uvamu hegorovo naehu jemesi jöëni God mae uabe rovodoho bogo vuonugë'e jeve. Ëhi'oromo Vavu hesi örire jemëni ëninamijajeje.

<sup>17</sup> Vavuoho ma-aje gemu hijë'ego nosi Bada Iesu Kerisoro uvajeje: Hu nasi Börömohe höjo. Vavuoho ëhi jië'e ae jië'ego naro hesi örire ëninamijajeje huro jemë ajëmi'iröhego. Ajëmiromo uehoro mae bojëmiromo hesi arijo'arije röjahirovego jemëro hu mae ga'irarijego.

<sup>18</sup> O jemesi simanoho jiovëhego garomo uvo'irarijego: Vavuohuro no hesinö javuojöro uövuë'ëro ëhu'ëro ijonö aji maro raromo'ëjarëjo. O uvo'irarijego: Vavuohuro hesi aboji harihu'oho aji'e suvuore bogo bise'oho vadu'oho börömo bëhe bojamui'iröhëni uvajëjo.

<sup>19</sup> O uvo'irarijego: Hu daruge bogo bise'oho vadu'oho jië'ëro ëhu'ëro hu ma uehorovarue aribövioho ajamuijaje höjo.

<sup>20</sup> Keriso guomamu i'ovade ëhi jië'e daruge gemuohuro no'oho ajamuijajeje. Ëdarugohuro Keriso ajamamu ri'öromo ö'idöre ajiomë'ëro hesi övo manö hiromo

<sup>21</sup> simano vaeruomaje vörö'e aru'ahoho rabe rabe je'ore sa'are ö'idöre dinö'e jioruomajoho iosirëmiromo iho masijo jio'amë'oho iosirëmiromo jaruvo majaho röhu ruëre maja i'oho jioröhoho ëho ihe gö gö masijo jiorovajoho taemëvo'i hu gemu döroho jië'ëje.

<sup>22</sup> Kerisoro ëhi böröme hijamu God-ro bövioho bise'oho hesi uhunö bamaho barëj'ëje huro gemuëro böröme namiromo muebe'amoröhego. Ëhi bamahoromo uavadeje huro gemuëro simane vaeromo ekaresia nosi muoho aho'obëhe muebe barë'iröhego.

<sup>23</sup> Keriso hu simanoho jio'i ekaresiae no övo höru'oho javue. Övo höru'oho javuë'ëro ëhuro simanoho romoromeje. Röhu ë simanohuro ëhuro bövie bise'e ö'idöroho sa'aroho romoromoroje.

## 2

*Nosi aru'aho vuovahuamu God-hu ajamuiromo i'ovahuade jöhoje.*

<sup>1</sup> Röhu urimoho jemesi aru'ahoho vuovëh'e ëma raromo jijihonövarijeje God-are jögoroho ahoromo mu sisë vaej'ëro jië'ëro.

<sup>2</sup> Mu sisë vaeromo ave sa'are öri sisëre jijihonövarijeje. Jijihoromo God döre jio'i aruëre ahore raromarue aru'aho sisë o dinö'e raromarue aru'aho sisë jabesi simano vaejaje ë a hesi ijore ijore jijihonövarijeje. Ëahuro God-are jö bogo eruomaje aribövi jabesi dë vövöbajo'oho huotovëhego mu sisëho vaeruomajeje. Ëa hesi ijore ijore jijihonövarijeje.

<sup>3</sup> God-are jö bogo eruomaje aehu raromo jijiharuëhi ae aho'obëhe no'o urimë'i sinehu nimego simanehu uehorovaje muohuremu vaebe nosi da-jehu nimajire biriri'övoromo ëhi jijihonövareje. Ëhi ë'obe rovë'ëro ëhu'ëro a ioro'iorehu God-are i'u mana baeröhëhi no'o ëhi bae hesi javuadeje.

<sup>4</sup> No ëhi javuadeje röhu God-ro noni vavaenimo avohoromo dë vövöbajole aho'o uehorovavuë'ëro

<sup>5</sup> ëhu'ëro gövuade no hesi jöho ahamu nosi aru'ahoho vuovahuë'e jiamu göromo bogo vuororamui'i Keriso'o gemuore havavuamu nosi aru'ahoho i'ovahuadeje. Hu hesi ma-huë baejëvoromo jemesi örire ëhi ajëmiromo maro babamëvadeje.

<sup>6</sup> Röhu God-ro Keriso'o gemuore havavuoromo no ajamuamu vuovoromo ri'öjë'ëro aru'ahoho i'ovahuë'eje. I'ovahuë'ëro Iesu Keriso'o gemuore havavuoromo ajamuamu no ajiomë'ëro hu'o röhe gemuore raromoromo sa'are mu sisëho ruahö'öjarueje.

<sup>7</sup> Vavuehu ëhi ajamuijade hesi bëhoho maja ijonöho rovego huro röjahuijego no'o a ioro'iorohu'o garomo uvobe va'iröhego: O Iesu Keriso'o gemuoro havavuoromo huë mae bojamuiromo ajamuijë'ëro ëhu'ëro huhu huë baejavuajoho börömo mae höjo.

<sup>8</sup> Ëhesi bëhoho huhu ma-huë baejëvoromo uehoro mae bojëmijadohuro iae ehuro jemë mae uehorovamu gagorovo maro bamëvadeje. Bogo jemesi biriroho baeromo ajamirovo'i a'i hesi God-ro suvuoroho bojëmijë'ëro jemë mae jëve.

<sup>9</sup> Hu bogo uvadeje: Jemë mu ma vaejë'oho maro bamëvo'ejöjo. O bogo vaejë'oho bogajo. Hu ëhi uvo'ibejo aëro nimoronimorohë'i jijihoromo uvoromo'ibejo: Noro nosi ajamirovoromo manö bamorovare höjo.

<sup>10</sup> A'i hesi God-ro no mae avohavuadeje. Huro Iesu Keriso'o gemuore havavuoromo bamavuadeje ehuro noehu vae'iröhe mu ma huhu uehorovadoho ëho vaebe va'iröhego.

*Kerisohu sa'a ioro'ioro rajohu'o Jew rajo ariböviohu'o gemuore gagovavuade jöhoje.*

<sup>11</sup> Ëhuni jemë urimë'i sisë'i raromarijoho uehorovore. Jemë bogo Israel rajo ariböviehu jëvo'i sa'a gö raje jëve. Israel rajohuro jabesi övëro döre muoho vaeromo sinoho tarivë'ëro uëruomajeje: No sine tarivahuë'e ariböviëro javuë'ëro God-are aribövie javuo'i jemë sine bogo tarivëhë'e ariböviëro jëvë'ëro bogo God-are aribövioho jëvajëjo. Jemë ëhi jië'e sine bogo tarivëhë'e aribövie jëvaje urimo diehi raromarijoho uehorovore.

<sup>12</sup> Evare majare jemë bogo Keriso'o gemuoroho jëvo'i Israel rajo God-hu muebejavuajiroho jemë bogo nosi gemuoroho jëvo'i jemesi hahagu raromonövarijeje. God-hu hesi aribövi ajamui'iröhëro mae uövuade jöho jemë bogo hejë'e ma-raromonövarijeje. God-hu ajamuego ijonö ma raromo'iröhe jöho bogo hejë'e God rumo'e jioromo sa'are ëma raromonövarijeje.

<sup>13</sup> Urimoroho jemë God jiaje gemuoroho bogojëvo'i rori'o numori'o jëvadeje. Jaruvoho Iesu Keriso-are ae gemuoho jëvë'ëro Keriso-are köho rueromo guomamu ehuro jemë ro God-are bëhire jëvë'eje.

<sup>14</sup> Keriso hu noni sanu'e mu barovaje ahoje Israel rajohu'o sa'a ioro'ioro rajohu'o gemuoro gagovavuë'ëro. Ëhesi bëhoho Israel rajohu'o sa'a ioro'ioro rajohu'o noni buorunö'e iromo tugohë'ëro gororamirovonövareje. Gororamirovamu Kerisoro araeromo guomoromo ehuro buore dadovanovadeje.

<sup>15</sup> Huro guomoromo Israel rajo nosi jögoroho tugohahuadeje. Mami'e ë jögoroho Israel rajohuro gabe rovaraje jajivoromo uvë'e jiamu: Ëhi ëhi ë'iro ëho ma-garëjo. Ëjöho tugohahuadeje. Tugohahuade hesi bëhoho urimë'i Israel rajoho noro nosi jögoroho e'i sa'a ioro'ioro rajohuro bogo eruomë'ëro ëhu'ëro hahagu hahagu javuajoho Kerisoro nimadeje baeromo hesinö gemu bu'öjego gemuoro raromego ma-i'e gemu javuojöro. Ëhuro Jew rajohu'o sa'a ioro'ioro rajohu'o huë baerovoromo maro raromo'iröhego.

<sup>16</sup> Hu nimadeje korosire guomoromo nu huohuoho tugohahuo'i sino haho'o ho hesi gemuore havavuë'ëro God'o no'o gemuoro huë mae raromo'iröhëro.

<sup>17</sup> Huë mae raromo'iröhëro Kerisoro rueromo ë huë ma jöho majahuijamu rori'o raromarije ariböviohu'o God-are bëhire raromare ariböviohu'o noro ëho hejareje.

<sup>18</sup> Kerisoro söjavuë'ëro ëhuro Israel rajohu'o sa'a ioro'ioro rajohu'o noro Aru'ahë gemu baeromo Vavu hesi bëhire va'arueje.

<sup>19</sup> Ëhu'ëro jië'ëro urimo jemë rori'o raje aruëre anumëre ëma jiji-honövarijoho jaruvoho bogo ëhioho ë'arujeje. Bogo ëhi'o'irögoro God-are aribövi nosi gemuoro jëvoromo hesi aboji harihu'e jëve.

<sup>20</sup> God-are aboji harihu'o ho javu va'ëne javue röhu jemë'o gemuoho jëve. Ëjavu hesi uhunö apostle o jö God-aro baeromo majëhijarue ariböviohuro javuoho banigojiomego Iesu Kerisoro huro munënö'e bönoho namijego ëhuro bibivajeje.

<sup>21</sup> Huro javuoho aho'obëhe ëhi ma'eno titimë'ëro javuoho marëbe va'ajeje God-are osa börömo jiajëhi no ëhi javuoröhego Bada'o gemuoro javuë'ëro.

<sup>22</sup> Röhu jemë'o Keriso'o gemuoro jëvë'ëro God-ro jemë'o hesi javunö'e gemuoro bimuvëvego gemuoro riravarujeje hesi Aru'ahohuro jemë'o jië'ëro.

### 3

*Sa'a ioro'ioro rajo ajëmiromo jabesi örire Keriso-are jö huruoho majëhi'iröhe mu Paul-hu baejade jöhoje.*

<sup>1</sup> God-ro jemesi örire ëhi mae vaejëvë'ëgo ëhuni Paul naro jemëni uehorovoromo God-are örire jöe jövajeje. Jew rajo iho bogo baejarije sa'a ioro'ioro rajo jemesi jöëni naehu uehorovëvoromo Iesu Keriso-are jö majëhijajohuni ëhuni aëro savoji gagore ba'amevë'ëro hije.

<sup>2</sup> Iae jemë hejarijeje God-ro huë mae baejëvoromo ave muoho bojemadeje jemëhu mare raromo'irarijohuni.

<sup>3</sup> God-hu diehi jië'e mu vaeröhëni hesi uhure uehorovadoho huro röjehijamu baejodeje. Ëjöho ma-bisemu jajivë'e jeve.

<sup>4</sup> Naehu jajivodoho jemë adahë'ohuro ëhuro garomo uvo'a'aruje: God-hu Keriso bojami'i uhure uehorovade muoho iae nöröro mae gavë'e höjo.

<sup>5</sup> Ëmuoho urimoho subivahuobe rovadoho avevejö'oho God-ro hesi Aru'ahoho uavamu huro hesi apostle ömo'ömohu'o jö hesirire baeromo majëhijarue ariböviohu'o nosi örire röjahuijamu baejë'e javue.

<sup>6</sup> God-hu uhure uehorovade mu hesi bëhoho aviëhije. Sa'a ioro'ioro rajoho jemëro Jew rajo no'o gemu mae God-are mu maho baeromo nosi sino haho'o ho ma-gemu havorovoromo God-hu Jew rajo huë mae bojamui'iröhëni uvadëhi ëhi Iesu Keriso-are ihoro jemë'o bojëmijego baejarujeje Kerisohu ë'ade jö maho jemesiro rovë'ëro.

<sup>7</sup> Ējō ma hesi muoho God-ro darugo'ëro jië'ëro na huë baejevoromo suvuore bojemadeje naro ë jō hesi muoho vaenövo'irodego.

<sup>8</sup> God-are ae magonahe ioro'ioroho masije jio'amo'i na bise'e jeve. Na ëhi jeve röhu God-ro huë baejevoromo ë muoho bojemijadeje ëhuro Kerisohu huë mae börömo bëhe bojamuaje jō maho sa'a ioro'ioro rajoho majëhibe juvo'irodego. Röhu ë jō hesi bëhoho bogo ga barë hesi javue. Ējōho huro uevadeje naro ëho majëhiromo

<sup>9</sup> rōjëhijego ae aho'obëhe garōhego God-hu hesi uhure uehorovade mu ëhi ëhi a nunire vaejajoho. Ēhuni ë muoho bojemadeje. Bövi bise'o bamade aho God-ro urimo ë muoho hesi simanore uehorovobe subivahuobe rovadeje.

<sup>10</sup> Subivahuobe rovade hesi bëhoho ëhuro avevejō'o ho anera masijohu'o daruge jië'ëro ö'idöre raromarue aribövi ioro'iorohu'o ëho jaburo ekaresiae no göromo uvoruomorōhego: Ojo'e God uehoro mabëhe gö gö hesi örire jië'ëro ëhu'ëro hesi aribövioho ajëmibe rovë'e höjo.

<sup>11</sup> Mami gö'e ëhi'o'i uvadoho Iesu Keriso nosi Bada uavamu huhu nimade muoho vaejahoromo sa'a ioro'ioro rajoho jemë Jew rajo nosi gemuore gagovëvadeje.

<sup>12</sup> Gagovëvë'ëro no hu'o gemuoho javuego noro hu mae uehorovaruëro jië'ëro ëhu'ëro bogo juhuonivo'i uvarueje: Iae hu ajamui'ajë uvoromo God-are bëhire va'oromo nosi jōho majahijarueje.

<sup>13</sup> Ēhuni naro jemë uëve: Naehu jemesi jöëni vi'ehi börömo baejajoho nadi ëho uehorovoromo nasi jöënioho vavaenimoromo u'uhore. Na vi'ehe baeje ëhuro jemë maro raromo'irarijego.

### *Kerisohu börömo bëhe uehorovavuaje jōhoje.*

<sup>14</sup> Röhu God-ro sa'a ioro'ioro rajoho jemë ajëmi'i uövuë'ego ëhuni naro ague aho hiromo Vavu hesi örire jöe jövajeje huro jemë ajëmi'irōhego.

<sup>15</sup> Agane aho'obëhe ö'idöre raromarue sa'are raromarue bamavuade a hesi örire naro jemesi jöëni ëninamiromo uavajeje

<sup>16</sup> hesi ajoho börömo bëhëro jië'ëro huro uavego hesi Aru'ahohuro hesi darugo maho bojëmego jemesi dë vövöbajo'oho biririvëvorōhego.

<sup>17</sup> Naro hu uavajeje jemëro Keriso mae uehorovego huro jemesi dë vövöbajo'ere ioro'ioeremu hi'irōhego. Huro jemë ajëmego ijehu ö'ehu sa'a gagore dirume abue'amë'ëro biririvajëhi o javue sa'a uhure vae abuejë'ëro biririvajëhi ëhi jemëro ae dë vövöbajo'e aho'o uehorovëvoromo ëhuro biririvoromo muoho mae vaebe va'irarijego.

<sup>18</sup> O jemëro God-are aribövi ioro'iorohu'o gemuoro avoho garomo uvo'irarijego: Kerisoro bogo bise'o vadu'oho uehorovavuo'i börömo bëhe uehorovavuo avohaje höjo.

<sup>19</sup> Röhu Kerisohu diehi uehorovavujoho noehu ga barë'iröhoho bogo eni javue. Iae ëhi jie röhu na nege jemëro uvo'irarijego huro ëhi uehorovavuaje hö uvego ëhuro God-are uehoro mahuro mu mahuro jō mahuro bövi bise'o mahuro jemesi dë vövöbajo'oho rarovëvo'irōhego. Na ëhi negego God-are örire jöe jövajeje.

<sup>20</sup> Röhu God-are ihoho mabëhe ua'ejo. Ēhesi bëhoho huro hesi darugoho nosi dë vövöbajo'ere bamahuë'ëro ëhu'ëro huhu ajamuiromo mu masijo vaeröhoho hu eni jie ë hesi bëhoho noehu hu ua gavaruoho o nosi dë vövöbajo'ere uehorovaruoho ëho ma-jianovo'i God-hu no iosiramuiromo mu börömo vaeromo bövie bise'e aho'o nosi örire ajamui'iröhoho hu eni jiajëro jië'ëro.



21 God-ro Iesu Keriso ajamiromo hesi ekaresiahu'o ajamuijē'ego ēhuni hesi ihoho mabēhe ua'ejo ēhi gemu jiemu jiobe va'irōhego.

## 4

*Keriso-are aribōvie no hesi sino haho'e gemuoho javuaje jōhoje.*

<sup>1</sup> God-ro ēhi jemē ajēmijē'ero jiē'ero ave jōho majēhi'iē'e. Naehu Badare jōēni savoji gagore hijajohuni ave jōho ejehore. God-hu jemē hesi aribōvi mae jēvojōro uēvadēhi ēhi mu mae vaejē'i raromo jijihore.

<sup>2</sup> Nadi dōroho bamorovo'i ma-sanuovoromo ae gō jabesi sisēho ga tae-moromo huē baerovore.

<sup>3</sup> O God-are Aru'ahohuro jemē aho'o uehore gemuoho bojēmijaje ē uehoroho ma'enoromo dē vōvōbajo'e gemu bamoromo agane vaerovo gare.

<sup>4</sup> Jemē sino haho'e gemuoho jēve. God-are Aru'ahe gemuoho baejē'e jēve. Aji'e mu bōrōmoho gemu bae'irarijego ēhuni God-ro hesinō jēvojōro uēvadoho muebejarujeje.

<sup>5</sup> Bada gemu uehore gemu bapataeto gemu jēve.

<sup>6</sup> God gemu ae aho'obēhe nosi Vavueje. Huro gemuēro bōrōme namiromo bōvie bise'e aho'o muebejavuoromo ma'enaguo titimoromo nosi dē vōvōbajo'ere hijajeje.

<sup>7</sup> Rōhu Kerisohu no ae gemu gemu suvuro bojamuibe rovadēhi ēhi baebe rovē'e javue ae ajēmi'irōhēro.

<sup>8</sup> Ēhesi jōho God-are surire jajivoromo uvē'eje: Badahu ajiomade-vare evare a sisēho ruahō'ōjēvē'ero tōvēvoromo sō ujuohoromo dō mare ajiomade hōjo. Ajiomoromo suvuroho ae suvurēmijade hōjo. Ēhi jajivē'eje.

<sup>9</sup> Ējō adaharoho ēhi uvē'eje: Badaro ajiomade hōjo. Ēhesi bēhoho bogo ēma ajiomo'i a'i urimo hu sa'are ruvebiromo sa'a uhu mare abuejadeje.

<sup>10</sup> Ruvebiromo abuejade ae gemuohuro ajiomadoho ajio ō'idōho iosiramiromo dō mare ajiomadeje ēhuro ō'idōho sa'aho aho'o huro rarovo barē'irōhēni.

<sup>11</sup> Ēahuro aviēhi jiē'e suvure gō gō bojamuibe va'ē'eje ēhuro noro hesi muoho vaerōhego. A ioro'ioroho apostle mu vaerōhe suvuroho bojamuijadeje. A ioro'ioroho jō God-aro baeromo majēhi'irōhe suvuroho bojamuijadeje. A ioro'ioroho Keriso-are jō ma majēhibe jijihō'irōhe suvuroho bojamuijadeje. A ioro'ioroho hesi aribōvi muebejēvoromo ōri rōjēhi'irōhe suvuroho bojamuijadeje.

<sup>12</sup> Suvuro ēhi bojamuijade hesi bēhoho God-are aribōvioho aho'obēhe noro ē suvuroho baeromo eni javuego gōero gōho ajamirovoromo ēhuro Keriso-are sino haho'e gemuohuro javuē'ero no uehoro mae baebe birire baebe va'ojuvo

<sup>13</sup> hujeji no ae aho'obēhe uehore gemu baeromo God-are Harihoho garomo gemuoro javuorōhego. Ēhi gemuoro javuo'iramu Keriso-are darugohuro bōviēro bise'ero rarovavuo'iramu ēhuro a duvahnō avoho raromo'ejo.

<sup>14</sup> A duvahnō avoho raromo'iramu evare ijonōho bogo asisō'o va'ēnoho javuo'ē'e. Bogo asisō'o va'ēnoho javuo'iramu aehu sareri sareri'e jō barueromo jō huotohuotovoromo bōvi bise'o ēma ōmoromo jō sisē majahuijē'oho ijonōho bogo ejēho'ejo. Bogo ejēhoromo burehu jovo dōre rueromo jovo hasajego vanagiehu huotorohuotorovobe va'ajēhioho no bogo ēhioho ē'i ma-biririvoromo ahōrirēro va'ejo.

15 Ma-ahorirëro va'oromo göëro göho rajahirovoromo jö mahemu majahirovo'ejo sareri'e jöho bogo. Jö mahemu majahirovobe huhu nimaje muohuremu avoho vaebe va'ejo ehuro Keriso nosi simanoho va'ëne jiahuoröhego.

16 Hu nosi simanoho jië'ëro ruahö'öjavuego gemuore hesi uhure raro-marueje hesi övo duruajo'ëro javuë'ëro. Hesi uhure raromoromo nosi sino haho'e bimuvavuadëhi ae aho'obëhe ëhi bimuvorovoromo ehuro hesi darugoho baeromo no ae göëro göëro huhu bojamuade mue gö gö avoho vaeromo göëro gö rajahirovoromo ehuro a duvahanö'e biririvobe va'arueje.

*Keriso-are ae gemuoho javuë'ëgo mu i'o baeröhe jöhoje.*

17 Röhu naro ave jögoroho Badare ihoro darugo'o majëhi'ië'e. God bogo ma uehorovarue ariböviehu jö sareri sareri uehorovë'i raromo jijiharühioho ijoho nadi ehioho raromo jijihore.

18 Ehësi bëhoho ëho jaburo simanoho ramoramovëhë'ëro uehoroho bogojioromo biriri'övoromo God bijönimoromo ehuro hesi biriroho bogo baejamu jabesi aru'ahoho vuovëhë'eje.

19 Jabumë mu sisëni javojëgadoho vuonugo'i jabesi dë vövöbajo'e aho'o sisëro gemu bojamirovoromo ö mahunö'e va'inumi'e muoho bövioho bise'oho ëma ömarueje.

20 Röhu jemë Keriso-are jöho bogo ehioho röjëhamu hejarijeje.

21 Hesi jöho iae mae hejarijeje. Hesi ariböviëro jëvë'ëro Iesuhu ëhi ëhi ë'oromo hibe juvade jö maho iae röjëhijamu hejarijeje.

22 Aviëhi jië'e jöho hejarijeje. Mami'e öri sisëre jijiharije ë hesi uehoro mamioho boremi'öre. Euehoro mamioho ejahoromo ehuro mu sisë naguego sareramirovoromo ë muoho vaejego sisërëjavuobe va'ajeje.

23 Uehoro mamioho boremi'ö'i God uarego huro jemesi dë vövöbajo'o uoho avohëho barë'iro.

24 Ehëhi uaromo uehoro i'e baere. Euehoro i'oho God-ro avohadeje noro hu va'ëne jioromo ma-taemo raromoromo mu maemu vaenövoröhego.

25 Ehuni no sino haho'e gemuoho javuë'e jiaje ehuni sareri sareri'e jöho vuonugo'i göëro gö hesi öriroho ma-jö maemu majahirovore.

26 O vörönëgë'iroho nadi ri'öromu mu sisëho vaere. Nadi dë vörönimemu vörönimobe va'ëgo majaho beva'oromo vahiromëvo'iro.

27 A'i vöröho vuonugego Satan bogo ijumëvo'iro.

28 O ae rahu vajiohu'e mu vaejaje aho uavego ijoho nadi ëhi jië'oho ë'i hesi övëro biririvoromo i'o mu'oho ma-avoho vae'i ehuro mae sisë eni jiego bövi bise'o rumo'e aribövi jabesi örire suvuorovo'iröhe.

29 O jö atë'iroho jö sisëho nadi ato'i ma-jö maemu atonövore. Ehëhi jië'e jö atë'ohuro jemë ae ajëmi'iramu jabumë huë vavaene rabe jëvë'oho jemesi jöho heromo biririvëvo'iramu dë vövöbajo'e mae jëvo'ë'e.

30 O God-are Aru'aho Maho nadi vavaenoho bojamire. Hu jemesirire jië'ëro ehü'ëro uvarueje: Jemë God-are aribövie jëvobe va'öjuvo hujeji ëho majaho rue'iramu sisëhu tövëvajoho God-ro jiovëho'iramu aho'obëhe ma-mae gemu jëvo'ajëjo.

31 Röhu ijoho a jabesi jö sisëho nadi uehorovo'i arire. Nadi a jabesi jöënioho vörönimemu vörönimore. Nadi ano'i vörö'iraenövore. Nadi jö sisëho uëromo giagamëhore. Nadi agëvore. Jö sisë gö gö nadi uehorovoromo ëhi jië'e muoho vae'i

32 a'i göëro göhuni vavaenimorovoromo huë baerovë'i göëro gö hesi mu sisëho uehorovoromo vuonugore. God-hu jemesi sisë Keriso-are jöëni uehorovoromo vuonugadëhi jemë'o ëhi ë'ore.

## 5

*Aji'ere raromo jijih'o'iröhe jöhoje.*

1 God-ro hesi dë vövöbajo'e aho'o uehorovëvego jemë hesi aboji harihu'e jëvaje ëhuni huhu ë'ajëhi jemë'o ëhi ë'onövore.

2 Ëhi'oromo ae uehorovëvë'i raromo jijihonövore. Ëhesi bëhoho Kerisoro no uehorovavuoromo nosi jöëni God-are örire suvuore bojamirovoromo guomorovadeje. Guomorovamu God-ro uvadeje: Huro mabëhe ë'ë'ëro ëhuro iae na huë mae jevajëjo. Kerisohu uehorovavuadëhi ëhi ae uehorovëvë'i raromo jijihonövore.

3 O jemë God-are aribövie jëvaje ëhuni önö'e mahunö'e muoho nadi vaeromo ae gö jabesi bövioho bise'oho nadi ujuohëho'i ë'orego ëhuro ëhi jï'e mu sisë hesi jöho jemesiroho bogojio'i.

4 O mu sisë jöho simano rumo'e jöho ijo ijo'e atarue jö sisëho nadi atore. Atë'oho bogo maehuje. A'i huë ma jöhemu God-are öroro atore.

5 Ave jö gavarujoho iae maeje. Ae rahu önö'e mahunö'e jijihë'oho o ae gö jabesi bövi bise'o ujuohëho'i ë'ë'oho Keriso'o God'o muebejarue öri ari'eroho bogo va'oruomo'ë'e. Ae gö jabesi bövi bise'o ujuohëho'i ë'arue hesi bëhoho God dejonö bamo'i inömo sisë nuninö bamarue mueje.

6 Ëhi jï'e mu sisëho God-are jö bijönimarue ariböviohuro vaejaruëro jï'ëro ëhu'ëro God-are i'ue mana bae hesijö. Ae göehu sareri'e jö atoromo uëvë'oho: Bogo ëhioho jio'a'ajë uëvë'oho nadi ejëhore.

7 Ëhuni ëhi jï'e ariböviohu'oho gemuoroho nadi jijihore.

8 Urimoroho jemë'o ramoramo'ere raromonövarijeje. Jaruvoho jemë Badare aji'ere raromaruje. Ëhuni aji'ere raromarue ariböviehu raromo jijiharuëhi ëhi raromo jijihore.

9 Rabëni. Aji rovë'ohuro ëhuro mu maemu vaeromo jö maemu atoromo bövie bise'e avoho vaejarueje. Ëhuni aji'ero raromore.

10 Avoho uehorovoromo gare Badahu nimaje muoho diho jiego.

11 O ramoramo'e mu aehu ma-imo vaejaruoho ëhi jï'e muoho nadi gavanovo'i mu mae vaejego jaburo ëho garomo uvoruomo'iro: Nosi muoho sisë höjo.

12 Iae ëhi jï'e muoho jabesi saginiëri vae'amaruoho javoje vëmunajoho jï'ëgo bogo atarue jöhoje.

13 Jabesi sisë aho'o gurihoro jiadoho aji va'orahoro jï'ëho jabesi mu diehi jiajoho ë garuomo'ë'e.

14 Mu rabe va'orahore jï'ëho iae aji'eje. Ëhuni noro God uehorovoromo jöe ioromo uvarueje:

Niavanuoho ri'öjëjo.

Guomanuoho i'ovëjo.

Ëhi'o'iramu Kerisoro ja ajivavo'ajëjo.

15 Ëhuni jemë diehi jï'e mu vaeromo raromo jijiharujoho ëho avo'avoho vaere. Simano rumo'e muoho bogo a'i simano ma'e muohemu vaere.

16 Mu mae rovajoho nadi vuonugo'i hesi muoho avoho vaere jaruvoho mu sisë vaeruomaje majae jiaje.

17 Ëhuni nadi sisë'ioho uehorovo'i a'i jemëhu diehi mu vaejöö Badahu nimajoho ëho avoho garomo baere.

18 Nadi vörö'le jovoho ue'ahego simanoho huotorovëvo'i. Ëhuro sisërëjëvo'ë'e. A'i nadi'ego God-are Aru'ahohuro rarovëvego ëhuro simano mae jëvo'i.

19 Psalms surire jajivare jöho God rajahi'iröhe jöho Aru'ahuhu bojëmaje jöe gö gö iaruoho majahirovore. Dë vövöbajo'e aho'o God rajahirovomo ëhi jïë'e jöho ionövore.

20 Vae majae huë mae o huë sisë rovë'o'oho nosi Bada Iesu Keriso-are ihoro God Vavuoho mae uanövore.

*Masurovë'e ariböviehu diehi avoho raromo'iröhe jöhoje.*

21 Röhu Keriso mae uehorovaruje jëvaje ëhuni göëro gö hesi jöho eja-horovore.

22 Vaboroharo Badare jöëni jemesi baruoho ejëhore

23 rabëni hesi bëhoho baruoho vaboro jemesi simane jio'amë'e jiaje. Keriso ekaresia nosi simanoho jio'i no hesi sino haho'e gemuoho javuë'ëro huro no maro bamavuë'eje. Röhu hu ekaresia nosi simano jiajëhi ëhi baruoho vaboro jemesi simanoho jio'ame.

24 Ëhuni ekaresiaehu Keriso-are jö ejaharuëhi ëhi vaboro ömo'ömoho jemëro baru jabesi jöho ejëho barëre.

25 O baruoharo jemesi vaboroho dë vövöbajo'e aho'obëhe uehorovëvore. Ëhesi bëhoho Kerisoro ekaresiaho uehorovavuoromo hesi arijo'arije bo-jamirovoromo guomorovadeje

26 ëhuro ekaresiaho jövëro u'ovahuoromo hesi jöho majahuiromomo ma-maemu avohavuoröhëni.

27 Ma-maemu avohavuego ekaresiaho aji mabëhe javuoröhego. I'o masu'iröhe magonaho va'inummi rumo'e sino haho'e bogo abuejë'e sisë rabe rabe bogojio'i ma-maemu jiajëhi ekaresiaho no ëhi ma-maemu gemu javuego huro no hesi baejavuoröhëni. Ëhuni ekaresiaho no uehorovavuoromo ajamuijadeje.

28 Iae Kerisohu ekaresia uehorovavuadëhi ëhi baru ömo'ömoho jemëro jemesi vaboroho uehorovëvore. Uehorovëvoromo jemesi sino rajahirovarujëhi jemesi vaboroho ëhi rajëhire. Jemëhu jemesi vaboro rajëhijë'ohuro ëhuro jemesi sinohu'o rajahirovarujeje.

29-30 Aho jabesi sinoho bogo bijönimorovo'i a'i Kerisohu ekaresiaho no hesi sino haho'e gemuoho javuajëromomo muebejavuajëhi aëro jabesi sinoho ëhi avo'avoho mueberovarueje.

31 Vaboro'o baru'o jabesi jöho God-are surire jajivoromo uvë'eje: Ëhu'ëro jïë'ëro aëro vëmu vavu'o'oho rëmö'ö'i vaborohu'o gemu mae hi'a'ajëjo. Hu'o hi'iramu jabumë niö'i jëvadoho röhu gemu jio'a'ajëjo.

32 Ëhi uvë'eje. Röhu ë jö hesi bëhoho uhuroho jö börömo börömeje. Ëjö hesi bëhoho naro uëve Keriso'o hesi ekaresia'o no gemuoho javuaje jöhoje.

33 Röhu jemesi jöhu'oje. Ae gemu gemu jemesi arijo'arije rajahirovarujëhi jemesi vaboroho ëhi rajëhire. O vaboro ömo'ömoho jemëro baruoho masijoho hö uehorovore.

## 6

*Aboji harihu'o vëmu vavu'o diehi avoho raromo'iröhe jöhoje.*

1 O aboji harihu'oharo Badare jöëni vëmu vavu'o jabesi jöho ejëhore. Ëhi ë'ë'o'oho iae maeje.

<sup>2</sup> Ĕhi jië'e jögoroho God-are surire jajivoromo uvë'eje: Jasi vëmoho vavuohe mae uehorovëvonëjo. Ĕjöho börömo maego God-ro ë hesi viture uvadeje: Jaehu ë jö ejë'oho naro mae ajami'ejöjo.

<sup>3</sup> Ĕhesi bëhoho uvë'eje: Vëmu vavu'o mae uehorovëvë'oho ëhuro maho javo'iramu sa'are majae ëgo'o hi'a'anuëjo.

<sup>4</sup> Röhu vëmu vavu'oharo jemesi aboji harihu'oho nadi sisë'ioho avohëvego dë vörönëgo'iro. Nadi ëhioho ë'i a'i avoho muebejëvoromo Badare jöho röjëhirego heromo avoho raromobe va'oruomo'iro.

*Avare mu vaejëharue ariböviohu'o jabesi simano vaejarue ariböviohu'o diehi avoho raromo'iröhe jöhoje.*

<sup>5</sup> O ae gö jabesi muemu vaejëharuje aribövioharo jemesi a masijo jabesi mu vaejë'iroho uvore: No Keriso-are mue vaejaruëromo jabesi jöho avoho uehorovoromo jemesi dë vövöbajo'o uhohu'o ejëhonövore.

<sup>6</sup> Nadi ma-döemuoho ejëhorego jemesi masijohuro gëromo uvo'iro: Mu mae vaejarujëjo. A'i uvore: No Keriso-are mue vaejahuëromo nadi bijönimo'i dë vövöbajo'e aho'o mu öröro bojamiromo God-hu nimaje muoho vaenövore.

<sup>7</sup> Uvore: No bogo ma-a jabesi muoho vaejëho'i Badare mue vaejahuëromo dë sasohoromo muoho vaere.

<sup>8</sup> Uvore: Ae gemu gemu mu mae vaejë'oho Badaro suvuoroho mana bojamui'ajëjo. No avare muemu vaejëhë'oho o nosi nimoro mu vaejë'oho iae hesi höjo. Ae gemu gemu mana bojamui'ajëjo.

<sup>9</sup> O simano vaejaruje aribövioharo ëhi mu mae vaenövore. Jemesi mu aribövi jö sisë uëromo giagamëharujoho vuonugore. A'i uvore: Nosi mu vaejahuërome aribövi jabesi o nosi Bövioho iae ae gemu ö'idöre hijajëjo. Huro mu ariböviohu'o no'o ma-gemuoho uehorovavuae höjo.

*Keriso-are ariböviehu ajamirovoromo niögu biriri'oho io'amoromo bijo buno baeromo Satan'o muorovo'iröhe uhu jöhoje.*

<sup>10</sup> Röhu aveho ijo tugoho'i jöho majëhi'ie'e. Bada'o gemu mae jioromo hesi darugo maho baeromo biririvore.

<sup>11</sup> God-hu bojamuae muorovo inömoho aho'o ujuohore Satan-ro sarerëmijego ëhuro biririvoromo riravo'irarije.

<sup>12</sup> No bogo ma-a'oho muorovo'i a'i a iosiramuijë'e sisë aribövi masijohu'o muorovarueje. Sa'ae aho'obëhe ramoramo'e mu muebejarue ariböviohu'o döre raromarue sisë ariböviohu'o vörö'e sisë aribövi ioro'iorohu'o ëho jabu'o no muorovarueje.

<sup>13</sup> Ĕhuni God-hu bojamuae muorovo inömoho aho'o ujuohore maja sisë rovego Satan-ro jemë'o muorovego biririvo'irarije. Ĕhi muorovojuvo majae barë'iramu biririvoromo ëhi baberumi riravo'aruje.

<sup>14</sup> Ĕhuni avoho riravore. Röhu a'o muorovo'ie'iroho götaho dë'ahore muoho titimo'iramu dë'ahoho bibivoromo ëhuro eni javo'ë'e. Ĕhesi bëhoho mu sisë'o muorovo'ie'iroho God-are uehoro mahemu ma'eno titimorego ëhuro eni jëvo'iro.

O a'o muorovo'ie'iroho biriri'e niögoho vinebire ba'amo'iramu ëhuro eni javo'ë'e. Ĕhesi bëhoho mu maemu baeromo maemu ömorego ëhuro eni jëvo'iro.

<sup>15</sup> O a'o muorovo'ie'iroho höru gudu ba'amë'ohuro ëhuro mae nami juvo'a'anue. Ĕhesi bëhoho Kerisohu huë mae bojamuae jö maho simanoro bamore avoho bibivo riravo'irarije.

16 O vëni ravë'e bijo vösö huotovaho'ië'iroho ejoho ma'enoromo nami'iramu siroho ro ë ejore riravoromo sugigivoromo vënoho duoroho'amo'ë'e. Ëhesi bëhoho God-ro no ajamuijaje hö uvoromo hu mae uehorovonövore. Ëhi uehorovë'ohuro Satan-ro hesi vörö'e bijohuro bijëho'iramu bogo ejaho'aruje.

17 O a'o muorovo'ië'iroho biriri'e simano bosöho didi'oromo simanoho tugohorovo'anue ehuro bogo nemavo'i mae javoröhego. Ëhesi bëhoho simanëro uehorovoromo uvore: God-ro no maro ramuë'e höjo. Ëhi uehorovë'ohuro ehuro Satan-are sisëho tugoho'iramu jemë bogo baejëvo'ë'e.

O a'o muorovo'ië'iroho kaejö egoho övëro ma'enoromo muorovo'anue. Ëhesi bëhoho God-are jö hesi Aru'ahuhu bojamuijajoho ëhi ma'enoromo Satan'o muorovore.

18 Ëhi jië'e muoho vaejë'i majae ëhi God-are Aru'aho hesi uehoroho baeromo parie gö gö vaeromo jöe gö gö ëninaminövore. Ëhi ë'irarije nune jioromo majae ëhi biririvore. Biririvoromo God-are aribövie aho'o jabsesi jöëni uehorovore.

19 O nasi jöho eh'u'o uehorovore. Uarego naehu hesi jö a majëhi'ië'iroho huro jö maho bojemego naro bogo juhuonivë'e ma-sama'e majëhinövo'iro ehuro jabumë hesi gurihijë'e jö ma hesi bëhoho mae garomo heruomoröhe.

20 Ëjö maho ae majëhi'irodego ehuni na God-are ihoro jö majëhijaje ae jeve. Röhu na savoji gagore hije. Ehuni God uarego na birire bojemego huhu boje-made muoho vaeromo bogo juhuonivo'i ë jöho ma-sama'e majëhinövo'iro.

*Ave surire jajivade ijo tugoho'i jöhoje.*

21 Röhu na diehi jevajoho o mu rabe vaejajoho ë jöho jemë'o he'irarijago ehuni Tychicus-ro ö'oromo majëhi'iramu he barë'aruje. Tychicus hu nosi huë baerovarue öeje. Hu Badare muoho biririvoromo vaejajeje.

22 Ëaho naehu nugö'ö'ië'aje hesi bëhoho huro ö'oromo jöho majëhijago noehu diehi raromarue jöho jemëro hejago dë vövöbajo'oho mae jëvoröhego ehuni nugö'ö'ië'e.

23 Röhu na nege God Vavuohu'o Bada Iesu Keriso'o jaburo nasi ö mueno'oho jemë ajëmijago jemëro God mae uehorovoromo huë mae raro-moromo rajahirovo'irarijago.

24 Nosi Bada Iesu Keriso rajahiemu rajahijaruje aribövioho aho'obëhe God-ro huë baeromo ajëminövo'ë'e. Ahia mino'e.

## PHILIPPIANS

*Paul-hu Philippi ekaresia jejëmade jöhoje.*

<sup>1</sup> O asë'e Iesu Keriso'o gemuore jëvoromo God-are ariböviëro jëvë'ëro Philippi amore raromarujoho Paul na'o Timothy'o Iesu Keriso-are mu vae-jaharue ae niö'i noro jemesi örire jejëmijö gare. O ekaresia muebejëvaruje ariböviohu'o ekaresia ajëmijaruje ariböviohu'o jemesi örire jejëmijö.

<sup>2</sup> Na nege God nosi Vavuohu'o Bada Iesu Keriso'o huë baeromo ajëmijego maro raromo'irarijego.

*Paul-hu Philippi ekaresia uehorovoromo God'o jö jövonövade jöhoje.*

<sup>3</sup> Naehu jemë uehorovëvë'iroho jemëni God nasi Börömo huë mae uavajeje.

<sup>4</sup> O jemëni God-are örire jö jövë'iroho nimorohë'i jöho majahijajeje.

<sup>5</sup> Rabëni hesi bëhoho mami'e jemëhu aevo'i na'o bimuvoromo Keriso-are jö ma hesi mu ajëmijarijoho ëhi ajemibe ruejuvo jaruvohu'o ëhi gemuoho ajëmijarujeje.

<sup>6</sup> Èhuni na mae uehorovoromo uvajeje: God-ro mabëhe aevoromo jemesi dë vövöbajo'o avohëvadoho iae ëhi avohëvobe va'ojuvo hujeji Iesu Keriso-are majaho rue'iramu avohëvo barë'ajëjo.

<sup>7</sup> God-hu jemë ëhi avohëvobe va'a'ajë uvajoho ëho iae maeje ë hesi bëhoho jemë nasi dë vövöbajo'ere jëvë'ëgo. Jemë na'o gemuore mu mabëhe baejë'e jëve. God-ro mu mae bojemamu urimoho na savoji gagoroho bogo hijë'iro hesi jö ma hesi jöhuni biririvoromo majëhibe rovodoho jaruvoho na savoji gagore hijë'i ëhi gemuoho majëhijajeje. Jemëro ëhi jië'e mu mabëhe na'o bimuvoromo ajemibe rovë'e jëve.

<sup>8</sup> Röhu Iesu Kerisoro nasi dëre rumorovevego na jemëni sisë maro vavaenegajeje. God-ro ge'ëgo na mae uëve.

<sup>9</sup> Röhu ave jöho na jemëni ëninamijajeje. Naro uavajeje huro jemë ajëmijego jemë simane mae jioromo mue bövie bise'e garomo ae rajahui-jarujoho gö'o gö'o dëre ëhi'obe va'oromo

<sup>10</sup> Èhuro rabe rabe maho jiego ga'irarijego. Èhi jië'oho Keriso-are majaho rue'iramu jemë jö sisëho bogojëvo'i uhohu'o ma-maemu jëvo'ë'e.

<sup>11</sup> O Iesu Kerisohu ajamuego vaejarue mu mahuro jemë'o rumorovëvo'ë'e èhuro God-are ihoho dö maro ajiomoröhego.

*Paul-hu hi juvonövade hesi bëhoho Keriso uehorovoromo juvonövade jöhoje.*

<sup>12</sup> Röhu nasi ö mueno'e na nege jemëro ave jöho ga'irarijego. Na ave savoji gagore hijamu mu rabehu rabehu nasi örire rovadohuro èhuro Keriso-are jö ma hesi muoho bogo sisërë'i marëjë'eje.

<sup>13</sup> Marëjë'ëro èhu'ëro sa'a a börömo hesi javu atovarue ariböviohu'o a ioro'iore aho'obëhe jabu'o mae garomo uvoruomajeje: Nörö Keriso-are aëro jië'ëro savoji gagore hijajëjo.

<sup>14</sup> O Christian ö mueno'e marohë'e maëro gevarue na savoji gagore hiro mo mae biririvego geromo jabu'o daruge baeromo èhuro bogo juhuonivë'e mabëhe biririvoromo God-are jöho majëhijarujeje.

<sup>15</sup> Èaribövioho a ioro'iorohuro iae nasi mu mahuni dë vörönimoromo na iosiremi'irögoro Keriso-are jöho majëhijarujeje röhu a ioro'iorohuro huë mae bojemi'i ë'arueje.

16 Jabumë uvarueje: God-ro nörö aviae bamade höjo ehuro aëro God-are jö maho sareri'e atego nöröro aho'iröhego. Ehuni jabumëro na mae uehorovevoromo Keriso-are jö maho majëhijarueje.

17 O ë aribövi ioro'iorehu Keriso-are jö majëhijaruoho bogo maho uehorovoromo ë'i a'i jabesi ihohemu uehorovoromo Keriso-are jöho majëhijarueje. Jaburo uvarueje: Noehu Keriso-are jö ae majëhijë'ohuro ehuro a masijohuro heromo Paul savoji gagore hijajoho röhu gö'o döre i'ue bojami'aruëromo ehuni Keriso-are jöho majëhijarueje.

18 Röhu ëho hesije. Aehu ma-döhemu uehorovo'i o uhohu'o uehorovo'i o diehi uehorovoromo Keriso-are jö majëhijaruoho röhu aëro Keriso-are jöho iae majëhijarueje. Na ëho uehorovoromo nimorohajeje. Röhu bogo vuonugo'i ëhi gemuoho nimorohonövo'ejo.

19 Ehësi bëhoho naro garomo uvajeje: Naehu ëhi sisë'i hijajoho jemëro nasi jöëni ëninami'iramu Iesu Keriso-are Aru'ahohuro ajemi'iramu ehuro na mae hi'ejöjo.

20 Ehuni naehu ave uehorovajohuremu nego avohe na bogo mae bogo javojoho baeromo muoho vuonugo'i a'i majae aho'o röhu avevejö'ohu'o biririvo avohoromo nasi arijo'arije aho'o bojamirovego Keriso-are ihoho dö maro jioröhego. Na ave sa'are hijë'oho o guomevë'oho ëhi gemu jiojoro nege.

21 Na ave sa'are hijë'oho Keriso gemu uehorovë'i hibe juvajeje. O guomevë'oho jaruvo sisë'i hijanovajoho ijonö mabëhe hi'ejo.

22 Na ave sa'are ëgo'o hijë'oho ehuro i'o mu'e birohonövo'ejo. Hesi nani'o diehi ë'ejo.

23 Na uehore niö'i jevo'ego ëho uehorovë'e hije. Iae na nege guomoromo sa'aho vuonugo'i va'o Keriso'o gemu mae hi'irodëni. Hu'o hijë'oho ëho mahoje.

24 Röhu naehu biririvoromo sa'are hijë'oho ëho börömohoje jemë ajëmi'irodohuni.

25 Ehö na eni gavë'e jeve. Ehuni na garomo uve: Naro biririvoromo jemë'o hi'ejöjo ehuro ajëmego Keriso mae uehorovobe nimorohobe va'irarijego.

26 Ehë jië'oho naro röhu maho ö'iramu jemëro na geromo Iesu Keriso-are örire mabëhe rajahi'aruje.

27 Röhu na diehi jevë'oho jemëro Keriso-are jö maho eromo raromo jijihore. Ehuremu börömohoje. Ehë ë'ë'oho ehuro naehu ö'oromo gëvë'oho o öre ëgo'o hiromo ma-jemesi jöhemu hejë'oho na garomo uvo'ejo: Jemëro gemuoro riravoromo uehore gemu baeromo mue gemu nimoromo jö ma hesi muohuremu biririvoromo nigemarujejo.

28 Biririvoromo nigemoromo jemesi jö bijönimoruomaje aribövioho bogo juhuonëmijarujëjo. Bogo juhuonëmijamu gëvë'ohuro ehuro God-ro röjëhijajeje jabumëro garöhego maja ijonöho jabumë sisërëjëvo'i jemë marojëvo'iröhoho jëvego. Iae God-ro jemë ajëmi'iramu marojëvo'ë'e.

29 Jemë Keriso-are mu börömoho niö'i baejë'e jeve. Göho Keriso-are örire mae uehorovo'irarijoho göho hesi jöëni vi'ehe bae'irarijoho.

30 Urimo jemë iae gavarijeje na sivohoromo Keriso-are muoho nigemamu. O jaruvoho jemë hejarujeje aëro uvoruomego: Nöröro ëhi gemuoho ë'aje höjo. Röhu ë mue gemuoho jemëro na'o bimuvoromo ehë sivohoromo ömo'aruje.



## 2

*No bogo nosi nimaruo hemu uehorovo'i göehu gö huë baerovo'iröhe jöhoje.*

<sup>1</sup> Jemë aho'o Keriso-are ae gemuoho jëvajoho na jemë ehuro hejarujeje biririvëvego. Kerisohu jemë huë baejëvajoho na jemë ehuro hejarujeje jemesi dë vövöbajo'oho giogovëvego. Na jemë God-are Aru'ahohu'o gemuoro jëve. Na jemë göëro göhuni vavaenimoromo dë vövöbajo'e aho'o uehorovëvarujeje.

<sup>2</sup> Ëhi jëv'e jiaje ehuni ma-gemuoro jioromo uehore gemu baeromo huë baerovë'e muoho gemu vaerego na heromo nimoroho avoho'iro.

<sup>3</sup> Nadi jemesi sinohemuoho uehorovoromo a ioro'ioroho ëma iosirëmiromomo ihoho döroho bamorovo'i uehorovoromo muoho vae'irögoromo a'i ma-u'emu uehorovoromo a ioro'ioroho masije hö uvoromo jabesi ihoho döro bamore.

<sup>4</sup> A ioro'ioro jabesi ihoho döro bamoromo röhu nadi jemesi jöhemuoho uehorovo'i a'i a ioro'ioro jabesi jöhu'o uehorovore.

*Kerisohu hesi nimajoho bogo uehorovo'i sa'are rueromo God-are jöhemu ejahadëhi noehu ëhi ë'iröhe jöhoje.*

<sup>5</sup> Iesu Kerisohu uehorovadëhi ëhi uehorovore.

<sup>6</sup> Hu God jiajëhi ëhi jië'ëro röhu bogo uvadeje: Naro biririvoromo God-hu hijajëhi ëhi hi'ejöjo.

<sup>7</sup> Hu bogo ehioho uvo'i bövie bise'e nugö'ö'amoromo mu vaejahuaje a jiajëhi ëhi jiadeje. Ma-a javuajëhi ëhi jiadeje. A nu ano'o va'ëne jioromo ae aho'obëhe nosi nunire rovadeje.

<sup>8</sup> Rueromo hesi iho börömo uehorovoromo vuonugo'i ma-God-are jöhemu ejahobe juvoromo ehuro guomadeje. Korosire anamu guomadeje.

<sup>9</sup> Ëhi ë'ë'ego ehuni God-ro ajamamu huro dö maro ajio namijamu hesi ihohuro iho ioro'ioroho iosiramuiromomo börömo bëhe jië'eje

<sup>10</sup> ëhu'ego ae aho'obëhe ö'idöre raromarue sa'are raromarue sa'a uhure raromarue aribövioho noro Iesuare ihoho böröme höromomo hu rajahiromomo ague aho raromoromo

<sup>11</sup> ae aho'obëhe noro huruohoromo uvoruomoröhego: Iesu Keriso iae Bada hö uvoröhego. Ëhi uvo'iramu God Vavu hesi ihoho börömo bëhe jio'ë'e.

*Ramoramo'ere raromarue ariböviohu'o ave sa'are raromoromo noro ironö'e ajivëvo'iröhe jöhoje.*

<sup>12</sup> Nasi ö mueno'e naehu jemë'o gemu mae hijamu jemëhu nasi jö ejehonövarijoho röhu jaruvo na öri ëgobövire hijajohu'o nasi jöho ejehonövore. Ëho börömohego. Juhuoni'o butubutu'o muoho avo'avoho vaerego jemë mae jëvo'iro.

<sup>13</sup> Ëhesi bëhoho God-ro jemesi dë vövöbajo'oho huotovëhajeje ehuro huhu nimaje ëhi jië'e muoho vae'i nimoromo vae'irarijeho. Ehuni ëhi jië'e muoho vaere.

<sup>14</sup> Mu rabe rabe vaejë'oho nadi muoho bijönimoromo jö sisëho atoromo o jöho aho'ahëmi'irögoromo a'i muoho ma-vaere.

<sup>15-16</sup> Ëhi ë'ë'oho jemë jö sisëho bogojëvo'i uhohu'o ma-mae jëvo'ë'e. Sareri sareri'e aribövi sisëhu'o gemuore raromomo'aruje röhu jemë God-are aboji harihu'e maemu jëvo'ë'e. A i'ovavuo'iröhe jöho röjëhiromomo ehuro jiji mujöru'ehu ramoramore ajivo'amajëhi ramoramore raromarue aribövioho ëhi ajivëvore. Jemë ëhi ë'ë'oho Keriso-are majaho rue'iramu naro uvo'ejo: O mabëhëjo. Jemë nasi jöho mabëhe ejeharije höjo. Na sa'are hiromomo jöho

majëhiromo muoho bogo ëma sivohoromo darugoho boremi'øjode hõromo jemesi jöëni nimoronimorohë'i jõho jövo'ejo.

<sup>17</sup> Röhu hesi nani'o nani aëro anego'iramu guomevo'ë'e. Ëhi'o'iramu nasi köho rue'iramu God-ro uvo'ë'e: Ëho na suvuore bojemijajëjo. Röhu jemëhu hesi örire mae uehorovoromo mu vaejarujoho ëhu'o God bojamijaruje suvuoreje. Röhu nasi suvuorohu'o jemesi suvuorohu'o gemuoro jio'iramu God-ro garomo uvo'ë'e: Iae eni jiajëjo. Ëhuni aehu na ëhi anegego guomevo'iröhoho na huë mae jeve. Huë mae jevoromo jemë'o gemu mae nimoroheve.

<sup>18</sup> Naehu ë'ajëhi jemëro huë mae jioromo na'o gemu mae nimorohore.

*Paul-hu Timothy'o Epaphroditus'o rëmö'øjego Philippi amore ö'irõhe jõhoje.*

<sup>19</sup> Iae na uehorovoromo uve: Bada Iesuhu nimë'ohuro ëhuro na ma-burëro Timothy nugö'ö'iramu jemesi örire ö'a'ajëjo. Ëhi ë'irodëro nege. Ëhesi bëhoho ö'oromo jemëhu diehi raromaruje jõho huro vuonorö'ö barovego na heromo huë mae jevorõhego.

<sup>20</sup> Timothy-ro gemuëro na'o gemuoro uehorovoromo bogo dõhemuoho a'i uhohu'o jemesi jõho uehorovajeje. Ëhi jië'e a göho bogojeve.

<sup>21</sup> A ioro'iorohuro bogo Iesu Keriso-are jõho uehorovo'i jabesi muohemu uehorovarueje.

<sup>22</sup> Röhu jemë gavarujoho iae hu a maeje. Harihehu vavu ajëmijaruëhi huro na ëhi ajemiromo Keriso-are jö ma hesi muoho vaebe rovë'eje.

<sup>23</sup> Ëhuni na uehorovoromo uve: Ga'irode nasi muoho diehi jiamu gavë'iroho hu nugö'ö'ejöjo ö'irõhego. Na ëhi nege.

<sup>24</sup> Röhu naro uve: Badahu nimë'oho majae ma-bisemu barë'iramu na'o ö'ejöjo.

<sup>25</sup> Röhu naro uvodeje: Nosi Christian öho Epaphroditus nugö'ö'ejöjo ö'ojöro. Ëhuremu iae mae hõjo. Röhu avevejö'oho hu na'o bimuvoromo Satan'o muorovoromo mu vaejaje aeje. Mami'e jemëro nugö'ö'jarijeje huro rueromo jemesi ihore nasi vavaenoho ajeminövo'irõhego. Röhu naro hu sionëro nugö'ö'je.

<sup>26</sup> Naehu hu nugö'ö'irode hesi bëhoho huro ae aho'obëhe jemëni vavaenime. Vavaenimoromo nurunurume jemesi jõhuni. Ëhesi bëhoho jemë hejarijeje uvavamu: Hu guomo guome baejade hö uvamu hejarijohuni ëhuni.

<sup>27</sup> Iae mae. Hu guomo guomo böröme baeromo guomo hesi jiadeje. Röhu God-ro hesi jöëni vavaenimoromo ajamijadeje. Bogo hesi jöënioho gemu vavaenimo'i a'i nani vavaenimadeje hu guomego naro huë vavaene gö'o dõre baejõëni.

<sup>28</sup> Ëhuni na nego avohe nugö'ö'jego ö'ojöro ëhuro hu ö'ego jemëro röhu maho garomo nimoroho'irarijego o ëhuro nasi nurunuruoho barëjanovorõhego.

<sup>29-30</sup> Ëhu'e jiaje hu ö'ego Badare ihoro börömo mae nimorohoromo rajahire. Ëhesi bëhoho hu uvadeje: Philippi amo rajoho ame ëgoböviro raromoromo Paul ajamijë'oho bogo eni jiajëjo. Ëhuni naro jabu'o röromo ë muoho vae'ejö uvoromo ëhuni hu ave sa'are hi'irõhe jõho bogo uehorovoromo guomo hesi jiadeje. Ëhuni ö'ego rajahire. O huhu ë'adëhi ae rahu jabesi sino bogo uehorovo'i Keriso-are muohuremu uehorovë'oho ëhi jië'e aribövioho aho'obëhe rajëhinövore.

## 3

*Noehu God-are nunire mae riravo'iröhe öroho ëho Keriso mae uehorovo'iröhe jöhoje.*

<sup>1</sup> Nasi ö mueno'e ijo tugoho'i jöho majëhi'ie'e. Badare öroro uehorovoromo nimorohore. Röhu ave majëhi'irode jöho mami'e uëvodoho röhu maho majëhijë'oho bogo u'uvevo'ë'e. O jemë röhu maho hejë'oho ëhuro avo'avoho raromo'aruje.

<sup>2</sup> Ö sisëho va'ëne aribövioho gëvë'i raromore. Jaburo God-are muoho sisë'i röjëhijarueje. Ëhuni gëvë'i raromore. Jaburo uëvarueje: Jemëro Jew rajo muoho vaeromo jemesi sinoho tarivorëjo ëhuro God-are nunire mae riravo'irarije. Röhu jabuhu röjëhijarue muoho bogo mu maehu jio'i ëho sino taritarivo'iröhe muoho jianove. Ëhuni gavë'i raromore. Ëhi jië'e ariböviohuro sarerëmi'ë'ö.

<sup>3</sup> Jaburo sarerivoromo uvoruomajeje: No sine tarivo'amë'ëro ëhu'ëro no God-are aribövie javuajëjo. Röhu jabumë ma-döhemu God-are aribövie jioruomoi a'i no uhohu'o God-are aribövie javue. Ëhesi bëhoho noro God-are Aru'aho hesi darugoho baeromo hu rajahiromo Iesu Keriso uehorovoromo nimorohë'i atarueje. No bogo uvarueje: Nosi muohu'o ihohu'o ave sa'are mae jiahuë'oho ëhuro God-are nunire mae riravo'ëjarëjo.

<sup>4</sup> Röhu nosi muohu'o nosi ihohu'o mae jiahuë'ego ëhuro God-are nunire mae javuo'ibejo Paul nasi muohu'o ihohu'o mae jiehe'ëro jië'ëro uvo'ibejo: Na hesi nunire mae jevajëjo. A ioro'iorehu uvaruoho: No Jew rajo maëro javuë'ëro Jew rajo muoho avo'avoho vae'ego God-are nunire mae javuajë uvaruoho Paul naro ëhi uvo'ibejo iae mae jio'ibejo rabëni naro jabumë iosirëmiromo Jew rajo maho na jevë'ego.

<sup>5</sup> Rahevamu hurae gemu barëjamu Jew rajo muoho vaejevoromo nasi sinoho tarijehareje. Nasi vëmu vavu'oho Israel rajëro jëvë'ëro ëhu'ëro na'o Israel raje jeve. Benjamin-are uje gemuoho jeve. Nasi hijo mino'ehu Hebrew huëhu atobe Hebrew mu vaebe rovarëhi na'o ëhi gemuoho ömajeje. O mu vaeröhe jögoru ejaje ae jevadeje. Pharisee ariböviehu jögoru e avohojöro uövuaruëhi na ëhi'obe rovodeje.

<sup>6</sup> O God-are mu nimode ae jevadeje. Naro uvodeje: Jew rajo muoho God-are mue höromo ekaresia aribövioho sisë vaejëvo'i hijodeje. Jew rajo nosi jögoru ejaruohuro ëhuro mae javuo'ibejo ja uvo'ibejane: Nörö mabëhi mae höjo.

<sup>7</sup> Ëhi jië'e mu mae iho mae jevamu iae marëjevajë uvodoho jaruvoho Keriso-are jöho uehorovoromo uvajeje: Ëhuro sisërëjevë'e höjo.

<sup>8</sup> Naro uvajeje: God-are nunire mae nami'irögoro naehu Jew rajo mu vaejë'ohuro mu ioro'iorohu'o noehu vaejego God-are nunire mae javuoröhe ëhi jië'e mue aho'obëhe naehu uehorovë'oho ëhuro sisërëjevo'ajëjo. Iesu Keriso nasi Börömo ga'irodoho ëhemu börömo höjo. Hesi jöëni mu ioro'ioroho musisi va'ëne höromo boremi'öjë'e jeve ëhuro naro Keriso bae'irodëro.

<sup>9</sup> Keriso baeromo hu'o gemuoro bimuvo'irodëro. Jaruvoho bogo nasi ëma birivoromo Moses-are jögoroho eromo uvajeje: God-are nunire mae jevajëjo. Bogo. A'i na Keriso mae uehorovoromo ëhuro hesi nunire mae jeve. Ëhesi bëhoho God-ro ajamuego no mae uehorovoromo hesi nunire mae riravarueje.

<sup>10</sup> Na nege nasi simanohuro dë vövöbajo'ohuro Keriso ga'iro hu ri'öjè'ëro hesi darugohuro ajemijego marëjevojöro. Huhu huë vavaeni vi'ehi baejadëhi na'o ëhi gemuoho baebe va'iro. Huhu mu sisë mu'uvahuo'i guomadëhi na'o ëhi mu sisë garomo hörëro taemobe va'irodëni.

<sup>11</sup> Sisëho hörëro taemobe va'oromo ëhuro ijönö Iesuhu guomoromo ri'öjadëhi nani na'o eni jevë'ohuro nasi sino haho'ohu'o guomoromo ëhi ri'ö'irodëro. Èhuremu nege.

*Paul-hu daruge aho'o bojamiromo Keriso-are mu vaejadëhi no'o ëhi ë'iröhe jöhoje.*

<sup>12</sup> Na bogo uehorovoromo uvajeje: Mami'e Keriso-are muoho baejè'ëro mu sisë bogojevo'i bövie bise'e eni jevajëjo. Bogo ëhioho uvo'i a'i Iesu Kerisoro hesi baejevë'ego ëhuni hesi muoho bae'i birivoromo muoho vaejajeje.

<sup>13</sup> Nasi ö mueno'e na bogo uvajeje: Naro Keriso-are muoho bae barëjè'e jevajëjo. Röhu ave muoho gemu uehorovajeje. Mue urimo vaebe rovodoho na bogo uehorovo'i ijönö jioröhe muohuremu bae'i sivohoromo ë'o gavajeje.

<sup>14</sup> Naehu vaejöro Kerisohu nimajoho ëhemu nunire bamoromo ë ahorirëro vae'i birivoromo ë'o gavajeje ëhuro ruahö'öromo suvorocho bae'irodëro. Èsuvoro hesi bëhoho God-hu uevego na Iesu Keriso'o gemuoro jevë'ëro hesirire ajiomo'irodohoje.

<sup>15</sup> Ae rahu a duvahanö'e uehorovarue aribövi javuë'oho naehu uëvodëhi ëhi uehorovonövo'ejo. O jemëhu jö gö uehorovë'iroho God-ro ëho röjëhi'iramu ga'a'aruje jemë bogo eni jëvo'iramu.

<sup>16</sup> Èhi jië'ego Keriso-are jö ejahobe rovaroho ëhi ejahobe va'ejo. Èhi jië'oho iae maeje.

<sup>17</sup> Nasi ö mueno'e jemë gemuoro bimuvoromo naehu ë'ajëhi ëhi ë'onövore. Noehu öri mare jijiharuëhi ëhi jijiharue aribövioho gë avohoromo jemë'o ëhi ë'ore.

<sup>18</sup> Röhu ave jöho majae aho'o majëhi'i hijodoho huë vavaene bogo bise'o vadu'oho baeromo röhu maho majëhi'irögoro ë'e. Ae aho'obëhe mu sisë vaebe jijihoromo ëhuro Kerisohu korosire guomade jöho ahanovoruomajeje.

<sup>19</sup> Ahanovoromo röhu noehu God börömoho hö uehorovaruëhi ëhi jabumëro jabesi sinohuremu nimajoho börömoho hö uehorovoruomajeje. Javoji'e muoho vaeromo mae hörömo nimoronimorohë'i jijihoruomajeje. Ave sa'a hesi muohemu uehorovoruomajeje. Èhu'ëro jië'ëro vëni'e örire va'o hesi jioruome.

<sup>20</sup> Jabumë ëhi jië'e aribövie jioruome röhu nosi öri ari'oho bogo aveho jio'i ö'idöre jie. Ö'idöre jië'ego no raromoromo muebejarueje Bada Iesu Keriso no maro bamavuaje ahuro ö'idöre jioromo rueröhego.

<sup>21</sup> Rueromo mue bövie bise'e ruahö'ö'amoröhe darugoho baeromo nosi sino haho'e u'uhavujoho avohahuo'iramu gorosovoromo hesi sino haho'o mabëhe jiajëhi ëhi mabëhe javuo'amo'ë'e.

## 4

*Noehu uehore gemu baeromo nimorohoromo mu maemu uehorovo'iröhe jöhoje.*

<sup>1</sup> Èhuni nasi ö mueno'e Badare öroro ëhi uehorovoromo birivoromo riravore. Na jemesi örire dë vövöbajo'e aho'o uehorovëvego jemesi jöëni

vavaenegajeje. Na jemesi jöho uehorovoromo huë mabêhe jevê'ëro ni-moroho avohajeje. Ëhuni na jemesi örire uëve: Nasi ö mueno'e birivoromo riravorëjo.

<sup>2</sup> Naro Euodia jasi örire uave. Syntyche jasi örire uave. Badare magonahe gemuoho jëvaje ëhuni uehore gemu baere.

<sup>3</sup> Röhu ja na'lo mue gemuoho mae vaejanue ae javê'ego naro ave jöho jasi örire uave. Ëmagonaho niö'ioho ajëmijego gemuoro avoho ari'iro. Ëhesi bëhoho ë magonahoho jaburo na'lo gemu mae bimuvoromo God-are jö ma hesi muoho birivoromo vaejareje. Jaburo Clement'o na'lo mu vaejarue aribövi ioro'iorohu'lo ëhi ë'areje. Jabesi ihoho mae raromemu raromo'iröhe ö'idöre jiaje surire ë jajivo'amë'eje. Ëhuni ë magonaho niö'ioho ajëmine.

<sup>4</sup> Röhu jemë ae aho'lo Badare ae gemuoho jëvaje majae ëhi nimoro-honövore. Röhu maho uëve: Nimorohorëjo.

<sup>5</sup> Ma-sanuovoromo ae aho'obêhe jabesi öroro huë mae baejövore. Badahu rueröhe majaho dunove.

<sup>6</sup> Bövi bise'lo rovë'iroho nadi nurunurumo'irögoro a'i God-hu ajëmijajoho huë mae uavë'i ëninamiromo jemesi huë vavaenoho hesi öroro ma-jahinövore.

<sup>7</sup> Jemëhu ëhi ë'ë'oho God-are sanu'e mahuro noehu uehorovarue sanu iosiramijajohuro ëhuro jemesi uehoroho dë vövöbajo'oho duohëho'iramu sanuovëho'ë'e Iesu Keriso'lo gemuoro jëvê'ëro.

<sup>8</sup> Nasi ö mueno'e ijo tugoho'i jöho uë'ië'e. Aviëhi jië'e muohemu uehorovore. Jö mae ataruohuremu a duvahonö'e vaejarue muemu ahorirëro vaejarue muemu ajiro raromarue muemu dë vuëvo'e muemu aji ma'e muemu huë baejë'e muemu mu rabe rabe ma-maemu jiajoho rabe rabe noehu mae uehorovaruoho ë muohuremu uehorovonövore.

<sup>9</sup> Naehu rabe rabe röjëhijamu o vaejamu jemëhu garomo heromo baejari-joho ëhi jië'e muohuremu vaenövore. Ëhi ë'ë'oho God jö sanu'e bojamuijaje ahuro jemë'o hi'ë'e.

*Philippi ekaresiaehu huë baeromo Paul-are örire suvuro bamahamu Paul-hu mabêhe uëvade jöhoje.*

<sup>10</sup> Bada'lo gemuoro jevê'ego na nimorohevo avohe ë hesi bëhoho jemë majae bisemu ëgo'lo bogo ajëmijarijoho avevejö'e röhu maho uehorovevoromo huë baejevarejohuni. Iae jemë na uehorovevobe rovarijeje röhu huë baejevo'irarije öroho bogo biroharijeje.

<sup>11</sup> Na bogo uve: Jemë nasi huë vavaenoho bogo gevanovarije höromo bogo ëhuniho jajive. A'i huë mae o huë sisë rovë'oho na uvajeje: Na rabe rabe jevajoho iae eni höjo. Ëhi jië'e uehoroho iae na avoho baejë'e jeve.

<sup>12</sup> Bövi bise'lo bogo eni jevajoho o marohë'e mae jevajoho iae na gavë'e jeve. Eni da'uegë'oho o hömevë'oho bövi bise'lo marohë'e mae jevê'oho o inömo rumo'e jevê'oho o diehi jevê'oho naro uehorovoromo uvajeje: Na iae eni jevajëjo. Ëhi jië'e uehoro hesi bëhoho birohë'e jeve.

<sup>13</sup> Keriso biriri bojemaje ahuro ajëmijë'ëro ëhuro mae o sisë rovë'oho na birivoromo nami'irodoho eni jeve.

<sup>14</sup> Röhu nasi huë vavaeni ajëmijarijoho ëho iae mae ë'arijeje.

<sup>15</sup> Röhu Philippi amo rajohumë jemë'lo iae gavarijeje. Na urimë'i aevoromo Keriso-are jö ma majëhibe juvodevare evare naro jemesi sa'aho Macedonia vuonugo'i va'amü ekaresia ioro'ioroho bogo ajemi'i jemëremu ijo bajo suvuroho bojemiromo huë maho mana baejarijeje.

<sup>16</sup> Röhu jemesi sa'aho bogo vuonugo'i a'i Thessalonica amore va'o hijamu evare na bogo eni jevo'ego jemëro suvuore nasi örire nugö'ö'i arinövarijeje.

<sup>17</sup> Na bogo suvuoroho nahoromo ëhuniöho uë'i a'i na nege jemëro suvuore bojemego ëhuro ijonö God-hu suvuoro mana jemesi örire bojëmi'iröhoho bövi mae jiëhoröhego.

<sup>18</sup> Epaphroditus-ro jemesi suvuoroho nasi örire barovadeje. Ëhuni uëve: Jemesi suvuoroho iae na baejë'e jevajëjo. Iae eni höjo. Maröhë'e mae höjo. Jew rajehu mi God-are örire suvuoro bojami'i anoromo vënire buejaho'ego God-hu ridi heromo vuëvonövadëhi jemesi suvuoroho ëhi jie. God-ro garomo suvuoroho nimoromo huë mae jiajeje.

<sup>19</sup> Röhu jemë rabe rabe bogo eni jëvamu gëvë'o'ho jemë Iesu Keriso-are ae gemuöho jëvë'ego nasi Vavuöhuro iae ajëmi'ë'e hu daruge aje bövie bise'e bogo bise'o vadu'o'ho jië'ëro.

<sup>20</sup> Röhu na nege God nosi Vavu hesi ihoho ioro'iore gemu dö maro jioje va'oröhego. Iae mae.

*Paul-mëhu ijo tugoho'i jejëmijare jöhoje.*

<sup>21</sup> Röhu God-are aribövie Iesu Keriso-are aganoho aho'obëhe jejëmijajë uëre. Christian ö mueno'e na'o gemu mae arijaruöhuro jemesi örire jejëmijö.

<sup>22</sup> God-are aribövie aho'obëhe jemë jejëmijö. Röhu Rome a börömo hesi osare raromarue God-are aganoho jaburo bövi maho jejëmijö.

<sup>23</sup> Bada Iesu Kerisoro jemesi aru'ahohu'o jioromo huë baeromo ajëminövo'ë'e. Ahia mino'e.

## COLOSSIANS

*Paul-hu Colossae ekaresia jejëmijade jöhoje.*

<sup>1-2</sup> O asë'e God-are aribövi Colossae amore raromarujo humë biririvoromo Keriso uehorovaruje ö mueno'e jëve hu'o gemuore bimuvorovë'ëro. God-ro nimamu Iesu Keriso-are apostle jevë'ëro Paul na'o nosi öho Timothy'o noro jemesi örire jejëmijö. No nague God nosi Vavuohuro huë baeromo ajëmijego maro raromo'irarijego.

*Paul-hu Colossae ekaresia jabesi jöëni uehorovoromo God rajahiromo ëninamade jöhoje.*

<sup>3</sup> Jemëni uehorovoromo pari vaejë'iroho noro God nosi Bada Iesu Keriso-are Vavu hesi örire huë mae uavarueje.

<sup>4</sup> Rabëni hesi bëhoho iae no hejareje uvavamu: Colossae aribövioho jemëro Iesu Keriso mae uehorovë'i God-are aribövie aho'obëhe huë baejëvaruje höjo.

<sup>5</sup> Jemë ëhi ë'aruje hesi bëhoho jemëro uvarujeje: Huë mae bae'iröhe ajoho ö'idöre rune vaejahuë'e höromo raromoromo muebejarujeje ijönö biroho'irarijëro. Ëhi mae biroho'irarije jöho mami'e aehu Keriso-are jö ma hesi bëhi mae majëhijarevare evare jemë hejarijeje.

<sup>6</sup> Jemesirire jiajëhi ëhi sa'ae aho'obëhe maja rojomajire beva'ajire ë jö maho majëhijego ae aho'obëhe eja huobe marëbe va'ajeje. Ëhi jië'e mu maho jemesirirohu'o rumorovë'eje. Jemëhu jö heromo God-are huë ma baeromo hesi bëhi avoho hejarije majare evare aevadeje.

<sup>7</sup> Epaphras-ro ë jö maho aevo'i jemë majëhijadeje. Epaphras noro uehorovarue aëro jië'ëro no'o bimuvoromo Badare muoho vaejahajeje. Huro no'o röromo jemesirire muoho biririvoromo ajëmijajeje.

<sup>8</sup> Huro uövuadeje: God-are Aru'ahëro jemesi dë vövöbajo'oho huotövëhë'ëro ae huë baejëvo avoharuje höjo. Jemesi jöho ëhi majahuijamu hejareje.

<sup>9</sup> Iae ëhuni jemesi jö hejarevare evare no aevoromo jemëni God-are örire uehorovobe rovaroho jaruvoho ëhi gemuoho ë'obe va'arueje. Ëhi ë'obe va'oromo noro God uavarueje huro jemë avohëvego hesi Aru'ahëhu simano ma bojamuijaje ëhi jië'e simanoho jemë'o mabëhe baeromo mue aho'obëhe avoho garomo ëhuro ga barë'irarijego God-hu diehi nimajoho.

<sup>10</sup> Ëhuro huhu nimajëhi jemëro ëhi vaejego Badaro jemë gëromo vuëvo avoho'iröhego. O jemë mu mae bövie bise'e vaeromo God bisemu gavaru-joho gabe va'ojuvo ijönö ga avoho'irarijego.

<sup>11</sup> Röhu God-hu aji mare hiromo bojamuijaje biriroho ëho jemëro bövi mae bae avohoromo ëhuro huë mae huë sisë rabe rovego nimorohë'i biririvoromo mae riravo'irarijego.

<sup>12</sup> Mae riravoromo Vavuoho huë mae ua'irarijego rabëni huro jemë avohëvamu hesi ariböviehu aji'e öri ari'ere va'o raromoromo mae bae-jaruëhi ëho jemë'o bae'irarijoho eni jëvë'ëro jië'ëro. Iae ëhuni no God ua gavarueje.

*Keriso aho'obëhe iosiramui'amaje a hesi aharire javuaje jöhoje.*

<sup>13</sup> Iae mae. God-ro no ajamuiromo ramoromo hesi vöröre raromaroho jiovahuoromo rinaguoromo hesi Harihu mabëhi hesi aharire ramuë'eje.

14 Ramu'ego hesi Harihohuro i'u'e mu sisëho tugohahuo'i hesi sasohë'e mu maho jiovahuoromo sisëho mu'uvahuadeje.

15 Sisë mu'uvahuade aho Keriso God bogo gavarue a jiajëhi hu ëhi jië'ëro no hu garomo uvarueje: God ëhi höjo. Hu Murioho jië'ëro God-hu bamade bövioho bise'oho iosiramui'amoromo hu simanohoje.

16 Ëhesi bëhofo God-ro Keriso uavamu huro bövioho bise'oho avoho'amadeje. Ö'idöre jiajohu'o sa'are jiajohu'o nunehu ga'amaruohu'o bogo ga'amaruohu'o simano vaeruomaje aru'aho masijohu'o vörö baeruomaje aru'aho masijohu'o aho'obëhe God-ro uavamu avoho'amo barëjadeje hesi muebe'amoröhëni.

17 Bövi bise'o bogo bamadevaroho Keriso hu urimo jiadeje. Huro aho'obëhe mueberomo ma'eno titimajeje.

18 Hu ekaresia nosi simanohoje no ma-hesi övo duruajo'e javuë'ëro. Hu ekaresia nosi bëhohoje. Hu aevo'i guomoromo ri'öjadeje ëhuro aho'obëhe iosiramui'amoromo huro urimo nuniroho jioröhëni.

19 God-ro nimamu Kerisoro hesiro daruge uehore bövie bise'e bae barëjë'eje.

20 God-ro ëhi nimë'ëro uvadeje: Na negajëjo Kerisoro aho'obëhe nasinö sö rovego na'o huë mae jioruomoröhego. Kerisoro korosire iromoromo köe rueromo guomego ëhuro God naro buore vaeromo bövie bise'e sa'are o ö'idöre jio'amajoho avoho'amego na'o huë mae garorovë'i raromoröhego. Na ëhi negajëjo.

21 Röhu urimoho jemëro sisë'i uehorovoromo sisë vaejamu mue gö jëvë'ëro God-ariroho hahagu tariö'örovë'e jëvanovoromo God nu huodivaruje aribövie jëvadeje.

22 Jaruvoho bogo God nu huodivaruje aribövioho jëvo'i a'i God-ro hesi Harihoho nug'öjamu sino haho'e jioromo guomamu ëhuro God-ro jemë buore vaejëvoromo agane vaejëvadeje ëhuro jemë övövo rumo'e jö sisë rumo'e jëvo'i ma-maemu jëvego va'o hesi nunire mae riravo'irarijego.

23 Hesi nunire ëhi mae riravo'i nëgë'oho mae uehorovaruje jöho ëhuremu birivoromo uehorovore. Urimo ë jö maho heromo uvariijeje: U'emu God'o gemu mae raromo'ejarëjamu huë mae jëvobe rovadeje. Ëhi uehorovobe rovarijoho nadi vuonugore. Ëjö maho sa'ae aho'obëhe maja rojomajire beva'ajire aëro majëhibe jijihö barëjë'ejö. Röhu ë jö hesi muoho naro vaejajeje.

*Paul-hu ekaresia ajëminövade jöhoje.*

24 Naro jemë ajëmi'irodëni vi'ehi huë vavaeni bövi bise'o baebe rovodoho huë mae jeve. Noehu Keriso'o röromo bae'iröhe vi'ehoho ëho naro ajamiromo nasi sinore bae'i hirohajeje hesi sino haho'oho naehu uëvaje hesi bëhoho hesi ekaresiaho mae jëvoröhego.

25 Ekaresiae jemë mae jëvoröhego God-ro ekaresia ajëmi'irode muoho nasi örire bojemijë'eje. Bojemiromo uevë'eje naro hesi jöho majëhi barë'irodego.

26 Majëhi'irode jöho urimo God-ro ae aho'obëhe subivëhobe rovadoho jaruvoho hesi aribövioho röjahuij'eje garöhego.

27 Ëjö urimo subivahuadoho God-ro hesi aribövioho röjahui'i nimadeje noro garomo uvoröhego: Ëjöho aji mabëhe jië'ëro sa'a gö gö raje aho'obëhe hebe va'oromo ma-mabëhe raromoruomo'ajëjo. Ëjö hesi bëhoho Keriso jemë'o jie. Keriso jemë'o jië'ëro ëhu'ëro uvarujeje: U'emu hesi aji mare ajio raromo'ejarëjo. Jöho ëhije.



<sup>28</sup> Ĕhu'ëro jië'ëro Keriso-are jöho ae aho'o majëhijarueje. Majëhiromo simane ma-mae uehorovoromo ae aho'obëhe röjëhibe jijiharueje jö bëhoho heromo avo'avoho uehorovoruomoröhego. Avo'avoho uehorovobe va'oromo ëhuro ae gemu gemu aho'obëhe Keriso-are ae gemuho jioromo a duvahanö'e God-are nunire riravoröhego.

<sup>29</sup> Ĕhi mae riravoröhego ëhuni naro Keriso-are darugo bövi maho baeromo biririvoromo mu börömo böröme vaemu vaeromo hesi jöho röjëhijajeje.

## 2

*Sareri'e jö bogo ejëho'i Keriso-are jöhemu mae uehorovo'iröhe jöhoje.*

<sup>1</sup> Röhu na nege jemëro ave jöho ga'irarijego. Na muoho bogo bise'o vadu'oho vaejajeje ëhuro jemë'o Laodicea amo rajohu'o nasi nu ano'o bogo gevarue a ioro'iorohu'o ajëmi'irodëni.

<sup>2</sup> Naehu mu vaejaje hesi bëhoho na nege jemesi dë vövöbajo'ohu'o jabesirohu'o biririvëho'iröhego. Jemë'o jabu'o huë baerovoromo rajahirovo'irarijego. Jöho avoho heromo ëhuro mae uehorovoromo uvo'irarijego: Jöho bogo sareri'ehu jio'i ma-mae gemu höjo. Ĕhuro God-hu urimo subivëhade jö hesi bëhoho Keriso-are jöho ga'irarijego.

<sup>3</sup> Ae rahu Keriso-are bëhi gavë'oho ëhuro God-are nuni aji'e uehoro maho börömo mae biroho'anue. Ĕhuremu jio'i biroho'irane öre gö bogoje.

<sup>4</sup> Na Keriso-are jö ëhi uëvaje hesi bëhoho ae göëro jemë sarerëmiromo vuëvo'e jöho majëhijego mae höromo ejëhojöëni uëve.

<sup>5</sup> Röhu na rori'o hi'i röhu nasi uehoroho aho'o jemesirire jie. Ĕhuro na jemë'o jevanove. Jemë'o hijanovoromo gavaje jemë biririvoromo gemuore riravoromo Keriso mae uehorovego gëromo nimorohajeje.

*Keriso-are ae gemuohuro javuë'ëro ëhu'ëro bövi bise'o eni javuego mae raromarue jöhoje.*

<sup>6</sup> Röhu jemë aevoromo mae uehorovoromo uvarijeje: Iesu Keriso iae nosi börömoho höjo. Aevoromo hu mae uehorovarijëhi ëhi uehorovoromo hu'o gemu mae raromo jijihore.

<sup>7</sup> Ije ö'e dirumu'ëro bibivajëhi o javu öbehu bibivo'amajëhi ëhi Keriso-are jöro dirumunö'e io'amoromo bibivo riravore. Ĕhi'oromo röjëhijamu hejarije jöho biririvoromo mae uehorovobe hesi öroro mabëhe uabe va'ore.

<sup>8</sup> Röhu aehu ëma sarerëmiromo uëvaruoho: Aveho nuni aji'e jö böröme hö uëvaruoho nadi ejëhoromo guaroho rireromanovore. Jabuhu atarue jöho ma-aëro jabesi uehorëro avohobe rovë'eje. Ave sa'a hesi jöhemu jië'ëro ëhuro Keriso-are jöho ahajeje.

<sup>9</sup> Ĕhuni jabesi jöho nadi ejëhore. Ĕhesi bëhoho God-hu diehi jiajoho iae Kerisoro hesi sino haho'ere bae barëjë'eje.

<sup>10</sup> O aru'aho mue gö gö jemëhu baejöro God-hu nimajoho iae eni bae barëjë'e jëve Keriso-are ae gemuohuro jëvë'ëro Kerisoro simano vaeruo-maje darugo'e aru'ahë gö gö aho'o taemëvo'i huro gemuëro dö maroho jië'ëro.

<sup>11</sup> Jemë Keriso-are ae gemuohuro jëvë'ëro ëhu'ëro jemesi sino sisëho tarivëhanovë'eje. Ĕhesi bëhoho bogo ma aehu Jew rajo muoho vaeromo sinoho tarivëhamu ëhuro God-are aribövie jëvo'i a'i Kerisoro jemesi sino hesi mu sisëho tarivëhë'eje God-are aribövie jëvoröhego.

<sup>12</sup> Jemë bapataeto vaejarijevarë evare Keriso guomamu hure bamarohuro ëhuro jemesi uehoro mamioho hu'o gemu mae guavëhë'eje ioro'ioeremu

barëjêho'irôhego. Rôhu God-ro darugoho bojamamu Keriso guomoromo ri'ôjadeje. Êdarugoho jemëro mae uehorovoromo êhuro Keriso'o gemu mae ri'ôromo uehoro i'oho baejarijeje. Bapataeto vaejarijevare êhi jêvadeje.

<sup>13</sup> Urimoho jemë mu sisêhemu uehorovonôvariijeje. Mu sisêhemu uehorovoromo bogo Jew rajehu jêvo'i sa'a gö rajëro jêvê'ëro God-are jôgoroho bogo baejê'ëro êhu'ëro jemesi dë vövöbajo'oho vuovëvanovadeje. Jaruvoho God-ro jemë Keriso'o gemu mae ajëmamu i'ovoromo ri'ôromo uehoro i'e baejê'e jêve. Rôhu God-ro nosi sisêho aho'o uehorovoromo vuonugahuê'eje.

<sup>14</sup> Urimo huro hesi jôgoroho bojamuïromo uövuadeje: Êhi êhi ê'orëjo. Bogo ê'ë'oho i'ue bae'a'arujëjo. Êhi uöromo gavade noro ê jôgoroho ahamu gagorovo nosi ihoho jajivoromo uvadeje: Jabumë mu sisë êhi êhi vaejê'ëro i'ue bae hesi jioruomajëjo. Êhi ê'ë'ëro Keriso korosire guomadevare God-ro nosi sisêho uehorovoromo vuonugoromo nosi mu sisë jö surire jiajoho Keriso'o korosire ano taemoromo mu'uvahuadeje êhuro mae javuorôhego.

<sup>15</sup> Rôhu majae gemuore Keriso korosire guomamu êhuro aru'aho sisë ihe gö gö sa'a bövi bise'o muebe'amarue jabesi darugoho God-ro ruahö'ô'amoromo rori'o ujuoho ruruhö'ôjadeje. Ruruhö'ôromo ê sisë aribövioho söromo a nunire rovadeje ae aho'obêhe garôhego God-ro jabumë ruahö'ôjêvê'e jiego.

<sup>16</sup> Vörö'e aru'aho sisêhu ave sa'are muebejêvoruomadoho ruahö'ôjêvê'e jiaje êhuni aehu ave sa'a hesi jôgorohuremu uehorovoromo uëvaruoho: Êioho jovoho bogave i'irarijëjo. ÊJew rajo maja bôrômoho vadune göro göro manaere göro göro hurae göro göro êhi rovego êhi êhi vaenövorëjo. Nosi jôgoru bogo ejahuê'oho sisêrêjêvo'ajë uëvaruoho nadi ejêhore.

<sup>17</sup> Êhi jiê'e jôgorohuro êhuro God-are mu maehu rue'irôhoho êho no masisê'i sisê'i maja aru'ahonö'e gavarueje. A'i Keriso gavê'ohuro êhuro ê mu ma hesi bêhoho gavarueje.

<sup>18</sup> Êhuni aehu sarerëmiromo uëvaruoho: No nia'ovo'iraeromo mu masijo masije gavê'ëro êhu'ëro a masije javuajëjo. Êhuni uëvaruëjo: Jemesi arijo'arije taemorovorëjo. Aneraho uvene aho røjêhinövorëjo. Nosi jö bogo ejahuarujohuni sisëro va'a'arujë uëvaruoho nadi ejêhore. Êhi jiê'e ariböviohuro sinehu nimaje mu sisêho uehorovoromo ma-dôhemu nimoronimorohê'i jijihoruomajeje.

<sup>19</sup> Bogo biririvoromo Keriso mae uehorovoruomajeje. Rôhu Keriso hu simanoho jio'i no hesi övo hörü'oho javue. Hu simanoho jiê'ëro muebejavuego övo hörü'oho jarömi umuogëro darugoho baerovoromo gemuoro bimuvorovoromo God-hu êhi ê'ojöro nimadêhi êhi vaeromo böviraebe va'arueje. Êhi jiê'ëro Keriso nosi simanohoje rôhu ê sisë aribövioho bogo biririvoromo simanoho Keriso'o gemuoroho bimuvorovoruomajeje.

*Keriso'o gemu mae vuovanovoromo mu mami vuonugo'i hu'o gemu mae ri'ôromo mu i'o baejare jôhoje.*

<sup>20</sup> Rôhu jemë Keriso'o gemu mae bimuvoromo vuovëvamu ave sa'a hesi mu jôho barëjêhadeje. Sa'a mu jö barëjêhadoho rôhu jemë rabëni ave sa'a hesi mu uehorovarijoho bogo vuonugê'e êhi gemuoho raromo jijiharujeje. Jemë rabëni aviêhi jiê'e jôho ejêharujeje:

<sup>21</sup> Aveho nadi ma'enorëjo. Êho nadi irëjo. Aruëroho nadi rëhorëjo.

<sup>22</sup> Êhi jiê'e jôgoroho ma-i hesi jögore o inömo hesi jögoreje. I ijê'oho barëjajeje. O inömo baeromo mu vaejê'oho êhuro ma-sisêrê'amajeje.

Ēhi sisērē'amorōhe inōmo bōvi bise'o hesi jōgoroho ma-aēro bojēmiromo rōjēhiruomajeje.

<sup>23</sup> Rōjahi'iramu uvo'a'anue: Jabesi jōho nani simano ma'e jōe hōjo. Ēhesi bēhoho jaburo uvarueje: Uehore aho'o bojamiromo aru'aho masijoho uvene aho rōjēhinōvorējo. Arijo'arije taemorovonōvorējo. Sino haho'o ho ijumorovonōvorējo. Rōhu jabesi jōho ma-dōemu maeje. Ejēhē'o ho bogo ēhuro sinehu nimaje mu sisēho aharueje.

### 3

<sup>1</sup> Rōhu Keriso guomoromo ri'ōjadohu'o gemu mae ri'ōjē'e jēvaje ēhuni Kerisohu God-are övo manō bōrōme hijajire dōre jiaje muoho bōvioho bise'o ho ēhemu uehorovore.

<sup>2</sup> Nadi ave sa'a hesi mu sisēho uehorovo'i dōre jiajohemu ēhemu uehorovore.

<sup>3</sup> Jemesi mu sisē hesi darugoho ioro'ioemu barējēhē'eje. Ēhuro vuovēvanovē'eje. Jemē vuovēvanovamu Keriso'o bimuvorovē'ēro jemesi darugo i'ohō God-arire gurihijē'eje.

<sup>4</sup> Ēhi'obe va'ojuvo hujeji Keriso darugo bojēmijaje aho va'orahoro rue'ē'e. Rue'iramu evare jemēro hu'o va'orahoro riravoromo hesi ajoho gemu mae bae'a'aruje.

*Mu mami vuonugo'i mu i'o vaenōvo'irōhe jōhoje.*

<sup>5</sup> Ēhuni sinehu nimaje mu sisēho mu'ure. Ōehu jijihanovarujoho va'inumi'e mu vaejarujoho jemesi dēre uehoro sisē ri'ōjēgo nimarujoho ēhi jī'e muoho mu'u'amore. Rōhu avare inōmemu nimaruje muoho mu'ure. Avare inōmemu nimarue mu hesi bēhoho God dejonō bamo'i inōmo sisē nuninō bamarue muohoje.

<sup>6</sup> God-are jō bogo eruomaje aribōviohuro ēhi jī'e mu sisēho vaeruomajego ēhuni God-are vōrōhuro jabumēni rue'ē'e.

<sup>7</sup> Urimoho jemē'o ēhi jī'e aribōviohu'o gemuore jijihoromo ēhi jī'e mu sisēho vaenōvarijeje.

<sup>8</sup> Rōhu avevejō'ohō aviēhi jī'e mu sisēho aho'obēhe vuonugore. Dē vōrōnimarujoho vōrō'iraejarujoho uehoro sisē baejarujoho ēhi ē'arujoho vuonugore. Ae gö jabesi iho ijumarujoho javoji'e jō sisē atarujoho bogave jemesi jō'orohō suorovo'i.

<sup>9</sup> Nadi göēro göho sareramirovore rabēni hesi bēhoho uehoro mami jēvo'ego mu sisē vaenōvarijoho vuonugo'i

<sup>10</sup> uehoro i'e baejē'e jēvaje. Ēuehoro i'ohō God-ro aevoromo bojēmadeje. Bojēmijē'ēro ē uehorohō huro avohēhobe va'ajeje huhu uehorovajēhi ēhi uehorovojōro ēhuro jemēro hu avohō ga'irarijēgo.

<sup>11</sup> Uehoro i'ēro jēvē'ēro jemē bogo aho adovoromo uvo'a'aruje: Jew rajoho gö javuo'i sa'a ioro'ioro rajoho gö javuajējo. Jew rajo mu vaeromo sino tarivahuē'e aribōvioho gö javuo'i sino bogo tarivahuē'e aribōvioho gö javuajējo. Huē gö aribōvioho o rori'ere aribōvioho gö javuajējo. O ae gö jabesi muemu vaejēharue aribōvioho gö javuo'i nosi nīmoro mu vaejarue aribōvioho gö javuajējo. Ēhi jī'e muoho iae barē'i jemē ae aho'obēhe Keriso-are aribōvie gemuohō jēve. Hu ae aho'obēhe jemesirireje.

<sup>12</sup> God-ro jemē hesi baejēvē'ēro jemē hesi aribōvi maemu jēvego huro jemē dē vōvōbajo'e aho'o uehorovēvajeje. Ēhuni huē baeromo a ajēmi'irarije muoho baere. Nadi sivuohō uehorovoromo bōvioho riravo'i

ma-sanuovoromo muoho vaere. Ae göehu huë sisë bojëmijë'oho biririvoro-  
romo ma-nunëremu ga taemore.

<sup>13</sup> Göëro göho garomo nadi nuoho huodivorovo'i jabu'oma-raromore. O  
uvë'iroho: Ae göëro mu sisë vaejade hö uvë'iroho göëro gö hesi sisëho ue-  
horovoromo vuonugore. Badahu jemesi sisë uehorovoromo vuonugadëhi  
jemë'o ëhi ë'ore.

<sup>14</sup> Ëhi jië'e muoho vaejë'i röhu ave muohuremu avoho ma'enore. Göëro  
göho dë vövöbajo'e aho'ouehorovore. Dë vövöbajo'e aho'ouehorovë'oho  
mu mae aho'obëhe avo'avoho vaenövo'aruje.

<sup>15</sup> Röhu Kerisoro ajamuijego nosi dë vövöbajo'e mae javuego gemuoro  
mae raromarueje. Jemëro ëhi gemuoro mae raromo'irarijego ëhuni God-ro  
gagovëvadeje sino haho'e gemuoho jëvojöro. Ëhuni ë muohuremu nunoro  
bamoromo uvore: No muoho ëhi ëhi vae'ejarëjo. O God-hu suvuoro gö gö  
bojëmijajoho nadi ëma nunëremuoho ga'i uvore: God-ro suvuoro mabëhe  
bojamuijë'e hö uvore.

<sup>16</sup> Röhu Keriso-are jöho mabëhe jiaje ë jöhuremu uehorovore. Ëjöho  
uehorovoromo simano mae bae avohoromo öroho röjahirovoromo jögore  
mamirovore. Ëhi'oromo uvore: God-ro mae vaejavuajë uvë'i Psalms surire  
jajivare jöho God rajahi'iröhe jöho Aru'ahehu bojëmaje jöe gö gö iore.

<sup>17</sup> Jemë jö atë'oho mu vaejë'oho o rabe rabe ë'ë'oho God Vavuoho Bada  
Iesuare ihore huë mae uavë'i mue aho'ou Bada Iesuare ihoro vaenövore.

*Aehu diehi avo'avoho garorovo'iröhe jöhoje.*

<sup>18</sup> Röhu vaboroharo jemesi baru jabesi jöho ejëhonövore. Jö ejëhë'oho iae  
maeje jemë Badare magonahëro jëvë'ëro.

<sup>19</sup> O baruoharo jemesi vaboroho rajëhire. Rajëhiromu nadi sisë'ioho  
vaejëvore.

<sup>20</sup> O aboji harihu'oharo jemesi vëmu vavu'ou jabesi jöho aho'ou ejëhonövore  
ëhi ë'ë'oho Badaro nimaje jiaje.

<sup>21</sup> O vëmu vavu'oharo aboji harihu'oho nadi huë sisëho bojëminövore.  
Huë sisë bojëmibe va'ë'oho jabesi uehoroho u'uhëho'ë'e.

<sup>22</sup> Ae gö jabesi muemu vaejëharuje aribövioharo jemesi masijoho  
ejëhonövore. Nadi ma-döemuoho ejëhorego jemesi masijohuro jemë gëromo  
mae uehorovëvo'irögoro a'i Bada uehorovoromo jabesi öroro uhohu'ou mae  
ejëhonövore.

<sup>23</sup> Ejëhoromu mu rabe rabe vaejë'oho uvore: Bogo ma-a jabesi muoho  
vae'i na Badare mue vaejajëromo dë vövöbajo'e aho'ou avoho uehorovoromo  
muoho vaere.

<sup>24</sup> Mu ma vaejë'oho Badare ariböviehu bae'iröhe suvuoroho huro jemë'ou  
mana bojëmi'ë'e. Ëhuremu uehorovore. Ëhesi bëhoho ae gö jabesi mu  
vaejë'oho ëhuro Keriso jemesi bövi hesi muohu'ou vaejarujeje.

<sup>25</sup> O mu sisë vaejë'oho ë mu sisë hesi manaho bae'a'aruje. God-ro bogo  
gö nimo'i gö bijönimo'i a'i ma-gemu uehorovavuajeje.

## 4

<sup>1</sup> O simano vaejaruje aribövioharo jemesi muemu vaejëhoruomaje aribövi  
jabesi öroro avo'avoho vaejëvore. Uvore: Bogo jabumëremu a'i no'ou Simano  
Vaejavuaje Ae iae ö'idöre jiajëjo.

*Biririvoromu God-are örire jö jövoromu mu avo'avoho vaenövo'iröhe  
jöhoje.*

<sup>2</sup> Röhu God-are örيره jö atë'iroho nadi u'uvo'i a'i birivoromo nune jioromo hesi öroro mabëhe uaromo jöho atore.

<sup>3</sup> God-are öroro jöho atoromo röhu nosi jöëni ëninamirego huro nosi öroho jiovahuo'iro no Keriso-are jö subivahuadoho ae huruoho majëhi'iröhe. Ëjö majëhijajohuni ëhuni aëro savoji gagore ba'amevë'ëro hijajeje.

<sup>4</sup> Ëninamirego na ë jö hesi bëhoho avo'avoho huruoho majëhi'iro aëro ma-mae heruomoröhe. Naehu ëhi ë'ë'oho iae maeje.

<sup>5</sup> O Keriso-are jö bogo heruomaje ariböviohu'o gemuore raromë'iroho simanoho avoho uehorovoromo jabu'oho raromo jijihore. Jabu'o raromoro röhu majae eni jiamu gavë'iroho nadi ëma raromo'i a'i birivoromo jabesi öroro avoho ajëmire.

<sup>6</sup> Röhu jemëhu jabu'oho jö atë'oho jemëro vuëvo'e jö mahemu atore. Ëhi jië'e jö atë'oho ëhuro he'irarije aëro Keriso-are jö bëhoho he'i uë gëvamu hejë'oho ae gemu gemu avoho majëhibe va'a'aruje.

*Ijo tugoho'i jejëmijare jöhoje.*

<sup>7</sup> Tychicus-ro ö'oromo naehu rabe rabe ë'aje jöho majëhi'iramu he'a'aruje. Hu nosi huë baerovarue öeje. Hu no'ö bimumoromo Badare muohemu vaejahajeje.

<sup>8</sup> Ëa naehu nugö'ö'ië'aje hesi bëhoho huro ö'oromo jöho majëhijego noehu diehi raromarue jöho jemëro hejego dë vövöbajo'oho mae jëvoröhego ëhuni nugö'ö'ië'e.

<sup>9</sup> Röhu Onesimus-ro Tychicus'o gemu mae ö'ë'e. Onesimus nosi huë baerovarue öhuro jië'ëro birivoromo Keriso mae uehorovajeje. Hu jemesi ae gemuohoje. Tychicus'o Onesimus'o niö'iro noehu rabe ë'aruoho majëhi barë'iramu he'a'aruje.

<sup>10</sup> Röhu na'ö savoji gagore hijaje aho Aristarchus-ro jemesi örيره jejëmije. O Mark Barnabas-are muenohuro jejëmije. Röhu Mark ö'ë'oho jejamiromo uare: Nosi osaro ro hijëjo. Ëjöho na mami'e bojëmamü gavarijeje.

<sup>11</sup> Röhu Joshua iho göho Justus hu'ö jemesi örيره jejëmije. Aristarchus o Mark o Joshua ë Jew rajoho niö'i gemu jaburo sivue na'ö bimumoromo God-hu muebejaje öri ari'ö hesi muoho vaejarueje. Vaeromo ma-mabëhe ajemijë'ejö. Jew rajo ioro'ioroho bogo ajemijarueje.

<sup>12</sup> O Epaphras jemesi ae gemuoho Iesu Keriso-are mu vaejahaje ahuro jemesi örيره jejëmije. Huro jemesi jöëni börömo mae birivoromo God-are örيره ëninamijajeje huro ajëmego jemëro a duvahanö'e birivoromo riravoromo hesi jöho uhohu'ö ma-mae hö uehorovoromo huhu rabe rabe nimajëhi ëhi ejaho barë'irarijego.

<sup>13</sup> Ëhi ëninamiromo mu börömo böröme vaejajeje jemë'ö Laodicea amo rajohu'ö Hierapolis amo rajohu'ö ajëmi'iröhëni. Mu böröme vaejamu gavë'ëro naro majëhije.

<sup>14</sup> Röhu oso muebejaje ae nosi huë baerovaruoho Luke o Demas jabu niö'iro jemesi örيره jejëmijö.

<sup>15</sup> O Laodicea raromarue Christian ö mueno'ohu'ö jejëmijode höre. O Nympha nasi Christian ma'ine o hesi osare ro gagovoruomaje ekaresiahu'ö jejëmijode höre.

<sup>16</sup> Röhu ave surire jö baeromo adahë'iroho suroho nugö'öromo Laodicea amo rajoho uëregö jabu'ö adaho'irovo. O naehu Laodicea amore nugö'öjode suroho jabuhu jemëni nugö'öjë'iroho jemë'ö ëho adahore.

<sup>17</sup> Röhu Archippus uare: Badahu bojamade muoho avo'avoho uehorovoromo vae barënëjo. Ëhi uane.

<sup>18</sup> Röhu ave jöho naro nasi övëro jajive gare. Paul naro jemesi örire jejëmiye. Na savoji gagore hijaje jöho nadi rumonimore.  
God-ro jemë huë baeromo ajëminövo'ë'e. Ahia mino'e.

## 1 THESSALONIANS

*Paul'o hesi ariböviohu'o jabuhu Thessalonica amore raromarue ekaresia jabesi örيره jejëmijare jöhoje.*

<sup>1</sup> O asë'e Thessalonica ekaresiaho Paul naro Silvanus-ro Timothy-ro ave jöho bamëhö. Jemë God Vavu hesi o Bada Iesu Keriso-are ekaresiaëro jëvë'ëro Thessalonica amore raromarujoho noro jemesi örيره jejëmijö. No nague God-ro huë baeromo ajëmijego maro raromo'irarijego.

*Thessalonica ekaresia ariböviehu birivoromo God mae uehorovoromo raromare jöhoje.*

<sup>2</sup> No God-are örيره jö atë'iroho no jemë ae aho'obëhe uehorovoromo jemesi jöëni majae ëhi God huë mae uavarueje.

<sup>3</sup> Nosi Vavue God-are örيره ëninamijë'iroho noro ave jöho uehorovarueje. Jemëro Keriso mae uehorovoromo ëhuro mu maho vaejarujeje. O ae gö huë baejëvoromo ëhuro i'u'e muoho vaejarujeje. O birivoromo nosi Bada Iesu Keriso ga'i muebemu muebejarujeje.

<sup>4</sup> Nasi ö mueno'e noro garomo uvarueje: God-ro hesi dë vövöbajo'o uhohu'o jemë rajëhijaje höjo. Rajëhijajoho hesinö jëvoröhego uvë'ëro ëhu'ëro huro jemë baejëvade höjo.

<sup>5</sup> Noehu ëhi uvarue hesi bëhoho urimë'i noehu Keriso-are jö ma majëhijarevare evare no bogo ma-jö'ëremuoho ë jö maho majëhijareje. A'i no God-are darugohu'o Aru'ahohu'o baejë'ëro ëhu'ëro birivavuamu jöho majëhijamu ma-burëro ejahuarijeje. Noehu jemesirire raromoromo jemesi jöëni diehi jië'e mu vaejaroho iae jemë gavarujeje.

<sup>6</sup> Röhu no'o Bada'o noehu raromo jijiharëhi jemë'o ëhi gemuoho raromo jijihonövarijeje. O noehu Keriso-are jö majëhijarevare jemë gavarijeje huë vavaene jemesi örيره rovamu. Röhu God-are Aru'ahohuro jemesi dë vövöbajo'oho avohëhamu jemëro nimorohoromo jöho birivoromo ejahuarijeje.

<sup>7</sup> Nimorohoromo jöho mae ejahuamu Macedonia sa'are Achaia sa'are raromarue Christian aribövie aho'obëhe jemesi mu ma hesi jöho heromo uvoruomë'eje: Ë'ego no'o ëhi jië'e muoho vaejarëjo.

<sup>8</sup> Ëhesi bëhoho jemëro mu mae vaejë'ëro ëhu'ëro Badare jöho jemesirire jioromo jemesi sa'ae Macedonia rumorovoromo sa'a göho Achaia rumorovobe va'ë'eje. Röhu gö'o jemëhu God mae uehorovaruje jöho sa'ae dinö'e dinö'e rumorovobe va'ë'eje. Rumorovobe va'amu ae he barëjë'ego no bogo röhu maho aho majëhiromo uë'ejo: Thessalonica amo rajohuro God mae uehorovoruomaje höjo. No bogo ëhioho uë'ejo.

<sup>9</sup> Ëhesi bëhoho jaburo mami'e hejë'ëro jabesi ri'öromomo nosi jöho ae majëhiromo uëruomajeje: Paul-mëhu Thessalonica amore aevoromo va'arevare ë amo rajohuro jabesi örيره mabëhe rajëhiromo baejëvare höjo. Baejëvoromo sareri'e darugo rumo'e inömo masije höromomo ëhemu uehorovoruomadoho vuonugo'i God darugo'e hijaje a ma hesi muoho aevoromo vaeruomade höjo.

<sup>10</sup> Aevoromo God-are muoho vaeromo hesi Harihoho muebejare höjo huro ö'idöre jioromo rueröhego. Harihoho iae Iesuoje. Guomamu God-ro ajamamu ri'öjadeje. Ri'öjë'ëro huro no ajamuijajeje ëhuro vörö'e maja

rov'oho God bogo dëho vörönimoromo i'uoho mana bojamuijego bae'i a'i mae raromo'iröhego.

## 2

*Paul-hu Thessalonica hiromo diehi mu vaejade jöhoje.*

<sup>1</sup> Röhu nasi ö mueno'e jemë'o gavaruje bogo noro ö'oromo Keriso-are jöho majëhijamu ë muoho sisërëjadeje.

<sup>2</sup> Urimë'i noehu jemesirire bogo ö'i Philippi amore raromarevare evare ë amo rajohuro huë vavaene bojamuiromomo mu sisë vaejavuareje. Ëhi ë'aroho jemë iae hejë'e jëve. Ëhi'amu noro jemesirire ö'amu jemesi amo rajohuro nosi jöho bijönimoromo ri'öromomo no'o muorovo'ië'areje. Muorovo'ia'amu röhu nosi Böröme God-ro ajamuijamu no bogo vuonugo'i biririvoromo hesi jö maho jemë majëhijareje.

<sup>3</sup> Ëhesi bëhoho aehu simano huotorovojöro mu jö majëhijë'oho no bogo simanoho garaeromo sareri'e jöho mae höromomo jöho majëhijarueje. No bogo uehoro sisëho baeromo jöho majëhijarueje. No bogo aho sarerëmi'i nimoromomo jöho majëhijarueje.

<sup>4</sup> A'i God-are jöho mae majëhijarueje. Ëhesi bëhoho God-ro no göromomo uvadeje: No eni javuajë uvoromo hesi jö maho nosi örire bojamuadeje noro majëhiröhego. Hesi jöho bojamuijë'ëro ëhuni noro jöho avoho majëhijarueje bogo aho heromo nimoroho'i a'i God nosi dë vövöbajo'o gövuajohuro nimorohojöro.

<sup>5</sup> Noehu jemë bogo mae bogo sanusanuëmiromomo sareri sareri'e jö majëhijaroho jemë iae gavarujeje. No bogo nosi sinohemuoho uehorovoromo bövioho bise'oho bojamuijöro nimoromomo jöho majëhijareje. God-ro gö'ego no jö mae uëvö.

<sup>6</sup> No bogo ma-aëro rajahuijöro bogo ëhunioho jemë jöho majëhijareje bogo jemëro o a ioro'iorëro rajahuijöro.

<sup>7</sup> No Keriso-are apostle ömo'ömohuro javuë'ëro hesi darugoho baejë'e javue. Hesi darugoho baejë'e javuë'ëro ëhu'ëro no masije riravoromomo i'u'e muoho jemë bojëmi'ibejo iae mae jio'ibejo. Röhu no bogo ëhioho ë'i a'i noro jemë'o raromoromomo ma-sanu'e jöhemu majëhijareje. Vëmehu aboji harihu'o sanuëmiromomo muebejaruëhi noro ëhi jemesi örire ma-sanu'e jöhemu majëhiromomo muebejëvareje.

<sup>8</sup> No jemëni vavaenaguo avohë'ëro ëhuni no uvareje: No bogo ma-God-are jö mahemu bojëmi'i nosi dë vövöbajo'o uhu'o bojëmi'ëjarëjo rabëni noro jemesi örire dë vövöbajo'e aho'o rajëhijë'ëro javuë'ëro.

<sup>9</sup> Nasi ö mueno'e noehu jemë'o raromoromomo i'u'e mu bogo bise'oho vadu'o vaejaroho iae jemë'o uehorovarujeje. Noehu God-are jö ma majëhijarevaroho no bogo ëhemuoho ë'i sisone vahie majae nosi övëro biririvoromomo i'u'e mue vaemu vaebe va'oromomo ëhuro nosi manaho birohoro iruno'oho bövioho bise'oho imonövareje. No God-are jö ma majëhiromomo böviëni bise'ëni mana ëninëmijë'oho no bijönaguadeje jemë anojëmijöëni. Ëhuni ëhi ë'areje.

<sup>10</sup> Jemë'o God'o iae gavë'e jëve Keriso mae uehorovaruje aribövi jemesi örire noro diehi jië'e muoho vaejëvamu. Noro God-are jöhemu uehorovoromomo mu maemu vaejëvamu ëhuro jö sisëho bogojio'i jö maemu jiadeje.

<sup>11</sup> Vavuehu hesi aboji harihu'o mu öri röjëhijajëhi noehu jemë ae gemu gemu ëhi röjëhijaroho ëhu'o gavarujeje.



<sup>12</sup> Noro jemë sanuëmijë'i jögore mëmijë'i jemesi uehoroho biririvëhojoro uënövareje God-hu nimajëhi jemëro ëhi raromo jijiholararijego. Ëhi uënövareje. Ëhesi bëhoho God-ro uëvajeje jemëro hesi öri ari'ere iojiomoromo hesi aji mare raromolararijego. Ëhuni ë'areje.

<sup>13</sup> Röhu noro ave jöhu'lo uehorovoromo vae majae God-are örire rajahijarueje. Noehu God-are jö bö'oromo majëhijamu hejarijevare jemë heromo uvarijeje: Ëjöho bogo ma-a jöehu jio'i God-are jöe hö uvoromo ejaharijeje. Iae mae uvarijeje. Iae God-are jöjeje. Hesi jöhuro jemë biririvëvego ëhuro hesi örire mae uehorovaruje aribövioho mae jëvajeje.

<sup>14</sup> Nasi ö mueno'e God-are ekaresiae Iesu Keriso-are ariböviehu Judea raromoromo vavaeni baejarëhi jemë'lo ëhi huë vavaene baejë'e jëve. Jew rajehu jabesi örire ë'arëhi jemesi sa'a rajohuro ëhi sisë vaejëvo'i arijë'ejö.

<sup>15</sup> Jew rajohuro ëhi jabesi sa'a rajo ekaresiaho sisë vaejëvareje röhu ë hesi urimo jabesi hijo miono'ohuro jö God-aro baeromo majëhinövare aribövioho muo'amobe ruejuvo evare ë Jew rajo ariböviohuro Bada Iesu'lo anareje. Bada Iesu anoromo no rarovö'öjavuareje. Jaburo God-are örire huë sisë bojamiromo nu huë'e muoho ae aho'obëhe nosi örire vaejarueje.

<sup>16</sup> Nu huë'e muoho vaeromo nosi öroho tugoho'ië'areje ëhuro no bogo sa'a ioro'ioro rajoho Keriso-are jöho majëhijego bogo ejahoromo maroho va'oruomoröhego. Ëhi jië'e mu sisëmu vaebe rovaroho jaruvoho börömo bëhe jio'ego iae barë'i God-ro dë vörönimë'ëro i'ue mana bojëmi'ië'e.

*Paul-hu Thessalonica ekaresia röhu maho va'lo gë'i nimade jöhoje.*

<sup>17</sup> Nasi ö mueno'e röhu vaevë'e no jemë'lo raromoromo dirö'lo göre rovaroho vëmu vavu'lo rumo'e va'ëne majae bunemu hesi uhure ëhi javuanovadeje. Iae nosi uehoroho jemë'lo jiadeje röhu no jemesi nu ano'oho bogo gëvareje. Bogo gëvë'ëro jemëni sisë maro vavaenaguamu öre nahareje ö'oromo jemesi nu ano'oho gë'irovo. Ëhuremu uehorovareje.

<sup>18</sup> No ö'i naguamu Paul naro öre naho'i hi'ego Satan-ro nosi öroho tugohahu'ego ö'oröhoho bogo eni javuonövadeje.

<sup>19</sup> Nosi Bada Iesu rovamu hesi nunire riravë'oho no rahumesi jöho uehorovoromo dë sasohoromo nimorohë'i uvo'ejo: No ë aribövioho mae ajëmiromo ruahö'öjë'e javuajëjo. No bogo a ioro'ioro jabesi jöhemuoho uehorovo'i jemesi jöhuni ëhu'lo nimoroho'ejo.

<sup>20</sup> Iae maeje. Jemë mae jëvo'iramu gëgorovo jemesi jöëni nosi ihoho döro ri'ö'iramu nimorohoromo God mabëhe ua'ejo. Iae ëhuni ö'oromo gë'i naguadeje.

### 3

<sup>1</sup> Ö'oromo gë'i naguamu bogo jemë'oho gemuoroho raromojuvo bogo eni javuamu noro Silas-mu niö'iro uvareje: Ë'ego nosi sivue Athens amore ari'i

<sup>2</sup> Timothy nugö'öjego huro va'oromo Thessalonica amo rajoho gëromo jöho heromo ro majahuego heröhe höjo. Timothy hu nosi Christian öëro jië'ëro no'lo bimuvoromo God-are muoho vaeromo Keriso-are jö maho majëhibe juvaje jië'ego ëhuni noro Timothy nugö'öjareje ö'oromo jemë ajëmego jemëro biririvoromo Keriso avo'avoho uehorovo'irarijego.

<sup>3</sup> Jemëhu Keriso uehorovarujohuni jemesi örire huë vavaene rovego mae uehorovarujoho vuonugojöëni ëhuni Timothy nugö'öjareje. Röhu Christian aribövi noehu huë vavaeni bae'iröhoho God-ro bamahuadeje. Jemë ë jöho iae gavarujeje.

<sup>4</sup> Ëhesi bēhoho urimē'i noehu jemē'o raromarevare noro uēvareje: Aēro sisē vaejavuo'iramu huē vavaene bae'ejarējo. Noehu uēvarēhi iae ēhi jiē'le huē vavaenoho rovamu gavē'e jēve.

<sup>5</sup> Rōhu jemesi jōho bogo hejē'e ēma hibe rovodoho hejode bogo eni jevamu hegorovo ēhuni Timothy jemesirire nugō'ōjodeje jemēhu diehi diehi Keriso mae uehorovaruje jōho he'iro. Ëhesi bēhoho na juhuonivoromo uvodeje: Nani evaho Satan-ro jemesi dēho bijioho gēvamu rireromēv'e hōjo. Ëhu'ēro noehu vaejare muoho aho'o sisērē'amo'ajējo. O diehi jio'amo'ajējo. Ëhuni Timothy nugō'ōjamu jemesiroho ō'adeje.

<sup>6</sup> Timothy nugō'ōjamu ō'ē'ēro rōhu aviavejō'e jemesi jō maho baeromo vuonorō'ō rueromo uōvuadeje: Iae jemē Keriso mae uehorovoromo huē baerovaruje hōjo. O jemēro no uehorovavuoromo noehu jemē gē'i vavaenimaruēhi jemē'o ēhi no gō'i vavaenimaruje hōjo.

<sup>7</sup> Nasi ō mueno'e no huē vavaene uehore gō gō hesi uhure raromamu u'uvavuē'iro hejare jemēhu Keriso mae uehorovaruje jōho Timothy-ro barovamu heromo jemesi jōēni nosi dē vōvōbajo'oho biririvahuadeje.

<sup>8</sup> Ëhesi bēhoho avevejō'oho jemēhu biririvoromo Bada'o gemuore raro-marujohuro ēhuro no ma-mae raromarueje.

<sup>9</sup> Iae no nosi Bōrōme God-are nuniro javuoromo jemesi jōēni sisē maro nimorohavue. Ëhi jiē'oho no rabu jōe majahiromo hesi ōriroho rajahi'ejo.

<sup>10</sup> Vahie majae jene noro hesi ōrire biririvoromo ua'i arijarueje huro ajamuijego ō'oromo jemesi nu ano'oho garomo jemēhu Keriso mae uehorovarujoho bisemu bogo eni jēvego ajēmi'irōhēni.

<sup>11</sup> Rōhu no nague nosi Vavue God'o nosi Bada Iesu'o nosi ōroho avo-hahuego maro ō'irōhēni.

<sup>12</sup> No nague Badaro ajēmego jemē ae gōēro gō avoho rajahirovobe a ioro'iorohu'o avoho rajahuibē va'oromo ijonō ma-mabēhe jēvorōhego. Noehu dē vōvōbajo'e aho'o jemē rajēhijaruēhi jemē'o ēhi ē'irarijego.

<sup>13</sup> Ëhi ē'ē'oho Badaro ajēmi'iramu jemē biririvobe va'ojuvo hujeji nosi Bada Iesuro hesi aribōvie aho'obēhe nosi gemuore rue'iramu evare jemēro nosi Vavue God-are nunire ma-mae riravo'aruje. Mae riravo'iramu jō sisē bogojēvo'i hesi aribōvi maemu jēvo'ē'e.

## 4

### *God-hu nimaje mu hesi jōhoje.*

<sup>1</sup> Nasi ō mueno'e rōhu jō gōho Bada Iesure ihore jajivo'ejo. Avo'avoho raromo jijihō'irarije jōhoje. Jōho bogo bise'o vadu'ohoje. Jemē ēho garomo avo'avoho uehorovore. Mami'e jemē hejarijeje noro uēvavamu: Ëhi ēhi avoho raromo jijihorego God-ro gēromo nimoroho'irajo. Ëhi jiē'le jōho hejē'ēro jemē iae ejahuarujeje. Rōhu no nague jemē gō'o gō'o dōre avoho ejahuobe va'irarijego.

<sup>2</sup> Noehu jōgore rabe rabe Bada Iesure ihore majēhijamu hejarijoho jemē iae eni gavarujeje.

<sup>3</sup> God hu aviēhi jiē'le muoho nime. Hu nime jemē ōehu jijihanovo'irarije muoho bogo vae'i mu maemu vaenōvo'irarijego.

<sup>4</sup> Jemē ae gemu gemu aho'obēhe magonaho masu'iē'iroho mu maemu uehorovoromo dē vōvōbajo'ohu'o rajahiromo masuromo ēhi gemuoro raromore. Ëhi jiē'le muoho avo'avoho gare.

<sup>5</sup> Nadi Christian rumo'e God bogo gavarue aribōviehu ē'aruēhioho ē'anovoromo ma-sino hesi ganiganiohuniōho magonahoho masure.

<sup>6</sup> O jasi öho nadi sareramiro mo vajiohuvoromo hesi vaboroho baene. Ëhi jië'e mu vaejarue aribövioho Badaro i'ue mana bojëmi'ë'e. Ëjöho mami'e darugo'o majëhijamu hejarijeje.

<sup>7</sup> God-ro no hesinö rinaguadeje bogo ëhuro no öero jijihanovo'i a'i mu mahemu vaenövo'iröhego.

<sup>8</sup> Ëhuni ae rahu ëhi jië'e jögoru dejonö bu'öromo öehu jijihanovë'o ho ëhi jië'e aribövioho jabu bogo aho no bijönaguo'i a'i God bijönimoruomajeje. Röhu God-ro hesi Aru'ahëhu mu maemu barovajoho suvuoramuijajeje. Aru'ahëhu mu maemu barovajoho suvuoramuijë'ëro ëhuni no ëhi gemuoho mu maemu vaebe jijiholejo.

<sup>9</sup> Röhu jemesi Christian ö mueno'o rajahirovo'irarije muoho God-hu mami'e röjëhijadoho no rabëni röhu maho sionoho röjëhilejo.

<sup>10</sup> Christian ö mueno'e aho'obëhe Macedonia jemesi sa'a börömore raromaruoho jabesi örire jemëro iae huë baejëvoromo rajëhijarujeje. Röhu nasi ö mueno'e noro uëvö jemëro ëhi jië'e muoho gö'o gö'o döre avoho vaebe va'irarijeje.

<sup>11</sup> Röhu jemesi ma-jörume raromoro mo jemesi muohuremu vaere. Noehu uëvarëhi jemëro ëhi'oromo jemesi övëro biririvoromo bövioho bise'oho baere. Ëhi jië'e muohuremu avoho uehorovore.

<sup>12</sup> Ëhi ë'ë'oho ëhuro God bogo ma uehorovarue ariböviohuro jemë gëromo mae uehorovëvo'i jemë bövie bise'e eni jëvo'ë'e.

*Iesuhu sa'are vuonorö'ö rueröhe jö noehu uehorovego huë vavaeni u'uhahuoröhe jöhoje.*

<sup>13</sup> Röhu nasi ö mueno'e jö göho no nague vuovë'e aribövioho diehi jioruomajoho jemë ga'irarijeje ëhuro bogo vavaenëgoröhego. Hesi a ioro'iorohuro uehorovoromo uvarueje: No vuovoromo bogo ri'ö'i ma-ioro'io remu vuovo'ëjarëromo sisë maro vavaenimarueje. Jabuhu vavaenimarühioho jemë bogo ëhioho vavaenëgoröhego ëhuni ave jöho jajivo'ië'ö.

<sup>14</sup> Noro mae uehorovoromo uvarueje: Iesu guomoromo röhu i'ovoromo ri'öjade höjo. Ëhi uvaruohuni ëhuni uvo'ëjo: Iesu mae uehorovoromo vuovë'e aribövioho jabu'o God-ro i'ovëvoromo Iesu'o gemu mae söjëvo rue'a'ajëjo.

<sup>15</sup> Ëhesi bëhoho ave jöho Badahu röjahuijade jöho no jajivo'ië'ö. Bada sa'are rovë'iroho ave sa'are raromarue aribövioho noro vuovë'e aribövioho bogo iosirëmiromo maroho jio'i a'i jabumëro urimo ri'öruomo'ë'e.

<sup>16</sup> Ëhesi bëhoho aëro heruomo'ë'e jöe bojëmiromo darugo'o uvavo'iramu anera börömo huro uvavo'iramu God-are hëgöho huavo'iramu. Ëho he'iramu gavë'i evare Badaro ö'idöre jioromo ruvebi'ë'e. Ruvebi'iramu Keriso-are aribövie vuovëvadoho urimo ri'öruomo'ë'e.

<sup>17</sup> Ri'ö'iramu röhu ijönö bogo vuovë'e ave sa'are raromaruoho God-ro no jabu'o gemu mae suehu'o ma-burëro baejavuo ajiomoromo gagovavuo'ë'e noro Bada birohojöro. Ëhi'onugoromo ioro'io remu Bada'o gemu mae raromolejo.

<sup>18</sup> Ëhi javuo'ië'e jiaje ëhuni ë jöho majahirovorego jemesi dë vövöbajo'oho mae jëvo'iro.

## 5

*Badahu rueröhego noehu avoho mueberovo'iröhe jöhoje.*

1-2 Röhu nasi ö mueno'e Bada Iesu divare rovego mu masije gö gö divare rue'iröhe ë hesi jöho no bogo jajivo'ejo jemë mami'e hejë'ego. Mami'e hejë'ëro ëhu'ëro iae garomo uvarujeje: Badare majaho vajiohu'e aehu vahi'e rovajëhi ëhi ma-majioho rue'a'ajëjo.

3 Keriso bogo ma uehorovarue ariböviohuro uvoruomoi'ramu: Jaruvoho muorovoho bövioho bise'oho bogojio'i ma-mae raromaruë uvo'iramu evare God-are i'uohuro ma-majioho rueromo ë aribövioho ijumëvo'ë'e. Dë'e magonahehu ma-majioho hara'uaruëhi ë aribövioho ëhi ma-majioho ijumëvo'iramu aho bogo huruomoi'ë'ö.

4 Röhu nasi ö mueno'e jemë bogo ëhioho jëve. Jemë bogo ramoramoroho raromarujeje. Ramoramoro raromoi'ibejarije jemë ga'ibejarije ë majaho vajiohunö'e ma-majioho rovego tiö'ibejarije. Röhu jemë bogo ëhioho jëve.

5 A'i jemë ae aho'obëhe aji'e majare raromaruje aribövioho jëve. No bogo vahi'e ramoramore raromaruë aribövioho javue.

6 Ëhuni a ioro'iorehu ma-momorö'öjaruëhioho no bogo ëhioho mamomorö'ö'i a'i nune jioromo simanoho avoho uehorovo'ejo.

7 Aehu momorö'öjë'iroho vahi'e momorö'öruomajeje. Vörö'e jovo ue'ahamu simano sisërëjëvë'oho ëhi jië'oho vahi'e ë'oruomajeje.

8 Vahi'e ëhi ë'oruomajeje röhu no maja'ere raromaruë ariböviohu javuë'ego ëhuni nosi simanoho avoho uehorovoromo muoho avoho vaeromo ëhuro birivoromo riravo'ejo. Muorovo majare birivoromo riravo'ië'iroho biriri'e niögoho vinebinö io'amoruomajeje bijo vösöho ë namiromo sugigivego birivoromo riravo'iröhëro. Keriso-are ariböviohu ëhi birivoromo riravo'ië'iroho noro Keriso mae uehorovoromo a ioro'ioroho dë vövöbajo'ëro rajëhi'ejo ëhuro birivoromo riravo'iröhëro. O muorovo majare aehu biriri'e bosö simanore io'amoromo biririvaruëhi noehu ëhi biririvo'ië'iroho uvo'ejo: Ijonö God-ro baejavuoromo no maro bamavuo'ajë uvë'e raromoi'ejo ëhuro biririvavuoröhego.

9 God-ro hesinö baejavuadeje bogo nosi sisëhuni i'ue bojamui'iröhëro. Hu bogo ëhunioho baejavuadeje. A'i huro no baejavuadeje nosi Bada Iesu Kerisoro nosi sisëho ajamuijë'ëro maro bamavuo'iröhëro.

10 Huro nosi sisëho ajamui'i noni guomadeje ëhuro ave sa'are birivoromo raromë'oho o vuovavuë'oho no hu'o gemuoro raromoi'iröhëgo.

11 Ëhuni ajamirovoromo jö mae majahirovarujëhi ëhi ë'orego ëhuro avoho biririvëvoromo mae jëvobe va'iro.

*Paul-hu ijo tugoho'i jajivade jöhoje.*

12 Röhu nasi ö mueno'e jö göho majëhi'ië'ö. Ëjöho bogo nu huë'e jöho jio'i ma-sanu'e jöemuje. Aehu jemesirire mu böromö vaeromo Badare ihore jemë muebejëvoromo jögoru majëhijarue ë aribövioho jemëro mae uehorovëvore.

13 Mae uehorovëvoromo jabesi muoho uehorovoromo rajëhi avohore. Röhu iro muorovo'oho nadi vae'i ma-raromore.

14 Röhu nasi ö mueno'e ave muohu'o vaere. Mu bijöni'e aribövioho uëvego mue vaejë'e raromoi'i. O juhuoni'e aribövioho ajëmego dë vövöbajo'oho mae jëvo'iro. O darugo u'uhëvë'e aribövioho ajëmego biririvëvo'i. Ae aho'obëhe jabesi öroro ma-sanu'e jöhemu majëhire.

15 Avoho mueberovore. Aehu mu sisë vaejëvë'oho nadi mana mu sisëho vaere. A'i ae göëro göho huë baerovo'i o a ioro'iorohu'o huë baejëvo'i ë'ogare.

16 O vae majae nimorohonövore.

17 God-are öroro jöe majahiemu majahinövore.

<sup>18</sup> Mu diehi rovë'oho hesi öroro huë mae uanövore rabëni Iesu Keriso-are aribövioho jemëro muoho ëhi vaejoro God-ro nimë'e jiaje.

<sup>19</sup> God-are Aru'ahoho vëninö'e ravajoho nadi duohore.

<sup>20</sup> He'irarije aëro uëvego: God-are Aru'ahëro jöho bojemi'ego majëhijajë uëvamu hejë'oho nadi bijönimore.

<sup>21</sup> Nadi bijönimo'i a'i jöho jemesi simanëro mevoromo gare diho mae jiego diho sisë jiego. O mue aho'o ëhi mevo gare. Mae jiamu gavë'iroho avoho ma'enore.

<sup>22</sup> Sisë jiamu gavë'iroho aho'o vuonugore.

<sup>23</sup> Röhu God hu ajamuego huë mae raromarue ahoje. Ëhuni na nege huro ajëmego jemëro uehore aho'obëhe ma-maëremu hesi örire gemu bojami'irarijego. Göho na nege God-ro jemesi aru'ahe dë vövöbajo'e sino haho'e aho'obëhe muebejëvobe va'ojöro ëhuro nosi Bada Iesu Keriso rovë'iroho jemë jö sisëho bogojëvo'i ma-maemu jëvo'iröhego.

<sup>24</sup> Iae huro ëhi ajëmi'ë'e rabëni jemë hesinö rinëgade aho God hu nue gemu uehorovaje aëro jië'ëro.

<sup>25</sup> Nasi ö mueno'e jemëro nosi jöëni ëhu'o parie vaenövore.

<sup>26</sup> Christian aganehu jejamirovaruëhi aho'obëhe ëhi jejamirovore.

<sup>27</sup> Röhu Paul naro Badare ihore ave jöho darugo'o majëhiromo uëve. Ave naehu jajivode jöho adahego Christian aganoho aho'o heruomo'i.

<sup>28</sup> Nosi Bada Iesu Kerisoro huë baeromo jemë ajëminövo'ë'e. Ahia mino'e.

## 2 THESSALONIANS

*Paul'o hesi ariböviohu'o jabuhu Thessalonica amore raromarue ekaresia jabesi örire jejëmijare jöhoje.*

<sup>1</sup> O asë'e Thessalonica ekaresiaho Paul naro Silas-ro Timothy-ro ëhi noro jemesi örire jejëmijö jemë God nosi Vavu hesi o Bada Iesu Keriso-are ekaresiae jëvë'ego.

<sup>2</sup> No nague God Vavuohu'o Bada Iesu Keriso'o huë baeromo ajëmijego maro raromo'irarijego.

*Bada Iesu sa'are rovego evare nosi mu mae o sisë jiego God-hu mevo garöhe jöhoje.*

<sup>3</sup> Nasi ö mueno'e noro jemesi jöëni God mae uanövo'ejo. Ëhi jië'o ho iae maeje. Rabëni. Jemë God mae uehorovobe va'ojuvo va'o ijonö börömo mae uehorovobe va'arujeje. O jemë ae gemu gemu aho'obëhe rajahirovobe va'ojuvo va'o ijonö börömo mae rajahirovobe va'arujeje.

<sup>4</sup> Ëhuni jemëhu mu ma vaejaruje jöho noro baeromo God-are ekaresiae gö gö nimorohë'i majëhibe jijiharueje. Majëhiromo uëvarueje: Aëro Thessalonica ekaresiaho sisë vaejëvego huë vavaene börömo mae baerumaje höjo. Ëhi'oromo bogo u'uhö'i biririvoromo Keriso mae uehorovoruomaje höjo. No jemesi jöho ëhi atobe jijiharueje.

<sup>5</sup> Jemë huë vavaene baeromo röhu biririvoromo Keriso mae uehorovego noro ëho garomo uvarueje: God-ro nosi muoho avoho mevo göromo diehi jië'e mu vaejarëhi manaho ëhi gemuoho bojamui'ajëjo. Iae huro jemë uë'a'ajëjo: Jemë mae jëvaje naehu börömo namiromo muebejaje öri ari'oro rojo raromohëjo. Ëhesi bëhoho avevejö'e God-are öri ari'o hesi mu ri'öröhego jemëhu nimoromo vavaeni baejarujohuni na ëhuni uëve.

<sup>6</sup> God-ro mu maemu vaeromo jemesi örire huë vavaeni bojëmarue aribövioho mana huë vavaene bojëmi'i

<sup>7</sup> huë vavaeni baejaruje aribövi jemesi örire mana huë sanue bojëmiromo no'o ëhi bojamui'ë'e. Bada Iesuhu nosi nunire rueröhe majaho rue'iramu evare God-ro ëhi jië'e muoho vae'ë'e. Bada Iesuro hesi darugo'e anera ömo'ömohu'o gemu mae ö'idöre jioromo

<sup>8</sup> vëni hödu'o rueromo God bogo uehorovoromo nosi Bada Iesure jö ma bogo ejaharue aribövioho i'ue mana bojëmi'ë'e.

<sup>9</sup> I'ue mana bojëmi'iramu jabumë Badahu jiajiroho bogo raromo'i hesi aji'eroho darugo'eroho bogo raromo'i rori'o va'oromo ioro'ioeremu sisërë va'ë'ö.

<sup>10</sup> Badahu rueröhe majare evare ëhioho jio'ë'e. Iae hu rue'ë'e hesi aribövie aho'obëhe noro hesi ihoho döro bamoröhego hu mae uehorovarue aribövioho noro hu rajahiruomoröhego. Jemë'o ëhi ë'a'aruje ë hesi bëhoho noehu majëhijare jöho jemëro mae uehorovë'ëro jëvë'ëro.

<sup>11</sup> Badare ihoho ëhi döro jioröhego ëhuni noro vae majae jemesi jöëni nosi Böröme God ëninamiromo uavarueje: God jero Thessalonica aribövioho uëvane höjo jabumë jasi aribövie jioromo mae jëvojöro. Ëhuni ajëmego jaehu uëvane ëhi jië'e aribövie jioruomö'irajo. Jasi darugohuro ajëmego jabuhu mu ma vae'i nimiruoho aho'obëhe vaeromo Keriso mae uehorovoromo vaejarue muoho aho'o vae barë'irarëjo. Noro ëhi God ua gavarueje.

<sup>12</sup> Jemëhu ëhi jië'e mu vaej'ohu ëhuro nosi Böröme God'o Bada Iesu Keriso'o huë baejëvoromo jemë ëhi ajëmi'iramu ëhuro nosi Bada Iesuare ihoho böröme jio'i jemëro hesiro ajoho bae'a'aruje.

## 2

*Mu ma ijumaje aehu ma-va'orahoro rueröhe jöhoje.*

<sup>1</sup> Nasi ö mueno'e nosi Bada Iesu Kerisohu rueromo uövüego noehu hu jiajire gagovoromo gemuore raromo'iröhe jöho noro majëhi'ie'ö avoho uehorovo'irarijego.

<sup>2</sup> Aehu sarerëmiromo uëvaruoho: Badare majaho mami'e rovë'e hö uëvaruoho ëho heromo nadi ma-burëroho tiöromo uehore gö gö baere. Ëhi jië'e jö rovade hesi bëhoho nani aëro sarerivoromo uëvareje: Ëjöhö God-are Aru'aho hesiro baeromo majëhijaruëjo. O nani aëro jabesi ëma uehorovoromo majëhijareje. O nani aëro sarerivoromo uvareje: Paul naro ëhi jië'e jöho jajivoromo bamëhode höjo. Nani ëhuni uvarujeje: Badare majaho mami'e rovë'e höjo.

<sup>3</sup> Ae göehu ëhi jië'e jö atoromo sarerëmi'i ë'o gavaruoho bogave ejëho'irarije. Badare majaho bogo ëma rue'i a'i ë hesi urimo ae aho'obëhe dë vövöbajo'e aho'o huotorovoromo God bijönimoromo hu'o muorovo'ie'iramu God-are mu ijumaje ahuro va'orahoro rueromo bövie nami'ë'e ijönö sisërë va'iröhëro.

<sup>4</sup> Bövie namiromo jöe majahuiromo uö'ë'e: Jemëhu bövie bise'e aho'o God höromo rajëhijarujo vuonugo'i na gemu börömoho hö uehorovevorëjo. Ëhi uöromo God-are osa börömore va'o hiromo majahuiromo uö'ë'e: Aviaë na God jevajëjo. Ëhi ë'iramu ë hesi ijönö Badare majaho rue'ë'e.

<sup>5</sup> Jemë'o uehorovore. Naro jemë'o hiromo ë hesi jöho uë'ego henövarijeje.

<sup>6</sup> God-are mu ijumaje aho u'emu rue'ë'e. Avevejö'ohö ë ia hesi mu sisëho ahë'eje. Diehi'oromo ahajoho iae jemë gavarujeje. Ëmu sisëho ahobe va'ojuvo majae eni jio'iramu God-are mu ijumaje ahuro va'orahoro rue'ë'e.

<sup>7</sup> Röhu avevejö'ohö hesi mu sisëho Satan-ro gurihiromo ae uëvego vaejarujeje. Vaejego mu sisë ahaje ahuro ahobe va'ojuvo rori'o bava'iramu evaroho sisëho bogo aho'ë'e.

<sup>8</sup> Sisëho bogo aho'iramu evare God-are mu ijumaje ahuro va'orahoro ro nami'ë'e. Va'orahoro ro nami'iramu Bada Iesuro rueromo jö'o ögëro hadivoromo ajoho röjahi'iramu sisërë barë'ë'e.

<sup>9</sup> Röhu urimo Bada bogo rue'iröhevare evare God-are mu ijumaje ahuro Satan-are darugohö barueromo ae sarerëmiromo darugo'e muohö röjëhi'ë'e aëro ëho garomo tiöromo sisë'i uehorovoromo uvoröhego: God-are mu ijumaje aho mae höjo.

<sup>10</sup> Darugo'e muohö röjëhiromo sareri'e mue bövie bise'e vaenövo'ë'e sisëre va'iröhe ariböviohuro garöhego. Jabuhu sisëre va'oröhe hesi bëhoho urimë'i Keriso-are jö maho bogo e'i bijönimoruomadeje. Jö maho ejahö'ibejo ëhuro iae maro va'oruomo'ibejo. Röhu bogo ejarohuro ëhuro sisëro va'o hesi jioruome.

<sup>11</sup> Jö maho bogo ejahego ëhuni God-ro sareri'e jöho jabesi dë vövöbajo'ere bojëmijajeje jaburo ë jöho mae uehorovoruomoröhego.

<sup>12</sup> God-are jöho bogo ma uehorovo'i ma-mu sisëmu nimë'ëro ëhu'ëro jabumë aho'obëhe God-are nunire riravo'iramu huro uë'ë'e: Mu sisë vaej'ë'e aribövie jëvajëjo.

*Birivoromo riravo'iröhe jöhoje.*

<sup>13</sup> Röhu nasi ö mueno'e jemë Badahu rajëhijaje aribövioho jëvo'ego noro jemesi jöëni God mabëhe uanövo'ejo. Ëhesi bëhoho urimë'i sa'a bövi bise'o bogo bamadevare evare God-ro jemesi jöëni uehorovoromo uvadeje: Naro baejëvoromo maro bamëvo'ejöjo. Nasi Aru'ahohuro jabesi dë vövöbajo'o ho mae avohëho'iramu jaburo Keriso-are jöho mae uehorovo'iramu ëhuro ëhi ë'ejöjo.

<sup>14</sup> God-ro ëhi uvë'ëro noro Keriso-are jö maho jemë majëhijamu God-ro uëvadeje: Ëjöhö jemëro mae uehorovorego naro baejëvoromo maro bamëvo'iröjo ëhuro jemesi Bada Iesu Keriso-are aji maho baejego mamabëhe jëvo'iröhe höjo.

<sup>15</sup> Nasi ö mueno'e ëhuni biririvoromo riravore. Biririvo riravoromo noehu jö'ehu majëhiromö röhu ijönö surire jajivoromo röjëhijare jöho ëhuremu ma'enoromo uehorovore.

<sup>16</sup> Jemëro ëhi ë'irarijego no nague nosi Bada Iesu Keriso'o God nosi Vavuohu'o jaburo niö'iro ajëmijöro. Ëhesi bëhoho urimë'i God-ro no uehorovavuoromo huë baejavuoromo no ioro'ioemu birire bojamuiromö ajamuijë'je noro nimorohë'i uvoröhego: Maro javuo'ajëjo.

<sup>17</sup> Ëhuni no nague jabumëro jemesi dë vövöbajo'o ho biririvëhego jemëro bogo juhuonivo'i mae riravoromo mu maemu vaeromo jö maemu atonövo'irarijego.

### 3

*Thessalonica ekaresiaehu Paul-mesi jöëni God-are örire ëninami'iröhego Paul-hu jajivade jöhoje.*

<sup>1</sup> Nasi ö mueno'e nasi ijo tugoho'i jöho jajivo'ië'ajoho gare. Jemëro nosi jöëni God ua garego ajamuego Badare jö noehu majëhibe jijiharuoho maburëro rumorovo va'ego ae aho'obëhe heromo uvoruomö'i: Jö mabëhe höjo. Ëhuro jemesirire jiajëhi ëhi jiobe va'iro.

<sup>2</sup> O ua garego God-ro ajamuego biriri'övarue aribövi sisëho no bogo baejavuoromo sisë vaejavuo'iro ë hesi bëhoho ae göëro göëro Keriso-are jöho bogo ma uehorovarue jiaje.

<sup>3</sup> Röhu Bada hu bogo sareri'o ho jio'i maëro jië'ëro huro jemë birire bojëmiromö avoho muebejëvo'ë'e A Sisëho bogo baejëvo'iröhego.

<sup>4</sup> Röhu huro no uehoro maho bojamuego jemesi jöho mae uehorovoromo uvarueje: Jemë nosi jö ejahuarujoho iae ëhi ejahuobe va'a'arujëjo.

<sup>5</sup> Röhu no nague Badaro ajëmijego jemesi dë vövöbajo'ere herovoromo uvo'irarijego: God-ro mabëhe uehorovauaje hö uvoromo Kerisohu vavaeni baeromö biririvadëhi ëhi biririvo'irarijego.

*Övehu biririvoromö bövi bise'o baeröhe jöhoje.*

<sup>6</sup> Nasi ö mueno'e noro Bada Iesu Keriso-are ihore ave jö börömo ho majëhi'ie'ö. Ga'irarije Christian aganoho rahuro noehu bojëmijamu hejarije jöho bogo ejahuo'i mue bijönimoromö ëma raromamu gëvë'iroho gorëvore.

<sup>7</sup> Iae jemë'o gavaruje. Noehu ë'arëhi jemë'o ëhi ë'ibejarije iae mae jio'ibejo. Noehu jemë'o raromarevaroho muoho bogo bijönimareje.

<sup>8</sup> No jemesi ioho bövioho bise'o ho bogo ëma ujuoho'i imoromö ujuohönövareje. Sisone vahie majae nosi övëro biririvoromö i'u'e mu börömo ho vaemu vaebe va'oromö nosi manaho birohoromö iruno'o ho bövioho bise'o ho imonövareje huë vavaene jemesi örire bojëmijöëni.

<sup>9</sup> Noro uë'ibejo: No God-are mue vaejarue javuaje bövie bise'e masuvore bojamuihë uë'ibejo iae mae jio'ibejo. Röhu noehu bogo ëhi



ë'are hesi bëhoho no naguadeje jemëro ga'irarijego noehu nosi övehu biririvoromo iruno'e bövie bise'e mana baejaruoho garomo ëhi gemuoho ë'irarijego.

<sup>10</sup> Noehu jemë'o raromarevare evare ave jögoroho majëhiromomo uëvareje: Ae rahu bijönimoromo mu bogo vaejë'oho ioho nadi i'imamirëjo.

<sup>11</sup> Noehu ëhi jajivarue hesi bëhoho no hejarueje uövuego: Jemesi a ioro'iorohuro muoho bijönimoromo ëma raromoromo ae gö jabesi muoho ëma ahohe jijiharue höjo.

<sup>12</sup> Èhuni noro ave jöho bojëmiromomo Bada Iesu Keriso-are ihoro majëhijö. Èhi jië'e aribövioho uëregö ma-u'emu taemo raromoromo jabesi övëro biririvoromo bövioho bise'oho bae'iro.

<sup>13</sup> Röhu nasi ö mueno'e jemëhu mu ma vaejarujoho nadi u'uhore.

<sup>14</sup> Ae rahu ave nosi surire jö bogo ejahuë'oho ëhi jië'e ahemu ga avohoromo nadi gavanovorego javoje bae'iro.

<sup>15</sup> Röhu nadi uvore: Hu no'o muorovaje ae höromomo nue huodivo'i a'i uvore: Nosi öe höromomo jögore majahijego avoho hi'iro.

*Ijo tugoho'i jajivade jöhoje.*

<sup>16</sup> Bada huë mae bojamuaje ae jië'ego no nague jemë mae o sisë raromë'oho huro majae ëhi huë mae bojëmi'iröhego. Huro ae aho'obëhe jemë'o jio'ë'e.

<sup>17</sup> Paul naro nasi övëro jajivoromo jemesi örire jejëmiromomo bame. Na surire jö jajivë'iroho nasi övo jajoho ëhi jajivajeje jemëro garomo uvo'irarijego: Paul-ro bamahuë'e höjo. Naehu jajivaje hesi nu ano'oho ëhije.

<sup>18</sup> Nosi Bada Iesu Kerisoro huë baeromo jemë ae aho'o ajëminövo'ë'e. Ahia mino'e.

## 1 TIMOTHY

*Paul-hu Timothy jejamade jöhoje.*

<sup>1</sup> O asë'e Timothy Paul naro ave jöho jasi örire jajive. Na Iesu Keriso-are apostle jeve ë hesi bëhoho baejavuoromo mare bamavuaje aho God'o noehu ga'i muebejarue aho Iesu Keriso'o ëho jaburo ë muoho bojemë'ëro ëhu'ëro.

<sup>2</sup> Naro Timothy jasi örire jejamije. Naehu Keriso mae uehorovajëhi jero nasi ijore ijore juvoromo Keriso ëhi mae uehorovanuëro javë'ëro ëhu'ëro ja nasi harihu mae jave. Na nege God Vavuohu'o nosi Bada Iesu Keriso'o ëho jaburo jabesi vavaenimoromo ajamijego maro hi'iranego.

*Timothy-hu sareri'e jö ahoröhe jöhoje.*

<sup>3</sup> Naehu ja'o hiromomo Macedonia sa'are rue'irögoru jasi örire jö bojamijode ë jöe gemuoho majahi'irögoru ë'e. Ephesus amoro ëhi hiromomo a ioro'ioroho darugo'o majëhiromomo uëne: Sareri sareri'e jö röjëhijarujoho vuonugohëjo.

<sup>4</sup> Hijo miono'o jabesi vavu gö gö jabesi ihe gö gö mevobe va'emu va'arujoho a mami jöe gö gö ëma uehorovoromo atarujoho ëhi jië'e jöemu uehorovarujoho vuonugohëjo. Ëhi uëne. Ëhi jië'e jöemu uehorovë'ohuro ëhuro aëro jöho ma-berohemu beroho'i God-are muoho bogo avoho baejarueje ë hesi bëhoho God-are jöhuremu mae uehorovoromo ëhuro ë muoho baejaruëro jië'ëro.

<sup>5</sup> Jabuhu ëhi jië'e mu vuonugojöro jaehu majëhi'iranego uavode hesi bëhoho na negadeje jasi ariböviohuro bogo ma-döëremuoho aho uehorovëvo'i a'i mu maemu vae'i nimoromo dë maemu jëvego herovoromo uhohu'o Keriso-are jöho mae uehorovoromo ëhuro aho avoho huë baejëvoröhego.

<sup>6</sup> A ioro'iorohuro ëhi jië'e mu ma hesi öroho garaeromo aruëre anumëre ëma jijihoromo jabesi jögoroho ëma berohemu beroharueje.

<sup>7</sup> Jöho ëhi berohoromo nimoruomajeje mu vaeröhe jögoru hesi öri röjëhijarue ae jioruomoi'iröhëro. Ëhi nimoruomajeje röhu jabumë mu vaeröhe jögoru jö atarue ë hesi bëhoho bogo avoho gavarueje. Bëhoho bogo gavë'e ëma biririvoromo jöho majëhijarueje.

<sup>8</sup> Iae no gavaruoho mu vaeröhe jögoru hesi bëhi aehu avoho röjëhijë'oho ë jögorohuro ëhuro marëjavuo'ë'e.

<sup>9</sup> No ave jöhëmu uehorovo'ejo. Mu vaeröhe jögoru bamade hesi bëhoho bogo aribövi mahunioho bamë'eje. A'i jögoru ahoruomajohuni hia'i biriri'övoromo jö bogo eroharuohuni o God bijönimoruomajohuni mu sisë vaejaruohuni o God-are mu ijumoruomajohuni sa'are mu sisëhemu uehorovoruomajohuni o vavu muo'amaruohuni vëmu muo'amaruohuni o a ioro'ioro muo'amaruohuni

<sup>10</sup> o a'o magonaho'o öehu jijihanvaruohuni o a'o a'o sihamirovaruohuni o ae gö vajiohehu guduamo ujuoho va'aruohuni o sareri sareri'e jö ataruohuni o court-re riravoromo sareri jö majëhijaruohuni o mu sisë rabe rabe vaeromo God-are mu ma aharuohuni ëhi jië'e ariböviohuni jögoroho bamë'eje.

<sup>11</sup> Ëmu ma jö hesi bëhoho God huë mabëhe hijaje a hesi aji röjahuijaje jöhoje. Ëjö hesi muoho huro na bojemadeje.

*God-hu Paul-ni vavaenimoromo ajamamu Paul-hu huë mae baejade jöhoje.*

<sup>12</sup> Naro Iesu Keriso nosi Badare örire huë mae uave rabëni huhu nasi muohuni darugo bojemadohuni o huhu na mae uehorovevoromo hesi mure bamevadohuni.

<sup>13</sup> Urimo naro Keriso-are jöho agoromo hesi aribövioho sisë vaejëvoromo biriri'övoromo hesi muoho ijumo'i ë'lo gabe rovodeje röhu huro hesi muoho iae bojemadeje. Huhu nasi jöëni ëhi vavaenimade hesi bëhoho naro hu bogo mae uehorovoromo nasi mu sisë hesi bëhoho bogo gavë'ego ëhuni ë'adeje.

<sup>14</sup> Vavaenimoromo nosi Badaro huë baejëvoromo börömo bëhe ajemiromo uehoro maho huë maho bojemijadeje ë hesi bëhoho no Iesu Keriso'o gemuoro bimuvë'ëro javuë'ëro ëhi jië'e uehoro maho huë maho baejaruëro jië'ëro.

<sup>15</sup> Iesu Kerisoro sa'are rovadeje sisë aribövioho no baejavuoromo maro ramuo'iröhëni. Ëho jö maego ae aho'obëhe mae uehorovë'o ho iae maeje. Sisë aribövi baejavuo'i rovadoho a ioro'ioroho ma-bisemu jëvanovo'i na gemu sisë maho jevë'eje.

<sup>16</sup> Sisë mae jevamu röhu Iesu Kerisoro nani vavaenimadeje. Nani vavaenimade hesi bëhoho ijönö hu mae uehorovoromo ioro'ioremu mae raromo'iröhe aribövioho aho'obëhe jaburo uvoruomoröhego: Urimë'i Paul-ro mu sisë bëhe vae'i hijade höjo röhu Iesu Kerisoro hesi sisëho garomo huni vavaenimoromo hesi vöröho ma-taemorovobe rovade höjo. Ëhu'ëro no garomo uvarue höjo: Kerisoro nosi sisëhu'o garomo noni ëhi vavaenimoromo hesi vöröho ma-taemorovaje höjo. Ëhi uvoruomoröhego ëhuni huro nani vavaenimadeje.

<sup>17</sup> Ëhu'ëro God hu mabëheje. Hu böröme namiromo bövie bise'e muebebe rovadoho ëhi muebe'amobe va'ë'e. Hu bogo guomo'i ioro'ioremu jio'ë'e. Hesi nu ano'oho no bogo gavarueje. Hu gemu börömohoje. Hu ëhi jië'e aëro jië'ëro iho maho aji maho hesirohemu jiëmu jiobe va'ë'e. Iae mae.

<sup>18</sup> Nasi harihe Timothy na ave jöho bojamije. Urimë'i aëro jöe God-aro baeromo jasi mu jögoroho majahuijamu ja'o na'o hejareje. Ëjöe gemuoho naro ja uave ëhuro jabuhu majahuijare jöhemu uehorovoromo biririvoromo Satan'o muorovoromo jö sisëho ahonövo'iranego.

<sup>19</sup> Satan'o muorovoromo jö sisë ahë'iroho Keriso mae uehorovoromo dë maemu jioromo ëhuro biririvoromo ëhi jië'e muoho vaene. A ioro'iorohuro bogo ëhioho dë maho jio'i a'i dëre herovoromo uehorovoromo uvareje: Ëmuoho sisë hö uvë'i röhu ëma ömareje. Ëma ömë'ëro ëhu'ëro Keriso mae uehorovare muoho ma-ioro'ioire gemu ijumoromo boremi'ö barëjareje.

<sup>20</sup> A ioro'iorohu'o röhu Hymenaeus'o Alexander'o ëhi jië'e mu sisëho vaejë'ejö. Ëhi'amu naro Satan-are övore bojamijodeje huro baejëvego jaburo a'ororomo God-are ihoho bogo ijumoröhego.

## 2

### *Ekaresiaehu diehi'oromo God uvene aho röjahiröhe jöhoje.*

<sup>1</sup> Röhu jö göho. Jö majëhi'irodoho ave jöho urimo majëhi'ië'e. Ja'o jasi ariböviohu'o jemëro ae aho'o jabesi jöëni uehorovoromo ëninamijë'i böviëni bise'ëni ua gavë'i huë mae uavë'i God-are öroro jöe atonövore.

<sup>2</sup> Ua gavego ave sa'are a masijohu'o jabesi bëhire riravoromo ave sa'are mu muebejarue ariböviohu'o huro ajëmego jaburo no avoho muebejavuego iro muorovo'oho bövioho bise'oho nosi öriroho bogo rovego no huë mae raromoromo God gemu uehorovoromo mu maemu vae'iro.

<sup>3</sup> Ĕhi ua gavë'oho mae jiego God-ro nimajeje ë hesi bëhoho hu bae-javuoromo mare ramuaje ahuro jië'ëro.

<sup>4</sup> Hu nime sa'ae dinö'e dinö'e raromarue ariböviohuro Keriso-are jö maho avoho uehorovoromo ëhuro ijönöho i'uoho bogo bae'i maro va'oruomoröhego.

<sup>5</sup> Ae aho'obëhe ëhi mare javuoröhego God-hu nimaje hesi bëhoho huro gemuëro sa'ae dinö'e dinö'e raromarue aribövioho muebejavuajeje. Ae gemu Iesu Kerisoro God'o nosi ririre öroho avohahuajeje.

<sup>6</sup> Öroho avohahuajëro jië'ëro ae aho'obëhe noni guomorovadeje ëhuro no sisëhu tövavuadoho jiovahuego no ae aho'obëhe mae raromo'iröhego. Ma-jae eni jiamu noni guomade hesi bëhoho noro ëho garomo mae uvoröhego: God-ro no ae aho'obëhe maro ramuo'i nimajëjo.

<sup>7</sup> Ĕjöhö naro ae majëhi'irodego ëhuni God-ro apostle bamevadeje. Na bogo sareramili jö mae majahije. Huro apostle bamevadeje naro sa'a ioro'ioro rajoho röjëhiromö uë'irodego: Ave jöhö mae jiaje mae uehorovorëjo.

<sup>8</sup> Ĕhuni na nege dinö'e dinö'e gagovoromo God rajahijë'iroho ama'oho jaburo nu huë'e iro muorovo'e jöhö bogo uehorovo'i uehoro maemu baeromo God-are örire jöe atönövoröhego.

<sup>9</sup> O na nege magonahoho jaburo simane mae uehorovoromo niögöho avoho ruhoruomö'iröhego. Avoho ruhoromo bogo sinöho nimorohoromo moni börömöho bu'öromö niögöho nieniaho bövioho bise'oho aho'obëhe imo'amoromo io'amoromo sinöho simano uoho avohorovo'i a'i uehorovo avohoromo niögöho io'amoromo

<sup>10</sup> mu mae vaeröhego nege. Magonahehu majëhiromö uëruomë'oho: No God rajahijarue magonahe javuajë uvë'oho jabuhu ëhi jië'e mu vae'iröhöho iae maeje.

<sup>11</sup> Gemuore gagovoromo God-are jö hejë'oho magonaho ömö'ömöhuro jörume ma-taemo raromöromö ma-jöhuremu heruomö'i.

<sup>12</sup> O magonahehu simano vaeromö ama'i jabesi örire church-re jö röjëhijë'oho ëhi jië'e muöho Paul naro ahajeje. Jörume raromë'oho iae maeje.

<sup>13</sup> Ĕhesi bëhoho urimöho God-ro aevo'ioho Adam bamoromö evare ijönö Eve bamadeje.

<sup>14</sup> Satan-ro bogo Adam sareramili a'i magonahoho sareramamu huro uvadeje: Mae höromö God-are jöhö ahahadeje.

<sup>15</sup> Iae ëhi jadeje röhu magonaho ömö'ömëhu God-are örire mae uehorovoromö ae huë baejëvoromö God-hu nimaje muohemu vaeromö ma-taemo raromöromö ëhi jië'e mu ma birivoromö vaejë'oho God-ro ajëmi'ë'e. Ajëmiromö gëröhe jabuhu aboji harihu'o rahamu gëvë'iroho ëhi jië'e mu ma vaejarue magonahoho baejëvoromö maro bamëvo'ë'e.

### 3

#### *Ekaresia muebejëvarue aribövi jabesi jöhoje.*

<sup>1</sup> Aëro uvarueje: Aehu ekaresia muebejëvo'i nimë'oho mu mae bae'i nimoruomaje höjo. Ĕhi atoruomaje jöhö iae maeje.

<sup>2</sup> Röhu ekaresia muebe'amo'ië'iroho ëhi ë'ië'e a hesi ihöho ma-maemu jio'iro. Magonahe ma-gemu masu'iro. Simane sasohoromö mae uehorovoromö taemo hi'iro. Ae osare söjëvo va'oromö nihudëgaje ae jio'iro. Jöe avoho röjëhijaje ae jio'iro.

<sup>3</sup> Nadi vörö'e jovoho iromo simanoho sisërë'iro. Nadi vörö'irae'i ma-u'emu jö sanu'e majëhiromo muoho vae'iro. Nadi iro muorovo'oho vae'iro. Nadi moniemuoho uehorovo'iro.

<sup>4</sup> Hesi osare raromarue aganoho avoho muebejëvo'iro. Avoho muebejëvoromo aboji harihu'oho avoho rjöhijego jaburo hesi jöho ejahoromo mu maemu vaeruomo'iro.

<sup>5</sup> O hesi osare raromarue agano bogo avoho muebejëvë'o'oho hu diehi'oromo God-are ekaresiaho muebejëvo'ë'e. Bogo eni jio'ë'e.

<sup>6</sup> O i'e aevoromo Keriso mae uehorovade aho ekaresiaho nadi muebejëvo'iro. I'e aevoromo mae uehorovade aehu ekaresia muebejëvë'o'oho nani hu hesi sivue uehorovoromo uvo'ë'e: Na a böröme jevë'ego ekaresia muebejëvaje mure bamevare höromo Satan-are guare beva'ë'e.

<sup>7</sup> A'i God-are jö bogo hejë'e ariböviehu mu bae'iröhe a mae uehorovë'o'oho ëhi jië'e ahuro ekaresiaho muebejëvo'iro. O hesi örire bogo ma uehorovë'e ekaresia ëma muebejëvë'o'oho hesi ihoho sisërë'iramu Satan-are guare be'ë'e. Ekaresia muebejëvarue aribövi jabesi jöho ëhije.

*Ekaresia ajëmarue aribövi jabesi jöhoje.*

<sup>8</sup> Röhu ekaresia ajëmijarue aribövi jabesi jöho ëhi gemuohoje. Taemo raromo'iro. O nadi jöho huotohuotovo majëhi'i. Nadi vörö'e jovo bövioho ue'aho'i. Nadi moniemuoho uehorovo'iro.

<sup>9</sup> God-hu rjöhuijade jöho uhohu'o mae uehorovo'iro.

<sup>10</sup> Mure bamëvo'ie'iroho urimo jabesi muoho diehi jiajoho gëre. Eni jëvamu gevë'o'oho evare muoho aevoromo vae'iro.

<sup>11</sup> O jabesi magonahoho ëhi gemuoho ma-taemo raromo'iro. Nadi ae gö jabesi jö sisëho atemu ato'irögoro a'i simane sasohoromo mue aho'o avoho mueberuomo'iro.

<sup>12</sup> O ekaresia ajëmijarue aëro magonahe ma-gemu masuromo aboji harihu'ohu'o jabesi osare raromarue agano ioro'iorohu'o avoho muebejëvo'iro.

<sup>13</sup> Ekaresia mae ajëmijë'o'oho jabesi ihoho mae jëvo'iramu ëhuro biririvoromo Iesu Keriso mae uehorovarue jöho ae ma-sama'e majëhinövo'ë'ö.

*Paul-hu jögoru Timothy-are örire jajivade hesi bëhohoje.*

<sup>14</sup> Na nege ma-burëro ö'irovo. Röhu naehu jajivaje hesi bëhoho

<sup>15</sup> naehu örisanuvoromo bogo vejö'oho ö'amu gevë'o'oho jero ë jöho adahoromo uehorovoromo uvo'iranego: Noro ëhi'oromo God-are agano ömo'ömo'hu'o gemu mae raromoromo muoho avoho vaejarue höjo. Iae God-are aganoho no daruge jië'e ae God-are ekaresiae javue. God-are ekaresiae javuë'ëro dioho'o bönu'o javuo ma'enegro bibivajëhi noro God-are jö maho ëhi ma'eno titimoromo avoho muebejëgo ëhi jiemu jiajeje.

<sup>16</sup> God-hu rjöhuijë'ëro noehu mae uehorovarue jö hesi bëhoho börömo maeje. Ae aho'o iae no ëhi uehorovarueje. Ejö hesi bëhoho aviajeje.

Hu a sine jioromo a nuniro rovade höjo.

Hu mae jiaje jöho God-are Aru'ahohuro hu ajamiromo no rjöhuijade höjo. Hesi nu ano'oho aneraëro gavare höjo.

Hesi jöho sa'ae göro göro aëro aevoromo hejare höjo.

Hesi jöho ave sa'are ariböviohuro mae uehorovare höjo.

Ö'idöre ajiomoromo hesi ajoho baejade höjo.

## 4

*Ijonö aehu Iesuare jö ma vuonugo'i sareri'e jö majëhi'iröhe jöhoje.*

<sup>1</sup> Röhu God-are Aru'ahohuro sama'e uövu'eje: Majae ijonö aëro God-are jö mae uehorovaruoho vuonugo'irögoro Satan-are aru'aho ömo'ömohuro sarerëmi'iramu mae höromo jabesi jö sisëho ejëhoruomo'ajëjo.

<sup>2</sup> Satan-are aru'aho sisëhuro jabesi sareri'e jöho bojëmi'iramu sareri sareri'e ariböviohuro jöho baeromo sisë diehi diehi vaejaroho jabesi dë vövöbajo'o uhuroho bogo herovo'i ae ma-sarerëmiromo majëhiruomo'ajëjo.

<sup>3</sup> Majëhiromo uëruomo'ajëjo: Nadi magonahoho masu'amorëjo. Ie gö gö nadi ue'ahorëjo. Ëhi uëruomo'ajëjo röhu ë iohu'o God-ro bamadeje ëhuro Keriso mae uehorovoromo hesi jö ma gavarue aribövioho noro hesi örire huë mae uaromo ë ioho ue'aho'iröhego.

<sup>4</sup> Ëhesi bëhoho God-hu iruno'o bövi bise'o bamadoho iae mae jio'ame. Ëhuni no bogo uvo'ejo: Sisë höromo juahovo'ejo. A'i noehu i ujuohoromo God mae uaromo ë i ijë'o maeje.

<sup>5</sup> Ëhesi bëhoho no God-are jö adahoromo gavaruohuro uvarueje: God-ro bövioho bise'o mae bamade höjo. Ëhi uvoromo hesi örire jö atoromo ijë'o mae ëhuro uvarueje: God-ro bamahuë'ëro ijaruoho iae mae höjo.

*Timothy-hu Keriso-are mu avoho vaeröhe jöhoje.*

<sup>6</sup> Ëjöho Christian aganoho majëhijego heruomo'iro. Ja ëhi ë'ë'o Iesu Keriso-are mu vaejanue a mae javo'ë'e. Ëhuro no ga'ejo noehu mae uehorovarue jö ma jaehu ebe rovanoho ja ëho uehorovoromo birire baejë'e javo'iramu.

<sup>7</sup> O simano sisërëromo God bogo uehorovë'e ëma atarue jöho nadi ejëhone. Nadi ejëho'irögoro biririvoromo God-hu nimaje muoho sivohemu sivohobe va'one.

<sup>8</sup> Noro sino haho'o hesi muoho sivoho avohë'i ë'o gabe va'arueje ëhuro nosi sinoho biririvavuo'iröhego. Ëhi ë'ë'o ëhuro no ma-bisemu mae javuo'ë'e. A'iro God-hu nimaje mu sivoho avoho'i ë'o gabe va'ë'o ëhuro mabëhe javuo'ë'e. Ëhuro jaruvoho mae raromaruëro ijonöhu'o ëhi gemuoho raromo'ejo.

<sup>9</sup> Ëho jö maego ae aho'obëhe mae uehorovë'o iae maeje.

<sup>10</sup> Noro ëhi mae raromo'iröhëni ëhuni no biririvoromo sivohoromo God-hu nimaje muoho vaejarueje ë hesi bëhoho God darugo'e aëro jië'ëro no ajamuijoro mae uehorovaruohuni. Hu sa'ae aho'obëhe ajamuaje aeje. Mae uehorovarue aribövioho no mare bamavuaje aeje.

<sup>11</sup> Ëhi jië'e jöho ae bojëmiromo ë hesi öroho röjëhinövone.

<sup>12</sup> Ja a i'e jave röhu nadi simano sisërëjë'e muoho vaejego aho uvoruomo'iro: Timothy asisö'ëro jië'ëro hu muoho bogo avo'avoho vaejaje höjo. A'i jero jö mae jövoromo mu mae vaeromo ae huë baejëvoromo God mae uehorovoromo avoho taemo hijego aëro jasi muoho garomo uvo'iro: No'o ëhi ë'ëjarëjo.

<sup>13</sup> Jero ëhi'oromo God-are jöho aëni adahoromo jögore mëmiromo öroho röjëhiromo ëhi ë'i hijego evare na ö'iro.

<sup>14</sup> Mu vae'irane suvuro God-hu bojamadoho nadi u'uho'i ma-biririvoromo muoho vaene. Ëhesi bëhoho urimë'i ekaresia muebejëvarue a duvahohuro övoho simanore bamahamu evare aëro jöho God-aro baeromo mu vae'irane jöho majahijamu ëhuro ë suvuroho baejaneje. Ëhuni ëho avo'avoho mueberomo muoho vaene.

<sup>15</sup> Ëhi jië'e muohuremu uehorovoromo biririvoromo vaenövone. Ëhi ë'ë'o ëhuro ae aho'obëhe ga'ë'ö jero muoho avoho vaebe rue'iramu.

<sup>16</sup> Jasi arijo'arije avo'avoho mueberovoromo God-are jöho avo'avoho röjöhine. Èhemu vaenövone. Èhi è'è'oho èhuro maro javoromo jasi jö hejarue ariböviohu'o maro jëvo'è'e.

## 5

*Timothy-hu ekaresia ae magonahe diehi jögoru mëmi'iröhe jöhoje.*

<sup>1</sup> Röhu ga'irane a duvahu mu sisë'i vaejamu jaehu jögoru majëhijë'oho nadi jö giagia'oho majëhi'i ma-sanu'e vavu majaharuëhi èhi majëhine. O a i'o jögoru mëmë'oho ö majëhijaruëhi èhi mëmine.

<sup>2</sup> O magonaho duvaho jögoru majëhijë'oho vëmu majëhijaruëhi èhi majëhine. O magonaho i'o jögoru mëmë'oho ma'ino majëhijaruëhi èhi jië'e jö mahemu mëmi'i jöe gö gö nadi uehorovoromo majëhine.

*Magonaho doru jabesi jöhoje.*

<sup>3</sup> Röhu magonaho doru jabesi jöho. Magonaho doru agano rumo'ëro jië'ëro huë ma baeröhe öri bogojië'oho èhi jië'e magonaho doruoho jero rajëhiromu ajëminövone.

<sup>4</sup> A'i magonaho dorue aboji harihu'e o hijo ömo'öme jëvë'oho ë ariböviohuro ave muoho avo'avoho uehorovo'iro. Jabesi agano mahu urimo avoho muebejëvoromo èhuro jabesi vëmu vavuehu hijo ömo'ömehu ajëmarëhi èhi jaburo mana ajëmi'iro. Jabesi mu ioro'ioroho ijönö jio'iro. Èhi jië'e muoho God hu nime.

<sup>5</sup> A'i magonaho dorue agano rumo'ëro jië'ëro jabesi sivu mueberovë'iroho èhi jië'e magonahohuro uvoruomajeje: Hesi God-ro ajemi'ajë uvoromo èhuni vahie majae jene God-are örire jöe jövoromo ua'i hijajeje: God jero ajemego na mae jevajo.

<sup>6</sup> O magonaho doruehu jabesi sinohemu uehorovë'oho ëma jijiharuëro ije jahosi'e jiajëhi èhi jëve.

<sup>7</sup> Èhi jië'e jöho majëhijego ejahego jö sisëho bogojio'iro.

<sup>8</sup> Ae rahu hesi ö mueno'o bogo ajëmijë'oho o hesi agano mahu'o èhu'o bogo ajëmijë'oho èhuro God mae uehorovarue jöho vuonugoromo God-are jö bogo hejë'e aribövioho iosirëmiromu hu sisë bëheje.

<sup>9</sup> Ekaresia ariböviehu magonaho doru muebejëvo'i jabesi iho jajivo'ië'iroho vadune aho'o 60 baejë'e jabesi ihohemu jajivo'amo'iro. O barue ma-gemu masuvë'oho èhi jië'e magonaho doru jabesi ihohemu jajivo'amo'iro.

<sup>10</sup> O magonaho dorue mu mae vaejamu èhuro jabesi iho mae jië'oho èhuremu ihoho jajivo'amo'iro. Aboji harihu'e avoho muebe'amobe rovë'e jiego ae i'e rovamu ajëmiromu nihudëgo'i arijë'e jiego Keriso-are aribövioho huë baejë'e jiego huë vavaeni'e aribövioho ajëmijë'e jiego mu mae bövie bise'e vaeruomë'e jiego èhi jië'e magonaho doru jabesi ihohuremu jajivo'amo'iro.

<sup>11</sup> A'i magonaho i'e doru jioruomë'oho nadi èhi jië'e magonaho jabesi ihoho jajivoromo muebejëvone. Èhesi bëhoho magonaho i'ohuro dëre uehorovoromo ri'öromu Keriso vuonugo'irögoro sionoho iore bamo'i ni-marueje.

<sup>12</sup> Èhi nimoromo èhuro urimë'i Keriso mae uavare jöho ahego èhuro jabesi ihoho sisërëjajeje.

<sup>13</sup> Röhu göho magonaho doru i'ohuro mue bijönibijiohoromo osare osare ma-raromobe jijihajeje. Röhu bogo èhemuoho ömo'i mu sisë gö'o döre

vaejarueje. A jöho ëma atobe a muoho ëma ahobe jijihajeje. No bogo atarue jöho ë magonahoho jaburo atoruomajeje.

<sup>14</sup> Ëhi jië'ohuni na nege magonaho doru i'ohuro röhu maho sionoho barue masu'amoromo aboji harihu'e vaeromo osaho avoho muebenövoröhego. Ëhi ë'ë'oho ekaresia bijönimarue ariböviehu jö sisë ato'iröhoho bogojio'ë'e.

<sup>15</sup> Na ëhi uavaje hesi bëhoho magonaho doru i'o ioro'iorohuro Keriso-are jöho vuonugo'i Satan-are örire va'ë'ego ëhuni uave.

<sup>16</sup> O Christian magonahe rahu hesirire magonaho doru jië'oho huro ajami'iro. Ajamijë'oho ëhuro ekaresia aribövioho bogo madomadëgo'iramu agano rumo'e magonaho doru ajëmi'iröhoho eni jëvo'ë'e. Magonaho doru jabesi jöho ëhije.

*Ekaresia muebejarue a duvaho jabesi jöhoje.*

<sup>17</sup> Röhu a duvahehu ekaresia muebejëvarue jöho jajivo'ië'e. A duvahehu ekaresia avoho muebejëvamu ekaresia jabuhu mabëhe rajëhiromo suvuoro bisemu bövie mana bojëmijë'oho iae maeje. O a duvahehu biririvoromo ekaresia avoho muebejëvoromo röhu göho God-are jö majëhiromo bëhi röjëhijarue ëhi jië'e aribövioho börömo mae uehorovëvoromo mana bojëmijë'oho iae maeje.

<sup>18</sup> Suvuoro bojëmi'iröhe hesi bëhoho ë hesi jöho God-are surire uhu'e uvë'eje: Jasi mu vaejahaje miehu jasi mu vaejahoromo i hörehu sa'ijovobe juvë'oho hesi jö'oho nadi tugohahego hu juvoromo hesi manaho baeromo huhu hörehu sa'ijovaje i vitu vituoho ibe juvo'irajo. Ëhi jië'oho miohuro ëho hesi manae bae'a'ajëjo. O God-are surire jö göho ëhi uvë'eje: Ae rahu mu vaeromo mana baejë'oho iae mae höjo.

<sup>19</sup> O aehu ekaresia muebejëvaje a duvaho hesi jö sisë ja majahijë'iroho ae gemuehu majahamu hejë'oho nadi ejahone. A'i ae niö'i o ae niö'i gemu jabuhu a duvaho hesi mu sisë jabesi hia'ehu heromo nunehu gavë'ëro jasi örire majahijamu hejë'oho ëhuremu ejëhone.

<sup>20</sup> Hu sisë jië'oho ekaresia aribövi jabesi nunoro jögore bojamego avoho uehorovo'i ëhuro a ioro'iorohuro ëho garomo juhuonivoromo bogo ëhioho ë'iröhe.

<sup>21</sup> Ëjöhö börömeje. God-are nunire Iesu Keriso-are nunire God-are anera jabesi nunire naro ja uave ejeho'iranego. Ejehanuevarö mevo ga'irane a duvaho jabesi jöho diho mae diho sisë jiamu gavë'iroho nadi ma-urimoho uvone: Iaho mae höjo o iaho sisë höjo. O nadi a duvahe jasi aemo'aemoho sanu'e jöho majëhi'i a duvaho ioro'ioroho darugo'e jöho majëhi'i a'i ma-uehore gemu baeromo a duvahe aho'obëhe majëhinövone.

<sup>22</sup> O ae göehu ekaresiaëni mu börömo vaeröhego övo simanore bamaho'ië'iroho nadi ma-majioho övoho simanoroho bamahone. Ëiahuro mu sisë vaejago ae niö'i jemesi ihoho sisërejëhojöëni uave. Nadi ëhioho ë'irögoro ma-avoho mueberovego sisëho bogojavo'iro.

<sup>23</sup> Röhu dëre guomo guomo baejavo'i hijajohuni nadi jovemuoho i'i wine jovohu'o ma-bisemu ijego ëhuro dëho mae javo'iro.

<sup>24</sup> Amo jaehu ekaresia jabesi mure bamëvo'ië'iroho jabesi muoho avoho garomo evaro bamëvone. Ëhesi bëhoho a ioro'iorohuro ma-va'orahoro mu sisë vaejaruëro jië'ëro jabesi mu mevo'irane ë hesi urimo ga'a'anue jabesi sisëho ma-va'orahoro jio'iramu muroho bogo bamëvo'anue. O a ioro'ioro jabesi sisëho subirö'öjë'ëro jero jabesi muoho mevo garomo evare ijönö ga'a'anue sisë jioruomö'iramu muroho bogo bamëvo'anue.



<sup>25</sup> O mu sisë urimo gö subirö'ö'i gö va'orahoro jiël'ëro ijonö aho'o ma-va'orahoro jiajèhi mu maho èhi gemuohoje. A ioro'iorohuro mu maho ma-va'orahoro vaejarueje. O mu ma ioro'ioroho subirö'öjè'eje röhu ijonöho bogo subirö'ö varijënoho jio'è'e.

## 6

*A jabesi muemu vaejarue aribövi jabesi jöhoje.*

<sup>1</sup> Röhu jö göho a masijo jabesi darugoremu raromoromo jabesi muemu vaejèharue aribövi jabesi jöhoje. Èhi jiè'e ariböviohuro a masijoho mae uehorovëvo avohoromo muoho vaejèhego God-are ihohu'o Keriso-are jöhu'o aho bogo sisë'ioho ato'iro.

<sup>2</sup> O jabesi a masijoho Keriso mae uehorovarue aribövie jëvë'o ho mu ariböviohuro nadi uvo'iro: Nosi a masijoho ma-Christian ö mueno'ëro jëvë'ëro bogo masijoho hö uvoromo muoho ëma sisë'i sisë'i ömo'iro. A'i uvoruomo'i: Nosi masijoho jabumë Keriso mae uehorovarue aribövie noehu rajëhijaruoho jëvajëjo. No èhi jiè'e aribövioho ajëmijarue hö uvoromo jabesi muoho avo'avoho vaejèhoruomo'iro.

*Keriso-are jö vuonugo'i sa'a hesi jöemu berohemu beroharue mu sisëhu'o ave sa'a hesi inömo bae'i èhemu uehorovarue mu sisëhu'o ë mu sisë niö'i hesi jöhoje.*

Èhi jiè'e jöho jero ae röjëhiromo uë'i hijego muoho avoho vaeruomo'iro.

<sup>3</sup> Aehu jöe gö röjëhijë'o ho sisëje. Jöe gö röjëhiromo nosi Bada Iesu Keriso-are jö mahu'o God-are mu diehi avoho vaejarue jöhu'o bogo ejë'o ho

<sup>4</sup> hu simanoho bogo uehorovë'e ëma uvajeje: Na a böröme jëvajëjo. Simane sisërëromo nimajeje bëhi rumo'e jöe gö gö ëma nahoromo jö aho'ahëmi'i. Röhu èhi jiè'e jö berohemu berohamu hejë'o ho èhuro aëro sarerivoromo uvoruomajeje: Nuni aji'e jöho jabumë diehi'oromo bae'i no bogo baejare höromo jabesi örire dë vörönimoruomajeje. Dë vörönimoromo iro muorovo'e vaeromo ae göëro gö hesi örire agoromo ae göëro gö hesi örire sisë uehorovoromuomajeje.

<sup>5</sup> O uehoro sisë baeromo God-are jö maho vuonugo'i irovoruomajeje. Irovoromo sarerivoromo uvoruomajeje: Noehu God-are muemu uehorovo'iröhe hesi bëhoho aviëhi höjo. Noro inömo ho bövioho bise'o ho ujuohoromo èhuro maro raromo'ëjarëjo.

<sup>6</sup> Iae mae. God-are muemu uehorovë'o ho iae maro raromarueje. Èhesi bëhoho God-are muemu uehorovoromo röhu bogo gö'o gö'o ho bae'i uehorovo'i a'i uvë'o ho: No eni javuajë uvë'ohuro èhuro maro ho raromarueje.

<sup>7</sup> Vëmehu rahavuare majaroho evaroho inömo rumo'e ma-övemu rovarëje. O vuovoröhe majaroho èhu'o ma-övemu va'ëjo.

<sup>8</sup> Röhu iruno'e o niögu suhi'e javuë'o ho èhuro uehorovoromo uvo'ëjo: No eni javuajë uvoromo bogo gö'o ho bae'i èhemu uehorovo'ëjo.

<sup>9</sup> A'i a ioro'iorohuro inöme bövie bise'e marohë'e mae bae'i èhuremu uehorovoromuomajeje. Èhi jiè'e aribövioho Satan-ro dinëmijego buororo rumo va'anovego buorëro taemëvanovego dë vövöbajo'ere ri'öromo simane sisë'i uehorovoromo mue gö gö nimoromo sisërërovo barëjarueje.

<sup>10</sup> Moniemu gemu uehorovë'o ho èhuro mu sisë aho'obëhe baejarueje. Ae göëro moniemu nimo avohoromo èhuro Keriso-are jöho rumonimobe va'ojuvo va'o vuonugo'i huë vavaene gö gö baeruomë'eje.

*Timothy-hu mue gö gö vaeröhe jögoru Paul-hu jajivadohoje.*

11 Röhu ja God-are ae jave. Ëhuni ëhi jië'e mu sisëho nadi gavanovone. Nadi gavanovo'i ma-mu maemu vaeromo God-are muoho nimoromo hesi öröro mae uehorovoromo ae gö huë baejëvoromo biririvoromo muoho vaeromo sanu'e jöho majëhinövone. Ëhi jië'e muohuremu vae'i ni-monövone.

12 Aehu ajajovoromo göehu gö iosirëmi'i biririvaje ëhi jië'e mu maho baejë'e jave. Ëhuni God mae uehorovoromo jasi daruge aho'o bojamiromo biririvoromo mu maho vaenövone. Muoho vaejë'i ijönö ioro'ioemu maro hi'irane öröho ëhuremu uehorovone. Urimë'i jaehu mae uehorovanue jö ae aho'o jabesi nunire huruoho majëhijanevare evare God-ro ja uavadeje ëhi maro hi'iranego. Ëjöhuremu uehorovone.

13 Röhu naro God-are nunire Iesu Keriso-are nunire ave jöho majahi'ië'e. God ae aho'obëhe darugo bojamuego raromarue ahoje. Iesu Keriso Pontius Pilate-are nunire namiromo hesi jö ma-maemu huruoho majahijade ahoje. Ëae niö'i jabesi nunire ave jöho majahi'ië'e.

14 Jögoru hejanoho avo'avoho ejego aho jasi jö sisëho bogo ato'iro. Ëhi ebe va'one ijönö nosi Bada Iesu Keriso rovego garöhe.

15 Iae hu rue'iramu no ga'ejo A Böröme God-hu nimaje majare. God hu ma-maro hiromo huro gemuëro börömo mae namijë'ëro masijo vaeruomaje ae aho'o iosirëmiromo hu gemu dörohoje.

16 God gemu hu bogo guomo hesije. Hu aji börömoru hijë'ëro hesi bëhiroho no bogo va'o hesi javue. Aho hu bogo ganövë'ëro ëhi bogo ganövo'ejo. Hesi iho börömo darugoho ma-ëhi jiemu jiobe va'ë'e. Iae mae.

17 Röhu ave sa'a hesi bövi bise'o marohë'e mae jëvë'e aribövioho uëne: Nadi jemesi inömoho bövioho bise'oho uehorovoromo döroho bamorovorëne. Nadi uvorëne: Na inömo marohë'e jevajohuro ëhuro mae jevo'ajëjo ë hesi bëhoho inömoho ma-jahuri jiaje inöme jiaje. A'i uvorëne: Hesi God-ro ajemi'iramu mae jevo'ajëjo. Ëhesi bëhoho huro bövie bise'e suvuoramui avohajeje huë mae javuoröhego.

18 O uënego jaburo mu mae vaeruomo'i. Huë baerovarue mu hesi öröho marohë'e mae jëvo'iro. Öve sasohoromo suvuore ë'iro.

19 Ëhi ë'ë'oho suvuoro maho ö'idöre rune vae'ë'ö ëhuro maja viture mamaro raromo'iröhohuni. Ëhuro ruaho'amoromo bogo ma-döemuoho mae raromo'i dë vövöbajo'o uhohu'o maro raromonövo'ë'ö.

20 Röhu Timothy God-ro hesi jöho bojamadeje jero muebe'iranego. Ëhuni ë jöhemu avoho uehorovoromo ae majëhinövone. A'i God rumo'e sareri sareri'e jöho nadi gavanovone. O aehu God-are jö ahoromo jö i'o barueromo sarerëmiromo uëvë'oho: Aveho nuni aji'e jöe hö uëvë'oho nadi gavanovone.

21 Ëhesi bëhoho ae göëro ëhi jië'e jö i'oho uehorovoromo God-are jöho vuonugë'ego ëhuni uave.

God-ro jemë huë baeromo ajëminövo'ë'e. Ahia mino'e.

## 2 TIMOTHY

*Paul-hu Timothy jejamade jöhoje.*

<sup>1</sup> O asë'e Timothy Paul naro ave jöho jajivo'ië'e. God-ro hesi nimë'ëro ëhu'ëro na Iesu Keriso-are apostle jevë'eje naro ae majëhiromo uënövo'irodego: God-hu nosi aru'aho i'ovahuo'i uövuadëhi iae huro ëhi Iesu Keriso'o gemuore ramuo'iramu i'ovavuo'ajë uë'irodego. Ëhu'ëro na ëhi jië'e ae jeve.

<sup>2</sup> Naro nasi harihe Timothy jasi örire dë vövöbajo'e aho'o jejamije. Na nege God Vavuohu'o nosi Bada Iesu Keriso'o jabesi vavaenimoromo ajamijego jero maro hi'iranego.

*Timothy-hu Keriso mae uehorovadohuni ëhuni Paul-hu God mae uavade jöhoje.*

<sup>3</sup> Naro God-are örire mabëhe uave. God nasi hijo miono'ehu uehorovobe rovarëhi na'o dë mae jevego herovoromo hesi muoho vaejajeje. Vahie majae jene naro jasi jöho hesi örire jövoromo hu mabëhe ua'i hijajeje.

<sup>4</sup> Jasi jöëni God mabëhe uaromo naro uehorovoromo uvajeje: Jero nani vavaenimoromo nivane hö uvoromo ëhuni naro ja ga'i nego avohajeje ja garomo nasi dë vövöbajo'e nimorohevoröhego.

<sup>5</sup> Na uehorovajoho ja bogo döëremuoho God mae uehorovo'i uhohu'o mae uehorovanueje. Urimë'i jasi hije magonaho ihe Lois'o jasi vëme Eunice'o jaburo uhohu'o ëhi God mae uehorovonövareje. Röhu na uehorovajoho jabuhu uehorovonövarëhi ja'o ëhi gemuoho God mae uehorovanueje.

*Timothy-hu vi'ehë huë vavaene baeromo biririvoromo Keriso-are muemu vaeröhe jöhoje.*

<sup>6</sup> Ëhuni naro ave jöho ua'ië'e uehorovo'iranego. Urimë'i naro nasi övohuro jasi simanoho taemahamu evare God-ro ja darugoho bojamijadeje jero hesi aribövioho muebejëvo'iranego. Ëhuni ë darugoho vëninö'e avoho muebejëgo bogo duoroho'iro.

<sup>7</sup> Ëhesi bëhoho God-ro hesi Aru'ahoho bojamuamu baejë'ëro ëhu'ëro bogo juhuonivo'i a'i daruge baeromo ae gö huë baejëvoromo avoho taemo raromarueje.

<sup>8</sup> Ëhuni nosi Badare jö majëhijanuoho nadi ëhunioho javojimone o na savoji gagore hijajohuni ëhu'o nadi javojimone. Nadi javojimo'i God-are darugoho uehorovoromo naehu huë vavaeni baejajëhi Keriso-are jö ma hesi jöëni huë vavaeni rovë'oho ja'o baene.

<sup>9</sup> Ëhesi bëhoho no sisë javuamu God-ro no baejavuoromo maro bamavuoromo hesi ariböviemu javuojöro uövuadeje. Ëhi ajamuade hesi bëhoho hu bogo uvadeje no mu mae vaejë'e javuajë uvoromo ëhunioho hesi aribövioho javuojöro uövuadeje. A'i hesi nimë'ëro noni vavaenimoromo ë'adeje. Urimo sa'a bövi bise'o bogo bamadevare evare God-ro noni vavaenimamu uvadeje ijönö Iesu Kerisoro no ajamui'iröhego.

<sup>10</sup> Ëhi uvadoho jaruvoho mare ramuajë aho Iesu Kerisoro nosi örire rovë'ëro ëhu'ëro God-hu no huë baejavuajë muoho va'orahoroje. Ëhesi bëhoho Iesu Kerisoro nosi örire rueromo vuovo'iröhe öroho ahahuadeje. Ahoromo hesi jö maho röjahuijë'ëro ëhu'ëro no ë jöho garomo uvarueje:

No ioro'ioire gemu maro raromemu raromo'ejarëjo. Kerisohu ajamuade jö maho ëhije.

<sup>11</sup> Ëjö maho naro majëhi'irodego God-ro bamevadeje. Ëhu'ëro na apostle o Keriso-are jö röjëhijaje ae jeve.

<sup>12</sup> Ëhi jië'e muoho vaebe juvë'ëro ëhuro na vi'ehoho huë vavaenoho baejajeje. Iae ëhi jeve röhu na bogo javojege. Rabëni. Naro God mae uehorovoromo gavajeje hu mae jiego. Ëhi gavajëro jië'ëro uvajeje: Iae mae höjo. God-ro eni jië'ëro ëhu'ëro hesi mu nasi övo döre bamehadoho huro avoho muebebe va'iramu evare ë maja börömocho rue'a'ajëjo. Ëhuni javojoho bogojeve.

<sup>13</sup> Röhu naehu jö ma röjahibe rovamu hejanoho ja'o ëhi jië'e jö mahuremu ma'enone. Iesu Keriso-are uehoro maho baeromo God mae uehorovë'e ae gö huë baejëvë'e hiromo ë jöhuremu ma'enone.

<sup>14</sup> God-hu hesi jö ma jasi övo döre bamadoho avoho muebenego aho bogo jö göho jövo'iro. God-are Aru'ahoho nosi dë vövöbajo'ere hijë'e jiaje hesi darogoho baeromo ëhuro ëhi ë'one.

<sup>15</sup> Iae ja'o gavanue Asia sa'a raje ae aho'obëhe Phygelos'lo Hermogenes'lo jabu'lo nasi jöho bogo uehorovo'i remo va'oruomë'eje.

<sup>16</sup> Röhu na nege Badaro Onesiphorus-are aganhuni vavaenimoromo ajëmi'iröhego. Ëhesi bëhoho urimë'i naro huë vavaene bae'ego Onesiphorus-ro ajemi'ego dëho sasohevonövadeje. O na savoji gagore hijamu hegorovo Onesiphorus-ro nasi jöëniho bogo javojimo'i

<sup>17</sup> Rome amore ruenugoromo nahevemu nahevobe juvojuvo birohevadeje.

<sup>18</sup> Ëhuni na nege Badare majaho rovego huro Onesiphorus-are jöëni vavaenimoromo ajamijego mae jioröhego. Na ëhi nege. Röhu urimë'i Onesiphorus-ro Ephesus amore hiromo muoho bövioho bise'oho ajem-inövadeje. Ja'o iae gavanueje.

## 2

<sup>1</sup> Röhu nasi harihe no Iesu Keriso'lo gemuoro bimuvavuë'ego God-ro hesi nimoromo huë baejavuoromo biriroho bojamuijë'e jiaje jero ë biriroho baeromo muoho vaenövone.

<sup>2</sup> Na diehi jië'e jö ae aho'obëhe majëhijajoho iae ja henövaneje. Ëhenövane jöho baeromo a ma jabesi öroro röjëhijego jaburo jöho bava'oromo a ioro'ioroho jabu'lo röjëhi'iro.

<sup>3</sup> Muoho ëhi vaeromo huë vavaeni rovë'oho nadi vuonugo'i a'i uvone: Iesu Keriso-are muorovo ariböviehu biririvoromo Satan'lo muorovoromo huë vavaeni baejaruëhi na'lo ëhi ë'ejö uvoromo ja'o ëhi jië'e huë vavaenoho baeromo biririvoromo Satan'lo muorovone.

<sup>4</sup> Röhu ë hesi uhu jö jajivo'ië'ajoho gane. Bijo bunoe baeromo sisë ariböviohu'lo muorovë'iroho mu göho göho bogo gemuoroho havoromo muorovo'i ma-muorovo muohemu vaejarueje jabesi muorovo a börömocho gëromo nimorohoröhego.

<sup>5</sup> O uhu jö göho. Ajajovoromo tutuvoromo ae göehu gö iosirëmi'ië'iroho diehi ajajovarue jögoroho ejëhoromo evare tutuvarueje bogo ejahë'oho suvuoroho bogo baejöëni.

<sup>6</sup> O uhu jö göho. Dë mu ravë'iroho biririvoromo mu vaejarue ariböviohuro urimoho ë ioho ue'aho'ë'ö.

<sup>7</sup> Naehu jajivaje jöho uehorovo avohone. Jöe aho'lo Badaro ajami'iramu bëhoho bae'a'anue.

<sup>8</sup> Röhu Iesu Keriso uehorovonövone. Keriso hu Israel sa'a muebenövade ae David-are ujeje. Huro guomoromo i'ovoromo ri'öjè'eje. Ëhi jiè'e jö maho naro majèhibe juvajeje.

<sup>9</sup> Ëhi jiè'e jö maho naro majèhijè'ëro èhuni Keriso bijönimarue ariböviohuro uvoruomajeje: Nörö Keriso-are jö majahuajohuro èhuro hu a sisè höjo. Ëhi uvoromo savoji gagore ba'amevè'ëro na huè vavaene baeje. Jabumëro na savoji gagore ba'amevoromo taemevareje röhu God-are jöho bogo taemè'ëro ae aho'obèhe hebe va'oruomajeje.

<sup>10</sup> Ae aho'obèhe God-are jö hebe va'aruohuni èhuni God-hu baejèvade ariböviohuni naro uehorovëvoromo biririvoromo huè vavaene bövie bise'e baejajeje. Èhesi bèhoho na nege è aribövioho jabu'o Iesu Keriso-are ae gemuohuro jèvè'ëro bogo sisèroho va'i maro va'oromo ioro'ioire gemu hesi ajire raromemu raromoröhego. Èhuni naehu biririvoromo mu vaejajèhi ja'o èhi biririvoromo muoho vaene.

<sup>11</sup> Röhu noehu ato'i arijarue jöho iae jö maeje. Atoromo èhi uvarueje: Nosi uehoro mamioho Iesu guomadèhi vuovahuè'o ho hu'o gemu mae raromo'ëjarèjo.

<sup>12</sup> No bogo u'uho'i ma-biririvè'o ho hu'o masije riravoromo hesi öri ari'o ho muebe'ëjarèjo.

Noehu hesinö dejo bu'öjè'o ho huro nosinö deje bu'ö'a'ajèjo.

<sup>13</sup> Noehu God mae uavare jö ahè'o ho röhu God-ro mae uövuade jöho bogo aho'a'ajèjo

huhu uvaje jö vuonugo'iröhoho bogo eni jiè'ego.

*Timothy-hu mu mae God-are nunire vaeröhe jöhoje.*

<sup>14</sup> Ëhi jiè'e jöho majèhijego Christian ariböviohuro heromo avoho uehorovoruomo'iro. Ëhi majèhiromo röhu God-are nunoro jögoroho darugo'o majèhiromo uène: Bèhi rumo'e jöe gö gö nadi ma-jö aho'ahamirovorène. Ëhi uène. Ëhi jiè'e jö aho'ahamirovè'o ho aho heromo bogo marè'i sisèrèrovarueje.

<sup>15</sup> Röhu jero muoho biririvoromo ömo gavego God-ro garomo uvo'iro: Ja eni javajèjo. God-are jö maho ma-ahorirèro majèhine. Jaehu èhi è'è'o ho jaehu vaejanue muoho God-hu gavè'o ho ja bogo javojago'è'e.

<sup>16</sup> Röhu God bogo uehorovè'e èma atarue jöho nadi enövone. Ëhi jiè'e jö atè'o ho aëro God rumonimobe va'oruomo'è'e.

<sup>17</sup> Ëhi jiè'e jö sisèho iae sago ho va'ène jio'è'e. Sagohehu sino döre ibe va'ego rumorovoromo sino sisèrèjèvobe va'ajèhi jabesi jö sisèhuro èhi rumorovo'iramu aëro sisèrèbe va'oruomo'è'e. A ioro'iorohuro èhi è'arueje röhu Hymenaeus'o Philetus'o jaburo niö'iro èhi jiè'e jöho majèhijarueje.

<sup>18</sup> Majèhiromo God-are jö maho vuonugoromo ae sarerèmiromo uèvarueje: No ae aho'obèhe mami'e vuovoromo i'ovoromo ri'öjè'ëro javuè'ëro è hesi majaho mami'e barèjè'e höjo. Jö sisèho èhi jörovamu hejè'ëro Christian ae göèro göèro Keriso avoho uehorovaroho vuonugè'ejö.

<sup>19</sup> Èaribövi ioro'ioirehu God-are jö vuonugaroho röhu God-are aribövi maho jabumëro öbunö'e bibivoromo riravarueje. Jabumè God-are javu hesi öbu va'ène jioruome. God-are javu hesi öbu va'ène jioruome röhu God-are javu öbu hesi ahore ave jö niö'ioho jajivè'eje. Göho uvè'eje: Badaro gèvaje höjo di aribövioho hesiroho jioruomego. O göho uvè'eje: Ae rahu uvè'o ho: Na Bada mae uehorovaje ae jevajè uvè'o ho è ahuro mu sisèho vuonugo'irajo. Èjöho jajivo'amè'eje.

<sup>20</sup> Röhu ekaresia jabesi uhu jö göho uehorovone. Osa börömore va'ë'oho ga'a'anue hevöe ramae nu ano'e gö gö jio'amo'iramu. Ioro'ioroho inömo ma-mabëhëro avoho'amë'eje. Ioro'ioroho ma-ijëro o sa'aëro sisë'i sisë'i avoho'amë'eje. Röhu jabesi muoho gö gö jiorove. Hevö ioro'ioroho maego maja börömhuni runo'e bahi'i hevö ioro'ioroho sisëgo majae ëhi mue vaejarueje.

<sup>21</sup> Ëhesi bëhoho ae rahu naehu jajivaje uehoro sisë gohö'öjë'oho ë aho hevö maho va'ëne jio'ë'e. Ëhi jië'e aho mae nugë'ëro hesi Börömo hesi muoho mabëhe ajami'ë'e. Mu mae rabe rabe rovamu vaejë'oho eni jio'ë'e.

<sup>22</sup> Röhu a i'ehu sisë ömo'i nimaruocho goro'i a'i aviëhi jië'oho sivoho gane. Bada dë vövöbajo'ohu uehorovoromo huhu ajëmijöro ua gavarue ariböviohu'ohu gemuoro hibe juvoromo mu mae vae'i God mae uehorovo'i a ioro'ioroho jasi dë vövöbajo'ëro rajëhi'i ë'ohu gane. Ëhi jië'e muoho nuninö bamone.

<sup>23</sup> Röhu nuni ramoramovë'ëro simano sisërëromo jö aho'ahamirovarue jöho nadi ejëhone. Ja'ohu iae gavanue. Ëhi jië'e jö aho'ahamirovë'iroho ëhuro iro muorovo'e vaejarueje.

<sup>24</sup> Röhu Badare mu vaejaje ahuro bogo iro muorovo'ohu vae'i a'i ae aho'ohu jabesi örيره huë baejëvonövo'ë'e. Ma-taemorovoromo jöho avoho röjëhinövo'ë'e.

<sup>25</sup> Ae göehu hesi jö ahë'iroho huro sanu'e jögoroho juvö'ö majëhinövo'ë'e. Juvö'ö majëhijë'oho hesi nani'ohu nani God-ro jabesi simanohu huotövë'ohu jabumë uehoro sisëho vuonugo'i jö maho avoho ga'ë'ö.

<sup>26</sup> Urimë'i ëhi jië'e ariböviohuro Satan-are guare rireromo va'oromo Satan-hu nimaje muohemu vaenövareje. Röhu jabumë jö ma avoho gavë'ohuro ëhuro avo'avoho uehorovoromo Satan-are guare jëvajokho suorovoromo maro va'ë'ö.

### 3

*Maja viture sisë ariböviehu huë vavaeni barue'iröhoho ëhi jië'e aribövi Timothy-hu gorëvo'iröhe jöhoje.*

<sup>1</sup> Röhu ave jöhu'ohu avo'avoho uehorovone. Sa'a bövi bise'ohu barë'iröhe majaho dunovë'iroho huë vavaene böröme rue'ë'e.

<sup>2</sup> Ëhesi bëhoho ae aho'obëhe jabesi sinohuremu rajahirovo'ë'ö. Bövie bise'e gö'ohu gö'ohu döre baebe va'i nimo'ë'ö. Jö huhe ë'oromo jöe gö gö ëma ato'ë'ö. Jabesi simanëro ëma uehorovoromo uvo'ë'ö: No a ioro'ioroho iosirëmiromo masijohu javuajëjo. Jö sisë ato'ë'ö. Vëmu vavu'ohu jabesi jöho aho'ë'ö. Suvuoro bojëmamu baejë'ohu huë ma jöho bogo uehorovo'i mabae'ë'ö. God-are mu maho ijumo'ë'ö.

<sup>3</sup> Jabesi aganohu bogo huë baejëvo'ë'ö. Nue huohu'ohu sanuëmë'ohu bogo e'ë'ö. Ae gö jabesi jö sisëho sarerëmiromo ato'ë'ö. Mue bövie bise'e nimaruocho ëma ömo'ë'ö. A umijaje ö sisëho va'ëne jëvo'ë'e. Mu maho bijönimo avoho'ë'ö.

<sup>4</sup> Aganohu sarerëmiromo sisë vaejëvo'ë'ö. Bogo avo'avoho uehorovë'e mu sisëho ëma vae'ë'ö. Simano bövie vaeromo uvo'ë'ö: No eni javuajëjo. God bogo nimo'irögoro sino sasohë'e nimorohë'e muohemu ëhemu nimo'ë'ö.

<sup>5</sup> Ma-döëremu God uehorovoromo hesi muoho vae'i uhohu God-are darugohu bogo herovarueje. Ëhi jië'e aribövioho gorëvo'iranego uave.

<sup>6</sup> Ëhesi bëhoho ëhi jië'e aribövi ioro'iorohuro sarerisareriëmiromo sanuëmibe osare osare va'oromo nu gö gö uehorovarue magonahoho

sarerëmijego jabesinö va'arueje. Ëhesi bëhoho ë magonahoho mu sisë vaebe rovë'ëro ëhu'ëro dë juhuoninëgajeje. Dë juhuoninëgego mue gö gö nimarueje.

<sup>7</sup> Mue gö gö nimoromo majae ëhi jöe gö gö hebe va'arueje röhu jö ma bae'iröhoho bogo eni jëvo hesije. Ëhi jië'e magonaho ömo'ömoho sarerëmijarueje.

<sup>8</sup> Sarerëmiromo God-are jö maho aharueje. Urimë'i a ihe Jannes'o Jambres'o Moses-are jö aharëhi ë sareri'e ariböviohuro ëhi God-are jö maho aharueje. Jabesi simanoho sisërëjëvë'ëro uehoroho bogojëve. God mae uehorovaroho rirerömëvë'eje.

<sup>9</sup> Röhu ë aribövi jabesi muoho bogo marë'i urimë'i Jannes'o Jambres'o jabesi mu simano rumo'e jiamu aehu gavarëhi ëhi ae aho'obëhe garuomö'ë'e ë aribövi jabesi muohu'o simano rumo'e jië'e jio'iramu.

*Paul-hu hesi majae barë'ia'amu Timothy jögoru börömo bojamade jöhoje.*

<sup>10</sup> Röhu ja bogo ëhi jië'e aho jave. Na diehi diehi röjëhibe rovodoho iae ja gavë'e jave. Na diehi hibe rovode öroho iae ja gavë'e jave. Bëhoho rabëni mu vaebe rovodoho iae ja gavë'e jave. Na God diehi mae uehorovobe rovodoho iae ja gavë'e jave. Naehu bogo nu huodëgo'i ma-sanuovoromo mu vaebe rovodoho iae ja gavë'e jave. Naehu a nasi dë vövöbajo'ere uehorovëvobe rovodoho iae ja gavë'e jave. Naehu dë vövöbajo'o bogo u'uhö'i ma-biririvobe rovodoho iae ja gavë'e jave.

<sup>11</sup> Aehu sisë vaejevo'i arijamu huë vavaene gö gö rue'i hijamu Antioch amore Iconium amore Lystra amore sisë vaejevo'i arijamu huë vavaeni diehi baebe rovodoho iae ja gavë'e jave. Ëhi jië'e huë vavaenoho baejamu röhu God-ro ajemamu mae jevobe rovadeje.

<sup>12</sup> Röhu na bogo gemuoho huë vavaenoho bae'i ae rahu Iesu Keriso'o gemuore bimuvoromo God-are jöhemu ejahobe va'i nëgë'ohö a ioro'iorohuro ëho garomo bijönimoromo jabesi örire sisë vaejëvo'i ari'iramu huë vavaene baenövo'ë'ö.

<sup>13</sup> Aribövi mahuro huë vavaene bae'i röhu sisë ariböviohu'o sareri'e jö majëhijarue ariböviohu'o avevejö'e mu sisë vaejaruoho jaburo ijönö gö'o döre sisë börömo mae vaebe va'ë'ö. Sisë vaebe va'oromo ae gö sarerëminövo'ë'ö o jabu'o ae gö jabesi sareri'e jöho heromo mae höromo ejëhonövo'ë'ö.

<sup>14</sup> Jabumë ëhi sisërëjëvo'ë'e. A'i jero heromo biririvoromo mae uehorovane jöhuremu ma'eno titimoromo uehorovobe va'one. Ëhesi bëhoho ë jö röjahijare aribövioho ja iae gövuanueje.

<sup>15</sup> Iae ja'o gavanue ja bise'o javade majare jero aevoromo God-are surire jöho hebe rovaneje. Ësurire jö gavë'ohuro ëhuro jasi simanoho ajivavo'iramu garomo uvo'a'anue: Naro ëhi'oromo Iesu Keriso mae uehorovoromo ëhuro bogo sisëroho va'i maro va'ejöjo.

<sup>16</sup> Röhu God-are surire jöho aho'obëhe ëho God-hu bojëmamu jajivare jöhoje. Ëjö adahë'ohuro ëhuro God-hu nimego noehu vaejarue muoho marëjajeje. Ëhuro God-are muoho huruoho majëhijarueje. Mu sisëho aharueje. Juvö'ö majëhijarueje. Mu ma hesi öroho röjëhijarueje.

<sup>17</sup> Noehu God-are surire jö adahoromo ëhi jië'e mu vaejë'ohö ëhuro God-are aribövioho no uehoro mae darugo mae bövie bise'e eni javuë'ëro ëhu'ëro mu mae aho'o vaejë'ohö eni javuo'ë'e.

## 4

<sup>1</sup> Röhu God-are nunire Iesu Keriso-are nunire jögore bogo bise'lo vadu'oho majahi'ejo. Uvone: Iesu Kerisoro sa'are raromarue ariböviohu'o vuovavuë'e ariböviohu'o no aho'obëhe göromo mevavuo'ajëjo. Huro nosi nunire rueromo böröme namiromo aho'obëhe muebejavuo'ajëjo. Ëjöho uehorovoromo uvone: Paul-hu Iesu Keriso-are nunire jögoru majehi'ie'ajoho böröme hö uvoromo avoho ejehone.

<sup>2</sup> God-are jöho darugo'o majëhine. Ae nimë'oho o bogo nimë'oho biririvoromo majëhine. Jöe majëhijego avoho uehorovoruomo'iro. Mu sisë vaejë'oho ahëvone. Darugo'e jö maho majëhijego heromo biririvoromo mu ma-maemu vaeruomo'iro. Nadi u'uho'i biririvoromo jöho röjëhinövone.

<sup>3</sup> Ëhesi bëhoho rabëni. Majae ijönöho aëro God-are jö maho bijönimoruomo'ë'e. Jö maho bijönimo'i sareri sareri'e jöe gö gö he'i hia'e avohoruomo'ë'e. Hia'e avohoromo ëhuni sareri sareri'e ae gö gö sö rueruomo'ë'e ëhuro he'i nimarue jö bëhoho röjëhijego heruomoröhëro.

<sup>4</sup> Ëhi jië'e aribövioho sö rueromo jö maho vuonugo'i sareri'e jöhuremu uehorovoruomo'ë'e.

<sup>5</sup> A'i jero rabe rabe rovë'iroho avo'avoho uehorovonövone. Huë vavaene rovë'oho nadi u'uho'i biririvone. Keriso-are jö maho majëhinövone. Ëmuoho ma'enone. Jasi muoho aho'obëhe avoho ma'eno titimone.

<sup>6</sup> Ëhesi bëhoho nasi majaho barë'irögoro ë'e. Jew rajehu God rajahiromo jovo otehoromo God bojamijaruëhi ëhi nasi sino haho'oho God-are örire suvuore bojamiromo guomo'ie'e. Majae dunovo'iramu na ave sa'aho vuonugo'ejo.

<sup>7</sup> Mu ma baejodoho naro nasi uehoroho darugoho aho'o bojamiromo biririvoromo vaejë'ëro ëhu'ëro ruahö'öromo vae barëjë'e jeve. Noehu mae uehorovarue jöho ma'enë'e jeve.

<sup>8</sup> Ëhu'ëro avevejö'e mu mae vaeromo ruahö'öjode hesi suvuoroho ö'idöre nugehë'eje. Badare majaho rue'iramu huro no avoho mevavuoromo gövuajëro jië'ëro ë suvuoroho bojemi'ë'e. Röhu bogo na gemuoho bojemi'i a'i ae rahu hu rovego ga'i nimarue ariböviohu'o ëhi jië'e suvuoroho bojemi'ë'e.

*Paul-hu hesi jö bise'lo bise'lo jajivade jöhoje.*

<sup>9</sup> Röhu ma-burëro nasi öroro rue'i ë'o gane

<sup>10</sup> rabëni hesi bëhoho Demas-ro sa'are muohemu nimoromo na remo'i Thessalonica amore va'irögoro Crescens-ro Galatia sa'are va'irögoro Titus-ro Dalmatia sa'are va'ë'e jiaje.

<sup>11</sup> Luke-ro gemuëro bogo va'ë'ëro huro rueromo gevajeje. O Mark mae ajamuijaje ae jiaje ëhuni hu'irae rovego huro muoho ajemi'iro.

<sup>12</sup> Röhu naro Tychicus nugö'öjamu Ephesus amore va'adeje.

<sup>13</sup> Röhu urimë'i na Troas amore hijodevare nasi runoni niögoho Carpus-are osare nugo rovë'e jeve. Ëhuni ja rovë'iroho baejeho ruene. O biriri'e suri suriohemu uehorovo avohoromo ujuoheho ruene suri suri ioro'iorohu'o ëhu'o.

<sup>14</sup> Röhu copper inömo avoho'amaje ae Alexander-ro nasi örire mu sisë bëhe vaejevadeje. Ëhuni hu sisë vaejevadëhi Badaro i'ue ëhi mana bojami'ë'e.

<sup>15</sup> Röhu jero gavë'i muoho vaene. Iahuro ja'lo sisë vaejavo'ë'e. Ëhesi bëhoho huro nosi jöho aho avohë'ego uave.



<sup>16</sup> Röhu urimë'i na court vaejevarevaroho aho bogo na'oho riravoromo nasi jöho ajemiromo majëhijareje. Ae aho'obëhe na vuororemijareje. Ëhi jîë'e muoho sisëgo na nege God-ro jabesi sisëho uehorovoromo vuonugojöro.

<sup>17</sup> Ae aho'obëhe vuororemi'i a'i Badaro na'o namiromo biriroho boje-madeje ëhuro naro hesi muoho vae barëromo hesi jöho majëhijego sa'a ioro'ioro raje ae aho'obëhe heruomoröhego. Ëhi'oromo na vörö'e mi hesi jö'ore jevanovamu Badaro ajemiromo baejevamu ëhuro sisëho bogo birohodeje.

<sup>18</sup> Na sisë'i jevamu Badahu baejevadëhi na sisë birohevobe va'ë'oho huro ëhi baejevoromo avoho muebejevonövo'ë'e ëhuro naro ö'idöre va'oromo huhu böröme namiromo muebejavuaje öri ari'ere ë hi'irodego. Hesi ihoho ma-mae jiemu jiobe va'ë'e. Iae mae.

*Paul o Christian ae gö gö jabuhu Timothy'o a ioro'iorohu'o jejëmijare jöhoje.*

<sup>19</sup> Röhu Prisca'o Aquila'o jejëmiromo Onesiphorus-are aganohu'o jejëmijode höne.

<sup>20</sup> Röhu Erastus Corinth amore hijadoho iae ëhi hije. O Trophimus guomo guome baejamu Miletus amore nugo rovodeje.

<sup>21</sup> Ëhuni jero ma-burëro ruene. Buru börömo majaho rueromo ja rue'irane öroho tarijööni uave.

Eubulus Pudens Linus Claudia ö mueno'o ioro'ioroho ëho jaburo jasi örire jejamijö.

<sup>22</sup> Badaro jasi aru'ahohu'o jioromo jemë ae aho'obëhe huë baeromo ajëminövë'e. Ahia mino'e.

## TITUS

### *Paul-hu Titus jejamade jöhoje.*

<sup>1</sup> O asë'e Titus Paul naro ave jöho jasi örire jajive. Na God-are mu vaejaje ae jevoromo Iesu Keriso-are apostle jeve.

Ëhesi bëhoho God-hu baejövade aho magonahoho naro ajëmijajeje jaburo God mae uehorovobe hesi jö maho garomo ejahobe va'iröhego.

<sup>2</sup> Ejahobe va'oromo muebejë'i uvoruomoröhego: Ioro'ioremu maro raromo'ejarejo. Ëhi maro raromo'iröhego mami'e sa'a bövi bise'lo bogo bamade majare God-ro mae uvadeje: Iae ëhi jio'a'ajëjo God hu sareri'e jöho bogo jövajëro jië'ëro.

<sup>3</sup> Maro raromo'iröhe jöho ëhi uvë'ëro gavade majaho eni jiamu gagorovo huhu uvade jöho hesi aribövioho sama'e majëhijadeje jaburo ae majëhiröhego. Röhu ë jöho na'lo bojemiromo uevadeje: Naehu uvode ma raromo'irarije jöho ae majëhinëjo. God baejavuoromo manö bamavuaje ahuro ë muoho bojemijë'ëro ëhu'ëro hesi mu vaejaje ae jevoromo Iesu Keriso-are apostle jeve.

<sup>4</sup> Röhu naro Titus jasi örire jejamije. Naehu God uehorovajëhi ja'lo ëhi gemuoho uehorovanuëro javë'ëro ëhu'ëro ja nasi harihu mae jave.

Na nege God Vavuohu'lo Iesu Keriso manö bamavuaje ahuro ëho jaburo huë baeromo ajamijego maro hi'iranego.

### *Titus-hu Crete hiromo mu vaeröhe jöhoje.*

<sup>5</sup> Röhu Crete sa'are naehu ja ramoromo rovode hesi bëhoho ëhuro Keriso-are ekaresia jabesi mue rabe rabe bogo eni jëvajokho jero avohëhego mae jio'amoröhego. O naehu uavodëhi ekaresia muebe'amo'iröhe a duvahoho jero amore amore ëhi bahibe juvo'iranego.

<sup>6</sup> Ekaresia muebe'amo'iröhe a duvahoho ëhi jio'amo'iro. Ëhi jië'e a duvaho hesi ihoho ma-maemu jio'iro. Hu magonahe ma-gemu masu'iro. Hesi aboji harihu'ohuro nadi hia'e biriri'övoromo aruëre anumëre ëma jijihio'iro. Ëhioho bogojio'i a'i ma-mae uehorovarue aribövie jëvo'iro.

<sup>7</sup> Iae ekaresia muebejaje aho bogo a muoho a'i God-are muoho muebejaje jiaje ëhuni hesi ihoho ma-mae jio'iro. Nadi jö giagia'e aho nadi burëro vörönimaje aho nadi vörö'e jovo iromo simano sisërëjë'e aho nadi vörö ë'aje aho nadi moniemu uehorovaje aho jio'iro.

<sup>8</sup> A'i osare søjëvo va'oromo nihudëgaje mu maemu nimaje taemorovaje jögore baeromo mueberovaje God avoho uehorovaje gororovaje ëhi jië'e ae jio'iro.

<sup>9</sup> Noehu majëhibe rovere ëhi jië'e jö maho biririvoromo mae uehorovo'iro ëhuro eni jioromo jö mae avoho röjëhiromo mu ma vaeruomaje a jabesi uehoroho birire bojëmi'i o göho jö aho'ahovarue aribövi jabesi uehoroho huotovëho'iröhe.

<sup>10</sup> Jö aho'ahovarue aribövioho aho'oje. Jöho bogo e'i bëhi rumo'e sareri'e jöho röjëhijarueje. A ioro'iorohu'lo röhu Jew rajo Christian aribövioho jaburo ëhi ë'arueje.

<sup>11</sup> Ëaribövi jabesi jöho ahëhore. Ëhesi bëhoho jabumë sisë uehorovë'i moniemu nimoromo jabesi sareri'e jöho röjëhijego agane gö gö uvarueje: Nani mae höromo rireromarueje.

<sup>12</sup> Jabesi Crete sa'a rajo jö majëhijaje a böröme gemuëro uvadeje: Crete rajoho sareri'e muoho javuobe vörö'e mi va'ëne javuobe mu bijöni'e iemu mahëro ue'ahanovobe rovë'e javuajëjo.

<sup>13</sup> Huhu uvade jöho iae maeje. Ëhi jië'e jiaje ëhuni jöho darugo'o majëhijego jaburo Keriso-are jöhemu avoho uehorovo'i

<sup>14</sup> a'i Jew rajehu jabesi uehoro jö ëma sarerëmiromo majëhijaruoho vuonugo'i. O aehu öri ma bijönimoromo jöe gö ëma bojëmijarue jö mae uehorovaruoho vuonugo'iro.

<sup>15</sup> Ae rahu dë vövöbajo'e ma-maemu jië'o'oho garomo uvarueje: Inöme aho'o sisë sisë bogojio'i ma-maemu jio'amajëjo. O ae rahu dë vövöbajo'o sisë jioromo Keriso bogo ma uehorovë'o'oho ëma uvarueje: Bövioho bise'o'oho sisë jio'amajëjo. Röhu jabesi uehorohu'o dë vövöbajo'ohu'o sisërëjävë'eje.

<sup>16</sup> Jö'ëro uëvarueje: No God gavarue höjo. Röhu mu sisëmu vaejaruohuro ëhuro röjahirovego no gavarueje jabuhu ëhi atarue jöho sarere jiego. Jabumë sisë bëhe jioruome. Jöho bogo eruome. Mu maho bogo vae hesi jioruome.

## 2

*Ekaresiaehu God-are jö avoho uehorovoromo mu avoho vae'iröhego Titus-hu röjëhi'iröhe jöhoje.*

<sup>1</sup> Jabumë ëhi jië'e mu sisë vaejarueje röhu jero God-are jö ma jiaje ëhi jië'e muohemu röjëhijego jasi ariböviohuro ëhi vae'iro.

<sup>2</sup> Ama'i mavojoho uëne: Jemesi simanoho sasohoromo mu maemu uehorovoromo taemo raromörene. God avoho uehorovoromo ae avoho huë baejëvoromo avoho biririvörene. A mavojoho ëhi uëne.

<sup>3</sup> O magonaho mavojoho ëhi jië'e jöe gemuoho majëhiromo uëne: God gemu uehorovobe jijihonövorëne. Ae gö jabesi jö sisëho nadi atemu atorëne. Nadi vörö'e jovohemu iemu irëne. Mu maemu röjëhijego magonaho i'oho he'irarëne.

<sup>4</sup> Magonaho mavojoho ëhi uëne. Jaburo mu mae röjëhijego magonaho i'ohuro heromo baruohu'o asisö'ohu'o rajëhi'iro.

<sup>5</sup> Taemo raromo'iro. Aho bogo sihëvo'iro. Amoho avoho muebe'iro. Baru jabesi jöho ejëho'iro. Christian magonaho i'ohuro ëhi ë'iramu gëgorovo aho God-are jöho bogo agoruomo'ë'e.

<sup>6</sup> O a i'oho ëhi jië'e jöe gemuoho majëhine. Uënego ma-taemo raromo'iro.

<sup>7</sup> Röhu jero mu maemu vaejago ae aho'obëhe ja garomo uehorovoromo uvoruomo'iro: Ë'ego no'o ëhi jië'e muoho vae'irarëjo. Nadi uehore gö gö bae'i ma-taemo hiromo jöho röjëhine.

<sup>8</sup> Jö maemu jövonego aho jasi jöho heromo bogo sisë'ioho atoruomo'iro. Ëhi jië'o'oho nosi jö bijönimoruomaje ariböviohuro Christian aribövi nosi jö sisë ato'iröhoho bogo eni jëvo'iramu javoje baeromo ma-raromo'ë'ö.

<sup>9</sup> O ae gö jabesi muemu vaejëharue aribövioho uëne: Jemesi a masijo jabesi jöho aho'obëhe ejëhego jaburo gëromo nimorohoirarëne. A masijo jabesi jöho nadi aho majëhirëne.

<sup>10</sup> Jabumë nadi vajiohuvodëgorëne. A'i mu maemu vaejago ae göëro gëromo uvoruomo'irajo: God-are jöho iae mae höjo. God no manö bamavuade a hesi jöho uave. Mu aribövioho ë jöho majëhine.

<sup>11</sup> Ëhi jië'e jögoru röjëhi'irane hesi bëhoho God-hu huë baejavuaje muoho ae aho'o nosi nunire rovë'eje ëhuro baejavuego maro va'iröhego.

12 Ĕmuoho rovë'ëro ëhuro God-ro røjahuijajeje noro God bogo uehorovarue muoho sinehu nimarue mu sisëho dejonö bu'ö'i ma-taemorovë'i mu mahuremu uehorovë'i God rajahijë'i ave sa'are raromo jijihojöro.

13 Ĕhi ë'lë'i muebejarueje ë nimoroho'iröhe maja rue'iröhire nosi A Böröme God no maro bamavuaje aho Iesu Kerisoro aji'o rovego ga'i.

14 Iesu Kerisoro nosi jöëni guomorovadeje sisëhu ruahö'öjavuadoho ahego noro maro raromoröhego. O nosi dë vövöbajo'oho u'ovahuego no hesi aribövi maemu jioromo mu maemu vae'i nimoröhego.

15 Ĕhi jië'e mu öroho røjëhinövone. Jögore mëmiromo mu sisëho ahonövone. Daruge baejë'e javaje jöho darugo'o majëhijego aho jasi jöho bogo mana aho majahi'i.

### 3

#### *Christian aribövi no diehi mu vae'iröhe jöhoje.*

1 Jasi ekaresiaho uëne: Jemesi sa'are simano vaeruomaje ariböviohu'o jemesi a masijo ioro'iorohu'o nadi biriri'övoromo juahëmi'i jabesi jöho ejëhorëne. Mu mae bövie bise'e ömo varijëne jiorëne.

2 Nadi ae gö jabesi ihoho ijumorëne. Nadi irovorëne. A'i ma-u'emu raromoromo a mahu'o a sisëhu'o jabesi örire ma-jö sanu'e majëhiromo huë baejëvonövorëne. Ĕhi uëne.

3 Ĕhesi bëhoho no'o uehore bogojië'e aribövie javuonövadeje. Jöe bogo e'i aruëre anumëre ëma jijihonövareje. Sinehu nimaje mue gö gö ëhuremu uehorovonövareje. A jabesi mu mahuni o böviëni bise'ëni dë vörönimoromo bijönaguonövadeje. Sisë javuo'ego aëro bijönaguonövareje. No'o göëro göho nue huodamirovonövareje.

4 A'i avevejö'oho God manö bamavuaje ahuro huë baeromo ajamuijamu no gavë'e javue.

5 Ajamuiromo baejavuoromo manö bamavuë'eje. Bogo noehu mu ma vaejarohunioho bogo ëhunioho ëhioho ë'i a'i huro noni vavaenimoromo ëhuni manö bamavuadeje. Ĕhesi öroho aviëhije. Huhu nosi sisë u'ovahuadohuro hesi Aru'ahuhu i'o baejavuadohuro ëhuro i'orëjavuadeje.

6 ĔAru'ahoho God-ro jovonö'e otehodaguadeje Iesu Keriso no mare bamavuaje a hesi ihore.

7 Hu ëhi ë'lade hesi bëhoho huro huë baeromo ajamuiromo nosi sisëho mu'uvahuë'ëro noro muebejë'i uvoröhego: No hesi aboji harihu'ëro javuë'ëro Vavu hesi bövioho bise'oho baeromo ëhuro ma-ioro'ioremu maro raromo'ëjarëjo.

8 Ĕjöho iae mae.

Na nege jero ë jöho darugo'o majëhijego ëhuro God uehorovoruomaje ariböviohuro ma-mu maemu avoho uehorovoromo vaeruomoröhego. Ĕhi jië'e mu vaejë'oho iae maeje. Ĕhuro ae aho'obëhe marëjëvo'ë'e.

9 A'i simano rumo'e jö berohemu beroharuoho bogave ejëho'irane. Hijo miono'o jabesi iho jöemu atemu ataruoho bogave ejëho'irane. O Jew rajo nosi jögöru hesi bëhohuni jö aho'ahamirovoromo irovaruoho bogave ejëho'irane. Ĕhi jië'e jöho ëho ma-jöeje. No ëho uehorovë'oho ëhuro bogo maho javuo'ë'e.

10-11 Ae göëhu jö sisë majëhiromo ekaresia adovëvaje ëhi jië'e aho jögore majahiromo bogo ejahamu gavë'oho röhu maho majahinövone. Bogo

ejahamu gavë'oho uvone: Ëhi jië'e a hesi simanoho sisë bëhe höne. Hesi sisëro jië'ëro i'ue bae'a'ajëne. Ëhi uvoromo ë a hesinö dejoho bu'öne.

*Ijo tugoho'i jöhoje.*

<sup>12</sup> Röhu naro Artemas o nani Tychicus jasi örire nugö'ö'ejo. Nugö'öjeko ö'ego evaro Titus jero ma-burëro Nicopolis amoro rueromo birohevone buru majare na Nicopolis hi'i uvë'e jevaje ëhuni.

<sup>13</sup> Zenas jögoru gavaje ahu'o Apollos'o avoho gëromo ie bövie bise'e ajëmijeko huë mae va'iro.

<sup>14</sup> Na nege nosi ekaresia ariböviohuro mu maho avo'avoho vaeromo bogo eni jëvë'e aribövioho ajëminövoröhego. Ajëmijë'ohuro ëhuro jabumë bogo ëma raromo'i i'o mu'e vaejarue aribövie jëvo'ë'e.

<sup>15</sup> Ave na'o raromarue aribövioho aho'obëhe jaburo Titus jasi örire jejamijö. O no'o gemuore Iesu mae uehorovarue aganoho naro jejëmijode höne.

God-ro jemë ae aho'obëhe huë baeromo ajëminövo'ë'e. Ahia mino'e.

## PHILEMON

*Paul-hu Philemon jejamijade jöhoje.*

<sup>1</sup> O asë'e Philemon nosi aemo'aeme no'o bimumoromo mu vaejanue aho na Iesu Keriso-are jöëni savoji gagore hijaje aho Paul na'o nosi öe Timothy'o noro niö'iro jasi örire jejamijö.

<sup>2</sup> O Apphia nosi ma'inoho o no'o gemu mae Satan'o muorovaje aho Archippus o Philemon jasi osare gagovarue ekaresia aribövioho ëhu'o jejemijö.

<sup>3</sup> Na nege God nosi Vavuohu'o Bada Iesu Keriso'o huë baeromo ajëmijego maro raromo'irarijego.

*Philemon-hu Iesu mae uehorovoromo God-are aribövi huë baejëvonövade jöhoje.*

<sup>4</sup> Philemon Paul naehu God-are örire jö jövë'iroho naro jasi jöhu'o jövoromo nasi God hesi örire huë mae uavajeje.

<sup>5</sup> Ehesi bëhoho naro hejajeje aëro jasi jöho atoromo uvoruomego: Jero God-are aribövioho aho'obëhe huë baejëvoromo Bada Iesuarë örire mae uehorovanue höjo. Ehi heromo ehuni God mae uaromo

<sup>6</sup> ëninamiromo uavajeje: God jero ajaminego Philemon no'o gemuore mae uehorovavajohuro ehuro hesi simanoho jiororovoromo Kerisohu bojamuijaje huë maho bövioho bise'oho ga avoho'irajo.

<sup>7</sup> Öho jaehu God-are aribövie aho'obëhe huë baejëvanohuro ehuro jabetesi dë vövöbajo'oho sanuovëhë'e jave. Ehuro na dë mae jevego nimoroho avohajeje.

*Onesimus Philemon'o hiromo ju'ebijë'ëro sionëro ö'ëgo Philemon-hu hesi sisë uehorovoromo vuonugoromo röhu maho baeröhe jöhoje.*

<sup>8</sup> Ja ehi jië'e huë baejë'e ae javë'ëgo ehuni ave jöho ua'ie'e. Na nego'ibejo na Keriso-are ihore darugo'e jöho bojamiromo ua'ibejo: Jasi muoho vaejëjo.

<sup>9</sup> Röhu bogo ehioho ë'ëjo. A'i ja huë baejë'e ae javë'ëgo ehuni naehu nimaje jöho ma-sanu'e majahi'ëjo. Paul na Iesu Keriso-are jö majëhijaje ae jevo'i aviavejö'e na hesi jöëni savoji gagore hijaje aëro jevë'ëro

<sup>10</sup> ehuni naehu huë baejaje harihu hesi jöëni naro jasi örire ave jöho uave. Naro savoji gagore hiromo ajamamu huro Keriso baejadeje. Ehuro hu nasi harihe jianove. Na Onesimus-are jöho uave.

<sup>11</sup> Onesimus-are iho hesi bëhoho ajamuijaje ahoje. Röhu hu urimo ja'o hiromo jasi muemu vaejahadevaroho evaroho jasi öriroho bogo avo'avoho ajaminövadeje. Röhu avevejö'oho Keriso baejë'ëro ja'o na'o ajamuijaje aeje.

<sup>12</sup> Iae na nugö'ö'irögoro ë'e vuonorö'ö ö'oromo jasi muemu vaejaho'iröhego. Röhu hu ö'iramu nasi dë vövöbajo'e aho'o hu'o jio'ë'e.

<sup>13</sup> Naro Onesimus ma'eno'ibejo ehuro iae na mae jevo'ibejo. Keriso-are jö ma hesi jöëni na savoji gagore hijego Onesimus-ro na'o gemu mae hiromo ja'o röromo ajemi'iröhego ehuni ma'eno'ibejodoho röhu bogo ma'eno'ëjo.

<sup>14</sup> Ja bogo uevë'e naehu Onesimus ëma ma'enë'oho na bijönege hu jasi muemu vaejahaje aego. Ehesi bëhoho Onesimus-ro ja'o röromo ajemi'iröhego naremuëremu nimoromo hu ma'enë'oho sisë jio'i a'i jaehu nimoromo Onesimus-hu na ajemijöro uavë'oho iae maeje. Röhu jasi jöho bogo baejë'ëro jevë'ëro ehuni na bogo ma'eno'i jani nugö'ö'ëjo.

<sup>15</sup> Onesimus ja'oho bogo hi'i dirö'lo göro majae ma-bisemu hijadeje. Ëhesi bëhoho nani hu vuonorö'ö ö'ego jero ma-ioro'ioremu bae'iranego.

<sup>16</sup> Avevejö'oho hu bogo ma-jasi muemu vaejahaje aho jio'i a'i jasi huë baejanue ö maeje. Iae na hesi örire börömo bëhe uehorovajeje. Röhu jero na iosiremiromo börömo mae hu uehorovo avoho'anue ë hesi bëhoho hu jasi mu vaejahaje ae jioromo ja'o hu'o Badare ae gemuoho jëvë'ego.

<sup>17</sup> Ëhuni jaehu uvë'oho: Paul Philemon na'o havaje ae hö uvë'oho ëhuro jaehu na rajehiromo baejevo'ibejanëhi Onesimus ö'ego ëhi rajahiromo baene.

<sup>18</sup> Huhu mami'e mu sisë vaejavadoho o jasi mae sisë'e bojami'iröhoho bogo bojamijadoho uevego naro hu'o röromo jasi örire mana bojami'iro.

<sup>19</sup> Paul naro ave jöho nasi övëro jajivoromo uave: Iae naro manaho bojami'ejöjo. Röhu jaehu mana ajemi'irane jöho na bogo ua'ejo. Ëhesi bëhoho naro ja ajamijamu jero Keriso baejë'ëro ëhu'ëro bogo sisëroho va'i maro va'o hesi jave. Röhu ë jöho bogo ua'ejo.

<sup>20</sup> Io'o öho naehu nimaje jöho Badare jöëni ejehego mae jevo'i. Ejehoromo ëhuro Keriso-are ihoro nasi dë vövöbajo'oho sanuovehone.

<sup>21</sup> Röhu na uehorovoromo uve: Naehu nimaje jöho ejeho'anuëromo ave surire jöho jajive. Iae na garomo uve: Naehu uavaje jöho jero eromo röhu gö'o döre vae avoho'anuejo.

<sup>22</sup> Röhu naehu hi'irode röhohu'o avohehone. Ëhesi bëhoho na uehorovoromo uve: Jemëhu nasi jöëni ëninamijarujohuro ëhuro God-ro ajemi'iramu na savoji gagore jioromo höröromo jemesi örire ö'ejöjo.

*Christian ae göehu göehu Philemon jejamijare jöhoje.*

<sup>23</sup> Röhu Iesu Keriso-are jöëni na'o savoji gagore hijaje aho Epaphras-ro jasi örire jejamije.

<sup>24</sup> O Mark Aristarchus Demas Luke ëhi na'o gemu mae Keriso-are mu vaejarue aribövioho jabu'o jasi örire jejamijö.

<sup>25</sup> Bada Iesu Kerisoro jemesi aru'ahohu'o jioromo huë baeromo ajëminövo'ë'e. Ahia mino'e.

## HEBREWS

*God-hu uavamu hesi Harihehu jö majahuijade jöhoje.*

<sup>1</sup> Urimoho God-ro mue gö gö majae göro göro vaebe rueromo ehuro hesi jöho röjëhi'ego jö hesirire baeromo majëhinövare ariböviohuro baeromo nosi hijo miono'oho majëhinövareje.

<sup>2</sup> Ehi'obe rovadoho avevejö'e ijo tugoho'i jioröhe majaho dunovamu God-ro uavamu hesi Harihohuro jöho majahuijê'eje. E'Harihoho God-ro uavê'ëro sa'ae bövie bise'e bamadoho ëho ijönö hesi bae barê'iröhohoje.

<sup>3</sup> Iae hu God-are aji maho baeromo ehuro no ajivavuajeje. God jiajêhi hu ehije. Hesi darugo'e jöho jövoromo ehuro sa'aho bövioho bise'oho aho'o ma'eno titimajeje. Huro nosi sisëho u'ovahuonugoromo dö mare ajiomoromo God börömo jiaje a hesi övo manö hijadeje.

<sup>4</sup> Ehu'ëro jiê'ëro anerae aho'obêhe iosirëmiromu huro dö mare hijajeje. Göho hu God-are Harihëro jiê'ëro hu iho bövi maho baejamu hesi ihohuro anera jabesiroho iosirëmijê'eje.

*God-are Harihehu anera ömo'ömo iosirëmijaje jöhoje.*

<sup>5</sup> God-are Harihehu anera jabesi iho iosirëmiromu iho börömo baejade jöho God-are surire jajivadoho gavarueje. God-ro anerae bogo gemu vadu'oho ave jöho ua'i ma-hesi Harihoho gemu uavadeje:

Ja nasi Harihoho javajêjo.

Jaruvoho naro ja baejavê'e jevajêjo.

O God anerae bogo gemu vadu'o hesi jöho jövoromo ae uê'i ma-hesi Harihu hesi jöhemu uêvadeje:

Na hesi Vavuoho jevo'i

hu nasi Harihoho jio'a'ajêjo.

<sup>6</sup> Jö göho God-hu hesi Harihu Muri sa'are nugö'öjadevare evare uvadeje:

Na negajêjo God nasi aneraho aho'obêhe jaburo ë aho gemu rajahiruomoröhego.

<sup>7</sup> O anera bogo iho masijo jio'amaje jöho huro uvê'eje:

God naro nasi aneraho avohëvego bururae'amaje höjo.

Nasi mu ajemijarue aru'ahoho avohëvego vëni hödurae'amaje höjo.

<sup>8</sup> Anera jabesi jöho ëhi uvo'i Harihu hesi jöho ëhi uvê'eje:

God ja böröme namijanuoho ëhi namiemu namibe va'a'anuêjo.

Böröme namiromu jero jasi öri ari'oho avoho muebejanue höjo.

<sup>9</sup> Ja mu maho nimo'i mu sisëho bijönimanue höjo.

Ehuni God jasi A Börömoho naro ja baejavoromo huë mabêhe bojamijamu

jero jasi aribövioho iosirëmijê'ëro ja börömoho javajêjo.

<sup>10</sup> Röhu God-are Harihu hesi örire jö göho ëhi uvê'eje:

Bada ni'i'ivadiroho jero sa'aho bamane höjo.

Ö'idöhu'o jasi övëro avohane höjo.

<sup>11</sup> Sa'ahu'o ö'idöhu'o barê'i a'i jero biririvoromo hiemu hi'a'anuêjo.

Sa'ahu'o ö'idöhu'o niögëro buraerovanovo'ajêjo.

<sup>12</sup> Aehu niögu suhi'o muotoho bahijaruëhi ëhi ö'idöho sa'aho rori'ohu bahi'anuêjo.

Aehu niögu jijö boremi'ö'i i'o io'amaruëhi ö'idö mamioho sa'a mamioho ëhi mu'u'i i'e avoho'anuêjo.

A'i ja vadune manaere aho'o ëhi ma-jiemu jiobe va'a'anuêjo.



<sup>13</sup> God-ro anerae bogo gemu vadu'oho ua'i ma-hesi Harihohemu uavadeje: Nasi övo manö ro hijego ja'o muorovarue aribövioho naro ruahö'öjëvego hörëro vijuvo taemo'amo'irane höjo.

<sup>14</sup> Harihoho ëhi böröme jio'i a'i anerae aho'o jabumë ma-God-are mu vae-jaharue aru'ahe jio'ame. Ëhi jio'amë'ëro God-ro rëmö'öjego jaburo rueromo God-hu ijönö mare ramuo'iröhe aribövioho no ajamuijarueje. Ëhu'ëro jië'ëro God-are Harihohuro aneraho iosirëmiromo hu börömo mahoje.

## 2

*God-hu baejavuoromo mare ramuaje jö noehu avoho uehorovo'iröhe jöhoje.*

<sup>1</sup> God-are Harihohuro aneraho iosirëmiromo hu böröme jië'ego ëhuni noehu God-are jö hejaroho bogo rumonimo'i biririvoromo ma'eno'ejo jöho nugo'i öre gö va'ojöëni.

<sup>2</sup> Urimoho aneraëro Jew rajo hijo miono'oho God-are jöho bojëmareje. Ëaneraho bogo masijehu jëvadeje röhu jabesi jöho bogo sareri'ehu jio'i iae mae jiadeje. Iae mae jië'ëro ae rahu jö bogo ejëho'i mu gö gö vaejë'oho i'ue mana baenövareje.

<sup>3</sup> A'i jaruvoho God-hu nosi aru'aho mare ramuaje jö bojamuijadoho ëho jö börömeje. Ae rahu ë jö vuonugë'oho i'ue baejöëni gororomo huruomoromo dinö'e va'ejo. Huruomo'iröhe öroho bogoje. Ëhesi bëhoho bogo aneraho uö'i Badaro aevoromo hesi jö'ëro majahuijamu jö hejare aribövioho jaburo ë jöe gemuoho majahuiromo uövuareje: Iae mae-ëjo.

<sup>4</sup> Röhu bogo jabesi sivuoho ëma majahui'i a'i God-ro jabesi jöho ajëmiromo bogo gavarue darugo'e mue gö gö vaenövadeje noro garomo jöho mae uehorovoröhego. Darugo'e muoho vaeromo huhu nimadëhi hesi Aru'ahoho ua'ego noehu mu mae vaeröhe suvuore gö gö ëhi bojamuinövadeje noro ëhu'o garomo jöho mae uehorovoröhego.

*Iesu hu baejavuoromo manö ramuade a böröme jiaje jöhoje.*

<sup>5</sup> Röhu ëhi jië'e mu masijoho ëho u'emu jioröhe öri ari'o i'o hesi muohoje. Na ë hesi jöho jajive. God-ro ë öri ari'o i'o bamo'i uehorovadevaroho bogo uvadeje: Aneraëro masije riravoromo ë öri ari'oho mueberuomo'ajëjo.

<sup>6</sup> Bogo aneraho jaburo mueberöhego uvo'i a'i jöe gö God-are surire uvë'eje:

God-ajo. Sa'are aribövioho ma-bise'e javuajëjo.

Röhu jero nosi jöëni uehorovanue höjo.

Nosi ihoho bogojavuanovajëjo.

Röhu jero no muebejavuanue höjo.

<sup>7</sup> Anera masijo jio'amaje jabesi bëhire sa'are aribövioho no bamavuane höjo. Ajohu'o iho mabëhohu'o bojamuane höjo.

<sup>8</sup> Noro hörëro taemoromo muebe'amoröhego bövie bise'e nosi hörü uhunö bahijahuane höjo.

Ëhi jajivë'eje. Bövi bise'o nosi hörü uhunö bahijade jö hesi bëhoho aho noro aho'obëhe ruahö'ö'amoromo muebe barë hesi javue. Röhu avevejö'oho bövioho bise'oho nosi hörü uhuroho bogojavuë'ëro ëhu'ëro aho no bogo aho'obëhe taemoromo muebe'amarueje. Ëhi jië'e muoho nosi nunoho bogo gavarueje u'emu garöhëro.

<sup>9</sup> A'i noro ae gemu Iesu iae gavö. Iesu hu döre jiadoho God-ro hesi nimoro huë baejavuoromo hu uavamu ruvebiromo anera jabesi bëhire hijadeje ae

aho'obëhe noni guomoröhego. Hiromo vavaene baeromo guomamu ehuni God-ro hu döro bamoromo ajohu'o iho mabëhohu'o bojamamu baejadeje. Eho iae no gavö.

<sup>10</sup> God-ro aboji harihu'e aho'obëhe aji'ere söjavuo ujuoho va'i nimamu ehuni baejavuoromo mare ramuo'iröhe a börömoho Iesu uavadeje huro vi'ehe baejöro ehuro mue aho'obëhe ruaho'amoromo eni romoromemu jiego no baejavuoromo maro ramuo'iröhego. God-hu bövi bise'o avohoromo muebe'amajohuni ehuni huhu Iesu ehi uavadoho mae jiadeje.

<sup>11</sup> Röhu nosi sisë u'ovahuaje aho Iesuoje. Sisë javuego u'ovahuaje aribövioho iae no javue. Röhu hesi Vavuohu'o nosi Vavuohu'o gemuohoje. Vavue gemuoho javuë'ëro Iesuro bogo javojimo'i ma-uvajeje: No ö mueno'e gemuoho javuajëjo.

<sup>12</sup> Iesuhu uvaje no ö mueno'e gemuoho javuajë uvaje jöho God-are surire jajivoromo ehi uvë'eje:

God jasi jöho naro majëhi'iramu nasi ö mueno'ohuro heruomo'ajëjo.

Naro jasi ariböviohu'o gemuore hiromo jasi örire rajahiromo jöho io'ejöjo.

<sup>13</sup> Röhu Iesu ae aho'o no'o gemuore jiaje jöho gö'o jajivoromo uvë'eje: Naro uvonövo'ejöjo: Hesi God-ro gemuëro ajemi'ajëjo. Röhu jöe gö'o uvë'eje: Na aviae jevajëjo. Na God-hu bojemade aboji harihu'ohu'o gemu mae hijajëjo. Iesu'o no'o gemu mae javuaje jöho ehi jajivë'eje.

<sup>14</sup> God-are aboji harihu'e javuajë uvadeje. Röhu aboji harihu'ohu no sino haho'e biroge köe javuë'ëro ehuni Kerisoro araeromo hu'o sino haho'e biroge köe ehi gemuoho baejadeje ehuro guomoröhëro. Guomego vuovo'iröhe öri hesi vörö baejaje aho Satan hesi darugoho mu'uvaho barë'iröhego.

<sup>15</sup> Satan-are darugoho mu'uvahago no vuovavuoröhe ë hesi juhuonoho barëjahuo'iröhego. Ehesi bëhoho urimë'i vuovavuo'iröhoho uehorovoromo juhuonivobe rovareje. Juhuoni juhuoni raromaroho diehi'oromo vuonugojöeni ehuni sisë'i raromareje. Ehi jië'e juhuonoho barëjahuo'iröhego ehuni guomadeje.

<sup>16</sup> Aveho iae mae. Iesuro bogo aneraho ajëmi'i a'i Abraham-are ujoho no ajamuijajeje.

<sup>17</sup> Ehu'ëro jië'ëro huro araeromo hesi ijoraje nomë va'ëne jiadeje. Eëre gemu jiadeje ehuro hu God-are muoho vaeromo priest böröme mabëhe jioröhëro. Ehi jië'e priest jioromo noni vavaenimoromo muoho avoho vaeromo a nosi sisëho u'ovahuoröhëro. Ehuni no va'ëne jiadeje.

<sup>18</sup> Sisëhuro Iesure dëre bijiohamu vavaene baejë'ëro ehü'ëro huro garöhe sisëhu nosi dëre bijioho gövuego huhu ajamui'iröhoho iae hu eni jie.

### 3

#### *Iesuhu Moses iosiramiromo böröme jiaje jöhoje.*

<sup>1</sup> Christian aganomë God-ro uëvadeje jemë'o hesinö jëvojöro. Ehuni Iesu uehorovo avohore. Iesuro God-are ihore jöe majahuijajeje. Hu nosi priest börömohoje. Ehu'ëro noro hu mae uehorovoromo hesi jöho huruoho majëhijarueje.

<sup>2</sup> Huro God-are örire muoho baeromo ë muoho avoho vaenövadeje. Urimë'i Moses-hu God-are mu avoho vaejahoromo God-are aribövie aho'o muebejëvonövadëhi Iesuro ehi gemuoho ë'adeje.

<sup>3</sup> Röhu Iesuro Moses iosiramiromo iho börömoho baejë'eje. Ehesi bëhoho Moses hu ma-God-are agane gemuoho jio'i Iesu hu God-are agano gagovade

aeje. Ĕaganoho gagovë'ëro ëhu'ëro Iesuare ihohuro Moses-are ihoho iosiramijë'eje.

<sup>4</sup> Agane gö gö bogo ëma jio'i aëro gagovoromo gemuoro nugo'amë'eje. Agano gagovoromo bövi bise'o avoho'amade aho God-je.

<sup>5</sup> Moses God-are mue vaejahaje aëro jië'ëro God-are agano ioro'iorohu'o hiromu hesi muoho avoho vaenövadeje. God-are muoho avoho vaeromo God-hu ijonö majahui'iröhe jö jiajëhi jië'e jöho huro urimo ae majëhinövadeje.

<sup>6</sup> A'i Keriso bogo ma-mu vaejahaje aehu jio'i hu God-are Harihe jiadeje. Hu God-are Harihëro jië'ëro God-are aganoho avoho muebe'amajeje. No'o God-are agane javue. God-hu maro ramuoröhe jöho bogo vuonugo'i birivoromo nimorohë'i uehorovobe va'ë'ohuro ëhuro no ëhi javue.

*God-are ariböviehu nuho'iröhe jöhoje.*

<sup>7</sup> Ĕhuni God-are Aru'aho hesi jöho avoho ejahore. Hesi surire jöho ëhi uvë'eje:

Ave jaruvore majaroho God-hu majëhijaje jö hejë'iroho

<sup>8</sup> nadi hia'oho biriri'övorëjo.

Jemesi hijo miono'ehu hia'i biriri'övoromo God na'o muorovarëhioho nadi ëhioho ë'orëjo.

Jabuhu a rumo'e sa'are raromoromo God nasi dë bijioho gavarehioho nadi ëhioho ömorëjo.

<sup>9</sup> Jemesi hijo miono'ohuro nasi mu masijo gabe rovaroho ëho bogo uehorovo'i nasi dë bijioho gebe rovaroho vadune 40 barëjade höjo.

<sup>10</sup> Ĕhuni God naro ë aribövi jabesi örire bijönimoromo uvode höjo:

Majae ëhi jabumë dë vövöbajo'ere sisë'i uehorovo'i nasi mu hesi öroho bogo avoho baerumë'e höjo.

<sup>11</sup> Ĕhi uvoromo naro dë vörönegamu jöe darugo'o jövoromo uvode höjo: Jabumë bogo na'oho ro raromoromo nuhoruomo'ajëjo. Bogo mae bogajo.

<sup>12</sup> Agonomë ëhi jajivë'e jiaje ëhuni gavë'i raromore. Jemë a ioro'iorohuro God bogo ma uehorovarue uehoro sisëho baeromo ëhuro darugo'e aho God vuonugo'aruje.

<sup>13</sup> A'i göëro göho jögore mamirovore. God-are surire mami'e adahare jöho uövü'eje: Ave jaruvore majaroho nadi hia'oho biriri'övorëjo. Ĕuövüade jaruvore majaho bogo barëjë'e jiaje evaro majae ëhi göëro göho jögore mamirovore ëhuro jemë a ioro'iorohuro sisëho garomo bogo simane huotorovoromo ëhioho hia'oho biriri'övo'irarije.

<sup>14</sup> Jögoru mamirovo'irarije hesi bëhoho noehu aevo'i birivoromo mae uehorovarëhi jië'e uehore gemuoho ma'eno titimobe va'öjuvo majae barëjamu bogo vuonugë'ohuro ëhuro no Keriso'o gemu mae javuajeje.

<sup>15</sup> God-are surire mami'e adahare jöho uövü'eje:

Ave jaruvore majaroho God-hu majëhijaje jö hejë'iroho

nadi hia'oho biriri'övorëjo.

Jemesi hijo miono'ehu hia'i biriri'övoromo God na'o muorovarëhioho nadi ëhioho ë'orëjo.

<sup>16</sup> Röhu rahumëro jöho heromo ri'öromo God'oho muorovareje. Moses-hu Egypt sa'are jioromo söjëvo rovade aribövioho ae aho'o jaburo huotorovoromo God'oho muorovareje.

<sup>17</sup> O God-ro rahumesi öriroho bijönimobe rovadoho vadune 40-ho barëjadeje. God-ro mu sisë vaeruomaje aribövioho bijönimadeje.

Ĕaribövioho sisë vaeruomël'ëro ëhu'ëro a rumo'e sa'are vuovo momorö'öbe va'oruomadeje.

<sup>18</sup> O God-ro jöe darugo'o uvadeje: Jabumë bogo na'oho ro raromoromo nuhoruomola'ajëjo. Bogo mae bogajo. Ĕho rahumesi jöho jövadeje. Jö bogo ejahare aribövi jabesi jöho jövadeje.

<sup>19</sup> Ĕhu'ëro jië'ëro no garomo uvö: Nosi hijo miono'ehu bogo ma uehorovarohuro ëhuro jabesi sa'are va'o nuho'iröhoho bogo eni jëvade höjo.

#### 4

<sup>1</sup> God-ro mae uövuë'eje noro va'oromo hu'o raromoromo nuhoröhego. Ĕhuhu uövuade jöho bogo barëjë'e jiaje ëhuni juhuonivoromo gavë'i raromore. Ijonö God-ro a ioro'ioro jemesi muoho garomo uvojjöeni: Rueromo na'o nuho'irarijoho jemë bogo eni jëvajë uvojjöeni uëve.

<sup>2</sup> No God-are jö maho hejë'e javue. Urimë'i a rumo'e sa'are jijihoruomade ë aribövioho jabu'o ë jö maho hejareje. Hejareje röhu bogo marëjëvadeje ë hesi bëhoho hejare jöho bogo ma uehorovë'ëro.

<sup>3</sup> A'i no Iesu mae uehorovarue ariböviohuro iae va'o God'o gemu mae raromoromo nuharueje. Ĕnuho'iröhe jö God-are surire adahare jöho ëhi uövuë'eje:

Naro dë vörönegamu jöe darugo'o jövoromo uvode höjo:

Jabumë bogo na'oho ro raromoromo nuhoruomola'ajëjo. Bogo mae bogajo. Ĕhi jajivë'eje röhu ë hesi urimo God-ro sa'ae bövie bise'e bamamu evare hesi muoho barëjë'ëro jaruvoho bogoje.

<sup>4</sup> God-hu mu barëjade jö God-are surire jajivaroho majae 6-ho barë'i 7 jiade jö jajivarire ë gavarueje. Ĕjöho ëhi uvë'eje: Majae aho'obëhe 6-ho barë'i röhu 7 jiamu gavë'i God-ro hesi muoho aho'obëhe vuonugo'i nuhade höjo.

<sup>5</sup> Röhu ave God-are surire jöhu'o jajivoromo uövuë'eje: Jabumë bogo na'oho ro raromoromo nuhoruomola'ajëjo. Bogo mae bogajo.

<sup>6</sup> Ĕhu'ëro jië'ëro urimë'i God-are jö ma heruomade ariböviohuro hesi jöho bogo ejahoromo ëhuro bogo va'o hu'o gemuoroho raromoromo nuhareje. O ae göehu göehu va'oromo God'o raromoromo nuho'iröhe jöho bogo barë'i iae ëhi gemuohoje.

<sup>7</sup> Ĕhuni God-ro majae gö bamoromo uvë'eje: Ave jaruvore majahajo. Ĕhesi bëhoho urimë'i hia'i biriri'övere aribövioho vuovëvadoho va'ojuvo majae ëgo'o barëjamu evare God-ro uavamu David-ro noehu adahare jöho jajivoromo uvadeje:

Ave jaruvore majaroho God-hu majëhijaje jö hejë'iroho nadi hia'oho biriri'övorëjo.

<sup>8</sup> Urimë'i Joshua-hu Israel aribövi jabesi sa'are söjëvo va'adevare ë ariböviohuro God'o raromoromo nuhoruomola'ibejo majae göre nuho'iröhe jöho God bogo bamo'ibejo. Röhu jabumë bogo God'oho raromoromo nuhareje.

<sup>9</sup> Bogo nuhë'ëro ëhu'ëro God-are ariböviehu nuho'iröhe jöho bogo barë'i iae ëhije. Urimë'i majae aho'obëhe 6-ho barë'i majae 7 jiamu God-hu aavoromo nuhade ëhi jië'e nuho majaho God-ro noni bamahuë'eje.

<sup>10</sup> Ĕhesi bëhoho God-hu hesi mu vuonugo'i nuhadëhi ae rahu va'o God'o raromoromo nuhë'oho i'u'e muoho ëhi vuonugo'i nuhoruomajeje.

<sup>11</sup> Ĕhuni no va'o God'o raromoromo nuho'iröhoho avoho vae ga'ejo ëhuro ë hijo miono'ehu God-are jö bijönimoromo sa'are rireromarëhioho no bogo ëhioho ë'iröhëro.

<sup>12</sup> God-are jöho darugo ma-ma'eje. Darugo ma-ma'ëro jië'ëro ë jöho kaejö va'ëneje. Hesi kaejö anio ruë jio vië jië'ohuro nosi dëre nure aho'obëhe ro bijioho gövuajeje. Röhu nosi kaejöho anio rumo'e jio'amo'i God-are kaejöho anio ma-ma'eje. Ëhuni no diehi diehi nosi uhure uehorovoromo nimiruho God-ro nosi dë vövöbajo'ere göromo hesi jöho ma-darugo'o ahorirëro majahuijajeje.

<sup>13</sup> Iae ae bövie bise'e God-hu bamavuadoho hesi nuniroho bogo gurihiro javuo'i a'i aho'obëhe God-hu gövuajoho ma-va'orahoro gemu javue. God nosi börömego noro hesi nunire riravoromo ua'ejo: Iae no ëhi ëhi vaej'e javuajëjo. Ëahuro no gö barëj'eje.

*Iesu hu priest börömo ma jiaje jöhoje.*

<sup>14</sup> Röhu no priest börömo maho javue. Huro ö'idöre God-hu jiaje mare ë ajiomadeje. Hesi ihoho Iesuoje. Hu God-are Hariheje. Ëhuni noro mae uehorovoromo huruho majëhijarue jöho ma'eno titimo'ejo.

<sup>15</sup> Nosi priest börömohuro gövuaje nosi uehoroho darugoho u'uhoromo mu sisë vae hesi javuego göromo hu bogo ma-nunëremuho gövuajeje. Nosi dëre mu sisëhu rabehu rabehu bijahuo'i hijajëhi sisëhuro nosi priest börömo hesi örire ëhi gemuoho vaejadeje. Ëhi gemuoho vaejamu bogo ejadeje.

<sup>16</sup> Ëhuni ë'ego no biririvoromo God-hu börömo namiromo hijajire ë va'oromo nosi jöho majahinövo'iro God-hu hesi nimoro ajamuijajohuni. Noehu va'oromo jö majahijë'oho huë vavaene baejavuo'iramu evare huro noni vavaenimoromo huë baejavuoromo ajamui'iramu mae javuo'ë'e.

## 5

<sup>1</sup> Ave sa'are raromarue priest masijo jabesi muoho aviëhije. Ae gemu ae aho'obëhe jabesirire jiego God-ro baeromo muro bamajeje huro God-are muoho ë aribövi jabesi jöëni vaeröhego. Muro bamë'ëro priest börömohuro ë aribövi jabesi jöëni muoho vaeromo mi suvuorohu'o suvuoro ioro'iorohu'o God-are örire bojamiijajeje huro jabesi sisëho uehorovoromo vuonugëhoröhego.

<sup>2</sup> Ave sa'are hijaje priest börömohuro garöhe ae gö simane garaejanovamu o öre sisë'i sisë'i jijihamu gëvë'oho uvo'ë'e: Priest-oho na'o u'uhevë'ëro ëhi jië'e mu sisëhuro baejevaje höromo jögoroho ma-u'emu avoho majëhi'ë'e.

<sup>3</sup> Ave sa'are priest börömoho u'uhë'ëro mu sisë vaejajeje. Mu sisë vaejajëro jië'ëro bogo a ioro'ioro jabesi sisënioho gemu a'i hesi sisëhuni mi suvuoroho God bojami'ë'e huro hesi sisëhu'o uehorovoromo vuonugahoröhego. Bogo bojamijë'oho sisëje.

<sup>4</sup> O aevoromo priest börömo mu vae'ië'iroho aho bogo sivuoho uehorovoromo döroho bamorovoromo priest börömo muoho bae'i a'i God-hu uavë'ohuro ëhuro priest muoho baejajeje. Priest börömo aevo'i jiade hesi ihoho Aaron God-hu uavamu priest mu baejadëhi God-hu uavë'ohuro priest muoho ëhi baejajeje.

<sup>5</sup> God-hu uavego priest mu baejaruëhi ëhi Kerisoro hu'o bogo hesi sivuoho uehorovoromo döroho bamorovoromo priest börömo muoho bae'i a'i God-ro priest muro bamoromo Keriso uavadeje:

Ja nasi Harihoho javajëjo.

Jaruvoho naro ja baejavë'e jevajëjo.

<sup>6</sup> O God-hu priest mu bojamide jö göho jajivoromo ëhi uvë'eje:

Melchizedek priest jiadëhi

ja ëhi priest jianuoho ëhi jiemu javo'ajëjo.

<sup>7</sup> Iae Iesuro ave sa'are hijadevare evare uvadeje: God ajemego bogo guomevo'iröhoho iae eni hö uvoromo darugo'o uvë'i nivë'i ëninamiromo ua gavadeje ajamijöro. Iesuro God-hu nimajoho ma-u'emu ejahonövä'ëro ëhuni God-ro hesi jöho ejahadeje.

<sup>8</sup> Hu God-are Harihe jiadeje röhu vilehe baeromo ëhuro God-are jö ejaho'iröhe öroho gavadeje.

<sup>9</sup> God ejaho'iröhe öroho ganugoromo eni romorome jiamu evare öroho jiovahuadeje ëhuro ae rahu hesi jö ejahë'o'ho ma-ioro'ioremu maro raro-moröhego.

<sup>10</sup> O God-ro jöe majahiromo Iesu uavadeje: Ja priest börömoho javajëjo. Melchizedek priest jiadëhi ja ëhi javanovajëjo.

*Noehu Iesu uehorovaruoho bogo vuonugo'iröhe jöhoje.*

<sup>11</sup> Melchizedek-are jöho aho'obëhe majëhi'irodoho jeve. Röhu jemesi simanoho i'u'eje. Na diehi diehi jöho röjëhi'ejo.

<sup>12</sup> Jemë Christian vaejarijoho majae ëgobövie baejë'e jëve. Ëhuni jemëro ae gö jö röjëhi'irarijoho eni jëvo'ibejo iae mae jio'ibejo. Röhu jöho bogo avoho baejë'ëro jemë nimarujeje God-are jö aevo'i röjëhijamu hejarijoho aëro röhu maho röjëhijöro. Jemë amure asisö'o'ho va'ëne jëvanove. Biriri'e i ma bogo ue'aharuje aribövie jëve.

<sup>13</sup> Amemu ue'ahë'e Christian aribövioho ma-asisö'o va'ënëro jëvë'ëro mu ma hesi jöho bogo ömo gavë'ejö.

<sup>14</sup> A'i biriri'e i maho hesi a ma'ëremu ue'ahoruomajeje. Ëhi jië'e Christian ariböviohuro mami'e muoho ömo garomo simanoho avoho uehorovobe rovë'ëro ëhu'ëro gavarueje di muoho mae jiego di muoho sisë jiego.

## 6

<sup>1</sup> Asisö'lehu uehorovaruëhi ëhi uehorovaruje jëvaje ëhuni ë'lego no Keriso-are jö samaho samaho urimo hejaroho bogo ëhemuoho uehorovo'i a'i hesi jöho i'e gö'o gö'o döre uehorovobe va'i ëhuro a duvahu uehorovaruëhi ëhi uehorovo'iröhe. Christian mu vae'iröhe jö aevoromo ae röjëhijaruoho bogo ëhemuoho jemesi öriroho röjëhi'i ari'ejo. Mu sisë vaeromo sisërëjaruoho vuonugo'iröhe jö hesi bëhoho God ma uehorovarue jö hesi bëhoho

<sup>2</sup> sisë jovehu u'ovarue jö hesi bëhoho övo simano taemarue jö hesi bëhoho ijonö vuovoromo ri'ö'iröhe jö hesi bëhoho mana mae o sisë God-aro ioro'ioremu bae'iröhe jö hesi bëhoho ëhi jië'e jö urimo röjëhijaruoho bogo ë jöe gemuohemu röjëhi'i ari'ejo.

<sup>3</sup> A'i God-hu nimë'o'ho jö i'e gö gö uehorovobe va'ejo a duvaho va'ëne javuojöro.

<sup>4</sup> O aehu urimo God-are nuni aji'e jö baeromo ö'idö hesi suvuro garomo God-are Aru'aho no'o gemu mae baeromo

<sup>5</sup> hesi jö ma heromo vuëvëvamu ijonö bae'iröhe darugoho gö avevejö'e baebe va'ojuvo

<sup>6</sup> röhu huotorovoromo Keriso uehorovaruoho vuonugo barëjë'o'ho ëhi jië'o'ho no diehi'oromo ajëmi'ejo jabumë röhu maho sisëho vuonugo'i huotorovoromo mae uehorovo'iröhego. Öre bogoje. Rabëni ëhi jië'e aribövioho jabesi dë vövöbajo'ere sisë'i uehorovaruohuro ëhuro God-are Harihoho korosire röhu maho ano taemanovoromuomajeje. Ano taemanovoromo ëhuro Iesure ihoho a nuniro ijumoruomajeje.

<sup>7</sup> God-are huë mae baebe va'ojuvo Keriso vuonugo'iröhe jöho naru uhunö'e i'o mu'ero bamo'ejo. Ënëro mure rue'i hiromo sa'ae sanuovego

ëhuro iruno'e bövie bise'e ri'amego mu arijo'o ho jaburo mabëhe gagovo bahiruomajeje. Ëhi jië'e i'o mu'o ho God-ro avoho muebe'iramu ma-mabëhe jio'ë'e.

<sup>8</sup> O ënehu mure rue'i hijamu röhu mure ma-bibë'e resu resu sisëhuremu ri'amë'o ho uvarueje: Ëi'o mu'o ho sisë höjo. Ëhi'ego God-ro i'o mu'o ho masisë'i avoho hesije vëniro bue'öromo ijumo barë nahonahovo'iröhëro.

<sup>9</sup> Nasi aganomë iae na ëhi jië'e jögoroho uhu'e majëhijë'e jeve. Röhu na uehoro mae baeromo uve: Jemë bogo ëhioho jëvajëjo. Iae aji maho baejë'ëro God'o maro raromo hesi jëvajëjo.

<sup>10</sup> God bogo sisë'ioho uehorovajeje. Jemëhu mu ma vaejarijoho hu bogo rumonimo'ë'e. O jemëhu hesi örire uehorovoromo hesi aribövi ajëmijarijoho röhu jaruvohu'o ëhi gemuoho ajëmijarujoho ëhu'o bogo rumonimo'ë'e.

<sup>11</sup> Röhu na negajoho jemë ae gemu gemu jemëhu God-are muemu nimo avoharujëhi ëhi gemuoho nimo avohobe va'ojuvo hujeji maja viture jemë nimoromo muebejarujoho bae'a'aruje.

<sup>12</sup> O jemëhu God-are jö uehorovarujoho u'uhëvo'iröhoho na bijönege. A'i na nege a ioro'iorehu biririvoromo God mae uehorovoromo ëhuro huhu ajëmi'i uëvadoho biharuëhi jemë'o jabesi muoho gavë'i ëhi ë'irarijego.

*God-hu ajamui'iröhëro mae uövuade jö noehu biririvoromo mae uehorovo'iröhe jöhoje.*

<sup>13</sup> Iae God-ro Abraham ajami'i uavadeje. Röhu bogo ma-ua'i a'i darugo'e jöho majahiromo ëhi mae uavadeje. Ae gö God iosiramirobomo böromö jië'o ho bogojiadeje God-hu ë a hesi iho uvoromo darugo'e jö majahi'iröhoho. Ëhu'ëro jië'ëro hesi ihoho uvoromo ëhuro hesi darugo'e jöho majahiromo

<sup>14</sup> Abraham uavadeje: Iae naro jasi örire mae vaejavoromo a uje aho'obëhe bojamibe va'ejöjo.

<sup>15</sup> Bojamibe va'ejöjamu Abraham-ro heromo biririvoromo uvo'i hinövadeje: Na iae bae'ejö uvoromo God-hu uavade ujoho iae birohadeje.

<sup>16</sup> Sa'are aribövi noehu darugo'e jö majëhijë'o ho ae gö hesi ihehu nosi iho iosiramuiromo hu böromö jiaje ë a hesi ihoho uvoromo darugo'e jöho majëhiromo ëhuro mae uëvarueje. Ëhi ë'ë'o ho aho bogo ijönöho ë jöho aho uö'ë'ö.

<sup>17</sup> O God-ro nimadeje hu ajamui'i uövuade aribövioho röjahuijego noro garomo uvoröhëgo: Iae mae-ëjo. God-ro ajamui'i nimadoho bogo vuonugo'ajë uvoröhëgo. God-ro ëhi nimoromo hesi iho uvadohuro ëhuro darugo'e jöho Abraham majahijadeje.

<sup>18</sup> Ëhu'ëro jië'ëro God-hu ajami'i uvade jöhu'o hesi iho uvoromo darugo'o uvade jöhu'o ë jöe niö'ioho bogo sisërë'ë'e. Ëjöho God bogo sareramui'ë'e. Ëhuni nomëro mami'e huruomoromo God-are burure va'ë'ëro uvo'ejo: God jö maemu jövajëromö ëhuro uehoro mae bae avohoromo biririvoromo uvo'ejo: Iae huro uövuadëhi iae ëhi maro ramuo'ajëjo.

<sup>19</sup> Hisiehu munë beromo e'u derire ba'amego vanagi ma'enegro namijajëhi huhu maro ramuo'iröhe jöho noro uehorovoromo nosi dë vövöbajo'o ho biririvoromo riravarueje. Iae uvarueje: God'o nosi ririre urahadoho Iesuro niögunö'e babu'öromo God-hu jiajire nosi sisëho avohahuo'i va'o hijë'ëro jië'ëro iae ëhuni huro ijönö maro bamavuo'ajë uvoromo ëhuro bibivoromo riravarueje.

<sup>20</sup> Iae God-hu jiajire Iesuro nosi jöëni urimo va'ë'eje. Hu priest böromë vaejë'eje. Priest böromë vaejë'ëro Melchizedek priest jiadëhi hu ëhi priest jiajoho ëhi jiemu jio'ë'e.

## 7

*Priest hesi ihe Melchizedek-are jöhoje.*

<sup>1</sup> Melchizedek hu Salem amore böröme naminövade ae jiadeje. O göho hu God dö mare hijaje hesi priest böröme jiadeje. Abraham-ro a masijohu'o muorovoromo muo'amonugoromo rovamu gagorovo Melchizedek-ro hu bihororomo huë mae hi'iröhe jöho bojamadeje.

<sup>2</sup> Bojamamu Abraham-ro ujuoho rovade inömo inömoho aho'obëhe mevoromo hue aho'o 10 bahiromo 9-ho hesi bahi'i gemu God-are suvuro maho Melchizedek mamadeje. Röhu Melchizedek-are iho huotovë'o ho ëho aji'e mu ma muebejaje a börömohoje. O hesi amo ihe Salem hu ë amo hesi a börömoho jiadeje. Salem amo hesi a börömo jiade ë jö hesi bëhi huotovë'o ho huë baerovarue mu muebejaje a börömohoje. Melchizedek ëhi jië'e a böröme jiadeje.

<sup>3</sup> Hesi vëmu vavu'e hijo miono'e jabesi jöho bogoje. Hu rahade guomade maja hesi jöho bogoje. Èhu'ëro God-are Harihe hu ioro'ioemu priest jiemu jiajëhi Melchizedek ëhi jianove.

<sup>4</sup> Jemë'o uehorovore. Melchizedek hu a böröme jiadeje. Èhesi bëhoho Abraham hu Israel rajo nosi ni'i'ivade bëhoho jiadeje röhu muorovoromo ujuoho rovade inömoho ëho mevoromo hue 10 bahiromo God-are suvuro maho gemu Melchizedek-are örire mamadeje. Abraham-ro God-are suvuro maho Melchizedek mamijë'ëro ëhu'ëro no garomo uvarueje: Melchizedek-ro Abraham iosiramiromo börömo mae jiade höjo.

<sup>5</sup> O Abraham-are uje gemu Levi jiadeje. Levi-are ado sirino'e jiobe rovaje priest-oho jaburo God-are jögoroho ejahoromo Israel rajo aribövi ioro'io jabesi örire God-are suvuro maho ujuoharueje. Priest-ehu suvuro ujuoho'ia'amu gavë'iroho Israel rajo ioro'iorohuro jabesi inömo inöme mevoromo hue aho'o 10 bahi'amego priest-ohuro God-are suvuro maho gemu baeromajeje. Levi rajo priest-ohuro jabesi sa'a rajo jabesi örire suvuroho ëhi baeromajeje. Jabesi sa'a rajoho jabu'o Abraham-are agane gemuho jioruome röhu jabesi örire ëhi jië'e suvuroho baeromajeje.

<sup>6</sup> A'i Melchizedek bogo Levi rajo aganoho jiadeje röhu huro Abraham-are örire God-are suvuro maho baejadeje. Baeromo huë mae hi'iröhe jöho Abraham majahijadeje. Abraham hu God-ro ajami'iröhe jöho majahijamu hejë'ëro ëhu'ëro iae hu huë mabëhe birohë'e jiadeje röhu Melchizedek-ro Abraham-are örire huë mae hi'iröhe jöho majahijadeje.

<sup>7</sup> Röhu huë mae raromo'iröhe jö heruomaje aribövioho ma-jianovo'i a'i ëhi jië'e huë mae jö majëhjarue aribövioho masije jio'amajeje. Èhi jiajoho iae no ae aho'obëhe gavarueje. Èhuni Melchizedek-ro Abraham-hu huë mae hi'iröhe jöho majahijë'ëro ëhu'ëro no gavö Melchizedek-ro Abraham iosiramiromo börömoho jië'e jio'ego.

<sup>8</sup> O Levi rajo priest ömo'öme God-are suvuro ujuoharuoho jabumë vuovarueje. A'i Melchizedek suvuro ujuohadoho ë a hesi jöho God-are surire uvë'eje: Hu iae hijajëjo.

<sup>9</sup> Iae Levi-are ujo ömo'ömhuro God-are suvuro maho ujuoharueje röhu Abraham-hu Melchizedek God-are suvuro bojamadevare Levi hu'o ë suvuroho Melchizedek bojamanovadeje.

<sup>10</sup> Èhesi bëhoho Levi hu bogo rahë'e hesi hije Abraham-are visöro jië'iro evare majare Melchizedek-ro Abraham birohadeje.

<sup>11</sup> Röhu Levi rajo ae Aaron'o hesi ujohu'o Jew rajo jabesi jögoroho muebenövareje. Muebejaroho jabesi muohuro ioro'ioe gemu ae



ajëmi'ibejo priest göho bogo rue'ibejo. Röhu jemë'o uehorovore. Jabesi muoho bogo eni jië'ëro ëhuni God-ro priest i'e gö baejadeje. Bogo Aaron-are ujo va'ëne priest-oho bae'i a'i Melchizedek jiade ëhi jië'e priest-oho baejadeje.

<sup>12</sup> Levi rajo priest-oho vuonugo'amo'i priest i'e gö baejë'ëro ëhu'ëro jabuhu muebejare jögoroho ëhu'o vuonugo'i jögoru i'e rovë'eje.

<sup>13</sup> Röhu nosi Bada Melchizedek va'ëne priest jioröhe hesi jö God-are surire jajivaroho ë aho bogo Levi rajo aehu jio'i hesi ae gö jiadeje hesi aganoho priest muoho bogo vaeromo God-are suvuro bahijarue maratuoho bogo muebenövë'ëro.

<sup>14</sup> No ae aho'o gavarueje nosi Badare agano ihoho Judah rajemu jio'amego. Röhu Moses-hu priest mu jö jövadiroho hu bogo uvadeje: Judah rajëro ë muoho vae'a'aruëjo.

*Iesu Melchizedek va'ëne priest jiaje jöhoje.*

<sup>15</sup> Röhu priest gö Iesu Melchizedek priest jiadëhi jië'e priest-oho iae rovë'eje. Ehu'ëro iae no ma-samae gavarueje priest mamiohu'o jögoru mamiohu'o barë'i i'e rovë'e jiego.

<sup>16</sup> Eï'o rovade priest-oho hu bogo vavuehu mu vaejade siono hari-hehu baeröhe ë hesi jögoroho ejë'ëro bogo ehuro priest muoho bae'i a'i ioro'iolemu hi'iröhe darugoho baejë'ëro ëhu'ëro priest muoho baejadeje.

<sup>17</sup> Eïoro'iolemu hi'iröhe jöho God-are surire jajivoromo uövuë'eje: Melchizedek priest jiadëhi ja ëhi priest jianuoho ëhi jiemu javo'ajëjo.

<sup>18</sup> Urimore jionövade jögoroho u'uhë'ëro jië'ëro ëhu'ëro bogo maho ajamuinövadeje. Ehuni God-ro ë jögoru hesi öroho tugohadeje.

<sup>19</sup> Ehesi bëhoho ë jögoroho bogo ae gemu vadu'oho ajamui'ego ioro'iolemu maroho javuonövadeje. A'i God-ro öri i'e jiovahuë'eje. Eöri i'ohuro öri mamioho iosiramiro mo ma-mabëhe jië'eje. Eöri i'o hesi bëhoho no nimoröhë'i uvarueje: Iae God-ro ajamui'iramu maro raromo'ëjarëjo. Euehoro mabëhoho javuë'ëro God-are bëhire va'arueje.

<sup>20</sup> Röhu God-ro Iesu priest muroho bogo ëma bamo'i a'i darugo'e jöho uvoromo bamadeje. Urimoho Levi rajo priest mu bojëmi'ië'iroho aho bogo ëhi jië'e darugo'e jöho uvoromo muoho bojëminövareje.

<sup>21</sup> A'i Iesuro priest muoho bae'ia'amu God-ro darugo'e jöho uvoromo bamadeje. Ejöho God-are surire jajivoromo uvë'eje:

God Badaro ave jöho darugo'o uvë'ëro

bogo vuonugo hesi höjo:

Ja priest jianuoho ëhi jiemu javo'ajëjo.

<sup>22</sup> Iesuro priest mamioho iosirëmi'jë'ëro ëhu'ëro God-hu muebejavuoröhe jögoru Iesuhu ma'enaje ë jögorohuro jögoru mamioho iosiramiro mo ma-mabëheje.

<sup>23</sup> Röhu göho Levi rajo priest-oho aho'obëhe jio'amobe rovë'eje rabëni hesi bëhoho vuovëvobe rue'ego muoho bogo ma-biririvoromo vaemu vaenövë'ëro.

<sup>24</sup> A'i Iesuro ma-oro'iolemu biririvoromo hijajëro jië'ëro ëhu'ëro a göho hesi sionoho bogo bae'i huro priest muoho ma-vaemu vaebe va'o hesije.

<sup>25</sup> Iesu priest muoho ma-vaemu vaebe va'o hesirëro jië'ëro ëhu'ëro ae rahu hesi ihore God-are bëhire va'ë'oho Iesuhu baejavuoromo ma-oro'iolemu mare ramuo'iröhoho hu eni jie rabëni hu bogo guomo'i majae ëhi biririvoromo hiromo nosi jöëni God-are örire jöe majahijajëro jië'ëro.

<sup>26</sup> Ēhi jiē'e priest bōrōmohuro iae mae ajamuajeje. Hu sisē rumo'ëro jiē'ëro hu a ma-maeje. Aribōvi sisēho öre gö jio'amo'i hu öre göje. Huro ajiomoromo sa'ae ö'idöe iosirami'amoromo ajio dö maro hijē'eje.

<sup>27</sup> Levi rajo priest masijehu ë'onövarēhioho Iesuhu ēhi ë'irōhoho bogoje. Majae ēhi Levi rajo priest-oho jaburo God-are örire mi suvuoroho i'imami'i arinövareje. Urimoho jabesi sisēhuni i'imaminugoromo ijoroho God-are aribōvi ioro'ioro jabesi sisēhuni mi suvuoroho i'imami'i arinövareje. Iesu bogo ēhioho ë'i a'i hesi arijo'arije God-are örire bojamirovoromo guomorov'ëro ēhu'ëro hesi suvuoroho majae gemu ma-ioro'ioemu bojamirovadeje.

<sup>28</sup> Moses-hu bojēmade jōgoru hesi uhuroho ma-u'uhē'e aemu priest masije bamobe rov'eje. A'i ë jōgoru hesi ijonö God-ro darugo'e jōho uvoromo hesi Harihoho bamadeje priest bōrōme jiorōhego. ĒHarihoho bogo u'uhē'oho jio'i mue aho'o romoromoro ma-ioro'ioere gemu bae barējē'eje.

## 8

### *Iesu hu nosi priest bōrōmo jiaje jōhoje.*

<sup>1</sup> Na jajivobe rovode jō hesi bēhoho aviēhije. Naehu jajivode ēhi jiē'e priest bōrōmoho javue. Hu ö'idöre ajiomoromo God eni jiē'e aehu bōrōme namijaje a hesi övo manö hijē'eje.

<sup>2</sup> God-hu jiajire osa hesi muoho vaejajeje. Ēhesi bēhoho huro God-are javu hesi priest muoho vaejajeje. Ējavuoho bogo maja aru'aho va'ëne amoho jianovo'i a'i God-are javu maeje. Bogo ma-aehu avoho'i Badaro avohē'eje. Ēosa hesi muoho nosi priest bōrōmohuro vaejajeje.

<sup>3</sup> Amo priest masije aho'o muro bahijarue hesi bēhoho jaburo mi suvuore övo suvuore gö gö God bojami'irōhego. Ēhuni priest muro bahijarueje. Jabesi muoho ēhi jiē'ëro nosi priest bōrōmohu'o övo suvuore jio'ë'e God bojami'irōhego.

<sup>4</sup> Röhu Iesu sa'are hi'ibejo bogo priest-oho jio'ibejo ë hesi bēhoho hesi Levi rajo priest-ëremu ë muoho vaeromo Jew rajo jōgorure jajivare suvuoroho God-are örire bojamijaruëro jiē'ëro.

<sup>5</sup> O Levi rajo priest mu vaejaruoho ëho ö'idöre jiaje muoho va'ëneje. Ēmuoho ma-arua'ahonö'e jio'i bogo mahoje. Aviēhi jianove. Moses-ro God-are niögu javuoho avoho'ia'amu evare God-ro uavadeje: Gavē'iajo. Ja'o na'o dahorure ariromo naehu röjahijamu hejanēhi bövie bise'e ēhi vaenējo. Amo priest ömo'ömohuro ēhi ö'idöre jiaje mu va'ëne vaejarueje.

<sup>6</sup> A'i Iesuhu baejade priest muohuro Levi rajo priest jabesi muoho iosiramiro mo bōrōmohoje. Ēhesi bēhoho Iesuro priest bōrōmëro jiē'ëro God'o no ae aho'obēhe nosi ririre namiromo öroho avohahuoromo God-hu muebejavuoröhe jōgoroho avohahuajeje. Ējōgoru Iesuhu avohahuajohuro Levi rajo priest jabesi jōgoroho iosiramiro mo mahoje. Ēhesi bēhoho Levi rajehu muebejarue jōgoru God-hu Jew rajo aevo'i bojēmadevare evare ma-bisemu ajēmi'i uvadeje. A'i Iesuhu avohahuaje jōgoru God-hu aevo'i bojamuadevare evare bōrōme ajamui'i uvadeje. Ēhu'ëro Iesure jōgorohuro Levi rajo jabesi jōgoroho iosiramijē'eje.

<sup>7</sup> Levi rajo priest-ehu muebejare jōgoru urimo bojamuijadoho eni jio'ibejo God jōgoru göho bogo bamo'i uehorovo'ibejo ajamui'iröhëni. Bēhoho bogojio'ibejo.

<sup>8</sup> Röhu God-hu jövade jō hesi aribōvi bogo eni jioruomaje jōho hesi surire jajivoromo ēhi uvē'eje:

Badaro ëhi uvajëjo: Iae majae ijonöho nasi aribövi muebejëvo'irode jögoru i'oho avohoromo

Israel rajohu'o Judah rajohu'o mëmi'ejöjo.

<sup>9</sup> Mami'e jabesi hijo miono'o muebejëvo'irode jögoru mëmodëhioho bogo ëhi jië'e jögoroho mëmi'ejöjo.

Jabesi hijo miono'e Egypt sa'are jëvamu naehu söjëgo rovodevare evare majare jögoroho mëmode höjo.

Mëmamu jaburo jögoroho bogo biririvoromo ejeho'i vuonugare höjo.

Ëhuni naro jabumë bogo gëvanovode höjo. Badaro ëhi uvajëjo.

<sup>10</sup> Röhu Badaro uvajëjo: Ëmajaho barë'iramu aviëhi jië'e jögoroho Israel rajoho mëmi'ejöjo.

Naehu nimaje ëhi ëhi ë'onövo'iröhe jöho jabesi simanore ba'amëho'iramu uehorovoruomo'ajëjo.

Jabesi dë vövöbajo'ere jajivëho'iramu ejehoruomo'ajëjo.

Ëhi'o'iramu jabumë muebejëvo'irode börömocho jevo'ajëjo.

Jabumë nasi aribövi mae jioruomo'ajëjo.

<sup>11</sup> Amo rajëro göëro göho bogo röjahirovoromo

aganëro göëro göho bogo majahirovoromo uarovo'aruëjo: Bada avoho gahëjo.

A ininore ëhi va'o a masijore aho'obëhe na ge'a'aruëjo.

<sup>12</sup> Jabuhu sisë vaejaruoho naro jabumëni vavaenimoromo

jabesi sisëho ma-ioro'ioemu uehorovoromo vuonugëho'ejöjo.

<sup>13</sup> Ëjögöroho i'e hö uvade hesi bëhoho urimore bojamuade jögoroho iae mamiraejë'eje. Röhu jöe rabe mamiraeromo sisërëbe va'ajoho ëho ma-burëro barë'ië'e.

## 9

*Jew rajo a mami priest masijehu God-are örire mi kö suvuoro bojaminövare jöhoje.*

<sup>1</sup> Ëurimore jögoru hesi uhuroho God rajahi'iröhe öri hesi jöho jiadeje. O sa'are vaejare javuoho jiadeje God ë rajahi'iröhoho.

<sup>2</sup> Ëjavuoho niögëro vaejareje. Ëosa gagoho ririro iromo tariojamu osae niö'i jëvadeje. Viënörire osaroho iro bahijarue gijoho maratuoho maratu döre bahijare God-are ioho ëhi jio'amonövadeje. Ëosa hesi ihoho God-are osa maho jiadeje.

<sup>3</sup> Niögëhu iromo tugohë'e ë hesi ruënörire osa gö hesi ihoho God-hu jiaje osaho jiadeje.

<sup>4</sup> Ëosa'eroho ridi'e oso buejarue maratue gold-ehu avoharoho o God-are jögoru bamare mauaho ë inömo niö'ioho ë dirö'ore jëvadeje. Ëmauaho hesi sinoroho gold-ëro ruë numë havo rova'oromo taemo titimë'e jiadeje. Ëmaua gagoroho gold'e ramaho God-hu i'imëmade ie gö hesi ihoho manna aegë'oho ë jiadeje. Göho Aaron-are ijaho sirinohijadoho maua gagore jiadeje. Göho munë ha'osire God-are jögoru jajivo'amadoho maua gagore jiadeje. Ëinömocho niö'i gemu maua gagore jio'amadeje.

<sup>5</sup> O maua dönöho vivoju'e majo va'ëne aehu avoharohuro rirarovareje. Ëinöme niö'i jabesi bëhoho uvoromo ë'areje: God-are ajoho aviae höjo. Röhu nume maua döho God-hu sisë mu'unövadoho jiadeje. Ëdirö'oho majo va'ëne jabesi vivojohuro aegahareje. Ëinömo jabesi jöho naro ma-bisemu jövë'ëro vituoho vuonuge.

<sup>6</sup> Ēinōmoho aho'obēhe ē avoho bahijē'ego evare priest aribōviahuro viēnōrīre osare aevoromo majae ēhi va'oromo God-are muoho vae'i arinōvareje.

<sup>7</sup> A'i ruēnōrīre osaroho hesi ma-priest bōrōmohuremu vadune gemu hesi uhure majae gemu rumo va'onōvadeje. Rumo va'iē'iroho bogo ōvemuoho va'i a'i mi kōho baeromo ē osare rumo va'oromo God-are ōrīre bojaminōvadeje. Hesi sisē hesi jōhuni bojamiromo a ioro'ioro jabesi sisēhu'o rōromo ēhuni bojaminōvadeje.

<sup>8</sup> Hesi ma-priest bōrōmohuremu ruēnōrīre God-hu jiaje osare va'ē'ēro jīē'ēro ēhu'ēro God-are Aru'ahohuro ma-sama'e rōjahuijajeje noro garomo uvorōhego: Viēnōnīre osa hesi mu jīadevaroho evaroho God-hu jīajire va'orōhe ojoho bogo jiovaheu'e jīade hōjo u'emu jiovaahuorōhēro.

<sup>9</sup> God-hu ē niōgu javuohu'o ē javu hesi muohu'o bamade hesi bēhoho jaruvo noehu God uehorovarue mu maho ēho maja aru'ahonō'e rōjahui'iro ēhuni bamadeje. Ēosaroho mi suvuore o suvuore gō gō God i'imaminōvareje. God-ni ēhi vaenōvareje rōhu bogo ēhuro herovonōvareje jabesi dē vōvōbajo'ere sisēho barējēho'ego.

<sup>10</sup> Ēhi jīē'e suorovo hesi bēhoho ma-i ijaruoho jovo ijaruoho jovo eguaruoho inōmo u'o'amaruoho ēhi jīē'e jōhuremu jionōvadeje. Ma-dajo hesi jōhemu God-ro ma-jahuri bamadeje ēhuro ēhi jiohe va'ujuvo hujeji hesi mu ōri mami tugoho'i Keriso-are mu i'o jiovaheu'irōhe majaho ruerōhego.

*Iesuhu hesi kō God-are ōrīre suvuoro bojamade jōhoje.*

<sup>11</sup> Jaruvoho Keriso rovē'eje. Hu priest bōrōmohuro jīē'ēro avevejō'e hesi mu maho vaejajeje. Urimoho ma-aeu niōgu javu bōrōmo vaejarire priest masijohuro ē rumo va'oromo muoho vaenōvareje. Avevejō'oho Keriso bogo ēhi jīē'e javuoroho rumo va'ē'ēro muoho vae'i a'i javu ma-mabēhire rumo va'ē'ēro muoho vaejajeje. Ējavu mabēhoho bogo aho vaejē'ēro ēhu'ēro God-hu bōvi bise'o bamade noehu ga'amaruoho gō jio'amo'i ē javuoho hesi ahe gōje. Ēhu'ēro ē javuohuro javu mamioho iosiramiro mo bōrōmo mahoje.

<sup>12</sup> Kerisoro ē javu bōrōmore va'oromo muoho vae'irōgoro bogo goat hesi kōho o cow harihu hesi kōho baeromo ē osaroho va'adeje God-ni bamahorōhēro. A'i hesi kō maho baeromo osare va'oromo evare God jīajire ma-ioro'iore gemu va'oromo no baejavuoromo ma-ioro'io remu maro ramuadeje.

<sup>13</sup> Rōhu Jew rajehu jabesi sinore sisē baeromo ēhuro God bogo avoho rajahi'iē'iroho priest-ēro goat hesi kōho o ano'e cow hesi kōho baeromo hijiovodēgonōvareje. O cow harihu hesi muomōho jovohu'o buarohoromo baeromo hijiovodēgonōvareje. Hijiovodēgo'ego jabesi dajore jiaje sisēho barē'ego ēhuro God-are ōrīre rajahijē'oho iae mae jēvonōvadeje.

<sup>14</sup> Mi kōehu rabehu hijiovodēgo'ego dajore jiaje sisē u'o'amonōvaroho majianovo'i a'i Keriso-are kō rovdohō ēho mu bōrōmo mahoje. Ēmu hesi bēhoho Kerisoro ioro'io remu jiaje Aru'aho hesi darugohuro biririvoromo hesi dajoho God-are ōrīre bojamirovoromo guomorovadeje. Hu mu sisēho bogo vaejē'ēro ēhu'ēro huro suvuoro mabēhe vaeromo hesi arijo'arije bojamirovadeje. Bojamirovamu kōho rovē'ēro ēhu'ēro mu sisē vaeromo nosi dē vōvōbajo'o ijumorovaruoho u'ovahuo'iramu herovo'ejo sisēho barējahuo'iramu. Sisēho barējahuo'iramu ēhuro God mae hijaje a hesi muoho noro avoho vaenōvo'ejo.

*Iesu kō rueromo guomē'ēro ēhuro God-hu muebejavuo'irōhe jōgoru i'o marējade jōhoje.*

15 Ëhuni Kerisoro God'lo nosi ririre jioromo God-hu hesi aribövi muebejavuo'iröhe jögoru i'lo hesi öroho avohahuaajeje. Jögoru i'lo hesi öri avohahuaaje hesi bëhoho ëhuro God-hu hesinö uövuade aribövioho noro ioro'ioemu jioröhe mu mae gö gö Vavu hesi örire bae'amoröhego huro bojamui'i uövuë'ëro ëhuni avohahuaajeje. Mu mae baeröhe hesi öroho aviëhije. Keriso guomadeje. Guomamu ëhuro noehu jögoru mami hesi uhure raromoromo mu sisë vaebe rovere ë hesi jö sisëho iae u'ovahuo barëjë'eje. Sisëho u'ovahuo barëjë'ëro ëhu'ëro Vavuehu bojamui'i uövuade mu maho no baejarueje.

16 Keriso guomë'ëro noehu mu ma baejarue jöho uhunö'e bamo'ejo ga'irarijego. Ave sa'are vavu ömo'ömhuro vuovego rahuhu inömo ujuoho'iröhe jöho surire jajivoruomajeje. A'i jabesi aboji harihu'ehu bövi bise'lo ujuoho'ië'iroho ae aho'obëhe garöhe vavuohe vuovo'iramu bövioho bise'oho evare ujuoho'ë'ö. O bogo vuovë'iroho bogo ujuoho'ë'ö.

17 Vavu bogo vuovo'i raromë'oho jabuhu jajivare jögoroho ëhi mamomorö'öjajeje. A'i vuovëvego evare vavuehu uvoruomadëhi ëhi ujuoharueje.

18 Ëhesi bëhoho God-hu Jew rajo muebejëvonövo'iröhe urimore jögoroho bogo ëma jio'i urimo mioho bijuëmamu vuovoromo köho rovamu evare God-ro aevoromo Jew rajo aribövioho avoho muebejëvadeje. O mioho bogo muo'amego ëhuro köho bogo rue'ibejo ë jögoroho bogojio'ibejo. Jew rajo aribövioho God-are ahariroho bogo raromo'ibejo.

19 A'i God-hu Jew rajo muebejëvo'iröhe jö hesi muoho Moses-ro avoho'irögoro jögoru jöho ae aho'obëhe majëhi barënugoromo evare cow harihu jabesi köho baeromo jovohu'lo buarohoromo sheep hesi u kavuë'e avoharoho ujuohoromo hyssop ahore huhohoromo ë kö'lo jovo'lo buaroharire sheep uoho ë io'amadeje rumorovoröhego. Rumorovamu ioromo jögoru jajivo'amade suri suriohu'lo ë ariböviohu'lo kö'e jovohuro hijiovodëgadeje.

20 Hijiovodëgoromo uëvadeje: Ave hijiovodëgaje köhuro ëhuro God-hu bojëmë'ëro ejaho'irarije jögoroho marëjajëjo.

21 Ëhi majëhiromo God-are javu börömo niögehu vaejarohu'lo God rajahi'amarue inömo inömo'hu'lo aho'obëhe ë köhuro hijiovodivo'amadeje. Ëhi'adeje.

22 Iae Moses-are jögoru hesi uhuroho aëro köho baeromo bövie bise'le u'lo'amo'ego ëhuro ë inömo hesi sisëho barënövadeje. Inöme ma-gemu gemu bogo ëhioho ë'onövareje. O aehu mu sisë vaejë'iroho mi muo'amamu kö rovë'ohuro ëhuro God-ro mu sisëho uehorovoromo vuonugonövadeje. O mi bogo muo'amamu kö bogo rovë'oho jabesi sisëho bogo barëjëhonövadeje.

*Iesu kö rueromo guomë'ëro ëhuro nosi sisë u'ovahuaaje jöhoje.*

23 ËGod rajahijarue inömo inömo'ho ma-maja aru'ahemu sa'are jio'amadoho ëho jabesi sisëho mi köëremu u'lo'amonövareje. Öre gö bogojideje. Röhu ë inömo inömo'ho ö'idöre inömo ma röjahuijajoho jianovadeje. O ö'idöre inömo maho ma-mi köëremu u'lo'iröhoho bogo eni jie. Mi kö God-are örire suvuro bojami'iröhoho bogo eni jio'i a'i suvuro göehu ë mi suvuro iosiramiro mo ma-mabëhe jië'oho ëhuro ö'idöre inömo ma jabesi sisëho u'lo'iröhoho eni jie.

24 Ësuvuro mabëhi hesi bëhoho ö'idöre God-hu jiaje öri ari'lo va'ëne ma-aehu vaejare osaroho Keriso ëho bogo rumo va'i a'i God-hu jiaje

ö'idö mare va'adeje. Ö'idöre va'el'ero God-are nunire hiromo nosi muoho avohahuajeje.

<sup>25</sup> Röhu Jew rajo priest börömhuro bogo hesi köho bae'i mi köe baeromo God-hu jiaje osare vadune göro göro va'i hinövadeje. Röhu Keriso bogo ehioho e'adeje. Ö'idöre va'adevaroho majae gö gö God-are öriroho suvuoro bogo bojamirovoromo guomorovo'i hiröhëro bogo ehunioho va'adeje.

<sup>26</sup> God-are örire suvuore bojami'i hi'ibejo sa'a bövi bise'o bamadevare aevoromo vi'eha baebe rue'ibejo. Röhu bogo ehioho vi'ehoho baebe rue'i a'i sa'ae bövie bise'e barë'i dunovamu gavë'i Kerisoro a nunire ioro'iore gemu rovë'aje God-are örire bojamirovoromo guomorovoromo nosi sisëho u'ovahuoröhëro.

<sup>27</sup> God-ro bamë'ero no ae aho'obëhe ma-vae gemu vuovavuo'iröhohoje ijonö hesi nunire riravoröhego.

<sup>28</sup> Ae aho'obëhe ma-vae gemu vuovavujëhi Keriso ëhi ma-vae gemu guomadeje. Hu ma-vae gemu suvuore bojamirovoromo guomorovadeje ae aho'obëhe nosi sisëho u'ovahuoröhëro. Ijonö röhu maho a nuniro vuonorö'ö rue'ë'e bogo mu sisëho avohahuo'i a'i hu rueröhego muebejarue aribövioho no baejavuoromo maro bamavuoröhëro.

## 10

*Jew rajo a mami priest-hu mi bijuëmoromo God suvuoro bojami'ego ë suvuoro hesi darugoho bogo eni jië'ero dë vövöbajo'ere sisë bogo u'ovëhonövade jöhoje.*

<sup>1</sup> Röhu Jew rajo jögoru urimo jiadoho ehuro God-are mu maho bövioho bise'oho no bogo avoho ga'i God-are mu maehu ijonö rovadoho ëho no ma-sisë'i sisë'i maja aru'ahonö'e gavarueje. Ehesi bëhoho aëro Jew rajo jögoroho ejëhoromo mioho vadune göro göro bijuëmoromo God-are örire ëhi jië'e suvuore gemuoho i'imamiemu i'imamibe rovarueje. Röhu ëhi jië'e suvuoro ujuohoromo God-are bëhire va'i arijaruoho jabesi uhoho bogo mae bogo marëjëho'ë'e.

<sup>2</sup> EGod rajahijarue aribövi jabesi uhoho marëjëho'ibejo ehuro jabumë herovo'ibejo jabesi dë vövöbajo'oho mae jëvavego mi bijuëmoromo God-are örire suvuoro i'imami'i arijaruoho vuonugo'ibejo.

<sup>3</sup> Röhu bogo ehioho jio'i a'i vadune göro göro mi bijuëmoromo God i'imamijaruohuro ehuro jabesi sisëho vadune göro göro ëhi gemuoho uehorovobe va'arueje

<sup>4</sup> ë hesi bëhoho cow ano'o hesi köhu'o goat köhu'o mu sisë u'oröhoho bogo eni jië'ero.

<sup>5</sup> Mi köho bogo eni jië'ego ehuni Kerisoro sa'are rue'irögoro God uavadeje: Mi bijuëmoromo jasi örire i'imamijë'oho ja bogo nimanue höjo. A'i jero na sino haho'e avohevane höjo.

<sup>6</sup> Mi bijuëmoromo jani vënire aho'o huo barëjë'oho o mu sisë u'o'iranego mi bijuëmoromo jasi örire suvuoro i'imamijë'oho ja bogo maho uehorovanue höjo.

<sup>7</sup> Evare na uavode höjo: God na aviae jevajëjo.

Nasi jö jasi jögoru surire jajivarëhi jaehu nimanue muoho ëhi vae'i abuejajëjo.

<sup>8</sup> Ejö hesi bëhoho no uehorovo'ejo. Urimo Kerisoro God uavade höjo: Mi bijuëmoromo suvuoro i'imami'i o mi jani vënire huo barë'i o mu sisë

u'ol'iranego mi bijuëmoromo jasi örire suvuoro i'imamijë'oho ëhi jië'oho ja bogo nimoromo bogo maho uehorovanue höjo. Bogo maho uehorovanue hö uavadoho Moses-hu bojëmijade jögoroho ejahoromo Jew rajoho jaburo ëhi jië'e mi suvuoroho God-are örire bojaminövareje. Röhu Kerisoro uavadeje: Ëhi jië'e suvuoroho ja bogo nimanue höjo.

<sup>9</sup> Röhu evare ijonö Kerisoro God uavade höjo: Na aviae jevajëjo. Jaehu nimanue muoho vae'i abuejajëjo. Ëjö hesi bëhoho mi bijuëmoromo God-are örire i'imami'i arijare muoho God-ro aho'i Kerisohu bojamirovoromo guomorovo'iröhe muoho bamadeje.

<sup>10</sup> God-ro ëhi jië'e muoho bamamu ëhuni Iesu Kerisoro God-are jöho ejahoromo hesi sino haho'oho ioro'ioere gemu suvuore bojamirovoromo guomorovadeje. ËGod-hu nimade muoho vaejë'ëro ëhu'ëro nosi sisëho u'ovahuë'eje.

*Iesu kö rueromo guomamu ë suvuoro hesi darugoho eni jië'ëro sisë u'ovahuaje jöhoje.*

<sup>11</sup> Ëhi jie röhu Jew rajo priest-oho aho'o jaburo majae ëhi riravoromo God-are muoho vaejarueje. Mioho bijuëmoromo ëhi jië'e suvuore gemuoho God-are örire i'imamibe va'arueje. Ëhi ë'arueje röhu ëhi ë'i arijaruoho ëhuro mu sisë u'ol'iröhoho bogo mae bogo eni jëve.

<sup>12</sup> A'i Kerisoro vae gemu God-are örire suvuore bojamirovoromo guomorovadeje mu sisëho ioro'ioere gemu u'ovahuoröhëro. Ëhi'onugoromo ajiomoromo God-are övo manö hijadeje.

<sup>13</sup> Hijë'ëro avevejö'oho hiromo muebeje hu'o muorovarue aribövioho God-ro hesi höru uhunö bahijego vijuvo taemo'amo'iröhëro.

<sup>14</sup> Ëhesi bëhoho huro vae gemu God-are örire suvuore bojamirovoromo guomorovë'ëro ëhu'ëro sisë u'ovahuë'e aribövioho no ioro'ioere gemu ma-maemu raromemu raromo'ejo.

<sup>15</sup> Noehu mae raromemu raromo'iröhe jöho God-are Aru'ahohu'o ëhi gemuoho majahuiromo God-are surire uvë'eje:

<sup>16</sup> Röhu Badaro uvajëjo: Ëmajaho barë'iramu aviëhi jië'e jögoroho Israel aribövioho mëmi'ejöjo.

Naehu nimaje ëhi ëhi ë'onövo'iröhe jöho jabesi dë vövöbajo'ere ba'amëho'iramu ejehoruomo'ajëjo.

Jabesi simanore jajivëho'iramu uehorovoruomo'ajëjo.

<sup>17</sup> Röhu ë jö hesi vituoho God-are Aru'ahohuro ëhi uvë'eje: Jabuhu nasi jö ahoromo mu sisë vaejaruoho na ma-ioro'ioeremu uehorovoromo vuonugëho'ejöjo.

<sup>18</sup> Ëhi majahuiromo mu sisëho uehorovoromo vuonugë'ego ëhu'ego ijonöho no suvuoroho God-are öriroho bogo bojami'ejo huro mu sisëho u'ovahuoröhego.

*Noehu God mae uehorovoromo hesi bëhire va'iröhe jöhoje.*

<sup>19</sup> Aganomë Iesure köho rovë'ego no bogo juhuonivo'i biririvoromo God-hu jiajire va'arueje.

<sup>20</sup> Ëhesi bëhoho Iesuro noni öri i'oho iogorahuë'eje huro bogo guomo'i hiromo ë söjavuo va'ego noro God-hu jiajire va'iröhego. Urimë'ioho God-hu jiaje osare rumo va'arue ojoho niögëro urahonövareje. Jaruvoho Iesure sinoho ijumahamu guomamu niögu va'ëne urahade ojoho dadovoromo jiovahuë'ëro noro God-hu jiajire ë va'arueje.

21 Röhu göho nosi örire priest böröme jie. Huro God-are aganoho no muebejavuajeje.

22 Ëhuni ë'ego no God-are bëhire va'oromo nosi jöho majahi'iro. Nosi dë vövöbajo'o ho sisërëjavuoromo i'uhaguamu Keriso-are köhuro u'ovahuo'i nosi sino haho'o ho ajivo barëjë'e jovohuro u'ovahuë'e jiaje ëhuni ë'ego no biririvoromo nosi dë vövöbajo'o uhohu'o mae uehorovoromo God-are bëhire va'oromo jöho majahi'iro.

23 O no ae huruoho majëhiromu uvarueje: Majae ijönö God-ro ajamui'ajëjo. Ë'ego no biririvoromo ë jöhuremu mae uehorovobe va'iro rabëni hesi bëhoho hu ajamui'i uövüadëhi iae hu ëhi ë'ië'e jiaje.

24 O ë'ego noro göëro göhuni uehorovoromo dë iahorovoromo ëhuro ae huë baejëvoromo mu mae vaenövo'iro.

25 O ae göëhu göëhu God rajahi'i gemuore gagovoromo vuonugaruëhioho ë'ego no bogo ëhioho ë'i a'i no ajamirovoromo jögore mamirovo'iro ëhuro biririvo'iröhe. Ëhesi bëhoho jemë'o gavarujeje Badare majaho rue hesi jiego gavarujohuni ëhuni ë muoho avoho uehorovo'ejo.

*Noehu God-are Harihu bogo dejönö bamoröhe jöhoje.*

26 Noehu ëhi ajamirovo'iröhe hesi bëhoho noehu Keriso-are jö ma baeromo röhu ijönö nosi nimoromo biriri'övoromo mu sisëmu vaejë'iroho nosi sisë u'ovahuo'iröhe suvuore gö bogojio'i

27 ma-i'u sisëhemu muebe'iröhohoje. God-ro a sisëho mevëvo'iramu hu'o muorovarue aribövioho vëni vöröro ravëvo'ë'e.

28 Urimoho Moses-hu bojëmadede jögoroho ae rahu ahoromo musisinö'e bu'öjamu ae niö'iehu o ae niö'i gemuehu ë a hesi sisë garomo huruoho majëhijë'o ho hesi öriroho bogo vavaenimë'e ma-anonövareje.

29 Moses-are jögoroho ahoromo ëhi jië'e i'uoho baenövareje. Ëhuni ae rahu God-are Harihu sivë'o ho ë iaho diehi jio'ë'e. O Harihu hesi köhuro ëhuro God-are jöguru i'oho marëjadeje. Ëhuro ë ia hesi sisë u'ovahadoho röhu huhu huotorovoromo uvë'o ho: Ëköho bëhi rumo'e hö uvë'o ho ë iaho hu diehi jio'ë'e. O God-are Aru'ahehu huë baejavuaje hesi örire sisë vaejë'o ho ë iaho diehi jio'ë'e. Moses-are jöguru ahare ariböviehu i'u börömo baeromadoho ëho ma-jianovo'i a'i ëhi jië'e aho i'uoho bogo bise'o vadu'o ho bae'ë'e. Ëhi jië'o ho iae maeje.

30 Ave jöho God-are surire jajivoromo uvë'eje: I'u bojëmi'irodoho ëho nasi mue höjo. Naro i'ue mana bojëmi'ejöjo. Ëjö jövade aho iae no gavö. O ave jöho jajivoromo uvë'eje: Badaro hesi aribövioho gëromu mevëvo'ajëjo.

31 Iae God darugo'e aëro jië'ëro huhu i'u bojamuamu baejë'o ho ë muoho juhuoni ma'eje.

*Noehu biririvoromo God mae uehorovo'iröhe jöhoje.*

32 Röhu urimore majare jemëhu diehi ë'arijoho uehorovore. Keriso-are ajehu jemë aevoromo ajivëvadevare evare jemë huë vavaene böröme baeromo sivohojuvo biririvarijeje.

33 Majae göro jemë Keriso nimë'ëro aëro a nuniro jö sisë bu'ö'ego henövariyeje. Mu sisë vaejëvo'ego ganövariyeje. Majae göro Christian a ioro'iorohuro ëhi jië'e huë vavaenoho bae'ego garomo jemëro jabu'o havoromo rabe rabe ajëminövariyeje.

34 Christian ariböviehu savoji gagore raromarue jabesi örire huë vavaene baenövariyeje. O aehu jemesi mae sisë vajiohehu ujuöhëho va'aroho jemë nimorohë'i uvonövariyeje: Ëho iae mae höjo. Nosi inömo maho ö'idöre höjo



ma-ioro'io remu bae'iröhoho. Ëvajohehu baejare inömoho iosiramiro mo börömo mae höjo.

<sup>35</sup> Ëhuni Iesuare jö birivoromo mae uehorovarujoho nadi vuonugore. Birivë'ohuro ehuro manaho ma-mabëhe bae'a'aruje.

<sup>36</sup> Jemëro u'urume vaenövore ehuro God-hu nimaje muoho vaeromo huhu bojëmi'i uëvade suvuoroho bae'irarije.

<sup>37</sup> Iae God-are surire jöho jajivoromo uvë'eje:

Majae ma-bunemu barë'iramu  
evare rue'iröhe aho iae rue'a'ajëjo.

Bogo örisanuovo'ajëjo.

<sup>38</sup> Röhu God nasi aribövi mahuro na mae uehorovevoromo ehuro birivoromo raromoruomo'ajëjo.

A'i ae rahu juhuonivo'i nasi öri vuonugë'oho  
na jabesi jöënioho bogo nimoroho vadë'ejöjo.

<sup>39</sup> Röhu nomë bogo juhuonivoromo Keriso-are mu vuonugo'i sisëre va'arue ariböviehu javuo'i a'i no God mae uehorovoromo maro va'arue aribövie javue.

## 11

*Noehu God mae uehorovo'iröhe ë hesi bëhi hesi jöhoje.*

<sup>1</sup> Mae uehorovarue hesi bëhoho aviëhije. Noehu mae uehorovë'iroho ehuro no birivoromo uvarueje: No ijönö maro raromo'iröhe jöho ëho mae höjo. Rabe rabe jio'amaje noehu nunehu bogo ga'amaruoho iae jio'amajë uvarueje.

<sup>2</sup> Nosi a mamiehu God mae uehorovarohuro ehuro jabesi ihoho God-are nunire mae jëvadeje.

<sup>3</sup> Noehu God-are jö mae uehorovaruhuro ehuro garomo uvarueje: God-ro jö'ëro jövamu ehuro ö'idörohu'o sa'arohu'o jiade höjo. Noehu nunehu bogo ga'amarue inömoho God-ro ujuohoromo ehuro ga'amarue inömo inömoho avoho'amade höjo.

*A mami ae Abel Enoch Noah ëho jabuhu God mae uehorovare jöhoje.*

<sup>4</sup> Iae Abel-ro God mae uehorovë'ëro ehü'ëro hu God-are örire suvuoro maho bojamadeje. Èsvuorohuro Cain-hu God bojamadoho iosiramijadeje. Mae uehorovamu gagorovo God-ro Abel-are suvuoroho mae hö uvoromo baejadeje. Baeromo röjëhijë'eje aëro uvoröhego: Abel hu a mae höjo. Amo Abel-hu God mae uehorovadohuro ehuro jaruvoho hu guomë'eje röhu hu jöe jövajeje.

<sup>5</sup> O Enoch-ro God mae uehorovë'ëro ehü'ëro bogo guomë'e God-ro maba'o'jomoromo hesirire nugadeje. Aëro hu nahareje röhu bogo birohareje God-ro hu mami'e ba'o'jomë'ëro. God-hu Enoch bogo ba'o'jomade majare evare God-ro hu garomo nimorohade höjo. Ëjöho God-are surire ëhi jajivë'eje.

<sup>6</sup> Röhu God-ro nomë bogo ëma göromo nimoroho'i a'i garöhe noehu hesi örire mae uehorovamu gavë'oho nimorohajeje. Ëhesi bëhoho noehu God-are bëhire va'oromo jö majahi'ië'iroho mae uehorovoromo uvo'ejo: God iae jiajëjo. Ae rahu hu biroho'i nahë'oho ajamui'ajëjo. Bogo ëhi uehorovë'oho hesi bëhiroho bogo va'ejo.

<sup>7</sup> O Noah-ro God mae uehorovadeje. Mae uehorovë'ëro hejade God-ro uvamu: Ëhi jië'e i'uoho sa'are ö'a'ajë uvamu hegorovo huro ë i'uoho bogo gavë'e God ma-ejahadeje. Ejahoromo boat börömo avohadeje ehuro

hu'o hesi aganohu'o jovoho bogo baejèvego va'o maro raromoröhëro. Mae uehorovoromo boat-oho avohë'ëro ëhu'ëro no garomo uvarueje: Noah-mëremu maho jëvo'i a ioro'ioroho aho'o sisë ë'ë'ëro i'u baeromo vuovëvadoho mae höjo. A'i Noah-ro God mae uehorovamu God-ro garomo uvadeje: Hu nasi örire mae uehorovajohuro ëhuro hu mae höjo.

*Abraham-hu God mae uehorovade jöhoje.*

<sup>8</sup> O Abraham-ro God mae uehorovadeje. Mae uehorovoromo huro dirö'o göro va'ojöro God-ro uavamu iae ejahadeje. Ejahoromo dinö'e va'iröhoho bogo gavë'e hesi sa'aho nugo'i ëma va'adeje God-hu u'emu bae'iröhego uavade sa'are hörö'iröhëro.

<sup>9</sup> God mae uehorovadohuni ëhuni God-hu bojami'i uavade sa'are va'o ë hijadeje. Ehijadeje röhu ae gö jabesi sa'aro ma-jahuri hijanovadeje. Hiromu bogo javu maho vae'i ma-niögu javuoremu hibe juvonövadeje. Ijonö hesi uje Isaac'o Jacob'o God-hu Abraham uavade sa'ae gemuoho bae'iröhoho jëvadeje röhu jabu'o ë sa'aroho niögu javuoremu raromobe jijihonövareje. Jabuhu ë'arëhi Abraham-ro urimoho ëhi ë'onövadeje.

<sup>10</sup> Ehësi bëhoho Abraham-ro uehorovë'e hijadeje ioro'ioyemu jioröhe amo börömo God-hu uehoro baeromo avohadire ë va'o hi'iröhëro.

<sup>11</sup> Röhu Abraham-ro God mae uehorovoromo ëhuro a ujo jioröhe darugoho baejadeje. Vaboroho Sarah dë tiojë'e jio'i baruoho Abraham mami'e mavojiraeromo harihu bae'iröhe darugo barëjahë'e jiadeje röhu hu uvadeje: God-hu harihu bojemi'i uevadëhi iae bojemi'ajëjo. Ehë uehorovoromo harihu bae'iröhe darugoho iae baejadeje.

<sup>12</sup> Abraham hu ma-ae gemu jio'i urimo hesi darugo barëromo u'uhanovadeje röhu a ujo jioröhe darugoho röhu maho baejamu hu bëhoho jioromo hesi ado sirino'oho jiji mujöru'o va'ëne aho'obëhe jio'amobe sö jovo riröre jio'amaje nie'u va'ëne ëhi bogo adaho varijënoho jio'amobe rovadeje.

<sup>13</sup> Abraham Isaac Jacob jabumë God-are örire mae uehorovë'e raromobe ruejuvo vuovëvadeje. God-hu ajëmi'i uëvadëhioho bogo ehioho bae'irögoro mae bae'iröhoho ma-ëgo'o riravoromo gavanovoromo uvareje: O ë muoho mabëhe rue'a'ajëromo ëhuni va'orahoro a nuniro uvareje: Noehu ave sa'are raromaruoho ae göehu ave sa'are ma-jahuri raromarue aribövioho javuanovajëjo.

<sup>14</sup> Ehë jië'e jö uvaroho ëho no garomo uvarueje: Jabuhu uvarëhi ëhi uvarue ariböviohuro ioro'ioyemu raromo'iröhe sa'a maho nëgego ëhuni ëhi uvoruomaje höjo.

<sup>15</sup> Röhu jabesi sa'a mare jioromo rovaroho ëho bogo uehorovareje. Ehë uehorovo'ibejo ë vuonorö'ö va'iröhe öroho jiëho'ibejo.

<sup>16</sup> Röhu jabesi sa'a mare jioromo rovaroho bogo uehorovo'i a'i sa'a gö sa'a ma-mabëhe ö'idöre jiajoho ëho nimareje. Ehë nimë'ëro God-ro ëho garomo jabesi jöënioho bogo javojimo'i ma-samae uvareje: Iae na jabesi A Börömo God jevajëjo. Iae God-ro amo börömo avohëhë'eje jaburo ë va'o raromo'iröhego.

<sup>17-18</sup> Röhu Abraham-ro God mae uehorovadohuni ëhuni hejade God-ro hesi dëre bijioho gavamu hegoro God-are jöho ejahoromo Isaac baeromo God-ni ano'irögoro hesi maratuore bamahadeje. Urimë'i God-ro Abraham jö mae majahiromo uavadeje: Na bogo a göho ajami'i ma-Isaac gemu ajami'iramu ëhuro jasi ihoho jiobe va'a'ajëjo. Iae God-ro ëhi mae

uavamu hejadeje röhu Abraham-ro hesi harihu gemu'oho Isaac God-are örire bojami'irögoro ë'adeje.

<sup>19</sup> Ëhesi bëhoho Abraham-ro uehorovoromo uvadeje: A vuovamu ri'öjoro ajëmijë'oho God hu eni höjo. Röhu iae ëhi jianovadeje. Abraham-ro uvadeje: Isaac guomo'ie'ajëjo röhu gavade God-ro ajami'ego bogo guomamu sionëro baejadeje.

*Isaac Jacob Joseph ëho jabuhu God mae uehorovare jöhoje.*

<sup>20</sup> O Isaac-ro God mae uehorovadohuni ëhuni hesi harihe niö'i Jacob'o Esau'o ijönö huë mae ari'iröhe jöho majëhijadeje.

<sup>21</sup> O Jacob-ro God mae uehorovadohuni ëhuni guomo'irögoro Joseph-are harihe gemu gemu huë mae ari'iröhe jöho majëhijadeje. Majëhiromo guduodohuro bëdumo hiromo God-are örire rajahijadeje.

<sup>22</sup> O Joseph-ro God mae uehorovadeje. Mae uehorovë'ëro ëhu'ëro guomo'irögoro evare ae uëvadeje: Ijönöho Israel rajo ujo ömo'ömohuro ave Egypt sa'are jioromo va'oruomo'ajëjo. Va'irögoro nasi ijo'ahoho ujuoho va'oromo ë va'o raromo'iröhe sa'are guavo'aruëjo.

*Moses-hu God mae uehorovade jöhoje.*

<sup>23</sup> O Moses-are vëmu vavu'ohuro God mae uehorovareje. Mae uehorovë'ëro ëhuni Moses rahanugoromo gavare hu a harihu ma-mabëhe jiamu gagorovo sa'a a börömo hesi jögoru sisë aho'iröhoho bogo juhuonivareje. Bogo juhuonivo'i Moses baeromo gurihi bamo nugaroho manaere niö'i gemu barëjadeje.

<sup>24</sup> Ëhi ë'ë'ëro Moses-ro böviraeromo hu'o God mae uehorovadeje. Mae uehorovë'ëro iae Egypt sa'a a börömo hesi abojohuro Moses hesi muohoromo uvadeje: Nasi harihe höjo röhu Moses-ro ae uënövadeje: Nadi uvorëjo: Nörö Egypt sa'are a börömo hesi aboji hesi harihe höjo.

<sup>25</sup> Ëhesi bëhoho huro uvadeje: Na mu sisë vaeromo ëhuro huë ma majahuri baejë'oho ëho bogo maho jio'i a'i na God-are aribövioho jabu'o gemuore bimuvoromo huë sisë baejë'oho ëho iae maho höjo.

<sup>26</sup> Huro uvadeje: Egypt sa'are jio'amaje inömo inöme marohë'e mae naehu ujuohë'oho ëho ma-jianovo'i a'i böröme namiromo ajamui'iröhe a hesi mu naehu vaejamu aehu sivegë'oho iae mae höjo. Ëhesi bëhoho huhu u'emu bae'iröhe suvuorohemu uehorovë'e hijadeje.

<sup>27</sup> Röhu Moses-ro God mae uehorovadohuni ëhuni Egypt sa'a a börömo hesi vöröho bogo juhuonivo'i huhu hijade sa'aho ma-vuonugo'i va'adeje. Va'oromo God noehu bogo gavarue aho hu gemu uehorovajëro jië'ëro biririvadoho bogo vuonugadeje.

<sup>28</sup> Röhu Moses-ro God mae uehorovadohuni ëhuni Israel rajo aribövioho aevo'i uëvadeje: God-hu Vörö Tugoho'iröhe Söröho irëjo. O mi köe javu ojoro hijiovodivo'amorëjo ëhuro a muo'amo'iröhe anerahuro ëho garomo jemesi harihu murioho bogo bijuëmo'i vuonugo va'iröhe höjo.

*Jew rajo ae göehu göehu God mae uehorovare jöhoje.*

<sup>29</sup> O Israel rajoho jaburo God mae uehorovareje. Mae uehorovoromo gavare Kavü'e Sö Jovoho jovo ihoho Kavü'e tarioromo ruhëhi va'o numëhi va'oromo riroho sinioromo ma-sa'aemu jiamu gagorovo va'oromo ioro'oro gönö jëvamu iojiomoruomadeje. Iojiomamu gavë'i Egypt sa'a rajoho jaburo siho baejëvo va'oromo iojiomo'ia'amu gavë'i jovohuro ro döe garaëjëvamu vuovëvadeje.

<sup>30</sup> Röhu Israel rajohuro God mae uehorovoromo ehuro Jericho amoho bae'irögoro rueromo gavare amoho munë rejo egoböviëro iromo rova'ë'e jiamu gagorovo God-are jöho mae uehorovoromo amoho majae gemu vae gemu rova'o rojomonövareje. Ehi'obe va'ujuvo majae aho'obëhe 7 barëjamu rejoho aho'obëhe ahoromo sa'are ruvebijamu amoho baejareje. Amo ë ariböviohuro God mae uehorovamu ehuro amo rejoho ahoromo ruvebijadeje.

<sup>31</sup> O Rahab ae ma-gë'amaje magonahohuro God mae uehorovadeje. Mae uehorovoromo gavade sa'a bae'iröhëni möe rueruomaje Israel rajoho rovamu gëgorovo huë baeromo ajëmadeje. Ajëmijë'ëro ijonöho God-are jö bogo eruomade ariböviohu'o ho i'uoho bogo gemu maho baeromo guomo'i mae hijadeje.

<sup>32</sup> Na rabëni jöe gö'o ho majëhi'ejo. Gideon-hu ë'ade jöho o Barak-hu Samson-hu Jephthah-hu ë'obe rueruomade jöho o David-hu Samuel-hu o jö God-aro baeromo majëhinövare aribövi ioro'iorehu ë'obe rueruomade jöho na jajivo'ibejo majaho barë'ibejo.

<sup>33</sup> E'ariböviohuro God mae uehorovoromo ehuro sa'a ioro'ioroho ruahö'ö'amareje. Mu maho nigemareje. God-hu bojëmi'i mae uëvadoho baejareje. Vörö'e mi jabesi jö'o ho tugohëho'amareje.

<sup>34</sup> Vörö'e vënoho duohareje. Kaejö ëgehu muo'amëvo'i höjaroho mae rovareje. U'uhëvadoho daruge baejareje. Muorovoromo biririvareje. Biririvoromo sa'a göëro jabu'o muorovamu gagorovo sihö'öjëvareje.

<sup>35</sup> Vëmu ömo'ömhuro God mae uehorovoromo gavare jabesi aganoho vuovoromo ri'öjamu sionëro ujuohareje. Iae ehi jiadeje.

A'i God mae uehorovarue a ioro'ioroho aëro jabumë vi'ehi böröme bojëmamu hara'uoromo vuovëvadeje. Jabumë God-are jöho vuonugo'ibejo vi'ehoho bogo bae'irögoro va'oromo jabesi nimoro raromo jijihö'ibejo. Röhu ehi ë'oröhoho bijönimareje ehuro ijonö i'ovoromo ma-mabëhe raromo'iröhëro.

<sup>36</sup> O God mae uehorovarue a ioro'ioroho aëro sivëgoromo hisuebijëvamu huë vavaene böröme baeruomadeje. Röhu göho a ioro'ioroho aëro tövo'amoromo savoji gagore io'amareje.

<sup>37</sup> O God mae uehorovarue a ioro'ioroho aëro munëro vajëmijamu a ioro'ioroho aëro huruvo'amamu a ioro'ioroho kaejö ëgohuro bijio'umamu vuovo'amadeje. God mae uehorovarue a ioro'iorohuro mi sino niögu sisëho io'amoromo iruno'o rumo'e bövi bise'o rumo'e raromonövareje. Aëro anëgo birëgo'ego ëma jijihonövareje.

<sup>38</sup> Röhu jabesi sa'a rajo sisë aribövie jio'i jabumë a maemu jëvadohuni ehuni a sisë jabu'o gemuore raromë'o ho ëho bogo maehu jiadeje. A rumo'e sa'are sa'are dahorure dahorure munë gagore sa'a gagore ëma raromobe jijihonövareje.

<sup>39</sup> Eho jaburo ae aho'obëhe God mae uehorovobe rovë'ëro ehü'ëro iho ma-mabëhoho God-are örire baeruomë'eje. Iae ehi jie röhu God-hu bojëmi'i uëvadoho bogo baeruomadeje.

<sup>40</sup> Bogo baeruomade hesi bëhoho God-ro noni uehorovoromo uehoro ma-mabëhe baeromo uvadeje jabumë bogo urimoho maho jëvo'i hujeji ijonö jabu'o no'o gemu mae ma-mae javuoröhego.

## 12

*Noehu Iesu gemu uehorovoromo biririvo'iröhe jöhoje.*

<sup>1</sup> Ĕhi jië'e ae aho'o siri val'ënehu God mae uehorovoromo mae jiamu gabe rovaroho ëho jabesi jöho gavarueje. Ĕhuni jabesi jöho uehorovoromo mu göehu göehu hutitimavuajoho ëho rori'o babu'öromo uehoro sisëhu simanore badirohavuajoho ëho dibo bu'ö'irögoro God-hu bojamuade muo-huremu biririvoromo vaenövo'ejo.

<sup>2</sup> Iesuaro nunoho bamë'i muoho ëhi vaebe vae'ejo ë hesi bëhoho huro God mae uehorovarue öroho aevoromo röjahuiromo va'o ijo tugoho'i mae uehorovo'iröhe öroho röjahuijë'ego. Sa'are hiromo uvadeje: Vi'ehe baenugoromo huë mabëhe biroho'ejö uvoromo javoji vëmunajo baeröhoho bogo uehorovë'e biririvoromo korosire guomadeje. Ĕhi ë'ë'ëro jaruvoho God böröme namijaje hesi övo manö hije.

*God-hu öri ma röjahui'iröhëro i'u bojamuaje jöhoje.*

<sup>3</sup> Röhu jemëro Iesu uehorovore. A sisëho jaburo nue huodivoromo hesi muoho aho'ia'amu huro biririvadeje. Ĕaho uehorovoromo nadi dë vövöbajo'oho u'uhobe va'oromo muoho vuonugore.

<sup>4</sup> Jemë mu sisë aho gabe rovarujoho bogo ëhuro köho rueromo vuovëvë'eje.

<sup>5</sup> God-ro jemë hesi aboji harihu'e jëvajëromo hesi jögoroho majëhijë'eje jemesi dë vövöbajo'ere avoho biririvo'irarijego. Na jemë ë jöho ru-monëgë'eje o diehi jëve. Ĕjöho God-are surire jajivoromo ëhi uëvë'eje:

Nasi harihohajo. Jaehu avoho hijöro Badahu röjahiromo i'u bojamamu gavë'oho nadi juahovonëjo.

O jögoru darugo'o majahijë'oho nadi u'uhonëjo.

<sup>6</sup> Badahu ae rahu uehorovavuë'oho ë ariböviohuro avoho raromöjöro i'ue bojamuijaje höjo.

Ae rahu hesi harihe javuöjöro baejavuë'oho ë aribövioho hisuebijavuaje höjo.

<sup>7</sup> Huë vavaeni rovamu baejë'iroho uvore: God-ro no röjahuijajëromo biririvore. Ĕhesi bëhoho God-ro jemë hesi aboji harihu'e jëvajëromo ëhi'ëvajeje. Röhu di aboji harihu'oho vavuoho jaburo bogo i'uoho bojëmë'ejö. Ae aho'obëhe iae baejarueje.

<sup>8</sup> No ae aho'obëhe i'u baejaruëhi jemë'o i'u bogo baejë'oho bogo God-are aboji harihu'o maho jëvo'i a'i öbie jëve.

<sup>9</sup> Ave sa'are vavu ömo'ömohuro i'ue bojamui'ego noro mae uehorovëvonövareje. Ĕho ma-jianovo'i a'i aru'aho muebejavuaje Vavue God-hu i'u jö röjahuijajoho ëho avoho ejahoromo maro raromo'ejo.

<sup>10</sup> Ave sa'are vavu ömo'ömohuro jabesi simanehu ëma diehi diehi maho hö uvaroho ëhi majae ma-bisemu röjahuiibe ruenövareje. Ĕho ma-jianovo'i a'i God-hu röjahuijaje hesi bëhoho nosi jöënije hu mae jiajëhi no'o ëhi gemuoho javuoröhego.

<sup>11</sup> O God-hu no röjahuiromo i'u bojamuajevare evare no uvarueje: Ĕmuoho bogo huë ma'oho jio'i huë sisë baejarue muoho höjo. Röhu God-ro röjahuijego no i'ue baebe va'ojuvo eni jiego evare noro God-are mu maho avoho vaejogo dë sasohavuajaje.

*Noehu avoho biririvoromo darugo'o riravo'iröhe jöhoje.*

<sup>12</sup> Ĕhuni övo hörü'e u'uhëvë'oho avoho biririvore.

<sup>13</sup> Öroho ahörirëro iogororomo ëhuro maro jijihore hörü sisërëjëvadoho bogo rireromoromo hurönivëho'i marëjëvo'iröhe.

14 Ae aho'o jabu'o ma-gemuoro huë mae raromo'i ë'o gare. Mu mahuremu vaebe jijih'o'i ëhu'o ë'o gare. Aehu bogo ëhi ë'ë'o'oho Bada'oho bogo mae bogo raromo'ë'ö.

15 Avoho mueberovore. Aëro God-hu huë baejävaje öroho vuonugojöëni uëve. O aëro oso sisë bojëmego ae gö gö jemesi dë vövöbajo'oho ijumëvego ae aho'obëhe sisërojëvojöëni uëve.

16 O aëro önö'e muoho vaejöëni uëve. O Esau-hu ë'adëhi aëro ëhi ë'ojöëni uëve. Esau-ro God rumonimoromo ave sa'are bövie bise'ohuremu uehorovadeje. Hu harihu murioho jiadeje röhu bogo ëho uehorovoromo muri hesi suvuoro'ho bae'i a'i majae ma-gemu hesi iohuni hesi suvuoro maho ioro'io'oremu vuonugadeje.

17 Iae jemë'o gavaruje. Ijonö hu vuonugade suvuoro'ho vuonorö'ö bae'irögorö nivë'i nahadoho bogo eni jiadeje.

### *Noehu huë mae baejarue jöhoje.*

18 Israel rajo a mamiehu rovarëhioho jemë bogo ëhioho rovë'e jëve. Ëho jaburo garomo heromo rëharue dahoru ihe Sinai ë rovarëje. Rueromo gavare vëni böröme ravoromo ramoramovoromo sue baduno'e jioromo buru böröme rovamu gavë'i

19-20 hejareje hëgöe huo'ego jöho ma-darugo'o uvavavamu. Uvamu hegoro'vo hejare uëvamu: Bogo aho gemu a'i miehu rabehu ave dahoru ro rëhë'oho munëro vajamirego guomo'ira uëvamu ë jöho heromo bogo eni jëvamu hegoro'vo dinamiro'omo Moses uavareje: God uavego nadi gö'oho uvego no he'irarëjo.

21 Iae ëhi jië'e juhuoni'e muoho garomo Moses-ro uvadeje: Asë'e na butubutuegoromo juhuoninegavajëjo.

22 Jemë bogo ëhi jië'e dahoruro'ho rueromo ga'i a'i Zion dahorure rovë'e jëve. God darugo'e jië'e a hesi amo börömore ö'idöre jiaje ame Jerusalem ë rovë'e jëve. Anerae aho'obëhe raromoruomajire ë rovë'e jëve.

23 God-are aribövi jabesi iho ö'idöre jajivo'amë'e God-are harihu muri ömo'ömehu gagovoromo nimoro nimoro bamaruire ë rovë'e jëve. God ae aho'obëhe mae o sisë javuego gövuaje a hesi örire rovë'e jëve. Mu mae vaenövare aribövie God-hu avohëvamu ma-mabëhe ruahö'öjävë'e ëho jabesi aru'aho ömo'ömo jabesi örire rovë'e jëve.

24 Iesuarë örire rovë'e jëve. Hu God-hu muebejavuaje jögoru avohahuade ahoje. Sisë u'ovahuoröhego Iesuhu kö hijiovö'öjadire rovë'e jëve. Ëkö hesi jö bëhohuro Abel-are kö hesi bëhoho iosiramiro'omo maeje. Abel anamu kö rueromo guomade hesi bëhoho God-hu ae gö i'u mana bojami'iröhoho jio'i a'i Iesu anamu kö rueromo guomade hesi bëhoho God-hu huë baejavuoro'omo sisë u'ovahu'iröhohoje. Iae Iesuhu kö hijiovö'öjadire ë rovë'e jëve. Iae mabëhe rovë'e jëve.

### *Noehu avoho mueberovo'iröhe jöhoje.*

25 Ëhuni avoho mueberovore. God-hu jö bojamuijajoho nadi bijönimore. Sa'are hijade aehu God-are jö majëhijadoho Israel ariböviohuro heromo bijönimë'ëro i'uoho bogo huotovahareje. Ëho ma-jianovo'i a'i ö'idöre hijaje aehu majahuijaje jö nomë heromo vuonugë'oho diehi diehi huruomo'ejo.

26 Urimë'i God-ro Sinai dahorure jöe jövamu ehuro sa'aho hijiohijiovadeje. Avevejö'oho huro mae majahuiro'omo uövuë'eje: Majae gemu röhu maho na sa'aho hijiovo'ejo. Röhu bogo sa'ahuremu hijiovo'i ö'idöhu'o sa'ahu'o hijiohijiovo'ejo.

<sup>27</sup> Majae gemu röhu maho hijiovo'ejö uövuade hesi bëhoho huhu avoho'amade bövioho bise'oho hijiohijiovoromo ujuoho va'iramu bogojio'amo'ë'e. Ëhi jio'iramu bogo hijiohijiovoröhoho ma-ioro'iore gemu bibivoromo nami'ë'e.

<sup>28</sup> God-hu böröme namiromo muebejaje öri ari'oho bogo hijiohijiovo varijënohoje. Ëho nosije. Ëhuni God-are örire huë mae ua'ejo. Mae uaromo huhu nimajëhi noro hesi ihoho bövie hö uehorovoromo avoho rajahi'ejo

<sup>29</sup> ë hesi bëhoho nosi Böröme God sisë vënehu bue'öjanovaje aho jië'ego.

## 13

*God-hu nimorohoröhego noehu vae'iröhe mu hesi jöhoje.*

<sup>1</sup> Röhu Christian ö mueno'e göehu gö huë baerovarue muoho ëho avoho ma'ënore.

<sup>2</sup> Ëhi'oromo ga'irarije ae gö jemesi amore i'e ö'amu gavë'iroho uënövore: Nosi osaro ro raromohëjo. Urimoroho a mamiohuro gavare ae i'e rovamu uvareje: Ma-a maëremu rovaruëromo ajëmijareje. Röhu bogo aehu rueruomamu ajëmi'i aneraëro rueruomamu ajëmijareje. Ëhuni ae i'e ö'ego ajëmi'irarije muoho nadi rumonimore.

<sup>3</sup> Iesuare jöëni savoji gagore raromarue ariböviohuni uehorovore. Uvore: Jabuhu savoji gagore raromaruoho no'o gemu mae raromaruëromo ëhi huë vavaene baere. O vi'ehi baeruomaje ariböviohuni uehorovore. Uvore: Jabuhu sino vi'ehi baejaruoho no'o gemu mae baejaruëromo jabesi jöëni huë vavaene baere.

<sup>4</sup> Röhu masurovarue muoho ae aho'obëhe mae uehorovore. Baruohu'o vaborohu'o jemesi arijo'ëremu garorovore. Önö'e jijihë'oho o goho'amë'oho ëhuro God-ro i'ue mana bojëmi'ë'e.

<sup>5</sup> O nadi moniohemu bae'i uehorovo'i a'i uvore: Noehu bövi bise'oa baejaruoho iae eni höjo. Rabëni God-ro no uövuë'eje: Na bogo mae bogo ja vuororamiro mo ramo va'ejojo.

<sup>6</sup> Ëhuni no biririvoromo uvo'ejo:

Badaro na ajemijaje höjo.

Ajemijajego na bogo juhuonivo'ejöjo.

Aho diehi'oromo na ijumevo'aruëjo.

<sup>7</sup> Jemesi ekaresia a masijoho uehorovore God-are jö aevo'i majëhijaroho. Jabuhu avoho raromo jijihöjuvo ma-mae vuovëvade jöho uehorovoromo jabuhu God mae uehorovarëhi jemë'o ëhi gemuoho God mae uehorovore.

<sup>8</sup> Ëhesi bëhoho Iesu Keriso hu urimo jiadoho jaruvohu'o ijonöhu'o ëhi magemuohemu jiemu jio'ë'e.

<sup>9</sup> Ëhuni aehu sareri'e jöe gö gö barueromo röjëhijë'iroho nadi ëho uehorovoromo öri mare va'arujoho vuonugo'i ione aho bu'öromo öri göroho va'ore. Noehu uvë'oho: God-ro hesi nimoromo ajamui'iramu nosi aru'ahoho biririvahuo'ajë uvë'oho ëho mahoje. A'i noehu uvë'oho: I i'iröhe jögoru rihromë'ohuro ëhuro nosi aru'ahoho biririvahuo'ajë uvë'oho ëho bogo maehuje. I iarue jögoru ejarue aribövioho bogo ëhuro marëjëvajeje.

<sup>10</sup> Nosi sisë mu'uvahuoröhego suvuro maho God-are örire bojamijë'eje. Sisë mu'uröhe suvuroho Jew rajo priest niögu javu hesi mu vaejaruoho bogo i'ë'ö.

<sup>11</sup> Jew rajo priest börömhuro mi köho baeromo God-hu jiaje osare ë rumo va'oromo hesi örire suvure bojaminövadeje sisëho mu'u'amoröhego. A'i mi maho bogo amoroho nugo'i a'i amore jioromo ujuoho va'o rori'o vëniro huonövadeje.

12 Rori'o huonövadëhi aëro ëhi Iesu bogo amoro ho nugo'i a'i amo börömore jiamu rori'o bava'areje. Bava'amu vi'ehe baeromo guomadeje ëhuro hesi kö maho rovego hesi aribövi nosi sisëho u'ovahuoröhego.

13 Iesu amore jiamu rori'o bava'amu guomë'ego ëhuni no'o amo rajehu sisë'i uehorovarue bogo jabesi gemuoro ho uehorovo'i a'i Iesuare jöëni i'ue baeromo hu'o gemuore riravo'ejo.

14 Rabëni ave sa'aroho noehu ioro'ioremu raromo'iröhe amoho bogojavue. A'i ijönö jioröhe amohemu ëhuremu uehorovö. Ëhuni amo rajehu sisë'i uehorovarue jabesi gemuoro ho no bogo uehorovo'i Iesu'o riravo'ejo.

15 Hu'o riravoromo mi suvuoro ho bogo a'i Iesuare ihore God rajahiro mo ëhuro suvuoro ho hu bojaminövo'ejo. Ësuvuoro hesi bëhoho noehu hesi iho a huruho majëhijë'o ho ëho noro jö'o öge i va'ëne ëhi God-are örire suvuore bojamarueje.

16 O huë baerovoromo ajamirovarujoho nadi rumonimore. Ëhi jïë'e mu vaejë'o ho God-ro uvajeje: Jabumë ëhi ë'aruho ho mi suvuoro mabëhe bojamaruëjo.

17 Röhu ekaresia muebejëvarue aribövioho jabuhu jö bojëmijaruho nadi aho'i ma-ëjëhore. Rabëni jabumë jemesi dë vövöbajo'o ho muebejëharueje ijönö God-are örire majahiro mo uaruomoröhëni: Iae no jasi aribövioho ëhi ëhi muebejahare höjo. Jemëhu jabesi jö ejëhë'ohuro ëhuro jabumë bogo huë vavaenoho baeromo ëma muebejëvo'i jabesi dëho sasohëvo'iramu muebejëvo'ë'ö. O bogo ejëhë'oho jabu huë vavaene bae'ë'ö röhu ëma muebejëvo'ë'ö. Ëhuro jemë bogo marëjëvo'ë'e.

18 Röhu jemëro nosi jöëni parie vaenövore. Ëhesi bëhoho noehu uehorovaruho majae ëhi mu maemu vae'i naguoromo ëhuro no dë sasohavue. Ëhuni parie vaenövore.

19 Na nego avohe jemëro ëhi ë'ojöro ëhuro God-ro remö'öjego na jemesi örire ma-burëro ö'iro.

20 Röhu na nege huë mae bojamuaje aho God-ro jemë ajëmego mae jëvojöro. Ëhesi bëhoho sheep muebejavuaje a böröme Bada Iesu God-ro ajamijamu guomoromo ri'öjadeje. God-hu Iesu ajamade hesi bëhoho Iesu köe rueromo guomamu ëhuro God-hu no ioro'ioremu muebejavuo'iröhe jögoroho jiadeje. Ëhuni Iesu ajamamu ri'öjadeje.

21 Amo na nege God-ro jemë inömo maho mu maho aho'o ajëmego huhu nimaje muoho vae avoho'irarijego o huro nosi dë vövöbajo'o ho mae avohahuego noro mu mae vaejego huro göromo dë mae jioröhego. Huro Iesu Keriso-are jöëni ëhi ajamuijöro nege. Keriso-are ihoho ma-dö maro jïemu jio'ë'e. Iae mae.

*Ijo tugoho'i jöhoje.*

22 Aganomë naro ave jö harihoho jajivoromo bamëhe jemëro adahoromo dë vövöbajo'o ho biririvo'irarijego. Jemëro nadi u'uvo'i ma-here. Jöho bogo ëgehueje.

23 Röhu ave jöho uë'ië'e jemëro he'irarijego. Nosi öho Timothy savoji gagore hijadoho jiovo nugö'öjë'eje. Hu burëro rovamu gavë'o ho ëhuro na hu'o gemu mae ö'oromo gë'ejo. O hu bogo burëro rovë'iroho naro sivue ö'ejo.

24 Jemesi ekaresia a masijohu'o God-are aribövi ioro'iorohu'o jejëmijode höre. Italy sa'a rajo ekaresiaho jaburo jemesi örire jejëmijö.

25 God-ro ae aho'obëhe jemë huë baeromo ajëminövo'ë'e. Ahia mino'e.



## JAMES

*James-hu God-are aribövi jejëmijade jöhoje.*

<sup>1</sup> God-are mu vaejahaje o Bada Iesu Keriso-are mu vaejahaje aho na James jeve. God-are ariböviehu jemesi sa'a vuonugo'i sa'a göre göre va'o raromarujoho naro jemesi örire jejëmiye.

*Birivoromo God mae uehorovo'iröhe o hesi örire uehoro mae bae'iröhe jöhoje.*

<sup>2</sup> Nasi ö mueno'e huë vavaenehu böviehu bise'ehu burunö'e rueromo anëgë'o'oho uvore: Ma-nimoroho'iröhe muoho rovë'e höjo.

<sup>3</sup> Iae jemë'o gavaruje burunö'e rueromo anëgamu God mae uehorovoromo riravë'o'oho ehuro u'urume vaejë'i biririvobe va'arujeje.

<sup>4</sup> Röhu u'urume vaejë'i birivoromo va'onövore ehuro ruahö'ö'irarije. Ehi ë'ë'o'oho ehuro a duvahonö'e raromo'iramu ma-ëhi gemu jëvobe va'ë'e.

<sup>5</sup> Röhu ja rahuaro uehoro bogojavë'o'oho God uavego uehoro mae bojami'iro. Ua gavë'o'oho God-ro iae ejaho'ë'e hu bogo nijio'irae'i ma-huë mae bojamuijaje aëro jië'ëro.

<sup>6</sup> Röhu ua gavë'iroho nadi uehore niö'i bae'i ma-God gemu mae uehorovoromo ua gane. Bogo ma uehorovë'o'oho buru buruehu anego jovehu hasaromo ajiomobe abuebe va'ajëhi jasi uehoroho ehi ruëre numëre jiobe va'ë'e.

<sup>7-8</sup> Ehi javë'o'oho uehore niö'i baeromo öroho dadivoromo ëma juvo'a'anue. Ehi jië'e uehoro baejë'o'oho nadi uvone: Badaro bojemi'iramu bae'ejöjo. Hu bogo mae bogo bojami'ë'e.

*Bövi bise'o rumo'e ariböviohu'o bövi bise'o marohë'e ariböviohu'o ehi jië'e aribövi jabesi jöhoje.*

<sup>9</sup> Röhu Christian öe bövi bise'o rumo'e javë'oharo ga'irane jasi ihe sa'are jiajoho God-ro nigemahamu gavë'o'oho nimoronimorohë'i juvone.

<sup>10</sup> O Christian öe bövi bise'o marohavë'oharo ga'irane jasi iho döre jiajoho sa'are bejahamu gavë'o'oho ja'o nimorohë'i juvone. Ehesi bëhoho resu inehu sahorijajëhi bövi bise'o marohëvë'e aribövioho ehi sisërë'amo'ë'e.

<sup>11</sup> Majaëro rojomoromo birebire'e bamoromo resu ahore ravego rudoho sahojajeje. Inoho rireromajeje. Mabëhe gavaruoho sahorijego iae barëjajeje. Sahori barëjajëhi bövi bise'o marohëvë'e ariböviohuro mue vaebe va'ojuvo röhu maja ahë'o sisërë'amo'ë'e.

*Huë vavaene rueromo nosi dëre bijahuaje jöhoje.*

<sup>12</sup> Röhu huë vavaeni bövi bise'o rueromo dëre bijaho gavamu jaehu birivoromo hijë'iroho huë mae javajeje. Birivoromo ruahö'öjë'iroho maro hi'irane röhoho iae bae'a'anue. Erohoho God-ro uövuadeje: Na uehorovevaruje aribövioho bojemi'ejöjo.

<sup>13</sup> Röhu sisëhu ro dëre bijëho gëvë'o'oho nadi uvore: God-ro sisëho nugö'ö'ego bijahuajëjo. Nadi ehioho uvore. Rabëni hesi bëhoho God-are dëroho sisëho bogo bijiohajeje. O God bogo sisëho nugö'öjego nosi dëroho bijahuajeje.

<sup>14</sup> Bogo ehioho jie. A'i ae gemu gemu dëre bijahuaje hesi bëhoho nosi sinohuro mu sisëho nimoromo jagu barovego ehuro sisëhuro ro bijahuajeje.

<sup>15</sup> Mu sisë vae'i nimobe va'ujuvo evare mu sisëho vaejarueje. Mu sisëho vaebe va'ujuvo ijono bejavuo'iramu evare iae barëjavuo'ë'e.

<sup>16</sup> Nasi ö mueno'e ehuni nadi jemesi arijo'arijoho sareramirovoromo uvore: God-ro sisëho nugö'öjogo dëre bijahuaje höjo. Hu bogo ehioho ë'ajeje.

<sup>17</sup> A'i suvuro mabëhe aho'o hesi örire gemu jioromo rovajeje. God hu bövie bise'e jiji mujöru'e manaere majae nosi örire ajivavuo'iröhego avohade ahuro aji mahuremu iae bojamuijajeje. God bogo gorosovo'i bogo ramoramovo'i ma-ëhi gemuohemu ajivavuobe va'ajeje.

<sup>18</sup> Huro hesi nimoromo hesi jö maho nugö'öjadeje nosi örire rovego noro heromo nosi aru'ahoho i'ovahuego hesi aboji harihu'e javuoröhego. Hesi aboji harihu'e javuego ehuro inömo inömo bövi bise'o avoho'amadoho noro iosirëmiromo hesi nunire aribövioho javuoröhego.

*God-are jö bogo ma-hia'ëremu he'i a'i avo'avoho ejahoromo mu vaeröhe jöhoje.*

<sup>19</sup> Nasi ö mueno'e avehuremu uehorovore. Ae aho'obëhe jemëro jöho ma-burëro hia'ëremu henövore. Nadi ma-burëroho jöho majëhiromo ma-burëroho vörö'iraere.

<sup>20</sup> Aehu vörö'iraejë'oho bogo ehuro God-hu nimaje mu maho ri'ö'ë'e.

<sup>21</sup> Ehuni va'inumi'e mu sisë aho'o vae'i arijarujoho uehorovoromo vuonugo'i God-hu dë vövöbajo'ere bamëhaje jöho ma-u'emu sanuovoromo ejahore. Ejahë'oho jöho darugo'ëro jië'ëro ehuro jemesi dë vövöbajo'oho i'ovëvo'iramu mae jëvo'ë'e.

<sup>22</sup> Nadi sareramirovoromo God-are jöho ma-hia'ëremuoho here. A'i jöho ejahoromo huhu uëvajëhi muoho ëhi vaere.

<sup>23</sup> God-are jö bogo e'i ma-hia'ëremu hejë'oho aririre garomo

<sup>24</sup> vuonugo'i va'oromo nu ano'o bogo avohorovo'i rumonimaruëhi ma-hia'ëremu hejarue aribövioho ëhi jëvo'ë'e.

<sup>25</sup> A'i ae göehu aririre nu ano'o ga avoharuëhi ëhi God-are jögoru ga avohoromo uvë'oho: Ma-maëro jië'ëro ejaruohuro bogo tövavuë'e maro raromo jijiharue höromo biririvoromo ma'enoromo bogo ma-hia'ëremuoho heromo rumonimo'i a'i ejahoromo mu vaejë'oho ëho iae mae jio'ë'e. Ehuro rabe rabe ë'ë'oho God-ro ë aribövioho ajëmiromo huë mae bojëminövo'ë'e.

<sup>26</sup> Röhu ae göëro göëro uvarueje: No God mae uehorovoromo hesi muoho ma'ënarue hö uvo'i röhu bitaroho bogo taemë'e atarueje. Ehi ë'aruoho jabumë ma-sareramirovoromo uvarueje: No mu mae vaejarue hö uvoromo ma-döhemu God uehorovoromo hesi muoho vaejarueje.

<sup>27</sup> A'i God Vavuohuro uvajeje: Aviëhi jië'e muoho bogo ma-döëremu na uehorovevarue muoho jio'i dë vövöbajo'oho uhohu'o vaejarue mue höjo. Öbi asisö'ohu'o magonaho doruohu'o huë vavaeni baejaruoho noro jabumë ajëmiromo avoho muebejëvo'ejo. O no ave sa'a hesi mu sisëho bogo gavanovo'i ma-mu maemu vae'ejo.

## 2

*Noehu ae aho'obëhe ma-gemuoho hö uehorovo'iröhe jöhoje.*

<sup>1</sup> Nasi ö mueno'e nosi Bada Iesu Keriso hesi aji'e hijajoho mae uehorovaruejë jëvaje nadi ma-dajemuoho garomo aribövioho adovoromo ioro'ioroho rajëhi'i ioro'ioroho bijönimore.

<sup>2</sup> Ĕhesi bēhoho jemēhu God rajahi'i ro gagovaruje osare ae niō'iro rovō. Gōhuro inōmo'e aēro jiē'ēro maho io'amoromo rue'i gōhuro inōmo rumo'e aēro jiē'ēro sino sine io'amoromo rove.

<sup>3</sup> Ĕhi'oromo rovamu gavē'oho niōgu mae io'amē'e aho jemēro garomo rajahiro mo ua'a'aruje: Isi ro rōho maro hijējo. A'i niōgu sisē'e aho garomo bijōnimoromo ua'a'aruje: Janioho rōhe bogojiē'e jiaje ēhi ma-namijējo. O ua'a'aruje: Janioho arēte bogojiē'e jiaje ave sa'aro nasi hōru bēhohuro ro hijējo.

<sup>4</sup> Ĕhi uēv'oho jemesi aribōvioho adovoromo inōmo rumo'e jiē'oho ruēhi nugo'i inōmo bōrōmo jiē'oho viēhi nugarujeje. Ĕhi'oromo sisē'i uehorovoromo mevarujeje.

<sup>5</sup> Rōhu nasi ō mueno'e ave jōhuremu here. Ave sa'are aribōviehu garuomajoho inōmo rumo'e aribōviēro jēv'ēro sisē'i raromarujeje. Sa'are sisē'i raromaruoho ē aribōvioho jabumē God-ro baejēvadeje jaburo bogo sisē'ioho uehorovo'i avo'avoho hesi ōrire ma-avo'avoho uehorovo'irōhego. Mae uehorovoromo hesi ōri ari'ere va'ego muebejēvo'irōhēni. Ĕhesi bēhoho mami'e God-ro uēvadeje: Ae rahu na uehorovev'oho naro ajēmiejōjo nasi ōri ari'ere rovego muebejēvo'irodēni. Ĕhuni iae ē inōmo rumo'e aribōvioho ēhi ajēmil'ē'e.

<sup>6</sup> God-ro inōmo rumo'e aribōvioho ēhi ajēmijajeje rōhu jemēro jabesi ihoho ijumēharujeje. Ĕhi ē'arujoho rōhu rahumēro jemē iosirēmiromo i'u'e muoho bojēmiruomajeje. Inōmo ma'e aribōviohuro ē'arueje inōmo rumo'oho bogo. O rahumēro guduamēvoromo court-roho va'o bahijēvoruomajeje. Inōmo ma'e aribōviohuro ēhi ē'arueje inōmo rumo'oho bogo.

<sup>7</sup> Jemē Keriso-are iho baejarijeje rōhu ē inōmo ma'e aribōviohuro Keriso-are ihoho ijumoruomajeje. Ĕhuni nadi inōmo ma'e aribōvioho rajēhi'i inōmo rumo'e aribōvioho bijōnimore.

<sup>8</sup> Rōhu jōgoru bōrōmo bōrōmoho God-are surire jajivoromo uōvuē'eje: Jaehu jasi arijo'arije rajahirovanuēhi jasi ae gemuoho ēhi rajēhinējo. Jemēhu ē jōgoru ejahē'oho iae maeje.

<sup>9</sup> Rōhu jemē dajohemu garomo ioro'ioroho rajēhi'i ioro'ioroho bogo rajēhijē'oho ēho jemēro sisē ē'oromo jōgoroho ahē'ēro i'ue bae hesi jēve.

<sup>10</sup> God-are jōgoru ejahobe va'oromo rōhu jōgore gemu ahē'oho ēhuro hesi jōgoroho aho'obēhe sisē vae'iramu ōvōvo'e ae javo'ē'e.

<sup>11</sup> Ĕhesi bēhoho God-ro uōvuadeje: Nadi goho'amonējo. Rōhu ē ae gemuohuro jō gōhu'o uōvuadeje: Nadi ae gō anonego guomo'irajo. Ĕhuni ja bogo goho'amo'i rōhu ae gō anē'oho God-are jō ahanue ae javo'ē'e.

<sup>12</sup> Ĕhuni uvonōvore: God-are jōgoru ejahē'oho ēhuro mu sisēhu tōvavuadoho jiovahuego maro raromarue hōjo. Ĕjōgoroho God-ro ijonō garomo nosi muoho mevo ga'a'ajējo no ejahē'e o bogo ejahē'e muoho vaejē'e javuo'iramu. God-ro hesi jōgoroho garomo ēhi mevo gō'a'ajē uvoromo jemēro ēho uehorovē'i jōho atobe muoho vaebe jijihore.

<sup>13</sup> God-ro mevavuo'ajē uvo'irarije ē hesi bēhoho God-hu mevavuē'iroho gō'irōhe huē bogo baejēvare aho hesi nunire ro riravamu gōvuē'oho bogo huēho baejavuo'i mana i'ue bojamui'ē'e. O huē baejēvare aho hesi nunire ro riravamu gōvuē'oho God-ro i'ue bojamui'i ē'oromo vuonugo'i huē baejavuo'ē'e.

*No bogo ma-dōhuremu God mae uehorovo'i uhohu'o God mae uehorovoromo hesi jō ejahoromo mu vaerōhe jōhoje.*

<sup>14</sup> Nasi ö mueno'e aehu uvë'oho: Iae na God mae uehorovaje hö uvoromo röhu God-hu nimaje mu bogo vaejë'oho ëhi jië'e aho God ma-simanëremu mae uehorovajeje. I'o mu bogo vae'i God uehorovoromo ëma hijë'oho God-ro bogo maroho bamo'ë'e.

<sup>15</sup> Ëhesi bëhoho jasi Christian ö ma'ino'e iruno'e niögu suhi'e bogo eni jëvamu gëromo

<sup>16</sup> röhu bogo mae bogo ajëmi'i ma-jöemu uëvë'oho: Maro va'onëjo. Va'oromo niögu mae ujuohoromo io'amoromo i mae ujuohoromo iromo hinëjo. Röhu jabesi sinehu nimaruocho bogo ajëmë'e ma-majëhijë'oho na ëho eni jio'ë'e o bogo. Ëho bogo eni jio'ë'e.

<sup>17</sup> Ma-jöemu majëhijë'oho bogo eni jiajëhi ëhi God-hu nimaje muoho bogo vae'i God ma-dajëremu uehorovë'oho ëho ma-bëhi rumo'e muohoje.

<sup>18</sup> Röhu aëro ue'ë'e: Ae göëro God mae uehorovaje höjo. Ae göëro mu mae vaejaje höjo. Ëhi ue'iramu naro ua'ejo: Röhu aho diehi'oromo God mae uehorovoromo muoho bogo vaejaje höjo. Röhu naro mue vaeromo ëhuro ja röjahi'iramu ge'a'anuëjo na God mae uehorovaje ae jevo'iramu.

<sup>19</sup> Röhu ja simanëremu uehorovoromo uvanueje: God gemu jiajëjo. Mabëhe. Satan ajamijarue aru'ahoho jabu'o uvoruomajeje: God gemu höjo. Ëhi uehorovoromo ma-juhuonibijiohoromo butubutumoruomajeje. Ëhuni ma-simanëremu God uehorovë'oho bogo eni jie.

<sup>20</sup> Uehoro bogojië'e ae jave. God-hu nimaje muoho bogo vae'i ma-God uehorovë'oho ëho bëhi rumo'eje. Ëhi jië'e jöho na ja nage naro röjëhijego ga'iro. Aveho hene.

<sup>21</sup> Nosi hijo miono'e Abraham diehi'amu hesi ihoho God-are nuniroho maho jiadeje. God-hu nimade muoho huro vaeromo hesi harihoho Isaac baeromo God-ni suvuro buejarue maratu döre God-ni bamadeje. Ëhi'amu ëhuro hesi ihoho God-are nunire maho jiadeje.

<sup>22</sup> Ja'o gane. Abraham-ro God mae uehorovoromo o God-hu nimade muoho vaeromo mue niö'i havëvoromo vaejadeje. God-hu nimade muoho vaejë'ëro ëhu'ëro God uehorovadoho iae eni jiadeje.

<sup>23</sup> Ëhi jië'ëro God-are surire jö uövuadëhi iae ëhi jiadeje. Jöho jajivoromo uövuë'eje: Abraham-ro God mae uehorovamu gavë'ëro God-ro uvade höjo: Abraham-are ihoho iae mae höjo. Ëhi'amu aëro uvoruomajeje: Abraham God-are aemo'aeme höjo.

<sup>24</sup> Ëhu'ëro jië'ëro jemëhu gavarujoho God-are ihohemu ëma uehorovë'oho bogo ëhuremu nosi ihoho God-are nuniroho maho javuajeje. A'i God uehorovoromo röhu hu nimaje mu vaejë'ohuro ëhuro nosi ihoho God-are nunire mae javuajeje.

<sup>25</sup> Röhu jö göho naro ua'ejo bëhoho avoho ga'iranego magonahehu mu ma vaejamu ëhuro hesi iho God-are nunire ma jiade jöho. Magonahe gemu hesi ihoho Rahab-ro iae hijade höjo. Hu ae siho'amaje magonahe jiade höjo. Röhu hesi ihoho God-are nunire mae jiade höjo. Diehi'oromo ëhioho jiade höjo. God-hu nimade muoho huro vaejamu ëhuro ëhi jiade höjo. Huro gëvade Jew rajëro God-are ihore rovamu gëgorovo ajëmiromo osare hu'irae baejëvo rueromo röhu öri göro rëmö'öjade höjo mae va'iröhego. Ëhi ë'amu hesi ihoho God-are nunire mae jiahade höjo.

<sup>26</sup> Ëhi jië'ëro ave uhu jöho majëhije. Nosi sino haho'ere aru'aho bogojië'oho nosi sinoho ëma imo javuo'ë'e. Ëhesi bëhoho no God uehorovo'i röhu huhu nimaje mu bogo vaejë'oho no ëma imo sinohuremu God uehorovarueje.

## 3

*Jö maemu ato'iröhe jöhoje.*

<sup>1</sup> Nasi ö mueno'e God-are jö röjehijarue muoho majëhi'ie'e. Nadi ae aho'obëhe God-are jö röjëhi'irarije muoho ëma baere. Rabëni hesi bëhoho jemë'o iae gavarujeje Christian a ioro'ioroho God-ro iae mevëvo'i röhu hesi jö ae röjehijarue aribövi nosi muoho God-ro ga avohoromo darugo'o mevavuo'ë'e.

<sup>2</sup> No ae aho'obëhe mue aho'obëhe garaejarueje. Röhu ae rahu bogo bitaro garae'i jö maemu atë'o'ho ëhi jië'e aribövioho ma-maemu jioruomajeje. Jabesi bitaro jö'o taemë'o'ho ëhuro jabesi sino haho'e aho'obëhe taemorovoromo mu maemu vaeruomajeje.

<sup>3</sup> Ëhesi bëhoho horse jö'o'ho uehorovore. Horse jö'ore ö'o'ho ruaharueje ëhuro ö'i vitunö vitunö jaguvego jaguvaruinö ë va'iröhego. Horse jö'ore ruahë'ëro ëhu'ëro horse dajo haho'e aho'obëhe ri'öjego no naguajinö ë va'ajeje. Ëhi nosi jö'o'ho taemë'o'ho nosi sino haho'e aho'obëhe taemorovoromo mu maemu vaejarueje.

<sup>4</sup> O boat jöho uehorovore. Boat-o'ho börömeje. Buru börömëro hesi niögu ba'uorimarire namiromo biduoho baeromo va'ajeje. Boat böröme jio'i buru böröme jio'i röhu damu bise'o'ho ma'enoromo hunuovego dinö'e va'i nimë'iroho ë va'ajeje.

<sup>5</sup> O nosi bitaroho iae gemuohoje. Boat damu bise'o jiajëhi nosi bitaroho iae ëhi inömo bise'eje. Inömo bise'o jiajoho röhu damuehu boat börömo hunuovajëhi ëhi nosi bitarohuro mu börömo hesi jöho ëma jö huhe atarueje.

Röhu aveho uehorovore. Vëni hödu biseharihohuro ëhuro je'o börömoho ravo barë'ë'e.

<sup>6</sup> Bitarehu jö sisë ataruoho ëho vëni sisëho va'ëneje. Sisë bövie bise'e uehorovaruoho vaejaruoho bitarëro atarueje. Bitaroho nosi sino haho'ere jië'ëro ëhuro nosi uhoho aho'obëhe sisërëromo rumorovobe va'ajeje. Jö sisë atë'iroho mue aho'obëhe ijumaje vënohuro ravanovajeje. Ëhesi bëhoho Satan-are öri ari'ere jioromo ro nosi muoho aho'obëhe ijumo'amajeje.

<sup>7</sup> Uge sigobe je'o maje jovo maje ihe gö gö aruëre anumëre jijihoruomajoho röhu aëro ahego ëhi ë'aruoho vuonugo'i ma-jabesi röhoremu raromarueje. Ëhi ë'iröhoho aho no eni javuajeje. Ëhi ë'ë'e javue.

<sup>8</sup> Röhu jö aruëre anumëre ataruoho ahorovoromo ëhi ë'aruoho vuonugo'i ahorirëremu ato'iröhoho a vadu'o'ho bogo eni javuo hesije. Nosi bitaroho sisë vörö'e sigobu jabesi bitaro va'ënëro jië'ëro ae gö ëhi jö sisë bojëmego sisërërovarueje.

<sup>9</sup> Bitarohuro ëhuro nosi Vavuoho Bada mae uavarueje. Röhu ë God mae uavarue bitarohuro ëhuro God va'ëne avoho'amade a jabesi örire jö sisë uëvarueje.

<sup>10</sup> Jö'e gemuore jioromo röhu jö mahu'o jö sisëhu'o jovonö'e rovajeje. Nasi ö mueno'e ëhi jië'o'ho sisëje.

<sup>11</sup> Jovo mahu'o sisëhu'o sa'a gage gemuoroho bogo suorovajeje.

<sup>12</sup> Nasi ö mueno'e ijo bajo ihe gö gö bogo gemuoroho rae'i ö'i bajoho bogo ijo bajohu'o gemuoroho rae'ë'e rabëni köe gö gö jië'ëro. Sö jovohu'o jovo mahu'o bogo gemuoroho vuo'a'anue. Ëhu'ëro jö mahu'o jö sisëhu'o bogo vaerovo'ejo.

*Uehoro mae niö'i göho ave sa'a hesi uehoroho ma-döhemu mae jio'i göho God-hu bojamuaje uehoroho uhohu'o mae jiaje jöhoje.*

<sup>13</sup> Röhu romorome uehorovë'e a o nuni aji'e a jemesirire jëvë'oho ëhi jië'e ahuro hu diehi ë'ë'e. Hu avo'avoho hibe juvoromo mu maemu vaeromo ma-u'emu taemo hirono simano mae uehorovo'ë'e. Ëhi ë'ë'oho no garomo uvo'ejo: Ëaho simano mae gavë'e ae höjo.

<sup>14</sup> Röhu jemë ae gö jabesi mu mahuni dë vörönimoromo nu huodivo'i jemesi ihohemu döre bamorovo'i nimë'oho nadi nimoronimorohoromo jö huhe ë'oromo o jö sareroho atoromo God-are jö maho ijumore.

<sup>15</sup> Jemë ëhi jië'e uehoro baejë'oho nani jemë uvarujeje: Ëhi jië'oho simano ma'e uehore höjo. Röhu ëho bogo ö'idöroho jioromo ruvebi'i a'i ave sa'a hesi uehoroho jio'i ma-nosi sinemu uehorovaruoho jio'i Satan-are ariböviehu uehorovaruohoje.

<sup>16</sup> Dinö'e dinö'e ae göehu gö hesi mu mahuni dë vörönimoromo jabesi sinemu uehorovoromo döre bamorovë'oho ëhi jië'ire aëro iro muorovo'e vaeromo bövie bise'e gö gö vaejarujeje.

<sup>17</sup> Sa'a hesi uehoroho ëhije. A'i ö'idöre jioromo ruvebijaje uehoroho göje. Ëhi jië'e uehoro ma baejë'oho mu ma-mae uehorovarujeje. Mu mae uehorovoromo gemuoro mae raromoromo muoho ma-u'emu vaeromo masanuvoromo jöho ejahorovarujeje. Jöho ejahorovoromo huë baerovoromo muoho avoho vaejarujeje. No bogo ruëroho numëroho uehorovo'i majöe gemu uehorovarujeje. Bogo ma-döemuoho mu maho vae'i a'i avoho uehorovoromo dë vövöbajo'ohohu'ovaejarujeje.

<sup>18</sup> God-hu nimaje mu rueröhego nimë'oho urimo ma-u'emu sanuvoromo huë baerovo'iramu evare ëhi jië'e muoho börömorae'ë'e.

## 4

*Ave sa'a hesi mu sisë bogo uehorovo'i God gemu uehorovo'iröhe jöhoje.*

<sup>1</sup> Röhu jemë ae göehu göehu iro muorovo'e vaejaruje hesi bëhoho rabeje. Sinohemu nimarujëro jië'ëro ëhu'ëro ë'arujeje. Ae göëro göëro jemesi sivu sivue sinohuni bae'i nimoromo uehore göëro göëro gemuore umogihoromo ëhuro ë'arujeje.

<sup>2</sup> Ëhesi bëhoho jemë bövie bise'e bae'i nimoromo röhu bogo baejarujeje. Bogo baeromo ae muo'amo'irögoro ë'arujeje. Muo'amo'irögoro röhu ganiganimoromo bae'irarije öroho bogo birohogoro iro muorovo'e vaejarujeje. God bogo ua gavarujohuro ëhuro bogo baejarujeje.

<sup>3</sup> O God ua gavë'oho ëhu'ohobogo baejarujeje. Rabëni hesi bëhoho jemë sisë'i uehorovoromo mae sisë ëma ua gavarujeje ëhuro baeromo jemesi sinehu nimarujohuni bul'ö'irarijëni. Ëhuni bogo baejarujeje.

<sup>4</sup> Sareri aribövie jëve. Magonahehu bogo baru uehorovoromo taemo hi'i ma-juvajëhi jëvanove. Ëhesi bëhoho jemë bogo God gemu uehorovoromo taemo raromo'i ave sa'are mu sisëhu'ohobogovarujeje. Jemë diehi'orombogogaromo uvarujeje: Ave sa'are mu sisëho böröme hö uehorovë'ohobogohuro God bijönimarue höjo. Ëhuni ae rahu ave sa'arohemu uehorovo'i nimë'ohohu God bijönimaje aeje.

<sup>5</sup> Iae God-are surire jöho uvë'eje: God-ro bojamuade aru'ahohuni vavaenimoromo uehorovavuae höjo noro hu gemu uehorovo'iröhego. God-are jöho ëhije. Röhu nani jemëro uvarujeje: Ëho ma-jöe höjo.

<sup>6</sup> Röhu iae hu nime noro hu gemu uehorovo'iröhego. Röhu God-ro hesi nimoromo huë baejavuoromo ajamui avohajeje noro ëhi ë'iröhego. Ëhi ajamuijaje jöho God-are surire jajivoromo uövü'eje:

Biriri'övoromo masije javuajë uvarue aribövioho God-ro ahëvaje höjo. Ma-u'emu taemo raromarue aribövioho God-ro hesi nimoromo huë baejëvoromo ajëmijaje höjo.

<sup>7</sup> Ëhuni God-are jöho ejahore. Satan rovë'oho ahore. Satan ahë'oho jemesirire jiajoho ju'ebiro mo va'ë'e.

<sup>8</sup> God-are bëhoro va'ore. Hesi bëhire va'ë'oho huro jemesi bëhire rue'ë'e. Jemë sisë'e aribövie jëvaje övoho u'orovore. Vaji vaji'e aribövie jëvaje dë vövöbajo'oho avohorovore.

<sup>9</sup> Huë vavaene börömoho baere. Jemë ma-ijo'ijovoromo nimoronimoro-harujoho vuonugo'i ma-nierusuburu'e bamoromo raromoro.

<sup>10</sup> God-are nunoro uvore: Nasi ihoho abuejë'e höjo. Ëhi uvë'oho God-ro jemesi ihoho döro bamëho'ë'e.

*Noehu bogo masijo riravoromo ae gö jabesi jö sisë ato'iröhe jöhoje.*

<sup>11</sup> Nasi ö mueno'e nadi göëro gö hesi jö sisëho atore. Ö mueno'oho jabesi jö sisë jövë'oho o döre bamorovoromo uvë'oho: Ö mueno'oho sisë hö uvë'oho ë hesi bëhoho God-are jögoroho sisë'i jövoromo döro bamorovoromo uvo'a'anue: A jabesi sisë bogo ato'iröhe jögoru God-hu bojamuadoho iae hesi höjo. God-are jögoroho iae hesi hö uvë'ohuro ëhuro ja hesi jögoroho bogo ejaho'i a'i hesi jögoroho iosiramiro mo mevo ga'a'anue ga'i God-hu bojamuade jöho diho mae jiego diho sisë jiego.

<sup>12</sup> Jögoru bamade aho gemuje. Nosi sisë mevahuaje aho gemuje. Ëaehu mare bamavuë'oho o sisëre bamavuë'oho hu eni jie. Ëhuni diehi'oromo uvanueje: Na böröme jevo'i God bise'e höromo ëhuni döro bamorovoromo jasi a hesi jö sisë mevanueje.

*Bogo nosi sivuoho eni javuajë uvoromo ma-döhemu nimoronimorohë'i ato'iröhe jöhoje.*

<sup>13</sup> Röhu ave jöho majëhi'ië'e here. Jemë a ioro'iorohuro uvarujeje: Jaruvo ë amore iae no va'ejarëjo. O uvarujeje: Nëri ë amore iae no va'ejarëjo. Va'iröhoho va'o vadune gemu hesi uhure ë raromoro mo mue vaeromo moni bövie bae'ejarëjo.

<sup>14</sup> Ëhi uvarujoho röhu nëri diehi jëvo'iröhoho dadivëve. Ëhuni vadune gemu ëhi jëvo'iröhoho ëhu'o dadivëvajeje. Ëhesi bëhoho jemë sue va'ëne jëve. Sueho majae bisemu numoromo evare dadovo va'oromo barëjajëhi ëhi jëvo'ë'e.

<sup>15</sup> Ëhuni nadi uvo'ibejarije: Ëhi ë'ejarëjo. A'i uvo'ibejarije: Hesi Badahu nimë'ohuro no biririvoromo raromoro mo ëhi ëhi ë'ejarëjo. Ëhi uvo'ibejarije iae mae jio'ibejo.

<sup>16</sup> A'i jemëro uvarujeje: Ëhi ëhi ë'iröhoho nosi sivuoho iae eni javuajëromo ma-döhemu nimoronimorohë'i atarujeje. Ëhi jië'oho bogo maehuje.

<sup>17</sup> Ëhu'ëro jië'ëro ae rahu mu ma vae'iröhoho garomo röhu bogo vaejë'oho ëho mu sisë vaeruomajeje.

## 5

*Bövi bise'o marohë'e mae ariböviehu avo'avoho uehorovo'iröhe jöhoje.*

<sup>1</sup> Röhu inömo marohë'e mae jië'e ariböviohumë aveho here. Nierusuburu'e bamo avohore huë vavaene börömo böröme jemesi örيره rue'ië'e jiaje.

<sup>2</sup> Bövi bise'o börömo bëhi jëvajoho sagohoriro mo muduhi'amo barë hesije. Giresasaëro jemesi niögoho tarivo'amo hesije.

<sup>3</sup> Jemesi mae sisë'o maho maho dë'irae'amo hesije. Dë'irae'amo'iramu ëhuro jemesi nigoji öroho va'orahoro jio'i jemë vënëro ravëvanovo'ë'e. Ave maja barë'ië'aje majare jemë inömo inömo bövi mae bahi avohë'e jëve.

<sup>4</sup> Aveho gahe. Jemesi mu ariböviohuro jemesi mure va'oromo iruno'oho tarivoromo gagovëhë'ejö. Jemesi muoho ëhi vaejëhamu jemëro bogo manaho i'imëmi'i jemesi vajiohëro bahijë'e jëve. Vajiohëro bahijë'ëro ëhuni jaburo darugo'o uvoruomajeje: Nosi a masijoho rabëni nosi manaho bogo i'imamuarue hōjo. Ëhi atarue jōho God bövi bise'o muebe'amaje aho hu iae hejajeje.

<sup>5</sup> Jemë ave sa'are raromoromo mahunö'e raromobe sinehu nimaje muohemu uehorovobe rovë'e jëve. Mahehu i ue'ahoromo masijorijaruëhi ëhi ë'obe rovarijoho mahunö'e muo'amëvego vuovo'irarije majaho rovë'eje.

<sup>6</sup> Mu sisë rumo'e aribövioho jemëro sarerisareriëmiromo court vaejëvoromo uëvarijeje: Sisë'e jëvaje öri sisëro va'ohëjo. Ëhi'oromo muo'amëvarijeje. Röhu jabumë vörö rumo'ëro jëvë'ëro jemë bogo ahëvarueje.

*Badahu rueröhego birivoromo taemo raromoromo muebe'iröhe o God-are örire ëninami'iröhe jōhoje.*

<sup>7</sup> Röhu ö mueno'e birivoromo ma-taemo raromoromo muebejego Bada rue'iro. Jemë'o uehorovore. Nimarue iruno'o gagovo'ië'iroho öjë'ëro iruno'oho bogo burëroho gagovo'amarueje. Urimo birivoromo muebejuvo urimore niohijo majaho rovego muebejuvo ijo tugoho'i niohijo majaho rovego birivoromo muebejuvo ijonö iruno'e mabëhe rijego evare gagovo'amarueje.

<sup>8</sup> Iruno'o riröhego birivoromo muebejaruëhi jemëro ëhi dë vövöbajo'oho birivoromo muebere Bada vuonorö'ö rue'ië'e jiaje.

<sup>9</sup> Nasi ö mueno'e huë vavaene rovego baejarujoho nadi göëro göënioho dë vi'ehimoromo ëma nibejahirovoromo uarovore: Jero ë'ane hōjo. Ëhi'amu gavë'oho God-ro mevëvoromo i'ue mana bojëmi'ë'e. Gare. No mevavuo'iröhe a hesi majaho dunove.

<sup>10</sup> Nasi ö mueno'e a mamioho uehorovore. Badare ihore jö majëhinövare aribövioho uëve. Jabumë huë vavaene baeromo röhu ma-birivoruomadeje. Jabuhu biririvarëhi jemë'o ëhi birivore.

<sup>11</sup> Ae gö gö huë vavaeni baeromo röhu biririvarohuni ëhuni no uvarueje: God-hu mabëhe ajëmijadoho jioruomajëjo. Ëhuremu uehorovore. Röhu a mami ae Job-hu huë vavaeni baeromo röhu biririvade jōho iae jemë'o hejarijeje. Job-hu biririvobe rovamu ijonö Badahu mabëhe ajamijade jōho ëhu'o gavarujeje. Iae Badaro bogo bise'o vadu'oho vavaenimoromo huë baejavuaje ahuro jië'ëro ëhu'ëro Job ajamijadeje. Ëhuni jemë huë vavaene baeromo biririvë'oho God-ro jemë'o ajëmi'ë'e.

<sup>12</sup> Nasi ö mueno'e ave jögoru börömo börömoho here. Jemëhu jö atë'iroho nadi ö'idö ihoroho o sa'a ihoroho o bövi bise'o ihoroho atorego darugo'e jōho jio'iro. Nadi ëhioho ë'i a ejaho'ië'iroho ma-uvore: Io'ajo. O bogo ejaho'ië'iroho ma-uvore: Bogajo. Ëhemu uvore. Ëhemu uvë'oho ëhuro God-ro bogo mevëvoromo i'uoho mana bojëmi'ë'e.

<sup>13</sup> Röhu jemë ae gö huë vavaeni baejë'oho ë ahuro God-are örire ëninami'iro. Ae gö dë sasohë'oho huro jöe ioromo God-are örire rajahi'iro.

<sup>14</sup> Ae gö guomo guomo baejë'oho huro ekaresia muebejarue a duvahuni jöe nugö'ojego rue'iro. Rueromo jaburo God-are örire ëninamiromo Badare ihore ijo bajo'e jovoho otehaho'iro.



<sup>15</sup> God mae uehorovoromo ëninamijë'oho ëhuro Badaro guomo guomo'e aho ajami'iramu marëromo i'ovo'ë'e. O mu sisë rabe rabe vaejë'oho God-ro uehorovoromo vuonugaho'ë'e.

<sup>16</sup> Ëhuni mu sisë vaejë'oho ae göëro gö huruoho majahirovonövore. Ëhi'oromo göëro göho uehorovoromo God-are öroro ëninamirego guomo guome o sisë rabe rabe jëvajoho marëjëvo'iro. A maehu ëninamijë'oho God-ro börömo mae ajëmi'ë'e.

<sup>17</sup> Ëhesi bëhoho jö God-aro baeromo a majëhinövade ae Elijah no va'ëne ae jiadeje. Röhu God-are örire biririvoromo ëninamijadeje ënoho barëjöro. Ëninamijamu ëni sa'are bogo rovadoho vadune aho'obëhe niö'i gemu röhu manaere aho'obëhe 6 ëhi barëjadeje.

<sup>18</sup> Barëjamu röhu maho God-are örire uavamu huro ënoho nugö'öjamu rovamu sa'are iruno'oho marë'amadeje.

<sup>19</sup> Nasi ö mueno'e jemë ae göehu God-are öri ma vuonugoli aruëre anumëre ma-va'amu gagoro ae göehu ajamijamu öri mare sionehu rovamu gavë'oho

<sup>20</sup> jemëro uvore: Ae öri sisëre juvajoho ae rahuhu ahoromo mu mae röjahijë'oho ëhuro ë a hesi aru'ahoho ajami'iramu bogo guomo öriroho va'a'ajëjo. O ëhuro God-ro mu sisë aho'obëhe mu'u'amo'ajëjo. Ahia mino'e.

## 1 PETER

*Peter-hu God-are aribövi jejëmade jöhoje.*

<sup>1</sup> Iesu Keriso-are apostle Peter naro jemesi örire jejëmiije. God-hu hesinö baejövade aribövioho jemë jemesi sa'aho vuonugo'i Pontus Galatia Cappadocia Asia Bithynia ë sa'are ma-jahuri raromobe va'aruje aribövie jëve.

<sup>2</sup> God Vavuohuro hesi nimë'ëro jemë baejövamu hesi Aru'ahohuro jemë avohëvadeje ehuro jemëro hesi aribövi maemu jioromo Iesu Keriso-are jöho ejaho'irarijego o hesi köhuro jemë u'ovëvo'iröhego.

Na nege God-ro huë baejëvoromo ajëmi avohego maro raromonövo'irarijego.

*Mae javuoröhego noehu biririvoromo muebejarue jöhoje.*

<sup>3</sup> Asë'e God hu mabëheje. Hu nosi Bada Iesu Keriso-are Börömeje o göho hesi Vavueje. Eaho God Vavuoho hu mabëheje. Ehesi bëhoho huro nosi jöëni börömo mae vavaenimë'ëro Iesu Keriso ajamamu guomoromo ri'öjadohuro ehuro no'o ajamuamu i'ovoromo mu i'oho baejë'ëro nune jioromo biririvoromo muebejarueje mae javuoröhego.

<sup>4</sup> Noro muebejarueje Vavuehu hesi aribövi no bojamui'iröhe suvuro mae gö gö baeröhëni. Esvuoroho ö'idöre jemëni nugëhë'eje u'emu bae'irarijego. Eö'idöre jiaje suvuroho bogo sagohori'i bogo sisërë'i ma-maemu jiobe va'ë'e.

<sup>5</sup> Iae jemëhu God ma uehorovarujohuro ehuro God-ro hesi darugohuro burunö'e aegëhobe va'ajeje ijo tugoho'i majaho rovego evare maro bamëvo'iröhe öroho mami'e avohëhë'ëro evare röjehijego ga'irarijego.

<sup>6</sup> Huhu maro bamëvo'iröhe öroho uehorovoromo nimoroho avoharujeje. Iae jaruvoho God-hu nimë'oho jemëro huë vavaene bövie bise'e baeromo ehuro majae ma-bunemu vavaenimë'e raromarujeje. Ehi jie röhu iae nimoroharujeje.

<sup>7</sup> Huë vavaeni baejaruje hesi bëhoho jemë'o no'o ga'iröhëni jemesi uhohu'o biririvoromo God mae uehorovego. Ehesi jöho na uhu'e uë'ië'e. Gold mae avoho'ië'iroho vëniro buejarueje. Vëniro buejego ravoromo va'inumoho si'urë barë'i ma-aji mae jiajeje. Röhu gold-ho bogo ioro'ioemu jio'irögoro jemëhu God mae uehorovaruje muoho ma-jiemu jiobe va'ë'e. Ehi jië'ëro God uehorovaruje muohuro gold-ho iosiramiro mo ma-mabëheje. Röhu vënehu gold buejego ravajëhi huë vavaenohuro jemesi örire ehi vëninö'e ravëvajeje. Röhu gold vëniro buejego ravoromo sisë si'urë barë'i aho'o ma-maemu jiego gavaruëhi jemë ehi huë vavaenoho baejarujeje ehuro jemëhu God uehorovarujoho biririvego jemë'o no'o garomo uvoröhëni: Jemë huë vavaene baeromo biririvoromo God mae uehorovobe rovë'ëro ehü'ëro jemesi uhohu'o God maemu uehorovaruje höjo. Ehi uvego Iesu Kerisoro a nuniro rovego evare God-ro jemesi ihoho döro bamëhoromo rajëhiromo mabëhe uëröhego. Ehu'ëro jemë huë vavaenoho baejarujeje.

<sup>8</sup> Amo Iesu Keriso rue'iramu jemesi ihoho ehi ma-maemu jiëho'ë'e. Avevejö'oho jemë hu bogo gavë'e jemesi dë vövöbajo'ohu hure hesi örire uehorovarujeje. Jemë hu bogo nunoho gavarujeje röhu hu mae uehorovoromo nimoroho avoharujeje. Nimoroharuje jöho börömo bëhe jië'ego ë hesi jöho bogo ato varijënoho jëve.

<sup>9</sup> Jemëro uehorovoromo uvarujeje: Noehu Keriso mae uehorovarue hesi bëhoho ijönö God-ro nosi dë vövöbajo'oho maro bamahuo'iramu iae mae javuo'ajë uvoromo huë mabëhe jëvego nimoroharujeje.

<sup>10</sup> Urimo Keriso bogo rovadevare evare God-hu jemë mare bamëvoröhe jöho jö hesirire baeromo majëhinövare a mamiohuro majëhinövareje. Majëhiromo röhu ë jö hesi bëhoho avo'avoho nahareje ga'i ë muoho diehi jiego.

<sup>11</sup> Kerisohu vi'ehi baeromo guomoromo ijönö aji bae'iröhe jöho Keriso-are Aru'ahohuro jabumë röjëhijamu simanore baeromo bëhoho nahoromo uvoruomadeje: Èhi jië'e muoho divare diehi jio'a'ajëjo.

<sup>12</sup> Bëhoho nahamu God-ro röjëhijamu garomo uvareje: Noehu jajivarue mu mabëhoho jaruvo ave sa'are raromaruoho no bogo ga'i ijönö raro-moruomoröhe ariböviohuro garuomajëjo. Èjöhö God-ro röjëhijamu bae-jareje. Röhu avevejö'oho ë muoho jemë iae hejë'e jëve. God-hu ö'idöre jiamu noni nugö'öjade Aru'aho hesi uehoroho baeromo aëro ë mu ma hesi jöho huruoho majëhijamu hejarijeje. Èmu ma hesi bëhoho aneraho jabu'oheli nimoruome röhu bogo eni jëve.

*Noehu mu sisë bogo gavanovo'i mu maemu vaeröhego God-hu uövuade jöhoje.*

<sup>13</sup> Èhuni nune jioromo mue vaeli avo'avoho uehorovore. Iesu Keriso a nuniro rue'iramu God-are aji maho bae'a'aruje. Èjöhuremu avo'avoho uehorovë'e raromore.

<sup>14</sup> Èhi uehorovë'e raromoromo God-are jöhuremu ejahonövore. Mami'e God-are jö bogo hejarije majare jemesi sinehu nimajohemu vaejarijoho èhi jië'e mu öriroho nadi jijihore.

<sup>15</sup> Nadi ehioho jijihö'i a'i mue bövie bise'e vaejë'iroho dë vövöbajo'ohohu'o ma-mae jioromo raro mo jijihonövore. God-hu jemë hesinö jëvojöro uëvade aho hu ma-maemu jiajëhi èhi jiore.

<sup>16</sup> Èhesi bëhoho God-are surire jöho uvë'eje: God na ma-maemu jevë'e jiaje èhuni jemë'o ma-maemu jiorëjo. Èhuni èhi ë'onörovore.

<sup>17</sup> God-ro bogo nue gö gö uehorovoromo gö'i a'i ma-gemu göromo nosi muoho diehi jiego garomo mae o sisë uövuajeje. Èhi jië'e aho jemë Vavuoho hö uavarujeje. Èhuni ave sa'are ma-jahuri raromarujoro God börömo hö uehorovë'i raromore.

<sup>18</sup> Èhesi bëhoho jemesi hijo miono'ohuro Keriso bogo uehorovë'ëro bëhi rumo'e muoho röjëhibe rovamu jemëro èhemu ejëhoromo sisë hesi darugoremu raromonövarijeje. Èhi jëvë'ëro God-hu nimaje muoho bogo vae varijënoho jëvadeje. Èhi jëvamu God-ro ajëmijë'ëro mae jëve. Röhu jemë'o iae gavarujeje. God-ro jemë ajëmi'irögoro ijo bajoho o bövi bise'o maho bogo èho bu'öromo èhuro ajëmijadeje èhi jië'e inömo ma-jahuri inöme jië'ego.

<sup>19</sup> A'i Keriso-are kö maho bamoromo èhuro mae ajëmijadeje. Èhesi bëhoho urimoroho Jew rajëro God-ni suvoro bamahö'ië'iroho sheep harihe mamahuremu muo'amoromo suvoro ho bamahonövareje. Keriso èhi jië'e suvoro maemu jiadeje. Èhi jiamu God-ro hu bamadeje jemëni guomoröhego.

<sup>20</sup> Jemëni guomoröhego sa'ae bövie bise'e bogo bamadevare God-ro hu baejadeje. Amo ave ijo tugohö'i majare jemesi jöëni God-ro hu nugö'öjamu a nuniro rovadeje.

<sup>21</sup> Rueromo jemë ajëmijël'ëro ëhu'ëro jemëro God mae uehorovarujeje. God-ro Keriso ajamamu ri'öromomo aji maho baejël'ëro ëhu'ëro jemëro God gemu uehorovoromo uvarujeje: Iae huro no'lo ajamui'ajëjo.

<sup>22</sup> Röhu God-are jö maho ejahoromo ëhuro mu sisë uehorovarijoho vuonugë'e jëve. Vuonugo'irögoro Christian ö mueno'oho bogo ma-döemuoho a'i dë vövöbajo'lo uhohu'lo uehorovëvë'e jëve. Ëhuni göëro göho dë vövöbajo'e aho'lo uehorovëvo avohore

<sup>23</sup> ë hesi bëhoho jemë Christian vaeromo ëhuro harihu aboji'e i'e rahëvanovamu i'oro aevoromo biririvë'e jëvaje. I'lo rahëvade hesi bëhoho vuovëvo'iröhe vëmu vavu'lo jabesi ujoho bogo bamëvo'i a'i God ioro'ioemu hijaje a hesi ujoho bamëvadeje. God-are ujo hesi bëhoho iae God-are jöjeje. Hesi jöho darugo bojëmijaje ioro'ioemu jioröhe jöhoje.

<sup>24</sup> God-are surire jöho ëhi gemuoho uvë'eje:

Ae aho'obëhe garasi va'ëne jio'amajëjo.

Inöme bövie bise'e mabëhe hö uehorovaruoho ëho resu resu ino va'ëne höjo.

Röhu garasioho sahori'amaje höjo.

Resu inoho rireromaje höjo.

<sup>25</sup> A'i Badare jöho ëhi jiemu jiobe va'aje höjo.

Ëjöho iae Keriso-are jö ma aehu majëhijamu hejarijohoje.

## 2

### *Bada Iesu hu munë va'ëne jiaje jöhoje.*

<sup>1</sup> Jemë i'e rahëvanovë'e aribövie jëvë'e jiaje ëhuni mu sisëho aho'obëhe vuonugore. Sareri sareri'e muoho döëremu mae vaejaruje muoho vuonugore. A jabesi mu mahuni dë vörönëgajoho vuonugore. Jö sisëho vuonugore.

<sup>2-3</sup> A'i jemëro mami'e herovarijeje Badaro jemë huë baejëvamu. Huë baejëvamu herovë'e jëvaje ëhuni i'e rahëvë'e asisö'ehu amu rihu ue'aho'i nimoruomajëhi ëhi dë vövöbajo'lo hesi amu maho ue'aho'i nimonörovore. Ëhi jië'e amu ue'ahë'oho jemesi aru'ahoho biririvobe va'ojuvo ijonö a duvaho va'ëne jioromo maro raromo'aruje.

<sup>4</sup> Röhu jemëro Bada Iesuarinö ruere. Hu hesi darugoremu hiromo darugo bojamuijaje ahoje. Hu munë va'ëneje. Ëmunëho aëro sisë hö uvoromo vuonugamu God-ro maego hesi baejadeje.

<sup>5</sup> Röhu jemëro Iesutare darugoho baejë'e jëvaje hesi öroro rovego God-ro jemë munë gagovëvanovoromo hu'lo havëvoromo javu böröme vaejëvanovo'iro jemë gemuoro jëvego hesi Aru'ahohuro ë va'lo hi'iröhe. Ëosa börömore jemë ë rumo va'oromo priest muoho vaenövo'aruje. Jew rajo priest-ehu God-are osa börömore rumo va'oromo God-ni suvuro bahi-jaharëhi jemëro ëhi priest muoho vaeromo jemesi dë vövöbajo'lo suvuroho Iesu Keriso-are jöëni God-are örire bojaminövo'aruje. Ëhi jië'e suvuro bojamijë'oho God-ro garomo nimajeje.

<sup>6</sup> Ëhesi jöho God-are surire jajivoromo uvë'eje:

Ëhuro gahëjo. God naro munë va'ëne aho Zion bamajëjo

huro munënö'e biriri'e bönu mabëhëro namijego ëhuro javuoho bibivoröhego.

Ae rahu ë aho mae uehorovë'oho bogo javojimo ga'a'ajëjo.

<sup>7</sup> Mae uehorovaruje aribövioho jemëro uvarujeje: Ëmunëho iae mabëhe höjo. A'i bogo ma uehorovarue aribövi jabesi jöho God-are surire jajivoromo uvë'eje:

Munë javue vae'irögoro munë gemu bijönimoromo vuonugare höjo.

Vuonugaroho jaruvoho ë munëhuro javuoho nigemo'ego bibivoromo mae namijajëjo.

<sup>8</sup> Röhu jabesi jö göho jajivoromo ëhi uvë'eje:

Aëro ë munë va'ëne are ro biberovo'aruëjo.

Hesirire ro rireromo'aruëjo.

Biberovarue hesi bëhoho God-are jöho juahobijioharueje God-ro ëhi jië'e i'uoho bamëhë'ëro.

*No God-are aribövie javuaje jöhoje.*

<sup>9</sup> A'i jemë God-ro baejëvë'e aribövie jëve. Hu'o masije riravarue priest ömo'öme jëve. Ma-maemu jëvë'e aribövie jëve. Hesiremu jëvaje hesi bëhoho jemëro hesi mu mabëhi hesi jöho ae majëhi'irarijigo rabëni jemë ramoramore raromamu huhu baejëvoromo hesi aji mare bamëvadohuni ëhuni ae majëhi'irarijigo.

<sup>10</sup> Urimoho jemë iho rumo'e aribövie jëvadeje. Jaruvoho God-are aribövie jëve. Urimoho God-are huë maho bogo baejarieje. Jaruvoho hesi huë maho baejë'e jëve.

*No God-are muemu vaejarue aribövie javuaje jöhoje.*

<sup>11</sup> Aganomë na jögore bojëmi'irögoro ë'e. Jemë ave sa'are raromaru-joho sa'a göre ma-jahuri raromarue aribövioho va'ëne jëvanove. Ëhuni uëve jemesi sinehu mu gö gö nimoromo aru'ahohu'o umogihajoho nadi gavanovore.

<sup>12</sup> A'iro God bogo uehorovarue ariböviohu'o raromoromo mu maemu vaebe va'ore. Ëhi ë'ë'oho jabumëro jö sisë bu'öromo jemë sisë vaejaruje hö uëvaruoho röhu gë'iröhe jemë mu mae vae'iramu gëgorovo va'o ëho majaho rue'iramu God-are ihoho mae ua'ë'ö.

<sup>13</sup> Röhu Badare jöho uehorovoromo aehu masijo bahi'amare aribövioho aho'obëhe jabesi jöho ejëhore. Aehu böröme namiromo nosi sa'ae aho'obëhe muebejavuajoho ejahore.

<sup>14</sup> A börömo hesi bëhire raromoromo sa'are mu muebejëvaruoho ejëhore. Ësa'are a börömohuro jabumë rëm'öj'ë'e mu sisë'e aribövioho i'ue bojëmi'i mu ma'e aribövioho mae uëröhego.

<sup>15</sup> Jemëhu a masijo ejëho'irarije hesi bëhoho God hu nime jemëro mu mae vaejigo sisë'i uehorovarue ariböviohuro ëho garomo simano rumo'e jöho vuonugoröhego.

<sup>16</sup> Röhu aehu a gö jabesi darugoremu raromoromo jabesi muemu vaejaruëhioho nadi ëhioho raromo'i mae raromo jijihore. Ëhi'ore röhu nadi uvore: No bogo a darugoremuoho raromo'i iae no nosi mae raromo jijiharuëromo ëhuni ri'öromo mu sisëho vaere. A'iro uvore: No God-are darugoremu raromoromo hesi muemu vaejarue aribövie javuajëromo mae raromo jijihore.

<sup>17</sup> Ëhi'oromo ae aho'obëhe rajëhire. Christian ö mueno'oho dë vövöbajo'le aho'o uehorovëvore. God böröme hö uehorovore. Sa'are böröme namiromo muebejavuajoho rajahire.

*Kerisohu huë vavaeni baejadëhi no'o ëhi huë vavaeni baeröhe jöhoje.*

<sup>18</sup> O ae gö jabesi darugoremu raromoromo mu vaejëharue aribövioharo jemesi mu simano vaejarue aribövioho masije hö uehorovoromo jöho ejëhonövore. Jemesi a masijehu a mae jioromo sanu'e jöemu majëhijë'oho ejëho'i röhu vörö'e aribövioho jabu'o ejëhonövore.

19 Ëhi jië'e sisë aribövi ejëho'irarije hesi bëhoho jaehu God-are jö uehorovanuohuni aehu huë vavaeni ëma bojamamu ma-herovë'i taemorovoromo hijë'o'oho God-are huë maho bae'a'anue.

20 O jemë mu sisë vaejamu aehu muo'amëvamu jemëhu ma-taemorovë'o'oho no rabëni uvo'ejo: Jemë taemorovarujohuro jemesi ihoho ajiomë'e höjo. A'i jemë mu mae vaejë'iro huë vavaeni bojëmamu ma-taemorovë'o'oho ëhuro God-hu gavajoho maeje.

21 Rabëni hesi bëhoho God-ro ëhi jië'e huë vavaeni'e muoho jemesi örيره bojëmijë'eje. Keriso hu'o jemesi jöëni huë vavaene baejadeje. Huë vavaene baeromo ëhuro jemëhu diehi ë'irarije muoho röjëhijadeje huhu ë'adëhi jemë'o ëhi ë'irarijeho.

22 Hu mu sisëho bogo vaejadeje. Sareri'e jöho bogo jövadeje.

23 Aehu sivohijaroho bogo mana sivëgonövohijo. Aehu vi'ehi bojamihi-jaroho hu bogo jö darugo'o'oho mana majëhinövohijo. A'i hesi arijo'arije God-are övo döre bamorovadeje hu mae mevoromo gavaje aego.

24 Ëhi'oromo huro nosi sisë hesi i'uoho hesi sino haho'ere baeromo korosire guomadeje ëhuro no vuovanovoromo öri sisëho ioro'iore gemu vuonugo'i i'ovoromo öri maremu jijihoröhego. Huhu vi'ehi baejadohuro ëhuro jemë sisë'i raromarijoho marëjëvë'eje.

25 Sheep-ehu sidövanovoromo jijiharijoho jaruvoho sheep o jemesi aru'aho muebe'amaje a hesiro vuonorö'ö rovë'e jëve.

### 3

#### *Vaboro'o baru'o diehi ë'iröhe jöhoje.*

1-2 Röhu vaboroharo jemesi baru jabesi jöho ëhi ejëhore. Ejëhorego baruehu God-are jö bogo ma uehorovë'o'oho vaboro jemesi Christian jöho bogo hejë'e jemesi muohemu garomo ga'iro jemëro God böröme hö uehorovoromo mu ma-maemu vaejeho gëromo huotorovoromo Keriso mae uehorovoruomo'iro.

3 Röhu jemë mae jëvego baruehu gëjörö nimë'o'oho nadi sinemuoho rajahirorovoromo ijo bajo börömoho bu'öromo ëhuro simano uoho avohorovoromo nieniaho niögohö bövioho bise'o'oho imoromo io'amego mae jëvego gë'iro.

4 Nadi sinemuoho uehorovo'i a'i dë vövöbajo'o uhohu'o avohorovego gë'iro jemesi muoho mae jiego. Sino avohorovë'o'oho mavojirojävo'iramu sisërëjëvo'ë'e. O dë vövöbajo'o avohorovë'o'oho gë'ë'ö mae jëvemu jëvobe va'iramu. Dë vövöbajo'o avohorovo'irarije hesi bëhoho ma-u'emu taemo raromo'irarije jöhoje. Jemë ma-u'emu taemo raromë'o'oho God-ro gëvajeje jemë ma-mabëhe jëvego.

5 Urimore God gemu uehorovonövare magonaho ömo'ömehu jabesi dë vövöbajo'o avohorovarëhi jemë'o ëhi avohorovore. Jabu ëhi ma-u'emu taemo raromoromo avohorovoromo jabesi baruoho ejëhonövareje.

6 Ëhi jië'e magonahe gemu Sarah-ro hesi barue Abraham-are jöho ëhi ejahoromo hesi örيره uanövadeje: Nasi böviohajo. Jemë bogo nurunurumoromo juhuonivo'i a'i mu mae vaemu vaejë'o'oho ëhuro jemë Sarah-are aboji ömo'ömoho va'ëne jëvanovo'ë'e.

7 Röhu baruoharo jemesi vaborohu'o gemuore raromarujevaro ëhi avo'avoho uehorovoromo raromore. Uvore: Ama'i nosirire jiaje darugoho ëhi jië'e darugoho magonaho jabisiroho bogohöjo röhu jabu'o no'o God-are harihu aboji'ëro javuë'ëro huro no ajamui'iramu ioro'ioremu hu'o maro raromo'ejarëromo vaboroho rajëhire. Vaboro rajëhijë'o'oho ëhuro jemëhu God-are örيره jö ataruje muoho bogo sisërë'ë'e.

*Noehu mu ma vaejego aehu bijönimoromo huë vavaeni bojamuijarue jöhoje.*

<sup>8</sup> Röhu jöe gemu ijo tugoho'ioho majëhi'iramumu iae barë'ë'e. Jemë ae aho'obëhe jöe gemu uehore gemu baeromo ö mueno'ehu rajahirovaruëhi ëhi huë baeromo rajahirovoromo ma-taemo raromoro.

<sup>9</sup> O ae göehu sisë vaejëvë'iroho nadi mana jabesi öriroho sisë vaejëvore. O jö sisë uëvë'iroho nadi mana jabesi öriroho jö sisëho uë'i a'i jemëro God uavego huro jabumë mae vaejëvo'iro. Ëhesi bëhoho God-ro jemë hesinö jëvojöro uëvadeje ëhuro jemë mae vaejëvego maro raromo'irarijego. Ëhuni jemëro hu uavego a ioro'iorohu'o mae vaejëvo'iro.

<sup>10</sup> Jemëhu ëhi ömo'irarijoho God-are surire uvë'eje:

Ae rahu mae hi'ië'iroho

sine sasohoromo juvo'ië'iroho

bitare taemoromo jö sisëho nadi bu'önëjo.

Jö'e tugohoromo nadi jöho ruëroho numëroho ma-jövonëjo.

<sup>11</sup> Mu sisë vaejanuoho gororomo mu maemu vaenëjo.

A'o mae avoho hi'i sivoho avohonëjo

<sup>12</sup> rabëni hesi bëhoho Badare nunoho ma aribövi jabesiroho bogo ahoro'i ëninamijaruoho hejëho'i

sisë aribövioho deje bojëmaje jiaje.

<sup>13</sup> Jemë mu mae vae'i ëhemu uehorovë'ohu rahuro jemesi öriroho sisë vaejëvo'ë'e. Aho bogo sisë vaejëvo'ë'ö.

<sup>14</sup> Röhu jemëhu mu mae vaejamu aehu bijönimoromo huë sisë bojëmamu baejë'ohuro ëhuro jemë maroho jëvo'ë'e. Nadi aho juhuonëmiromu nurunurumo'i

<sup>15</sup> dë vövöbajo'o uhoro uvore: Keriso börömëro jië'ëro Bada hö uvoromo hu gemu mae uehorovore. Hu gemu mae uehorovoromo he'irarije God-are jö bogo heruomë'e ariböviehu jemë uëvamu: Mu maehu rueröhego uehorovaruje hesi bëhoho majahuihego hejarë uëvamu hejë'ohu simane sasohoromo bëhoho röjëhire.

<sup>16</sup> Röhu ma-u'emu sanu'e jöhemu röjëhiromu mu maemu vaerego ëhuro jemesi dë vövöbajo'ohu marëjëvo'i ëhuro jemëhu Keriso-are ijore ijore jijihoromo mu mae vaejarujoho ëho aehu sivëgë'ohu jaburo jemesi muoho garomo javoje bae'iröhe.

<sup>17</sup> Mu sisë vaeromo vi'ehi baejë'ohu sisë jio'i a'i mu ma vaeromo God-hu nimamu vi'ehi baejë'ohu ëho iae maeje.

<sup>18</sup> Keriso hu'o a maëro jië'ëro sisë'e ariböviohuni uehorovoromo ma-gemu guomadohuro ëhuro jemesi sisëho ma-oro'iohemu mu'uvëhadeje ëhuro jemë God-are örire söjëvo va'oröhëni. Hesi sino haho'ohu guomo'i röhu hesi aru'ahoho i'ovadeje.

<sup>19</sup> Hesi aru'ahohuro i'ovoromo va'o aru'aho oro'iorehu savoji gago va'ënire sisë'i raromaruire ë va'oromo jöho majëhijamu heruomadeje.

<sup>20</sup> Röhu ë hesi urimo Noah-hu hijadevaroho evaroho ë aribövioho bogo vuovë'e sa'are raromareje. Sa'are raromoro God-are jöho bogo eja-honövareje. Jöho bogo ejaholego Noah-ro boat börömoho vae'ego God-ro ëhi ma-hiromu muebejëvonövadeje ë ariböviohuro avoho uehorovoruomojöro. Muebejëvamu jöho bogo ejahareje. Bogo ejahamu ae ma-vemino'e ae aho'obëhe 8 boat-re rumo va'amumu jovo döre jëvoromo ëhuro mae jëvadeje.

<sup>21</sup> Ëjovehu uhu'e ë'adoho jovehu bapataeto vaejaruëhi ëhi jianove. Ëhesi bëhoho jemë bapataeto vaejë'ohu sisë'i raromego God-ro jemë baejëvoromo maro rëmege mae jëvajeje. Bapataeto hesi bëhoho bogo sinore jiaje

va'inumoho dibojöro bogo ehunioho jovoho eguo'i a'i bapataeto hesi bëhoho bapataeto vaeromo jemë God uavarujeje: Nosi dë vövöbajo'oho avo-hahuego no uvo'irarëjo: Nosi sisëho iae u'ovahuë'e höjo. Röhu bapataeto vaeromo jemë bogo sisëroho va'i mae raromarujeje rabëni Iesu Kerisoro guomoromo ri'öjê'ëro ëhu'ëro.

<sup>22</sup> Iae Iesu Kerisoro ri'önugoromo ö'idöre ajiomë'ëro God-are övo manö böröme namiromo anera'o ö'idöre raromoromo darugo baejê'e aru'aho ioro'iorohu'o jabesi örire huro jöho bojëmego hu gemu ejahoruomajeje.

## 4

*Sinehu nimaje mu vaejaruoho vuonugo'i God-hu nimaje mu vaeröhe jöhoje.*

<sup>1</sup> Kerisoro hesi sino haho'ere vi'ehe baejadeje. Vi'ehi baeromo mae uehorovadëhi jemë'o ëhi gemuoho uehorovoromo ëhuro avoho biririvore. Ae rahu jabesi sino bogo uehorovo'i Keriso-are jöëni vi'ehi jabesi sino haho'ere baejê'oho ëhi jië'e aribövioho mu sisëmu vae'i nimaroho vuonugê'ejö

<sup>2</sup> ëhuro sa'are raromo'iröhe maja vituroho sinehu nimajohemuoho bogo uehorovo'i a'i God-hu nimajohemu uehorovë'e raromo'iröhëro.

<sup>3</sup> God-are jö bogo heruomaje ariböviehu ömo'i nimoruomajëhi jemëhu urimo ëhi ömonövarijoho iae eni jië'eje. Urimoho jemëro öëro ë'anovoromo dëre ri'öjêvego bövie bise'e ëma ömonövarijeje. Jovo sisë iromo simane sisërënövarijeje. Mahëro gemuoro uruvanovo'amonövarijeje. Söröro raromanovoromo vörö'e jovemu ue'ahonövarijeje. Uehore sisë'i baeromo uvonövarijeje: Inöme gö gö aru'aho'e höromo uvene aho röjêhinövarijeje.

<sup>4</sup> O jaruvoho jemë God rumo'e ariböviohu'oho bogo gemuoroho sisëho vaeromo bövioho bise'oho ëma ë'oromo ruëroho numëroho ëma jijiharujeje. Jemë bogo ëhioho ë'ego gëromo ë ariböviohuro uvarujeje: Noehu ë'aruëhioho jabumë rabëni bogo ëhioho ë'arue höromo tiöjarujeje. Tiöromo jemesi ihoho ijumëharujeje.

<sup>5</sup> Ijumëharuoho ijönö mu sisë rabe rabe ë'aruoho God-are örire huruoho majëhi'ë'ö huro ave sa'are raromarue ariböviohu'o mami'e vuovade ariböviohu'o mevavuo gö'iröhëro muebejavuoromo hijajego.

<sup>6</sup> Ehuni vuovë'e aribövi jabesi örire Keriso-are jö majëhijamu hejare hesi bëhoho ëhuro ma-aeuho sisë hesi mana nosi sino haho'ere baeromo vuovaruëhi jabu'o ëhi sisë hesi mana sino haho'ere baeromo vuovëvadoho God-hu biririvoromo hijajëhi jabesi aru'ahoho ëhi mae raromoröhego.

*Mu vaeröhe suvuro God-hu bojamuijajoho avoho mueberöhe jöhoje.*

<sup>7</sup> Bövi bise'o barë'iröhe majaho dunove. Ehuni taemorovoromo avoho mueberovë'i parie vaenövore.

<sup>8</sup> Röhu aveho börömoho jiaje ehuremu uehorovore. Göëro göho dë vövöbajo'e aho'o uehorovo avohore rabëni huë baerovaruohuro mu sisë aho'o mu'uvahuaje jiaje.

<sup>9</sup> Röhu ga'irarije Christian ö mueno'e vejö'e i'e rovamu gavë'iroho üere: Nosi osaro ro raromöhëre. Nadi i'uho'i dë vövöbajo'e sasohoromo ëhi jië'e muoho vaere.

<sup>10</sup> Röhu God-ro hesi nimoromo suvure gö gö ae gö gö bojamuibe va'laje jiaje ehuni God-hu diehi jië'e suvuro bojëmamu baejarijoho avoho muebejahoromo ë suvuorohuro göëro göho ajamirovore.

<sup>11</sup> Jö majëhi'irarije suvuro baeromo God-are aribövi majëhi'ie'iroho God-are jöhemu majëhire. A ajëmi'ie'iroho God-hu bojëmaje darugoho baeromo



ë muoho vaere. Mue bövie bise'e avo'avoho vaejogo aëro gëromo uvo'iro: Jemë Iesu Keriso-are ariböviëro jëvë'ëro ë'arujë uvoromo God-are ihoho dö maro bamoruomo'iro. Aji maho darugo maho hesiremu ioro'ioemu jiemu jiobe va'ë'e. Iae mae.

*Keriso'o bimuvoromo huë vavaeni baeröhe jöhoje.*

<sup>12</sup> Aganomë huë vavaenoho jovëro ruomanovajeje God-ro gëröhego jemë biririvego o bogo. Huë vavaeni baejarujoho nadi uvore: Diehi'ego ë'ajëromo tiö'i

<sup>13</sup> ma-uvore: Kerisohu huë vavaeni baejadëhi no'o ëhi gemuoho baejaruëromo nimorohore. Ëhi jië'ooho ijönö Kerisoro hesi ajoho röjëhi'iramu garomo jemë nimoroho avoho'aruje.

<sup>14</sup> Aehu Keriso-are jöëni jemë sivëgë'ooho huë mae jëvajeje rabëni God-are aji'e Aru'ahohuro jemë aegëhë'ëro.

<sup>15</sup> Röhu jemëhu a anamu guomë'ooho o vajiohehu baejë'ooho o mu sisë gö gö vaejë'ooho o ae gö jabesi mu ëma ahobe jijihë'ooho ëho sisëje. Nadi ëhi jië'e muoho vaeromo ëhuro huë vavaenoho mana baere.

<sup>16</sup> O Christian jëvamu aehu bijönëgoromo huë vavaeni bojëmamu baejë'ooho nadi javojoho bae'i Keriso-are ihoho baejë'e jëvaje ëhuni God-are öroro huë mae uare.

<sup>17</sup> Noehu vi'ehi baejarue hesi bëhoho God-hu mevavuo'iröhe majaho mami'e aevë'eje. Iae hesi aribövire bëhe vaeromo mevavue. No rabe gavaruoho ma-i'e aevajoho röhu va'ojuvo ijönöho God-are jö ma bijönimarue aribövioho diehi jëvo'ë'e.

<sup>18</sup> God-are surire jöho ëhi gemuoho jajivoromo uvë'eje: Mu mae vaejarue aribövioho bogo ëma maroho va'i huë vavaenëro anoja-muijuvo

ë hesi ijönö evare maroho va'o hesi javuajëjo.

Ëhuni God deju bojamiromo mu sisëmu vaejarue aribövioho diehi jëvo'ajëjo.

<sup>19</sup> Ëhuni God-hu nimajëhi huë vavaeni baejë'ooho uvore: No ave sa'are bamavuade ahuro ajamui'i uvadëhi ëhi ajamuijajëromo mu mae vaeromo jemesi arijo'arije hesi övo döro bamorovore.

## 5

*A duvahehu God-are ö mahu'o avoho muebe'amo'iröhe jöhoje.*

<sup>1</sup> O God-are ekaresia muebejëvaruje a duvahoharo nasi jögoru harihoho gare. Na'o ekaresia muebejëvaje a duvahe jeve. Naro gavodeje Kerisoro huë vavaene baejamu. Röhu u'emu Kerisohu hesi aji ma röjahuijë'iroho huro nasi örire bojemi'iramu na'o hu'o gemu mae ajoho bae'ejo. Na ëhi jië'e aëro jëvë'ëro ëhuni ave jöho majëhi'ië'e.

<sup>2</sup> God-ro hesi sheep-oho bojëmijadeje jemëro muebejaho'irarijego. Ëhuni jemëhu hesi sheep muebejëvë'iroho nadi ë muoho bijönimë'i muebejëvo'i a'i God-hu nimajëhi ëhi muoho nimoromo hesi sheep-oho muebejëvore. Nadi moniemuoho uehorovoromo muebejëvo'i a'i muoho dë vövöbajo'e aho'o nimo avohoromo God-are aribövioho muebejëvore.

<sup>3</sup> God-hu jemesi övore bamëvade aribövioho nadi masije jëvajë uvoromo i'ue gö gö bojëmi'i a'i mu mae vaeromo öroho röjëhirego jaburo gëromo ëhi ë'irovo. Ëhi muebejëvore.

<sup>4</sup> Ëhi ë'lë'ooho Sheep Muebejavuaje A Börömehu rovë'iroho ioro'ioemu jioröhe aji'e suvuoroho bae'a'aruje.

<sup>5</sup> O a i'oharo a duvaho jabesi jöho ejëhore. Röhu ekaresiae aho'obëhe jemëro ma-u'emu taemorovoromo huë baerovoromo ajamirovore. God-are surire jöho ëhi gemuoho uvë'eje:

Biriri'övoromo masije javuajë uvarue aribövioho God-ro ahëvaje höjo. Ma-u'emu taemo raromarue aribövioho God-ro hesi nimoromo huë baejëvoromo ajëmaje höjo.

<sup>6</sup> Èhuni uvarujoho: No masije javuajë uvarujoho vuonugo'i uvore: God-ro gemuëro darugo'ëro jië'ëro böröme namiromomo no muebejavuajë höjo. Èhi uvë'oho majae eni jio'iramu huro ajëmi'iramu jemesi ihoho döro ajiomö'ë'e.

<sup>7</sup> Röhu nurunuruëgajoho aho'o God-are öroro bojamire hu jemesi jöëni uehorovaje jiaje.

<sup>8</sup> Röhu nune jioromo gavë'i raromore. Satan hu jemë'o muorovaje aeje. Vörö'e miehu darugo'o uvobe mi ja'ihö'i nahobe juvajëhi Satan-ro jemesi örire ëhi ë'ajeje.

<sup>9</sup> Satan-hu ëhi ë'lë'ohö biririvoromo God mae uehorovoromo ëhuro ahore. Ahoromo uvore: Nosi Christian ö muenö'e aho'obëhe sa'ae dinö'e dinö'e raromoruomajoho ëhi jië'e huë vaenoho baeruomaje höre.

<sup>10</sup> Jemë majae ma-bisemu huë vavaene baebe va'oromo majae ijönö God-ro ajëmiromomo jemesi dë vövöbajö'ohö avohëhoromo daruge bojëmi'iramu ëhuro ma-mae jioromo munënö'e biririvoromo riravo'aruje. God-ro huë baejavuoromo bövie bise'e ajamuajëje. Huro uëvadeje jemëro Keriso'o gemu mae jioromo hesirire ioro'ioremu jiaje ajoho bae'irarijego. Èhuni iae ajëmi'ë'e mae jëvoröhego.

<sup>11</sup> Hesi daruge jiajoho ëhi gemuoho jiemu jiobe va'ë'e. Iae mae.

*Peter-hu ijo tugoho'i jajivoromo jejëmijade jöhoje.*

<sup>12</sup> Silas-ro na ajëmiromomo ave surire jö harihoho jajivë'e javue. Na uehorovoromo uvajeje: Hu Christian ö mae höjo. Röhu na jajivode hesi bëhoho jemëro adahego dë vövöbajö'e mae jëvoröhego. O göho nare gavë'ëro ëhuro majëhiromomo uë'iroadëni: God-are huë ma'e öroho ëhi höjo. Èöroho bogo sareri'ehu jio'i iae mae höjo. Biririvoromo ë örohuremu jijihorëjo. Èjöho majëhi'i negamu ave suroho jajivë'e jeve.

<sup>13</sup> Babylon amore raromarue ekaresiahuro jemesi örire jejëmijareje God-ro jemë'o jabumë'o baejëvamu hesi aribövie jëvë'ego. O nasi Christian harihe Mark-ro jemë jejëmijadeje.

<sup>14</sup> Keriso-are aganehu rajahirovaruëhi ëhi jejamirovore.

Keriso-are aribövie aho'obëhe jemëro God-are huë maho baeromo raromore. Ahia minö'e.

## 2 PETER

*Peter-hu Keriso-are aribövi jejëmijade jöhoje.*

<sup>1</sup> Simon Peter na Iesu Keriso-are muemu vaejahaje ae jevoromo hesi apostle jeve. Keriso mae uehorovaruje aribövioho naro jemesi örire jajive. Noehu Keriso mae uehorovoromo aji'e mu ma baejarëhi jemë'o mae uehorovoromo aji'e mu ma gemuoho baejarijeje. Ëhesi bëhoho gemu börömëro jië'ëro namiromomo muebejavuoromo mare bamavuaje aho Iesu Kerisoro avoho uehorovoromo jemë'o no'o gemuoho gövuajëro jië'ëro ëhuni no mu ma bojamuijadëhi jemesi örire ëhi bojëmamu baejarijeje. Ëhuni naro jemesi örire jejëmije.

<sup>2</sup> Na nege jemëhu God'o Iesu nosi Bada ma gëvarujohuro ëho jaburo huë baejëvo avohoromo ajëmego jemë maro raromonövo'irarijego.

*No muoho avoho vaenövo'ëjo ëhuro uvoröhëni: Iae God-ro no baejavuade höjo. Ëhesi jöhoje.*

<sup>3</sup> God-are darugoho hesiro jië'ëro Kerisoro mue aho'o ajamuijë'eje ëhuro hesi örire avoho jijihö'iröhego. Ëhesi bëhoho God-ro urimë'i no uövuadeje noro hesi aji'e mu maho baeröhego. Ëhi uövuamu noro hu mae gavareje. Gavë'ëro ëhu'ëro huro ajamuijë'eje noro huhu nimaje muoho vaeromo öri mare jijihöhego.

<sup>4</sup> Ëhi ajamuiromomo ëhuro mu börömo börömoho röjahuijë'eje noro uehorovoromo uvoröhego: Iae mae höjo. Ijonö mue gö gö ma-mabëhe ajamui'ajëjo. Ijonö mae ajamui'iröhe jö hesi bëhoho jemëro ëho uehorovoromo sa'arohemu uehorovarue ariböviehu jabesi sinehu nimiruoho ömoromo sisërëjaruëhioho jemë bogo ëhioho ömoromo sisërërovo'irögoro a'i God-are muoho baejego hu jiajëhi ëhi jëvo'iröhego.

<sup>5</sup> Ëhuni aviëhi jië'e muoho avo'avoho vae'i ë'o gare. Jemëhu Keriso mae uehorovarujoho mu mae barueromomo Keriso uehorovarujë muohu'o gemuoro havore. Mu ma vaejë'oho God-are öroho avoho garomomo mu ma vaejaruje muohu'o gemuoro havore.

<sup>6</sup> God-are öri gavë'oho taemo raromoromomo God-are öri gavaruje muohu'o gemuoro havore. Taemo raromë'oho biririvoromomo riravoromomo taemo raromaruje muohu'o gemuoro havore. Biririvoromomo riravë'oho God-hu nimaje muohemu uehorovoromomo biririvoromomo riravaruje muohu'o gemuoro havore.

<sup>7</sup> God-hu nimaje mu uehorovë'oho huë baerovoromomo God-hu nimaje mu uehorovarujë muohu'o gemuoro havore. Huë baerovë'oho ae gö jabesi öroro dë vövöbajö'e aho'o uehorovëvoromomo huë baerovarujë muohu'o gemuoro havore. Ëhi jië'e muohuremu uehorovore.

<sup>8</sup> Jemëhu ëhi jië'e mu vae avohë'oho ëhuro bogo ëma imo nosi Bada Iesu Keriso garomomo muoho vae'i a'i hu garomomo muoho vaeromomo rae avohö'aruje.

<sup>9</sup> A'i aehu ëhi jië'e mu bogo vaejë'ohuro nune sisërëjëvego öri ëgoroho bogo uheriho'irögoro ma-sa'a hesi muohemu garuomajeje. Mu sisë mami'e vaejamu God-hu u'ovëhadoho ëho rumonëgë'eje.

10 Aganomë ëhu'e jiaje avoho biririvoromo God-hu nimaje muoho vaenövore ëhuro uvo'irarije: Iae mae-ëjo. God-ro hesinö javuojöro nimoromo uövü'e höjo. Ëhi jië'e mu vaejë'o ho sa'aroho bogo mae bogo rireromo'aruje.

11 Bogo rireromo'irögoro a'li nosi Bada Iesu Kerisohu no mare bamavuaje aehu ioro'ioremu muebejaje öri ari'ere jemëro mabëhe va'iramu huro jemë rajëhi avoho'ë'e.

12 Ëhu'ëro jië'ëro ëhi jië'e jöho iae na majëhi'i hinövo'ejo jemë ru-monëgojööni. Iae jemë ë jöho mami'e hejë'ëro God-are jö maho eni baeromo biririvoromo ma'eno titimarujeje. Röhu maho majëhinövo'ejo jemëro heromo uehorovonövo'irarijejo.

13 Bogo guomevo'i naehu ave sa'are hibe va'ajevare ëhi jië'e jöho majëhiromo jemesi uehoroho avohëhonövo'ejo. Na uehorovoromo uve: Ëhi jië'o ho ëho nasi mue höjo.

14 Ëhesi bëhoho na gavajoho ave sa'aroho bogo ëgoho hi'i guomo hesi jeve nosi Bada Iesu Kerisoro ëhi ma-va'orahoro röjehijë'ëro.

15 Na jöho ma-avo'avoho jajivo'ejo na guomevego jemëro adahoromo uehorovonövo'irarijejo.

*Peter-mëhu Keriso-are aji nunehu gavare jöhoje.*

16 Nosi Bada Iesu Keriso darugo'e a jiaje jöhu'o huhu rueröhe jöhu'o noehu jemë majëhijarevare bogo aho ëma uehorovoromo sareri sareri jöho mae avohoromo majahuijamu heromo mae höromo jemë majëhi'i a'li nosi nunëro hesi aji börömo ho gavë'ëro jöho majëhijareje.

17 Kerisoro God Vavu hesi örire iho börömo hu'o aji börömo hu'o baejadire noro hu'o riravareje. Riravamu aji börömo jiajire ë a huëro Iesuni uvavohijo: Ave aho nasi Harihu mabëhe höjo. Na hu garomo nimorohevajëjo.

18 Ëhuëho ö'idöre uvamu noro nosi hia'ëro hejareje hu'o gemuore maemu jiaje dahorure riravare majare.

19 Ëhi jië'e jöho hia'ëro heromo muoho nunëro gavë'ëro ëhu'ëro jö God-aro baeromo majëhinövare a jabesi jö surire jajivaroho jemë'o no'o adahoromo mae uehorovo avoharueje. Ëhuni jabuhu God-are jö jajivaroho jemëhu avo'avoho ejëhë'o ho iae mae jëvo'ë'e. Uvore: Surire jöho ramoramovego irehu öri röjahuijejo ë va'aruëhi ë surire jöho ëhi höromo ejahobe va'ejarëjo hujeji Bada Iesure majaho rue'i dunovego evare nosi dë vövöbajo'ere garöhëni sisonuvo'ië'ego mujörehu rojomoromo ajivavuajoho. Ëhi ë'ë'o ho jemë iae mae jëvo'ë'e.

20 God-are surire jöho ejahoromo avehu'o uehorovo avohore: Jö God-aro baeromo majëhiromo jajivare jö hesi bëhi he'i naguë'o ho bogo nosi sivuohö jö bëhoho ëma morijovo ga'ejo.

21 Rabëni hesi bëhoho bogo aho jabesi ëma nimoromo jöho God-aro baeromo majëhiromo jajivo'i a'li God-are Aru'ahëro jabesi simanoho huotövëho'ego God-hu bojëmaje jöho majëhinövareje.

## 2

*Keriso-are jö huotuhuotovoromo majëhijarue aribövi jabesi jöhoje.*

1 God-hu bojëmade jöho mae majëhinövareje röhu ae göëro göëro ëma sarerëmiromo uënövareje: No jö God-aro baeromo majëhijarue ae javuajëromo sareri sareri'e jöho majëhinövareje. Jabesirire jionövadëhi jemesirire ëhi jië'e sareri'e aribövioho jioruomö'ë'e. Jioruomoromo ma-döëremu jö mae

atanovoromo Iesuare jöho huotohuotovo majëhinövo'ë'ö. Majëhijamu mae höromo ejëhë'oho sisërëjëvo'ë'e. Bada Iesuro hesi köëro imëvoromo jabumë baejëvadeje hesi darugoro raromöjoro. Ëhi ë'adeje röhu jaburo hu deje bojämiruomajeje. Ëhu'ëro jië'ëro sisë hesi manaho ma-majioho baeromo sisërëruomo'ë'e.

<sup>2</sup> Bogo ë'arue javoji'e mu sisëho vae'iramu ae aho'obëhe jabesi ijore ijore jijihonövo'ë'e. Ëhi'o'iramu God-are öri ma hesi ihoho sisërë'ë'e.

<sup>3</sup> Monie jabesiremu bae'i nimoromo sareri sareri'e jöho jabesi sivue ëma uehorovoromo majëhiruomo'ë'e jemëro heromo mae höromo ijo bajoho mana bojëmi'irarijego. Ëaribövioho God-ro mevëvoromo sisëre rëmö'ö'iröhoho mami gö'e aevoromo uehorovobe rovë'eje. Hu nune jiajëro i'uoho iae bojëmi'ë'e.

<sup>4</sup> Rabëni anera ioro'iorehu mu sisë vaejaroho God-ro bogo ma-nunëremuoho gë'i a'i tövo'amoromo sisëro nugö'ö'amadeje jabumë ë ramoramo'ere va'o raromego huhu mevo gë'iröhe majaho rueröhego.

<sup>5</sup> O mami gö'e sa'are raromo jijihonövare aribövi jabesi sisëho God-ro bogo ma-nunëremuoho gë'i a'i hu bijönimoruomamu gëgorovo jovoho nugö'öjamu börömo bëhe rojomoromo ae aho'o baeniagëgadeje. A'i a ihe Noah mu ma hesi jö majëhinövade ahu'o röhu a ioro'ioroho aho'obëhe 7 ë ariböviohemu i'uoho bogo bojëmi'i avoho muebejëvadeje.

<sup>6</sup> O Sodom'o Gomorrah'o amo masije niö'i God-ro i'ue bojëmiromu vënëro bue'öjëvamu ravoromo ma-muomöe jëvadeje. Ëhi ë'ade hesi bëhoho God bijönimoruomaje ariböviohuro uvoruomoröhego: Ëhi jië'e i'uoho God-ro no'o bojämui'ajëjo. Iae ëhuni ëhi jië'e i'uoho bojëmijadeje.

<sup>7</sup> Ëamo rajo a ioro'ioroho i'uoho ëhi bojëmi'i a'i a maho Lot ajamamu hu Sodom amore jioromo mae rovadeje. Ëhesi bëhoho urimo Lot-ro amore hiromo ganövadeje amo rajoho jögoroho bogo e'irögoro ma-biriri'övoromo öëro ë'anovoruomo'ego gë'i hiromo bijönimo avohonövadeje.

<sup>8</sup> Ëaho a maëro jië'ëro ë amo rajohu'o gemuore hiromo majae ëhi heromo gëromo jabumëro mu sisë vae'ego bijönimoromo dë vövöbajo'e sisërëjadeje hu a maëro jië'ëro. Ëhi'amu God-ro amoho ijumo'irögoro Lot ajamamu mae rovadeje.

<sup>9</sup> God-ro sisë aribövioho ëhi ijumëvo'i a maho ëhi ajamijë'ëro ëhu'ëro hu uehorovarue aribövioho vavaeni'ere rireromavuo'ië'ego ajämui'iröhoho hu eni jie. A'i sisë'e aribövi taemëvo'iröhoho eni jie i'uoho baemu baejuvo hujeji mevëvoromo i'u ioro'iohemu bojëmi'iröhe majaho rueröhego.

<sup>10</sup> Sisë'e aribövioho aho'obëhe jabesi örire ëhi ë'ë'e röhu garöhe aehu jabesi sinehu sisë nimajoho ömoromo öehu jijihanovoromo va'inumi'e mu vaeromo jögoru masijo bijönimamu gëvë'oho huro ë ariböviohu'o taemëvoromo i'ue bojëmijajeje.

Ëhi jië'e jö sareri röjëhijarue aribövie jemë'o raromaruohuro biriri'övoromo uvarueje: Noremuëremu masije javuajëjo. Masije javuajëromu bogo juhuonivo'i aji'e aribövie ö'idöre raromarue jabesi jöho sisë'i atarueje.

<sup>11</sup> Ëhi ë'arueje röhu anera ma jabesi darugohuro jö sareri röjëhijarue aribövi jabesi darugoho iosiramiro mu börömo bëheje. Ëhi jie röhu ë aneraho bogo Badare nuniroho riravoromo anera sisëho agëvoromo jabesi jö sisëho majahijarueje.

<sup>12</sup> Bogo ëhioho ë'irögoro a'i ë jö sareri röjëhijarue aribövioho mahu urejo va'ëne jioruome. Urejoho bogo uehorovanövë'e jabesi ëma jijihego

aëro rinovoromo muo'amoromo ujuoho va'arueje. Ëjö sareri røjëhjarue aribövioho ëhi jio'ame. Jabu'o bogo uehorovë'e jabesi ëma jijihoromo bogo ma hejarue gavarue jöho sisë'i atarueje ijönö mahu urejonö'le sisërë'amoröhëro.

<sup>13</sup> Mu sisë vaejarohuni ëhuni i'ue mana bae'ë'ö. Jabumë uvarueje: Dë vövöbajo'o vuëvavuaje hesi bëhoho maja'le a nunire mahehu uruvanovë'oho ëhuro vuëvavuo'ajëromo ëhi ë'arueje. Mahëro uruvanovoromo jabesi sareri sareri'e muoho nimo avohoromo jemesi gemuore ö'oromo ioho ue'ahego evare niögu suhi'ere va'inumi jiajëhi jabesi aru'ahoho ëhi va'inumi'le jëvajeje.

<sup>14</sup> Mu sisë vae'i öëro ë'anovoromo magonahoho majae ëhi ërimëharueje. Ëhi jië'e mu sisë vuonugo'ië'oho bogo eni jëve. O mu göho ë sisë ariböviohuro garöhe bogo biririvoromo mae uehorovarue aribövioho raromamu gevë'oho jaburo jö sisë røjëhiromo rinëgoromo sö ujuoho va'ego guaro rireromanovajeje. Bövie bise'le ma-bae taemo'i nivoromo vajiohu mu biririvoromo ë'o gabe rovaroho jaruvoho ë muohuro ruaho'amëvë'eje. Ëaribövioho God-ro sisë bojëmi'ë'le.

<sup>15</sup> Öri ahorirehu jijiharoho vuonugo'i aruëre anumëre ëma jijihë'ejö. Ëma jijihoromo a ihe Balaam Bosor-are harihoho Balaam-hu juvade öri sisëre va'ë'ejö. Ëhesi bëhoho Balaam jö God-aro baeromo majëhinövade ae jiadeje röhu hu mu sisë hesi manaho ijo baje bae'i nimadeje.

<sup>16</sup> Ëhi nimamu God-ro ë a hesi uehoro sisëho ahahadeje. God-hu Balaam-are uehoro sisë ahahade hesi jöho aviëhije. Balaam-ro mu sisë vae'irögoro mi ihe donkey döro hiromo örire va'adeje. Va'amu God-ro ë donkey-oho uehoro maho bojamamu ë jö bogo jövajohuro ri'öromo a huënö'le jöe jövamu hegorovo ë jö God-aro baeromo majëhijaje ahuro simano rumo'le muoho vae'ië'oromo vuonugadeje. God-ro Balaam-are uehoro sisëho ëhi ahahadeje. Balaam-hu öri ma vuonugadëhi ë jö sareri'e røjëhjarue ariböviohuro ëhi ë'oromo mu sisë vaeromo ijo baje bae'i nimarueje.

<sup>17</sup> Röhu ë sisë aribövioho jovehu sa'a gagore rojomoromo sinihajëhi jabumë muoho ëhi sisë'i sisë'i ömarueje. O buru börömehu rueromo sue huosihego arue anume va'oromo öri ari'le tugohego bogo gavaruëhi jaburo mu maho ëhi tugohahuego bogo gavarueje. Jabumë ëhi jëvë'ego ëhuni God-ro röhe nugëhë'eje jaburo ramoramo sisë ma jië'ire ë va'ö raromoröhego.

<sup>18</sup> Jö huhe ë'oromo simano rumo'le jöho ëma atarueje. Ëma atoromo öëro jijihanovoromo mu sisë ae røjëhiromo rinovo'amëgo ëhuro biriri rumo'le ariböviohuro sisë aribövi ioro'ioro jabesi öri avevejö'le vuonugaroho uvarueje: Jö mae höromo ejëhoromo röhu maho vuonorö'ö va'oromo ëhuro rireromarueje.

<sup>19</sup> Jemë'o raromarue sisë ariböviohuro ae sarerëmiromo uëvarueje: Noro jemë ajëmi'iramu jemë bogo tövanovë'le aribövioho jëvanovo'i a'i jemë rabe rabe ömo'i nëgë'oho ëma ömonövo'arujëjo. Ëhi uëvarueje röhu jabumë tövëvanovë'eje. I'u'e mu hesi darugore jëvë'ëro mu sisëmu vaemu vaejarueje. Ëhesi bëhoho di mu sisëhu ruahö'öjavuë'ohuro ëhuro tövavuanovë'eje.

<sup>20</sup> Ëhi tövëvanovoromo sisë bëhe jëvajeje. Ëhesi bëhoho nosi Bada Iesu Keriso no mare bamavuaje aho ae rahuhu mae garomo ëhuro sa'a hesi mu sisëmu vaejaroho vuonugo'i mae va'öjuvo röhu huotorovoromo sareri'e jöho mae höromo miehü viöre aeganovoromo sisërëjëvë'oho ëhi jië'e aribövioho urimo sisë jëvadoho majae ijönö rireromoromo sisërë'amo

barë'ë'e.

<sup>21</sup> Jabumë mu ma hesi öroho bogo ga'ibejo jabumë sisë jio'i röhu bisemu ma'e jëvanovo'ibejo. Röhu mu ma hesi öroho iae garomo God-are jögoroho bojëmamu vuonugë'ëro ëhu'ëro sisë mae jëvë'eje.

<sup>22</sup> Simano ma'e jöe niö'i urimë'i uhunö'e jajivaroho huotovë'o ho ëho ëhi jië'e aribövi jabesi jöeje. Jöho ëhi uvë'eje: Öhuro ëgubijiohadire vuonorö'ö rovaje höjo. O jö göho jovo eguahë'e mahohuro vuonorö'ö va'oromo sa'osa'oho muomorovaje höjo. Ëaribövi jabesi muoho ëhije.

### 3

*Bada Iesuhu sa'are vuonorö'ö rue'iröhe jöho bogo sarerehu jio'ti iae mae jiaje jöhoje.*

<sup>1</sup> Aganomë urimo na surire jö jajivoromo jemëni nugö'öjodoho röhu maho jöe nugö'öje. Ëjö niö'i jabesi bëhoho urimo hejarije jöho röhu maho majëhiromo jemesi simanoho avohëhe jemëro bogo rumonimo'i ma-maemu uehorovo'irarijego.

<sup>2</sup> Iesu bogo rovadevare jö God-aro baeromo majëhinövare a maehu God-are surire jajivë'e jiamu gavarije jöho o Bada Iesu mare bamavuaje aehu jemesi apostle aribövie no bojamuamu noehu jemë majëhijamu hejarije jöho ë jöho jemëro avo'avoho uehorovo'irarijego ëhuni jajive.

<sup>3</sup> Röhu ave jöhuremu avo'avoho uehorovore. Ijo tugoho'i jioröhe majaho dunovo'iramu evare aëro rueromo jabesi sinehu sisë nimajohemu ëma ömobe jijihoromo jemë sivëgo'ë'ö.

<sup>4</sup> Sivëgoromo uë'ë'ö: Iahuro uëvade höjo: Naro va'oromo vuonorö'ö rue'ejöjo. Hu rue jö uvarujoho hu diae rovë'e höjo. Hu va'adoho bogo rovë'e nosi hijo miono'oho vuovëvobe rovë'e höjo. Urimë'i ni'i'ivadire aevoromo bövi bise'o jioje rovdoho bogo barë'i ëhi ma-gemuohemu jio'amajëjo.

<sup>5</sup> Ëhi uëvarueje röhu ave jöho jabesi nimoromo bogo gavanovarueje. Ni'i'ivadire God-ro jöe jövamu ëhuro ö'idöho sa'aho ëma jio'amadeje. Sa'aho jovore jioromo rojomamu jovoho ruë numë jio'i sa'aho ririre jio'amadeje.

<sup>6</sup> Ëhi jiadeje röhu ijönö jovohuro rojomoromo sa'ae aho'obëhe baeniagivamu evare majare ë sa'are jiade bövioho bise'oho ijumo barëjadeje.

<sup>7</sup> Amo God-ro jöho röhu maho jövë'ëro ëhu'ëro jaruvo jiaje ö'idöho sa'aho ëhi nugo'amë'eje u'emu vënëro buejego ravo'amoröhego. Ö'idöho sa'aho nugo'amajeje God bogo uehorovarue ariböviohuro hesi nunire riravoromo jabesi jö sisëho heromo i'ue baeromo sisëro va'oruomego evare aho'ö vënëro ravo barë'iröhego.

<sup>8</sup> Röhu aganomë ave jöho gemu avo'avoho uehorovore. Kerisohu uövuade muoho iae rue'ë'e. Sa'are raromarue ariböviohuro uvarueje: Vadune aho'ö barëjë'e höjo röhu Keriso bogo rovë'e hö uvaruëhioho Bada bogo ëhioho uvajeje. Hu bogo uvajeje: Majae vadune ëmine ëmine jioromo barëjaje hö uvo'i a'i uvajeje: Majae gemu ëho vadune aho'obëhe mae jianovo'i vadune aho'obëhe mae ëho majae gemu jianovajëjo. Ëhuni bogave uvo'irarije: Majae ëge barëjë'ëro rue'i uvadoho bogo rovë'ëro ëhuni bogo rue'a'ajëjo.

<sup>9</sup> Hesi aëro Badare jöho sareri'e uehorovoromo uvoruomajeje: O hu ëhi ëhi ömo'i uövuajoho ëma hiromo örisanuovaje höjo. Röhu Bada bogo ëma örisanuovo'irögoro a'i huro jemesi jöëni uehorovoromo ëhuni ma-taemorovoromo hije. Aehu sisëre va'ë'oho hu bijönimo'i a'i hu nime ae aho'obëhe sisëho vuonugoröhego. Ëhuni muebeje.

<sup>10</sup> Röhu Badare majaho iae ma-majioho vajiohu'e aëro rovanovo'ë'e. Ma-majioho rue'iramu evare ö'idöho darugo'lo tögömoromo ëma bogojio va'oromo ë inömo ho majaho manaeroho jiji mujöru'oho ravo barëromo sa'aho sa'a hesi i'lo mu'oho sisërë barë nahonahovo'ë'e.

<sup>11</sup> Bövi bise'lo ëhi sisërë barë'iröhohuni ëhuni avevejö'oho jemë diehi jië'e mu vaejaruje aribövie jiore. Jemë God gemu uehorovoromo ma-maemu raromo jijihö'irarije aribövie jiore.

<sup>12</sup> Ëhi jië'e aribövie jioromo mueberomo raromego God-are majaho rue'iro. Ëhi ë'ë'i muoho biririvoromo avo'avoho vaejago ë majaho ma-burëro rue'iro. God-are maja rovë'iroho ö'idöho ravo barëromo ö'idöre jio'amaje inömo ho ravoromo disoruvo barë'ë'e.

<sup>13</sup> Ëhi'o'iramu God-ro uövuadëhi ëhi ö'idö i'oho sa'a i'oho bamo'ë'e. Ö'idö i'oho sa'a i'oho bamo'iramu ma-mu mahuremu ë jio'amo'ë'e. Ëhi jio'iröhego no raromoromo muebejaruje.

<sup>14</sup> Aganomë ëhi jioröhego muebejarujoho biririvoromo God'lo gemuoro huë mae raromoromo hesi nunoro mu ma-maemu vae'i ë'lo gare.

<sup>15</sup> Nosi Badahu bogo burëro i'u bojëmi'i ma-taemorovoromo hiromo muebejävajoho ëho avo'avoho uehorovoromo uvore: Hu ma-taemorovoromo hiromo muebejavuajohuro ëhuro majaho bogo barëjë'e iae jiahuaje höjo noehu hu ua gavego mare bamavuo'iröhoho. Ëhi jië'e jöho nosi ö mae Paul hu'o simano maho God-are örire baeromo jemesi örire jajivadeje.

<sup>16</sup> Ëhi jië'e jö suri göre göre aho'obëhe jajivoromo majëhi'i nimë'oho hu'o jöe gemuoho jajivajeje. Röhu Paul-are surire jöho jöe gö gö anoji'eje. Jö anoji'e jiamu gavë'oho simano rumo'ehu bogo biririvoromo riravarue ariböviohuro God-are surire jö ioro'ioro sisë'i huotovuuehi ëhi Paul-are jöhu'o sisë'i sisë'i huotovoromo ëhuro ijönöho sisërëjëvo'ë'e.

<sup>17</sup> Aganomë ëhi jioröhe jöho jemë iae hejë'e jëve. Ëhuni avo'avoho mueberovore. Jögoru ahoruomaje a sisë jabesi jiore jiore jijihö'aruje. Amo ëhuro biririvoromo riravarujoho vuonugo'i baradore rirerömëvo va'ë'e.

<sup>18</sup> Avo'avoho mueberovoromo nosi Bada Iesu Keriso mare bamavuae a hesi huë maho avo'avoho baebe hesi mu maho avo'avoho ga'amobe va'ore. Jaruvoho hesi ihoho mabëhe uaromo ëhi ioro'ioemu mabëhe uabe va'ejo. Iae mae. Ahia mino'e.



# 1 JOHN

*God-are Jö jumuvë'e ahuro daruge bojamuiromo i'ovavuaajeje. Röhu ë aehu sino haho'o baeromo sa'are rovamu John-mëhu gavare jöhoje.*

<sup>1</sup> Ni'i'ivadiroho ae gemu jië'e jiadeje. Jiadoho iae ëhi ma-jiemu jiohe rovë'eje. Noro ë a hesi jöho heromo hu nosi nunëro garomo muebe'i ariromo hesi dajoho nosi övëro rëhë'ëro javuë'ëro ë a hesi jöho jajivo'ië'ö. Hu God-are Jö jumuvë'e i'ovavuaaje daruge bojamuijaje aeje.

<sup>2</sup> Ëi'ovavuaaje darugoho va'orahoro huruohamu noro gavë'ëro ëhu'ëro jemë mae majëhiromo uëvarueje: Ëahuro darugoho ioro'ioremu bojamuijaje höjo. Huro Vavuohu'o gemu mae hijë'ëro nosirire rueromo ë darugoho iae röjahuijade höjo.

<sup>3</sup> Noehu garomo hejare a hesi jöho majëhijö jemëro heromo jemë'o no'o agane vaerovo'iröhëro. Noehu Vavuohu'o hesi Harihe Iesu Keriso'o agano vaerovaruehi jemë'o no'o ëhi agane vaerovo'iröhëro.

<sup>4</sup> Jemë'o no'o ë'oromo ëhuro no nimoroho avoho'iröhëro ëhuni jajivö.

*Noehu mu sisë vaejaruoho vuonugoromo ëhuro God-are ajire raromo'iröhe jöhoje.*

<sup>5</sup> Ave jöho God-are Harihohuro majahuijamu hejë'ëro noro jemë majëhijö. God hu ma-ajemu höjo. Ramoramoho hesiroho bogohöjo.

<sup>6</sup> God hu ma-aji'emu jië'ëro ëhu'ëro no uvë'o'ho: No God'o agane vaerovarue hö uvoromo röhu ramoramore raromo jijihë'o'ho ëho no sareri sareri jöe atoromo sareri sareri mue vaejarueje.

<sup>7</sup> A'i God-hu aji'ere hijajëhi noehu ëhi aji'ere raromo jijihë'o'ho ëhuro no göëro göhu'o iae agane vaerovarueje. Agane vaerovego hesi Harihe Iesu hesi köhuro nosi sisëho u'ovahuo barëjajeje.

<sup>8</sup> No uvë'o'ho: No sisë bogojavuajë uvë'o'ho ëho simane garaejego God-are jö maho dë vövöbajo'eroho bogojavuaajeje.

<sup>9</sup> A'i noehu nosi sisë God-are örire huruoho majahijamu hejë'o'ho huro biririvoromo ma-maemu uehorovoromo muoho ma-maemu vaejajëro jië'ëro ëhu'ëro nosi sisëho uehorovoromo vuonugoromo u'ovahuo barëjajeje.

<sup>10</sup> O no uvë'o'ho: No bogo sisëho vaejë'e javuajë uvë'o'ho ëho noro uvoromo ë'arueje: God-hu uövuajoho: Jemë mu sisë vaejaruje hö uövuajoho hu ma-sareramuiromo ë jöho jövaje höjo. No ëhi uvë'o'ho God-are jöho nosi dë vövöbajo'eroho bogojajajeje.

## 2

<sup>1</sup> Nasi aboji harihu'e ave jö naehu jemesi örire jajivaje hesi bëhoho jemë mu sisëho bogo vae'irarijego ëhuni jajive. Röhu mu sisë vaejë'o'ho Iesu Keriso a maëro jië'ëro nosi sisëho ajamuijajeje. Ajamuiromo Vavu hesi örire jöe majahijajeje.

<sup>2</sup> Hu guomadohuro ëhuro nosi sisëho mu'uvahuoromo God-are vöröho sanuamijego God-ro nosi sisëho uehorovoromo vuonugajeje. Röhu bogo nosi sisënioho gemu guomo'i sa'ae aho'obëhe dinö'e dinö'e raromarue aribövi jabesi sisëni guomadeje.

*God-hu bojamuade jögore aho'o röhu ö mueno'e uehorovëvo'iröhe jöguru ejahoromo ëhuro ajire raromo'iröhe jöhoje.*

<sup>3</sup> Röhu ave jöho uehorovoromo ehuro uvarueje: No God gavarue höjo. No huhu bojamuade jögoru ejahë'ohuro ehuro iae no hu gavarueje.

<sup>4</sup> Ae rahu uvë'oho: Iae na God gavaje hö uvo'i röhu God-are jögoru bogo ejahë'oho ehö hu ma-sarerivoromo ehioho uvajeje. God-are jö maho hesi dë vövöbajo'eroho bogoje.

<sup>5</sup> O God-are jö ejahë'oho ehuro hu God-are örire hesi dë vövöbajo'e aho'o uehorovo avohajeje. Röhu ave jöho uehorovoromo ehuro uvarueje: No God'o gemuoro javuajëjo.

<sup>6</sup> Ae rahu uvë'oho: Na God'o gemuoro jevajë uvë'oho Iesuhu hibe juvadëhi ehi hi'ë'e.

<sup>7</sup> Aganomë na jemesi öriroho bogo jögoru i'oho jajivo'i a'i jögoru mamioho jajivo'ië'e. Aevoromo Keriso-are jöho heromo ave jögoroho hebe rovarijeje. Ejögoru mamioho ehö noehu majëhijamu hejarije jöhoje.

<sup>8</sup> Naehu jajivo'irode jögoroho mamieje röhu i'eje. Ejö hesi muoho Kerisohu vaejadoho jemë'o vaejarujeje. Noro ë muoho garomo uvarueje: Ejöho iae mae höjo. Ehesi bëhoho ramoramo'e muoho rori'o va'anovo'i aji mahuro aevoromo ajivavuë'ego ehuni uvarueje: Ejöho iae mae höjo.

<sup>9</sup> Ae rahu uvë'oho: Na God-are aji'ero hijaje hö uvo'i röhu hesi Christian ö mueno'o nu huodëgë'oho ramoramo'ere hibe rovadoho jaruvohu'o ehi gemuoho hijajeje.

<sup>10</sup> O hesi Christian ö mueno'o hesi dë vövöbajo'ere uehorovëvë'oho God-are aji'ero hiromo uehore ma-maemu jië'ero ae gö bogo iëmi varijënoho jiajeje.

<sup>11</sup> O hu hesi Christian ö mueno'o nu huodëgë'oho ramoramo'ere hiromo ramoramo'e muoho vaebe juvajeje. Ehi'ego ramoramëro nunoho ramoramovahë'ero öroho sidövajeje.

*Ave sa'a hesi mu sisë bogo uehorovo'iröhe jöhoje.*

<sup>12</sup> Nasi aboji harihu'e God-ro Keriso-are jöeni uehorovoromo jemesi sisëho uehorovoromo vuonugë'ego ehuni na jemesi örire jajive.

<sup>13</sup> A duvahohumë jemë aevo'i jiobe rovade aho gavë'e jëvo'ego ehuni na jemesi örire jajive. A i'ohumë jemëro A Sisëho ruahö'öjë'e jëvo'ego ehuni na jemesi örire jajive.

<sup>14</sup> Nasi aboji harihu'e jemë Vavuoho gavë'e jëvo'ego ehuni na jemesi örire jajive. A duvahohumë jemë aevo'i jiobe rovade aho gavë'e jëvo'ego ehuni na jemesi örire jajive. A i'ohumë jemë birivoromo God-are jöhuremu jemesi dë vövöbajo'ere uehorovoromo A Sisëho ruahö'öjë'e jëvo'ego ehuni na jemesi örire jajive.

<sup>15</sup> Ave sa'a hesi mu sisëho bövioho bise'oho nadi uehorovore. Ave sa'a hesi mu sisë uehorovë'oho jemesi dë vövöbojo'eroho Vavuoho bogo uehorovo'aruje.

<sup>16</sup> Sisë rabe rabe nosi sinehu nimiruoho rabe rabe nosi nunehu garomo nimiruoho o noehu ave sa'are raromoromo rabe rabe uehorovoromo döre bamorovaruoho ehö ave sa'a hesi mu sisëje. Ehi jië'e muoho aho'o bogo Vavu hesirire jioromo rovade muoho jio'i a'i ave sa'a hesi mueje.

<sup>17</sup> Sa'a hesi mu sisëho sa'are nimirue bövioho bise'oho barë hesi jio'i a'i ae rahu God-hu nimaje mu vaejë'oho bogo barë'i ma-ioro'ioremu raromarueje.

*Keriso'o muorovarue aribövi jabesi mu sisë avoho goro'iröhe jöhoje.*

<sup>18</sup> Nasi aboji harihu'e sa'a bövi bise'o barë'iröhe majaho dunove. Ehesi bëhoho jemë hejarijeje uëvamu: Bövi bise'o barë'iröhe majaho

dunovo'iramu Keriso'o muorovaje aho rue'a'ajëjo. Röhu avevejö'oho Keriso'o muorovarue aribövioho aho'obëhe rueruomë'eje. Èhu'ëro jië'ëro no garomo uvarueje: Bövi bise'o barë'iröhe majaho dunovajëjo.

<sup>19</sup> ÈKeriso'o muorovarue ariböviohuro nosi ekaresiaho ramuo va'areje. Röhu urimo jabu no'o raromonövadevaroho jabumë bogo nosi aribövi maehu jioruomadeje. Jabumë nosi aribövi mae jioruomo'ibejo jabumë no'o ëhi raromoruomo'ibejo. Röhu jabuhu va'arohuro ëhuro no garomo uvarueje: Jabumë bogo ae gemu vadu'oho nosi aho jië'ëro ëhu'ëro va'oruomade höjo.

<sup>20</sup> A'i jemë Keriso-are Aru'ahoho baejël'ëro ëhu'ëro jemë ae aho'obëhe God-are jö maho gavarujeje.

<sup>21</sup> God-are jö maho gavarujego ëhuni na bogo uve: Jemë jö maho dadivëvajëromo ëhunioho röjëhiromo jajive. A'i naehu jajivaje hesi bëhoho jemë jö maho iae gavarujeje. Garomo uvarujeje: Sareri'e jöho bogo God-are jö ma hesi gemuoroho jioromo rovaje höjo. Iae ëhuni jajive.

<sup>22</sup> Sareri sareri ma'e aribövioho rahumëje. Ae rahu jö majahuiromo uövuë'oho: Iesu hu bogo bövie namiromo ajamuaje aho hö uövuë'oho ëhi uövuaruë aribövioho Keriso'o muorovarue aribövie jioruome Vavu'o Harihu'o bijönëgaruëro jië'ëro.

<sup>23</sup> Ae rahu Harihu bijönimë'oho Vavuohu'o bijönimoruomajeje. O ae rahu Harihu ejahë'oho Vavuohu'o ejahoruomajeje.

<sup>24</sup> Keriso-are jö aevo'i hebe rovarije jöho uehorovoromo ma'eno titimore. Èhi ë'l'ë'oho Harihu'o Vavu'o jabesi gemuore raromo'aruje.

<sup>25</sup> Röhu Kerisoro ave suvuroho bojamui'i mae uövuadeje. Huro uövuadeje: Naro ajëmi'iramu jemë ioro'ioire gemu maro raromo'arujëjo.

<sup>26</sup> Jemë sarerëmi'i ë'o gavarue aribövi jabesi jöho naro jemesi örire jajive.

<sup>27</sup> A'i jemë Kerisoro hesi Aru'ahoho bojëmamu jemesi dë vövöbajore abuejël'ëro jemë'o hijajeje. Hijë'oho a göho rabëni jemë öroho röjëhi'ë'ö. Bëhe bogoje. God-are Aru'ahohuro hesi muoho bövioho bise'oho jemë röjëhijajeje. Röjëhiromo bogo sareri'e jöho röjëhi'i jö mae röjëhijajeje. Èhu'e jiaje jemëro hesi Aru'aho hesi jöho ejahoromo Keriso'o gemuoro raromore.

<sup>28</sup> Io'o nasi aboji harihu'ohumë hu'o gemuoro raromore. Èhi ë'l'ë'oho hu rue'iramu no bogo javojimo'i birivoromo hesi nunire mae riravo'ejo.

<sup>29</sup> Jemëro garomo uvarujeje: Keriso iae a mae höjo. Èhuni uvo'a'aruje: Ae rahu mu mae vaejël'ëro God-are aboji harihu'e javuajëjo.

### 3

*Noehu mu sisë vaejaruoho vuonugoromo ëhuro God-are aboji harihu'ehu raromaruëhi ëhi raromo jjiho'iröhe jöhoje.*

<sup>1</sup> Asë'e Vavuohuro no mabëhe rajahuijë'eje. Èhi rajahuiromo huro no aboji harihu'e uövuë'eje. Hesi aboji harihu'e uövuadoho iae no javue. God-are aboji harihu'e javuajoho ave sa'are mu sisëhemu uehorovarue ariböviohuro God bogo avoho gavë'ëro ëhu'ëro no'o bogo avoho göruomajeje.

<sup>2</sup> Aganomë avevejö'oho no iae God-are aboji harihu'e javue. Ijonö ëhi javuoröhoho bogo röjahuijë'ëro no bogo avoho gavö. Röhu no iae garomo uvarueje: No ëhi javuoröhoho röjahui'iramu gagorovo Keriso hu diehi jiajoho iae no ga'ejarëjo. Garomo ëhuro hu jiajëhi no'o ëhi javuo'ajëjo.

<sup>3</sup> Ae rahu uvë'oho: Kerisoro no ajamui'iramu hu jiajëhi no'o ëhi javuo'ajë uvë'oho ëhuro Keriso ma-maemu jiajëhi ëhi jio'i ë'o gavajeje.

<sup>4</sup> Ae rahu mu sisë vaejè'oho èho God bijönimoromo hesi jöho ahajeje. Mu sisë hesi bëhoho èho God bijönimoromo hesi jö ahaje muohoje.

<sup>5</sup> Röhu jemè'o iae gavarujoho Keriso rovade hesi bëhoho nosi sisèho rori'o bava'ego bogojioröhego èhuni rovadeje. Röhu hesiroho sisèho bogoje.

<sup>6</sup> Èhu'ëro jiè'ëro ae rahu Keriso'o gemuore jiè'oho bogo birivoromo mu sisèho vaejajeje. Birivoromo mu sisë vaejè'oho hu Keriso bogo ga vadè'è'eje.

<sup>7</sup> Nasi aboji harihu'ohumë ae göehu sarerëmijè'oho nadi ejèhore. Ae rahu mu mae vaejè'oho Keriso mae jiajèhi èhi jiajeje.

<sup>8</sup> O mu sisë birivoromo vaejè'oho èho Satan-are aeje Satan-ro aevo'i sisë vaebe rovè'ëro. Sisë vaebe rue'i God-are Harihehu rovade hesi bëhoho Satan-are muoho mu'u'iröhèro èhuni rovadeje.

<sup>9</sup> Ae rahu God-are aboji harihu'e jèvè'oho Vavu örèro jèvè'ëro èhu'ëro jabumë bogo mu sisèmuoho vaejarueje. God-are aboji harihu'ëro jèvè'ëro mu sisèmu vae'iröhoho jabumë bogo eni jëve.

<sup>10</sup> No ave muoho garomo uvarueje: Èaho God-are harihe o aboje höjo. Èaho Satan-are harihe o aboje höjo. Ae rahu bogo mu ma vaejè'oho o ö mueno'o bogo dè vövöbajo'ere uehorovèvè'oho èho bogo God-are aboji harihu'oho jioruome.

*God-hu bojamuade jögore aho'o röhu ö mueno'e uehorovèvo'iröhe jögoru ejahoromo èhuro hesi aboji harihu'ehu raromaruèhi èhi raromo'iröhe jöhoje.*

<sup>11</sup> Ave jöho jemèhu aevo'i hebe rovarije jöhoje. Noro göëro göho dè vövöbajo'e aho'o uehorovèvo'ejo.

<sup>12</sup> Cain-hu è'adèhioho no bogo èhioho è'èjo. Hu A Sisë hesi aëro jiè'ëro hesi öho ano bamadeje. Rabèni èhioho è'adeje. Hu mu sisèmu vae'i hesi öho mu maemu vaejajego èhuni è'adeje.

<sup>13</sup> Aganomë ave sa'are mu sisèmu uehorovarue ariböviehu jemë gëromo bijönègaruoho nadi tiöromo uvore: Diehi'oromo è'aruèjo.

<sup>14</sup> No ave jöho uehorovoromo èhuro garomo uvarueje: No vuovo öroho vuonugè'ëro i'ovo öriremu javuajèjo è hesi bëhoho noro Christian ö mueno'oho dè vövöbajo'e aho'o uehorovèvaruëro jiè'ëro. A'i ae rahu a bogo uehorovèvè'oho vuovo örire jijihadoho èhi jijihajeje.

<sup>15</sup> Ae rahu ö mueno'e gëromo bijönimè'oho a muo'amarue a jabesi dè vövöbajo'o va'ène jèvanovajeje. Jemè'o iae garomo uvarueje: A muo'amaje aho bogo i'ovo öriroho jiè'ëro bogo ioro'ioremuoho maho hi hesi höjo.

<sup>16</sup> No ave jöho uehorovoromo èhuro uvarueje: Göehu gö dè vövöbajo'e aho'o uehorovarue hesi bëhoho èhi höjo. Kerisoro hesi dè vövöbajo'ere börömo bëhe uehorovavuoromo sinoho bogo juhuonivo'i ajamui'i guomade höjo. Èhuni no'o Christian ö mueno'ëro göëro göho uehorovèvoromo sinoho bogo juhuonivo'i ajèmi'i vuovo'ejo o diehi'o'ejo. Èhi jiè'oho iae maeje.

<sup>17</sup> Ae rahu inöme marohè'e jio'i ga'iröhe hesi Christian ö mueno'o bövie bise'e bogojèvamu gagorovo ma-nunèremu gèvè'oho hu diehi'oromo uvo'è'e: Na God nasi dè vövöbajo'ere uehorovaje höjo.

<sup>18</sup> Nasi aboji harihu'ohumë è'ego no bogo ma-jö'èremuoho aho sarerèmiromo uè'iro: Naro jasi örire dè vövöbajo'e aho'o uehorovavaje höjo. A'i è'ego no ae uehorovèvoromo huè baejèvoromo ajèmi'iro.

<sup>19</sup> Göehu gö dè vövöbajo'e aho'o uehorovèvè'oho èhuro no garomo uvo'ejo: No jö ma ejarue aribövie javuajèjo. Èhi uvoromo God-are nunire riravoromo juhuonivo'i nosi dè vövöbajo'oho sanuamirovo'ejo.

<sup>20</sup> Jö sisë javuë'ëro dë vövöbajo'ere juhuonivë'o ho no uvarueje: Nosi arijo'arije ma-bisemu garorovo'i God-ro no iosiramuiromo aho'obëhe gö barëjaje höjo.

<sup>21</sup> Aganomë nosi jö sisëhuni nosi dë vövöbajo'ere bogo juhuonivë'o ho God-are nuniro javuoromo birivoromo mae riravarueje.

<sup>22</sup> Mae riravoromo rabe rabe ua gavë'o ho iae hesirire baejarueje rabëni hesi bëhoho hu bojamuade jöho ejahoromo huhu nimaje muoho vaejaruëro jïë'ëro.

<sup>23</sup> Huhu bojamuade jöho aviëhije. Huro uövuadeje noro hesi Harihe Iesu Keriso-are ihoho mae uehorovoromo huhu uövuadëhi ëhi göëro göho dë vövöbajo'e aho'o uehorovo'iröhego.

<sup>24</sup> Ae rahu God-are jöe gö gö ejahë'o ho God'o gemuoro jio'i God-ro hesi dë vövöbajo'ere hijajeje. Ave jöho uehorovoromo ëhuro uvarueje: God-ro nosi dë vövöbajo'ere hijaje höjo hesi Aru'ahoho bojamuijë'ëro ëhu'ëro.

## 4

*Keriso'o muorovarue aribövi jabesi mu sisëhu'o ave sa'a hesi mu sisëhu'o avoho goro'iröhe jöhoje.*

<sup>1</sup> Aganomë ae göëro göëro sarerivoromo sa'ae dinö'e dinö'e majëhibe jijihoromo uvoruomajeje: No God-are Aru'ahohuro jöho bojamuego majëhijarue höjo. Ëhuni ae göëhu ëhi uëvë'o ho avoho gëromo gare jabumë mae God-are Aru'ahe baejë'ëro uëvego o hesi aru'ahe gö baejë'e jioruomego.

<sup>2</sup> Ave muoho garomo uvo'a'aruje: God-are Aru'ahëro jöho bojëmego majahuijarue höjo. Ae rahu ae huruoho majëhiromo uëvë'o ho: Iesu Keriso a nosi sino jiajëhi ëhi rovë'e hö uëvë'o ho God-hu bojamuaje Aru'ahoho baerumë'eje.

<sup>3</sup> O ae rahu Iesuare jö bogo ëhi huruoho majëhijë'o ho ëho bogo God-are Aru'ahoho baeromo majëhi'i a'i Keriso'o muorovaje a hesi aru'ahoho baeromo majëhijarueje. Jemë mami'e hejarijeje uëvamu: Keriso'o muorovaje ahuro rue'a'ajëjo. Röhu avevejö'o ho ë a hesi sareri sareri'e muoho ave sa'are vaeruomajeje.

<sup>4</sup> Hesi sareri sareri'e muoho vaeromo Keriso-are jöho sisë'i majëhijarueje. Iae ëhi ë'arujeje röhu nasi aboji harihu'e jemë God-are ariböviëro jëvë'ëro Keriso-are jö sisë'i majëhijarue aribövi jabesi muoho ruahö'öjë'e jëve. Ëhesi bëhoho jemëro God-are Aru'ahoho bae'i sa'a hesi mu sisë uehorovarue ariböviohuro Satan-are darugoho baerumë'eje. Röhu God-are Aru'aho hesi daruge jemesirire jiajohuro Satan-are daruge jabesirire jiajoho iosiramijë'eje. Ëhu'ëro jïë'ëro jemëro Keriso-are jö sisë'i majëhijarue aribövi jabesi muoho ruahö'öjë'e jëve.

<sup>5</sup> Ëaribövioho jabu ave sa'a hesi mu sisë uehorovarue aribövie jioruome. Ëhi jïë'ëro ave sa'a hesi jö sisëho atego ave sa'a hesi mu sisë uehorovarue ariböviohuro ejëhoruomajeje.

<sup>6</sup> A'i no ma-God-are ariböviemu javue. Ëhi javuë'ëro ae rahu God gavë'ohuro ëhuro nosi jöho ejahuarueje. Ae rahu bogo God-are aribövi jëvë'o ho nosi jöho bogo ejahuarueje. No garöhe di ariböviohuro God-are jö ejahuamu o ave sa'a hesi jö sisë ejëhamu gavë'o ho ëhuro uvarueje: Ëho God-are Aru'ahëro jöho bojëmego majahui'i ëho sareri'e aru'aho sisëhuro bojëmego majahuijarue höjo.

*No göehu gö dë vövöbajo'e aho'o uehorovo'iröhe jöhoje.*

<sup>7</sup> Aganomë ë'ego no göëro gö dë vövöbajo'e aho'o uehorovo'iro. Noehu göehu gö ëhi uehorovë'o'ho ëho God-ro hesi uehoro maho nosi dë vövöbajo'ere bojamuego ë'arueje. God-are aboji harihu'ëro javuë'ëro God mae gavarueje.

<sup>8</sup> O ae rahu ae gö dë vövöbajo'ere bogo uehorovë'o'ho God bogo ma gavarueje rabëni God-ro dë vövöbajo'e aho'o uehorovemu uehorovavuaje aëro jjië'ëro.

<sup>9</sup> Huhu uehorovavuaje muoho aviëhi röjahuijadeje. Harihe gemu'o'ho sa'are nugö'öjadeje huro i'ovavuego mae raromo'iröhego.

<sup>10</sup> Göehu gö dë vövöbajo'e aho'o uehorovarue mu hesi bëhoho diehije. Noehu God dë vövöbajo'ere uehorovaroho ëho ma-bise'eje. Èhuni göehu gö uehorovarue mu hesi bëhoho bogo ëhiohoje. A'i God-ro hesi dë vövöbajo'e aho'o no uehorovavuoromo hesi Harihoho nugö'öjadeje guomego nosi sisëho uehorovoromo vuonugo'iröhëni. Èho böviohoje. Èhuni God-hu ëhi no uehorovavuadoho ëho göehu gö uehorovarue mu hesi bëhohoje.

<sup>11</sup> Aganomë God-ro börömo bëhe uehorovavuoromo ëhi ajamuijadeje. Èhuni no göëro göho ëhi uehorovo'ejo.

<sup>12</sup> Ae gö nosi nunoho God bogo gavë'e javue. Röhu göehu gö dë vövöbajo'ere uehorovë'o'ho God-ro nosi dë vövöbajo'ere hiromomo hesi uehoro maho bojamuego nosi dë vövöbajo'o'ho rarovavuajeje.

<sup>13</sup> Ave jöho uehorovoromo ëhuro garomo uvarueje: No God'o gemuoro javuo'i hu nosi dë vövöbajo'ere hijaje höjo. Huro hesi Aru'ahoho bojamuijé'ëro ëhu'ëro.

<sup>14</sup> No God-are Harihoho iae nosi nunëro gavë'e javue. Gavë'ëro noro mae majëhiromomo ae uëvarueje: Vavuohuro hesi Harihoho nugö'öjade höjo sa'ae dinö'e dinö'e raromarue aribövioho baejëvoromo maro bamëvo'iröhego.

<sup>15</sup> Ae rahu huruoho majëhiromomo uëvë'o'ho: Iesu iae God-are Harihe hö uëvë'o'ho ëhi jjië'e aribövi jabetesi dë vövöbajo'ere God hi'i jabumë God'o gemuoro jëvajeje.

<sup>16</sup> Röhu iae no'o garomo mae uehorovoromo uvë'e javue: God-ro no mabëhe uehorovavuaje höjo.

God hu dë vövöbajo'e aho'o no uehorovavuaje ahoje. Èhuni ae rahu ae gö dë vövöbajo'ere uehorovo'i hijë'o'ho God'o gemuoro jio'i God-ro hesi dë vövöbajo'ere hijajeje.

<sup>17</sup> God-hu hesi uehoro ma nosi dë vövöbajo'ere bojamuego rarovavuaje hesi bëhoho hujeji Kerisohu nosi mu mevo gövuamu no hesi nunire riravë'o'ho no bogo juhuonivo'i a'i uvoröhego: Keriso jiajëhi no'o sa'are raromoromo ëhi jio'be rovë'e javuajë uvoromo ëhuni avoho birivoröhego. Èhuni God-ro hesi uehoro maho bojamuego nosi dë vövöbajo'ere rarovavuajeje.

<sup>18</sup> No herovoromo uvë'o'ho: God-ro hesi dë vövöbajo'e aho'o uehorovavuaje hö uvë'o'ho no bogo hesi öriroho juhuonamijarueje. No herovë'o'ho God-are uehoro maehu rueromo nosi dë vövöbajo'ere rarovavuamu hejë'o'ho God juhuonamijaruoho vuonugo'i mae uehorovarueje. Èhesi bëhoho no God juhuonamijë'o'ho no uvarueje: God-ro i'ue bojamui hesi höjo. Ae rahu hu juhuonamijë'o'ho ëhi jjië'e aribövioho God-are uehoro maho jabetesi dë vövöbajo'eroho bogo rarovëvajeje.

<sup>19</sup> God-hu urimo nosi örire dë vövöbajo'ere uehorovavuadohuro ëhuro no hu'o ae gö'o dë vövöbajo'ere uehorovëvarueje.

<sup>20</sup> Ae rahu uvë'oho: Iae na God-are örيره dë vövöbajo'ere uehorovaje hö uvo'i röhu hesi ö mueno'o gëromo bijönëgë'oho ëho hu ëma sarere uvajeje: Na God uehorovaje höjo. Hesi ö mueno'e nunehu gëvajoho bogo uehorovëvë'oho ëhuro God uehorovo'iröhoho bogo eni jie hu God bogo nunoho gavajëro jië'ëro.

<sup>21</sup> Ëhu'ëro God-ro ave jöho bojamuiromo uövuë'eje: God nasi örيره uehorovevë'oho jemesi ö mueno'ohu'o dë vövöbajo'oro uehorovëvorëjo.

## 5

### *God-are Harihu mae uehorovo'iröhe jöhoje.*

<sup>1</sup> Ae rahu mae uehorovoromo uvë'oho: Iesu hu böröme namiromo ajamuaje ae hö uvë'oho ëhi jië'e aribövioho God-are aboji harihu'e jioruome. Ae rahu vavu dë vövöbajo'ere uehorovë'oho ë vavu hesi aboji harihu'ohu'o dë vövöbajo'ere uehorovëvo'anue.

<sup>2</sup> Ëhuni no ave jöho uehorovoromo ëhuro iae garomo uvarueje: No God-are aboji harihu'oho dë vövöbajo'ere uehorovëvarue höjo. No God dë vövöbajo'ere uehorovoromo hesi jögoru ejahë'ohuro ëhuro no garomo uvarueje: Hesi aboji harihu'ohu'o uehorovëvarue höjo.

<sup>3</sup> God dë vövöbajo'ere uehorovë'oho ëhuro iae no God-are jögoroho ejaharueje. God-are jögoru ejahë'oho ëho bogo i'u'ehuje.

<sup>4</sup> God-are aboji harihu'e aho'obëhe sa'are mu sisëho biririvoromo ruahö'öjarueje. Ruahö'ö'iröhe hesi öroho no Iesu mae uehorovaruhuro ëhuro ruahö'öjarueje.

<sup>5</sup> Diehi jië'e ariböviohuro sa'are mu sisëho ruahö'öjarueje. Ae rahu uvë'oho: Iesu hu God-are Harihe hö uvë'ohuro ëhi jië'e ariböviohuremu sa'are mu sisëho ruahö'öjarueje.

### *God-hu jö mae majahuijego no heromo ëhuro Keriso mae uehorovarue jöhoje.*

<sup>6</sup> Röhu sa'are rovade aho iae Iesu Keriso jiadeje. Ëahuro rueromo jovo maëro bapataeto vaejamu köho rueromo guomadeje. Bogo rueromo ma-bapataeto vaejadohemuje. A'i hu jovo maëro bapataeto vaejamu ijonö hesi köho rueromo guomadeje. Huhu ëhi ë'ade jöho God-are Aru'ahohuro iae mae majahuijajeje ë Aru'ahoho sareroho bogojio'i ma-maemu jië'ëro.

<sup>7</sup> Jöe niö'i gemu no heromo Keriso mae uehorovarueje

<sup>8</sup> Aru'ahuhu majahuijaje jöho jovehu bapataeto vaejade jöho kö rovade jöho. Ëjöho niö'i gemu bëhe gemuhoje. Ëho heromo mae uehorovarueje.

<sup>9</sup> Ma-aëremu jö ma majahuijamu hejë'oho noro ëho mae uehorovarueje. Röhu a jabesi jöho ma-bise'e jio'i God-hu jö mae majahuijajoho ëho börömohoje. Röhu God-ro hesi Harihu hesi jöho ëhi ma-mae majahuijë'eje.

<sup>10</sup> Ae rahu God-are Harihu mae uehorovë'oho ëhuro dë vövöbajo'ere uehorovoromo uvarueje: God-hu hesi Harihu hesi jö majahuijadoho iae mae höjo. O ae rahu God-hu majahuijade jö bogo ma uehorovë'ohuro ëhuro uvoruomajeje: God hu jö sarere jövaje ae höjo. Ëhesi bëhoho God-hu hesi Harihu hesi jö majahuijadoho jaburo bogo ma uehorovarüero jië'ëro ëhiho uvoruomajeje.

<sup>11</sup> God-hu hesi Harihu hesi jö mae majahuijade hesi bëhoho aviëhije. God-ro darugoho bojamuijë'eje noro baeromo nosi aru'ahoho i'ovoromo ioro'ioremu mae raro'mo'iröhego. Ëdarugoho God-are Harihu hesirire jie.

<sup>12</sup> Ēhu'ëro ae rahu Harihohu'o gemuore bimuvë'o ho ë darugoho baeromo hu'o gemuore mae hijajeje. O bogo God-are Harihohu'o gemuore jië'o ho bogo ëhioho maho hijajeje.

*Ioro'ioemu mae raromo'iröhëro gavarue jöhoje.*

<sup>13</sup> Naehu jemesi örire jajivaje hesi bëhoho jemëro garomo uvo'irarijego: Iae no maro raromaruoho ëhi ioro'ioere gemu raromobe va'ejarë uvo'irarijego. God-are Harihu mae uehorovaruje aribövioho jemë uëve.

<sup>14</sup> Ave jöho uehorovoromo ëhuro no biririvoromo hesi nunire riravoromo jöho majahijarueje. God-hu rabe rabe bojamui'i nimajoho noehu ua gavë'o ho iae hu ejahuaajeje.

<sup>15</sup> Noehu ua gavë'o ho iae ejahuaaje hö uvaruëro jië'ëro ëhu'ëro no uvarueje: No ua gavë'o ho bojamuego baejarue höjo.

<sup>16</sup> Ae rahuro ga'irane Christian ö mueno'ehu mu sisë vaeromo bogo sisëroho va'o hesi jioruomamu gëvë'o ho jero God ua ganego huro jabesi sisëho ajëmiromo daruge bojëmego maro raromo'iro. Na uaromo ë'e mu sisë vaeromo bogo sisëre va'o hesi jio'amaje ariböviohuni God ua ganëjo. A'i mu sisë gö vaejë'o ho sisëro va'o hesi javue. Na bogo uave: Jero ëhi jië'e ariböviohuni God ua ganëjo.

<sup>17</sup> God-hu bijönimaje muoho aho'obëhe vaejë'o ho ëho sisëje. Röhu mu sisë gö vaejë'o ho no bogo ëhuro sisëroho va'o hesi javue.

<sup>18</sup> No garomo uvarueje: Ae rahu God-are aboji harihu'e javuë'o ho mu sisëho bogo vaemu vaejarue höjo. God-are Harihohuro tugohahuego A Sisëho nosi öriroho bogo ijumavuajeje.

<sup>19</sup> No garomo uvarueje: No God-are aboji harihu'e javuo'i sa'are mu sisë uehorovarue aribövie aho'o jabumë A Sisë hesi darugoro raromarue höjo.

<sup>20</sup> O no garomo uvarueje: God-are Harihohuro rueromo uehoro maho bojamuijë'e höjo ëhuro noro God garöhego God gemu hu mae jiajoho. No hu'o gemuoro javuoromo hesi Harihe Iesu Keriso'o gemuoro javue. Ēaho gemu God mahoje. Huro ajamuego no ioro'ioere gemu mae raromarueje.

<sup>21</sup> Nasi aboji harihu'e avoho mueberovore. Nadi uvore: Inöme bövie bise'e masije höromo nuninöho bamo'i God dejonöho bamore. Ahia mino'e.



## 2 JOHN

Aëro uvoruomajeje: Jö jabesi örire jajivade ekaresiaehu ame gemuore raromarue jöho John-ro huotovoromo uhu'e magonahehu aboji harihu'e söromo gemuore raromaruëhi ëhi jajivade höjo. O verse 13-re John-hu hijade amore ekaresia jabesi jöho huotovoromo uhu'e uvade magonaho hesi ö hesi aboji harihu'o jönö'e ëhi jajivade höjo.

<sup>1-2</sup> O asë'e aboji harihu'e gagovoromo gemuore raromaruje magonahoho God-ro hesinö javojöro baejavë'e magonahe jave. Ekaresia jabesi a duvahoho naro jemesi örire jejëmije. Jemë'lo no'lo God-are jö maho uehorovoromo ëhi gemu uehorovobe va'ejo. Ëhuni na bogo ma-döëremuoho uehorovëvo'i dë vövöbajo'e aho'lo uehorovëvajeje. Bogo na gemuoho a'i God-are jö ma gavarue aribövioho aho'obëhe jabu'lo ëhi gemuoho uehorovëvarueje.

<sup>3</sup> Noro God-are jö maho ejahoromo göëro gö dë vövöbajo'e aho'lo uehorovëvo'iramu God Vavuohu'lo hesi Harihe Iesu Keriso'lo noni vavaenimoromo ajamuiromo huë mae bojamui'ë'e.

*God-are jö mahemu ejahoromo dë vövöbajo'e aho'lo uehorovo'iröhe jöhoje.*

<sup>4</sup> Na hejodeje uevamu: Vavuehu uövuadëhi jasi aboji harihu'lo ioro'iorohuro God-are jö mahemu ëhi ejaharue höjo. Ëhi hegoro nimoroho avohodeje.

<sup>5</sup> Ma'ino röhu ave jögoru jajivo'ië'ajoho bogo i'ehu jio'i mami'e aevo'i hebe rovere jögorohoje. Naro uëve: Ë'ego no ae aho'obëhe göëro göho dë vövöbajo'ere uehorovo'irarëjo.

<sup>6</sup> Göehu gö dë vövöbajo'ere uehorovo'iröhe hesi bëhoho ëho God-are jögoroho ejahë'e raromo'ejo. O God-are jögoru hesi bëhoho ëho mami'e aevo'i hebe rovarijëhi ëhi jemë göehu gö uehorovë'i raromo'irarijohoje.

<sup>7</sup> Röhu a sarerëmiarue aribövie aho'obëhe sa'ae dinö'e dinö'e sareri jöho majëhibe jijihoromo uëvarueje: Iesu Keriso bogo a maho rue'i aru'ahëro rovade höjo. Ëhi majëhijarue aribövioho Keriso'lo muorovoromo ae sarerëmiarue aribövie jioruome.

<sup>8</sup> Ëhuni avo'avoho mueberovore. Sareri'e jö bogo ejëhë'oho ëhuro mu vaebe rovarije suvuoroho bogo boremi'ö'i bae barë'aruje.

<sup>9</sup> Ae rahu Keriso-are jö bogo ma'eno titimo'i aruëre anumëre ëma jijihë'oho ëhi jië'oho God rumo'e aribövie jioruome. O ae rahu Keriso-are jö ma'eno titimë'oho God Vavuohu'lo Harihohu'lo jaburo niö'iro ëhi jië'e ariböviohu'lo gemuore jiarueje.

<sup>10</sup> Ae göehu jemesirire ö'oromo Keriso-are jö jiajëhi bogo ëhi majëhijë'oho nadi uëre: Ruehëjo. O nadi jejëmire.

<sup>11</sup> Ae rahu jejëmijë'oho ëhuro iae jemë jabu'lo bimuvoromo jabesi mu sisëho vae'a'aruje.

*Ijo tugoho'i jöhoje.*

<sup>12</sup> Na jöe aho'obëhe jajivo'irodoho röhu bogo jajivo'ejo. Na nege ö'oromo jemë'lo na'lo jöho majahirovoröhëni. Ëhi jië'ohuro ëhuro jemë'lo na'lo sisë maro nimoroho'ejo.

<sup>13</sup> God-hu baejade magonahe jasi öe hesi aboji harihu'oho jaburo jasi örire jejämijö. Ahia mino'e.

### 3 JOHN

<sup>1</sup> O asë'e nasi isio Gaius God-are ekaresia jabesi a duvahoho naro jasi örire jejamije. Na bogo ma-döëremuoho uehorovavo'i nasi dë vövöbajo'e aho'o uehorovavajeje.

<sup>2</sup> Isio na nege jasi sino haho'ohu'o muohu'o ma-mabëhe javojöro. Iae na gave jasi dë vövöbajo'oho avevejö'oho mae javo'ego.

<sup>3</sup> Èhesi bëhoho Christian ö mueno'ëro rueromo uevareje: Gaius hu God-are jö mahemu ejahaje hö uevamu heromo nimoroho avohodeje. Èho iae maeje. Majae èhi ja God-are jö maho ejahë'e raromanueje.

<sup>4</sup> Mu göëni göënioho na ma-bisemu nimoroho'i aehu uevë'oho: John jasi Christian aboji harihu'ohuro God-are jö maho ejahë'e raromaruë uevamu hejë'oho na nimoroho avohajeje.

*Gaius-hu mu mae vaejamu John-hu rajahijade jöhoje.*

<sup>5</sup> Isio jero mabëhe biririvoromo Christian ö mueno'oho ajëmijanueje. Öre gö jioromo rovare Christian ariböviohu'o huë mae bojëmijanueje.

<sup>6</sup> Èariböviohuro rueromo ekaresiae aho'o uövuareje: Gaius-ro nosi örire huë mabëhe bojamuijade höjo. Röhu God-hu nimajëhi jaehu bövi bise'oho jabumë ajëmiromo rëmö'öjamu örire va'ë'oho èho iae mae jio'ë'e.

<sup>7</sup> Èhesi bëhoho God bogo ma uehorovarue aribövi jabesiroho suvuoroho bogo ujuohë'e ëma ri'öromo va'ë'ejö Keriso-are jöho baeromo jijih'o'iro.

<sup>8</sup> Èhuni Christian aribövioho noro jabumë ajëmi'ejo èhuro no jabu'oho bimuvoromo jö ma majëhijarue hesi muoho vaeröhëni.

*Diotrephes'o Demetrius'o ë ae niö'li jabesi jöhoje.*

<sup>9</sup> Naro jasi ekaresia jabesi örire jö harihe jajivodeje. Jajivodoho Diotrephes hu böröme vae'i nimë'ëro nosi jöho bogo ejahuaeje.

<sup>10</sup> Èhu'ëro jië'ëro na ö'ë'oho huhu vaejaje mu sisëho huruoho majëhi'ejo ekaresiae aho'o heromo uehorovoruumoröhego. Huro nosi jöho huotovoromo uëvajeje: John-mëro èhi jië'e mu sisëho vaejarue höjo. Hu bogo èhemuoho è'i Christian ö mueno'ehu ö'ë'oho bogo rajëhiromo baejëvajeje. O ae göehu ajëmi'li nimë'oho huro ahëvoromo uëvajeje: Jemë ë aribövioho ajëmi'ië'e jëvaje rori'oho va'ohëjo. Va'oromo nadi ijoho Keriso rajahijarue osaroho ruerëjo.

<sup>11</sup> Isio aehu mu sisë vaejaruëhioho nadi èhioho vae'i a'li mu ma vaejaruëhi èhi vaene. Ae rahu mu mae vaejë'oho èho God-are aribövie jioruome. O ae rahu mu sisë vaejë'oho jabu God bogo gavë'ejö.

<sup>12</sup> Röhu ae aho'obëhe uvoruomajeje: Demetrius hu a mae höjo. Iae hu mu mae vaejaje aeje. Ae aho'o hu garomo èhi uvarueje. Iae no'o uvarueje: Hu a mae höjo. Röhu ja'oho gavanueje no jö maemu majëhijego. Èhu'ëro Demetrius-are jö majëhijaruoho èhu'oho iae maeje.

*Ijo tugoho'li jöhoje.*

<sup>13</sup> Na jöe aho'obëhe jajivo'irodoho röhu bogo jajivo'ejo.

<sup>14</sup> Na nege ma-burëro ö'oromo ja garomo ja'oho na'oho jöho majahirovoröhëni.

<sup>15</sup> Huë mae hine. Ja huë baejavarue aganoho jaburo jasi örire jejamijö. O nasi aganoho aho'o gemu gemu jejemijode höne. Ahia mino'e.

## JUDE

<sup>1</sup> Iesu Keriso-are mu vaejahaje aho James-are öe Jude naro jemesi örire jejëmiye. God Vavuohuro jemë hesinö jëvojöro uëvë'ëro jemë dë vövöbajo'e aho'o uehorovëvoromo Iesu Keriso-are burure rëmë'eje.

<sup>2</sup> Na nege God-hu jemëni vavaenimoromo huë mae bojëmiromomo rajëhijaje muoho jemë herovo avoho'irarijego.

*Sareri'e jö rjöhijarue aribövi jabesi jöhoje.*

<sup>3</sup> Aganomë God-hu mare bamavuade jöho jemë'o na'o gemuoho uehorovarueje. Èhesi jöho na jajivo'i nego avohadeje. Èhi negamu röhu uvodeje: Èjöho vuonugo'i jögoru gö jajivë'o ho iae mae höjo öre gö bogojevë'ego. Èhesi bëhoho God-ro hesi aribövioho jöho rjöhijadeje noro ioro'ioremu mae uehorovo'iröhego. Röhu ë jöho a ioro'iorëro huotohuotovoromo rjöhijö. God-are jö huotohuotovoromo rjöhijaruohuni èhuni jabesi sareri'e jöho biririvoromo aho'irarijego jajivo'irögoru uvodeje.

<sup>4</sup> Èhesi bëhoho aëro jabesi mu sisëho gurihi'i ekaresia jemesi gemuore ro buarohoruomë'eje. Jemë'o buarohoruomë'ëro God bogo ma uehorovo'i a'i sareri'e jöho majëhiromomo uëvarueje: Jemë öehu jijihanovë'o ho iae mae höjo God huë baejövaje ae jië'ego. Èhi uëromomo Iesu nosi Bada hu gemuehu böröme vaejavuaje ë aho jabumëro bijönimoruomajeje. Èhi jië'e aribövioho i'ue baeromo sisëro va'oruomoröhego God-are surire jöho èhi uvë'eje.

<sup>5</sup> Ave jö naehu jajivo'ië'ajoho jemëro he barëjë'e jëve. Röhu na maho uë'i nege jemëro avoho uehorovo'irarijego. Israel aribövioho Egypt sa'are sisë'i raromamu Badaro ajëmiromomo mare sö ujuoho rovade höjo. Èhi è'ade höjo röhu ijonöho ae rahu bogo ma uehorovaroho huro i'ue mana bojëmamu sisërëjövade höjo.

<sup>6</sup> O anera jabesi jöhu'o uehorovore. God-hu bojëmade muoho anera ioro'iorohuro bogo biririvoromo muebe'irögoru jabumë raromomo'iröhe röhoho vuonugo'i jabesi mue gö baejare höjo. Èhi'amu God-ro ioro'ioremu tövëvoromo ramoramomere taemëvo rëmë'e höjo maja börömo rovego uëröhëro: Sisë jövaje sisëro va'ohëjo.

<sup>7</sup> O Sodom amohu'o Gomorrah amohu'o jabesi bëhire jiaje amo ioro'iorohu'o èho jabesi jöhu'o uehorovore. Jabu'o mu sisë bëhe vaeruumade höjo. Mu sisë vaeromomo öëro jijihanovoromomo a'o a'o sihorovoromomo mue gö gö vaeruumade höjo. Èhi'amu God-ro i'ue mana bojëmiromomo vënoho nugö'öjamu ioro'ioremu ravo'amade höjo aëro garomomo uvoröhego: God-ro èhi jië'e i'uo ho sisë'e aribövioho bojamui'ajëjo.

<sup>8</sup> Èhi jie röhu jemë'o gagovarue ariböviohuro èhi jië'e mu sisë gemuoho vaejarueje. Jabumëro uvarueje: Nia'ovo'iraeromomo gavaruëhi èhi ömë'o ho mae höromomo va'inumi'e muoho vaeromomo jabesi sino haho'o ho ijumorovarueje. Jögoru masijoho bijönimarueje. Aji'e aribövie ö'idöre raromarue jabesi jöho sisë'i atarueje.

<sup>9</sup> Jabu èhi sisë'i atarueje röhu urimomo Michael anerae börömo namijajoho bogo èhioho sisë'ioho jövadeje. Èhesi bëhoho Moses guomamu Michael'o Satan'o èhi di aehu Moses-are sino bae'iröhe jöho aho'ahamirovareje. Jöho aho'ahamirovoromomo Michael bogo biriri'övoromomo jö sisëho majahiro

nibejahi'irögoro ma-uavadeje: Na jöho bogo ua'ejöjo. Jaehu sisë ë'anue jöho hesi Badaro majahi'ajëjo.

<sup>10</sup> Ëhi jië'e sanu'e jö jövadoho röhu jemë'o gagovarue ariböviohuro bogo ëhioho ato'i a'i bogo ma hejarue gavarue jöho ëma sisë'i atarueje. Sisë'i atoromo simano rumo'e mahu urejehu jijiharuehi jabumëro ëhi bogo uehorovë'e jabesi nimarue muoho ëma vaebe jijihoromo ëhuro sisërërovarueje.

<sup>11</sup> Jabuhu i'u bae'iröhe majaho iae rue'ë'e. Jabumë a mamie niö'i gemu urimo raromaro ho va'ëne jëve. A mami ae Cain-hu hesi nimoromo ëma ë'adëhi jaburo öre gemuore jijiharueje. O Balaam-hu moniemu uehorovoromo sareri'e mu a röjehijadëhi jaburo ëhi jië'e muohuremu vaejarueje. O Korah-hu biriri'övoromo God-are jö ahamu guomadëhi jaburo God-are jöho ëhi aharueje u'emu vuovëvoröhego.

<sup>12</sup> Jemëhu huë baerovo'i gemuore gagovoromo i ue'ahë'iroho ë aribövioho jabu'o rovarueje. Rueromo bogo juhuonivo'i ma-biriri'övoromo nimorohë'i ioho jovoho mahunö'e ue'aharueje. Ëhi jië'e sisëho ë'ego ëhuro niögu suhi'ere va'inumi jiajëhi jabesi aru'ahoho ëhi va'inumi'e jëvego huë sisë baejarueje. Jabumë ae gö bogo ajëmi'i jabesi sivue ajamirovarueje. Jabumë ëni rumo'e sue burehu bava'ego sa'a bogo rihu bojama joho va'ëne jëve. Jabumë ijo saho va'ëne jëve. Ijo saho jabesi bajo rae maja rovë'iroho bogo raejarueje. Bogo raejego aëro umoromo dirumohu'o jahego ioro'ioremu sisërëjajeje. Jemë'o gagovarue aribövioho ëhi jëve.

<sup>13</sup> O jovehu va'inumi gatogato hasaromo ionire a nunire bu'öjajëhi jabesi sisëho ëhi a nuniro ma-va'orahoro vaejarueje. O ara'ehu vëni ioromo bio baeromo va'ajëhi jabumë ëhi jëvanove. God-hu nugëhade ramoramo sisë mare jië'ire ë rireromoromo ioro'ioremu raromo'ë'ö.

<sup>14</sup> Jemë'o gagovarue ëhi jië'e a sisë jabesi jöho Enoch-ro ae majëhijadeje. Adam-are ujehu jiobe rovadoho ro iae Enoch hu number 6-ho jiadeje. Enoch-ro sisë aribövi ijonö diehi jëvoröhe jöho urimo ae majëhiromo uëvadeje: Jemë'o garëjo. Badaro hesi anera maho aho'obëhe mae jabu'o gemuore rue'a'ajëjo

<sup>15</sup> ae aho'obëhe mevavuo'iröhëni gö'i mae o sisë javuego. Mevavuoromo God bijönimoruomaje ae aho'obëhe uëröhëni: God nasi örire bijönegoromo ëhi jië'e mu sisëho vaejëvarije höjo. Na bijönegoromo nasi jöho sisë'i bëhe atarije höjo. Ëhuro jemë sisë'e aribövie jëvaje sisëro va'ohëjo. Ëhi mevëvo'iröhëni Bada rue'a'ajëjo.

<sup>16</sup> Röhu jemë'o gagovarue ariböviohuro nibejëhiromo a jöho aruëre anumëre ëma vaerovarueje. Jabesi sinehu nimajëhi ëhi jijiharueje. Jabesi sivue uehorovoromo dö mare bamorovoromo jö huhe atarueje. Ae gö sanusanuëmijarueje ëhuro jabuhu nimaruehi ëhi ë'oruomöjoro. Ëaribövioho ëhi jië'e aribövie jëvë'eje.

*Avo'avoho biririvoromo raromo'iröhe jöhoje.*

<sup>17</sup> Röhu aganomë jemëro ave jöho uehorovore. Nosi Bada Iesu Keriso-are apostle ariböviehu mami'e majëhinövre jöho uëve.

<sup>18</sup> Majëhiromo uëvareje: Ijo tugoho'i jioröhe majaho dunovo'iramu aëro rueromo God-are jöho sivoromo hu bogo uehorovë'e jabesi sinehu nimajohemu vaebe jijihoruomo'ajëjo.

<sup>19</sup> Ëjabuhu uëvare ëhi jië'e ariböviohuro ëhi'oromo jemesi ekaresiaho adovëvarueje hahagu hahagu jëvojoro. God-are Aru'ahoho bogojëvë'ëro jabesi sinehu nimarue muohemu uehorovarueje.

<sup>20</sup> A'i aganomë jemëro God-are jö mahuremu uehorovarujoho biririvoromo gö'o gö'o mae uehorovobe va'oromo God-are Aru'aho hesi uehoroho baeromo God-are öroro jöe atonövore.

<sup>21</sup> Hu jemesi örire huë baejövaje jiaje ëhuni nadi vuonugo'i hu'o gemu mae raromore. Raromoromo muebere nosi Bada Iesu Kerisoro jemesi jöëni vavaenimoromo ajëmego ëhuro ioro'ioremu maro raromo'irarije.

<sup>22</sup> Ae göëro uvoruomajeje: Na Keriso-are jöho mae höjo o ëma jöe höjo. Ëhi jië'e ariböviohuni vavaenimoromo ajëmire.

<sup>23</sup> Sisëre va'arue örire ae göehu jijihoromo vënire ravorovanovamu gëvë'oho ma-burëro baejövorego mae jëvo'i. Ae göehu mu sisë vaejamu gëvë'iroho vavaenimoromo ajëmirego jabesi sisëho vuonugoruomo'iro. Röhu ëhi ajëmijë'oho gavë'i ajëmiromo jabesi sisëho goro avohore. Jabuhu ömarue muoho iëmijego jemë'o ëhi ömojööni uëve.

*God mabëhe rajahjarue jöhoje.*

<sup>24</sup> Iae God eni jië'e aego mabëhe ua'ejo. Jemë guare bejëvo va'ojööni ma'enëgoromo sějëvo va'oromo huhu hijaje aji mare rëmego nimorocho avohë'i ma-maemu riravo'irarijoho hu eni jie.

<sup>25</sup> Hu A Börömoho God gemuje. Hu no maro bamavuaaje aeje. Ëhuni no Iesu Keriso nosi Badare jöëni rajahiromo hesi örire ua'ejo: Jasi ihoho dö maro höjo. Daruge eni javë'e ae javajëjo. Böröme namiromo jasi darugëro bövie bise'e aho'o mae muebe'amanue höjo. Ëhi jiemu jiobe rovanoho jaruvo ëhi javajoho ëhi jiemu jiobe va'a'anuëjo. Iae mae. Ahia mino'e.

## REVELATION

### *Aevo'i jajivare jöhoje.*

<sup>1</sup> Aveho urimo subivahuadoho Iesu Kerisohu huruohoromo röjahuijade jöhoje. Ĕröjahuijade jöho God-ro Iesu bojamadeje huro hesi mu vaejharue aribövioho röjahuijego noro garomo uvoröhego: God-ro nimo'ego majae ijönö ähi ähi jië'e muohuro nosi örire rue'ië'ajëjo. Ĕijönö rueröhe mu hesi jöho Kerisoro nosi örire röjahui'i nimoromo hesi aneraho uavamu huro barueromo John God-are mu vaejahaje aho röjahijadeje.

<sup>2</sup> God-hu jövade jö Iesu Kerisohu mae röjahijamu John-hu gavadoho aho'o huhu mae jajivo barëjadoho aviajeje.

<sup>3</sup> Ae rahu ave surire jö adahë'o ho o ave God-are örire jioromo rovade jö heromo rabe rabe jajivadoho äho ejahë'o ho iae huë mae bae'a'anue maja börömo ho dunovë'ëro.

### *John-hu God-are ekaresiae amo göre göre raromaruho jejëmijade jöhoje.*

<sup>4</sup> O asë'e ekaresiae aho'obëhe 7 Asia sa'a hesi uhure amo göre göre raromobe rovarujohumë John naro jemesi örire jejëmiye. Na nege God mami'e ähi jië'ëro hiemu hibe rovë'ëro jaruvohu'o ähi hijaje röhu ijönö ähi gemu hiemu hibe va'iröhe ä ahuro jemë huë baeromo ajëmijego maro raromo'irarijego. O na nege God-hu döre hijaje röho hesi nuninö raromarue Aru'ahë aho'obëhe 7 äho jabu'o ähi gemuho jemesi örire ajëmi'iröhego.

<sup>5</sup> O na nege Iesu Kerisoro Vavu hesi jöhuremu ma-mae majahuibe rovë'ëro guomoromo huro aevo'ioho ri'öromo hijë'ëro a masijo ioro'ioro ave sa'a muebejaruho iosirëmiromo böröme namiromo muebejëvaje ä aho hu'o ähi gemuho ajëmi'iröhego.

Keriso hu mabëheje. Huro nosi örire uehorovavuajëro jië'ëro hesi köho otehoromo guomorovoromo ehuro nosi sisëho u'ovahuadeje.

<sup>6</sup> U'ovahuoromo ajamuiromo nosi ihoho döro bamahuamu ehuro no masije riravoromo priest muho baejë'e javue noro Keriso-are Böröme o Vavue God-are muho vaenövoröhëni. Ähi ajamuijë'ego ehuni uvo'ejo: Hesi ihoho gemu börömo ho höjo. Daruge aho'o hesiriremu höjo. Ae aho'obëhe no ähi uvemu uvobe va'ëjarëjo. Iae mae.

<sup>7</sup> Gare. Iae hu suehu'o gemu mae ruvebi'ië'e. Ruvebi'iramu ae aho'obëhe röhu hu anare aribövioho jabu'o nunëro garuomö'e'e. Garomo sa'ae aho'obëhe nierusuburu'e bamoruomö'e'e. Ĕjöho iae mae. Iae ähi jio'ë'e.

<sup>8</sup> Bada God-ro uëve: Na urimo ni'i'vevadoho röhu ijo tugohö'ioho ähi gemuho jevo'ajëjo. Mami'e jiobe rovadoho röhu avevejö'ohö ähi jioromo röhu ijönöhu'o ähi jiobe va'iröhe aho daruge aho'o jië'e aho God-ro ähi uëve.

### *John-hu nia'ovo'iraeromo Keriso gavade jöhoje.*

<sup>9</sup> Röhu John na jemesi agane gemuho jeve. Jemë'o na'o Iesuare ae gemuohuro javuë'ëro na jemë'o havoromo huë vavaene baeromo God-are aharire jiajëro hesi ajoho baeromo baberumi namijajeje. Na motumotu hesi ihe Patmos ä remë'ëjö rabëni God-hu jövade jö Iesuhu ma röjahuijadoho naehu majëhijajohuni.

<sup>10</sup> Naro Patmos sa'are hiromo hura börömo ho Bada uehorovarue majaho rovamu iae God-are Aru'ahöhuro rumorovevoromo uehore bojemamu hi'i hejodeje nasi dejonö jö'o öghuro hëgö va'ëne ma-darugo'o rovavamu.

11 Jö'o ögohuro ma-darugo'o rueromo uevavohijo: Mue gö gö ga'amanuoho suri surioro jajivonëjo. Jajivoromo ekaresiae aho'obëhe 7 jabesi öroro nugö'önego adahego hebe va'irarëjo. Ephesus amo rajo ekaresiae Smyrna amo raje Pergamum amo raje Thyatira amo raje Sardis amo raje Philadelphia amo raje Laodicea amo raje ëho jabumëro adahobe hebe va'irarëjo.

12 Ëhi jövamu hejë'i hunuorovodeje rahuhu na'o jöe jövajoho ga'i. Ë'i gavodeje iro bahijarue gije aho'obëhe 7 gold-ehu avoho'amë'oho ë mo-morö'öjamu

13 o iro bahijarue gije riravaje ririre a ma val'ëne aho niögu ëgobövi ba'amamu hörohu'o utahë'e gold-ehu avohë'e hisioho vinebire muoho taemë'e ëhi namijamu.

14 Ëa hesi simanohu'o simano uohu'o ajivoromo sa buse jahanovë'e jiohijo. Hesi nunoho vënëro höduvanovohijo.

15 Hesi höroho ajanie vënëro ravoromo ajivanovohijo. Huhu jö jövajoho jövëro ruomanovoromo ma-darugo'o uvavohijo.

16 Hesi övo mare jije aho'obëhe 7 jio'amohijo. Hesi jö'ore kaejö ëge anie ruë jio vië jië'e anio ma-ma'e jiohijo. Hesi nu ano'oho majaehu höröromo ajivego gavaruëhi ëhi ajivë'e jiohijo.

17 Ajivë'e jiamu gavë'i juhuonivoromo hesi höru'ere bejevoromo hesi bëhire ae guomë'ohuro raromanovodeje. Raromamu hesi övo mahuro nasi sinore bamehoromo uevadeje: Nadi juhuonivëjo. Na aevo'i jevadoho röhu ijo tugoho'i jevo'ajëjo.

18 Na birivoromo hijaje ae jevajëjo. Urimo na guomevade höjo. Röhu gevëjo. Na ioro'ioremu hiemu hijajëjo. Ioro'ioremu hiromo darugoho baejë'ëro ëhu'ëro naehu uëvë'ohuro aëro vuovoromo vuovë'e ariböviehu va'o raromaruire ë va'o raromarue höjo. O bogo uëvë'oho bogajo. Na ëhi jië'e eni jevë'e ae jevajëjo.

19 Ëhuni jaruvo jiaje muohu'o ijonö rueröhe muohu'o jaehu ga'amanuoho ëho jajivo'amonëjo.

20 Röhu jije aho'obëhe 7 nasi övo mare jio'amamu gavane hesi jö subivahadoho o gold-ehu avoho'amë'e iro gije aho'obëhe 7 ga'amane ë hesi jö subivahadoho ë jöe niö'i jabesi bëhoho ma-sama'e huruoho majahi'ië'ajëjo. Jije aho'obëhe 7 jabesi bëhoho ekaresiae 7 jabumë muebejëvobe va'arue anerae jio'amajëjo. O iro gije 7 jabesi bëhoho ë ekaresia 7-ho jiohe va'ajëjo.

## 2

### *Iesuhu Ephesus amore raromarue ekaresia jabesi örire nugö'öjade jöhoje.*

1 Röhu Ephesus amore raromarue ekaresia jabu'o hiromo muebejëvaje anera hesi öroro ave jöho jajivonego ekaresiae aho'o he'irarëjo. Jajivoromo uënëjo: Nörö böröme namiromo jije 7 övo mare ma'eno'amë'e iro gije 7 jabesi ririre hi juvaje aho nöröro jöe majëhi'irögoro ë'ajëjo. Uënëjo: Nöröro uvajëjo:

2 Jemesi muoho iae na gëvajëjo. I'u'e mu masijoho u'urume vae'ego gëvajëjo. O sisë aribövioho jemëro bogo ma-nunëremuoho gë'i ahëvo'ego gëvajëjo. Aëro jemë sarerëmiromo uëvare höjo: No apostle javuajë uëvaroho jemëro jabesi muoho mevoromo gëvarije höjo jabumë bogo apostle maehu jëvamu.

3 U'urume vaejë'e jëvajëjo. Nasi jöëni vavaeni böröme baejë'e jëvajëjo röhu bogo u'uvëvë'e höjo.

<sup>4</sup> Ēhi jëvohijajo röhu avehuremu gë'ihöromo na bijönegajëjo. Rabëni jemë aevo'i rajehi avoho'ego gënövödëhioho avevejö'oho bogo ëhioho ë'ego gëvajëjo.

<sup>5</sup> Urimo dë vövöbajo'e aho'o rajehinövarijoho avevejö'oho u'uhëhanovajoho ëho uehorovoromo sisëho vuonugo'i huotorovoromo urimo ë'onövarijëhi ëhi ë'onövorëjo. Bogo ëhi ë'ë'oho naro ö'oromo jemesi iro gijoho rori'o bava'ejöjo. Bogo huotorovoromo avoho rajehijë'oho iae na ëhi ë'ejöjo.

<sup>6</sup> Iae ëhi höjo röhu aviëhi ë'arujoho iae mae höjo. Nicolaus-are ijore ijore jijiharue aribövi jabesi mu sisë naehu bijönimajëhi jemë'o ëhi gemuoho bijönimaruje höjo.

<sup>7</sup> Ae rahu ja God-are jö hejanue ae javë'oho nasi Aru'ahehu ekaresia majëhibe rovaje jöho heromo avoho uehorovonëjo.

Ae rahu biririvoromo mu sisë ruahö'öjamu gavë'oho Iesu naro ja ua'ejöjo a i'ovëvo'iröhe ije God-are mure namijaje hesi bajoho i'iranego. Ahia mino'ëjo.

*Iesuhu Smyrna amore raromarue ekaresia jabesi örire nugö'öjade jöhoje.*

<sup>8</sup> O Smyrna amore raromarue ekaresia jabu'o hiromu muebejëvaje anera hesi öroro ave jöho jajivonego ekaresiae aho'o he'irarëjo. Jajivoromo uënëjo: Aevo'i jiadoho ijo tugoho'i jioröhe aho guomadoho röhu maho i'ovade aho nöröro jöe majëhi'irögoro ë'ajëjo. Nöröro uvajëjo:

<sup>9</sup> Jemesi huë vavaenoho iae na gëvajëjo. Jemë ave sa'a hesi mae sisë bogojëvajohu'o gëvajëjo. Röhu dë vövöbajo'o uhure bövi mae baejë'e jëvajëjo. Amo jemë agëvarue aribövi jabesi jö sisëho ëhu'o gavajëjo. Jaburo uvarue höjo: No Jew raje javuajëjo röhu Jew rajehu God-are aribövi jiaruëhioho jabumë bogo ëhioho jio'i Satan-are aribövie jioruomajëjo.

<sup>10</sup> Jemë vi'ehe huë vavaene bae'ië'arujoho nadi juhuonivorëjo. Gahëjo. Iae Satan-ro ae uë'a'ajëjo jaburo jemë ae gö gö savoji gagore ba'amëvego huro jemesi dëho bijioho gëröhëro. Ēhi'o'iramu huë vavaene baebe va'ojuvo majae ma-bisemu barë'iramu barëjëho'ajëjo. Röhu biririvemu biririvamu vuovëvë'iroho ioro'iolemu raromo'irarije suvuroho naro bojëmi'ejöjo ruahö'öjarijohuni.

<sup>11</sup> Ae rahu ja God-are jö hejanue ae javë'oho nasi Aru'ahehu ekaresia majëhibe rovaje jöho heromo avoho uehorovonëjo.

Ae rahu biririvoromo mu sisë ruahö'öjë'oho sinoho guomavo'iramu ijönöho aru'ahoho bogo guomavoromo sisëroho va'i maro hi'a'anuëjo. Ahia mino'ëjo.

*Iesuhu Pergamum amore raromarue ekaresia jabesi örire nugö'öjade jöhoje.*

<sup>12</sup> O Pergamum amore raromarue ekaresia jabu'o hiromu muebejëvaje anera hesi öroro jajivonego ekaresiae aho'o he'irarëjo. Jajivoromo uënëjo: Kaejö ëge anie ruë jio vië jië'e anio ma-ma'e jö'ore jië'e aho nöröro jöe majëhi'ië'ajëjo.

<sup>13</sup> Vaevë'e diehi jië'e amore raromarujoho iae na gëvajëjo. Satan hu ë amore a böröme vaeromo muebejëvaje höjo. Ēhi höjo röhu nasi ekaresia aribövioho jemëro biririvoromo nasi ihoho ma'enaruje höjo. Urimë'i Antipas-ro nasi jöho mae majëhijamu hegoroovo ë Satan-hu hijajire raromarue amo rajohuro hu anamu guomade höjo. Guomamu röhu jemëhu nasi örire mae uehorovevarijoho bogo vuonugarije höjo.



14 Ëhi höjo röhu avehuremu bogo maehu jio'i sisë höjo. Jasi ekaresia aribövie göero göero Balaam-hu mu sisë vaejadëhi ëhi gemuoho vaejarue höjo. Ëhesi bëhoho urimë'i Balaam-ro a börömo hesi ihe Balak röjahiromo uavade höjo: Jero ëhi'oromo Israel rajoho sarerëminego sisëro revo'irajo. Balaam-ro jö sisëho ëhi röjahijamu hegorovo rue a börömhuro ejahoromo Israel rajoho dinëmijamu jaburo God-are jöho ahoromo uvare höjo: Inöme gö gö aru'aho'e höromo rajahiromo mioho ë inömo inömhuni bahijëhoromo vituoho ue'ahoromo öero jijihanovoruomade höjo. Balaam-ro ëhi jië'e mu sisëho röjahade höjo.

15 Balaam-hu mu sisë urimo röjëhijadëhi jaruvoho ëhi jië'e mu sisëho Nicolaus-ro röjëhijego ae gö jemesirire raromaruohuro hesi ijore ijore jijihoromo mu sisë vaejarue höjo. Mu sisë vaejego jemëro ma-raromoromo nunëremu gëvaruje höjo.

16 Ëhi jië'e mu sisë ma-nunëremu gëvarujoho vuonugo'i ë mu sisëho ahëvohëjo. Bogo ahëvë'oho naro ma-burëro ö'ejöjo. Ö'oromo nasi jö'ore jiaje kaejöho baeromo ë sisë ariböviohu'o muorovo'ejöjo.

17 Ae rahu ja God-are jö hejanue ae javë'oho nasi Aru'ahëhu ekaresia majëhibe rovaje jöho heromo avoho uehorovonëjo.

Ae rahu biririvoromo mu sisë ruahö'öjamu gavë'oho naru suvuore bojami'ejöjo. Suvuoro hesi bëhoho urimë'i God-are ariböviehu a rumo'e sa'are jijihamu God-hu muebejëvoromo ö'idöre jiaje i i'imëmijadëhi naru ja ëhi muebejëvoromo gurihijë'e ö'idöre jiaje ioho i'imami'ejöjo i'iranego. Ö'idöre jiaje ioho i'imamiromo ajivë'e munëho bojami'ejöjo. Ëmunë hesi döre iho i'e jajivë'e jio'a'ajëjo. Ëihoho jasi sivue ga'a'anuejo. A göho bogajo. Ahia mino'ëjo.

*Iesuhu Thyatira amore raromarue ekaresia jabesi örire nugö'öjade jöhoje.*

18 O Thyatira amore raromarue ekaresia jabu'o hiromo muebejëvaje anera hesi öroro jajivonego ekaresiae aho'o he'irarëjo. Jajivoromo uënëjo: God-are Harihe nunire vënehu höduvanovoromo hörure ajani vënehu ravoromo ajivanovaje aho nöröro jöe majëhi'ie'ajëjo.

19 Iae na gavajoho jemë mu mae vaejaruje höjo. Jemë na'o a ioro'iorohu'o rajahuiromo na mae uehorovevoromo nasi muoho vaejehoromo muoho u'urume vaejë'i biririvaruje höjo. Urimoho mu mae ma-bisemu vaejarijoho jaruvoho börömo bëhe vaejaruje höjo.

20 Iae ëhi gavajëjo röhu avehuremu gë'ihöromo na bijönegajëjo. Magonahe gemu Jezebel-hu urimë'i hiromo mu sisë barovadëhi magonahe gemuëro jemë'o hiromo mu sisëho ëhi gemuoho barovaje höjo. Mu sisëho barovego jemëro bogo aho'i ma-nunëremu gavaruje höjo. Ma-nunëremu gavego ë magonahohuro jemë'o hiromo sarerëmiromo uëvaje höjo: Na jö God-aro baeromo majëhijaje magonahe jevajëromo Iesu nasi mu vaejeharue aribövioho sareri sareri'e jöho röjëhiromo uëvaje höjo: A'o magonaho'o ëma sihamirovë'oho iae mae höjo. O inöme gö gö aru'aho'e jio'amajëromo jabumëni bahijëhare mi ue'ahë'oho iae mae höjo. Ëhi jië'e sareri'e jöho majëhijego nasi aribövi ioro'iorohuro uvarue höjo: Hesi jöho mae höromo ejaharue höjo.

21 Ëhi ë'ë'e höjo röhu Iesu naru bogo burëroho i'uoho bojami'i ma-muebejë'e jevajëjo huro uehoro sisëho vuonugo'i uehoro mae baeröhego. Röhu önö'e mu sisë röjëhijajoho vuonugo'iröhoho bijönimajëjo.

22 Bijönimë'ego ëhuni iae Iesu naru i'ue mana bojami'iramu guomo guome baeromo röhoremu raromo'ajëjo. Raromo'iramu ë magonahohu'o

önö'e jijihaje aribövioho jabu'o ëhi vi'ehe böröme bae'a'aruëjo. Jabumë ë magonaho hesi jö ejaho'i bogo vuonugë'o'ho ëhi jië'e vi'ehi börömoho bojëmi'ejöjo.

<sup>23</sup> O ë magonaho hesi ijore ijore jijiharue aboji harihu'o'ho Iesu naro muo'amo'iramu vuovëvo'ajëjo. Vuovëvo'iramu gagorovo ekaresiae aho'obëhe amo göre göre uvobe va'oruomo'ajëjo: Nöröro ae aho'obëhe nosi simanoho dë vövöbajo'o'ho mevavuo barëjaje höjo gö'i mae o sisë javuego. Mevavuo göromo nosi mu diehi vaejarue hesi manaho ëhi bojamui'ajëjo. Ekaresiaëro ëhi uehorovoruomo'ajëjo.

<sup>24</sup> Röhu Thyatira amo rajo a ioro'ioroho jemëro ë magonaho hesi jö sisëho bogo ejaharuje höjo. O hesi ariböviehu uëvaruoho: Satan-are uhu jö hesi bëhoho no baejaroho jemë'o baerë uëvaruoho jemë bogo ejëharuje höjo. Bogo ejëharujohuni ëhuni Iesu naro jemesi örire ave jöho uë'ië'ajëjo. Jemë mu böröme baejë'ego ë hesi döroho muoho bogo gö'o'ho bojëmi'ejöjo.

<sup>25</sup> Röhu ë mu baejarijoho biririvoromo ma'enegro Iesu na ö'iröjo.

<sup>26</sup> Ae rahu mu sisë ruahö'öromo biririvoromo nasi mu ma'enobe va'ojuvo jasi maja barëjë'o'ho naro ja daruge bojami'iramu sa'ae aho'o muebejëvo'anuëjo.

<sup>27</sup> Sa'ae gö gö muebejëvoromo aehu rama anoromo hahovaruëhi jero ëhi ha'itoho baeromo vörö'o muebejëvo'anuëjo. Naehu ëhi'oromo sa'ae gö gö muebejëvo'irodego nasi Vavuehu uevadëhi naro ja ëhi ua'ejöjo sa'ae gö gö vörö'o muebejëvo'iranego.

<sup>28</sup> Naro ëhi uaromo sisonu'e gavarue mujöru hesi ajoho bojami'ejöjo.

<sup>29</sup> Ae rahu ja God-are jö hejanue ae javë'o'ho nasi Aru'ahehu ekaresia majëhibe rovaje jöho heromo avoho uehorovonëjo. Ahia mino'ëjo.

### 3

*Iesuhu Sardis amore raromarue ekaresia jabsi örire nugö'öjade jöhoje.*

<sup>1</sup> O Sardis amore raromarue ekaresia jabu'o hiromo muebejëvaje anera hesi öroro jajivonego ekaresiae aho'o he'irarëjo. Böröme namiromo God-are Aru'ahe aho'obëhe 7 o jije aho'obëhe 7 baejë'e aho nöröro jöe majëhi'ië'ajëjo. Jemëhu mu vaejarujoho iae na gavajëjo. Na gavajoho ae aho'obëhe uvoruomaje höjo: Sardis ekaresiaho jemëro God-are daruge baeromo mae raromaruje höjo. Jemesi jöho ëhi atarue höjo. Röhu jemë bogo ëhioho jëvo'i jemesi aru'ahoho God-are darugo rumo'ëro jiëhë'ëro vuovëhë'e höjo.

<sup>2</sup> Ëhuni ri'ö nune dadovohëjo. Vëni duoroho'ië'ajoho mueberomo huego avoho ravo'irajo. Duoroho barëjëho'ajëjo. Na gavajoho nasi A Börömoho God-ro uvaje höjo: Jemesi muoho bogo maehu höjo.

<sup>3</sup> Ëhuni Christian jö rabe majëhijamu hejarijoho avo'avoho uehorovoromo eromo uehoro sisëho vuonugohëjo. Bogo ri'ö nuni dadovoromo avoho uehorovë'o'ho naro vajiohëro ö'ejöjo. Naehu ö'irode majaho bogo mae bogo ga'a'arujëjo.

<sup>4</sup> Jemë ëhi jëvajëjo röhu jemesi Sardis amo raje ae gemu gemu jabsi niögoho avo'avoho muebejë'ëro va'inumoho bogojiëhajëjo. Ëaribövioho maëro jëvë'ëro ëhuni ajivë'e niögoho io'amoromo na'o gemu mae jijiho'aruëjo.

<sup>5</sup> Ae rahu biririvoromo mu sisë ruahö'öjë'o'ho ajivë'e niögoho ëhi ba'amo'anuëjo. O jasi ihoho mae raromemu raromo'iröhe aribövi jabsi surire jajivodoho na bogo mu'uvaho'ejöjo. Bogo mu'uvaho'i a'i naro nasi

Vavu hesi nunire o anera jabetesi nunire namiromo jasi ihoho ma-samae majehiromo ue'ejöjo: Ave aho nasi a maho höjo.

<sup>6</sup> Ae rahu ja God-are jö hejanue ae javë'oho nasi Aru'ahehu ekaresia majehibe rovaje jöho heromo avoho uehorovonëjo. Ahia mino'ëjo.

*Iesuhu Philadelphia amore raromarue ekaresia jabetesi örire nugö'öjade jöhoje.*

<sup>7</sup> O Philadelphia amore raromarue ekaresia jabu'o hiromo muebejevaje anera hesi öroro jajivonego ekaresiae aho'o he'irarëjo. Jajivoromo uënëjo: Bogo sisëho bogo sareri'oho jio'i ma-maëremu jiaje aho nöröro jöe majehi'ie'ajëjo. David-hu böröme namiromo God-are öri ari'ere va'iröhe öroho muebejadëhi naro ëhi muebejaje höjo. Naehu öri jiovë'iroho ae göehu tugoho'iröhoho bogo eni höjo. O naehu tugohë'iroho ae göehu jiovo'iröhoho bogo eni höjo. Ehi jië'e a börömoho Iesu naro jöe majehi'ie'ajëjo.

<sup>8</sup> Jemëhu mu vaejarujoho iae na gëvajëjo. Hehëjo. Naro mu öroho jemëni jiovëh'e jevajëjo. Jiovëh'ëro ae göehu tugohë'iroho bogo eni höjo. Iae na gavajoho jemesi darugoho bogo bövioho jië'e jemëro nasi jöho ejehoromo nasi ihoho ae aho'o jabetesi nunire huruoho majehiromo uevë'e jëvajëjo: Iae no Iesuare aribövie javuajëjo.

<sup>9</sup> Iae Satan-are ariböviohuro jemesi amore raromoromo uvoruomaje höjo: No Jew raje javuajëjo. Röhu Jew rajehu God-are aribövi jiaruëhioho jabumë bogo ehioho God-are aribövioho jio'i Satan-are aribövie jioruomajëjo. Röhu hehëjo. Naro jabumë ruahö'öjëvo'iramu jaburo ö'oromo jemesi hörunö ague aho raromoromo gëromo uvoruomajëjo: Jemë Iesuhu rajëhaje aribövie jëvajëjo.

<sup>10</sup> Nasi örohuni jemë u'urume vaejë'i biririvonövo'irarijego uevode höjo. Ejöho jemëro ma'enë'e jëvo'ego ehuni naro jemë ma'enëgo'ejöjo. Ma'enëgo'iramu huë vavaene sa'ae dinö'e dinö'e rueromo ae aho'o jemesi dëre bijiohë'iroho jemë mae riravo'arujëjo.

<sup>11</sup> Naehu rue'irode majaho dunovajëjo. Ehuni jemëhu baejarije mu maho nadi vuonugo'i ma-avoho mueberëjo ehuro aho bogo iosirëmiromo jemesi suvuoroho baejho'iröhe höjo.

<sup>12</sup> Ae rahu biririvoromo mu sisë ruahö'öjë'oho naro baejavoromo nasi A Böröme God-are osare bamavo'iramu bönunö'e bibivoromo nami-janovo'anuëjo bogo ijoho rori'o va'iranëro. O nasi A Böröme God-are ihoho jasi sinore jajivaho'ejöjo ja hesiremu javoröhego. O nasi A Böröme God-are amo hesi ihoho sinore jajivaho'ejöjo. EJerusalem amo i'oho nasi A Böröme God-hu hijajire ö'idöre jioromo ruvebi'iröhoho ë amo hesi ihoho uavajëjo. O nasi iho i'ohu'o jasi sinore jajivaho'ejöjo.

<sup>13</sup> Ae rahu ja God-are jö hejanue ae javë'oho nasi Aru'ahehu ekaresia majehibe rovaje jöho heromo avoho uehorovonëjo. Ahia mino'ëjo.

*Iesuhu Laodicea amore raromarue ekaresia jabetesi örire nugö'öjade jöhoje.*

<sup>14</sup> O Laodicea amore raromarue ekaresia jabu'o hiromo muebejevaje anera hesi öroro jajivonego ekaresiae aho'o he'irarëjo. Jajivoromo uënëjo: Mae jövaje aho na jevë'ego God-are jöho maro maro huruoho majehijaje aho na jevajëjo. God-hu bövi bise'o bamadoho uevamu avoho'amode aho Iesu naro jöe majehi'ie'ajëjo.

<sup>15</sup> Jemesi muoho iae na gëvajëjo. Jemë nanioho bogo nëgo avohaje höjo bogo bijönëgo avohaje höjo. Nëgo avoho'ibejajo o bijönëgo avoho'ibejajo na mae jevo'ibejajo.

<sup>16</sup> Rõhu bogo nõgo avoho'i bogo bijõnõgo avoho'i uehore ma-ririre jõvajokuni õhuni sabonõ'e ijuhõ'õjõvo'ejõjo.

<sup>17</sup> Jemõro uvaruje hõjo: Nosi sivue bõvie bise'e eni javuajõjo. Marohõ'e mae javuajõjo. Bõviõni bise'õnioho bogo vavaenoho baejarue hõjo. Õhi ataruje hõjo. Rõhu jemesi uhuroho bogo õhioho jõvajokõjo. Jemõ vavõ'e huõ vavaeni'e bõvi bise'o rumo'e nuni sisõ'e ma-sinõremu raromarujõjo. Õhi jõvajokõho õho bogo gavarujõjo.

<sup>18</sup> Õhuni ave õri avoho rõjõhi'ie'ajoho avoho herõjo. Nasi gold ma-mabõhe ajivõ'oho nasiro imoromo jemesi ujuohorego marohõ'e mae jõvo'irajo. Ajivõ'e niõgoho nasiro imoromo io'amego sinõremu raromoromo a nunire javoji'e mu vaejarujoho tugohego mae jõvo'irajo. Nuni hesi osoho imoromo rue jemesi nuni maro buerovego jemesi simanoho ajivõvego avoho uehorovo'irarije hõjo.

<sup>19</sup> Rõhu naehu huõ baejõvaje aribõvioho i'ue bojõmiromo avo'avoho rõjõhijaje hõjo sisõho vuonugo'i ma-avoho jijihõ'irarijõgo. Õhuni jemõro nimo avohoromo huotorovoromo uehoro maemu baerõjo.

<sup>20</sup> Hehõjo. Naro osare õ'irõgoro amonõ namiromo jemesi ojore ano'anovajõjo. Ae rahu nasi huõ heromo ojo jiovehõ'oho naro rumo õ'oromo ja'o hiromo gemuoro ioho i'ejarõjo.

<sup>21</sup> Ae rahu biririvoromo mu sisõ ruahõ'õjõ'oho urimo naehu biririvoromo sisõ ruahõ'õromo ajiomoromo nasi Vavu hesi rõho mare hu'o gemu mae hijõ'õro bõvi bise'o muebejõvajõhi naro õhi ja ua'iramu nasi rõho mare õ'oromo na'o gemu mae hiromo na ajemiromo bõvioho bise'oho muebe'amo'anuõjo.

<sup>22</sup> Ae rahu ja God-are jõ hejanue ae javõ'oho nasi Aru'ahõhu ekaresia majõhibe rovaje jõho heromo avoho uehorovonõjo. Ahia minõ'õjo.

## 4

### *Õ'idõre raromoromo God rajahiruomaje jõhoje.*

<sup>1</sup> Õhi'amu naro ga'i gavodeje õ'idõre va'arue ojoho jiovo nugõ'e jiamu. Jiovo nugõ'e jiamu gagorovo hejode hõgõehu uvanovaje urimo jõ majehijade ahuro rõhu maho ma-darugo'o jõe majehiromo uevavamu: Avehuro rojomõgo ijõnõ mu diehi diehi jio'irõhoho na rõjahijõjo.

<sup>2</sup> Õhi uevamu hejõ'i God-are Aru'ahõhuro na avõhevoromo simanoho huotoveho barõjamu gavõ'i naro õ'idõre muoho garomo gavodeje a bõrõmõhu hijaje rõhoho õ'idõre jiamu. Õhi jio'ego ae gemu õ hihijõ.

<sup>3</sup> Hi'ego munõ mabõhe gõ gõ kavuõ'e ajivõ'e jio'amoromo jino-jino'irae'amajõhi hesi nu ano'oho õhi jinojino'iraehijõ. Rõhu nuogõro rõhoho numohijõ. Munõhu mabõhe rõvajõhi nuogõhuro nomoromo õhi rõvohijõ.

<sup>4</sup> Õrõho maho ririre jio'i a duvahe aho'obõhe 24 ruõ numõ gemu gemu rõho mare raromo rova'oruomohijõ. Ajivõ'e niõgoho io'amoruomõ'e a masijõhu didi'aruõhi jiõ'e bosõe gold-õhu avoho'amarõho simanore didi'oruomõ'e õhi raromohijõ.

<sup>5</sup> Rõhu ririre rõhore baderivo'õgo varuru vajeri'e vae'i hijavohijõ. O õ rõho ma hesi nuninõ iro bunõ'irae'amadoho aho'obõhe 7 kavuõ'amohijõ. Õiro jabõsi bõhõho God-are Aru'ahõ aho'obõhe 7-hõje.

<sup>6</sup> O rõho ma hesi nuninõho jovo e'u deri va'õne ajivo avõhõ'e bõrõmo bõrõme jiohijõ.

O röhoho ririre jio'i God rajahijarue maje 4-ho ioni göre ioni göre dejonö nuninö ëhi riravo rova'oruomohijo. Nu ano'e ruë numë ma-nunemu jioruehijo.

<sup>7</sup> Ëmajoho göho lion va'ëne jio'i göho cow ano'e harihu va'ëne jio'i göho ma-a nu ano'o va'ëne jio'i göho buruhehu hetejeho gavaruëhi hesi nu ano'o ho ëhi jiohijo.

<sup>8</sup> God rajahijarue maje 4-ho gemu gemu vivoje aho'obëhe 6 6 jio'amohijo. Jabesi vivoju uhohu'o dönöhu'o sino haho'o ho aho'o ma-nunemu jio'amohijo. Röhu majae vahie sisone bogo vuonugë'e ma-jöe iemu ioromo uvarueje:

Bada God maemu maemu maemu jio'i daruge aho'obëhe hesirohemu höjo. Mami'e jiobe rovadoho jaruvo jiajoho röhu ijönö jio'iröhoho höjo.

<sup>9</sup> God rajahijarue majohuro God ëhi ma-mabëhe rajahiromo jöho iarueje röho mare hiromo ioro'ioremu hibe va'aje a hesi ihoho dö maro jioröhogo.

<sup>10</sup> Ëmaje 4-ehu ëhi rajahiromo jö ië'iroho rue a duvahoho aho'obëhe 24 jaburo röho mare hijaje a hesi nuninö ague aho raromomo hesi örire rajahijarueje hu ioro'ioremu hibe va'aje jië'ego. Rajahiromo jabesi a masijehu simanore didi'arue bosöho God-hu hijaje nuninö rideho bahijarueje. Bahiromo uavarueje:

<sup>11</sup> Nosi Bada God jero bövie bise'e bamane höjo.

Jero nimoromo avohë'ëro jio'amajëjo.

Ëhuro ja mae javë'ego iho böröme aje aho'o daruge aho'o jasi gemu höjo.

## 5

*Huhohë'e sure God-are Sheep Harihe Iesu gemuehu jiovo varijëne jöhoje.*

<sup>1</sup> Ëhi'amu gavodeje röho mare hiromo muebejavuaje aho God-ro hesi övo mahuro huhohë'e suroho ma'enë'e jiamu. Ësuroho ruë jajivo vië jajivoromo huhohoromo sivaëro aho'o 7 ëmino'e suroho badihi taemo'amë'e jiohijo.

<sup>2</sup> O gavodeje darugo'e anerahuro ma-darugo'o uvamu: Rahu a böröme javë'o ho badihi taemo'amade sivaho goho'amoromo suri jiovo'iranoho eni javajëjo.

<sup>3</sup> Ëhi uvamu röhu ö'idöre sa'are sa'a uhure ëhi jië'e a börömoho nahoromo bogo mae bogo birohareje huhu ë suri jiovoromo adaho'iröhoho.

<sup>4</sup> Ëhi jië'e aho bogo birohamu ehuni na sisë maro nivodeje.

<sup>5</sup> Nivamu a duvahe gemuëro uevadeje: Nadi nivo'i ave jöho hejëjo. A böröme gemu iae eni jiajëjo. Lion-hu mi ioro'ioro iosirëmiromo darugo'e jiajëhi huro Judah rajo ioro'ioroho ëhi iosirëmiromo darugo ma'e höjo. David urimo hinövade a hesi ujo böröme höjo. Ëahuro sisëho ruahö'öjë'ëro sivae 7 goho'amoromo suri jiovë'o ho hu eni höjo.

<sup>6</sup> Eni höjamu hejë'i gavodeje Sheep Harihoho namijamu. Mami'e aëro anamu guomë'ëro sinore batato'e jië'e ëhi namijamu. A duvahoho ruë numë riravo rova'ego God rajahijarue maje 4-ho ruë numë riravo rova'ego ë Sheep Harihoho riri mare God-are röho ma hesi ririre namihijo. ËSheep-oho dane aho'obëhe 7 o nune aho'obëhe 7 ëhi jio'amohijo. Ënune aho'obëhe 7 jabesi bëhoho God-are Aru'ahe 7 sa'ae dinö'e dinö'e rëmö'öjadohoje.

<sup>7</sup> Amo ë Sheep Harihohuro rueromo röho mare hijaje aho God hesi övo mare jiaje suroho baehijo.

<sup>8</sup> Suroho bae'ego God rajahijarue maje 4-ho a duvahe aho'obëhe 24-ho jaburo Sheep Harihu hesi nuninö sa'are ague aho raromohijo. Jabumë gemu gemu gita övore ujuohë'e gold'e ramare ridi'e buejarue vëni u'oho

ujuohë'e jiohijo. Ridi'e buejarue vëni u'i hesi bëhoho God-are aribövieuho hesi örيره atarue jö'ö ögohoje. Gita'ö ramare vëni u'ohu'ö ujuohë'e ague aho raromoromo

<sup>9</sup> jö i'ohö ioromo uaruomohijo:

Ja maëremu javë'ëro ëhuni suri baeromo siva goho'amë'ohö eni javajëjo. Aëro anagamu jasi köhö otehoromo guomane höjo. Guomoromo ëhuro ae ajëmijane höjo.

Agane gö gö huë gö gö sine gö gö sa'ae dinö'e dinö'e sisë'i raromaroho jero guomoromo ëhuro imëvoromo baejëvoromo God-arinö rëmane höjo.

<sup>10</sup> God-arinö rëmoromo jabesi ihohö döro bamëhamu

ëhuro jabumë masije riravoromo priest muohö baejare höjo

nosì A Böröme God hesi muohö vaenövoröhëni.

Priest muohö baejë'ëro ijonö masije vaeromo

sa'are ae muebejëvoruomö'ajëjo.

<sup>11</sup> Èhi uaruomamu naro garomo hejodeje anerae aho'obëhe mae bogö adaho varijënoho uvoruomamu. God-are röho maho ö God rajahijarue majohö ö a duvahohö ëhö ririro jio'amo'i ë aneraho aho'obëhe ruë numë raromo rova'oruomohijo.

<sup>12</sup> Raromo rova'oromo ma-darugo'ö uvoruomohijo:

Anamu guomade Sheep-ohö mae höjo.

Èhu'ëro darugo maho inömo inöme aho'ö uehorö maho vörö maho

ihö maho aji maho ma-hesiro gemu höjo.

Noro hu gemu rajahi'ëjarëjo.

<sup>13</sup> Èhi uvoruomamu hegorovo hejodeje God-hu bamade bövie bise'le ö'idöre sa'are sa'a uhure jövo gagore raromaruohö ëhö jaburo aho'obëhe uvoruomavamu:

God röho mare hijaje ahu'ö Sheep Harihohu'ö

ihö maho aji maho darugo maho ma-jabesiro gemu höjo.

Èhi jiemu jiobe va'ië'ëgo jabumë gemu rajëhiemu rajëhinövo'ëjarëjo.

<sup>14</sup> Èhi uvoruomamu hegorovo rue God rajahijarue maje 4-hö jaburo uvoruomohijo: Èjöho iae mae-ëjo. Ö a duvahohö jaburo sa'are ague aho raromoromo God'ö Sheep Harihohu'ö rajëhiruomohijo. jöhoje.

## 6

### *Suri badihi taemë'e siva dadovobe va'ade*

<sup>1</sup> Èhi'oruomamu gagorovo gavodeje surire sivae 7 badihijarohö gemu Sheep Harihohuro aevoromo gohamu. Gohamu evare hejodeje God rajahijarue maje 4-hö röhu gemüero varurehu anajëhi ëhi uvavamu: Rovëjo.

<sup>2</sup> Rovëjamu hegorovo ga'i gavodeje sino ajivë'e horse jiamu. Röhu ë horse hesi döre hijade aho pevare ma'ënohijo. Mami'e muorovoromo ruahö'öjë'ëgo bosö mabëhohö hesi simanore didi'ahohijo. Didi'ahö'ëgo va'ohijo muorovoromo huro muorove aho'ö ruahö'ö'amo'iröhëni.

<sup>3</sup> Èhi'ëgo Sheep Harihehu urimo surire sivae gemu gohadohö röhu number 2-ohö gohohijo. Jiovamu evare hejodeje God rajahijaje majö göhuro uvavamu: Rovëjo.

<sup>4</sup> Rovë'ëgo ae sino kavuo avohë'e horse-re ruehijo. Rueromo vöröe bojami'ëgo baehijo ëhuro sa'ae gö gö huë mae baerovarue muohö ijumëhego ae göëro göhö muo'amo'iröhego. Èhi ë'iröhego muorovarue kaejö ëgohö hesi örيره bojamihijo.

<sup>5</sup> Èhi'ëgo Sheep Harihehu urimo surire sivae niö'i gohadohö röhu number 3-ohö gohohijo. Gohamu evare hejodeje God rajahijaje majö göhuro

uvavamu: Rovëjo. Rovëjamu naro ga'i gavodeje ae rövë'e horse-re hiromo i'u gavarue inömoho baejë'e rovamu sa'a hesi iruno'oho ga'iröhëro i'ue dimino'e jiego.

<sup>6</sup> Ae rövë'e horse-re hiromo i'u gavarue inömoho baejë'e rovamu gagoro hejodeje God rajahjarue majo jabesi ririre jioromo aëro jövanovoromo sino rövë'e horse-re rovade a hesi örire uavavamu: Jero sa'a iruno'e ijumo'anujëjo. Ijumo'iramu iruno'oho sisërëromo bogojianovo'ajëjo. Ioho bogojianovo'iramu ëhuro hesi manaho ajiomom'ajëjo. Ajiomom'iramu aehu i imo'ië'iroho majae gemu hesi mu vaejare manaho bu'ö barëromo ëhuro majae gemu hesi iruno'o maho o majae niö'i gemu hesi iruno'o sisëho ujuoho'aruëjo. Suvuoroho ëmino'e ajiomom'ajëjo. Röhu jaehu iruno'o ijumë'oho olive ijo bajohu'o grape ö'i bajohu'o bogave ijumo'iranëjo.

<sup>7</sup> Ëhi'ego Sheep Harihehu urimo surire sivae niö'i gemu gohadoho röhu number 4-ho gohohijo. Gohamu evare hejodeje God rajahijaje majo göhuro uvavamu: Rovëjo.

<sup>8</sup> Rovëjamu hegorovo ga'i gavodeje ae sino jio'ajivë'e horse-re rovamu. Jio'ajivë'e horse-re rovade a hesi ihoho A Vuovëvo'iröhe Aho jiadeje. O ae gö hesi ijore ruehijo. Hesi ihoho Vuovë'e Aribövi Raromarue Öri ari'oho jiadeje. Jabu niö'i vöröe bojëmi'ego baehijo sa'ae aho'obëhe tarijogo ëhi niö'i ëhi niö'i jiego jaburo gemu baeröhëni. Gemu baeromo ijumëvego göëro göhu'o muorovoromo vuovoröhego. Ie barëromo vuovoröhego. Guomo guomo sisë baeromo vuovoröhego. Je'o miëro umijego vuovoröhego.

<sup>9</sup> Ëhi'ego Sheep Harihohuro urimo surire sivae 4 gohadoho röhu number 5-ho gohohijo. Gohamu evare gavodeje vuovëvë'e a jabesi aru'ahoho God-ni suvuro bahijarue maratu bëhire sa'are raromamu. Ëraromare hesi bëhoho urimoho ë ariböviohuro God-are jöho uehorovoromo biririv-oromo majëhinövareje. God-are jöho biririvoromo majëhijamu gagorovo aëro muo'amamu vuovëvadeje. Muo'amamu vuovëvë'ëro ëhu'ëro jabesi aru'ahoho ë raromohijo.

<sup>10</sup> Raromoromo ma-darugo'o uvoruomohijo: O asë'e Bada ja darugo eni jië'e ae javajëjo. Ja mu sisëho bogo vaejanue o sareri'e jöho bogo jövanue a ma-maemu javajëjo. Röhu ë sa'are raromarue ariböviohuro no bijuëmavuare höjo. Ëhuni ja majae dimino'e ma-nunëremuoho gëbe va'oromo evare ë jabesi mu sisëho mevo gëromo i'uoho mana bojëminëjo.

<sup>11</sup> I'uoho mana bojëminëjamu ajivë'e niögu ëgoho ë aribövioho suvuorëmi'ego ujuohoruomohijo. Ujuohoromo hejareje uëvavamu: Majae mabisemu ëgo'o nuhanovorëjo hujeji jemë muo'amëvarëhi jemë'o nasi mu vaejarue ö mueno'o aehu muo'amëgo vuovoröhe aribövi ioro'ioroho rue barëjega evare i'uoho mana bojëmi'irode höjo.

<sup>12</sup> Ëhi'ego Sheep Harihehu urimo surire sivae övo gö mine gohadoho röhu number 6-ho gohohijo. Gohamu evare gavodeje sa'aho börömo böröme hijiohijiovamu. Sa'aho hijiohijiovo'ego niögu sisë rövë'e jiajëhi maja nunohuro ëhi rövo'ego manaerohuro kö va'ëne kavuohijo.

<sup>13</sup> Manaerohuro kavuo'ego buru börömehu rueromo meso hijiovego meso böso i'ehu rireromo ruvebijajëhi jiji mujöru'ohuro ëhi sa'are rireromo ruvebihijo.

<sup>14</sup> Rireromo ruvebi'ego aehu suri huhöhego bogo gavaruëhi ö'idöhuro ëhi arorovoromo sisërë va'ohijo. Dahore aho'obëhe o sa'a dirö dirö'e jovore jio'amajoho aho'obëhe arua anumiae va'ohijo.

<sup>15</sup> Arua anumiae va'lego sa'are a masijo masijoho a duvaho ioro'ioroho muorovo a masijoho inömo marohë'e aribövioho darugo'e aribövioho a jabesi muemu vaejarue aribövioho jabesi nimoro mu vaejarue aribövioho ëhi ae aho'o huruomo va'oromo juju gagore dahorure munë burure gurihirovo barëhijo.

<sup>16</sup> Gurihirovo barëromo uvoruomohijo: Dahoroho munëho jemëro ahoromo urahahuego ëhuro röho mare börömo hijaje ae God bogo gö'irajo. O Sheep Harihu hesi vöröho no bogo baejavuo'irajo.

<sup>17</sup> Ehesi bëhoho vörö majaho rovë'e höjo. Raro ë vöröho uraho nami'a'ajëjo.

## 7

### *God-hu hesi aribövie 144,000 avoho muebejëvade jöhoje.*

<sup>1</sup> Ehi'amu gavodeje anerae 4 riravamu. Sa'ae aho'o dinö'e dinö'e jiajoho ririre jio'i jabumë aruhiae anumiae aruae aviae riravo rova'ohijo. Riravo rova'oromo anerae gemuëro gemuëro burehu rovajoho gemu gemu tugohohijo buroho bogo rueromo sa'aho jovoho ijoho huosihoröhego.

<sup>2</sup> Buroho ëhi tugohamu gagorovo na gavodeje anerae göëro aruhe maja rojomajire jioromo rojomamu. Rojomoromo God darugo'ehu hijaje hesi jajivarue inömo hesi övëro baejë'e ruehijo ëhuro God-are aribövi jabesi sinore taemëhego jaji'e jio'amo'iröhego. Rueromo ma-darugo'o uvohijo rue anerae 4-ho jaburo hejëro mami'e sa'a'o sö jov'o ijumo'iröhe vöröho God-aro baeruomë'ëro.

<sup>3</sup> Uvoromo uvohijo: Jemëro sa'aho jovoho ijoho nadi vejö'oho ijumo'amohëjo. Hujeji God-are mu vaejarue aribövi jabesi varijore God-are soroho jajivëhego evare jemëro ë jajoho garomo uvo'irarijego: God-ro tugohë'e höromo jemëro jabumë bogo ijumëvo'i öri ari'ohemu ijumo'irarije höjo.

<sup>4</sup> Ehi uvavamu hejë'i hejodeje aëro uevamu: God-are soru varijore baejare aho 144,000 ëmino'e höjo. Israel hesi agane 12 aho'obëhe baebe va'ë'e höjo.

<sup>5</sup> Judah'o hesi ujoho 12,000. Reuben hesiroho 12,000. Gad hesiroho 12,000.

<sup>6</sup> Asher hesiroho 12,000. Naphtali hesiroho 12,000. Manasseh hesiroho 12,000.

<sup>7</sup> Simeon hesiroho 12,000. Levi hesiroho 12,000. Issachar hesiroho 12,000.

<sup>8</sup> Zebulun hesiroho 12,000. Joseph hesiroho 12,000. Benjamin hesiroho 12,000. Eäribövioho 144,000 jaburo God-are soroho baeruomade höjo.

### *God-are aribövie ae aho'obëhe riravoruomade jöhoje.*

<sup>9</sup> Ehi'amu naro ga'i gavodeje ae aho'obëhe mae riravamu. Bogo adaho varijënoho jiohijo. Sa'ae dinö'e dinö'e agane gö gö sine gö gö huë gö gö aribövioho ajivë'e niögu ëgoho io'amë'e juva hanoho ujuohë'e God-are röho ma hesi nuninö Sheep Harihu hesi nuninö riravohijo.

<sup>10</sup> Riravoromo ma-darugo'o uvoruomohijo: God röho mare hiromo muebejavuajohu'o Sheep Harihohu'o jaburo niö'iro mabëhe ajamuiromo manö babamavuë'e höjo.

<sup>11</sup> Ehi uvoruomamu God-are röho maho riri mare jio'i God rajahjarue maje 4-ho ruë numë riravo rova'i röhu majo jabesi dejonö a duvahoho ruë numë raromo rova'i röhu a duvaho jabesi dejonö ë aneraho aho'obëhe ruë numë riravo rova'ohijo. Ehi riravoromo röho ma hesi riröre ague aho raromoromo God rajahiruomohijo.



<sup>12</sup> Rajahiromo uvoruomohijo: Aveho iae mae-ëjo. Aji maho uehoro maho iho maho darugo maho vörö maho nosi Böröme God-aremu jiajoho ëhi majiemu jiove va'a'ajëjo. Ma-jiemu jiove va'ië'ego noro hu gemu rajahiromo huë mabëhe uanövo'ejarëjo. Iae mae-ëjo.

<sup>13</sup> A duvahe 24-ho röhu gemuëro ri'öromo na uehijo: Ëajivë'e niögu ëgo io'amë'e aribövioho rahumë jioruomajëjo. Dinö'e jioromo rueruomade höjo.

<sup>14</sup> Rueruomade höjamu naro uavodeje: Na bogo gavajëjo. Jasi jero gavanuëjo. Jasi jero gavanuë'ego rue a duvahohuro uehijo: Ëajivë'e niögu io'amë'e aribövioho ëho bogo vuovëvë'e sa'are raromamu evare Iesu bijönimarue ariböviohuro jabesi örire huë vavaene börömo bëhe bojëmamu baeruomade höjo. Baeromo röhu iae mae rueruomade höjo. Jabumëro God-are Sheep Harihu hesi köhuro jabesi niögohu u'oruomamu jabesi sisëho barëjähë'ëro niögohu ma-ajemu jiëho'amajëjo.

<sup>15</sup> Ëhu'ëro jië'ëro jabumë God-hu hijaje röho ma ë hesi nuninö riravoromo hesi osare vahie majae ma-hesi muohemu vaemu vaejahoruomaje höjo. Vaejaho'iramu röho mare hijaje ahuro jabu'o gemu mae hiromo mu sisëho raboho tugohëho'iramu munë bururo raromanovoruomo'ajëjo.

<sup>16</sup> Munë bururo raromanovoruomo'iramu ijonöho vadunoho bogo hömëvonövo'ajëjo. Huëho bogo girihëvonövo'ajëjo. Majaho bövioho bise'oho bogo ravëvo'iramu sinoroho vörö'iraeromo birebirëgonövo'ajëjo.

<sup>17</sup> Rabëni hesi bëhoho God-are Sheep Harihe röho ma hesi ririre hijaje ahuro ë aribövioho hesi Sheep ömo'ömego gagovëvoromo muebejëvonövo'ajëjo. Muebejëvoromo sö ujuohoromo a i'ovëvo'iröhe jovore ë va'onövo'ajëjo. Ëhi'o'iramu God-ro jabesi nuni jovoho miorëho'iramu jabesi huë vavaenoho aho'obëhe barë'ajëjo.

## 8

*Suri badihi taemo'amare sivae 6 gohobe rovadoho ijo tugoho'i number 7-ho gohade jöhoje.*

<sup>1</sup> Ëhi'ego Sheep Harihehu urimo surire sivae övo gö mine övo göre gemu gohadoho röhu ijo tugoho'i number 7-ho gohohijo. Goho'ego evare ö'idöho jörumoraëbe va'ojuvo half hour rabu'e barëjadeje.

<sup>2</sup> Ëhi'amu evare anerae 7 God-are nuninö riravaruoho naro gëvodeje. Riravoromo hëgöe aho'obëhe 7 bojëmi'ego gemu gemu ujuohohijo.

<sup>3</sup> Ujuoho'ego anerae göëro gold'e hevöho baeromo ruehijo ose ë bamoromo vënëro buejego ridi'e vëni u'ohuro God-ni ajiomoröhego. Hevöho baeromo God-ni suvuro vënehu buejarue maratue gold-ehu avohare ë hesi bëhire rueromo ë namihijo. Nami'ego aëro ose aho'obëhe bojami'hijo huro God-hu hijajire nuninörire maratuore ë bamoromo buejego God-are ariböviohuro ëninamijego ëninamaruohu'o ridohu'o gemuoro havoromo God-arire ajiomoröhego.

<sup>4</sup> Osoho bojami'ego anerahuro övëro ma'eno'ego God-are ariböviehu ëninamaruohu'o ridohu'o gemuoro havoromo God-arire ajiomohijo.

<sup>5</sup> Ëhi'ego anerahuro ridi'e hevöho baeromo God-ni suvuro vënehu buejarue maratu döre ravë'e vënoho aëgoromo irijiomu'ego vënoho suovoromo io'amo'ego sa'are rireromo abuehijo. Rireromo abue'ego baderivoromo vajeri varuru'e vaeromo sa'aho hijiohijiovohijo.

*Aneraehu hëgö huobe rovere jöhoje.*

<sup>6</sup> Ĕhi'ego rue anerae aho'obēhe 7-ho hēgōe gemu gemu ujuohē'ēro huo'io jō'ore bamohijo.

<sup>7</sup> Jō'ore bamoromo anerae number 1-ohuro hēgōho huohijo. Hēgōho huo'ego ēnēro direjohijē'e masijohu'o vēni'o kō'o buarohē'o ho otehō'ō'ego ō'idōre jioromo sa'are rireromo abuehijo. Rireromo abue'ego sa'ae aho'io ije aho'io niō'io gemu tarijaroho gemu ō'idōre jioromo rireromo abuejade vēnohuro ravo barēhijo. O garasi rude rōvē'e ma-maho aho'obēhe ravo barēhijo.

<sup>8-9</sup> Ĕhi'ego anerae gemuehu hēgō huadoho rōhu number 2-ohuro hēgōho huohijo. Hēgōho huo'ego evare dahoru bōrōme vēnehu ravanovē'ohuro ahoromo sō jovo e'ure abuehijo. Abue'ego sō jove aho'io jovo mie aho'io boat aho'io niō'io gemu tarijaroho jovēro dirō'e gemu kōraehijo jovo mie ē dirō'e gemuore vuovohijo boat ē dirō'e gemuore dadorovo'amohijo. Rōhu dirō'e niō'io bogo.

<sup>10</sup> Ĕhi'ego anerae niō'iehu hēgō huaroho rōhu number 3-ohuro hēgōho huohijo. Hēgōho huo'ego jiji bōrōme ō'idōre jioromo vēnēro ravanovē'e be'abuehijo. Be'abueromo rova'o'amē'e jove aho'obēhe sa'a gagore rojomo'amaje jove aho'obēhe niō'io gemu tarijaroho dirō'e gemu taemohijo.

<sup>11</sup> Taemamu jovoho ajuovadeje jiji hesi ihoho Ajuo'ēro jiē'ēro. Ajuovo'ego ae aho'obēhe ē jovoho ue'ahoromo ajuomo'amoromo vuovohijo.

<sup>12</sup> Ĕhi'ego anerae aho'obēhe niō'io gemuehu hēgō huaroho rōhu number 4-huro hēgōho huohijo. Hēgōho huo'ego majae manaere jiji mujōru'e ha'ose aho'obēhe niō'io gemu tarijaroho gemu sisērēhijo. Sisērēromo ramoramovohijo. Ramoramovē'ēro ēhu'ēro majaehu sisonu'e jeni'e maja'e ajivo'irōhe majae bamo'irōhoho niō'io gemu tarijaroho gemu bogo ajivo'io ramoramovohijo. O manaerehu jiji mujōru'ehu vahi'e ajivo'irōhe majae niō'io gemu tarijaroho gemu bogo ajivo'io ramoramovohijo.

<sup>13</sup> Ĕhi'amu naro ga'irōgoro ē'amu gavē'i evare hejodeje buruhohuro dōre biojē'i uvavamu: O vaevē'e vaevē'ējo. Sa'are raromaruje aribōvioho anera ioro'ioroho niō'io gemu jaburo hēgōho huobe va'iramu jemē sisērējēvo'ajējo.

## 9

<sup>1</sup> Ĕhi'ego anerae ēhi niō'io ēhi niō'iehu hēgō huaroho rōhu number 5-huro huohijo. Huamu gavode jijo ho ō'idōre jioromo sa'are be'abuejē'e jiamu gagorovo gavodeje gua gago ēgobōvi ma ē hesi ojo jiovarue key-oho aēro jiji hesi ōrire bojami'ego baejamu.

<sup>2</sup> Gua hesi ojo jiovarue key-oho baenugoromo gago ēgobōvi hesi ojoho jiovohijo. Jiovo'ego vēni bōrōmo bōrōme gua gagore jioromo u'ivoromo rojomohijo. Rojomoromo majaho tugoho'ego ōri ari'oho aho'obēhe ramoramovohijo.

<sup>3</sup> Ramoramovo'ego guaeaviguaeviēro vēni u'ire jioromo sa'are ruvebiruomohijo. Ruvebiromo ē guaeaviguaeviohuro niani'ō hesi vōrō va'ēnoho baejareje ae ijumo'amorōhēni.

<sup>4</sup> Vōrōho baeromo rōhu heruomadeje uēvavamu: Garasie ije ō'e iruno'e resu resue rabe rabe sa'are jiajoho bogave ijumo'irarijējo. God-are soru varijore bogojiē'ohemu ijumēvorējo.

<sup>5</sup> Ijumēvō'oho jabumē nadi muo'amēvo'irōgoro niani'ōehu umijego vi'ehēgaje ēhi jiē'e vi'ehoho manaere ōvo gō mine bojēmibe va'orējo. Ĕhi uēhijo.

<sup>6</sup> Ĕhi uēvadēhi ē manaere övo gö mine hesi uhure ē ijumēvē'e aribövioho vuovo'i nēgo'ē'e. Vuovo'i nēgo'iramu vuovo'i öroho bogo biroho'ē'ö.

<sup>7</sup> Röhu ē guaeviguaeви jabetesi sino haho'oho muorovo'irögoro avohēhare horse-oho va'ēne jio'amohijo. O jabetesi simanore gold'e bosö va'ēnoho didi'ēho'amē'e jiohijo. O jabetesi nu ano'oho a nosi nu ano'o va'ēne jio'amohijo.

<sup>8</sup> O jabetesi simano uoho magonahe simano rudu'e jabetesi u jiajēhi ēhi jiohijo. O jabetesi anoho vösö'e lion jabetesi ano va'ēne jiohijo.

<sup>9</sup> Röhu aehu muorovo'irögoro biriri'e niögehu vinebi tugohoromo io'amarue ēhi jiē'e biriri'e niögohu vinebire io'amē'e jiohijo. O vivojehu dihodiohovoromo huosihē'oho ēho muorovo'i va'i horse-ehu maratu jagu ujuohoromo darugo'o va'ego garahörö'e baejego hejaruēhi ēhi jiavohijo.

<sup>10</sup> Röhu jabumē uho'e jio'amohijo. Jabetesi uhoho vörö'e niani'ö uho va'ēne jio'amohijo. Vöröho uhore jiē'ero ē uhohuro manaere övo gö mine umibe va'ē'ö.

<sup>11</sup> Röhu ē guaeviguaeви jabetesi börömo vaeromo muebejevaje aho gua gago ēgobövi muebejaje anera sisēhoje. Ĕanera hesi ihoho Hebrew jöero uvarueje: Abaddon-ajo. O Greece jöero uvarueje: Apollyon-ajo. Ĕiho hesi bēhoho bövi bise'o ijumo'amajohoje.

<sup>12</sup> Guaeviguaeви rueruomade vavaeni'e muoho iae barē'i röhu buruhehu uvade vavaeni'e muoho niö'i gö'o rue'ē'e.

<sup>13</sup> Iae anerae övo gö minehu hēgö huaroho röhu number 6-huro hēgöho huohijo. Hēgöho huamu hejodeje God-are nuninö namijaje gold'e maratu osore osore jioromo uvavamu.

<sup>14</sup> Uvoromo ē vejö'e hēgö huaje aneraho uavavohijo: Nume anerae ēhi niö'i ēhi niö'i Euphrates jovo börömore tövëvaroho jiovo nugö'ö'amējo.

<sup>15</sup> Jiovo nugö'ö'amējamu rue hēgö huade anerahuro ē anerae ēhi niö'i ēhi niö'i tövëvaroho jiovo nugö'ö'amohijo ae aho'obēhe sa'are raromaruoho niö'i gemu tarioromo niö'i nugo'i gemu muo'amo'iröhego ē aneraho ēhi niö'i ēhi niö'i God-ro tövëvoromo bamēvē'ero ē majaho ē manaeroho ē vadunoho rovego jiovo nugö'ö'amego ē sa'are aribövioho muo'amëvoröhego.

<sup>16</sup> Röhu ē anerae 4 jabetesi horse-re va'arue muorovo aribövioho iae 200 million jiadeje. Ĕjöho iae na hejodeje.

<sup>17</sup> Röhu ē muorovo'iröhe horse jabetesi o horse va'arue muorovo aribövi jabetesi nu ano'oho nia'ovoro gavodeje. Jabetesi vineboho biriri'e niögohuro tugohoromo io'amē'e jiohijo. Röhu biriri'e niögu jabetesi nu ano'oho kavuē'e vëni hödu va'ēne rövē'e vëni u'i va'ēne o hövë'e munë ravoromo hödu hövë'e jiajēhi ēhi jio'amohijo. Röhu horse jabetesi simanoho lion jabetesi simano va'ēne jio'amohijo. Röhu vëni höde vëni u'e o hövë'e munë ravoromo hödu hövë'e jiajēhi jiē'oho ēho jabetesi jö'ore jioromo suorovohijo.

<sup>18</sup> Horse jabetesi jö'ore jioromo suorovoromo vëni hödoho o u'oho o hövë'e munë hövë'e jiajēhi jiē'oho ē mu sisëhuro ae aho'obēhe sa'are raromaruoho niö'i gemu tarijaroho niö'i rëmo'i gemu ravëvo barëjadeje.

<sup>19</sup> Röhu ē horse jabetesi vöröho jabetesi jö'ore o jabetesi uhore jiohijo. Jabetesi uhoho simano'e jiohijo ēhuro ae ijumo'amo'iröhëni. Jabetesi uhoho simano'e jiē'ero ēhu'ero ē uho jabetesi nu ano'oho sigobu sisë jabetesi nu ano'o va'ēne jiohijo.

<sup>20</sup> Ĕmu sisëhuro ēhi rueromo ijumëvo'ego a ioro'ioroho vuovëvo'i ioro'ioroho bogo vuovëvohijo. Bogo vuovëvadeje röhu inömo sisë jabetesi övehu avohoromo uehorovaruoho bogo uehorovoromo vuonugo'i a'i inömo

sisë gold-ehu o silver-ehu o copper-ehu o munë göehu göehu o ijehu avoho'amaroho sarerivoromo uvoruomohijo: Ëho aru'aho'e höromo uehorovemu uehorovoruomohijo. Röhu ëhi jië'e inömoho bogo uheriharueje. Bogo hejarueje. Bogo jijiharueje. Ma-momorö'öjarueje. Ëhi jië'e inömohu'o aru'aho sisëhu'o uehorovaruoho bogo vuonugo'i ëhi mauehorovoruomohijo.

<sup>21</sup> Ëhi ma-uehorovoromo a muo'amarue muoho bogo vuonugoromo iro oso'e muoho bogo vuonugoromo önö'e muoho bogo vuonugoromo vajiohu'e muoho bogo vuonugo'i ma-vaemu vaeruomohijo.

## 10

*Aneraehu suri bise'o John bojamamu ijade jöhoje.*

<sup>1</sup> Ëhi'amu gavodeje anera göho hesi darugoho bövi maho jië'ëro suëro numë'e simano döre nuoge ba'amë'e sa'are ruvebijamu. O hesi nu ano'oho maja va'ëne ajivë'e jio'i hesi höroho vëni hödu ëgobövi va'ëne jiohijo.

<sup>2</sup> Röhu huhoharue suri bise'oho jiovë'e ë anerahuro övëro ma'ënohijo. O hesi höru maho sö jovo döre bamo'i hesi höru adoho sa'a döre bamoromo ëhi namihijo.

<sup>3</sup> Ëhi namiromo lion-ehu uvaruëhi ëhi ma-vöröëremu uvohijo. Uvo'ego vajeroho aho'obëhe övo gö mine övo göre niö'i ano'amoromo dirö'e göre göre ëhi uvobe va'ohijo.

<sup>4</sup> Vajeroho anoromo uvobe va'amu hejë'i ë vajerehu uvare jöho naro jajivo'irögoro ë'odeje. Jajivo'i ë'irögoro hejodeje jöe ö'idöre uevavamu: Vajere övo gö mine övo göre niö'i uvaroho nadi jajivo'i subivëhonëjo.

<sup>5</sup> Röhu höru gö sö jovore bamo'i höru gö sa'are bamë'e namijamu gavode anerahuro övo maho ö'idöre nugojiomohijo.

<sup>6</sup> Nugojiomoromo God-are ihore darugo'e jöho majëhiromo uvohijo: Ioro'ioremu hijaje aho God ö'idö sa'a jovo bövi bise'o avoho'amade ahuro ge'ego na ave jöho majëhi'irögoro ë'ajëjo. Ijonöho bogo muebel'irögoro

<sup>7</sup> a'i anera göhuro hëgöho huol'iramu evare God-hu mami'e subivahuade mu jioröhe jö God-hu hesi mu vaeromo jö majëhijarue aribövi uëvadoho ë muoho iae jio barë'ajëjo.

<sup>8</sup> Ëhi uvamu röhu urimo ö'idöre uevavamu hejode ahuro jöe gö majehiromo uevavohijo: Rue anera höru gö jovore bamo'i höru gö sa'are bamo namiromo jiovë'e suri övehu ma'ënajoho ë suroho jero va'oromo bæjëjo.

<sup>9</sup> Ëhi uevamu hegorovo naro va'oromo aneraho uavodeje: Suri bise'oho bojemijëjo. Suri bise'oho bojemijëjamu uevadeje: Më suroho baeromo ijëjo. Baeromo i'iramu jö'ore vuomëro rihuamanovo'i röhu dë vi'ehago'ajëjo.

<sup>10</sup> Vi'ehago'ajëjamu naro baeromo ijamu vuomëro rihuamanovoromo hejodeje dë vi'ehëgavamu.

<sup>11</sup> Vi'ehëgamu aëro uevareje: Röhu maho ri'öromo sa'ae dinö'e dinö'e sine gö gö huë gö gö sa'are a masije gö gö ëho jabesi jö God-hu jövajoho jero majëhinego ae aho'obëhe he'irarëjo. Jasi muoho ëhi höjo.

## 11

*God-are jö majëhijare ae niö'i jabesi jöhoje.*

<sup>1</sup> Ëhi ue'ego aëro guduodo va'ëne vahu bæjarue ijahe memiromo uevavohijo: Ri'ö va'oromo God-are javu börömo hesi vahuoho o God-ni mi suvuoro bæjarue maratu hesi vahuoho baeromo ganëjo dimino'e jiego. O osare raromoromo God rajahijarue aribövioho adahoromo ganëjo dimino'e jiego.

<sup>2</sup> Röhu God-are javu hesi vahu baejè'ooho rirönöho nadi baenëjo. Èhesi bëhoho javu riröho Jew rajoho bogo a'i sa'a gö raje God-are jö bogo heruomaje aribövi jabesi örire bojëmijè'e höjo. Jabesi örire bojëmijè'ëro jabumëro rueruomomo God-are amo börömohe Jerusalem manaere 42 hesi uhure höru duruajo'ëro vaeruomajëjo.

<sup>3</sup> Höru duruajo'ëro vae'i è'iramu evare nasi jö majëhijarue ae niö'i naro uè'iramu jabumëro niögu sisëho io'amoromo nasi jöho majëhibe va'iröhoho è manaere 42-ho barè'ajëjo. Èhi uevavohijo.

<sup>4</sup> Èae niö'ioho èho sa'a muebejaje a God-are nunire rirarovarue olive ije niö'ioho va'ëne o hesi nunire rirarovarue iro niö'ioho va'ëne jëve. Èhesi bëhoho è olive ijo niö'i jabesi jovo baeromo buejego ajivajëhi o è ire niö'i buejëvego ajivajëhi è ae niö'iohuro èhi God-are darugoho baeromo ajoho barue'è'ö.

<sup>5</sup> Röhu aehu è ae niö'i jabesi örire ijumëvo'iè'iroho vënëro è ae niö'i jabesi jö'ore jioromo rueromo nu huodëgarue aribövioho ravëvo barè'è'e. Ae rahu jabumë ijumëvo'iè'ooho iae èhi vuovëvo'è'e.

<sup>6</sup> Röhu è ae niö'ioho jaburo vöröho bae'è'ö èhuro God-are jö majëhijarue majaho rovego evare ènoho tugohego bogo ruejuvo jöho majëhi barëjego evare rueröhego. O vöröho bae'è'ö èhuro jabesi divare nëgë'iroho jove gö gö ijumo'amego kö'irae'amoröhego o uvego sa'are aribövioho guomo guomo sisë gö gö bae'amoröhego.

<sup>7</sup> Amo jabesi jöho majëhibe va'ojuvo barè'iramu vörö'e majo sisëhuro gua ègobövire jioromo rojomoromo ae niö'iohu'o muorovo'è'e. Jabu'o muorovoromo ruahö'öjëvoromo anëgo'iramu vuovëvo'è'e.

<sup>8</sup> Vuovëvo'iramu jabesi sinoho amo börömo hesi öri börömore èhi raromëvo'è'e. Èamoho sisëgo èhuni uvarueje: Èamoho Sodom o Egypt höjo. Röhu urimë'i è ae niö'i jabesi A Börömohe aëro gudumomomo è ame gemuore korosire anareje. Amo è ame gemuore jabesi sinoho raromëvo'è'e.

<sup>9</sup> Raromëvo'iramu sine gö gö agane gö gö huë gö gö sa'ae dinö'e dinö'e aribövioho èho jaburo rueromo è ae niö'i jabesi sinoho èrimëhoromo uarovonövo'è'ö: Bogo guavëvo'ëjarëjo.

<sup>10</sup> Èhi uarovoromo sa'are raromarue ariböviohuro uvoruomö'è'e: Èae niö'iohuro huë vavaene aho'obëhe nosi örire bojamuinövare höjo. Röhu vejö'ooho vuovëvè'e höromo nimoronimorohoromo suvuoramirovo'è'ö. Èhi'ojuvo majae niö'i gemu röhu ma-bisemu hesi ijore barè'è'e.

<sup>11</sup> Èmajaho barè'iramu God-ro jö'o ögëro jabesi nu gagore huosihëho'iramu vuovëvadoho i'ovoromo ri'öromo döro rirarovo'è'ö. Döro rirarovo'iramu ae aho'obëhe jabumë gëromo juhuonivo avoho'è'ö.

<sup>12</sup> Juhuonivo'iramu è ae niö'iohuro he'è'ö ö'idöre jöe uvo'iramu: Avehuro rojomohëjo. Avehuro rojomohë'iramu evare jabumë nu huodëgarue ariböviohuro ga'è'ö è ae niö'ioho ö'idöre suëro numëvobe ajiomö'iramu.

<sup>13</sup> Ö'idöre ajiomö'iramu evare sa'aho hijiohijiovo'è'e. Sa'aho hijiohijiovo'iramu amo taritarivaroho dirö'e 10 jié'ëro dirö'e 9 mae jio'i dirö'e gemu ijumo barè'è'e. Dirö'e gemu barè'iramu ae aho'obëhe 7,000 vuovëvo'è'e. Vuovëvo'iramu a ioro'iorohuro juhuonivoromo uvo'è'ö: Asë'e ö'idöre hijaje ae God hesi ihoho böröme höjo. Èhi jioröhoho naro nia'ovoro gavodeje.

<sup>14</sup> Vavaeni'e mue niö'i buruhehu uvadoho iae barè'i röhu number 3-oho ma-burëro rue'è'e.

*Aneraehu hëgöe 6 huobe rovaroho ijo tugoho'i number 7-ehu huade jöhoje.*

<sup>15</sup> Iae anerae övo gö mine övo göre gemuehu hëgö huaroho röhu ijo tugoho'i anerae number 7-huro hëgöho huohijo. Hëgöho huo'ego ö'idöre darugo'o uvoromo uvoruomavohijo: Jaruvoho nosi Bada God'o God-hu uavë'ëro böröme namiromo ajamuijaje aho Keriso'o jabu niö'iro darugoho baejë'e höjo bövie rirarovoromo sa'ae aho'obëhe muebe'amoröhëni. Darugoho baejë'ëro God-ro böröme namiromo muebemu muebebe va'onövo'ajëjo.

<sup>16</sup> Ëhi uvavamu hegoroovo a duvahe aho'obëhe 24 a masijehu raromarue röho mare God-are bëhire raromaruohuro ri'öromomare aho raromoromo God rajahiruomohijo.

<sup>17</sup> Rajahirovomo uvoruomavohijo:  
O asë'e Bada God daruge aho'o baejë'e ae javajëjo.  
Urimë'i jiove rovanoho jaruvohu'o ëhi gemuoho hiemu hijanue ae javajëjo.  
Jasi darugo börömo baeromo dö mare hiromo aevoromo aho'obëhe muebejavuë'ego

ëhuni rajahijaruëjo.

<sup>18</sup> Urimoho sa'ae dinö'e dinö'e raromarue ariböviohuro vörö'iraejë'e raromonövare höjo.

Jaruvoho jero jabesi örire vörö'iraejanuëjo.

Majaho rovë'e höjo vuovëvë'e aribövi mevëvoromo gë'iranoho mae o sisë jëvego.

Gëromo jasi mu vaejahoromo jö baeromo majëhijaruë aribövi jabesi mana bojëmi'iranoho

jasi aribövi ma jabesi mana bojëmi'iranoho

jasi iho mae uehorovarue aribövioho ininore va'o masijore jabesi mana bojëmi'irane ë hesi majahu'o

sa'are bövi bise'o ijumaruoho mana ijumëvo'irane ë hesi majahu'o rovë'e höjo.

<sup>19</sup> Ëhi uvo'ego God-are osae ö'idöre jiajoho jiovohijo. Jiovo'ego God-are jögoru jiaje maua va'orahoro jiohijo. Va'orahoro jio'ego baderivoromo vajeri varuru'e vaeromo sa'aho hijiohijiovoromo ënëro direjohijë'e masije darugo'o ruvebihijo.

## 12

### *Sigobu börömehu magonaho sihade jöhoje.*

<sup>1</sup> Ëhi'amu gavodeje bogo gavaruëhi jïë'e mu böröme gö ö'idöre jiamu. Ëmu hesi bëhoho magonahe gemu jiohijo. Majae niögu va'ëne ba'amë'e jiohijo. O höroho manaerore bamë'e jiohijo. O hesi simanore jije aho'obëhe 12 inovoromo bosö va'ëne didi'ahë'e jiohijo.

<sup>2</sup> Röhu hu dë'ëro jïë'ëro raho'irögoro vi'ehe böröme baeromo hara'uoromo darugo'o jö'e dadovavohijo.

<sup>3</sup> Ëhi'ego bogo gavarue mu böröme gö'o ö'idöre ruehijo. Ëmu hesi bëhoho kavuë'e sigobu börömo böröme jiohijo. Vörö'e mae jiohijo. Hesi simanoho aho'o övo gö mine övo göre niö'i jio'amohijo. O hesi danoho aho'obëhe övo gö mine övo göre niö'i jio'amohijo. O sigobu simanoho gemu gemu a masijehu io'amaruëhi jïë'e bosöhuro didi'o'amë'e jio'amohijo.

<sup>4</sup> Röhu jije aho'obëhe ö'idöre jio'amajoho niö'i gemu tarijaroho dirö'e gönö niö'i nugo'i dirö'e gönö gemu sigobu hesi uhohuro sa'are ujuoho io'amohijo. Ujuoho io'amoromo ë harihu raho'ië'aje magonaho hesi nuninö raromoromo muebehijo rahego harihoho i'iro.

<sup>5</sup> Raromoromo muebe'ego rue magonahohuro harihoho rahohijo huro ijonö hujejo ha'itoho baeromo sa'ae dinö'e dinö'e raromarue aribövioho vörö'o muebejëvego jaburo hu gemu ejahoröhego. Amo harihoho raho'ego ë aho ma-majioho ba'ojio God-hu röho mare hijajire ë nugohijo.

<sup>6</sup> Evare vëmohuro ju'ebiro mo arue a rumo'e sa'are va'ohijo God-hu avohahade öri ari'ere ë hijego God-ro ajamiromo muebebe va'ego majae aho'o 1260 barë'iröhego.

<sup>7</sup> Ëhi'ego ö'idöre muorovohijo. Anera böröme Michael'o huhu muebejevaje anerahu'o ëho jaburo ri'öromo sigobohu'o muorovoruomohijo. Muorovo'ego sigobohu'o sigobu hesi anera ömo'ömo'u'o mana muorovëmihijo.

<sup>8</sup> Muorovëmi'ego rueho jaburo sigobohu'o hesi ariböviohu'o taemëvohijo. Taemëvoromo uëhijo: Ave ö'idöho ioro'ioremu vuonugo'i va'ohëjo.

<sup>9</sup> Ëhi uënogoromo ë sigobu böröme ö'idöre jiajoho baba'amohijo. Ësigoboho ni'i'ivadire jiobe rovadoho hesi ihoho Devil o Satan jiohijo. Sa'ae dinö'e dinö'e raromarue aribövi sareramuibë juvaje ahoje. Hu'o hesi anera sisë ömo'ömo'u'o sa'are baba'amëvohijo.

<sup>10</sup> Baba'amëvamu hejodeje ö'idöre darugo'o uvavamu: Jaruvoho nosi Börömo God-ro hesi darugoho röjahuiromo bövi mae namiromo sisëho noni ruahö'öjahuë'e höjo. O jaruvoho God-hu uavë'ëro böröme namiromo ajamuaje aho Kerisoro no muebejavuaje darugoho röjahuijë'e höjo. Ëhesi bëhoho jö sisë majahijaje aho baba'amë'e höjo. Huro God nosi A Börömo hesi nunire namiromo vae majae nosi ö mueno'o jabesi jö sisëho sareramiro mo majahinövade höjo. Röhu jaruvoho baba'amë'e höjo.

<sup>11</sup> Nosi Christian ö mueno'ohuro uvare höjo: God-are Sheep Harihoho köe rueromo guomë'ëro mae javuajë uvoromo hesi jöho ae sama'e majëhiromo ëhuro sisëho ruahö'öruomade höjo. Jabesi sinoho bogo uehorovo'i uvare höjo: No Keriso-are jöëni vuovë'oho iae hesi höjo.

<sup>12</sup> Ëhuni ö'idöho mabëhe höjo. Ö'idöre jiaruje aribövioho mabëhe jëvaje nimorohohëjo. A'i sa'ahu'o jovohu'o vaevë'e höjo ë hesi bëhoho Satan hu ë abuejë'ego. Abuejë'ëro garomo uvaje höjo: Nasi majaho barë'irögoro ë'ajëromo vörö'iraejë'e höjo. Ëhi uvoruomohijo.

<sup>13</sup> Ëhi'ego rue sigobohuro gavade baba'amë'ëro sa'are jiamu gagorovo aharihu rahade magonahoho ijumo'i siho baeromo va'ohijo.

<sup>14</sup> Siho baeromo va'ego buruhi börömo hesi vivojoho niö'i magonahohuro God-aro baehijo ëhuro bioromo a rumo'e sa'are va'oromo hesi röhere hiröhëni. Hijego God-ro muebejego sigoboho ë magonahuhu hijaje öri ari'eroho bogo va'ego vadune aho'obëhe niö'i gemu röhu ma-bisemu hesi ijore barë'röhego.

<sup>15</sup> Ëhi'ego sigobohuro jovo böröme hesi jö'ore otehö'öhijo ë jovohuro ruomoromo ë magonahuhu jiajire va'oromo ë magonahoho bava'ojöro.

<sup>16</sup> Jovoho otehö'ö'ego jovohuro magonahoho bae'i rue'ego sa'ahuro magonahoho ajamiromo tögöromo'ego jovohuro ë gagore va'o barëhijo.

<sup>17</sup> Va'o barë'ego ë sigobohuro magonaho hesi örire vörö'iraeromo va'oromo magonaho hesi aboji harihu'o ioro'iorohu'o muorovo'i va'ohijo. Röhu ë aboji harihu'o jabesi bëhoho God-are jögoru ejahoromo Iesuare jö birivoromo mae uehorovarue aribövioho jioruome. Ëariböviohu'o sigobohuro muorovo'i va'ohijo.

<sup>18</sup> Ëhi'oromo ë sigobohuro va'oromo sö jovo riröre raromohijo.

## 13

*Vörö'e mi niö'iehu rueromo mu sisë vaejare jöhoje.*

<sup>1</sup> Sigobohuro sö jovo riröre raromamu naro gavodeje vörö'e mi sisë sö jovore jioromo rojomamu. Hesi simanoho aho'obëhe övo gö mine övo göre niö'i jiohijo. O hesi danoho aho'obëhe övo gö mine övo gö mine jiohijo. O a masijehu didi'aruëhi jië'e bosöho dane gemu gemu jio'amobe va'ohijo. O simane gemu gemu God agarue iho sisëho gemuohemu jajivo'amë'e jiohijo.

<sup>2</sup> Röhu ë vörö'e mi sisë hesi nu ano'oho leopard nu ano'o va'ëne jiohijo. O hesi höroho bear höru va'ëne jiohijo. Hesi jö'oho lion jö'o va'ëne jiohijo. Röhu rue sigobohuro darugo börömëro jië'ëro ë darugoho vörö'e mi sisëho bojamiromo uahijo: Na'o röromo röho maro ajio hiromo nasi öri ari'oho aho'o muebejehonëjo.

<sup>3</sup> Röhu ë mi sisëho hesi simanoho gemu aëro anamu guomoromo i'ovë'ëro batato'e jiohijo. Guomoromo i'ovë'ëro batato'e jiamu ae aho'obëhe ëho garomo tiötiövoromo simane sisë'i uehorovoromo uvareje: Ëho mae höromo hesi ijore ijore jijihoruomohijo.

<sup>4</sup> Hesi ijore ijore jijihoromo uvoruomohijo: Sigobohuro vörö'e mioho hesi darugoho mabëhe bojamijade höromo ëhuni sigoboho rajahiruomohijo. Sigoboho rajahiromo vörö'e miohu'o rajahiruomohijo. Rajahiromo uvoruomohijo: Ëvörö'e mioho darugo ma'e höjo. Rahuario ëhi jië'e darugoho höjo. Rahuro ë vörö miohu'o muorovo'ajëjo. Ëhi uvoruomohijo.

<sup>5</sup> Ëhi'ego God-ro ë vörö'e mi hesi öroho bogo tugohahohijo huro nimoronimorohë'i jö sisë jövoromo hesi nimoromo bövie bise'e muebebe va'ojuvo manaere aho'obëhe 42 barë'iröhego.

<sup>6</sup> Öroho bogo tugohahë'ëro vörö'e mi sisëhuro ri'öromo God agoromo hesi ihoho ijumoromo God-hu hijaje öri ari'oho sivoromo God'o gemu mae ö'idöre raromarue aribövi jabesi sisëho sarerivoromo ëma jövohijo.

<sup>7</sup> Jö sisëho ëhi jövo'ego God-ro ë vörö'e mi hesi öroho bogo tugohahohijo huro God-are ariböviohu'o muorovoromo ruahö'öjëvo'iröhego. Ruahö'öjëvoromo vöröho baeromo agane gö gö sa'ae dinö'e dinö'e huë gö gö sine gö gö aho'obëhe muebejëvo'iröhego.

<sup>8</sup> Ae aho'o sa'ae dinö'e dinö'e raromaruoho jaburo ë vörö'e mi sisëho iae uvene aho röjahiruomö'ë'e. Uvene aho röjahi'iröhe hesi bëhoho urimo God-hu ö'idö sa'a bogo bamadevare evare God-ro a ioro'ioro jabesi ihoho hesi Sheep Harihu anego guomoröhe hesi surire jajivo'amadeje hu'o maro raromemu raromö'iröhego. A ioro'ioro jabesi ihoho suriroho bogo jajivo'amadeje bogo ëhioho maroho raromö'iröhego. Röhu iho bogo jajivo'amë'e sa'are raromarue ariböviohuro vörö'e mi sisëho rajahiruomö'ë'e.

<sup>9</sup> God-are jö hejaruje aribövioho ave jöho hehëjo.

<sup>10</sup> Aehu jemë guduamëvoromo savoji gagore ba'amëvo'ië'oho iae savoji gagoro ba'amëvo'ë'ö. O aehu muo'amëvamu vuovëvo'ië'oho iae vuovëvo'ë'e. Ëhi jië'e mu sisë rue'iröhohuni ëhuni God-are aribövioho jemëro birivoromo God gemu uehorovobe va'ore.

<sup>11</sup> Ëhi'amu gavodeje vörö'e mi sisë gö'o sa'a gagore jioromo rojomamu. Ëmi hesi danoho niö'i sheep harihu hesi dano jiajëhi ëhi jëvohijo. A'i huhu jö jövajoho ë sigobu börömëhu jövajëhi ëhi ma-darugo'o jövohijo.

<sup>12</sup> Ijore rovade vörö'e mi sisëhuro urimore rovade mi sisë hesi vöröe gemuoho bae barëromo huni röromo muoho vaehijo. Urimore rovade mi hesi muoho vaeromo sa'are raromarue aribövioho uëhijo jabumëro urimore rovade mi sisëho uvene aho röjahi'iröhego. Aehu hesi simanoho



gemu anahamu guomoromo i'ovade ë hesi batato'e simano jië'e mioho rajahi'iröhego muoho vaehijo.

<sup>13</sup> Ijore rovade miohuro urimore rovade mi hesi muoho vaeromo no bogo gavarue vörö'e mu masijoho vaehijo. Mu masije gö gö vaeromo röhu ae aho'obëhe jabesi nunire namiromo uvo'ego vënohuro ö'idöre jioromo sa'are ruvebihijo. Èhu'o ë'ohijo.

<sup>14</sup> God-ro hesi öroho bogo tugohahë'ëro ëhu'ëro ijore rovade miohuro urimore rovade miohuni röromo ëhi jië'e vörö'e muoho vaeromo ëhuro sa'are raromarue aribövioho sarerëmihijo. Sarerëmiromo uëhijo jabumëro urimore rovade mioho rajahi'i munë o rabe sehoromo inöme hesi nu ano'o va'ëne avohoröhego. Hesi simanoho gemu anahamu guomoromo i'ovade ë hesi batato'e jië'e mi hesi nu ano'o va'ëne avohoröhego.

<sup>15</sup> Urimore rovade mi hesi nu ano'o va'ëne inömoho avoho'ego God-ro öroho bogo tugohahë'ëro ëhu'ëro ijore rovade miohuro ë mi nu ano'o va'ëne inömo hesi nu gagore jö'o ögëro huosihohijo mi nu ano'o va'ënohuro daruge baeromo jöe jövoromo garöhe ae rahu hesi öriroho bogo uvene aho röjahijego muo'amo'iröhego.

<sup>16</sup> Èhi'oromo ë ijore rovade miohuro a masijoho a ininoho inömo marohë'e aribövioho inömo rumo'e aribövioho a jabesi muemu vaejarue aribövioho jabesi nimoro mu vaejarue aribövioho ae aho'obëhe mae jöe bojëmiromo uëhijo: È'ego no jemesi övo manö o varijore jajivëharëjo. Jajivëharëjamu ejëho'ego jajivëhohijo.

<sup>17</sup> Bogo ejëho'ibejo mi sisëhuro öroho tugohëhego iruno'oho bövioho bise'oho bogo imo'ibejo. Èjajivëharoho mi hesi iheje.

<sup>18</sup> Èhesi bëhoho avoho uehorovore. Ae rahu simano ma'e jëvë'oho ë mi hesi iho hesi bëhoho nahoromo birohore. Hesi ihoho 666-je. Èihoho avoho adahë'oho a ihe biroh'o'ane.

## 14

*God-are aribövie 144,000 jabuhu jö i'o ioruomade jöhoje.*

<sup>1</sup> Röhu naro ga'i gavodeje God-are Sheep Harihoho Zion dahorure nami'ego ae aho'obëhe 144,000 Sheep Harihu hesi ihohu'o hesi Vavu hesi ihohu'o varijore jajivo'amë'e hu'o riravamu.

<sup>2</sup> Röhu hejodeje ruhe ö'idöre uvavamu. Jovehu ruomoromo uvego hejaruëhi o vajerehu anego hejaruëhi o aehu gita bejogo heromo vuëvavuajëhi jöho ëhi jiavavamu.

<sup>3</sup> Èhi uvoromo God-hu hijaje röho ma hesi nuninö hu rajahjarue maje 4 jabesi nuninö a duvaho jabesi nuninö riravoromo jabsinö nu ano'oho nugoromo jö i'oho ioruomohijo. Ae aho'obëhe sa'are sisë'i raromaruoho röhu ae 144,000 ëmino'e God-hu baejëvadoho ë ariböviohuremu ë jö i'o io'iröhoho eni jëvadeje. A ioro'ioroho bogo.

<sup>4</sup> Èaribövioho magonaho'oho mu sisëho bogo vae'i ma-mae raromarueje. God-are Sheep Harihehu dinö'e dinö'e va'ë'iroho jabu'o hesi ijore ijore jijiharueje. A ioro'iore aho'obëhe jio'amajoho röhu God-ro i'u'e muoho baeromo ëhuro ë ariböviohuremu hesi baejëvadeje. Èaribövioho God'o hesi Sheep Harihohu'o jabuhu aevo'i ma-mabëhe baejëvaroho jëve.

<sup>5</sup> Jabumë bogo sareri jöho atamu aho he'irögoro jabumë ma-maemu jëve.

*Anerae niö'i gemu jabuhu uvare jöhoje.*

<sup>6</sup> Ĕhi'amu gavodeje anerae gö döre bioromo va'amu. Ĕnerahuro God-are jö maho baejè'ëro sa'are raromarue aribövioho majëhiromo uë'irögoro ë'ohijo: Ioro'ioremu jioröhe muoho ëhi ëhi höjo. Ĕjö maho sa'are raromarue aribövie aho'obëhe sine gö gö agane gö gö huë gö gö sa'ae dinö'e dinö'e raromaruoho majëhi'i va'ohijo.

<sup>7</sup> Va'oromo jöho ma-darugo'o majëhiromo uëhijo: Jöe hehëjo. God-are öroro avo'avoho uehorovoromo uvohëjo: Hu gemu börömoho höjo. Huhu ae aho'o mevëvo'iröhe majaho rovë'e höjo. Ĕhuni ö'idö sa'a sö jovo sa'a gagore suorovaje jovo bamade aho God hesi öroro uvene aho röjahihëjo.

<sup>8</sup> Ĕhi uvo'ego anerae number 2-ohuro ijore rueromo uëvavohijo: Jöe hehëjo. Iae amoho bejè'e höjo. Iho'e amo böröme Babylon vejö'oho barëjè'e höjo. Ĕhesi bëhoho urimë'i Babylon amo rajohuro mu sisë röjëhinövareje. Magonahehu ae mu sisë röjëhiromo vörö'e jovo i'imëmego ue'ahoromo simano sisërëromo önö'e jijiharuëhi ëhi Babylon amo rajohuro sa'ae dinö'e dinö'e raromarue aribövioho mu sisëho röjëhijamu simane sisërëromo mu sisë sisë vaeruomë'e höjo. Ĕhu'ëro Babylon rajohuro God-are i'uoho baeruomë'e höjo.

<sup>9</sup> Ĕhi uvo'ego anerae niö'i rueromo jö majëhijaroho röhu number 3-ohuro jabesi ijore rueromo uëhijo: Jöe hehëjo. Ae rahu mi sisë o hesi nu ano'o va'ëne avoharoho uvene aho röjëhiromo hesi iho varijore o övore baejè'oho

<sup>10</sup> ë ariböviohuro God-are i'uoho baeromo'ajëjo. Aehu vörö'e jovo bogo sanuovë'e ma-ue'ahoromo hara'uarue ëhi jië'e i'uoho God-ro vörö'iraeromo bojëmi'iramu baeromo'ajëjo. Baeromo God-are anera jabesi nunire God-are Sheep Harihu hesi nunire raromoromo vënohu'o vënehu ravoromo girosijiomë'e munëhu'o ravëvo'iramu hara'uoruomo'ajëjo.

<sup>11</sup> Hara'uo'iramu ë aribövi ravëvaje vënoho bogo duoroho'i ma-u'ivemu u'ivonövo'ajëjo. U'ivo'iramu ae rahu mi sisë o mi hesi nu ano'o va'ëne avoharoho uvene aho röjëhijè'oho o mi hesi iho sinore baejè'oho ëhi jië'e aribövioho jabesi vi'ehoho bogo u'uho'i vae majae ma-jiemu jiobe va'a'ajëjo. Anerahuro ëhi uvavohijo.

<sup>12</sup> Ĕhi jië'e huë vavaeni rue'iröhohuni ëhuni God-are ariböviehu hesi jögoru ejahoromo Iesu gemu uehorovarujoho jemëro biririvoromo ëhi gemu vaebe va'orëjo.

<sup>13</sup> Ĕhi'amu hejodeje ö'idöre uevavamu: Jajivoromo uvonëjo: Badare muohuni avevejö'e o ijonö vuovëvë'oho jabumë huë mae baebe va'a'aruëjo. God-are Aru'ahohuro jöe gemuoho jövoromo uvajëjo: Io'ajo. Iae huë mae baeromo mu masijehu u'uvëvadoho vuonugo'i nuho'aruëjo. Nuhë'i ga'a'aruëjo jabuhu vaejarëhi ëhi mae jio'iramu.

*Anerae göehu aribövi ma gagovoromo avoho bahi'i anerae göehu sisë aribövi gagovoromo i'u bojëmade uhu jöhoje.*

<sup>14</sup> Röhu naro ga'i gavodeje a ma va'ëne aho ajivë'e sue döre hijamu. A masijehu didi'aruëhi jië'e gold'e bosöho simanore didi'ë'e jiohijo. O anio ma'e siravaho övore jiohijo.

<sup>15</sup> Röhu anera göhuro God-are osa börömore jioromo höröromo ruehijo. Rueromo suere hijaje a hesi örire ma-darugo'o uahijo: Iruno'o gemuore bahijarue majaho rovë'e höjo. Jasi siravahuro tarivoromo avoho bahijëjo. Sa'are jiaje iruno'oho mamí'e mavoromo eni jië'e höjo.

<sup>16</sup> Ĕhi uvavamu hegorovo sue döre hijaje ahuro ë siravahuro sa'are jiaje iruno'o maho tarivoromo avoho bahihijo.

17 Ĕhi'lego röhu anera göhuro God-are osa böröme ö'idöre ë jioromo anio ma'e siravaho baejë'e höröromo ruehijo.

18 Ĕhi'lego anerae gö vëni muebejaje anerahuro God-ni suvuoro vënehu buejharue maratu bëhire jioromo ruehijo. Rueromo anio ma'e sirava ma'enaje anera hesi örire ma-darugo'o uahijo: Sa'are jiaje grape ö'i bajoho mavë'e jiaje jasi siravahuro tarivoromo ujuohëjo.

19 Ĕhi uvo'lego rue anerahuro hesi siravahuro sa'are jiaje ö'i bajoho tarivoromo munë guorötore ujuoho bahihijo sa'ijosa'ijovoröhëni. Sa'ijosa'ijovo'iröhe hesi bëhoho God-hu vörö'iraeromo a i'u bojëmi'iröhohoje.

20 Munë guorötore ujuoho bahijaroho bogo amo börömoroho jio'i hesi rori'o jiohijo. Röhu ë ö'i bajoho sa'ijosa'ijovohijo. Sa'ijovo'lego ëhuro ë kavuë'e ijo bajo jovohuro kö val'ëne sa'are oterohoromo e'u val'ëne ruhibe rojomojuvo a buno gëvaruëhi ë jovo hesi ëgoho ëmino'e jiohijo. O hesi börömo 300 kilometre jiohijo.

## 15

*Ijo tugoho'i majare God-are i'u sa'a rajo bojëmi'iröhëro anerae 7 jabuhu rama ujuohare jöhoje.*

1 Ĕhi'amu gavodeje noehu bogo gavaruëhi jië'e mu börömo böröme ö'idöre jiamu. Ja'o ga'ibejane tiö'ibejane. Ĕhesi bëhoho anerae aho'obëhe 7 jaburo a bövi bise'o ijumo'amo'iröhe inömo sisëho ujuoho ruehijo. Ĕinömo sisëho rue'iramu ëhuro God dë vörönimobe rovadoho barë'ë'e. Ĕhuni ë inömo sisëho ijo tugoho'i a bövi bise'o ijumo'amo'iröhe inömo jiohijo.

2 Ĕhi jio'i röhu gavodeje jovo e'u deri val'ëne börömo böröme jiamu. Ĕe'u val'ënire vënëro ravanovoromo kavuohijo. O ë e'u val'ëne hesi riröre ae riravohijo. Urimoho ë ariböviohuro biririvoromo mi sisëhu'o hesi nu ano'o val'ëne inömo'u'öho ëho jabesi muoho jöho bogo ejëhoromo mi sisë hesi ihoho sinoroho bogo bae'i ruahö'öjareje. Ĕariböviohuro God-hu i'imëmade gitaho ujuohë'e e'u val'ëne ë hesi riröre riravohijo.

3 Gitaho ujuohë'e riravoromo God-are mu vaejahaje ae Moses-are jöho ioromo God-are Sheep Harihu hesi jöhu'o ioromo uvoruomohijo: Bada God ja daruge aho'o baejë'e ae javajëjo.

Jasi muoho masije ma-mabëhe höjo.

Ja böröme namiromo sa'ae aho'o muebejavuanue ae javajëjo.

Jasi muoho bogo sareri'ehu jio'i ma-maemu jio'amajëjo.

4 Bada raro ja bogo böröme hö uehorovo'ajëjo.

Raro jasi ihoho bogo döroho bamo'ajëjo.

Ja gemu ma-maemu javajëjo.

Sa'ae aho'obëhe rueromo jasi örire rajahiruomo'ajëjo

jasi mu ma va'orahoro jio'amajohuni.

5 Ĕhi'amu gavodeje ö'idöre God-hu jiajire niögu javu maho jiovë'e jiamu.

6 Jiovë'e jiamu gagorovo naehu avevejö'e uëvode aneraho 7 ë osare jië'ëro ma-mabëhe ajivë'e sanu'e niögoho io'amë'e vinebire gold-ëro muoho taemo'amë'e suorovoromo ruehijo.

7 Rue'lego God rajahjarue maje 4-ho röhu gemuëro anerae 7 jabesi örire gold'e hevöho 7 ëhi anerae gemu gemu bojëmibe va'ohijo. Ĕhevö gagoho God-hu a i'u bojëmi'iröhe vöröhuro irijiom'amë'e jiohijo God ioro'ioremu hijaje a hesi vöröhuro.

<sup>8</sup> Röhu God-are ajohu'o darugohu'o ë hesi u'ohuro God-are osa mare u'ivoromo rumorovohijo. Ae gö ë God-are osa maroho bogo rumo va'lo varijënoho jiohijo. Hujeji anerae 7-ho jaburo a bövi bise'lo ijumo'amo'iröhe mue 7-ho vae barë'iramu evare va'oruomo'ë'e.

## 16

*Anerae 7-ehu God-are vöröe ramare jio'amajoho otehö'öjamu sa'are raro-marue ariböviehu huë vavaeni sisë baebe rovamu John-hu gavade jöhoje.*

<sup>1</sup> Ëhi'amu hejodeje God-are osa mare anerae aho'lo 7 jabesi örire ma-darugo'lo uëvavamu: Va'oromo God-are vöröe ramae 7-re jiajoho sa'aro otehö'öhëjo.

<sup>2</sup> Ëhi uvo'ego anerae 1-ohuro va'oromo hesi övore ramare vöröho sa'are otehö'öhijo. Otehö'ö'ego mi sisë hesi iho sinore jajivëhoromo mi sisë hesi nu ano'lo va'ëne inömo rajaharue aribövioho vi'ehi'e sagoho sagoho sisëho baerumohijo.

<sup>3</sup> Sagoho sagohoho baerumamu urimo anerae gemuehu ramare vörö otehö'öjadoho röhu number 2-ohuro ramare vöröho sö jovore otehö'öhijo. Otehö'ö'ego sö jovoho vuovë'e a jabesi kö va'ëne jio'amohijo. Jovoho kö va'ëne jio'ego jovore jijiharue majoho aho'lo vuovo barëhijo.

<sup>4</sup> Vuovo'ego urimo anerae niö'iehu vörö otehö'öjaroho röhu number 3-ohuro ramare vöröho otehö'öhijo. Otehö'ö'ego rova'lo'amë'e jovohu'lo sa'la gagore rojomaje jovohu'lo körae'amohijo.

<sup>5</sup> Ëhi'amu naro hejodeje jovo muebejaje anerahuro uavavamu: O asë'e God urimë'i jiobe rovanoho avevej'oho ëhi javajëjo. Ja a maemu javajëjo. Jaehu a gëromo ëhi jië'e i'u mana bojëmijanuoho iae mae höjo.

<sup>6</sup> Nume aribövi sisëhuro jasi jö baeromo majëhijarue ariböviohu'lo jasi aribövi ma ioro'iorohu'lo muo'amamu jabesi köho rovade höjo. Jabumëro jasi aribövioho muo'amamu köho rovë'ego ëhuni jero jabesi örire köe mana bojëmijane höjo ue'aho'iröhego. Jabumë sisë'i ë'arohuni ëhuni ëhi jië'oho iae mae höjo.

<sup>7</sup> Ëhi ua'ego God-ni suvuoro vënehu buejaharue maratuore uavavohijo: Io'ajo. Bada God ja daruge aho'lo baejë'e ae javajëjo. Jaehu a gëromo i'u mana bojëmijanuoho ëho bogo mu sisëho vae'iro iae mu mae vaejanue höjo.

<sup>8</sup> Ëhi uvo'ego urimo anerae niö'i gemuehu vörö otehö'öjaroho röhu number 4-huro ramare vöröho maja nunire otehö'öhijo. Otehö'ö'ego God-ro maja nuni hesi öroho bogo tugohohijo majaëro vörö'iraeromo ae aho'lo jabesi sino haho'oho vënëro ravëvanovoröhego.

<sup>9</sup> God-ro maja nuni hesi öroho bogo tugohë'ëro majaëro sisë maro nijëmiromo vënëro ravëvanovo'ego ë i'u nugö'öjade aho God agoruomohijo. Jabumë jabesi mu sisëho bogo vuonugoromo bogo uvoruomohijo: God-are ihoho böröme höjo.

<sup>10</sup> Ëhi'ego urimo anerae ëhi niö'i ëhi niö'iehu vörö otehö'öjaroho röhu number 5-huro mi sisëhu börömo vaeromo hijaje hesi döre ë ramare vöröho otehö'öhijo. Otehö'ö'ego ë mi sisëhu muebejaje öri ari'oho ramoramovohijo. Ramoramovo'ego ae aho'obëhe hara'uoromo anëro bitaroho ja'ihorovo'amohijo.

<sup>11</sup> Anëro bitaroho ja'ihorovo'amë'ëro jabesi vi'ehohu'lo sagoho sago-hohu'lo uehorovoromo ö'idöre hijaje aho God hesi örire agoruomohijo. Jabumë mu sisë vaeruomadoho bogo uehorovoromo vuonugoruomohijo.

<sup>12</sup> Ĕhi'ego urimo anerae övo gö minehu vörö otehö'öjaro ho röhu number 6-huro ramare vöröho rova'ë'e jovo böröme Euphrates-are döre otehö'öhijo. Otehö'ö'ego jovo ho sinihohijo ĕhuro ruhe maja rojomajinö jioromo rueröhe a masijo jabesi öroho jiovëhego maro rueromo muorovoruumoröhego.

<sup>13</sup> Ĕhi'amu naro gavodeje aru'aho sisë niö'i gemu vahuno va'ënoho göhuro sigobu börömo hesi jö'ore jioromo göhuro mi sisë hesi jö'ore jioromo göhuro sareri'e aru'aho'e jö majëhijaje a hesi jö'ore jioromo suorovoromo rueruumamu.

<sup>14</sup> Ĕaru'aho sisëho jabumë Satan-are anera sisëro jioruumë'ëro bogo gavarue darugo'e muoho vaeruumajeje. Darugo'e muoho vaeromo sa'ae dinö'e dinö'e va'arueje sa'are masijo vaejarue aribövioho aho'obëhe gagovëvego daruge aho'o baejë'e aho God-are maja börömo ho rovego muorovoruumoröhego.

<sup>15</sup> Röhu Iesuro uve: Jöe hehëjo. Naro vajiohu'e aëro ö'anovo'ië'ajëjo. Ĕhuni ae rahu nune jioromo niögu avo'avoho mueberovë'o ho iae mae jioruumo'ajëjo. Ĕhi jië'o ho bogo ma-sinëremuoho a nuniroho jijihoromo javojoho baeruumo'ajëjo. Iesuro ĕhi uve.

<sup>16</sup> Amo ĕ aru'aho sisë niö'i gemu jaburo sa'a muebejarue a masijoho sö ujuohëvo rueromo öri ari'o ihe Hebrew jöehu uvaruoho Armageddon ĕ gagovëvohijo.

<sup>17</sup> Gagovëvo'ego urimo anerae övo gö mine övo göre gemuehu vörö otehö'öjaro ho röhu number 7-huro ijo tugoho'i ramare vöröho sa'anö otehö'öhijo. Sa'anö otehö'ö'ego God-are osa börömore jiaje röho mare uvavohijo: Iae barëjë'e höjo.

<sup>18</sup> Iae barëjë'e hö uvo'ego baderivoromo vajeri varuru'e vaeromo sa'aho sisë maro hijiohijiovohijo. Aevoromo aehu sa'are raromobe rovaroho sa'aho bogo ĕhioho darugo'e maho hijiohijiovo'i ma-bisemu jiobe rovadeje.

<sup>19</sup> Sa'aho hijiohijiovo'ego amo börömo ho niö'i gemu tariorovobe va'ohijo. Tariorovobe va'ego ame gö gö sa'ae dinö'e dinö'e jio'amajoho sisërë'amohijo. Röhu God-ro amo böröme Babylon hesi sisëho bogo rumonimo'i vörö'iraeromo i'uoho amo rajoho bojëmihijo ĕhuro aehu vörö'e jovo ue'ahoromo hara'uaruëhi ĕ i'uoho baeromo ĕhi hara'uorumoröhego.

<sup>20</sup> Ĕi'uoho bojëmi'ego sa'a dirö dirö'e jio'amajoho dahore aho'obëhe sisërëromo ĕhi va'o barë'amohijo.

<sup>21</sup> Röhu ënëro direjohi'amë'e masijo masije ruvebihijo. Ĕhesi i'uoho gemu gemu 50 kilo rabu'e jio'amë'ëro ĕhuro ruvebiromo ae taemo'amoromo ijumëvohijo. Sisë maro ijumëvo'ego jaburo God agorumohijo.

## 17

### *Önö'e juvaje magonaho börömo hesi jöhoje.*

<sup>1</sup> Ĕhi'ego anerae aho'obëhe 7 rama ujuoharoho röhu gemuëro rueromo uehijo: Rovego na röjahego önö'e juvaje magonaho böröme hu i'u baejajoho gavëjo. Ĕmagonahoho ruë numë jovemu jië'e öri ari'ere hijaje höjo.

<sup>2</sup> Urimë'i a masije aho'obëhe sa'ae dinö'e dinö'e muebejaruoho ĕho jaburo ĕ magonahoho sihonövare höjo. O ae aho'obëhe sa'ae dinö'e dinö'e raromaruoho ĕho jaburo hesi jöho ejahoromo hesi vörö'e jovo ho ue'ahoromo simane sisërëromo hu'o mu sisëho vaenövare höjo. Ĕhuni rovego na röjahego huhu i'u baejajoho gavëjo.

<sup>3</sup> Ĕhi uenugoromo God-are Aru'ahohuro nasi simanoho huotovehamu ĕ anerahuro na baejevoromo a rumo'e sa'are ruehijo. Baejevoromo rovamu

naro gavodeje magonahoho sino kavuë'e mi sisë hesi döre hijamu. Röhu mi sisë hesi sinore iho sisë God agaruoho jajivo'amë'e jiohijo. Hesi simanoho aho'obëhe 7 jio'amohijo. Hesi danoho aho'obëhe 10 jio'amohijo.

<sup>4</sup> Röhu ë magonahohuro kavuë'e niöge nu ano'e gö gö jië'oho ruahë'e gold mabëhëro aji'e munë mabëhëro nieniae gö gö mabëhëro ëhuro gurasijiomoromo avohorovë'e hihijo. Hiromo gold'e enatuoho övëro ma'enuhijo. Ëenatu gagoho ë magonahehu va'inumi'e mu gö gö vaejaje ë hesi va'inumohuro irijiomë'e usihö'e sisë bëhe jiohijo.

<sup>5</sup> O magonaho hesi ihoho hesi varijore uhu'e jajivoromo uvë'e jiohijo: Ave magonaho hesi bëhoho amo börömoho Babylon höjo. Önö'e jijiharue mu gö gö vaejarue sa'ae dinö'e dinö'e raromarue aribövi jabesi vëmoho höjo.

<sup>6</sup> Röhu na gavodeje ë magonaho hesi simanoho huotorovoromo sisërëjë'e jiamu ë hesi bëhoho huro God-are ariböviehu Iesuale jö birivoromo majëhijaroho muo'amoromo jabesi köho ibe rovë'ëro. Ëhu'ëro jië'ëro simanoho sisërëjë'e jiohijo.

Simane sisërëjë'e jiamu gagorovo na tiötiövevadeje.

<sup>7</sup> Tiötiövevamu gegorovo rue anerahuro uehijo: Ja rabëni tiöjanuëjo. Ëmagonaho hesi uhu jöho o magonahehu döre hijaje mi sisë simane 7 o dane 10 jiajoho ë mi hesi uhu jöho huruoho majahi'ie'ajëjo.

<sup>8</sup> Jaehu gavane mioho urimo namijade höjo. Röhu avevejö'oho bogohöjo. Röhu u'emu gua ëgobövi sa'a gagore jio rojomo'ie'ajëjo ijonö sisëro va'iröhëro. Rojomo'iramu sa'are raromarue ariböviohuro tiöromo jöe barëjëvo'ajëjo. Urimë'i ö'idö sa'a bogo bamadevare evare God-ro maro raromemu raromo'iröhe surire a ioro'ioro jabesi ihoho jajivo'i a ioro'ioro jabesi ihoho bogo jajivo'amade höjo. Jabesi iho bogo jajivo'amade ariböviohuro ë mi sisëho garomo tiöruomo'ajëjo. Ëhesi bëhoho ë mioho urimo namijadoho avevejö'oho bogojiajoho röhu ijonö röhu maho jio'a'ajëjo. Iae ëhuni tiöruomo'ajëjo.

<sup>9</sup> Röhu ae rahu ave jöho avo'avoho uehorovoromo simano mae baeromo bëhi nahë'oho ave nasi uhu jö hesi bëhoho biroho'arujëjo. Ëjövode mi sisë hesi simane 7 ëho jabesi bëhoho dahore aho'obëhe 7 hesi jöho höjo. Ëmagonahohuro ë dahore aho'o 7 jië'e hesi döre hijanovaje höjo. Röhu simane 7 jabesi bëhoho gö sa'are masijo vaejarue ae 7 jabesi jöho höjo.

<sup>10</sup> Övo gö mine rireromadoho gemu avevejö'oho daruge jioromo hi'i röhu gemu gö'o bogo rovë'e höjo. Rovë'iroho iae majae ma-bisemu hi'a'ajëjo.

<sup>11</sup> Röhu mi sisë urimo namijë'ëro jaruvo bogojiaje hesi bëhoho a masije 7 jabesi jö uavode röhu ë hesi ijore number 8-ehu rueröhe hesi jöho höjo. Röhu ëho urimo riravobe rovarue a masije 7 jabesi ae gemuoho jio'a'ajëjo. Röhu hu sisëro va'a'ajëjo.

<sup>12</sup> Röhu mi hesi dane 10 gavanoho ë hesi bëhoho sa'a muebejarue a masije 10 jabesi jöho höjo. Röhu avevejö'oho mueberuomo'iröhe öri ari'oho bogo baeromë'e höjo. U'emu bae'a'aruëjo. Jabesi muebe'iröhe öri ari'o baejë'iroho evare a muebejëvo'iröhe darugoho bae'a'aruëjo mi sisëhu'o gemu mae masije riravoromo ae muebejëvego majae ma-bisemu jioromo evare ë darugoho barëjëhoröhego.

<sup>13</sup> Ëa masije aho'obëhe 10 ëho jaburo uehore gemu bae'a'aruëjo. Uehore gemu baeromo jabesi darugoho aho'o mi sisë hesi örire gemu bojamiromo ajaminövo'aruëjo.

<sup>14</sup> Mi sisëho ajamiromo riöromo God-are Sheep Harihohu'o muorovo'aruëjo. Muorovo'iramu Sheep Harihohuro mana

muorovëmiromo jabumë ruahö'öjëvo'ajëjo ë hesi bëhoho huro masijo vaeruomaje ae aho'o iosirëmiromo hu gemu döroho jië'ëro. O huhu bæjëvo'i uehorovëvoromo hesi bæjëvade ariböviehu hu gemu biririvoromo uehorovarue ë aribövioho jaburo Sheep Harihohu'o gemuoro bimuvoromo muorovoromo sisëho ruahö'öjëvoruomajëjo.

<sup>15</sup> Anerahuro ëhi ueromo uehijo: Önö'e juvaje magonahehu ruë numë jovemu jië'ire hijamu gavane jovo hesi bëhoho ae aho'obëhe sine gö gö huë gö gö sa'ae dinö'e dinö'e raromarue aribövi jabesi jöho höjo.

<sup>16</sup> Röhu mi sisëhu'o hesi dane aho'obëhe 10 ga'amanoho ëhu'o jaburo huotorovoromo ë önö'e juvaje magonahoho nue huodivoromo ijumo'aruëjo. Ijumoromo niögu siri'oho jahaho'amo'iramu dë'ahobatëremu jio'iramu ëhi nugoruomajëjo. Dë'ahobatëremu nugonugoromo hesi sino ioro'ioroho ue'aho'i ioro'ioroho vëniro huoruomajëjo.

<sup>17</sup> Ëhi ë'iröhe hesi bëhoho God-ro uehore ë danoho simanore bojëmijade höjo ëhuro huhu nimaje muoho vaejahoruomoröhego. Huhu nimaje muoho jabumëro vaejahoromo simane gemuoho uehorovoromo mi sisëho jabesi darugoho aho'o bojamiromo ajamijego ë mi sisëhuro bövie namiromo öri ari'oho muebebe va'ego evare God-hu rabe rabe uëvadëhi ëhi jioröhego.

<sup>18</sup> O jaehu gavane magonaho hesi bëhoho iho'e amo börömoho höjo. Ëamohuro sa'ae dinö'e dinö'e muebejarue a ioro'ioroho muebe'amarue höjo.

## 18

### *Amo sisë Babylon ma-ioro'ioremu sisërë barë'iröhe jöhoje.*

<sup>1</sup> Ëhi'amu gagorovo gavodeje anerae gö ö'idöre jioromo ruvebijamu. Hu darugo böröme bæjë'ëro ruvebi'ego hesi ajohuro sa'ae aho'obëhe ajivo'amohijo.

<sup>2</sup> Sa'ae aho'obëhe ajivo'amo'ego ma-darugo'o uvohijo: Amoho barëjë'e höjo. Iho'e amo börömoho Babylon vej'oho barëjë'e höjo. Avevej'oho ë amoho Satan-are anera jabesi ame höjo. Aru'aho sisë jabesi öri ari'e höjo. Va'inumi'e ugo sisë ihe göëro göëro ë raromo jijiharue höjo.

<sup>3</sup> Ëhesi bëhoho ëhi höjo. Aehu magonaho hesi vörö'e jovo iromo simane sisërëromo hu'o önö'e vaejarue ëhi jië'e mue gemuoho ë amo rajoho jaburo sa'ae aho'obëhe röjëhijare höjo. Aehu magonaho'o önö'e mu vaejaruëhi sa'are a masijo ömo'ömohuro ë amo gemuore bimuvoromo javoji'e mue gö gö vaejare höjo. O Babylon amo rajohuro mahunö'e raromoromo bövie bise'e imo'i nimare höjo. Ëhi nimë'ëro inömo imo'amarue ariböviohuro sa'ae göro göro jioromo rueromo ë amore jabesi inömoho imoromo ëhuro moni ma'e jëvade höjo.

<sup>4</sup> Ëhi uvavamu hejë'i hejodeje ö'idöre huë gö uvavamu: Nasi aribövioho ë amore raromarujoho vuonugo'i ruehëjo ëhuro ë amo rajo jabesi gemuoroho bogo bimuvoromo mu sisëho vae'irarije höjo.

O jabuhu i'u baeruomajoho jemë bogo bæ'irarije höjo.

<sup>5</sup> Ëamo rajehu mu sisë börömo bëhe vaebe rovaroho God iae uehorovajëjo i'ue bojëmi'iro.

<sup>6</sup> Amo rajehu mu sisë vaeruomadëhi jemëro i'uoho mana ëhi bojëmiromo röhu gö'o döro börömo bëhe bojëmirëjo.

Jabuhu a ioro'ioro vörö'e jovo bojëmanovamu ue'ahoromo ijumorovarëhi

jemëro ëhi mana bojëmirëjo.

Röhu vörö ma-ma'e jovoho bojëmëgo ue'ahoromo ijumorovo avoho'irarëjo.

<sup>7</sup> Urimo amo rajehu nimoronimorohë'i jijihoromo mahunö'e raromarëhi i'uoho mana ëhi bojëmëgo hara'uoromo huë vavaene baeruomo'irajo.

Magonahehu sarerivoromo uvajëhi: Na magonaho bërömerö jev'ëro dö maro hijaje höjo.

Na bogo doruoho hijaje höjo.

Bogo mae bogo huë vavaenoho bae hesi jevajë uvajëhi

ë amo rajohuro ëhi gemuoho sarerivoromo uehorovoromo uvoruomaje höjo:

No masije javuajëjo.

<sup>8</sup> Èhuni majae gemuore jabesi i'uoho aho'obëhe ma-majioho rue barë'iramu sisërëjëvo'ajëjo.

Ae guomo guomo sisë baeromo vuovëvo'ajëjo.

Huë vavaene bëröme jabesi örire rue'a'ajëjo.

Hömo majae rue'a'ajëjo.

Vënëro ravëvo barë'ajëjo

ë hesi bëhoho jabumë mevo gëromo i'u bojëmaje aho Bada God-are darugoho bërömerö jïë'ëro.

<sup>9</sup> Röhu sa'a gö gö a masijohuro ë amo rajohu'o bimuvoromo javoji'e muoho vaeromo hesi inöme marohë'e mae ujuohoromo mahunö'e raromë'ëro garöhe amoho vënëro ravoromo u'ivo ajiomol'iramu garuomoromo amo hesi jöëni vavaenimoromo nierusuburu'e bamoruomo'ë'e.

<sup>10</sup> Nierusuburu'e bamoromo ë amore huë vavaeni bërömo baejaruoho garomo juhuonivoromo rori'o ëgoböviro riravo'ë'ö. Riravoromo uvoruomo'ë'e:

Babylon vaevë'e amo bërömhajo.

E-e vaevë'e biriri'e amohajo.

Jemesi i'uoho ma-majioho baejë'e jëvajëjo.

<sup>11</sup> Èhi uvoruomo'iramu sa'ae dinö'e dinö'e raromoromo inömo imoromo moni mana ujuoharue ariböviohuro ë amo hesi jöëni vavaenimoromo nierusuburu'e bamoruomo'ë'e. Èhesi bëhoho urimë'i ë amo rajehu imo'amarue a jabesi inömo imo'amoromo moni bojëminövaroho ë i'u baeröhe majare evare iae barë'ë'e. Barë'iramu ae bogojië'ëro jabumë inömhoho bogo imo'amoromo monioho bae'ë'ö.

<sup>12</sup> Jabesi gold silver munë gö gö maho nienia maho bogo imo'amoromo monioho bae'ë'ö. Sanuovë'e niöge kavuë'e nu ano'e gö gö ëhu'o bogo imo'amoromo monioho bae'ë'ö. Ridi'e ije nu ano'e gö gö ëhu'o bogo imo'amoromo monioho bae'ë'ö. Inömo inömo mi danehu avoho'amaroho ijo maehu avoho'amaroho rövë'e munë maehu ajaniehu munë nu ano'o göehu göehu avoho'amaroho ëhu'o bogo imo'amoromo monioho bae'ë'ö.

<sup>13</sup> Rihu'e i maho ridi'e oso ihe gö gö vëniro buejago ridivajoho o sino avohorovaruooho o mu rabe rabe vaejaruoho ëhu'o bogo imo'amoromo monioho bae'ë'ö. Wine jovoho olive ijo bajo jovoho flour-ho wheat-ho cow-ho sheep-ho horse-ho ëhu'o bogo imo'amoromo monioho bae'ë'ö. Maratu mabëhe horse-ehu jagu bava'aruoho ëhu'o bogo imo'amoromo monioho bae'ë'ö. Ae magonahe aru'aho'e jioruomajeje röhu mahu mi'o ë'aruëhi ëhi guduamo'amoromo imo'amarueje ae gö jabesi muemu vaeröhego. Ae magonahe mi va'ëne imo'amaruëhioho ëhioho bogo imo'ë'ö. Ijonöho aho bogo imo'amo'iramu ëhuni imo'amarue ariböviohuro nierusuburu'e bamoruomo'ë'e.



<sup>14</sup> Nierusuburu'e bamoromo uvoruomo'ë'e: Vaevë'e amoho ijo baje gö gö i'i ganiganiëgajoho iae barëjêhë'e hõjo. Jemë inõme marohë'e mae o bövie bise'e ajivë'e ma-mabëhe jëvadoho sisërëjêhë'e hõjo. Dinõ'e röhu maho birohorejo.

<sup>15</sup> Iae ë inõmo amo rajo jabesi õrre imo'amoromo mana marohë'e ma ujuoharohuro ë amo rajehu huë vavaeni vi'ehi börõmo baejaruoho gëromo juhuonivë'ëro rori'o ëgobõviro riravo'ë'e. Ëgobõviro riravoromo huë vavaene baeromo nierusuburu'e bamoruomo'ë'e.

<sup>16</sup> Nierusuburu'e bamoromo uvoruomo'ë'e:

E-e vaevë'e vaevë'e amo börõmohajo.

Sanuovë'e niõgu mabëhe kavuë'e ma-mabëhe io'amonõvarije hõjo.

Nieniae gold-ehu inõmo göehu göehu avoho'amaroho gurasijiomoromo avohorovonõvarije hõjo.

<sup>17</sup> Jaruvoho jemesi inõmo marohë'o ho ma-majioho ijumëhë'e hõjo.

Boat muebe'amarue aribõvioho boat ma'endarue aribõvioho boat-re raromoromo mu vaeromo moni baejarue aribõvioho boat-re va'arue a ioro'ioroho ëho jaburo rori'o ëgobõviro riravoromo

<sup>18</sup> garõhe Babylon amoho vënëro ravoromo u'ivo ajiamo'iramu garuomoromo ma-darugo'o uvoruomo'ë'e: Sareri amo börõmo börõme jiade hõjo. Ëhi jië'e amoho urimoho bogojiade hõjo.

<sup>19</sup> Ëhi uvoruomoromo vavaenimorovoromo tohotohoho jabesi simanore bu'õdivorovoromo nierusuburu'e bamoromo uvoruomo'ë'e:

E-e vaevë'e vaevë'e amo börõmohajo.

Boat baeromo sö jovore va'arue ae aho'o noro ë amo rajore nosi inõmoho imëvoromo

manaho marohë'e mae ujuohë'e javuajëjo.

Jaruvoho ma-majioho sisërëjê'e hõjo.

Ëhi uvoruomo'ë'e.

<sup>20</sup> Röhu õ'idõ rajoho apostle õmo'õmoho jö God-aro baeromo majëhjarue aribõvioho God-are aribõvi ioro'ioroho jemëro nimorohore. Ëamo rajehu jemesi õrre sisë'i vaejëvaroho God-ro ëho gëromo ë hesi i'uo ho mana bojëmijë'eje.

<sup>21</sup> Röhu darugo'e anerae gemuëro munë ha'osi börõmo börõmoho banigojiomoromo sö jovore bu'õ'ego jovo gagore be'abuehijo. Jovo gagore be'abue'ego anerahuro uvavohijo: Ëmunëhu e'ure be'abuejê'ëro ijonõ bogo gavaruëhi amo börõmo börõme Babylon i'ue baeromo ëhi ma-ioro'ioremu beva'oromo sisërë'iramu ijonõho bogo ga'a'anuëjo.

<sup>22</sup> Gita bejaruoho jö iaruo ho virikõ huosiharuoho hëgõ huaruoho ë hesi huëho ë amoroho ijonõho bogo he'a'anuëjo. Inõmo javuo bövi bise'o avoho'amarue aribõvioho ë amoroho ijonõho bogo birohëvo'anuëjo. I sa'ijovaje munë hunuohunuovo'ego garahõrõ'e baejajoho ë amoroho ijonõho bogo he'a'anuëjo.

<sup>23</sup> Iro bunõ'irae'ego ajivajoho ë amoroho ijonõho bogo ga'a'anuëjo. A'o magonaho'o masurovoromo nimoronimoroharuoho ë amoroho ijonõho bogo he'a'anuëjo. Röhu amo rajomë urimo jemesi moni mu vaejarue aribõviohuro sa'a ioro'ioroho iosirëmiromomo masije jëvade hõjo. Jemëro sareri sareri'e muoho vaeromo sa'ae aho'o jabesi uehoroho ijumëharije hõjo.

<sup>24</sup> Röhu jö God-aro baeromo majëhjarue aribõviohu'o God-are aribõvi ioro'iorohu'o ë amore o dinõ'e dinõ'e raromaruoho muo'amamu vuovëvë'o ho ë amo rajo jabesi sisë hõjo. Iae ëhuni ë amoho sisërë'ajëjo. Anerahuro ëhi uvohijo.

## 19

<sup>1</sup> Ĕhi'amu hejodeje ae aho'o ö'idöre ma-darugo'o uvoruomavamu: God mabëhëjo. Huro gemuëro maroho bamavuaje höjo. Iho börömo ho darugo maho nosi God hesiriremu höjo.

<sup>2</sup> God-ro ae mae o sisë jëvego gë'i avoho mevëvaje höjo. Ĕhesi bëhoho ë önö'e juvaje magonaho böröme hu sa'ae aho'o javoji'e mu röjëhiromo ijumëvadohuni ëhuni huro mevoromo uavade höjo: Sisë javo'ego sisëro va'a'anuëjo. Ĕmagonahehu God-are mu vaejarue aribövi muo'amëvadohuni ëhuni i'ue mana bojamijë'e höjo.

<sup>3</sup> Ĕhi uvoruomoromo röhu maho uvoruomohijo: God mabëhëjo. Ĕamo börömo ho vënehu ravaje u'oho ëhi ma-ajiomemu ajiomö'ajëjo.

<sup>4</sup> Ĕhi uvoruomö'ego rue a duvahe aho'obëhe 24-ho o God rajahijarue maje 4-ho jaburo sa'are ague aho raromoromo God-hu röho mare hijajoho rajahiromo uaruomohijo: Ĕjöho iae mae-ëjo. God mabëhëjo.

### *Masu'iröhe söro God-are Sheep Harihehu bae'iröhe jöhoje.*

<sup>5</sup> Ĕhi uvoruomö'ego God-are röho mare uvavohijo: Nosi Börömo ho God mabëhe uarëjo. Hesi mu vaejharuje hu uehorovaruje aribövi masijohu'o ininohu'o aho'o hesi öroro huë mae uarëjo.

<sup>6</sup> Ĕhi uvoruomamu hejë'i naro hejodeje ae aho'obëhe uvorovaruehi jovehu ruomoromo uvajëhi varurehu anego hejaruehi ëhi uvoromo uvavamu: God mabëhëjo. Bada nosi God daruge aho'o baejë'e ahuro böröme namijajëjo.

<sup>7</sup> Ĕhuni ë'ego no huë mae baeromo nimoroharëjo. Hesi ihoho mabëhe uavarëjo. Ĕhesi bëhoho God-are Sheep Harihehu masu'iröhe majaho rovë'e höjo. Huhu masu'iröhe magonahohuro avohorovë'e höjo.

<sup>8</sup> God-ro sanuovë'e ajivo avohë'e niögoho bojamamu ba'amë'e höjo. Ĕhi uvoruomavohijo. Röhu sanuovë'e niögu hesi bëhoho God-are ariböviehu mu ma vaejarue hesi jöhoje.

<sup>9</sup> Ĕhi'ego ë anerahuro uehijo: Ave jöho jajivoromo uvonëjo: Ae rahu hejë'oho uëvamu: God-are Sheep Harihehu masu'iröhe söroho ro ihë uëvamu hejë'oho huë mabëhe jioruomö'ajëjo. Ĕhi uenugoromo uehijo: Ave jö hejanuoho God-are jö maho höjo.

<sup>10</sup> Anerahuro ëhi uevamu hejë'i naro hu uvene aho röjahi'irögoro hesi hörü'ere ague aho hijodeje. Hiromo rajahi'irögoro ë'amu gegorovo uehijo: Bogave ëhioho ë'iranëjo. Jaehu God-are mu vaejanue ëhi jïë'e mu vaejaje ae jevajëjo. O jasi ö mueno'ohu'o Iesuare jö mae uehorovoromo majëhijaruoho jabuhu Badare mu vaejaruehi na'o ëhi ë'aje ae jevajëjo. Ĕhuni nadi na rajehi'i God gemu rajahijëjo. Ĕhesi bëhoho Aru'aho gemuohuro jöe bojëmë'ego aëro ijönö jioröhe jöho majëhinövare höjo o avevejö'oho Iesuare jöho majëhijarue höjo.

### *Mu Ma Uehorovaje Aehu sino ajivë'e horse-re hiromo va'oromo sisë ariböviohu'o muorovade jöhoje.*

<sup>11</sup> Ĕhi uevamu gavodeje ö'idöho jiovë'e jiamu. Jiovë'e jiamu gagorovo gavodeje ae sino ajivë'e horse-re hijamu. Ĕa hesi ihoho Biririvoromo Mu Ma Uehorovaje Ahoje. Hu mevoromo gövuaje a mae o sisë javuego gövuajoho ëho huro mae uehorovoromo ë'ajeje. O muorovajoho ëhu'o huro mae uehorovoromo ë'ajeje.

<sup>12</sup> Rōhu hesi nunoho vënëro höduvanovohijo. O hesi simanore a masijehu didi'aruēhi jiē'e bosōho aho'obēhe didi'o'amē'e jiohijo. Rōhu hesi sinore ihe jajivē'e jiohijo. Ae gö ē iho hesi bēhoho bogo ga'i hesi huro sivue gavajeje.

<sup>13</sup> Hu köēremu jiē'e niōgoho ba'amē'e jiohijo. Rōhu hesi ihoho God-are Jō jumuvē'ohoje.

<sup>14</sup> Rōhu ö'idöre jioruomaje muorovo ariböviohuro aji buse jiē'e sanuovē'e niōgoho io'amoruomē'e sino ajivo'amē'e horse-re raromoruomohijo. Raromomo ē a bōrōmo hesi ijore ijore jijihoruomohijo.

<sup>15</sup> Rōhu ē a hesi jō'ore anio ma'e kaejōho jiohijo ēhuro God bogo uehorovarue aribōvi sa'ae dinō'e dinō'e raromaruoho ruahō'ōjēvorōhēro. Ruahō'ōjēvoromo hujejo ha'itoho baeromo vōrō'o muebejēvo'ē'e jaburo hu gemu ejahoruomorōhego. Muebejēvoromo aehu kavuē'e ö'i bajo munē guorōtore hōrehu taemotaemovoromo sa'ijovo'amaruēhi huro sisē aribövioho ēhi hörēro taemotaemovo'amo'ē'e. Ēhesi bēhoho daruge aho'o baejē'e aho God-hu dē vōrōnimēgo vōrō rōjēhiromomo i'u bojēmijaje jōhoje.

<sup>16</sup> Rōhu hesi ahihonō niōgu dōre ihoho jajivoromo uvē'e jiohijo: Masijo vaeruomaje ae aho'o iosirēmiromomo hu gemu dōroho hōjo. Ēhi jajivē'e jiohijo.

<sup>17</sup> Ēhi'amu gavodeje anerae gemu maja nunire namijamu. Namiromomo dōre bioromo va'arue ugoho aho'obēhe ma-darugo'o uēhijo: God sōrō bōrōme bamajējo. Rueromomo gemuoro gagovohējo

<sup>18</sup> ēhuro sa'are masijo vaejarue a jabesi birogoho iromomo muorovo a masijo jabesi birogoho darugo'e a jabesi birogoho horse jabesi birogoho horse-re va'arue aribōvi jabesi birogoho mae o sisē'i raromarue aribōvi jabesi birogoho a masijo o a inino jabesi birogoho ēho i'amo'irarije hōjo. Ēhi uēhijo.

<sup>19</sup> Rōhu gavodeje urimo gavode mi sisēho o sa'ae dinō'e dinō'e masijo vaeruomaje aribövioho o jabesi muorovo aribövioho ēho jaburo ē sino ajivē'e horse-re hijaje a bōrōmohu'o hesi muorovo ariböviohu'o muorovo'i gemuoro gagovē'e jiamu.

<sup>20</sup> Muorovo'ego horse-re hijaje a bōrōmohu'o hesi muorovo ariböviohu'o ēho jaburo mi sisēhu'o mi sisē hesi sareri'e aru'aho jō majēhijaje ahu'o ēhi guduamo baejēvo va'ohijo. Urimē'i ē jō sareri'e majēhijaje ahuro mi sisē hesi jōho ae sarerēmiromomo darugo'o majēhiromomo mi sisēhuni rōromomo noehu bogo gavarue darugo'e muoho vaenōvadeje. Darugo'e muoho vaeromomo ēhuro aho sarerēmi'ego ae rahu mi sisē hesi iho sinore baeromomo hesi nu ano'o va'ēne inōmo avoharoho uvēne aho rōjahijē'oho guaro rireromomo va'onōvareje. Amo ē sareri'e aru'aho jō majēhijaje ahu'o mi sisēhu'o guduamēvoromomo bogo anēgo'i ma-babu'ōjēvo'ego vēnehu munē ravoromomo girosijiomoromomo e'u bōrōmo va'ēne jiajire ē bejēvo va'ohijo.

<sup>21</sup> Bejēvo va'ego jabesi muorovo aribōvi sisēho horse-re hijaje a bōrōmo hesi jō'ore jioromomo hörōjade kaejōhuro muo'amohijo. Muo'amo'ego uge aho'obēhe ē aribōvi jabesi birogoho ue'ahē'ero dē bajo'e jio'amohijo.

## 20

*Satan gua gagore vadune ēgobōvie hi'irōhego tövoromomo gua gago ēgobōvire ba'amamu John-hu gavade jōhoje.*

<sup>1</sup> Naro gavodeje aneraho ö'idöre jioromomo gua ēgobōvi hesi ojo jiovarue key'o biriri'e ö'ohu'o övëro ömëv'e ruvebijamu.

<sup>2</sup> Ruvebiromo ë anerahuro ni'livadire jiohe rovade sigobu börömo hesi ihoho Devil o Satan ë sigoboho gudumomoro tövohijo ëhi jiohe va'ojuvo vadune aho'o 1,000 barë'iröhego.

<sup>3</sup> Tövoromo ë gua ëgobövire ba'amo'ego beva'ohijo. Beva'ego ojoho tugohoniagivoromo sivaëro badihi taemohijo ëhuro hu bogo höröromo urimo ë'adëhioho sa'ae dinö'e dinö'e raromarue aribövioho sarerëmibe va'ego vadune aho'o 1,000 barë'iröhego. Röhu vadune aho'obëhe 1,000 barë'iramu evare ojoho jiovaho'iramu iae höröromo hibe juvoromo majae ma-bisemu barë'iramu evare barë'ë'e. Ehi jio'ë'e.

<sup>4</sup> Ehi'amu gavodeje a masijoho röho mare raromamu. God-ro urimo uëvamu darugoho baerumadeje ae mevëvoromo gëröhëni mae o sisë jëvego. Eëaribövioho röho mare raromorumohijo. O gavodeje a ioro'ioro jabesi aru'ahoho jio'amamu. Urimë'i ë ariböviohuro sa'are raromoro God-are jö Iesuhu majëhijadoho ae majëhibe jijiamu gagorovo aëro ë mu maho bijönimoromo sönöe tarivëhamu vuovëvadeje. Vuovëvë'ëro ë aribövi jabesi aru'ahoho gëvodeje. Urimë'i ë aribövioho jaburo mi sisëho o ë mi hesi nu ano'o va'ëne avohare inömo bogo uvene aho röjëhijareje. Emi sisë hesi ihoho varijore o övore jajivëho'iröhoho bijönëgamu bogo baejareje. Bogo baejë'ëro vuovoromo i'ovë'ëro Keriso'o gemu mae masije vaejuvo vadune aho'obëhe 1,000 barëhijo.

<sup>5</sup> A ioro'ioroho bogo i'ovo'i ma-vuovo momorö'öjuvo vadune aho'obëhe 1,000 barë hesije. A'i naehu gëvode aribövioho i'ovoromo ri'öjë'e raromorumohijo. Jabuhu i'ovoromo ri'öjare hesi bëhoho urimo ri'ö'iröhe majahoje.

<sup>6</sup> Urimo i'ovoromo ri'ö'iröhe aribövioho huë mae jëvo'ë'e. God-are aribövi maho jëvo'ë'e. Urimo vuovëvadoho röhu maho bogo vuovoromo sisëroho va'i a'i God-are o Keriso-are priest muoho vaeromo Keriso'o gemu mae masije vae'iramu vadune aho'obëhe 1,000 barë'ë'e.

*Satan ruahö'öromo vëni ravajire ë bu'ö'iröhe jöhoje.*

<sup>7</sup> Vadune aho'obëhe 1,000 barë'iramu Satan jiovo nugö'ö'iramu höröromo va'ë'e.

<sup>8</sup> Hörö va'oromo Gog sa'are Magog sa'are sa'ae dinö'e dinö'e ae sarerëmibe muorovojöro gagovëvobe va'ë'e. Sarerëmibe gagovëvobe va'iramu ae aho'obëhe muorovo'i gagovo'iramu nie'u va'ëne jio'ë'e.

<sup>9</sup> Nie'u va'ëne jïë'ëro sa'ae bövioho ruë numë tagavoromo God-are aribövie hesi amo börömore riravaruoho muorovëmi'i numëvo'ë'e. Numëvo'iramu vënerö ö'idöre jioromo ruvebiromo ravëvo barë'ë'e.

<sup>10</sup> Ravëvo barë'iramu Satan ë aribövi sarerëmiromo gagovëvade aho babu'ö'iramu vënehu munë ravoromo giosijiomoromo e'u börömo va'ëne jiajire be'abue'ë'e. Urimo mi sisëhu'o hesi sareri'e jö majëhijaje ahu'o ba'amëvego abo rireromo'iröhire ë be'abue'ë'e. Be'abueromo mi sisëho o sareri'e jö majëhijaje aho o Satan ëho jaburo vae majae hara'uemu hara'uobe va'ë'ö.

*Ae aho'obëhe God-are nurire riravego jabesi muoho mae o sisë jiego God-hu ma-ioro'ioremu mevoröhe jöhoje.*

<sup>11</sup> Ehi ë'ë'ö. Röhu gavodeje a masijehu raromarue ëhi jïë'e ajivë'e röho börömore ae gemu hijamu. Hi'ego aehu huruomo va'aruëhi sa'ahu'o ö'idöhu'o ëhi arua anumiae va'ego röhu ijoho bogojiohijo.

<sup>12</sup> Ehi'amu gavodeje vuovëvë'e aribövioho ininore va'o masijore ë röho ma hesi nunire riravamu. Riravo'ego suri surioho jiovo'amohijo. Röhu suri

suri göho ëho maro raromemu raromo'iröhe aribövi jabesi iho jajivo'amë'e suroho jiovohijo. O suri suri ioro'ioroho ëho ae aho'o mu vaebe rovere jöho jajivo'amë'e jiohijo. Ëröho mare hijaje ahuro suri surioho adahohijo ga'i di ahuro mu maho vaejë'e jiego di ahuro mu sisëho vaejë'e jiego. Ëho garomo uëhijo: Mu mae vaejë'e javaje manö va'ëjo. Mu sisë vaejë'e javaje sisënö va'ëjo.

<sup>13</sup> Vuovare aribövi ioro'iorohuro sö jove iromo vuovo momorö'öjë'ëro jië'ëro rojomoromo ioro'iorohuro vuovë'e ariböviehu raromaruire ë jioromo ri'öromo rueruomohijo. Rue'ego röho mare hijaje ahuro ae gemu gemu mevo garomo mu mae vaejadoho o mu sisë vaejadoho manaho ëhi bojami'ego baebe va'ohijo.

<sup>14</sup> Röhu vuovarue vöröhu'o a vuovego bahjarue öri ari'ohu'o ëhu'o ma-ioro'ioremu bu'ö'ego vënehu ravoromo e'u börömo va'ëne jiajire ë abue'ego ijönöho vuovarue öroho bogojiohijo. Röhu vënehu ravoromo e'u börömo va'ëne jiaje hesi bëhoho ae rahu sisë vaejë'ëro vuovoromo ri'öjë'ëro röhu maho vuovoromo ë e'u va'ënire abueröhe jöhoje.

<sup>15</sup> Ae rahu mae raromemu raromo'iröhe surire hesi iho bogojië'oho ëhi jië'e aribövioho ujuoho ruruhö'ö'ego e'u va'ëne vënehu ravajire ë rireromohijo.

## 21

*God-hu ö'idö sa'a bövi bise'o i'o avoho'iröhe jöhoje.*

<sup>1</sup> Ëhi'amu gavodeje ö'idö i'ohu'o sa'a i'ohu'o jiamu ö'idö mamiohu'o sa'a mamiohu'o sisërë barëjë'ëro. Sö jove urimo jiadoho bogojiohijo.

<sup>2</sup> Ëhi garomo gavodeje God-are amo böröme hesi ihoho Jerusalem amo i'e ö'idöre God-hu hijajire jioromo ruvebijamu. Magonahehu masu'irögoro baruohuro gajöro sino avohorovaruëhi ë amo i'oho ëhi avohë'e jiohijo.

<sup>3</sup> Ëhi jiamu gagorovo hejodeje röho mare ma-darugo'o uvavamu: Jöe hehëjo. Avevejö'oho God-are javu maho a ririö jië'ëro huro a'o gemu mae hinövo'ajëjo. Jabumë hesi aribövie jëvo'i huro jabu'o gemu mae hiromo muebejëvonövo'ajëjo jabesi Börömëro jië'ëro.

<sup>4</sup> Muebejëvoromo nuni jovoho miorëho'ajëjo. Ijönöho aho bogo vuovëvo'i bogo nivo'i huë vavaenoho vi'ehoho bogo baeruomo'ajëjo mu mamioho mami'e barëjë'ëro jië'ëro.

<sup>5</sup> Ëhi uvo'ego röho mare hijaje ahuro uvavohijo: Jöe hehëjo. Naro bövie bise'e i'ëremu bamajëjo. I'ëremu bamajë uvonugoromo uehijo: Ëjöhö bogo sareroho jio'i iae jö mae höjo. Ëhuni suroro jajivonëjo.

<sup>6</sup> Ëhi ueromo uehijo: Muoho iae barëjajëjo. Na urimo ni'i'ivevadoho röhu ijo tugohö'ioho ëhi gemuoho jevo'ajëjo. Mue aho'o aevodoho ëhi vae barë'irodoho jevajëjo. Ae rahu huë girihëvë'oho naro sa'a gagore rojomaje jovoho vuoromo suvuore bojëmi'ejöjo ue'ahego i'ovëvo'iröhego.

<sup>7</sup> Ae rahu mu sisë ruahö'öjë'oho aviëhi jië'e huë maho nasi örire bae'a'ajëjo. Na hesi Börömöho God jevo'i hu nasi harihe jio'a'ajëjo.

<sup>8</sup> A'i juhuonivoromo mu vuonugarue aribövioho sareri sareri'e aribövioho mu sisë gö gö vaejarue aribövioho a muo'amarue aribövioho önö'e jijiharue aribövioho iro oso'e vaejarue aribövioho inömo sisë aru'aho'e höromo uvene aho röjahi'amarue aribövioho jö sareri'e atarue aribövioho aho'obëhe ëhi jië'e aribövi jabesi öri ari'oho e'u börömo va'ëne munë vënehu ravoromo giosijiomajire ë jio'a'ajëjo. Ëhesi bëhoho ë aribövioho mami'e vuovëvadoho röhu maho vuovoromo ë va'o raromoruomo'ajëjo.

*Jerusalem amo i'lo hesi jöhoje.*

<sup>9</sup> Röhu urimo anerae 7 ramare vöröho 7 otehö'öjamu evare bövie bise'le ijo tugoho'i sisërë'amadeje. Mami'e ëhi ë'are anerae aho'obëhe 7 röhu gemuëro rueromo uehijo: Rovego na röjahijego Sheep Harihu hesi vaboro i'e masuvajoho gavëjo.

<sup>10</sup> Ëhi uenugoromo God-are Aru'ahohuro nasi simanoho huotoveho'ego ë anerahuro baejevoromo dö mare ajiomoromo dahoru börömo ëgobövire ë ruehijo. Baejevo rueromo röjehijamu gavodeje God-are Amo Böröme hesi ihoho Jerusalem ö'idöre God-hu hijajire jioromo ruvebijamu.

<sup>11</sup> Ëamohuro God-are ajoho baejë'ëro ëhu'ëro ajivohijo. Ajivoromo mamabëhe ajivo barëjë'e jiohijo. Munë mabëhe hesi ihe jasper ajivajëhi ëhi ajivohijo.

<sup>12</sup> Röhu ë amo hesi rejoho ëgo ëgobövi mae jiohijo. Rejo hesi ojoho aho'obëhe 12 jio rova'ohijo. Anerae aho'obëhe 12 oje gemu gemu riravo rova'ohijo. Israel rajo jabesi agane 12 jabesi ihoho gemu gemu ojo ahore jajivo'amo va'ë'e jiohijo.

<sup>13</sup> Maja höröjajinöho oje aho'o niö'i gemu jiohijo. Maja beva'ajinöho oje niö'i gemu jiohijo. Ruënöho niö'i gemu viënöho niö'i gemu ëhi jiohijo.

<sup>14</sup> Ëamo rejo hesi uhuroho munë aho'obëhe 12 ruh'e jïë'ëro ëhu'ëro rejoho bibivoromo namihijo. Ëmunë ruho va'are ahore God-are Sheep Harihu hesi apostle ömo'öme 12 jabesi ihe gemu gemu jajivo'amo va'ë'e jiohijo.

<sup>15</sup> Röhu na'o jö jövaje anerahuro gold-ehu avohare vahu baejaruoho övoro baejë'e jiohijo amo bövi hesi vahuoho o amo rejohu'o ojohu'o ëho jabesi vahuoho bae'iröhëro.

<sup>16</sup> Röhu ë amo börömoho ioni göho ioni göho ruhënöho numënöho vahuvojadoho hesi vahuoho ma-gemuoho jiohijo. Anerahuro gold ahoho bava'oromo amo börömo hesi vahuoho vahuvo garomo gavadeje amo hesi ëgoho 2,400 kilometre jio'i hesi bunohu'o döre ajiomadohu'o jabesi vahuoho gemuoho jiamu.

<sup>17</sup> O anerahuro amo hesi rejo vahuoho vahuvo garomo gavadeje rejo döre ajiomadoho 60 metre jiamu. Jabuhu vahuvo gavaruëhi ëhi gavadeje.

<sup>18</sup> Röhu amo rejoho munë nu ano'o mabëhëro vaejë'e jiohijo. Munë hesi ihoho jasper-je. O amo bövioho ma-gold-ëremu avohë'ëro ma-ajëro jïë'ëro ruënörire öri ari'ohu'o ga'a'anue.

<sup>19</sup> Röhu amo rejo bibivo'iröhëgo rejo uhure bahijare munëho munë mabëhe nu ano'e gö gö avohoromo bahijë'e jiohijo. Munë number 1 hesi ihoho jasper ajivë'e ma-mabëhe jiohijo. Munë number 2 hesi ihoho sapphire nuogu'e ma-mabëhe jiohijo. Munë number 3 hesi ihoho agate mahu guho'e jiohijo. Munë number 4 hesi ihoho emerald rövë'e ijo hano va'ëne jiohijo.

<sup>20</sup> Munë number 5 hesi ihoho onyx hesi nu ano'e gö gö kavuë'e jionövo ajivë'e jionövohijo. Munë number 6 hesi ihoho carnelian kavuë'e jiohijo. Munë number 7 hesi ihoho quartz hövë'e jiohijo. Munë number 8 hesi ihoho beryl ijo hano va'ëne jiohijo. Munë number 9 hesi ihoho topaz hövo avohë'e jiohijo. Munë number 10 hesi ihoho chalcedony rövoromo hövanovë'e jiohijo. Munë number 11 hesi ihoho turquoise nuogu'e jiohijo. Munë number 12 hesi ihoho amethyst rövoromo kavuanovë'e jiohijo. Munë aho'obëhe 12 jabesi nu ano'e gö gö ëhi jio'amohijo.

<sup>21</sup> Röhu rejo oje aho'obëhe 12 jabesi tugoharuoho ëho nienia ha'ose aho'obëhe 12 jiohijo. Oje gemu gemu nienia ha'ose gemu gemu ëhi jiohe

va'ohijo. Röhu amo hesi öri börömoho ma-gold-ëremu avohë'ëro ma-ajëro jië'ëro ruënörire öri ari'ohu'o ga'a'anue.

<sup>22</sup> Röhu gavodeje God rajahjarue javu börömoho bogojiamu. Bada God daruge aho'o baejë'e ahu'o hesi Sheep Harihohu'o ëho jabu bëhi maro jëvë'ego ëhuni bogo osaremuoho rajëhi'i dinö'e dinö'e God'o hesi Sheep Harihohu'o ë rajëhiruomohijo.

<sup>23</sup> O bëhoho rabëni majahu'o manaerohu'o ë amoroho bamoromo ajivojoro. God-are ajohuro amoho ajivoromo God-are Sheep Harihohuro iro va'ëne amoho ajivajeje.

<sup>24</sup> Ajivo'iramu sa'ae dinö'e dinö'e raromarue aribövioho ë amo hesi ajire jijihonövo'ë'ö. Sa'are masije riravarue ariböviohuro jabesi bövie bise'e nu ano'o mabëhe gavaruoho ë amore ujuoho rue'ë'ö.

<sup>25</sup> Ëamoroho vahioho bogojio'ë'e. Majae vahie bogojio'i ma-majae jiemu jio'iramu amo rejo ojoho bogo tugohonövo jiovonövo'i ma-ëhi jiovo nugo'ë'ö.

<sup>26</sup> Sa'ae dinö'e dinö'e raromarue ariböviohuro jabesi mu maho inömo maho ë amore ujuoho rueruomo'ë'e.

<sup>27</sup> Va'inumi'e muoho bogo mae bogo barueruomo'ë'e. Mu sisë gö gö vaejarue aribövioho o sareri'e jö atarue aribövioho bogo ë amoroho rueruomo'i a'i mae raromemu raromo'iröhe aribövi jabesi iho Sheep Harihu hesi surire jajivo'amade ë ariböviohuremu ë amoroho rueruomo'ë'e.

## 22

<sup>1</sup> Ëhi'amu iae ë anerahuro röjehijamu gavodeje a i'ovëvoröhe jovoho ajivo barëjë'e rova'amu. Jovoho God'o hesi Sheep Harihohu'o jabuhu arijarue röho mare jioromo ruehijo.

<sup>2</sup> Röho mare jioromo rueromo amore öri börömo hesi ririre rova'ohijo. Jovoho ririre rova'i a i'ovëvo'iröhe ijoho ionire ionire riravobe va'ohijo. Vadune gemu gemu röhu vae 12 12 bajoho ëhi raejajeje manaere gemu gemu. Ëijo hano hesi bëhoho sa'ae dinö'e dinö'e raromarue aribövi marëjëvo'iröhoho jiohijo.

<sup>3</sup> A'i God-hu bijönimaje bövioho bise'oho ijonöho ë dirö'oho bogojio'ë'e. God'o hesi Sheep Harihohu'o jabuhu masijo vaeromo arijarue röho maho ë jio'ë'e. God-are mu vaejarue ariböviohuro hu ë rajahinövo'ë'ö.

<sup>4</sup> Rajahiromo hesi nu ano'oho ganövo'ë'ö. Hesi ihoho jabesi varijore jajivo'amë'e jio'ë'e.

<sup>5</sup> Röhu vahioho ijonöho bogojio'ë'e. Iro hesi ajohu'o maja hesi ajohu'o ajivëvo'iröhe bëhoho bogojio'ë'e. A'i Bada God-are ajohuro ajivëvonövo'ë'e. Ajivëvo'iramu jabumëro ioro'ioremu masije riravoromo öri ari'oho muebebe va'oruomo'ë'e.

### *Iesu rueröhe jöhoje.*

<sup>6</sup> Röhu ë anerahuro uehijo: Ave jöe aho'o hejanuoho iae mae-ëjo. Bogo sareroho höjo. Bada God hesi Aru'aho a jabesi simanore bamëhego ae jö majëhjarue aho God-ro hesi aneraho na remö'öjade höjo naro rueromo röjehijego hesi mu vaejaruje ariböviohuro garomo uvo'irarijego: God-ro nimo'ego majae ijonöho ëhi ëhi jië'e muohuro nosi örire rue'ie'ajëjo. Ëhi uehijo.

<sup>7</sup> Röhu Iesuro uve: Jöe hehëjo. Na ma-burëro ö'ie'ajëjo. God-are jö börömoho ave surire jajivë'e höjo. Ëhuni ae rahu ejë'oho huë mabëhe jioruomo'ajëjo. Ëhi uve.

<sup>8</sup> Röhu naehu jajivode jö hesi muoho aho'obêhe John naro heromo gavê'e jeve. Heromo ganugoromo ë mu röjehijade aneraho naro uvene aho röjahi'irögoro hesi höru'ere ague aho hijodeje.

<sup>9</sup> Èhi'o'ego uehijo: Bogave èhioho è'iranëjo. Jaehu God-are mu vaejanue èhi jië'e muoho vaejaje ae gemuoho jevajëjo. O jasi ö mueno'ohu'o jö God-aro baeromo majëhijaruoho o jaehu jajivanue surire jö ejaho'iröhe aribövioho jabuhu God-are mu vaejaruëhi na'o èhi è'aje ae gemuoho jevajëjo. Èhuni nadi na rajehi'i God gemu rajahijëjo.

<sup>10</sup> Èhi uenugoromo uehijo: Ijonö jioröhe mu hesi jö ave suri surire jajivanuoho nadi subivëhonëjo ë hesi majaho dunovë'e jiaje.

<sup>11</sup> Ae rahu mu sisë vaejaruoho èhi vaemu vaebe va'oruomo'ajëjo. Ae rahu va'inumile mu uehorovaruoho èhi uehorovemu uehorovobe va'oruomo'ajëjo. Ae rahu mu ma vaejaruoho èhi vaemu vaebe va'oruomo'ajëjo. Ae rahu God gemu uehorovaruoho èhi uehorovemu uehorovobe va'oruomo'ajëjo.

<sup>12</sup> Röhu Iesuro uve: Jöe hehëjo. Na ma-burëro ö'ië'ajëjo. Jemesi mu hesi suvuoroho ujuohoromo ö'ejöjo mu diehi diehi mae o bisemu sisë'i sisë'i vaejarijëhi ae gö gö suvuoroho èhi bövie o bise'e bojëmi'irodëni.

<sup>13</sup> Na urimo ni'l'ivevadoho röhu ijo tugoho'ioho èhi gemuoho jevo'ajëjo. Na aevo'i jevadoho röhu ijonö jevo'ajëjo. Mue aho'o aevodoho èhi vae barë'irodoho jevajëjo.

<sup>14</sup> Ae rahu niögu u'o'amaruoho huë mabêhe jioruomajëjo. Èhi jië'e aribövioho naro uë'iramu a i'ovëvo'iröhe ijo hesi bajoho iromo amo rejo hesi ojoho ruahoromo amo börömore rueruomo'ajëjo.

<sup>15</sup> A'i mu sisë gö gö vaejarue aribövioho iro oso'e vaejarue aribövioho önö'e jijiharue aribövioho a muo'amarue aribövioho inömo sisë aru'aho'e höromo uvene aho röjahi'amarue aribövioho sareri'e mu nimoromo vaejarue aribövioho èhi jië'e aribövioho ave amoroho bogo rueruomoli marori'o jioruomo'ajëjo.

<sup>16</sup> Iesu naro nasi aneraho nugö'öjë'e jevajëjo ë jöho huruoho majëhijego ekaresiae gö gö he'irarijego. Na a böröme David-are ujoho jevajëjo. Sisonuvego ajivaje mujöroho va'ëne jevajëjo. Iesuro èhi uve.

<sup>17</sup> Röhu God-are Aru'ahohu'o Sheep Harihehu i'e masuvade magonahohu'o jaburo niö'iro uvö: Ruehëjo. O ave jö he'irarije aribövioho jemë'o uvore: Ruehëjo. O ae rahu huë girihëvë'oho jemëro ruehe. Nimë'oho rueromo a i'ovëvo'iröhe jovoho ma-ire. Manaho bogojio'ë'e.

### *Ijo tugoho'i jöhoje.*

<sup>18</sup> Röhu John naro God-are jö börömoho ave surire jajivë'e jeve. Èhuni naehu jajivode jö he'irarije ariböviohumë ave jö majëhi'ië'ajoho avoho here. Naehu jajivode jöho ae rahu gö'o döre ëma jajivë'oho ave surire jajivode i'uoho God-ro ë aho bojami'ë'e.

<sup>19</sup> O ae rahu uvë'oho: John-hu jajivade jö ë hesi vituoho sisë höromo dodure bu'öjë'oho God-ro uvo'ë'e: Èhi jië'e aho sisë höromo dodure bu'ö'ë'e. Dodure bu'ö'iramu ave surire jajivode a i'ovëvo'iröhe ijo bajoho bogo i'ë'e. O ave surire jajivode God-are amo börömoroho bogo va'ë'e.

<sup>20</sup> John naehu jajivode jö mae hö uvaje Ahuro uve: Iae na ma-burëro ö'ië'ajëjo. Bada Iesu iae mae uvanue. De je rove.

<sup>21</sup> Bada Iesuro jemë aho'o huë baeromo ajëminövo'ë'e. Ahia mino'e.



## Read the New Testament daily

### *January*

date	Scripture
1	Matthew 1:1-2:12
2	Matthew 2:13-3:6
3	Matthew 3:7-4:11
4	Matthew 4:12-25
5	Matthew 5:1-26
6	Matthew 5:27-48
7	Matthew 6:1-24
8	Matthew 6:25-7:14
9	Matthew 7:15-29
10	Matthew 8:1-17
11	Matthew 8:18-34
12	Matthew 9:1-17
13	Matthew 9:18-38
14	Matthew 10:1-23
15	Matthew 10:24-11:6
16	Matthew 11:7-30
17	Matthew 12:1-21
18	Matthew 12:22-45
19	Matthew 12:46-13:23
20	Matthew 13:24-46
21	Matthew 13:47-14:12
22	Matthew 14:13-36
23	Matthew 15:1-28
24	Matthew 15:29-16:12
25	Matthew 16:13-17:9
26	Matthew 17:10-27
27	Matthew 18:1-22
28	Matthew 18:23-19:12
29	Matthew 19:13-30
30	Matthew 20:1-28
31	Matthew 20:29-21:22

### *February*

date	Scripture
1	Matthew 21:23-46
2	Matthew 22:1-33
3	Matthew 22:34-23:12
4	Matthew 23:13-39
5	Matthew 24:1-28
6	Matthew 24:29-51
7	Matthew 25:1-30
8	Matthew 25:31-26:13
9	Matthew 26:14-46
10	Matthew 26:47-68
11	Matthew 26:69-27:14
12	Matthew 27:15-31
13	Matthew 27:32-66
14	Matthew 28:1-20
15	Mark 1:1-28
16	Mark 1:29-2:12
17	Mark 2:13-3:6
18	Mark 3:7-30
19	Mark 3:31-4:25
20	Mark 4:26-5:20
21	Mark 5:21-43
22	Mark 6:1-29
23	Mark 6:30-56
24	Mark 7:1-23
25	Mark 7:24-8:10
26	Mark 8:11-9:1
27	Mark 9:2-29
28	Mark 9:30-10:12

date	Scripture
1	Mark 10:13-31
2	Mark 10:32-52
3	Mark 11:1-26
4	Mark 11:27-12:17
5	Mark 12:18-37
6	Mark 12:38-13:13
7	Mark 13:14-37
8	Mark 14:1-21
9	Mark 14:22-52
10	Mark 14:53-72
11	Mark 15:1-47
12	Mark 16:1-20
13	Luke 1:1-25
14	Luke 1:26-56
15	Luke 1:57-80
16	Luke 2:1-35
17	Luke 2:36-52
18	Luke 3:1-22
19	Luke 3:23-38
20	Luke 4:1-30
21	Luke 4:31-5:11
22	Luke 5:12-28
23	Luke 5:29-6:11
24	Luke 6:12-38
25	Luke 6:39-7:10
26	Luke 7:11-35
27	Luke 7:36-8:3
28	Luke 8:4-21
29	Luke 8:22-39
30	Luke 8:40-9:6
31	Luke 9:7-27

date	Scripture
1	Luke 9:28-50
2	Luke 9:51-10:12
3	Luke 10:13-37
4	Luke 10:38-11:13
5	Luke 11:14-36
6	Luke 11:37-12:7
7	Luke 12:8-34
8	Luke 12:35-59
9	Luke 13:1-21
10	Luke 13:22-14:6
11	Luke 14:7-35
12	Luke 15:1-32
13	Luke 16:1-18
14	Luke 16:19-17:10
15	Luke 17:11-37
16	Luke 18:1-17
17	Luke 18:18-43
18	Luke 19:1-27
19	Luke 19:28-48
20	Luke 20:1-26
21	Luke 20:27-47
22	Luke 21:1-28
23	Luke 21:29-22:13
24	Luke 22:14-34
25	Luke 22:35-53
26	Luke 22:54-23:12
27	Luke 23:13-43
28	Luke 23:44-24:12
29	Luke 24:13-53
30	John 1:1-28

date	Scripture
1	John 1:29-51
2	John 2:1-25
3	John 3:1-21
4	John 3:22-4:3
5	John 4:4-42
6	John 4:43-54
7	John 5:1-23
8	John 5:24-47
9	John 6:1-21
10	John 6:22-40
11	John 6:41-71
12	John 7:1-29
13	John 7:30-52
14	John 7:53-8:20
15	John 8:21-30
16	John 8:31-59
17	John 9:1-41
18	John 10:1-21
19	John 10:22-42
20	John 11:1-53
21	John 11:54-12:19
22	John 12:20-50
23	John 13:1-30
24	John 13:31-14:14
25	John 14:15-31
26	John 15:1-27
27	John 16:1-33
28	John 17:1-26
29	John 18:1-24
30	John 18:25-19:22
31	John 19:23-42

date	Scripture
1	John 20:1-31
2	John 21:1-25
3	Acts 1:1-26
4	Acts 2:1-47
5	Acts 3:1-26
6	Acts 4:1-37
7	Acts 5:1-42
8	Acts 6:1-15
9	Acts 7:1-29
10	Acts 7:30-50
11	Acts 7:51-8:13
12	Acts 8:14-40
13	Acts 9:1-25
14	Acts 9:26-43
15	Acts 10:1-33
16	Acts 10:34-48
17	Acts 11:1-30
18	Acts 12:1-23
19	Acts 12:24-13:12
20	Acts 13:13-41
21	Acts 13:42-14:7
22	Acts 14:8-28
23	Acts 15:1-35
24	Acts 15:36-16:15
25	Acts 16:16-40
26	Acts 17:1-34
27	Acts 18:1-21
28	Acts 18:22-19:12
29	Acts 19:13-41
30	Acts 20:1-38

date	Scripture
1	Acts 21:1-16
2	Acts 21:17-36
3	Acts 21:37-22:16
4	Acts 22:17-23:10
5	Acts 23:11-35
6	Acts 24:1-27
7	Acts 25:1-27
8	Acts 26:1-32
9	Acts 27:1-20
10	Acts 27:21-44
11	Acts 28:1-31
12	Romans 1:1-17
13	Romans 1:18-32
14	Romans 2:1-24
15	Romans 2:25-3:8
16	Romans 3:9-31
17	Romans 4:1-12
18	Romans 4:13-5:5
19	Romans 5:6-21
20	Romans 6:1-23
21	Romans 7:1-14
22	Romans 7:15-8:6
23	Romans 8:7-21
24	Romans 8:22-39
25	Romans 9:1-21
26	Romans 9:22-10:13
27	Romans 10:14-11:12
28	Romans 11:13-36
29	Romans 12:1-21
30	Romans 13:1-14
31	Romans 14:1-23

date	Scripture
1	Romans 15:1-21
2	Romans 15:22-16:7
3	Romans 16:8-27
4	1 Corinthians 1:1-17
5	1 Corinthians 1:18-2:5
6	1 Corinthians 2:6-3:4
7	1 Corinthians 3:5-23
8	1 Corinthians 4:1-21
9	1 Corinthians 5:1-13
10	1 Corinthians 6:1-20
11	1 Corinthians 7:1-24
12	1 Corinthians 7:25-40
13	1 Corinthians 8:1-13
14	1 Corinthians 9:1-18
15	1 Corinthians 9:19-10:13
16	1 Corinthians 10:14-11:1
17	1 Corinthians 11:2-16
18	1 Corinthians 11:17-34
19	1 Corinthians 12:1-26
20	1 Corinthians 12:27-13:13
21	1 Corinthians 14:1-17
22	1 Corinthians 14:18-40
23	1 Corinthians 15:1-28
24	1 Corinthians 15:29-58
25	1 Corinthians 16:1-24
26	2 Corinthians 1:1-11
27	2 Corinthians 1:12-2:11
28	2 Corinthians 2:12-17
29	2 Corinthians 3:1-18
30	2 Corinthians 4:1-12
31	2 Corinthians 4:13-5:10



date	Scripture
1	2 Corinthians 5:11-21
2	2 Corinthians 6:1-13
3	2 Corinthians 6:14-7:7
4	2 Corinthians 7:8-16
5	2 Corinthians 8:1-15
6	2 Corinthians 8:16-24
7	2 Corinthians 9:1-15
8	2 Corinthians 10:1-18
9	2 Corinthians 11:1-15
10	2 Corinthians 11:16-33
11	2 Corinthians 12:1-10
12	2 Corinthians 12:11-21
13	2 Corinthians 13:1-14
14	Galatians 1:1-24
15	Galatians 2:1-16
16	Galatians 2:17-3:9
17	Galatians 3:10-22
18	Galatians 3:23-4:20
19	Galatians 4:21-5:12
20	Galatians 5:13-26
21	Galatians 6:1-18
22	Ephesians 1:1-23
23	Ephesians 2:1-22
24	Ephesians 3:1-21
25	Ephesians 4:1-16
26	Ephesians 4:17-5:2
27	Ephesians 5:3-33
28	Ephesians 6:1-24
29	Philippians 1:1-26
30	Philippians 1:27-2:18

date	Scripture
1	Philippians 2:19-3:6
2	Philippians 3:7-4:1
3	Philippians 4:2-23
4	Colossians 1:1-20
5	Colossians 1:21-2:7
6	Colossians 2:8-23
7	Colossians 3:1-17
8	Colossians 3:18-4:18
9	1 Thessalonians 1:1-2:9
10	1 Thessalonians 2:10-3:13
11	1 Thessalonians 4:1-5:3
12	1 Thessalonians 5:4-28
13	2 Thessalonians 1:1-12
14	2 Thessalonians 2:1-17
15	2 Thessalonians 3:1-18
16	1 Timothy 1:1-20
17	1 Timothy 2:1-15
18	1 Timothy 3:1-16
19	1 Timothy 4:1-16
20	1 Timothy 5:1-25
21	1 Timothy 6:1-21
22	2 Timothy 1:1-18
23	2 Timothy 2:1-21
24	2 Timothy 2:22-3:17
25	2 Timothy 4:1-22
26	Titus 1:1-16
27	Titus 2:1-14
28	Titus 2:15-3:15
29	Philemon 1:1-25
30	Hebrews 1:1-14
31	Hebrews 2:1-18

date	Scripture
1	Hebrews 3:1-19
2	Hebrews 4:1-13
3	Hebrews 4:14-5:14
4	Hebrews 6:1-20
5	Hebrews 7:1-19
6	Hebrews 7:20-28
7	Hebrews 8:1-13
8	Hebrews 9:1-10
9	Hebrews 9:11-28
10	Hebrews 10:1-18
11	Hebrews 10:19-39
12	Hebrews 11:1-16
13	Hebrews 11:17-31
14	Hebrews 11:32-12:13
15	Hebrews 12:14-29
16	Hebrews 13:1-25
17	James 1:1-18
18	James 1:19-2:17
19	James 2:18-3:18
20	James 4:1-17
21	James 5:1-20
22	1 Peter 1:1-12
23	1 Peter 1:13-2:10
24	1 Peter 2:11-3:7
25	1 Peter 3:8-4:6
26	1 Peter 4:7-5:14
27	2 Peter 1:1-21
28	2 Peter 2:1-22
29	2 Peter 3:1-18
30	1 John 1:1-10

date	Scripture
1	1 John 2:1-17
2	1 John 2:18-3:2
3	1 John 3:3-24
4	1 John 4:1-21
5	1 John 5:1-21
6	2 John 1:1-13
7	3 John 1:1-14
8	Jude 1:1-25
9	Revelation 1:1-20
10	Revelation 2:1-17
11	Revelation 2:18-3:6
12	Revelation 3:7-22
13	Revelation 4:1-11
14	Revelation 5:1-14
15	Revelation 6:1-17
16	Revelation 7:1-17
17	Revelation 8:1-13
18	Revelation 9:1-21
19	Revelation 10:1-11
20	Revelation 11:1-19
21	Revelation 12:1-18
22	Revelation 13:1-18
23	Revelation 14:1-20
24	Revelation 15:1-8
25	Revelation 16:1-21
26	Revelation 17:1-18
27	Revelation 18:1-24
28	Revelation 19:1-21
29	Revelation 20:1-15
30	Revelation 21:1-27
31	Revelation 22:1-21